


Eta Táurinaquene máechajiruvahi ema Viya eta
viyehe, ticajare puito Eta Nuevo Testamento



New Testament in Ignaciano (BL:ign:Ignaciano)

Eta Táurinaquene máechajiruvahi ema Viya eta viyehe, ticajare puito Eta Nuevo Testamento New Testament in Ignaciano (BL:ign:Ignaciano)

copyright © 2012 Wycliffe Bible Translators, Inc.

Language: Ignaciano

Translation by: Wycliffe Bible Translators, Inc.

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ignaciano

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source files dated 29 Jan 2022
332465cd-916c-5bfc-8721-b0114be92360

Contents

San Mateo	1
San Marcos	80
San Lucas	131
San Juan	216
Hechos	275
Romanos	349
1 Corintios	380
2 Corintios	412
Gálatas	431
Efesios	443
Filipenses	454
Colosenses	461
1 Tesalonicenses	469
2 Tesalonicenses	475
1 Timoteo	479
2 Timoteo	488
Tito	494
Filemón	498
Hebreos	500
Santiago	524
1 Pedro	532
2 Pedro	541
1 Juan	547
2 Juan	555
3 Juan	557
Judas	559
Apocalipsis	562

Ena Apóstole Mateo májuequenehahi eta máichararacavahi ena Jesucristo, ticaijare puiti eta EANGELIO SEGÚN SAN MATEO

Ena achaneana máchucáequeneanaini ena Jesús eta acane (Lc 3.23-38)

¹ Nuvaraha numetacaheya mayehe ena Jesucristo. Éma, vijaneanahi israelítahi, taicha eta mámariéquenerahi ena viáchucaini Abraham. Énerichuware, ena Jesús rey-yarehi taicha eta mámariéquenerahi ena víyarahaini rey David. Eta juca eta nalista ena máchucáequeneanaini ena Jesús.

² Ena víyarahaini Abraham, macachichapa ena Isaac. Ena Isaac macachichapa ena Jacob. Ena Jacob macachichapa ena Judá énapa ena apamuriana maparapenaveana. ³ Ena Judá macachichapa ena Fares émapa ena Zara. (Esu naena ticaijaru Tamar.) Ena Fares macachichapa ena Esrom. Ena Esrom macachichapa ena Aram. ⁴ Ena Aram macachichapa ena Aminadab. Ena Aminadab macachichapa ena Naasón. Ena Naasón macachichapa ena Salmón. ⁵ Ena Salmón macachichapa ena Booz. (Esu maena ticaijaru Rahab.) Ena Booz macachichapa ena Obed. (Esu maena ticaijaru Rut.) Ena Obed macachichapa ena Isaf. ⁶ Ena Isaf macachichapa ena rey David. Ena rey David macachichapa ena Salomón. (Esu máenaini ticaijaru Betseba, esu mayenainihi ena Urías.) ⁷ Ena Salomón macachichapa ena Roboam. Ena Roboam macachichapa ena Abías. Ena Abías macachichapa ena Asa. ⁸ Ena Asa macachichapa ena Josafat. Ena Josafat macachichapa ena Joram. Ena Joram macachichapa ena Uzías. ⁹ Ena Uzías macachichapa ena Jotam. Ena Jotam macachichapa ena Acáz. Ena Acáz macachichapa ena Ezequías. ¹⁰ Ena Ezequías macachichapa ena Manasés. Ena Manasés macachichapa ena Amón. Ena Amón macachichapa ena Josías. ¹¹ Ena Josías macachichapa ena Jeconías énapa ena maparapenaveana, ena nacarataruanahi námaqueneanahi ena apavasana ticavasannahi te Babilonia.

¹² Te táequenepa eta juca, ena Jeconías macachichapa ena Salatiel. Ena Salatiel macachichapa ena Zorobabel. ¹³ Ena Zorobabel macachichapa ena Abiud. Ena Abiud macachichapa ena Eliaquim. Ena Eliaquim macachichapa ena Azor. ¹⁴ Ena Azor macachichapa ena Sadoc. Ena Sadoc macachichapa ena Aquim. Ena Aquim macachichapa ena Eliud. ¹⁵ Ena Eliud macachichapa ena Eleazar. Ena Eleazar macachichapa ena Matán. Ena Matán macachichapa ena Jacob. ¹⁶ Ena Jacob macachichapa ena José, ena suímahi esu María, máenahi ena Jesús, ena ticaijare Cristo, ena vicuchapaquenehi.

¹⁷ Tacahe, catorcemuriana ena mámariéquéqueneanainihi ena Abraham. Ena rey David, émapa náichecuinehi eta natupa. Tacahe, ena rey David, catorcemurianavare ena mámariéqueneanainihi. Ena nacarataruanahi námaqueneanahi ena apavasana te Babilonia, énapa náichecuinehi eta natupa. Ena Jeconías, catorcemuriana ena mámariéqueneanainihi. Ena Jesucristo, émapa náichecuinehi eta natupa.

*Eta máuchusira ema Jesús**(Lc 2.1-7)*

¹⁸ Aní tacahehi eta máuchusirahi ema Jesucristo. Esu maena María, tráuripahi eta suítauchirayarehi ema José. Vuíchahasera nacachanecacahini. Ticajaripahisera ésu, mávajúechirahi ema Espíritu Santo. ¹⁹ Ema José, tétavicavahi eta máuriva. Eta tacahe, vahi tisemaimahi. Váhivare mavarahahini máimicatsiriachahini esu María. Mavarahahisera macaepaha eta matratune suyehe ésu. Váhisera mávarahahini náechahini ena achaneana eta tacayemaquenehi. ²⁰ Ema Viya máimararacahi eta mapanereruhi. Eta tacahe, tiúcupaica pa ema ángele mametapanahi te mavapure ema José. Ánipa máicha*:

—Tata José, tímitecanuhi numetapanavi eta juca: Vahi picueñamava eta pítauchirayare esu María. Tájina píchavaimahi. Taicha ticajaripahi ésu, mávajúechirahi ema Espíritu Santo. ²¹ Tacahe, te máuchucapa ema suchichayare, enacayare eta máijareyare JESÚS. Éma ticatiuchayare ena achaneana tayehe eta naviurevanayarehini taicha eta napecaturana —máichapa ema ángele.

²² (Títauchavapahi tamutu eta juca máechajiriruvanahi ema Viya mayehe ema víarahaini profeta Isaías. ²³ Aní tacahehi: “Sutiarihiyare esu amaperu esena témunahiricavaya ticajari. Ema suchichayare, yátupiqueneyare eta émaira Viya, tiúcupauchahaviyare ticatiuchahavipanayare” tacahepa.)

²⁴ Tacahe, te téjamiuchavapa ema José eta macavapureirahi, ichaperinehi eta masuapirahi eta máechajiriruvanahi ema ángele mavaneruhi ema Viya, eta máitáuchirayarehi esu María. ²⁵ Váhisera náneacacahini te jena cájeanahi eta sucajarirahi. Tacahe, suínacapa ema suárachichahi. Nanacapa eta máijarehi JESÚS.

2*Náejirapana ema amuya ena reye mágoana*

¹ Eta máuchusinehi ema Jesús te avasare ticaijare Belén tayehe eta departamento Judea. Te jena año, ema Aluresi ema tayehehi rey eta Judea. Tásiha, títecapanapa te Jerusalén ena reye mágoana tíasihanahi te tayerehiquene avasare tinapaica te táuchusine eta sache. ² Nacayasesererpupahi, ánipa nacahe:

—Víti, tímitecavahi eta vitanusirahi ema amuya máuchurehi rey-yarehi eyehe eti israelítana. Taicha vímahahi eta arairu jarairiqui, vétetearuhi máicutiarahi ema Viya eta máuchusinehi ema amuya rey-yare. Titupihapa eta te juca eyehe. Puiti vivarahahi véjirapanayare éma. ¿Távihapuca mávihahi ema amuya? —nacahepa.

³ Te masamairiricapa ema Aluresi, ichaperinehi eta mapaneréqueneháirahi. Vaipa máurisamurehíni. Ena achaneana te tajuhe eta avasare, énerichuvare napaneréquenehahi éna apanavare eta juca téchacarehi. ⁴ Tacahe, ema Aluresi máimichuhavacapa namutu ena tuparairucana énapa ena títuruequenehana eta Sagrada Escritura. Mayaserecavacapa:

—¿Távihapuca máuchusihayarehi ema vicuchapaquenehi ticaijareyare Cristo? —macahepa.

* **1:20** Ema ángele, eta máechajisirahi ema José, manacahi eta nayeherepi náechajisira ena israelítana. Aní macahehi: “Piti José, machicha ema David”.

⁵ Éna najicapapa:

—Te Belén te tachacaya eta juca viávasa Jerusalén. Taicha tacahehi eta májurehi ema víarahaini profetaini Isaiás. Máechajicahi éma eta avasare tímícutijiricavahi eta achanénahini. Ánipa macahe: ⁶ “Piti avasare Belén, tachichavihi eta Judea, picunachacarepánayare píti. Taicha eta máuchusi-hayarehi piyehe ema ichapequeneyarehi eta maháquenucávayare. Éma, téchapajirimurihayare namutu ena vijaneanana israelítana”.

⁷ Tacahe, te masamapa ema Aluresi, máichuhavacapa ena mágoana. Mañajichamuripa, taicha mavaraha máechaya tájamuhupuca te tépanavainapa náimahapa eta jarairiqui. ⁸ Te máechapa, mavanecavacapa éna te Belén. Máichapa:

—Eyana etanuca ema amuya te Belén. Te étupiacapuca, echava emetacanyuare, apaesa nuyana núti apanavare néjirapanayare —máichavacapa.

⁹ Tacahe, ena mágoana, eta nasamirahi, tiyananavarepa. Tásiha, náimahavarepa eta jarairiqui náehirupahi. Tiyanapa te namirahu. Étapa te Belén eta tatupihaiyahi, te táinahu eta mávihahi ema amuya. ¹⁰ Tétavicava eta náurisamurevahi ena mágoana eta náimairahi eta tatupihairaripa. ¹¹ Títecapánavanepa eta te peti mávihahi ema amuya. Náimahapa éma, ésupa esu maena María. Tásiha, tépuyucanapa natsiucapa ema amuya. Navecuhapa eta námavahuanapahi. Nájaracasichapa eta oro, eta incienso étapa eta táijiyequene perfume. ¹² Te táequenepa eta náejirairahi ema amuya, tichavanayarepa te návasa. Apanapasera eta achene eta nayanirahapahi, taicha ticame-tacasianapa te navapure vaipa nacuetavajica te mávihahi ema Aluresi.

Ena José ésupa esu María náimijunapa ema amuya te Egipto

¹³ Tacahe, te táequenepa eta nayanirahi ena mágoana, tiúcupaicapa ema émana ángele mavaneruhi ema Viya, mametapanayarehi ema José te mavapure. Ánipa máicha:

—Péhepuca, José. Piyana piáma ema amuya ésupa esu María tayehe eta Egipto. Pinasiyare ánaqui. Tiámainucava te numetacavivare eta pichavirainapa, taicha ema Aluresi títecayare matanucayare ema amuya, mavarairahi macapacayare —máichapa ema ángele.

¹⁴ Tacahasera ema José téhepucapa. Tétupirícavanavanepa te jena yati. Tiyananapa námapa ema amuya tayehe eta Egipto. ¹⁵ Nanasipa ánaqui. Tiámainucava te tépenapa ema Aluresi, ticavanahianavarepa mayehe ema ángele eta nachavirayare. Tamutu eta juca títauchavahi eta juca mametarapi ema Viya eta te Sagrada Escritura, ani macahehi: “Te Egipto nímijunaiyahi ema nuchicha. Te táequenepa, níchuhayarepa éma”.

Ena Aluresi máimicapapajicapa ena amuyanaini te avasare Belén

¹⁶ Tacahe, ema Aluresi te masamairiricapa eta nánucuiraripa ena mágoana, tise marinehi eta navayuasirahi. Máimivanerecapa nacapapajicapana namutu ena amuyana ajairana tiávihanahi te Belén énapa ena tiávihanahi te tachacayahana, ena ticayehearipa apina año énapa ena náuchusirávana. Máepanaequenehapa eta táuchusihahi eta jarairiqui náimahaquenehi ena mágoana. ¹⁷ Tacahe, te Belén eta tátauchiravahi eta májuchaquenehi ema

víyarahaini profetaini Jeremías. Ani tacahehi: ¹⁸ “Tétavicavahi eta najapanuiravahi ena esenana. Ichape eta náiyairahi taicha ena suntaruana nacapapajisirahi ena nachichanaveana. Nájina naratahahini nacamatinaahini taicha eta najapanuiravahi ichape” tacahepa.

¹⁹ Tacahe, te jácani año te táequenepa eta máepenirahi ema Aluresi, tiápechavavarepa ema ángele máechajicahi ema José te mavapure ánaqui te Egipto. Ánipa maicha:

²⁰ —Péhepuca, José. Piveha ema amuya ésupa esu maena. Piyana pichava te piávasa Israel taicha vaipa táenamavacare. Tépenaipahi ema tipanereuchainihi ticapacayarehini ema amuya —máichapa ema ángele.

²¹ Jéhese, ema José téhepuca. Tétupiricavapa, ésupa esu maena ema amuya. Tiyananapa tichavanahi tayehe eta návasa. ²² Tacahe, eta napaisirapahi eta nachavirapa tayehe eta návasa, masamairiricapa ema José eta maviravaipahi aquenuca ema Arquelao, machicha ema Aluresini. Tipicapa ema José machavahini tayehe eta Belén. Tásiha, ema ángele mápechavarepa máechajicahi te mavapure eta matupiruirayarepa te Nazaret te tinapaica Galilea. ²³ Te titecananapa, ánaqui étapa náejasihahi. Tacahehi eta táitauhiravahi eta táechajirivanahi eta Sagrada Escritura nájureanahi ena profetanaini eta macaijarerayarehi Nazareno ema Jesús.

3

Ema Juan Tícachasiricarahi tépanavapa ticametarairu eta máechajiriva ema Viya nayehe ena vámahicuruhana
(*Mt 1.1-8; Lc 3.1-9, 15-17; Jn 1.19-28*)

¹ Tacahe, te jácani treinta áño, matiarihivare ema achane ticaijare Juan. Éma, máichuhaquenehi ema Viya eta macametarairuirayare, máetupiricavacayare ena achaneana. Tacahe, masupahi eta matuparahahi. Tiyanapa vámahicuruhapa. Váipa avasarecuruhainahini. Ticametarairupaipa nayehe ena macutiqueneanahi vámahicuruhana, ticavasanahi te tachausti eta Jordán te tinapaicahi eta Judea. ² Ánipa macahehi eta máimituresirahi:

—Ítsivacha eta epanereruana. Éneuchava mayehe ema Viya, taicha márapiainapa ema aquenucayare mavaneruhi ema Viya —máichavacapa.

³ Ánaquiaparipahi eta áñoana acane, ema Viya mametacapa ema víyarahaini profeta Isaías eta mapanereruhi, eta mavanesirayare ema Machicha te juca apaquehe, ticaturahiyarehi eta tímitecayarehi. Énerichuvare matiarihiyareva ema apana achane máichuhaquenearehi ema Viya. Macametarairuyarehi, máetupiricavacayare ena achaneana, náinajisirayarehi eta napanereruana tamauriqueneana, apaesa táuri eta najacapirayare ema Machicha ema Viya. Émaripa ema Juan, ema máechajisihaquenehi ema Viya, máetupiricavacayare ena achaneana. ⁴ Ema Juan, vanairucahi me Viya, profetahi éma. Eta mamuirihahi eta náitsameru tajiyaha eta náitátiquene ticaijare camello. Eta máitijuhe, vácapi jayumepi. Eta maniriji manicasare eta tsacara. Eta matítivera ema mápama. ⁵ Tiyananavare nacapayaca ena achaneana ticavasana te Jerusalén, navarairahi nasamararaca eta máechajisihaquene; énapa ena ticavasana te Judea, énapa ena tiávihanahi tayehe eta cajacure Jordán. ⁶ Tacahe, eta nametauresiravaipa, navarairahivare náinajica eta napecaturana, ema Juan máicachasicavacapaipa te cajacure Jordán.

⁷Énaripa ena fariséoana énapa ena saducéoana nayanauchahivare ema Juan. Vahi náeneuchavahini, navarahahisera ticaicachasiana. Tacahe, ema Juan máichavacapa:

—¿Tájaha tacayema eta epauchiranuhi, eti tachichanaveanatataji eta quichare? Esamairirahipuca eta járajapairayarepa eta táifehiqueneyare ecuñaraqui. Evarahahipuca iúchucuhayare. ⁸Tiuri puiti, te evarahapuca eta iúchucuha, yátupina tátupiruva eta epanereruana. Ímrecava eta ínajisiraya eta epecaturana. ⁹Váhivare ecucajamurava eta mámariequenehárahahi ema viáchucaini Abraham. Taicha tayanapane mámariehepuca éma, váhisera iúchucuhaimahi te vahi ecuitsivacha eta epanereruana. Ema Viya, tájina máemaitucaimahi éma. Te mávarahapuca, vahi máejecharachaimahi máepiyaca achaneanaina eta juca mari, mavarairainahi yátupina ena mámariequeneanaina ema Abraham. ¹⁰Ecauneuchava, taicha tiánehipa eta táitecapachirahaviyare eta ecuñaraqui nayehe ena achaneana máitucarahanahi téneuchavana, váhivare náitsivachahini eta napanereruana. Timicutijiricavaipa te máechucayarepa ema achane eta yucuqui máhireana. Ticaechuyarehi tamutu eta tapareana. Tíjuyarehi. ¹¹Yátupi núti nícachasicahahi te une, te éneuchava mayehe ema Viya. Ávanepaipahisera mácani ema yátupiquene Cristo. Te yátupina ecasiñava mayehe, ticachasicahayareva; tjaracaheyareva ema Espíritu Santo. Téhesera vahi ecucasiñavapuca mayehe, tícuñacaheyare tayehe eta táijurequene yucu. Éma, ichapequenehi nuyehe núti. Váiparinehi nácutinasimahi eta máitupajijiasiravahi. Váiparinehivare nácaemuñavaimahi macamusuranuhini núti páuresami. ¹²Puiti éma márjapainapa tinerejiricainapa nácani yátupiqueneana téhicana. Máunacainapa éna. Ticutinapa mácani achane te tiácatayajirica eta arusu. Máunacainapa. Tásiha, máquijicapa eta tapiraquiji. Máijuchayarepa te yucu. Eta nacaheyare ena máurirahanahi, tíjuanáinapa te yucu, máitavacacayarehi eta namuruira —máichavacapa ema Juan.

*Eta macaicachasirahi ema Jesús
(Mr 1.9-11; Lc 3.21-22)*

¹³Tacahe, títecapavarepa ema Jesús te cajacure Jordán te mávihahi ema Juan. Éma, másihapahi te tinapaica eta Galilea. Mavarahahi ticaicachasiyare mayehe ema Juan. ¹⁴Émasera ema Juan, vahi mávarahahini máicachasicahini. Ánipa macahe:

—Tata Jesús, nútira táuricahi nútivaina pícachasicanu. Nusapihapa núti picaijuhenuhi eta nícachasicaviya —máichapa.

¹⁵Émasera ema Jesús majicapapa:

—Tájinachucha táichava. Ticamunucarehi nítauchayare eta mavarahaquenehi ema Nucaiyaquene —máichapa.

Tásiha, ema Juan tísapavapa. ¹⁶Te tamutupa eta macaicachasirahi ema Jesús, tíucupaicapa tayehe eta une. Tásiha, tíjahúchavapa téjiaca eta anuma. Máimahapa ema Espíritu Santo tíucupaicapaipahi, mavasimahipaipa eta paloma. Tavenesicapa ema Jesús. ¹⁷Tacahe, tíáramicarepa eta mahu ema Viya tásihaquenehi te anuma, ánipa macahe:

—Ema maca ema yátupiquenehi nuchicha némunarquenehi. Tétavicavahi eta núsamurevahi máicha —macahepa.

4

*Emá Váinaraji Satanás mavaraha macaitsamaraji emá Jesús
(Mr 1.12-13; Lc 4.1-13)*

¹ Tacahe, emá Espíritu Santo enurujipa máimitucaipahi emá Jesús eta mayaniraya te mávapahi apaquehe. Ánaqui macuchapayarehi eta máitsamarajiyare emá Váinaraji. ² Tájina manicahini emá Jesús te jena cuarentaquenehi sache, cuarentavare yati eta mayerevahi. Ichapepa eta máecuavahi. ³ Tásiha, emá Váinaraji témeñahavapa mayehe. Mavarahapa macaetema-yarehi. Ánipa máicha:

—¿Pécuhapa píti? Tacahe, pivaneca eta juca mari táepiyacava pan, taicha píti machichavihi emá Viya, ¿masi? —máichapa.

⁴ Emá Jesús majicapapa:

—Váhipuca pecha eta táechajiriruvahi eta Sagrada Escritura, ani tacahehi: “Vahi tacarichuimahi eta tinicacare ticaitarecayare ena achaneana. Tacachaneyarehi eta máechajiriruvana emá Viya. Jéhevare, éta ticaitarecaryare” macahepa.

⁵ Tásiha, emá Váinaraji má mavarepa tayehe eta tacapicahuquene avasare Jerusalén. Máimiapanapa te táinahu eta Templo. ⁶ Tásiha, máichapa:

—Te yátupina machichavina emá Viya, písapavayare pémirica te apaquehe. Tájina píchavaimahi eta pémirisirayare. Pécharichuhi eta táechajiriruva eta Sagrada Escritura, ani tacahe: “Emá Viya mavanecapa ena mayeheana ángeleana téchapajiricaviana. Tiámavianayare te navahuana, apaesa vahi picucayutetu eta máriana eta te pipaisirayare” tacahepa. Tásiha, németeaca tijaneacavianayare puiti, vahi náisapaimahi picajara te pémirica —máichapa emá Váinaraji.

⁷ Tacahe, emá Jesús majicapavarepa:

—Énerichuvare ani tacahe eta Sagrada Escritura: “Vahi picaitsamaramahi emá Viya, taicha Piáquenuhi éma” —máichapa.

⁸ Tacahe, emá Váinaraji má mavarepa te táinahu eta anuquehe mari cerro. Máimechapa tamutu eta ichapequeneana avasareana te juca apaquehe ticutirinehi tacachacayajiricacahini taicha eta máitupajijiasiravahicacha emá Váinaraji. Máimechavarepa eta ichapequeneana náimahaqueneana ena achaneana. ⁹ Tacahe, máichapa:

—Núti níjaracaviyare tamutu eta juca avasareana. Pítina náquenuvina ena távacuanahi eta avasareana. Pépuyucanumaserá te numirahu. Pitsiucanu apaesa níjaracavisarepa tamutu —máichapa emá Váinaraji.

¹⁰ Émasera emá Jesús majicapapa:

—Pévuisihatataji piti Satanás te juca numirahu. Váhipuca pecha eta táechajiriruvahi eta Sagrada Escritura. Ani tacahehi: “Macarichu emá Viya vépuyumirauchayare. Macarichuvare vicaemataneacayare” tacahepa. Váhiquene táurica nucaemataneacavihini —máichapa emá Jesús.

¹¹ Tacahe, emá Váinaraji térajicavapa. Majunijicapa emá Jesús. Tásiha, tiúcupaicana ena ángeleana, náechapajiricapa emá Jesús.

*Emá Jesús tépanavapa ticametairairu
(Mr 1.14-15; Lc 4.14-15)*

¹² Tacahe, te jena sácheana, nacaratacapa emá Juan. Námapa te jácani tayerehiquene. Tacahe, emá Jesús, eta masamairirisirapa eta macaera-tairahi te cárcel emá macheji Juan, tiyanapa tichava te mávasa Nazaret te

Galilea. ¹³⁻¹⁷ Váipasera mánasihini te majurusinehi. Tiyana tayehe eta avasare Caperaum. Éta maejasihahi. Eta juca avasare távihahi te tachaui eta cáquiure Galilea. Eta macametarairuirahi, tamutuhi mapaica eta tina-paica eta provincia Galilea*.

—Éneuchava mayehe ema Viya. Ítsivacha eta epanereruana, taicha tiánehi eta sácheyare tímrecavaya eyehe ema ticatiuchaheyare. Aquenucayare mavaneruhi ema Viya, téchaheyare éma —máichavacapa.

Eta juca títauchavahi eta májureanahi ema víyarahaini profeta Isaías, ani tacahehi: “Tíuricacareanainapa ena achaneana cávasanahi te tachaui eta cáquiure Galilea tayehe eta provincia Zabalón éta eta Neftalí, namutu támairiaca ena ticavasana te apachara eta Jordán. Éna, tiyerehi eta nacata-jivairanahi, tacuti eta tavayureva eta tamapicuva. Puitisera máitecapauchavacari-pahi ema timícauchamurihi. Ticatiuchavacayarehi tayehe eta nacata-jivairahi. Éma, tétumechavacahivare eta mamícauchiravacahi” tacahepa.

Éma Jesús máichuha ena cuátroqueneana ténicarahiana, máimitureanayare (Mr 1.16-20; Lc 5.1-11)

¹⁸ Tacahe, eta mapaisirapahi ema Jesús te tachaui eta cáquiure Galilea, máimahavacapa ena apinana ajairana, ema ticajarehi Simón Pedro émapa ema maparape Andrés. Eta náematanerepi ena nani, ténicarahanahi. Náquijiercahi eta nayehe tarrafa. ¹⁹ Tacahe, ema Jesús máichuhavacapa:

—Yare, éhicanu. Núti níjaracaheyare eta apana ématanerepiyare. Éti ítucavaparacahi eta jímana; tacaheyare eta ítusiravayareva ena achaneana, machaneranyare ema Viya —máichavacapa.

²⁰ Enevanepa náinajicapa éna eta náenisirahi. Tiyananapa náehicapa ema Jesús.

²¹ Ánaquipanavarepa máimahavarepa ema Jesús ena apinana ticaparape-cácanavare: ema Jacobo émapa ema Juan. Téjacanahi te napacure. Matiari-hihivare ema naiya Zebedeo. Náitijiricahi eta nayehe tarrafa. Éma Jesús máichuhavarepa. ²² Enurujipa náehicavare. Nanaquicavarepa eta napacure, émapa ema naiya. Najunijicavarepa.

Éma Jesús máimitucavacapa ena camuriqueneana achaneana (Lc 6.17-19)

²³ Éta mapaisirahi ema Jesús tayehe eta avasareana te Galilea, máimitucavacapahi ena achaneana te sávarumuhuana tayehe eta náurujisirarevana. Mavanecapa eta náeneuchiravaina taicha tiánehipa eta sácheyare tímrecavayare ema ticatiuchayare, ema aquenucayare mavaneruhi ema Viya. Énerichuvare ema Jesús macanaracapahivare tamutu eta apanapanequeneanahi jumareana eta najumanapahi ena achaneana. ²⁴ Tacahe, nasamairiricapa ena achaneana ticavasánahi eta tasimutuqueneana avasareana te tinapaica eta Siria. Tásiha, námavacapaipa ena nacajumaqueneana, apanapanenejiquenehi eta najumana, nacatiruhavanahi. Énaripa ena návahá-ruanahi ena éreanana, ena tirapapasiana, énapa ena muracaquihana. Namutu ena nani, macanaracavacapahi ema Jesús. ²⁵ Tacahe, camuriana ena

* **4:13-17** Éma profeta Isaías, ánvare macahehi eta máechajisihairahi: “...étaripa eta provincia táviha náitecapihahi ena apavasanana”. (Acane eta juca apaquehe, apina eta apana tájareanaini: eta Zabalón éta eta Neftalí.) Éta máimitusiravacahi ena achaneana, ánipa maicha ema Jesús:

achaneana téhicanahi éma. Éna, tiásihana te Galilea, te Judea, te Jerusalén, te avasareana tinapaica eta Decápolis, étapa te apachara eta Jordán.

5

*Éma Jesús máimitucahi nayehe ena ticunachacareanahi me Viya
(Lc 6.20-23)*

¹ Tacahe, eta máimairavacahi éma Jesús ena camuriqueneana achaneana, tiápanapa tayehe eta anuquehepahi apaquehe taicha tiúripanahi eta nasamarasirayarehi ena achaneana. Téjacaripa éma, énapa ena máimitureana nachayacaipahi. ² Ani tacahehi eta máimiturapianahi:

³ —Ena náimatihí eta tacamunuqueneanahi eta náchanevana, tétavicavahi eta náuricacarevaya taicha máejerare eta najacapirayare eta máechajiriruva éma Viya, machaneranayarehi.

⁴ Éna nani tijapanujiricavanahi, tétavicavahi eta náuricacareva taicha émaripa éma Viya macurisamurechavacayare.

⁵ Éna nani tisuapajirahianahi me Viya, mánsuanahi mayehe, tétavicavahi eta náuricacareva taicha máíjararuanayare eta arairu apaquehe náicuchihi me Viya.

⁶ Éna nani, ichape eta najamurachirahi eta náitaresirahi eta matapiravacare te mamirahu éma Viya, tétavicavahi eta náuricacarevaya taicha máíjaracayare éma eta navarahaquenehi.

⁷ Éna nani tijapanurahianahi nayehe ena apamuriana achaneana, tétavicava eta náuricacarevaya; taicha éma Viya, éma apanava majapanuvacayare éna.

⁸ Éna nani vahi náisapajirícavahíni tahapapicahini eta náehisirahi éma Viya, tétavicavahi eta náuricacarevahi; taicha éna, titecapanainapa te mamirahu éma Viya, náimararacainapa éma.

⁹ Éna nani ticonsejarahianahi nayeheana ena achaneana, nacaepahairahi eta semanereana, tétavicava eta náuricacarevaya éna; taicha máimereuchainapa éma Viya eta machichairavacahi éma.

¹⁰ Éna nani ticatajivanahi eta nacatianacasivahi nayehe ena achaneana te juca apaquehe táichavenehi eta táurivahi eta náitaresirahi, tétavicavahi eta náuricacarevaya; taicha éna aquenucarahanaya majupahanayare éma Viya.

¹¹⁻¹² Eti nuchaneranahi, járajapainapa eta saché eta nacatianasiraheya ena achaneana táichavenehi eta éhisiranuhi. Tipanararachaheanainapa, tépiyaequenehaheanainavarepa. Váhisera ecuarami eta juca. Ene nacahehi eta nacatajivairahi ena profetanaini, ena náinapureanahi machaneranahi éma Viya. Éta tacahe, te nacatianacahepuca, ¡ecurisamurechavachucha, evapinavachucha! ¡Tétavicavahi eta iúricacareva taicha ejacapayare eta ícuchiya te anuma, taicha ichape eta macunachirahehi éma Viya!

*Éma Jesús tímitucahavi eta vicamunucareravayarehi tacutihi eta tacamunucarevahi eta icheve, étapa eta tijarahi
(Mr 9.50; Lc 14.34-35)*

¹³ Eti ímiyanavayare eta ecamunucareravahi nayehe ena achaneana, tacutihi eta tacamunucarevahi eta icheve. Vahi tacuepaha eta ecamunucareva. Vahi ecucuti eta tajachira eta icheve, taicha tájina eta táichevavainahíni. Tásiha, nájinapa ticamunuimahi. Náepuruinapa namutu.

¹⁴ Tacutiquene éti ecutihi eta tijarahi. Éti, namicahuyarehi namutu ena achaneana eta ímitusiravacaya, apaesa náinajica eta náehisirahi eta tamauri-queneana. Ímereuchayahivare eta iúriua, ecutiya eta avasare tiávihahi te tajirumane eta anuquehe mari. ¹⁵ Tacutiquene, vahi ecucuti nácani súnsuana tiyustacanahi jácani lámpara, tásiha nanacapurucaini te tajuhe eta cajune, nayumurusihahini. Nanacayahisera te anuquehe apaesa náimairi-ricasarepa namutu ena tiávihanahi te peti, tamicaureanayaheri. ¹⁶ Ene ecaheyare éti, ímrecayare eta ejaravayare nayehe ena achaneana apaesa eta náimairainahi eta táuriqueneana íchaqueneanayare; tásiha nacunachainapa ema Tata Vicaiyaquene tiávihahi te anuma.

Éma Jesús tímitucahavi tayehe eta tasuapacarevahi eta Sagrada Escritura

¹⁷ Vahi étaina tímitecanuhi núti nucaepahahini eta mavanairipiana ema víyahaini Moisés, étaripa eta náimiturapianaini ena profetanaini. Eta tímitecanuhi núti, níminecapaequenehaheyare eta nájureanahi. ¹⁸ Nutupiruva numetacahe: Títauchavaya tamutu eta máechajiriruvana ema Tata. Tímiyanava eta tasuapacareirahi nayehe ena achaneana tamutu eta Sagrada Escritura. Tájina ticaepahaimahi, tayanapane táitavapuca eta anuma étapuca eta apaquehe. ¹⁹ Eta tacahe, nácani tépuruanayare eta tavanairipianahi eta Sagrada Escritura, jácani ánichichaquenehi, vahi tisiapanaimahi te anuma. Tavetijipa te náimitucapuca ena apamuriana eta náepuruiraya. Nácanisera tisuapanayaheri, tímiturecanahivare eta juca nayehe ena apamuriana achaneana eta náehisiraina; éna, ichapeyare eta nacunachacarevayare eta nasiapiraipa te anuma. ²⁰ Táicha te evaraha ítujuvaca esiapa te anuma, tacamunuhi tiápajucavaya eta táurivahi eta eyeherepiana éti, ecachuricayare eta nayeherepianahi ena escribánoana, énapa ena fariséoana.

Éma Jesús tímitucahavi vahi tacunasi te visamure eta visemaneva (Lc 12.57-59)

²¹ Éti écharichucha eta nayeherepiana ena íachucanaveanaini ani tacahe: “Vahi ecucapaca mácani piparaepiya; taicha mácani ticaparecahi, ticaicuñayaheri”. ²² Nútisera numetacahe eta apana: Mácani tisemahi mayehe ema maparape, énerichuvare ticaicuñayare. Mácani tiúmehahi ema maparape, ticayaserehiyare te namirahu nácani tuparairucanahi tayehe eta avasare. Tacutiquene mácani ticaecahihí ema maparape, mávacuhaipahi eta ecuñaraqui tayehe eta infierno.

²³ Eta tacahe, te piámaphi eta piámavahu te mamirahu ema Viya, tásiha, péchapanainapapuca eta pitapiravahi mayehe ema piparape. ²⁴ Vuíchaha picuiyaracuha eta piámavahu. Tativanumayare piyaseapanaya eta perdón ema piparape. Pétipiricanumayare tativa eta píchavaquenevahi mayehe éma. Táuricasarepa píchava píyaracuhapanainapa eta piámavahu te mamirahu ema Viya.

²⁵ Tacutiquene te matiarihyarepuca mavaraha mametauchavi te namirahu ena tuparairucana, vahi picucuchapa mametauchavi. Tativayare pétipirica eta píchavaquenevahi mayehe, mapurare vuíchaha picaeratahini mayehe ema juez tayehe eta cárcel. ²⁶ Taicha te náimisipavipa tayehe eta cárcel, ticajeraequenénapa eta piúchuriraya.

Éma Jesús tímitucahavi vicuneuchavaya eta jácani táimiaquipaichavi tayehe eta pecatu

²⁷ Énerichuvare écharichuhi éti eta náimiturapihi ena iáchucanaveanaini: “Vahi ecuveha esu apana esena”. ²⁸ Puítisera núti numetacahe eta apana: Mácani majamurachahi esu apana esena, ticapecaturaipahi te masamure taicha eta majamurachirahi. ²⁹ Eta tacahe, eta iúquiha váure, te tavarahapuca tímiaquipaicahe tayehe eta pecatu, tavarairahi táimahayare eta tamauri-queneana tájiparacana, tíuripana evecuhaulquichava iáquijicaya. Taicha tíuripanahi táejiacava ánichichaina te iáquehe, váhisera tacuimicuñacahe eta te yucu infierno, tamutupahi eta iáquehe. ³⁰ Étaripa eta evahu váure, te tavarahapuca tímiaquipaicaheyare tayehe eta pecatu, tapamisirahéna-papuca Ichayare eta tamauriqueneana, tíuripana eyuchatica iáquijica. Taicha tíuripanahi táejiacava eta evahu, váhisera tacuimicasiapahe támutu eta iáquehe tayehe eta yucu infierno.

Éma Jesús manacahi eta máimiturapi nayehe ena tñajicacana
(Mt 19.9; Mr 10.11-12; Lc 16.18)

³¹ Énerichuvare ena viáchucanaveanaini náisapahi eta máejerare eta máinajisira mácani achane esu mayena. Ani nacahehi: “Mácani tñajicahi esu mayena, máemepiyarecahi eta ajumeruca táechajisihayarehi eta máinajisiraya esu mayena”. ³² Nútisera numetacahe eta apana: Mácani achane, te máinajicapuca esu mayena, ticapecaturaipahi me Viya. (Váhinénipuca sucaecahihini mayehe ema apana achane.) Énerichuvare te tíapechavahipuca ticaima ésu, tamuriacahi ésu eta maviurevahi ema suima. Tásiha, mácani arairuhi suima, émapa tamuriacahi eta máejeccapiravahi taicha eta mavirahi esu esena sucaimaquenehi.

Éma Jesús tñitucahavi eta vahi vijurachaimahi

³³ Énerichuvare esamairiricavare eta náimitucasivahi ena iáchucanaveanaini: “Machu vahi ecuitaucha jácani ejurachirahipuca. Yátupinasera eta itauchiraina tamutu eta íjarasiravahi me Viáquenu” nacahepa. ³⁴ Nútisera numetacahe éti: Vahi táuricahini íchahini eta juramento. Vaipa échajisihahini eta anuma taicha éti, mávacurehi ema Viya. ³⁵ Váipavare échajisihahini eta apaquehe taicha éta, macaematanéyahi éma. Váipavare échajisihahini eta Jerusalén, taicha éta, mávacureyarehi ema yátupiquenehi Rey, mavaneryare ema Viya. ³⁶ Váipavare échajisihahini eta ejurachirahi te echuti, taicha vahi aratahaimahi ehapamaichahini, ítsivachirahini eta táimahi, tijapupuca, tíquisapuca. ³⁷ Numetacahe: Te tatiarhipuca eta íjarasiravayare, átupiruva ácahe: “Turi”. Te váhipuca evarahahi, átupiruva: “Vahi” ácahe. Te émunahacavapuca ejuracha, ema Váinaraji títurucaheripa.

Éma Jesús tñitucahavi eta vahi vicusema ne nácani ticaetemajiricahaviana
(Lc 6.29-30)

³⁸ Énerichuvare esamairiricahi eta acane: “Mácani achane téhararecahi mapuchuquichahi ema apana achane, énerichuvare éma napuchuquichayareva ena tuparairucana. Te macavetuquiahechahipuca, énerichuvare nacavetuquiahechayareva ena tuparairucana”. ³⁹ Nútisera numetacahe: Vahi ecujicapa te masema mácani achane váinarajihí. Tíuripana, te náehahepca nácani te emira, íjaracayare eta apachacaya eta emira. ⁴⁰ Tacutiquene, te natiarhipuca ena timetauchaheana, navaraha naverejicahe eta ecamisa, vahi ecusema. Váhivare ecujicapairihi. Íjaracavare eta apana eta epacua. ⁴¹ Ísapayare te nácani navanecahepuca

eta enaracureca eta tijitacare. Te navaraha iámina étanaina kilómetro, evapinava eta eservichiravacaina. Vahi ecobrachavacaimahi. ⁴² Mácaniripa tájahapuca mayaseacahe, íjaracayare. Vahi ecueñamiha mácani ticapucahe eta ecayehequeneana.

*Ena Jesús tímitucahavi eta vémunasirayare nácani ticatianacahaviana
(Lc 6.27-28, 32-36)*

⁴³ Énerichuware esamairiricahi eta acane eta náimitucasivahi ena iáchuca-naveanaini: “Émunasirahi nácani témunacaheanahi. Tásiha, ecatichayarepa nácani ticatianacaheanahi”. ⁴⁴ Nútisera numetacahe: Émunacayareva nácani ticatianacaheanahi. Eyaseaca ema Viya eta nayujarahuina nácani téchajicanahi eyehe. Ímereca eta iúriava nayehe nácani ticaticahaheanahi. Eyu-jaraucha nácani tíumehaheanahi ticaetemajiricaheanahi. ⁴⁵ Te ítaucha eta juca, éta tímereuchaheyare eta machichahéirahi ema Vicaiyaquene te anuma. Taicha éma nájina manerejiruina, namutu máemunacavaca: ena achaneana váinarajiana, énapa ena tíuriana. Éma, tíjaracahavi vimutu eta sache vimícahuhi, étapa eta tíquiva. ⁴⁶ Éti, tájina ecunachacarevaina eta me Viya, te nacarichuhi émunaca nácani témunacaheanahi éti. Apanasica ena tisipecaturarahiana náichahi eta juca. ⁴⁷ Tacutiquene, tájinavare ecunachacarevaina eta me Viya, te iúriyare nacarichuhi ena eparapenaveanahi. Apanasica ena máimatirahanahi ema Viya tíurianahi eta nayehe ena naparapenaveana. Étisera tatuparacahe eachuricayare eta iúriava. ⁴⁸ Tétavicavasareya eta iúriava nayehe namutu. Vahi enerejicaimahi ena achaneana. Váhivare eyavanaimahi eta iúriava. Ecutiyare ema Vicaiyaquene te anuma eta máurivahi.

6

Ena Jesús tímitucahavi eta vahi vicusiñavavaicapa eta víchira eta táuriqueneana

¹ Eta ecajirayare ena páureana, échapavayare. Ena Tata Vicaiyaquene, tájina ticunachahemahi te evarahapuca náimaha ena achaneana eta ecajirahi, evarairahi ticunachaheanayare. Tájinavare máitsirijicavahini éma eta eyehe. ² Eta tacahe, te ímicatacayarepuca nácani ticamunuvanahi, vahi ecumetajirica. Vahi ecucuti ena apimirana timetajiricanapa te viúrujisirarevana, téhepa te anecapahiana. Eta juca náichahi, navarairahi ticunachacareanayarehi nayehe ena achaneana. Nútisera numetacahe: Ena nani ticaheanahi, tájina nacunachacarevaimahi me Viya. ³ Te jácani píjaraca nácani ticamunuvanahi piyehe, vahi picumetajirica. Váhivare picumetaca nácani pémunacasareana. ⁴ Piñajichayare eta píjarasirayare nácani píjaracasiruyare. Tacahe, ema Tata Vicaiyaquene te anuma máimamaracahi tamutu. Jácani píchaqueneana tayumurevana, éma títsirijiequenehayare, tíjaracaviyare eta pícutihi.

*Ena Jesús tímitucahavi eta viyujarasirayare
(Lc 11.2-4)*

⁵ Te eyujaracahi, vahi ecucuti ena apimirana tiyujaracana te viúrujisirarevana, téhepuca te anecapahiana. Titupihanahi éna eta nayujarasirahi, navarairahi náimamaracayarehi ena achaneana. Nútisera numetacahe: Tájinachucha nacunachacarevaimahi me Viya. ⁶ Étisera ani tacaheyare

te eyujaraca. Esiapayare te eyehe cuarto, ératacayare eta tapaja. Eñajichavayare eta échajisirayare ema Tata Vicaiyaquene. Éma, tímaracahavihi; masamayarehi eta piyujaracasa.

⁷ Tacutiquene, váhivare ecuapepirica eta ecayemaqueneanayare. Vaipa tácomesahini eápepiricahini eta eyujarasirahi. Vahi ecucuti ena máimatirahanahi ema Viya. Tiúpiemanapa eta nayujarasirahi, náimijachaipa tisamacareanahi mayehe ema Viya. ⁸ Vahi ecucuti éna, taicha ema Viya máimatiripahi éma jácani vivarahaquenehi viyaseaca. ⁹ Éti, ani tacaheya eta eyujaruchiravaina: Tata Vicaiyaquene, piti piáviha te anuma, vipicauchahi yátupi eta píjare. ¹⁰ Vivaraha íchapeina eta tasuapacarevaina eta pivanairipiana nayehe namutu ena achaneana ani te apaquehe, tacuti eta nasuapiravihi ena ángeleana te anuma. ¹¹ Pájapanuhavi píjaracahavi puiti jena sache eta vicamunuirava eta vinicaqueneana. ¹² Pájapanuhavi piperdonachahavi eta viviurevana piyehé, tacuti eta viperdonachira víti ena ticaviurevana viyehé. ¹³ Vahi picuisapahavi eta vicha eta tamauriquene. Picatiuchahavivare mayehe ema Váinaraji. Taicha píti yátupiquenevihi Viáquenuvihi. Nájina pácuti eta pítipujijiasiravahi. Máichecuaraquire eta píjaraivahi. Amén.

¹⁴ Taicha te yátupihí eta eperdonachirahi nácani ticaviurevanahi eyehe, ema Tata Vicaiyaquene te anuma tiperdonachaheyare éti apanava. ¹⁵ Téhesera te vahi eperdonachahi ena ticaviurevanahi eyehe, ema Tata Vicaiyaquene váhivare tiperdonachahémahi eta éjecapiravanahi éti.

Éma Jesús tímitucahavi tayehe eta ayuna

¹⁶ Tacutiquene, te ayunahepuca, vahi ecajapanuramiraimahi te namirahu ena achaneana. Vahi ecucuti ena apimirana ena tímicaecherachavanahi eta ayunairanahi. Núti numetacahe: Tájinachucha nacunachacarevaimahi me Viya. Éma, váhivare títsirijicavaimahi eta nayehe. ¹⁷ Étiserá, te ayunahepuca, ímiyanava eta esipauquichiravaya, etatacavavare, apaesa nacuíja nacuimatiacahe eta ayunairahehi. ¹⁸ Éma Tata Vicaiyaquene tímaracahéhi tamutu eta esamureana. Tisamacareyarehi eta eyasearuhi.

Éma Jesús tímitucahavi eta vahi vicuisapava vicasamure eta vímahaqueneanahi (Lc 12.33-34; 11.34-36)

¹⁹ Váhivare tacuavasamurerecahe eta ímahaqueneana te juca apaquehe. Éta juca ticamitiequenehacareana taicha eta tajararesira eta cachusiri, étapa eta táichasivayare. Natiarihivare eta tíameyechaheanayare. ²⁰ Epanerechaserá eta ecaimahaquenerahi te anuma. Ánaqui jararihi eta táitsivayare eta íchirahi eta táuriqueneana te juca apaquehe. Ánaqui, tájina cachusirina, nájnavare tíamerahina tayehe. Tájina témitiacaimahi. ²¹ Éti, te ecasamurepuca eta ímahaqueneanahi te juca apaquehe, evarahahi enasiyare te juca. Vahi ávarahahini ejunijicahini eta ímahaqueneana. Téhesera te ecasamurehi-chapuca eta ícuchiana te anuma, ánaqui evarahayare eyanavaneyare.

²²⁻²³ Tacutiquene, ecuneuchava, machu tacuetaviuchava eta ejamurachira eta ímahaqueneana. Ecaratacava, vahi ecuisapa tahapasamurechahe eta ecaimahaquenerahi. Taicha te tahapasamureruhépapuca eta ímahaquene, tétavicavahi eta tamapicuvahi eta te iáchanevana. Téhesera esuapa eta nímiturapiana, tétavicavahi eta tamicauchiraya eta iáchanevana, tímijunijicayare eta emaurivahi, étapa eta ejamurachiravahi eta ímahaqueneana.

Eta tacahe, machu ísapava tayanariana eta timapicu eta te iáchanevanasami. ¡Páurehesami éti te ísapavapuca tanasipa!

²⁴ Tacutiqene éti, eta itaresirahi, vahi táuricahini apinanainahini ena iáquenuana. Taicha émunacapanayarehi ema émana, tisuapacarepanayarehivare; tásiha ema apana, apaesarineya eta émunasiraya, váipainapa tisuapacaremahí ema. Ene tacahehi eta juca ímahaqueneana, vahi ecuisapa tahapasamurechahe eta plata, machu tahapapirica eta émunasirahi ema Viya, éta pa eta ecaemataneasirahi éma.

Ema Jesús tímitucahavi eta majaneasirahavihi ema Viya viti machichanaveana
(Lc 12.22-31)

²⁵⁻²⁶ Étasera nuvaraha yátupina eta ecasiñavairaina mayehe ema Tata Vicaiaquene. Vahi ecuaeñamaracavaicha tayehe eta enicaquenerepi éta pa eta emuiriharapi puiti juca itaresiraichaha. Eta enicaquenerepi, éta pa eta emuiriharapi, tájina táeñamavacarevahini. Ímararacarichuhi eta cáyureana. Vahi táevacahini, váhivare táechatijiricahini, táunacahipucaini eta tanicaqueneayere. Émasera ema Tata Vicaiaquene máechapajiricahi, májjarasirahi tamutu eta tanicaquenerepiana. Evetijipa éti, iápajupanavahi eta éñamacarévahi me Viya tayehe eta cáyureana. ²⁷ Tájina táuricahíni eta éñamiravahi eta júcana. Éti, nájina tiratahaimahi étijivainahini ecajurucavahini, tayanapane tahapasamurechahehipuca.

²⁸ Tacahe, ¿tájaha tacayema tihapasamurecahehi eta emuiriharapi? Ímararacarichuhi eta tajurusirahi eta flúreana, vahi tacaeñamaracavahini tacaematanehini, tájjururecahipucaini. ²⁹ Táitsivahisera, te tépnehapa, tétavicavahi táurinavahi eta taflurene. Nájina tácuti eta nacamuirihaira eta táurinava, émaripa ema víarahaini rey Salomón eta tajanusira eta macamuirihairahi. ³⁰ Apanasicahi, ema Viya májjaracahi eta táurinavahi, ánipirichuhinéni eta táitaresirahi. Evetijipa éti eta máechapajirisirahehi, májjarasiraheyarehi eta emuiriharapi eti achaneana. ¿Tájaha tacayema vahi ácasiñavahíni eta mayehe? ³¹ Eta tacahe, vahi ecuaeñamaracavaicha tayehe eta enicaquenerepiana étaripa te echuririacapuca eta une érayare, váhivare eta emuiriharapi. ³² Ena achaneana vahi náimatihini ema Viya, ichapemurihi eta tacaeñamarasiravacahi eta júcana. Vahi nácasiñavahini mayehe ema Viya, nacuchapahipucahini eta májjararyarehi éma. Étiserá, écharine eta mararirihahi ema Ecaiaquene te anuma. Máimatihí éma tamutu eta ecamunuqueneanahi. ³³ Tásihasera éti, tativayare íjaracava ecaemataneacaya ema Viya, ecasamureirahi eta ítauchirayare tamutu eta mavarahaqueneanahi. Tihapasamurechaheyarehivare eta tátupiruvairaya eta itaresira, ecurisamurechirayare éma. Máimarinépa éma. Tíjaracaheyare tamutu eta juca ecamunuqueneana. ³⁴ Eta tacahe, ácasiñava mayehe éma. Vahi tacuimipañerechahe eta íchararacavayare achichu. Puiti ecuchapaípa eta máimicatasi-raheyare. Ímianava eta ecuchapirayare eta máimicatasiraheya.

7

Ema Jesús tímitucahavi eta vahi vicunemahi eta nájecapiravana ena apamuriana achaneana; vicuneuchavaserá viti
(Lc 6.37-38, 41-42)

¹ Vahi ecunemahi eta nájecapiravana ena apamuriana achaneana, váhivare eucacahivaca, machu étaina táimicuñacahe me Viya. ² Te ecunerahipuca nayehe ena apamuriana achaneana, ecaheyare éti eta macunera-hénapa ema Viya tayehe tamutu eta éjecapirávanahi éti. ³ Piti ajaira, pítipa piti esena, vahi táurica eta picunerahi eta ánichichaqueneana nájecapiravanahi éna. Tituparacavi pítijivaina picuneuchava eta táichapeva eta péjecapirava. ⁴⁻⁵ Vahi tatuparacavimahi pétupirica eta jácani nájecapiravahi ichipichuana ena piparaepiyana. Tájina piviyahini eta piconsejachihaimahi. Ichape-sera eta tatuparasiravíhi pétupirica eta péjecapiravanahi píti. Tapaenu-mava pétupirica eta píchavaquenévanahi, táuricapaini piconsejacha ema pi-paraepiya tayehe eta máichavaquenévahi.

Ena ticaecahirahiana, vahi vicuijaraca jácani téñamacareana

⁶ Vahi ecumituca eta máechajiriruvana ema Viya nácani achaneana ticaecahirahiana, taicha váiparinehi náuricaimahi. Machu étaina táemehahe. Váhivare ecuijaraca jácani téñamacareana, machu nácatayayajica.

*Vahi vicuyacuji eta viyaseasiraina ema Tata Vicaiyaquene
(Lc 11.9-13; 6.31)*

⁷⁻⁸ Ánivare tacahe eta máechajiriruva ema Jesús:

—Numetacahe: Échajica ema Tata Vicaiyaquene. Eyaseacayare eta ecamu-nuqueneana. Éma, tíjapanurahi. Tisamaheyare, tíjaracaheyareva. Vahi ecuyacuji eta eyaseasiraina. Énerichuvare, te tatiarihinapupuca eta jácani íchiraya ichapehi eta tacajeravayarehi, eyaseacayare máijaracahehíni eta ítupajijiasiravaya. Éma, tíjaracaheyare. Te jararihipuca eta táichejimi-ráuchahe, éma macaevuisinaheyarehi.

⁹ Eta juca tímicutijiricavahi te natiarhipuca ena echichanaveanahi éti, te tiyaseacaheanapuca eta pan nanicayare, váiparinehi táuricaimahi íjaracahini éti eta márijahi. Tímicutijiricava evijaruinahini ena echichanaveana. ¹⁰ Étaripa te tiyaseacaheanapuca eta jima, váhivare táuricaimahi íjaracaimahi eta quichare. ¹¹ Etiaríhi éti vahi ecajirahíhíni nayehe ena achaneana. Íuríhisera nayehe ena echichanaveana. Mavetijicha ema Tata Ecaiyaquene tíávihahi te anuma. Éma, vahi ticavijaruhemahi eta eyaseserepi. Tíjaracahe-yarehi tamutu eta táuriqueneana eyasearuanayarehi.

¹² Evaraha eta náurivaina ena achaneana eta eyehe, ¿masi? Tásiha, táuricahi eta íchiraya eta íuriva nayehe. Taicha eta tacahehi eta táimiturapi eta Sagrada Escritura eta eyehe.

*Jararihi eta apina achene
(Lc 13.24)*

¹³⁻¹⁴ Esamanuchaha. Jararihi eta apina achene. Eta ichape achene, vahi tácájera eta náehisira ena achaneana. Camurianapana ena téhicana eta ticai-juhe tayehe eta ecuñaraqú. Étasera eta achene ánicuchicharichu, ticaijuhe tayehe eta vítaresirayare, tájina ecuñaraqúina. Váhísera camurianaina ena téhicana éta. Éti epamicava esíapa tayehe eta achene ánicuchicharichu.

*Ena Jesús máimicutichahi ena achaneana tépiyahirahiana, nacuti eta yucuqui máurinisiráha eta tahi
(Lc 6.43-44)*

15 Échapavayare tayehe eta náimiturapiana ena tépiyahirahiana tímijachavana machanerana ema Viya. Tépiyacavánapahi tiúriana tacutihi eta tamansuva eta uvesa. Téhesera te nasamureana, tétavicavahi eta navainarajiva, nacutihi eta ichini. 16 Ímaticavacahisera éna táichavene eta náichaqueneana. Nacutihi eta yucuquiana. Eta yucuqui, tímaticarehi eta táhi. Étaripa eta sitavere, váiparinehi tiúchucaimahi eta tacahihini narasahinahipucaini. Tásiha, eta ijicaqui váiparinehivare tacahimahi eta táhi cachiche-ruhinahipucaini. 17 Tacutiquene, tímaticarehi eta táhi eta yucuqui tiúrinisi. Tímaticarevare eta táhi eta máurinisiráhana. 18 Eta yucuqui tiúrinisihi eta táhi, vahi témunahiricavaimahi vahi tacurinisihini eta táhi. Étaripa eta máurinisiráhana, váhivare témunahiricavaimahi táurinisihini eta táhi. 19 Tamutu eta yucuquiana máurinisiráhana ticaechuyarehi, títuyarepa te yucu. 20 Eta tacahe, imativacayare ena tépiyahirahiana táichavene eta náichaqueneana tamauri-queneana.

Vahi námutuimahi títujicavana tisiapanaimahi te anuma
(Lc 13.25-27)

21 Nararihnapa ena achaneana tépiyacavana nuchanerana. Váhisera títujicavanaimahi tisiapana tayehe eta mávasa ema Viya. Tayanapane náichanuinapapuca “Tata Viáquenu”, vahi tisiapanaimahi. Taicha vahi yátupinahini eta nacaemataneasirahi ema Tata Nucaiyaquene te anuma. 22 Te táitecapapa eta juicio, camurianayare ena tichanuanayare: “Tata Viáquenu, víti véchajisihaparacahi eta píjare. Vipiarcavíhi te píjare eta viáquijisiráhi ena váinarajiana, téhevare te píjare vímerecohi eta tiáramicareana” náichanuinapapuca. 23 Nútisera nujicapainapa: “Éti vahi nuchaneráhena. Nímatisera nútí eta íchaqueneanahi tamauriqueneana. Évuisiha te numirahu” níchainapa éna.

Ema Jesús máimicuticha ena tisuapajirahiana énapa ena masuapajirairahana
(Lc 6.47-49; Mr 1.22)

24 Nácani tisuapanuanahi náitauchahivare eta juca nuvanairipianahi, téchemarahianahi táicha. Nacutiyahehi mácani títucahi tépiyareca peti, manacayarehi eta túmeana yucuqui emuruquiana. 25 Jéhesare, te járajapapa eta muraca técatícava, tiámaquiha tiquiva, tisiapapa eta une, váipasera tacayayacahini eta peti, taicha tiúsiapiravacahi. 26 Nararihivare ena tépiyacavanahi tisuapanuana, váhisera náitauchahini eta juca nuvanairipiana. Éna nacutihi ema máitucarahe tépiyareca peti. Vahi manacaimahi eta túmeana yucuqui, váhivare táusiapiravacahini máicha. 27 Te járajapapa eta muraca técatícava, tiámaquiha tiquiva, tisiapapa eta une, tacajimuyapaicapa eta apaquehe. Tiáquiapaicavapa eta peti, tamutusamípa témitiequeneha —máichavacapa ema Jesús.

28 Te títapiricapa ema Jesús eta máimitusiravacahi ena achaneana, ichapereinehi eta náramirahi eta máimiturapiana. 29 Vahi nasamasarénahini. Tétavicavahi eta máitusirahi mayunapaicahi tamutu. Tétavicahivare eta tasuapacarevahi eta máimiturapiana.

8

Ema Jesús macanaraca ema émana achane leproso
(Mr 1.40-45; Lc 5.12-16)

¹ Te tiúcupaicapa ema Jesús tayehe eta cerro te mávinehi, camuriana éna achaneana téhicanapahi. ² Tacahe, macahepaipa ema émana achane lep-roso. Témeñahavapa mayehe ema Jesús. Tépuycupa te mamirahu. Tásiha, máichapa:

—Tata, nucasíñavahi eta piyehe, picanaracanupaini.

³ Tacahe, ema Jesús majicapapa:

—Nuvaraha nuncanaracavi. Tájinaapa píchiravaina puiti —máichapa.

Máemamahacapa. Tásiha, enevanepa tinaracahi ema macajumaquenénihí eta máechajisirahi ema Jesús. ⁴ Tásiha, ema Jesús máichapa:

—Pímaha, nacuija picumetaca eta nútirahi nuncanaracavihi. Piyanavanesera pímerecava nayehe ena tuparairucana, apaesa náimamacavi. Énainapa timetajiricanainapa eta yátupirahi pinaraca, pipachihairapa. Piyanayareva me Viya. Picamavahuyarepahi eta pihasulupayachirayare taicha eta macanarasiravihi —máichapa ema Jesús.

*Ema Jesús macanaraca ema mamusura ema capitán romano
(Lc 7.1-10)*

⁵ Tacahe, ema Jesús títecapapa tayehe eta Capernaúm. Matiarihíhi ema achane apavasana. Comandantehi éma nayehe ena suntaruana romanoana. Capitán eta mávacure. Tiyanapa mapauchapa ema Jesús. ⁶ Mayaserecapa, ániapa máicha:

—Tata, mararihi puiti te nupena ema amaperu numusura ticajumahi eta áire. Tétavicavahi tacativa masama. Pájapanupaini, picanarasinanupanaini éma —máichapa.

⁷ Ema Jesús, majicapapa:

—Tiuri, nuyanayare nuncanarapanayare —máichapa.

⁸ Tásiha, ema capitán majicapapa:

—Tata, vahi picuaeñamacava eta pítesiraina eta nuyehe, taicha vahi táuricahini pisiapahini te nupenasami. Németeaca taratarichu picavanairipi eta picanarasiraya ema numusura. ⁹ Taicha nútí nusuapahi te tivane-canuana ena anuquehepananahi eta nuyehe. Nútiripa nusuapacarehivare nayehe ena nusuntaranahi. Te nuvanecavaca, téhevare níchuhavacapuca, tisuapanuanahi. Te nuvanecapuca ema nuvaneru, enurujipa tisuapanu-
vane —máichapa.

¹⁰ Te masamapa ema Jesús eta juca, ichaperinehi márami eta yátupirahi macasíñavairahi eta mayehe. Máichavacapa ena téhicanapahi:

—Nutupiruva numetacahe: Nájina nímaha émanaina vijaneana israelíta mácutihini ema maca achane apavasana eta macasíñavairahi eta nuyehe.

¹¹ Numetacahe puiti: Járjapainapa eta sache, náitecapiraya ena camuri-queneana achaneana apavasana tiásihanayare te tamutu avasareana te juca apaquehe. Tisiapanayare eta mávasa ema Tata, te mávihahi ema viáchucaini Abraham, ema Isaac, émapa ema Jacob. Tétavicavainapa eta náurisamurevaya. ¹² Tacahe, tamapuruji eta náimatiequenehairahi ena vijaneanana israelítana eta máechajiriruva ema Tata, váhisera nácasíñavahini eta nuyehe. Eta tiviuchavacayarehi tayehe eta nacaicuñaiyaya eta te tamapi-cuene te távihahi eta tájirequenehi yucu. Ticapitiquiahechavanainapa eta tacativayare nasama. Tíyahanainapa —máichapa.

¹³ Tásiha, ema Jesús máichapa ema capitán:

—Piyana pichava te pipena. Tinaracaripa ema pimusura, taicha eta picasíñavairahi eta nuyehe —máichapa.

Tacahe, ema amaperu ticajumahi tinaracaripahi te jena hora eta náechajirisiravahi éna.

*Ena Jesús macanaraca esu máimase ema Pedro
(Mr 1.29-31; Lc 4.38-39)*

¹⁴ Ema Jesús tiyanavarepa te mapena ema Pedro. Máimahapa esu máimase ema Pedro, ticajumahi eta muraca fiebre. Mapauchapa tayehe eta suívesihahi. ¹⁵ Máemamahacapa, enevanepa táetaviacahi eta fiebre. Tinaracapa. Enurujipa téchepeuca. Tásiha, tépanavapa ésu eta suítátirahi ema Jesús.

*Camuriana ena macanaruarunapahi ema Jesús
(Mr 1.32-34; Lc 4.40-41)*

¹⁶ Te yátipa, títeparácanapaichucha ena achaneana. Námavacapaipa ena nacajumaqueneana, énapa ena návaháruana ena éreanana. Tacarichu te máechajiriruvachucha ema Jesús, macuchuchujicavacapaipa ena éreanana tiávahácanahi ena nacajumaqueneanahi. Macanaracavacapa ena apamuriana tisananahi eta apana jumareana. ¹⁷ Eta juca títauchavapahi eta táechajisihairahi eta májurehi ema víyarahaini profeta Isaías, ani tacahehi: “Masamí-nahavihivare eta vijumana eta macanarasirahavihi”.

*Tituparacahavi vahi véñamavaimahi eta víjarasiravahi véhica ema Jesús
(Lc 9.57-62)*

¹⁸ Te máimahapa ema Jesús ena camuriqueneana achaneana nachayacahi, macavanairipipa ena máimitureana natsecava eta nánuesirayarehi te apachara cáquiure. ¹⁹ Tacahe, ema émana escribáno témeñahavapa mayehe ema Jesús. Máichapa:

—Tata máestro, núti apana nuvaraha néhicavi te jácani pivarahaquenezare piámianu —máichapa.

²⁰ Ema Jesús, ánipa tacahehi eta majicapirahi:

—Tamutu eta sárareana ticapenavaca. Énerichuvare eta cáyureana tamacajipachuvare. Nútisera nuti Manerejirunuhi ema Viya, tájina nuviya nusiapihahini —máichapa.

²¹ Te apanavarepa sache, ema émana máimiture máichavarepa:

—Tata, nuyaseacavi písapanuhini nuchava te nupena. Nucuchapanumayarehini eta máepeniraya ema ticachichanu, nécaranumaya. Tásiha, nucapavacavipa néhicaviya —macahepa.

²² Ema Jesús majicapapa:

—Péhicanuchucha. Pésamirica náecaracacaichaha ena máecharaireana. Tájina tájjaracavimahi eta juca tihapasamurerecavihi —máichapa.

*Ena Jesús macaesamirica eta táepacusirahi eta une étapa eta técativaca
(Mr 4.35-41; Lc 8.22-25)*

²³ Te títapiricapa ema Jesús, tiávacuhapa te pacure. Énapa ena máimitureana, náehicapaipe éma. ²⁴ Te itupiercanapa, járajapapa eta muraca técativaca. Ichapevaca eta táepacuruhana. Tisiapapaipahi eta une tayehe eta pacure. Ema Jesús, tímacapaichucha éma. ²⁵ Tacahe, ena máimitureana tipiararecanapa eta napisirahi. Nacajamicapa éma. Ánipa náicha:

—Tata maestro, picatiuchahavi. Véricainapa —náichapa.

²⁶ Ema majicapavacapa:

—¿Tájaha tacayema epica? ¿Vahi ácasíñavapahini eta nutiarahirapahi eta eyehe? —macahepa.

Tásiha, téchepucapa. Macamatinacapa eta técatícava étapa eta une. Enevanepa tésamiricavahi eta táepacusirahi. Tájinapa táichiravainahini.

²⁷ Ena máimitureana ichaperinehi nárami. Ánipa nacahe:

—¡Tétavícavahi eta máitupajjiasiravahi! ¡Jéhesare, yátupiquene eta émairahi machichahi ema Viya! ¡Taicha tamutu tasuapahi, macamatinacahi eta técatícava étapa eta une eta táepacusirahi! —nacahepa.

Ena apinana ajairana návaháruana ena ichapemuriqeneana éreanana (Mr 5.1-20; Lc 8.26-39)

²⁸ Te titecapapa ema Jesús te apachara eta cáquiure te apaquehe Gadara, tiúchujicanapa te ecarí ena apinana ajairana, návaháruanahi ena éreanana. Tétavícava eta náínehivavacahí. Náehayarehi nácani tiánucuhanapahi. Tacahe, napauchapa ema Jesús. ²⁹ Tipiararecanapa, ánipa nacahe:

—¿Tájaha picha píteca pipauchahavi piti Jesús, Machichaquenevihu ema Viya? ¿Pivarahapa picaetemajiricahaviyare víti? ¡Pájapanuhavi, vuíchaha picuvanecahavi tayehe eta vicaicuñaiyayare! —nacahepa.

³⁰ Tásiha, tatiarihihivare nacachacayahi eta camuriqeneana cúchiana tinihicanahi. ³¹ Ena éreanana nayaseacapa ema Jesús. Ánipa náicha:

—Te piáquijicahaviyarepuca, picatajicahavi. Písapahavi visiapahacavaca eta jena cúchiana —náichapa.

³² Tacahe, ema Jesús máisapapa:

—Tiuri, eyana esiapahacavaca —máichapa.

Tacahe, tiúchucanapa ena éreanana nayehe ena návaháruanainihi. Tiárame-murihanainehi eta cúchiana. Tijunaparanapa témiririjicanapa te tachausi eta cáquiure. Téririjicanapa. ³³ Ena tijanearecanainihi eta cúchiana tiyananapa tijunana tayehe eta avasare. Timetajiricanapa eta náimairahi, étapa eta nanarasirahi ena návaháruanahi ena éreanana. ³⁴ Tacahe, tiyananapa ena achaneana te mávihahi ema Jesús, náimahapanahi. Te náimahapa éma, nayaseacapa vahi macuíticapahini te návasa, machavahini te másinehi.

9

Ena Jesús macanaraca ema émana achane macajumaquene eta mura-caquiha

(Mr 2.1-12; Lc 5.17-26)

¹ Tacahe, ema Jesús tichavapa tiávacuhavarepa te pacure. Tichavapa tayehe te mávasahi Capernaum. ² Ánaqui náimipauchavarepa ema achane macajumaquene eta muracaquiha. Ema tívécahi te mayehe camilla. Te máimahapa ema Jesús eta nacasiñavairahi eta mayehe, máechajicapa ema macajumaquene. Ánipa máicha:

—¡Pétumechava, nuchicha! Nucaepahainavipa eta pipecaturanaini —máichapa.

³ Natiarihi ena escribánoana. Eta nasamirahi ema Jesús, ánipa nacahe te nasamure: “Ema maca tépiyacava tímijachavahi Viya eta macaepahairahiji eta pecatuna. ¡Tétavícava eta matapirava!” ⁴ Émasera ema Jesús máimatihí eta napaneruanahi. Máichavacapa:

—¿Tájaha tacayema eta éjcapirava nuyehe te epanereruanahi? Núti tájina nutapiravaina eta níchirahi eta juca. ⁵ Núti, eta nucaepahairahi eta mapecaturana ema maca, tacutihí eta máejerererahi eta nucanarasirahi

eta máquehe. ⁶ Tiúrisera puiti, nuti Manerejirunuhi ema Viya, nímereuchavainapa eta nuratahairahi nucaepaha eta pecatuana te juca apaquehe. Ímararacanu —tacahe, máichapa ema macajumaquene—. Puiti, nuchicha, nuvanecavi péchepuca. Piveha eta jara piyereruva. Piyana te pipena — máichapa.

⁷ Enevanerinehi téchepuca ema macajumaquenéni. Tiyana te mapena. ⁸ Ichaperinehi eta náramirahi namutu ena achaneana natiarihiqueneanahi. Tétavicavarinehi eta nacunachirahi ema Viya taicha eta máitupajijiasirava ema Jesús eta májarasirahi ema Maiya.

Ena Jesús máichuha ema achane ticaijare Mateo, mayehyare apóstole (Mr 2.13-17; Lc 5.27-32)

⁹ Te apanapa sache, nuti Mateo néjacahi eta te nucobraresirare eta impuesto. Tacahe, tiánucuhapaipa ema Jesús. Te tímahanupa, tíchuanupa.

—Yare, péhicanu —máichanupa.

Enevanepa, néchepucahi. Néhicapa éma.

¹⁰ Tacahe, námapa éma te nupena, énapa ena máimitureana. Níchuhavacapa ena nuchamuriana ticobrarerahianahi eta impuesto énapa ena apamuriana tisipecaturana. Nénicavacayarehi éna. Macachanemurihivare ema Jesús eta vinisirahi. ¹¹ Títecapanavarepa ena fariséoana. Eta náimairahi namutu ena némunaruqueneana, eta vicachanerahi ema Jesús, ticaecahirecanapa. Ánipa nacahe nayehe ena máimitureana ema Jesús:

—¿Tájaha tacayema tísapava ema eyehe maestro macachanevaca eta mansirahi ena nánitatajiana ticobrarerahiana eta impuesto? ¡Ticapecaturarahiana éna! —nacahepa.

¹² Te masamairiricapa ema Jesús eta náechajiruvana, máichavacapa:

—Ena majumareanahi vahi nácamunuimahi ema médico. Nacarichu ena ticajumanahi nacamunuyarehi ema médico. ¹³ Nútiripa vahi étaina tímitcanuhi nutanucayarehi nácani matapiravareanahi. Nutanucapahi núti ena tisipecaturana, apaesa náeneuchava, náinajica eta napecaturana. Tásiha éti, eyana ecaravahu eta máechajirivanahi ema Viya. Ánipa macahe: “Núti nuvaraha yátupinaini eta eJapanuraivainahini. Taicha te vahi, tamapurujiyare eta ecamavahuirahi eta nuyehe” macahepa ema Viya.

Nayaserecapa ema Jesús tayehe eta ayuna (Mr 2.18-22; Lc 5.33-39)

¹⁴ Títecapanapa ena máimitureana ema Juan Tícachasiricarahi, nayaserecapa ema Jesús tayehe eta ayuna. Ánipa naicha:

—¿Tájaha tacayema vahi nahayunacha ena pímitureana, vahi nácutihavihini viti máimitureana ema Juan, énapa ena fariséoana?

¹⁵ Ena Jesús majicapavacapa:

—Nímicutichinahe puiti. Vahi táuricaimahi ticatisamurevana nácani ticaichuhacasianahi tinicanahi nayehe ena araimana. Tiúrisamureanayarehi taicha matiarhihi ema arayena. Téhesera te tépenapuca éma, jéhesare ticatisamurevanayarehi. Tacutiquene, vuíchaha táuricaimahi eta ayunanainahini ena nímitureana. Járापainapasera eta sácheyare, ticaverejicasianayare taicha ticaratacanuanainapa ena ticapacananaya núti.

¹⁶⁻¹⁷ Esamanuchaha. Eta juca eta nímiturapiana, amairiha arairu. Mavaraha ema Viya arairuyare eta eyeherepianayare eti achaneana. Vahi

ticiticacaimahi eta nayeherepiana ena achaneana. Eta ítusira éti eta nímiturapiana, tavaraha ínajica eta ichasi eyeherepiana tamauriqueneanahi — máichavacapa ema Jesús.

Ena Jesús macanaraca esu machicha ema Jairo, ésupa esu apana esena sucajumaquenehivare
(Mr 5.21-43; Lc 8.40-56)

¹⁸ Téchajiricavaichahahi ema Jesús nayehe ena achaneana, títecapanechavare ema émana achane ticaijare Jairo. Tuparairucahi éma. Matupirupa tépuyucapa te mamirahu ema Jesús. Ánipa macahe:

—Tátachicha, surarihi esu nuchicha. Puítirichaha tépenahi. Téhesera te piyana, pinacaini eta pivahu, suchavahini suítarecahina —máichapa.

¹⁹ Tásiha masuapapa ema Jesús. Tiyanapa te mapena ema Jairo, vimutupaichu viti máimitureana. ²⁰ Tásiha, sutiarihihivare esu ésuna esena sucajumaquene. Doce áñoripahi eta sucatajivairahi, táichirahi eta suítine. Témeñahavapa te maquecu ema Jesús. Suémamacapa eta tacheyarapi tamatsianahi eta mamuiriha. ²¹ Taicha te supanereru ésu, sucahehi: “Taratarichu jácani te némamaca eta ñimuiriha, éta ticanaracanuyare” sucahepa. ²² Émasera ema Jesús masamarichucha eta suémamajiasirahi, macaicutiarahi eta macanararesirahi. Téquerucavapa. Máimahapa eta supisirahi esu esena. Tásiha, máichapa:

—Vaipa picupica, nuchicha. Pinaracapa puiti táichavenehi eta picasiñairanuhi —máichapa.

Tacahe, tinaracapa esu esena. Vaipa tápechahini eta sujumainihi.

²³ Tiyanavarepa ema Jesús. Títecapapa tayehe eta mapena ema Jairo. Máimahainehi ena músicoana. Tiúrianaipahi eta námirayarehi te ecarí esu suépenaquene. Énapa ena achaneana, tijajamurianaripahi eta náiyairahi.

²⁴ Tásiha, ema Jesús máichavacapa:

—Íuchucachaha te aneca. Váhinéni suépenahini esu suca amaperu. Tímacarichucha ésu —máichavacapa.

Énasera nacaecahirichucha éma, técanapapa. ²⁵ Te tiúchucanapa ena achaneana, tisiapapa ema Jesús te suávihahi esu suépenaquene. Macarata-vauchapa ésu. Macaechepucapa. Tichavapa títarecahi ésu. ²⁶ Te nasamairiricapa ena ticavasannahi eta te Capernaum, náraminehi namutu. Nacatsa-
tsaicapa timetajiricanapa.

Ena Jesús macanaraca ena apinana púchuquiana

²⁷ Tiuri, tichavayarepa ema Jesús te mapena. Eta mapaisirahi te calle, náehicapaipe ena apinana púchuquiana. Tipiaracanapaipahi te máequene.

—¡Tátachicha Jesús, pájapanuhavi picanaracahavi. Vicasiñavi piti yátupi-
quenévihí Cristo! —náichapa.

²⁸ Váhisera masuapavanehini éma. Te tisiapapa ema Jesús te mapena, ena púchuquiana tisiapanavarepa. Témeñahavanapa eta mayehe. Tásiha, éma mayaserecavacapa. Ánipa máichavaca:

—¿Yátupipuca ecasiñairanuhi eta nucanarasiraheyare? —macahepa.

Ena najicapapa:

—Yátupi, tata.

²⁹ Tacahe, ema Jesús máemamacapa eta náuquihana. Tásiha, máichavacapa:

—Tiúri, eta ecasiñairanuhi, enaracayare —máichavacapa.

³⁰ Jéhesare, enevanepa tinaracanahi. Tímairiricanapa. Tásiha, mura-
capa eta matuparasira vahi nacumetajirica eta macanarasiravacahi éma.
³¹ Váhisera nácahehini éna. Étarichuhi te tiúchucanapa, timetajiricanapa eta
macanarasiravacahi. Tásiha, náechapa namutu te tachacayarahanahi eta
avasare eta juca máichaquenehi éma Jesús.

Ena Jesús macanaraca éma achane upa, macaechajicahi

³² Te viúchucavarepa, nacahepaipavare éna achaneana. Námapahi éma
achane. Úpahi éma, taicha mávaháruhi éma éreana. ³³ Tacahe, éma Jesús
máquijicapa éma éreana, éma tiávahácainihi. Tásiha, éma achane tinaracapa.
Téčajicapa. Ichaperinehivare eta náramirahi éna achaneana eta náimairahi.
Ánipa nacahe:

—¡Tétavicava eta máitupajijiasirava éma Jesús! Te viávasa Israel, nájina
tiratahaina tíchaina tácutihini eta juca vímahaquenehi —nacahepa.

³⁴ Nararihivare éna fariséoana. Ánipa nacahehi:

—Éma maca Jesús, vémeteaca majupahahi éma Satanás, éma náquenu-
murihi éna éreanana. Májararuhi jácani eta máitupajijiasiravahi eta macuchu-
siravacahi éna —nacahepa.

Ena Jesús majapanuvaca éna achaneana

³⁵ Éma Jesús tamutuhi mapaica eta avasareana éta pa eta ánichicha-
queneana avasarechichana. Tímiturecapahi tayehe te jácani máitecapi-
hapahi te náurujisirarevana. Ticametarairupahi eta máechajiriruva éma
Viya eta náuchucuirayare éna ticasíñanahi éma, machaneranayarehi éna.
Ticanararecapahivare éna ticatajivanahi ticatiruhanahi. ³⁶ Camuriana
éna achaneana títanajirícavanahi. Taicha ticatajivanahi éna, nájina nácasí-
ñahini. Nacutihí eta uvesa te nájina tíjaneacaina. Éta máimairavacahi éma
Jesús, ichape eta majapanuiravacahi. ³⁷ Tacahe, éma Jesús máichahavipa viti
máimitureana:

—Tétavicavapa eta vicamunuirava éna tímicatatahavianaya tayehe eta
juca vématanerepihi. ³⁸ Eyaseacayaresera éma Tata Vicaiyaquene, májara-
cahavi éna tímicatatahavianayare. Éta juca tímicutijiricavahi mácani achane
eta macamunuiravahi éna tímicatatacanaya te máechatijicaya eta ma-
harusura —máichahavipa.

10

Ena dócequeneana apostóleana manerejiruanahi éma Jesús
(Mr 3.13-19; Lc 6.12-16)

¹ Tacahe, éma Jesús tíchuhavipá viti dócequeneana, mayeaneanayare
apóstole. Tíjaracahavipá eta vítupajijiasiravayare viratahairayarehi vicuchu-
cavaca éna éreanana, vicanarasirayareva éna nacajumaqueneana éta pa eta
nacatiruhavana.

²⁻⁴ Éta juca víjareana viti apóstoleana*: Éma títapuca éma Simón Pedro,
émapa éma maparapeichu Andrés, éma Jacobo éma maparapeichu Juan, éma

* **10:2-4** Éna nani apinana ajairana éma Jacobo émapa éma Juan, naparapecacahi,
machichanaveanahi éma Zebedeo. Éma Mateo, éta máematanerepinihi, ticobrareca éta impuesto.
Éma apana Jacobo, machichahi éma Alfeo. Éma Lebeo, mapapihi éta májare. Ticajarehivare
Tadeo éta pa eta Judas. (Te pivaraha pecha, pitanuca te Marcos 3.16-19 éta pa te Lucas 6.14-16.) Éma
apana Simón, tímaticarehi éma, nachamurinihi éna revolucionárióana ticajareanahi “cananístana”.
Navaraha náquijica éna extranjeroana romanoana.

Felipe, ema Bartolomé, ema Tomás, nútupa Mateo, ema apana Jacobo, ema Lebeo, ema apana Simón, émapa ema Júlasí Iscariote (ema tíjararecahi ema Jesús).

Emá Jesús mavanecavacapa ena dócequeneana apóstoleana napaicayare tamutu avasareana, ticametarairuanayarepahi

(Mr 6.7-13; Lc 9.1-6)

⁵ Tacahe, ema Jesús tévatacahavipa viti dócequeneana apóstoleana vicametarairuyarehi. Ánipa máichahavi:

—Vahi ecuyana tayehe eta návasana ena apavasajuecuana. Váhivare ecuyana nayehe ena samaritanoana. ⁶ Eyanayaresera tayehe eta avasareana návasanahi ena vijaneana israelítana. Taicha éna nacutihi eta uvasana máquenureana. ⁷ Eyana ecametarairuyare nayehe. Emetacayare eta nútijapairainapa nuti Náquenuyare, nuti nucuchucuhavacayare éna, taicha mavanerunuhi nútí ema Viya. ⁸ Ecanaracavacayarepahi ena leprósoana énapa nácani ticatajivanahi taicha eta apana jumare. Ecachepucayareva ena náepenaqueneana. Ecuchucayareva ena éreanana. Éti, vahi evachare-ruinahi eta juca ítupajijiasiravahi, váhivare ecobrachimahi nácani ecanarayanare.

⁹ Váhivare iámaimahi eta oro, eta plata, eta reale. Tacuija iama eta enirurucuha te alforja. ¹⁰ Étanarichuvare emuiriha, éta iámayare. Étapa eta éparupeva, étaripa eta eyupairiquiana. Ema ticaematanerahi, tatuparacahi náenicayarepahi te jácani macaemataneiyapahi. Ene ecaheya éti, títátiheanayare ena tíjacapanaya eta ecametarairuirayarepahi.

¹¹ Te ítecapaucha jácani avasare, etanucayare ema achane tiuri, témunarahi. Enasiyare mayehe. Tiámainucava te táitecapa eta iúchusirayareva tayehe eta avasare, epaenumavaya ejunijica eta ítecapihahi. ¹² Te esiapayarepa tayehe eta peti, eyaseacayare ema Viya eta náuricacarevaina ena achaneana ticapenana eta peti. ¹³ Te tiúrianahi ena achaneana ticapenana eta peti, ímiyanava eyaseuchayare eta náuricacarevaina. Téhesera te vahi nacuri, váhi eyaseuchaimahi. ¹⁴ Étaripa te váhipuca nacujacapahe te jácani avasare, étapa te jácani peti ítecapihayare, váhivare nacubaraha nacusamahe, iúchucavane-yareva. Étatapevachavanúmayareséra eta máteji te ívapeana. Táicutiarayare eta máicuñasirayare ema Viya taicha eta namavarairahi najacapahehíni. ¹⁵ Nutupiruva numetacahe, te táitecapa eta juicio, tiápajucavainapa eta náicuñayare. Tacachuricayare eta nacaicuñairayare ena achaneana váinarajiqueneana ticavasaini te Sodoma étapa eta Gomorra.

Nacatianacainapa ena téhicanapahi ema Jesús

(Lc 12.2-7)

¹⁶ Esamanuchaha. Nútí nuvanecahehi éti eyana epaica. Nararihisera ena achaneana váinarajiqueneanahi étupiaruanayare. Éna nacutihi eta sárare táínehiqueneánahi. Étiserá ecutiyaere eta uvesa eta tamansuvahi. Ítucayare eta ecaichepaisirayare eta navainarajivana. Váhisera ecujicapauchava te návarahapuca náehahe. ¹⁷ Échapava, taicha nararihiyare ena achaneana ticatianacaheanayare táichavenehi eta éhisiranuhi. Ticaratacaheanainapa,

écyaserehinapa nayehe ena juéseana. Téstacaheanainavarepa eta te náuruji-sirarevana. ¹⁸ Tásiha, etiarhiyare éti tiámaheanaya te namirahu ena aque-nucana, téhevare te namirahu ena Presidenteana gobiernonahi, ecaviu-revayare táichavenehi eta éhisiranuhi. Esapihasera éti, ecamapuravainapa échajisianuyare te namirahu éna, apaesa náimatiyare namutu ena achaneana te avasareana eta nímiturapiana. ¹⁹ Tacahe, te jácani námahepapuca te nami-rahú ena aquenucana, vahi ecueñamava tayehe eta jácani échajiuuchiravayare, ecatiuchiravayare. Échajicayare eta échajiriruvana máijaruhehare ema Espíritu Santo te jena sache. ²⁰ Taicha máimahaheinepa, tímitucaheyare eta échajisiraya. Vahi étijivaimahi eta échajisiraya.

²¹ Natiarihiyareva nácani achaneana tíjararecanaya ena naparape-queneana, navarairahi náimicapaca táichavenénahi eta náehisiranuhi núti. Natiarihiyareva ena nácani náiyana, navarahayareva náijarareca ena nachichanaveana táichavenehi eta náehisiranuhi núti. Natiarihiyareva nácani nachichanaveana nacanarainapa ena náiyana, náimicapacainapa táichavenehi eta náehisiranuhi núti. ²² Namutuyaréni ena achaneana ticatianacaheanayare táichavenénahi eta éhisiranuhi núti. Téhesera ecamichahi tamutu, ímiyanavahi eta éhisiranuhi te táitavapa tamutu, nucuchucuhaheyare núti. ²³ Te napanajicahepuca te jácani avasare iávihihi, táichavenehi eta ecametarairuirahi, ejunayare tayehe eta apana avasare. Jéhesare, nuti Manerejirunuhi ema Viya, nútijapavanénapa. Vuíchaha ecuitahi epaica eta avasareana ne vijaneanana israelítana.

²⁴ Éti nímitureana, ticatianacaheanaya ena achaneana. Vahi epicauchaca-réimahi nayehe, táichavenehi éhisiranuhi núti. Ticatianacaheyaresera tacuti eta nacatianasiranuhi núti. ²⁵ Tíjarechaheanayare váinarajihe, máurishi-hepuca, tacuti eta náumehairanuhi núti. Étiserá, evapinavaya eta ecutira-nuyare eta nacatianasiranuhi nuti iáquenu, núti eyehenuhi maestro.

²⁶ Váhisera ecupicavaca ena ticatianacaheana. Ema Viya tímarara-caheya. Ticunachaheya eta ecamichirahi, evehainapa eta ícuchihi. ²⁷ Tásiha, étumechava eta ecametarairuiraya tamutu eta nímiturapiana te tamutu avasareana. Jácani néchajiriruvanahi te timapicu, éti ecuchujicayarehi te tíjarahí, emicauchiravacaya ena achaneana. Étaripa eta nujajairuhehi te vicarichuhi, epiaracainapa te calle. ²⁸ Vahi ecupica nácani nacapacapuca eta iáquehe, tacarichuchucha náituruequenehayare. Váhisera naratahaimahi nacamítiequeneha eta iáchaneva. Macarichu ema Viya epicayare, taicha éma máituruequenehahi tamutu. Maratahahi macamítiequeneha eta iáchanevana tayehe eta táíñehiquene ínfierno, te ecainajiruva táichavenehi eta episirapuca eta nacapasiraheyare.

²⁹ Nímicutichinahe eta cáyurechicha. Éti ímijachapapuca vahi tasivachahini éta. Téñamacareanahisera me Viya. Éma, téchavacahi eta táitaresirahi, étapa eta táepenirahi. ³⁰ Evetijipa éti, éñamacarepanahi me Viya. Éma, tímatipa eta tatupa eta echutimacana. Téchahehivare éma tamutu eta ítaesirana. ³¹ Eta tacahe, vahi ecueñamavahi éti tayehe eta ítaesirana, taicha tétavicavahi eta emunavahi mayehe.

*Vímereuchavayare eta véhisira ema Jesús
(Lc 12.8-9)*

³² Tímiyana ema Jesús tímitucahavi. Ánivare macahe:

—Namutu ena tímereuchavanahi eta náehisiranuhi te namirahu ena achaneana, núti apanavare nímereuchavaya eta nuchanerairavacahi éna mayehe ema Tata Nucaiyaquene, ema tiávihihi te anuma. ³³ Nácánisera vahi návarahahini tímereuchavanahi eta náehisiranuhi, núti apanava nímereuchaya eta vahi nuchaneranainahini éna, te mamirahu ema Tata Nucaiyaquene.

*Ena achaneana náepuruvacainapa nácani téhicanayare ema Jesús
(Lc 12.51-53; 14.26-27)*

³⁴ Éti ímijachaipapuca eta nítésirahi te juca apaquehe, tájina tácyemacaré mahi, tiúricacareyarehi nícha. Váhiserá ene tacahe. Níchaveneya núti, ena achaneana tépuruheanaya térajicavanaya eyehe. Eta tacahe, nuvaraha échapirica yátupina eta juca éhisiranuhi. ³⁵ Taicha puiti juca vicaijuheyare, mácani achane, te natiaríhi ena machichanaveana, nacatichayarehi ema naiya táichaveneyarehi eta máehisiranuhi éma. Ésurípa esu naena, nacatíanacayareva. Ésupa esu chinénaca, sucatíanacayareva esu suímase taicha eta suéhisiranuhivare esu apana. ³⁶ Ene nacaheya, nararihiyare ena tachichanaveana eta peti ticatíanacana ena náiyana te peti níchavenéhi núti.

³⁷ Nácánisera tínajicavana eta náehisiranuhi táichavenéhi eta nacatíanasira ena nachichanaveana, váipa tatuparacahini nuchaneranainahini. Énarípa nácani tínajicavana eta náehisiranuhi táichavenéhi eta nacatíanasira ena náiyana, énerichuvare vaipa tatuparacahini nuchaneranainahini. ³⁸ Énerichuvare nácani apaesaríchu eta navarairahi téhicanuanahi, váhivare náijaracavahini táimicapacahini eta náehisiranuhi, vaipa tátuparacahini nuchaneranainahini. ³⁹ Taicha nácani téñamavanahi eta náítaresira, tiávamirahuana eta náehisiranuhi, énajívyare ticamítiequenehavanaya. Énasera nácani yátupi tíjararecavanahi téhicanuana, táimicaparuanayarepuca eta náehisiranuhi, éna tíuchuchuanayare eta náítaresíryare.

*Jararíhi eta vícuchihi te anuma
(Mr 9.41)*

⁴⁰ Ema Víya máitsivachayare nácani tiúriana ena najacapiraheyare nasamahe éti. Taicha eta najacapirahehi, ticaecheranahi eta najacapíranuhivare núti; énerichuvare najacapahivare ema Tata Nucaiyaquene. ⁴¹ Énerichuvare nácani tíjacapanahi ema profeta nuvaneruhi, énapa ena achaneana tíuri eta náehisiranuhi, máitsivachayare ema Tata, máijarasíravacayare eta náicuchi. ⁴² Énarípa ena témunarahianahi nayehe ena nani ánichíchaqueneana téhicanuanahi, nacumpíracha eta une táichavene eta náehisiranuhi; énerichuvare jararíhi eta náicuchi quene —máichahavípa ema Jesús.

11

*Ema Juan Tícachasíricaríhi mavanecavacapa ena máimitureana
(Lc 7.18-35)*

¹ Te tamutupa eta máimitusírahavíhi ema Jesús víti dócequeneana mayeheana apóstole, tíyanavarepa eta te avasareana tayehe eta Galilea. Taicha mavarahíhi máimitucayare ena achaneana eta máechajírírvana ema Víya.

² Tíuri puiti, ema Juan Tícachasíricaríhi, mávinehi te cárcel. Ánaquí masamáírírícapa eta máíchaqueneanahi ema Jesús. Tacahe, máevatacapa ena

apinana máimitureana, nayaserepanayarehi ema Jesús. ³Te náitecapauchapa, náichapa:

—Ema viáquenu Juan tivanecahavihi viyaserepanaviyare te yátupihipuca pítiripahipuca Cristo ema vicuchapaquenehi, ¿téhésrapuca vimíyanavaya-repuca vicuchapa? —náichapa.

⁴⁻⁵Ema Jesús majicapavacapa:

—Nuvaraha ímararacaya eta níchaqueneana puiti. Nucaimairiricavacaipa ena púchuquiána. Nímipaisiraipa ena masariana. Nucanaracavacaipa ena leprósoana, énapa ena túhuquiñana. Nucaechepusiravacaipavare ena náepenaqueaneanaini. Énerichuvare níchuhahi ena páureana náeneuchavaya apaesa náuchucuha. Tásiha, eyana emetaca ema Juan tamutu. ⁶Vaipa macueñamava ema Juan eta nuyehe. Tétavicavahi eta máuricacarevahi éma, te ticasínavahi eta nuyehe —máichavacapa.

⁷Tacahe, tichavanapa ena vanairucanahi me Juan. Tásiha, tépanavavarepa téchajica ema Jesús, máechajisihapa ema Juan. Ánipa macahe eta mametasiravacahi ena achaneana:

—Nuvaraha epanereuchayare ema Juan. Te jácani vuíchaha nacaratacahíni éma, te eyanapa te mávapahi apaquehe te mávihahi, ¿tájaha eta epanereruana tayehe eta macametarairuirahi? Éti ímijachaipapuca mamapachichijiriruvaichucha eta máechajisirahi tacutihí te vímararaca ta taflurena eta acutena te tacayamuririjica eta técticava. ⁸Ímijachaipavarepuca tavayuaruhi éma tíurinanácavayarehi eta macamuirihairahi. Écharichuhi éti mácani tíurinanacavahi, píncanillahi eta máítaresira, váiparinehi tíuchucaimahi te sache, váhivare tìyanaimahi te mávapahiana apaquehe. Manasiqueneyarehi te jácani tíurina peti. ⁹Nuyaserecahe: ¿Tájaha eta ímijachirahi eta mayehe? ¿Ímatihipuca eta profetairahi éma? Núti numetacahe: Matupiruvahi eta macametarairuirahi ema Juan. Mavaneruhi ema Viya eta yátupiquenehi profetahi éma. Nájina mácutihini ena apamuriana profetana. ¹⁰Ema maca Juan émara máechajisihaquenehi ema Viya eta te Sagrada Escritura, ánipa macahehi: “Nuvanecayare ema tínapumirauchaviyarepahi ema ticametarairuyarepahi, apaesa natsecavapaipa ena achaneana eta najacapiraviyare” tacahepa eta Sagrada Escritura. ¹¹Núti nutupiruva numetacahe: Ema maca Juan, nájina mácuti nayehe ena achaneana. Tétavicavahi eta macunachacarevahi. Tiápajupanavahisera eta nacunachacarevahi nácani nuchaneranaya, apaesachichapucaini eta nacaicutiarairahi eta mapaneruana ema Tata.

¹²Ema Juan tépanavapa eta máímitusirahi ena achaneana tacamunuirahi eta náeneuchirava me Viya. Nararihisera ena vahi náuricahini nasamararacahini. Éta pa tímicitichahi témecatájivachahi éma. Puíticha tanasihi ticatichanuana núti apanava, témecatájivachanuanyare. ¹³Ema víyarahaini Moisés téchajisihanuhi eta te májurehi. Énaripa ena víyarahaini profetana náechajisihahi eta nitesirayarehi nuti Manerejirunuhi ema Viya. ¹⁴Puiti numetacahe: Ema Juan émaripahi ema profeta máiteruyarehi mavasiyarehi ema víyarahaini Elías, eta máinapumirauchiranuyare. ¹⁵Te evarahapuca ecaicutiara, tavaraha eta epanerechinavaya.

¹⁶⁻¹⁷Etiaríhíhísera eti achaneana puiti juca sácheana, eta emasuapajiravahi, nímicutihahesa ena amaperuana tíutseruanahi. Apapipijichucha eta nacayemaqueneanapahi. Ema apana macahepapuca: “Vépiyacaya eta

piéstachicha”. Énasea ena apamuriana vahi náisapavahini. Tásiha, ema apana macahepuca: “Vépiyacaya eta ecari”. Váhivaresera náisapavahini. ¹⁸ Ema Juan, te timerecavapa, muraca eta máimiturapianahi. Eta manicasareana, vahi tácutihini eta nancasareana ena achaneana. Nararihisera te emuri eta tépiyaequenehanahi éma. Náimijachahi mávaháruhi ema éreana. ¹⁹ Nuti Manerejirunuhi ema Viya, eta nítecapauchirahepa, nuchanehepaipa eti achaneana eta enisirahi. Etiarihivare eti épiyaequenehanuhi: “Ímaha ema maca, cánisiuquitataji, cávahárasí. Macachanevacapaipa ena achaneana tisipecaturarahianahi” ecahehi. Eti épiyacavapa épururahi, ticutirinehi yátupinahini échemarahihini. Tétavicavahisera eta éjecapiravahi taicha eta emasuapajiraivahi. Te yátupihihini échemarahi, ímatinuhini eta nuchavanahirahi eta me Tata —máichapa ema Jesús.

*Eta táicuñayare eta návasana ena achaneana masuapajirairahana
(Lc 10.13-15)*

²⁰ Ema Jesús tépanavapa máechajisiha eta táicuñayarehi eta avasareana máichinehi eta tiáramicareana. Ticaicuñayarehi ena tachichanaveanahi táichavenehi eta namasuapajiraivahi. Váhivare náeneuchavahini, náinajicahipucaini eta napecaturana. Máechajicapa ena achaneana tímicitijiricavahi natiarihinahini te mamirahu. Ánipa macahe:

²¹ —¡Páurehesami eti nujaneanana ecavasanahi te avasare Corazín! ¡Páurehesamihivare eti apamuriana nujaneanana ecavasanahivare te avasare Betsaida! Ichape eta ícuñayare taicha éti ímaharipa tamutu eta tiáramicareana níchaqueneanahi te emirahu, váhisera ávarahahini éneuchavahini. Ena nani achaneana ticavasanahi te Siria, apavasanahinéni, tétavicavahinéni eta namaurivahi, németecasera núti nasapihahipucaini téneuchavana te náimahahini eta níchaqueneanapahi. Enévanenahini náimerecavahini yátupi eta náeneuchiravainahini.

²² Numetacahevanesera: Te jena sáchevare, muracapanayare eta ícuñayare éti, taicha eta emavarairahi éneuchavahini. Tacachuricayare eta nacacuñairaya ena achaneana apavasanana ticavasanahi te Siria.

²³ Étiripa eti ecavasanahi te avasare Capernaum, tamapurujihí eta nímitusirahehi étapa eta ímairahi eta tiáramicareana níchaqueneana. Eti ecasiñavavaicahi, ímijachaipapuca eta ticayapaheyare te anuma. Ichapesera eta etsirihacarevayare, taicha épujuquichavayare eta te yucu taicha vahi éneuchavaimahi éti. Taicha te nímerecahini eta tiáramicareana tayehe eta avasaréni váinarajiquenehi Sodoma, tácutihini eta ímairahi éti, ichapehipucaini eta náeneuchiravainahini, váipapuca macuicuñacahini ema Viya. ²⁴ Numetacahevanesera: Ichape eta ícuñayare te táitecapapa eta júicoyare. Tacachuricayare eta náicuñayare ena ticavasanaini te avasare Sodoma —macahepa ema Jesús.

*Ema Jesús tíurisamuréinehi mayehe ema Maiya
(Lc 10.21-22)*

²⁵ Étarichuhi te jena hórachi, ema Jesús ánipa macahe:

—Tata Nucaiyaquene, tétavicava eta nucunachiravi. Jéhevare píti táquenuvihí eta anuma étapa te juca apaquehe. Títauchavaipa eta pipanereruhi. Vahi písapahini náitucahini eta júcana ena tímijachavanahi téchemarahiana. Énapasera píjaracahi ena nani téhicanuanahi, tájinahinéni náechemaraivainahini. Puiti nasapiharipahi nacachuricahi ena

títupajjiacavanahi. ²⁶ Tétavicavahi eta táurivahi eta pipanereruhi píti, Tata Nucaiyaquene.

Ena Jesús máichuhavaca ena navitajiruana, mavaraha macanaracavaca

²⁷ Tacahe, ema Jesús máichavacapa ena achaneana:

—Ema Tata Nucaiyaquene, ema tíjaracanuhi eta nútiraya néchaya tamutu. Nájina énajivainahini náimatihini ema Tata. Nucarichu nútí néchinavahi ena nímitiruanayare éma. Taicha nútí yátupihí eta nímatirahi ema Tata Nucaiyaquene; tacutiquenehi eta yátupirahivare eta máimatiranuhi éma.

²⁸ Yare, ecasiñanu emutu eti evitajiruanahi te iáchanavana eti éyarecarahiana eta éjecipiravana. Nútí nuncanaracahyare. ²⁹ Ísapava nunacasahe eta nuyehe yugo. Nucachanehe apaesa ecaravahu nuyehe, taicha nútí mánsunu, tétavicava eta núriva eta nusamure. Éti tétavicavaya eta iúricacarevaya te iáchanavana te ejaçapa eta nímiturapiana. ³⁰ Taicha eta nuyehe yugo vahi tácajera. Tipevejiyare esama —máichavacapa ema Jesús.

12

Ena fariséoana náimipicauchahi eta nayeherépiana tayehe eta sávarumuhuana. Émasera ema Jesús máimereuchahi émarichu téchahi eta nayeherépiana ena achaneana eta sache nanarasirayare.

(Mr 2.23-28; Lc 6.1-5)

¹ Eta jena sávaru, ema Jesús tiyanapa tipaica. Tiámahavipa viti máimitureana. Témehicavanapa ena fariséoana. Vétavivijicapaipahi eta isanitia. Tacahe, eta vipaisirapahi, véchupaipa viti máimitureana. Tásiha, vivechuquiha-paipahi étajavapahi eta trigo. Vivepiraquihapaipa, vépurajacachavapaipahi. Vinicapaipa, taicha tísapacareichucha. ² Énasera ena fariséoana eta náimarasirapahi, tisemamajuheanapa. Ánipa naicha ema Jesús:

—Pímaha ena pímitureana. Ticaemataneanapaichucha eta navepiraquihapahi eta trigo puiti juca sache tétavicavahi eta tacapichuirahí. Vahi tísapacaremahi eta juca nacaematanérahí puiti —náichapa.

³ Tásiha, majicapavacapa ema Jesús:

—Németeaca éti vahi ecaicutiara eta tacayemaquene eta Sagrada Escritura, eta máichavaquenevahi ema víyahaini David eta mapaisirapahi téchupaipa, énerichuva ena téhicanapahi. ⁴ Écharichuhi éti te masiapapa eta mapena ema Viya, tiyaseserecapa eta manicayarehi. Nájaracapa eta pan tacapichuquenehi nanacasarehi te mamirahu ema Viya. Nanicasarehi ena tiyujaracarahiana, émasera ema David vahi tátuparacahini manicahini. Étasera eta máecuavahi, manicapa eta pan, énapa ena macachanequeneanapahi. ⁵ Váhipuca échajicuha éti eta te Sagrada Escritura eta mavanairipi ema víyahaini Moisés eta nayehe ena tiyujaracarahiana téchapajiricanahi eta Templo. Éna, tájina natapiravainahini eta nacaematanerahi te sávarumuhuana. ⁶ Tavetijichapuca puiti nutiarhipahi nútí. Ichápequenénupánahi tayehe eta Templo. ⁷ Éti váhivare ecaicutiara eta juca máechajiriruvana ema Viya: “Núti nuvaraha yátupinaini eta ejanapuraivainaini. Taicha te vahi, tamapurujiyare eta ecamavahuirahi eta nuyehe” macahepa. Te ecaicutiarahini, váhiyarehini ecaechavaca ena nímitureana, taicha éna tájina natapiravainapahi. ⁸ Tiuri puiti, numetacahyare: Núti Manerejirunuhi ema Viya, nútirichu néchahi eta sache nanarasiraya ena achaneana —máichapa.

Ena Jesús macanaraca ema achane tépenavahu

(Mr 3.1-6; Lc 6.6-11)

⁹ Te apanavarepa sávaru, tiyanavare ema Jesús tisiapahi tayehe eta náuruji-sirareva. ¹⁰ Ánaqui matiarahi ema achane vaipa tayamurichahini eta mavahu, tépenavahuipa. Natiarilihivare ena fariséoana, natanujiricahi eta ticaviurevayarehi ema Jesús. Nayaserecapa éma:

—¿Táuricapuca vicanaracava ena nacajumaqueneana te sávarumuhuana tacapicahuquenehi? —náichapa.

¹¹ Ena Jesús majicapavacapa:

—Nímicutichinahe puiti. Németeaca májina émanaina achane vahi macujapanuhini eta máitatiquene uvesa, te téchipaicavapuca te pusu te jena sache tacapicahuquenehi. Eta máëñamirahi, tipatsicava mavecuha eta paure sárare. ¹² Núti numetacahe: Ena maca achane tiápajucavahi eta téñamacare tayehe eta uvesa. Tacahe, tísapacaréchucha víchayare eta táuriqueneana te sávarumuhuana —máichavacapa.

¹³ Tásiha, ema Jesús máichuhapa ema achane ticajumavahuhi:

—Nímaha. Picajaruvauchava, pímereca eta pivahu —máichapa.

Tacahe, ema achane eta macajaruvauchiravahi, enevanerinehi tinaraca eta mavahu. Tiúrivarepa tichava, tacutipa eta mavahu sapa. ¹⁴ Tisemanarinehi ena fariséoana eta náimairahi eta máichaquenehi ema Jesús. Tiyananapa. Tinacuchavanapa eta napanerechirahi eta nacapasirayarehi ema Jesús.

Ena Jesús tiyanavarepa tipaicahi

¹⁵ Tacahe, ema Jesús, te máechapa eta napanererihi ena fariséoana, navarairahi nacapaca, tiyanavarepa tipaicahi. Náehicapa ena camuri-queneana achaneana. Énerichuvare, náitecapauchapaipa ena nacajumaqueneana. Macanaracavacapaipa namutu. ¹⁶ Mavanecapaisera ena macanararuanapahi vahi nacumetajirica eta émairahi ticanaraca. ¹⁷ Eta juca títauchavapahi eta máechajiriruvahi ema Viya tayehe eta májurehi ema víyarahaini profetai Isaiás. ¹⁸ Ánipa tacahehi: “Nuvaraha ímatiya ema vanairucahi nuyehe, nunerejiruhi núti. Tétavicavahi eta némunasirahi, núsismurehivare máicha. Ímatiyare éma taicha mávaháruhi ema Espíritu Santo májjararui éma. Ena nuvanara, tímitucavacayare ena achaneana te tamutu avasareana eta nuvanairipianahi. ¹⁹ Éma, tájina máitucaimahi téhacaca. Váhivare tiplararecaimahi, macunachiravahi te cálléana tayehe eta máichaqueneanahi. ²⁰ Mánsuhi éma taicha ticayehihi paciencia. Macamichavacahi namutu. Váhivare macajachaimahi nácani vahi túmeanaina. Tiámainucava te máejacapa tayehe eta mávacureyare, muracainapa eta mávacureyare. ²¹ Tásihasera, namutu ena achaneana te avasareana ticunevayare eta mayehe, navarairayare máurichayare éma” macahepa ema Viya.

Ena fariséoana téjecapavanahi eta náimijachirahi ema Jesús mávaháruhi ema Váinaraji Satanás

(Mr 3.19-30; Lc 11.14-23; 12.10)

²² Tacahe, ena achaneana námapaipa ema achane púchuqui, úpavare, taicha mávaháruhi ema éreana. Navarahahi macanaraca ema Jesús. Jéhesarehisera ema Jesús macanaracahi. Tiúripa téchejica, túmairiricavarepa. ²³ Ichaperinehi nárami ena achaneana. Tásiha, ánipa nacahe:

—Ema maca Jesús, émapachupuca ema Cristo, ema vicuchapaquenehi mámariequene ema víarahaini David —nacahepa.

²⁴ Énasea ena fariséoana napanerechahi náepiyaequenehayarehi. Ánipa nacahe:

—Ema maca Jesús, eta macchusiravacahi ena éreanana, vémeteaca májjararui eta máitupajjiasiravahi mayehe ema Satanás, ema náquenu-murihi ena éreanana —nacahepa.

²⁵ Ema Jesús máimatihí eta napanereruhi éna. Tacahe, máichavacapa:

—Nímicutichinahe puiti ena machanerana ema gobierno. Éna vahi típutsimuriahacacanaímahi apinainahipucaini partido. Te típutsimuriahacacana, énajicacaipapucaini tiáquipaicacana. Énaripa ena achaneana te avasare, vahi táurica náiputsimuriahavahini. Émaripa mácani achane, te camurianahi ena machichanaveana, váiparinehivare típutsimuriahavanaimahi náehajiricacahini, énajiricacahini náquipairicacahini. ²⁶ Ene macahehi ema Váinaraji Satanás, váiparinehi máisapahini típutsicacana ena machamuriana, taicha mavarahahi tisimutuanayarehi éna, tímiyanavanayarehi eta nacaetemajirisirahaviyarehi. ²⁷ Éti ímijachaípa nútirichu machamuri ema Satanás, táichavenehi eta nuratahairahi nucuchucavaca ena éreanana. Tájina vahi étupicavahini éti eta juca epanereruana. Te émahipuca tímicitacanuhi ema Satanás, énerichuhivare éti máimicataruanahivare jácani éma, eta ecuchusiravaca ena éreanana. Epanerechinávanuma. ²⁸ Émaquenehisera ema Espíritu Santo, tíjaracanuhi eta juca nuratahairahi nucuchucavaca ena éreanana. Eta juca étara ícutiaraya éti eta matuparasiranuhi ema Viya eta nútirayare nécha tamutu. Nútiripara nuti ecuchapaquenehi.

²⁹ Nájina tisiapaimahi eta námerecahíni te jácani peti matiaríhihi ema túmequenehi. Tacamunuhi nacaratacanumayare, náitiacanumayarehi éma. Jéhesare, náituruyechasareyarepa eta máimahaqueneana. Ene nacahehi nútí, túmepananuhi mayehe ema maca Satanás.

³⁰ Te vahi éhicanu, ecaemataneasiranuya, machamurihehi éti ema ticatianacanuhi. Masapiha ímicatacachi éma eta macaetemajirisiranuhi.

³¹⁻³² Nutupiruva numetacahe: Eperdonachacareana eti achaneana eta epecaturana, tamutu jácani échajisihaira eta táíñemahiqueneana. Jácani te ecaecahinuhipuca nuti Manerejirunuhi ema Viya. Jararihísera eta epecatura vahi típerdonachacaremahi. Éti ímijachahi ema Satanás ema tiávahácanuhi. Ichape eta éjecapiravahi, taicha ema tiávahácanuhi nútí, émaquenehi ema Espíritu Santo. Éti epanararacaripa éma. Tásiha, tájina eperdonachacareímahi puiti juca ítaresiraichaha, evetijipa te apana ítaresira —máichavacapa.

Ema Jesús máimicuticha eta táhi eta yucuqui
(Lc 6.43-45)

³³ Tímaticare eta yucuqui te tíurínisihí eta tacahira. Tímaticarehivare eta apana yucuqui, máuriraha eta tacahira. ¡Epanerecha! Nútí níchahi eta táuriqueneana nayehe ena achaneana ticatajivanahi. Éta tímereuchanuhi eta mávahásiranuhi ema Espíritu Santo. Téhesera nucaetemarecahíni, nícahíni eta máematanerepiana ema Váinaraji, jéhevaeserapucaini eta tímereuchanuhini eta mávahásiranuinahini éma. ³⁴ ¡Étísera machichanaveanatajaji ema Váinaraji! Váiparinehi ítucaímahi échajisíha eta táurinaqueneana, taicha

éti tamaverasiavahi eta evainarajivana. Eta échajiriruvanahi ticaecherahi eta evainarajiva te esamureana. ³⁵ Nácani tiúriana achaneana, tatupiruvahi eta náechajirisirava taicha tiúrihi eta nasamure. Nácanisera achaneana váinarajiana, vahi tiúrimahi eta náechajirisirava. Tíñemahipivacahi taicha tavayuchahi eta tavainarajiva eta nasamure. ³⁶ Nutupiruva numetacahe: Te táitecapa eta sache táitecapirayare eta juício, emutu ecayaserehiyare eta échajisihairana eta tamaeperajiqueneana. ³⁷ Étaripa eta tiviuhaeyare. Téhesera tiúrihipuca eta échajisihairahi, vahi ecaicuñaimahi. Tájina tiviuchá-hémahi —máichavacapa.

Éma Jesús macajachavaca ena fariséana taicha eta namasuapajiravahi (Mr 8.12; Lc 11.29-32)

³⁸ Tacahe, nayaseacapa ema Jesús ena fariséana énapa ena escribánoana.

Ánipa náicha:

—Tata maestro, vivaraha picuchucaini eta tiáramicare, te yátupipuca mavaneruvahi ema Viya —náichapa.

³⁹ Éma Jesús majicapavacapa:

—¡Eti achaneana váinarajiqueneana! Núti nímatihe. Vahi esuapanuimahi, te nímercapucaini eta tiáramicare. Tásiha, váhinéni étina tatuparaca ímahahini eta tiáramicareana. Ímahayaresera eta tiáramicare tacutiyare eta máichavac-quenevahi ema víyarahaini profetaíni Jonás. ⁴⁰ Taicha ema Jonás masiapajuechahi eta ichapequene jima, mapana sache eta mayerevahi, mapanavare yati. Ene nucaheyare, núti Manerejirunuhi ema Viya, mapanayare sache, mapanavare yati, eta nucaheyare eta nucaecarasirayare. ⁴¹ Éta jena sácheyare téchepucanayare namutu, tíuchuchuhanayare ena achaneana ticavasanáinihi acane te Nínive. Tisipecaturarahianahinéni éna. Natupiruvahisera nasuapa eta mametarairu ema Jonás. Téneuchavanavanehi. Tásiha, te jena sácheyare, nacahenapa eyehé éti: “Táuricapa nacaicuñahini ena nani maparajuruana ema Cristo, táichavenehi eta namasuapirahi éma. Taicha éma, máuriquenepanahi mayehe ema Jonás” nacahénapa. ⁴² Tacutiquene esu reina Seba eta acane, te susamairiricapa eta máitupajijiasiravahi yátupi ema Salomón. Ésu, tayérehiquenehinéni eta suávasa, tiyanahisera sucapayaca ema Salomón taicha suvarahahi susamayarehi éma. Tacahe te téchepucanapa namutu, ésu suyaseacainapa eta ecaicuña éti máetupicushmanahi puiti. Sucahenapapuca: “Táuricapa nacaicuñahini ena nani máetupicushmana, tájina náetseraruina nasamaripa ema Cristo, ema titupajijíapanavahi mayehe ema Salomón, tásiha vuíchahacaruva nasuapa” sucahénapapuca jácani.

Éma Jesús máimicutichinahi ena masuapajirairahana mayehe (Lc 11.24-26)

⁴³ Tímiyanava eta máechajisiravahi ema Jesús, ánipa macahe: —Énerichuvare éti ecuti mácani achane máinajiruhi ema émana éreana. Éma éreana tiyana matanucainapa eta jácani masiapihayarehi. Éta mamaichimavira eta mavarahaquene, mapanerechayarehi tichava. ⁴⁴ Macahénapapuca: “Nuyanayare nuchava, nusiapayareva mayehe ema návaháruinihi”. Te titecapapa ema éreana mayehe ema achane mávaháruinihi, máimihapa ema achane máinajicaripa eta mapecaturana, vuíchahasera máehichahini ema Viya. ⁴⁵ Tásiha, tiúrisamurepa ema éreana. Tásiha, tíchuarecapa ena síétequeneana machamuriana. Váinarajipanana éna. Nasiapahacainavarepa namutu éna.

Jéhesare, tiápajucavapa eta mavainarajiva ema paure achane. Ene ecaheyare éti, taicha eta emasuapiranuhi —máichavacapa ema Jesús.

*Suítecapauchapa esu maena ema Jesús énapa ena maparapenaveana
(Mr 3.31-35; Lc 8.19-21)*

⁴⁶ Tímiturecarichaha ema Jesús nayehe ena achaneana, títecapanecha esu maena énapa ena maparapenaveana. Nanasihisera te aneca. Navarahahi náechajicayarehi éma. ⁴⁷ Natiarihihi ena timetapananahi ema Jesús. Ánipa nacahe:

—Esu pémunaruquenehi pena énapa ena piparapenaveana, nararihi ani te aneca. Navarahahi téchajicaviana —náichapa.

⁴⁸ Émasera majicapapa:

—Yátupi némunacavacahi esu meme, énapa ena nuparapenaveana. Nararihisera ani te juca nuchacaya ena némunaruanahivare, nuparapenaveanahi.

⁴⁹ Tásiha, tisuvechahavipa viti mayeheana apóstoleana. Tásiha, macahepa:

—Numetacahe, ena nani ena némunaruanahivare. ⁵⁰ Taicha namutu nácani ticaemataneacanahi me Tata tiávihahi te anuma, énahi ena némunaruanahivare —máichavacapa.

13

*Ema Jesús máimicutichinavaca ena achaneana eta evaraqui tacaevaquenehi
te apanapanenejiquene máteji*

(Mr 4.1-9; Lc 8.4-8)

¹ Te jena sache, tiyanavarepa ema Jesús, macaijuhe te tachaui eta cáquiure. Téjacavarepa eta ánaqui eta máimituresirayarehi. ² Tásiha, camuriannahivare ena achaneana títecapachanahi éma. Eta navayuchirripa ena achaneana, tiyanapa ema Jesús tiávacuhapa tayehe eta pacure. Ena achaneana nanasipa te tachaui tiájipahi. ³ Tásiha, camurihi eta máimicutichaqueneanahi eta máimitusiravacahi. Ánipa macahe:

—Matiarihi ema émana achane. Tévapanahi te máesane. ⁴ Eta mapaisirapahi, témiricapaipa eta evaraqui te achene. Táimahapa eta cáyure, tanicapa. ⁵ Eta mayherepi éma eta máevasira, máevajajapaica eta apaquehe. Tásiha, eta apamuri evaraqui témiricapa te váhirichu tamitutihini eta máteji taicha máripahi eta apaquehe. Tímarucavanepaneni táicha. ⁶ Téhesera te tíjurepa eta sache, tacapajicapa; taicha váhirichu táuparevacahíni. ⁷ Tacahe, eta apana evaraqui témiricapaipa te tataracu eta itapeaire. Tiúrinahinéni eta táimarusirahi, étasera eta itape tacachuricapa eta tajurusirahi. Táemuriachapa eta sucureca. ⁸ Tacahe, eta apamuri evaraqui témiricapaipa te tiúrina máteji. Tiúrinapanahi eta tajurusira. Eta étana, ticahipa tétupicavapanapa. Eta apanavare, ticahipa ánimurichu. Eta apanavare, ticahivare apaesasajiruichu. ⁹ Esamararacanu emutu éti. Te evarahapuca eacacutiara, tavaraha eta epanerechinavayare.

*Ema Jesús máitametacaquenevacapa ena apóstoleana eta juca máimiturapihi
(Mr 4.10-20; Lc 8.9-15)*

¹⁰ Tacahe, viti mayeheana apostóleana vémeñahavapa eta mayehe ema Jesús. Viyaseracapa tájahapuca tacayemahi eta máimicutiarachiravacaichucha eta máimitusiravacahi ena achaneana.

¹¹ Tásiha, ema Jesús tijicapahavipa:

—Ema Tata tituparacanuhi nítametacaheyare éti eta juca táequenereruana mapanereruana. Mavaraha ímatiequenehaya éti. Énasera ena apamuriana achaneana vahi nítametacavacaimahi, náimainavainepa éna. ¹² Éti, te esuapa yátupihí eta nímiturapiana, ema Espíritu Santo túmitucaheyá tamutu eta tacayemaqueneanahi. Énasera nácani vahi návarahahini nasuapa, énjajivayare tíchavana ticaverejicasianaya eta nasamaqueneanahi. ¹³ Eta tacachehi eta nímitusiravacahi, nímicutiarachinavacaichucha. Te apaesarichu eta navarairahi náituca, vahi nacaicutiarahini eta juca nímechaqueneanahi. Nasamahi eta néchajiriruvana, váhisera nacaicutiarahini eta nímitusirahi. ¹⁴ Puiti ena nani achaneana nacuti ena achaneana acane, vahi nasuapahini ema víyarahaini profeta Isaías. Ánipa macahe: “Nímatihe éti. Esamayarenénipuca, váhisera ecaicutiaraimahi. Ímahayarehinénipuca, váhivaresera ímatiequenehaimahi. ¹⁵ Taicha eta esamureana eti achaneana, tétavícavahi eta tamuracava. Vahi evaraha esama. Épiyacavahivare púchuquihe, emavairahi esuapahini te esamureana. Tájinapa táichahíni vicuchapahini eta éneuchiravainahíni, evarairapucaini ecasiñavahini me Viya, apaesa macanacacahéhini” macahepa ema víyarahaini Isaías.

¹⁶ Étisera eti nímitureana, tétavícavahi eta iúricacarevahi, taicha esuapahi eta juca ímahaqueneanahi étapa eta esamaqueneanahi. ¹⁷ Nutupiruva numetacache: Acane ichapemuriana ena achaneana tíuriana énapa ena víyarahaini profetana, tétavícavahi eta navarairahi tímatinuana, náimahavare eta juca níchaqueneanahi ímahaqueneanahi. Navarahavarepa nasama eta nímituresirahi. Váipasera nacapayacahini.

¹⁸ Ácaicutiaracha eta juca nímicutiarachaquenehi mayehe ema tévacarahi. ¹⁹ Núti níchuhavaca ena achaneana, machaneranyare ema Viya ena téhicanuanayare. Tásiha, natiarihi ena achaneana nasamaripahinéni eta nímiturapianahi, émasera ema Váinaraji vahi máisapahini tánasihini te nasamureana. Enevanehi macamitiscavaca eta náimitucasivanainihi. Éna nacutíhi eta máteji muracpahiquenehi te achene. ²⁰ Natiarihivare ena apamuriana achaneana, nacutíhi eta máteji máripahi. Te nasamaraca eta nímiturapiana, natupiruvanehi nasuapa, túrisamureanainehi. ²¹ Váhisera náratahahini nacaravahuhini yátupinahíni. Vahi nácutihíni eta evaraqui tíúparehi. Ánipirichu eta náehisirahi, taicha vahi nacamichahini jácani nacatajivairanahi. Váhivare túmesamureanainahíni te tatiarihípa eta jácani nacatichaira ena achaneana táichavenehi eta náehisiranuhi. ²² Natiarihivare ena apamuriana achaneana nacuti eta máteji te távihahi eta itapequijiana. Énerichuhare nasamaracahinéni eta nímiturapiana. Napaneréquenehahinéni, tahapapiricavachisera eta jácani táicharacavayarehi eta náitaresira. Tavayuacavacavare eta tájiparacana, étapa eta navarairahi tirricochavana. Tamutu eta juca táemetavícahi eta navarairahi téhicanuana. Tamapurujiyarehi eta najacapirahi eta nímiturapiana. ²³ Natiarihiserá ena apamuriana achaneana nacutíhi eta tíurina máteji. Éna, tisamanuanahi. Náunacahi yátupi eta nímiturapiana, náimatiequenehairahi. Tájinavare náichiravainahíni eta náehisiranuhi. Ichape eta nacaemataneasirahi ema Viya. Nararihi ena apaesarichu eta nacaemataneasirahi. Nararihivare ena apamuriana, nativarerehapanapa eta nacaemataneasirahi. Tásiha, ena apamuriana, ichapemuripanapa eta nacaemataneasirahi ema Viya —macahepa ema

Jesús.

Ena Jesús máimicutiarachina eta sucureca trigo étapa eta ejare

²⁴ Ena Jesús máimicutiarachavare ena achaneana eta máimitusiravacahi:

—Puiti nuvaraha nímitucahe tatiarihiyare eta sácheyare te táitecapapa eta nacayeserehiraya me Viya ena achaneana. Tacutihi eta máichavaqueneva mácani achane tévacaarahi eta tiúrina evaraquí tayehe eta tiúrina máteji.

²⁵ Étasera te tímacapa ema ticayehe eta sucureca, macahepaipa ema macatiana. Máimisiriqúichinapa eta táifñemahiqueneana ejare. Tásiha, tiyanapa.

²⁶ Tacahe, te tímarucainipa eta evaraquí trigo, tiúchucavarepa eta ejare, tacachaneapaipa eta evaraquí.

²⁷ Náraminehi ena machanerana hi ema achane tévacaarahi. Tiyananapa nametapana ema náejaháruhi. Ánipa náicha: “Tata, eta jena pévacaquihí, tájina tacasiriqúihini eta táifñemahiqueneana ejare. Puítisera tiúchucapa tacachaneapaipahi eta pévacaquihí” náichapa.

²⁸ Ena náejaháruhi majicapapa: “Matiarihi mácani ticatianacanuhi. Éma tíchahi eta juca, tímisiriqúichinanuhi”. Tásiha, ema machanerana náichapa: “¿Pivarahapuca, tata, viyana víti vívepuríha eta jena ejareana?”

²⁹ Éma majicapapa: “Vahí tiúririne, taicha machu táimivepurica eta névacaquí trigo.” ³⁰ Tácuticacárichaha eta tajurusirayare. Tiámáinucava te tacaechatíjipa, nuanecahénapa éti nuchanerana tativayare evepurica eta ejarejana, ítijicainapa eta tacaijuirayare. Tásiha, evehainasarepa eta trigo, ticaunainapa te tacaunairare”.

Ena Jesús máimicuticha eta taquí eta mostaza

(Mr 4.30-32; Lc 13.18-19)

³¹⁻³² Ena Jesús máimicutiarachavare eta taquí eta mostaza eta máimituresirahi. Ánipa macahe:

—Puiti nuvaraha nímitucaheya eta apana tayehe eta evaraquí ánichichaquene, étasera te tijurucapa, tíñejyarehi. Tacaheyare eta tajurusirayare eta nímiturapiana nayehe nácani tijacapanayare. Ímatichuhi éti eta taquí eta mostaza, eta ánichichapanahi tayehe eta apamuriana evaraquiana. Tásihasera te tímarucapa, tiúnayarehi eta táenaquí, tacutiyaehi eta yucuquí eta táichapeva. Tacachuricayarehi eta apamuriana evaraquiana. Járjapainapa eta cáyureana. Táepiyacainapa eta tamacajiana te tatavavajiana. Ene tacaheyare eta tajurusirayare eta nímiturapiana núti Manerejirunuhi ema Viya.

Ena Jesús máimicuticha eta levadura

(Lc 13.20-21)

³³ Énerichuvare máimicutichina eta juca apana máimituresirahi. Ánipa macahe:

—Tacutiquene, eta juca nímiturapiana tímicitijiricavahi eta levadura. Esu súcani esena tiúrihi eta tasisijisira eta suyehe levadura te tamutu eta suépiyaruhi masa, tayanapane apinapucaini arroba eta suyehe jarina, tasiha-jicahisera. Jéhesare, tiápucayarehi tiuri.

Camuri eta máimicutichaqueneana

(Mr 4.33-34)

³⁴ Ena Jesús tamutu máimicutiarachinapahi eta máimituresirahi. Tájina étahena te tímitureca, vahí macunacahini eta máimicutichinaqueneana.

³⁵ Títauchavahi eta juca máechajiriruvanahi ema émana profeta. Ani macahehi: “Tamutu eta nímiturapianayare nímicutichinayarepahi. Nímicaecherachainapa eta táeñaurevaquenehi te tépanavainapa máepiyacainapa ema Viya eta apaquehe” macahepa.

Éma Jesús máimicaecherachapa eta máimicutichaqueneanahi tayehe eta trigo étapa eta ejare

³⁶ Tacahe, ema Jesús mavanecavacapa ena achaneana nayanapa te napenana. Éma apanava tiyanavarepa tichava te mapena, vítipa viti mayeaneanahi apóstoleana. Tacahe, te véjacapa vimutu, viyaserecapa máimicaecherachahini eta máimiturapihi máimicutichaquenehi eta ejare tacachanequenehi eta trigo. ³⁷ Tacahe, ema Jesús máichahavipa:

—Nuti Manerejirunuhi ema Viya nucutihi ema achane tévacahi eta tíurina evaraquí. ³⁸ Eta apaquehe tacaevaiyahi eta trigo, énahi ena achaneana te juca apaquehe. Eta tíurina evaraquí, étihi eti nuchaneranahi núti. Tásiha, eta ejare énahi ena machaneranahi ema Váinaraji. ³⁹ Taicha ema ticatia-nacanuhi, manacahi eta ejare, mavarairahi máepacuchayarehi eta névaruhi núti. Eta tacaechatijirapa eta trigo, étahi eta táitavirayare eta apaquehe. Nárajapayarepa ena ángeleana, ticurujiricanayarehi. ⁴⁰⁻⁴² Tásiha, te jena sáchezare, nuti Manerejirunuhi ema Viya nuvanecainapa ena nuyeheana ángeleana nacavehasi ena tichanahi eta máeperajiqueneana énapa ena tímiaquipaicana ena apamuriana achaneana. Tásiha, náquijicavacainapa eta te táijurequenehi yucu. Ticapitiquiahechavanainapa eta tacataviyare nasama. Tíyahanainapa. ⁴³ Tásiha, nácani titauchanahi eta mavanairipianahi ema Viya, tétaavicavayare eta najaraivayare tacutiyare eta tajaraiva eta sache. Téjacanainapa tayehe eta macatuparahaiyahi ema Vicaiyaquene. Te evarahapuca ecaicutiara, tavaraha eta epanerechinavaya.

Éma Jesús máimicuticha eta entierro

⁴⁴ Eta nímiturapiana nuti násihaquenehi te anuma tacuti eta tayumuru-revaquenehi entierro. Te máichimavahi mácani achane eta entierro, tíurisamureyarehi. Tásiha, máimichavayarehi mayumuruca tayehe eta apaquehe távihahi. Mavacharecayarepa eta apaquehe, mavarairayarehi eta entierro. Tayanapane táimijararecayarepa tamutu eta macayehequeneanainihi.

Máimicutichavare eta perla tasivachaquenehi

⁴⁵ Énerichuvare eta najacapirahi ena achaneana eta nímiturapiana nuti násihaquenehi te anuma tacuti eta macaematnerahi mácani achane comerciantepahi. Matanucapahi eta tasivachaqueneanahi perla. ⁴⁶ Te máichimavapa eta perla matanurepahi, tétaavicavahi eta tasivachavahi. Mavarahasera mavachareca eta perla, tayanapane táimijararecayarehi tamutu eta macayehequeneanainihi.

Máimicutichavare eta ichape nayutahe

⁴⁷ Énerichuvare nuvaraha nímitucahe tayehe eta sáchezare eta táitecapirayarehi eta ecuñaraqui. Tacutihi eta ichape nayutahe. Te náechipaecapa te cáquiure, tamutu tavehayarehi eta tasimutuqueneana jímana. ⁴⁸ Te náimahapa tínica eta nayutahe, navehayarepa nachurupaicapa te táijipahi tachausi. Nanerejicayarepa eta jímana tíurinana. Nanacacuhayarepa te ichape maha. Tásiha, náquijicayarepa eta apamuri máurirahanahi. ⁴⁹ Ene tacaheyare eta táitavirayare eta apaquehe. Nárajapayare ena ángeleana, nanerejicainapa

ena achaneana tíchanahi eta tamauriqueneanahi. ⁵⁰ Náijuchainapa te yucu, táetaviuchahi eta táijureva. Ticapitiquiahechavanainapa eta tacativayare nasama. Tíyahanainapa —macahepa ema Jesús.

Emá Jesús mayaserecavaca te nacaicutiarahipuca eta máimiturapianahi

⁵¹ Tacahe, ema Jesús tiyaserecavapipa. Ánipa macahe:

—¿Ecaicutiarapuca éti tamutu eta juca nímiturapianahi? —máichahavipa.

Tásiha, víti vijicapapa:

—Vicaicutiara, tata —vicahepa.

⁵² Tacahe, máichahavipa:

—Eta yátupirapa eta ímatiequenehairapa eta nímiturapiana, éti apanavare máestrohénapa. Puiti nutuparacahe ímitucavacaya ena achaneana. Tétaví-cavaya eta ítamuturusirayare eta ímituresirayare eta mapanereruana ema Viya —máichapa.

Tichavapa ema Jesús te mávasa Nazaret

(Mr 6.1-6; Lc 4.16-30)

⁵³ Te tamutupa eta máimicutichirahi ema Jesús eta juca máimiturapiana, viyanapa. ⁵⁴⁻⁵⁷ Vichavapa tayehe eta mávasa. Te sávarumuhuquenepa, viyanavarepa tayehe eta náurujisirareva eta nayujarauchirahi ena achaneana. Tímiturecapa ema Jesús. Ichape eta tahapasamurechiravacahi ena achaneana. Váhisera návarahahini nasuapahini. Náepururichucha éma. Ánipa nacahe:

—Témunahiricava eta máitupajijiasiravapahi ema maca. ¿Távihásica macaravahuinehi eta máichirayare eta tiáramicareana? Vivaraha vímaha víti apanava eta jácani máichaqueneanahiji visamairirivanahi. Taicha vímatihí ema maca. Carpintérohi éma. Vímativare ema máiyaini, ésupa esu maena María, énapa ena maparapenaveana ema Jacobo*, ema José, ema Simón, émapa ema Judas. Vímativare ena esenana maparapenaveanahivare, ticavasanahi eta ani. ¿Távihásica máitusiavahi eta juca máitucaqueneanahicacha? —nacahepa.

Émasera máichavacapa:

—Tatuparaca epicauchahaviya vimutu víti mavaneruana ema Viya. Étisera éti nujaneananahi ecavasanahi eta te juca viávasa, étipa eti nuparapenaveana, vahi epicauchanumahi —máichavacapa.

⁵⁸ Tásiha, tájina máimerecachichaini eta tiáramicareana táichavenehi eta namasuapajiraivanahi, váhivare nacasiñavahini eta mayehe.

14

Emá Herodes masamairicapa eta máichaqueneanahi ema Jesús

(Mr 6.14-29; Lc 9.7-9)

¹ Tacahe, ema Herodes ema aquenucahi tayehe eta Galilea masamairiricavarepa eta máichaqueneanahi ema Jesús. ² Tacahe, ema Herodes máimijachahi ema tichavahi téchepuca ema Juan. Tásiha, máichavacapa ena máevanachanahi:

* **13:54-57** Ema maca achane, ticajarehi Jacobo te náechajiriruva ena israelítana. Te véchajiriruva, ticajarehi Santiago. Mapaenumavahi máehica ema Jesús te tájequenepa eta máechepusirahi te máecari ema Viáquenu.

—Ema mácara, émaripa ema Juan Tícachasiricarahi, ema nímicaparuhi. Tichavaripa téchepuca te máecari. Táitusiava máiturucahi macuchuca eta tiáramicareana —macahepa.

³⁻⁴ Taicha ema Herodes mavehahi esu Herodías, esu machinenahi, mayenahi ema maparape Felipe. Máiminajicapa ema suima. Tacahe, ema Juan macajachavacuripa éna eta naviracacairahi. Étapa tímicitichahi ema Juan, sucatichapa esu Herodías. Tásiha, ema Herodes máeratacapa te cárcel ema Juan, macavanaripipa náitiaca te cadena. ⁵ Taicha supamicahi ésu eta máimicapasirayarehi. Tipicahisera éma nasemahini ena achaneana. Taicha ema Juan, tétavacavahi eta náemunasirahi ena achaneana. Náimatihí éma, eta vanairucairahi me Viya.

⁶ Tásihasera, títecapapa eta sache máijaremuhu ema Herodes, sutiarihihi esu amaperu, suchicha esu Herodías. Tiúchucapa tírimaica te mamirahu ema Herodes, énapa ena machimaranahi. Ema Herodes máuricainehi ichape.

⁷ Tacahe, máichapa ésu:

—Nujuracha te pimirahu, eta níjarasiraviya jácani piyasearunuyare — máichapa.

⁸ Tásiha, esu amaperu suyaserecapa esu suena tájahahipuca eta suyasearuyarehi. Esu suena suímitucapa: Piyaaseacayare aní píchaya: “Píjaracanu eta ñichuti eñi Juan te curuja” píchayare.

⁹ Tásiha, eta masamirahi eta juca suyasearuhi, ema rey Herodes ichaperinehi eta mapanereresirahi. Tájinapasera máicharacavahini taicha máechajiriruvaipahi majurachaipahi te namirahu ena machimaranahi eta máijarasirayare eta suyasearuyarehi ésu.

¹⁰ Tacahe, macavanairipipa nayuchatiptiquenuhapana ema Juan. ¹¹ Tacahe, námapaipa te curuja eta machutini, náijaracapa esu amaperu. Tásiha, ésu sujacapapa, suíjaracapa esu suena.

¹² Títecapananecha ena máimitureanahi ema Juan. Navehapa eta máquehe, náecarapanapa. Tásiha, tiyananapa nametapanahi ema Jesús.

Ema Jesús máitaparahavaca máenicavaca ena camuriqueneana achaneana
(Mr 6.30-44; Lc 9.10-17; Jn 6.1-14)

¹³ Te masamairicapa ema Jesús eta nacapasirahi ema Juan, viyanapa víavacuhapa tayehe eta pacure. Vicaijuhepa tayehe eta apaquehe mávapahi. Énasea ena achaneana náecharichucha eta viyanirahi. Tiyananapa náehicahi típicanapahi. ¹⁴ Te tiúcupaicapa ema Jesús tayehe eta pacure, máimahapa ena camuriqueneana achaneana. Majapanuvacarinehi eta máimairavacahi. Macanaracavacapa ena nacajumaqueneanahi námaqueneanapahi. ¹⁵ Tacahe, viti mayeheana apóstoleana vímahapa eta cáperehíchicharinehi. Vimetacapa éma máevatamurihahini ena achaneana natiarhiqueneanahi. Víchapa éma:

—Cáperehipa jena sache. Tiyerehivacahi eta pétiana. Táuricapa pivane-cavaca ena achaneana nayanapa, navachareca eta nanica; taicha aní tájina naviyavaimahi eta te juca —víchapa.

¹⁶ Ema Jesús tijicapahavipa:

—Vahi nuvaraha nuvaneca nayana. Tájina naviyava eta nácaijuhehini. Íjaraca étina eta nanica.

¹⁷ Tásiha, viti víchapa:

—Tájina vácayehe eta tinicacare. Jucarihisera cíncochichahi eta pan, apina eta jima.

¹⁸ Ema Jesús máichahavipa:

—Íama ani.

¹⁹ Tacahe, macavanairipipa náejahahapaica ena achaneana te táinahu eta muñjipahi. Mavehapa eta cíncoque ne pan étapa eta apina jima. Máesenicapa eta anuma. Mahasulupayachapa ema Viya. Mayuvetucavacapa eta pan, tásiha, tíjaracahavipa víti. Víti víjaracavacapa ena achaneana. ²⁰ Vinicapa vimutu, visatuhevacapa. Tásiha, vicaemacharichahavare doce saye ichapehiana táinicachaichahava eta vémacharajiana.

²¹ Ena tinicanahi eta juca, cinco mil ena ajairana eta náichapemurívahi, énerichuvare ena esenana énapa ena amaperuana.

Ema Jesús mapaicaeca eta une
(Mr 6.45-52; Jn 6.16-21)

²² Tiuri, ema Jesús tivanecahavipa viti mayeheana apóstoleana viávacu-hayare eta te pacure. Vínapucayarehi viánueca te apachara eta cáquiure. Émasera manasiyarehi máevatumuríhanumayarehi ena achaneana nachava te napenana. ²³ Te tamutupa eta macametavairahi ema Jesús nayehe ena achaneana, tiyanapa tiápanahi tayehe eta cerro. Tiyujaracayarehi tayehe. Étapa tavinehi eta yati, manasipa macarichuhi eta te cerro. ²⁴ Tacahe, víti te túpierecahaviripahi, tichimaracahavipa eta muraca técatícava, viácapaqui-hapaipahi. ²⁵ Te tíjararahichichapa, vímahapa ema Jesús mapaicaecapahi eta une eta macapayasirahaviya. ²⁶ Eta vímairahi éma, vipicarinehi. Vímijachapa cunare. Vipiararecapa eta vipisirahi.

²⁷ Émasera ema Jesús téchajicahavipa:

—Vahi ecupica. Nútichucha. Étumechava —máichahavipa.

²⁸ Tásiha, ema Pedro majicapapa:

—Te yátupipuca pítiquenehi, píti Tata, pivanecanu núti apanavare nu-paicaeca eta une. Nuvaraha nupauchavi —máichapa.

²⁹ Ema Jesús majicapapa:

—Yare, pipauchanu.

Enevanepa tíucupaicahi te pacure ema Pedro. Tiyanapa mapaicaecapa eta une, macapayacayarehi ema Jesús. ³⁰ Étasera eta máramesirahi taicha eta muraca técatícava, tímutserahavapaipa téricapaipa. Tásiha, típiararecapa:

—¡Picatajicanu, Tata! ¡Néricainapa!

³¹ Enevanepasera macaratavauchapa ema Jesús eta macuchucuirayarehi. Tásiha, máichapa:

—¿Ticamitísicavipapuca eta pipisirahi eta picasiñanuirahi?

³² Te tiávacuhapa ema Jesús émapa ema Pedro tayehe eta pacure, enevanepa tésamiricavahi eta técatícava. Tíchecapa eta táepacucairahi. ³³ Tacahe, viti apamuriana vicunachainehi ema Jesús eta vímairahi. Vépyumurihapa te mamirahu. Tásiha, víchapa:

—¡Éhevare píti Tata, Machichaquenévihí ema Viya! —víchapa.

Ema Jesús macanaraca ena nacajumaqueneana te avasare Genesaret
(Mr 6.53-56)

³⁴ Tacahe, te apanapa sache, viápechavavarepa viánueca eta cáquiure. Vítecapapa eta te apaquehe ticaijare Genesaret. ³⁵ Tásiha, ena achaneana

ticavasanahi tayehe náimativanehi eta émairahi ema Jesús. Timetajiri-cacanapa náechapa namutu ena achaneana ticavasanahi te avasareana. Tiyananapa mayehe ema Jesús, námavacapaipahi namutu ena nacajuma-queneana. ³⁶ Nayaseacapa éma eta máisapirainahíni námamajiacca eta tache-yarapi eta mamuriha. Tacahe, nácani témamajiacanapahi, enevanepaipa tinaracanapahi.

15

Éma Jesús mametaca ena achaneana eta timaeperajicarahi (Mr 7.1-23)

¹ Tacahe, títécapanapa ena apamuriana fariséoana tiásihanahi tayehe eta Jerusalén, énapa ena escribánoana. Témeñahavanapa eta mayehe ema Jesús. Ánipa naicha:

² —Pímaha, ena pímitureana vahi náitauchahini eta viyeherepiana. Namaeperajicapa eta náchanevana eta nanisirahi taicha vahi nacasipavahunumahini. ¿Tájaha tacayema vahi napicauchahini eta viyeherepi nanaquiruhi ena viáchucanaveanaini? ¿Étasera puca tacahehi eta pímitusiravacahi? —náichapa.

³ Tásiha, ema Jesús majicapavacapa:

—¿Tájaha tacayema éti apanavare, vahi ítauchahini eta mavanairipiana ema Viya, tasapihapa epicauchahi eta eyeherepiana nanaquiruhi ena iáchucanaveanaini? ⁴ Éma Viya ani macahehi eta macavanairipirahi eta viyehe: “Pipicauchaya pémunacayareva ema piya ésupa esu pena”. Jucarihi eta apana vanairipi: “Ecapacayarehi mácani tíñemahi eta nacayemaquene mayehe ema máiya, ésupa esu maena”. ⁵⁻⁶ Étiserá vahi epicauchahini eta júcana mavanairipiana ema Viya. Taicha te mararihi mácani achane ticamavahupuca me Viya eta máimahaqueneanahi, eta ímitucasivahi éti: “Vaipa tatuparaca ema achane eta máimicatasiraya ema maiya ésupa esu maena”. Tasapihapa, ichape ticapicahuhi eyehe eta eyeherepiana. Étasera eta mavanairipi ema Viya, vaipa epicauchahini. ⁷ ¡Éti ecaijarehi apimirana! Tatupiruvahi eta máechajiriruvahi ema Viya, téchajisiahehi éti eta te Sagrada Escritura*. ⁸⁻⁹ Ánipa macahe: “Ena nani achaneana, tétserajicanuanahi te najaca; váhisera táetupicavahíni te nasamureana. Téneuchavanahi eta nuyehe, tamapurujihisera eta náeneuchiravahi. Nacaerajicahivare eta nuvanairipiana; tasapihapa náimicapicauchahi eta nayeherepiana táuchurechucha te napanerueruana ena náchucanaveánaini” macahepa ema Viya.

¹⁰ Tásiha, máichuhavacapa ema Jesús ena achaneana. Ánipa máicha:

—Nuvaraha esamanu yátupina, apaesa ácaicutiara. ¹¹ Tájina máeperajina eta viáchanevana te vinicapuca eta vimacasipavahuiranumahini. Jácani tasiapaquenehi te vijaca, tájina tamaeperajicahivihini. Vahi étaparacaina. Étasera eta evainarajivana táuchureanapuca te ejaca, étapa eta evainarajipanereruanahi, jéhevare éta timaeperajicahahi —máichapa.

¹² Tacahe, viti mayeheana apóstoleana vémeñahavapa eta mayehe. Vimetacapa:

—Ena nani fariséoana tise manahi taicha eta juca píchiravacahi —víchapa.

¹³ Émasera máichahavipa:

*

15:7 Májurehi ema víyarahaini profeta Isaías eta juca máechajiriruvana ema Viya.

—Ena nani nacutihi eta ejare, vaipa émaimahi máechahini ema Tata Nuaicaiaquene. Ticavepuricasianayaresera éna. ¹⁴ Ésamiricachucha. Vahi ecuimisiapava nayehe, taicha éna, púchuquianahi tayehe eta juca nímiturapiána. Ena púchuquiana, te tichurucacanapuca, tiáquipaicacanayarehi táicha vahi náimahahini eta nayanihayarehi —máichapa.

¹⁵ Tásiha, ema Pedro mayaserecapa:

—Picatajicahavi pímitucahavi apaesa vímatiequeneha eta juca pímicutiara-chirahi eta táuchureanahi te vijaca —máichapa.

¹⁶ Ema Jesús máichahavivarepa:

—¿Énerichuvare éti mapanererurehehi? ¹⁷ ¿Váhipuca ácaicutiarahíni eta juca? Tamutu eta juca tasiapaqueneanahi te vijaca vinicasareanahi, tatupiru te viami. Tásiha, te tiúchucapa, apanapa eta táuchusihahi. Vahi timaeperajicahavimahi. ¹⁸ Étasera jácani táuchurehi te vijaca tásihaquenehi te amahe eta visamure. Eta tamaurivahi eta náechajisirana ena achaneana, étara timaeperajicavacahi éna. ¹⁹ Táicha jácani táifnemahiqueneanahi paner-rucana, eta tásihaqueneanahi te nasamureana. Ema achane mapanerechahi maveha esu apana esena mayena ema apana achane. Esu esena supanerechahi suveha ema apana achane suima esu apana esena. Ena amape-ruana napanerechahi eta natuhusivaya. Nácanivare, tipanerechanahi eta ticaparecana, tiámerecana, tivayurecana, téchajihiana. ²⁰ Tamutu eta juca panerercana tamauriqueneana, te náichahi ena achaneana, éta timaepera-jicahi éna. Étasera jácani nanicaqueneana, tayanapanepuca vahi náichahi eta nayeherepi eta nasipavauchirava, vahi tamaeperajicaimahi —máichahavipa.

*Esu ésuna esena apavasana sucasiña ema Jesús
(Mr 7.24-30)*

²¹ Tacahe, tiámahavivarepa ema Jesús te apana avasareana táunavahi eta departamento Siria, návasa ena apaechajiriruvana. ²² Ánaqui, ticapayaca-havipa esu esena. Supiaracapaipa eta supauchirahi ema Jesús. Ániapa sucahe: —Pájapanunu, tata. Píti yátupiquenevihu Cristo, ñivaneruvihu eñi Viya, vicuchapaquenevihu. Esu nuchicha ñvahácahi eñi éreana, tétávicavahi eta sucatajivairahi. Picatajicanu, tata, eta picanarasinanuini ésu nuchicha —suíchapa.

²³ Émasera ema Jesús vahi majicapahini. Tipaicapaichucha. Vipauchapa viti mayeheana apóstoleana, vimetacapa éma:

—Tata, pévataca suyana esu suna esena apavasana tipiararecapahi te véquene —vicahepa.

²⁴ Tásiha, ema Jesús máichahavipa:

—Jéhevale eta epanereruhi. Ema Tata tivanecanuhi nacarichu néchapajiri-cayare ena vijaneanana israelítana. Nacutihi éna eta uvesana máquenureana, taicha ticamununanahi eta nujaneasiraya —máichahavipa.

²⁵ Ésusera esu esena tépuyucapa te mamirahu. Suíchapa:

—¡Tátachicha, picatajicanupaini, pímicatacanu! ¡Picanarasinanuini esu nuchichasami! —suíchapa.

²⁶ Ema Jesús majicapapa:

—Nativa néchapajiricavacaya ena nujaneanana. Taicha vahi táuricahini ásapihahíni néchapajiricahehíni éti apavasananana émetavicahíni ena nu-janeanana —máichapa.

²⁷ Esu esena sujicapapa:

—Énehinehi tacahehi, tátachicha. Yátupihi vahi pijaneananuinahini. Pájapanunusera, picatajicanuchuchaini. Víti apanava vácasiñavahi eta piyehe eta vítátijivairaina —suíchapa.

²⁸ Ema Jesús majicapavarepa:

—Páurevi piti nuchicha, ichape eta picasiñavairahi eta nuyehé. Puiti títauchavayare eta piyasearapihi nuyehé. Nucanarasinaviyare esu pichicha —máichapa.

Jéhesare enevanepa tinaracahi esu amaperu.

Camurianahi ena nacajumaqueneana macanararuanahi ema Jesús

²⁹ Tacahe, tianavarepa ema Jesús. Véhicavarepa víti apanava. Vichavavarepa te Galilea. Tásiha, vijuchechausichapaipahi eta cáquiure, vicaijuheya eta te mávapahi apaquehe anuquerehi, te táviahahi eta céroana. Vinasipanapa eta jena sácheana eta ánaqui. ³⁰ Tacahe, nacahepaipavare ena camuriqueneana achaneana te viáviahahi víti. Námaquenepanepahi ena nacajumaqueneana: ena masariana, énapa ena púchuquiána, énapa ena úpana, énapa ena túpupáiqueana. ³¹ Namutu ena nani nacajumaqueneana macanaracavacapaipahi éma. Ichaperinehi eta náramirahi ena achaneana eta náechajisiraipa ena úpana, énapa ena túpupáiqueana tinaracanapaipa, tiúripaipa eta napaisira ena masariana. Tímairiricanapaipa ena púchuquiána. Eta náurisamurevapahi, nacunachapaipa ema Viya.

Ema Jesús máenica ena cuatro mílqueneana achaneana (Mr 8.1-10)

³² Tásiha, ema Jesús tíchuhavipa víti mayeheana apóstoleana. Máichahavipa:

—Nujapanuvaca ena nani achaneana natiarihiqueneanahi ani, taicha mapanaripahi sache puiti eta nacahehi eta viyehé. Tájinahivare naviyahini nanica. Nujapanuvacaicha névatacavacahini, machu náquiipaica te achene taicha eta náecuavana. Vájapanu eta náecuava, vénicavaca —máichahavipa.

³³ Tásiha, víti vijicapapa:

—¿Távihapucaini vítusiahahini eta tinicacare eta te juca mávapahi vamáhi? ¡Váhivare vítaparahaimahi vénicavaca ena nani camuriqueneana achaneana! —víchapa.

³⁴ Tacahe, ema Jesús tiyaserecavavipa:

—¿Áyanachaha eta pan eta íamaqueneanapahi?

Víti vijicapapa:

—Jucarihi siéterine. Ánimurichicharinehivare eta jímachicha —vicahepa.

³⁵ Tásiha, macavanairipipa eta náejahapaimuriahahini namutu te apaquehe.

³⁶ Mavehapa eta siétequene pan, étapa eta jímana. Mahasulupayachapa ema Viya. Tásiha, mayuvetucavacapa, tújaracavavipa víti. Tásiha, víti víjaracavacapa ena camuriqueneana achaneana. ³⁷ Tacahe, vimutu vinicahi, visatuhevacapa. Vicaemacharichavavare. Siétehi eta sáyeana táinicarui eta vémacharajiana. ³⁸ Eta nasimutuvahi ena achaneana, cuatro mílqueneana ena ajairana. Natiarihivare ena esenana énapa ena amaperuana. ³⁹ Te tamutupa eta juca, mavanecavacapa ema Jesús ena achaneana nayanapa nachava te napenana. Tásiha, éma tiávachavarepa te pacure. Vivanavarepa. Vicaijuhe eta te avasare Magdalena.

16

Ena Jesús mápechavare mayunacavaca eta namasuapajiraivahi ena fariséoana

(Mr 8.11-13; Lc 12.54-56)

¹ Tacahe, ena apamuriana fariséoana énapa ena saducéoana napauchapa ena Jesús. Eta navarairahi náemejecapavacha éma, nayasecapa máimerecahini eta tiáramicareana, máimerecavahini te yátupihipuca vanairucahi me Viya. ² Émasera majicapapa:

—Te cáperehichicha, te ímahahi eta táitsirahi eta úcaji, éti ímijacha tímiyanavayare eta tíuriyare eta sácheana. ³ Te yáticarahi, te ímaha eta timapicurume, títsitsimehi, ímijachahi tiquivayare. Éti, ímijachavahi ímatiequeneha eta tapaisira eta anuma. ¡Tétavicavahisera eta emasuapajiraivahi! Taicha éti ímijachavahi religiósohe, ímijachavavare ímatiequeneha eta mavarahaqueneanahi ena Viya, váhisera ávarahahini ímatiequeneha eta máimeruhehi ena Viya, te juca sácheana nucachanerahehi. ⁴ ¡Eti achaneana váinarajiqueneana! Núti nímatilhe. Vahi esuapanuimahi, te nímeracapucaini eta tiáramicareana. Tásiha, váhira étiina tatuparaca ímahahini eta tiáramicareana. Ímahayaresera eta tiáramicare tacutiyare eta máichavaquenevahi ena víyarahaini profetaini Jonás —máichavacapa.

Tásiha, majunijicavacapa, tiyanapa.

Ena Jesús máimicuticha eta levadura eta náimiturapiana ena fariséoana

(Mr 8.14-21)

⁵ Tacahe, eta viánuesiravarepa eta cáquiure, vipanerechapaipahi eta vémitisirapa eta pan.

⁶ Ena Jesús máichahavipa:

—Tímaticarehi eyehe eta levadura eta tapareasirahi eta masa. Tacutirichu eta tapareasirahi eta apimirairavacahi ena fariséoana énapa ena saducéoana. Échapavaicha tayehe, vahi ecuehica éna —macahepa.

⁷ Vítisera viti apóstoleana, eta véñamavairahi, víchacacapa:

—Tímicajachahavihi eta vémitisisirahi eta pan. Eta tacahe, macahehi tayehe eta levadura —víchapa.

⁸ Éma tímatiacahavihi. Tásiha, máichahavipa:

—¿Tájaha tacayema ecahechajiriruvahi eta vahi íamapahini eta pan? ¿Váhipuca ácasinávahi eta nuyehe? ⁹ ¿Vuíchahacaru ácaicutiaraini? ¿Vuíchahápuca ímatinu? ¿Váhivare échaini eta nucaejasirahi eta cincoquene pan nanaquenehi ena cinco mílqueneana achaneana étapa eta náemacharajiana? ¹⁰ ¿Váhivarepuca écha eta siétequene pan naniruhi ena cuatro mílqueneana achaneana étapa eta náemacharajiana? ¹¹ Nímijachapa ecaicutiarayarehi eta níchirahehi eta échapiravainahini eta nayehe levadura ena fariséoana énapa ena saducéoana. Váhira étainahini néchajisihahíni eta levadura tayehe eta pan —máichahavipa.

¹² Vipaenumavahi véchahi eta máichirahavihi éma eta véchapiravainahini vahi vicucuti ena fariséoana énapa ena saducéoana eta apimirairanahi.

Ena Pedro máimereucha ena Jesús eta émairahi ena Cristo

(Mr 8.27-30; Lc 9.18-21)

¹³ Tacahe, te apanapa sache, viyanavarepa vipaica. Vicaijuhe eta te Cesarea máepiyaruhi ena rey Felipe. Te viánehipa, ena Jesús tiyaserecavipa:

—¿Tájaha nacayema ena achaneana eta nuyehe nuti Manerejirunuhi ema Viya? ¿Nájahapuca náimijachanuhi éna? —máichahavipa.

¹⁴ Vjicapapa víti:

—Ena apamuriana náimijachavihi ema Juan, tichavahi téchepucahi. Ena apamuriana tímijachavianahi ema víyahaini profeta Elías, téchepucahi éma. Ena apamuriana tímijachavianahivare ema víyahaini profeta Jeremías; émapuca ema apana profetaini antívuini, téchepucahi —vicahepa.

¹⁵ Ema Jesús tiápechahavivare tiyaserecavi:

—Étiyapa ¿nájaha ímijachanuhi núti?

¹⁶ Ema Pedro majicapapa:

—Pítira yátupiquenevihi Cristo, machichaquenevihi ema yátupiquenehi Viya.

¹⁷ Ema Jesús majicapapa:

—Píti Pedro*, tétavicavahi eta pétupisiravahi taicha manacasamureruvihi ema Tata Nucaiyaquene tiávihahi te anuma. Vahi étáinahini eta máimiturapinahíni piyehe mácani achane. ¹⁸ Núti apanavare nutupiruva numetacavi. Píti picajarehi Pedro. Píti picutiyare eta mari, tétavicavayare eta pitumevaya. Namutu ena picutiqueneana eta pisuapiranuhi nútirahi yátupiquenehi Cristo, énara nuchaneranyare. Éna apanavare nacutiyareva eta mari eta natumevayare eta náehisiranuhi. Tájina vahi máratahaimahi macaetemavaca ema Váinaraji. ¹⁹ Píti picatuparahayare eta llave tayehe eta anuma, apaesa nasiapa nácani pijacapaqueneanyare píti —máichapa.

²⁰ Tacahe, tituparacahavipa muraca ema Jesús nacuija vicumetaca eta émairahi ema Cristo.

*Ema Jesús máimereucha eta máepenirayarehi
(Mr 8.31–9.1; Lc 9.22–27)*

²¹ Tacahe, ema Jesús tépanavapa timetacahavihi eta táicharacavayare eta máepenirayare. Máichahavipa:

—Nuti nucatuparahahi eta nuyanirayarehi te Jerusalén. Ánaqui nucatajivayarehi ichape naicha ena tuparairucana, énapa ena aquenucarahana, énapa ena escribánoana. Éna, tímicapacuanayareva. Mapanayareichuhisera sache nucaheyare eta népenirayare. Tásiha, nuchavayarehi néchepuca —máichahavipa.

²² Tásiha, máiputsicapa mámahi ema Pedro ema Jesús. Ánaqui macajachapa, máijarasiravahi eta mapanereruhi:

—Núti vahi návarahahini táitachavahini nacapacavihini.

²³ Tacahe, ema Jesús máichapa ema Pedro:

—Píti téjcapavahi eta pipanereruhi. Pínajica eta juca tamauriqueneanahi. Pivarahapuca pihapapicayare eta mapanereruhi ema Viya. Eta juca pipanereruhi tacuti eta mapanereruanahi ema Satanás, énapa ena machanerana —máichapa.

²⁴ Tásiha, máichahavivarepa víti:

—Nácani navaraha náehicanu, tacamunu náinajicava tamutu eta tihapapicavaca eta náehisiranuhi. Nacaravahuyareva eta nímiturapiana. Náijaracavare eta táimicapasiraina eta náehisiranuhi. ²⁵ Nácanisera téñamanahi eta

* **16:17** Ema Jesús téjchicahi te máechajiriruva hebreo, máimijarechahi ema Pedro: “Simón, machicha ema Jonás”.

náitaresira, tiávamirahuanaya eta náehisiranu, énajivayare ticamitiequenehanaya eta náitaresira. Énaserá nácani yátupiquenehi tjaracavana téhicanuana, tayanapane táimicapacainepuca eta náehisiranuhi, éna tíujicavanayare tíuchuchuhanayare eta náitaresiranaya. ²⁶ Énerichuvare nácani tacañamararuanahi eta nacaimahaquenéiraya te juca apaquehe, tájina náimaequenehaimahi, taicha eta tacañamarasiravacahi tahapapiricavacahi tayehe eta náuchucuirayarehini. Taicha vahi máratahaimahi mácani achane mavachachahini eta máuricacarevaya te apana vítaresira. ²⁷ Taicha nuti Manerejirunuhi ema Viya nuchavayarehi. Námainapaipa eta majaraiva ema Tata, nucachanénapaipavare ena ángeleana. Te jena sáchezare, níjaracavacainapa eta náicuchianahi ena nuchanerana te tíurihi eta nacaemataneasiranuhi, te jácani náemataneanapachuhi. ²⁸ Nutupiruva numetacahe: Puítiripa éti, etiarihi enerejicavayare vahi épenavanémahi, ímahanumaya eta nucatuparahairaya aquenucanuirayare nuti Manerejirunuhi ema Víya —macahepa.

17

Ema Jesús tihapamaichava eta máimahi (Mr 9.2-13; Lc 9.28-36)

¹ Tiuri, sáisipa sache eta vinasirahi ánaqui. Tacahe, tinaquicahavipa ema Jesús. Nacarinehi máma ema Pedro, ema Jacobo émapa ema Juan. Tiyananapa eta te étana cerro anuquehepana. ² Eta ánaqui, náimahapa tihapamaichavahi eta máimahi ema Jesús te namirahu éna. Eta mamira, tétavicava eta tajararasira tacuti eta sache. Eta mamuiriha, tétavicava eta tajanunumesirahi, étapa eta tajapuvahi. ³ Tásiha, tiáramicareanavarepa tímerecavana ena apinana ajairana: ema víyahaini Moisés émapa ema víyahaini profetaíni Elías. Téchajiricavanaripahi mayehe ema Jesús. ⁴ Tásiha, ema Pedro tímisiapavapa téchajicapa. Ánipa macahe:

—Tata Náquenu, tétavicavapa eta víuricacareva eta víávilhairahi eta áni. Tíurihipucaini vépiyarecaini eta epenahuinapachuhini. Pipenahuinarihuhini píti, mapenainarichuhivaréni ema Moisés, émapaini ema Elías —macahepa.

⁵ Tacahe, téchejicaichaha ema Pedro, tiáramicarepa eta úcaji táepacumurihahi éna. Tétavicavahisera eta tajanunusirahi eta úcaji. Nasamavarepa eta mahu ema Viya tayehe eta úcaji. Ánipa macahe:

—Ema maca, éma yátupiquenehi nuchicha némunarquenehi. Tétavicavahi eta núsismurevahi máicha. Éma esuapayti, mapenainarichuhivarare —macahepa.

⁶ Eta nasamirahi ena vichamuriana, tipicanarinehi. Tépuycanapa titsiucapairicanapa. ⁷ Tásiha, ema Jesús témeñahavapa eta nayehe. Máemamasicavacapa. Máichavacapa:

—Échepuca, nuchichanaveana. Vahi ecupica —máichapa.

⁸ Tacahe, te téchepucanapa éna, nájinaripahi éna apinana náimahaqueaneanahi. Macarinehi ema Jesús.

⁹ Te tichavanapa tayehe eta cerro, ema Jesús mametacavacapa vahi nacumetajiricahini eta juca náimahaquenehi. Tiámainucava te máechepucaini te máecari éma. ¹⁰ Tacahe, nayaserecapa ema Jesús:

—Ena escribánoana eta náimiturapihi, náechajisihahi eta machavirayare títareca ema víyarahaini Elías, tínapucayarehi eta máimeresiravayare piyehe piti Cristo. ¿Énapuca téjecapavanahi ena escribánoana? —náichapa.

¹¹ Ema Jesús majicapavacapa:

—Yátupi ema víyarahaini Elías títecapayarehi, máetupiripanayarehi tamutu.

¹² Nútisera nutupiruva numetacahe: Títecaripahi ema Elías, váhisera náimatihini ena escribánoana. Váhivare najacpahini éma ena tuparairucana. Nacatianacahi nacapacahi éma. Ene nucaheyare nuti Manerejirunuhi ema Viya, ticatianacuanayarehiva, éneyaréichuvare ticapacuanayare —máichapa.

¹³ Tásiha, ena vichamuriana náechapa eta máechajisihairahi ema Jesús ema Juan Ticachasiricarahihi.

*Ema Jesús macanaraca ema amaperu mávaháruhi ema éreana
(Mr 9.14-29; Lc 9.37-43)*

¹⁴ Tacahe, te tichavanapa éna tayehe eta viávihahi víti énapa ena achaneana, témeñahavapa ema émana achane mayehe ema Jesús. Tépuycapa te mami-
rahu. Máichapa:

¹⁵ —Picatajicanu, tata, pímicatacanu. Picanarasinanuini ema maca nuchicha. Tétavicavahi eta macatajivairahi. Tacacharipairica te tanahaca eta majuma. Tatiarihi te táquipaica te une, téhepuca yucu. ¹⁶ Námari-
pahinéni nayehe ena pímitureana, váhisera náratahahini nacanaracahini éna —
máichapa.

¹⁷ Ema Jesús máichahavipa:

—¡Tétavicava emasupajiravavaca eti achaneana! ¡Cúverecachasicáini eta nucamichirahenahini! Iáma ani ema amaperu —máichapa.

¹⁸ Tacahe, ema Jesús, muraca eta máevatasirahi ema éreana, máinajiacapa ema amaperu. Enevanepa tinaracavanehi éma.

¹⁹ Tásiha, te táequenepa, víti víputsiacavapa ema Jesús, viyaserecapa:

—¿Tájahapuca tacayemahi eta vahi váratahahini vicuchuca ema éreana mayehe ema amaperu? —víchapa.

²⁰ Ema Jesús tijicapahavipa:

—Eta tíchahi éti vuíchaha yátupinahini ácasiñavahini me Viya. Nutupiruva numetacahe: Te yátupiquenenahini ácasiñavahini mayehe éma, eratahaya-
rehini. Váhinéni tácomesahini ichapenahini eta ecasiñavairahi. Tayanapa-
nepuca ánichichainaichu eta ecasiñairavahi, tacutihupucaini eta táquichicha eta mostaza, tamuturihini erataha. Étaripa eta jácani cerro ávarahahini ecayejeca, eratahayarehi. Te íchapuca: “Piyejecava eta te juca. Piyana ánaquipana”. Tásiha, tiyjecavahini éta. Jéhesare, tájina tacucajerarajihini eyehe. ²¹ Étasera eta juca, muracapanahi ema éreana ema tiávahácahi ema maca amaperu. Eta vicuchusira, tavaraha víchanumayare eta ayuna étapa eta viyujaraca —máichahavipa.

*Tiápechavavare ema Jesús máimereucha eta máepenirayarehi
(Mr 9.30-32; Lc 9.43-45)*

²² Tacahe, eta vipaisirapahi tayehe eta avasareana eta te táunavahi eta Galilea, tiápechahavivarepa timetacahavi ema Jesús eta máepenirayarehi. Ánipa macahe:

—Nuti Manerejirunuhi ema Viya, járajapainapa eta sáchezare tjararecanuyare mácani achane nayehe ena ticatianacanuanahi. Ticaratacanuanayare éna. ²³ Ticapacananayareva. Nécheputayaresera te mapanaquenapana sache —máichahavipa.

Tacahe, eta visamirahi, ichaperinehi eta véñamiravahi víti.

Ticavacha eta impuesto tayehe eta Templo

²⁴ Tacahe, te vítecapapa tayehe eta viávasa Capernaúm, natiarihihi ena ticobrararahiana eta impuesto tayehe eta Templo. Nárajapapa náechajipanahi ema Pedro. Nayaserecapa:

—¿Mavachachapuca ema eyehe máestro éti eta impuesto tayehe eta Templo? —náichapa.

²⁵ Ema Pedro majicapapa:

—Mavachacha —macahepa.

Te visiapayarepa te peti, ema Jesús máechajicanumapa ema Pedro. Ánipa macahe:

—¿Tájaha picayema, piti Pedro, nájahasica tatuparacahi navachachayare eta impuesto mavarahaquene ema mácani rey? ¿Énapuca ena machichaqueneana, énapuca ena machanerana? —máichapa.

²⁶ Ema Pedro majicapapa:

—Ena machanerana.

Tásiha, ema Jesús macahepa:

—Tiuri, víti machichahavihi ema Viya. Vahi tatuparacahini vivachahahini víti eta juca impuesto. ²⁷ Vinaquicasera eta impuesto apaesa tacuija tacucayemacare nayehe ena achaneana. Piyanayare pénica eta jima te cáquiure. Te piáquijiecapa eta péñirave, eta tñapuca jima tacaratacaya eta péñirave, tatiarihiyare eta plata te tajaca. Pivehainapa eta reale, tásiha taratahayare tavachacha eta nuyehe parte núti, étapa eta piyehe píti —máichapa.

18

¿Nájahapuca ema apóstole ticapicahupana?

(Mr 9.33-37; Lc 9.46-48)

¹ Tacahe, te jena sácheanahi, viyaserecapa ema Jesús:

—¿Nájahapuca ema ticapicahupana viyehe víti te táitecapapa eta sache aquenucaviraya? —vicanajucasera eta impuesto apaehapa.

² Tacahe, máichuhapa ema Jesús ema émana amaperuchicha, macatupihapa te vimirahu. ³ Máichahavipa:

—Nutupiruva numetacahe: Ínajicayare eta ecasiñavavaisira. Echávayare ecutiayare ema maca amaperu, apaesa ítujicava esiapa ecachanenu tayehe eta néjasihayare. ⁴ Nácani navarahahi ticapicahupananayare te jena néjasihayare núti, tacamunu mánsuanayare. Vahi máitucaimahi tiácapauchava. ⁵ Tacutiquene nácani tijacapanayare ena amaperuana níchavenénahi núti, ena nani yátupihí námereca eta náemunasiranuhi núti, taicha tímicitijiricavahi nútinahini najacapa.

Ichape eta máicuñayare mácani tñiaquipaica te pecatu ena amaperuana

(Mr 9.42-48; Lc 17.1-2)

⁶ Tacutiquene mácani tiáquipaicaya ema émana amaperu téhicanuhi, tiúripanahipucaini máepenahini mativainahini éma. Váhirichupucaini

macucaicuñahini, taicha vahi macuaquipaicaahini ema amaperu tayehe eta pecatu. ⁷ Taicha muracayare eta náicuñayare nácani tímiaquipaicanayare ena achaneana. Yátupi vahi téjiacavaimahi eta tímiaquipaicaaya ena achaneana tayehe eta pecatu. Ichapesera eta náicuñayare nácani ticatapiravanahi eta náimiaquipaisirahi ena achaneana tayehe eta pecatu.

⁸ Eta tacahe, te táimipecurachahepuca eta evahu, étapuca eta ívapeana, tíuripana eyuchatica, íaquijica; apaesa vahi tacuímiaquipaicahe tayehe eta pecatu. Tíuripana táejiacava eta íáquehe eta esiapirayare te anuma, váhisera tacumutuhi tasiapa te yucu eta íáquehe. ⁹ Étaripavare eta iúquiha, te tímiaquipaicahepuca tayehe eta pecatu, tavarairahi táimahayare eta tamauri-queneana tájiparacana, tíuripana evечuhauquichava íaquijicaya. Taicha tíuripana eta ejiacapacarehi éti eta esiapiraya te anuma tayanapane táejiacavapuca eta iúquiha. Páurehesamisera éti, te náepujuquichahepuca te yucu infierno, tamutuyare eta íáquehe.

*Ena Jesús máimicutiarachinahi te témitiaca étana uvesa
(Lc 15.3-7)*

¹⁰ Vahi ecuepuru ena amaperuana. Numetacahevane: Nararihi ena ángeleana tijaneacavacahi éna. Títupajjiacavanahi eta nacatiuchiravacahi ena amaperuana, máicha ema Viya. ¹¹ Nuti Manerejirunuhi ema Viya, eta tímitecanuhi nucuchucuhayare nácani tiávacuhanahi táíñehiquene eta náitaresira.

¹² Esamanuchaha. Nímicutichinaheyare puiti. Matiarahi ema émana achane. Ticayehe eta cien uvesana. Te témitiyechapuca eta étana, ema achane tianayarehi matanuca eta táemitiaruhi. Eta máeñamiravahi, manaquicayarepa eta apamuriana noventa y nueve te majanearesihahi. ¹³ Te máichimavapa, tichavapa. Tétavicava eta máurisamurevapaipahi eta mámirapaipahi eta táejiaruvahi.

¹⁴ Ene macahe ema Tata Ecaiyaquene éti, ema tiávihahi te anuma. Vahi mávarahahini náemitiacahini ena nani amaperuana.

*Tatuparaca vipardonacha ena téjecapavana eta viyehe
(Lc 17.3)*

¹⁵ Te tatiarihipuca eta máejeapiravahi ema piparape eta piyehe, tituparacavi piperdonachayare. Tásiha, piconsejachayare éma, píputsiacayare éma eta pimetasira eta máejeapiravahi. Te tisuapavihi éma, tájinapa íchiravaimahi. Tíurinapa eta ítaresirana. ¹⁶ Téhesera te vahi macusuapavi, pitanucayare apinanaina ena písheanayare testigo apaesa tasuapacarepa eta piconsejarapiyare. ¹⁷ Te vuíchaha macusuapavi, pimetacapa namutu ena pichamurianahi picatupihapa te namirahu. Téhesera te váhiquenechapuca macusuapahe, tímaticarénapa éma eta mamasuapajiraivahi me Viya. Vaipa ecuimisiapava mayehe, taicha eta mamasuapajiraivahi. ¹⁸ Nutupiruva numetacahe: Te ecurujicacahi, te ímahahi eta mamasuapajiraivahi, emetacayare éma vahi táepahahini eta mapecatura. Tanasirichuhi. Émaripa ema Viya, máimaraacahi eta evarairahi etupirica éma. Téhesera te máneuchavapuca, emetacayare éma eta táepahairipa eta mapecatura. Ema Viya, tíuriripa eta máimaira.

¹⁹⁻²⁰ Énerichuvare te etiarhipuca éti te juca apaquehe apinahehi, mapanahehipuca ecurujicacahi te nijare núti, nutiarhiyarechuhivare núti te emuri.

Tásiha, te étanaichuhi eta epanereruhi, ticuticacahi eta eyaseserepi te mayehe ema Tata, éma tjaracaheyare —máichahavipa.

²¹ Tásiha, ema Pedro mapauchapa, mayaseredayarehi ema Jesús. Ánipa macahe:

—Tata, ¿áyahepuca tatuparaca nuperdonachaya ema nuparape, te máejecapava eta nuyehe? ¿Táuricapuca siéteheyare eta nuperdonachirayare? —macahepa.

²² Ema Jesús majicapapa:

—Vahi tácarichuimahi siétehénarichuyare eta piperdonachirayare. Tímiyanavayarechucha eta piperdonachiranayare. Vahi pitupachaimahi —máichapa.

Ema Jesús máimicutiarachina ema achane máuriraha vahi máitucaimahi maperdonacha ema maparape

²³ Nuti Manerejirunuhi ema Viya nucuti mácani rey rícoquenehi te mavarahahi máechayare eta nanteveana ena mamusurana. ²⁴ Tásiha, námapaipahi ema tévavicavahi eta manteve. Tisintevapanahi éma. ²⁵ Tásiha, ema achane musu, tájina maviyahini mavachachihahini ema máquenuhi. Tacahe, ema rey macavanairipipa macaijararecasi, namutu esu mayena énapa ena machichanaveana, étapa eta macayehequeneanaini te mapena, apaesa mavachachahini apaesachichainarinehini eta mantevehi. ²⁶ Tásiha, ema achane musu tépuyucapa te mamirahu ema máquenu. Ánipa máicha: “Tátachicha, picatajicanuhini. Picuchapanuini. Te nítucavapaini, nuvachachapaini tamutu eta nunteve piyehe” macahepa. ²⁷ Jéhesare, ema máquenu majapanupa. Maperdonachapa tamutu eta mantevenihi. Macaiticapa. ²⁸ Vuíchahasera táyerehini eta máuchusirahi, mácapajícapa ema apana achane ticantevehi eta mayehe. Macompañeroinihivare. Váhinéni camurinahini eta mantevehi. Macaratachisera, macobrachapa. Masemaracapa macapitucapa. “Pivachachanu puítirichu” máichapa. ²⁹ Ema achane ticantevehi tépuyucapa te mamirahu. Mayaseacapa: “Picatajicanu, picuchapanuchaha. Te nítucavapa, nuvachachavipa”. ³⁰ Váhiquenesera maperdonachahini. Máimicasiapapa te cárcel, mavarairahi mavachachavaneyarehini eta mantevehi. ³¹ Tacahe, te náimahapa ena apamuriana machamurianahi, ticatirinehi te nasamure eta náimairahi ema nachamuri présuiraipahi. Tiyananapa nametacahi ema náquenu tamutu eta máichavaquenévahi ema nachamuri. ³²⁻³⁴ Tacahe, ema máquenuhi máimichuhapa ema tipresurecainihi. Ichape eta masemanevahi. Ánipa maicha: “¡Piti máeperajitataji musu! Váiparinehi péchavahini eta nuperdonachiravihi eta pinteve ichapequenehi. Taicha eta piyaseasiranuhi, nuperdonachavihi. Piúriháinehi pájapanuhini píti apanavare ema pichamusuvahi, tácutihini eta nuperdonachiravihi núti” máichapa ema rey. Tásiha, macavanairipipa náicuñaca, étapa mavachachayarehi tamutu eta mantevehi.

³⁵ Tacahe, ema Jesús te títapiricapa eta juca máimiturapiana, ánipa macahe:

—Ene máichaheyare ema Tata Nucaiyaquene éti apanavare, te vahi ecuituca eperdonacha nácani eparapenaveana náejecaparuvanahi eta eyehe —máichahavipa.

19

Ena Jesús timiturecahi máechajisihahi mácani achane tñajicahi esu mayena (Mr 10.1-12; Lc 16.18)

¹ Te tamutupa eta juca máimiturapianahi ema Jesús, viúchucapa te Galilea. Viyanapa tayehe eta Judea. Viánuecapa eta cajacure Jordán te tinapaicahi te táuchusine eta sache. ² Camuriana ena achaneana tiúrujicavanahi. Ánaqui macanaracapaipavare ema Jesús ena nacajumaqueneana.

³ Tásiha, títecanapa ena apamuriana fariséoana. Napauchapa ema Jesús. Natanucahi eta tiuiuchayarehi éma. Ánipa naicha:

—Vivaraha pimetacahavi ¿te táuricapuca máinajica ena achane esu mayena taicha jácani tájiparacana? —náichapa.

⁴ Ema Jesús majicapavacapa:

—Németeaca vahi ácaicutiarahi eta échajicuirahi eta Sagrada Escritura. Te tépanavainapa acane, ema Viya máijaracahi ema achane ésunayareichuhi esu mayenayare. Esu esena émanayareichuvare ema suímayare. ⁵ Ani tacahe eta mavanairipi ema Viya: “Mácani amaperu achane ésupa esu mayenayare, te ticaimanapa, tatuparacavacahi típutsicavanayarehi eta napanana ena ticachichana. Énajiavainapa títaticacanayare. Eta navehacairahi, tímicutijiricavaipa étanarinehi eta náqueheana” macahepa ema Viya. ⁶ Tacahe, tímicutijiricavainapa émanainarichuhini te peti. Étanarichu eta napanereruana. Vaipa táisapacarehini náinajicacahini. Eta tacahe, mácani máinajicahi esu mayena, éma máepuruhi eta juca mavanairipi ema Viya —máichavacapa.

⁷ Tásiha, ánivare nacahe:

—¿Tájahasica tacayema eta mavanairipihí ema víyarahaini Moisés ticaepiyarehi eta ajureca suyehe esu esena eta máinajisirayarehi ema suima? —náichapa.

⁸ Ema Jesús majicapavarepa:

—Ena iáchucanaveanaini, te jácani eta nasemirahi, náinajicapa ena nayenana. Ema víyarahaini Moisés máisapahi tinajicacana táichavenehi eta tájinairahi eta náimitucacarevainahini, táetaviuchirahi eta namuracasamureva. Váhisera máuricahini ema Viya eta náinajicacahini. ⁹ Puiti nuvaraha numetacahe: Te máinajicapuca esu mayena mácani achane, te tájinapuca suíchiravainahini; tásiha, mavehapa esu apana esena, ticapecaturaipahi me Viya. Tacutiquene, mácani mavehahipuca súcani esena máinajiruhi ema suima, ticapecaturaipavare éma, taicha ésu, matiarihichahahi ema suímaquenehi —máichavacapa.

¹⁰ Tacahe, te víputsiacavavarepa, viti mayeheana apóstole viyaserecapa ema Jesús:

—Te énehipuca tacahehi eta juca, eta vivira viti ajairana esu esena, tiúripa-naichuhipuca vahi vicutanuca esu esena —víchapa.

¹¹ Ema Jesús máichahavivarepa:

—Vahi ámutu árataha ímatiequeneha eta juca. Nararihisera tinerejicavanayarehi náimatiequenehayare máicha ema Viya. ¹² Nararihi ena ajairana vahi natanucaimahi esu esena nayenainahini, taicha eta náquehe vahi táichuhahini esu esena. Nararihivare ena ticavechuanahi, navetijipa éna vaipa náesenicaimahi esu esena. Nararihivare ena apamuriana tinerejicavanahi vahi natanucahini esu nayenainahini, navarairahi tacuija jácani tahapapicahini eta nacaemataneasiraya ema Viya. Ticunachacarepanayare

ena tiratahanayare eta juca náijarasirava yátupiquene nacaemataneacaya ema Viya —máichahavipa.

*Ema Jesús mayujaraucha ena amuyana
(Mr 10.13-16; Lc 18.15-17)*

¹³ Tacahe, ena achaneana námavacapaipa ena amuyana eta mayehe ema Jesús. Navarahahi máemamahacavacayarehi éna, mayujarauchahivaréni. Vítisera viti mayeheana apóstoleana vahi vísapahini. Vicaichepaicapa ena tíamanapahi ena amuyana. ¹⁴ Ema Jesús máichahavipa:

—Ésamiricachucha ena amuyana, náitecaichaha eta nuyehe. Vahi ecucaichepaica éna. Taicha ena nuchanerana nuti Cristo nacutiyarehi ena nani amuyana eta nasuapajiraiva éna —máichahavipa.

¹⁵ Tásiha, máemamahacavacapa ena amuyana, mayujarauchavacapa. Te tamutupa, viyanavarepa te apana avasare.

*Ema achane rico téchajiricava mayehe ema Jesús
(Mr 10.17-31; Lc 18.18-30)*

¹⁶ Matiarahi ema achane amaperu rico. Mapauchapa ema Jesús. Mayaserecapa:

—Tata maestro, piti piúriquene. ¿Tájahapucaini eta nícharacavahíni eta nítujisiravaina me Viya máichecuaraquirénahini eta nítaresira? —máichapa.

¹⁷ Ema Jesús majicapapa:

—¿Tájaha tacayema pímiarechanu “Piti piúriquene”? Mararihi ema Viya. Jéhevare éna, tétavicavahi eta máurivahi. Téhesera te pivarahapuca pécha te apana vítaresira, pisuapayare eta vanairipiana —máichapa.

¹⁸ Mayaserecavarepa ema achane:

—¿Tájahasica eta vanairipianahi eta nusuapaqueneya?

Majicapavare ema Jesús:

—Eta juca eta mavanairipiana ema Viya: Vahi picucapareca. Vahi picuveha esu esena apayena. Vahi picuamereca. Nacuija pépiyéqueneruina.

¹⁹ Pipicauchayare ena ticachichaviana. Pémunacayareva ema piparaepiyahi, tácuti eta pémunasiravahi píti —máichapa.

²⁰ Tacahe, ema achane majicapapa:

—Tamutu eta juca nusuapahi nítauchahi. ¿Tájahasera puca eta jácani néjequeruichahahi? —macahepa.

²¹ Ema Jesús majicapavare:

—Te pivaraha pítaucha tamutu, piyana píjararecaya tamutu eta pímaqueneana. Tásiha, píjaracavacapa ena páureana. Jéhevare éta, píjacapayare eta pímaquenyare te anuma táitsivayare. Te tamutupa eta juca, pítecavanepa péhicanu —máichapa.

²² Te masamapa ema achane eta juca macayemaquenehi ema Jesús, ichaperinehi eta mapanereresirahi, taicha mavayuchahi eta macaimahaquenerahi. Macatiequenerahinehi tamutu. Tiyanapa tipanererecapaipa.

²³ Tacahe, ema Jesús máichahavipa viti mayeheana apóstole:

—Nutupiruva numetacahe: Yátupiquenehi máitujiji eta náijarasiravainahini eta náehisiranuinhini ena rícoana eta nasiapirainahini te anuma.

²⁴ Esamanuchaha. Eta juca tímicutijiricavahi eta vipera camello, máitujiji tánucuhahini te támicuejehe eta parirapa. Ene nacahehi ena rícoana —macahepa.

²⁵ Eta visamirahi viti, viáraminehi. Víchacacapa:

—¡Tétavacavahi eta tamáitujicacarevahi! ¡Nájina títujicavaimahi náuchucuhahini!

²⁶ Ema Jesús tímaracahavipa. Tásiha, máichavipa:

—Nájina émanaina achane émajivainahíni ticuchucuhava. Émasera ema Viya, macarichu marataha ticuchucureca. Taicha tájina máemejerachaquenéhini ema Viya. Tamutu marataha —máichapa.

²⁷ Ema Pedro máichavarepa:

—Vítisera, Tata, vinaquicahi tamutu eta vicayehequeneanahi, vivarairahi véhicavi. ¿Tájahasica eta vímahaquenéya? —máichapa.

²⁸ Ema Jesús majicapavarepa:

—Nutupiruva numetacahe: Járjapayare eta sáchevayare, tacaitsivairayare tamutu arairuya. Tásiha, nuti Manerejirunuhi ema Tata néjacainapa te tajarahiquenehi trono. Tásiha, eti éhicanuanahi éjacainavarepa tayehe eta dócequene trono. Ecavanairipinapa nayehe ena dócemuriqueneana vijaneanana israelítana. ²⁹ Tásiha, emutu eti enaquicanahi eta epenana, ejunijicahivare ena ticachichaheana*, ena eparapenaveana, ena echichanaveana, eta eyehe apaquehe, táichavenehi eta éhisiranuhi puiti, tiápajucavainapa camuripanayare ena ejaneananayare étapa eta ímahaqueneanaya. Énerichuvare táurivayare eta ítaesira máíchequairenapa. ³⁰ Maverahesera eti etiariqueneanahi puiti, váhirichuhi ecapicahuhini. Te jena sácheyare, ichapepaninapa eta ecapicahuiraya. Ena puiti ticapicahuanahi, te táitauchavapa te jena sácheyare, énapavainapa téquenehanayare.

20

Ema Jesús máimicutichahi ema achane rico tiuri eta mavachachira ena ticaemataneychana

¹ Te jena sácheyare te njaracahénapa eta ícuchiyare eti nuchanerana, tacuti eta mavachachirahi ema émana achane ticayehe eta ichape quinta úvaquiji nayehe ena ticaematanearahiana. Ema maca mayatiruhi típaica matanuca ena achaneana ticaemataneanayarehi mayehe. Tírerecanayarehi eta uva. ² Te tíucavapa ena ajairana, mametacavacapa eta mavachachirayarehi étana reale te sache. Tiúrihi eta mavachachiravacahi. Mavancavacapa tiyanana tayehe eta náireresihayarehi. ³ Tásiha, macamunui-chahava ena apamuriana achane. Te las nuévapa sache, tiyanavarepa te plaza. Máimahainezare ena apamuriana ajairana máemataneanahi. ⁴ Máechajiacavarepa eta náireresirayarehi. Mametacavacavarepa eta táurivayarehi eta mavachachirayarehi. Tiyanavarepa éna, tírerecanahi. ⁵ Te las dócepa sache, tiyanavarepa matanuca ena apamuriana. Títucavavare, máevatamurihavare tírerecanayare. Te las trespa sache, tiápechavavare tiyana tíucavavare ena apamuriana, énerichuvare tírerecanayarehi. ⁶ Te las cócopa sache, tiyanavare tíuchucahi tayehe eta plaza. Títucavavare ena apamuriana ajairana máemataneanahi. Tásiha, máichavacapa: “¿Tájaha tacayema tájina ématanenahini puiti jena sache?” ⁷ Éna najicapapa: “Nájina náechejiacahavihini”. Tásiha, ema máichavacapa: “Eyana éti apanava írereca ánaqui te nuyehe quinta úvaquiji”. Mametacavarepa eta táurivayarehi eta

* **19:29** Te jácani apanana versiónéana, tatiarihi te juca lista eta táechajiriruva “ena nayenana”. Tájinasera nalistanahini te libro antivupanahi. Eta tacahehi, vímatiequeneha vahi manacahini ema Mateo. Mácani apana achane mavejuchahipuca te Lucas 18.29.

mavachachiraya. ⁸ Tacahe, te yátipa, mametacapa ema mayehe empleado máichuhavacapa namutu, mavachachavacayarepa. Mavarahahi náinapuca nacavacha ena náequenereruanahi ticaemataneana. Nasapihapa téquenehanahi ticavachana ena náinapureanahi. ⁹ Tásiha, ena nasiapaqueneanahi te las cincopa sache, mavachachavacapa ema achane eta étapevacahi eta reale, tacutirichuhi eta navachahi ena ticaemataneanahi tamutu sache. Énapa ena nasiapaqueneanahi te las trespa sache, énerichuvare eta étapevaca reale eta navachahi. ¹⁰ Tacahe, te ticavachanapa ena náinapureanahi tisiapana, náimahapa éna tacutirichuhi eta navachanahi ena náequenereruqueneanahi. ¹¹ Tásiha, tisemanapa mayehe ema náquenuhi. ¹² Ánipa nacahe: “Ena nani náequenereruanahi títecapana, vicutivachavacaichuhi eta navachahi, étanainehinéni hora eta nacaematanerahi. Tacutirichuhisera eta vivachahi viti vínapureanahi. Váhiquene táuricaimahi eta juca, taicha ichapemurishi eta vicamichirahi víti eta tájjureva muracaquene eta sache. Táurica vicachuricavacayahini éna eta navachahi” nacahepa. ¹³ Émasera ema náquenu majicapavacapa: “Váhira nucaetemahémahi éti. Énaripa ena náequenereruanahi, váhivare nucaetemavacaimahi. Tínunahi eta nuvachachirahehi étapevacahi eta reale níjaracahe. Vahi ecusema. ¹⁴ Ésamiricavachucha. Evehachucha eta juca evachahi. ¹⁵ Núti néchinava taicha nuyeherichuhi eta plata. Nuvaraha ácticacahini eta evachana emutu. ¿Éti ecapinarunupapuca eta núrivahi nayehe ena nani?” máichavacapa.

¹⁶ Ema Jesús macahevarepa:

—Ene nacaheyare te jena sáchezare, nácani náequenereruanahi téhicanuana, éna nasapihayare tínapucana. Tásiha, nácani náinapureanahi, nasapihayare téquenehanayare* —macahepa.

Ema Jesús tíapechavavare máechajisihá eta máepenirayare

(Mr 10.32-34; Lc 18.31-34)

¹⁷ Tacahe, eta vipaisirapahi te achene te vicaijuhepa eta Jerusalén, típutsiacahavipa ema Jesús viti dócequeneana apóstoleana. Máichahavipa:

¹⁸ —Ímaha puiti, viyanainapaipa vicaijuheyare eta Jerusalén. Ánaqui nucaijararecasiyare nuti Manerejirunuhi ema Viya. Ticaratacanuanainapa ena tuparairucana. ¹⁹ Tímicapacuanayare taicha tíjararecanuanainapa nayehe ena suntaruana romanoana. Éna, nájina najapanuquenéna. Ticaecahinuanainapa. Téstacuanayareva. Tétatacanuanayareva te crusu. Tásihasera, te mapanaquenenapa sache, néchepucainapa te nécari —máichahavipa.

Esu naena ema Jacobo émapa ema Juan suyaseaca ema Jesús eta macajupahavahini ena suchichanaveana

(Mr 10.35-45)

²⁰ Tásiha, témeñahavapa esu naena ena vichamuriana ema Jacobo émapa ema Juan, suámavacapaipahi éna. Tépuycapa ésu te mamirahu ema Jesús, suyaseacayarehi énainahini majupahanainahini ena suchichanaveanahi.

²¹ Éma mayaserecapa:

* **20:16** Te jácani apanana versiónéana, tatiarihi eta juca táechajiriruvana “porque muchos son llamados, pero pocos son escogidos”. Tájinasera eta juca táechajiriruvanahi te libro antivupanahi. Eta tacahe, vímateiqueneha vahi manacahini ema Mateo. Mácani apana achane mavejuchahi eta juca te Mateo 22.14.

—¿Tájahasica ecamunu, nuchicha?

Ésu suíchapa:

—Nuvaraha pácachanéni ena nuchichanaveana tayehe eta péjasihayare picavacureraya. Náejacahini te pichacaya, eñi eñina te pivaure, eñi apana te sapa —suíchapa.

²² Ema Jesús majicapavacapa éna:

—Éti, vahi ímati tájahapuca eta nátajivayare nácani nujupahanayare. ¿Eratahayarepuca ecamicha eta íchavaquenévayare ecatajivairayare, ecutinuyarepuca eta nucamichirayare núti? —máichapa.

Éna najicapapa:

—Virataha vicamicha —nacahepa.

²³ Tásiha, máichapa:

—Yátupi ichape eta ecatajivairaya, vicuticacaya eta nacapasirahaviyare. Étapasera eta éjasirayare eta te nuchacaya, vaipa nútina necha nucaejacahini. Ema Tata Nucaiyaquene, émahí tinerejicayarehi ena nujupahanayare —máichapa.

²⁴ Tacahe, eta visamirahi viti diésqueneana mayeheana apóstole, visemapa nayehe ena apinana. ²⁵ Émasera ema Jesús máichahavipa. Ánipa macahe:

—Écharichuhi éti ena aquenucana tayehe eta avasare, muraca eta nacavainairipira. Énaripa ena tuparairucana, tétavicavahi tisuapacareanahi eta nacavacurerahi. ²⁶ Váhisera ecucahehi éti nayehe ena echamuriana. Mácani timerecavahi ticapicahupana, tacamunuhi máitativacayare ena apamuriana. ²⁷ Te etiarihivarepuca eti evarahahi ínapuca, tacamunuhi ímerecavaya navanarahayarehi ena echamuriana. ²⁸ Ecutinuyare nuti Manerejirunuhi ema Viya. Vahi étaina tímitecanu nucaitaticasihini. Nútiyarehi nítatihe. Énerichuvare níjaracavayarehi nímicapacava íchavenequeneanainahi éti camuriqueneanaya nucuchucureanaya —máichahavipa.

Ema Jesús macaimairicavaca ena apinana púchuquiána

(Mr 10.46-52; Lc 18.35-43)

²⁹ Tacahe, te vijunijicavarepa eta avasare Jericó, camurianahivare ena achaneana ticavasanahe tayehe, téhichavianahi. ³⁰ Natiarihi ena apinana ajairana púchuquiána. Téjacanahi te achenechacaya. Te nasamapa ema Jesús eta mánuicuirapahi, tipiararecanapa. Ánipa nacahe:

—¡Tátachicha! ¡Pítiqueneripa yátupiquenévihí Cristo! ¡Picatajicahavipaini pájapanuhavi!

³¹ Natiarihisera ena achaneana vahi náuricahini eta napiarasirahi ena púchuquiána. Navarahapa nacamatinaca. Énasera napiaracaichucha:

—¡Tátachicha! ¡Pítiqueneripa yátupiquenéví Cristo! ¡Picatajicahavipaini pájapanuhavi! —nacahepa.

³² Tacahe, ema Jesús eta masamiravacahi, titupihapa. Máichuhavacapa ena púchuquiána. Mayaserecapa tájahahipuca navarahahi.

³³ Éna najicapapa:

—Tátachicha, vivaraha pípuhauquichahavini apaesa vímairicapaini —nacahepa.

³⁴ Tacahe, ema Jesús majapanuvacainehi. Máemamahauquichavacapa. Enevanerinehi tímairiricana. Tásiha, téhichavianapa.

21

*Títicapapa ema Jesús eta te Jerusalén
(Mr 11.1-11; Lc 19.28-40; Jn 12.12-19)*

¹ Tacahe, te apanapa semana, viyanapa vicaijuhe te Jerusalén. Vétavajicapa tayehe eta avasarechicha Betfagé te tachacaya eta cerro ticaijarehi Olivoquiji. Ánaqui ema Jesús mavanecapa ena apinana vichamuriana.

² Ánipa maicha:

—Eyanayare tayehe eta te jena avasarechicha Betfagé. Ánaqui ímahayare ticaitühahi eta esena burrico, étapa eta tachicha te tachacaya. Evejapucayare íáminanuyare eta áni. ³ Te natiarihinapuca náeñama, emetacayare eta nucamunuirahi núti. Vahi táyeréimahi vímichavavaneyare —máichavacapa.

⁴ Eta juca tamutuhi útauchavapahi eta májuchaquenehi ema mácani víyarahaini profeta. ⁵ Ani tacahehi: “Emétaca ena achaneana ticavasanahi te Jerusalén, apaesa natsecava eta najacapirayare ema nayeheyare Rey. Emétacayare vahi nacupica, taicha tétavicavapahi eta mamansuvapahi, étapa eta máurivahi. Mámapahi eta iúritaresirayare. Tímaticareyarepahi ema, taicha ticaperayare eta burricuchicha” tacahehi eta Sagrada Escritura.

⁶ Tacahe, ena vanairucanahi náitauchahi eta navanahi mayehe ema Jesús. ⁷ Námapaipahi eta burricochicha étapa eta tachicha. Nanacamaequechapa eta náepacuhana. Tásiha, ticaperapa ema Jesús. ⁸ Camuriana ena achaneana tiácapanahi náepacapaicapaipa eta namuirihana. Ena apamuriana navehapa eta tapacaji eta cáchipaca. Nanacavare te mayanihayarehi éma. ⁹ Ena apamuriana títapumirauchanapahi énapa ena téquenehanapahi tipiaracanaipa:

—Yare, Tata. Píti yátupiquenevihu Cristo réyvihu viyehe viti israelítana. Ichape eta vicunachiravihu píti. ¡Vanairucaquenevihu me Viya! ¡Asulupaya me Viya te anuma! ¡Viva ema Viáquenu! ¡Viva! —nacahepa.

¹⁰ Tiúchuchujicanapa ena achaneana te Jerusalén. Ichape eta náramirahi ema Jesús eta máitecapirahi. Tiyaserejiricacanapaipa:

—¿Nájaha ema maca achane?

¹¹ Ena apamuriana najicapapa:

—Émara ema profeta ticaijare Jesús, ticavasa te Nazaret te tinapaica te Galilea —nacahepa.

Ema Jesús macuchuchujicavaca ena tjararecanahi eta sárareana, cáyureana te tajuhe eta Templo

(Mr 11.15-19; Lc 19.45-48; Jn 2.13-22)

¹²⁻¹³ Tacahe, te apanapa sache, tianapa tisiapa ema Jesús tayehe eta te Templo. Máimaharinehi ena achaneana tjararecanahi eta sárareana, cáyureana. Ena apamuriana ena tivacharecanahi. Natiarhivare ena títsiri-perecarahiana eta naplataneana ena apavasanana. Máichavacapa:

—Ema Tata Nucaiyaquene, ani macahehi eta máechajiriruvahi te Sagrada Escritura: “Eta nupena tacarichu táicuchihi eta nayujarasirareya ena achaneana” macahepa. Étisera eti tiámerahiana, ecasiapavapa eta te juca. Emaeperajicapa eta tacapichuirahi. ¡Eyana iúchucatataji! —máichavacapa.

Tásiha, macuchuchujicavaca namutu. Máequehepuichinavacapa eta namesarana étapa eta nasiyana.

¹⁴ Eta mávihairahi te Templo ema Jesús, napauchapa ena púchuquiana énapa ena masariana. Tásiha, éma macanaracavacapaipahi. ¹⁵ Tacahe,

ena amaperuana tipiararecanahi eta nacunachirahi éma, ánipa nacahe: “Pítiquenehi yátupiquenevihi Cristo manerejiruvihi ema Viya” nacahepa. Énasea ena tuparairucana énapa ena escribánoana vaipa náuricahini eta náimairahi tamutu eta juca. Tisemanapa. ¹⁶ Náurujiacapa. Navarahapa nacaichepaica eta máichaqueneanahi. Tásiha, náichapa éma:

—¿Tájaha tacayema písapa tipiararecana ena nani amaperuana? ¿Váhiyapa picamatinacavacapai? —náichapa.

Ena Jesús majicapavacapa:

—¿Tájahasica táichavahi eta juca najirairahi? ¿Váhipuca échajicuha eta Sagrada Escritura eta táechajisihairahi eta juca najirasahi ena nani amaperuana? Ani tacahehi: “Piti, Tata, pinacasamurechavacahi ena amaperuana eta máejerarerayarehi naicha eta najirairayare eta táurinaquene alabanza” — máichavacapa.

¹⁷ Te títapiricapa eta majicapiravacahi, majunijicavacapa. Tiyanapa eta te avasarechicha Betania, étapa máimasinehi. Véhicapaichuhisera víti.

Ena Jesús májiquiha eta higo taicha máhiriquirehi

(Mr 11.12-14, 20-26)

¹⁸ Te apanapa sache, te yáticarrahichicha, tiyanavarepa ema Jesús tayehe eta Jerusalén. Véhicapaichuhivare víti apanava. Eta vipaisirapahi, técuhasamurepa éma. ¹⁹ Máimahapa eta yucuqui ticajare higo te achenechacaya. Tiyanapa mapauchahi. Tájinasera táhinahini. Tapacajianachucha. Tásiha, máichapa ema Jesús eta higo:

—¡Pépiyainapa píti eta máhiriquereviyare! —máichapa.

Ena macaherahi, enevanapa tijiyujipa eta tapacajiana. ²⁰ Eta vímairahi víti, viáraminehi ichape. Viyaserecapa ema Jesús:

—¿Tájaha táichararacavahi eta táijahúchiravahi táijiqui eta higo? — vicahepa.

²¹ Ena Jesús tijicapahavipa:

—Jéhesare nusamacarehi me Tata. Éti apana esamacareyareva, te yátupina eta ecasiñavairahi me Viya. Tájina émaitucaimahi. Eratahayare ícha, ecutinuya eta níchaquenehi. Eratahayareva ecayejeca eta cerro te apachacaya.

²² Tamutu jácani eyaseserepiyare eta mayehe ema Viya te eyujarasirana, ecajaracasiyare te yátupina eta ecasiñavairahi me Viya —máichahavipa.

Nayaserecapa ema Jesús nájahahipuca tituparacahi éma

(Mr 11.27-33; Lc 20.1-8)

²³ Tacahe, visiapavarepa tayehe eta te Templo. Ena Jesús, tímiturecavarepa nayehe ena achaneana. Tacahe, napauchapa ena tuparairucanahi. Natiarihivare ena tinerejicavanahi ena aquenucarahana. Ánipa nacahe:

—Píti, vahi vitupararuvinahini víti eta píchira eta júcana. ¿Nájahasica tímítucavihi? ¿Nájaha tituparacavihi eta juca píchaqueneana? —náichapa.

²⁴ Ena Jesús majicapavacapa:

—Núti apanavare nuvaraha nuyaserecahe. Ejicapanuyaresera apaesa numetacahe eta nucatuparahairahi eta níchirahi eta júcana. ²⁵ ¿Nájahapuca tivanecahi ema Juan eta máitesirahi máicachasirisirahi? ¿Émapuca ema Viya tivanecahi, émajivapuca eta máitesirahi? —máichavacapa.

²⁶ Váhisera náituruequenehahini eta najicapirayarehi. Tiácapaemajiricanapa. Ánipa nacahe:

—¿Tájahasica vicayemayare eta vijicapirayare ema maca? Te vémunahacava vícha: “Mavaneruhi ema Viya”, éma macahénapapuca: “Tásiha, ¿váhiyapa esuapahini éma?” Téhesera vácahepuca: “Émajivaichucha eta máitesirahi”, ticauyayacareripa titupisicahaviana eta te márijahiana ena achaneana, taicha namutuhi náimijachahi ema Juan profetaquenehi yátupiquene, mavaneruhi ema Viya —téchajiricacanapa.

²⁷ Tásiha, náichapa ema Jesús:

—Vahi vecha víti —nacahepa.

Tacahe, máichavacapa éma:

—Énerichuvare núti, vahi numetacahémahi nájahapuca ema tituparacanuhi. ²⁸ Nuvarahasera nímicutiarachinaheyare. Nararihi ena apinana ticaparapacacana. Ticavanahipa ema émana mayehe ema naiya. Ánipa máicha: “Nuchicha, piyana picaematane puiti jena sache. Pírerecaya eta uva” máichapa. ²⁹ Ema machicha majicapapa: “Vahi nuvaraha nucaematane puiti juca sache”. Te tiyerepa, tiyanapanéni ticaematanehi. ³⁰ Tásiha, ema naiya mavanecavarepa ema émana machicha, mayanahini macaematanehini éma apanavare. Tásiha, ema amaperu majicapapa: “Tiuri, nuyanayare” macahepa. Váhinéni mayanahini. ³¹ Puiti nuyaserecaheyare: ¿Nájaha ema tisuapajirahihi mayehe ema maiya? —máichavacapa ema Jesús.

Éna najicapapa:

—Ema tínapuca, éma tisuapajirahihi.

Tásiha, ema Jesús máichavacapa:

—Nutupiruva numetacahe puiti. Nasapihayare ticachuricaheanayare tisiapana te anuma ena túhusianainihi énapa ena tisipecaturarahanainihi. Éti vahi esiapaimahi. ³² Taicha vahi esuapahini eta máimiturapiana ema Juan Ticachasiricarahini, váhivare ávarahahini étupiricavahini eta itaresirana. Nararihisera ena tisipecaturarahiana, ichape eta nasuapirahi. Étiserá, tétavicava eta emasuapajiraiva, tayanapane ímahahi masuapacarevahi éma —máichavacapa.

*Ema Jesús máimicutichina ena pártirárioana máurirahana
(Mr 12.1-12; Lc 20.9-19)*

³³ Ema Jesús máichavarepa:

—Esamanu eta juca apana nímiturapiya. Nímicutichinaheyare. Matiarahi ema achane. Ticaevaruhi camuri eta uva te máesane. Manaruchapa eta masucure. Máepiyacavarepa eta nacaticaresihayare eta tachi eta uva. Máepiyacavare eta torre, nápanihayare eta najaneasihayare eta máevaru.

Tásiha, máijaracapa ena achaneana, pártirárioanayarehi. Tásiha, tiyanapa ema achane te apana avasare. ³⁴ Tacahe, te títicapapa eta caje tayairahi eta uva, máimivanerecapa ena mamusurana nayaseapanavacayarehi ena pártirárioanahi eta tatucachaqueneharehi éma. ³⁵ Énasera ena pártirárioanahi tismauchavanarichucha. Nacaratacavacapa, náehapa ena vanairucana. Nacapacapa ema émana. Ema apana nayucaracapa te márijahiana. ³⁶ Tásiha, ema achane máimivanerecavarepa ena apamuriana. Camuripanana. Váhiquesera náijarahini, náhavacavarepa. Nacapacavacapa ena apamuriana.

³⁷ Tacahe, émajacaruvapa máevataca ema machicha. Máimijachaipahi émapapucaini napicauchahini. ³⁸ Te náimahapa ema machicha ema ticayehe

eta úvaquiji, ánipa nacahe: “Émainapapuca ticayeheyare ema maca. Yare, vicapaca apaesa tánasipa viyehe tamutu. Tájina máicharachavimahi ema achanénavaji”. ³⁹ Tacahe, nacaratacapa ema machicha, nacuchucapa eta tayehe eta isaniti, nacapacapa.

⁴⁰ Puiti, nuyaserecaheyare: ¿Tájahapuca máicharachavayare ema ticayehe eta úvaquiji ena pártirárioanahi máurirahana? —macahepa ema Jesús.

⁴¹ Éna najicapapa:

—Éma tisemainapa. Vaipa májapanuvacaimahi. Macapapanavacayarepa ena pártirárioanainihi. Májjaracainapa ena apamuriana pártirárioanayareva, nácani tipicaurahianahi, nájjaracahini eta mayehe parte —náichapa.

⁴² Tásiha, ema Jesús máichavacapa:

—Jehe tíuríhi eta ejicapiranuhi. Nuvarahasera epanerechinavapaini eta tacayemahi eta Sagrada Escritura, apaesa ácaicutiara éti. Ani tacahehi: “Éna tépiyarecarahiana eta Templo, tasapiha náepuruhi eta mari táicuchihi tatumearayare eta peti, taicha vahi náimatihini. Émasera ema Viya macaiticapahi eta te táicuchihi eta tatuparahahi. Tacapicahuquenehi puiti. Táitusiava, tétavicavahi eta vicunachirahi víti ema Viya” tacahehi eta Sagrada Escritura. Nuvaraha ecaicutiaraya.

⁴³ Puiti numetacahe: Táichavenehi eta emasuapajiravahi, vaipa étiparacaimahi tayehe eta mavanairipi ema Viya. Éna tisuapajirahianahi, éna ticavacureanayare te jena sácheyare. Énainapa téchanayare eta vanairipiana. ⁴⁴ Puiti, núti nucutihi eta ichape mari náepuruquenehi. Eti épurunuanahi, iáquipaicavayare évetutujicayare. Tichimaracahenapa eta muraca ecuñaraqui taicha eta emavarahirahi éhicanu —máichavacapa.

⁴⁵ Étasera eta nasamirahi ena tuparairucana énapa ena fariséoana, tisemarinenehi taicha tímaticavanapa eta énairahi tayunacavaca eta máimicutichiravacahi ema Jesús. ⁴⁶ Navarahapa nacaratacayarehíni. Tipicavanachuchasera nayehe ena achaneana taicha namutu nacunachahi ema Jesús eta émairahi vanairuca me Viya.

22

Éma Jesús tímicutichava mácani rey te máichuhavacapa ena machimaranaya, máichayarehi eta ichape piesta

¹ Éma Jesús máimitucavare ena achaneana eta apana máimicutichaquene. Ánipa macahe:

² —Éma Viya, macutihi mácani rey te máimiyenachayare ema machicha, máichayarehi eta ichape piesta. ³ Mavanecapa ena mavanarana náichuhapanavaca ena machimaranaya. Váhisera návarahahini nayanahini éna. ⁴ Tásiha, ema rey máevatacavare ena apamuriana mavanarana. Ánipa máichavaca: “Eyanavare étipava ímitatajiricavaca ena níchuhaqueneanahi, náitecavanepa. Nucaparecaripahi eta vaca nirureyare nésinaruanahi. Tíúrinapa tamutu eta juca tinicacare. Énanecha nucuchapahi náitecavanepa” macahepa.

⁵ Énasera ema máichuhaqueneanahi vahi nasuapahini. Nájina nayanahini. Éma émana tianapa te máesane. Éma apana máimahapana eta mayehe tienda. ⁶ Éna apamuriana nacaratacapa ena vanairucanainihi, náehavacapa, nacapacavacapa. ⁷ Tacahe, te máechapa ema rey, tisemapa. Mavanecapa ena ma-suntaruana nacapapanavaca ena ticapahianahi. Nájuchavare eta tamutu eta

napenanaini. ⁸ Tásiha, máichavacavarepa ena apamuriana mavanaranahi: “Tiúripa tamutu eta juca tinicacareana. Váipasera nuvaraha náiteca ena náinapureanahi níchuhaqueneanainihi. ⁹ Eyana te tamutu cálleana. Íchuha-vacayare namutu nácani ecanunaqueneanayare” máichavacapa. ¹⁰ Tacahe, ena mavanaranahi tiyananapa, náchepupanevacapa. Nacurujicavacapa namutu nácani nacainunaqueneanapahi: nácani achaneana tiúriana énapa ena súnsusurujiana. Camurianahi. Tinicanarinehi eta te távihayarehi eta piesta.

¹¹ Tacahe, ema rey tisiapapa, máimahayarehi ena machimaranahi. Máimahapa ema émana achane ema matiaríhiquenehi vahi manacahini eta namuirihasa te ticaichuasiana. ¹² Tacahe, máichapa: “Ajaira, ¿tájaha tacayema vahi pinacahini eta múiriare níjararuheanahi tayeheyarehi puiti juca piéstayarehi?” Émasera ema achane vahi majicapahini. ¹³ Tacahe, ema rey mavanecavacapa ena mavanarana: “Eveha ema maca. Ítjivaucha, ítiápe-chavare. Íyaracuhapana te timapicu tayehe eta máiyauchiavayare macapiti-quiachechiavayare” macahepa ema rey.

¹⁴ Ema Jesús máichavarepa:

—Numetacahe puiti: Camurianahi ena níchuhaqueneanapaipahi. Ánimur-ianarichusera ena títaurahianayare —macahepa ema Jesús.

*Navaraha náemejecapavacha ema Jesús tayehe eta impuesto
(Mr 12.13-17; Lc 20.20-26)*

¹⁵ Tacahe, eta nasamirahi ena fariséoana, tiseanmarinehi. Tiyananapa ticurujicacanapa, navarahaipa náemejecapavachayarehi apaesa étainhi-pucaini taviuchahini ema Jesús. ¹⁶ Tacahe, navanecapa ena nachamuriana énapa ena políticoana. Nayaserepanahi ema Jesús. Te náitecapauchapa, ánipa nacahe:

—Tata maestro, vímatihi eta tatupiruvairahi táurivahi eta juca pímitura-pianahi. Yátupihi eta pímitusiravacahi eta táurinaquene achene ticaijuhe me Viya. Váhivare pipicacaracavahini eta péchajisihairahi eta náichavaquené-vanahi nácani achaneana, tayanapanehi aquenucahi. ¹⁷ Vívarahahisera viyaserecaviyare eta pipaneruhi: ¿Táuricahipuca vivachacha ena viyase-hana impuesto mayehe ema Presidente Emperador romano? Taicha víti, machanerahavihi ema Viya, ¿masi? —náichapa.

¹⁸ Émasera ema Jesús máimatiacavacapa eta taurivapahi eta napane-reruana. Tacahe, máichavacapa:

—¡Apimirahetataji! ¿Tájaha tacayema evaraha ímiaquipaicanu?

¹⁹ Nímahaseji, iáminanu étapena eta reale —máichavacapa.

²⁰ Eta náijarasirapa, éma máichavacapa:

—¿Nájaha ticaijare eta juca? ¿Nájahavare ticavasimahi eta juca mirare eta te juca reale? —máichavacapa.

²¹ Éna najicapapa:

—Mayehe ema Presidente Emperador —náichapa.

Tacahe, éma máichavacapa:

—Tiuri, táuricahi íjaraca ema Presidente Emperador eta juca mayehe-richuhi éma. Tásiha, íjaracavare ema Viya eta mayeherichuhivare éma —máichavacapa.

²² Te nasamapa ema Jesús eta majicapiravacahi, ichaperinehi titsirihaca-vanahi. Náramipa eta máitupajjiasiravahi. Tiyananapa tichavanahi.

Nayasereca ema Jesús náicharacavayarepuca ena náepenaqueneana eta náechepusirayare

(Mr 12.18-27; Lc 20.27-40)

²³ Étarichu te jena sache, nacahepaipahi ena saducéoana. Ena nani saducéoana, apanahivare eta náimiturapiana. Éna, vahi nasuapa eta náechepusirayare ena náepenaqueneana. Tiyananapa náimahapanahi ema Jesús. Natanucahi eta táetseraruvayarehi náicha. Ánipa nacahe:

²⁴ —Tata maestro, ema víarahaini Moisés, manaquicahi eta máechajiriruvahi eta viyehé: “Te máepenaquenehahipuca ema achane esu mayena, tásiha nájinahipuca manaquiequeneruvainahini machichainahini; te matiarihihipuca mácani maparapehi, mavehayare esu machinenaquenení, apaesa émainapuca macachicha eta suyehe, máitsivainahi ema maparapéní”. ²⁵ Tacutiquene te juca vitaracu, natiarihinihi ena siétequeneana ticaparapejiricacana. Tacahe, ema náechavimuri títauchavapa. Máepenaquenehapasera esu mayena. Nájinahi machichainahini. ²⁶ Tacahe, ema maparape máitauchavare esu machinenaini. Énerichuvasera máepenaquenehavare, nájinavare máchichainahini. Ema émana maparape máitauchavare ésu. Énerichuvare máepenaquenehavare. Namutupa ena siétequeneana navehahi ésu, tásihasera náepenaquenehapai, nájina émanainahini macachichahini eta suyehe. ²⁷ Te táequenepa, tépenapa esu esenaini. ²⁸ Tacahe puiti, te apanapapuca eta náitaresirayare ena nani, ¿nájahapuca ena siétequeneana ema yátupiquenehi suímaquenehi esu esena, taícha ena siétequeneana namutuhi suímanarihi? —náichapa.

²⁹ Tásiha, ema Jesús majicapavacapa:

—Éjecapava éti. ¿Tájaha tacayema vahi ácaicutiarahini eta táimiturapi eta Sagrada Escritura? ¡Váhivare evarahahini esupahini eta tamutuirahi marataha ema Viya! ³⁰ Ánaqui te apana náitaresiraya, vaipa nácamunuimahi esu esena. Énaripa ena esenana, váipavare nácamunuimahi ema ajaira. Nacutinapa ena ángeleana tiávihanahi te anuma eta namaepenaacacairahi. ³¹ Éti váhivarepuca ácaicutiara eta yátupirahi eta vahi táepenahini eta náchanevana ena náepenaqueneana. Váhipuca ácaicutiara eta máechajiriruva ema Viya. Ani macahehi éma: ³² “Nútira yátupiquenenuhi Viya, macasiñaquenehi ema Abraham, ema Isaac émapa ema Jacobo” macahepa ema Viya. Nutupiruvahi numetacahe: Ema Viya, éma téchahi eta náitaresirana ena téhicanahi, tayanapane tépenaripa. Eta náchanevana, tímiyanavarichucha títareca te mamirahu. Éti, ichape eta éjecapiravahi —máichavacapa ema Jesús.

³³ Tacahe, eta nasamirahi ema Jesús, ichaperinehi eta náramirahi ena achaneana eta máimiturapihi.

Eta tisuapacarepanahi te mavanairipiana ema Viya

(Mr 12.28-34)

³⁴ Tacahe, ena fariséoana eta náimairahi macamatinasiravacahi ema Jesús ena saducéoana, ticurujicacanapa éna. ³⁵ Tásiha, tiyananapa náemejecapavachayarehi ema Jesús. Ema émana ticainapucavapa, máestrohi éma tayehe eta nayeherepiana. Mayaserecapa éma:

³⁶ —Tata maestro, nuvaraha pimetacanuini ¿tájahapuca eta vanairipi tisuapacarepanahi tayehe eta mavanairipiana ema Viya? —macahepa.

37-38 Ema Jesús majicapapa:

—Eta máechajiriruva ema Viya te Sagrada Escritura, ani tacahehi: “Yátupina eta émunasiranuina nuti Iáquenu. Iúnaca te esamureana. Yátupina eta ecachanevairanuina núti. Epanerecha eta nímiturapiana tamutu sácheana, yátiana”. Étara eta juca eta vanairipi tisuapacarepanahi. Éta tativayare ítauchayare, tínapuca tayehe eta apamuri vanairipiana. ³⁹ Eta apana táehiruhi eta juca, ánivare tacahe: “Pémunacayare ema piparaepiyahi, tácuti eta pémunasiravahi píti”. ⁴⁰ Eta juca apínaquene vanairipi, éta máehicahi ema víyahahini Moisés tayehe eta apamuriana mavanairipianahi éma. Énaripa ena apamuriana profetana, étarichuvare náehicahivare éna tayehe eta náimiturapianahi.

Yátupi ema Cristo mámariequenénihni ema rey David, Víyahivare éma (Mr 12.35-37; Lc 20.41-44)

⁴¹ Tacahe, eta náurujiasiraichaha ena fariséoana te machacaya ema Jesús, ⁴² máichavacapa:

—Puiti, nuvaraha nuyaserecahe eti: ¿Tájaha tacayema eta epanereruana éti mayehe ema Cristo ema ecuchapaquenehi? ¿Tájaha eta ícutiarayare eta ímatirayarehi éma te máimerecavapa? —máichavacapa.

Éna najicapapa:

—Vímatinapa éma taicha tiúchucayare mámariequenyare ema víyaháini rey David —nacahepa.

⁴³ Majicapavarepa:

—Yátupihni ema Cristo achanequenehi eta máimahi taicha mámariequenyarehi ema víyaháini David. Nuvarahasera epanerechaya eta juca máechajiriruvahi ema David te májurehi Salmo, ani macahehi: ⁴⁴ “Ema Viya máichapa ema Tata Náquenu Cristo: Yare, péjaca te nuvaure, eta picuchapihayare eta nucaepuyusiraya te pimirahu ena ticatianacavianahi” macahepa. ⁴⁵ Ema David, eta máimijarechirahi ema Cristo “Tata Náquenu”, ¿tájahapuca eta macayemaquenehi? Núti németeaca Víyahivare ema Cristo. ¿Tájaha íchahi éti? —máichavacapa.

⁴⁶ Eta nasamirahi eta juca, nájina nájaracavahini najicapahini. Eta tacahe, nájinapa napatsicavahini nápechahini nayaserecchini.

23

Ema Jesús máimereuchavaca eta nájecapiravana ena fariséoana énapa ena escribánoana

(Mr 12.38-40; Lc 11.37-54; 20.45, 46)

¹ Tacahe, ema Jesús máichavacapa ena achaneana vítipa viti máimitureana. Ánipa máichahavi:

² —Ena escribánoana énapa ena fariséoana tímijachavana catuparahana eta navepaisirayarehi eta mavanairipiana ema Moisés. ³ Tacahe, éna es-uapayare. Ítauchayare eta navanairipiana. Váhisera ecuehica eta nayeherrepiana taicha ena apapipijichucha eta napanereruana. ⁴ Tacutiquene tipimacahéana ítauchaya eta camuriqueneana nayeherepiana. Éti, tájina eta eapanucarehíni nayehe. Nájinapa tiratahaimahi títaucha. Apanasica éna, vahí náratayahini náitauchahini tamutu. ⁵ Tímijachavanahi tamutu náitaucha, navarairahi ticunachacareanayarehi nayehe ena achaneana. Tisiñavavai-canahi eta nápajusiravahi religiósana. Nanacahi te nanahuana eta ajureca

navejurehi eta te Sagrada Escritura. Tacutiquene eta nacamuirihaira tísapepeacavanahi píncanillanahi. Ticamatsivacahi eta nacamuirihaira. ⁶ Ena nani, te ticaichuhasiana eta nanisiraya, éna tinerejisinavanahi eta tiúrina-panána eta náejasihaya. Navarahahivare ichape eta napicauchiraya ena achaneana te náurujisirarevanahi. ⁷ Tétavicavahi eta navairahi ticapicahuana. Navarahahivare ticacajamicasianayarehi te jácani nácapajisiha ena námitureana téhepahi calle.

⁸ Étiserá vahi ecujamuracha eta nacajamisirahenahini ena achaneana, étainapapucaini nacunachirahenahini. Taicha éti eparapejiricacahi, ecuticacahi te mamirahu ema Viya. Nucarichu núti yátupiquenénuhi eyehenuhi Maestro, nuti Cristo. ⁹ Váhivare “Tata Nucaiyaquene” ecuquicha nácani achaneana te juca apaquehe. Taicha mararihi ema yátupiquene Ecaiyaquene, ema tiávihihi te anuma. ¹⁰ Váhivare tísapacarémani eta náimijarechahe, “Tata nuyehé jefe”, taicha nucarichuhi núti yátupiquenénuhi jéfenuhi eyehe. ¹¹ Nuvarahasera ítátijiricacayare. Nácani titátirahiana, éna ticunachacarepananayarehi eta eyehe. ¹² Énerichuvare nácani mánsuanahi, éna ticunachacarepananayare me Viya. Nácanisera ticasíñavaicanahi ticunachavanapuca, tímitsiriávanayare me Viya —macahepa.

Éma Jesús mayunacavaca eta nájecapiravanahi ena escribánoana énapa ena fariséoana

¹³ Tacahe, títécapanapa ena escribánoana énapa ena fariséoana. Tásiha, ema Jesús máechajicavacapa éna, mayunacavacahi. Ánipa macahe:

—¡Éti escribánoana étipa eti fariséoana! ¡Muracayare eta ícuñayare taicha eta apimirairahéhi! ¿Tájaha tacayema ímijachavahi éti echa eta tapaja eta anuma? Vahi ísapa nasiapahini ena achaneana, nácani tivarahana tisiapana. ¡Étiripa vahi ítujicavaimahi eslapa!

¹⁴ Jucarihi eta apana tiviuchahehi. Tatuparacahi eJapanuyare ena tépenaimana te váhipuca narataha navachachahini eta nantéve. Étiserá everejicavacahi tamutu eta nacayehequeneana. ¡Apimirahehi! Épiyacavahi religiósohehi, íchahi íúpiemahi eta eyujarasira te namirahu ena achaneana, evairairahi vahi tacuimicaecherachava eta emaurivanahi. Ichapeyare eta ícuñayare táicha.

¹⁵ ¡Jucarihivare eta apana tiviuchahehi, éti escribánoana étipa eti fariséoana! ¡Muracayare eta ícuñayare taicha eta apimirairahéhi! Éti, tétavicavahi eta éñamavairahi eta íturuca ena téhicana eta ímiturapiana, eyanirahi te avasareana tiyerehiana. Tasapihahi ímitucavacahi eta nacutiheraya eta evainarajivahi. Tiápajucava eta namaurivahi ícha. Eta tacahe, ecachanevacayare éna te yucu infierno.

¹⁶ Jéhevare éti ecaijare páurehe. Ichape eta ícuñayare taicha eta ímiaquipaisiravacahi ena ecutiqueneana púchuquiána. Éjecapavahi tayehe eta juca ímiturapihi. Ímituca eta tájinahi eta taviuchaimahi nácani najurachahi eta Templo. Étasera te najuracha tayehe eta oro eta tiávihihi eta te Templo, ticaviurevananapa ícha éti. ¹⁷ ¡Tétavicavahi eta emachaireva eti púchuquiána! Eta Templo, étara tipicauchacarepanahi tayehe eta oro tiávihihi tayehe.

¹⁸ Jápechavavare eta éjecapiravahi tayehe eta apana ímiturapi. Éti íchavare: “Te náichapuca nácani eta promesa, najurachapuca tayehe eta náijuchirare eta sárareana, tájinaipavare ticaviurémahi. Téhesera najurachahi tayehe eta

nanaquiruvahi te táinahu eta náijuchirarehi, étasera ticaviurevanaripa” íchahi éti. ¹⁹ ¡Tétavicavahi eta emaecharaireva eti púchuquiána! Eta náijuchirarehi eta sárareana, étara tipicauchacarepanahi tayehe eta enaquiruvanahi. Éta tímipicauchahi eta enaquiruvanahi. ²⁰ Taicha nácani tijurachanahi tayehe eta náijuchirarehi, vahi tácarichuhini napicauchayare éta, napicauchayarehiva tamutu eta námavahuana tiávihanahi te náijuchirarehi. ²¹ Tacutiquene nácani tijurachanahi tayehe eta Templo, vahi tácarichuhini náichahini eta juramento tayehe eta Templo. Najurachahivare mayehe ema Viya tiávihahi tayehe. ²² Énaripa ena tijurachanahi tayehe eta anuma, najurachahivare mayehe ema Viya, taicha eta anuma étahi eta mávasa, étaipa eta máejasihahi ema téchahi tamutu.

²³⁻²⁴ ¡Jucarihivare eta apana tivichahehi eta tamuracavaya eta ícuñayare, éti apimirana! Éti ímijachavahi íminecapaequeneha ena ecutiqueneana púchuquiána tayehe eta títucareana. Ímijachavahi yátupiquenehi eta religiósohéirahi eta epamisiravahi eta ítauchira eta vanairipi eta ecamavahuira me Viya eta diésmuri tayehe eta sucurecana. Ecnachacarehi taicha eta. Váhiserá epamicavahini eta táuriqueneana ticunachacarepanahi me Viya. Tatuparacahe emutu ájapanurahi; ecatiuchavacayarehi ena macatiuchavarahanahi; yátupina eta ítauchiraya tamutu eta íjarasiravahi; yátupina eta ecasínavairaina me Viya. Tatuparacahehivare ecamavahu eta me Viya eta diésmuri. Éti éñamavahi eta ítauchirahi eta ánichichana, étasera eta tisuapacarepanaqueneanahi táuriqueneana, tasapihahi vahi esuapahini*.

²⁵ ¡Tétavicavahi eta apimirairahehi! Éti ímijachavahi yátupiquenehi religiósohehi, ecaéñamaracavahi eta ímiyaniravaya ítaucha eta eyeherepiana. Étasera eta esamureana, tétavicavahi eta tachipejivavacahi taicha eta ecaetemaraivana étapa eta íjarasiravahi icha tamutu eta ejamuraraivana. ²⁶ ¡Tétavicavahi eta epuchuquiva eti fariséoana! Tamapurujíhi eta religiósohéirahi. Tacamunúhi tativa esipaca eta esamureana, apaesa yátupinasarepa eta iúrivayare, tipachinainapa eta ítaresiraya.

²⁷ ¡Tétavicavahi eta ecatajivairaya, táichavenehi eta apimirairahehi, eti escribánoana étipa eti fariséoana! Éti ecuti eta covacha. Tiúrinahi te táinahu, téhesera te amahe távihahi eta máeperejiqueneana. ²⁸ Tacahehi eta ítaresirahi éti. Ticutimahinehi iúrihi te namirahu ena achaneana. Étasera te esamureana táurujisiavahi eta evainarajivana, tacutiquene eta apimirairahehi.

²⁹ ¡Páurehesamichapucaini eti escribánoana étipa eti fariséoana! ¡Ichape-muriquene eta eviurevanahi! Eti, ímijachavaipahi puiti ecnachacarehi eta evarairahi échapajirica eyeheheacahi eta náecariana ena profetanaini matapiravarequeneanahi, nacaparuanahi ena iáchucanaveanaini éti. Épiyacavahi yátupiquenénahini eta iúrivahi. ³⁰ Tásiha, ánivare ecahe: “Te vitiaríhinaripahini víti eta acane te ticaparecanapa ena viáchucanaveanaini, vahi vicuímicasiapavahini tayehe éta” ecahepa. ³¹⁻³² Étijivapa ímereuchavahi eta apimirairahehi, taicha puiti éti epanerechahi ecapacanuya, tacutihi eta napanereruanahi ena iáchucanaveanaini. Tásiha, ecuticacayare eta naviurevahi ena iáchucanaveanaini.

* **23:23-24** Ani tacahe eta mayeherepi ema Jesús te máechajiriruva: “Eti ecatijsica eta chupi; ejjircasera eta camello”.

³³ ¡Éti tachichanaveanatajaji eta quichare, tétavicavahi eta evainarajivahi! ¡Váhiquene ticaiticahémahi eta ícuñaya te infierno! ³⁴ Nímicaecherachayare eta evainarajivahi. Nuvanecayare napauchahe ena nuchanerana. Éna, tímetacheanayare eta mapanereruana ema Tata. Tímitucaheanayareva tamutu eta nímiturapiana. Nasapihayare vahi esuapaimahi éna. Éna, yátupihí náituca. Émepururecayaresera éti eta náitupajijiasiravahi éna. Esapihainapa, éti ecapacavacainapa éna; ena apamuriana émétatacayare te crusu. Tásiha, ena apamuriana éstacavacainapa te iúrujisirarevana. Éhicarairicavacainapa te jácani avasareana najunaiyarepahi.

³⁵ Tásiha, eta ecapasiravacainapa ena nuvaneruanahi, étinapa tamuriacayare eta naviurevanahi namutu ena ticapacanahi ena achaneana matapiravarequeneanahi. Ema Abel máinapuiruhi nacaparuhi, máetaviuchainihí eta máuriva. Émapa ema máequenereruhi Zacarías (machichainihí ema Berequías), ema nacaparuhi te tamirahu eta Templo. Camurianahisera ena apamuriana náumurivanainihí. ³⁶ Nutupiruva numetacahe puiti: Étinapa tamuriacayare tamutu eta náepeniranahi. Títecapainapa eta ícuñayare eti achaneana ítareruanahi puiti —macahepa ema Jesús.

Éma Jesús ticatisamurevahi táichavenehi eta namasuapajiraivahi ena achaneana ticavasanahi te Jerusalén
(Lc 13.34-35)

³⁷ Tacahe, ema Jesús tiápechavava máechajicavacapa ena achaneana. Ánipa macahe, taicha eta macatisamureravahi:

—¡Tétavicavahi nucatisamureravahi ícha étisami eti tachichanaveanahi te juca viávasa Jerusalén! Ena iáchucanaveanainí, éna ticapapajicanahi ena profetana mavaneruanahi ema Tata. Puiti étipavapa evaraha ecutiya ena iáchucanaveanainí. Ichapemurihinéhi eta níchuirahéhi éti, iúrujiacanuhini, tácutihini eta varayu te tacurujimuriha eta tachichanaveana eta te tapava. Váhisera ávarahahíni. ³⁸ Ímahainapasera puiti eta íchararacavayare. Ticaqui-paicasiyare tamutu eta epenana, étiripa ticuchucaheanainapa. ³⁹ Numetacahévane puiti vaipa iápechavaimahi ímahanu, tiámainucavainapa te ítsivachapa eta epanereruana, evarairayare ejacapanu. Ecahénapa: “Ichape eta vicunachiravihi píti vanairucaquenévihí me Víya” ecahénapa.

24

Éma Jesús máimereucharipa eta táquipaisiravaya eta Templo
(Mr 13.1-2; Lc 21.5-6)

¹ Tacahe, ema Jesús tiúchucapa tayehe eta Templo, tiyanayarepainí. Vítisera viti máimitureana vémeñahavapa eta mayehe. Eta viáramirahí, vímechapa eta táurinaqueneana mari tayehe eta anuquehe peti te Témplosami. ² Émasera ema Jesús tijicapahavipa:

—Tamapurujiyare eta juca táurinava eta pétisami ímahaquenehi puiti. Nutupiruva numetacahe: Járájapayare eta sáchezare ticaqui-paicasiyare tamutu eta juca Templo. Téjanerepaicainapa tamutu eta juca táurinaqueneanahi ímahaqueneanahi puiti —máichahavipa.

Tatiarihiyare eta ecutiarareanaya te tánehipaicha eta táichecuriya
(Mr 13.3-23; Lc 21.7-24; 17.22-24)

³ Tásiha, viyanapa tayehe eta cerro Olivoquiji, víputsicavapa. Te vítecapapa, téjacapa ema Jesús. Tásiha, víti máimitureana víyaserecapa:

—Vivaraha pimetacahavi. ¿Tájamuhupuca eta náimiauipaisirayare eta Témposami? ¿Jararihiyarepuca eta ecutiarareyare eta piápechiravayare píteca, étapa eta táitachirayare eta táequeneruhi mapanereru ema Viya? — Víchapa.

⁴ Tásiha, ema Jesús máichahavipa:

—Ecuneuchavaicha yátupina, machu navayuacahe, taicha nárájapayare ena tépiyacavanayarepahi tímivasichavanayare nuyehe. ⁵ Nacaheyarepahi éna: “Nútiripa Cristo”. Nasapiha navayuacayare ena camuriana achaneana.

⁶⁻⁷ Énerichuvare esamairiricayare eta táehacacairayare eta ichapequeneana avasareana. Ticanarajiricacanainapa eta te avasareana tayerehiqueneana, énerichuvare ticauyayacarenapa guerraina eyehe éti. Váhisera ecuarameca eta esamairirisiraya, taicha ene tacaheyare eta táepaniravayare eta ecutiarareanayare. Vuíchahasera étaimahi eta táichecuirayare. Énerichuvare tatiarihiyareva eta ichape ecuhamuhuyareva te avasareana. Tatiarihiyareva eta ichape tayamurisiránaya eta apaquehe te jácáni távihanapahi táetupiaruyare. ⁸ Tamutu eta juca ecutiarareanayare eta táepaniravayare eta nátajivanayare ena achaneana.

⁹ Tásiha, eti nuchaneranihi, ticatianacahanainapa ena achaneana, táichaveneyare eta éhisiranuhi. Tipanajiricahanainapa te tamutu avasareana. Ticaratacaheanayareva. Ticapacaheanayareva. ¹⁰ Tásiha, nararihinapa camurianaya ena únajicavanayare eta náehisiranuhi. Tásiha, ticatianacahanainapa éti yátupiquene eta éhisiranuya. Tíjararecahanainapa éti. ¹¹ Natiarihinavarepa nácani tépiyacavanayare mavaneruana ema Tata. Tamutusera eta náimiturapiana náepiyahiravayarechucha, camurianayare ena navayuaruanayare. ¹² Énaripa ena arajuruana, tétavicavainapa eta namasuapajiraivaya, vaipa napicauchaimahi ema Viya. Camurianayare éna vaipa témunarahanáimahi. ¹³ Étisera nuchaneranihi, te ecamichahi tamutu, ímiyanavahivare eta éhisiranuhi te táitavapa tamutu, nucuchucuhaheyare núti.

¹⁴ Énerichuvare, eti nuchanerana ecametarairuyare te tamutu avasareana, taicha nuvaraha náecha namutu ena achaneana. Ímitucavacayarehi eta najacapacarevahi me Tata namutu ena téneuchavanahi, étapa eta apamuriana nimiturapiana. Te ítecapapa te tamutu eta avasareana, nápechavayare nuchava.

¹⁵ Numetacahevaneyare eta apana. Járájapayare eta sache táíñehiqueneayare. Tímerecavaya ema achane váinarajiquene, máechajisihaquenehi ema víyarahaini profeta Daniel. Mavanecayare ena machanerana náechipejisirayare eta tacapicahuquenehi Templo, nacuchucavacayare ena téhicanahi ema Viya. (Nácani navaraha nacaicutiara eta juca, tacamunuhi ticaravahuanayare eta májurehi ema víyarahaini Daniel.) ¹⁶ Tásiha, te ímahapa eta juca, esamairicapapuca, táuricapa etatajipa ejunavane, éti etiarihiqueneanahi te Judea. Ecaijuheyare eta te cérroana, étaina eyumuru-siavaina. ¹⁷ Nácani tiávihanahi te nayehe canchón te nasamairicapa eta juca téchacarehi, táuricapa najunavanepa. Vaipa táuricahini nasiapanumahini te napenana, navehahini jácáni náeñamaqueneanainihi. ¹⁸ Nácani tachimaruaruanayare te vamáhi eta téchacarehi, táuricapa vaipa nacuchava tayehe eta avasare, tayanapane náeñamahi eta nayereruvana. ¹⁹ ¡Páureanasami

nácani esenana tachimararuanayare, nácani ticajarianahipuca, nácani esenana ticachichanahi eta amuya tiájicachaha! ²⁰ Eta tacahe, eyaseacayare ema Viya tacuija táichejicahé* ; váhivare tacuchimaracahe eta ichape tiquiva te achene te eyanapapuca ejuna. ²¹ Te jena sácheanayare, tétavicavayare eta nacatajivairayarehi ena achaneana. Tájina tácutimahi eta táifnehivayare eta nacatajivairayare, te táepaniravahi eta náitaresirahi ena achaneana te juca apaquehe. Te táequenénapa eta tíñehi, tájinainapa tácutimahi. ²² Nájina tacaitiruimahi eta nacatajivairayarehi ichape. Macaichecavaneyaresera ema Viya eta masemavahi ema maca achane váinarajiquene, mavarairahi ema Viya macuchucuhavaca ena machanerana manerejiruana, majapanuqueaneanahayare. Taicha te vahi macucaicheca ema Viya, máitamurihahipucaini macapapajicavaca namutu ena achaneana ema maca achane.

²³⁻²⁴ Énerichuvare te tánehipaicha eta juca, natiarihinapa ena tivayuarahiana tépiyacavanayare Cristo tímivasichavanainapa núti. Natiarihivare ena tímicutijiricavanayare profetana mavaneruinahini ema Viya. Áninapa nacaheyare: “Yare, éhicayare ema Cristo. Matiarhipahi te juca vitaracu”. Ena apamuriana ánivare nacaheya: “Náepiyahiraivahi éna. Ema Cristo mávihahi te viávasa víti”. Étisera vahi ecusuapavaca. Eta navarairahi tivayucaheanaya eti machanerana ema Tata, náituruequenehayare naicha eta ichapequeneana tiáramicareana ecutiarareanayare. Camurianasamiyare ena navayuaruanayare. ²⁵ Étisera vahi tivayucaheanaimahi taicha numeta-cahevanehi puiti. ²⁶ Te náichahepuca: “Ímaha máenahi ema Cristo ánaqui te mávaphi apaquehe”, vahi ecuyana. Étaripa te náichahepuca: “Mararihipa jácani tayumurevaquenehi cuarto. Vicarichu viti vímatihí eta mávihahi”, váhiquenevare ecusuapavaca. ²⁷ Taicha te yátupinapa eta nítésirayare núti, nucutiyare eta táijahúchirava títecapa eta térameca. Namutuyare ena achaneana te juca apaquehe tinecapanuanayare. Tacaheyare eta nuchavirayare nuti Manerejirunuhi ema Viya. ²⁸ Vahi ecueñamava távihapuca nítécapihaya. Núti nítécapauchaheya te jácani iávihahi éti†.

Eta machavirayare ema Manerejiruhi ema Viya

(Mr 13.24-27; Lc 21.25-33; 17.26-30, 34-36)

²⁹ Tacahe, te táitavapa eta juca nacatajivairaya ena achaneana, enévanénapa témahainapa eta sache. Étaripa eta caje, témahainavarepa. Témiricanainapa eta jarairiquiana. Étaripa eta tiávihanahi te anuma vímaimahaque-
neanahi énerichuvare tiyamuricanainapa, tiyejyecavanainapa. ³⁰ Tásiha, náimahainapa te anuma eta nícutiara núti Manerejirunuhi ema Viya. Tíyahanainapa eta napisira namutu ena achaneana távacuanahi eta avasareana te apaquehe. Tásiha, tímahanuanainapa núti. Tiámanuinaipaipa eta úcaji eta núcupaisirayare. Tétavicavayare eta nujaraivayarepahi, níñehinapaipa. ³¹ Nuvanecaya ema Arcángele, muracayare eta macacherunajirapahi, apaesa ena ángeleana nacurujicainapa namutu ena nuchanerana nunerejiruanahi, tiásihanayare te tamutu eta juca apaquehe.

* **24:20** Ema Jesús máechajisihahi eta ticasarahimuhu, tiquivamuhuvare te jena mávasa Judea. Máechajisihahivare ena nayeherépi ena israelítana eta váhiquene náisapavahini tíanana tipaicana te jácani sávarumuhuana. † **24:28** Te máechajiruvahi ema Jesús, áni macahehi: “Te jácani mávihahi ema máepaquene, eta távihayare eta sipuquiana”. Eta juca mayehei proverbio, tatiaríhi eta tacayemaquenehi tayumurevahi.

³² Tiuri puiti, nuvaraha nímicutichinahe eta jácani yucuqui. Eta táitsiva-chiravavacapa eta tapacajiana, te ímahapa eta tajimuyairapa eta tatavaqui, tiúchucayarepa eta tapacajianaya arairu, tímaticarehi tiánehiripa eta únemuhuirayarépa. ³³ Ene tacahehi, te ímahayarepa tacaecherapa eta júcana ecutiarareana, ímaticainapa eta tánehirainapa eta nuchavira. ³⁴ Numeta-cahevanecha: Vuíchaha títavianaimahi ena achaneana náitareruanaichaha te táitecapapa eta júcana ecutiarareanayare. ³⁵ Títavainapa eta anuma étapa eta apaquehe. Tatívyaresera títauchava tamutu eta numetaruheanahi.

³⁶ Eta juca tiáramicareyarechucha. Nájina téchaimahi tájamuhuyarepuca eta táitauchiravayare, énaripa ena ángeleana vahi náechahini. Nútivaneréca-hipucáini néchahini. Macaríchu ema Tata, ema téchahi. ³⁷⁻³⁸ Tacutiyare eta acane eta náijahúchiravahi tépenana ena achaneana machamurianaini ema Noé. Ena nani tinicairihianinecha, náematanerinecha térana, tímarerecanahi ena nachichanaveana. Vahi téñamavanaimahi eta náimairahi ema Noé eta masiapirahi tayehe eta ichapequene pacure. ³⁹ Tájina vahi natsecavahini eta táitecapauchirayarehi eta ichape une. Tacahe, eta táemirisirapa eta ichapequene tíquiva, tacapapajicavacahi namutu éna. Ene nacahe-yare ena achaneana te jena sáche-yare. Vahi natsecavahini tayehe eta nuchaviraya. ⁴⁰ Te jena sácheanayare, natiarihiyare ena apinana ajairana ticaemataneanahi te isaniti, ema émana tiáramicareyare tíara. Ema apana manasinapa. ⁴¹ Tacuti-quene, apinanahipuca ena esenana cáemataneanahi tiyuvarecanahipuca. Énerichuvare esu ésuna tiáramicareya tíara. Esu apana sunasinapa.

⁴² Eta tacahe, etsecavahi ecauneuchava éti machu vahi ecunecapachava eta nítesirayarehi nuti Iáquenu. ⁴³ Nuvaraha ácaicutiaraquenéna. Machu ácutiriana mácani achane námeyeruhi ena tíamerahiana. Tájina máechapiavahini tájahapuca hóravayarehi eta náitecapauchiraya te mapena. Te máechapucaini, ticauneuchavaipahini éma, váipasare nacuameyechahini. ⁴⁴ Eta tacahe, éti ecuneuchavayare tamutu sácheana, taicha vahi échahini tájamuhuyarepuca eta nuchavirayare nuti Manerejirunuhi ema Viya, machu iáramecariana.

*Nararihi ena músuana tíuriana. Nararihivare ena músuana máurirahana.
(Lc 12.41-48)*

⁴⁵ Tiuri, nuvaraha nímicutichinaheyare eta apana. Macañárihipuca ema empleado máetaviuchahi eta máitupajijiasiravahi. Tisuapajirahivare éma. Ema máquenu tiyanayarehi te apana avasare. Táitusiava ema máquenu matuparacahi ema empleado eta májirasiraya eta tinicacareana ena apamuriana machamusuvanahi. ⁴⁶ Tétavicava eta máuricacarevaya ema maca ticatuparahahi, te tamutuhi máitauchahi jácani machimápirana ema máquenu. ⁴⁷ Németeaca, eta tamutuirahi tiuri eta machimápirahi, matuparacainapa éma téchayarehi tamutu eta máimahaqueneana. Eta tacahe, nuvaraha ácutipaini ema maca empleado tíurahi eta máitauravahi. ⁴⁸ Téhesera váhipuca tiuri eta mapanereruana ema mácani empleado, máimijachaichucha tiyere-yarehi eta máitecapirayarehi ema máquenu. ⁴⁹ Tásiha, macaetemajiricavacapapuca ena machamusuvanahi. Máichapapuca eta piesta, tinahacavapa téra macachanevacahi ena macuti-queneana téra-rahiana, téniricapa. ⁵⁰ Tásiha, vaipa manecapachavahini te títecapapa ema máquenu. Machimaracapa ema empleado eta mamapachichijisiraipa eta máimahaqueneana. ⁵¹ Eta tacahe, ema máquenu macavanairipinapa náestacayare muraca. Tájina najapanuhini, tayanapane máiyahainepuca, macapitiquiahechavainepuca

éma. Tásiha, machu ácutihini ema maca empleado máurirahahi, machu ecaqui-paicasisami eta te yucu infierno.

25

Ena Jesús máimicutichina ena diésqueneana amaperuana esenachichana

¹ Puiti nuvaraha nímicutichinaheyare nayehe ena tiúchucuhanaya ticachanenuanayare eta néjasihaya eta návacureya, énapa ena vahi ticachanenuanaimahi. Ena nani nacutihi ena diésqueneana esenachichana amaperuana. Ticuchapanahi ena araimanayare, nácapirayare te nasamapa eta náitecapiraya. Tiámauchavavacapaipa eta namicahuana lámparinana. ²⁻⁴ Ena cincoqueneana, téchemarahianahi. Tiámauchavavacapahi eta nabotellana eta aceite natseruvapahi. Ena apamuriana cincoqueneanahivare máechemarairahana mapanererureana. Vahi námauchavapahina eta nahaceiteyarehi. Tásiha, tájinapa naviyahini. ⁵ Tacahe, vahi náitecapavanehini ena araimana. Navarahaipahi tímacana éna. Tavehapa eta ichapu, tímacanapa. ⁶ Tacahe, te enumuhupa yati nasamapa ema tipiaracahi. Ánipa macahe: “¡Nárajapa ena araimanayare! ¡Yare íacapa!” nacahepa. ⁷ Téchepucanapa namutu ena esenachichana. Náetupiricapa eta namicahuana. ⁸ Tásiha, ena cincoanavare tájicuvacaipahi eta namicahuana. Tiyaseserecanapa eta aceite. Ánipa nacahe: “Ecatajicahavi ecajihavi eta eyehe aceite, taicha tájicuvacaipahi eta juca vimícahuana, vémahaequenehaipa” nacahepa. ⁹ Énasera ena cincoqueneana najicapapa: “Vahi víjaracahémahi machu véchuriaca víti apanava. Vahi várataimahi. Tiúripána eyana evachareca eta ehaceitena” nacahepa. ¹⁰ Tásiha, tíananapa tivacharepananayarehi eta aceite. Eta nayerevapahi, títecapananecha ena araimanayare. Tisiapanapa te tajuhe te távihayarehi eta piesta. Náehicapa ena cincoana natseruvanahi te távihayarehi eta piesta. Tacahe, ticaeratapa eta tapaja. ¹¹ Te tiyerepa, títecapanapa ena apamuriana esenachichana. Náehahamecapa eta tapaja. Ánipa nacahe: “Tata, tata, pivejiquenehahavi. Vivaraha visiapa” nacahepa. ¹² Émasera ema arayanayare majicapapa: “Éti, ¿nájahahehipuca? Vahi nímatihe. Németeaca vahi étina tavanaranaina eta peti” máichavacapa ema arayanayarehi.

¹³ Tacahe, ena Jesús máichahavipa:

—Éti, vahi ecucuti ena máechemarairahana. Ecutiyaresera ena téchemarahiana. Ecuneuchavaicha éti, machu vahi ecunecapauchava eta jácani sáchezare eta nuchavirayare núti Manerejirunuhi ema Viya.

Ena Jesús máimicutichinavaca ena achaneana ticaijaracasianahi eta maplatane ema achane rico

¹⁴ Puiti nuvaraha nímicutichinahe tayehe eta níjarasiraheya eti nuchanerana eta evacurecana taicha eta táurirahi eta ecaemataneasiranuhi. Matiaríhi ena achane rico. Tíyanayarehi te apana avasare. Máichuhavacapa ena mapanana mamusurana. Máijaracapa eta maplatane.

¹⁵ Ena achane máimativacahi eta náechemaraivahi ena mamusurana. Ena émana máijaracapa cinco millone. Ena apana máijaracapa apina millone. Ena apana máijaracapa étana millone. Nacaejapacayare eta plata. Tásiha, ena rico tíananapa te macaijuheyarehi te apana avasare. ¹⁶ Tacahe, ena tijacapahi eta cinco millone, macaemataneacapa eta plata. Macaejapacapa eta plata. Diez millonepa maicha eta maplatane eta macaejapasirahi. ¹⁷ Ena apana, ena tijacapahi eta apina millone, énerichuvarepa macaejapacapa eta plata.

Títucavavare éma eta cuatro millone eta plata. ¹⁸ Émasera ema tijacapahi eta étanaichu millone, vaipa macaejapacahini eta plata. Máecarapa eta plata, mapisirahi eta macaetehahini.

¹⁹ Tiyere eta mapairirisirahi ema náejaharu. Téhesera te tichavapa, mayase-recavacapa eta plata máijararuanahi éma. ²⁰ Tacahe, tínapucapa ema tija-capahi eta cinco millone. Máijaracapa ema máquenu eta máiturevahi. Ánípa macahe: “Tata, píti píjaracanuhi cinco millone eta plata. Júcahisera cinco milloneva eta táejapasirahi”. ²¹ Ema máejaharu majicapapa: “Tiuri, nuchicha. Tájina táichava. Tétavicava eta piúrivera. Pítauchahi eta picaemataneasirahi eta nuplatane. Puiti vahi támapurujimahi eta piúriverahi tayehe eta juca ánimurichichahi níjararuvíhi. Nutuparacavinapa eta camuriquene. Puiti pisiapainapa eta nuyehe. Piúrisamurereacaváinapa”. ²² Tásiha, títecapavarepa ema apana ema tijacapahi eta apina millone eta plata. Máichavarepa: “Tata, júcahi eta apina millone eta plata píjararunuhi. Júcahivare eta apinavare millone eta táejapasirahi”. ²³ Ema máejaharu majicapavarepa: “Tiuri, nuchicha. Tétavicava eta piúrivera píti apana. Puiti, váhivare támapurujimahi eta piúriverahi tayehe eta juca ánimurichichahi níjararuvíhi. Nutuparacavinapa eta camuripanaquene. Puiti pisiapainapa eta nuyehe. Piúrisamurereacaváinapa”. ²⁴ Tásiha, títecapavarepa ema tijacapahi eta étana millone. Máichapa ema máejaharu: “Tata, núti nímativíhi eta pímapapanuraivahi. Píverejicanuyarehi eta táejapasirayarehi eta piplatane. Pítahacanuyarehiva eta nématanevachahi. ²⁵ Eta nupisirahi nácaetehahini eta piplatane, nécarapa. Puiti, júcahi nímicahava tamutu eta piplatane”. ²⁶ Ema máejaharu majicapapa: “Tétavicava eta pisunsuva, píti plújutataji. Te pímatinuhípuca eta numajapanuraivahi, nítharahi eta apaematanevacha, téhevere pímiijachahi nuverejicaviyare eta táejapasirayarehi eta níjararuvíhi nuplatane; ²⁷ váhiyapa pinacapaini te banco eta nuplatane. Puiti váequeneipahini puiti eta táejahacaripahini eta nuchaviraipahi”. ²⁸ Tásiha, máichavacapa ena apamuriana mamusurana natiaríhi-queneanahi: “Everejica ema mácatataji eta plata. Íjaraca ema ticayehehi eta diez millone. ²⁹ Taicha, mácani máiturequenehahi eta macaemataneasirava, tatuparacahi eta nímicatasiraya. Ticayeheyare camuripana. Énasera nácani vahi náiturequenehahini eta nacaemataneasirava, ticaverejicasianayarehi eta náijaracasianahi. ³⁰ Émechareca muraca ema maca musu máurirahatataji. Vahi ecujapanu, tayanapane máiyahainepuca, macapitiquiahechavainepuca. Tásiha, íaquijica eta te cuarto tamapicujuhequenepanahi” macahepa ema achane rico.

Ena achaneana, te jena sáchezare ticayaserehianainapa, étapa tíamavacaya eta náitátirahi ena apamuriana, tícaevatanainapa tayehe eta návihayare

³¹⁻³³ Te nuchava nuti Manerejirunuhi ema Viya, néjacainapa eta te nuyehe trono tacapicahuquene, Réynuina. Tásiha, névatacaya ena nuyeheana ángeleana nacurujicavacaya te numírahu namutu ena achaneana te avasareana. Tásiha, núti nunerejicavacainapa ena yátupiqueneanahi nuchanerana. Nunacainapa te nuvaure. Tásiha, ena vahi nuchaneranainahini nunacainapa te sapa. ³⁴ Tásiha, nuti Rey ánípa níchayana ena nuchanerana tiávihanayarehi te nuvaure: “Yare, eti íuricacareanahi manerejiruanahi ema Tata. Níjaracahénapa eta etuparahayare, ícuchihi mayehe ema Tata acane te tépanavainapa eta apaquehe. ³⁵ Taicha te ímahanuhi eta nécuavahi,

éti énicanuhi. Numaunepahi, éti íjaracanuhi néra eta une. Tájina nítecapihahini te nupaisihapahi, éti íjaracanuhi eta nítecapihayare. ³⁶ Tájina numuirihainapahini, éti emuriachanuhi. Nucajumahi, éti ípuchapananuhi. Nucaeratahi te cárcel, éti éjirapananuhivare”. ³⁷ Tásiha, ena níchuhaque-
neanahi tijicapuanainapa: “Tata, ¿tájamuhu vímahavihi pécuhapahi, tásiha vénicavipa? ¿Tájamuhuvare vímahavihi pimaunepahi, tásiha víti vésicavipa eta une? ³⁸ ¿Tájamuhuvare vímahavihi te pipaisirana tájina pítecapihahini, tásiha, víti víjaracavipa eta pítecapihahi? Váhivare vímahavihini mamuriarevinahini, tásiha víti vimuriachavipa. ³⁹ ¿Tájamuhuvarehipuca picajumahi, tásiha víti vípuchapanavipa? ¿Tájamuhuvarehipuca picaeratahi, tásiha víti véjirapanavipa?” náichanupa. ⁴⁰ Tásiha, nuti Rey nujicapainavarepa: “Nutupiruva numetacahe: Nútira íjaracanuhi tamutu eta ejapanuraivahi, ímicatasiravacachi ena echamuriana nuchaneranhivare, ena nani namaesachaque-
neanahi najacaphahini ena apamuriana ena achaneana” níchavacapa.

⁴¹ Tásiha, ena tiávihanahi te sapa, níchavacainapa: “Étiserá évuísiha te numirahu, eti masuapajirairahana ecaviurevanahi. Eyana tayehe eta yucu, acanevacahéna eta ecaicuñaira eta emuruiraya, máicuchihi ema íáquenuhi ema Váinaraji énapa ena majupahana ángeleanainihi. ⁴² Taicha te nécuhapahi, éti vahi íjaracanuhi eta nunica. Numaunepahi, váhivare ésichanuhi une. ⁴³ Étaripa te nupaisiranapahi, váhivare íjaracanuhi eta nítecapihahini. Néchurihavare eta numuiriha, váhivare íjaracanuhi numuirihainahini. Nucajumahivare, nucaeratahare, váhivare éjirapananuhini” níchavacainapa éna. ⁴⁴ Tacahe, éna náichanupa: “Tátachicha, ¿tájamuhu vímahavihi pécuhapahi, pimaunepahi, pipairicapahi, mamuriarevahi, picajumapahi, picaeratahi, eta jácani vimáimicatasirávihipuca?” ⁴⁵ Nuti Rey nujicapainavarepa: “Nutupiruva numetacahe: Éti, vahi ejapanunuhini, taicha vahi ájapanuvacahini apaesainahini ena nani nuchanerana emaesachaqueaneanahi”. ⁴⁶ Emutu éti eyanayare tayehe eta ecaicuñaiyayare máitavacayare. Énaserá ena nunerejiruana, matapiravareanahi. Námavacainapa tayehe eta táurivayare eta náitaresira, máitavacayareva.

26

Napanerechahini ena tuparairucana eta nacaratasirayare ema Jesús (Mr 14.1-2; Lc 22.1-2; Jn 11.45-53)

¹ Te titápiricapa eta juca máimiturapianahi, máichahavipa víti máimitureana:
² —Écharichuhi éti eta apinarine sache eta Pascuáiraya. Tásiha, nútí Manerejirunuhi ema Viya, ticaratacanuanainapa témetatarecanuanainapa —máichahavipa.

³ Tiuri, ena tuparairucana énapa ena aquenucarahana, énapa ena escribánoana ticurujicacanaripahi te tajuhe eta mayehe palacio ema Caifás, ema corregidor. ⁴ Tacahe, náechajisihaipahi eta nacaratasirayare ema Jesús. Navaraha éna navayuacayarehi eta nacaratasirayare, nacapasirayarehi.

⁵ Tipicacavanarichuchasera. Ánipa nacahehi eta náechajiruvahi:

—Vuíchaha vicucarataca éma achichu juca piéstairaya. Taicha camuriana-
yarehi ena achaneana, machu tájahapuca náicharacahavi taicha navaraha-
yarehi nacatiucha éma. Vicuchapasera nayana —nacahepa.

*Esu esena tíamasichahi ema Jesús te táijiyequene perfume
(Mr 14.3-9; Jn 12.1-8)*

⁶ Tacahe, ema Jesús, tiyanapa tichava eta te avasarechicha Betania. Náichuhasivahi eta manisiraya te mapena ema achane ticaigare Simón ema leprosoinihi. ⁷ Tacahe, eta manisirahi, sucahepaipahi esu ésuma esena. Suámaphahi eta perfume te bótechicha. Táetaviuchahi eta tasivachavahi. Su-pauchapa éma. Sujucuscipapa te machuti eta táetaviurehi eta táijiyeva. ⁸ Eta náimairahi ena nuchamuriana máimitureana ema Jesús, váiparinehi náuricahini eta suémepuresirahi eta tasivachaquene perfume sujucucisirahi ema Jesús. Ánipa nacahehi:

—¿Tájaha tacayema suémepurureca eta juca tasivachaquenehi perfume?

⁹ Tiúripanahipucani víjaracahini eta juca táijiyeamaquenehi. Vivehahini eta camuriquene plata; tásiha, vímicatasihahini ena páureana —nacahepa.

¹⁰ Émasera ema Jesús máimatihhi eta napanereruana. Tacahe, máichahavipa: Ésamirica esu suca esena. Tétavicavahi eta táuriva eta suíchiranuhi. ¹¹ Ena páureanasami, tamutuchucha sácheana eta ecachaneravacayare éna. Ímicatacayarehi te jácani ecaimahaquenérana. Nútisera vahi nánasiquenémahi eta eyehe. ¹² Eta juca sujucucisiranuhi eta perfume, sucainapucahi ésu eta suíjyechirahi eta náquehe tayeheyarehi eta nucaecarasirayare. ¹³ Nutupiruva numetacahe: Nácani ticametarairuanayare eta tiúrina echajirucava, náechajisihayarevare eta juca suíchaquenehi esu suca esena. Témechayare suyehe te tamutu avasareana te juca apaquehe —macahepa.

*Eta máijararesirahi ema Júlsi ema Jesús
(Mr 14.10-11; Lc 22.3-6)*

¹⁴ Ema Júlsi, émarichu vichamurinihi éma vidocenénihhi apóstole mayehe ema Jesús. Tiyanapa téchajiripanavahi nayehe éna tuparairucana. ¹⁵ Ánipa máichavacahi:

—Te yátupihpuca evarahahi ecarataca ema Jesús, núti nímechaheyare. Nucamunuhsira néchayare ¿áyanayarepuca eta evachachanuyare eta nímechiraheyare eta mávirare? —máichavacapa.

Tacahe, éna náijaracapa eta treinta reale. ¹⁶ Jéhevarepasera ema Júlsi matanucaipa eta máicharacayarehi eta máijararesirayarehi ema Jesús.

*Ema Jesús mánimurihapa ena máimitureana
(Mr 14.12-25; Lc 22.7-23; Jn 13.21-30)*

¹⁷ Tacahe, títecapapa eta piesta Pascua, étaripa eta títapuca sache eta semana vinicahi eta pan mayehere levadura. Viti máimitureana víyaserecapa ema Jesús:

—¿Távihapuca pivarahahi vácaijuhe eta vétupirisiavahini eta vinisirayare eta uvesachicha eta viyeherepi? —nacahepa.

¹⁸ Éma tivanecahavipa:

—Eyana tayehe eta Jerusalén, te mapena ema nímaticasare. Ani íchayare: “Ema maestro tivanecahavihi eta piyehe. Ani macahehi: Tiánehipa eta nítavirayare eta nématanehi. Te pipena eta nunisihayare eta uvesachicha eta viyeherepi, nénisihayare ena nímitureana” íchayare.

¹⁹ Tacahe, tiyananapa ena máimitureana. Étaipachuhi náichahi eta máimiturapianahi. Tinahacavanapa náetupiricahi eta naniruyare tayehe eta Pascua.

²⁰ Tacahe, te jena yátiquenehi ema Jesús, ténicahavipa viti dócequeneana máimitureana. ²¹ Te vinicaripahi, máichahavipa éma:

—Jéhesareinehi, te etaracu éti, mararihi ema émana títjararecanuyare — máichahavipa.

²² Tacahe, víti ichaperinehi eta máimipanereresirahavihi eta juca máichirahavihi. Vimutu viyaserecapa éma:

—¿Nútichupuca, Tata, jácani? —víchavacapahi víti éma.

²³ Tásiha, éma máichahavipa:

—Mácani néniruyare eta pan néchipaejiruhi te juca nuplatura, émara ema títjararecanuyare. ²⁴ Tacahe, nútí Manerejirunuhi ema Viya, étapaichuhi eta nacapasiranuyarehi, táitachiravayarehi eta nuyehe eta táechajiriruvahi eta Sagrada Escritura. ¡Páuresamisera ema títjararecanuyare! Tiúripaichuhi-pucani vahi macuchucahini te sujuhe esu maena —máichahavipa.

²⁵ Tacahe, téchajicapa ema Júlasí:

—Maestro, ¿nútípuca jácani nítjararecaviyare?

Tásiha, ema Jesús majicapapa:

—Pítisami —máichapa.

Éma Jesús tímechahavi eta macaejasiraya eta matratune arairu mayehe ema Maiya

(1 Co 11.23-26)

²⁶ Tásiha, eta vinisirahi, mavehapa eta pan ema Jesús. Mahasulupayachapa ema Viya. Mayuvetucapa, títjaracahavivacapa viti máimitureana. Tásiha, máichahavipa:

—Eta juca neche. Enica —macahepa.

²⁷ Tacahe, mavehavarepa eta vasu vérirare, mahasulupayachavarepa ema Viya. Tásiha, títjaracahavivare. Máichahavipa:

—Era eta juca ámutu éti. ²⁸ Taicha eta juca eta nítine, táepusiruvayare eta nucaepahairayare eta epecaturana emutu eti achaneana, esimutuque-neyarehi. Étarichuvare táicutiarayare eta nufirmachirayare eta arairu matratune ema Vicaiyaquene, nucaejasirayava eta matratune apaesa ámutu ecapacare mayehe. ²⁹ Nutupiruva numetacahe: Vaipa nápechavaimahi nérahivaréni eta juca tachi eta uva. Tiámainucava te táitachavapa eta nusiapi-riya eta nucavacuréraya, nucajupahairaya ema Tata Nucaiyaquene. Te jena sache, nítjaracaheya vérainapa eta aramaruama. Vicajupahainapa ema Tata.

Éma Jesús máimereucha ema Pedro tépiyacavayare vahi máimati ema Jesús
(Mr 14.26-31; Lc 22.31-34; Jn 13.36-38)

³⁰ Tásiha, eta vítanerirapa, vijirapa eta jirasare eta vihasulupayachirahi ema Viya. Te vítapiricapa, viyanapa vicaijuhe eta te huerta Getsemaní távihahi eta táemiripaisinehi eta cerro ticaijare Olivoquiji. ³¹ Eta vipaisirapahi, ema Jesús máichahavipa:

—Puiti juca yati ejunijicanuyare emutu éti. Ejunaracayare. Tásiha, títauchavayarehi eta máechajiriruvahi ema Tata eta te Sagrada Escritura: “Nísapayare nacaratata ema Pastor, nacapasirasamiyare. Tásiha, tijunara-cananainapa eta uvesana macurujiruanainihi” macahepa. ³² Téhesera te néchepucapa te nécarí, nínapucainapa te Galilea. Ánaqui nucuchapiaheyare éti —máichahavipa ema Jesús.

³³ Tásiha, ema Pedro majicapapa:

—Tayanapanepuca, Tata, najunaracapuca ena apamuriana, nútisera vahi nujunaimahi —máichapa.

³⁴ Ema Jesús máichavarepa:

—Nutupiruva numetacavi piti Pedrosami: Puiti juca yati, te tamirahuina-paichaha eta táechajisirayare eta varayu, mapahe eta pépiyasiravayare vahi pímatinu —máichapa.

³⁵ Ema Pedro macahevarepa:

—Tayanapanepuca pímicapacanu, váhiquesera népiyacavaimahi vahi nucuimativihini, váhivare nínajiacavimahi —máichapa.

Viti apamuriana étarichuvare tacahehi eta véchajiriruvahi.

Ema Jesús tiyujaraca te Getsemaní

(Mr 14.32-42; Lc 22.39-46)

³⁶ Te vítecapapa víti tayehe eta huerta Getsemaní, máichavavipa ema Jesús:

—Éjacachaha eta ani te juca. Ecu Chapmanuchaha. Núti nuyanayare ánaquipana, nuyujaracayare —macahepa.

³⁷ Mapananaichu ena mámaqueneanahi: ema Pedro, ema Juan émapa ema Jacobo. Ema Jesús, ichape eta máeñamiravahi te masamure, ticatisamurevapa. ³⁸ Tásiha, máichavacapa:

—Tétavicava eta táeñamirava muraca eta nusamure. Tavaraha ticapacanu. Ácahéchaha ani te juca. Váhisera ecuimaca. Ecauneuchanuhi —máichavacapa.

³⁹ Tásiha, tipaipanapa ánaquipanachíchahi. Tiáquipaicavapa máetipaisinapa, macaitecapa eta mamira te apaquehe. Eta mayujarasirahi, ániapa macahe:

—Tátachicha Nucaiyaquene, picatajicanupaini. Váhini tacuitauchavaini eta níchavaquenevayare. Váhini picuisapaini eta nucatajivairaya. Níjaracavasera núti eta nítauchiraya eta pivarahaquenehi píti —macahepa.

⁴⁰ Tásiha, téchepucapa. Tichavapa eta te návihahi ena mapanaqueneana máimitureana. Máimaharinehi éna, tímacanaripa. Macajamicapa ema Pedro. Tásiha, máichapa:

—Váiparinehi ímicatacanuhini ejaneacavahini étanainahipucaini hora ácahehini. ⁴¹ Éjamiuchava. Eyujarauchava apaesaina. Eyaseaca ema Viya eta étumevaina apaesa váhi macuiturucahe ema Satanás. Yátupihinéni eta iáchanevana taratahahi ticaratacava. Étasera eta éche máteji, vahi taratahaimahi ticaratacava —máichapa.

⁴² Tásiha, tiápechavavarepa tiyanavarepa ema Jesús. Apihepa eta mayujarasirahi. Ániapa macahe:

—Tátachicha Nucaiyaquene, váhini tacuitauchavaini eta níchavaquenevayare. Tásihasera, níjaracava núti eta nítauchiraya eta pivarahaquenehi puiti. Nísapava nacapacanu —macahepa.

⁴³ Tásiha, tichavavare eta viyeh viti máimitureana. Tímahahavipa víti vímamurihaipa taicha taveharipa eta ichapu eta víuquihana. ⁴⁴ Tacahe, mapahequenepa tichavapa tiyujarapana. Étarichuhi eta máechajiriruvanahi.

⁴⁵ Te tichavapa, téchajicahavipa:

—¿Iápechavapa ímaca? ¿Vuíchahapuca enaracahini? Jéhesare, puiti títecapapa eta nutuparahahi nacaratasiranuyare ena ticatianacuananahi. ⁴⁶ Ávane ema tíjararecanuyare. Échepuca. Viyana víacavavaca —máichavavipa.

Nacaratacava ema Jesús

(Mr 14.43-50; Lc 22.47-53; Jn 18.2-11)

⁴⁷ Téchajiricavaichaha ema Jesús, macahepainecha ema Júlasí, ema vichamurinihi. Mámamurihapaipahi ena camuriqueneana achaneana suntaruana. Ticaepuchiriquianapaipahi, étapa eta nayeheana espada. Éna, vanairucanahi nayehe ena aquenucarahana. ⁴⁸ Ema Júlasí, tatiarihihi eta máicutiarayarehi eta náimatirayarehi ena suntaruana ema Jesús. Ani macahehi eta máechajiriruvahi ema Júlasí:

—Ecunenuyare. Ema nétserareruyare, éma ecaratacaya —macahepa.

⁴⁹ Tacahe, ema Júlasí témeñahavapa mayehe ema Jesús. Máichapa:

—Yátiheipa, tata Maestro —máichapa.

⁵⁰ Tásiha, máetserarecapa. Ema Jesús majicapapa:

—Píti nímiturevíhi, ¿tájaha tímitecavi? —máichapa.

Tásiha, ena suntaruana enevaneпа nacaratacahi, napresuchapa. ⁵¹ Ema émana vichamuri mavehapa eta mayehe espada. Mayuchatipaisinapa eta machaca ema mamusura ema aquenuca Caifás. ⁵² Tásihasera ema Jesús macatiuchaichucha. Ánipa maicha:

—Pinaca te tatumaramuhi eta piyehe espada. Taicha namutu nácani ticaparecanahi tayehe eta espada, énerichuvare nacaheyare, espada eta ticapacayare. ⁵³ Váhipuca pecha te návarahahini núti nuyaseacahini ema Tata, puítinaichuhini macucupaicahini ena 80,000queneana ángeleana.

⁵⁴ Váhisera nuvaraha nuyaseaca. Tatuparacahi títauchavayarehi eta táechajiriruvanahi eta Sagrada Escritura eta níchavaquenevayarehi —tásiha, máichavacapa ena suntaruana —. ⁵⁵ ¿Tájaha tacayema ecasiña eta espada, ecaepuchiriquipaipahivare eta ecaratasiranuyare, tímicutijiricavapa námerahihini? Étayapasica cape juca tamutuhi sácheana nucachanehehi nímitucahehi tayehe eta Templo. Váhivare epatsicavahini ecaratacanuhini.

⁵⁶ Títauchavahisera tamutu eta juca taicha tacahehi eta náechajiriruvahi ena profetanaini, tayehe eta Escritura táechajisihairanuhi —macahepa.

Tacahe, víti máimitureana vimutu vijunaracapa, vinaquicapa ema Jesús.

*Nacatupihapa ema Jesús te namirahu ena tuparairucana
(Mr 14.53-65; Lc 22.54-55, 63-71; Jn 18.12-14, 19-24)*

⁵⁷ Ena ticaratacanahi ema Jesús námapa te mamirahu ema Caifás, ema corregidorhi te jena áñohe. Natiarihivare ena escribánoana énapa ena aquenucarahana. ⁵⁸ Ema Pedro, máehiequenehapahi, mayerehipahisera. Te náimisiapapa, tisiapavarepa éma te tajuhe eta canchón mayehe ema Caifás. Téjacaipahi macachanevacaipahi ena suntaruana, mavarairahi máimahayarehi tájahapuca eta náicharacayarehi ema Jesús. ⁵⁹ Tacahe, ena tuparairucana énapa ena aquenucarahana natanucaipahi ena tépiyaequenehanayarehi ema Jesús, navarairahi tatiarihiyarehi eta tivichayarehi eta máepenirayare. ⁶⁰ Váhisera náichimavahini, camurianahinéni ena tépiyaequenehanahi. Tisiapananechaserá ena apinana tépiyaequenehanayarehi.

⁶¹ Ánipa nacahe:

—Ema maca achane visamahi víti eta mavarairahi máquipaica eta Templo mayehe ema Viya tacapicahuquenehi. Tásiha, máimichavayarehiji macaechepuca te mapanaquenenaji sache —nacahepa.

⁶² Tacahe, ema corregidor téchepurucainehi. Mayaserecapa ema Jesús. Ánipa maicha:

—¿Tájaha tacayema vahi pijicapavaca ena nani eta pépiyaequenehi? ¿Yátupipuca eta nacayemaquenehi? Taicha vímahavi vahi picatiuchavahini —máichapa.

⁶³ Émasera ema Jesús vahi majicapavacahini. Tásiha, mápechavare mayasereca ema corregidor:

—Pímaha puiti, nuyaserecaviyare. Vahi nuvaraha pépiyahirahi. Némechavi máimahavihi ema Viya. Pátupiruva pimetacahavi te yátupihpuca pítiquenehi Cristo, Machichaquenevihi ema Viya —máichapa.

⁶⁴ Tacahe ema Jesús majicapapa:

—Yátupi núti Cristonuhi. Nuti Manerejirunuhi ema Viya. Tásiha, numeta-caheyare eta apana. Járápaya eta sácheyare ímahanuyare eta néjasirayare te mavaure ema Viya máitupajijíaruvaquenehi. Ímahanuyareva núti eta núcupaisirayareva násíhairayare te anuma, támiranuyarepahi eta úcaji —macahepa.

⁶⁵ Tacahe, ema corregidor eta masamirahi, tise-marinehi ichape. Tivetsa-yujiacavapa eta mamuiríha eta masemanevahi. Tásiha, macahepa:

—¡Tétavicavaipa eta maviurevahi ema maca taicha macacahihi ema Viya! ¡Puiti émaqueneva visama éma tépiyacavahi Machicha ema Viya! ¡Váipa tácomesa vitanucahíni ena testigoanainahíni! ¡Puiti esamarípa éti eta juca macayemaquenehi! ⁶⁶ ¿Tájaha vícharacayare puiti ema maca? —macahepa.

Tásiha, najicapapa éna:

—¡Ticaviurevapa! ¡Étaina táimicapaca! —nacahepa.

⁶⁷ Tacahe, náehavacapa ema Jesús. Nátutuquichapa. Náehamirahavare.

⁶⁸ Tásiha, náichapa:

—Vímahasejicacha, te yátupihpuca pítihi Cristo. Te pijarauquipuca, pímatihaviyare nájahahipuca ema téhamirahavíhi —nacahepa.

Éma Pedro tépiyacavapa vahi máimati ema Jesús

(Mr 14.66-72; Lc 22.56-62; Jn 18.15-18, 25-27)

⁶⁹ Tiuri, ema Pedro, matiaríhichahahi eta te canchón. Téjacaipahi tíasacavahi. Tacahe, sucahepaipahi esu mavanara ema corregidor. Suímahapa éma. Tásiha, suíchapa:

—Németeaca pítiríchu ñímiture éñi Jesús éñi ticavasahi te Galilea —suíchapa.

⁷⁰ Émasera majicapapa:

—Vahi nímati ema péchajisíhaquenehi. ¿Távíhapuca pímatinenuhi píti? —máichapa.

⁷¹ Tásiha, mavarahapa tíuchucavaneyarehíni. Suímahavare esu apana vanaraca. Suíchavacapa ena natiaríhiqueneanahi:

—Éñi ñica achane éñiríchu ñíchamuri éñi Jesús Nazareno. Nímahahi ñicachane-pahi —suíchavacapa.

⁷² Tíápechavavarepa ema Pedro téchajica, ánipa macahe:

—Nujuracha te emirahu. Váhiquene nímati ema píchaquenehi —macahepa.

⁷³ Te tíyererehachíhavarepa, náimahavarepa ena apamuriana. Náichavarepa:

—Yátupíquene pítiríchu machamuri ema maena Jesús, taicha eta péchajisíra éta tímereuchavíhi —náichapa.

⁷⁴ Tásiha, macahevarepa:

—Máicuñacanuine ema Viya te vahi nucucahe yátupina. Váhiquenesera nímati ema achane échajisíhaquenehi —macahepa.

Tásiha, enurujipa téchajicanecha eta varayu. ⁷⁵ Te masamapa eta varayu, enevanepa máechahi ema Pedro eta máichirahi ema Jesús: “Te tamirahui-napaichaha eta táechajisirayare eta varayu, píti mapaheyare eta pépiyacavayare vahi pímatinu”. Tásiha, tiúchucavanepa ema Pedro. Tíyahavanepa taicha máimativanepa eta táichapevahi eta máejecapiravahi.

27

Námapa ema Jesús te mamirahu ema Pilato (Mr 15.1; Lc 23.1-2; Jn 18.28-32)

¹ Te tijarahipa, tiúrujicavanapa namutuyaréni ena tuparairucana énapa ena aquenucarahana. Ticaechacasipa eta náimicapasirayarehi ema Jesús. ² Nacuchucapa ticaitihapaipa eta námirapahi te mamirahu ema Poncio Pilato, ema aquenucahi prefectohíquene.

Eta macapasiravahi ema Júlassi

³ Tacahe, ema Júlassi eta máimairahi eta táichapevahi eta macatajivairahi ema Jesús étapa eta nacapasirayarehi, ichaperinehi ticatisamurevahi taicha eta máejecapiravarihi. Tíyanapa máimichavapanahi eta treinta reale eta plata mavachahi nayehe éna. ⁴ Tásiha, máichavacapa: —Néjecapavahi ichape eta níjararesirahi ema maca achane matapirava-requene. Nuvaraha nímichavaya eta nuvachainihi —máichavacapa éna.

Énasera najicapapa:

—Jéhepuca, vahi vecha víti. Péchaquenevaichuhi píti —náichapa.

⁵ Émasera ema Júlassi máquijimirauchavacapa eta te tajuhe eta Templo návihahi éna. Tásiha, tiúchucapa. Tíyanapa. Táichavenehi eta macatisamurevairahi, tichumucavapa.

⁶ Ena tuparairucana navehapa eta plata. Tásiha, nacahepa:

—Vahi táuricahini víyaracuhahini eta juca plata tayehe eta caja vinaquisi-rareva taicha mavachaequeneya eta máepenirayarehi ema maca achane —nacahepa.

⁷ Tásiha, eta plata máimichavaquenehi ema Júlassi, napanerechaipa eta navacharesirayarehi eta apaquehe nacaecarasirareyare ena apavasanana. Eta juca apaquehe naseresirarehi ena típuarecarahiana eta yupi. ⁸ Puiti éta ticajarehi “Apaquehe máitinevacha ema Jesús”. ⁹⁻¹⁰ Tacahehi eta táitauchiravahi eta májurehi ema víyaraa profetaini Jeremías. Ani tacahehi: “Navehapa eta treinta reale eta plata. Ena tuparairucana navacharecapa eta apaquehe nayehe ena típuarecarahiana. Tacahe eta juca mametasiranuhi ema Viya eta náichirayarehi eta juca” macahepa ema víyarahaini Jeremías.

Ema Pilato mayaserecapa ema Jesús (Mr 15.2-5; Lc 23.3-5; Jn 18.33-38)

¹¹ Ema Jesús ticayaserehipa te mamirahu ema aquenucahi Pilato. Ánipa macahe eta mayaseresirahi:

—¿Jéhesareji réyvihí píti nayehe ena pijaneanana israelítana? —máichapa.

Ema Jesús majicapapa:

—Pitupiruvahi eta juca piyaseresiranuhi. Yátupihí eta nurreyvahi —máichapa.

¹² Tásihasera, te nametauchaipa ena tuparairucana, vahi majicapavacahini ema Jesús. ¹³ Tacahe, ema Pilato máichapa:

—¿Vahi péchajiuchava eta juca nametauchiravihi? Camurihi eta piviurevana eta nayehe —máichapa.

¹⁴ Émasera ema Jesús váhiquene majicapahini. Tásiha, ema Pilato máramipa eta mamajicapirahi. Váipa máitucacarehini.

*Éma Pilato macavanairipipa eta náetatasiraya ema Jesús
(Mr 15.6-15; Lc 23.13-25; Jn 18.38–19.16)*

¹⁵ Tiuri puiti, tatiarihi eta mayeherepi ema Pilato, te Páscuamuhua, macaiticayarehi ema émana preso, mácani nayasearuyarehi ena achaneana.

¹⁶ Tiuri, matiarhi ema achane ticaijare Barrabás, ichape eta maviurevahi.

¹⁷ Eta náurujisiravahi ena achaneana, mayaserecavacapa ema Pilato:

—¿Nájahapuca ema eyasesereruyare ema nucaitiruya? ¿Émapuca ema Barrabás, téhesera émapuca evaraha nucaitica ema Jesús, ema ticaijare Cristo —máichavacapa. ¹⁸ (Taicha máimatiacaripahi eta nametauchahi ema Jesús ena tuparairucana taicha nacapinaruhi éma.)

¹⁹ Eta máejasirahi ema Pilato tayehe eta mávacure, suímimetarecapa esu mayena: “Vahi picuimisiapava ñiyehe éñi ñira achane matapiravare taicha yatí tametasiranuhi eta nuvapure eta ñíchararacavayare éñi” sucahepa.

²⁰ Énasera ena tuparairucana énapa ena aquenucarahana náimitumurihapa ena achaneana nayaseserecahi ema Barrabás, émainahini máuchucuha. Tásiha, nayaseserecapa máepenahini ema Jesús. ²¹ Máechajimurihavarepa ema Pilato, mayaserecavacapa:

—¿Nájahasica ema evarahaquenehi nucaitica? —macahepa.

Éna najicapapa:

—¡Émaina máuchucuha ema Barrabás! —nacahepa.

²² Éma Pilato mayaserecavarepa:

—¿Tájahasica nícharacaini ema Jesús ticaijare Cristo?

Éna najicapapa:

—¡Pémetatareca te crusu! —nacahepa.

²³ Éma Pilato máichavacavarepa:

—¿Tájaha tacayemahi eyaseacahi eta németatasiraya ema maca? ¿Tájahasica eta maviurevahi? —máichavacapa.

Énasera tipiararemurihanavare muracapana:

—¡Pémetatareca te crusu! —nacahepa.

²⁴ Tacahe, máimahapa ema Pilato eta vahi máiturucahini macatiuchahini, taicha ena achaneana tivayuchavapaichucha eta nasemanevanahi. Tacahe, máemepanapa eta une, ticasipavahupa te namirahu ena achaneana. Tásiha, máichavacapa:

—Nuvaraha nímererca te emirahu vahi nútiparacaina eta máepeniraya ema maca achane matapiravarehi. Éti échinavayarehi —máichavacapa.

²⁵ Tásiha, najicapapa namutu ena achaneana:

—Vítinarine vícatapirava, énapa ena vichichanaveana. Vítinarine taeha eta máepeniraya ema maca achane —nacahepa.

²⁶ Tacahe, ema Pilato macavanairipipa nacaitica ema Barrabás. Tásiha, macavanairipipa náestaca ema Jesús; tásiha náetatacayarevare te crusu.

*Nacavayumarajipa ena suntaruana ema Jesús
(Mr 15.16-20; Jn 19.1-3)*

²⁷ Tásiha, ena suntaruana námapa ema Jesús tayehe eta náestasihayarehi te távirarehi eta guardia. Nachayacapa ena camuriqueneana suntaruana náumurivana. ²⁸ Navejamuhiacapa eta mamuiriha. Namuriachapa eta múiriare títsime. ²⁹ Náitsamemacapa eta itapepi eta majarapiyarehi náicha. Nanacavarepa te machuti. Náimicaratacavarepa eta curina te mavahu vaure, matsucurúpayarehiji. Eta nacavayumarajirahi, náepuyumirauchapajicha. Ánipa nacahe:

—Tata, ¡pítitataji nayehevihíji Rey ena israelítana! —náichapa.

³⁰ Tásiha, nátutuquichapa. Náetetuvauchapa eta matsucurupahi, náepuchisicapa tayehe. ³¹ Te tamutupa eta nacaecahijirisirahi, navejamuhiacavarepa eta mamuiriha títsime. Namuirichapa eta mamuirihaichu. Tásiha, námapa tayehe eta macaetataiyarehi.

*Náetatacapa ema Jesús te crusu
(Mr 15.21-32; Lc 23.26-43; Jn 19.17-27)*

³² Eta napaisirapahi te calle, nácapajicapa ema achane ticaijare Simón ticavasahi te Cirene. Napamicapa éma manaracuha eta macurusura ema Jesús. ³³ Tacahe, nacaitecapapa tayehe eta masihi nacaetatairare ticaijare Gólgota. ³⁴ Ánaquipa náesichinehi ema Jesús eta vino tisucareama ticasiriquiama eta ipuruji. Te masamaecapa ema Jesús, vaipa mávarahahini máerahini.

³⁵ Te náitauchapa eta náetatasirahi ema Jesús, ena suntaruana nasuerte-hachapa eta mamuiriha eta náijarajirisiracacahi. Tacahehi eta táitauchiravahi eta májurehi ema víarahaini profetaini David. Ánipa tacahe: “Tíjarajiricacanapa eta numuirihaini. Nasuertehachapa eta náijarasiricacairahi”. ³⁶ Tásiha, najaneacapa ema Jesús ena suntaruana. ³⁷ Te tápusi eta macurusura, tatiarihíhi eta ajureca táechajisihahi eta tivíuchahi. Ani tacahehi eta ajureca: “Ema Jesús, Rey nayehe ena israelítana”.

³⁸ Natiarihíhivare ena apinana tiámerahiana. Ticaetatanahivare te machacaya, ema émana te mavaure, ema apana te masapa. ³⁹ Tásiha, ena tiánucumi-rauchanapahi, tépiupiusicavanapaipa eta nacaecahirapaipahi éma. ⁴⁰ Ánipa nacahe:

—¡Pítitataji! Picahechajiriruvahi eta piáquipaisirayarehíji eta Templo, pirátahahivaréji pímuchava picatupíha eta arairu Templo te mapanayarerichuhíji sache. Puiti vivaraha vímaha eta pítupajijiasiravahi, te yátupipuca Machichavi ema Vía. Piúcupaica te jara crusu. ¡Pícatiuchava pítijivaina! —náichapa.

⁴¹ Énerichuvare ena tupairucana nacaecahijiricavare, énapa ena escribánoana énapa ena fariséoana, énapa ena apamuriana aquenucarahana. Náichajiricapa:

⁴² —Ema mácacacha, macahehi eta máechajiriruvahi eta marátahairahíji macatiuchavaca ena apamuriana achaneana. Tásiha, puiti váhivare marátahahini émajivainahíni macatiuchavahini eta te jara mávihahi. Te yátupinahíni Réyinaíni viyehé viti israelítana, macatiuchavaipahini, ¿masi? Mácupai-caripahini te jara crusu, ¿masi? Visuapasarepaini eta vímairainahini. ⁴³ Téhevare te yátupihipuca ticasínavahi me Vía, vívaraha vímaha machucuha éma púitinaríchu, te yátupihipuca máemunacahi éma. Taicha macahehi eta máechajiriruvahi eta machichairahi ema Vía —nacahepa.

44 Ena tiámerahiana ticaetatanahivare te machacaya, énerichuvare nacaecahivare éna apanavare.

*Eta máepenirahi ema Jesús
(Mr 15.33-41; Lc 23.44-49; Jn 19.28-30)*

45 Tacahe, te las dócequenepa, témahapa eta sache. Timapicupa tamutu eta apaquehe. Mapana hora eta tamapicuirahi. 46 Tásiha, te las trespa sache, tipiaracapa muraca ema Jesús, ánipa macahe:

—Elí, Elí, ¡lama sabactani! —te véchajiriruva, ani tacahe: “¡Tata Nucaiyaquene! ¡Tata Nucaiyaquene! ¡Vahi picujunijicanu!”

47 Tacahe, ena natiarihiqueneanahi ena tisamanahi, ánivarepa nacahe:

—Esama ema maca achane mapiaracahi ema víyarahaini profeta Elías —nacahepa.

48 Ema apana tiyanapa tijunapahi máepanapa eta machuchujiruyarehi eta tisisica vino. Máitiacapa te tiúqui curinaqui. Máimicapayacapa eta majaca ema Jesús, machuchujicayarehi. 49 Énasea ena apamuriana, ánivarepa nacahe:

—Ésamiricachucha. Vímahayare te títecapayarepuca macatiuchapana ema Elías —nacahepa.

50 Tásiha, tiápechavavarepa tipiaraca muraca ema Jesús. Tásiha, tépenapa.

51 Tásiha, tíjahúchavapa tétsayumecapa eta cortina tayehe eta Templo. Tépanava te anuquehe, tíchechua te apaquehe. Tiyayacarepa eta apaquehe. Étaripa eta ichapepuhiqueneana mari téjepuichavacavare. 52 Étaripa eta ecariana téjiacavacapa. Téchepucanavarepa ena náepenaqueneana ena tisuapajirahianahi mayehe ema Viya. 53 Tásiha, te mapanaquenepa sache, téhevere te táequenepa eta máechepusirahi ema Jesús te máecari, éna apanavare tíuchucanapa tayehe eta náecariana. Tásiha, tisiapanapa tayehe eta avasare Jerusalén. Tichavanapa te napenana. Ichapemurianahi ena achaneana tímahanahi éna.

54 Tacahe, ena tijanearecanahi, émapa ema nacapitara, te náimahapa eta tayayacarevahi eta apaquehe, étapa eta apamuriana tiáramicareanahi, ichaperínehi eta napisirahi. Tásiha, nacahepa:

—Yátupiquenerichuyapa Machicha ema Viya ema maca —nacahepa.

55 Natiarihihivare ena camuriana esenana. Tímararacanahi te tiyerehi. Ena nani esenana, éna téhicanahi ema Jesús. Téchapajiricanapahi ema Jesús eta mapaisirapahi te másihapa te Galilea. 56 Nacarichusera ticajuanahi eta náijaruana esu María Magdalena, ésupa esu apana María, maena ema José émapa ema Jacobo. Sutiarihivare esu mayena ema Zebedeo, náena ena nuchamurianahi ema Juan émapa ema Jacobo, apóstoleanahi.

*Nacucupaicapa te crusu ema Jesús, náecarayarepa
(Mr 15.42-47; Lc 23.50-56; Jn 19.38-42)*

57 Matiarihivare ema achane rico ticajare José. Ticavasahi te avasare Arimatea. Émarichuhi téhicahi ema Jesús. 58 Te capererehipa, eta máimairahi máepenirapahi ema Jesús, tiyanapa mayehe ema Pilato. Mayaseapanahi eta máquehe ema Jesús, mavarairahi máecarayare. Tacahe, ema Pilato macavanairipipa náisapahini eta náecairaya. 59 Nacucupaicasarepa eta máquehe ema Jesús tayehe eta crusu. Náyuruacapa tayehe eta tijapuquene sávana. 60 Nanacapa tayehe eta máecari máemepiyareruhi máecariyahini ema José.

Eta juca ecari, nasecajueruhi eta mari. Najihachapa tayehe eta tajitaca-requene márime. Te náitauchapa, tiyananapa. ⁶¹ Esu María Magdalena, ésupa esu apana María, téjacanahi éna, náimmararacaipahi eta ecari.

Ticavanahianapa ena suntaruana najaneaca eta ecari

⁶² Tásiha, te apanapa sache tiyananavarepa ena tuparairucana mayehe ema Pilato. ⁶³ Náechajicapa ema Pilato. Ánipa nacahe:

—Tímitcachavihi, tata, vimetapanavi eta máechajiriruvahi ema Jesús te achanerichaha eta máechepusirayarehiji te máecari te mapanaquenénapaji sache. ⁶⁴ Puiti, vivarahahi picavanairipihini náeratahini muraca eta tapaja eta máecari, mapanainavare sache eta najaneasirayare ena suntaruana. Machu nayana te yati námechapana eta máquehe ena máimitureana. Machu nácaheriana “Téchepecaripa te máecari”. Tásiha, ena achaneana nasuapai-napapuca, náimijachainapa yátupi. Tisuapacarepanainapapuca tayehe eta máichaqueneanahi te achanerichaha —náichapa.

⁶⁵ Ema Pilato máichavacapa:

—Tiuri, níjaracahe ena nusuntarurana. Eyana iama. Evaneca najaneaca-quenéna. Nachujichaquenéna muraca eta máecari —máichavacapa.

⁶⁶ Tacahe, tiyananapa nachujichapa muraca eta ecari. Nanacapa eta táicutiaranayarehi. Tásiha, najaneacahi ena suntaruana.

28

*Eta máechepusira ema Jesús te máecari
(Mr 16.1-8; Lc 24.1-12; Jn 20.1-10)*

¹ Te apanapa sache te tijarahichichapa eta lumíncuquenehi, tiyanapa esu María Magdalena, sucachanehi esu apana María, náimahapanayarehi eta ecari. ² Tíjuhúchavapa tiyayacarehi eta apaquehe. Émahi ema ángele eta máucaupaisirahi te anuma. Te máitecapauchapa eta ecari, máequehepuichapa eta mari tajihainihi eta máecari. Máejahamecapa eta mari. ³ Tétavicava eta majaraivahi, tivayuhauquirahi. Eta mamuiriha, tétavicavavare eta tajapuva. ⁴ Eta náimairahi ena suntaruana, tiáquipapaicavanapa, tiyayacareanapa eta napsirahi. Tiánehini tépenaracana. ⁵ Tásiha, ema ángele máechajicavacapa ena esenana. Ánipa nacahe:

—Vahi ecupicanu. Núti néchahi eta etanusirapahi ema Jesús ema macaeta-taquenénihi. ⁶ Májinaipahi eta te tajuhe eta máecari. Téchepecaripahi taicha tacahehi eta máechajiriruvahi. Yare, ímaha eta juca mávinénihi. ⁷ Eyana púitinarichu, emetapanavaca ena echamurianahi máimitureana eta máechepusiraipahi tayehe eta máecari. Énerichuvare emetacavaca tiyanayare ema Jesús eta te Galilea. Ánaqui macuchapiaheyare emutu éti. Eta tímitecanuhi núti numetapanahayarehi —máichavacapa.

⁸ Tacahe, ena esenana tiyananapa tichavanahi tijunaparacanapaipa eta nametasirayarehi ena nachamuriana. Tipicanapaipa, tásihasera tacachanepahi eta náurismurevapahi ichape. ⁹ Eta najunapirapahi, tíjuhúchavapa tímerecava ema Jesús eta nayehe. Máechajicavacapa. Témeñahavanapa éna eta mayehe. Tépuycanapa natsiucepavachapa. ¹⁰ Éma máichavacapa:

—Vahi ecupicanu. Eyana emetapanavaca ena apamuriana echamuriana nímitureanahi. Eyanayare emutu te Galilea. Ánaqui nucuchapiaheyare —máichavacapa.

Eta nametarapianahi ena suntaruana

¹¹ Eta najunapirapahi ena esenana, ena suntaruana tijanearecanainihi tiyananapa éna, nametapanavacayarehi ena tuparairucana tamutu eta náimahaqueneanahi. ¹² Tacahe, ema corregidor ticurujiricapa namutu ena apamuriana aquenucarohana, mavarairahi téchajiricavana napane-rechayare eta náicharacavayarehi. Jéhesare, navachachavacapa eta camuriquene plata ena suntaruana. ¹³ Tásiha, náimitucavacapa, ánipa náicha: —Tè natiarihinapuca nayaserecahe, ecaheyare: “Tiyananahi ena máimitureana ema Jesús te yátimuhu; námechapanahi eta máquehe. Ticamapuravanahi eta vímasirahi víti” ecaheyare. ¹⁴ Émaripa ema aquenuca te máechapuca, vímaharinepa víti. Vitanucayare eta vivayuarasirayare, apaesa tacuija eviurevaina éti —náichapa.

¹⁵ Tacahe, ena suntaruana najacapapa eta plata navachahi. Tiyananapa. Jéhesare, étapaichuhi náechajisihapahi eta náimitucasivahi. Puíticha, ena israelítana, tanasirichuhi tacahehi eta nametarapi, te natiarihi ena tiyase-recana.

Ema Jesús mavanemurihapa ena máimitureana eta náimituresihaya te tamutu avasareana

(Mr 16.14-18; Lc 24.36-49; Jn 20.19-23)

¹⁶ Ene tacahehi eta viyanirahi viti óncequeneana apóstoleana tayehe eta Galilea te cerro taicha tacahehi eta mametarapihi éma Jesús. ¹⁷ Tacahe, te vímahapa ema Jesús, vépuyumurihavanepa. Vimutu vitsiucapa. Natiarihisera ena vuíchaha nasuapapajichahini. ¹⁸ Tásiha, ema Jesús témeñahavapa eta viyehe. Máichahavipa:

—Ema Tata te anuma tituparacanuhi núti néchayare tamutu te anuma étapa te juca apaquehe. ¹⁹ Eta tacahe, eyanayare puíti epaicayare tamutu eta avasareana. Ímitucayare ena achaneana, nuchanerana éna apanavare. Ícachasicavacayarepahi te máijare ema Tata, nútipa nuti Machicha émapa ema Espíritu Santo. ²⁰ Ímitucayareva eta nasuapiraina éna apanavare tamutu eta nímiturapianahi eta eyehe. Núti, tayanapane nuyerehehi, nímicatacaheyaresera. Níjaracahénapaipa eta nítipajijiasirava. Tamutu sácheana nucahanehevacayarehi. Váhiquene nujunijiacahémahi —máichahavipa.

Tamutupa eta juca nájuchaquenehi eta nímahaquenehi nuti Mateo.

Ma San Marcos májuequenehahi eta máichararacavahi ema Jesucristo, ticaijare puiti eta EVANGELIO SEGÚN SAN MARCOS

¹⁻³ Nuparapenaveana, puiti nuvaraha numetacahe eta máitaresirahi ema Jesucristo, Machicha ema Viya, te títecapauchahavipa te vítaracu. Ichape-rinehi eta viúricacarevahi puiti taicha eta mametasirahavihi eta táurina-quenehi máechajiruvana ema Viya.

Ánaquiaparipahi eta áñoana acane, ema Viya mametacapa ema víarahaini profeta Isaías eta mapanereruhi, eta mavanésirayare ema Machicha te juca apaquehe. Éma, túmitecahi ticatiurahiyarehi. Énerichuvare matiarihiyareva ema apana achane máichuhaqueneharehi ema Viya. Macametarairu-yarehi, máetupiricavacayare ena achaneana, náinajisirayarehi eta tamauri-queneana napanereruana apaesa táuri eta najacapirayare ema Machicha ema Viya.

*Éma Juan Tícachasiricarahi tépanavapa ticametarairu eta máechajiririva ema Viya nayehe ena vámahicuruhana
(Mt 3.1-12; Lc 3.1-9, 15-17; Jn 1.19-28)*

⁴ Tiuri, te táequenepa eta juca, camuriquenehi áñoana, tiúchucapa ema achane ticaijare Juan. Éma, máichuhaquenehi ema Viya eta macametarairuirayare, máetupiricavacayare ena achaneana. Tacahe, masupahi eta matuparahahi. Tiyanapa vámahicuruhapa. Vaipa avasarecuruhainaini. Ticametarairupaipa nayehe ena macutiqueneana vámahicuruhana. Ánipa macahehi eta máimituresirahi:

—Ítsivacha eta epanereruana. Éneuchava mayehe ema Viya, apaesa maperdonachahe eta epecaturana. Te éneuchavapa, núti nícachasicahénapa, apaesa etsecavaipa eta ejacapirayare ema Cristo —máichavacapa ema Juan.

⁵ Tacahe, nárajapapa napaucha ena achaneana ticavasana eta te ichape avasare Jerusalén étapa eta apamuriana avasareana te táunavahi eta provincia Judea. Eta nametauresiravaipa ena achaneana, navarairaiipa náinajica eta napecaturana, ema Juan máicachasicavacapaipa tayehe eta cajacure Jordán.

⁶ Éma Juan, vanairucahi me Viya, profetahi éma. Eta macamuirihairahi eta náitsameru tajiyaha eta náitatiquene ticaijare camello. Eta máitijuhe, vácapi jayumepi. Éta manicasareanahi eta tsacara. Éta máitiverahi eta mápama.

⁷ Ánivare macahe eta macametarairuirahi:

—Ávanepaipahisera mácani yátupiquene Cristo. Éma, tiápajupanavahi nuyehe núti eta mapicauchacarévahi. Váiparinehi nácutisamimahi eta máitupajijiasiravahi. Váiparinehivare nácaemuñavaimahi macamusuranuhini núti páuresami. ⁸ Yátupi núti nícachasicahéhi te une, te éneuchavapa mayehe ema Viya. Émainapa, tícachasicahénavarepa eti ecasiñavanahi mayehe éma, tíjaracahénasarepa ema Espíritu Santo —macahepa ema Juan.

*Éta macaicachasirahi ema Jesús
(Mt 3.13-17; Lc 3.21-22)*

⁹ Te jena sácheana eta mávihairarichaha ema Juan te cajacure Jordán, títecapapa ema Jesús. Másihapahi te avasare Nazaret te tinapaica eta Galilea. Tásiha, ema Juan máicachasicapa ema Jesús. ¹⁰ Te tamutupa, te tiúcupaicapa eta te une ema Jesús, tíjahúchavapa máimaha téjiacahi eta anuma. Máimahavarepa ema Espíritu Santo ticutipahi eta paluma. Máucupauchapa ema Jesús, mávahácapa éma. ¹¹ Tacahe, nasamapa eta mahu ema Viya tásihaquenehi te anuma. Ani macahehi eta nasamirahi:

—Pítira nuchicha némunarquene. Núrisamurecha piyehe —macahepa.

*Emá Váinaraji Satanás mavarahapa macaitsamaraji ema Jesús
(Mt 4.1-11; Lc 4.1-13)*

¹² Tacahe, ema Espíritu Santo eta mávahásamurechirahi, enurujipa máimitucaipahi ema Jesús eta mayaniraya te mávapahi apaquehe. ¹³ Eta mayerevahi ema Jesús cuarenta sácheana. Tásiha, ema Satanás macaitsamarajipa, mavaraha macaetema ema Jesús. Váhisera máratahahini. Tatiarihivare eta sárareana eta te mávihahi ema Jesús. Te tamutupa, ena ángeleana náechapajiricahi éma.

*Emá Jesús tépanavapa ticametarairu
(Mt 4.12-17; Lc 4.14-15)*

¹⁴ Tacahe, te jena sácheana, nacaratapapa ema Juan. Námapa te tiyerehi. Tacahe, tiyanapa tichavahi ema Jesús eta te provincia Galilea. Tépanavapa ticametarairu. Máichuhavacapa ena achaneana náehicayarhi ema Viya. ¹⁵ Ánipa tacahehi eta mametarapi:

—Éneuchava mayehe ema Viya. Ítsivacha eta epanereruana. Taicha puíti tíchuhahénapa ema Viya. Tiánehipa eta sáchezare títecapauchahénapa eyehe ema ticatituchaheyare. Aquenucayare mavaneruhi ema Viya, éma téchaheyare. Ichape eta iúricarevaya te esupa eta nímiturapiana —macahepa.

*Emá Jesús máichuhavaca ena cuátroqueneana ténicarahiana, máimitureanayarehi
(Mt 4.18-22; Lc 5.1-11)*

¹⁶ Tacahe, eta mapaisirapahi ema Jesús te tachausi eta cáquiure Galilea, máimahavacapa ena apinana ajairana, ema émana ticaijarehi Simón Pedro émapa ema maparape Andrés. Eta náematanerepi ena nani, ténicarahianahi. Náquijierecahi eta nayutahe. ¹⁷ Tacahe, ema Jesús máichavacapa éna:

—Yare, éhicanu. Núti níjaracaheya eta apana ématanerepiyare. Éti ítucavaparacahi eta jímana; tacaheyare eta ítusiravayareva ena achaneana, machaneranyare ema Viya —máichavacapa.

¹⁸ Enevanepa náinajicahi éna eta náenisirahi. Tiyananapa náehicapa ema Jesús.

¹⁹ Ánaquipanavarepa máimahavarepa ena apinana ticaparapeccanavare ema Jacobo émapa ema Juan. Téjacanahi te napacure. Matiaríhivare ema naiya Zebedeo. Náititijiricahi eta nayutaheana. ²⁰ Ema Jesús máichuhavarepa ena apinana. Tásiha, náehicavarepa. Najuniicapa ema naiya Zebedeo. Manasipa éma te pacure, macachanehi ena mamusurana.

*Emá Jesús máimijunapa ema éreana tívahácainihi ema achane
(Lc 4.31-37)*

²¹ Tacahe, títecapanapa tayehe eta avasare ticaijare Capernaum. Eta juca sache sávarumuhuhi, tiyanapa ema Jesús eta te naúrujisirareva ticaijarehi

sinagoga. Máimitucavacapa ena tiúrujicavanahi. ²² Ichape náramihi ena achaneana eta máimiturapianahi táicha vahi nasamasaré nahini. Tétavica vahi eta máitusirahi mayunapaicahi tamutu. Tétavicavahi eta tasuapacarevahi eta máimiturapiana.

²³ Te nataracu ena náurujuvanahi, matiarihahi ema émana achane mávaháruhi ema éreana. Tipiararecapa, ánipa macahe:

²⁴ —Núti nímativi. Pítira Sántoquenevahi. Machichaquenevahi ema Viya. Pésamiricahavipaini, piti Jesús Nazareno. Váhini picuesirujicahavini. Pivarahainapapuca pijararecaviyare —macahepa ema achane.

²⁵ Tacahe, ema Jesús macajachapa ema éreana. Ánipa maicha:

—¡Pámatina! Piyana pijunijica ema maca achane —máichapa.

²⁶ Tacahe, ema achane t́jahúchavapa tiáquipaicava, tiyayacarepa. Tipiara-recapa muraca maicha ema éreana eta majunijisirayarehi ema achane.

²⁷ Tásiha, náraminehi ichape ena natiarihiqueneanahi. Tiyaserejiricacanapa, ánipa nacahe:

—¿Tájahasica tacayema eta juca? Ema maca Jesús, tétavicava eta máitupajijásiravahi, maratahahi máquijica ena éreanana. Tásiha, ichape eta napisirahi ema. Vahi nácapamachahini. Tamutupa arairu eta máimiturapianahi ema maca —nacahepa.

²⁸ Tacahe, nasamairiricapa namutu ena achaneana eta juca máichaqueneanahi ema Jesús. Énaripa ena ticavasanahi te avasareana eta te táunavahi eta Galilea.

Ena Jesús macanaraca esu máimase ema Pedro
(Mt 8.14-15; Lc 4.38-39)

²⁹ Tacahe, te tiúchucanapa tayehe eta náurujisirareva, tiyanapa ema Jesús te napena ema Pedro ema Andrés. Náheicavarepa ena apinana ema Jacobo émapa ema Juan. ³⁰ Sutiarihihi esu máimase ema Pedro. Sunasiqueneipahi tivecahi, ticajumahi ésu eta muraca fiebre. Nametacapa ema Jesús eta sucaju-mairahi esu esena. ³¹ Tásiha, mapauchapa. Macaratavauchapa, macache-pucapa ésu. Táetaviacavaneinehi eta fiebre. Tacahe, suéchapajiricapa ema Jesús, énapa ena máimitureana.

Camuriana ena macanararuapanahi ema Jesús
(Mt 8.16-17; Lc 4.40-41)

³² Te jena cáperehiquénehi, te téricapa eta sache, ena achaneana námavacapaipa eta mayehe ema Jesús namutu ena nacajumaqueneana énapa ena návaháruanahi ena éreanana. ³³ Jéhesaréinehi, namutu ena achaneana ticavasanahi tayehe eta avasare tiúrujicavanapa te tapaja eta peti. ³⁴ Camuriana ena macanararuana tayehe eta apanapane jumareana. Maveranavare ena váinarajiana máquijiruanapahi te náqueheana ena achaneana. Váhiserá máisapahini náechajicahini ena éreanana, taicha náimatihahi éna eta émairahi ema Cristo.

Tamutu avasareana te Galilea mapaica ema Jesús
(Lc 4.42-44)

³⁵ Tacahe, te tijararahipa, téchepucavanepa ena Jesús. Tiyanapa eta te mayujarasirare. ³⁶ Te téjamica ema Pedro, májinaripa ema Jesús. Tásiha, tiyananapa nacapayacapa éma eta te mayujarasirare eta te mávapahi apaquehe. ³⁷ Te náitecapauchapa, náichapa:

—Namutu ena achaneana titanucavianahi —náichapa.

³⁸ Tásiha, máichavacapa ema Jesús:

—¡Páureanasami! Nuvarahapasera viyanayare tayehe eta apana avasareana apaesa nucametarairu taicha nutuparacasivaichuhi níchuhavacaya namutu ena achaneana náehica ema Viya —máichapa.

³⁹ Tacahe, ema Jesús tiyanapa tipaica tayehe eta avasareana te Galilea. Ticametarairupaipa eta te náurujisirarevana. Énerichuvare nayanau-chapaipa ena achaneana návaháruanahi ena éreanana, máquijicavacapaipa ena éreanana.

Ema Jesús macanaraca ema émana achane leproso
(Mt 8.1-4; Lc 5.12-16)

⁴⁰ Tacahe, te apanapa sache, títecápapa ema émana achane macajumaquene eta lepra. Mapauchapa te mamirahu ema Jesús, máepuyumirauchapa. Tásiha, máichapa:

—Tata, nucasíñavahi eta piyehe, picanaracanupaini —máichapa.

⁴¹ Tacahe, ema Jesús tijimuyainehi majapanuinehi. Manacapa eta mavahu. Máichapa:

—Nuvaraha nuncanaracavi. Tájinapa píchiravaina puiti —máichapa.

⁴² Enevanepa tinaraca. Vaipa leprosoinahíni. ⁴³ Tacahe, ema Jesús máevatacapa ema achane. Matuparacapa ichape vahi macumetajirica. Ánipa máicha:

⁴⁴—Pímaha, piyanayaresera pímerecava nayehe ena tuparairucana, apaesa náimamacavi. Énainapa timetajiricanayare eta yátupirahi pinaraca, pipachihapa. Nacuijasera picumetacavaca eta nútirahi nuncanaracavi. Tásiha, piyanayareva me Viya. Picamavahuyarepahi eta pihasalupayachirayare taicha eta macanarasiravihi —máichapa ema Jesús.

⁴⁵ Tacahe, tiyanapa ema achane. Timetajiricapaipasera, mametacapa namutu ena achaneana eta máichavaquenevahi. Eta tacahe, ema Jesús vaipa máimerecavahíni te avasareana taicha énevaneyarehi náurujiaca ena achaneana tímarahijiana. Tacarine tiyanahi tayehe eta nájinaricha achane-nahichaini. Énasera ena achaneana tiyananaichucha napauchahi. Tiásihana tayehe tamutu avasareana.

2

Ema Jesús macanaraca ema émana achane macajumaquene eta mura-caquiha

(Mt 9.1-8; Lc 5.17-26)

¹ Tacahe, te apanavarepa sache, tichavapa ema Jesús eta te Capernaum. Eta nasamairirisirahi eta matiarihiraripa éma, títecapanapaipa ena achaneana, camuriqueneana. ² Tiyututucavanapa eta te peti mávihahi éma. Tájinapa táviravainahíni eta te tapajachacaya. Ema Jesús máimitucavacaipa eta nacajjuheraya me Viya. ³ Tacahe, títecapanavarepa ena apamuriana, námapahi te áchuji ema achane muracaha. Cuátroana ena tíamanapahi. ⁴ Váhisera náitecapauchahíni eta te mávihahi ema Jesús, taicha eta nayututusravahi ena achaneana. Tacahe, navetatamaequechapa eta peti eta te máinahu te manapaicahi ema Jesús. Te náitauchapa navetatata, nacajuchucupapa ema macajumaquene eta te áchuji te mamirahu ema Jesús. ⁵ Te máimahapa ema Jesús eta nacasíñavairahi eta mayehe, máichapa ema macajumaquene:

—Tiuri, nuchicha. Eta pipecaturanahi nucaepahainavipa —máichapa.

⁶ Tacahe, énerichuvare natiarihihivare téjacanahi ena escribánoana. Napanerequenehapa eta macayemaquenehi ema Jesús. Tásiha, tisemanarinehi. ⁷ Ánipa nacahe te nasamureana: “Ema maca tímijachavaipapuca Viya eta macaepahairayaréji eta pecatuana. ¡Tétavicava eta matapirava! Taicha macarichu ema Viya marataha macaepaha eta pecatuana. Nájina apanaina tiratahaina ticaepahaina eta pecatuana” tacahehi eta napanereruana. ⁸ Enurujipa ema Jesús máimararacavacahi eta nasamureana étapa eta napanereruanahi éna. Tacahe, máichavacapa:

—¿Tájaha tacayema téjecapava eta epanereruana? ⁹ Tájina táejeravaina eta níchirahi ema maca: “Nucaepahainavipa eta pipecaturanahi”. Máejerrepánapuca níchahini: “Nucanaracavipa. Péchepuca, piveha eta pímacaraji, piyana pipaica”. ¹⁰⁻¹¹ Tiuri puiti, nuti Manerejirunuhi ema Viya, nímereuchavainapa eta nuratahairahi nucaepaha eta pecatu te juca apaquehe. Ímararacanu —tacahe, máichapa ema macajumaquene—. Puiti, nuchicha, nuvanecavi péchepuca. Piveha eta jara piyereruva. Piyana te pipena —máichapa ema Jesús.

¹² Enevanerinehi téchepuca ema macájumaquenéni. Mavehapa eta mayereruva. Tipaicapa te namirahu ena achaneana. Tiyana tiúchucapa. Eta náimairahi, ichape eta náramirahi namutu ena natiarihiqueneana. Tétavica-vainehi eta nacunachirahi ema Viya. Ánipa nacahe:

—¡Tétavicava táramicareva eta máichaqueneana ema Viya! ¡Asulupaya, Tata! ¡Vahi vímahasarénahini! —nacahepa.

*Ena Jesús máichuha ema achane ticaijare Mateo, mayehyare apóstole
(Mt 9.9-13; Lc 5.27-32)*

¹³ Tiuri, te apanapa sache, tiyanavarepa ema Jesús te tachausi eta cáquiure. Náitecapauchavarepa namutu ena achaneana eta mayehe. Tásiha, máimitucavacapa.

¹⁴ Tacahe, te tiápechavapa tipaica ema Jesús, máimahapa ema Mateo, machicha ema Alfeo. (Ema Mateo ticaijarehivare Leví.) Téjacahi eta te macatuparahaiyahi eta macobraresirahi eta impuesto.

—Yare, péhicanu —máichapa ema Jesús.

Tacahe, ema Mateo enevanepa tiyana máehica ema Jesús.

¹⁵ Te jena sácheana, ema Mateo ténricapa eta te mapena. Mámapa ema Jesús énapa ena máimitureana. Camuriqueneana ena téhicanahi ema Jesús. Natiarihivare maverana ena macutiqueneana ema Mateo ticobrarecarahiana tayehe eta impuesto. Maveranahivare ena apamuriana máemunacareana ema Mateo. Tiúrisamureanahi eta nanisirahi. ¹⁶ Títecapanavarepa ena apanamuri achaneana: ena escribánoana énapa ena fariséoana. Eta náimairahi eta macachanérahahi ema Jesús ena máichuhaqueneana ema Mateo, nacaecahipa. Ánipa nacahe nayehe ena máimitureana:

—¿Tájaha tacayema tísapava ema eyehe maestro macachanevaca eta manisirahi ena nánitátajiana ticobrarecarahiana eta impuesto? ¡Tétávicavahi eta nacapecaturaravahi! —nacahepa.

¹⁷ Te masamapa ema Jesús eta náechajiriruvana, máichavacapa:

—Ena ticajumanahi, tétavicavahi eta nacamunuirahi ema médico. Énasera ena majumareanahi vahi nácamunuimahi ema médico. Puítisera, eta tímitcanuhi núti nutanucayare namutu ena tisipecaturana apaesa náeneuchavahini, náinajica eta napecaturana. Nácani matapiravareanahi vahi nasamavahini nácamununuhini —máichavacapa.

Nayaserecapa ema Jesús tayehe eta ayuna

(Mt 9.14-17; Lc 5.33-39)

¹⁸ Tacahe, te apahevarepa, ayunanahi ena máimitureana ema Juan. Ayunahanahivare ena fariséoana. Náitecapauchapa ema Jesús ena apamuriana achaneana témejecapavarahiana. Nayaserecapa:

—¿Tájaha tacayema vahi naháyunachahini ena pímitureana? ¿Tájaha tacayema vahi nácutihíni ena máimitureana ema Juan énapa ena fariséoana? —náichapa.

¹⁹ Majicapapa ema Jesús:

—Nímicutichinahe puiti. Vahi táuricaímahi ayúnanáinahníni nácani ticaichuhacasianahi tinicanaya nayehe ena araimana. Tiúrisamureanayarehi taicha matiaríhihi ema arayena. Vahi táuricahini ayúnánáinahníni. Téhesera te tépenapuca éma, jéhesare ticatisamurevanayare. Tacutiquene, vuíhaha táuricaímahi ayunanainahini ena nímitureana. ²⁰ Járájapainapasera eta sáchezare, ticaverejicasianayare, taicha ticaratacanuanainapa ena ticapacuanayare núti. Jéhevarepa ayunanainapa.

²¹⁻²² Esamanuchaha. Eta juca eta nímiturapianahi, amairiha arairu. Mavaraha ema Viya arairuyare eta eyeherepianayare eti nuchanerana. Vaipa tácuticacaimahi eta nayeherepiana ena apamuriana achaneana. Eta ítusirahi éti eta nímiturapiana, tavaraha ínajica eta ichasi eyeherepiana tamauriqueneanahi —máichavacapa ema Jesús.

Ena fariséona náimipicauchahi eta nayeherepiana tayehe eta sávarumuhua.
Émasera ema Jesús máimereuchahi émarichu téchahi eta nayeherepiana ena achaneana eta sache nanarasirayare

(Mt 12.1-8; Lc 6.1-5)

²³ Eta jena sávarumuhu, tiyanapa tipaica ema Jesús. Mámamurihapa ena máimitureana. Témehicavanapa ena fariséoana. Náetavivijicapaipahi eta isanítiana. Tacahe, eta napaisirapahi, ena máimitureana navechuquihapaipahi étajavapahi eta trigo. Navepiraquihapaipa, tépurajacachavanapaipahi. Tinicanapaipa. Tísapacareichucha éta, taicha técuhanapahi. ²⁴ Énasera ena fariséoana eta náimarasirapahi, tise-manapaipa. Ánipa naicha ema Jesús:

—Pímaha ena pímitureana. Ticaemataneanapaichucha eta navepiraquirapahi eta trigo puiti juca sache tétavicavahi eta tacapicahuquenehi. Vahi tísapacarémahí eta juca nacaematanerahi puiti —náichapa.

²⁵ Tacahe, majicapavacapa ema Jesús:

—Németeaca éti vahi ecaicutiara eta tacayemaquene eta Sagrada Escritura, eta máichavaquenevahi ema víyahaini David eta mapaisirapahi técuhanapaipa énerichuva ena téhicanapahi. ²⁶ Te émarichaha ema Abiatar náquenuríhi ena tiyujaracarahiana, ema David tisiapapa eta te mapena ema Viya. Tiyaseserecapa eta manicayarehi. Náijaracapa eta pan tacapicahuquenehi nanacasarehi te mamirahu ema Viya. Nanicasarehi ena tiyujaracarahiana, émasera

ema David vahi tátuparacahini manicahini. Étasera eta máecuavahi, manicapa eta pan, énapa ena macachanequeneanapahi.

²⁷ Tímiyanava eta mametasirahi éna:

—Ema Viya máepiyacahi nativa ena achaneana. Te táequenepa, máimija-rechinapa eta sache nanarasiraya ena achaneana, tíurichayarehi éna. Vahi étainahini témepiyaca eta tihapapiricavacayare éna. ²⁸ Tiuri puiti, numetacahayare: Núti Manerejirunuhi ema Viya, nútirichu néchahi eta sache nanarasiraya ena achaneana —máichavacapa.

3

Emá Jesús macanaraca ema achane tépenavahu

(Mt 12.9-14; Lc 6.6-11)

¹ Tacahe, te apanavarepa sávarumuhu, tiyanavare ema Jesús, tisiapahi eta te náurujisirareva. Matiarihihivare ema émana achane vaipa tayamuricahini eta mavahu, tépenavahuipa. ² Natiarihihivare ena fariséoana, ena ticanarajiricanahi ema Jesús. Náimararacapa éma te macanaracayarepuca ema achane eta te jena sache tacapicahuquenehi. Natanunuiricahi eta tiviuchayarehi ema Jesús. ³ Tacahe, máichapa ema Jesús ema achane:

—Yare, pitupihayare ani te namirahu ena achaneana —máichapa.

⁴ Tacahe, máichapa ena achaneana:

—Núti nuvaraha epanerechaya. Puiti juca sache sávarumuhuhi, ¿tájahapuca táurica eta víchayare? ¿Tísapacarepuca vicha eta táuriqueneana? ¿Étapuca víchayare eta tamauriqueneana? ¿Táuricapuca vípuchavaca ena achaneana? ¿Vicaparecapuca? —máichavacapa.

Énasera timatinamurianarinehi. ⁵ Tacahe, ticatisamurevarine ema Jesús eta muracairahi eta nasamureana. Tacahe, tisemamajuhepa eta máesenimurihairahi éna. Máichapa ema achane macajumaquene:

—Nímaha. Picajaruvauchava, pímechanu eta pívahu —máichapa.

Eta máimeresirahi eta mavahu ema achane, enevaneпа tinaravauchavanepa. ⁶ Énasera ena fariséoana, tisemanarinehi eta náimairahi eta juca máichaquenehi ema Jesús. Tiyananapa tisamacacana nayehe ena políticoana, machanerana ema Herodes, taicha navaraha nacapacaya ema Jesús.

Títecapanapa ena camuriqueneana achaneana

⁷ Émasera ema Jesús tiyanapa térajicavapa eta te mávapahi apaquehe eta te tachausi eta cáquiure. Mámapa ena máimitureana. Náehicavare ena ichapemuriqueneana achaneana ticvasanahi eta te provincia Galilea. ⁸ Jéhesare, te nasamairiricapa eta máichaqueneanahi ema Jesús, títecapanapa ena ichapemuriqueneana achaneana. Tíásihanahi eta te avasare Jerusalén, eta te provincia Judea, eta provincia Idumea, eta provincia Siria, étapa eta avasareana te apachara eta cajacure Jordán. ⁹ Tásiha, ema Jesús mavanecapa ena máimitureana natsesinahini étasina pacure apaesa vahi nacutupiaraca ena ichapemuriqueneana achaneana.

¹⁰ Taicha camuriana ena macanararuanapahi. Namutu ena nacajumaqueneana témeñahavanapahi tiyumususujicavanapahi eta náemeñahairavaya, taicha navarahahi náemamacayare. ¹¹ Jéhesare, ena éreanana tiávahacanhahi ena achaneana, te náimahapa ema Jesús, tíaquipaicavanapa te mami-
rahu éma. Tipiararecanapa:

—¡Pítira Machicha ema Viya! —náichapa.

12 Mavanecapasera máecatihavacapa nacuija nacumetaruína taicha vuíchaha mávarahahini náimatihíni ena achaneana eta émaquenérahí Machicha ema Vía.

*Éma Jesús manerejica ena dócequeneana apóstoleana
(Mt 10.1-4; Lc 6.12-16)*

13 Tacahe, tiyanapa ema Jesús eta te mávapani apaquehe máripahi. Mámamurihapa ena ánimuriana máimitureana. 14 Tacahe, ánaqui manerejicavacapa te nataracu ena dócequeneana mayeaneanarehi apóstoleana. Vaipa najunijiacaimahi éma, macachaneyarehi tamutu sácheana. Matuparacavacapa eta nacumetarairuirayare. 15 Máijaracavacapa ena dóceana eta naratahairayarehi ticanararecana ena nacajumaqueneana, náimijunairyareva ena éreanana tiávahácanahi ena achaneana.

16-19 Eta juca náijareana ena manerejiruanahi*: Éma Pedro (éma ticaijarevare Simón), ema Jacobo, ema maparape Juan, ema Andrés, ema Felipe, ema Bartolomé, ema Mateo, ema Tomás, ema apana Jacobo, ema Tadeo, ema apana Simón, émapa ema Júlasí Iscariote (ema tújararecahi ema Jesús).

Éna escribánoana téjcapavanahi eta náimijachirahi ema Jesús mávaháruhi ema Váinaraji Satanás

(Mt 12.22-32; Lc 11.14-23; 12.10)

20 Tacahe, tichavapa ema Jesús, énapa ena mayeheana apóstoleana te napena. Tiápechavanavarepa tíurujicavana ena achaneana. Tásiha, vaipa náitujicavahini tinicana taicha tétavicavahi eta nasimutuvahi ena achaneana. 21 Énasera ena maparapenaveana ema Jesús, te nasamairiricapa, tiyananapa náepanayarehini éma, taicha náimijachaipahi máurishi éma.

22 Énerichuvare natarihípa ena escribánoana, tiásihanahi te Jerusalén. Náepiyaequenehapa ema Jesús, ániapa nacahepa:

—Éma maca Jesús, vémeteaca majupaha ema náquenumurihi ena éreanana, émaripa ema Satanás. Táitusiava máijaracahi eta máitupajijiasiravahi eta macuchusirahi ena éreanana —nacahepa.

23 Tacahe, ema Jesús máichuhavacapa ena ticaecahirahianahi. Eta máimitusiravacahi, máimicutichinapa. Ániapa máichavaca:

—Éti, téjcapavahi eta epanereruana ímijachanuhi majupahanuhi ema Satanás. Ímijachapuca ticatianacacanahi ena éreanana. Váhisera énena tácahe.

24 Tacutihí ena machanerana ema gobierno. Éna, vahi típutsimuriavanaimahi apinainahipucaini partido. Te típutsimuriavanapa, énajicacaini tiáquipaicacana. 25 Émaripa mácani achane te camurianahi ena machichanaveana, váiparinehivare típutsimuriavanaimahi, náehajiricacahini, énajicacahini náquipaicacahini. 26 Ene macahehi ema Váinaraji Satanás, váiparine

* **3:16-19** Éna nani apinana ajairana ema Jacobo émapa ema Juan, naparapecachi, machichanaveanahi ema Zebedeo. Émasera ema Viáquenu Jesucristo máimarracahi eta náchanevana, máimativacahi éna. Manacapa eta náchucarapianahi “Boanerges”. (Eta táechajiruvahi eta juca, Tíjricati eta náechajisira, téyayarasianavare.) Matiarhivare ema apana achane ticaijarehivare Jacobo. Éma maiya ticaijarehi Alfeo. Matiarhivare ema apana ticaijarehivare Tadeo. Éta tápipine eta májare Lebeo, étapa Judas. Tacahe, mapana eta májare. (Pitanuca te Lucas 6.16 étapa te Mateo 10.2.) Éma apana Simón, tímaticarehi ema, náumurvainihi ena revolucionárioana ticaijareanahi “cananístana”. Navaraha náquijica ena extranjeroana romanoana.

máisapahini típutsicacana ena machanerana, taicha mavarahahi tisimutuanayarehi éna, tímiyanavayarehi eta nacaetemajirisirahaviyarehi.

²⁷ Macutihi ema mácani achane tume. Te macaratacáhi eta mataquiriqui eta majaneasirahi jácani macayehequeneana, nájina tíameyechaimahi. Tacamunuhi nacaratanumayare, náitiacanumayarehi ema túmequenehi achane. Jéhesare, náituruyechasareyarepa eta máimahaqueneana. Ene nucahehi núti, túmepananuhi mayehe ema maca Satanás.

²⁸ Puiti nutupiruva numetacahe: Tiperdonachacareanayare ena achaneana eta napecaturana, tamutu jácani náechajisihaira eta táíñemahiqueneana. ²⁹ Jararihisera eta epecatura vahi tiperdonachacaremahi. Eti ímijachahi ema Satanás ema tiávahácanuhi. Ichape eta éjecapiravahi, taicha ema tiávahácanuhi nuti, émaquenehi ema Espíritu Santo. Éti epanararacaripa éma. Tásiha, máitavacaca eta etapiravanaya —máichavacapa ema Jesús.

³⁰ Tacahehi eta máechajiriruvahi taicha eta nacahechajiriruvairahi: “Ema maca Jesús, majupaha ema Satanás”.

Suítecapauchapa esu maena ema Jesús énapa ena maparapenaveana (Mt 12.46-50; Lc 8.19-21)

³¹⁻³² Tacahe, te apanapa sache, tíurujicavanavarepa ena camuriqueneana achaneana te tajuhe eta peti. Téjacanapa te machacaya ema Jesús. Títecapanecha esu maena énapa ena maparapenaveana. Nanasipasera te aneca taicha tiyututucavanahi ena achaneana. Navarahahi náechajicayarehi éma. Tásiha, nametacapa ena apamuriana ema Jesús, ánipa naicha:

—Esu pémunaruquenehi pena, énapa ena piparapenaveana nararihi ani te aneca. Navarahahi téchajicaviana —náichapa.

³³ Majicapapa éma:

—Yátupi némunacavacahi esu meme, énapa ena nuparapenaveana. Nararihisera ani te juca nuchacaya ena némunaruanahivare, nuparapenaveanahi.

³⁴ Tacahe, máesenimuríhapa ena máimitureana ena téjacanahi te machacaya. Tásiha, macahepa:

—Ena nani ena némunaruanahivare. ³⁵ Taicha namutu nácani ticaemata-neacanahi ema Tata, énahi ena némunaruqueneanahi —máichavacapa.

4

Eta máimicutichinaquenehi evaraqui tacaevaquenehi te apanapanenéji máteji te apaquehe

(Mt 13.1-9; Lc 8.4-8)

¹ Tacahe, te apanapa sache, tiápechavavare tímitureca ema Jesús te tachaui eta cáquiure. Tásiha, camurianapahivare ena achaneana títecapauchanahi éma. Eta navayuchiravaripa ena achaneana, ema Jesús tíavacuhapa tayehe eta pacure, tiápajuecavapa apaesahi. Téjacapa eta máimituresirahi. Ena achaneana nanasipa tayehe eta te tachaui. ² Camuri eta máimicutichaqueneanahi eta máimitusiravacahi. Ánipa macahe:

³ —Esamararacanuchaha. Matiarihíhi ema émana achane. Tévacahi te máesane. ⁴ Eta mapaisirapahi, témiricapaipa eta evaraqui te achene. Táimahapa eta cáyure, tanicapa. ⁵ Eta mayeherepi éma eta máevasira, máevajajapaicapaica eta apaquehe. Tásiha, eta apamuri evaraqui témiricapa te váhirichu tamitutihini eta máteji taicha márípahi eta apaquehe. Tímarucavanepanéni táicha. ⁶ Téhesera te tíjurepa eta sache, tacapajicapa; taicha

vaipa táuparevacahíni. ⁷ Tacahe, eta apana evaraqui témiricapaipa te tapare eta itapequiji. Tiúrinahinéni eta táimarusira, étasera eta itape tacachuricapa eta tajurusirahi. Táemuriachapa eta sucureca. Tanasipa, vaipa tacahihini. ⁸ Tacahe, eta apamuri evaraqui témiricapaipa te tiúrina máteji. Tijuruca-rahíhi eta táimarusira. Ichapemurihi eta tahi. Eta étana, ticahipa apaesa-sajiruichucha. Eta apana, ticahipa tativarerehapanapa. Eta apanavare, ticahivare tétupicavapanapa. ⁹ Esamararacanu emutu éti. Te evarahapuca ecaicutiara, tavaraha eta epanerechinavaya —macahepa ema Jesús.

*Éma Jesús máitametacavaca ena máimitureana eta juca máimiturapi
(Mt 13.10-23; Lc 8.9-15)*

¹⁰ Tacahe, te najunijicapa ena apamuriana achaneana, témeñahavanapa eta mayehe ema Jesús ena dócequeneana apóstoleana énapa ena apamuriana máimitureana. Nayaserecapa tájahapuca tacayemahi eta máimicutiarachiravacaichucha eta máimitusiravacahí ena achaneana. ¹¹ Tacahe, majicapapa éma:

—Éma Tata tituparacanuhi nítametacaheyare éti eta juca mapanereruana táequenereruana tayehe eta macuchucuirahayare eti achaneana. Mavarahahi ímatiequenehaya éti. ¹² Énasera ena apamuriana achaneana nímicutiarachinavacaichucha, apaesa vahi máejerarémahi eta nacaicutiarairaya eta nasamaquenehi. Tavaraha napanerechinavaya. Eta nacaicutiarairaya, náitsivachahini eta náitairesira, apaesa naperdonachacarepaini — máichavacapa ema Jesús.

¹³ Énerichuvare máichavarepa:

—Éti, ¿vuíchaha íturuequeneha eta juca nímicutichaquenehi? Tavaraha eta epanerechinavaya éti apanava apaesa íturuequeneha eta apamuriana nímicutichaqueneanahi. Tiuri, numetacahe: ¹⁴ Eta evaraqui eta máevaruhi ema achane tacutihí eta nímiturapiana. ¹⁵ Natiarihi ena achaneana nacuti eta apaquehe muracapahi te achene, te táemirisihahi eta evaraqui. Ena nani nasamararacahi eta nímiturapiana. Émasera ema Satanás macamitiscavanepa eta nasamaquenehi. ¹⁶ Natiarihivare ena apamuriana achaneana, nacutihí eta máteji máripahi. Te nasamararaca eta nímiturapiana, natupiruvanehinéni nasuapa, tiúrisamureanainehi. ¹⁷ Váhisera náratahahini nacarahuhini yátupinahíni. Vahi nácutihíni eta evaraqui tiúparehi. Ánipirichu eta náehisirahi, taicha vahi nacamichahini jácani nacatajivairanahi. Váhivare túmesamureanainahini te tatiarihipa eta jácani nacatichaira ena achaneana táichavenehi eta náehisiranuhi. ¹⁸ Natiarihivare ena apamuriana achaneana nacuti eta máteji te távihahi eta itapequiji. Énerichuvare nasamararacahinéni eta nímiturapiana. ¹⁹ Napaneréquenehahinéni, tahapapiricavachisera eta jácani táicharacavayare eta náitairesira. Tavayucavavare eta tájiparacana, najamurachahi tamutu. Tahapapiricavare eta navarairahi tirricuchavana. Tamutu eta juca táemetavichahi eta navarairahi téhicanuana. Tamapurujihí eta najacapirahi eta nímiturapiana. ²⁰ Natiarihisera ena apamuriana achaneana nacuti eta tiúrina máteji. Éna, nasamararacahi náunacahi yátupi eta nímiturapiana. Tájinavare náichiravainahíni eta náehisiranuhi. Ichape eta nacaemataneasirahi ema Vía. Nararihi ena apaesarichu eta nacaemataneasirahi. Nararihivare ena apamuriana, nativarerehapanapa eta nacaemataneasirahi. Tásiha, ena apamuriana, ichapemuripanapa eta nacaemataneasirahi ema Vía —máichapa ema Jesús.

*Emá Jesús tímitureca eta apamuriana yátupiqueneana
(Lc 8.16-18)*

²¹ Tímiyanava eta máimituresirahi, ánípa macahe:

—Te viyustaca eta vímicahu, váiparinehi táuricaímahi vijihapaicahini, vinacahivarepucaini te tápecu eta vétsatsame vímasirarehi. Tacamunuhi vinacayaherehi te anuquehe. ²² Jéhesare, tayanapanepuca nacayumuruquí, tamutuyarehisera ticaechea jácani tayumururevanahi. Tájina tépacuchaimahi jácani najajairuvanahi. Tamutuyarehi téchacareya. ²³ Te evarahapuca ecaicutiara, tavaraha eta epanerechinavaya.

²⁴⁻²⁵ Máichavarepa:

—Tacamunuvare epanerecha yátupina eta esamaqueneana. Te apaesarichuhi eta epanerechirahi, apaesarichuvare eta ecaicutiarairaya. Te esuapa yátupina eta nímiturapiana, emá Espíritu Santo tímitucaheya tamutu eta tacayemaquenehi. Jéhevare, tímitucaheyare éma eta apamuriana yátupiqueneanahi. Énasera nácani vahí návarahahini napanerecha, váhivare nasuapa, énajivayare tíchavana ticaverejicasianaya eta nasamaqueneanahi.

Emá Jesús máimicutiarachava eta táimarusira eta evaraquiana

²⁶ Máichavacavarepa:

—Nuvaraha nímicutichinahe eta nímiturapiana nuti Manerejirunuhi emá Viya. Te yátupihí eta nasuapirahí eta nímiturapiana ena achaneana, náitsivachainapa arairuinapa eta napanereruana étapa eta nayeherepianaya eta náítaresira. Tacutihí eta máevaraquí mácani achane. Tévacahi te máesane. Tásiha, tinaracapa, macuchapayarepa eta tacahirayare eta máevaraquí. ²⁷ Tímarucapa eta evaraquiana. Tijurucavare. Emá achane, tájina macaicutiarahini eta táimarusirahi. Váhivare macaicutiarahini eta tajurusirahi. ²⁸ Taicha eta apaquehe, éta ticaimarucahi. Tacuchucahi tativa eta tapacaji, táehicapa eta tanaquí. Te ticahipa, tíuchucapa eta tapiraquí. ²⁹ Te tiyahapa eta tahi, ticaechatijipa te tumare, taicha étainapa eta tacavehasiraya —macahepa emá Jesús.

*Emá Jesús máimicuticha eta taquí eta mostaza
(Mt 13.31-32; Lc 13.18-19)*

³⁰ Ánivare macahe:

—Puiti nuti Manerejirunuhi emá Viya, nímicutichinahe eta ichapemurivaya eti íjaracavanahi éhicanu. ³¹ Ecutiya eta ánichichaquene taquí eta sucureca ticaijare mostaza. Éta juca, ániquititavacapana eta taquí te tamutu eta evaraquiana tatiarihiqueneanahi tayehe eta juca apaquehe. ³² Téhesera te ticaevapa, tijurucapa eta tíápajucavahi ichapepana tayehe eta apamuriana sucurecana. Tatiaríhi eta ichapetavavaca. Tásiha, tacapenajicapa eta cáyureana —macahepa emá Jesús.

*Camuri eta máimicutichaqueneana
(Mt 13.34-35)*

³³ Aní tacache tamutu eta máimitusiravacahi ena achaneana. Camuriana eta máimicutichaqueneanahi. Tamutuhi ticaicutiaracarevaca nayehe ena tivarahanahi náituruequeneha. ³⁴ Tájina étahena te tímitureca, vahí macunacahini eta máimicutichira. Téhesera te macarichupa emá Jesús énapa ena máimitureana, máimicaecherachapa tamutu eta máimicutichinaqueneanahi.

Ena Jesús macaesamirica eta une eta táepacusráhi étapa eta técatícava
(Mt 8.23-27; Lc 8.22-25)

³⁵⁻³⁶ Tacahe, te jena sache, eta máejasirahi emá Jesús te pacure, tímiturecahi. Te cáperehichichapa, máichapa emá Jesús ena máimitureana:

—Viyanaya viánueca te apachara —máichavacapa.

Tacahe, ticametavanapa nayehe ena achaneana. Tásiha, námapa emá Jesús eta te pacure. Náehicapa ena apamuriana te pacure eta napaisirapahi.

³⁷ Te ítupierecanapa, tachimaracapa eta muraca técatícava. Tépacucapa ichape eta cáquiure. Tisiapapaipahi eta une tayehe eta pacure. Tiánehipaipahi tacaericavaca. ³⁸ Émasera emá Jesús, tímacapaichucha te tahivu eta pacure te machunusi. Tásiha, nacajamicapa éma. Ánipa náicha:

—¡Tata maestro! ¡Picatiuchahavi, véricainapa! ¿Váhipuca péñamava eta viyehe? —náichapa.

³⁹ Tásiha, enurujipa téchepuca éma. Titupihapa. Mavanecapa eta técatícava étapa eta une. Ánipa macahe:

—¡Pámatina, pésamiricava! —máichapa.

Tacahe, tíchecapa eta técatícava. Tésamiricavapa eta une. Tésamiriecavapa tamutu.

⁴⁰ Tacahe, máichavacapa ena máimitureana:

—¿Tájaha tacayema epica? ¿Váhipuca ecasiñavahini eta nutiarahirapahi eta eyehe? —máichavacapa.

⁴¹ Ena máimitureana, tétavicavainehi eta náramirahi. Tiyaserecacanapa, ánipa nacahe:

—¡Tétavicavapa eta máitupajijasiravahi emá maca vimaestro! ¡Jéhesare, yátupiquene eta émairahi machíchahi emá Viya! ¡Taicha tamutu tasuapahi, macamatínacahi eta técatícava étapa eta une eta táepacusráhi! —nacahepa.

5

Ena achane návaháruhi ena ichapemuriqueneana éreanana
(Mt 8.28-34; Lc 8.26-39)

¹ Títecapanapa te apachara eta cáquiure eta te apaquehe ticaijare Gadara.

² Ánaqui tatiarihi eta ecariana. Tacahe, te tiúcupaicapa emá Jesús eta te pacure, tiúchujicavanepa emá émana achane návaháruhi ena éreanana. ³ Éma másihapahi eta te ecari, taicha macapenajuechavacahi eta covachana. Nájina náratahahini náitiacahini éma. Étaripa eta ichapepi cadena, vahi táratahahini.

⁴ Taicha máejeharipa nacaratata. Náitijivauchahi te cadena. Nanacavare eta grillo te mapiqui. Émasera mavenarurujica eta cadena, mavenarucavare eta mayehe grillo. Jéhesare, nájina naratahahini namansuchahini emá maca achane. ⁵ Eta máitaresirahi, eta mávirarehi tayehe eta ecari étapa eta mávapahi te anuqueheana mari. Tamutu sácheana, yátiana, tipiararerecahi éma. Tijarachava te márijahiana. ⁶ Tacahe, tiyerehipaichaha máimahapa emá Jesús, tijunapapa mapauchapa. Máepuyumirauchapa.

⁷⁻⁸ Ena Jesús, eta máimairahi emá achane, máichapa:

—¡Pijunijica emá maca achane, piti éreana! —máichapa.

Tipiararecapa muraca eta majicapirahi emá achane. Ánipa macahe:

—¿Tájaha pícha píteca pipauchanu, piti Jesús, Machichaquenevihi emá Viya? ¡Pájapanunu, vuíchaha picuvanecanu ánaqui te nucaicuñaiyayare! —macahepa.

⁹ Tacahe, ema Jesús mayaserecapa ema éreana. Ánipa maicha:

—¿Tájaha pǎjare pǐti?

Majicapapa éma:

—Núti nucaijare “Nacapenaharu ena ichapemuriqueneana éreanana”. Jéhesarehi, ichapemurihavihi víti. ¹⁰ ¡Pájapanuhavisera! Te piáquijicahaviya-repuca, ¡vahi picuevatacahavi viyanaya te tiyerehi! —nacahepa ena éreanana tiávahácanahi ema achane.

¹¹ Tiuri puiti, tatiarihihivare eta camuriqueneanahi cúchiana. Tinihicanahi ánaqui te táemiripaisine eta masihi. ¹² Tacahe, ena éreanana tiyaseuchavanapa mayehe ema Jesús. Ánipa nacahe:

—¡Picatajicahavi! Pévatacahavi eta te távihahi eta jena cúchiana. Písapahavi visiapahacavaca eta jénana —náichapa.

¹³ Tacahe, ema Jesús macuchuchujicavacapa eta te máquehe ema achane, máisapapa nasiapahacavaca eta cúchiana. Tatiarihi cútimahi apina mil eta cúchiana. Tacahe, te tasamapa eta cúchiana eta nasiapahasiravacahi ena éreanana, tijunaparacanapa témiririjicanapa te tachaui eta cáquiure. Téririjicanapa tamutu.

¹⁴ Natiarihihisera ena tijaneacanainihi eta cúchiana. Te náimahapa, tiáramecanarinehi. Tiyananapa tijunapanapaipa, timetajiricanapaipa nácani nácapajiruvanapahi, étapa te avasare namutuvare nametaca. Tiáramicaréinehi nayehe ena achaneana. Tiyananapa náimahapana tájahapuca eta táichavaquenevahi eta cúchiana. ¹⁵ Te títecapanapa, náimahapa ema achane návaháruinihi ena éreanana. Téjacaripahi te máivapechacaya ema Jesús. Tájinaripahi máichiravainahini. Ticamuirihaipahivare. Tásihasera, típicanarinehi ena achaneana. ¹⁶ Tavetijipa te náitametacapa ena tímahanahi eta táichavaquenevahi eta cúchiana te macuchuchujicavacapa ena éreanana ema Jesús. ¹⁷ Tacahe, nayaseacapa ema Jesús váhini macuítECApauchavacaini tayehe eta návasahi éna, machavavanehini te másinehi.

¹⁸ Tacahe, te tiávacuhayarepa ema Jesús, ema achane manararuhi tiyaseserecapa eta mavarairapa máehica ema Jesús. ¹⁹ Émasera, vahi máisapahini. Ánipa maicha:

—Piyanchucha pichava nayehe ena pijaneanana te piávasa. Pimetacaya eta macanarasiravihi ema Viya taicha eta majapanuiravihi —máichapa ema Jesús.

²⁰ Tacahe, tiyanapa tichava ema achane. Timetajiricapaipasera mametacavacapaipa eta máichaquenehi ema Jesús mayehe. Náraminehi namutu ena ticavasanahi eta te provincia ticaijare Decápolis.

Éma Jesús macanaraca esu machicha ema Jairo, ésupa esu apana esena sucajumaquenehivare
(Mt 9.18-26; Lc 8.40-56)

²¹ Tiuri, tichavavarepa tiánueca ema Jesús te apachara. Te títecapapa, náurujiacavanepa ena ichapemuriqueneana achaneana te mávinehi te tachaui eta cáquiure. ²² Tacahe, títecapapa ema émana achane ticaijare Jairo. Éma maca achane, tétavicavahi eta mapicauchacarevahi. Tuparairucahi tayehe eta náurujisirareva. Te máitecapauchapa, tépuyucapa te mamirahu ema Jesús. ²³ Mayaseacapa, ánipa máichapa:

—Tátachicha, surarihi esu nuchichasami, ticajumahi. Puiti téñamajiri-cavaipa ésu. Picatajicanupaini, tata. Pinasinanu eta pivahuana suyehe apaesa sunaraca —máichapa.

²⁴ Tacahe, masuapapa ema Jesús. Tiyana maéhicahi ema achane. Náhejavarepa ena camuriqueneana achaneana. Náevatajiricanecha éma.

²⁵ Tásiha, te nataracu sutiarhipahivare esu esena sucajumaquenehi. Doce añoripahi eta sucajumairahi táichirahi eta suítine. ²⁶ Ichaperipa eta sucatajivairahi taicha camurianaripa ena tipuchanahi mé dicoana. Títaharipa eta suímahaqueneanaini. Tájinasera vahi suátivarehini. Suávraparasia-vaichuhi suvayuhapaichucha eta sujuma. ²⁷ Ésu, sutanucapaipahi ema Jesús, susamairiricahi eta tiáramicareana máichaqueneanahi. Supaucha suéhiquecuchapaipahi te maquecu. ²⁸ Taicha tacahehi eta supaneruhi: “Taratachuchaini né mamajiacahini eta ñimuirihá, németeaca nunaracapa-pucaini”, sucahesamurepa. ²⁹ Tacahe, suémamajiacapa eta tacheyarapi eta mamuirihá. Jéhesaréinehi, enurujipa tíchea eta suítine. Tisamavapa ésu eta sunarasiraipahi tayehe eta sujumainihi.

³⁰ Émasera ema Jesús macaicutiaravanepa eta sutiarahirahi esu tacanararui eta máitupajijiasiravahi. Enurujipa téviurucavahi te namuri ena ichapemuriqueneana achaneana. Ánipa macahe:

—¿Nájaha témamajiacanuanahi?

³¹ Tacahe, ena máimitureana náichapa:

—Tata, téñatuhejiricacanaahi namutu eta achaneana taicha ichape eta nasimutuvahi. Piyaserecavirichahava nájahapuca ena témamajiacavianahi —náichapa.

³² Émasera ema Jesús máesanimurihapa, matanucapa nájahapuca ena témamajiacanahi. ³³ Tásiha, supaucha esu esena. Tiyayacarepaipa taicha tipicaripahi. Taichasuéchahi eta suíchaquenehi ésu. Suépuyumirauchavanepa te mamirahu. Sumetacapa tamutu. ³⁴ Tásiha, máichapa ema Jesús:

—Tiuri, nuchicha. Pinaracapa puiti táichavenehi eta picasiñairanuhi. Vaipa picueñamava eta pichaviraya te pipena. Vaipa tichavaimahi eta pijumainihi —máichapa.

³⁵ Téchajiricavaichahahi ema Jesús eta suyehe esu esena, títecapananecha ena tíasihanahi te mapena ema Jairo. Nametacavanepa:

—Esu pichicha tépenasamipahi. Vaipa picucamesa ema Maestro —náichapa.

³⁶ Émasera ema Jesús vahi masuapahini eta nametasirahi. Mavara-haichucha tiyana. Tacahe, máichapa:

—Vahi picueñamava, piti Jairo. Pácasiñavachucha eta nuyehe —máichapa.

³⁷ Tacahe, ema Jesús vaipa máisapahini náehica ena apamuriana achaneana. Nacarinepa ema Pedro, ema Jacobo, émapa ema Juan. ³⁸ Te títecapanapa te mapena ema Jairo, máimahapa ema Jesús ena achaneana vaipa náitucarahahíni, tijajamurianaripahi eta náiyairahi. Tipiararecanaripahi muraca. ³⁹ Émasera ema Jesús eta masiapirahi, máichavacapa:

—¿Tájaha tacayema eta iúrujiricavahi eta ani, iyaharacavapa? Vahi ecuiyaha. Esu suca amaperu, váhinéni suépenahini. Tímacarichucha ésu —máichavacapa.

⁴⁰ Énasea ena achaneana nacaecahirichucha éma, técavanapa. Tacahe, ema Jesús macuchucavacapa te aneca namutu. Tacahe, tisiapapa te suávihahi esu amaperu, émapa ema suiya, ésupa esu suena, énapa ena mapanana máimitureana. ⁴¹ Tacahe, macaratavauchapa ésu. Máichapa:

—Nuchicha, néchajicavi. Péjamica, péchepuca —máichapa.

⁴²⁻⁴³ Enurujipa esu amaperu téjamica, téchepuca. Tipaicapa te namirahu. Ichaperinehi eta náramirahi ena tímahanahi. Tásiha, ema Jesús mavanecavacapa náijaraca eta sunica esu amaperu. Matuparacavarepa muraca eta vahi nacuechajisiha eta náimahaquenehi. Esu amaperu, dóceripahi eta suñañora.

Tacahe, tiyanapa ema Jesús. Tichavapa te mapena.

6

Tichavapa ema Jesús te mávasa Nazaret

(Mt 13.53-58; Lc 4.16-30)

¹ Tacahe, te apanapa sache, tiyanavarepa tipaica. Tichavapa tayehe eta mávasa Nazaret, mámamurihapaipa ena máimitureana. ²⁻³ Tacahe, te jena sache sávarumuquene, tiyanapa tayehe eta náurujisirareva nayujarasirare ena achaneana. Tímiturecapa. Camuriana ena tisamararacana. Ichape eta tahapasamurechiravacahi ena achaneana. Váhisera návarahahini nasuapahini. Náepururichucha éma. Ánipa nacahe:

—¿Távihapuca mavínehi eta júcana máimiturapianahicacha ema máca? ¡Témunahiricavapa títupajijiacavaipahíjicacha! ¿Távihasica macaravahuinehi eta máichirayare eta tiáramicareana? Vivaraha vímaha víti apanava eta máichaqueneanahíji visamaiririruana. Taicha vímatihi ema maca. Carpintérochucha éma. Vímatihivare esu maena María. Vímatihivare ema maparape Jacobo*, émapa ema José, émapa ema Judas, émapa ema Simón. Vímatihivare ena esenana maparapenaveanahi, ticavasanahi ani —náichacapa.

⁴ Ema Jesús máimatihí eta napanereruanahi. Tásiha, máichavacapa:

—Tatuparaca epicauchahaviya vimutu viti mavaneruana ema Viya. Étisera eti nujaneananahi ecavasanahi eta te juca viávasa, étipa eti nuparapenaveana, vahi epicauchanuhini —máichavacapa.

⁵⁻⁶ Éma, ichape eta máramirahi eta namasuapajiraivahi éna. Eta tacahe, tájina máimerecachichaini eta tiárami careana. Tacarichu eta macanarasirahi ena nacajumaqueneana eta máemamamahásiravacahi te mavahuana. Vahi camurianainahini ena macanararuanahi.

Ema Jesús mavanecavacapa ena dócequeneana apóstoleana napaicayare tamutu avasareana, ticametairuanayare

(Mt 10.5-15; Lc 9.1-6)

Tacahe, ema Jesús tiyanapa mapaicahi eta avasareana máimitucavacapa ena achaneana.

⁷ Étana sache, macurujimurihapa ena dócequeneana mayeheana apóstoleana. Tacahe, máijaracavacapa eta náitupajijiasiravayare naratahairayare náquijica ena éreana. Tacahe, mavanecapa tiyanana

* **6:2-3** Ema maca achane, ticajarehi Jacobo te náechajiriruva ena israelítana. Te véchajiriruva, ticajarehi Santiago. Mapaenumavahi máehica ema Jesús te táequenepa eta máechepusirahi te máecari ema Viáquenu.

eta te apanapaneana avasareana, apinanayarepahi eta napaisirayarepahi.

⁸ Matuparacapa, ánipa máichavaca:

—Tájina iámaimahi eta eyereruvana eta epaisiraya. Váhivare ecuama eta enirurucuha te alforja, étapa eta plata. ⁹ Étanarichuvare iámayare eta emuiriha. Tacarichu iámaya eta eyupairiqui. Ecaeparupevayaresera.

¹⁰ Te ítecapapa tayehe eta jácani peti ítecapihaya te jácani avasare, ánasi tayehe. Te iúchucayarepa eta te jena avasare, epaenumava ejunijica eta ítecapihahi. ¹¹ Te váhipuca nacujacapahe te jácani avasare, váhivare nacu-

varaha nacusamahe, iúchucavaneyare. Étatapevachavanumayaresera eta máteji te ívapeana. Táicutiarayare eta máicuñasiravacayare ema Viya taicha eta namavarairahi najacapahehíni. Nutupiruva numetacahe, te táitecapa eta juicio, tiápajucavainapa eta náicuñayare. Tacachuricayare eta nacaicuñairayare ena achaneana váinarajiqueneana ticavasanaini te Sodoma étapa eta Gomorra —máichavacapa ema Jesús.

¹² Tacahe, tiyanapa ena dóceana. Ticametarairuana eta tacamunuirayarehi eta náeneuchiravaya ena achaneana, náinajica eta napecaturana.

¹³ Náimijunavacapaipa ena éreanana tiávahácanahi ena achaneana. Camuriannahivare ena nacanararuana tayehe eta najumanaini, nacapajasisirapahi te nachuti eta aceite.

Éma Herodes masamairiricapa eta máichaqueneanahi ema Jesús

(Mt 14.1-2; Lc 9.7-9)

¹⁴ Tacahe, ema Herodes ema aquenucachi tayehe eta Galilea masamairiricavarepa eta máichaqueneanahi ema Jesús, taicha náechajisihahi namutu ena achaneana. Nararihi ena téjecapavanahi eta napanereruana, ánipa nacahe:

—Ema maca Jesús, ¿váhipuca émaina ema Juan Tícachasirícarahíni macaparuhi ema Herodes? Tichavahichupuca títareca. Étapuca tacahehi puiti maratahahi maicha eta tiáramicareana —nacahepa.

¹⁵ Nararihisera ena apamuriana nacahepa:

—Émapuca ema víyarahaini profeta Elías, téchepucahi.

Ena apamuriana nacahepa:

—Émarichuhi profeta, macutiquenehi ena náinapureanáini antivuanaini. Váhiserá téchepucaimahi éma —nacahepa.

¹⁶ Émasera ema Herodes, eta masamairirisirahi, macahepa:

—Németeacachi ema maca émaripa ema Juan, ema nímiyuchatiqipiquenurehi, téchepucahipuca te máecari —macahepa.

Éta táichararacavahi eta máepenirahi ema Juan

(Mt 14.3-12)

¹⁷⁻¹⁸ Éta macapasirahi ema Herodes ema Juan, ani tacahe eta táichararacavahi: Te jena año, ema Herodes mavehahi esu Herodías, esu machinenahi, mayenahi ema maparape Felipe. Máiminajicapa ema suima. Tacahe, ema Juan macajachavacapa éna eta naviracacairahi. Étapa tímicitichahi ema Juan, sucatichapa esu Herodías. Tásiha, ema Herodes máeratacapa te cárcel ema Juan, macavanairipipa náitiaca te carenapi. ¹⁹ Esu Herodías, tétavicava eta sucatichirahi ema Juan. Suvarahahi sucapaca éma. ²⁰ Váhiserá suratahahíni, taicha matsirihacahi mapicauchahi ema Herodes ema Juan, taicha máechahi tétavicava eta máurivahi ema Juan. Máimatihivare eta mavaneruhi ema Viya. Éta tacahehi, macatiuchahi éma apaesa tacuija suícharaca ésu.

Táitusiava, ema Herodes máuricapa masamararacahi eta máimiturapiana ema Juan; váhisera máituruequenehahini tájahapuca máíchararacavayarehi. ²¹ Tacahe, eta te jena yati ticaijaremuhupa ema Herodes, sucamapurapa esu Herodías eta máepiyasirahi eta ichape piesta ema Herodes. Máichuhapa ena máevanachana énapa ena oficiáleana, énapa ena ticaimahaqueneana ticavasanahi tayehe eta Galilea. ²² Te tinicanapa téranapa, esu suchicha esu Herodías tisiapapa eta te návihahi ena achaneana. Esenacharipa ésu. Tírimaicapa te namirahu. Ema Herodes máuricainehi ichape, énapa ena machimarana. ²³ Tacahe, ema Herodes máíchapa ésu:

—Nujuracha te pimirahu. Piyaseacanu tájahapuca eta pivarahaquenéna. Núti níjaracaviyare jácani piyasearunuyare, tayanapane vácuticaca eta nímahaqueneana —máíchapa ésu.

²⁴ Tacahe, tiyanapa tiúchucapa esu amaperu. Suyaserepanapa esu suena, ánipa suícha:

—¿Tájahapuca eta nuyaseacaini eñi ñina Herodes? —sucahepa.

Tásiha, suíchapa esu suena:

—Píyaseacaya eta ñichuti eñi Juan, puítinarichu ñíjaracavi —suíchapa.

²⁵ Enurujipa tichava tisiapa esu amaperu eta te mávihahi ema aquenuca Herodes. Suyaseacapa éma, ánipa suícha:

—Nuvaraha píjaracanu puítinarichu eta ñichuti eñi Juan eñi tícachasiricarahi. Píjaracanu te curuja —suíchapa.

²⁶ Tásiha, eta masamirahi eta juca suyasearuhi ema rey Herodes, ichapérinehi eta mapanereresirahi. Váhisera mávarahahini mavayuacahini ésu táicha nasamaripahi ena machimarana eta máíjarasirayarehi eta suyasearyarehi ésu. ²⁷⁻²⁸ Tacahe, enurujipa mavaneca ema suntaru eta te cárcel. Mayuchatipiquenuhapana ema Juan. Tacahe, mámapaipahi eta machutini te curuja. Máíjaracapa esu esena amaperu. Tásiha, suíjarapanapa esu suena.

²⁹ Te nasamairiricapa ena máimitureana ema Juan, tiyananapa náepanapa eta máquehéni, náecarapanapa.

Éma Jesús máítaparahavacahi máenicavaca ena camuriqueneana achaneana (Mt 14.13-21; Lc 9.10-17; Jn 6.1-14)

³⁰ Tacahe, tichavanapa tiúrujicavana ena apóstoleana mayehe ema Jesús. Nametacapa tamutu eta náíchaqueneanapahi étapa eta najacapirahi ena achaneana eta náimiturapianahi. ³¹ Tacahe, máíchavacapa ema Jesús:

—Tiuri. Tájina táichava. Puiti viyana vácarichu eta te mávapahi apaesa vinaraca ánipina —máíchavacapa.

Taicha vahi téjicavavana ena achaneana. Tévacajiricacanahi tiyanana. Vahi náitujicavahini nanicanumahini ena apóstoleana émapa ema Jesús. ³² Tacahe, tiyananapa te pacure, tiávacuhanapa. Nacaijuhepa te mávapahi apaquehe.

³³ Énasera ena achaneana nanecapaichucha eta nayanirahi. Camurianahi ena tímatianahi. Tacahe, tiyananapa tijunapanapaipa, nametapanayarehi ena apamuriana achaneana. Tásiha, tiúrujicavanapa ena tiásihana te tamutu avasareana. ³⁴ Te tiúcupaicapa ema Jesús, máimahapa ena camuriqueneana achaneana natiarիրipahi. Tévacavainehi eta majapanuiravacahi, taicha nacutihí eta uvesana nájina tijaneacaina. Tacahe, máimitumuriharipa. Camuri eta máimiturapiana. Tiuna eta máimitusiravacahi. ³⁵ Te cáperehipa, ena máimitureana napauchapa éma. Náíchapa:

—Cáperehipa juca sache. Tiyerehivacahi eta pétiana. ³⁶ Tacahe, táuricapa pimetacavaca ena achaneana nayanapa, navachareca eta nanica te jácani isanítiana, avasarechichanapuca te víchacayarahanahi. Taicha ani, tájina naviyaimahi eta nanicahini —náichapa.

³⁷ Majicapapasera éma:

—Íjaraca étina eta nanica.

Éna náichavare:

—¿Pivarahapuca viyana vivachareca eta pan? Tacamunuhi vácayehehini eta camuri plata apaesa námutupaini vítaparahahini vénicahini apaesainahini návaminahini. ¡Vahi taratahahini eta dies mil páneana! —nacahepa.

³⁸ Tacahe, mayaserecapa ema Jesús:

—¿Áyana eta pan ecayehe puiti? Eyana ímaha.

Te náechapa, nametacapa:

—Cíncochichaichu eta pan, apiquipa eta jima jitaruca —nacahepa.

³⁹ Tacahe, macavanairipipa náejahahacapaicahini namutu te muíjipahi, náijamuripaichuhi. ⁴⁰ Tacahe, téjahaicanapa ena achaneana. Náijamuripaichuhi eta náejasirahi. Cincuantapahi, ciéntoanapahi. ⁴¹ Tacahe, ema Jesús mavehapa eta cincoquene pan étapa eta apiqui jima. Másenicapa eta te anuma. Mahasulupayachapa ema Viya. Mayuvetutujicapa eta pan, tásiha máijaracapa ena apóstoleana. Éna, náijaracapa ena achaneana. Énerichuvare mayuvetutuhesinavare eta apiqui jima. Tisimurivacapaipa eta náijaraca. ⁴² Tacahe, námutu tinicana, tisatueanapa. ⁴³ Tásiha, nacaemacharichahavare eta doce saye ichapehiana táinicachavacaichahava eta náemacharajiana eta pan étapa eta jima. ⁴⁴ Camuriana ena máeniruanahi. Te nataracu, natiarihini ena cinco mílqueneana ajairana.

Éma Jesús mapaicaeca eta une
(Mt 14.22-27; Jn 6.16-21)

⁴⁵ Te tamutupa, enevanepa mavanecahi ema Jesús tiávacuhana eta te pacure ena máimitureana. Tínapucanayarehi tiánuecana te apachara eta te avasare Betsaida. Émasera ema Jesús manasiyarehi máevatamurihanumayarehi ena achaneana.

Tásiha, tiyananapa ena máimitureana. ⁴⁶ Tacahe, te tamutupa eta macame-tavairahi ema Jesús nayehe ena achaneana, tiyanapa tiápanahi tayehe eta anuquehe mari. Tiyujaracayarehi tayehe.

⁴⁷ Tacahe, te tiúyatipa jena yati, ema Jesús manasirichaha macarichuhi eta te anuquehe mari. Éna máimitureana itupierecanaipa tayehe eta cáquiure.

⁴⁸ Tásiha, tachimaracavacapa eta muraca técativaca, nácapaquihipa. Te tijarahipa, ema Jesús máimahapa eta nanausirapahi muraca. Tacahe, tiyanapa macapayamuriha. Mapaicaecapaipa eta une. Máetavicavacapai-pasera. ⁴⁹ Éna máimitureana tipicanarinehi eta náimairahi eta mapaicaesirapahi eta une, náimijachaipahi cunare. ⁵⁰ Tipiararecanapa namutu eta náimairahi. Máechajicavanepasera éma. Ánipa maicha:

—Vahi ecupica. Nútichucha. Étumehava —máichavacapa.

⁵¹ Tacahe, mapauchapa éna. Tiávacuhapa nayehe. Tacahe, tíjahúchavapa tíchecapa eta técativaca. Náramirinehi ichape ena máimitureana. ⁵² Taicha vuíchaha nacaicutiarahini eta tacayemaquenehi eta macaejapasirahi eta pan, eta táimereuchirahi éma eta vanairucairahi me Viya. Muracasamuremurianarichaha.

*Ena Jesús macanaraca ena nacajumaqueneana ticavasana te Genesaret
(Mt 14.34-36)*

⁵³ Tacahe, te apanapa sache, tiápechavanavarepa tiánuecana eta cáquiure. Títecapanapa eta te avasare ticaijare Genesaret. ⁵⁴ Te tiúcupaicanapa, náitiacapa eta napacure. Ena natiarihiqueneanahi náimativanepa ena Jesús. ⁵⁵ Tásiha, tiyananapa tijunapana timetajiricanayarehi tayehe tamutu eta avasarechichana tachacayarahanahi. Tacahe, tiúrujicavanapahi ena achaneana te jácani máitecapihapahi ena Jesús. Námavacapaipahi eta te áchuji ena nacajumaqueneana. ⁵⁶ Énerichuvare, te jácani mayanipahahi te acheneana téhepuca cálleana, nanaquipaicapahi ena nacajumaqueneana. Tacahe, nayaseacapahi éma máisapirainahíni náemamajiaca eta tacheyarapi eta mamuiriha. Tacahe, nácani témamajiacanapahi, enevanepaipa tinaracapanahi.

7

*Ena Jesús mametaca ena achaneana eta timaeperajicarahi
(Mt 15.1-20)*

¹ Tiuri, te apanapa sache, náitecapauchapa ena apamuriana fariséoana énapa ena escribánoana, tiásihanahi tayehe eta Jerusalén. Témeñahavanapa eta mayehe ena Jesús. ² Te nataracu ena máimitureana ena Jesús, nararihi éna vahi nacasipavahunumahini eta nanisirahi. Tacahe, ena fariséoana, eta náimairahi eta namaitauchirahi eta nayeherepihi, ichaperinehi eta nasemanevahi, taicha náimijarechahi “máeperaji” eta juca. ³ Taicha namutu ena israelítana, napicauchahi eta nayeherepiana ena náchucanaveanaini, navetijipa ena fariséoana. Te vahi ticasipavahunumanahi, váhivare náisapaimahi tinicana. Taicha éna vahi návaraha tánasihíni eta tachipejihini ánichichainahini, taicha tipicanahi tamaeperajicahini eta náchanevana. ⁴ Étaripa násihahipuca te mercado, te plázapuca, te títecapanapa te napena, ticasipavahunayarehi. Maverá eta apamuri nayeherepianahi tipicauchacareanahi nayehe, étaripa eta nasipasiraparaca eta náereresiana, éta pa eta jarra, éta pa eta návacuruhiana éta pa eta catre náimasirare.

⁵ Tacahe, nacajachapa ena Jesús ena fariséoana énapa ena escribánoana. Ánipa náicha:

—Pímaha. Ena pímitureana vahi náitauchahini eta viyeherepi. Namaeperajicapa eta náchanevana eta nanisirahi taicha vahi nacasipavahunumahini. ¿Tájaha tacayema vahi napicauchahini eta viyeherepi nanaquiruhi ena viáchucanaveanaini? ¿Étaserapuca tacahehi eta pímitusiravacahi? — náichapa.

⁶ Tacahe, majicapapa ena Jesús, ánipa maicha:

—¡Éti ecaijarehi apimirahe! Tatupiruvahi eta máechajiriruvahi ena Viya, téchajisiahehi éti eta te Sagrada Escritura. Ánipa macahe: “Ena nani achaneana, tétserajicanuanahi te najaca; váhisera táetupicavahini te nasamureana. ⁷ Téneuchavanahi eta nuyehe, tamapurujihisera eta náneuchiravahi. Nacaerajicahivare eta nuvanairipiana; tasapihapa náimicapicauchahi eta nayeherepiana táuchurechucha te napanereruana ena náchucanaveánaini” macahepa ena Viya. ⁸⁻⁹ Ichape eta éjecapiravahi éti, taicha tasapihapa epicauchahi eta eyeherepiana. Étasera eta mavanairipi ena Viya, vaipa epicauchahini. Tasapihapa épuruhi eta mavanairipiana

taicha tivayuacahehi ichape eta itauchirahi eta eyeherepiana. ¹⁰ Émarichuhi ema víyarahaini Moisés tiájuchahi eta mavanairipi ema Viya eta viyehe: “Pipicauchaya pémunacayareva ema piya ésupa esu pena”. Jucarihi eta apana vanairipi: “Mácani tiúmehahi ema maiya ésupa esu maena, vahi tijapanucarémahi nacapacayarehi”. ¹¹⁻¹² Étisera vahi epicaucha eta júcana vanairipiana mayehe ema Viya. Taicha te mararihipuca mácani achane ticamavahupuca me Viya eta máimahaqueneanahi, eta ímiturapi éti “Vaipa tatuparacaimahi ema achane eta máimicatasiraya ema maiya ésupa esu maena”. ¹³ Ani tacahehi eta ecaepahaira eta tasuapacarevahi eta mavanairipiana ema Viya. Tasapihapa, ímicapicáuchahi eta eyeherepianachucha. Jararihivare eta apamuriana eta éjecapiravanahi tavasiqueneanahi —máichavacapa ema Jesús.

¹⁴ Tacahe, máichuhapa ena achaneana, náurujicava eta máimitusiravacayare. Tásiha, máichavacapa:

—Nuvaraha esamanu yátupina, apaesa ácaicutiara. ¹⁵⁻¹⁶ Tájina timaeperajicaina eta víachanevana te vahi vicasipavahunumahi te vinicayare. Vahi étaparacaina eta vinicaqueneana. Étasera eta jácani evainarajivana táuchureanapuca te ejaca, étapa eta evainarajipanereruana; jéhevare éta timaeperajicahehi —máichavacapa.

¹⁷ Tacahe, te tyanaracana ena achaneana, macarinepa ema Jesús énapa ena máimitureana, nayaserecapa máitametacavacahini eta máimiturapi. ¹⁸ Tacahe, máichavacapa:

—¿Énerichuvare éti mapanererurehe? ¿Váhipuca ácaicutiarahini eta juca? Tamutu eta juca tasiapaqueneanahi te vijaca vinasareanahi, vahi timaeperajicahavimahi, taicha vahi tasiapa te visamure. ¹⁹ Tatupiruhi te vijuhe. Tásiha, te tiúchucapa eta, apanapa eta táuchusihahi —máichavacapa ema Jesús. (Eta máichiravacahi eta juca, máimicaeherachapa eta táurivahi tamutu eta tinicacareana.)

²⁰ Macahevarepa:

—Étasera jácani panerercana tauriqueneana, te náisapavapuca ena achaneana, étara timaeperajicavacahi éna. ²¹⁻²² Taicha te amahe eta nasamureana napanerechahi eta tauriqueneanahi. Ema achane mapanerechahi maveha esu apana esena mayena ema apana achane. Esu esena supanerechahivare suveha ema apana achane suima esu apana esena. Éna amaperuana napanerechahi eta natuhusivaya. Nácani tipanerechanahi eta ticaparecana, tiámerecana, tivayuarecana, téchajihihana. Te nasamureana, najamuracha eta apayeheana, ticapinarurahiana, tétserajicavana eta nasiñavairahi. Mapicaurairahana, camuriqueneana eta napanereruana máecharaireana. ²³ Tamutu eta juca panerercana tauriqueneana tiásihahi te nasamureana. Jéhesare, eta júcana eta timaeperajicahi eta náchanevana ena achaneana —máichavacapa ema Jesús.

*Esu ésuna esena apavasana sucasiña ema Jesús
(Mt 15.21-28)*

²⁴ Tacahe, tyanavarepa tipaica ema Jesús, énapa ena máimitureana. Nacaijuheyarehi eta avasareana táunavanahi eta provincia Siria. Tásiha, títecapanapa te jácani peti. Váhisera mávarahahini náechahini ena apamuriana achaneana eta matiarahirahi. Tásihasera náecharichucha éna. ²⁵ Tacahe,

susamairicapa esu ésuna esena. Ésu, apavasanahi, sirofeníciana. Eta suéchejiriruva eta griego. Esu suchicha mávaháruhi ema émana éreana. ²⁶ Títecavanepa esu, suépuymirauchapa te mamirahu ema Jesús. Tiyaseuchavapa mayehe ema Jesús eta máimijunijicahini ema éreana suyehe esu suchicha. ²⁷ Tacahe, máichapa esu:

—Nativaya néchapajiricavaca ena nujaneanana. Taicha vahi táuricahini ásapihahíni néchapajiricahéhini éti apavasanana, émétavicahini ena nujaneanana —máichapa.

²⁸ Esu esena sujicapapa:

—Énehineni tacahehi, tátachicha. Yátupihi vahi pijaneananuinahini. Pájapanunusera, picatajicanuchuchaini. Víti apanava vácasíñavahini eta piyehe eta vítátijivairaina —suíchapa.

²⁹ Tacahe, máichapa ésu:

—Tiuri eta péchajiriruva. Piyanapa pichava te pipena. Táichavene eta picasíñairanuhi, nímijunijicaripa ema éreana suyehe esu pichicha —máichapa.

³⁰ Tacahe, tichavapa ésu te supena. Suchimapapa tívecahi esu suchicha te sucamane. Jéhesaréinehi, májinaripa ema éreana, majunijiacaripa ésu.

Ena Jesús macanaraca ema túhuquiña upa

³¹ Tacahe, tiyananavarepa tipaicana najunijicapa eta provincia Siria. Nánucuhapa eta provincia ticaijare Decápolis. Tacahe, títecapanapa eta te tachaui eta cáquiure Galilea, te tinapaica te táuchusine sache. ³² Tacahe, ena achaneana námapa ema émana achane mayehe ema Jesús. Túhuquiña, úpavare ema achane. Náechajiuchapa eta manaca eta mavahu mayehe ema achane, macanarasirayarehí. ³³ Tacahe, ema Jesús mañajichapa ema achane nayehe ena achaneana. Manacapa eta masuveraqui te maquiñana. Tacahe, tiátutuquivauchavapa. Tásiha, máemamacapa eta manene ema achane. ³⁴ Tacahe, máesenicapa te anuma. Tiúmitipa. Tacahe, máichapa:

—¡Téchujihapa eta piquiñana!

³⁵ Enurujipa tisamarahipa ema achane. Tijimuyapa eta manene, tiúripa téchejica. ³⁶ Tacahe, máimichavapa ema achane nayehe ena majaneanana. Matuparacapa éna eta nacuija nametaca. Énasera timetajiricanaichucha.

³⁷ Tétavicava eta náramirahi ena nametaruanahi. Ánipa nacahe:

—Tétavicava táuricacareva tamutu eta máichaqueneanahi ema Jesús. Téchajicanapahi ena úpana, tisamarahianavarepa máicha ena túhuquiñana —nacahepa.

8

Ena Jesús tiápechava máenica ena achaneana

(Mt 15.32-39)

¹ Tacahe, eta juca sácheanahi tiúrujicavanapa ena ichapemuriqueneana achaneana te mávihahi ema Jesús. Mapanaripa sache nacahehi ena achaneana, tájinaipa nanicahini. Tacahe, máichuhavacapa ema Jesús ena máimitureana. Máichapa:

² —Nujapanuvaca ena nani achaneana, taicha mapanaripahi sache puiti eta nacahehi eta viyehe. Tájinaipavare naviyahini nanica. Téchurihanaripa eta nanicaquene. ³ Te névatacavaca nayana te napenana, machu náquipaicava

te achene taicha vaipa túmevacaimahi eta náecuavahi. Taicha natiarihi ena tiásihanahi te tiyerehiana. Vénicavacayare —máichapa.

⁴Tacahe, najicapapa ena máimitureanahi. Ánipa naicha:

—¿Távihapucaini viviyahini eta vénisihayarehi ena nani camuriqueneana achaneana? Eta te juca mávapahi vámahí, tájina vítusiáváimahi eta tinicacareana —nacahepa.

⁵Tacahe, mayaserecapa éna. Ánipa máicha:

—¿Ayanachaha eta pan eta íamaqueneanapahi?

—Jucarihi siéterine —náichapa.

⁶Tacahe, macavanairipipa eta náejahapaimuriahini namutu ena achaneana. Tacahe, mavehapa eta siétequene pan, mahasulupayachapa ema Viya te anuma. Tásiha, mayuvetucavacapa, májjaracapa ena máimitureana. Éna, nájjaracavacapa ena achaneana. ⁷Tatiarihihivare eta ánimurichicha eta jímachichana. Mahasulupayachavare ema Viya tayehe eta jima. Tacahe, mavanecavarepa eta nájjarasiravacayare ena achaneana. ⁸Tacahe, tinicanapa namutu, tísatuheanapa. Tacahe, nacurujicapa eta náemacharájiana. Siete sáyerichahahivare eta náemachana. ⁹Éta nasimutuvahi ena tinicanahi táetavica eta cuatro mil achaneana. Tacahe, te tamutupa eta juca, máevatamuríhasarepa ema Jesús ena achaneana nayanaya nachava te napenana. ¹⁰Enurujipa tiávacuhanapa te pacure ema Jesús énapa ena máimitureana. Tiyananavarepa. Tiánuecana nacaijuhepa eta te avasare ticaijare Dalmanuta.

*Éma Jesús macajachavaca eta namasuapajiraivahi ena fariséoana
(Mt 16.1-4; Lc 12.54-56)*

¹¹Tacahe, títécapanapa ena apamuriana fariséoana. Tépanavanapa nacanarajirica ema Jesús. Eta navarairahi náimiaquipaicayarehi, nayaseacapa máimerecaini eta tiáramicareana, máimerecavahini te yátupihipuca vanairucahi me Viya. ¹²Tásiha éma, tichuruamichavarine muraca. Tacahe, máichavacapa:

—¿Tájaha tacayema eti achaneana eyaseacanu nímereca eta tiáramicareana? Núti nímatihe. Vahi esuapanuimahi te nímerecapucaini eta tiáramicare. Tásiha, váiparine étina tatuparaca ímahahini eta tiáramicareana —máichavacapa.

¹³Tacahe, majunijicavacapa éna. Tiyanavarepa tiávacuha te pacure. Tiyananapa tiánuecana te apachara eta cáquiure.

*Éma Jesús máimicuticha eta levadura eta apimirairanahi ena fariséoana
(Mt 16.5-12)*

¹⁴Tiuri puiti, náemitisicahi ena máimitureana eta nanirurucuha. Tatiarihihisera eta étanahi pan eta te pacure. ¹⁵Éta nayanirahi, máimitumurihapa ema Jesús éna. Máichavacapa:

—Tímaticarehi eyehe eta levadura eta tasisijisira tamutu eta masa. Tacutirichu eta tapareasirahi eta apimirairavacahi ena fariséoana étapa eta tacañamarasira eta ecaimahaquenerayare. Vahi ecucuti ena políticoana. Échapaváicha tayehe, machu éhica éna —máichavacapa.

¹⁶Tacahe, náichacacapa ena máimitureana. Ánipa nacahe:

—Tímicajachahavihi eta vémitisisirahi eta pan. Éta tacahe, macahehi tayehe eta levadura.

¹⁷Éma máimatiacavacapa. Tásiha, máichavacapa:

—¿Tájaha tacayema ecahechajiruvahi eta émitisisirahi eta pan? ¿Vuíchahacaru ácaicutairahini? ¿Tájinacaruichaha epanereruina éti? ¿Muracachutihichaha? ¹⁸ Tamapurujichuchapuca eta imairahi eta níchaqueneana. ¿Vuíchahacaru ácaicutiarahini? Tamapurujipuca eta esamirahi eta nímiturapiana. ¹⁹ ¿Váhivare échahini eta nucaejasirahi eta cíncoquene pan, naniruhi ena cinco mílqueneana achaneana? ¿Áyanahi sáyeana eta náemacharajiana evehaqueneanahi? —máichavacapa.

Tacahe, najicapapa:

—Doce sáyeana.

²⁰ —Étapa eta siétequene pan naniruhi ena cuatro mílqueneana achaneana, ¿áyanahivare sáye eta náemacharajianahi evehaqueneanahi? —máichavacapa.

Najicapavare:

—Siete sáye —náichapa.

²¹ Tacahe, máichavacapa:

—¿Vuíchahacaruva ácaicutiara? —máichapa.

Ena Jesús macanaraca ema émana achane púchuqui eta te avasare Betsaida

²² Tiuri, títecapanapa eta te avasare Betsaida. Ánauqui, námapa ema achane púchuqui. Náechajiuichapa éma eta macanarasiraya ema Jesús. ²³ Tacahe, ema Jesús macaratavauchapa ema púchuqui, mámapa te tachachacu eta avasare. Tacahe, mayajlhauquichapa eta mátureta eta te máuquihana. Tásiha, manacapa eta mavahuana eta te machuti. Tásiha, mayaserecapa:

—¿Pímairiricapa? —máichapa.

²⁴ Tacahe, téseninicapa ema púchuqui. Macahepa:

—Nímairiricapa apaesa. Eta nímairahi ena achaneana, ticitimahichuchasera yucuquiana, tiyamuricanahisera —máichapa ema púchuqui.

²⁵ Tacahe, ema Jesús mápechavare manaca eta mavahuana eta te máuquihana ema púchuqui. Te mavehapa eta mavahuana, yátupipa tijarahipa eta máimairirisirahi. Tamutupa máimaha. ²⁶ Tacahe, ema Jesús máevatacapa ema púchuquinihi, mayanapa te mapena. Máichapa:

—Piyanaapa pitupiru te pipena. Váhisera picusiapa eta te jena avasare eta piyanihaya —máichapa.

Ena Pedro máimereucha ema Jesús émairahi ema Cristo
(Mt 16.13-20; Lc 9.18-21)

²⁷ Te táequenepa eta juca, tiyanavarepa tipaica ema Jesús, énapa ena máimitureana. Nacaijuhepa eta te avasarechichana tachacaya eta ichape avasare ticaijare Cesarea, máepiyaruihi ema rey Felipe. Eta napaisirapahi, mayaserecapa ena máimitureana. Ánipa maicha:

—¿Tájaha nacayema ena achaneana eta nuyehé? ¿Nájahanuhipuca náimijachanuhi núti? —máichavacapa.

²⁸ Tacahe, najicapapa:

—Ena apamuriana náimijachavihi téchepuca ema Juan Tícachasiricarahini. Ena apamuriana tímijachavianahi ema víyarahaini profeta Elías, téchepucahi éma. Ena apamuriana tímijachavianahivare ema mácani apana profetaini antívuini, téchepucahi —náichapa ena máimitureana.

²⁹ Tacahe, tíapechavavare mayaserecavaca:

—Étiyapa, ¿nájaha ímijachanuhi núti?

Majicapavanepa ema Pedro:

—Pítira yátupiquenévihi Cristo —macahepa.

³⁰ Tacahe, matuparacapa muraca éna, nacuija nacumetaca eta émairahi ema Cristo.

*Éma Jesús tímereuchava eta máepenirayare
(Mt 16.21-28; Lc 9.22-27)*

³¹ Tacahe, tépanavapa máimitucavacahi eta táichararacavayare eta máepenirayare. Ániya maicha:

—Nuti Manerejirunuhi ema Viya, nutuparahaichuhi ichapemuri eta nucatajivairayare. Tépurunuanayare ena tuparairucana énapa ena aquenucarahana. Éna, tímicapacuanayareva. Mapanayareichuhisera sache eta nucaheyare eta népenirayare. Tásiha, nuchavayarehi néchepuca — macahepa.

³² Máimicaecherachapa eta macayemaquenehi. Tacahe, ema Pedro máiputsiacapa ema Jesús. Ánaqui macajachapa, máijarasiravahi eta mapanereruhi. ³³ Tacahe, téviurucavapa ema Jesús. Máesenicapa ena apamuriana máimitureana. Tásiha, macajachavarepa émapava ema Pedro. Máichapa:

—Píti, téjecapavahi eta pipanereruhi. ¡Pínajica eta juca tamauriquenehi! Pivarahapa pihapapica eta mapanereruhi ema Viya. Eta juca pipanereruhi tacutihi eta mapanereruanahi ema Satanás, énapa ena machanerana — máichapa.

³⁴ Tacahe, máichuhavacapa ena máimitureana énapa ena apamuriana achaneana. Máichavacapa éna:

—Nácani navaraha náehicanu, tacamunu náinajica tamutu eta tihapapirica eta náehisiranuhi. Nacaravahuyareva eta nímiturapiana. ³⁵ Nácanisera téñamanahi eta náitairesira, tiávamirahuanaya eta náehisiranu, énajivayare ticamitiequenehavanaya eta náitairesira. Énasera nácani yátupi tíjaracavana téhicana eta náehisiranuhi, étapa eta námirahi eta túrina échajirirucava, tayanapane táimicapacavacapura, éna titujicavanayare tíuchucuhayare eta náitairesiranaya. ³⁶ Énerichuvare nácani tacañamararuanahi eta nacaimahaquenéiraya te juca apaquehe, tíñehiyare eta náitairesira taicha eta tacañamarasiravacahi tahapapiricavacahi tayehe eta náuchucuirayarehini. Tiyanainapa eta te yucu nacaicuañaiyayare. ³⁷ Taicha vahi máratahaimahi mácani achane mavachachahini eta máurivaya te apana vítaresira. ³⁸ Énaripa nácani titsirihanapura téhicanuana, náimitsirihapura eta nímiturapiana te namirahuana ena achaneana mapicauruirahana pecatumareana, núti apanava nutsirihayareva nayehe ena nani. Nucaerajicainapa ena nani, nuti Manerejirunuhi ema Viya, te táitecapapa eta sácheyare nuchavirayare aquenucuanapaipa. Te jena sácheyare, námainapaipa núti eta majaraiva ema Tata, nuchachénapaipa ena sántoqueaneana ángeleana.

9

¹ Énerichuvare máichavacapa:

—Nutupiruva numetacahe: Puítiripa te etaracu éti etiarahi éti vahi épenanémahi, ímahanunumaya eta táepaniraya eta nítapajjiasiravahi eta nucaturarahairahi aquenucuanaya me Viya — máichavacapa.

*Éma Jesús tihapamaichava eta máimahi
(Mt 17.1-13; Lc 9.28-36)*

² Tiuri, sáisipa sache eta nanasirahi ánaqui. Tacahe, ema Jesús manaquicavacapa ena máimitureana. Nacarinehi máma ema Pedro, ema Jacobo, émapa

ema Juan. Tiyananapa eta te étana mari anuquehepana. Nacarichu éna. Eta ánaqui, náimahapa tihapamaichavahi eta máimahi ema Jesús te namirahu éna. Tétavicavapa eta tajapuvahi tajararasirahi tamutu eta máquehe. ³ Eta mamuiria, táetaviucha eta tajanunumesirahi. Nájina tiratahaina tépachinacha tajanunumecahini náicha eta muíriare. ⁴ Tacahe, tiáramicareanavarepa timerecavana ena apina ajairana: ema víyarahaini profeta Elías émapa ema víyarahaini Moisés. Téchajiricavanaripahi mayehe ema Jesús. ⁵ Tásiha, ema Pedro tímisiapavapa, téchajicapa ema Jesús. Ánipa macahe:

—Tata Náquenu, tétavicavapa táuricacareva eta viávihairahi eta ani. Tiúripa nahipucaini vépiyacahini eta epenahuinapachuhini. Pipenahuinarichuhini píti, mapenainarichuhivaréni ema Moisés, émapaini ema Elías —máichapa.

⁶ Váhinéni máimatiequenehaini ema Pedro tájahahipuca eta mavarahaquenehi macayema. Namutu tíñacavana ichape ena mapanana máimitureana. ⁷ Tacahe, tiáramicarevarepa eta úcaji táepacúmurihahi éna. Nasamavarepa eta mahu ema Viya tayehe eta úcaji. Ánipa macahe:

—Ema maca, ema yátupiquenehi nuchicha némunarquenehi. Éma esuapayare —macahepa.

⁸ Tíjahúchavavarepa, te náesenicavarepa, macarinehi ema Jesús. Nájinaripe ena apinana náimahaqueneanahi.

⁹ Tacahe, te tichavanapa tiúcupaicanavarepa, ema Jesús matuparacavaca éna. Ánipa maicha:

—Vuíchaha ecumetajirica eta juca ímahaquenehi puiti. Tiámainucava te néchepuca te nécari núti —macahepa.

¹⁰ Tásiha, nasuapa eta matupararui. Napanerequenehahisera eta macayemaquenehi. Tiyaserejiricacanapa:

—¿Tájahapuca tacayemarihi eta máechepusirayare te máecari? —nacahepa.

¹¹ Te tichavanapa tayehe eta anuquehe mari, nayaserecapa éma, ánipa naicha:

—Ena escribánoana tímítucanahi eta machavirayare tiápechavaya títareca ema víyarahaini Elías, tínapucayarehi eta pímeresíravayarehi píti Cristo. ¿Énapuca téjcapavanahi ena escribánoana? —náichapa.

¹²⁻¹³ Majicapapa ema Jesús:

—Yátupi, ema víyarahaini Elías títecapayarehi, máetupiripanayarehi tamutu. Nútisera numetacahe: Títecaripahi ema Elías, váhisera náimatihini ena escribánoana. Váhivare najacaphahini ena tuparairucana éma. Nacatianacahisera nacapacahi éma, tacuti eta táechajisihaqueneanahi eta Sagrada Escritura eta máíchavaquenevayarehi éma. Ene nucaheyare núti Manerejirunuhi ema Viya. Ticitianacuanayarehivare, tépurunuanyarehi. Ichape eta námecatajichiranuyare eta náimicapasiranuya, tacutihi eta táechajisihaquenehi eta Sagrada Escritura eta nuyehe —máichapa ema Jesús.

Éma Jesús macanaraca ema amaperu mávaháruhi ema éreana

(Mt 17.14-21; Lc 9.37-43)

¹⁴ Tacahe, te tichavanapa éna te návihahi ena apamuriana máimitureana, natiarihihi ena camuriqueneana achaneana te nachacaya. Natiarihihivare ena apamuriana escribánoana, nacanarajiricavacahi ena máimitureana.

¹⁵ Eta náimairahi ema Jesús, náraminehi ena achaneana. Tijunaparacanapa

namutu náechajipanaya. ¹⁶ Te títecapanapa te návihahi ena máimitureana, ema Jesús mayaseremurihapa éna. Ánípa maicha:

—¿Tájaha eta ecanarajiricavacahi ena nani escribánoana? —máichapa.

¹⁷ Tacahe, tiúchujicávanepa ema émana achane. Majicapapa, ánípa maicha:

—Tata maestro, picatajicanu. Námapahi piyehe ema maca nuchichasami.

Éma, vahi téchajica maicha ema éreana. ¹⁸ Mavarahapa jácani ema éreana, máijahúchava máquipaicahi ema nuchicha. Tásiha, ema amaperu ticarisa-sajacapa, tinirataquiahechavapa muraca. Tivirajipa máicha ema éreana, muracaquihavarepa. Nuyaseacahi ena pímitureana eta náimijunairayarehini ema éreana. Váhisera náratahahini —máichapa ema achane.

¹⁹ Tacahe, máichapa ema Jesús:

—¡Tétavicava emasuapajiraiavaca eti achaneana! ¡Cúverarecachasicaini eta nucamichirahénahini! Íáma ani ema amaperu —máichapa.

²⁰ Tacahe, náepanapa ema amaperu. Te máimahapa ema éreana ema Jesús, enurujipa macaeñamaca ema amaperu. Tacahe, tiáquipaicavapa te apaquehe. Téchariripáicavapa ticarisasajacapa. ²¹ Tacahe, mayaserecapa ema Jesús ema maiya ema amaperu. Macahepa:

—¿Tiyereripahipuca eta juca máichavaquenevahi? —macahepa.

Majicapapa ema achane:

²² —Te amuyarichaha. Máejeharipa máquipaica ema mara éreana te yucu téhevare une, taicha mavaraha macapaca éma nuchicha. Pítisera, te píratáhapucaini, pájapanuhavini picatajicahavisamini —macahepa ema achane.

²³ Majicapapa ema Jesús:

—¿Tájaha picayemaquene eta píchanuhi eta te nuratahahipucaini nútí? ¡Pítinapucaini, te píratáha! ¡Pácasañanu! ¡Tamutu títujicacare te ecasiña eti achaneana! —máichapa ema Jesús.

²⁴ Enurujipa majicapa ema achane. Tijaranu eta majicapirahi, ánípa macahe:

—¡Nucasiñavi, tata! ¡Pímícataganu eta néchuriasirahi eta nucasiñairavaina piyehe! —macahepa.

²⁵ Tacahe, máimahapa ema Jesús ena achaneana tiúrujicavanaripa mayehe. Tásiha, macajachapa ema éreana, ánípa maicha:

—¡Piti váinaraji, piti péтуhuquiñarahi, úpahi pícha éma! Núti nuvanecavi: ¡Pijunijicayare ema maca amaperu! ¡Vaipa picuchavaucha ema maca! —máichapa ema Jesús.

²⁶ Tacahe, tipiararecapa ema éreana. Mavayuyujicapa tiyayacare ema amaperu máicha. Tacahe, majunijiacapa ema amaperu. Ema amaperu ticutípa máepenaquene. Tacahe, nacahepa ena achaneana:

—Tépenasamipa —nacahepa.

²⁷ Tacahe, ema Jesús macaratavauchapa, macaechepucapa ema amaperu. Tacahe, titupihapa ema amaperu, tiúripa. Tájina máichava.

²⁸ Tacahe, te táequenepa, náiputsiacapa ema Jesús ena máimitureana. Nayaserecapa:

—¿Tájaha tacayemahi eta vahi váratahahini vicuchuahini ema éreana mayehe ema amaperu? —náichapa.

²⁹ Tacahe, majicapapa éma:

—Ema maca éreana, muracapanahi éma. Eta ecuchusiraina ena nani macutiqueneanahi tavaraha íchanumayare eta eyujarasiraina étapa eta íchiraya eta ayuna —máichapa.

Tiápechavavare ema Jesús tímereuchava eta máepenirayarehi
(Mt 17.22-23; Lc 9.43-45)

³⁰ Tacahe, tiyananavarepa tipaicana. Nánucuhapa eta provincia Galilea. Vahi mávarahahini ema Jesús eta nasamairiricahini ena achaneana eta nánucuirahi éna, machu nahapapiricapucaini eta máimitusiravacahi ena máimitureana. ³¹ Eta máimitusiravacahi, ánipa macahe:

—Nuti Manerejirunuhi ema Viya, járajapainapa eta sáchezare eta máijarasiránuya mácani achane nayehe ena ticatianacuananahi. Ticaratacuananayare, ticapacuananayareva. Téhesera te mapanaquenénapa sache eta népeniraya, néchepucayare —macahepa.

³² Énasera ena máimitureana váhiquene nacaicutiarahini eta macayemaquenehi. Natsirihacapasera nayaserecahini.

¿Nájahapuca ema apóstole ticapicahupana?
(Mt 18.1-5; Lc 9.46-48)

³³ Tacahe, titecapanapa eta te avasare Capernaúm. Te peti náitecapihahi, mayaserecavacapa ena máimitureana. Ánipa macahe:

—¿Tájahapuca eta ejicapaemaracacahi eta epaisirapahi te achene? —macahepa.

³⁴ Tásiha, vahi najicapahini, taicha vahi návarahahini náimereuchavahini eta najicapaemajiricacairapahi eta nájahairayarepuca mácani ticapicahupanahi. ³⁵ Tásiha, téjacapa ema Jesús. Máichuhamuripa ena dócequeneana eta napauchirayare náejaca eta te machacaya. Tacahe, máichavacapa:

—Nácani navarahahi ticapicahupananayare te etaracu, tavaraha náechapajiricavaca namutu ena nachamuriana. Nacachuricayare eta náemunaraivahi nayehe ena apamuriana —máichavacapa.

³⁶ Tacahe, máichuhapa ema émana amaperuchicha. Majupacapa te nami-
rahu éna. Tacahe, máichavacapa:

³⁷ —Nácani tijacapanayare ena amaperuana níchavenénahi núti, ena nani yátupi náimerecaya eta náemunasiranuhi núti taicha tímicitijiricavahi nútinhini najacapa. Taicha nácani tijacapanuanahi núti, énerichuyareva tacahehi eta najacapirahi ema Ticachichanu, ema tivanecanuhi —máichapa.

Tímicatacavahanahi nácani vahi ticatianacaviana
(Lc 9.49-50; Mt 10.42)

³⁸ Tacahe, ema Juan mametacapa, ánipa máicha:

—Tata maestro, vímahahi ema émana achane máquijicavacahi ena éreanana te píjare ticutirinehi pítinahini píjaraca eta máitupajijiasiravahi. Tásihasera vicavacahi éma, taicha vahi víúmurvainahini —máichapa ema Juan.

³⁹ Émasera ema Jesús máichapa:

—Vahi ecucavaca éma. Taicha te máichahipuca ema mácani eta tiáramicare, mámapicahi eta níjare, vahi macaecahinuhini. ⁴⁰ Tímicatacavahanahi nácani vahi ticatianacavahanahi. ⁴¹ Jéhesare, nácani ticumpirachaheana eta une éti étaripa táichavenera eta étirahi nuchaneranairahahi nuti Cristo, vahi námapurujimahi. Yátupihí ticavachaequeneanayarehi éna —macahepa.

Ichape eta máicuñayare mácani tímiaquipaica te pecatu ena amaperuana

⁴² Tímiyanava eta máimituresirahi ema Jesús, ánipa macahe:

—Tacutiquene mácani tímiáquipaicaya nácani ena téhicanuanahi mánsuque-
neanahi. Tiúripanahipucaini táijahúchavahini máepenahini mativainahini

éma. Váhirichupucaini macucaicuñahini, taicha vahi macuimiauquipaichahini ena téhicanuanahi —macahepa.

Ecunevaicha ichape, machu náepujuquichahe eta te yucu máemahacacaquene (Mt 18.6-9; Lc 17.1-2)

43-48 Énerichuvare máichavacapa:

—Jéhevare, te tavarahapuca táimipeaturachaheyare eta evahu, tapamisi-rahénapapuca íchayare eta tauriqueneana, tiúripa eyuchatica, apaesa vahi tacuimiáquipaicahe tayehe eta pecatu. Étaripa eta ívape, te tavarahapuca támahe íchayare eta tauriqueneana, tiúripa eyuchaticavare, apaesa vahi tacuimiáquipaicahe tayehe eta pecatu. Étaripavare eta iúquiha, te táimiaquipaicahepuca tayehe eta pecatu, tavarairahi táimahayare eta tauriqueneana tájiparacana, tiúripa evectuauquichava. Taicha tiúripa eta ejacapacarehi éti eta esiapiraina eta te mávasa ema Viya, tayanapane táejiacavapuca eta iáquehe. Páurehesamisera éti, te náepujuquichahepuca eta te yucu infierno, tayanapanéni tamutuchahahini eta iáquehe. Taicha ánaqui máemahacacaquenehi eta yucu. Máitavacaca eta ecatajivairanayare. ⁴⁹Tacuti eta vépurarajica eta icheve eta viniru, ene nacaheyare ena tiyana te yucu, ticaepuraracasianayare tayehe eta yucu.

Vahi ecuisapa táepaha eta ecamunucarevahi (Mt 5.13; Lc 14.34-35)

⁵⁰Eta icheve, tétavicavahi eta táurivahi, taicha ticamunucarehi. Ene ecaheyare éti eta ecamunucarevahi eta nayehé ena achaneana. Váhi tacuepaha eta ecamunucareva. Vahi ecucuti eta tajachira eta icheve, taicha tájina eta táichevainahini. Tacuijavare tahapapicahe eta iúrivahi —máichapa ema Jesús.

10

Ema Jesús tímíturacahi, máechajisihahi mácani achane tínajicahi esu mayena (Mt 19.1-12; Lc 16.18)

¹Tacahe, tiyananavarepa tipaicana te tinapaica te vana. Nánucuhapa eta provincia Judea. Tásiha tiánuecanapa eta te apachara eta cajacure Jordán. Ánaqui tiápechavanavare tiúrujumuriavana ena ichapemuriana achaneana te jácani máitecapihapahi ema Jesús. Tásiha, tímíturacavare éma, taicha tacahehi eta mayeherepihi. ²Tacahe, náitecapauchapa ena apamuriana fariséoana. Natanucahi eta ticaviureyarehi ema Jesús. Ánipa náicha:

—Vivaraha pimetacahavi ¿te táuricapuca máinajica ema achane esu mayena?

³Tásiha, ema Jesús mayaserecavarepa ema apana:

—¿Tájahasica eta tacayema eta mavanairipi ema víyarahaini Moisés? — máichapa.

⁴Najicapapa éna:

—Ema víyarahaini Moisés máisapahi ema suima máejerare eta máinajisira esu mayena. Macavanairipiser májucha eta ajureca tayehe eta náinajicacaira. Tásiha, eta májjarasirahi ésu eta juca ajureca, máinajica ésu. Tásiha, vaipa mayenainahini —nacahepa ena fariséoana.

⁵Tacahe, ema Jesús máichavacapa éna:

—Ena iáchucanaveanaini, te jácani eta nasemairahi, náinajica ena nayenana. Ema víyarahaini Moisés máisapahi tínajicacana táichavenehi eta

namuracasamurevanahi éna, vahi náimitucacarehini táicha. ⁶ Váhisera máuricahini ema Viya eta náinajicacahini. Taicha te tépanavainapa acane, ema Viya májaracahi ema achane ésunayareichuhi esu mayenayare. Esu esena émanayareichuvere ema suímayarehi. ⁷⁻⁸ Ani tacahe eta mavanairipi ema Viya: “Mácani amaperu achane ésupa esu mayenayare, te ticaimanapa, tatuparacavacahi típutscavanayarehi eta napanana ena ticachichana. Énajivainapa titáticacanayare. Eta navehacacairahi, tímicutijiricavaipa étanarinehi eta náqueheana” tacahepa. Éna, tímicutijiricavainapa émanainarichuhini te peti. Étanarichu eta napanereruana. Vaipa táisapacarehini eta náinajicacairahini. ⁹ Eta tacahe, mácani máinajicahi esu mayena, éma máepuruhi eta juca mavanairipi ema Viya —máichavacapa.

¹⁰ Te táequenepa, nacarichuipahivare ena tayehe eta peti náitecapihahi, ena máimitureana nayaserecapa ema Jesús tayehe eta juca máéchajirivanahi. ¹¹ Tacahe, máichavacapa éna:

—Te máinajicapuca esu mayena mácani achane, eta maviraya esu apana esena, ticapecaturaipa éma me Viya. Ichapevare eta máejecapiravahi suyehe. ¹² Tacutiquene súcani esena, te suínajicapuca ema suima, eta suviraya ema apana achane, ticapecaturaipavare ichape ésu —máichavacapa.

Éma Jesús mayujaraucha ena amuyana
(Mt 19.13-15; Lc 18.15-17)

¹³ Tacahe, ena achaneana námavacapaipahi ena amuyana eta mayehe ema Jesús. Navarahahi máemamahacavacayarehi éna, mayujarauchavachivaréni. Énasera ena máimitureana vahi náisapahini. Nacaichepaicapa ena tíamanapahi ena amuyana. ¹⁴ Te máimahapa ema Jesús eta nacaichepaisirahi, tisemapa. Tásiha, máichavacapa ena máimitureana:

—Ésamiricachucha ena amuyana, náitecaichaha eta nuyehe. Vahi ecucaichepaica éna. Taicha ena nuchanerana nuti Cristo nacutiyarehi ena nani amuyana eta nasuapajiraiva éna. ¹⁵ Nutupiruva numetacahe: Nácani vahi nácutihini ena amuyana eta nasuapajiraiva, vahi nuchaneranimahi —macahepa.

¹⁶ Tacahe, majupacavacapa ena amuyana. Máemamasicavarepa, mayujarauchavacapa.

Éma achane rico téchajiricava mayehe ema Jesús
(Mt 19.16-30; Lc 18.18-30)

¹⁷ Tiuri, te apanapa sache, tiyananavarepa. Eta napaisirapahi, macahepaipa ema émana achane. Tijunapaipahi. Matupiru máepuyumiraucha te mamirahu ema Jesús. Mayaserecapa, ániapa maicha:

—Tata maestro, piti piúriquene ¿Tájahapucaini eta nícharacavahini eta nítujisiravaina me Viya máichecuaráquirénahini eta nítaresira? —máichapa.

¹⁸ Éma Jesús majicapapa:

—¿Tájaha tacayema pímijsarechanu “Piti piúriquene”? Mararihi ema Viya. Jéhevare éma, tétavicavahi eta máurivahi. ¹⁹ Téhesera te pivarahapuca pecha eta apana vítaresira, písuapayarehi eta mavanairipiana ema Viya. Píti pímatipa eta júcana: “Váhi picucapareca. Váhivare picuveha esu esena apayena. Váhivare picuamereca. Nacuija pépiyáequeneruina. Váhivare picuvayureca. Pipicauchayareva ena ticachichaviana” —máichapa.

²⁰ Tacahe, majicapapa ema achane:

—Tata, tamutu eta juca vanairipiana nusuapahi nítauchahi eta námape-
ruvahi, puíticha juca ajairairanuipa —macahepa.

²¹ Tacahe, ema Jesús máimmaracapa ema achane, máemunacainehi. Tásiha,
máichapa:

—Jucarichaha eta pítauchaquenyare. Piyana, píjararecaya tamutu eta
pímahaqueneana. Tásiha, píjaracavacapa ena páureana. Jéhevare eta, pijaca-
payare eta pímahaquenyare te anuma, táitsivayare. Te tamutupa eta juca,
pítecavanepa péhicanu —máichapa ema Jesús.

²² Tásiha, témahasamurerinehi ema achane taicha eta macayemaquenehi
ema Jesús. Ichaperinehi eta mapanereresirahi, taicha mavayuchahi eta
macáimahaquenerahi. Macatiequeneharinehi tamutu. Tiyanchucha.

²³ Tacahe, máesenicapa ema Jesús ena máimitureana natiarihiqueneanahi te
machacaya. Tacahe, máichavacapa:

—Yátupiquenehi máitujiana eta nájarasiravainahini eta náhisiranuinahini
ena rícoana eta nasiapirainahini te anuma —máichapa.

²⁴ Ena máimitureana náramine eta nasamirahi eta máechajiriruvana. Tásiha,
mápechavacapa máicha:

—Nuchichanaveana, esamanu. ¡Máitujiquenehi eta nájarasiravainahíni
téhicanuana ena ticasíñanahi eta nacáimahaquenerahi! ²⁵ Eta juca tímicutijiri-
cavahi eta vipera camello, máitujihí tánucuhahini te támicuejehe eta parirapa.
Ene nacahehi ena rícoana —macahepa.

²⁶ Tásiha, náramine ena máimitureana, eta nasamirahi eta juca. Náichapa:

—¡Tétavicavahi eta tamaitujicacarevahi! ¡Nájina títujicavaimahi náuchucu-
hahini!

²⁷ Tacahe, máimmaracavacapa ena máimitureana. Tásiha, máichavacapa:

—Nájina émanaina achane émajivainahíni ticuchucuhava. Émasera ema
Viya, macarichu marataha ticuchucureca. Taicha tájina máemejerachaque-
nénahini ema Viya, tamutu marataha —máichapa.

²⁸ Tacahe, máichapa ema Pedro:

—Vítisera, Tata, vinaquicahi tamutu eta vicayehueneana, vivarairahi
véhicavi —máichapa.

²⁹ Ema Jesús majicapavarepa:

—Nutupiruva numetacahe: Namutu nácani nanaquicahi eta napena,
najunijicahivare ena ticachichana*, ena napanavenaveana, ena nachicha-
naveana; étapa eta nayehe apaquehe, te nanaquicahi táichavenehi eta náhisir-
ranuhi, étapa eta námirayare eta tíurina echajirirucava; ³⁰ tiápajucavainapa
camuripanayare ena napanavenaveanayare ajairana, esenana, énapa ena
náenanaveanayare, énapa ena nachichanaveanayare. Camuripanayareva
eta náitsirijisiravayare. Ticaticacareanayaresera nayehe ena apamuriana
achaneana. Énerichuvare níjaracavacaya eta nápechiravayare títarecana.
Máichecuaraquirenapa eta náuricacarevanayare. ³¹ Maverahesera eti etiari-
hiqueneanahi puiti, váhirichuhi ecapicahuhini. Te jena sáchezare, ichapepa-
nainapa eta ecapicahuiraya. Éna puiti ticapicahuanahi, te táitauchavapa te
jena sáchezare, énapavainapa téquenehanayare —máichavacapa ema Jesús.

* **10:29** Te jácani apanana versiónéana, tatiarihi te juca lista eta táechajiriruva: “ena nayanana”.
Tájinasera nalistanahini te libro antivupanahi. Eta tacahehi, vímatiequeneha vahi manacahini ema
Marcos. Mácani apana achane mavejuchahipuca te Lucas 18.29.

*Emá Jesús tiápechavavare máechajisiha eta máepenirayarehi
(Mt 20.17-19; Lc 18.31-34)*

³² Te apanavarepa sache, tiyananavarepa tipaicana. Nacaijuhepa eta te Jerusalén. Tínapucapaipa emá Jesús te namirahu ena máimitureana. Náramipaipahi éna. Natiarihivare ena tipicanapaipahi. Tacahe, emá Jesús mañajichamuripa macaetavajimurihavarepa ena dóceana apóstoleana. Mametacavacapa eta jácani máicharachavayarehi éna. ³³ Máichapa:

—Ímaha puiti, viyanainapaipa vicaijuheyare eta Jerusalén. Ánaqui nucaijararecasiyare nuti Manerejirunuhi emá Viya. Tícaratacanuanayare ena tuparairucana. Tímicapacanuanayarehi, taicha tíjararecanuanayare nayehe ena suntaruana romanoana. Éna, nájina najapanuquenéna. ³⁴ Tícaecahinuanayare. Tíátutuquichanuanayareva. Téstacanuanayareva. Tásiha, ticapacanuanainapa. Tásihasera, te mapanaquenénapa sache néchepucainapa te nécari —máichavacapa.

Emá Jacobo émapa emá Juan nayaseacapa emá Jesús eta macájupahávachini éna

(Mt 20.20-28)

³⁵ Tacahe, te apanapa sache, témeñahavanapa emá Jesús ena apinana ticaparapecacana emá Jacobo émapa emá Juan. Náichapa:

—Tata maestro, vivaraha picatajicahavihinini eta viyasearuviyare —nacahepa.

³⁶ —¿Tájaha ecamunu? —máichapa emá Jesús.

³⁷ Najicapapa éna:

—Te jena sáchevare te péjacapa te piávacureyare aquenucavirayare, vivaraha picaejacahavihivareni te pichacaya, pijupahahavinahini, véjacaini te pivaure, emá émana te sapa —náichapa.

³⁸ Tacahe, majicapapa emá Jesús:

—Éti, vahi ímati tájahapuca eta nátajivayare nácani nujupahanayare. ¿Eratahayarepuca ecamicha eta íchavaquenevayare ecatajivairayare, te ecutinuyarepuca eta nucamichirayare nútí? ¿Váhivarepuca epicayare ticapacaheana tacuti eta nacapasiránuyare nútí? —máichapa.

³⁹ Ena najicapapa:

—Viratahayare vicamicha. Váhivare vipicaimahi.

Tásiha, máichavacapa:

—Yátupi ichape eta ecatajivairaya, vicuticacaya eta nacapasirahaviyare.

⁴⁰ Étapasera eta nucaejasiraya ena nujupahanayare, vaipa nútímahí necha. Emá Tata Nucaiaquene, émahí tinerejicayarehi éna nujupahanayare —máichapa.

⁴¹ Tacahe, te náechapa ena apamuriana apóstoleana, tise mamajuheanapa nayehe ena apinana. ⁴² Tásiha, máichuhamuripa namutu. Máichavacapa:

—Écharichuhi éti ena aquenucana tayehe eta avasare, muraca eta nacavainairipira. Énaripa ena tuparairucana, tétavicavahi tisuapacareanahi eta nacavacurerahi. ⁴³ Váhísera ecucahe éti nayehe ena echamuriana. Mácani tímerecavahi ticapicahupana, tacamunuhi máitátivacayare ena apamuriana. ⁴⁴ Te etiarivarepuca éti evarahahi ínapuca, tacamunuhi ímerecavayare navanarahayare ena echamuriana. ⁴⁵ Ecutinuyare nuti Manerejirunuhi emá Viya. Vahi étaina tímitecanu nucaitaticasihini. Nútíyarehi nítátíhe éti.

Énerichuvare níjaracavayarehi nímicapacava íchaveneyarehi éti camuriqueneanaya nucuchucureanayare —máichavacapa.

Éma Jesús macaimairirica éma púchuqui ticaijare Bartimeo
(Mt 20.29-34; Lc 18.35-43)

⁴⁶ Tiuri, títecapanapa eta te avasare Jericó. Te apanapa sache tiyananayarepa. Náehicapaipa éna camuriqueneana achaneana. Te achenechacaya, matiarihihi éma achane púchuqui. Ticaijare Bartimeo, machicha éma Timoteo. Téjacahi tiyaseserecahi limosna. ⁴⁷ Te masamapa eta mánuclairapahi éma Jesús Nazareno, tipiaracapa. Ánipa macahe:

—¡Tátachicha Jesús! ¡Pítiqueneripa yátupiquenévi Cristo! ¡Picatajicanupaini pájapanunuini!

⁴⁸ Tacahe, nacavacapa camuriana éna natiarihiqueneanahi. Náichapa:

—Pámatina. Vaipa picupiaraca —náichapa.

Émasera tipiaracaichucha:

—¡Tátachicha Jesús! ¡Pítiqueneripa yátupiquenévi Cristo! ¡Picatajicanupaini pájapanunuini! —macahepa.

⁴⁹ Tacahe, tícheapaica titupihapa éma Jesús. Máichapa:

—Íchuha éma mara.

Tacahe, náichuhapa éma púchuqui. Náichapa:

—¡Pétumechava! Péchepuca, taicha tíchuhavipa éma Jesús —náichapa.

⁵⁰ Éta mananesirahi éma púchuqui, macamiricapa eta máepacuha. Téhepucapa, tiyanapa mapauchahi éma Jesús. ⁵¹ Tacahe, mayaserecapa éma Jesús éma púchuqui. Ánipa máicha:

—¿Tájaha picamunu nuyehe?

Majicapapa éma:

—Tátachicha, nuvaraha picaimairiricanupaini —macahepa éma púchuqui.

⁵² Tacahe, máichapa éma Jesús:

—Tiuri, nuchicha. Táichavenehi eta picasiñairanuhi, pinaracapa puiti. Tiúrinapa eta piyaniraya pipaisiraya —máichapa.

Enurujirinehi tímairirica. Tacahe, máehicapa macachanepaipa éma Jesús eta mapaisirapahi te achene.

11

Títecapapa éma Jesús eta te Jerusalén
(Mt 21.1-11; Lc 19.28-40; Jn 12.12-19)

¹ Tacahe, te apanapa semana tiyananavarepa. Tétavajicanaya tayehe eta avasarechichana ticaijare Betfagé éta eta Betania, te tachacaya eta cerro ticaijarehi Olivoquiji. Tiánehanapa eta te Jerusalén. Ánaqui, éma Jesús mavanecapa éna apinana máimitureana. ² Ánipa máicha:

—Eyanayare éta te jena avasarechicha Betfagé. Te ítecapapa ánaqui, ímahayare ticaitihahi éta burrico. Éta jena sárare mávaequehéchaha. Nájinaichaha ticaperainahi. Evejapuacayare, íáminanuyare éta ani. ³ Te natiarihinapuca náeñama, emetacayare éta nucamunuirahi núti. Vahi táyerémahi vímichavavaneyare —máichavacapa.

⁴ Tacahe, tiyananapa éna vanairucanahi. Jéhesare, nachimapapa éta burrico. Ticaitihahi éta te calle te tapajachacaya éta peti. Tacahe, navejapuacapa. ⁵ Náichapasera éna ticayeheana:

—¿Tájaha tacayema íamayare éta vuyehe burrico?

⁶ Tacahe, najicapapa éna, nametacapa eta máimiturapihi ema Jesús. Tásiha, náisapapa eta námirahi eta burrico. ⁷ Tacahe, te títécapanapa te mávihahi ema Jesús, náepacamaequechapa eta náepacuhana. Tásiha, ticaperapa ema Jesús. ⁸ Tacahe, tiúrujicavanapaipa ena achaneana. Camuriana éna tiácapanahi, náepacapaicapaipa eta namuirihana eta te mayanihayarepahi éma. Ena apamuriana navehapa eta cáchipaca. Nanacavare te achene. ⁹ Ena tinapumirachanapaipahi énapa ena téquenehanapahi, namutu tipiaracanapaipa. Ánipa nacahe:

¹⁰ —¡Yare, Tata! ¡Píti yátupiquenévihí Cristo, réyvihí viyehe! ¡Asulupaya! ¡Vanairucaquenévihí píti me Viya! ¡Ichape eta vicunachiravi píti! ¡Asulupaya me Viya te anuma! ¡Viva ema Viáquenu! ¡Viva! —nacahepa.

¹¹ Tacahehi eta máitecapirahi ema Jesús eta te Jerusalén. Matupirupa tiyanahi te Templo. Te tamutupa máimahahi, tiyanapa tichava te Betania, namutupaichu ena dóceana apóstoleana, taicha cáperehichicharipa.

Ena Jesús májiquiha eta yucuqui ticaijare higo taicha máhiriquirehi (Mt 21.18-19)

¹² Te apanavarepa sache, te yáticarahi, tichavanavare te Jerusalén. Eta najunijisirahi eta Betania, técuhaipahi ema Jesús. ¹³ Eta máimairahi tiyerehi eta étana yucuqui ticaijare higo. Ticainapucavahi ticápácaji. Tacahe, ema Jesús tiyanapa máimahapana te ticahhipuca. Téhesera te máitecapauchapa, máimahainehi tájina táhinahini. Tacarichuhi eta tapacajiana, taicha vúichaha tacahirainahini. ¹⁴ Tacahe, máichapa ema Jesús eta higo:

—¡Piti pépiyainapa eta máhiriquireviyare! —macahepa.

Nasamararacahi ena máimitureana.

Ena Jesús macuchuchujicavaca ena tjararecanahi eta sárareana, cáyureana te tajuhe eta Templo (Mt 21.12-17; Lc 19.45-48; Jn 2.13-22)

¹⁵ Tacahe, te títécapanapa te Jerusalén, tiyananavarepa eta te Templo. Máimaharinehi ema Jesús ena achaneana tjararecanahi eta sárareana, cáyureana. Ena apamuriana tivacharecanahi. Natiarihivare ena títsiriperecarahiana eta taplataneana eta apanapane avasareana. Tásiha, macuchuchujicapa namutu. Máequehepuichinavacapaipa eta namesarana étapa eta nasyana. ¹⁶ Nájinavare máisapaquenénahini eta nánucuhahini eta canchón tayehe eta Templo, námaphini jácani eta nájarareruanahi. ¹⁷ Tásiha, máimitucavacapa ena natiarhiqueneanahi. Ánipa máicha:

—Ena Tata Nucaiquene, ani macahehi eta máechajiriruvahi te Sagrada Escritura: “Eta nupena tacarichu táicuchihi eta nayujarasirareya ena achaneana tiásihana te tamutu avasareana” macahepa. Étiserá eti tiámerahiana ecasiapavapa eta te juca. Emaeperajicapa eta tacapicahuirahi. ¡Eyana iúchucatajái! —máichapa.

¹⁸ Ena ticationacanahi ema Jesús, te nasamairicapa eta juca máechajirivanahi, tisemanapa. Tásiha, natanucapa eta jácani náicharasirayare eta náimicapasirayarehi éma. Taicha napicarinehi éma, taicha náimahahi tétavacavahi eta masuapacarevahi eta nayehe ena achaneana.

¹⁹ Tacahe, te cáperehichicharinehi, tiyanavarepa ema Jesús, tiúchuca eta te Jerusalén.

*Tiájiriquipa eta yucuqui higo**(Mt 21.20-22)*

²⁰ Tacahe, te yáticarahipa, eta nachaviravarepa eta te Jerusalén, náetavicaipahivare eta yucuqui higo. Náimahainehi tiájiriquipahi éta. ²¹ Tacahe, téchavapa ema Pedro eta máechajiriruvanahi ema Jesús cape sache. Tásiha, máichapa:

—¡Pímaha, tata! ¡Tiájiriquipa eta higo eta pévajiriaruhi!

²² Majicapapa ema Jesús:

—Ácasiñava yátupina eta me Viya. ²³ Jéhesare, éti apana esamacareyareva, te yátupina eta écasiñavairaina eta me Viya. Tájina émaitucaimahi. Eratahayareva ecayejeca eta cerro te apachacaya, tájina iávamirahuimahi te esamureana.

²⁴ Tacahe, numetacahe eta juca: Te eyasecapuca ema Viya eta jácani, ecasiñava mayehe. Vahi ecueñamava eta ejacampirayare. Tásiha, tíjaracahéna éma tamutu eta eyasearuanaya. ²⁵ Énerichuvare, eta eyujarasiraina, eperdonacha éti nácani náejecapavaquenehi eta eyehe. Eperdonachavaca apaesa maperdonachahavare eta éjecipiravana ema Tata Ecaiyaquene te anuma. ²⁶ Téhesera vahi eperdonachahi, váhivare típerdonachahemahi eta éjecipiravana ema Tata Ecaiyaquene te anuma —macahepa ema Jesús.

*Nayasereca ema Jesús nájahhipuca tituparacahi éma**(Mt 21.23-27; Lc 20.1-8)*

²⁷ Tiuri, títecapanavarepa eta te Jerusalén. Natupiruvarepa tiyanana te Templo. Te mapairirijuecharipa ema Jesús eta Templo, napauchapa ena ticatianacanahi éma. ²⁸ Nayaserecapa éma, ánipa naicha:

—Píti, vahi vitupararuvinahini víti eta píchirahi eta júcana. ¿Nájahasica tímitucavihi? ¿Nájaha tituparacavianahi eta juca píchaqueneanahi? — náichapa.

²⁹ Tacahe, majicapapa éma:

—Núti apanava nuvaraha nuyaserecahe. Ejicapanuyaresera apaesa numetacahe eta nucatuparahairahi eta níchirahi eta júcana. ³⁰ ¿Nájahapuca tivanecahi ema Juan eta máitesirahi máicachasirisirayare? ¿Émapuca ema Viya tivanecahi, émajivahipuca eta máitesirahi? Ejicapanu —máichavacapa.

³¹ Váhisera náituruequenehahini eta najicapirayarehi. Tiácapaemajiricanapa, ánipa nacahe:

—¿Tájahasica vicayemayare eta vijicapirayare ema maca? Te vémunahacava vicha: “Mavaneruhi ema Viya”, ema macahénapapuca: “Tásiha, ¿váhiyapa esupahini éma?” ³² Váhivare táurica víchahini: “Émajivaichucha eta máitesirahi”. ¿Tájahapuca vicayemayare eta vijicapirayare? —náechajiricacapa.

Nacahehi éna, taicha napicaracahi eta jácani náicharasirahipuca ena apamuriana achaneana, taicha namutuhi náimijachahi ema Juan profetaquenehi yátupiquene mavaneruhi ema Viya. ³³ Tacahe, najicapapa ema Jesús:

—Vahi vecha víti —nacahepa.

Ema Jesús máichavarepa:

—Énerichuvare núti, vahi numetacahemahi nájahapuca ema tituparacanuhi —máichavacapa.

12

*Éma Jesús máimicutichina éna pártirárioana máurirahana
(Mt 21.33-46; Lc 20.9-19)*

¹ Tacahe, tépanavavarepa tímitureca éta juca máimicutichaquenehi. Ánipa macahe:

—Matiarihi éma achane. Camuri éta máévaru uva te máesane, manaruacahivare éta masucure. Máépiyacavarepa éta nacatiareasihayare éta tachi éta uva. Máépiyacavare éta torre, nápanihayare éta najaneasirayare éta máévaru.

Tásiha, máijaracapa éna achaneana, pártirárioanayarehi. Taicha tiyanayarehi éma achane te apana avasare. ² Tacahe, te tiyahapa éta uva, máimivanerecapa éma mamusura mayaseapanavacayarehi éna pártirárioanahi éta tatucachaqueneharehi éma. ³ Énasera éna pártirárioana tismauchavamarichucha. Nacaratacapa náehapa éma vanairucahi. Tichavapa éma, tájina náijaracahini. ⁴ Tacahe, tiápechavavare mavaneca éma apana mamusura. Váhivare nasuapahini éma. Natupisicapa éta te márijahiana, najarasicapa. Náumehavarepa éma vanairucahi. ⁵ Tacahe, éma achane mavanecavarepa éma apana mamusura. Tásiha, éna pártirárioana nacapacapa éma. Vuíchasesa masemahini éma achane. Ticayehehi paciencia. Máimivanerecapa éna apamuriana, camurianapa. Énerichuvare, tiápechavanapa náehavacavarepa. Nacapacavacapa éna apamuriana.

⁶ Tacahe, matiarichahasera éma apana mavaneruyare. Émajacaruvapa máévataca éma machicha máemunaruquenehi. Máimijachaipahi émainahipucaini napicauchahini. ⁷ Énasera éna pártirárioana, te náimahapa éma machicha éma achane, ánipa nacahe: “Émainapapuca ticayeheyare éma maca. Yare, vicapaca éma apanavare, apaesa tánasipa viyehe tamutu. Tájina máícharacahavimahi éma achanenavaji” nacahepa. ⁸ Tacahe, nacaratapaca éma machicha. Nacapacapa éma, náquijicapavarepa éta máquehe te aneca tayehe éta úvaquiji.

⁹ Puiti, nuyaserecaheyare: ¿Tájahapuca máícharacavacayare éma achane ticayehe éta úvaquiji? Jéhesare, vaipa macayehehinehi paciencia. Títecavenéna macapapanavacayarepa éna pártirárioanahi máurirahanahi. Tásiha, máijaracainavarepa éta úvaquiji éna apamuriana pártirárioanayareva.

¹⁰⁻¹¹ Nuvaraha epanerechapaini éta tacayemahi éta Sagrada Escritura, apaesa ácaicutiara éti. Ani tacahehi: “Éna tépiyarecarahiana éta Templo, tasapiha náepuruhi éta mari táicuchihitatumearayare éta peti, taicha vahi náimatihini. Émasera éma Viya macaitcapa éta te táicuchihitatu-parahahi. Tacapicahuquenehi puiti. Táitusiava tétavicavahi éta vicunachirahivíti éma Viya” tacahehi éta Sagrada Escritura. Nuvaraha ecaicutiaraya — máíchavacapa éma Jesús.

¹² Tacahe, éna ticiatianacanahi éma Jesús, éta nasamirahi, tise-manarinehi taicha tímaticavanapa éta énaírahi tayunacavaca éta máimicutichiravacahi. Éta nasamirahi, tise-manarinehi. Navarahapa nacaratacayarehíni. Tipicavanachuchasesa nayehe éna achaneana, nacatiuchahini éma Jesús. Tacahe, najunijiacapa éma, tiyananapa natanuca éta táícharacavaya éta nacaratasiyare éma.

*Navaraha náemejecapavacha éma Jesús tayehe éta impuesto
(Mt 22.15-22; Lc 20.20-26)*

¹³ Tacahe, ena ticatianacanaahi ema Jesús navanecapa ena témejecapaca-chanayare apaesa étainahipucaini taviuchahini ema Jesús. Natiarihi ena tinerejicavanahi ena fariséoana. Natiarihivare ena políticoana. ¹⁴ Te náitecapauchapa, ánipa nacahe:

—Tata maestro, vímatihí eta tatupiruvairahi tiuri eta juca pímiturapianahi. Vahi pipicacaracavanahini eta péchajisihairahi eta náichavaquenevahi nácani achaneana, tayanapanepuca aquenucahi. Taicha pivaraha náehichahini namutu eta táurinaquene achene ticaijuhe me Viya. Vivarahahisera viyaserecaviyare eta pipanereruhi: ¿Táuricahipuca vivachacha eta viyasehana impuesto mayehe ema Presidente Emperador romano? Taicha víti, machane-rahávihi ema Viya, ¿masi? —nacahepa.

¹⁵ Máimativanehisera ema Jesús eta apimiravacahi éna, navarairahi ticaviureyarehi éma. Tásiha, ema máichavacapa:

—¿Tájaha tacayema evaraha ímiaquipaicanu? Nímahaseji, iáminanu étapena eta reale —nacahepa.

¹⁶ Éna náijaracapa eta reale. Tásiha, máichavacapa:

—¿Nájaha ticaijare eta juca? ¿Nájahavare ticavasimahi eta juca mirare eta te juca reale? —máichavacapa.

Éna najicapapa:

—Mayehe ema Presidente Emperador —nacahepa.

¹⁷ Tacahe, máichavarepa:

—Tiuri. Táuricahi íjaraca ema Presidente Emperador eta juca mayeherichuhi éma. Tásiha, íjaracavare ema Viya eta mayeherichuhivare éma —máichavacapa.

Te nasamapa ema Jesús eta majicapiravacahi, náramipa eta máitupajijiasiravahi.

Nayasereca ema Jesús náichararacavayarepuca ena náepenaqueneana eta náechepusirayare

(Mt 22.23-33; Lc 20.27-40)

¹⁸ Nacahepaipavare ena apamuriana achaneana. Saducéoanahi. Ena nani saducéoana, apanahi eta náimiturapiana. Éna, vahi nasuapa eta náechepusirayare ena náepenaqueneana. Tiyananapa náimahapanahi ema Jesús. Ánipa nacahe:

¹⁹ —Tata maestro, ema víyarahaini Moisés manaquicahi eta ajureca máechajiriruvahi eta viyehé: “Te máepenaquenehahipuca ema achane esu mayena, tásiha, nájinahipuca manaquiequeneruvainahini machichainahini, te matiarihhipuca mácani maparapehi, mavehayare esu machine-naequenéni, apaesa émainapuca macachicha eta suyehe, máitsivainahini ema maparapeni”. ²⁰ Tacutiquene te natiarihipuca ena siétequeneana ticaparapejiricacana, te títauchavapa ema náechavimuri. Máepenaquenehapasera esu mayena. Nájinahi machichainahini. ²¹ Tacahe, ema maparape máitauchavare esu machinena. Énerichuwaresera máepenaquenehavare, nájinavare machichainahini. Ema émana maparape máitauchavare ésu. Énerichuware máepenaquenehavare. ²² Namutu ena siétequeneana navehahi ésu, tásihasesa náepenaquenehapaichucha, nájinaquene émanainahini mácachichahini eta suyehe. Te táequenepa, tépenapa esu esenaini. ²³ Tacahe puiti, te apanapapuca eta náitaresirayare ena nani, ¿nájahapuca ena siétequeneana éma

yátupiquenehi suímaquenehi esu esena, taicha ena siétequeneana namutuhi suímanarihi? —náichapa.

²⁴ Tásiha, ema Jesús majicapavacapa:

—Éjecapava éti. ¿Tájaha tacayema vahi evaraha ácaicutiarahini eta táimiturapi eta Sagrada Escritura? Váhivare evarahahini esuapahini eta tamutuirahi marataha ema Viya. ²⁵ Ánaqui te apana náitaresiraya, vaipa nácamunuimahi esu esena. Énaripa ena esenana váipavare nácamunuimahi ema ajaira. Nacutinapa ena ángeleana tiávihanahi te anuma eta vahi náitachacacahini. ²⁶ Éti, váhivarepuca ácaicutiara eta yátupirahi eta vahi táepenahini eta náchanevana ena náepenaqueneana. Váhipuca ácaicutiara eta máechajiriruvana ema Viya májuchaqueneanahi ema víyarahaini Moisés. Te juca Sagrada Escritura, eta te libro ticaijare Éxodo, téchajicapa ema Viya. Ánipa macahe: “Nútira yátupiquenenuhi Viya, macasiñaquenehi ema Abraham, ema Isaác émapa ema Jacobo” macahepa ema Viya. ²⁷ Nutupiruvahi numetacahe: Ema Viya, éma téchahi eta náitaresirana ena téhicanahi, tayanapane tépenanaripapuca. Eta náchanevana, tímyanavanarichucha títareca te mamirahu éma. Éti, ichape eta éjecapiravahi —máichavacapa ema Jesús.

*Eta tisuapacarepanahi te mavanairipiana ema Viya
(Mt 22.34-40)*

²⁸ Tacahe, mactarihihivare ema émana escribáno. Masamararacahi eta nacanarajirisiracacahi. Máimativanepa eta táurivahi eta majicapirahi ema Jesús. Tásihasera, tíjaracavahi mayasereca ema Jesús, ánipa maicha:

—Tata, nuvaraha pimetacanuini ¿tájahapuca eta vanairipi tisuapacarepanahi tayehe eta mavanairipiana ema Viya? —macahepa.

²⁹ Majicapapa ema Jesús:

—Eta máechajiriruva ema Viya te Sagrada Escritura, ani macahehi: “Esama, emutu eti achaneana israelítana. Nuti Viya, nucarichuhi nuti Iáquenu. Nacuija apanaina iáquenuina esiñarajina. ³⁰ Tásiha, yátupina eta émunasiranuina nuti Iáquenu, táunasiraina te esamureana. Yátupina eta ecachanevairanuina nútí. Epanerecha eta nímiturapiana tamutu sácheana, yátiana. Yátupina eta ecaemataneasiranu te tamutu eta ítupajijiasiravana”. ³¹ Jararihivare eta apana táehiruhi eta juca, ánivare tacahe: “Pémunacayare ema piparaepiyahi, tacuti eta pémunasiravahi píti”. Eta juca apinaquene vanairipi, tacachurica eta tasuapacareva tamutu eta apamuriana vanairipiana —macahepa ema Jesús.

³² Tacahe, máichapa ema escribáno:

—Yátupiquene, tata maestro, tétupicavahi eta péchajiriruva. Yátupihí eta macarichuirahi ema Viáquenu, eta nájinairahi apanainahini Viáquenuinahini.

³³ Yátupihivare tavaraha eta vémunasiraina ema Viáquenu, étapa eta viúnasirayare te visamure, étapa eta vipanerechiraina eta máimiturapiana tamutu sácheana, étapa eta vicaemataneasiraina éma te tamutu eta vítupajijiasiravana, étapa eta vémunasiraina ema viparaepiyahi. Jéhesare, eta táuriva eta vémunasirahi táetavichahi eta táuriva eta víjaracasichira eta sárareana eta víjuchaqueneana eta me Viya. Táetavichahivare tayehe eta táuriva tamutu eta apamuriana víamavahuana eta me Viya —máichapa ema escribáno.

³⁴ Ema Jesús máimatiequenehapa eta táuriva eta majicapira ema achane. Tásiha, máichapa:

—Píti piánehi eta píjarasiravaina eta péhisirayare ema Viya —máichapa.

Tacahe, nájinapa nájaracavahini nayaserecahini ema Jesús eta náemejeca-pavachirayarehi éma.

Ena Cristo, yátupihi mámariequenénihi ema rey David, Víyahivare éma (Mt 22.41-46; Lc 20.41-44)

³⁵ Tacahe, ema Jesús tímiyanava tímiturecahi, eta máejasirahi eta te Templo. Ánipa macahe:

—Ena escribánoana, ani tacahehi eta náimiturapiana: “Tiúchucayare ema Cristo, mámariequeneyare ema víyahahini rey David” nacahehi. ³⁶ Yátupihi ema Cristo achanequenehi eta máimahi taicha mámariequenénihi ema víyahahini David. Nuvarahasera epanerechaya eta juca máechajiruvahi ema David te májurehi Salmo, ani macahehi: “Ema Viya máichapa ema Tata Náquenu Cristo: Yare péjaca te nuvaure, eta picuchapihayare eta nucaepuyusiraya te pimirahu ena ticatianacavianahi” macahepa. ³⁷ Ema David, eta máimijarechirahi ema Cristo, “Tata Náquenu”, ¿tájahapuca eta macaye-maqueenehi? Núti németeaca Víyahivare ema Cristo. ¿Tájaha íchahi éti? — máichavacapa.

Ena camuriqueneana achaneana náuricahi eta nasamararaca eta máimiturapiana ema Jesús.

Ena Jesús máimereuchavaca eta náejecapiravana ena escribánoana (Mt 23.1-36; Lc 11.37-54; 20.45-47)

³⁸ Tímiyanavahi eta máimituresirahi ema Jesús, ánipa macahe:

—Échapavayare éti, machu éhica eta nayaherepiana ena escribánoana taicha tétavicavahi eta apimiranairahi éna. Tétavicavahi eta náurisirahi éna tiúmajihána, navarairahi ticunachacareanayarehi nayehe ena achaneana eta nareligioovanahi. Navarahavare ticapicahuanayarehi eta náechajisiraya ena achaneana te jácani nácapajisihapahi éna. ³⁹ Tacutiquene tinerejiurucavana eta táurinaqueneana téjasihacareana, te tiyanana te víuruji-sirarevana. Étaripa te nanisirana, ticaejacavanavare te jácani tiávihanahi eta tiúrinisipana tinicacare. ⁴⁰ Tacutiquene naverejicavare eta nacayehe-queneana ena tépenaimana, nájina najapanuquenéna. Tásiha, tépiyacavanapa religiooanahi, tiúpiemána eta nayujarasira, namavarairahi tácaecherahini eta náichiraqueneanahi eta tauriqueneana. Énasera tiápajucavanahi eta náicuñayayare muraca —macahepa ema Jesús.

Ena sunaquiruva esu máimaru tacachuricahi eta nanaquiruvana ena apamuriana achaneana (Lc 21.1-4)

⁴¹ Eta máejasihahi ema Jesús, mávihahi te tamirahu eta chapamana eta nanacacuirarehi eta plata námavahuana ena achaneana. Máimarraraca ena camuriqueneana eta nanacacuíra eta námavahuana. Natiarihíhi ena rícoana, tinaquicavanapahi eta ichapemuripanavaca. ⁴² Tacahe, títecapapa esu esena suépenaimaquene, páurehi ésu. Sunaquicahi eta apipechichahi eta suplatane, váhirichu tasivachahini. ⁴³ Tásiha, ema Jesús, eta máimairahi eta juca, máichuhamuripa ena máimitureana. Ánipa maicha:

—Ímaha esu suca esena páurechicha. Ácuneucha eta suémunasirahi ema Viya. Jéhesare ésu, tímepanávhahi eta sunaquiruva, sucachuricavacahi namutu ena apamuriana achaneana. Ichaperinehi eta sucunachacarevahi me Viya. ⁴⁴ Taicha namutu éna, tacarichu nanaquicahi eta náemacharajiana

naplataneana. Ésusera esu suca páurehinéni, sunaquicahisera tamutu eta sucayehequenehi. Suítahi eta sunícavachayahéni —máichapa.

13

Emá Jesús máimereucharipa eta táquipaisiravaya eta Templo

(Mt 24.1-2; Lc 21.5-6)

¹ Tacahe, tiyanayahéni emá Jesús, énapa ena máimitureana. Eta náuchusiraya tayehe eta Templo, máichapa emá émana máimiture:

—¡Tata maestro! ¡Pímaha eta juca máriana! ¡Tétavicava eta táichapeval! ¡Tétavicava táurinava eta juca peti! —macahepa.

² Emá Jesús majicapapa:

—Tamapurujiyare eta juca táurinava eta pétisami ímahaquenehi puiti. Nutupiruva numetacahe: Járájayare eta sáchezare ticaquipaicasiyare tamutu eta juca Témposami. Téjanerepaicainapa tamutu eta juca táurinaqueneanahi ímahaqueneanahi puiti —máichapa.

Tatiarihiyare eta ecutiarareanaya te tánehipaicha eta táichecuraya

(Mt 24.3-28; Lc 21.7-24; 17.22-24)

³ Tacahe, tiyananapa eta te cerro ticaijare Olivoquiji, távihahi te apacharahi eta te tatavarapihi te tamirahuhi eta Templo. Te téjacanapa nacarichuhi eta te jena quinta, nayaserecapa eta macayemaquenehi. Matiaríhi emá Pedro, émapa emá Jacobo, émapa emá Juan, émapa emá Andrés. Ánipa náicha:

⁴ —Vivaraha pimetacahavi. ¿Tájamuhupuca eta náimiauipaisirayare eta Témposami? ¿Jararihiyarepuca eta ecutiarareyare te tánehipaicha eta táitauchiravayare eta apana péchajisihaqueanea? —náichapa.

⁵ Tacahe, majicapapa emá Jesús:

—Ecuneuchavaicha yátupina, machu navayuacahe, taicha nárájayare ena tépiyacavanayarepahi tímivasichavanayare nuyehe. ⁶ Nacaheyarepahi éna: “Nútiripa Cristo”. Nasapiha, navayuacayare ena camuriana achaneana.

⁷⁻⁸ Énerichuvare esamairicayare eta táehacacairayare eta ichapequeneana avasareana. Ticanarajiricacainapa eta te avasareana tayerehiqueneana, énerichuvare ticauyayacarenapa guerraina eyehe éti. Váhisera ecuarameca eta esamairirisiraya, taicha ene tacaheyare eta táepaniravayare eta ecutiarareanayare. Vuíchahasera étaimahi eta táichecurayare. Énerichuvare tatiarihiyareva eta ichape tayamurisiránaya eta apaquehe te jácani távihanaya táitupiaruanayare. Tatiarihiyareva eta ichape ecuhamuhuyareva te jácani avasareana. Ichape eta nacatajivairayare ena achaneana. Tamutu eta juca ecutiarareanayare eta táepaniravayare eta nátajivanayare ena achaneana.

⁹ Tásihasea eti nuchaneranahi, ecuneuchavayare, étumechavayare. Taicha natiarihiyare ena ticatianacaheanayare táichavenéni eta éhisiranuhi. Ticaratacaheanainapa, ecayaseserehinapa nayehe ena juéseana. Téstacaheanainapava eta te náurujisirarevana. Tásiha, etiaríhiyare éti tíamaheanaya te namirahu ena aguenucana, téhevere te namirahu ena Presidenteana gobiernonahi, ecavierevayare táichavenéni eta éhisiranuhi. Esapihasera éti, ecamapuravainapa échajisianuyare. ¹⁰ Énerichuvare, éti nuchanerana ecametarairuyareva eta tíurina echajirirucava nayehe ena achaneana tayehe tamutu avasareana te juca apaquehe. Te ítecapapa te tamutu,

tépanavayarehi eta táichecurayare. ¹¹ Tacahe, te jácani nacaratacahe-papuca, námahe te namirahu ena aquenucana, vahi ecueñamava tayehe eta jácani échajichiravayare, ecatiuchiravaya. Échajisihaya eta échajirucavana májararuheyare ema Espiritu Santo te jena sache. Taicha máimahaheinepa. Tíjaracaheyare eta ítusirayare échajica. Vahi étíjivaimahi eta échajisiraya.

¹² Natiarihiyareva nácani achaneana tíjararecanaya ena naparape-queneana, navarairahi námicapaca táichavenénahi eta náhehisanuhi nútí. Natiarihiyareva ena nácani náiyana, navarahayareva nájarareca ena nachichanaveana táichevenehi eta náhehisanuhi nútí. Natiarihiyareva nácani nachichanaveana nacanarainapa ena náiyana, námicapacainapa táichavenehi eta náhehisanuhi nútí. ¹³ Namutuyaréni ena achaneana ticatianacaheanayare táichavenénahi eta éhisanuhi. Téhesera ecamichahi tamutu, ímianavahi eta éhisanuhi te táitavapa tamutu, nútí nuchucuhayare.

¹⁴ Numetacahevaneyare eta apana. Járápáyare eta sache táíñehique-neyare. Tímerecavayare ema achane váinarajiquene. Mavanecayare ena machanerana náechipejisirayare eta tacapicahuquenehi Templo, nacuchucavacayare ena téhicanahi ema Viya. (Nácani navaraha nacaicutiara eta juca, tacamunuhi ticaravahuyare eta májurehi ema víyarahaini profetaini Daniel.) Tásiha te ímahapa eta juca, esamairicapuca, táuricapa etátájipa ejunavane, eti etiarihiqueneanahi te Judea. Ecaijuhayare eta te céroana, étaina eyumurusivaina. ¹⁵ Nácani tiávihanahi te nayehe canchón te nasamairiricapa eta juca téchacarehi, táuricapa najunavane. Vaipa táuricahini nasiapanumahi te napenana, navehahini jácani náeñamaqueneanainihi. ¹⁶ Nácani tachimaruanayare te vamáhi eta téchacarehi, táuricapa vaipa nacuchava tayehe eta avasare, tayanapane náeñamahi eta nayereruvana. ¹⁷ ¡Páureanasami nácani esenana tachimaruanayare nácani ticajarianahipuca, nácani esenana ticachichanahi eta amuya tiájicachaha! ¹⁸ Eta tacahe, eyaseacayare ema Viya tacuija táichejicahé; váhivare tacuchimaracahe eta ichape tiquiva te achene te eyanapapuca ejuna*. ¹⁹ Te jena sácheanayare, tétavicavayare eta nacatajivairayarehi ena achaneana. Tájina tácutimahi eta táíñehivayare eta nacatajivairayare, te táepaniravahi eta máepiyasirahi ema Viya eta juca apaquehe. Te táequenenapa eta tíñehiyare, tájainainapa tácutimahi. ²⁰ Nájina tacaitruimahi eta nacatajivairayarehi ichape. Macaichecavaneyare ema Viya eta masemavahi ema maca achane váinarajiquene, mavarairahi ema Viya macuchucuhavaca ena machanerana manerejiruana, majapanuque-neañavare. Taicha te vahi macucaicheca ema Viya, máitamurihahipucaini macapapajicavaca namutu ena achaneana ema maca achane.

²¹⁻²² Énerichuvare te tánehipaicha eta juca, natiarihinapa ena tivayuarahiana tépiyacavanayare Cristo tímivasichavanainapa nútí. Natiarihivare ena tímicutijiricavanayare profetana mavaneruinahini ema Viya. Áninapa nacaheyare: “Yare, éhicayare ema Cristo. Matiarhipahi te juca vitaracu”. Ena apamuriana ánivare nacaheya: “Náepiyahiraivahi éna. Ema Cristo mávihahi te víáva víti”. Étisera vahi ecusuapavaca. Eta navarairahi tivayua-caheanaya eti machanerana ema Tata, náituruequenehayare naicha eta ichapequeneana tiáramicareana ecutiarareanayare. Camuriasamiyare

* **13:18** Ema Jesús máechajisihahi eta ticasarahimuhu, tiquivamuhivare te jena mávasa Judea taicha ticajeraequenehi eta napaisirahi.

ena navayuaruanayare. ²³ Tásiha, ecuneuchavaya nayehe. Numetacahevanehi puiti apaesa écharipa —máichapa.

*Eta machavirayare ema Manerejiruhi ema Viya
(Mt 24.29-35, 42-44; Lc 21.25-36)*

²⁴ Máichavarepa ema Jesús:

—Te jena sácheanayare te táequenénapa eta jena nacatajivairayare ichape ena achaneana, eta sache témahainapa, étaripa eta caje váipavare tijarahimahi. ²⁵ Témiricanainavarepa eta jarairiquiana. Étaripa eta tiávihanahi te anuma vimaimahaqueneanahi, énerichuvare tiyamuricanainapa, tiyejejecavanainapa. ²⁶ Nupaenumavainapa níteca nuchava núti Manerejirunuhi ema Viya. Namutu tímahanuanayare eta núcupaisirayare. Tiámanuinapaipa eta úcaji. Tétavicavayare eta nujaraivayarepahi, nífehinaipa. ²⁷ Tacahe, nuanecainapa ena ángeleana nacurujicayare namutu ena nuchanerana nunerejiruanahi, tiásihanayare te tamutu eta juca apaquehe te jácani návihahi.

²⁸ Tiuri puiti, nuvaraha nímicutichinahe eta jácani yucuqui. Eta táitsivachiravavacapa eta tapacajiana, te ímahapa eta tajimuyairapa eta tatavaquí, tiúchucayarepa eta tapacajianaya arairu, tímaticarehi tiánehiripa eta únemuhirayarepa. ²⁹ Ene tacahehi, te ímahayarepa tacacherapa eta júcana ecutiarareana, ímahayarepa eta tánehirainapa eta nuchavira. ³⁰ Numetacahenecha: Vuíchaha títavanimahi ena achaneana náitareruanaiçaha te táitecapapa eta júcana ecutiarareanayare. ³¹ Títavainapa eta anuma étapa eta apaquehe. Tativayaresera títauchava tamutu eta numetaruheanahi.

³² Eta juca tíamamicareyarechucha. Nájina téchaimahi tájamuhuyarepuca eta táitauchiravayare, énaripa ena ángeleana vahi náechahini. Nútivanerécahipucaini néchahini. Macarichu ema Tata, éma téchahi.

³³ Eta tacahe, etsecavahi ecaunehivare éti, eyujarauchavayareva. Taicha vahi echa eta tájamuhuyarepuca eta nítesirayarepa. ³⁴⁻³⁶ Tamutu eta juca nímicutichinahe eta máichaquenehi ema mácani achane eta te tiyanayare tipairirica. Te tiyanayarépa, máijaracavaca namutu ena mamusurana eta náemataneana, matuparacavacapa eta najaneasirayarehi tamutu. Tacahe, matuparacavarepa ema tijanearecarahi eta tapaja, macuneyarehi eta jácani hora machavira ema máquenu, téhepuca timapicucuhipa, téhepuca enumuhu yati, téhepuca tijararahiyarepa, téhepuca yáticarahi. Ene ecaheyare éti. Ecauneya machu níjahúchava nítecapauchahe, machu nuchimaracahe ímacacaruhi. Taicha vahi échaimahi tájamuhupuca nítecapayare nuti Iáquenu. ³⁷ Eta juca numetaruheanahi puiti, nuvaraha emetacayarevare ena echamuriana, apaesa ecauneyare emutu —máichapa ema Jesús.

14

*Napanerechahipi ena tuparairucana eta nacaratasirayare ema Jesús
(Mt 26.1-5; Lc 22.1-2; Jn 11.45-53)*

¹ Tacahe, apinarinecha sache eta piesta ticaijare Pascua, eta náepanavaira eta semana eta nanisirahi étachucha pan mayehere levadura. Tacahe, ena tuparairucana énapa ena escribánoana navarahaipaicha náimicapaca ema Jesús. Tásiha natanucahi eta táicharacavaya eta nacaratasirayare. Váhisera navaraha eta nanecapahini ena achaneana. ² Ánipa nacahe:

—Vuíchaha vicucarataca éma achichu juca piéstairaya. Taicha camuriana-yarehi ena achaneana, machu tájahapuca náicharachavi taicha navaraha-yarehi nacatiucha éma. Vicuchapa nayananuma —nacahepa.

*Esu esena tíamasichahi ema Jesús te tájiyemaquene perfume
(Mt 26.6-13; Jn 12.1-8)*

³ Tacahe, ema Jesús tiyanapa tichava eta te avasarechicha Betania. Máichuhaquenehi eta mananisiraya mayehe ema achane ticaijare Simón ema leprosoinihi. Tacahe, eta manisirahi, sucahepaipahi esu ésuna esena. Suámaphi eta perfume te bótechicha. Ticaijare nardo eta juca tíjiyema amairiama. Táetaviuchahi eta tasivachavahi. Supauchapa ema Jesús. Suvechujihapa eta bótechicha, tásiha, suépusasicapa eta tájiyemaquene perfume. ⁴ Natiarihiserá ena váhiquene náuricahini eta suémepuresirahi eta tasivachaquene perfume, suámasicirahi ema Jesús. Ánipa nacahe:

⁵ —¿Tájaha tacayema suémepureca eta juca tasivachaquenehi perfume? Tiúripanahini víjararechahini eta juca tájiyemaquenehi. Vivehahini eta camuriquene plata, tásiha, vímicatasihahini ena páureana. ¡Máechemairarahahi esu suca esena! —nacahepa.

⁶ Émasera ema Jesús máuricapa eta suíchaquenehi. Ánipa máicha:

—Ésamirica esu suca esena. ¿Tájaha tacayema ecaecahihi éti esu suca? Tétavicava eta táuriva eta suíchiranuhi. ⁷ Ena páureanasami, támutuchucha sácheana eta echaneravacayare éna. Te jácani ávarahapapuca ímicata-cayare, nararihi ena ticamunuana. Nútisera vahi nánasiquenémahi eta eyehe. ⁸ Esu suca suíchahi eta suímirataharuvahi. Eta juca suépusahasiranuhi eta juca perfume. Sucainapucahi ésu eta suíjyechirahi eta náquehe tayehe-yarehi eta nucaecarasirayare. ⁹ Nutupiruva numetacahe: Nácani ticame-tarairuanayare eta tiúrina echajirucava, náechajisihayarevare eta juca suíchaquenehi esu suca esena. Témechanayare suyehe te tamutu avasareana te juca apaquehe —macahepa.

*Eta máijararesirahi ema Júlasí ema Jesús
(Mt 26.14-16; Lc 22.3-6)*

¹⁰ Tacahe, tiyanapa ema Júlasí, émarichuhi nachamuri ena dócequeneana apóstoleana. Mapauchapa ena tuparairucana, téchajiripanava eta máijararesirayare ema Jesús eta nayehe. ¹¹ Tacahe, tiúrisamureanarine ichape eta nasamirahi eta mavarairahi máijararecayare ema Jesús. Tásiha, nametacapa eta náijarasirayarehi eta plata. Tásiha, jéhevarepa ema Júlasí matanucaipa eta máicharachayarehi eta máimicarasirayarehi ema Jesús.

*Ema Jesús máenimurihapa ena máimitureana
(Mt 26.17-29; Lc 22.7-13; Jn 13.21-30)*

¹² Tacahe, títecapapa eta piesta Pascua, te tépanavahi eta semanahi nancahi eta pan mayehere levadura. Étarichuhi eta sáche nacapasihahi eta uvesachicha naniruyarehi te yátipa. Ena máimitureana nayaserecapa ema Jesús:

—¿Táviha pivarahahi vácaijuhe eta vétupirisiava eta vinisirayare eta uvesachicha eta viyeherepi? —nacahepa.

¹³ Tacahe, mavanecapa ena apinana máimitureana. Máíchavacapa:

—Eyana tayehe eta Jerusalén. Te ítecapayarepa tayehe, iácapajicayare ema émana achane tíamaphi eta une te yupí. Éhicayare éma. ¹⁴ Eta te peti

masiapihayare, éti apana esiapayareva. Tásiha, emetacayare ema ticayehe eta peti, ani íchayare: “Ema viyehe Maestro tivanecahavihi viyaserepanavi pímechahavi eta cuarto vinisihayare eta uvesachicha eta viyeherepi, vicachaneyare éma” íchayare. ¹⁵ Tásiha, éma tímechahénapa eta ichape cuarto te anuquehe piso. Táuriquenéipahi eta jácara téjasihacareana, tacaetupirihique-neripa. Tásiha, étupiricapa eta viniruyare eta ánaqui —máichapa ema Jesús.

¹⁶ Tacahe, tiyananapa nacaijuhe te Jerusalén ena apinana vanairucana. Jéhesareinehi náimahapa étapaichuhi eta macayemaqueneanahi ema Jesús. Tacahe, náetupiricapa eta naniruyare tayehe eta Pascua.

¹⁷ Tacahe, te yátipa títecapapa ema Jesús macachanepaipa ena apamuriana apóstoleana. ¹⁸ Eta náejasiraripahi tinicanaripa, máichamuripa éna ema Jesús: —Jéhesareinehi, te etaracu éti, mararihi ema émana tíjararecanuyare, émarichu tinicahi nucachanehi —máichapa.

¹⁹ Tacahe, ichaperinehi eta máimipaneresiravacahi éna eta juca máichiravacahi. Nayaserecapa ena émanapachu, ánipa náicha:

—¿Nútichupuca jácani? —macahepa ema émana.

—¿Nútichupuca? —macahevarepa ema apana.

²⁰ Tacahe, majicapapa ema Jesús:

—Ema émana te etaracu eti dócequeneana. Mácani néniruyare eta pan néchipejiruhi te juca nucuruja, émara ema tíjararecanuyare. ²¹ Nuti Manerejirunuhi ema Viya, étapaichuhi eta nacapasiranuyarehi, títauchavayarehi eta nuyehe eta táechajiriruvahi eta Sagrada Escritura. ¡Páuresamisera ema tíjararecanuyare! ¡Muracayare eta máicuñayare! ¡Tiúripañaichuhini te vahi macuchucahini te sujuhe esu máena! —macahepa.

Ema Jesús máimereuchahi eta macaejasiraya eta arairu matratune ema Maiya

(Mt 26.26-29; Lc 22.14-20; 1 Co 11.23-26)

²² Tacahe, eta nanisirahi, mavehapa eta pan ema Jesús. Mahasulupayachapa ema Viya. Mayuvetucapa máijaracavacapa ena máimitureana. Tacahe, máichavacapa:

—Eta juca néche. Enica —macahepa.

²³ Tacahe, mavehavarepa eta vasu náerirare, mahasulupayachavarepa ema Viya. Tásiha, máijaracavarepa ena máimitureana. ²⁴ Te náerapaipahi, máichavacapa:

—Eta juca eta nítine. Éta táepusairuvayare étarichuvare táicutiarayare eta nufirmachiraheyare eta arairu matratune ema Vicaiyaquene, nucaejasirayareva eta matratune apaesa ejacapacare mayehe, ichapemurivayarepahi éti. ²⁵ Jéhesarénehisera, numetacahe: Vaipa nápechaváimahi nérahivaréni eta juca tachi eta uva, tiámainucava te táitauchavapa eta nusiapiraya eta nucavacureiraya, nucajupahiraya ema Tata Nucaiyaquene. Te jena sache, níjara-caheya vérainapa eta aramaruama —máichapa.

Ema Jesús máimereucha ema Pedro tépiyacavayare vahi máimati ema Jesús

(Mt 26.30-35; Lc 22.31-34; Jn 13.36-38)

²⁶ Eta náitanesirapa, tijiranapa eta jirasare eta nahasulupayachirahi ema Viya. Te títapiricanapa, tíuchucanapa, nacaijuhepa eta te huerta Getsemaní tiáivihahi eta táemiripaisinehi eta cerro ticaijare Olivoquiji. ²⁷ Eta napaisirapahi, máichavacapa ema Jesús:

—Puiti juca yati ejunijicanuyare emutu éti, taicha epicayare eta náicharasiranuyarehi. Tásiha, títauchavayarehi eta máechajiriruvahi ema Tata eta te Sagrada Escritura: “Nísapayare nacarataca ema Pastor, nacapasirayaresami. Tásiha, tijunaracanainapa eta uvesana macurujiruanainihi” macahepa. ²⁸ Téhesera te néchepucapa te nécari, nínapucainapa nuyanainapa te Galilea. Ánaqui nucuchapiaheya éti —máichapa ema Jesús.

²⁹ Émasera ema Pedro máichapa:

—Tayanapane, Tata, najunijicavipuca ena apamuriana, nútisera vahi nujunijicavimahi —máichapa.

³⁰ Ema Jesús máichavarepa:

—Nutupiruva numetacavi pítisami Pedro: Puiti juca yati, te apíhénapa eta táechajisirayare eta varayu, mapahe eta pépiyasiravayare vahi pímatinu —máichapa.

³¹ Ema Pedro tijaranurusi eta majicapirahi. Ánipa macahe:

—Tayanapanepuca pímicapacanu, váhiquenesera népiyacavaimahi vahi nímativi, váhivare nínajiacavimahi —máichapa.

Étarichuhivare tacahehi eta náechajiriruvahi ena apamuriana máimitureana.

Ema Jesús tiyujaraca te Getsemaní
(Mt 26.36-46; Lc 22.39-46)

³² Tacahe, titecapanapa eta te quinta Getsemaní. Tacahe, máichamuripa ena máimitureana:

—Éjacaichaha eta ani te juca. Ecuchapanuchaha. Núti nuyujarapanayare —máichapa.

³³ Tacahe, mámapa ánaquipana ema Pedro, émapa ema Jacobo, émapa ema Juan. Tépanavapa téñamava eta masamure, taicha muraca eta máichavaque-névayarehi. ³⁴ Tacahe, máichavacapa éna:

—Tétavicava eta táéñamirava muraca eta nusamure. Tavaraha ticapacanu. Ánasichaha ani te juca. Váhisera ecuimaca. Ecuneuchanuhi —máichavacapa.

³⁵⁻³⁶ Tacahe, tipaipanapa ánaquipanachichahi éma. Tiáqui paicavapa eta te apaquehe. Eta mayujarasirahi, ánipa macahe:

—Tátachicha Nucaiyaquene, píti pirataha tamutu. Picatajicanupaini. Váhini tacuitauchavaini eta níchavaquenevayare. Váhini picuisapaini eta nucatajivairaya. Níjaracavasera núti eta nítauchiraya eta pívarahaquenehi píti —macahepa.

³⁷ Tásiha, téchepucapa. Tichavapa eta te návihahi ena máimitureana. Máimaharinehi éna, tímacanarichucha. Máichapa ema Pedro:

—Píti Simón, ¿pímacarichucha? ¿Tájaha tacayema pímacahi? Váiparinehi pímicatcanuhini pijaneacanhini étanainahipucaini hora pácahehinehi.

³⁸ Éjamiuchava. Eyujarauchava apaesaina. Eyaseaca ema Viya eta etumevaina apaesa vahi macuiturucahe ema Satanás. Yátupihinéni eta íáchanevana taratahahi ticaratacava. Étasera eta éche máteji, vahi taratahaimahi ticaratacava —máichapa.

³⁹ Tacahe, tíáechavavarepa tiyana tiyujaraca. Eta mayujarasirahi, étarichuva eta máechajiriruvanahi. ⁴⁰ Tásiha, tichavavanepa eta te návihahi ena máimitureana. Máimahavarepa tímacanaripavare, taicha muracaripa eta náechapune. Tájinavare nacayemahini táichavenehi eta natsirirahi. Tacahe,

tiyanavarepa tiyujarapana. ⁴¹ Te mapahequenepa eta mayujarasirahi, tichavapa. Máichavacapa:

—¿Iápechavaipava ímaca? ¿Vuíchahapuca enarahacaquenénahini? ¡Tarat-apa! Jéhesare, puiti títicapapa eta nutuparahahi nacaratasiranuyare ena ticitianacananahi. ⁴² Ávane ema títjararecanuyare. Échepuca. Viyana viácapavaca —máichavacapa.

Nacaratacapa ema Jesús

(Mt 26.47-56; Lc 22.47-53; Jn 18.2-11)

⁴³ Téchajiricavaichaha ema Jesús, macahepainecha ema Júlasí. Mámamurihapaipahi ema camuriquenepa suntaruana. Ticaepuchiriquianapaipahi, étapa eta nayeheana espada. Éna, vanairucanahi nayehe ena ticitianacananahi ema Jesús. ⁴⁴ Ema Júlasí, tatiarihihi eta máicutiaryarehi eta náimatirayarehi ena suntaruana ema Jesús. Ani tacahehi eta máechajiriruvahi ema Júlasí:

—Ecunenuyare. Ema nétsereruyare, éma ecaratacaya. Machu ecaitica, muraca eta ecaratasiraina —máichavacapa.

⁴⁵ Te títicapapana, mapauchapa ema Júlasí ema Jesús. Máichapa:

—Yátiheipa, tata Maestro —máichapa.

⁴⁶ Tásiha, máetserarecapa. Tacahe, ena suntaruana enevanepa nacaratacahi. ⁴⁷ Tacahe, ema émana apóstole, eta máimaira nacaratasirahi ema Jesús, mavehapa eta mayehe espada. Máquijica eta machaca ema mamusura ema aquenuca Caifás. ⁴⁸ Émasera ema Jesús máichavacapa ena suntaruana:

—¿Tájaha tacayema ecasiña eta espada, ecaepuchiriquipaipahivare eta ecaratasiranuyare, tímicutijiricavapa námerahihini núti? ⁴⁹ Étayapásica cape juca tamutuhí sácheana nucachanehehi nímitucahehi tayehe eta Templo. Váhivare epatsicavahini ecaratacanuhini. Tacahehisera éta, títauchavayarehi tamutu eta téchajiriruvana eta Sagrada Escritura —máichavacapa.

⁵⁰ Tacahe, tijunaracanapa namutu ena apóstoleana nanaquicapa ema Jesús. ⁵¹ Matiarihivare ema émana amaperu achane. Téchicapahi. Ticaepacuhapahi eta te sávana. Tacahe, nacaratacavarepa éma apana. ⁵² Tijunahisera manaquicapa eta máepacuhainihi sávana. Tiyanapa mamuriarepaipa.

Nacatupihapa ema Jesús te namirahu ena aquenucarahana

(Mt 26.57-68; Lc 22.54-55, 63-71; Jn 18.12-14, 19-24)

⁵³⁻⁵⁵ Tacahe, nacaitecapapa ema Jesús te mapena ema corregidor. Ema Pedro, máehiequenehapahi éna, mayererehipahisera. Títujicavapa tisiapa eta te canchón tayehe eta mapena ema corregidor. Tásiha, téjacapa macachanemuripa ena suntaruana, tiásacavahi eta te yucu. Váhiserá náimatihini éma. Tacahe, tíurujicavanapa namutuyaréni ena apamuriana tuparairucana énapa ena aquenucarahana énapa ena escribánoana. Napanerechaipa, natanuicaripa eta ticaviureyarehi ema Jesús. Náichuhapa ena tépiyaequenehanayarehi eta matapiravayarehi náicha, navarairahi náimicapacayarehi éma. Váhiserá náichimavahini eta maviurevainahini. ⁵⁶ Camurianahinéni ena tépiyaequenehanahi éma, váhisera tácticacahini eta nacayemaquenehanahi.

⁵⁷ Titupihanavarepa ena apamuriana tépiyahirahianayarehi. Ánipa macahe ema émana eta máepiyahiraivahi:

⁵⁸ —Núti nusamahi ani macahehi ema maca: “Núti nuvetataicayare eta juca Templo náepiyaruhi ena achaneana. Tásiha, te mapánaquenehána sache, nímiclavayare nacatupihá eta apana Templo. Váipasera tácutimahi

eta náepiyaruhi ena achaneana”. Eta juca nusamaquenehi eta máechajiriruvanahi ema Jesús —macahepa ema tépiyahirahi.

⁵⁹ Váhiquenesera tácuticacahini eta máechajiriruvanahi nayehe ena apamuriana.

⁶⁰ Tacahe, ema corregidor téchepucapa eta mayaseresirayarehi ema Jesús. Ánipa maicha:

—¿Tájaha tacayema vahi pijicapavaca ena nani eta pimetauchacasivahi? ¿Yátupipuca eta nacayemaquenehi? Taicha vímahavi eta vahi picatiuchiravainahini —máichapa.

⁶¹ Émasera ema Jesús vahi majicapavacahini. Timatinaichucha. Tásiha, mápechavare mayasereca ema corregidor:

—Nuvaraha pimetacanu. ¿Píti pímiyachavahíjicacha pítihi Cristo ema vicuchapaquenehi, Machicha ema Viya? —máichapa.

⁶² Tacahe, ema Jesús majicapapa:

—Yátupi nuti Cristonu. Nuti Manerejirunuhi ema Viya. Tásiha, numetacahayare eta apana. Járापaya eta sácheyare ímahanuyare eta néjasirayare te mavaure ema Viya máitupajijihauenehi. Ímahanuyareva núti eta núcupaisirayareva, násihayare te anuma, támiranuyarepahi eta úcaji —máichapa.

⁶³⁻⁶⁴ Tacahe, ema corregidor eta masamirahi, tisemarinehi ichape. Tivetsayujicavapa eta mamuirahi eta masemanevahi. Tásiha, macahepa:

—¿Émaquenepa visama ema maca tépiyacavahi Machicha ema Viya! Tétavicaipa eta maviureva taicha macacahíhi ema Viya. Vaipa tácomesa vitanucahini ena testigoanayare. Puiti esamaripa éti eta juca macayemaquenehi. ¿Tájaha vícharacayare puiti ema maca? —macahepa.

Tacahe, namutupa najicapa:

—¡Ticaviurevaipa! ¡Étaina táimicapaca! —nacahepa.

⁶⁵ Tacahe, nátutuáca éma. Náepacauquichavarepa, tásiha, náehamirahavarepa te mamira. Tásiha, náichapa:

—Te yátuphipuca pítihi Cristo, pímatinuyare nájahanupuca nuti néhavíhi. ¡Pimetacahaví! —náichapa.

Énapa ena suntaruana, te námapaipahi, náehavarepa. Ichape eta náichirahi.

*Éma Pedro tépiyacavapa vahi máimati ema Jesús
(Mt 26.69-75; Lc 22.56-62; Jn 18.15-18, 25-29)*

⁶⁶ Tiuri, ema Pedro, matiaríhichahahi eta te canchón. Tacahe, sucahepaipahi esu mavanara ema corregidor. ⁶⁷ Suímahapa ema Pedro, tiásacavahi. Suímararacapa eta mamira. Tásiha, suíchapa:

—Németeaca pítirichu ñichamuri eñi ñica Jesús, eñi nazareno —suíchapa.

⁶⁸ Émasera majicapapa:

—Vahi nímati ema péchajisihaquenehi. ¿Távihapuca pímatinenuhi píti? —máichapa.

Tacahe, tiyanapa éma eta te portón. Téchajicavanepa eta varayu.

⁶⁹ Suímahavarepa tíápechava esu esena. Sumetacavacapa ena natiaríhiqueneanahi, suíchapa:

—Éñi ñica eñi nachamuri ena téhicanahi eñi Jesús —suíchapa.

⁷⁰ Tíápechavavarepa ema Pedro tépiyacava vahi máimatihini ema Jesús. Tacahe, te tayererehachavare, ena natiaríhiquenehi náichapa ema Pedro:

—Yátupiquene pítirichu machamuri ema maena Jesús, taicha eta péchajisira, tímaticarehi eta piásihairahi te Galilea —náichapa.

⁷¹ Tacahe, majicapapa:

—Máicuñacanuine ema Viya, te vahi nucucahe yátupina. Váhiquenesera nímati ema achane échajisihauquenehi —macahepa.

⁷² Enurujipa tiápechava téchajica eta varayu. Tíjahúchavapa téchava ema Pedro eta macayemaquenehi ema Jesús: “Te tamirahuinapaichaha eta apíhequenehá téchajica eta varayu, píti mapahenaripa eta pépiyacavayare vahi pímatinu”. Eta máechavairahi ema Pedro, tépanavapa tíyaha.

15

Námapa ema Jesús te mamirahu ema Pilato

(Mt 27.1-2, 11-14; Lc 23.1-5; Jn 18.28-38)

¹ Te tijarahipa, tiápechavanavarepa tírujicavana namutuyaréni ena aquenucarahana, taicha náichuhaqueneanahi ena tuparairucana, éna escribánoana. Tiyaserejiricanapa tájahapuca eta náichararacayarehi ema Jesús. Tacahe, nacuchucapa ticaitihapaipa eta námirapahi te mamirahu ema Prefecto Poncio Pilato. Eta máimairahi ema Pilato ema Jesús, mavarahapa máimatiyarehi éma. ² Tacahe, mayaserecapa:

—¿Yátupisareji réyvihi píti nayehe ena pijaneanana israelítana? — máichapa.

Ema Jesús majicapapa:

—Pétupicavahi eta juca piyaseresiranuhi. Yátupihí eta nurreyvahi — máichapa.

³ Tásiha, ena tuparairucana nametauchaipa ema Jesús, camuri eta maviurevahi náicha. ⁴ Tacahe, mápechavare mayasereca ema Pilato. Máichapa:

—¿Vahi péchajiuchova eta juca nametauchiravihi? Camuri eta piviuirevahi náicha —máichapa.

⁵ Émasera ema Jesús váhiquene majicapahini. Tásiha, máramipa ema Pilato.

Ema Pilato macavanairipipa eta náetatasiraya ema Jesús

(Mt 27.15-26; Lc 23.13-25; Jn 18.38-19.16)

⁶ Tiuri puiti, tatiarihi eta mayeherepihi ema Pilato te Páscuamuhuana. Macaiticayarehi ema émana preso mácani nayasearuyarehi ena achaneana.

⁷ Tacahe, natiarihihi eta te cárcel ena ajairana ticaeratanahi. Ichape eta naviurevahi ena téhajiricacarahiana te revolución, nacapasirapahi ena achaneana. Te namuri, matiarhihi ema achane ticaijare Barrabás. ⁸ Tásiha, ena achaneana nayasecapa ema Pilato máichahini eta mayeherepi. Ánipa náicha:

—Vivaraha picha eta piyeherepi te Páscuamuhuana —náichapa.

⁹ Tacahe, mayaseremurihapa ema Pilato:

—¿Evarahapuca nucaítica ema eyehe Rey, iáquenumuri eti israelítana? — macahepa ema Pilato. ¹⁰ (Taicha ema Pilato máimaticaripahi eta nametauchirahi ema Jesús ena tuparairucana taicha nacapinaruhi éma.)

¹¹ Énasera ena tuparairucana náimitumuriharipa ena achaneana, eta nayaseasirayarehi émaina máuchucuha ema Barrabás.

¹² Tacahe, ema Pilato mayaseremurihavare. Máichapa:

—¿Tájahasica nícharacayare ema Jesús ema íjarechaquenehi Rey iáquenumuri eti israelítana? —máichamuripa.

13 Éna, tipiaracanapa eta najicapirahi:

—¡Pémetatareca te crusu! —nacahepa.

14 Tásiha, mápechavarepa mayaseremuriha, ániapa máicha:

—¿Tájaha tacayemahi eyaseacahi eta németataresiraya ema maca? ¿Tájahasica eta maviurevahi? —máichapa.

Énasesa tipiaracavare muracapanapa:

—¡Pémetatareca te crusu! —nacahepa.

15 Ema Pilato mavarahahi tiúriyarehi nayehe ena achaneana. Tacahe, mavanecapa ena suntaruana, ániapa maicha:

—Ecaiticaya ema Barrabás. Émasera ema maca Jesús, íamayare, éstacayare. Étatacayareva te crusu —máichavacapa.

*Nacaecahijiricava ema Jesús ena suntaruana
(Mt 27.27-31; Jn 19.1-3)*

16 Tacahe, ena suntaruana námapa ema Jesús tayehe eta náestasihayarehi te távirehi eta guardia. Náimichuhavarepa namutu ena apamuriana suntaruana námurivana. 17 Te náitauchapa eta náestahirahi éma, namuriachapa eta muíriare mularume. Náitsamemacapa eta itapepi eta majarapiyarehi. Nanacapa te machuti. 18-19 Nacavayumarajipa. Náepuyumirauchavarepa, ániapa náicha:

—Tata, ¡pítitataji nayehevihíji Rey ena israelítana! —nacahepa.

Náepuchisicapa eta te machuti tayehe eta curinaqui. Nátutuácavarepa.

20 Tacahe, te títavanapa eta nacaetemajirisirahi, navejamuhiacapa eta mularume. Nanacavarepa eta mamuirihachu. Tásiha, námapa tayehe eta macaetataiyayarehi te crusu. Náetatacapa ema Jesús te crusu

(Mt 27.32-44; Lc 23.26-43; Jn 19.17-27)

21 Eta napaisirapahi te calle, nácapajicapa ema achane ticaijare Simón. Éma, másihapani te máesane. Napamicapa éma manaracuha eta macurusura ema Jesús. (Ema maca Simón, máchusinehi te jena avasare Cirene. Éma, máiyahi ema Alejandro émapa ema Rufo.)

22 Tacahe, nacaitecapapa tayehe eta masihi nacaetatairare ticaijare Gólgota. 23 Ánaquipa náesichinehi ema Jesús eta vino ticasiriquiama eta ipuruji tisucareama ticaijare mirra. Váhisera máerahini. 24 Tacahe, náetatacapa éma te crusu. Ena suntaruana, nasuertehachapa eta mamuirihaini eta náijarajirisiracacayare.

25 Te náetatacapa éma, las nuéveripa eta yáticarahi. 26 Te tápusi eta macurusura, tatiarhihivare eta ajureca táechajisihahi eta tiviuchahi eta máepeni-rayarehi. Ani tacahehi eta ajureca: “Ema Rey nayehe ena israelítana”. 27 Natiarhihivare ena apinana tiámerahiana. Ticaetatanahivare te machacaya, ema émana te mavaure, ema apana te sapa. 28 Tacahe, tamutu títauchavahi eta táechajiriruvana eta Sagrada Escritura, ani tacahe: “Náimijachahi ema nachamurihi ena namauriqueneana”.

29 Tacahe, ena tiánucumirauchanapahi, tépiupiusicavanapaipa eta nacaecahirapaipahi ema Jesús. Ániapa nacahe:

—¡Pítitataji! Picahechajiriruvahi eta piáquipaisirayarehíji eta Templo, piratahahivaréji pímicava picatupihi eta arairu Templo te mapanayarerichuhíji sache. Puiti vivaraha vímaha eta pítipajijiasiravahi. 30 Piúcupaica te jara crusu. ¡Picatiuchava pítipivaina! —náichapa.

³¹ Énerichuvare ena tuparairucana nacaecahijiricavare, énapa ena escribánoana. Náichajiricácapa:

—Ema mácacacha, macahehi eta máechajiriruvahi eta maratashairahíji macatiuchavaca ena apamuriana achaneana. Tásiha, puiti váhivare máratahahini émajivainahini macatiuchavahini eta te jara mávihahi. ³² Te yátupinahini Cristo, Reyinahini viyehe viti israelítana, macatiuchavaipahini, ¿masi? Máucupaicaripahini te jara crusu, ¿masi? Visuapasarepaini eta vímairainahini —nacahepa.

Ena tiámerahiana ticaetatanahivare te machacaya, énerichuvare nacaecahivare éna apanavare.

Eta máepenirahi ema Jesús

(Mt 27.45-56; Lc 23.44-49; Jn 19.28-30)

³³ Tacahe, te las dócequenepa, témahapa eta sache. Timapicupa tamutu eta apaquehe. Mapana hora eta tamapicuirahi. ³⁴ Tásiha, te las trespa sache, tipiaracapa muraca ema Jesús, ánipa macahe:

—Elí, Elí, ¡lama sabactani! —te véchajiriruva, ani tacahe: “¡Tata Nucaiyaquene! ¡Tata Nucaiyaquene! ¡Vahi picujunijicanu!”

³⁵ Tacahe, ena natiarihiqueneanahi ena tisananahi, ánivarepa nacahe:

—Esama. Ema maca achane mapiaracahi ema víyarahaini profeta Elías —nacahepa.

³⁶ Ema apana tianapa tijunapahi máepanapa eta machuchujiruyarehi eta tisisica vino. Máitiacapa te tíuqui curinaqui. Máimicapayacapa eta majaca, machuchujicayarehi. Tacahe, máichapa:

—Ésamiricachucha. Vímahayare te títecapayarepuca macatiuchapana ema Elías —máichapa.

³⁷ Tacahe, tiápechavavarepa tipiaraca muraca ema Jesús. Tépenapa.

³⁸ Tásiha, tíjahúchavapa tétsayumecapa eta cortina tayehe eta Templo. Tépanava te anuquehe, tíchecuha te apaquehe. ³⁹ Tásiha, ema nacapitara ena santaruana romanoana, eta matupihairahi máimararasirahi te mamirahu ema Jesús, masamirahi eta mapiarasirahi, ánipa macahehi:

—Yátupiquenerichuyapa Machicha ema Viya ema maca —macahepa.

⁴⁰ Tacahe, natiarihivare ena esenana. Náimarasirahi, nayererehiserá. Te nataracu, sutiarihíhi esu María Magdalena, esu Salomé, ésupa esu apana María. (Esu suca María, máenahi ema Jacobochicha émapa ema José.) ⁴¹ Ena nani esenana ena náumurivana ena téhicarairicanapahi téchapajiricanapahi ema Jesús eta mapaisirapahi te másihapa te Galilea. Natiarihivare ena camuriana apamuriana esenana náitecapaquenehi te Jerusalén, téhicanapahi éma.

Nacucupaicapa te crusu ema Jesús, náecarayarepa

(Mt 27.57-61; Lc 23.50-56; Jn 19.38-42)

⁴²⁻⁴³ Matiarihivare ema achane ticaijare José*. Ticavasahi te Arimatea te Judea. Éma, tétavicavahi eta mapicauchacarevahi. Masupahi ema Jesús eta émairahi ema Cristo mavaneruhi ema Viya, étaripa eta émairahi

* **15:42-43** Ema maca José, vahi émaina ema maparape ema Jacobo ema táechajisihaquenehi te versículo 40. Váhivare émaina ema José ema suima esu María, máenahi ema Viáquenu Jesucristo. Ema maca José, tatiarihi eta mávacure tayehe eta Cabillo de Jerusalén. Émasera vahi máimicasiapavahini nayehe ena ticatianacanahi ema Jesús. (Pitanuca te libro Lucas 23.51.)

ema téchayarehi namutu ena achaneana. Ema maca José, náumurivahi ena aquenucarahana. Tacahe, te cáperehipa eta jena sáchequenehi, tétumechavapa ema José tiyanapa eta me Pilato, mayaseapanahi eta máquehe ema Jesús, mavarairahi máecarayare. Tacahe, tiyayauchavapa taicha téricayarepahi eta sache. Vahi táisapacarehíni náecararecahíni te yátimuhu, váhivare táisapacarehíni máejamíacahíni te jena sávarumuhu. ⁴⁴ Máramínehi ema Pilato eta máijahúchiravahi tépenavane ema Jesús. Tásiha, máimichuhapa ema nacapítara. Te títécápapa ema nacapítara, mayaserecapa te yátupihípuca tépenarípa ema Jesús. ⁴⁵ Tásiha, eta mametasirahi ema nacapítara eta máepeniraipahi ema Jesús, máisapapa ema Pilato eta máquehe ema Jesús. ⁴⁶ Tacahe, tiyanapa ema José. Mámapa eta tiúrina sávana mavachareruhi. Tásiha, macucupaicapa eta máquehe ema Jesús. Náyuruácapa tayehe eta sávana. Náiyaracuhapa tayehe eta máecari eta te mari nasecajueruhi. Tásiha, najihachapa te tapaja eta máecari eta ticheyame mari tajitacarequene. ⁴⁷ Sutiarihihivare esu María Magdalena ésupa esu apana María†. Náimamaracahi, náimatípa eta nanasihahi eta máquehe ema Jesús.

16

*Eta máechepusira ema Jesús eta te máecari
(Mt 28.1-10; Lc 24.1-12; Jn 20.1-10)*

¹ Tacahe, te jena sache sávaruquenehi, téricaípa eta sache, tiyanapa esu María Magdalena, ésupa esu Salomé, ésupa esu apana María. Tivacharecanapa eta tíjiyequene perfume nayariasihayare eta máquehe ema Jesús. ² Tásiha, te apanapa sache, lumíncuquenehi, nayatírupa tiyanana eta te máecari. Te tiúchucapa eta sache, títécapanapaípa éna eta te máecari. ³ Eta napaisirapahi, tiyaserejiricanapaípa. Ánípa nacahe:

—¿Nájahapapucaini náequehepuichinahavini eta tajiha eta ñécari eñi Viáquenu eta mari tajitacarequene? —nacahepa.

⁴ Te títécapanapa, náimahapa eta máríme tájinaripahi te tapajacura eta máecari. ⁵ Tásiha, tisiapanapa. Ánaquí náimahapa ema émana amaperu achane, mávihahi te vaure. Eta mamuiríha, tétavícava eta tajapuva. Tiáramecanarinehi ena esenana. ⁶ Ema amaperu achane máechajicavacapa:

—Vahi ecupica. Éti etanucapahi ema Jesús Nazareno, ema macaetataqueneníhi. Májinaripahi, taicha ticaechepucasirípa. Yare, ímaha. Júcahi eta mávinehi. ⁷ Tiuri puiti, eyana emetaca ema Pedro, tásiha, namutu ena apamuriana echamuriana. Emetacavaca tiyanayare ema Jesús eta te Galilea. Ánaquí macuchapiaheyare emutu éti. Échavarichuhípuca eta macayemaqueneanahi te achanerichaha —máichavacapa ema ángele.

⁸ Tacahe, tiúchucanapa eta te máecari. Tiyananapa tijunapanapaípa. Tiyayacareanapaípa taicha eta náramirahi. Eta nayanirahi, nájina nametaruínahíni taicha eta napisirahi.

*Tímerecavapa ema Jesús suyehe esu María Magdalena
(Jn 20.11-18)*

⁹ Tiuri, eta máechepusirahi ema Jesús te máecari te jena lumíncuquenehi te yáticarahichícha, sutívapa máimeresiavahi suyehe esu María Magdalena.

† **15:47** Esu suca María, esu táechajisíhaquenehi te versículo 40. (Te pívaraha pecha pítanuca Juan 19.25.)

(Esu suca María, esu máepachiaruhi ena siétequeneana éreanana te suáquehe.)

¹⁰ Tacahe, tiyanapa ésu, sumetapana ena suchamurianahi. Éna, tétavicavahi eta napanereresirahi, tíyahanahi eta nacatisamurevairahi. ¹¹ Váhisera nasuapahini eta sumetarapihi esu María eta máechepusiraipa, machaviraipahi títareca, étapa eta máimeresiravahi eta suyehe.

Tímerecavapa ema Jesús nayehe ena apinana máimitureana

(Lc 24.13-35)

¹² Te táequenepa eta juca, tímerecavavarepa ema Jesús nayehe ena apinana máimitureana eta napaisirapahi, nacaijuheirahi eta avasarechicha te tachacaya eta Jerusalén. Tiápamaichavahisera eta mamira. Vahi náimatívanehini éma. ¹³ Téhesera náimatipa éma, majunijiacavacapa. Tacahe, tichavavaneanapa nametapana ena apamuriana nachamuriana. Váhiquenevaresera nasuapahini ena apinana, eta nametasirahi.

Tímerecava ema Jesús nayehe ena mayeheana apóstoleana

(Lc 24.36; Jn 20.19-21)

¹⁴ Tiuri, te táequenepa, tíurujicavanahi eta nanisirahi ena óncequeneana apóstoleana. Tacahe, tíjahúchavapa tímerecava ema Jesús eta nayehe. Macajachamurivarepa eta namasuapirahi eta nametarapianahi ena tímahanahi éma eta máechepusiraipahi.

Matuparaca ema Jesús ena apóstoleana

(Mt 28.16-20; Lc 24.37-49; Jn 20.22-23)

¹⁵ Tacahe, máichavarepa:

—Eyana epaica te tamutu eta avasareana eta te juca apaquehe. Ecametarairuyare eta tíurina echajirucava nayehe namutu ena achaneana.

¹⁶ Nucuchucuhavacayare namutu ena tisuapajirahianaya, ena ticaicachasianaya. Énasera éna vahi tisuapanaya, ticaicuñanayare taicha tanasirichuhi eta napecaturana.

¹⁷ Ena tisuapajirahiana náimerecayare eta juca tíáramicareana: Náimijunijicayare ena éreanana nayehe ena achaneana, taicha námapicayare eta níjare. Náitucayare téchajicana tayehe eta apanana échajirucavana namaitucaqueneanainihi. ¹⁸ Te nacaratacahipuca eta quichareana, tájina táicharacaimahi. Te téranahipuca eta venéno, tájinavare náichavaimahi. Nanacayare eta navahuana nayehe ena nácani nacajumaqueneana, tásiha, tinaracayare éna —macahepa.

Eta mayapirahi ema Jesús te anuma

(Lc 24.50-53)

¹⁹ Tacahe, te títavapa tamutu eta mametarapianahi ema Viáquenu Jesús, tiyanapa tíyapa te anuma. Ema Viya macaejacapa ema Machicha te mavaure.

²⁰ Tacahe, tiyananapa eta te tamutu avasareana ena máimitureana. Ticametarairuanapaipa eta tíurina echajirucavana. Ichape eta máimicatasiravapahani éma Viáquenu. Tétávicavahi tajacapacarevahi máicha, eta náimiturapiapanahi. Taicha máijaracavacapahi eta náimeresirapahi eta tíáramicareana ticunachacareanahi.

Tamu tupa.

Ema San Lucas májuequenehahi eta máichararacavahi ema Jesucristo, ticajare puiti eta EVANGELIO SEGÚN SAN LUCAS

¹⁻³ Némunaruquene nuparape Teófilo, nucajurevi puiti apaesa pecha píti apanavare eta juca néchaqueneanahi núti. Ichapemurianahi ena vichamuriana tiájuequenehanahi tayehe eta máicharacavahi ema Viáquenu Jesucristo. Tásiha puiti, núti apanavare nájuequenehavare. Nucaejarusinahi tamutu eta nájuequenehairahi, taicha tamutuhi nucayasesereru nayehe ena tinecapaequenehanahi, tímahanahi eta apaicape eta táepaniravahi eta máitaresirahi ema Viáquenu. ⁴ Núti nuvaraha nímimatichavi apaesa yátupina pecha tamutu eta juca piáravahuanahi.

Ema ángele macametarapi eta máuchusirayare ema Juan Tícachasiricarahiyare

⁵ Cape juca viásinequenehi te émarichaha ema Aluresi aquenucahi, réyhi tayehe eta jena provincia Judea, matiarihihivare ema émana achane, ticajare Zacarías. Éma, náumurivanahi ena ticajareana Abías. Eta náematanerepi éna, náechapajirica eta námavahuasana ena achaneana tayehe eta Templo. Esu mayena ema Zacarías ticajaruhi Elisabet, mámariequenehi ésu ema viyarahaini Aarón. ⁶ Ema maca Zacarías ésupa esu mayena, tájina náichiravainahini te mamirahu ema Viya. Tamutuhi náitaucha eta mavanairipiana ema Viáquenu. Tacahe, tájina náechajisiequenehahini nayehe ena achaneana. ⁷ Nájinasera nachichainahini, macheruhi esu Elisabet eta suítaresira. Váipavare ticachichanaimahi taicha ichavicanaripahi.

⁸⁻¹⁰ Te jena sache, náichuhapa ema Zacarías eta masiapirayare tayehe eta Templo te Jerusalén, taicha áñopahi eta masiapirayare. Tacahe, ticátuparácasipa éma. Émapa táetupiacahi eta máematanerepiyarehi máijuchayarehi eta incienso te táinahu eta mesa nájuchirarehi, taicha tacahehi eta nayeherepini ena israelítana. Tacahe, ema Zacarías tisiapapa te tajuhe eta cuarto tacapicahuquenehi, máijuchapa eta incienso. Macarichusera tísapacarehi tisiapa. Ena apamuriana achaneana nanasipa te aneca, tiyujaracanaripa éna. ¹¹ Tiáramicarepa tímerecava ema émana ángele te mamirahu ema Zacarías. Mavaneruhi ema Viáquenu. Titupiharipa ema ángele te vaure tayehe eta mesa nájuchirarehi eta incienso. ¹² Tiáramecarine ema Zacarías eta máimairahi ema ángele. ¹³ Émasera ema ángele máechajicapa:

—Vahi picupica, Zacarías —máichapa—. Ema Viya masamahi eta piyaseserepihi píti eta mayehe. Puiti esu piyena Elisabet ticachichayare. Juan eta máijareyare ema echichayare. ¹⁴ Ichapeyare eta piúrisamurevayare te máuchucapa ema echichayare. Énaripa ena achaneana, ichapeyareva eta náurisamurévaya taicha eta máuchusirayare. ¹⁵ Numetacavi: Ema pichichayare, ichapeyare eta macunachacarevayare mayehe ema Viya. Píti, vahi písapaimahi tera eta vino, étaripa eta apamuriana téracareana muracacuneana. Taicha éma, eta máuchusirayare, mávaháruyarepahi ema Espiritu Santo. ¹⁶ Éma pichichayare, éma tétupiricayare eta táurivayare eta napaneruana ena pijaneanana israelítana, tachavirayare eta nasuapirayare ema Viya. ¹⁷ Ema maca pichichayare, éma tínapumirauchayarepahi ema

Viáquenu. Macutiyaire eta máitupajijiasiravaini ema víyahaini profeta Elías. Ichapeyare eta máitusirayare eta macajimuyasirayare eta nasamureana ena achaneana apaesa tachava eta nasuapiraina ema Viya, tácuti eta nasuapajiravainihi ena náchucanaveanainihi. Énaripa ena váinarajipanereruana, tisuapajirahanayareva máicha. Mametacavacayare ena achaneana natseavaipa eta najacapirayare ema Viáquenu —máichapa ema ángele.

¹⁸ Tásiha, ema Zacarías majicapapa. Ánipa macahehi:

—Párenusami, vaipa numaitacavaimahi nucachichahini, ésuripa esu nuyena. Ichavichavípa víti. Váhicha nusuapapajica eta juca vicachichairayarepuca —máichapa.

¹⁹ Émasera ema ángele máichavarepa:

—Núti nucaijare Gabriel. Núti mavanerunuhi ema Viya. Nutuparacasi-vaichuhi eta numetasiraviyare eta juca ecachichairayare. Piúriháine ichape-nahini eta piúrisamurevainahini. ²⁰ Puítisera úpaviyare. Eta ecutiarareyare piyehe taicha eta pimasuapiranuhi. Tiámáinucava te tátauchavapa eta juca numetaruvíhi, péchajicainavarepa —máichapa ema ángele.

²¹ Tacahe, ena achaneana nanasiqueneanahi te aneca nacuchaparairi-caipaicha ema Zacarías, náramipa eta mayerevaipahicha te tajuhe. ²² Jéhesa-reinehi, te tiúchucapa ema Zacarías, vaipa máechajicahini. Námatiacapasera éna, eta máechajisirahi ema Viya te tajuhe. Tisuveverecapaipahi éma eta mavarairahi máimicutiarachavaca ena achaneana eta yátupirahi masama-quernehi. Úpapaipahi éma.

²³ Tacahe, te títauchavapa tamutu eta jena sácheanahi eta matuparacasi-vahi, tianapa ema Zacarías tayehe eta mapena. Nueve caje eta mayerevayarehi eta mamaechajisirayarehi. ²⁴ Tásiha, esu mayena Elisabet, ticajaripa ésu. Váipasera súchuchurecahini te supena. Váhivare sumetajiricahini. Tiámainucavapa te títauchavayarepa eta cincoquenehi caje eta sucajarirahi. ²⁵ Tétavica-vahi eta súrismurevahi eta susamiravahi ésu. Ánipa sucahe:

—Ichape eta ñijapanuiranuhi eñi Viya, tíjaracanuhi eñi nuchichayare. Váipasare nayunacaimahi ena achaneana eta numacheruvahi —sucahepa.

Éma ángele macametarapi eta máuchusirayare ema Jesús

²⁶ Tacahe, te sáisiquenepa caje, ema Viya mápechavare mavaneca ema ángele Gabriel tiúcupaicha tayehe eta avasare Nazaret, tayehehi provincia eta Galilea. ²⁷ Máucupauchapa esu amaperu esena ticajararu María. Ésu, tájina suímatyahini ema ajaira. Matiarhipasera ema suímayarehi, ema ticajare José. Téjaripahi eta natratune. Ésu, mámariequéneinihi ema víyahaini rey David. ²⁸ Tacahe, ema ángele máucupauchapa ésu tayehe eta suávihahi. Máichapa ésu:

—Pícharacava, María. Piti manerejiruvíhi ema Viya. Tétavica-vahi eta piúricacarevayare taicha ichape eta majapanuiravíhi éma Viya. Picachuricahi namutu ena apamuriana esenana —máichapa.

²⁹ Ésusera tíaramecainehi eta máechajisirahi ema ángele. Supanerequene-hainehi tájahahípuca tacayemahi eta máechajisirahi ema ángele. ³⁰ Émasera ema ángele máichavarepa:

—Vahi picúpica, María. Piti manerejiruvíhi ema Viya. ³¹ Numetapanavíhi puiti eta picajarirayare. Ajairayare ema pichichayare. Jesús eta máijareyare. ³² Tétavicavaya eta napicauchirayare ena achaneana taicha Machichayarehi

ema Viya. Ichapequenyare eta aquenucairyare éma taicha ema Viya manacayareva eta mávacureyare aquenucaiyare. Macutiyarehi eta aquenucairahi ema máchucaini David. ³³ Éma téchayarehi namutu ena pijaneanana israelítana. Máepenacacayare eta aquenucairyare — máichapa ema ángele.

³⁴ Tásiha, esu María, sujicapapa:

—¿Tájahasica táicharacavayare eta juca? Taicha núti nájinaichaha nímainahini —suíchapa.

³⁵ Émasera ema ángele máichavarepa:

—Picachichayare taicha eta máitupajjiasiravahi ema Viya. Timicauchaviyare eta majaraiva, tásiha, tisiapahacavinapa ema Espíritu Santo. Eta tacahe, ema amuya pínaryare, sántoyare éma, taicha machichayarehi ema Viya. Náimatiyare namutu eta machichairahi ema Viya. ³⁶ Picutiyare esu pijaneana Elisabet, énerichuvare ticajaripahi ésu. Tayanapanehi ichavichicharipahinéni ésu, macheruinihinéni. Sáisiripasera caje eta sucajarirahi puiti. ³⁷ Taicha ema Viya, tájinaquene máemáituca éma —máichapa ema ángele.

³⁸ Tacahe, esu María sujicapapa:

—Núti ñivanaranuichuhi eñi Viya. Nutiarahi puiti. Ñímahanuinepa eñi, eta ñicharacanuyare te ñivanairipiana —suíchapa ema ángele.

Tacahe, eta masamirahi ema ángele, tianapa tichavahi.

Esu María suéjirapanapa esu sujaneana Elisabet

³⁹ Tacahe, te jena sácheana titátájipa esu María tiyana tayehe eta avasarechicha te tataracucujianahi eta márijuecu tayehe eta provincia Judea, suávasahi esu sujaneana Elisabet émapa ema Zacarías. ⁴⁰ Te títecapapa esu María tayehe eta napenahi, suéchajicapa esu Elisabet. ⁴¹ Te susamapa esu Elisabet eta suahu esu María suéchajisirahi, tiyamuricainehi eta amuya te sujehe esu Elisabet, enevanepa mávahácahi ésu ema Espíritu Santo. ⁴² Tacahe, téchajicapa muraca esu Elisabet, suíchapa:

—Píti, tétavicavahi eta piúricacarevahi ñicha eñi Viya. Picachurichavahi vimutu viti esenana. Éñiripa eñi pichichayare, tétavicavahivare eta ñicunachacarevaya. ⁴³ Nusapihasamipa núti péjirapananuhi piti ñénaviyarehi eñi Náquenu. ⁴⁴ Te nusamapa eta pياهو eta péchajisiranuhi, tiyamuricainehi te nujuhe eñi nuchicha, taicha eta tíurisamuréinehi eñi. ⁴⁵ Tétavicava eta piúricacarevaya píti taicha eta pisuapajiravahi ñe Viya. Títauchavainapa tamutu eta ñimetarapihi eñi Viáquenu eta piyehe —suahepa esu Elisabet.

⁴⁶ Tacahe, esu María sujicapapa:

—Ichapemurihi te náchaneva eta nucunachirahi eñi Viáquenu. ⁴⁷ Taicha tétavicavapa eta táurisamureva eta nusamure ñicha eñi Viya Ticatiurahiguene eta nuyehe. ⁴⁸ Taicha eñi, vahi ñépurunuhini páurenuhinéni nútisami. Tétavicavahisera eta ñijapanuiranuhi nuti ñivanarahi. Nútipa ñinerejicanuhi, tásiha, ichapenapapuca eta nacapinarunuiraya namutu ena achaneana natiarihiguenehi puiti, énapa ena arajuruanayare. “Tétavicavapa eta súricacarevahi esu María” nacáhénapapuca. ⁴⁹ Tétavicavapa eta ñitupajjiasiravahi eñi Viya, tíjaracanuhi eta núrivayarehi ñicha. Jéhevare eñi, Sántoquenehi eta ñijare. ⁵⁰ Eta tacaheyare eta ñijapanuirahaviyare puiti, énapa namutu ena arajuruanayare, nácani típicauchanayare eñi.

⁵¹ Eñi Viya, ñíjaracayare eñi nuchichaya eta ñítupajijiasiravaya ichape. Tásiha, ñícaerajicavacaya ena ticasíñavavairicana, énapa ena váinarajipanere-ruanahivare. ⁵² Nácani aquenucana nacatianacainapapuca, ñícapaquechavacayahisera éñi. Nasapihapa ena páureanasamihi, ñínerejiruanaya éna, ñíjupahanayare. ⁵³ Yátupiya eta ñíjarasiravacayare eta táetaviuchiraya eta náuricacarevaya namutu ena ticasíñavanayare ñíyehe. Énasa ena tímijachavanahi tájinhini nácamunuhini, ñícaerajicavacaya namutu.

⁵⁴⁻⁵⁵ Eñi Viya acane tjaracavahi ñíyehe eñi viáchucaini Abraham énapa ena ñíámariéqueneana, eta ñíjarasiravacainapa eta táetaviuchiraya eta náuricacarevanaya. Vahi ñémitisicaimahi eñi Viya eta ñéchajiriruvahi ñíjararuvahi. Puiti, eñi nuchichaya tiámayarepahi tamutu eta viúricacarevanaya viti israelítana. Máitavacayaheri éta —sucahepa esu María.

⁵⁶ Tásiha, sunasipanapa esu María te supena esu Elisabet. Mapana caje eta suyerevahi. Te táequenepa, tichavavarepa te supena.

Eta máuchusira ema Juan

⁵⁷ Tacahe, títauchavapa eta sucajera esu Elisabet. Suínacapa ema suchicha. ⁵⁸ Tiyananapa ena sujaneanana énapa ena suchacayapenanahi, náejirapana ésu. Táicha eta nasamairirisirahi eta súrivahi maicha ema Viya eta majapanuirahi ésu. Tiúrisamureanarinehi namutu. ⁵⁹ Tacahe, te óchoquenepa sache eta máuchusirahi ema amuya, nayanauchapa ena najaneanana, namarcachapanyarehi ema amuya; taicha tacahehi eta nayeherepihi. Tásiha, navarahapa nanacayaheri eta máijareyarehi Zacarías, mámapicayaheri eta máijare ema máiya. ⁶⁰ Ésusera esu maena ema amuya vahi suvarahahini. Suíchavacapa:

—Juan eta ñíjareyare.

⁶¹ Tásiha, éna nacahepa:

—¿Tájaha tacayema? Namutu ena pijaneanana, nájina ticaijarena eta Juan —nacahepa.

⁶² Tásiha, éna náimicutiarachinapa eta nayaseresirahi ema Zacarías tájahapuca eta máijareyarehi maicha éma. ⁶³ Tacahe, ema Zacarías tiyaseserecapa eta táblamechicha, májuchihayarehi eta máijareyarehi ema machicha. Eta ajureca, ani tacahehi: “Juan eta máijareyare”. Tésenijiricacanarinehi éna taicha eta máijareyarehi ema amuya. ⁶⁴ Tásiha, tójahúchavapa tichavapa eta máechajisira ema Zacarías. Macunachapa ema Viya eta máurisamurevahi. ⁶⁵ Ichape eta tiáramicarehi nayehe ena natiarihiqueneanahi. Nasamairiricanepa namutu ena távacuanahi eta avasarechichana tayehe eta provincia Judea. Náechajisihapa eta juca nasamairirivanahi. ⁶⁶ Namutupa napanerequenehahi. Nácani tisamairiricanapahi, tiyasejiricacanaripa. Ánipa nacahe:

—¿Cañarihi tacayemaquenehi eta juca máuchusirahi ema amuya? —nacahepa.

Tásiha, ema amuya, tétavicavahi eta majaneasirahi ema Viya eta majuru-sirapaipahi.

Eta majirarapi ema Zacarías

⁶⁷ Tacahe, eta jena sáchequenehi eta macamarcairahi ema amuya, étaripa eta nanasirahi eta máijareyarehi, téchajicapa ema Zacarías. Macunachaipa ema Viya, taicha mávahácaripa ema Espíritu Santo. Ánipa macahehi:

⁶⁸ —Tétavicavapa eta macunachacareva ema Tata Vicaiyaquene, ema véhiruhi vimutu viti israelítana. Taicha tijapanuhavihi vimutu viti machaneranihi, ticuchucuhaviyarehi. ⁶⁹ Tíjaracahaviyarehi puiti ema yátupique-neyare eta macatiuraivaya, ema manerejiruhi te namuri ena mámarieque-aneanainihi ema David, ema mavanarainihivare ema Viya. ⁷⁰ Títaucha-vaipahi eta náechajiriruvanahi ena santo profetanaini acane, eta nametaca-sivanahi me Viya. ⁷¹⁻⁷³ Taicha tacahehi eta matratunehi ema Viya mayehe ema viáchucaini Abraham. Ema Viya tíjaracahavi eta majapanuiravaca-yarehi ena viáchucanaveanaini, énapa ena ticachichahaviana, vítipa puiti. Énerichuvare tíjaracavahi eta mamaemisisiraya eta macatiuchirahaviyare nayehe ena ticatianacahavianahi. ⁷⁴ Ema Cristo manerejiruhi ema Viya, ticatiuchahaviyarehi taicha mamavarairahi vipicahini, nacuijahivaréni ena nahapapicahavihini eta vicaemataneasirayarehi éma. ⁷⁵ Eta mavaraha-queñehi tíuriyare eta vítaresirayarehi tamutu sácheana, tájina víchiravaimahi te mamirahu éma.

⁷⁶ Pítiripa, piti nuchicha, píchuarecasivaichuhi mayehevuyare profeta ema Tata Vicaiyaquene taicha píti pínapumirauchayarepahi ema Viáquenu Cristo. ⁷⁷ Pétupiricayarehi eta nasamureana ena achaneana, yátupinapa machaneranyarehi éna. Pímitucayareva nácaicutiaraya eta mavarairahi ema Viya macatiuchavacayare, macaepahairayarehivare eta napecaturana. ⁷⁸⁻⁷⁹ Puítiripa, eta máemunasirahavihi ema Viya, macucupaisinahavihi te anuma ema Machicha. Éma, tímimaticahavinapa eta majaraiva ema Tata Vicaiyaquene éta pa eta táuriquene achene ticaijuhe mayehe. Máetucarcava-cayare eta nasamureana ena ticatisamureanahi, nácani tépenanyarehíni — macahepa ema Zacarías.

⁸⁰ Tacahe, ema amuya eta majurusirahi, tiámavapahi eta masuapajiravahi mayehe ema Viya. Váhivare étainahini te tajuhe eta avasare eta majurusinehi. Vámahicuruhahi eta majurusirahi. Tiámainucava te ajairapa, tímerecavapa nayehe ena majaneanana israelítana, tépanavapasera ticametarairu.

2

Eta máuchusira ema Jesús (Mt 1.18-25)

¹⁻³ Tacahe, te jena añoanahi cape juca viásinequenehi te émarichaha aguenu-cahi ema Emperador Augusto, matiarihivare ema apana achane ticaijare Cirenio, majupahahi ema Augusto. Prefectohi éma, tayehe eta avasare-ana. Ticaijare Siria eta mávihahi*. Tacahe, te jena sácheana, ema Au-gusto macavanairipipa nacuchuca eta vantu eta nacatupairayare namutu ena achaneana te avasareana. Tacahe, tiyananapa ena achaneana te návasanapachu te náuchusineana eta nacatupairayarehi. Nasuapayarehi eta vanairipi. Táinapuiruhi censo maicha ema Emperador Augusto.

⁴⁻⁵ Tacahe, tiyanapa ema José. Mámapa esu mayena María. Ticajaripaipa ésu. Tacahe, tiúchucanapa éna tayehe eta avasare ticaijare Nazaret te Galilea. Nacaijuhepa eta avasare ticaijare Belén te Judea, eta mávasainihi ema aque-nucaini rey David. Étarichuvare mávasahi ema José, taicha ema José mámarie-queñehi ema David. Tiyananapa ticatupanayarehi.

* **2:1-3** Te jena año, matiarihivare ema ichapequenehi aguenuca ticaijarehi Aluresi. Éma, reyhi tayehe eta departamento Judea.

6-7 Tacahe, títécapanapa te Belén. Tájinaipasera táviravainahini eta te pétiana eta náitecapihahini taicha camuriqueneanahi ena achaneana náitecapaqueneanahi. Tacahe, tisiapanapa eta te peti tapena eta sárareana. Tacahe, esu María tiyuriticavaipa eta sucajera eta suínasirayarehi. Tacahe, títacapa jena yati. Suínacapa ema amuya ema suárachichahi. Tacahe, suáyuruacapa eta te mámaratataji pañal. Sucaivecapa ema amuya alauchu.

Ena pástulérwana ticametacasianapa nayehe ena ángeleana

8 Te vámahi te tachacaya eta avasare Belén, natiarihihi ena pástulérwana. Éna, najaneacahi eta nayeheana uvesana te jena yátiquenehi. 9 Tiáramicarepa tímerecava ema ángele mavaneruhi ema Viya. Jéhesare, tamicauchamurinehi ena pástulérwana eta majaraivahi éma. Tiáramecanarine éna. 10 Tásihasesa, ema ángele máichavacapa:

—Vahi ecupica. Yare, jucarihi eta tímitecanuhi núti numetapanahere. Tétávicava táurisamurécavaya nayehe namutu ena achaneana. 11 Puiti te jena avasare Belén, mávasaini ema rey David, tiúchucaipa ema Ticatiurahiyare eyehe emutu éti. Éma, ticaijare Cristo Viáquenu. 12 Eta tacahe, nímicucutiachinahere eta ímairaya: Echimapayare ema amuya ticayuruhahi te mámaratataji pañal. Tívecahi eta te tajuhe eta peti tapena eta sárareana — máichavacapa ema ángele.

13 Tásiha, tíjahúchavapa tímerecavana ena camuriqueneana ángeleana eta te mávihahi ema émana ángele. Najirahi eta alabanza eta nacunachirahi ema Viya te anuma. Ánipa nacahe:

14 ¡Tétávicavapa eta vicunachirahi ema Viya vimutu viti viávihanahi te anuma! ¡Jéhevare puiti, tiúricavanainapa ena achaneana te juca apaquehe, ena manerejiruanahi macatajiruanahi ema Viya! ¡Tájinainapa náichiravaimahi! —nacahepa.

15 Tacahe, tiyananapa ena ángeleana, tichavana te anuma. Tásiha, náichacacapa ena pástulérwana:

—Yare, viyana te Belén. Viyana vímahapana eta juca mametaruhavihi ema ángele mavaneruhi ema Viya Viáquenu —náichacacapa.

16 Tacahe, titátájianapaipahi tiyanana. Jéhesareinahi, te títécapanapa, nachimapaiinehi esu María émapa ema José. Matiarihisaréipahi ema amuya. Tívecahi éma eta te tajuhe eta peti tapena eta sárareana. 17 Te náimahapa tamutu, tépanavanapa náemechapa. Amairipahipa naecha eta mametarpianahi ema ángele eta máuchusiraipahi ema amuya. 18 Tacahe, náraminehi namutu ena achaneana eta nametarpianahi ena pástulérwana. 19 Tásihasesa, esu María supanerequenehinehi te susamure tamutu eta juca susamaqueneanahi. 20 Tacahe, ena pástulérwana tichavanapa tayehe eta te najanearesihahi eta uvesana. Nacunachinehi ema Viya te anuma táichavene eta máechajiriruvahi ema ángele, táichavenevare eta náimairahivare ema amuya alauchu. Éta paichuhi tacahehi eta macayemaquenehi ema ángele.

Námapa ema amuya Jesús te Jerusalén, náimerepana tayehe eta Templo

21 Te óchoquenepa sache eta máuchusirahi ema amuya, namarcachapa éma taicha tacahehi eta nayeherépi ena israelítana. Tacahe, nanacapa eta máijareyare Jesús. Eta máijare máimijarechaquenehi ema ángele te sucajariyarepa esu maena María.

22-24 Tacahe, te cuarentaquenepa sache eta suínasirahi esu María, tiyananapa te Jerusalén. Eta tímiyanavacahi éna, náimerepanayarehi ema amuya mayehe ema Viya Viáquenu. Taicha ema Viya macavanairipihí eta te Sagrada Escritura eta májurehi ema víyarahaini Moiséini, ánipa tacahehi: “Te ajairapuca ema mácani suárachicha esu esena, ímerezayare nuyehe; íjaracanuyare taicha nícuchichuhi ema”. Énerichuvare náitauchayarehi eta juca apana vanairipí tayehe eta napachihairaina ena esenana eta te táequenerapa eta náinasira. Ánipa macahe: “Esu súcani esena arainacahi, suíjaracasichanupana eta apihina paluma símarrune; te váhipuca, apina paluma suítatiqueneana, amairuhichichanasera”.

25 Tiuri, matiarhihi te Jerusalén ema émana achane ticaijare Simeón. Tétávicavahi eta máuriva. Tipicaurahi éma. Émarichu mávaháruhi ema Espíritu Santo. Ticuchapavaipahícha ticaimairuvaipaicha éma eta máimatiraya ema Cristo, éma ticaurisamurerahi nayehe ena achaneana majaneanana israelítana. 26 Taicha ema Espíritu Santo mametacaripahi ema Simeón eta vuíchaha tépenavanemahi éma, táicha máimatinumayarehi ema Cristo mavaneruyarehi ema Viya.

27 Tiuri, te jena sache, ema Espíritu mavanecapa ema achane Simeón mayana eta te Templo. Tacahe, títecapanapa ena ticachichana ema Jesús. Námapaipa ema amuya. Náitauchayarehi eta vanairipiana taicha eta máuchusirahi ema suárachichahi. 28 Tacahe, te máimahapa ema Simeón ema amuya, mavehapa, majupacapa. Tásiha, macunacharinehi ema Viya te anuma. Macahepa ema Simeón:

29-30 —Tiuri puiti, Tata Náquenu te anuma, nuvarahapa nunaraca te juca apaquehe, nutí pivanarahi. Taicha núrísamurepa eta nímairaipa ema Cristo. Étaipaichuhi eta pimetarunuhi. Nímatipa ema Ticatiurahiqueneyarehi, ema pivaneruhi pitupararui. 31 Éma, tímaticareya picha nayehe ena achaneana ticavasanahi eta te tamutu avasareana. 32 Ticunachavanarinehi ena pinerejiruaana israelítana. Tijarahinevare te nasamure eta nacunachirahi. Éma, tímicauchavacaya ena apamuriana achaneana apavasanana apaesa náimatiyare ema Viya —macahepa ema Simeón.

33 Náraminehi ena ticachichana eta máechajiriruvanahi ema Simeón mayehe ema amuya.

34 Tacahe, ema Simeón mayaseacapa ema Viya eta náurivaina éna. Tacahe, máichapa esu María esu maena ema amuya Jesús:

—Pímaha. Ema maca amuya, matuparacasivaichuhi me Viya eta máimiturisarayare eta máechajiriruvana ema Viya. Natiarhiyaresera camuriana ena vijaneanana israelítana énajivayare tíchavanayare, taicha náepuruyare ema pichicha, nacatianacayareva. Tásiha, natiarhiyarevaresera ena apamuriana vijaneanana tinaracanayare tíuricavanayare taicha eta nacasiñairaya éma. 35 Étainapa tacaetheraiyaya eta napanereruanapachu te nasamureana. Énerichuvare, numetacavi piti María: Ichape eta picatisamurevayare, taicha pímahayare eta táínehiqueneyare máichararacavayare ema pichicha. Tímicutijiricavayare tayuvaracahini eta pisamure eta tumare — máichapa ema Simeón.

36 Tiuri, sutiarhihivare esu ésuna esena ichavicachicha. Ticametarairurahi ésu. Ticaijaruhi Ana. Ema suíyaini ticaijaréni Fanuel. Ésu, mámariequenehi ema víyarahaini Aser. Eta suámaperuvahi ésu, siete año

eta sucachanerahi ema suímaini. ³⁷ Tásiha, ochenta y cuatro año ripahi eta suépenaimavahi. Sunasiquenehi sucapenehi ésu eta te Templo. Tamutuhi sácheana, yátiana, tiyujaracahi ésu. Suhayunachahivare. ³⁸ Tacahe, ema Simeón téchajiricavainirichaha, títicapanecha esu Ana. Eta suímairahi ema amuya Jesús, sucunacharinehivare ésu apanahavare, suhasulupayachapa ema Viya máichavene ema amuya. Tásiha, sucametarairupa mayehe ema amuya. Suéchajisihahi éma nayehe ena tisuapajirairahana ticuchapanahi eta máitecapirayare te Jerusalén ema Cristo.

Tichavanapa eta te návasa Nazaret

³⁹ Tiuri, náitauchapa tamutu eta mavanairipiana ema Viya eta te Sagrada Escritura. Tacahe, tichavanapa eta te Nazaret te Galilea, te návasaichuhi éna. ⁴⁰ Tacahe, ema amuya Jesús tiúrijuruhi. Túmehi. Téchemarahihi, tamutu maecha, taicha mamunavahi me Viya.

Ema Jesús téchajiricava nayehe ena máestroana

⁴¹ Tiuri, tamutu añoana te Páscuamuhua, eta nayeherepi ena ticachichana ema amaperu Jesús, tiyananayarehi tayehe eta avasare Jerusalén. ⁴² Tacahe, ema Jesús, te macayehepa doce año, tatuparacaripahi ena ticachichana náimerepanayarehi éma, námayarehi tayehe eta Jerusalén, námimatichayarehi eta piesta ticaijare Pascua.

⁴³ Tiuri, te jena táequenerapa eta piesta, tichavanapa te napena. Tíminasichavapasera ema amaperu Jesús eta te Jerusalén. Eta napaisirapahi te achene, vahi náejicavanehini ena ticachichana, ⁴⁴ taicha námijachahi matiarhipahi éma te namuri ena achaneana nacachanequeneanapahi. Étanaripahi sache eta napaisirahi, napaenumavapa náejicahi éma. Te jena cáperhiquenepe, natanucapa te namuri ena najaneana nacachanequeneanapahi. ⁴⁵ Májinasera náichimavahini. Tacahe, tichavanavarepa te Jerusalén, natanupanayarehi éma. ⁴⁶ Tacahe, te jena mapanaquenepe sache eta natanusirahi, napaenumavapa náetupiacahi ema Jesús tayehe eta Templo. Macachanemurihi, téjacahi te namuri ena máestroana. Masamararacavacahi, mayaseremurihavacahivare éma apanavare. ⁴⁷ Ichaperinehi eta náraminehi namutu eta náimairahi eta máechemaraivahi, taicha táurivapahi eta majicapiravacapahi éna, taicha eta máechemaraivahi. ⁴⁸ Tacahe, tiáramivanarinéhi ichape ena ticachichana te náetupiacapa. Tásiha, suíchapa esu maena:

—Nuchicha, ¿tájaha tacayema píchahavihi? Ichapemuri eta vicañamarasiravahi pícha. Vitanujiriricavihi, núti éñipa eñi piya —suíchapa esu maena.

⁴⁹ Tacahe, ema Jesús majicapapa:

—¿Tájaha tacayema, meme, eta etanujiricanuhi? ¿Váhipuca échahini éti eta návihairahi eta ani? Níchayare eta máemataneana ema Tata —macahepa ema Jesús.

⁵⁰ Énasera vahi nacaicutiarahini eta macayemaqueneanahi ema nachicha Jesús. ⁵¹ Tacahe, tiyananapasera tichavana te návasahi Nazaret. Ema Jesús, tisuapajirahihahi nayehe ena ticachichana. Esu maena María tamutuhi supanerequenehahi te susumure eta juca susamaqueneanahi.

⁵² Tacahe, ema Jesús tijurucapaipa, tijuruhacapaipavare eta máquehe, tacachanepahisera eta máitupajijiasiravahi. Máimicatacachi ema Viya. Tétavichavivare eta náemunasirahi éma, ena achaneana.

3

*Emá Juan Tícachasiricarahi tépanavapa ticametarairu eta máechajiriruva emá Viya nayehe ena vámahicuruhana
(Mt 3.1-12; Mr 1.1-8; Jn 1.19-28)*

¹ Tacahe, eta máepenraipahi emá aquenucaini Augusto, tisiapapa emá Tiberio máitsivaquenehi. Émapa Emperadorhi. Quince añoripahi eta macatuparahairahi. Emá Poncio Pilato, émaripa prefectohi tayehe eta departamento Judea. Tásiha, emá Herodes Antipas, machicha emá Aluresini, prefectohivare tayehe eta departamento Galilea. Emá maparape Felipe, prefectohivare éma, tayehe eta departamento Iturea étapa eta Traconite. Emá Lisaniás, prefectohivare tayehe eta departamento Abilina. ² Te Jerusalén, emá Caifás, corregidorhi. Énerichuvare tipicauchacarehi emá Anás, pasado corregidor, máimachuca emá Caifás.

Tacahe, te jena sácheanahi, emá Juan machicha emá víyahaini Zacarías, ajairaripa. Manasirichahahisera tayehe eta mávapahi majurusinehi. Tásiha, ticametacasipa emá Juan eta mayehe emá Viya eta macametarairuirayarepa eta máechajiriruvana.

³ Tacahe, tiyanapa tipaicaahi emá Juan tayehe eta avasarechichana tiávihanahi te tachausi eta cajacure Jordán. Mametacavapaipa ena achaneana. Ánipa maicha:

—Ítsivacha eta epanereruana. Éneuchava mayehe emá Viya apaesa maperdonachahe eta epecaturana. Te éneuchavapuca, núti nícachasica-hénapa —máichapa.

⁴ Emá maca Juan, émaripa emá máechajisihauenehi emá Viya eta te Sagrada Escritura, taicha ánaquiaparipahi eta añoana acane, emá Viya mametacapa emá víyahaini profeta Isaías eta mapanereruhi, eta mavanesirayare emá Machicha te juca apaquehe. Eta tímitecahi ticatiurahiyarehi. Énerichuvare matiarihiyareva emá apana achane máichuhaqueneharehi emá Viya. Macametarairuyarehi, máetupiricavacayare ena achaneana, náinajisirayarehi eta napanereruana tauriqueneana, apaesa táuri eta najacapirayare emá Machicha emá Viya. Tacamunuhivare yátupina eta nacasiñairavayarehi mayehe, náinajicayarehivare eta nacasiñavavaisirahi, étapa eta navayuaraivahi. Nasapihahi tijapanurahianainapa éna. Tásiha, te máitecapapa emá ticatiurahiyarehi, éma máimimatichainapa namutu eta najacapacarevaya me Viya namutu ena ticasiñavana mayehe.

⁷ Tacahe, ena achaneana tiyananapaipa napauchapaipa emá Juan, navarahapa ticaicachasianayare eta mayehe. Tásiha, éma máichavacapa:

—¿Tájaha tacayema eta epauchiranuhi, eti tachichanaveanatataji eta quichare? Esamairirahipuca eta járajapairayarepa eta táifehiquenehare ecuñaraqui. Evarahahipuca iúchucuhayare. ⁸ Tiuri puiti, te evarahapuca eta iúchucuha, yátupina tátupiruva eta epanereruana. Ímerecava eta ínajisiraya eta epecaturana. Váhivare eucujamurava eta mámariequenérahehi emá viáchucaini Abraham. Taicha tayanapane mámarihepuca éma, váhisera iúchucuhaimahi te vahi eucuitsivacha eta epanereruana. Emá Viya, tájina máemaitucaimahi éma. Te mavarahapuca, vahi máejecarachaimahi máepiyaca achaneanaina eta juca mari, mavarairainahi yátupina ena mámariequeneanaina emá Abraham. ⁹ Ecauneuchava, taicha tiánehipa titecapauchaheyare eta ecuñaraqui nayehe ena achaneana

máitucarahanahi téneuchavana, váhivare náitsivachahini eta napanereruana. Tímicutijiricavaipa te máechucayarepa ema achane eta yucuqui máhireana; tásiha, máijuchainapa tamutu. Ene nacaheyare ena máeneuchavarahana — máichavacapa ema Juan.

¹⁰ Tásiha, ena achaneana nayaserecapa:

—¿Tájahasica eta vícharacavayare eta viúrivaina?

¹¹ Ema Juan majicapapa:

—Ecajirahiyare. Mácani tatiarihi apina eta macamisa, máijaracasichayarehi eta étana mácani tájina macamisaina. Énaripa nácani ticaniruanahi, nacajiyareva nácani tájina naviyahini eta nanicaquene — máichavacapa.

¹² Te jena sácheana, náitecapauchavare ema Juan ena ticobrarecarahiana eta impuesto. Navarahapa ticaicachasianayarehi. Nayaserecapa ema Juan, náichapa:

—Maestro, ¿tájahapuca vícharacavaini eta viúrivainaini víti apanavare? — náichapa.

¹³ Majicapapa ema Juan:

—Vaipa ecuapechava ecuvayuyujica eta ecobresira, tátupiruva jácani tavanairipihí eta ley — máichapa.

¹⁴ Énerichuvare náitecapaucha ena suntaruana. Nayaserecavare ema Juan, náichapa:

—Víti apanavare, ¿tájahapucaini vícharacavayare eta viúrivaya? — nacahepa.

Máichavacapa éma:

—Vaipa ecuverejica eta náimahaqueneana ena achaneana. Váipavare ecupicarareca. Nacuijapa ecuepiyequeneha. Tarataripa tacurisamurechahe eta evachasana — máichavacapa.

¹⁵ Ena achaneana ticunevanaripaicha eta mayehe ema Juan, náimijachapahi émaripa ema Cristo nacuchapaquenehi, cátiurahiyarehi. Váhisera námutuimahi. ¹⁶ Tásihasera ema Juan máichavacapa:

—Yátupi núti nícachasicahéhi te une. Ávanepaipahisera mácani yátupiquene Cristo. Éma, tiápajupanavahi nuyehe núti, eta mapicauchacarevahi. Váiparinehi nácutinasimahi eta máitupajijiasiravahi. Váiparinehivare nácaemuñavaimahi macamusuranuhini nuti páuresami. Te yátupina ecasiñava mayehe, ticachasicahayareva; tíjaraheyareva ema Espíritu Santo. Téhesera vahi ecucasiñavapuca mayehe, ticuñacaheyare tayehe eta tájirequene yucu. ¹⁷ Puiti éma márājapainapa tinerejiricainapaipa nácani yátupiqueneanahi téhicanayare. Máunacainapa éna. Ticutinapa mácani achane te tiácatayajiricahi eta arusu. Máunacainapa. Tásiha, máquijicapa eta tapiraquiji, máijuchayarepa te yucu. Eta nacaheyare ena máurirahanahi, tíjuanáinapa te yucu, máitavacacayarehi eta tamuruira — máichavacapa ema Juan.

¹⁸ Tacahehi eta juca máechajisiravacahi ema Juan. Ichape eta maconsejachiravacahi ena achaneana, máimitusiravacahi eta máechajiriruva ema Viya.

¹⁹ Émaripa ema Herodes Antipas ema aquenucahi, maconsejachahivare vahi macuimiyana macuveha esu Herodías, mayenahi ema maparape Felipe. Váhivare macuimiyana macuquicha eta apamuriana táñemahiqueneana máichaqueneana. ²⁰ Émasera ema Herodes vahi masuapahini. Masapiharichucha tisemahi, máimicaratacapa ema Juan, macasiapayarehi te cárcel.

*Eta macaicachasirahi ema Jesús**(Mt 3.13-17; Mr 1.9-11)*

²¹ Tiuri, te tamirahupaichaha eta macaeratairaya ema Juan, túmiyanaivaichahahi máicachasicavacahi ena achaneana. Étana sache, máitecapauchapa ema Jesús, mavarairahi ticaicachasi éma apanavare. Tacahe, te tamutupa eta macaicachasirahi, mayujarasirahi. Tíjahúchavapa téjiaca eta anuma. ²² Tiúcupaicapa ema Espíritu Santo, mavasimahipaipa eta paluma eta máimahi. Matupiruruchapa te mápusi ema Jesús. Tásiha, nasamapa eta mahu ema Viya te anuquehe. Ánipa macahehi:

—Pítira nuchicha némunaruquene. Núrismurecha piyehe —macahepa.

*Ena achaneana máchucaqueanaini ema Jesús eta acane**(Mt 1.1-17)*

²³ Tiuri, ema Jesús, macayeheripahi treinta año te tinacuchavapa túmiturecachi nayehe ena achaneana. Éma, náimijachaquenahi machicha ema José. Ema máiyainihi ema José, ema Elí.

²⁴ Ema máiyainihivare ema Elí, ema Matat.

Ema máiyainihivare ema Matat, ema Leví.

Ema máiyainihivare ema Leví, ema Melqui.

Ema máiyainihivare ema Melqui, ema Jana.

Ema máiyainihivare ema Jana, ema José.

²⁵ Ema máiyainihivare ema José, ema Matatías.

Ema máiyainihivare ema Matatías, ema Amós.

Ema máiyainihivare ema Amós, ema Nahum.

Ema máiyainihivare ema Nahum, ema Esli.

Ema máiyainihivare ema Esli, ema Nagai.

²⁶ Ema máiyainihivare ema Nagai, ema Maat.

Ema máiyainihivare ema Maat, ema Matatías.

Ema máiyainihivare ema Matatías, ema Semei.

Ema máiyainihivare ema Semei, ema José.

Ema máiyainihivare ema José, ema Judá.

²⁷ Ema máiyainihivare ema Judá, ema Joana.

Ema máiyainihivare ema Joana, ema Resa.

Ema máiyainihivare ema Resa, ema Zorobabel.

Ema máiyainihivare ema Zorobabel, ema Salatiel.

Ema máiyainihivare ema Salatiel, ema Neri.

²⁸ Ema máiyainihivare ema Neri, ema Melqui.

Ema máiyainihivare ema Melqui, ema Adi.

Ema máiyainihivare ema Adi, ema Cosam.

Ema máiyainihivare ema Cosam, ema Elmodam.

Ema máiyainihivare ema Elmodam, ema Er.

²⁹ Ema máiyainihivare ema Er, ema Josué.

Ema máiyainihivare ema Josué, ema Eliezer.

Ema máiyainihivare ema Eliezer, ema Jorim.

Ema máiyainihivare ema Jorim, ema Matat.

³⁰ Ema máiyainihivare ema Matat, ema Leví.

Ema máiyainihivare ema Leví, ema Simeón.

Ema máiyainihivare ema Simeón, ema Judá.

Ema máiyainihivare ema Judá, ema José.

Ema máiyainihivare ema José, ema Jonán.
 Ema máiyainihivare ema Jonán, ema Eliaquim.
³¹ Ema máiyainihivare ema Eliaquim, ema Melea.
 Ema máiyainihivare ema Melea, ema Mainán.
 Ema máiyainihivare ema Mainán, ema Matata.
 Ema máiyainihivare ema Matata, ema Natán.
³² Ema máiyainihivare ema Natán, ema David.
 Ema máiyainihivare ema David, ema Isaí.
 Ema máiyainihivare ema Isaí, ema Obed.
 Ema máiyainihivare ema Obed, ema Booz.
 Ema máiyainihivare ema Booz, ema Salmón.
 Ema máiyainihivare ema Salmón, ema Naasón.
³³ Ema máiyainihivare ema Naasón, ema Aminadab.
 Ema máiyainihivare ema Aminadab, ema Aram.
 Ema máiyainihivare ema Aram, ema Esrom.
 Ema máiyainihivare ema Esrom, ema Fares.
 Ema máiyainihivare ema Fares, ema Judá.
³⁴ Ema máiyainihivare ema Judá, ema Jacob.
 Ema máiyainihivare ema Jacob, ema Isaac.
 Ema máiyainihivare ema Isaac, ema Abraham.
 Ema máiyainihivare ema Abraham, ema Taré.
 Ema máiyainihivare ema Taré, ema Nacor.
³⁵ Ema máiyainihivare ema Nacor, ema Serug.
 Ema máiyainihivare ema Serug, ema Ragau.
 Ema máiyainihivare ema Ragau, ema Peleg.
 Ema máiyainihivare ema Peleg, ema Heber.
 Ema máiyainihivare ema Heber, ema Sala.
³⁶ Ema máiyainihivare ema Sala, ema Cainán.
 Ema máiyainihivare ema Cainán, ema Arfaxad.
 Ema máiyainihivare ema Arfaxad, ema Sem.
 Ema máiyainihivare ema Sem, ema Noé.
 Ema máiyainihivare ema Noé, ema Lamec.
³⁷ Ema máiyainihivare ema Lamec, ema Matusalén.
 Ema máiyainihivare ema Matusalén, ema Enoc.
 Ema máiyainihivare ema Enoc, ema Jared.
 Ema máiyainihivare ema Jared, ema Mahalaleel.
 Ema máiyainihivare ema Mahalaleel, ema Cainán.
³⁸ Ema máiyainihivare ema Cainán, ema Enós.
 Ema máiyainihivare ema Enós, ema Set.
 Ema máiyainihivare ema Set, ema Adán.
 Ema Adán macaepiyaquenepa me Viya.

4

Ema Váinaraji Satanás mavaraha macaitsamaraji ema Jesús
(Mt 4.1-11; Mr 1.12-13)

¹ Tacahe, ema Jesús, mávahácaripa ema Espíritu Santo. Tásiha, ema Espíritu Santo eta mávasamurechirahi, máimitucaipahi eta mayanirayarehi te mávapahi apaquehe. Majunijicayarehi eta cajacure Jordán. ² Cuarenta

sache macahehi tayehe. Tájinvare manicahini eta jena sácheanahi. Técuhasamurepa. ³ Tacahe, ema Váinaraji témeñahavapa mayehe. Mavarahapa macaetemayarehi. Ánipa maicha:

—¿Pécuha píti? Tacahe, pivaneca eta juca mari táepiyacava pan, taicha píti machichavihi ema Viya, ¿masí? —máichapa.

⁴ Ema Jesús majicapapa:

—Váhipuca pecha eta táechajiriruvahi eta Sagrada Escritura, ani tacahehi: “Vahi tácarichuimahi eta tinicacare ticaitarecayare ena achaneana. Tacachaneyarehi eta máechajiriruva ema Viya. Jéhevare, éta ticaitarecarihiyare” —macahepa.

⁵ Tacahe, ema Váinaraji má mavarepa te táinahu eta anuquehe mari. Tíjuhúchavapa máimecha tamutu eta íchapequeneana avasareana te juca apaquehe ticutirinehi tacachacayajiricacahini taicha eta máitupajijiasiravahicacha ema Váinaraji. ⁶ Tásiha, máichavarepa ema Váinaraji:

—Núti níjaracaviyare tamutu eta juca avasareana. Ichape eta napicau-chiraviyare, nacunachiraviyareva ena achaneana. Pítina náquenuvina ena távacuanahi eta avasareana. Taicha núti néchavacahi éna. Nútivare nécha mácani nuvarahaqueneyare níjaraca. ⁷ Pépuyucanumasera te numirahu pitsiucanu apaesa níjaracavisarepa tamutu —máichapa.

⁸ Émasera ema Jesús majicapapa:

—Pévuisihatataji píti Satanás te juca numirahu. Váhipuca pecha eta táechajiriruvahi eta Sagrada Escritura. Ani tacahehi: “Macarichu ema Viya vépuyumirauchaya. Macarichuvare vicaemataneacayare” tacahepa. Váhiquene táurica nucaemataneacavihini —máichapa ema Jesús.

⁹ Tacahe, vahi máevuisihahini ema Váinaraji. Má mavare te avasare Jerusalén. Máimiapanapa te táinahu eta Templo. Tásiha, máichavarepa:

—Te yátupina machichavina ema Viya, písapavayare pémirica te anuquehe. Tájina píchavaimahi eta pémirisirayare. ¹⁰ Pécharichuhi eta táechajiriruva eta Sagrada Escritura, ani tacahe: “Ema Viya mavanecapa ena mayeheana ángeleana téchapajiricavianayare, énevaneyarehi tijaneacaviana. ¹¹ Tiámavianayare te navahuana, apaesa vahi picucayutetu eta máriana eta te pipaisirana” tacahepa. Tásiha, németeaca tijaneacavianayare puiti, vahi náisapaimahi picajara te pémirica —máichapa ema Váinaraji.

¹² Tacahe ema Jesús majicapavarepa:

—Énerichuvare ani tacahe eta Sagrada Escritura: “Vahi picaitsamara-jimahi ema Viya taicha éma Piáquenu” —máichapa.

¹³ Tacahe, tiyanapa ema Váinaraji. Majunijicapa ema Jesús taicha tímaha-vaipahi vahi máiturucahini macaetema. Mavarahahisera tichavayarehi tíapéchavayarehi macaetemapana.

*Ema Jesús tépanavapa ticametarairu
(Mt 4.12-17; Mr 1.14-15)*

¹⁴⁻¹⁵ Tacahe, tépanavapa ema Jesús mapaica eta avasareana tayehe eta provincia Galilea. Ichape eta máitupajijiasiravahi taicha mávahácapahi ema Espíritu Santo. Tímiturecapaipa tayehe eta náurujisirarevana te avasareana. Ichapemuri eta nacunachirahi namutu ena tísamararacapanahi. Nasamairicavarepa ena apamuriana achaneana ticavasanihi te tachacaya eta avasareana.

*Tichavapa ema Jesús te mávasa Nazaret
(Mt 13.53-58; Mr 6.1-6)*

¹⁶ Tásiha, tiyanavarepa te avasare Nazaret te majurusinehi. Te jena sache sávaru, tiyanapa tayehe eta náurujsirareva nayujarauchirare ena achaneana, taicha tacahehi eta mayeherepihi. Titupihapa ema Jesús, táicutirahi eta mavarairahi téchajicureca eta Sagrada Escritura. ¹⁷ Náichuharsarepa eta máechajicuresiraya. Nájaracapa eta libro májurehi ema profetaíni Isaías. Te mavejiacapa eta libro, matanucapa eta máechajicureyarehi. Ani tacahehi eta táechajirivanahi: ¹⁸ “Tiávahácanuhi ema Espíritu Santo. Taicha manerejirunuichuhi núti ema Viya Viáquenu eta numetasiravacayare ena páureana eta juca máemunasiravacahi éma, máimicatasirayareva. Eta tímitecanuhi nucanaracayare ena ticatisamurevanahi. Nucaítitijicayareva ena máerataruanahi ema tivayuarahi Satanás. Nucaimairircayareva ena púchuquiana. Nucuchucuhayareva ena ticatajivanahi, níjaracaya eta náuricacarevaya. ¹⁹ Numetacayareva járajapainapa eta sácheyare tamutuiraya máetupirica ema Viya, tamutuínapa tíurísamurécarepa máicha” tacahehi eta Sagrada Escritura eta máechajicurehi.

²⁰ Te tamutupa eta máechajicuresirahi ema Jesús, máeratacapa eta libro. Máimichavapa mayehe ema tijanearecarahi eta líbroana. Téjacavarepa ema Jesús. Náimarracaripa ena achaneana natiaríhiqueneanahi. ²¹ Tacahe, tépanavapa téchajica ema Jesús:

—Nútiripa ema táechajísíhaquenehi eta juca libro. Tímitecanuhi numetacáhe eta máemunasirahehi emá Viya —macahepa.

²² Tacahe, náramipa namutu ena achaneana. Ánipa náichacaca:

—¡Tétavícvahi tapachínava eta máechajirivanahi ema maca! Émachuchasera ema machícha ema Joséíni ema carpintéroi. ¿Tájahasica eta juca? —nacahepa.

²³ Émasera ema Jesús máichavacapa:

—Németeaca éti váhirichuhi esuapapajicanuhini. Tásiha, evaraharinepuca íchanuyare: “Te yátupina píturequeneha, pípuhavaca ena ticajumanahi te juca. Vímahaséji piápechavavare picuchuca te juca piávasaichu tacuti eta pímereruhi te avasare Capernaum” íchanuyare. ²⁴ Nutupirivasera numetacáhe: Tatuparaca eta epícauchirahaviya vimutu viti mavaneruana ema Viya. Étísera eti nujaneananahi ecavasanahi eta te juca viávasa, vahi epícauchanuhini, váhivare ejacapanuini. Ecuti ena achaneana acane eta náepuruirahi ena apamuriana profetana mavaneruanahi ema Viya. ²⁵ Eta tacahe, eta máimairahi ema Viya eta náepuruiravacahi, tivanecavaca ena profetana nayana napauchayare ena apavasanana. Acane, te matiaríhichaha ema profetaíni Elías, mapana año y medio vahi taquívahini, tásiha, ichapevare eta ecuha. Németeaca núti camurianahi nácani ena tépenaimana israelítana. ²⁶ Váhisera étainahini macavanahiyahini me Viya ema Elías eta nayehe ena majaneananahi. Ánaqui te avasare Sarepta tachacayahi eta avasare Sidón, étapa macavanahiyahi máitecapíhayare suyehe esu ésunahi esena apavasan tépenaimahi. Ésupa máimicataruhi táichavenehi eta susuapajiríavahi me Viya. ²⁷ Énaripa ena israelítana nacajumaqueneana eta lepra te jena sácheanahi te matiaríhichaha ema profetaíni Eliseo. Váhivare énainahini macanaracahini ena majaneanana. Masapíhapa macanaracahi ema apavasanáquenehi

ticaijare Naamán, ticavasahi te Siria. Ema Naamán, tinaracaripa eta majuma, táichavenehi eta masupajiraivahi —máichavacapa ema Jesús.

²⁸ Tacahe, eta juca máichiravacahi ema Jesús, tisemanapa ena natiarihi-queneanahi. ²⁹ Tásiha téchepumurihanapa éna. Nacuchucapa ema Jesús te tachachacu eta avasare, te tachausi eta táupenaquene, navarahapa nacami-ricayarehi éma. ³⁰ Émasera tichavapa mánumurihapaipa éna. Tiyanapa, majunijicavacapa.

Ema Jesús máimijuna ema éreana tiávahácainihi ema achane

(Mr 1.21-28)

³¹ Tacahe, títecapapa ema Jesús tayehe eta avasare Capernaúm te Galilea. Tamutu sávaruana tiyanapa tayehe eta náurujisirareva ena achaneana, tímítu-repanaya. ³² Ichape náramihi ena achaneana eta máimiturapianahi taicha tétavicavahi eta máitusirahi mayunapaicahi tamutu. Tétavicavahivare eta tasuapacarevahi eta máimiturapiana.

³³ Étana sávaru, matiarhihi te namuri ema émana achane mávaháruhi ema éreana. Tipiararecahi, ánipa macahe:

³⁴ —Núti nímativi. Pítira Sántoqueveni. Machichaquenevivi ema Viya. Pésamiricahavipaini, piti Jesús Nazareno. Váhini picuesirujicahavini. Pivarahainapapuca picajanerepaicahaviyare —macahepa ema achane.

³⁵ Tacahe ema Jesús macajachapa ema éreana. Ánipa maicha:

—¡Pámatina! ¡Piyana pijunijica ema maca achane! —máichapa.

Tásiha, tíjahúchava tiáquipaicavapa te apaquehe ema achane. Tásiha majuni-jiacapa ema éreana. Tájinasera máichavahini ema achane. ³⁶ Náraminehi ichape namutu ena achaneana eta náimairahi. Tiyaserejiricanapa:

—¿Tájahasica tacayema eta juca? Ema maca Jesús, tétavicava eta máitupaji-jiásiravahi, maratahahi máquijica nácani éreanana. Tásiha, ichape eta napisir-ahi éma. Vahi najicapaemachahini. Tamutupa arairu eta máimiturapianahi ema maca —nacahepa.

³⁷ Enevanevarepa naecha namutu ena achaneana eta juca máichaqueneanahi ema Jesús. Énaripa ena ticavasanahi te avasareana eta te provincia Galilea.

Ema Jesús macanaraca esu máimase ema Pedro

(Mt 8.14-15; Mr 1.29-31)

³⁸ Te tíuchucapa ema Jesús tayehe eta náurujisirareva, tiyanapa te mapena ema Simón Pedro. Te tisiapapa, náechajiacapa ema Jesús máimaharine esu máimase ema Pedro. Ticajumahi ésu eta muraca fiebre. ³⁹ Tásiha, mapauchapa ema Jesús. Máquijisinapa eta muraca fiebre. Tinaracavanepa ésu, téchepucavanepa. Suéchapajiricapa éma, énapa ena máimitureana.

Camuriana ena macanararuanapahi ema Jesús

(Mt 8.16-17; Mr 1.32-34)

⁴⁰ Te jena cáperehiquenehi, te téricapa eta sache, ena achaneana námavacapaipa namutu ena nacajumaqueneana eta mayehe ema Jesús. Apanapaneneji eta najumanapahi éna. Manacapaipa eta mavahu te náinahuana, macanaracapaipahi. ⁴¹ Maveranavare ena éreanana máquijiruanapahi te náqueheana ena nacajumaqueneana. Tipiararecanapaipa eta náuchusi-rapahi. Ánipa nacahe:

—Pítira Machichaquenevi ema Viya.

Émasera ema Jesús vaipa máisapahini náimiyanavahini napiaraca éma, taicha náimatihí éna eta émairahi ema Cristo.

Tamutu avasareana te Galilea mapaica ema Jesús
(Mr 1.35-39)

⁴² Te apanapa sache, te tijarahipa, tiyanapa ema Jesús te mávapahi. Natanucapasera ena achaneana. Náetupiasirapa éma tayehe eta mávihahi. Navarahapa náiminasichayaherini. Vaipa náisapahini mayanahini. ⁴³ Émasera ema Jesús máichavacapa:

—Nutuparacasivaichuhi eta nuyanirayare tayehe eta apana avasareana taicha nuvanahirichuhi eta níchuiravacaya ena achaneana náehisiraina ema Viya apaesa macuchucuhavaca —máichavacapa.

⁴⁴ Tacahe, tiyanapa tipaica ticametarairupaipa te náurujisirarevana tayehe eta avasareana te Galilea.

5

Tiáramicarepa eta náitusiravahi eta jima
(Mt 4.18-22; Mr 1.16-20)

¹ Te jena sácheanahi, ema Jesús mávinehi te tachausi eta cáquiure ticaijare Galilea. Títécapanapa ena camuriqueneana achaneana. Váipanecha náratavahini, tipamihejiricacanapa eta navarairahi nasama eta macametarairuirahi ema Jesús eta máéchajiriruvana ema Viya.

² Máimahapa ema Jesús eta apisi pacure te tachausi. Ena ticayeheana eta pacureana, tisipajiricanahi eta ichapequeneana nayutaheana. ³ Tacahe, ema Jesús tiávacuhapa tayehe eta mapacurehi ema Simón Pedro. Mavanecapa máevataeca apaesachicha eta pacure. Téjacapa ema Jesús eta te pacure, tépanavapa máimitucavacapa ena achaneana. ⁴ Te títipiricapa eta máimitusiravacahi, máichapa ema Pedro:

—Tata, iama eta juca epacure tayehe eta táupenamaiya. Jáquijieca eta jara eyutahe —máichapa.

⁵ Ema Pedro majicapapa:

—Maestro, tamutu yati vinajuiricahi, tájinasera vítucavahini. Tavetijipa puiti eta tarahiraripa. Nusuapavisera eta juca pivanesiranuhi, náquijiecaya eta nuyutahe —máichapa.

⁶ Jáhesaréinehi, te nachurucapa eta yutahe, tiyututucavaipahi eta jímana. Vaipa táratavahini ténarujicapa eta ichape yutahe taicha eta tajitacareva eta jima. ⁷⁻¹⁰ Natiarihihisera te apana pacure ena nachamuriana: ema Jacobo émapa ema Juan. Tacahe, náevéhauquichapa tímícatacanayarehi. Te títécapanapa, náinicachapa eta apisiquene pacure. Tiánehirichahavare vahi táratavaherini taicha eta tajitacarevahi, téricayarepaini eta pacure. Ichape eta náramesirahi namutu taicha eta náimairahi eta camuriquene jímana. Tásiha, ema Pedro máepuyumirauchapa ema Jesús. Máichapa:

—Tata, pítiyara yátupiquenévihi Viáquenuvi. Váhicha nímiuriacava nutupihamirauchavi núti. Nucapecaturarahiquenehi —máichapa.

Matiarihihi ema Jacobo émapa ema Juan, machichanaveana ema Zebedeo. Machamurianahi ema Pedro. Énerichuvare tiáramecanarinehi éna, énapa ena apamuriana natiarihiqueneanahi. Émasera ema Jesús máichapa:

—Vahi picupica, Simón. Pínajicainapa puiti eta juca pématanerepini. Núti njaracaviya eta apana pématanerepiyare. Pitanucainapa ena achaneana nuchaneranaya — máichapa.

¹¹ Tacahe, te nachurupaicapa eta napacureana te tiájipahi, étapa nanaquisinehi. Tiyananapa náehicapa ema Jesús.

Éma Jesús macanaraca ema émana achane leproso

(Mt 8.1-4; Mr 1.40-45)

¹² Tacahe, eta máncuirapaipahi ema Jesús eta avasarechicha, mácapajicapa ema émana achane macajumaquenehi eta lepra, tamutu eta máquehe. Eta máimairahi ema Jesús, máitecapauchapa. Tépuycapa te mamirahu. Máichapa:

—Tata, nucasínavahi eta piyehe, picanaracupaini.

¹³ Majicapapa ema Jesús:

—Nuvaraha nucanaracavi. Tájinapa píchiravaina puiti — máichapa.

Manacapa eta mavahu. Énevanerinehi témitiacahi eta majumainihi.

¹⁴ Matuparacapasera ema Jesús. Ánipa máicha:

—Pímaha, nacuija picumetaca eta nútirahi nucanaracavihi. Piyanavaresera pímerecava nayehe ena tuparairucana, apaesa náimamacavi. Énainapa timetajiricanainapa eta yátupirahi pinaraca, pipachihairapa. Piyanayareva me Viya. Picamavahuyarepahi eta pihasulupayachirayare taicha eta macanarasiravihi — máichapa ema Jesús.

¹⁵ Tásihasera, náechapa namutu ena achaneana te avasareana eta máitupajijiasiravahi ema Jesús. Nayanauchapai ena camuriqueneana achaneana, navarairahi nasamararacayarehi, macanarasiravacayarehiva tayehe eta najumana. ¹⁶ Émasera ema Jesús, majunijimuriahachucha. Tiyanapa tayehe eta mávaphianahi apaquehe. Ánaqui mayujarasihayarehi.

Éma Jesús macanaraca ema émana achane macajumaquene eta mura-caquiha

(Mt 9.1-8; Mr 2.1-12)

¹⁷ Étana sache ema Jesús tímiturecahi te tajuhe eta peti, camuriana ena achaneana. Natirihihivare ena fariséoana tépiyacavana religiósana, énapa ena escribánoana, tímatiana eta nayeherepiana ena israelítana. Éna, tísihanahi te Jerusalén, ena apamuriana tísihanahivare te avasarechichana tayehe eta Galilea, étapa te Judea. Éma Viya máimicatacahi ema Jesús eta macanarasiravacayarepahi ena nacajumaqueneana. ¹⁸ Títecapanavarepa ena apamuriana, námaphi te áchuji ema achane muracaha. Navarahainipa nacasiapa te tajuhe te máviahahi ema Jesús. ¹⁹ Étasera eta nayututusiasiravahi ena achaneana, vahi náitujicavahini nasiapahini. Tímipanerechavanapasera náimiapanapa te tamaequethe eta peti. Navetatamaequetchapa eta peti te manapaicahi ema Jesús, nacajuchuchucapa ema macajumaquene. ²⁰ Tacahe, te máimahapa ema Jesús eta nacasiñavairahi eta mayehe, máichapa ema macajumaquene:

—Tiuri, nuchicha. Eta pipecaturanahi, nucaepahainavipa.

²¹ Éna escribánoana énapa ena fariséoana, eta napanerequenehairahi eta macayemaquenehi ema Jesús, tiseanmarinehi. Ánipa nacahe te nasamureana: “Éma maca tímijachavaipapuca Viya eta macaepahairayaréji eta pecatua. ¡Tétavicava eta matapirava! ¡Taicha macarichu ema Viya marataha macaepaha eta pecatua!” tacahehi eta napanereruana.

²² Émasera ema Jesús máimatihí eta napanereruana. Máichavacapa:

—¿Tájaha tacayema téjecapavahi eta epanereruana? ²³ Tájina táejeravaina eta níchirahi ema maca: “Nucaepahainavipa eta pipecaturanaini”. Máejera-repánapuca eta níchahini: “Péhepuca, piyana pipaica”. ²⁴ Tiuri puiti, nuti Manerejirunuhi ema Viya, nímereuchavainapa eta nuratahairahi nu-caepaha eta pecatu te juca apaquehe. Ímararacanu —tacahe, máichapa ema macajumaquene—. Puiti nuchícha, nuvanecavi péhepuca. Piveha eta jara piyereruva. Piyana te pipena —máichapa ema Jesús.

²⁵ Enevanerinehi téchepuruca ema macajumaquenéni. Mavehapa eta may-eruruva. Tipaicapa te namirahu ena achaneana. Tiyana te mapena. Ichaperinehi eta macunachirapahi ema Viya. ²⁶ Ichaperinehivare eta náramirahi namutu ena natiarihiqueneanahi. Tétavicavarínehi eta nacuna-chirahi ema Viya, napicaucharinehivare. Ánipa nacahe:

—Tétavicavapa táamicareva eta juca vímahaquenehi puiti —nacahepa.

Éma Jesús máichuha ema Mateo, mayehyare apóstolo
(Mt 9.9-13; Mr 2.13-17)

²⁷ Te táequenepa eta júcana, ema Jesús tiúchucapa. Eta mapaisirapahi, máimahapa ema achane ticaijare Mateo. (Ticaijarehivare Leví.) Téjacahi éma eta te macatuparahaiyahi eta macobradesirahi eta impuesto.

—Yare, péhicanu —máichapa ema Jesús.

²⁸ Enurujiapa téchepucahi ema Mateo. Manaquicapa tamutu eta matupara-hainihi. Tiyana máehicahi ema Jesús.

²⁹ Tacahe, te jena sácheanahi, tépiyarecapa eta piesta ema Mateo te mapena. Máichuhapa ema Jesús eta máenirisirayarehi, énapa ena camuríqueneana macutíqueneanahi ticobrarerahiana impuesto, énapa ena apamuriana máemunacasareana ema Mateo. ³⁰ Natiarihihivare ena máimitureana ema Jesús. Tásiha títecapanavarepa ena fariséoana énapa ena escribánoana. Eta tímiyanavacahi, ticaecahirecanayarehi. Ánipa náichavaca ena máimitureana:

—¿Tájaha tacayema ecachanemuri eta enisirahi ena nánitatajana ticobra-recarahiana eta impuesto? ¡Tétavicavahi eta nacapecaturaravahi! —nacahepa.

³¹ Émasera ema Jesús, te masamairiricapa eta náechajiriruvanahi, máichavacapa:

—Ena majumareanahi vahi nácamunuimahi ema médico. ³² Núti, vahi étaina tímitecanu nutanupanavacayare nácani matapiravareanahi. Eta tímitecanuhi núti nutanupanavacayare ena tisipecaturanapanahi apaesa náitsivacha eta napanereruana, náeneuchavapa me Viya —máichapa ema Jesús.

Nayaserecapa ema Jesús tayehe eta ayuna
(Mt 9.14-17; Mr 2.18-22)

³³ Tiuri, nayaserecavare ena achaneana ema Jesús:

—¿Tájahapuca tacayema vahi ayúnanainahíni ena pímitureana? Énayapasica ena máimitureana ema Juan náichahi eta muraca ayuna eta nayujarasirana. Énaripa ena fariséoana, énerichuvare. Tásiha, ena pímitureana píti tinicanahi, téranahivare —náichapa.

³⁴ Majicapapa ema Jesús:

—Nímicutichinahe puiti. Vahi táuricaimahi ayúnanainahíni icha ena íchuha-queneanahi tinicanayare nayehe ena araimana. Tiúrisamureanayarehi taicha matiarihíni ema arayena. Tájina táurichahini ayúnanainahíni. Téhesera

te tépenapuca éma, jéhesare ticatisamurevanayare. Tacutiquene, vuíchaha táuricaímahi ayúnanainahíni ena nímitureana. ³⁵ Járájapainapasera eta sáchezare, ticaverejicasianayare, taicha ticaratacuanainapa ena ticapacuananayare núti. Jéhevarepa ayunanainapa. ³⁶⁻³⁸ Esamanuchaha. Eta juca eta nímiturapianahi, amairiha arairu. Mavaraha ema Viya arairuyare eta eyeherepianayare eti nuchanerana. Vaipa tácuticacaimahi eta nayeherépiana ena apamuriana achaneana. Eta ítusirahi éti eta nímiturapiana, tavaraha ínajica eta ichasi eyeherepiana tamauriqueneanahi. ³⁹ Ticajerasera eta náinajisirahi ena achaneana eta nayeherépiana tamauriqueneana. Apaesachicharichu eta navarairahi naicha eta juca arairu nayeherépianayare. Namutuyaréni navaraha náimiyanava eta nayeherépiana tásihaque-
neanahi eta napanereruana ena náchucanaveanaini —máichavacapa ema Jesús.

6

*Ena fariséoana náimpicauchahi eta nayeherépiana tayehe eta sávarumuhua.
Émasera ema Jesús máimereuchahi émarichu téchahi eta nayeherépiana ena
achaneana eta sache nanarasirayare
(Mt 12.1-8; Mr 2.23-28)*

¹ Eta jena sache sávaruquenehi, tiyanapa tipaica ema Jesús. Máمامurihapa ena máimitureana. Témehicavanapa ena fariséoana. Náetavivijicapáipahi eta isanítiana. Tacahe, eta napaisirapahi, ena máimitureana navechuquihapaipahi étajavapahi eta trigo. Navepiraquihapaipa, tépura-jacachavanapaipa. Tinicanapaipa. Tísapacareichucha eta nanisira, taicha técuhanahi. ² Tacahe, eta náimararasirapahi ena fariséoana, tisemanapaipa. Ánipa naicha:

—¿Tájaha tacayema vahi epicaucha éti eta juca sache tacapichuquenehi? Écharichuhi éti vahi tísapacarémahí eta vicaematanerahi puiti. Eta juca evepiraquihapahi eta trigo, ticaijare ecaematanehi —náichapa.

³ Tásiha, majicapavacapa ema Jesús:

—Németeaca éti vahi ecaicutiara eta tacayemaquene eta Sagrada Escritura, eta máichavaquenevahi ema víyarahaini David eta mapaisirapahi técuhaipaipa, énerichuvare ena téhicanapahi. ⁴ Écharichuhi éti te masiapapa eta mapena ema Viya, tiyaseserecapa eta manicayarehi. Náijaracapa eta pan tacapichuquenehi nanacasarehi te namirahu ema Viya. Nanicasarehi ena tiyujaracarahiana émasera ema David vahi tátuparahini manicahini. Étasera eta máecuavahi, manicapa eta pan, énapa ena macachanequeneanapahi.

⁵ Tiuri puiti, numetacaheyare: Nuti Manerejirunuhi ema Viya, nútirichu néchahi eta sache nanarasirayare ena achaneana —máichapa.

*Ena Jesús macanaraca ema achane tépenavahu
(Mt 12.9-14; Mr 3.1-6)*

⁶ Tiuri, te apanapa sávaru, tiyanavarepa ema Jesús tayehe eta náurujisireva. Tímiturecavarepa. Tásiha, matiarihíhi ema émana achane, ticajumahi eta mavahu váure. Vaipa tayamuricahini, tépenavahuhi. ⁷ Natiarihíhivare ena escribánoana, énapa ena fariséoana. Náimaharipahi ema Jesús te macanaracayarehipuca ema macajumaquene eta jena sache tacapichuquenehi. Natanunuiricahi eta tivichayarehi éma. ⁸ Émasera ema Jesús máimatíhi

eta napanereruana éna. Tacahe, máechajicapa ema achane ticajumavahuhi. Máichapa:

—Yare, pitupihayare ani te namirahu ena achaneana —máichapa.

Tásiha, titupihapa ema achane te namirahu. ⁹ Tásiha, máichavacapa ema Jesús:

—Nuvaraha epanerechaya. Puiti juca sache sávarumuhuhi, táuricahi víchaya eta táuriqueneana, ¿masi? Táuricahi vípuchayare ena nacajumaqueneanahi, ¿masi? ¿Ímjichapuca tiúriyare eta víchirayare eta tamauriqueneana, vicaparecapuca ena achaneana? ¿Tájahasica eta epanerechahi? —máichavacapa.

¹⁰ Tacahe, ema Jesús máesenimurihapa ena achaneana. Tásiha, máichapa ema achane macajumaquene:

—Nímaha, picajaruvachava pímeraeca eta pivahu —máichapa.

Eta máimeresirahi eta mavahu ema achane, enevanepa tinaravauchavanepa. ¹¹ Tacahe, tiseanmarinehi ena fariséoana eta náimairahi. Tásiha, tiyaserejiricanapapa:

—¿Tájahapuca vícharacaini ema mácatataji eta táimicaviúchaini? —nacahepa.

Ema Jesús manerejica ena dócequeneana apóstoleanayarehi

(Mt 10.1-4; Mr 3.13-19)

¹² Te jena sácheanahi, tiyanapa ema Jesús tayehe eta tápusi eta márijuecu. Tamutu eta jena yati tiyujaracahi me Viya. ¹³ Te tjarahipa, máichuhavacapa namutu ena máimitureana. Manerejicapa ena dócequeneana mayeheanayarehi apóstole. ¹⁴⁻¹⁶ Ena nani ena manerejiruanahi: ema Pedro (éna ticajarevare Simón), émapa ema maparapeichuhi ticajare Andrés; émapa ema Jacobo* émapa ema maparape Juan; émapa ema Felipe; émapa ema Bartolomé; émapa ema Mateo; émapa ema Tomás; émapa ema apana Jacobo; émapa ema apanavare Simón; émapa ema Judas; émapa ema Júlasí Iscariote (éna tjararecahi ema Jesús).

Ema Jesús máimitucavaca ena camuriqueneana achaneana

(Mt 4.23-25)

¹⁷ Tacahe, tichavapa ema Jesús, énapa ena máimitureana. Te tachachacu eta mari táinunapahinepa, émapa nacainunainehi ena camuriqueneana achaneana. Ena nani tiásihanahi eta te avasare Jerusalén, eta te provincia Judea, émapa eta provincia Siria. Eta tímitecanahi éna, navarahahi nasama ema Jesús eta máimiturapiana, navarahavare macanaracavacahini tayehe eta najumana. ¹⁸ Ena ticatajivanahi návaháruanahi ena éreanana, macanaracavacapasera ema Jesús. ¹⁹ Namutu ena achaneana navarahahi náemamahaca ema Jesús taicha náechahi tinaracanayarehi eta najumana eta náemamahasirayare taicha titupajjiacavahi éma.

Ema Jesús máimitucahi nayehe ena ticunachacareanahi me Viya

(Mt 5.1-12)

²⁰ Tacahe, máesenimurihapa ema Jesús ena máimitureana. Máichavacapa:

* **6:14-16** Ema apana Jacobo machichahi ema Alfeo. Ema apana Simón, tímaticarehi éma, náumuvainihí ena revolucionárioana ticajareanahi “cananístana”. Navaraha náquijica ena extranjeroana romanoana, énaripa nacapaquerevacavahi ena israelítana. Eta májuchirahi ema Lucas, ani macahehi: “...ema Judas mayehe ema Jacobo...”. Váipasera vecha te machichahipuca ema Jacobo, téhevare maparapehipuca. Véchahisera eta mapapirahi eta májare ema Judas. Ticajarehi Lebeo émapa eta Tadeo. (Te pivaraha pécha, pitanuca te Mateo 10.3 émapa te Marcos 3.16-19.)

—Éti ímatihí eta tacamunuqueneanahi eta iáchanavana, tétavicavahi eta iúricacarevayarehi taicha máejerare eta ejacapirayare eta máechajiriruva ema Viya, machanerahérayarehi. ²¹ Eti ejamurachahi puiti eta itaresirahi eta matapiravarecare te mamirahu ema Viya, tétavicavahi eta iúricacarevayarehi taicha t́jaracaheyare éma eta evarahaquenehi.

Eti íyauchavanahi puiti taicha eta epecaturana, tétavicavahi eta iúricacarevayarehi. Títecapainapa eta evapinavairaya, écavainapa, taicha eperdonachacareya me Viya.

²²⁻²³ Eti nuchaneranahi, járajapainapa eta sache ticitianacaheanainapa ena achaneana, navarahainapa tíaquijicaheana. Tipanararachaheanainapa. Nacatianapicainapa eta íjareana. Eta juca náichiraheyarehi, táichavenehi eta éhisiranuhi nuti Manerejirunuhi ema Viya. Váhisera ecurami eta juca. Ene nacahehi eta nacatajivairahi ena profetanaini. Te ticitianacaheanahi, jecurisamurechavachucha, evapinavavare! ¡Tétavicava eta iúricacarevaya taicha ejacapainapa eta ícuchirichuhi te anuma!

Éma Jesús máimituachi nayehe ena tavayuaruanahi eta tájiparacana

²⁴ Tacahe, ema Jesús máechajicapa ena apamuriana achaneana, tímicutíjiricavahi natirihí te mamirahu, tiyerehianahisera éna. Ánipa máicha:

—Eti evapinavapa eta ecaimahaquenerahi, páurehesamiyare éti. Tíchechuhainapa eta evapinairavainíhi.

²⁵ Páurehesami eti esatuheherecanahi, taicha ichapenapa eta écuhairaya.

Páurehesami eti ecasamureana eta piesta, écarairicavahi, taicha ichapeyare íyairaya, ecatisamurevainapa.

²⁶ Páurehesami eti namunaneanahi ena achaneana. Eta tacahehi eta nacunachiravacahi ena profetana tépiyacavanahi tímijachavana mavananahi ema Viya, tivayuarahianahisera.

Vémunacayare ena ticitianacahaviana

(Mt 5.38-48; 7.12)

²⁷ Puítiripa eti esamanuanahi, numetacahe: Émunacayare ena ticitianacaheana. Ímereca eta iúriya nayehe ena ticaticahaheanahi. ²⁸ Eyaseaca ema Viya eta nayujarahuina nácani téchajicanahi eyehe. Eyujaracha ena tíumehaheanahi. ²⁹ Te máehahepuca mácani achane te emira, vahi ecujicapa. Íjaracasera eta étachacaya eta emira. Te naverejicahepuca eta esacu, ísapayare. Te naverejicahevare eta ecámisa, énerichuvare ísapayare. ³⁰ Énaripa nácani tiyaseacaheanahi eta ecajirayare, íjaracaya. Te naverejicahepuca eta ímahaqueneana, vahi eucamesa eta náimichaviraina. ³¹ Numetacahe eta apana: Te evaraha eta náuriraya ena achaneana eta eyehe, tituparacahe iúriyare éti eta nayehe.

³² Éti, tájina ecunachacarevaimahi eta me Viya, te nacarichuhi émunaca nácani témunacaheanahi éti. Apanasica témunarahiana ena máimatirahanahi ema Viya. ³³ Tacutiquene, tájinavare ecunachacarevaimahi me Viya, te tacarichuhi icha eta táuriqueneana nayehe ena tíurianahi eyehe. Apanasica títsirijicavanahi ena máimatirahanahi ema Viya. Tituparacahe ecachuricavacayare eta iúriya. ³⁴ Téhevare nacarichupuca íjaraca nácani títsirijicavanahi te ticapucaheana, tájinavare tacunachacarevaina eta me Viya. Apanasica ena máimatirahanahi ema Viya t́jaracana ena títsirijicavanahi te ticapurecana.

³⁵ Étisera émunacayare ena ticitianacaheana. Íchayareva eta táuriqueneana

nayehe namutu. Íjaracavare nácani ticapucaheana. Vahi ecucuchapa eta náitsirijirápiyare. Máimaharine ema Viya. Éma tjaracaheyare eta táitsivayarehi eta iúriivanahi. Eta tacahehi eta ímereuchirava eta machichaheira ema Tata Vicaiyaquene. Taicha éma, tétavicavahi eta máuriva nayehe namutu ena váinarajiqueneana énaripa ena máechavarahanahi eta máemunasiravacahi éna. ³⁶ Ejanapurahiyareva, ecutiyaere eta majapanuirahavihi ema Tata Vicaiyaquene.

Éma Jesús tímitucahavi eta vahi vicucune eta nájecapiravana ena apamuriana achaneana; vítinasera vicuneuchava

(Mt 7.1-5)

³⁷ Vahi ecunemahi eta nájecapiravana ena apamuriana achaneana, váhivare ecucaecahivaca, machu étina táimicuñacahe me Viya. Te májecapavapuca mácani achane, vahi ecubaraha macaicuñavane, apaesa vahi macuicuñacahe éti ema Viya. Eperdonacha ena tójecapavana eyehe apaesa maperdonachahe ema Viya. ³⁸ Ecajirahiya nayehe ena achaneana. Éma Viya títsirijicavayare eyehe. Tímepeánávainapa eta máijararuheyare éma. Te iúrihi éti nayehe ena achaneana, ema Viya, tétavicavayarehi eta máurivaya eta eyehe éti.

³⁹ Tacahe ema Jesús, ánipa tacahe eta máimiturapi, máimicutichirahi:

—Váiparinehi tichurucacanaímahi ena apinana púchuquiána, taicha tíáquipaicavanayarehi te pusú. ⁴⁰ Émaripa mácani amaperu te escuelahipuca, váiparinehi macachuricaímahi mácani mayehe maestro. Tapaenumava te máítucapa, macutisarepa ema mayehe maestro.

⁴¹ Vahi táurica eta ecunerahi eta ánichichaqueneana nájecapiravana ena apamuriana achaneana. Tituparacahe ecuneuchava eta táíchapeva eta éjecapirava étijiva. ⁴² Vahi tituparacahemahi étupirica eta jácani ánichichaquenehi májecapiravahi ema eparaepiya. Tájina eviyahini eta econsejarapínahini. Ichapesera eta tatuparasirahéhi étupirica eta éjecapiravanahi éti. Tapaenumava eta étupirisirapa eta íchavaquenévanahi, táuricapaini econsejacha ema eparaepiya tayehe eta máichavaquenévahi.

Éma Jesús máimicuticha nayehe ena achaneana eta tacahirahi eta yucuquiána

(Mt 7.17-20; 12.34-35)

⁴³ Tacutiquene tímaticarehivare eta táhiana eta yucuquiána. Jararihi eta tinicacareana. Jararihivare eta vahi tánicacare. ⁴⁴ Énerichuvare eta yucuqui tímaticarehi eta táurinisiva eta táhi. Étaripa eta sitavere, váiparinehi tíúchucaimahi eta táhíhíni narasahinahipucaini. Tásiha, eta ijicaquí váiparinehivare tacahimahi eta tahi cachicheruhinahini. ⁴⁵ Ene nacahe nácani tíúriána achaneana tatupiruvahi eta náechajirisirava taicha tíúrihi eta nasamure. Nácanisera achaneana váinarajipanereruana, vahi tíúrimahi eta náechajirisirava. Tíñemahipivacahi taicha eta tavayuchahi eta tavainarajiva eta nasamure.

Éma Jesús máimicuticha ena tisupajirahiana énapa ena masupajirairahana

(Mt 7.24-27)

⁴⁶ ¿Tájaha tacayema eta échajicanu éti, “Tata náquenu” ecahepa; tásiha vahi esupahini eta nuvanairipiana?

⁴⁷ Nácani tisuapanuanahi náitaucahivare eta nuvanairipianahi, téchema-rahianahi táicha. Nuvaraha nímicutichinahe éna. ⁴⁸ Nacutiyarehi mácani títuca ticatupiareca peti, manacayarehi eta túmeana yucuqui emuruquiana. Tiúpenavacahi máicha eta masucuqueruana. Jéhesare te járajapapa eta muraca técatícava, tiámaquiha eta tiquiva, tísiamapa eta une, váipasera tacaeyaya- cahini eta peti, taicha máetupiricahi eta máepiyasirahi. ⁴⁹ Nararihivare ena tépiyacavana tisuapanuana, váhisera náitaucahahini eta nuvanairipiana. Éna nacutihi ema máitucaraha tépiyareca peti. Vahi manacaimahi eta túmeana yucuqui, váhivare táusiapirahini máicha. Te járajapapa eta muraca técatícava, tísiamavarepa eta une, tacajimuyapaicapa eta apaquehe. Tíjahúchavapa tíajúpaicava eta peti, témitiequenepa tamutu —máichavacapa ema Jesús.

7

Éma Jesús macanaraca ema mamusura ema capitán romano (Mt 8.5-13)

¹ Tiuri, te títapiricapa ema Jesús eta máimitusiravacahi ena achaneana, tichavapa eta te avasare Capernaúm. ² Matiarihíhi ema achane apavasana. Comandante éma nayehe ena suntaruana romanoana. Capitán eta mávacure. Ticajumahi ema mamusura. Tiánehiripahi tépena. Ichaperinehi eta máeñamiravahi taicha máemunarúquenehi ema mamusurahi. ³ Tacahe, te masamairicapa ema capitán eta matiarihirahi ema Jesús, máevatacavacapa ena náiyamurianahi ena israelítana náichuhapanayarehi ema Jesús, macanarasinapanahini ema mamusura. ⁴⁻⁵ Tacahe, te náitecapauchapa ema Jesús ena vanairucanahi, nayaseacapa, ánipa naicha:

—Mararihi ema capitán te víávasahi. Ichapemuri eta máimicatasirahavihi. Máemepiyarecahivare eta ichape peti eta víurujisirareva eta viyujarasi-rarehi. Tásiha puiti, tivanecahavihi víchuhapanávi picatajicahini picanarasinapanahini ema mamusura. Tatuparacahi pímicatacaini ema maena —náichapa.

⁶ Tacahe, ema Jesús tísapavapa tiyana, máehicavacapa éna. Étasera te tiánehanapa eta mapena, mavanecavacapa ema capitán ena máimaticasareana, nametapana ema Jesús. Ánipa naicha:

—Tata Jesús, eta juca máechajiriruvahi ema capitán: “Tata, vahi picucaña-macava eta pítesiraina eta nuyehe, taicha vahi táuricahini pisiapauchanusa-minihini te nupena. ⁷⁻⁸ Eta tacahe, vahi nupatsicavahini nútijacarávaihini níchuhapanávi. Németeaca tarataharichu picavanairipi eta picanarasiraya ema numusura. Taicha nútí nusuapahi te tivanecanuana ena anuquehe-pananahi eta nuyehe. Nútiripa nusuapacarehivare nayehe ena nusuntaru-ranahi. Te nuvanecavaca, téhevere níchuhavacapuca, tisuapanuanahi. Te nuvanecapuca ema nuvaneru, enurujipa tisuapanuvane” macahepa.

⁹ Te masamapa ema Jesús eta juca, ichaperinehi márami eta yátupirahi macasiñavairahi eta mayehe. Máichavacapa ena téhicanapahi:

—Numetacahe: Nájina nímaha émanaina vijaneana israelíta mácutini ema maca achane apavasana eta macasiñavairahi eta nuyehe —máichavacapa.

¹⁰ Tacahe, nacarinepa tichavanahi ena vanairucana. Te títecapanapa, náimaharinehi ema macajumaquenehini, tinaracaripa.

Éma Jesús macaecheputa ema amaperu máepenaquenehi, suchicha esu esena suépenaimaquene

11 Te táequenepa eta juca, tiyanavarepa ema Jesús tayehe eta avasare ticaijare Naín. Náheicapahivare ena máimitureana, énapa ena camuri-queneana achaneana. 12 Te títecapanayarepa te avasare nácapajicavacapa ena achaneana tiámanapahi ema máepenaquene, náecarayarehi. Camuriana-pahivare ena achaneana téhicanapahi. Éma máepenaquenehi, macarichuhi suchichahi esu esena suépenaimaquenehi. 13 Eta máimairahi ema Viáquenu, majapanurinehi esu esena. Tásiha, máichapa:

—Vahi picuiyaha —macahepa.

14 Tásiha, mapauchapa ena tiámanapahi ema máepenaquene. Titupihanapa éna. Máemamahicapa eta macajone. Tásiha, macahepa:

—Nuchicha, núti nuvanecavi, péchepuca —macahepa.

15 Enevanerinehi téchepucapa ema amaperu máepenaquenénihí. Téchajicapa ema amaperu. Tásiha, ema Jesús máijaracapa esu maena. 16 Tacahe, ichaperinehi tiáramicarehi eta juca nayehe ena camuriqueneana achaneana. Ánipa nacahe:

—Tétávicava eta macunachacareva ema Viya. Jéhevare ema maca achane yátupiquene profeta, mavaneruhi ema Viya. Tétávicavapa táurisamurecareva eta máuchusirahi te vimuri —nacahepa.

Ena apamuriana ánivare nacahe:

—Ema Viya tiúcupauchahavihi tímicatapanahávihi viti machaneranahi —nacahepa.

17 Eta juca máichaquenehi ema Jesús, téchacarevanepa tamutu avasareana te návasanahi ena israelítana. Títecavarepa te táyerehiqueneana avasareana.

Ena Juan Tícachasiricarahi mavanecavacapa ena máimitureana (Mt 11.2-19)

18 Énerichuvare ema Juan, te mávihahi te cárcel, masamairiricapa eta juca taicha nametacapa ena máimitureana. 19 Tacahe, máevatacapa ena apinana, nayaserepanayarehi ema Jesús te yátupihipuca émaripahi ema Cristo ema macuchapaquenehi. 20 Tacahe, ena vanairucanahi me Juan náitecapauchapa ema Jesús. Nayaserecapa, ánipa náichahi:

—Ema viáquenu Juan tivanecahavihi viyaserepanaviyare te yátupihipuca pítiripahipuca Cristo ema vicuchapaquenehi. ¿Téheserapuca vímijanavaya-repuca vicuchapa? —náichapa.

21 Eta náitecapauchirahi ema Jesús, éma ticanararerecaichahahi ena nacajumaqueneana, énapa ena nacajaraqueneana. Máquijicavare ena éreanana tiávahácanahi nácani achaneana. Macaimairicavare ena maveraqueneana púchuquiana. 22 Tacahe, ema Jesús majicapavacapa ena vanairucanahi me Juan. Máichavacapa:

—Nuvaraha ímararacaya eta níchaqueneana puiti. Nucaimairicavacaipa ena púchuquiana. Nímipaisiraipa ena masariana. Nucanaracavacaipa ena leprósoana, énapa ena túhuquiñana. Nucaechepusiravacaipavare ena náepenaqueneanaini. Énerichuvare níchuhahi ena páureana náeneuchava apaesa náuchucuha. Tásiha, eyana emetaca ema Juan tamutu eta níchaqueneanahi. 23 Vaipa macueñamava ema Juan eta nuyehe. Tétavicavapa eta máuricacarevahi éma, te ticasíñavahi eta nuyehe —máichavacapa ema Jesús.

24 Tacahe, tichavanapa ena vanairucanahi me Juan. Tásiha, tépanavavarepa téchajica ema Jesús, máechajisihapa ema Juan. Ánipa macahe eta mametasiravacahi ena achaneana:

—Nuvaraha epanereuchayare ema Juan. Te jácani vuíchaha nacaratacahini éma, te eyanapa te mávapahi apaquehe te mávihahi, ¿tájaha eta epanereruana tayehe eta macametairuirahi? Éti ímijachavaipapuca mamapachichijiriruvaichucha eta máechajisirahi tacutihi te vímararaca eta taflurena eta acutena te tacayamuririjicahi eta técatcava. ²⁵ Ímijachaipavarepuca tavayuaruhi ema tiúrinanácvayarehi eta macamuirihairahi. Écharichuhi éti mácani tiúrinanacavahi, píncanillahi eta máitaresira, váiparinehi tiúchucaimahi te sache, váhivare tiyanaimahi te mávapahiana apaquehe. Manasiqueneyarehi te jácani tiúrina peti. ²⁶ Nuyaserecahe: ¿Nájahapuca ímijachahi éma? ¿Ímatihipuca eta profetairahi éma? Núti numetacahe: Matupiruvahi eta macametairuirahi ema Juan. Mavaneruhi ema Viya eta yátupiquenehi profetahi éma. Nájina mácutihini ena apamuriana profetana. ²⁷ Ema maca Juan émara máechajisiquenehi ema Viya eta te Sagrada Escritura, ánipa macahehi: “Nuvanecayare ema tinapumirauchaviyarepahi ema ticametairuyarepahi, apaesa natsecavapaipa ena achaneana eta najacapirovarepahi” tacahepa eta Sagrada Escritura. ²⁸ Núti nutupiruva numetacahe: Ema maca Juan, nájina mácuti nayehe ena achaneana. Tétavicava eta macunachacarevahi. Iápajupanavahisera eta ecunachacarevahi eti nuchaneranahi, apaesachicharipa eta ecaicutiarairahi eta mapanereruanahi ema Tata. ²⁹ Ena achaneana, énaripa ena tisipecaturarahianaini, náimatiacahi ema Juan eta mavanecasivahi me Viya. Nasuapahivare eta mametarairuana ema Juan. Eta tacahe, ticaichasianapa mayehe. ³⁰ Énasera ena fariséoana énapa ena máestroana, éna máisapavarahanahi nacaicachasihini mayehe ema Juan. Témepururecavanaripa eta náurivayarehini maicha ema Viya.

³¹⁻³² Etiarihihi eti achaneana puiti juca sácheana, eta emasuapajiraivahi, nímicutichinahesa ena amaperuana tiútseruanahi. Apapipijichucha eta nacayemaqueneanapahi. Ema apana macahepauca: “Vépiyacapa eta piéstachicha”. Énasera ena apamuriana vahi náisapavahini. Tásiha, ema apana macahepuca: “Vépiyacapa eta ecari”. Váhivaresera náisapavahini. ³³ Ema Juan Tícachasiricarahi, te tímerecavapa, muraca eta máimiturapianahi. Eta manicasareana, vahi tácutihini eta nanicasareana ena achaneana. Nararihiera te emuri ena tépiyacquenehanahi éma. Náimijachahi mávaháruhi ema éreana. ³⁴ Núti Manerejirunuhi ema Viya, eta nítecapauchirahepa, nucachaneheripa eti achaneana eta enisirahi. Etiarihihivaresera eti épiyacquenehanuhi: “Ímaha ema maca, cánisiuquitataji, cávahárisi. Macachanevacapaipa ena cóbrarecarahianatataji énapa ena apamuriana nasipecurarahiqueneanahi”. ³⁵ Éti épiyacavapa épururahi, ticutirinehi yátupinahini échemarahihini. Tétavicavahisera eta éjecapiravahi taicha eta emasuapajiraivahi. Te yátupihupacaini échemarahihini, ímatinuhini eta nucavanahirahi eta me Tata*.

Ema Jesús ticaichuhacasihi te mapena ema fariseo ticaijarehivare Simón

³⁶ Matiarhihi ema achane ticaijarehi Simón, fariséohi éma. Macumpirachapa ema Jesús, manipana te mapena. Masuapahisera ema Jesús. Tiyanapa. Te tiúripa eta tinicacare, téjacapa te mesa. ³⁷ Susamairiricapa esu ésuna esena tisipecaturarahinini eta matiarhirahi ema Jesús te mapena ema

* **7:35** Eta juca mayeherepi proverbio ema Jesús te máechajiriruva, ani tacahe: “Eta téchemarahicare, éta nacunachihayare namutu ena tachichanaveana”. Tatiarihi eta tacayemaquenehi tayumurevahi.

fariseo. Tásiha, tiyanapa supauchahi ema Jesús. Suámapaipa eta bótechicha. Tínicapahi eta táijiyequene perfume tasivachaquenehi. ³⁸ Tépuycapa te máivapeana ema Jesús. Tiyahacavapa, táetsipapevachapa eta sutsera. Suájahapa te suchutumaca. Tásiha, suépusapevachavare eta suámaquenepahi perfume, sutsiucapevachavare. ³⁹ Tacahe, eta máimairahi ema fariseo eta juca, mapanerequenhapa. Téchajicapa te masamure: “Te yátupinahini profetaihini ema maca, máimatiacaripahini esu suca esena eta susipeaturaraivatatajihi. Vahi táuricahini suémamacahini” macahesamurepa.

⁴⁰ Émasera ema Jesús masamahi eta mapanereruhi ema fariseo. Máichapa:

—Simón, jucarihi nuvaraha numetacaviya.

Ema fariseo majicapapa:

—Nímahaseji, pimetacanu, maestro —máichapa.

⁴¹ Tacahe, ema Jesús máimicutiarachinapa, máichapa:

—Natiarihi ena apinana ajairana ticanteveanahi mayehe ema rico. Ema émana ticantevehi quiniento; ema apana ticantevehi cincuenta. ⁴² Tacahe, vahi náratahahini navachachahini eta nanteveana. Tásiha, maperdonachavacapa ema rico ena apinana. Tiuri puiti, nuyaserecaviyare. Ena nani apinana, ¿nájahapuca ema témunacapanahi ema rico? —máichapa.

⁴³ Majicapapa ema Simón:

—Ticutimahi ema tisintevepanahi.

Tacahe, máichapa ema Jesús:

—Pímahaipajira.

⁴⁴ Tacahe, ema Jesús máimaracaripahi esu esena. Tásiha, máichapa:

—Pipanereaca esu suca esena. Puítihí, te nusiapapa te pipena, vahi pímisipacahini eta nívape. Ésusera esu suca esena tisipapevachanuhi te sutsera, tíajapevachanupa te suchutumaca. ⁴⁵ Píti vahi pitsiucanuhini eta pijacpiranuhi. Ésusera, ichapemurihi eta sutsiucapevachiranuhi. ⁴⁶ Váhivare piámasichanuhini eta aceite eta pijacpiranuhi. Ésusera esu suca esena tisipapevachanuhi eta te táijiyequene perfume. ⁴⁷ Yátupi tisipecaturainihi esu suca. Numetacaviyaresera, nuperdonacharipahi ésu tamutu eta supeaturanaini. Eta tacahe, ichape eta suímeresirahi eta yátupirahi eta suémunasi-ranuhi. Nácanisera apaesarichuhi eta napecaturanaini, apaesarichuhivare eta náemunaraiva, taicha apaesarichuhivare eta najacpirahi eta nayehe perdón.

⁴⁸ Tacahe, ema Jesús máichapa esu esena:

—Vahi picueñamava, nuperdonacharipa tamutu eta pipecaturanainihi.

⁴⁹ Tacahe, ena natiarihiqueneanahi chimaracanahi náejaruanahi te mesa nacahepa te nasamureana: “¿Nájahapuca ema maca ticaemuñavahi marataha maperdonacha eta pecatuana?” —nacahepa.

⁵⁰ Émasera ema Jesús máichapa esu esena:

—Táuricapa piyana. Yátupi eta piúchucuhairaya táichavenehi eta picasiñairanuhi.

8

Natiarihihivare ena esenana titátianapahi ema Jesús te mapaisihapahi tayehe eta avasareana

¹ Te táequenepa eta juca, tiyanavarepa ema Jesús, tipaichahi tayehe eta tasimutuqueneana avasarechichana. Ticametarairupahi eta máechajiriruva

ema Viya eta náuchucuirayare ena ticasíñavanahi mayehe, machanerana-yarehi. Náehicapahivare ena dócequeneana apóstoleana. ² Énerichuvare náehicapahi ena esenana máepachiaruanahi nayehe ena éreanana tiávahácanainihi. Sutiarihipahi esu María Magdalena, máepachiaruhi nayehe ena siétequeneana éreanana tiávahácanainihi ésu. Natiarihihivare ena apamuriana esenana macanararuanahi tayehe eta apapananenejiqueneanahi najumanainihi. ³ Sutiarihipahi esu Susana, ésupa esu Juana, mayena ema Chuza. (Ema Chuza, mayehehi empleado ema Herodes, téchahi tamutu eta máimahaqueneana ema Herodes.) Maveranahivare ena apamuriana esenana, tiámauchavanapahi eta nirure, náitátirapahi ema Jesús, énapa ena apóstoleana.

Eta máimicutichaquenehi evaraqui tacaevaquenehi te apapananeneji máteji te apaquehe

(Mt 13.1-9; Mr 4.1-3)

⁴ Te jena sácheanahi, camuriana ena achaneana tiyananapaipa napaucha ema Jesús. Tiásihanapahi te avasareana. Te máimahapa éma ena camuri-queneana, máechajicavacapa; máimicutiarachinapa eta máimitusiravacahi. Ánipa máicha:

⁵ —Matiarihi ema émana achane. Tévpapanahi te máesane. Tásihasesa, eta mapaisirapahi témiricapaipapuca eta evaraqui te achene. Eta nanucuiraparacahi ena achaneana, nácatayacapaipa eta evaraqui táemiriruanapahi. Táimahapa eta cáyure, tanicapa. ⁶ Tásiha, eta apana evaraqui témiricapa te máripahi apaquehe. Tímarucainipa, tásihasesa tájijicapa eta sache taicha muracapahihi eta apaquehe. ⁷ Eta apana evaraqui témiricapa te taparereji eta itapequiji. Tiúrinainihi eta táimarusira, étasera eta itape tacachuricapa eta tajurusirahi, táemuriachapa. ⁸ Eta apana evaraqui témiricapa te tiúrina máteji. Tijurucarahihi eta táimarusira. Tiúrinahivare eta tahi. Tájaracahi ichapemuri eta tahi —macahepa.

Te titapiricapa ema Jesús eta máechajirisiravacahi, máichavacapa:

—Te evarahapuca ecaicutiara, tavaraha eta epanerechinavaya —macahepa.

Ema Jesús máitametacavaca ena máimitureana eta juca máimiturapihi

(Mt 13.10-23; Mr 4.10-20)

⁹ Tacahe, ena máimitureana nayaserecapa ema Jesús tájahapuca tacayemahi eta máimicutichaquenehi mayehe ema tévacarahi. ¹⁰ Émasera máichavacapa:

—Ema Tata tituparacanu nítametacaheyare éti eta juca mapanereruana táequenereruana. Mavarahahi ímatiequenehaya éti. Énasera ena apamuriana achaneana nímicutiarachinavacahi, apaesa vahi máejerémahi eta nacaicutiarairaya eta nasamaquenehi. Tavaraha napanerechinavaya. Te vahi yátupina eta navaraira nasuapa, váhivare nacaicutiaraimahi eta nímiturapiána.

¹¹ Étara eta juca tacayemaquenehi: Eta evaraqui tímicutijiricavahi eta máechajiriruva ema Viya eta nímiturapianahi. ¹² Natiarihi ena achaneana nasamaripahinéni eta nímiturapianahi, émasera ema Váinaraji vahi máisapahini tánasíhini te nasamureana. Enevanehi macamítisicavaca eta nasamaquenehi, mamavarairahi nacasiñanuhini apaesa nucuchucuhavacayarehini. Éna, nacutihi eta máteji muracapahi te achene. ¹³ Natiarihivare ena apamuriana achaneana, nacutihi eta máteji máripahi. Te

nasamararaca eta nímiturapiana, nasuapa, tíurisamureanarinehi. Váhiserá naratahahini nacaravahuhini yátupinahíni. Vahi nácutihíni eta evaraqui tíuparehi. Ánipirichu eta náehisirahi. Tíñajicavanávane taicha eta náimairavahi eta nacatajivairahi. ¹⁴ Natiarihivare ena apamuriana achaneana nacuti eta máteji te távihahi eta itapequiji. Énerichuvare nasamararacahinéni eta nímiturapiana. Napaneréquenehahinéni, tahapapiricavacahisera eta jácáni táicharacavayare eta náitaresira. Váhivare náinajicahíni eta tacañamarasiravaca eta tájiparacana, étapa eta navarairahi tirricochavana. Váhivare náinajicahini eta náichirahi eta tamauriqueneana. Tamutu eta juca táemetavicahi eta navarairahi téhicanuana. Tamapurujíhi eta najacapirahi eta nímiturapiana. Tájina vahi nacaemataneacahini ema Viya. ¹⁵ Natiarhisera ena apamuriana achaneana nacutihi eta tíurina máteji. Éna, nasamararacahi eta nímiturapiana, náunacahi yátupi te nasamureana. Tájnavare náichiravainahíni eta náehisiranuhi. Ichape eta nacaemataneasirahi ema Viya. Vahi nayacujimahi.

*Éma Jesús máimicutiarachava eta lámpara eta máimituresira
(Mr 4.21-25)*

¹⁶ Ánivare macahe:

—Súnsuanahi nácani tiyustacanahi eta lámpara namichayarehi, tásihasera, najihapaicapapucaini, nanacavarepucaini te tápecu eta náetsatsame náimasirare. Vahi tamicauchaimahi. Tacamunuhi nanacayarehi te anuquehe. Jéhesare ticaecherasareyarepa tamutu apaesa nácani tisiapanapahi, tímairicanayarepahi. ¹⁷ Tayanapanepuca ticayumuruquianahi, tamutyarehisera ticaechera jácáni tayumurevanahi. Tájina tépacuchaimahi jácáni najajairairuvanahi. Tamutyarehi téhacareya.

¹⁸ Eta tacahe, ecaquiñaicha yátupina eta juca. Taicha mácani máitururuequenehahi yátupi, tiápajucavayarehi eta máitupajijiasiravayarehi. Mácanisera apaesarichuhi eta máitucaquene, te váipa mapanerequenehahini, máemitisicayarehi eta máitucaquénéihini.

*Súitecapachapa esu maena éma Jesús énapa ena maparapenaveana
(Mt 12.46-50; Mr 3.31-35)*

¹⁹ Tacahe, esu maena éma Jesús énapa ena maparapenaveana títecapanapa te peti te máimituresihahi éma Jesús. Váhiserá náitujicavahini nasiapahini taicha tiyututucavanahi ena achaneana. ²⁰ Nametacapasera ena apamuriana achaneana éma Jesús:

—Esu pémunaruquenehi pena énapa ena piparapenaveana nararihi ani te aneca, navarahahi téhajicaviana —náichapa.

²¹ Émasera majicapavacapa:

—Yátupi némunacavacahi esu meme énapa ena nuparapenaveana. Nararihisera ani te juca nuchacaya ena némunaruanahivare, nuparapenaveanahi. Taicha tisuapajirahianahi éna tayehe eta máechajiriruvana éma Viya, ticaemataneacanhivare éma —máichavacapa.

*Éma Jesús macaesamirica eta táepacusirahi eta une étapa eta técaticava
(Mt 8.23-27; Mr 4.35-41)*

²² Étana sache, éma Jesús tiávacuhapa eta te pacure. Tásiha, máichavacapa ena mayeheana apóstoleana:

—Viyana, viánueca te apachara —máichavacapa.

Tacahe, tiyananapa tiánuecanayarehi. ²³ Eta napaisirapahi, ema Jesús tívecapa tímacaipahi. Tacahe, járajapainapa eta muraca técativava. Tépacucapa muraca eta cáquiure. Tasiapauchapaipa eta une te pacure. Tipicanapa ena máimitureana, taicha tímaticavanapa eta náecharisiravayarehi. ²⁴ Tacahe nacajamicapa ema Jesús, náichapa:

—¡Maestro! ¡Maestro! ¡Péjamica! ¡Pímaha vécharicavainapa taicha eta tépacuca!

Enevanepe téchepucapa ema Jesús. Macamatinacapa eta técativava étapa eta táepacusráhi eta une. Tésamiriecavapa tamutu. ²⁵ Tacahe, máichavacapa ena máimitureana:

—¿Tájaha tacayema vahi ácasíñavahini eta nutiarahirapahi eta eyehe? — máichavacapa.

Énasea tiáramecanapa. Tésenijiricacanapa, tásiha nacahepa:

—¡Tétavicavapa eta máitupajjiasirava! ¡Jéhesare, yátupiquene eta émairahi machichahi ema Viya! Taicha eta mavanairipi, tamutu tasuapahi eta técativava étapa eta une —nacahepa.

Ema achane návaháruanahi ena ichapemuriqueneana éreanana (Mt 8.28-34; Mr 5.1-20)

²⁶ Tacahe, títecananapa te apachara tayehehi apaquehe eta provincia Gadara. Te apachara tacanaraipahi eta provincia Galilea. ²⁷⁻²⁹ Te tiúcupaicapa ema Jesús, énapa ena máimitureanahi, máuchujiuchavacapa ema émana achane. Ema maca achane mávasaichuhi tayehe eta juca avasare Gadara. Tájinasera máimatyahini mayanahini te peti taicha namaurishichaipahi ena camuriqueneana éreanana tiávahácanahi. Ánaquiaparipa eta návahásirahi. Nametapanéni ena achaneana nacaratata. Náitiaca te ichapepi carena étapa te enure, te náimahavarepa tacananesica naicha ena tiávahácanahi. Émasera, tétavicavaipahi eta matumevahi. Mavechuquimurivare eta carena máitihanahi. Tijunavare, tiyanavarehi te mávapahiana naicha ena éreanana. Macapenajuechavacahi eta ecariana. Mamuriarehi eta máitaresirahi.

Tacahe, te máimahapa eta matiarahirahi ema Jesús, mapauchapa. Tépuycapá te mamirahu. Ema Jesús mavanecavacapa ena éreanana náinajiacá ema achane. Ema achane tipiararecapa. Ánipa macahe:

—¿Tájaha picha piteca pipauchanu, piti Jesús, Machichaquenevihi ema Viya? ¡Pájapanunu vuíchaha picuvanecanu ánaqui te nucaicuñaiyayare! — máichapa.

³⁰ Tacahe, ema Jesús mayaserecapa:

—¿Tájaha píjare píti?

Ema achane majicapapa:

—Núti nucaijare “Nacapenaharu ena ichapemuriqueneana éreanana”.

Éma, tacahehi eta majicapirahi ema Jesús taicha camurianahi ena tiávahácanahi. ³¹ Tacahe, ena éreanana nayaseacapa ema Jesús vahi macuaquijicavaca te táupenaquene pusu náicuchihí návihayare éna. ³² Tatiarivare eta camuriqueneana cóchiana. Tinihicanahi te táemiripaisine eta masihi. Ema éreanana nayaseacapa ema Jesús máisapahini nasiapahacavaca eta cóchiana. ³³ Tacahe, ema Jesús macuchuchujicavacapa te máquehe ema achane, máisapahivare nasiapahacavaca eta cóchiana. Te tasamapa eta cóchiana

eta nasiapahasiravacahi ena éreanana, tijunaparacanapa témiririjicanapa te tachaui eta cáquiure. Téririjicanapa tamutu.

³⁴ Natiarihivare ena tijaneacanainihi eta cúchiana. Te náimahapa, tiáramecanarinehi. Tiyananapa tijunapanapaipa timetajiricanapaipa nácani nácapajiruvanapahi, étapa te avasare namutuvare nametaca. ³⁵ Tiáramicaréinehi nayehe ena achaneana. Tiyananapa náimahapana tájahapuca eta táichavaquenevahi eta cúchiana. Te títecapanapa, náimahapa ena achane návaháruinihi ena éreanana. Téjacaripahi te máivapechacaya ema Jesús. Tájinaripahi máichiravainahini. Ticamuirhaipahivare. Tásihasea, tipicanarinehi ena achaneana. ³⁶ Tavetijipa te náitametacapa ena tímahanahi eta macuchuchujisirahi ena éreanana te máquehe ema achane. ³⁷ Tacahe, te nasamairiricapa, namutu ena achaneana ticavasanahi te Gadara, vaipa napatsicavahini máitecapauchavacahini ema Jesús taicha náeñamaipahi tácahémahivaréni eta apamuriana náitátiqueneana. Nayaseacapa ema Jesús machavahini te másinehi. Tacahe, tiávacuhavarepa éma, tichavavarepa. ³⁸ Tacahe, ema achane mayaseacainipa ema Jesús máisapahini máehica. Émasera máevatacaichucha machava te mapena. Ánipa maicha:

³⁹—Piyanchucha pichava te pipena. Pimetajiricaya eta majapanuiravihi ema Viya eta macanarasiravihi —máichapa.

Tacahe, tiyanapa tichavahi ema achane. Mametacavacapaipa namutu eta macanarasirahi ema Jesús.

Ena Jesús macanaraca esu machicha ema Jairo, ésupa esu apana esena sucajumaquenehivare

(Mt 9.18-26; Mr 5.21-43)

⁴⁰ Te títecapavarepa ena Jesús te apachara, enevanepa nácapahi ena ichapemuriqueneana achaneana taicha nacuchaparairicaipahicha. Tiúrisamureanarinehi eta náimairahi éma. ⁴¹ Títecapavarepa ena émana achane ticajare Jairo. Ema maca achane, tuparairucahi tayehe eta náurujisirareva tayehe eta jena avasare. Tacahe, ema maca achane tépuyucapa te mamirahu ema Jesús. Mayaseacapa macatajicahini mayanahini te mapena, macanarasinapanahini esu machicha. ⁴² Taicha ésunaracavahi esu machichahi. Doce añoripahi eta suhañorahi. Téñamajiricavaipahi ésu, taicha eta sujuma. Tacahe, tiyanapa ema Jesús, máehicapa te mapena. Náehicavarepa ena camuriqueneana achaneana. Váipanecha náratavapahini eta napaisirapahi.

⁴³ Sutiarihipavare esu apana esena, sucajumaquenehivare. Doce añoripahi tayerevahi eta suhitiarevahi. Ichapemuripa eta sutanusirahi ena médicoana, váhisera sucanarahini ésu. ⁴⁴ Tépiyayacavapa témeñahava te maquecu ema Jesús. Suémamajiacapa te tacheyarapi eta mamuiraha. Enevantinehi tinaraca ésu. Tíhecapa eta suítine.

⁴⁵ Émasera ema Jesús masamarichucha eta suémamajiasirahi. Macahepa: —¿Nájaha témamajiacanuanahi? —macahepa.

Nájina tísapavaina.

Émasera ema Pedro énapa ena machamuriana náichapa:

—Maestro, pímaharichuhi eta nasimutuvahi ena achaneana. Tiyututuavanahi te pichacaya. Váiparinehi tímaticarémahi nájahapuca nácani témamajiacavianahi —náichapa.

⁴⁶ Émasera ema Jesús macahevarepa:

—Nacañárihi témamajiacuananahi taicha nusamavahi nútí eta nucanarasirahi eta jumare táichavenehi eta nítupajijiasiravahi —macahepa.

⁴⁷ Ésusera esu esena, tímatiacavapa eta máimatirahi ema Jesús eta suémamajiasirahi, tiyanapa supauchahi. Tépuycapa te máívapechacaya. Tiyayacareripa eta supisirahi. Sutupiruvapasera timetaurecavahi eta ésuirahi témamajiacahi. Ánipa sucahehi:

—Tata, nútira némamajiacavihi, nuvarairahi nunaraca tayehe eta numumahi. Nusamavaipasera eta nunarasirahi —suíchapa.

⁴⁸ Tacahe, ema Jesús, máichapa esu esena:

—Tiuri, nuchicha, pinaracapa puiti táichavenehi eta picasiñairanuhi. Vaipa picueñamava eta pichaviraya te pipena —máichapa.

⁴⁹ Téchajiricavaichahahi ema Jesús eta suyehe esu esena, títecapanecha ema émana achane tísihahi te mapena ema Jairo. Mametacapa:

—Esu pichicha tépenasamipahi. Vaipa picucamesa ema Maestro —máichapa.

⁵⁰ Émasera ema Jesús, te masamapa, máichapa:

—Vahi picuarameca, váhivare picueñamava. Pácasiñava eta nuyehe. Tinarcayareichu esu pichicha —máichapa.

⁵¹ Tacahe, tiyanavanepa ema Jesús. Te títecapanapa, vaipa máisapahini ema Jesús nasiapahini ena achaneana. Nacarichu tisiapanahi ema Pedro, ema Jacobo, ema Juan, émapa ema suiya esu amaperu, ésupa esu suena. ⁵² Natiarihihísera ena achaneana te tajuhe. Tiyahanaripa éna. Te máimahavacapa ema Jesús, máichavacapa:

—Vahi ecuiyaha. Váhira suépenahini esu suca amaperu. Tímacarichucha —máichavacapa.

⁵³ Técanarichuchasera eta mayehe éma, taicha náimahahi eta suépeniraipahi. ⁵⁴ Tacahe, ema Jesús macaratacapa eta suvahuana. Tásiha, máichapa: —Nuchicha, nuvanecavi: Péjamica, péchepuca —máichapa.

⁵⁵ Tacahe, esu amaperu tichavapa títareca. Tásiha, téchepucavanepa. Ema Jesús mavanecavacapa ena ticachichana náijaraca eta sunica. ⁵⁶ Ichape-rinehi eta náramirahi ena ticachichana. Émasera ema Jesús matuparacavacapa vahi nacuechajisiha eta náimahaquenehi.

9

Ema Jesús mavanecavacapa ena dócequeneana apóstoleana, napaicayare tamutu avasareana

(Mt 10.5-15; Mr 6.7-13)

¹ Ema Jesús macurujimurihapa ena dócequeneana mayeheana apóstoleana. Tacahe, máijaracavacapa eta náitupajijiasiravanayare naratahairayare náquijica ena éreanana, naratahairayareva nacanaraca nácani nacajumaqueneanahi. ² Tásiha, ticavanahianapa ticametarairuanayare eta tacamunucarevayarehi náeneuchiravayarehi ena achaneana, náinajisiraina eta napecaturana, náehica ema Cristo. Ticanaracanayarepahivare nácani nacajumaqueneanahi. ³ Eta mavanesarayacahi, máichavacapa:

—Tájina íámaimahi eta eyereruva. Váhivare ecucayupairiquipahi. Tacuijavare ecanirurucuhaina te alforja. Étaripa eta plata, tacuijavare iama. Étanainarichu eta emuiriha íamayare. ⁴ Enasinumayarepahisera te jácani peti nayehe ena tíurihi eta najacapiraheya. Tiámainucava te táitecapa eta

eyanirayareva. ⁵ Téhesera nacuijapuca nacubaraha najacapahe tayehe te jácani avasare, váhivarepuca nacubaraha nasama eta emetarairuya, iúchucavanepa. Étatapevachavanumayaresera eta máteji te ívapeana. Táicutiarayare eta máicuñasirayare ema Viya taicha eta namavarairahi najacapahehini — máichavacapa.

⁶ Tacahe, tiyananapa ena apóstoleana. Tamutu napaica eta avasarechichana. Ticametarairuanapaipahi eta máechajiriruva ema Viya, eta viúchucuiraya majacapirahaviyare éma. Ticanararecanapaipavare ena nacajumaqueneana nácani náetupiaruanapahi.

Ena Herodes masamairiricavare tamutu eta juca máichaqueneanapahi ema Jesús

(Mt 14.1-12; Mr 6.14-29)

⁷ Tacahe, ema aquenucahi Herodes masamairiricavare tamutu eta tiáramicareana máichaqueneanahi ema Jesús. Váipasera máitucarehini. Taicha masamairiricahi náimijachahiji émahí ema Juan téchepucahi te máecari. ⁸ Ena apamuriana náimijachahivare téchepuca ema antivuini profeta. Ena apamuriana náimijachahivare ema Elías. ⁹ Émasera ema Herodes macahepa:

—Nútijacaru vahisera nucavanairipi náechatinuca ema Juan, eta máepenirahi. Puiti, ¿nájahapuca ema maca nusamaiririuasaparacahi eta máichira eta tiáramicareana? Nuvarahasa nímatini ema mácara —macahepa.

Ena Jesús máitaparaha máenicavaca ena camuriqueneana achaneana

(Mt 14.13-21; Mr 6.30-44; Jn 6.1-14)

¹⁰ Tacahe, tichavanapa ena apóstoleana eta napaisirahi. Nametacapa ema Jesús tamutu eta náichaqueneanapahi. Tásiha, éma mámamurihavacapa te mávapai, tinapaicahi eta avasare Betsaida. ¹¹ Téhesera náechavarepa ena achaneana eta macaijuhehi ema Jesús, tiyanavarepa nacapayacahi. Émasera majacapavacaichucha, máimitumuriharipavare tayehe eta náitaresira ena machaneranahi ema Viya. Macanaracavare ena nacajumaqueneanahi.

¹² Te náimahapa ena apóstoleana cáperehiyareipahi, témeñahavanapa eta mayehe ema Jesús. Tásiha, náichapa:

—Táuricapa pivanecavaca ena achaneana nayanapa natanuca eta nanisiha étapa eta náimasihaya te avasarechichana tachacayarahanahi eta juca viávihihi, taicha ani, tajina náviyavaimahi eta te juca —náichapa.

¹³ Tásiha, ema Jesús majicapapa:

—Étina, íjaraca eta nanica.

Énasera náichavarepa:

—Tájina viviyaimahi eta nanicahini ena nani achaneana. Jucárihinéni cinco eta pan, apiquipa jima jitaruca. Váiparinehisera nárataimahi. Tayanapane tatiarihinapucaini eta vivacharesihahini eta tinicacare, váiparinehivaresera nárataimahi ena nani camuriqueneana achaneana —náichapa.

¹⁴ Ena achaneana, cinco mil eta náichapemurivahi ena ajairana, énarichahavare ena esenana, énapa ena amaperuana.

Tásiha, ema Jesús máichavacapa:

—Evaneca náejahapaicavaca ena achaneana. Cincuentavacainapahi eta náiputsitsisiravaina —máichavacapa.

15 Énepasera tacahehi naicha ena apóstoleana. Tásiha, ticaejarecanapa namutu. 16 Tacahe, ema Jesús mavehapa eta cincoquene pan étapa eta apiqui jima. Másenicapa te anuma. Mahasulupayachaipa ema Maiya eta máenisiravacayarehi ena camuriqueneana achaneana. Mayuvettutuecavacapa, májaracapa ena apóstoleana. Nájaracapasera namutu ena achaneana. 17 Namutupa tinicana, tisuhevacapa. Váharuvare náitahini eta tinicare. Dócehi saye ichapehiana tínichi eta náemacharájana.

Ena Pedro máimereucha ema Jesús eta émairahi Cristo
(Mt 16.13-19; Mr 8.27-29)

18 Étana sache, ema Jesús énapa ena máimitureana tiápechavare típutsiacavana, tiyananapa tayehe eta nayujarasihayarehi. Te titavanapa eta nayujarasirahi, éma mayaserecavacapa:

—¿Tájaha nacayema ena achaneana eta nuyehe? ¿Nájahapuca náimijachanuhi éna? —macahepa.

19 Éna najicapapa, ánipa naicha:

—Ena apamuriana náimijachavijiji téchepuca ema Juan Tícachasiricarahini. Ena apamuriana tímijachavianahi ema víyarahaini profeta Elías, téchepucahi éma. Ena apamuriana tímijachavianahivare ema mácani apana profetaini antiviuni, téchepucahi —náichapa.

20 Ema Jesús mápechavare mayaserecavaca éna:

—Étiyapa, ¿nájaha ímijachanuhi núti?

Ena Pedro majicapapa:

—Pítira yátupi queneví Cristo, piásihaquenehi me Viya —macahepa.

Ena Jesús tímereuchava eta máepenirayarehi
(Mt 16.20-28; Mr 8.30-9.1)

21 Tásiha, matuparacavacapasera ema Jesús nacuija nacumetaca eta émairahi ema Cristo. 22 Tásiha, máichavarepa:

—Tacamunuichaha eta ichapemuriyare eta nucatajivairaya, nuti Manerejirunuhi ema Viya. Tépurunanayare ena tuparairucana énapa ena aguenucarahana énapa ena escribánoana. Éna, tímicapacuanayareva. Mapanaya-reichuhisera sache eta nucaheyare eta népenirayare. Tásiha, nuchavayarehi néchepuca —máichavacapa.

23 Tásiha, máimitucavacahi namutu ena achaneana, ánipa máichavaca:

—Nácani navaraha náehicanu, tacamunu náinajica tamutu eta tihapapiricana eta náehisiránuhi. Nacaravahuyareva eta nímiturapiana. Nájaracavavare eta táimicapasiraina eta náehisiránuhi. 24 Nácanisera téñamanahi eta náitaresira, tiávamirahuanaya eta náehisiránuya, énajivayare ticamitiequenehavanaya eta náitaresira. Énasera nácani yátupihí tjaracavana téhicanuana, tayanapane táimicapacavacapuca eta náehisiránuhi, éna títujicavanayare tíuchucuhanayare eta náitaresiranaya. 25 Énerichuvare nácani tacáeñamaruanahi eta nacaimahaquenéirayare te juca apaquehe, tájina náimaequenehaimahi, taicha eta tacaéñamarasiravacahi tahapapiricavacahi tayehe eta náuchucuirayare. 26 Énaripa nácani titsirihanapuca téhicanuana, náimitsirihapuca eta nímiturapiana, núti apanava nutsirihayarevare nayehe ena nani. Nucaerajicainapa ena nani, núti Manerejirunuhi ema Viya, te táitecapapa eta sácheyare nuchavirayare aguenucanuinaipa. Te jena sácheyare, námainaipa núti eta nujaraiva, étaripa eta majaraiva ema Tata.

Nucachanénapa ena sántoqueneana ángeleana. ²⁷ Nutupiruva numetacahe: Puítiripa te etaracu éti, etiaríhi éti vahí épenavanéimahi, ímahanumayare eta nucatuparahairahí aquenucanuya nuti Manerejirunuhi ema Viya — tacahepa eta máimituresirahi ema Jesús.

Ena Jesús, tíhapamaichava eta máimahi

(Mt 17.1-8; Mr 9.2-8)

²⁸ Tiuri, te táequenepe eta óchoquenehi sache, tiyanapa ema Jesús, tíapanahi te anuquehe mari. Tiyujarayarehi. Mapananarichusera ena mámaqueneanahi: ema Pedro, ema Jacobo, émapa ema Juan. ²⁹ Tacahe, eta mayujarasirahi ema Jesús énapa ena mámaqueneanahi, tíjahúchavapa títsivachavahi eta máimahi ema Jesús. Apaimahipa eta mamira étape eta mamuiríha. Tétaví-cavapa eta tajapuvahi tajararasirahi tamutu eta máquehe. ³⁰ Tásiha, tíárami-careanavarepa tímerecavana ena apinana ajairana. Téchajiricavanaripa mayehe ema Jesús. Ema émana, émahi ema víyarahaini Moisés. Ema apana, ema víyarahaini profeta Elías. ³¹ Tétavícaivaipahivare tajararasirahi eta te natupíhaiyahi. Náechajisíhaipahi eta macatajívairayarehi máepenirayarehi ema Jesús tayehe eta avasare Jerusalén. ³² Tavarahaipaichanéni tímaca ema Pedro énapa ena apinana machamurianahi. Téhesera te náimahapa eta tíjararacahi te nachacaya, témitiacarinehi eta náechapuneana. Náimarracaripahi eta majaraivahi ema Jesús, énapa ena apinana ajairana tíucupauchanahi. ³³ Tacahe, te máimahapa ema Pedro eta nachavirayarepa ena nani apinana, témeñahavapa. Tásiha, macahepa:

—Tata Maestro, tétavícaavapa táurícareva eta víavíhairahi eta ani. Tíúripa-nahípucaíni vépiyacahíni eta epenahuínápachuhíni. Pipenahuínarichuhíni píti, mapenainarichuhívaréni ema Moisés, émapaini ema Elías — máichapa.

Váhinéni máimatíequenehahíni ema Pedro tájahahípuca eta mavarahaquenehi macayema. ³⁴ Tacahe, eta máechajirisiravaichahahi, tíjahúchavapa tíucupaicahi eta úcaji, tamuíchavacapa ema Jesús énapa ena apinana ajairana. ³⁵ Tásiha, nasamarinehi eta mahu ema Viya, tayehe eta úcaji. Ánípa macahe:

—Ema maca ema yátupíquenehi nuchicha némunaruquenehi. Éma esuapayare —macahepa.

³⁶ Te tímatinapa eta mahu ema Viya nasamaquenehi, náimahapa ema Jesús, macarineipahi. Nájinaripa ena tíucupauchanahi.

Tacahe, ena mapanana apóstoleana, tíyerehi eta namametasirahi ena apamuriana nachamuriana eta náimahaquenehi.

Ena Jesús macanaraca ema amaperu mávaháruhi ema éreana

(Mt 17.14-21; Mr 9.14-29)

³⁷ Te apanaquenepe sache, tíucupaicanavarepa tayehe eta anuquehe mari návinehi. Natiaríhipavare ena camuríqueneana achaneana. Te náimahapa ema Jesús, tiyananapa nácapahi. ³⁸ Matiaríhihi ema émana achane te namuri ena camuríqueneana achaneana. Tipiaracapa muraca éma, ánípa macahe:

—Tata maestro, picatajicanupaini pípuchinanuini ema maca nuchicha. Émanaracavahi te numirahu. ³⁹ Mávaháruhi ema éreana. Macapíarare-recahi técharípaicavavare ticarísasajacavare. Ichapemuri eta macatajívaira máicha. Vahí mávaraha máinajíaca. ⁴⁰ Néchajiacarípahínéni ena pímitureana. Váhísera náratayahíní nacuchuca ema éreana tíavahácahi ema nuchichasamí —máichapa ema achane.

⁴¹ Tásiha ema Jesús majicapapa:

—¡Tétavicava emasuapajiraivavaca eti achaneana! ¡Cúverarecaichapucaini eta nucamichirahenahini! Piama ani ema pichicha.

⁴² Temeñahavainipa ema amaperu, tápechavarepa tacañamacahi tiáquipai-cavapa, téchariripaicavaipavare. Émasera ema Jesús, máquijicapa ema éreana, muracapavare eta macajachirahi. Tásiha, máijaracapa ema maiya, tinara-caipahi. ⁴³ Náramirinehi ena achaneana taicha eta tamutuirahi marataha ema Viya, máitupajijiasiravahi.

Tiápechavavare ema Jesús tímereuchava máepenirayarehi
(Mt 17.22-23; Mr 9.30-32)

Nanasirichahahi napanerequenehahi ena achaneana eta juca náimaha-quenehi. Ema Jesús mápechavare mametacavaca ena máimitureana. Ánipa macahehi:

⁴⁴ —Ecaquiña yátupina eta juca numetaruheya. Váhivare ecuemitisica. Núti Manerejirunuhi ema Viya, járajapainapa eta sáchezare tjararecanuyare máncani achane nayehe ena ticatianacauanahi. Ticaratacanuanayareva — máichavacapa.

⁴⁵ Énasera ena máimitureana váhiquene nácaicutiarahini eta macayemaque- neanahi. Taicha émarichuhi ema Viya tjaracahi eta vuíchaha nácaicutia- raimahi. Váhivare napatsicavahini nayaserechahini tájahapuca tacayemahi eta máichiravacahi.

¿Nájahapuca ema apóstole ticapichapuna?
(Mt 18.1-5; Mr 9.33-37)

⁴⁶ Te táequenepa eta juca, ena apóstoleana ticapinarujiricacanapa nájaha-hipuca ema ticapichapanahi. ⁴⁷ Émasera ema Jesús máimatiacavacapa eta náechajirivanahi. Máichuhapa ema émana amaperuchicha, macatupihapa te namirahu. ⁴⁸ Tásiha, máichavacapa ena apóstoleana:

—Nácani tijacapanayare ena amaperuana níchavenéinahi núti, ena nani yátupi náimerecayare eta náemunasiranuhi núti taicha tímicutijiricavahi nútinahini najacapa. Taicha nácani tijacapanuanahi núti, énerichuvare tacahehi eta najacapirahi ema Ticachichanu, ema tivanecanuhi. Nácani náechapajiricayare namutu ena nachamuriana, náemunasiravacahivare, énahi ena ticapichapananayare te etaracu —macahepa.

Nácani vahi ticatianacahaviana, éna tímicatacaviana
(Mr 9.38-40)

⁴⁹ Tacahe ema Juan mametacapa, máichapa:

—Tata Maestro, vímahahi ema émana achane máquijicavacahi ena éreanana te píjare ticutirinehi pítinahini píjaracahini eta máitupajijiasiravahi. Tásihasera, vicavacahi éma, taicha vahi víumurivainahini —máichapa.

⁵⁰ Émasera ema Jesús máichapa:

—Vahi ecucavaca éma. Taicha nácani vahi ticatianacahavianahi, éna tímica- tacahaviana —macahepa.

Ema Jesús macajachavaca ema Jacobo émapa ema Juan

⁵¹ Te jena sácheanahi tiánenehipaipa títecapa eta mayanirayarehi ema Jesús te anuma. Tásiha, tjaracavaichaha eta mayaniranumayare te Jerusalén. ⁵² Macavanairipipa tiyanana ena tnapumirauchanayarepahi. Titanuca- nayarehi eta máitecapihayare tayehe eta jácani avasare. ⁵³ Énasera ena

samaritánoana vahi návarahahini najacapa taicha náimahahi éna eta matupiruirapahi te Jerusalén. ⁵⁴ Tacahe, ena apinana apóstoleana, ema Jacobo émapa ema Juan, tise mamajuheanapa eta namajacpirahi ema Jesús. Tacahe, náichapa éma:

—Tata Viáquenu, ¿pivarahapuca viyasesereca táemirica eta yucu tiásiha te anuma? Étaina táitapaimuriha ena náenatajiana, tácuti eta máichaquenehi ema profetai Elías —náichapa.

⁵⁵ Tacahe, ema Jesús máimaracapa éna. Tásiha, macajachavacapa, máichapa:

—¿Tájaha tacayema vahi tétupicava eta epanereruana? Ticutipa vahi mávaháruhénahi ema Espíritu Santo. ⁵⁶ Vahi étaina tímitecanu nícuñacavacayare ena achaneana, nuti Manerejirunuhi ema Viya. Tímitecanuhi nucuchucuhavacayare éna —máichavacapa.

Tásiha, tiánucuhanapa te apachacaya te apanahivare avasare.

Vínajicayare tamutu, te vivaraha véhica ema Jesús

(Mt 8.19-22)

⁵⁷ Eta napaisirapahi te achene ema Jesús énapa ena máimitureana, nacainunapa ema émana achane, mavarahapa máehica. Ánipa macahehi:

—Tata, núti apanavare nuvaraha néhicavi te jácani pivarahaquenezare piámianu.

⁵⁸ Ema Jesús, ánipa tacahehi eta majicapirahi:

—Tamutu eta sárareana ticapenavaca. Énerichuvare eta cáyureana tamacajipachuvare. Nútiserá núti Manerejirunuhi ema Viya, tájina nuviya nusiapihahini —máichapa.

⁵⁹ Te apanavarepa sache, máichuhapa ema Jesús ema apana máimiture apóstoleyare. Tásiha, ema majicapapa:

—Tata, nuyaseacavi písapanuhipucaini nuchava te nupena. Nucuchapanumayarehini eta máepeniraya ema ticachichanu, nécaranumaya. Tásiha, nucapayacavipa néhicaviya —macahepa.

⁶⁰ Ema Jesús majicapapa:

—Pésamirica náecaracacahaha ena máecharaireana. Tájina tájaracavimahi eta juca tihapasamurerecavihi. Yare, péhicanu. Níjaracaviyare eta pémataneyare. Picametarairuyare eta máechajiriruvana ema Viya —máichapa.

⁶¹ Matiarihivare ema apana énerichuvare macahehi:

—Tata náquenu, núti nuvaraha néhicavi. Písapanusera nucametavapanumaya te nupena —macahepa.

⁶² Ema Jesús majicapavare:

—Mácani achane tipaicapahi téyarecapahi vahi tichavaequenehavaimahi mámarairicahini eta mámaquene. Ene picaheyare piti, vahi pichavaequenehavaimahi tayehe eta tájiparacana. Taicha vahi nuvaraha mácani tínajicavahi eta macametairuiru eta máechajiriruvana ema Viya —máichapa.

10

Ema Jesús mavanecavaca ena setentaqueneana, tímiturecanayare

¹ Te táequenepa eta júcana, ema Viáquenu Jesucristo manerejicavarepa ena setentaqueneana apamuriana máimitureanahivare. Tiyananapa ticametarairuanayarehi te avasareana mapaisineanapahi éma. Apinanavacapahi eta napaisirayare éna. ² Máichapa eta matuparasiravacahi:

—Tétavicavapa eta vicamunuirava ena tímicatatahavianaya tayehe eta juca vématanerepihi. Eyaseacayaresera ema Tata Vicaiyaquene máijarahavi ena náimicatatahavi. Eta juca tímicutijiricavahi mácani achane eta macamunuiravahi ena tímicatacana eta máechatijisiraya eta maharusura.

³ Puiti, névatacaheyare eyana epaica. Nararihisera ena achaneana váinara-jiqueneanahi étupiaruanayare. Éna nacutihi eta sárare táíñehiqueneanahi. Étisera ecutiyahehi eta uvesachicha eta tamansuvahi. ⁴ Eta epaisirayare, tájina íámaimahi eta tarera, váhivare íámaimahi eta billetera. Váhivare íámaimahi eta eparupeva. Eyaiyauchavayarepahisera eta epaisirayarepahi te achene. ⁵ Te jácani peti ítecapihayarepahi, ani tacaheyare eta échajisirayare ena achaneana: “Ema Viya, tiúrichaheyare éti te juca peti”. ⁶ Nararihiyare ena achaneana navarahaya eta náurivaya mayehe ema Viya. Eta échajisiravacayare, tatupiruvaya me Viya máijaraca eta náurivaya. Téhesera vahi nacuraraha najacapahe, vahi eucuaeñamacava nayehe, taicha énapa téchinavana. ⁷⁻⁸ Te jácani avasare, jácani peti eta najacapiahepuca, enasipanayare tayehe eta peti ítecapihahi. Vahi ecuepuru jácani tinicacareana náeniruheanayare. Étaripa jácani náesiruheanayare. Éti, táitsivayare eta ecaemataneasiranuyarepahi. Váhivare ecupamirahapahi ímacacuhapahi eta pétiana. ⁹ Ecanaracayarepahi ena nacajumaqueneana natiarihiqueneanahi. Tásiha, emetacavacapaipa námutu ena achaneana eta núcupaisiraripa nuti Cristo, nútirichuhi ema nacuchapaquenehi. Nucuchucuhavacayare namutu ena téneuchavana, ticasíñavanavare eta nuyehe nuti Mavanerunuhi ema Viya. ¹⁰ Téhesera nacuija nacujachapahe te jácani avasare itecapihayarepahi, iúchucavanepa te calle. ¹¹ Ánipa ácahe: “Vétatapevachavahi eta juca tavaparu támaquenehi eta vívape. Eta juca táicutiarahi eta máicuñasiraheyare ema Viya taicha eta emavarairahi ejacapahavihini. Vivarahasera vimetacahe eta máucupaisiraripa ema Cristo, émarichuhi ema vicuchapaquenehi, ema Mavaneruhi ema Viya. Macuchucuhahéhini éti, te éneuchavahini, ácasiñavahini mayehe” íchavacayare éna. ¹² Jéhesare, te táitecapapa eta juicio, tiápajucavainapa eta náicuñayare. Tacachuricayare eta nacaicuñairayare ena achaneana váinara-jiqueneana ticavasanaini te avasaréni Sodoma —máichavacapa ema Jesús.

*Eta táicuñayare eta návasana ena achaneana masuapajirairahana
(Mt 11.20-24)*

¹³ Tacahe, ema Jesús máechajicahi ena apamuriana achaneana, tímicutijiricavahi natiarihinahini te mamirahu. Ánipa macahe:

—¡Páurehesami eti nujaneana ecavasanahi te avasare Corazín étipa eti ecavasanahi te avasare Betsaida! Ichape eta ícuñayare taicha eti ímaharipa tamutu eta tiáramicareana níchaqueneanahi te emirahu, váhisera ávarahahini éneuchavahini. Ena nani achaneana ticavasanahi te Siria, apavasanánahinéni, tétavicavahinéni eta namaurivahi, németecasera nútí téneuchavananavahinini eta náimairahi eta níchaqueneanapahi. Enévanénahíni náimerecavahíni yátupi eta náeneuchiravainahíni. ¹⁴ Tásiha puiti, muracapanayare eta ícuñayare éti, taicha eta emavarairahi éneuchava. Tacachuricayare eta nacaicuñairaya ena achaneana apavasanana ticavasanahi te Siria.

¹⁵ Étiripa eti ecavasanahi te avasare Capernaúm, tamapuruji eta nímitu-sirahehi étapa eta ímairahi eta tiáramicareana níchaqueneanapahi. Eti ecasiñavavaicahí, ímijachaipapuca eta ticayapaheyare te anuma. Ichapesera

eta etsirihacarevayare, taicha épujuquichavayare eta te yucu taicha vahi éneuchavaimahi éti —macahepa.

¹⁶ Tacahe, tiápechavavare máimitucavaca ema Jesús ena máimitureana, ánipa macahe:

—Nácani tisuapaheanayare, ticaecheranahi eta nasuapiranuyareva núti. Énasa nácani tépuruheanayarepahi, ticaecheranayareva eta náepuruiranuhi núti. Ene tacahehi eta náepuruiravare ema Tata tivanecanuhi —máichavacapa ena máimitureanahi eta napaisirayare.

Tichavanapa ena setentaqueneana vanairucanahi

¹⁷ Tacahe, tichavanapa ena setentaqueneana. Tiúrisamurereacavanapaipa eta náitecapirahi. Ánipa nacahe:

—Tata Viáquenu. Vítauchaipa eta pivanairipi. Viratahivare viáquijicavaca ena éreanana taicha eta vipiarasirahi eta píjare —nacahepa.

¹⁸ Ema Jesús majicapavacapa:

—Tájinarinehi matumevaimahini ema Satanás eta viáquiquijisirapahi ena majupahana. Taicha ema Espíritu Santo tímechanuhi eta nunecapirahi eta máquipaisiravahi ema Satanás, tacutihi eta térameca eta tájahúchiravahi eta macaquijirahi te anuma. ¹⁹ Táitaurevaquene núti, ichape eta nujaneasirahehi. Tayanapanepuca iácatayaca eta quichare, alacránpuca, tájinasea táicharachémahi. Eta juca ítupajijiasiravaya níjararuhehi, tacachuriaca eta máitupajijiasiravahi ema Váinaraji Satanás, énapa ena majupahanahi. ²⁰ Váhisera ecucasiñavavaica eta eratahairahi iáquijica ena éreanana. Iúrisamurereacavasera eta táejasiraiapa te anuma eta elistana.

Ema Jesús tiúrisamuréinehi mayehe ema Maiya (Mt 11.25-27; 13.16-17)

²¹ Tacahe, enévanehinehi táitecapauchahi ema Jesús eta máurisamurevahi maicha ema Espíritu Santo. Tásiha, macahepa:

—Tata Nucaiyaquene, téavicava eta nucunachiravi. Jéhevare píti táquenuvivi eta anuma étapa te juca apaquehe. Títauchavaipa eta pipanereruhi. Vahi písapahini náitucháini eta júcana ena achaneana tímijachavanahi téchemarahiana. Énapasera píjaracahi ena nani téhicanuanahi, tájinahinéni náechemaraivainahíni. Puiti nasapiharipahi nacachuricahi ena titupajijiacavanahi. Tétávicavahi eta táurivahi eta pipanereruhi, piti Tata Nucaiyaquene.

²² Tacahe, ema Jesús máichavacapa ena achaneana:

—Ema Tata Nucaiyaquene, ema tíjaracanuhi eta nútiraya néchaya tamutu. Nájna náratahaimahi énajivainahini náimatihini ema Tata. Nucarichu nuti néchinavahi ena nímitatiruanayare éma. Taicha núti yátupihí eta nímatirahi ema Tata Nucaiyaquene; tacutiquenehi eta yátupirahivare eta máimati-ranuhi éma —macahepa.

²³ Tacahe, mañajichamuripa ena máimitureana, máichavacapa:

—Tétávicavahi eta iúricacareva éti taicha tíjaracahehi ema Viya eta juca ímairahi puiti eta níchaqueneanahi. ²⁴ Jéhesare, numetacahe: Acane ichape-muriana ena viyarahananíni profetana énapa ena réyeaanani, téavicavahi eta navarairahi tímatinuana, navarairahivare náimaha eta juca níchaqueneanahi ímahaqueneanahi. Navarahahivare nasama eta nímituresirahi. Váipasera nacapayacahini —máichavacapa.

Éma Jesús máimicuticha, máechajisihahi éma achane máuriquenehi, samarítánohi. Tijapanurahi mayehe éma émana achane macajaraquenehi, tayanapane vahi émainahini majaneanainahini.

²⁵ Matiarihíhi éma achane, maestro tayehe éta mavanairipiana éma víyarhaini Moisés. Tiyanapá matanucahi éma Jesús, téchajiricavayarehi éta mayehe. Mavarahahi macaicutarayare. Máichapa:

—Tata maestro, ¿tájahapucaini nícharacavaini éta níurusirayare éta núchucuirayare te apana vítaesira? —macahepa.

²⁶ Éma Jesús majicapa:

—¿Tájahasica tacayemahi éta táechajiriruvahi éta Sagrada Escritura? ¿Tájaha tacayemahi éta pisamirahi éta péchajicuirahi? —macahepa.

²⁷ Tásiha, éma maestro majicapapa:

—Ani tacahehi éta néchejicuirahi: “Macarichu éma Viya pémunacayare te pisamure. Macarichuvare éma piáchanevaqueneya. Píjaracayare tamutu éta pitumeva éta picaemataneasirayare. Éma pipanerechayare tamutu sácheana. Pémunacayareva éma piparaepiyahi tácuti éta pémunasiravahi píti”.

²⁸ Éma Jesús majicapa:

—Tétupícava éta juca píjicapiranuhi. Te pítaucha éta juca, piúchuchayare.

²⁹ Émasera éma maestro vahi mavarahahini apaquehereruinahini. Máichapa:

—¿Nájahasica éma nuparaepiyahi? —macahepa.

³⁰ Éma Jesús máichavarepa:

—Nímicutichinaviyare éta juca. Matiaríhi éma émana achane. Tipaicahi te achene, másiha te Jerusalén. Tiyanayarehi te Jericó. Éta mapaisirapahi te achene, náuchujiuchapa éna tiámerahiana. Náepuchiricanumapa. Tiánehi nacapacayaréni. Námeychapa éta mámaqueneanapahi éta éta mamuiríha.

³¹ Tásiha, macahepa éma émana tiyujaracarahi. Máimahapa éma achane te apaquehe te achenechacaya. Váhisera májapanuhini máichejiuchahini. Máetávicaichucha. ³² Tásiha, macahepaipavare éma apana achane. Éma, téchapajiricahi éta Templo. Énerichuvare te máimahapa, máetávicaichuchavare.

³³ Tacahe, macahepaipavare éma apana achane. Éma, indigenahi samaritano. Éma, te máimahapa éma macajaraquenehi, majapanurinehi.

³⁴ Tíchechanumapa éma, témeñahavapa. Máipuchapa te aceite éta éta alcohol éta majarana. Máepacuchavacapa te amaratajai. Tásiha, manaracuhapa manacaquechapa éta te maperapahi cavayu. Mámapa éta te máitecapihayarehi. Máipuparacaipahi. ³⁵ Te apana sache, tiyanayarepa éma samaritano. Tivecuacavapa aripe éta maplatane. Mavachachapa éma ticapenahi éta peti. Tásiha, máichapa: “Pícatajicanu. Péchajirisinánu éma maca achane. Te tatiaríhinapuca éta macamunuirava, píjarasinánuya. Nímahavirine nuvachachavi te nuchava” máichapa. ³⁶ Tiuri puiti, nuyaserecaviyare píti. ¿Nájahapuca éna nani mapanaqueneana éma témunacahi éma maparaepiya najararuquenehi éna tiámerahiana? —máichapa éma Jesús.

³⁷ Éma maestro majicapapa:

—Éma témunacahi éma maparaepiya, éma tijapanuhi —macahepa.

Éma Jesús máichapa:

—Pímahapajira, éne picaheyare píti apanava. Pijapanurahiya — máichapa.

Éma Jesús máejirapanavaca te napena esu Marta ésupa esu María

38-39 Tímiyanavavarepa eta mapaisirahi ema Jesús. Máitecapauchapa eta avasarechicha suávasa esu ésuna esena ticaijaruhi Marta, ésupa esu suparape ticaijaruhi María. Mayanauchapa te supena esu Marta. Tétávicavahisera eta táurivahi eta najacpirahi éna. Tacahe, esu María téjcapa te máivapechacaya ema Jesús. Susamararacaripa eta máimiturapiána éma. ⁴⁰ Ésusera esu Marta tahapapiricaichucha eta sucaparujirahi, taicha eta suénisrayare ema Jesús. Tacahe, esu Marta tistemamajheripa eta suímairahi esu suparape suéjarasirahi. Tacahe, suíchapa ema Jesús:

—Tata Náquenu, picatajicanupa. Pivanesinanu esu suca nuparape súimicatanuichu apaesaina tayehe eta ematanecana —suíchapa.

⁴¹ Tásiha, ema Jesús majicapapa:

—Páurevisami piti Marta, tétavicavapa tahapapirisiravi eta pématanerepiana. ⁴² Tituparacavi pínajica eta tihapapiricavihi. Picaravahu eta máechajiriruva ema Viya. Esu suca piparape María tétupicavahi eta supanereru. Suvarahahi suítucayare. Eta tacahe, tismararacanuhi. Nájina tiverejicaimahi eta suvarahaquenehi suítuca —máichapa.

11

Emá Jesús tímitucahavi eta viyujarasiraya

(Mt 6.9-15; 7.7-11)

¹ Tacahe, te jácáni apanapa sache, ema Jesús mávihahi eta te mayujarasirarehi. Te títayujarápa, témeñahavapa ema émana máimiture, máichapa:

—Tata Viáquenu, pímitucahavi eta viyujarasirayare víti apanavare, tácuti eta máimitusiravacahi ema Juan ena máimitureanahi —macahepa.

² Tásiha, ema Jesús máimitucavacapa:

—Ani tacaheyare eta eyujarauchiravaina: Tata Vicaiyaquene, piti piávihahi te anuma, vipicauchahi yátupi eta píjare. Vivaraha ichapeina eta tasuapacarevaina eta pivanairipiana nayehe namutu ena achaneana ani te apaquehe, tacuti eta nasuapiravihi ena ángeleana te anuma. ³ Pájapanuhavi píjaracahavi puiti juca sache eta vicamunuqueneana vinicaquenerepiana. ⁴ Pájapanuhavivare piperdonachahavi eta viviurevana piyehe. Víti apanava viperdonachavacaripa namutu ena ticaviurevanahi viyehe. Vahi picuisapahavi vicha eta tamauriquene. Picatiuchahavi mayehe ema Váinaraji. Tacaheya eta eyujarauchiravaina.

⁵ Máichavare ema Jesús:

—Tiuri, nímicutichinaheya puiti. Matiarahi ema émana achane. Tacahe, máitecapauchahi ema apana achane máitunacasarehi te enumuhu yati. Viajéropahi éma. Émasera ema avasarecuruhahi, tájina maviya eta máenicahini. Tásiha, mayana mayehe ema apana máitunacasarehivare. Máichainapapuca: “Picatajicanu, nucapucavi mapanaina pan. ⁶ Taicha títecapauchanuhi ema níunacasare viajéropahi. Tájinasera nuviya nucumpirachahini”. ⁷ Tacahe, ema macaijuhequenehi váhipuca macujapanuhi, macahénapapuca: “Vahi picujarareca eta néchapune. Pésamirisinanuvare eta tapaja tacaerataquenehi. Tímacanahivare ena nuchichanaveana. Vahi nítujicava néchepuca níjaracavihini eta pivarahaquenehi” macahenapapuca. ⁸ Máitunacasarequenehihipuca éma, váhisera máipurajihini máechepuchahini májaracahini eta mayasesereruhi. Téhesera te tímiyanavapuca mapiararaca ema ticamunuvahi, németeaca tipamicavayarehi téchepuca, májaracayarehi eta macamunuquenepahi.

9-10 Eta tacahe, numetacahe: Échajica ema Tata Vicaiyaquene. Eyaseacayare eta ecamunuqueneana. Éma, tijapanurahi. Tisamaheyare, tjaracaheyareva. Vahi ecuyacuji eta eyaseairaina. Téhevare tatiarihinapapuca eta jácani íchiraya ichapehi eta tacajeravaya, eyaseacayare májjaracahehíni eta ítupaijijiasiravaya. Éma, tjaracaheyare. Te jararihipuca eta táichejimiráuchahe, éma macaevuisihainaheyare. ¹¹ Eta juca tímicitijiricavahi te natiarihipuca ena echichanaveanahi éti, te tiyaseacaheanapuca eta pan nanicayare, váiparinehi táuricaímahi íjaracahíni éti eta márijahi, tímicitijiricavaipa ecavijaruhíni ena echichanaveana. Étaripa te tiyaseacaheanapuca eta jima, váhivare táuricaímahi íjaracahíni eta quichare. ¹² Étaripa te tiyaseacaheanapuca eta varayuha, váhivare táuricaímahi íjaracahíni eta sáse. ¹³ Étiarihi éti vahi ecajirahihíni nayehe ena achaneana. Íurihisera nayehe ena echichanaveana. Ítucahi íjaracavaca jácani nayasearuheanahi táuriqueneana. Mavetiji ema Tata Ecaiyaquene tiávíhahi te anuma. Éma, vahi ticavijaruheimahi eta te eyaseserepiana. Tjaracaheyarehi tamutu eta eyasearuana, émaripa ema Espíritu Santo tiávahácaheyarehi —macahepa ema Jesús.

Ena achaneana téjcapavanahi eta náimijachirahi ema Jesús mávaháruhi ema Váinaraji Satanás

(Mt 12.22-30; Mr 3.19-27)

¹⁴ Te apanaquenepa sache, ema Jesús macanaracahi ema achane, úpainíhi eta máítaresira taicha eta mávahásirahi ema éreana. Tacahe, eta máuchusirapa ema éreana te máquehe ema úpainíhi, tiúripa téchajica. Ichaperinehi nárami ena achaneana. ¹⁵ Natiarihihisera ena apamuriana achaneana, ánipa nacahehi:

—Ema maca Jesús, vámeteaca majupahahi ema Satanás, ema náquenu-murihi ena éreanana. Májararuhi jácani eta máitupaijijiasiravahi eta macuchusiravacahi éna —nacahepa.

¹⁶ Nararihihivare ena apamuriana achaneana váhivare nasuapapajicahíni ema Jesús. Eta tacahe, navarahapa nacaicutiarayarehi, nayaseacapa macuchuahíni eta tiáramicare, máimereuchayare eta émaírahi Cristo mavaneruhi ema Viya. Váhisera nasuapayarehíni. ¹⁷ Émasera máimatíhi eta napanereruana eta namasuapirahi. Máichavacapa:

—Nímicutichinahe puiti ena machanerana ema gobierno. Éna, vahi típutsimurihacacanaimahi apinainahipucaini partido. Te típutsimuriacacanapa, énajicacaiapucaini tiáquipaicacana. Émaripa mácani achane te camurianahi ena machichanaveana, váiparinehivare típutsimuriavanaimahi náehajiricacahíni, énajicacahíni náquipaicacahíni. ¹⁸ Ene macahehi ema Váinaraji Satanás, váiparinehi máisapahíni típutsicacana ena machamuriana, taicha mavarahahi tisimutuanayarehi éna, tímiyanavayarehi eta nacaetemajirisirahaviyarehi. Éti ímijachaipa nútirichuhi machamuri ema Satanás, táichavenehi eta nuratahairahi nucuchucavaca ena éreanana. ¹⁹ Tájina vahi étupicavahíni éti eta juca epanereruana. Te émahipuca tímicitacanuhi ema Satanás, énerichuhivare éti máimicataruanahivare jácani éma, eta ecuchusiravaca ena éreanana. Epanerechinávanuma. ²⁰ Émaquenehisera ema Viya, tjaracanuhi eta juca nuratahairahi nucuchucavaca ena éreanana. Eta juca étara ícutiaraya éti eta matuparasiranuhi ema Viya eta nútirayare necha tamutu. Nútiripara nuti ecuchapaquenehi.

²¹ Tacutiquene mácani achane tume. Te macaratacahi eta mataquiriqui eta majaneasirahi jácani macayehequeneana, nájina tiámeyechaimahi. ²² Téhesera macahepaipa mácani achane túmepanahi mayehe, maverejicayare eta mataquiriquini macasiñaquenehi. Máitiacavane. Tásiha, émapa técha tamutu eta majanearuinihi ema achane. Ene nucahehi núti, túmepanauhi mayehe ema maca Satanás.

²³ Te vahi ecuehicanu, ecucaemataneacanu, éta túmereuchaheya machamurihehi éti ema ticatianacanuhi. Masapiha ímicatacahi éma eta macaetemajirisiranuhi.

Éma Jesús máimicutichinahi éna masuapajirairahanahi mayehe (Mt 12.43-45)

²⁴ Tímiyanava eta máechajirisiravahi ema Jesús, ánipa macahe:

—Énerichuvare éti ecuti mácani achane máinajiruhi ema émana éreana. Éma éreana tiyanainapa matanucainapa eta jácani masiapihayarehi. Éta mamaichimavira eta mavarahaquene, mapanerechayarehi tichava. Macahénapapuca: “Nuyanayare nuchava, nusiapahacayareva ema návaháruinihi”. ²⁵ Te títecapapa ema éreana mayehe ema achane mávaháruinihi, máimahapa ema achane máinajicaripa tamutu eta mapecaturana, vuíchahasera máehicahini ema Viya. ²⁶ Tásiha, tiúrisamurepa ema éreana. Tásiha, tíchuarecapa éna siétequeneana machamuriana. Váinarajipanána éna. Nasiapahacainavarepa namutu éna. Jéhesare, tiápajucavapa eta mavainarajiva ema paure achane —máichavacapa ema Jesús.

Viúriyare te visuapa eta máechajiriruva ema Viya

²⁷ Mapaenumavahi títapirica ema Jesús eta juca máechajiriruvanahi, tipiaracapa esu ésuna esena te namuri éna achaneana. Ánipa sucahehi:

—¡Tétavicavapa eta sucunachacarevahi esu pena, táichavenehi eta suínasiravahi, suájisiravahi eta sucajurusiravahi! —sucahepa.

²⁸ Éma Jesús majicapapa:

—¡Tiápajucavayaresera eta nacunachacarevayarehi namutu éna tisamayare eta máechajiriruvanahi ema Viya, yátupiyarehi eta nasuapirayareva! —máichapa.

Éma Jesús macajachavaca eta namasuapajiraivahi éna achaneana (Mt 12.38-42; Mr 8.12)

²⁹ Tacahe, títecaparacanaipaichucha te machacaya ema Jesús éna camuriqueneana achaneana. Tásiha, eta máimitusiravacahi, máichavacapa:

—Nararihi éna achaneana puiti juca náetaviuchahi eta navainarajivana taicha vahi návarahahini nasuapa eta yátupirahi mavanerunuhi ema Viya. Tiyaseacuananahi nímechayarehi eta tíaramicare táicutiarahi eta mavaneriranuhi ema Viya. Váhisera nímechaimahi. Tacarichu náimahayare eta níchararacavaya tacuti eta máichararacavahi ema profetaini Jonás. ³⁰ Éma profetaini Jonás yátupihí ecutiararehi éma eta mavanerirahi ema Viya nayehe éna achaneana ticavasanahi te avasare Nínive. Ene nucahehi nútí Manerejirunuhi ema Viya, ecutiararenuhi puiti eyehé eti achaneana.

³¹ Tacutiquene, esu reina Seba eta acane, te susamairiricapa eta máitupajijiasiravahi yátupi ema Salomón. Ésu, tayerehiquenehineni eta suávasa, tiyanahisera sucapayaca ema Salomón taicha suvarahahi susamayarehi éma. Tacahe, te táitecapapa eta sáchezare téchepucanaya namutu, suyaseacainapa

ésu eta nacaicuñahini ena nani máetupicushmanahi puiti. Sucáhénapapuca: “Táuricapa nacaicuñahini ena nani máetupicushmana, tájinapa náetseraruina nasamaripa ema Cristo, ema titupajijiápanavahi mayehe ema Salomón, tásiha vuíchahacaruva nasuapa” sucahénapa jácani. ³² Tacutiquene ena achaneana ticavasanahi acane te Nínive. Tisipecaturahiana éna. Natupiruvahisera nasuapa eta mametarairu ema Jonás. Téneuchavavaneanahi. Tásiha, nacahénapapuca te jena sáchezare: “Táuricapa nacaicuñaini ena nani maparajuruana ema Cristo, taviuchahi eta namasuapirahi éma. Taicha éma máuriquenepanahi mayehe ema Jonás” nacahénapa. Eta máimiturapiana ema Jesús, tamícahu eta vítaresira

(Mt 5.15; 6.22-23)

³³ Tímiyanava eta máechajirisirava ema Jesús, ánipa macahe:

—Súnsuanahi nácani tiyustacanahi eta lámpara namicahuyarehi, tásihasera nanacapapucaini te jácani tayumururevahi cuarto, najihapaicapucaini te cajúne. Tacamunuhi nanacayarehi te anuquehe. Jéhesare, tamicauchasarepa tamutu apaesa tímairiricanapaipa nácani tisiapanapahi. ³⁴ Ene ecahehi éti, eta esuapirahi eta nímiturapiana, tétavícvavahi eta tamicauchiraya eta íáchanavana. Tímijunijicayare eta emaurivahi. Téhesera vahi esuapahini, tétavícvavahi eta tamapícvavahi eta íáchanavana. Tanasipa tamutu eta tamaurivahi. ³⁵ Eta tacahe, machu ecaínajiruva tayehe eta juca esamaqueneanahi ímahaqueneanahivare, machu tayanariana te tímápicu eta íáchanavana. ³⁶ Téhesera yátupina esuapa eta nímiturapiana, tétavícvavaya eta tamicauchirahéya tayehe eta ítaresiranahi. Tásiha, vahi eyaseacanuimahi nímechahe eta tíáramicareana —macahepa.

Ena Jesús máimereuchavaca eta nájecapiravana ena fariséoana énapa ena escribánoana

(Mt 23.1-36; Mr 12.38-40; Lc 20.45-47)

³⁷ Tacahe, te títapiricapa ema Jesús eta máechajisirahi, témeñahavapa ema émana fariseo. Macumpirachapa tinipanayarehi te mapena. Masuapahisera ema Jesús. Tiyanapa te mapena ema fariseo. Te tíúripa eta tiníccare, téjacapa ema Jesús te mesa. ³⁸ (Tíuri, ena fariséoana, jucaríhi eta nayeherepi te tinicanayare, tayanapanehipuca típachivahuanahi, ticasipavahunumana-yarehisera. Eta juca nasípavaurusiravahi, namavarairahi náechipejicahini eta náchanavana.) Émasera Jesús, vahi masípavaurucavunamahini. Tacahe, máraminehi íchape ema maca fariséo eta mamaitauchirahi eta nayeherepianahi éna. ³⁹ Émasera ema Víáquenu Jesús máichapa:

—Eti fariséoana, eta eyeherepiana, ecaeñamaracavahi esipacanuma eta enisírareana étapa eta érirareana, emavarairahi táetserarúinahini tasiapahini eta pecatu te íáquehe. Étisera íápájupánavahi eta tachipejivahi eta íáchanavana táichavene eta evainarajivana, étapa eta tavayuasirahéhi eta éjamurachirahi tamutu. ⁴⁰ ¡Tétavícvavasamíhi eta tamuracavahi eta esamureana! Ema Víya vahi tácarichu máímaha eta te íáquehe eta tíávihahi te ínahu. Énerichuvare máímahahi eta tíávihanahi te amahe esamureana. Éma yátupíhi eta máimatirahéhi. ⁴¹ Tatuparacahi éjapanurahiya nayehe ena ticamunvanahi. Tátupiruva te esamureana te échajirícava apaesa tacuíjasarepa tachipejivaina eta íáchanavana.

⁴² ¡Páurehesami eti fariséoanal! ¡Tétavícvavahi eta tamuracavaya eta ícuñayare! Éti ímijachavahi yátupiquenehi eta religiósohérahí eta epamisirava eta

ecamavahuirahi me Viya eta diésmuri tayehe tamutu eta évaraqui. Ecunachacarehi taicha éta. Váhiserá ecatiuchavacahini ena achaneana páureana macatiuchavarahana. Váhivare émunacahini ema Viya. Yátupi tituparacahehi eta ecamavahu eta diésmuri íamavahuana. Énerichuvare tituparacahehi eta eapanuraivaya, yátupinavare eta émunasiraina ema Viya.

⁴³ ¡Jucarihivare eta apana tiviuchahehi eti fariséoana! ¡Tétavicava eta esñavavaisirahi! Emetapa evaraha tipicauchaheana, ticaejacaheana te táurinaquene siya eta te iúrujisirarevana. Evarahavare tipicauchaheana-yarehi eta náechajisiraheana te cálleana.

⁴⁴ ¡Jucarihivare eta apana tiviuchahehi eti escribánoana, étipa eti fariséoana, táichavenehi eta apimirairahehi! Ímijachavahi epicauchacarehiji. Étiserá eta eyeherepiana, émejecapavacha ena achaneana eta náehisirahi ema Viya. Páureanasami éna. Váhi náimatiequenehahini eta náejecipiravahi táichavene eta evayuasirahi eta ecaetemairavacahi —máichavacapa ema Jesús.

⁴⁵ Matiarihivare ema émana maestro eta mavanairipiana ema Moisés. Máichavarepa:

—Tata maestro Jesús, eta piyunasiravaca ena fariséoana, tétavicavapa tayunasirahavihi viti apanavare viti máestroana. ¿Pivarahapuca vicaviurevahivareni viti? —máichapa.

⁴⁶ Tacahe, ema Jesús majicapapa:

—¡Eti apanavare eti máestroana, tétavicavahivare eta eviurevahi! ¿Tájaha tacayema epamicavacahi ena apamuriana achaneana eta júcana eyeherepiana tacajeraqueneana? Nájinapa tiratahaimahi títaucha. Apanasica éti váhivare ítauchahini.

⁴⁷⁻⁴⁸ ¡Jucarihivare eta apana tiviuchahehi eta tamuracavaya eta ícuñayare! Éti ecaijare apimirana, taicha ímijachavahi machanerahe ema Viya eta eyehehearasirahi eta náecariana ena profetanaini nacaparuanahi ena íachucanaveanaini. Puiti étarichuhi tacahehi eta epanereruanahi eta evarairahi ecapacahavi viti mavanaranahi ema Viya taicha eta épuruirahi eta vímiturapianahi táuriqueneanahi. ⁴⁹ Ema Viya, acane tímatihehi eta ecutirayarehi eta napanereru ena íachucanaveanaini ticapacanahi ena profetanaini. Eta tacahehi eta máechajiririvanahi: “Nuvanecayare ena profetana; tásiha, nuvanecayareva ena apóstoleana. Váhiquenesera nasuapaimahi ena tisamanayarehi eta náimiturapianaya ena nuvanarana. Napanajiricavacayarechucha ena nuvanaranahi. Natiarihiyareva ena nacapacayarepahi” macahehi ema Viya. ⁵⁰⁻⁵¹ Eta tacahe, numetacahe nútí: Eti nujaneanana israelítana etiarhiqueneanahi puiti, ecaicuñayare, taicha tímuriacahehi eta naviurevahi ena íachucanaveanaini taicha eta nacapapajisiravacahi ena profetanaini. Acane te tépanavainapa eta apaquehe, ema Abel máinapuiruhi nacaparuhi. Máequeneruhi nacaparuhi ema maca Zacarías, ema nacaparuhi te tamirahu eta Templo. Camurianahiserá ena náumurivanaini. Puiti étipa tamuriacahi eta ícuñayare naicha ena íachucanaveanaini.

⁵² ¡Páurehesamichapucaini eti máestroana! ¡Camuriquenehi eta eviurevanahi! Tamapurujipa eta ímatiequenehairainihi eta yátupiqueneana títuca-cáreana, taicha vahí esuapaimahi, váhivare éhicaimahi. Éti tásihahi íchejímiráurucavacahi ena tivarahanahi tisuapanaya, náehicaya ema Viya —máichavacapa ema Jesús.

53-54 Tacahe, eta nasamirahi ema Jesús ena fariséoana énapa ena máestroana, tisemanarinehi eta mayehe. Tépanavanavarepa náitsamarareca eta nayase-resirapahi, navarairahi nasama te májecapavahipucaini eta macayema-queneanapahi, navarairahi eta tiviuchayarehi éma.

12

*Ema Jesús vahi mávaraha apimirahávina
(Mt 10.26-31)*

1 Tacahe, te jena sácheanahi, títeparacanapaichucha ena camuriqueneana achaneana. Tiyututucavanapa. Énasa ena máimitureana ema Jesús návihahi te machacaya. Tásiha, máichavacapa namutu:

—Tímaticarehi eyehe eta levadura eta tasisijisirahi eta masa. Tacutirichu eta tapareasirahi eta apimirairanahi ena fariséoana. Échapavaicha éti, machu napareacahe éna. ²⁻³ Ema Viya tímaracahehi tamutu eta íchaqueneanahi, tayanapanenénipuca eyumurucavaquenénapuca te timapicu. Tisamahehivare tamutu eta échajiriruanahi. Tímatihevare tamutu eta epaneruan. Te jácani sácheyare ticaeherayare tamutu, tétavicavaya eta etsirihairaya taicha eta emaurivanahi —macahepa.

4 Étiripa eti némunacasareana, numetacahe: Vahi ecupica nácani nacapacupuca eta íaquehe, tacarichusera náituruequenehayare. ⁵ Numetacaheva, macarichu ema Viya epicayare, taicha macarichu éma téchahi eta ítaresirana. Jéhevare, éma maratahahi macamitiequeneha eta íachanevana tayehe eta táíñehiquene yucu infierno, te ecainajiruva táichavenehi eta episirapuca eta nacapasiráhena. Jéhevare, éma epicayare.

6 Nímicutichinahe eta cáyurechicha. Éti ímijachapapuca vahi tasivachahini éta. Téñamacareanahisera me Viya. Éma, téchavacahi eta táitaresiranahi.

7 Evetijipa éti, éñamacarepanahi me Viya. Éma téchahevare tamutu eta ítaresirana. Váiparinehi témitisicahémahi. Eta tacahe, vahi ecueñamava éti tayehe eta ítaresirana, taicha tétavicavahi eta emunavahi éti mayehe. Éma, máimatihí eta tatupa eta echutumacana. Vímereuchavayarehi eta véhisira ema Jesús

(Mt 10.32-33; 12.32; 10.19-20)

8 Numetacahe puiti, nuti Manerejirunuhi ema Viya: Namutu ena tímereuchavanahi eta náehisiranuhi te namirahu ena achaneana, nútí apanavare nímereuchaya eta nuchanerairavacahi éna te namirahu ena ángeleana mayeaneanahi ema Tata. ⁹ Nácanisera vahi návarahahini náimereuchavahini eta náehisiranuhi, nútí apanava nímereuchaya eta vahi nuchanera-nainahini éna te namirahu ena ángeleana mayeaneanahi ema Viya.

10 Namutu nácani ticaeahinuanahipuca nuti Manerejirunuhi ema Viya, típerdonachacareana. Nácanisera nacaeahipuca ema Espíritu Santo, vahi típerdonachacareanaimahi éna.

11 Jararihiyare eta sácheanayare tiámaheanaya te namirahu ena nacapitarana eta te náurujisirarevana, énapapuca ena tuparairucana, énapapuca ena juéseana te jácani avasareana eta nayaseseresiraya. Váhisera ecueñamava tayehe eta jácani ecatiuchiravayare. ¹² Ema Espíritu Santo tímitucaheyare eta táurivayare eta ecayemayare te jena sache ecayaseserehinapa —macahepa.

Vahi táurica tahapasamurechahavi eta vímahaqueneanayare

¹³ Matiaríhi ema achane te namuri ena camuriqueneana achaneana. Máechajicapa ema Jesús. Máichapa:

—Tata maestro, pímicatacanu, pimetaca ema nuparape máíjaracanu eta nuyehé parte eta nímaequeneruyare eta máimahaquenéni ema ticachichanuini —macahepa.

¹⁴ Ema Jesús majicapapa:

—Nuchicha, ¿tájaha tacayema pivaraha pinacanu juésnuyare eta eyehe? Vahi nútina néchaheyare tayehe eta máimahaqueneanaini ema ticachichahéni —máichapa.

¹⁵ Énerichu máichavacavare ena apamuriana achaneana:

—Échapavavare éti apanavare, machu émunahiricava, ejamurarahi tayehe eta tímahacareana. Taicha eta tímahacareana te juca apaquehe, vahi étaina ticaitarecaheyare. Vahi táéñamacarehini.

¹⁶ Tacahe, máimicutiarachinavare:

—Matiaríhi ema achane ricu. Ichape eta máesane. Tiúrina eta máévaru.

¹⁷ Tacahe, ema ricu mapanerechapa, ánipa tacahe eta mapanereru:

“Ániquehepa eta juca névaru, tájinapa núnasiha. ¿Tájahapuca nícharacaya? ¹⁸ Tiúripanapuca nuvetataha eta núnavarahi nujanejuecha. Ichapepanainapa nicha eta táitsivaya. Tiúripanainapa, apaesa táirijica tamutu eta néchatijiru étapa eta apamuriana nucayehequeneana. ¹⁹ Tásiha, nucahénapa: Jéhevare puiti tétávicavapa eta núrivayare. Tájinapa níchiravaimahi. Ichapemurihi eta núnaru. Taratahaquene juca añoanayare. Nucanaracavaya nútí. Tamutu sache tiúriya eta nunisira, néraya. Ichape eta núrísamurevaya” macahepa ema ricu. ²⁰ Tásihasera ema Viya máichapa ema achane: “Tétávicava eta pisunsuva, piti achane. Puiti jena yati pépenaya. Tájina vahi pítapanaimahi eta juca piúnaruhi”.

²¹ Ene nacahe ena achaneana ticurujiricana eta náimahaqueneana nayehéchiravarichu. Vahi nápanerechahini naicha eta táuriqueneana tacunachacarehini me Viya taicha tétávicavahi tahapasamurechirahi eta nacaimahaquénéraya.

Ema Jesús tímitucahavi eta majaneasirahavihi ema Viya
(Mt 6.25-34)

²²⁻²⁴ Te apahequenepa, ema Jesús máichavacapa ena máimitureana:

—Étisera, nuvaraha ácasíñava yátupina mayehe ema Viya. Vahi eucacaeñamaracavavaicha tayehe eta enicaquenerepi étapa eta emuiriharapi puiti juca ítaresiraichaha. Eta enicaquenerepi étapa eta emuiriharapi, tájina táéñamavacarevaina. Ímarararichuhi eta cáyureana. Vahi tacaéñamaracavahini tayehe eta tanicaquenerepi. Vahi táevacahini, váhivare táechatijiricahini, táunacahipucaini eta tanicaqueneyare. Émasera ema Viya máechapajiricahi máíjarasirahi tamutu eta tanicaquenerepiana. Evetijipa éti, íapajupana vahi eta éñamacaré vahi me Viya tayehe eta cáyureana. ²⁵ Vahi táuricahini eta ecaéñamaracavahini eta júcana. Eyehe éti, nájina naratahahini étijivainahini ecajurucavahini, tayanapane te tihapasamurechahehipuca. ²⁶ Vahi étijivaimahi íturucava ecajurucavahini, váhivare táuricahini ecaéñamaracavahini tayehe eta júcana.

²⁷ Ímarararichuhi eta tajurusirahi eta flúreana, vahi tacaéñamaracavahini tacaematanehini, tájururechahipucaini. Táitsivahisera, te tépunehapa, tétávicavahi táurinavahi eta taflurene. Nájina nácuti eta nacamuirihaira eta táurinava, émaripa ema víyarahaini rey Salomón eta tajanunusira eta

macamuirihairahinihi. ²⁸ Apanasica ema Viya máijaracahi eta táurinavahi, ánipirichuhinéni eta táitaresirahi. Evetijipa éti eta máechapajirisirahehi, máijarasiraheyarehi eta emuiriharapi eti achaneana. ¿Tájaha tacayema vahi ácasiñavahíni eta mayehe? ²⁹ Eta tacahe, vahi ecucaañamaracavaicha tayehe eta enicaquenerepiana étaripa te échuririacapuca eta une érayare. ³⁰ Ena apamuriana achaneana te juca apaquehe, ichapemurihi eta tacañamara-siravacahi eta júcana. Vahi nácasiñavahini mayehe ema Viya, nacuchapahipucaini eta máijararuyarehi éma. Étiserá, ecasiñavayarehi eta matiarahirahi ema Ecaiyaquene. Máimatihí éma tamutu eta ecamunuiravanahi. ³¹ Eta tacahe, tativayare Íjaracava ecaemataneacaya ema Viya, ecasamureraya eta ítauchirayare tamutu eta mavarahaqueneanahi. Máimaharinepa éma. Tíjara-caheyare tamutu eta ecamunuqueneana.

Te vicajirica eta vímahaqueneana, vijacapayare eta táitsivayare ánaqui te anuma (Mt 6.19-21)

³² Vahi ecupica, eti nuchichanaveana. Tayanapane vahi camurihénahini, eti máichuhaqueneanahi ema Ecaiyaquenehi. Éma téchahehi. Eta tacahe, tétavicavahi eta mavapinairavahi eta majacapirahehi, machaneraheya. ³³ Tacahe, te ecaimahaquenepuca, Íjararecayare eta ímahaqueneana. Íjaracayare nácani ticamunuvanahi. Tásiha, ema Viya máimahainepa, éma tíjara-caheyare eta táitsivayare ánaqui te anuma. Máitavacacainapa eta ecaimahaquenéraya. Tájina varepa tévajaicavaimahi. Váhivare táeñamavacare ánaqui taicha nájinapa tiámeyechahemahi, váipavare cachusirimahi eta ímahaqueneanayare. ³⁴ Éti, te ecasamurepuca eta ímahaqueneanahi te juca apaquehe, evarahahi enasiyare te juca. Vahi ávarahahini ejunijicahini eta ímahaqueneana. Téhesera te ecasamurehichapuca eta ícuchiana te anuma, ánaqui evarahayare eyanavaneyare.

Yátupina eta vicuneuchiravaina

³⁵ Éti, yátupina eta ecuchapiranuya eta nuchaviraya. Etsecavaya tamutu sácheana. ³⁶ Ácutihí nácani achaneana músuana titsecavanahi te tapaja navejieuqueraya ema náquenu eta machaviraipahi másihairahi mayehe ema arayenahi. Te máehahamecapa eta tapaja, enevanayarepa éna navejieuqueneyare. ³⁷⁻³⁸ Tayanapane enumuhupuca yati, tíjararahipuca eta machavirayarehi ema náquenu. Tétavicavasera eta náuricacarevahi ena músuana eta machimapirahi ema náquenu eta nacuchapirahi, te vahi náimacaequenehahini. Nutupiruva numetacahe: Yátupinasarepa eta máurisamurevayare ema náquenu, macaejacavacainapa te mamesara, máenicavacainapa. Émajacaruvainapa máechapajiricavacayare. ³⁹ Nuvaraha ácaicutiaraqunéna. Machu ácutiriana mácani achane námeyeruhi ena tiámerahiana. Tájina máechapiavahini tájahapuca hórayarehi eta náitecapauchiraya te mapena. Te máechahipucaini, ticuneuchavaipahini éma, váipasare nacuameyechahini. ⁴⁰ Eta tacahe, éti écaunechavayare tamutu sácheana, taicha vahi échaimahi tájamuhuyarepuca eta nuchavirayare nuti Manerejirunuhi ema Viya, machu íarameca —macahepa.

Nararihi ena músuana tiúriana. Nararihivare ena músuana máurirahana (Mt 24.45-51)

⁴¹ Tacahe, ema Pedro mayaserecapa. Ánipa maicha:

—Tata Náquenu, eta juca pímicutiarachaquenehavihi, ¿viveheyarechuchapuca viti dócequeneana, téhesera vimutupuca viti véhicavianahi? — macahepa.

⁴² Tacahe, ema Viáquenu majicapapa:

—Nímicutichinahepa eta apana. Macañárihipuca ema empleado máetaviuchahi eta máitupajjiasiravahi. Tisuapajirahivare éma. Ema máquenu tianayarehi te apana avasare. Táitusiava matuparacahi ema empleado eta májarasiraya eta tinicacare ena apamuriana machamusuvanahi.

⁴³ Tétavicava eta máuricacarevaya ema maca ticatuparahahi, te tamutuhi máitauca jácani machimapirana ema máquenu. ⁴⁴ Németeaca, eta tamutuirahi tiuri eta machimapirahi, matuparacainapa éma téchayarehi tamutu eta máimahaqueneana. Eta tacahe, nuvaraha ácutipaini ema maca empleado tíúrihi eta máitauraiwa. ⁴⁵ Téhesera, váhipuca tiuri eta mapaneruana ema mácani empleado, máimijachaichucha tiyereyarehi eta máitecapirayarehi ema máquenu. Tásiha, macaetemajiricavacapupuca ena machamusuvanahi, énapa ena vanaracana. Máichapapuca eta piesta, téniricapa térapa, ticavahapa. ⁴⁶ Tásiha, vaipa manecapauchavahini te títecapapa ema máquenu. Tásiha, machimaracapa ema empleado eta mamapachichijisiraipa eta máimahaqueneana. Eta tacahe, ema máquenu macavanairipinapa náestacayare muraca, taicha eta mamasuapajiraivahi.

⁴⁷ Tacutiquene mácani musu, te máechahi eta mavarahaqueneanahi ema máquenu, tásiha vahi máitauchahi eta mavanahianahi éma, muracayarehi eta macaicuñairayare. Ticaestayarehi éma. ⁴⁸ Mácanisera musu, te vahi máechahi eta tacayemaqueneana, tásiha téjecapavapa, éma apaesayaréchu eta máicuñayare. Étipa eti ecaimitucasianahi eta yátupiqueneanahi, tatuparacahi ímitucavacayare ena apamuriana achaneana. Núti, ánaquiaparipa eta nímitusiráhehi; tásiha puiti, étipa táehanacahi eta juca ímituresirayare.

Ena achaneana nacatianacainapa ena téhicanaya ema Jesús

(Mt 10.34-36)

⁴⁹⁻⁵⁰ Núti, eta nítesirahi te juca apaquehe, tímitecanuhi eta népeniraya. Yátupiyare eta nucatajivairayare, naicha ena ticatianacanuana. Éti apanava, ticatianacaheanayare táichaveneyarehi eta éhisiranuhi núti. Tímicutijiricavayarehi te tipaica eta yucu, eta tamuruira eta muiji. Eta juca, nuvarahaquenehi táitauchavavanehini. ⁵¹ Éti ímijachaipapuca eta nítesirahi te juca apaquehe, tájina tácyemacarémani, ímijachaipavarepuca tíuricavacareyarehi nícha. Váhisera ene tacahe. Táichaveneya eta éhisiranuhi, ena achaneana tépuruheanaya térajicavanaya eyehe. ⁵² Taicha puiti juca vicaijuheyare, te natiarihinapapuca te étanahi peti mácani achane, esu mayena, esu machicha, ema machicha, ésupa esu chínenaca. Te mapananahipuca ena téhicanuanahi, tásiha apinanahipuca ena ticatianacanuana. Téhesera apinanahipuca ena téhicanuanahi, mapananahivarepuca ena ticatianacanuana. ⁵³ Mácani achane, súcani esena, te natiarihi ena nachichanaveana, nacatichayarehi ena ticachichanahi táichaveneyarehi eta náehisiranuhi éna. Mácani apana achane masuapajirairahahi, súcani esena, nacatichayarehi ena nachichanaveana táichavenehi eta náehisiranuhi, énapa ena nachinenaveana.

Ena achaneana timasuapanahi eta máimeruana ema Viya

(Mt 16.1-4; Mr 8.11-13; Mt 5.25-26)

⁵⁴ Tacahe, ema Jesús máechajicapa ena achaneana:

—Te ímaha timapicurume, émetecaripa tiquivayare. Ene tacahehi.

⁵⁵ Técativapuca te vana, émetecaripa váipavare tiquivaimahi*. Énevare tacahehi. ⁵⁶ ¡Eti masuapajirairahana! ¡Yátupihinéni ímatiequenehahi te tiquivayare, váhisera ávarahahini ímatiequeneha eta máimeruhehi ema Viya, te juca sácheana nucachanerahehi!

⁵⁷ ¿Tájaha tacayema vahi ávarahahini éhica eta juca yátupiqueneana?

⁵⁸⁻⁵⁹ Járjapainapa eta sache ticaicuñanainapa namutu ena achaneana. Tacamunurichu etanucayare puiti ema Viya, ecasiñayare ecuchucuiyavaina. Eta juca tímicitijiricavahi mácani achane te ticametauchacasiya. Tatuparacahi tativaya máetupiricanumaya eta mayaseasirayare perdón ema timetauchahi, mapurare vuíchaha masiapahini te cárcel. Taicha te masiapapa, ticajeraequenénapa eta máuchucuiraina. Numetacahehi puiti: Te jácani esiapapa eta yucu infierno, váhiquene iúchucaimahi éti —máichavacapa ema Jesús.

13

Tavaraha náeneuchava ena achaneana

¹ Étarichu te jena sache, titecapanavarepa ena apamuriana achaneana. Nametacaipa ema Jesús eta táíñehiquene máichaquenehi ema Pilato, étaripa eta máimicapasiravacahi ena tiyujaracanahi te jena Templo te Jerusalén. Ánivare nacahe:

—Ena nani, galiléoanahi éna. Tépenanapa te tachacayanahi eta sárareana nacaparuanahi námavahuásanahi. ¿Étapuca eta nasipeaturaivahipuca tímicapacavacahi? —nacahepa.

² Tacahe, ema Jesús máichavacapa:

—Éti ímijachaipa táimicaparuhi eta nasipeaturaivanahi ena nani nayehe ena apamuriana najaneananahi te Galilea. ³ Nútisera numetacahe: Váhira étainahi táimicapacahini eta nasipeaturaivanahi. Vahi étaparacaina. Tacamunusera éneuchavavane éti, machu táijahúchava eta épenira, machu ácuti éna. ⁴ Némehahe ena nani diéciochoqueneana tacaparuanahi eta táevajaisiravahi eta torre tayuchamarainihi te calle Siloé. Ímijachapapuca táimicapacavacahi eta táichapevahi eta naviureva, navetijipapuca nayehe ena apamuriana ticavasanahi te Jerusalén. ⁵ Nútisera numetacahe: Váhira ichapena eta naviureva ena apamuriana. Étiripa, te vahi ecueneuchava, énerichuvare tíjahúchavaya eta épenira —macahepa.

Ema Jesús máimicuticha eta yucuqui máhiquire

⁶ Eta máechajirisirahi ema Jesús, máimicutijirichinapa. Ánipa macahehi:

—Matiarihíhi ema achane. Tatiaríhíhi eta masucure higo. Máhiquirehisera. ⁷ Tacahe, máichapa ema mamusura: “Mapanapa año vahi ticahi eta juca nusucure. Péchupaicayare puiti taicha tíápítaváiricaipa eta te juca isaniti” macahepa. ⁸ Émasera ema musu majicapapa: “Tiúripanapucaini, tata, vicuchapaichahaini étanainavaréni año. Nuvaraha némurinahechayare eta máteji apaesa tachahipapucaini. ⁹ Téhesera váhiquenénaichapuca tacuahi, néchupaicasarepa” macahepa ema musu.

* **12:55** Te jena avasare Judea, te táerisine eta sache eta tásirareasa eta tiquiva. Étasera eta táuchusiha eta técativava te vana, tájijicahi tamutu, taicha tijuruhimuhivare.

Emá Jesús macanaraca esu esena tépiñumaiquehe

¹⁰ Te apanapa sávaru, emá Jesús timiturecavarepa tayehe eta náurujsi-rareva. ¹¹ Sutiarihihi esu esena mávaháruhi emá éreana, tépiñumaiquehehi eta suítaresira. Vahi táurihini sutupinahahini. Diéciocho áñoripa eta sucajumairahi. ¹² Te máimahapa emá Jesús, máichuhapa. Tacahe, supauchapa. Máichapa ésu:

—Páurevi piti esena, picajumahi. Puítisera pinaracainapa —máichapa.

¹³ Tacahe, emá Jesús manacapa eta mavahuana te suápusi. Enevanepa titupinahahi ésu, tinaracapa eta sujumainihi. Ichaperinehi eta sucunachirahi emá Viya. ¹⁴ Matiarihivare emá táquenuruhahi eta náurujsi-rareva. Eta máimarahi eta juca, tisemarinehi taicha eta macanarasirahi emá Jesús esu sucajumaquene te jena sache sávaru tacapichahuquenehi. Tásiha, máichavacapa ena achaneana:

—Saisi sache tatuparaha eta vicaemataneraya, énerichuvare eta nacaipuirayareva ena nacajumaqueneana. Puítisera juca sache, vahi táurichini nacaipuhini taicha tacapichahuquenehi —macahepa.

¹⁵ Tásiha, emá Viáquenu Jesús, majicapapa:

—¡Tétavicavahi eta tamuracava eta esamureana! Te ticaitiquihi eta epera te jácani sache sávaru, evejapuacayarehi eta ésichirayare eta une, tayanapane tacapichahuquenehinéni eta sache. ¹⁶ Suvetijicha esu suca esena vicuti-quenehi achane, mámariequenehi emá viáchucaini Abraham, ticatajicacarehi eta nuncanarasirayarehi tayehe eta máítiarapi emá Satanás. Taicha dieciocho áñoripahi eta máécájumachirahi ésu. ¡Táuricahi nuncanaracayarehi puiti juca sache tacapichahuquenehi! —máichapa emá Jesús.

¹⁷ Eta nasamirahi emá Jesús, namutu ena ticatianacanahi titsirihanarinehi. Énaserá ena apamuriana achaneana tiúrisamureanarinehi, taicha eta náimairahi eta táuricacarequeneana máichaqueneanahi emá Jesús.

Emá Jesús máimicuticha eta taquí eta mostaza

(Mt 13.31-32; Mr 4.30-32)

¹⁸ Ánivare macahe emá Jesús:

—Puiti nuvaraha nímicutichinahe eta nímiturapiana nuti Manerejirunúhi emá Viya. ¹⁹ Tacutihí eta ánichiquene taquí eta mostaza. Te máévacapa emá achane te máésane, tiúnarahiyarehi eta tajurusira. Tásiha, járajapainapa eta cáyureana, ticamacajiyarehi te tatavana eta sucureca.

Emá Jesús máimicutichavare eta lévadura

(Mt 13.33)

²⁰ Ánivare macahe emá Jesús:

—Nímicutichinahe yareva eta apana. ²¹ Eta nímiturapiana tacutihivare eta lévadura. Esu súcani esena tiúrihi eta tasisijisira eta suyehe lévadura te tamutu eta suépiyaruhi masa, tayanapane apinapucaini arroba eta suyehe jarina, tasihajicahisera. Jéhesare, tiápucayarehi tiuri —macahepa.

Vicamesavayare visiapa te tapaja ánicurichu

(Mt 7.13-14, 21-23)

²² Emá Jesús tyanavare tipaica. Máimitucavacahi ena achaneana te jácani avasare máitecapihapahi. Macajuhéhi eta Jerusalén, váhisera máitecapavanehini. ²³ Matiarihíhi emá tiyaseserecachi éma, ánipa maicha:

—Tata Viáquenu, ¿váhipuca camuriahavianainaya viti viúchucuhanaya? —máichapa.

Tásiha, éma majicapapa:

²⁴ —Vahi táechacare te ánimuriheanayareichupuca eti esiapanaya eta mávasa ema Viya. Étiserá tacamunu epamicava esiapaya puiti. Vahi ecuyacuji. Taicha camurianayare ena apaesachicharichu eta navarairahi tisiapanaya, váhisera títujicavanaimahi. ²⁵ Taicha járajapainapa eta sáchezare, nératacinapa eta tapaja. Tásiha, ítecapapapuca éti, éhahamecapa eta tapaja, epiaracanupa: “Tátachicha, pivejieuenehahavi”. Tásiha, nujicapahénapa núti: “¿Nájahahefica éti? Vahi nímatihe. Váhivare nuchanerahénahi éti”. ²⁶ Tásiha, ejicapanuinapapuca: “Vítirichu picachanequeneanahi te mesa eta vinisirahi. Pimitucahavihivare te plaza te jena viávasa”. ²⁷ Tásiha, nujicapahénavarepa: “Esamanuripa, vahi nuchanerahéna éti. Évuisiha eta te juca, emutu eti ícharahianahi eta tamauriqueneana” níchahénapa. ²⁸ Járajapainapa eta sache ímahainapa te tajuhe eta mávasa ema Viya te návihahi ena viáchucanaveanainihi: émaripa ema Abraham, ema Isaac, ema Jacobo, énapa namutu ena profetana. Étiserá enasinapa te aneca. Tétavicavaya eta íyauchiravaya, ecapitiquiahechiravaya taicha eta ecatisamuréravaya étapa eta etsiriraya eta emasiapirahi. ²⁹ Nasapiha tisiapanaya ena camuriqueneana achaneana tísihanayare te tamutu avasareana te juca apaquehe. Tétavicavainapa eta náurisamurevaya. ³⁰ Tásiha, te jena sáchezare, nácani téquenehanahi puiti, nasapihainapa tisiapanayare. Étiserá eti ínapureanahi puiti, étinavarepa vahi ítujicavaimahi esiapa —máichapa ema Jesús.

Éma Jesús ticatisamureva náichavene ena achaneana ticavasanihi te Jerusalén
(Mt 23.37-39)

³¹ Tacahe, te jena sáche, títetapanapa ena fariséoana te mávihahi ema Jesús. Náichapa:

—Piyana. Pitátájiva piúchuca eta te juca. Taicha ema Herodes mavaraha ticapacaviyare —nacahepa.

³²⁻³³ Émasera ema Jesús majicapapa:

—Eyana emetaca ema mácara ticaetemarahuquene. Vahi típicararecanuimahi núti eta juca mametarapihi. Nunasiyarechaha puiti, nucanararecanumayare ena nacajumaqueneana énapa ena návaháruanahi ena éreanana. Núti jucarihi eta nématanerepipahi eta tímipaicanupahi puiti juca sácheana, nítauchanumayare tamutu. Vahi émainayare técha eta népeniraya. Yátupisera eta Jerusalén návasahi ena ticapahianahi ena profetanaini.

³⁴ Tétavicavahi eta táimicatisamurechirano eta viávasa Jerusalén. Nama-puruji ena tachichanaveanasami. Éna, ticapapajicanahi ena profetanaini mavanaranahi ema Tata. Puiti navarahainapa nútipavaya ticapacanuana. Ichapemurinehi eta níchuiravacahi éna, náurujiacanuhini tacutihini eta varayu te tacurujimuriha eta tachichanaveana te tapava. Váhiquenesera návarahahíni. ³⁵ Náimahainapasera eta náichararacavayare. Ticaquipai-casiyare tamutu eta napenana. Táimijunavacainapa éna eta napisiraya. Numetacavevane puiti: Eta nínjajiasiravacainapa, vaipa tímahanuanaimahi. Tíamainucavainapa te náitsivacha eta napanereruana, navarahainapa tijacapanuana. Nacahénapa: “Ichape eta vicunachiravi píti vanairucaquenévihime Viya” nacahénapa.

14

Ema Jesús macanaraca ema achane tíamaquiape

¹ Tacahe, te jena sache sávaruhi, ema Jesús ticaichuhacasihi tinipanaya te mapena ema émana náiyamuri ena fariséoana. Ticaichuhacasianahivare ena apamuriana fariséoana, énapa ena máestroana tayehe máimiturapiana ema Moiséni. Navarahahi nacaicutiarayarehi ema Jesús. ² Tíjuhúchavapa tímercava te nataracu ema émana achane macajumaquene. Tíamaquiapevacahi éma. ³ Ema Jesús, eta máimairahi ema macajumaquene, mayaserecavaca ena natiarihiqueneanahi:

—¿Táuricapuca vicinaracavaca ena nacajumaqueneana puiti juca sávaru-muhuirahi tacapicahuquenehi? —máichapa.

⁴ Énaserá vahi najicapahini, timatinanarichucha. Tásiha, ema Jesús macaratavauchapa ema macajumaquene. Eta macaratavauchirahi, enévanepa tinaraca. Tacahe, máevatacapa mayana te mapena. ⁵ Tásiha, máichavacapa ema Jesús:

—Nímicutichinahe puiti. Éti, németeaca májina émanaina achane vahi macujapanuhini eta mapera burro, mavuiyerapuca, te tíaquipaicavahi te pusu te jena sache tacapicahuquenehi. Eta máeñamirahi, tipatsicavayarehi macaechepupana eta paure sárare, tayanapanehinéni eta sache tacapicahuquenehi —máichavacapa.

⁶ Énaserá vahi napatsicavahini najicapahini. Timatinanarichucha.

Eta maconsejarapianahi ema Jesús

⁷ Eta máimararasiravacahi ema Jesús ena macumpirachaqueneanahi ema fariseo, énajivahi tinerejiuchavana eta náejasihayarehi tíurinapanana. Tacahe, ema Jesús maconsejachavacapa, ánipa máichavacahi:

⁸ —Te natiarihinapuca nacumpirachahe, vahi ecaínapupuicavaimahi ecaejacava tayehe eta téjasihacareana taicha tijuricati eta máejasihayarehi mácani ticapicahupanahi eyehe éti. ⁹ Taicha ema ténicirahi, éma ticaejarecayarehi, tijuricati macaechepucavi te péjasihahi macaejasihayarehi mácani apana. Titsirihacarepahi eta macaejacavihini te náequenemuri.

¹⁰ Te ecaichuhacasiuca, ecaejacavaya te náequenemuri, apaesa ema téchahi tíchuhahénapa ticaejacaheyare te návihahi ena típicauchacareanapanahi. Tásiha, ecunachacarénasarepa nayehe ena natiarihiqueneana. ¹¹ Taicha nácani ticasíñavavaicanahi tímijachavanahi ticapicahuana, ema Viya máimicatsiriacavayarehi. Nácanisera mánsuanahi eta náitaresira, ichapeyare eta nacunachacarevayare me Viya.

¹² Ema Jesús maconsejachavare ema fariseo, ema ticumpirarecahi:

—Píti apanavare, te pénicarayare, vahi nacucarichu píchuhavaca ena pémunacasareanahicha, ena piparapenaveanapuca énaripa ena rícoana, táichavenénahi eta pivairainahi títsirijicavanaya eta piyehe. ¹³ Píchuhavacayareva ena páureana, nácani nacahemahianahi: túpúpaquiana, masariana, píchuquiana. ¹⁴ Taicha ena nani, vahi títsirijicavanaimahi eta piyehe. Táitsivasera tétávicavayare eta piúricarevayare píti eta pijacapirayare eta pícuhihi te jena sácheyare picachanevacayare ena náuriqueneanahi macaechepureana ema Viya —macahepa.

Ema Jesús máimicutichinavare ema achane tíchuhavacahi ena achaneana, máeniruanayare

¹⁵ Tacahe, eta nasamirahi ema Jesús ena natiarihiqueneanahi te mesa, téchajicapa ema émana. Ánipa macahehi eta mayehe ema Jesús:

—Tétávicavayare eta viúricacarevaya te visiapapuca eta mávasa ema Viya, vinicayare te mamesara —macahepa.

¹⁶ Tásiha, ema Jesús majicapapa, máichapa:

—¡Jéhesare, te esiapapapucaya! Nímicutichinahe puiti. Matiarihíhi ema émana achane téniricahi eta ichapemuriquene tinicacare. Camuriana ena máichuhaqueneanahi. ¹⁷ Te máimahapa tiúripa eta tinicacare, ma-
vanecapa ema mamusura mametacavaca náitecapa ena nacaichuhacasi-
queneanahi taicha tiúriripahi eta tinicacare. ¹⁸ Namutusera natanucapa eta
náetseraruyarehi. Ema apana ánipa macahehi: “Vuíchaha nítujicavaimahi
níteca. Nuyananumayare nímahapanayare eta nuvachareruhi apaquehe”.
¹⁹ Ema apana énerichuvare, ánvare macahe: “Picatajicanuchaha. Vuíchaha
nítujicavaimahi níteca, taicha nuyananumayare nímahapanayare eta cinco
yúntaquene vuiye nuvachareruanahi”. ²⁰ Ema apana ánvare macahe: “Nu-
paenumava nítauchavahi eta nuvehacacairahi. Eta tacahe, vahi nítujica-
vaimahi níteca”. ²¹ Te tichavapa ema musu vanairucahi, mametacapa
ema máquenu eta namaitujisiravavacahi tútecana ena máichuhaqueneanahi.
Tásiha, tisemapapa ema máquenu. Máichavarepa ema musu: “Tiuri, piyana
puítirichu te plaza étapa te cáleana. Píchuhavaca ena páureana, ena masar-
iana, ena púchuquiana, nácani pétupiaruanayare nacahe mahiqueneanahi”.
²² Tacahe, te tichavavarepa ema musu, mametacapa ema máquenu, máichapa:
“Tata, nítaucharipa eta juca pivanairipihi. Jucarihichahasera eta juca téjasi-
hacareana”. ²³ Tacahe, ema máquenu máichavarepa: “Piyavare puítirichu te
isanitiana. Píchuhavaca ena achaneana, nácanipa piácápajiruanayarepahi te
achene. Picamesavaca náiteca, apaesa nayuriticava eta juca téjasihacareana
mávacua naichahahi. ²⁴ Nusemacarpa puiti. Nájínava néniruimahi ena
nánapureanahi níchuhaqueneanahi” macahepa ema téniricahi —máichapa
ema Jesús.

Vahi máejeraréna eta véhisiraya ema Cristo

²⁵ Te jena sácheana, camuriana ena achaneana téhicanahi ema Jesús.
Tásihasera, éma máesenimurihapa. Máichavacapa:

²⁶ —Te etiarihipuca éti evarahanayare éhicanu, tacamunu epamicavaya
yátupina eta éhisiranuya. Nútínapa émunacapanayare, németavicainapa eta
émunasiravacaini eta ticachichaheana. Mácani achane németavicayareva
eta máemunasiraini esu mayena, machichanaveanapuca, maparapenavea-
napuca. Váipavare éñamaimahi eta ítaresira. Téhesera apaesarichupuca eta
émunasiranuyare, vahi táuricaimahi éhicanuhini. ²⁷ Ecatajivayare taicha
eta éhisiranuyare. Te epicahipuca íjaracava muraca, táimicapacahepuca eta
éhisiranuhi, tiúripaichu vahi ecuehicanu. ²⁸ Tacutiquene te epanerecha-
hipuca éti épiyarecayare eta anuquehe peti apinapuca piso, vahi táuricahini
émunanasicavahini enahahajisiravainarichuini ecaematane, epanerecha-
numayarehi áyanayarehipuca egastaruya ítauchirainahi eta evarahaquenehi
épiyaca. ²⁹ Vahi ácaemuñavaimahi épiyareca eta tiúrina peti, te vahi árata-
haimahi ítaucha. ³⁰ Tásiha, nacahénapapuca ena ticaecahiheanayare:
“Ímahapa, váhira máratahahini máitauchahini eta jena peti, táurinaqueneya-
rehíji. Tíjaracavasamipa. Ichape eta mamelaya” nacahenapapuca. ³¹ Émaripa

mácani rey, te tismahipuca, mavarairahi máichayare eta guerra, macanayarehi mácani apana rey camuripananahi ena machanerana, mapanerechanumayarehi te maratahayarepuca macanara taicha éma vahi camurianainahini ena machanerana. ³² Eta máimairahi vahi máratahayarehi, váhivare tjaracavaimahi máehacacahini. Tásiha, máimivanerecainapa mayehe ema mánarayarehini táitavapa eta semanerehi, vaipa nacupanerechahini. ³³ Ene ecahehi éti. Eta evarairahi éhicanu, epanerechanumayarehi eta ínajisirayare tamutu, eratahairayarepa yátupi eta éhisiranuyare. Taicha te vahi eratahayare, vahi ecucaemuñava éhicanuhini.

³⁴ Eta icheve, tétavicavahi eta táurivahi taicha eta tacamunucarevahi. Étasera eta tajachira eta icheve, tépurucarepahi. ³⁵ Tájinapa tacamunucarevainahini. Ticaquijiyarepa. Ene nacahehi ena únajicavana eta náehisiranuhi. Nacutíhi eta tajachira eta icheve. Te evarahapuca ecaicutiara, tavaraha eta epanerechinavaya —macahepa.

15

Éma Jesús máimicutichinahi te témitiaca étana uvesa (Mt 18.10-14)

¹ Tiuri, te jácani sácheana, títicaparacavanarepa ena achaneana te mávihahi ema Jesús. Camurianapahi éna. Natiarihipahi ena cóbrarécarahiana eta impuestoa. Namutu éna, ichape eta náepurucarevahi nayehe ena fariséoana. Émasera ema Jesús, vahi máepuruvacahini. Tásiha, témeñahavanapa éna te machacaya, taicha navarahapa nasamararacayarehi éma. ² Natiarihipahivare ena fariséoana énapa ena máestroana. Ena nani, vahi náuricahini eta macachaneiravacahi ema Jesús ena nani achaneana. Ánipa nacahe:

—¡Vahi tiuri eta máichaquenehi ema maca! ¡Namatuchucha majacapavaca ena nacahequeneté tájiana ticajachahacareanahi! ¡Nasapihapa macachanevacahi eta nanisirahi ena nánitatajiana! —nacahepa.

³ Tacahe, te masamapa ema Jesús eta juca, máimicutichinavacapa eta máimitusiravacahi. Ánipa máichavaca:

⁴ —Esamanuchaha. Nímicutichinaheya puiti. Matiarihi ema émana achane. Ticayehihi eta cien uvesa. Te témitiyechapuca eta étana, ema achane tíanayarehi matanuca eta táemitiaruhi. Eta máeñamiravahi, majunijicayarehi eta apamuri noventa y nueve uvesa te majaneasihahi. ⁵ Jéhesare, te máichimavapa eta táemitiaruhi, tichavapa tiúrisamurepaipa. Mámapaipa te machepa. ⁶ Te títicapapa te mapena, máichuhapa ena machacayapenana májiriareana. Tacahe, máichapa éna: “Yare, éti apana iúrisamurevare nuyehe núti. Taicha níchimavaipahi eta uvesa táemitiaruhi” máichapa ena májiriareana.

⁷ Tiuri, núti numetacahe eta juca: Énerichu ema Viya te anuma tiúrisamurevare nayehe ena achaneana tiúritaresiranahi, taicha tájina náejecapiravainahini. Tétavicavainehisera eta máurisamurevahi ema Viya nayehe nácani achaneana tímatianahi eta nacapecaturairahi, tásiha téneuchavanapa, nánajicapa eta napecaturanaini —macahepa ema Jesús.

Éma Jesús máimicutichinahi eta táemitiaru étana reale

⁸ Tímiyanava eta máechajirisirava ema Jesús, ánipa macahe: —Nímicutichinaheya eta apana. Sutiarihi esu ésuna esena. Ticayehihi eta dies reale eta tijapu plata. Te témitiyechapuca eta étape, tinanesiyarehi

sutanucayarehi eta táemitiaruhi. Eta sutanusirayare, suyustacainapa eta sumicahu. Supihicainapa tamutu eta te tajuhe eta supena. ⁹ Te suíchimavapa, tiúrisamurénapa. Suíchuhavacainapa ena suchacayapenana suájiriareana. Tacahe, suíchavacainapa éna: “Yare, éti apana iúrisamurevare nuyehé núti, taicha níchimavaipa eta reale nucamitiaruhi” suíchavacainapa esu esena ena suájiriareana. ¹⁰ Tiuri puiti, núti numetacahe eta juca: Ene macahehi ema Viya. Tétavicavainehi eta máurisamurevaya te namuri ena ángeleana eta máneuchiravapa mácani achane cápecaturarahini, máinajisiraipahi eta mapecaturanaini —macahepa ema Jesús.

Ena Jesús máimicutichinahi ema émana achane amaperu tacamitiriaru eta matuhusiva

¹¹ Timiyanava eta máechajirisirava ema Jesús, ánipa macahe:

—Matiarihihi ema émana achane. Apinanahi ena machichanaveana.

Ajairana. ¹² Étana sache, máichapa ema maiya ema émana machicha amuyapana: “Tata, picatajicanupa, píjaracanu puiti eta nuyehyare tatucachaquenuyare eta picayehequeneana” máichapa. Tacahe, tísapavapa ema naiya. Máijaracavacapa eta máimahaqueneana ena apinana machichanaveana. ¹³ Tacahe, étarichuhi te jena sácheanahi, tétupiricavapa ema amaperu, tiyanavanepa. Mámapa tamutu eta mayehéchiravaripahi máijararuhi ema maiya. Tiyanapa te apana avasare tayerehiquene. Eta ánaquí, máitaiyahi tamutu eta máimahaqueneanaini. Tamutupa mamapachichijica. ¹⁴ Tacahe, eta jena sácheana, táitecapauchapa eta ecuha eta avasare mávihahi ema amaperu. Tacahe, namutu ena achaneana tayehe eta te avasare téchurihanapa eta tinicacare. Tivayuchavapa eta ecuha. Ema amaperu títarahaipahi eta máimahaqueneanaini. Tásiha, tájinapa maviyahini eta manica. ¹⁵ Tásiha, ticaquenurecapa mayehé ema émana achane. Tacahe, ema máquenuhi mavanecapa ema amaperu eta majaneasinaya eta cúchiana eta te máesane. ¹⁶ Ichapesera eta máecuavahi. Majamurachainehi manicahini eta taniru eta cúchiana, taicha nájina náitátihini éma. ¹⁷ Tacahe, téquecavapa eta mapaneruanahi. Tipanerequenehavapa émajiva. Ánipa tacahehi eta mapaneruhi: “Namutu ena mavanarana ema tata, tíurihi eta nanisira. Nútisera ani ticapacanuinapa eta nécuava. ¹⁸ Níjaracava, nuyana nuchava eta me tata ticachichanu. Tásiha, níchayare éma: Tátachicha, nucapecaturaipa mayehé ema Viya étapa eta piyehé piti tata. ¹⁹ Tayanarinepuca táimicutijiricavainepuca vahi pichichanuina. Picatajicanusera. Pijacapanu, nímiáquenuchavarine piyehé piti tata. Nácutirine ena pivanarana. Níchayare ema tata”. Tacahepa eta mapaneruhi ema amaperu achane.

²⁰ Tásiha, tiyanapa tichava eta me maiya. Te tiánehipa tútecapa ema amaperu, máimahapa ema maiya. Enurujipa máimativane. Ichaperinehi eta majapanuirahi. Enurujipa tiyana tijunapa mácapa. Majupahacapa ema machicha. Máetserarecapa eta máurisamurevahi. ²¹ Émasera ema amaperu, téchajicapa. Ánipa maicha: “Tátachicha, nucapecaturapa mayehé ema Viya étapa eta piyehé piti tata. Tásihasera, tayanarinepuca táimicutijiricavainepuca vahi pichichanuina” máichapa. ²² Émasera ema maiya, mavaraha máimercaya eta yátupirahi eta majacapirahi ema machicha. Vahi máicuñacahini. Tásiha, mavanecapa ena mavanarana. Máichapa: “Etátajirica, iama eta muíriare tiúrinapana. Emuiriacha ema maca nuchicha. Iama eta tiúrinapana surtija; masurutijaina. Iámavare eta tiúrinapana eparupeva,

máeparupevaina. ²³ Énerichuvare épana eta jena mamona tiújepana. Ecapaca, vinica. ¡Víchayare eta piesta! Viúrisamurevaina eta máitecapirahi ema maca nuchicha. ²⁴ Taicha éma, tímicutijiricavahi eta máepenaquenénahini ema maca, puítisera tiúchujicapa tichavapa ani nuyehé. Máemitiaruhi te numirahu, puítisera nímahapa éma” macahepa ema maiya. Tacahe, ichape eta náurisamurevahi ema namutu. ²⁵ Tiuri, ema émana machicha máechavihi tiyanahi te isaniti. Te tichavapa, te tiánehipa eta napena, masamapa eta piesta te tajuhe. ²⁶ Tásiha, máichuhapa ema émana nacajurure. Mayaserecapa: “¿Tájaha tacayema eta juca piesta?” macahepa. ²⁷ Tacahe, máichapa ema macajurure: “Ema piparape títecapahi. Tásiha, ema piya máimicapacapa eta étana mamona tiújepana. Ichape eta piesta, taicha eta máurisamurevahi ema piya eta máitecapirahi ema piparape” máichapa ema macajurure. ²⁸ Tacahe, tise-marinehi ema maparape. Vaipa mávarahahini masiapahini. Tacahe, te máechapa ema naiya, tiúchucapa. Macamesapa macasiapa. ²⁹ Majicapapasera ema machicha, ánipa maicha: “Pímaha, tata. Ánaquiapapa eta nitatíravihi núti. Tájina nímatiyahini nácapaemachavihinini te pivanairipiana. Tásihasera, tájina píjaracanu-hini eta étanainahini chívachichainapucaini eta nunicahini nucapiestarahipucaini núti, nácachanehinini ena nájiareana némunacasareana. ³⁰ Tásiha, puiti pímicapacainehi eta mamona tiújepana, taicha eta máitecapirahi ema émana pichichatataji. Ema mácatataji títahacavahi eta píjararuinihi picayehequeneanainihi náichavenehi ena esenana túhusiana” máichapa ema machicha. ³¹ Tacahe, ema maiya máichapa: “Pímaha, nuchichachicha, píti ánaquiaparipa eta péjahasiranuhi. Tásiha, tamutu eta nucayehequeneanahi, piyehéanahivare píti. ³² Puítisera, táuricaichucha vicha eta piesta eta viúrisamurevainahi, taicha tímicutijiricavahi eta máepenaquenénahini ema maca piparape, puítisera tiúchujicaipa, tichavapa éma. Ema máemitiaruhi te vimirahu, puítisera víápechavavarepa vímaha éma” máichapa.

Tacahehi eta máechajiriruvanahi ema Jesús nayehe ena achaneana.

16

Eta máimituresirahi ema Jesús, máimicutichina ema capataz timapachichijicahi eta máimahaquene ema máquenu

¹ Ema Jesús ánivare macahehi eta máimitusiravacahi ena máimitureana:

—Nímicutichinahe eta apana. Ema achane rico, matiarihini ema mayehe capataz, téchahi tamutu eta máimahaqueneana ema máquenu. Tásiha, masamairiricapa ema máquenu eta mamapachichijisiraipahi eta máimahaqueneana. ² Tacahe, ema máquenu máichuhapa. Mayaserecapa: “¿Tájaha tacayema eta juca? Nusamauchavihi eta pimapachichijisirahi eta nímahaqueneana”. Émasera ema capataz tájina maviyavahini macatiuchiavahini taicha yátupihini eta máejecapiravahi. Tacahe, ema máquenu máichapa: “Tiuri, vitupaequenehayare tamutu taicha vaipa nuvaraha pímiyanava eta nuyehé”. ³ Tacahe, ema capataz ichaperinehi eta mapanereresirahi taicha eta máuchusiraya. Tásiha, macahepa te mapanereruana: “¿Tájahainapapucu nícharacavayare puiti? Ema náquenu ticuchucanuina tayehe ema juca nématanerepíhi. Ichape eta nutsirihacarevayare taicha vahi núriahini nucaematanehinini eta isaniti, váhivare nuratahaimahi eta tamuracava eta emataneca. Titsirihacarehivare nuyaseserecainini eta nunicaquene. ⁴ Tiuri,

áni nucaheyare. Némeñahavayare nayehe ena ticanteveanahi mayehe ema náquenu, tiámainucava te nítucavapapucaini eta nítatijiyavayare” macahepa te mapanereruana.

⁵ Tacahe, máichuhavacapa namutu émanapahi ena ticanteveanahi mayehe ema máquenu. Tacahe, mayaserecapa ema máinapuiruhi: “¿Péchapuca áyana eta pintevehi mayehe ema náquenu?” ⁶ Tacahe, ema ticantevehi majicapapa: “200 lata eta aceite comer eta nuntevehi mayehe”. Tacahe, ema capataz máichapa: “Júcahi eta piyehe vale pifirmarui. Puítinarichu vítsivachaya eta apana vale. Vaipa pivachachaimahi tamutu. Cien latainarine eta pinteveyare” macahepa. ⁷ Tacahe, mayaserecavare ema apana: “¿Pítiyapa péchapuca áyana eta pintevehi?” Ema ticantevehi majicapapa: “Séisicientohi tarera eta trigo eta nuntevehi mayehe”. Tacahe, ema capataz máichavarepa: “Júcahi eta piyehe vale pifirmarui. Vítsivachaya eta piyehe vale. Vaipa pivachachaimahi tamutu. Quinientorine tarera eta pinteveyare”. Ene tacahehi eta máichirahi nayehe ena apamuriana ticanteveanahi, máitsivachirapaipahi eta nayeheana váleana. ⁸ Tacahe, te máechapa ema máquenuini eta máichaqueneanahi ema mayeheni capataz eta macatiuchiravahi, ánipa macahe: “Tétavicavapa eta máitusirahi masámápuha ema maena nuyeheni capataz” macahepa ema máquenuini. Ene nacahehi eta achaneana máimatirahanahi ema Viya. Éna tiápajupananahivare eta náitusirahi eta tayanirava. Nacachuricahi eta téhicanahi ema Viya, taicha tavayucavacahi eta tájiparacana.

⁹ Puiti numetacaheyare eti nímitureanahi: Eta itaresirahi te juca apaquehe tauriquenehi, te ecaimahaquenehipuca, ecajiyare te napauchahepuca ena ticamunuvanahi. Tacahe, te ítecapapa te mávasa ema Viya, tíuriyare eta ítecapiraya, ánaqui ejaicapainapa eta táitsivayare.

¹⁰ Taicha nácani tíurihi eta náechapajirisirahi jácani ánichichaquenehi, ene tacaheyarehi eta táurivayare eta náechapajirisirayare eta camuriquenehi. Nácanisera vahi tíurihi eta náechapajirisirahi jácani ánichichaquenehi, éneyareichuhivare vahi tíurimahi eta náechapajirisirayare eta camuriquenehi. ¹¹ Taicha te vahi tíurihi eta itauchirahi eta ecatuparahairahi échapajiricaya eta tímahacareanahi eta te juca apaquehe, ema Viya vahi tituparacahémahi eta tímahacareana yátupiqueneana te anuma. ¹² Eta tacahe, itaurahiyare tayehe jácani apayeheana apaesa máijaracahe ema Viya eta ícuchihi, taicha eta máimairahi éma eta itauravahi éti.

¹³ Éti, eta itaresirahi, vahi táuricahini apinanainahini ena iáquenuana. Taicha émunacapanayarehi ema émana, tisuapacarepanayarehivare. Tásiha, ema apana, apaesarineya eta émunasiraina, váipainapa tisuapacaremahi éma. Ene tacahehi eta juca ímahaqueneana, vahi ecuisapa tahapasamurerecahehinehi eta plata, machu tahapapiricaheriana eta émunasirahi ema Viya, étapa eta ecaemataneasirahi éma —máichavacapa ema Jesús ena máimitureana.

*Éma Jesús maconsejachapa ena fariséoana
(Mt 19.1-12; Mr 10.1-12)*

¹⁴ Natiarihivaresera ena fariséoana. Nasamararacahi eta juca máimiturapianahi ema Jesús. Tásiha, nacaecahirichuchasera eta nasamirahi éma. Taicha tétavicavahi eta tavayuasiravacahi éna eta tímahacareana. ¹⁵ Tacahe, ema Jesús máichavacapa:

—Éti épiyacavahi iuri eta ímairavahi nayehe ena achaneana. Émasera ema Viya máimatihí eta esamureana. Macatianacahi ichape éma eta apimira-hérahí.

¹⁶ Numetacaheva eta apana: Ema víyarahaini Moisés, énapa ena víyaranaini profetana tínapucanahi eta náechajisihahi tayehe eta nítésirayarehi nati Cristo ecuchapaquenehi. Puiti ichape eta navapinairavahi ena camuri-queneana téhicanuanapaipa. Éti apana, tituparacahe éhicanuyareva.

¹⁷ Numetacahe puiti: Váhiquene títavaimahi eta tasuapacarevahi eta máechajiriruvana ema Tata. Máichecuaraquire éta, tayanapanehipuca táitava eta anuma étapa eta juca apaquehe. ¹⁸ Éti, eta ímiturapi, ísapahi mácani achane máquijica esu mayena, tásiha, ísapahivare maveha esu apana esena. Nútisera numetacahe: Mácani achane, te máinajicapuca esu mayena, tásiha maveha esu apana esena, éma ticapecaturaipahi me Viya. Tacutiquene mácani apanavare achane mavehapa esu esena máinajiruhí ema suima, énerichuvare ticapecaturahivare me Viya taicha ésu, matiaríhichahi ema suímaquenehi —máichavacapa.

Eta macatajivairahi ema rico étapa eta máuricacarevahi ema paure ticaijare Lázaro

¹⁹ Tacahe, ema Jesús máimitucavacavare ena achaneana. Ánipa macahe: —Nímicutichinahe eta apana. Matiaríhíhi ema émana achane. Mavayuchahi eta marricuva. Tétavícvahi táurinavahi eta macamuiríhíra. Tijanunuhaacanecha. Tamutuhi sácheana máicha eta táurinaquene piesta. ²⁰ Tásiha, matiaríhíhivare ema apana achane paure ticaijare Lázaro. Ticajumahi. Amairíhíhi carachacha eta majuma. Téchajapairicahi éma tamutu sácheana te mapajacura ema rico. ²¹ Ema maca paure tíyaseserecachi manicayare eta máemacharajiana ema rico. Tájinasera náijaracaimahi. Tavetijípa, vahi túmenahini ema paure. Vaipa maratahahini maçatiuchavahini eta táeverasirahi eta tamucuana eta macarachana. ²² Étana sache títecapapa eta máepenirahi ema paure. Nárajapapa ena ángeleana; náepanapa eta máchaneva ema Lázaro, námapa tayehe eta paraíso mávihahi ema víachucaini Abraham. Tacahe, te táequenepa, tépenavarepa ema rico. Tíúrinavare eta náecarirahi. ²³ Eta máepenirahi éma, tíyanapa tayehe eta macatajivaiyayarehi. Tásiha, te téjamíháuquichapa, máimahapa eta mávihahi ema Abraham, émapa ema Lázaro te machacaya. Mayerehivacahisera eta máímairahi. ²⁴ Tacahe, típiaracapa ema rícoini: “Tata Abraham, pájapanunu. Picatajicanu, pívanésinanuini ema Lázaro máechípaicaini apaesachichaini eta mavauquí te une. Máecasarechapanaini eta nunene. Taicha tétavícvahi eta numaunevahi eta te juca nucatajivaiyahi tayehe eta juca návíhahi táijurequene yucu” máichapa. ²⁵ Émasera ema Abraham majicapapa: “Vahi nuvanecaimahi. Péchavachucha, nuchicha, te achanevichaha, tétavícvahi eta píúricacarevahi. Tájina pácamunuhini eta pítaresirahi. Ánipasera picatajivaiyahi. Émasera ema maca Lázaro, ichapemuríhi eta macatajivairahi te achanerichaha. Púitísera vaipa macatajivahini. Puiti éma, majacaparipahi eta máuricacarevahi. ²⁶ Tacutiquene máitujíhi eta mánuuirainahini eta ára píyehe. Pítirípa váhivare pítuíjavaimahi pítecapauchahavi ani te juca víávíhahi víti, taicha jucaríhi eta tíchejímirauchahavíhi eta víánuuirainahini tacutihí eta tíúchausi cajacure. Máitujíhi eta mayanahini” macahepa ema Abraham. ²⁷ Tacahe, ema rícoini máichavarepa: “Tiuri, te váhipuca

títujicacarehi, picatajicanusera. Pivanesinanuini mayana ema Lázaro te nupena. ²⁸ Mametapaninanuini ena cincoqueneana nuparapenaveana. Maconsejachapanavacaini eta náeneuchiravainaini éna, apaesa váhini nacuitcahini tayehe eta juca návihahi núti nucatajivaiyahi”. ²⁹ Émasera ema Abraham máichavarepa: “Éna, narataha téchajicurecana, ticaravahuanayare eta Sagrada Escritura. Te nasuapahivarepuca eta tavanairipianahi, vahi tisiapanaimahi eta te jara ecuñaraqui piávihahi píti”. ³⁰ Ema rícoini majicapavarepa: “Táitaurevaquene ene tacahehi, tata Abraham. Tiúripanahiserahipucaini mayanahini ema émana máepenaquenehi eta nayehe ena nuparapenaveana, mametapanavacahini. Németeaca téneuchavavaneanapaini”. ³¹ Ema Abraham máichavarepa: “Te váhipuca nacusuapahini eta Sagrada Escritura, tacaheyarehi eta namasuapirayare mácani máechepurehi máepenaquenehi” macahepa ema Abraham.

17

Ichape eta máicuñayare mácani tímiaquipaica te pecatu ena amaperuana (Mt 18.6-7; Mr 9.42)

¹ Te táequenepa, ema Jesús mametamurihavarepa ena máimitureana. Ánipa macahe:

—Yátupi eta vahi téjiacavaimahi eta tímiaquipaicayare tayehe eta pecatu ena achaneana. Ichapesera eta náicuñayare nácani táemesiavanayare náimiaquipaisiraya nácani apamuriana tayehe eta pecatuana. ² Mácani tímiaquipaicaya ema émana amaperu, tiúripanahipucaini máepenahini mativainahini éma. Váhirichupucaini macucaicuñahini; taicha vahi macuimiaquipacahini ema amaperu tayehe eta pecatu. ³ Eta tacahe, échapavaya éti machu ímiaquipaica ena amaperuana.

Tatuparaca viperdonacha ena téjecapavana viyehe (Mt 18.21-22)

Numetacahe eta apana: Te máejecapavapuca ema piparape eta piyehe, piconsejachaya. Téhesera máeneuchava eta piyehe, piperdonachaya éma. ⁴ Tayanapane siétehénapuca máejecapava te étana sache, máeneuchavaserá eta piyehe, tituparacavi piperdonachayare —macahepa ema Jesús.

Tamutuyare virataha te yátupihí visuapa ema Viya

⁵ Tiuri, ena apóstoleana nayaserecapa ema Jesús:

—Tata Viáquenu, picatajicahavi. Pimitucahavi apaesa tajurucapaini eta vicasíñairavahi mayehe ema Viya. Vivaraha ichapenaini eta vicasíñairavaya eta mayehe —nacahepa.

⁶ Tacahe, ema Jesús majicapavacapa:

—Vahi tácomesa ichapenahini eta ecasiñairavahi mayehe ema Viya. Tayanapanepuca ánichichainarichu eta ecasiñairavahi, tácutipuca eta táquichicha eta mostaza, tamutuyare erataha. Étaripa eta jácani yucuqui, te evarahapuca ecayejecca, eratahayarehi. Te íchapuca: “Piyejecava eta te juca, piyana pisucuchava te cáquiure”; tásiha, eta yucuqui tisuapaheyarehi. Tiyejecavainapa tayehe eta cáquiure.

Tatuparaca vítauchayare eta vicaemataneasirayare ema Viya

⁷ Étaripa ema mácani achane te ticamusurahi, te másihapaipapuca ema musu te vámahí eta majaneasirahi eta vaca, te tísahhipuca, te titecapapa

te peti, ema máquenu váiparinehi matátáuchaimahi máepiyaca eta tinicare eta máenisiraya ema musu. ⁸ Matátáuchayarechucha mavaneca ema musu émaina máepiyaca eta tinicare, máenicayare ema máquenu. Tásiha, máichainapuca: “Tiuri, nítanesipa. Pitipavapa pinica”. ⁹ Váiparinehivare mahasulupayachaimahi ema mamusura eta máitachirahi eta mavanahianahi. ¹⁰ Ene ecahehi éti, ecuti ema musu. Te itauchapa tamutu eta evanahiana me Viya, ecahenapa: “Viti músuanahi vahi vicunachacarémahi. Tacarichuhi vicha eta vivanahianahi” ecahenapa —máichavacapa ema Jesús.

Emá Jesús macanaracahi ena diésqueneana leprosoana

¹¹ Tímiyanavavare tipaica ema Jesús, macaijuhepa eta Jerusalén. Máetavicavacapaipa eta avasareana te provincia Galilea étapa eta Samaria. ¹² Te máitecapauchapa eta apana avasarechicha, tiúchujicanapa ena diésqueneana ajairana ticajumana eta lepra. Nacapayacapa éma. Váhisera náemeñahavahini éna, nayerehichucha. ¹³ Tacahe, napiaracapa ema Jesús:

—Tata Jesús Nazareno, pájapanuhavi. Picatajicahavi, picanaracahavi eta vijuma —náichapa.

¹⁴ Tacahe, ema Jesús máesenicavacapa. Tásiha, máichavacapa:

—Eyana, ímrecava te namirahu ena tuparairucana apaesa náimamaracahe. Énainapa nametajirica eta iúriavaipa, enarasiraipahi eta ejumanainihi —máichavacapa.

Nasuapavanehi éna. Tásiha, eta nayanirahi, tinaracanapaipa. ¹⁵ Tacahe, ema émana, eta máimairavahi eta manarasiraipahi, tichavapa te mávihahi ema Jesús. Tipiaracapaipahi muraca eta macunachirahi ema Viya. ¹⁶ Matupirupa tépuyucahi te mamirahu ema Jesús. Tétipaicapa macaitcapa eta mamira te apaquehe, mamaverarasiravahi eta mahasulupayachirahi ema Jesús. Ema maca achane, indigenahi samaritano. ¹⁷ Tacahe, ema Jesús máichapa:

—Ticutimahi diésnahi ena nucanararuanahi. ¿Tájahapuca tacayemahi vahi nachavahini ena apamuriana nuévequeneana? ¹⁸ Macarichuhi tichava ema maca apavasaquenesamihí, macunachapaipa ema Viya.

¹⁹ Tacahe, ema Jesús máichapa ema achane:

—Péchepuca, piyana pichava. Pinaracaipasera táichavenehi eta picasiñairanuhi —macahepa.

Eta ecutiaraneanaya eta máitesiraya ema Cristo

(Mt 24.23-28, 36-41)

²⁰ Tiuri, ema fariséoana nayaserecavare ema Jesús tájamuhuyarepuca eta máitecapiraya ema Cristo nacuchapaquenehi. Éma, majicapavacapa:

—Eta máitecapiraya ema ecuchapaquenehi, tájina metárapimahi eta máimeresiravaya éma. Vahi tácajerahini eta ímairaya. ²¹ Nájinavare timetajiricaimahi eta máitecapiraya taicha matiarirhipahi éma puiti ani. Nútiripa —máichavacapa.

²² Tacahe, máichavacapa ema máimitureana:

—Tatiaririhiyare eta sáchevayare ichapeyare eta ecaimairunuiraya. Tétavicavaya eta evarairaya íjahúchavayare ímahanu nuti Manerejirunuhi ema Viya eta nuchaviraya. ²³ Te navayuaracahepuca nacahenapuca: “Émaripa ema vímahaquenehi ánaqui”. Ena apamuriana nacahénavarepuca: “Émaripa ema maca vímahaquenehi puiti eta ani”. Váhisera ecusuapavaca éna. Váhivare ecuehicavaca. ²⁴ Taicha te táitachavapa eta nítecapiraya nútí, nucutiyare

eta tájahúchirava títecapa eta térameca. Namutuyare ena achaneana te juca apaquehe tinecapanuanayare. Tacaheyare eta nuchavirayare nuti Manerjirunuhi ema Viya. Ticaecherayaresera, tájina vahi máchasimahi. ²⁵ Tativayaresera nucatajivanumayare ichape. Tépurunuanayare ena achaneana natiarihiqueneanahi puiti. ²⁶⁻²⁷ Tacutiyare eta acane ena achaneana machamurianaini ema Noé. Ena nani tinicairihianarinecha, náematanerinecha, térana, tímarerecanahi ena nachichanaveana. Vahi téñamavanaimahi eta náimairahi ema Noé eta masiapirahi tayehe eta ichape pacure. Tájina vahi natsecavahini eta táitecapauchirayarehi eta ichape une. Tacahe, eta táemirisirapa eta ichapequene tíquiva, tacapapajicavacahi namutu éna. Ene nacaheyare ena achaneana te jena sácheyare. Vahi titsecavanaimahi tayehe eta nuchaviraya. ²⁸ Tacutiquene ene nacahehivare acane ena achaneana ena machamuriana ema Lot. Tinicairihianahivare éna, téraracavanahivare. Étanecha napanerechahi náijarareca eta náevavareruana. Ena apamuriana natanujiricarinecha eta nacamunuqueneanahi. Tépiyarecanarichucha pétiana. Vahi naéñamavahini tayehe jácani ecuñaraquiya. ²⁹ Téhesera te majunijicapa ema víyahaini Lot eta avasare Sodoma, tíjahúchavapa tíquivapa eta yucu ticasiríqui azufre tíasihahi te anuma. Tacapapajicavacapa. ³⁰ Ene tacaheyare eta nusacherayare nuti Manerjirunuhi ema Viya eta nuchaviraya.

³¹ Te jena sácheyare, nácani tachimararuanayare te aneca, vahi táuricaimahi nasiapahini te napena navehanumahini jácani náeñamaqueneanahi náimahaqueneana. Énaripa ena napaiririruanahi te vámahi, váhivare tichavaequenehavanaimahi náepanahini eta náeñamaqueneanahi. ³² Écharichuhi eta acane eta suíchararacavahi esu mayenaini ema Lot. Ésu, tétaficavahi eta suéñamaequenehairahi eta suímahaqueneana sujuniruanahi. Táichavenahi eta suvarairahi tichava, ésujivapa ticamitiequenehava*. ³³ Nácani téñamanahi eta náitairesira, tahapapiricarinecha eta tájiparacana te juca apaquehe, éna témitiequenehanaya eta náitairesira. Énasera nácani tahapapiriruanahi eta náehisiranuhi, tayanapanepuca táimicapacavaca, éna títujicavanayare tíuchuchuanayare eta náitairesiranaya.

³⁴ Numetacahevanecha: Te jena yátiyare, te apinanahipuca nácani natiarihiqueneanahi te tajuhe peti, émanayare ema níchuhaqueneayare, ema apana manasiyare. ³⁵ Tacutiquene, apinanahipuca ena esenana tiyuvarecanahipuca. Énerichuvare ésuna esu níchuhaqueneayare. Esu apana sunasiyare. ³⁶ Te apinanahipuca ena ajairana te vámahi, éneyareichuvare émana ema níchuhaqueneayare. Ema apana manasiyareva —máichapa ema Jesús.

³⁷ Eta nasamirahi ena máimitureana, nayaserecapa:

—Tata Viáquenu, ¿távihapuca táitauchiavayare eta juca pimetarapianahi? —nacahepa.

Majicapapa éma:

* **17:32** Ema Viya mavanecahi ena apinana ángeleana, nametapana ema Lot eta máicuñasirayarehi eta avasare Sodoma. Ésusera esu mayena ema Lot, ticametacasihineni eta sujunairayare sucachaneyarehi ema suima, sucatiequeneharichucha eta suímahaqueneanainihi. Étapa tivichahi sunasipa te achene, tépiyavapa icheve máripuhi.

—Vahi ecueñamava eta távihapuca nítecapihayare. Núti nítecapauchaheya te jácani iávihahi éti† —máichavacapa.

18

EMA JESÚS MÁIMICUTICHINAVARE EMA JUEZ ÉSUPA ESU TÉPENAIMA

¹ Ema Jesús máimitucavacavare ena máimitureana vahi nacucainajiruva eta nayujarasirana. Tímiyanavanaya, tayanapane vúichaha najacapavanehini eta nayasearuanahi. ² Eta máimicutichinahi, ánipa máichavacahi:

—Matiaríhi ema achane. Juézhi tayehe eta avasare. Éma, tájina vahi mapicauchahini ema Viya. Nájinavare mapicauréna ena achaneana.

³ Sutiarihivare tayehe eta avasare esu ésuna esena suépenaimaquenehi. Suchavaururicahi ema juez taicha eta sumetauchirahi ema sucatianaruhi.

⁴ Émasera ema juez vahi masuapahini eta sumetauresirahi ésu. Váhisera sucainajiruvahini. Tásiha, mapanerequenehapa macahepa: “Núti néchinava. Nájina nárataha napamicanuhini. Váhivare tipamicanuimahi ema Viya.

⁵ Ésusera esu suca esena, nuyacujipa eta suchavauruirisiranuhi. Nícharinepuca eta suvarahaquenehi, apaesa vaipa sucuápechava suíteca” macahepa ema juez.

⁶ Puiti, nuvaraha ecaicutiaraquenehaicha eta juca nímiturapihi mayehe ema juez mapicauruiraha eta macatiuchirahi esu suca esena táichavenehi eta suchavauruirisirahi éma. ⁷⁻⁸ Ene macahehi ema Viya. Vahi máyererejimahi eta macatiuchiravevaneya eti manerejiruanahi, esamacareyarehi taicha eta macainajiruvairahi eta eyujarasirainahi tamutu sácheana, yátiana. Étaripa te táitecapa eta nuchavirayare nuti Manerejirunuhi ema Viya, németeacahi natiarihiyareichaha nuchimapaqueneanaya ena vahi ticainajiruvahini eta nayujarasira, nacutihi esu suépenaimaquene eta sumacainajiruvairahi —máichavacapa ema Jesús.

EMA JESÚS TÍMITUCAHAVI VAHI VICASIÑAVAVAICAIMAHI, VÁHIVARE VÉPURURAHIMAHÍ

⁹ Ema Jesús apanavare eta máimicutichinahi eta máimituresirahi, nayehe ena tímijachavanahi tíuriana, tájina náichiravainahi; náepuruvacahisera ena apamuriana achaneana. Tacahe, máichavacapa:

¹⁰ —Nímicutichinahe eta apana: Natiarihi ena apinana ajairana te Templo. Téneuchavanahi. Ema émana achane, fariséohi éma. Ema apana, tisipecaturarahi éma. ¹¹ Ema fariseo, eta macasiñavavaisirahi, témeñhavapa tayehe eta cuarto tacapicahuquenehi te Templo. Ánipa macahehi eta mayujarasirahi: “Nuhasulupayachavi, Tata Dios, eta núrivahi te pimirahu. Vahi nácutihini ena apamuriana achaneana tíamerahianahi, tisipecaturanahi, esenamareanahivare. Váhivare nácutihini ema mácatataji te juca nuchacaya. ¹² Píti pímatinuhi eta apiheirahi áyunanu te semanana. Níjaracavivare eta plata nunganaruasa. Te nunganachhipuca eta dies peso, étanahi peso eta níjaracaviparaca. Téhesera cien pésohipuca eta nunganareruhi, dies pésohivare eta níjaracavi. Vahi nuyavanahini eta námavahuásana eta piyehe” macahepa.

¹³ Émasera ema apana achane vahi máemeñahavahini. Tiyerehichucha eta máeneuchiravahi. Váhivare mapatsicavahini máesenicahini te anuma.

† 17:37 Te máechajiruvahi ema Jesús, ani macahehi: “Te jácani mávihahi ema máepaquene, éta távihayare eta sipuquiana”. Eta juca mayehehi proverbio, tatiarihi eta tacayemaquenehi tayumurevahi.

Téhatupachavahisera eta máeneuchiravahi. Ánipa macahehi: “Tata Dios, nucatisamureva ichape eta nucapecaturairahi piyehe. Pájapanunusera piperdonachanu eta nupecaturana” macahepa ena achane.

¹⁴ Tiuri, nutupiru numetacha: Ema maca achane, eta machaviraipahi te mapena, tijacaparéinehi me Viya taicha yátupihi eta máeneuchiravahi. Émasera ema fariseo vahi majacaparehini. Taicha nácani ticasíñavai-canahi, timijachavanahi ticonacharehi, éna tépurucareanayarehi me Viya. Nácanisera ena tiyaseacanahi ema Viya eta májapanuiravacaina, yátupihi tijacapareanayarehi mayehe —macahepa ema Jesús.

Ema Jesús mayujaraucha ena amuyana
(Mt 19.13-15; Mr 10.13-16)

¹⁵ Tacahe, ena achaneana námavacapaipahi ena amuyana eta mayehe ema Jesús, navarairahi máemamahacavacayarehi éma. Énasera ena máimitureana vahi náisapahini, nacaichepaipa ena tiámanapahi ena amuyana. ¹⁶ Émasera ema Jesús máichuhavacaichucha ena amuyana. Tásiha, ena máimitureana máichavacapa:

—Ésamiricachucha ena amuyana, náitecaichaha ena nuyehe. Vahi ecucaichepaica éna. Taicha ena nuchanerana nuti Cristo nacutiyahehi ena nani amuyana eta nasuapajiraiva éna. ¹⁷ Nutupiruva numetacha: Nácani vahi nácutihi ena amuyana eta nasuapajiraiva, vahi nuchaneranaímahi éna —macahepa ema Jesús.

Ema achane rico téchajiricava mayehe ema Jesús
(Mt 19.16-30; Mr 10.17-31)

¹⁸ Matiarihi ema achane. Náiyacararipahi ena achaneana. Témeñhavapa mayehe ema Jesús, mayaserecapa:

—Tata maestro, piti piúrique. ¿Tájahapucaini eta nícharacavaini eta nítuji-siravaina me Viya máichecuaraquirénahini eta nítaresira? —máichapa.

¹⁹ Ema Jesús majicapapa:

—¿Tájaha tacayema pímiarechanu “Piti piúrique”? Mararihi ema Viya. Jéhevare éma, tétavicavahi eta máurivahi. ²⁰ Téhesera te pivarahapuca pecha eta apana vítaresira, pisuapayarehi eta mavanairipiana ema Viya. Píti pímatipa eta júcana: “Vahi picuveha esu esena apayena. Vahi picucapareca. Vahi picuamereca. Nacuija pépiyaequeneruina. Pémunacaya ena ticachichavianahi” —máichapa.

²¹ Tacahe, ema achane majicapapa:

—Tamutu nusuapahi eta juca vanairipiana eta námaperuvahi, puíticha juca ajairanuirapa —macahepa.

²² Tásiha, ema Jesús máichavarepa:

—Jucarihichahasera eta pítauchaquenyare. Píjararecaya tamutu eta pímaqueneana. Tásiha, píjaracavacaya ena páureana. Jéhevare éta, pijacapayare eta pímaquenyare te anuma, táitsivayare. Te tamutupa eta juca, pítecavanepa péhicanu —máichapa ema Jesús.

²³ Te masamapa ema achane eta juca macayemaquenehi ema Jesús, ichaperinehi eta mapanereresirahi, taicha mavayuchahi eta marricovahi. Macatiequeneharinehi tamutu. Tíyanapa típanererecapaipa. ²⁴ Eta máimairahi ema Jesús eta mapanereresirahi, máichavarepa:

—Yátupiquenehi máitujihí eta náijarasiravainahini eta náehisiranuinahini ena rícoana eta nasiapirainahini te anuma. ²⁵ Esamanuchaha. Eta juca

tímicutijiricavahi eta vipera camello, máitujihí tánucuhahini te támicuejehe eta parirapa. Ene nacahehi ena rícoana —macahepa.

²⁶ Tacahe, ena tisamararacana, ánipa tacahehi eta nayaseresirahi:

—¡Tétavicavahi eta tamáitujicacarevahi! ¡Nájina títujicavaimahi náuchucuhahini!

²⁷ Ema Jesús majicapavacapa:

—Nájina émanaina achane émajivaimahi ticuchucuhava. Macarichu ema Viya marataha ticuchucuhahe —macahepa.

²⁸ Émaripa ema Pedro máichavarepa:

—Vítisera, Tata, vinaquicahi tamutu eta vicayehequeneana, vivarairahi véhicavihi.

²⁹ Ema Jesús majicapavarepa:

—Nutupiru numetacahé: Namutu nácani nanaquicahi eta napena, najunijicahivare ena ticachichana, ena naparapenaveana, nayenanapuca, nachichanaveanapuca, táichaveneyarehi eta náehisiranuyare; ³⁰ jararihiyare eta táitsivayare te juca apaquehe eta náimahaquenyare. Nararihiyarevare ena achaneana téchapajiricanayareva. Tásiha, tavetijinapa te náitecapapa te apana náitaresiraya, máichecuaraquirenapa eta náuricacarevaya —macahepa ema Jesús.

Ema Jesús tíápechavare máechajisiha eta máepenirayare

(Mt 20.17-19; Mr 10.32-34)

³¹ Ema Jesús máiputsiamurihapa mámamurihapa ena dócequeneana máimitureana. Tásiha, máichavacapa:

—Ímaha puiti, viyanainapa vicaijuhénapaipa te Jerusalén. Ánaqui táitautiavayare tamutu eta nájucunachaqueneanahi ena profetanaini eta nícharacavayarehi núti Manerejirunuhi ema Viya. ³² Ánaqui nucaijararecasiyare núti nayehe ena apavasaqueneana romanoana. Énainapa ticaeahijiricanuanayare, ticaetemajiricanuanaya, tiátutuquichanuanayareva. ³³ Téstanuanayareva. Tásiha, ticapanuanainapa. Tásihasera te mapanaquénapa sache, néchepucainapa te nécari —máichavacapa.

³⁴ Énasera ena máimitureana vahi nacaicutiarahini eta juca mametasiravacahi. Váhivare náimatiequenehahini tájahapuca eta máechajisihahi taicha vahi náemetecahini énemahinahíni náichahini ema Jesús.

Ema Jesús macaimairica ema achane púchuqui ticavasa te Jericó

(Mt 20.29-34; Mr 10.46-52)

³⁵ Tacahe, te tiánehipa títecapa ema Jesús tayehe eta avasare Jericó. Matiaríhi ema achane púchuqui, téjacahi te achenechacaya tasiaparacuhi eta avasare. Tiyaseserecahi eta limosna. ³⁶ Te masamavacapa ena camuriqueneana achaneana tiánucuhanapaipa, macayasasererupa ema púchuqui tájahahipuca eta téchacarehi. ³⁷ Nametacapasera eta émarahi tiánucuhayarehi ema Jesús Nazareno. ³⁸ Tacahe, tipiaracapa ema achane púchuqui:

—¡Tátachicha Jesús! ¡Pítiqueneripa yátupiquenévihi Cristo! ¡Picatajicanupaini! ¡Pájapanunu! —macahepa.

³⁹ Ena achaneana tínapumiráuchanapahi ema Jesús navarahapa nacamatincayarehini. Émasera tipiararecaichucha:

—¡Tátachicha Jesús! ¡Pítiqueneripa yátupiquenévihi Cristo! ¡Picatajicanupaini! ¡Pájapanunuini! —macahepa.

⁴⁰ Tacahe, ema Jesús te macanarapa, tíchecanumapa. Macavanairipipa náepana ema púchuqui. Te nacaitecapa, mayaserecapa:

⁴¹ —¿Tájaha picamunu nuyehe?

Ema púchuqui majicapavarepa:

—Tátachicha, nuvaraha picaimairiricanupaini —macahepa.

⁴² Ema Jesús máichapa:

—Tiuri, nuchicha. Táichavenehi eta picasiñairanuhi, pinaracapa puiti — máichapa.

⁴³ Jéhesareinehi, tǵjahúchavapa timairirica ema púchuqui. Tásiha, tiyanapa máehica ema Jesús tiúrisamurepaipa. Macunachapaipavare ema Viya. Énapa ena achaneana tímararacanañi eta manarasirahi, ichaperinehi eta nacuna-chirahi ema Viya.

19

Ema Zaqueo mavarahahi máimati ema Jesús

¹⁻² Tacahe, eta máitecapiraipa ema Jesús te tajuhe eta avasare Jericó, matiarahi ema achane rico, ticaijare Zaqueo. Nacapitarahi ena cóbrare-carahiana eta impuesto. ³ Te masamairiricapa eta émairahi ema Jesús títecapapahi, mavarahapa máimatiyarehi. Étasera eta máichipichuvahi éma, vahi máratahahini máimahahini ema Jesús te namuri ena camuriqueneana achaneana. ⁴ Tásiha, tijunapapa eta te mayanihayarepahi ema Jesús. Tiápanapa te yucuqui, máimaraacasarápahi ema mavarahaquenehi máimati. ⁵ Tacahe, te macapecupa ema Jesús eta yucuqui mávihahi ema Zaqueo, máesenicapa ema Jesús te anuquehe. Tásiha, máichapa:

—Zaqueo. Yare, piúcupaica, taicha puiti nuvarahahi nunasinumayare te pipena —máichapa.

⁶ Tacahe, ema Zaqueo titátájipa tiúcupaicapa. Tiúrisamuréinehi eta majac-pirahi ema Jesús. ⁷ Eta náimairahi ena achaneana eta juca, téchajicanapa mayehe ema Jesús. Náichapa:

—Émamesapa máitecapauchayarehi ema maca ticapecaturahitátáji — nacahepa.

⁸ Te téjacanapa te tajuhe, témeñahavapa ema Zaqueo te mamirahu ema Jesús. Tásiha, macahepa:

—Pímaha, Tata Náquenu. Núti néneuchavapa me Viya. Puiti níjaracayare ena páureana ticutimuriacaca eta nímahaqueneana. Nímichavayareva te natiarhipuca ena nucaetemaqueneanahi, cuátrohénapasera eta táitsivayare eta nímicavaqueneya —máichapa.

⁹⁻¹⁰ Tásiha, ema Jesús majicapa:

—Nímahapa puiti eta yátupirahi eta péneuchiravahi eta pipecaturana, taicha pivarahahi pímiclavayare eta plata picatemareranahi. Tásiha puiti, pijacpacarepa me Viya. Vaipa pémitiequenémahi. Taicha píti picutipá ema viáchucaini Abraham eta macasiñavairahi mayehe ema Viya. Píti nuchane-ravipa, picutipá ena apamuriana nucurujiuranahi. Taicha éta tímitecanuhi nuti Manerejirunuhi ema Viya —macahepa ema Jesús.

Ema Jesús máimicutichinava ema príncipe eta májjarasirahi ena machanerana eta maplatane, apaesa nacajurucayarehi

¹¹ Tacahe, ena achaneana, eta náimairahi eta mánehiraripa eta Jerusalén, náimijachaipahi éta pa tímiyanayare éma, eta máimeresiravayare eta

marreyvayarehi. Tacahe, ema Jesús máimatiacaripa eta napanereruanahi. Tásiha, máimitucavacapa eta apamuri máimicutichinapa apaesa nácaicutiara eta tayerevaichaha eta marreyvayarehi. ¹² Máichavacapa:

—Matarihíhi ema achane. Ichape eta mapicacarevahi. Tiyanayarehi te apana avasare tayerehiquene. Eta tímiyanayarehi ánaqui máepanihayarehi eta mávacureyarehi eta marreyvayarehi tayehe eta mávasa. Eta machavi-rayarepa, téjacayarepa éma. ¹³ Te tiyanayarépa éma, máichuhanumapa ena diésqueneana machanerana. Máijaracavacapa étapevaca eta maplatane tasiva-chaquenehi. Tásiha, máichavacapa: “Ecajurucayare eta juca nuplatane. Te nuchava, táimecavaipa eta tachichanayare”. ¹⁴ Tacahe, tiyanapa ema rey-yarehi tayehe eta macaijuheyarehi. Te máequenepasera, tise mamurianapa ena majaneanana. Ánipa nacahe: “Vahi vávaraha émaina viyehéna rey ema maca” nacahepa. Náimivanerrecapa eta comisión, nayaseserecayare vahi nacujaraca eta mávacuréna. ¹⁵ Ticamesavauchuchasera majacapaichucha eta mávacurehi. Te tichavapa te mávasa, téjacapa émapa reyhi. Tásiha, máichu-havacapa ena machanerana máijararuanahi eta maplatane. Mayaserecapa te tímecavaipahipuca eta tachichanahi. ¹⁶ Tiyanapa ema émana tímere-cavapa. Máichapa: “Tata náquenu, eta piplatane píjararunuhi tímecavaipa eta tachichanahi. Diésripa eta tajurusirahi”. ¹⁷ Ema rey majicapapa: “Tiuri, nuchicha. Tájina táichava. Tétavicava eta piúri. Puiti vahi támapurujimahi eta piúrivahi tayehe eta juca ánichichaquenehi níjararuvihi. Puiti níjaracaviyare pituparahaya nujupahaviya. Píti táquenuya eta diésquene avasareana”. ¹⁸ Tímerecavavarepa ema apana mamusura. Máichapa: “Tata náquenu, eta píjararunuhi piplatane, tímecavaipahi cinco eta tajurusirahi”. ¹⁹ Majicapavarepa: “Tiuri, nuchicha. Tájina táichava. Tétavicava eta piúri. Puiti nunacaviyare aguenucaviya tayehe eta cincoqueneana avasareana”. ²⁰ Tímerecavavarepa ema apana mamusura. Máichapa: “Tata náquenu, júcahi eta piplatane. Vahi nucajurucahini. Núnacaichucha, nítipuichahi te pañuelo. ²¹ Taicha nupicahi nácaetehahini, machu pícuñacanu. Pétáviuchahi píti eta pivainarajiva, taicha píti pivehahi eta nématanevachayaréni”. ²² Tacahe, ema rey máichapa ema machanera: “Eta juca péchajiriruvahi, éta tímicaeche-rachavihi eta pépiyahiraivahi. Piplujuvahi eta tichavihi. ²³ Te pímatinuhipuca eta nuvainarajivahi, eta nuvehairaya eta pématanevacha, etapa eta nícuñasiraviyare te picamitiacapuca, váhiyapa pinacapaini te banco eta nuplatane. Étainahini tajurusihahini apaesainahini nímaequenéahini puiti”. ²⁴ Tásiha, máichavacapa ena apamuriana: “Everejica ema maca eta nuplatane. Íjaraca ema ticajurucahi eta diéspequene”. ²⁵ Éna nacahevarepa: “Tata viáquenu, tímecavaipahinéni diéspepahi eta tajurusirahi”. ²⁶ Ema rey majicapavarepa: “Tiuri numetacaheya: Nácani ticajurucanahi camuri, nujanechinayare eta apana. Nácanisera tájinaquenehi nacajururénahini, nuverejicayare eta náijaracasinihi. ²⁷ Énasera ena ticatianacananahi éna vahi najacapanuhini eta nurreyvahi, iáminanuyare ani te numirahu. Ecapapajicavaca éna”.

²⁸ Tacahe, te tamutupa eta juca máimituresirahi, ema Jesús tímiyanavavarepa tipaica. Macaijuhepa eta te Jerusalén. Tínapucapa ena máimitureana.

Títecapapa ema Jesús eta te Jerusalén
(Mt 21.1-11; Mr 11.1-11; Jn 12.12-19)

²⁹ Te apanapa semana, tiyananavarepa. Te tiánehipa eta avasarechichana Betfagé etapa eta Betania, tacanaraipahivare eta masihi ticaijare Olivoquiji, tichecanumanapa. Mavanecapa ema Jesús ena apinana máimitureana.

³⁰ Máichavacapa:

—Eyanayare eta te jena avasarechicha Betfagé. Te ítecapayarepa, ímahayare eta burrico ticaitihahi. Eta jena sárare mávuéquehéchaha, nájinaichaha ticaperainahi. Evejapucayare, iáminanuyare eta ani. ³¹ Te natiarihinapuca náeñama, emetacayare eta nucamunuirahi núti —máichapa.

³² Tacahe, tiyananapa ena vanairucanahi. Jéhesaréinehi etapaichuhi eta mametarapihi éma. ³³ Te navejapucaripa eta burrico, ena ticayeheana nayaserecapa:

—¿Táviha íámihayare eta viyehe burrico?

³⁴ Éna najicapapa:

—Ema maena Viáquenu macamunuhi —nacahepa.

³⁵ Tacahe, náisapapa eta námiraya eta burrico. Te náitecapauchapa ema Jesús, náepacamaequechapa eta náepacuhana. Tásiha, ticaperapa ema Jesús. ³⁶ Te náimahapa ena achaneana tiúchujicapaipahi ema Jesús, náimativanepa. Tiyananapa nácapahi éma. Tépacapairicanapaipa te mamirahu eta náepacuhana te mayanihayarepahi. ³⁷ Eta napaisirahi, témiricanapaipa te tachausi eta cerro ticaijare Olivoquiji. Namutu ena máimitureana téhicanahi ema Jesús tipiaracanapaipa eta náurisamurevahi taicha eta náimahaque-
neanahi tiáramicareana máichaqueneanahi éma. Ichape eta nacunachirahi ema Viya. ³⁸ Ánipa nacahehi eta napiarasirapahi:

—Yare, Tata, ¡Piti réyquene, vanairucaquenévihí me Viya! ¡Asulupaya! ¡Puiti, te anuma viciticacahi eta viúrisamurevahi víti te eta juca apaquehe! Tétávicava eta vicunachira ema Viya eta macatajisirahavihi —nacahepa.

³⁹ Tacahe, eta nasamirapahi ena fariséoana natiarihiqueneanahi eta napiarasirapahi ena achaneana, náechajicapa ema Jesús:

—Tata maestro, picamatinacavacaichu ena nani pímitureana —náichapa.

⁴⁰ Ema Jesús majicapavacapa:

—Tiuri, numetacahe puiti. Te namatinapuca ena nani, táitsivasera étainapa tipiaracaya eta máriana —macahepa.

⁴¹ Tacahe, títecanapapa te tápusi eta cerro Olivoquiji. Ticaeherapa eta Jerusalén. Eta máimairahi ema Jesús eta avasare, týahapa táicha. ⁴² Macahepa eta máiyairahi:

—Páurevisami piti návasasami Jerusalén. Te nácaicutiaraini apaesachichainaini ena pichichanaveanahi eta nuvarairahi nucuchucuhavaca núti. Puiti juca sache nutiarahiraripa ani piyehe, náurihainehi nácamapuravahini eta náuricacarevahini. ⁴³ Taicha járajapayare eta sáchezare táetaviuchavaya eta nacatajivairaya ena pichichanaveana náicha ena piánaranaya tichayacavianayare. Téhavianainapa, tájinapa piviyavaimahi picatiuchiavaimahi. ⁴⁴ Témetapaicavianainapa te apaquehe. Nacapapajicavacainapa ena pichichanaveana. Tájina nacaemachaquenémahi eta peti. Tamutuyare náquipapaica. Eta piviyevaya, eta juca pimajacapiranuhi eta néjirairavihi nuti mavanerunuhi ema Viya —macahepa.

Ema Jesús macuchuchujicavaca ena tjararecanahi eta sárareana, cáyureana te tajuhe eta Templo

(Mt 21.12-17; Mr 11.15-19; Jn 2.13-22)

45-46 Tacahe, te apanapa sache, tiyanapa ema Jesús. Tisiapahi te Templo. Máimaharinehi ena achaneana títararecanahi eta sárareana, cáyureana. Tásiha, tise mapa. Eta macuchuchujisiravacahi, máichavacapa:

—Ema Tata Nucaiyaquene, ani macahehi eta máechajiriruvahi te Sagrada Escritura: “Eta nupena tacarichu táicuchihi eta nayujarasirareya ena achaneana” macahepa. Étiserá eti tiámerahiana ecasiapavapa eta te juca. Emaeperajicapa eta tacapicahuirahi. ¡Eyana iúchucatataji! —máichavacapa.

47 Eta manasiquenerahi ema Jesús, tamutuhi sácheana tímitureca tayehe eta Templo. Énase ra ena tuparairucana énapa ena escribánoana, napanerechaipahi eta navarairahi nacapaca ema Jesús. 48 Váhisera napatsicavahini taicha natiarihi ena camuriqueneana achaneana tisamararacanaahi eta máimiturapiana éma. Váhivare náisapaimahi náichahini ena ticatianacanaahi.

20

Nayasereca ema Jesús te vanairucahipuca me Viya (Mt 21.23-27; Mr 11.27-33)

1 Étana sache tímiturecaichaha ema Jesús tayehe eta Templo eta máechajiriruva ema Viya. Títecaparacanapa ena tuparairucana, énapa ena aquenucarahana, énapa ena escribánoana. 2 Nayaserecapa ema Jesús:

—Píti, vahi vitupararuvinahini víti eta píchirahi eta júcana. ¿Nájahasica tivanecavihi? ¿Nájaha tituparacavihi picha eta juca píchaqueneana? —náichapa.

3 Ema Jesús majicapavacapa:

—Núti apanavare nuvaraha nuyaserecahe. Ejicapanuyaresera.

4 ¿Nájahapuca tivanecahi ema Juan eta máitesirahi eta máicachasirisirahi? ¿Émapuca ema Viya tivanecahi, émajivahipuca eta máitesirahi? —máichavacapa.

5 Váhisera náituruequenehahini eta najicapirayarehi. Tiácapaemajiricanapa. Ánipa nacahe eta náechajiriruvanahi:

—¿Tájahasica vicayemayare eta vijicapirayare ema maca? Te vémunahacava vicha: “Mavaneruhi ema Viya”, éma macahénapapuca: “Tásiha, ¿váhiyapa esuapahini éma?” 6 Téhesera vácahepuca: “Émajivaichucha eta máitesirahi”, ticauyayacareipa nacapacahavi ena achaneana te márjahiana, taicha náechahi éna émairahi ema Viya tivanecahi ema Juan —náechajiricapa.

7 Tacahe, ánipa nacahehi eta najicapirahi ema Jesús:

—Vahi vecha víti —nacahepa.

8 Ema Jesús máichavarepa:

—Énerichuvare núti, vahi numetacahémahi nájahapuca ema tituparacanuhi —náichapa.

Ema Jesús máimicutichina ena pártirárioana máurirahana (Mt 21.33-44; Mr 12.1-11)

9 Tacahe, ema Jesús tépanavavarepa máimitucavaca ena achaneana. Ánipa tacahehi eta máimiturapiana:

—Nuvaraha nímicutichinaheya, tatiarihi eta isaniti amairiha úvaquiji, masucurehi ema émana achane. Tiyanayarehisera ema ticayehe, tipairicayarehi te apana avasare. Tacahe, matuparacavacapa ena tírehanayarehi te áñoana eta mayehe uva. Partidoyarepa eta majunijisirayarehi.

¹⁰ Tacahe, te títicapapa eta caje tayairahi eta uva, máimivanerecapa ema mamusura mayaseapanavacayarehi ena pártirárioanahi eta tatucachaque-neyarehi éma. Énaserá ena pártirárioanahi, tájina náijaracahini. Tisemauchavanarichucha, náehapa ema vanairucainihi. ¹¹ Tásiha, ema ticayehe máevatacavarepa ema apanavare mamusura, mayaseapanavacayarehi éna. Énerichuvaresera náumehavarepa ema vanairucainihi, náehavarepa. Tájina náijaracahini. ¹² Tásiha, ema ticayehe vahi macainajiruvahini. Máevatacavarepa ema apanavare mamusura. Énerichuvare náehavarepa ema vanairucainihi. Najarachapa, náquijicapa.

¹³ Tacahe, ema ticayehe tipanererecaripa: “¿Tájahasica nícharacavayare?” macahepa. “Nuvanecapuca mayana émajacaruvaina ema nuchicha némunaruquenehi. Tatiarihi te émainapapuca napicaucha te náimahapa”. ¹⁴ Tacahe, te náimahapa ema machicha, navetijichucha eta nasemirahí. Tímitujiricanaripa. Ánipa nacahe: “Émainapapuca ticayeheyare ema maca. Yare, vicapaca, apaesa tánasipa tamutu vítinapa vicayehe”. ¹⁵ Tacahe, nacaratapaca éma, nacuchucapa eta tayehe eta isaníti, nacapacapa.

Puiti nuyaserecaheyare: ¿Tájahapuca máicharacavayare ema achane ticayehe eta úvaquiji? Jéhesare, vaipa macayehini paciencia. ¹⁶ Títicavanénapa macapanavacayarepa ena pártirárioanahi máurirahanahi. Tásiha, máijaracainavarepa eta úvaquiji ena apamuriana pártirárioanayareva — macahepa ema Jesús.

Tacahe, ena tisamararacana, ánipa nacahehi:

—Viti vicatajicacare, vahi vácutihini ena nani máurirahana —nacahepa.

¹⁷ Ema Jesús máesenimurihavacapa. Tásiha, máichavacapa:

—Jéhepuca, németeacaserá vuíchaha ácaicutiarahini eta tacayemaquenehi eta Sagrada Escritura. Éta, áni tacahehi: “Ena tépiyarecarahiana eta Templo, tasapiha náepuruhi eta mari táicuchihi tatumearayare eta peti, taicha vahi náimatihini. Émasera ema Viya macaiticapapa eta táicuchihi eta tatuparahahi. Tacapichaquenehi puiti” tacahehi eta Sagrada Escritura. ¹⁸ Puiti, núti nucutihí eta ichape mari náepuruquenehi. Eti epurunuanahi, iáquipaicavayare évetutujicayare. Tichimaracaheyare eta muraca ecuñaraqui taicha eta emavarahairahi éhicanu —máichavacapa.

¹⁹ Ena tuparairucana navarahapa náijahúchayarehini nacarataca ema Jesús, taicha tímatiacavanapa éna eta énaírahi tayunacavaca eta máechajiriruvana ema Jesús. Váhisera napatsicavahini taicha návamirahuhi ena camuriqueneana achaneana.

Navarahahi náemejecapavacha ema Jesús tayehe eta impuesto

(Mt 21.45-46; 22.15-22; Mr 12.12-17)

²⁰ Tacahe, náimivanerecapa ena apamuriana ajairana tépiyacavanayarepahi tíuriana te mamirahu, navarahairahi natanucayare eta tímucaviuchayarehi. Énayarepa timetauchanavarehi mayehe ema aquenucahi prefecto Poncio Pilato. ²¹ Tacahe, nayaserecapa éma, ánipa nacahe:

—Tata maestro, vímatihí eta tatupiruvairahi tíuri eta juca pímiturapianahi. Nájinavare pinerejiruinahini ena achaneana, taicha pívarahahi náehicahini namutu eta táurinaquene achene ticaijuhe me Viya. ²² Vívarahahisera viyase-recaviyare: ¿Táurichipuca vivachacha eta viyasehana impuesto mayehe

ema Presidente Emperador romano? Taicha víti, machanerahavihi ema Viya, ¿masi? —náichapa.

²³ Ema Jesús máimatiacavacapa eta taurivapahi eta napanereruana. Tacahe, máichavacapa:

—¿Tájaha tacayema evaraha ímiaquipaicanu? ²⁴ Nímahaseji, íáminanu étapena eta reale.

Éna náijaracapa. Tásiha, ema máichavacapa:

—¿Nájaha ticaijare eta juca? ¿Nájahavare ticavasimahi eta juca mirare eta te juca reale? —máichavacapa.

Éna najicapapa:

—Mayehe ema Presidente Emperador.

²⁵ Tacahe, éma máichavacapa:

—Tiuri. Táuricahi íjaraca ema Presidente Emperador eta juca mayeherichuhi éma. Tásiha, íjaracavare ema Viya eta mayeherichuhivare éma — máichavacapa.

²⁶ Váhiquesera náratahahini náimiaquipacahini eta nayaseresirahi te namirahu ena achaneana. Táitsivahi ichape eta náramirahi eta táurivahi eta majicapiravacahi. Timatinanapa tésamiricavanapa.

Nayasereca ema Jesús náicharacavayarepuca ena náepenaqueneana eta náechepusirayare

(Mt 22.23-33; Mr 12.18-27)

²⁷ Nacahepaipavare ena apamuriana achaneana. Saducéoana. Ena nani saducéoana, apana eta náimiturapiana; váhi nasuapa eta náechepusirayare ena náepenaqueneana. Éna natanucahi eta táetseraruvayahi. Tacahe, nayasereca ema Jesús:

²⁸ —Tata maestro, ema víyarahaini Moisés manaquicahi eta ajureca máechajiriruvahi eta viyehé: “Te máepenaequenehahipuca ema achane esu mayena, tásiha, nájinahipuca manaquiequeneruvainahini machichainahini; te matiarihihipuca mácani maparapehi, mavehayare esu machine-naequene, apaesa émainapuca macachicha eta suyehe, máitsivainahi ema maparapeni”. ²⁹ Tacutiquene te natiarhipuca ena siétequeneana ticapara-pejiricacana, te títauchavapa ema náechavímuri, máepenaequenehapasera esu mayena. Nájinahi machichainahini. ³⁰ Tacahe, ema maparape máitauchavare esu machinena. Énerichuvaresera máepenaequenehavare, nájinavare machichainahini. ³¹ Ema émana maparape máitauchavare ésu. Énerichuvare máepenaequenehavare. Namutu ena siétequeneana navehahi ésu, tásihasera náepenaequenehapahi, nájina émanainahini mácachichahini eta suyehe. ³² Te táequenepa, tépenapa esu esenaini. ³³ Tacahe puiti, te jéhesarepuca tichavanayare títarecana te táequenénapa eta náepenirahi ena nani, ¿nájahapuca ena siétequeneana éma yátupiquenehi suímaquenehi esu esena? Taicha ena siétequeneana namutuhi suímanarihi —náichapa.

³⁴ Tacahe, ema Jesús majicapavacapa:

—Ena ajairana te juca apaquehe natuparacasivaichuhi títauchavanayare suyehe esu esena. ³⁵ Ánaquisera te apana náitaresira, nácani ticatuparahayare eta nasiapirayare te anuma te náechepucapa, vaipa nácamunuimahi esu esena. Énaripa ena esenana, vaipa nácamunuimahi ema ajaira. ³⁶ Taicha

vaipa tiápechavaimahi tépenana. Nacutinapa ena ángeleana eta namaepe-nacacairahi. Yátupinapa machichanaveanainapa ema Viya, taicha éma ticaechepucavacahi.

³⁷ Émaripa ema víyahaini Moisés timetacahavi eta májurehi eta yátupirahi eta vahi tánasi tépena eta náchanevana ena náepenaqueneana. Te máimahapa ema Moisés eta yucuqui timurujíhi, eta macametacasiyahi mayehe ema Viya eta émarichuhi ema macasiñaquenehi ema Abraham, ema Isaac, émapa ema Jacobo. ³⁸ Taicha ema Viya, ema téchahi eta náitaresirana ena téhicanahi, tayanapane tépenanaripa. Namutu ena, tímiyanavarichucha títareca eta náchanevana te mamirahu éma —macahepa ema Jesús.

³⁹ Tacahe, ena escribánoana, ena natiarihiqueneanahi náichapa ema Jesús: —Tétupicava eta juca péchajiriruva, tata maestro —nacahepa.

⁴⁰ Váipasera nacaemuñavahini nápechavahini nayasereca.

Éma Cristo, yátupiquenehi Viya. Mámariequenenihisera ema rey David (Mt 22.41-46; Mr 12.35-37)

⁴¹ Éma Jesús máichavacavarepa:

—Éti ecahehi eta échajiriruvahi: “Tiúchucayare ema Cristo, mámariequenehare ema víyahaini rey David” ecahehi. ⁴² Yátupíhi ema Cristo achanequenehi eta máimahi taicha mámariequeneníhi ema víyahaini David. Nuvarahasera epanerechaya eta juca máechajiriruvahi ema David te májurehi Salmo, ani macahehi: ⁴³ “Éma Viya máichapa ema Tata Náquenu Cristo: Yare, péjaca te nuvaure, eta picuchapihayare eta nucaepuyúsiraya te pimirahu ena ticitianacavianahi” macahepa. ⁴⁴ Éma David, eta máimijarechirahi ema Cristo: “Tata Náquenu”, ¿tájahapuca eta macayemaquenehi? Nutupiruva numetacahe: ema Cristo yátupiquenehi Viya éma. ¿Tájaha íchahi éti? —máichavacapa.

Éma Jesús máimereuchavaca eta nájecapiravana ena escribánoana (Mt 23.1-36; Mr 12.38-40; Lc 11.37-54)

⁴⁵ Namutu ena achaneana nasamararacahi ema Jesús eta máechajisiravacahi ena máimitureana. ⁴⁶ Ánipa macahehi eta nayehe:

—Échapavayare éti, machu éhica eta nayeherepiana ena escribánoana. Navarahavare ticapichuanayarehi eta náechajisiraya ena achaneana te jácani nácapajisihapahi éna. Tacutiquene tinerejiurucavana eta táurinaqueneana téjasihacareana te tiyanana te viúrujisirarevana. Étaripa te nanisirana, ticaejacavanavare te jácani távihahi eta tíurinisipana tinicacare. ⁴⁷ Tacutiquene naverejicavare eta nacayehequeneana ena tépenaimana, nájina najapanuquenéna. Tásiha, tépiyacavanapa religiósóanahi, tíúpiemana eta nayujarasira, namavarairahi tácaecherahini eta náichira eta tamauriqueneana. Énasera tiápajucavanahi eta nacaicuñairaya muraca.

21

Éta sunaquiruva esu máimaru tacachuricahi eta nanaquiruvana ena rícoana (Mr 12.41-44)

¹ Éma Jesús máimamararacahi ena rícoana eta nanaquisirava eta plata tayehe eta chapama nanaquisirareva eta námavahuana mayehe ema Viya.

² Énerichuvare máimahavare tinaquicava esu ésuna esena suépenaimaquene.

Páurequenehi ésu. Sunaquicahisera eta apipechichahi eta suplatane.

³ Tacahe, ema Jesús macahepa:

—Ímaha esu suca esena páurechicha. Ácuneucha eta suémunasirahi ema Viya. Jéhesare ésu, tímepanávahi eta sunaquiruva, sucachuricavacahi namutu ena apamuriana achaneana. ⁴ Taicha namutu éna tacarichu nanaquicahi eta náemacharajiana naplataneana. Ésusera esu suca páurehinéni, sunaquicahisera tamutu eta sucayehequenehi. Suítahi eta sunicavachayarehini — macahepa.

Ena Jesús máimereucharipa eta táquipaisiravaya eta Templo

(Mt 24.1-2; Mr 13.1-2)

⁵ Natiarihihi ena téchajisihanahi eta Templo. Náechajisihahivare eta táurinaqueneana tayereruvana nanaquiruanahi ena achaneana, étapa eta táurinavavacahi eta máriana tayeheanahi. Ichapemurihi eta táejeravahi te nacaematanénapa. Tacahe, ema Jesús máichavacapa:

⁶ —Járajapayare eta sáchevayare ticaquipaicasinapa tamutu eta juca Témplosami. Téjanerepaicainapa tamutu eta juca táurinaqueneanahi ímahaqueneana puiti — macahepa.

Tatiarihiyare eta ecutiareanaya te tánehipaicha eta táichecuraya

(Mt 24.3-8; Mr 13.3-8)

⁷ Tacahe, nayaserecapa ema Jesús. Náichapa:

—Tata Maestro, ¿támuhuyarehipuca eta náimiaquipaisirayare eta Témplosami? ¿Jararihiyarepuca eta ecutiareyare eta apana péchajisihaqueneana? —náichapa.

⁸ Ema Jesús máichavacapa:

—Ecuneuchavaicha yátupina, machu navayuacahe, taicha nárajapayare ena tépiyacavanayarepahi tímivasichavanayarepahi nuyehé. “Nútiripa Cristo” nacaheñapa. Ena apamuriana nacaheñapa: “Táitecapaquenepa puiti eta sache”. Váhisera ecusuapavaca, váhivare ecuehicavaca. ⁹ Étaripa te esamairicapuca eta guerra, revoluciónpuca, váhivare ecuarameca. Taicha eta tánapuaraquianayarehi eta júcana ecutiareanayare, vuíchahasera étaimahi eta táichecuraya.

¹⁰ Ánivare macahe:

—Téhacacayareva eta ichapequeneana avasareana. Ticanarajiricainapa eta apamuriana. ¹¹ Tatiarihiyareva eta ichapeyare tayamurisirana eta apaquehe. Te avasareana tatiarihiyare eta ecuhámuhuyareva, jumare-muhuyareva. Te anuma tímerecavainavarepa eta ichape ecutiareya, táimayare eta ecuñaraqiyare.

Ena achaneana napanajiricainapa ena téhicanahi ema Viáquenu

(Mt 24.9-28; Mr 13.9-23)

¹² Tativanumayaresera tipanajiricaheanayare éti, táichavenénahi eta éhisiranuhi nútí. Ticaratacaheanayare, tíamaheanayare te náurujisirarevana, ecayaserehinapa nayehe ena juéseana. Ecaevatainapa te cárcel. Tásiha, etiarihiyare eti tíamaheanaya te namirahu ena aquenucana, téhevere te namirahu ena Presidenteana gobiernonahi, ecaviurevayare táichavenehi eta éhisiranuhi. ¹³⁻¹⁴ Étumechavasera. Te námahepa te ecayaserehiyaya, ecamapuravainapa échajisianuyare. Váhi ecueñamava eta ecayemayare ecatiuchiravaya. ¹⁵ Nímahahéinepa nútí, níjaracaheyare eta ítusirayare ecatiuchava. Nájina ácutimahi eta ítupajjiasiravaya. Ichape ecachuriacayare

ena iánaranaya. ¹⁶ Etiarihiyare éti énajacaruvainapa ena ticachichaheana tǵjararecaheanaya énaripa nácani eparapeanapuca, énajacaruvayareva tǵjararecaheana, ényarepaichupuca ena ejaneanana, ítunacasareana. Enerejicavainapa eti nacaparuanaya. ¹⁷ Namutu ena acha neana ticatianacaheanayare táichavenénahi eta éhisiranuhi. ¹⁸ Tayanapanesera nacapacahepuca, nímahahéinepasera núti. Vahi émitiequenémahi. Étaripa eta echutimacana, tájinavare témitiequenémahi. ¹⁹ Téhesera ecamicahi tamutu, ímiyanavahi eta éhisiranuhi, núti nǵjaracaheyare eta ítasesiraya.

²⁰ Te ímahapa ena suntaruana nachayacapa eta Jerusalén, étanaquene-yarehi ejército eta náichapemurivaya, étainapa ícutiaraya eta táitavirayare eta avasare. ²¹ Tásiha, te ímahapa eta juca, táuricapa etátájinapa ejuna, eti etiarihiqueneanahi te Judea. Ecaijuheyare eta te céroana, étaina eyumurusivaya. Nácani tiávihanahi te tajuhe eta avasare Jerusalén, tavarahaipahi náuchucavane tayehe. Nácani tiávihanahi te vámahiana, vaipa távarahahini nachavahini tayehe eta avasare. ²² Taicha táitecapauchainapa eta tasacheyarehi eta tacaicuñairaya, títauchavainapa eta tametarapi eta Sagrada Escritura. ²³ ¡Páureanasami nácani esenana tachimararuanayare, nácani ticajarianahipuca, nácani esenana ticachichanahi eta amuya tiájcachaha! Támairijicainapa eta nacatajivairayare namutu ena achaneana tiávihanahi te Jerusalén taicha eta náicuñayare. ²⁴ Natiarihi ena tépenanaya te guerra, ena apamúrriana nacaratatajicainapa prisionéroanainapa. Námavacainapa te apanaqueneana avasareana. Ema Viya máisapainapa tisiapana te Jerusalén ena apavasaqueneana. Énapa téchanayare eta Jerusalén. Tiámainucava te máicutichapa ema Viya, macuchucavacainavarepa.

*Eta máitesiraya ema Manerejiruhi ema Viya
(Mt 24.29-35, 42-44; Mr 13.24-37)*

²⁵ Tacahe, tímerecavanainapa eta ecutiarareyare te sache, te caje, étapa te jarairiquiana. Tipicanainapa ena achaneana te juca apaquehe. Tiáramecanainavarepa taicha eta nasamirayare eta muracaquene táepacuruha eta ichapequene une. ²⁶ Ena achaneana tiáquipaicavanainapa eta napisiraya, taicha eta náimairayare eta ecutiarareanayare, váhisera náimatiequenehaimahi tájahapuca eta náichararacavayarehi. Énerichuvare tiyjecavavacainapa eta tiávihanahi te anuquehe anuma. ²⁷ Nupaenumava nítecainapa nuchava núti Manerejirunuhi ema Viya. Namutu tímahanuanayare eta núcupaisirayare. Tiámanuinapaipa eta úcaji. Níñehinapaipa eta táetaviuchirayare eta nujaraivayarepahi. ²⁸ Te ímahapa tanacuchavapa eta juca ecutiarareanayare, evapinavainapa éti taicha tiánehiripa eta nítecapiraya nucatiuchiráheyare.

²⁹ Máimicutirachinavare eta máimituresirahi. Ánipa macahe:

—Ecauneyare eta jácani yucuqui. ³⁰ Te ímahapa túsvachavavacapa eta tapacajiana, tiánehiripa eta únemuhuyareipa. ³¹ Ene tacahehi, te ímahayarepa, ímatiacainapa eta tánehiraripa eta nítesirayare. ³² Numetacahevanecha: Vuíchaha títavanaimahi ena achaneana náitareruanaiachaha te táitecapapa eta juca ecutiarareanaya. ³³ Títavayarepa eta anuma étapa eta apaquehe. Tativyaresera títauchava tamutu eta numetaruhehi.

³⁴ Échapavaicha, machu tachimaracahe eta jena sache, vahi ecucuti ena tavayuaruana eta téracare, machu muracachutihéna táicha. Vahi ecueñamava eta ítasesira, machu tahapapicahe eta éhisiranuhi. ³⁵ Eta táitecapauchirayare

eta sache nuchavirayare tímicitijiricavahi eta táijahúchirava eta táerata-sirava eta trampa. Ene nacaheyare ena achaneana te tamutu avasareana eta namanecapauchiravaya. ³⁶ Eta tacahe, etsecavaicha yátupina. Eyuja-rauchavahi támutu sácheana, apaesa túmehénapa eta ecamichiraina tamutu eta juca táicharacavayare, apaesa tacuija ecuichiravaina eta ítecapauchi-ranuya te numirahu nuti Manerjirunuhi ema Viya —macahepa ema Jesús.

³⁷ Tiuri, tamutu sácheana tiyana eta te Templo ema Jesús. Tímiturecahi. Te yátivare tiyanavare te avasarechicha Betania te táequenehi eta cerro Olivoquiji. ³⁸ Ena achaneana, tamutu yáticarahiana, tiyanana te Templo, titsecavanaripa eta nasamararasirayare éma.

22

Napanerechapa eta nacaratasiraya ema Jesús (Mt 26.1-5, 14-16; Mr 14.1-2, 10-11; Jn 11.45-53)

¹ Tamirahupaipaicha eta piesta ticajare Pascua, eta náepanavaira eta semana eta nanisirahi étachucha pan mayehere levadura. ² Tacahe, ena tuparairucana énapa ena escribánoana, navarahaichaha náimicapaca ema Jesús. Tásiha, natanucahi eta náicharacayare eta nacaratasirayare. Návami-rahuhisera ena achaneana.

³ Tacahe, ema Satanás mávahácapa ema émana máimiture ticajare Júlasí. Émarichuhi nachamurihi ena dócequeneana apóstoleana. ⁴ Tacahe, ema maca Júlasí tiyanapa matanupanavacahi ena tuparairucana, énapa ena nacápi-tárana ena suntaruana tayehe eta Templo. Téchajiripanavayarehi nayehe, mametacavacaipa eta táicharacavayarehi eta máijararesirayarehi ema Jesús eta nayehe. ⁵ Tiúrisamureanarinehi eta mametasiravacahi éma. Nameta-capá eta náijarasirayarehi eta plata. ⁶ Tacahe, éma majacavacapa eta naplatane. Tásiha, máichavacapa:

—Tiuri, núti népanaheyare te nímahapa nacuijapa ena achaneana te machacaya. Námahénapa tayehe eta mávihahi éma —máichavacapa.

Ema Jesús mavanecahi ena apinana máimitureana, natsecayare eta naniru-yare tayehe eta Pascua (Mt 26.17-25; Mr 14.12-21; Jn 13.21-30)

⁷ Títecápapa eta sache táepaniravahi eta semana tapiestara eta nanisiraya eta pan mayehere levadura. Étarichuvare eta jena sache ticajare Pascua, nacapasiraya eta uvesa ticajare cordero pascual, nanisirayare te jena yati. ⁸ Ema Jesús mavanecavacapa ena apinana máimitureana, ema Pedro émapa ema Juan. Máichavacapa:

—Eyanayare étupiripanaya eta viniruyare tayehe eta Pascua.

⁹ Éna nayaserecapa:

—¿Táviha pivaraha vétupirisihaya?

¹⁰ Ema Jesús majicapavarepa:

—Eyanayare tayehe eta avasare. Te ítecapayarepa tayehe, íacapajicayare ema émana achane tiámaphi eta une te yupi. Éhicayare éma te peti masiapi-hayare. Éti apana esiapayareva. ¹¹ Emetacayare ema ticayehe eta peti. Ani íchayare: “Ema viyehe Maestro tivanecahavihi viyaserepanavi pímechahavi eta cuarto vinisihayare eta uvesachicha eta viyeherepi, vicachaneyare éma” íchayare. ¹² Éma, tímechahénapa eta ichape cuarto te anuquehe piso.

Táuriquenéipahi eta jácara téjasihacareana. Tásiha, étupiricapa eta viniruyare —máichavacapa ema Jesús.

¹³ Tiyananapa ena vanairucanahi. Jéhesaréinehi, náimahapa étapaichuhi eta macayemaqueneanahi ema Jesús. Tacahe, náetupiricapa eta naniruyare tayeheyarehi eta Pascua.

*Ena Jesús mánimurihapa ena máimitureana
(Mt 26.26-29; Mr 14.22-25; 1 Co 11.23-26)*

¹⁴ Tacahe, te hórapa eta nanisirayarehi, téjacanapa te mesa ema Jesús énapa ena apóstoleana. ¹⁵ Eta máenisiravacapa, máichavacahi éna:

—Íchapemuri eta nuvarairahi nucachanehe eta nunisirayarehi eta juca téqueneha nénisirahehi puiti eta juca yati páscuirahi, mapurare vuíchaha táitecapahini eta népenirayare. ¹⁶ Tásiha, numetacahevaneya puiti, vaipa nápechavaimahi nunica eta Pascua, tiámainucava te táitauchavapa eta nusiapi-
raya eta nucavacureraya, nucajupahairaya ema Tata —macahepa.

¹⁷ Tacahe, mavehapa eta vasu náerirare, mahasulupayachapa ema Viya. Tásiha, macahepa:

—Era eta juca. Ecajjiricaca. ¹⁸ Puiti numetacahevane: Vaipa nápechavaimahi nera eta juca tachi eta uva, tiámainucava te táitauchavapa eta nusiapi-
raya eta nucavacureraya, nucajupahairaya ema Tata —macahepa.

¹⁹ Tacahe, mavehavarepa eta pan, mahasulupayachavarepa ema Viya. Mayuvetuhecapa, májaracavacapa ena máimitureana. Tásiha, máichavacapa:

—Eta juca neche. Enica. Étivenehi níjararecavahi eta népenirayare. Eta juca aparahiyare te apaquehe, te étipava énicaca, éta témechaheyare nuyehé —
máichavacapa.

²⁰ Énerichuvare, te títanesianapa, mavehavarepa eta náerirare vasu. Máichavacapa:

—Eta juca vino, tácutiarahi eta nítine táepusairuvaya íchavene éti, nufirma-
chirayare eta arairu matratune ema Vicáyaquene, nucaejasirayareva eta
matratune apaesa ejacapacareya mayehé.

²¹ Puitisera, ani te etaracu, mararihi ema tíjararecanuyare. ²² Yátupi-
quenehi eta nacapasiranuyarehi, taicha tacahehi eta mapanereruhi ema
Tata eta nuyehé nuti Manerejirunuhi éma. Páuresamisera ema tíjararecanuya
—macahepa.

²³ Tacahe, ena máimitureana tiyaserejiricanapa:

—¿Nájahapuca mácani te vitaracu ema tíjararecaya ema Viáquenu? —
nacahepa.

*Ena Jesús máimitucavaca eta nacapichuirayare ena téchapajiricanahi ena
nachamuriana*

²⁴ Te táequenepe, tiácapamajiricanapa ena máimitureana tayehe eta nájaha-
yarepuca ema ichapequenepanaya aguenuca te nataracu te náejasiraya te
návacureanayare. ²⁵ Te máechapa ema Jesús, ánipa máichavaca:

—Ena réyeana énapa ena aguenucana te ichapequeneana avasareana
nacaetemajiricavacahi ena achaneana, navarairahi ticapichuanayarehi.

²⁶ Étisera vahí táuricaímahi ene ácahehini. Téhesera evarahahipuca ecapichahu,
vahí ecasíñavaimahi. Ecutiyaire ema amaperu eta mamansuvahi. Tacuti-
quene nácani tivanecanahi, tatuparacavacahi téñamavanayare
eta náechapajirisiravacayare ena nachamuriana. ²⁷ Eta nayeherepi
ena achaneana, ichape eta napicauchirahi ema ténicahi eta tinicacare.

Énaserá ena vanairucana téchapajiricanahi eta mesa, vahi nacapicahuhini. Puítiserá, nímitucaheyare eta juca arairu nuvanairipi. Puiti ímahanuipa eta nítátirahehi. Nuvaraha ecutinuya. Ítáticayare éti.

²⁸ Éti, ímararacanuhi eta náichiranuhi ena ticatianacanuani. Váhisera ejunijicanuhini. ²⁹ Eta tacahe, níjaracaheyare núti eta etuparahanayare ecutinuyare núti eta nucatuparahairaya mayehe ema Tata. ³⁰ Éjacainapa tayehe eta ecatuparahairaya. Étinapa evanerecaya nayehe ena dócemuri-queneana ena vijaneanana israelítana. Ecachanenuinavarepa te mesa eta enisiráya ánaqui te nucatuparahairayare —máichapa.

Éma Jesús máimereucha éma Pedro eta máepiyasiráya vahi máimati éma Jesús (Mt 26.31-35; Mr 14.27-31; Jn 13.36-38)

³¹ Éma Viáquenu máichapa éma Pedro:

—Nuchicha Simón, péchapavayare. Éma Satanás, ichape eta mavarairahi ticaicutiraheyare tiáquipaichayare emutu éti. ³² Nútiserá nuyaseuchahehi me Tata, pítipira, apaesa vahi tacuemitiaca eta péhisiranuhi. Piáquipaicavasamiyaresera. Tichavayaresera eta picasiñairanuya, tásiha pétimechavacainavarepa ena apamuriana pichamuriana —máichapa.

³³ Éma Pedro majicapapa, máichapa:

—Tata Náquenu, tájina vahi nujunijicavímahi. Níjaracava néhicavi tayehe eta cárcel. Te nacapacavípuca, núti apanavare níjaracavavare nacapacanu apaesa nácachanevi —macahepa.

³⁴ Éma Jesús majicapapa:

—Numetacavivaneya, Pedro. Puiti jena yati, te tamirahuinarichaha eta táechajisiraya eta varayu, piti mapaheyare pépiyacavayare vahi pímatinu, eta picatiuchiravayare pítipiva —máichapa.

Puiti etsereacavainapa

³⁵ Tacahe, éma Jesús mayaserecavacavarepa ena máimitureana. Máichavacapa:

—Te nuvanecahénapa epaica, nutuparacahehi vahi ecuama eta tarera, eta billetera, eta eparupevana, ¿yátupihí, masí, vahi ecamunuvapahini?

Éna najicapapa:

—Tájina vácamunuipahini.

³⁶ Tásiha, máichavacavarepa:

—Puítiserá mácani ticatarerahi, tiúripanahi mámayare eta matarera, étapa eta mayehe billetera. Émaripa mácani tájinahi mayehénahi espada, tiúripanahi májarareca eta masacu, mavacharesihaya eta mayehayare espada. ³⁷ Tacahe numetacahévanécha. Éna achaneana nacatianacahaviya muraca. Títauchavainapa eta táechajiriruvanahi eta Sagrada Escritura eta níchararacavayarehi: “Timicutijiricavahi námerahihini náicha”. Tamutu títauchavayarehi eta tacayemaqueneanahi eta Sagrada Escritura eta nuyehé —macahepa.

³⁸ Tacahe, éna máimitureana náichapa:

—Tata Viáquenu, jucarihi apinahi eta espada.

Éma majicapavacapa:

—Tiuri, tarataquene.

Éma Jesús tiyujaraca te Getsemani (Mt 26.36-46; Mr 14.32-42)

³⁹ Tacahe, tiúchucapa ema Jesús, énapa ena máimitureana, tiyananapa tayehe eta huerta Getsemaní tiávihahi te táemiripaisinehi eta cerro ticajarehi Olivoquiji, eta mayujarasirarehi éma. ⁴⁰ Te títécapanapa tayehe eta Getsemaní, máichavacapa:

—Eyujarauchava. Eyaseaca ema Viya eta étumevaina apaesa vahi macuiturucahe ema Satanás —máichapa.

⁴¹ Térajipanavapa apaesa ema Jesús eta tayehe. Cincuenta metro eta mayerehinévacahi. Tépuycapa. ⁴² Eta mayujarauchiravahi, ánipa macahe:

—Tátachicha Nucaiyaquene, picatajicanupaini. Nuyaseacavi vahi tacuitauchavaini eta níchavaquenevayare. Váhini picuisapaini eta nucatajivairaya. Níjaracavasera núti eta nítauchiraya eta pivarahaquenehi píti eta nuyehe —macahepa.

⁴³ Tacahe, tiáramicarepa máucupaucha ema émana ángele tiásihahi te anuma. Máetumechapanayarehi. ⁴⁴ Ichape eta máeñamiravahi eta mayujarasirahi. Témericapa eta máepatsure tacasiriquiamaipahi eta máitine. Cuájuuamapaipa eta táemirisirahi te apaquehe.

⁴⁵ Te títapiricapa eta mayujarasirahi, téchepucapa. Tiyanapa te návihahi ena máimitureana. Máimahainei éna, tímacanaripahi táichavenehi eta nacatisamurevairahi. ⁴⁶ Tásiha, máichavacapa:

—¿Tájaha tacayema ímacaichucha éti? Échepuca. Eyujarauchava apaesaina. Eyaseaca ema Viya eta étumevaina apaesa vahi macuiturucahe ema Satanás —máichavacapa.

Nacaratacapa ema Jesús
(Mt 26.47-56; Mr 14.43-50; Jn 18.2-11)

⁴⁷ Tacahe, téchejiricavainirichaha ema Jesús, títécapananecha ena camuriqueneana suntaruana. Máinapumirauchavacapaipahi ema Júlasí. Témeñahavapa eta mayehe ema Jesús. Máetserarecapa. ⁴⁸ Tásiha, ema Jesús máichapa:

—Júlasí, ¿tájaha tacayema pétserarecanu eta píjararesiranuhi nuti Manerejirunuhi ema Viya? —máichapa.

⁴⁹ Tacahe, ena máimitureana natiarihiqueneanahi, eta náimairahi ena camuriqueneana suntaruana, nayaserecapa ema Jesús. Ánipa nacahe:

—Tata Viáquenu, ¿vicatiuchava te espada?

⁵⁰ Tásiha, ema émana mavehapa eta mayehe espada. Mayuchatipaisinapa eta machaca tinapa te vaure ema mamusura ema aquenuca Caifás. ⁵¹ Ema Jesús máicha nuti Manerejirunuhi ema vacapa:

—Ésamiricavachucha —macahepa.

Tásiha, ema Jesús mavehapa eta machacaini ema achane, máimichavapa máipístaca, tinaracavanepa. ⁵² Tásiha, máichavacapa ema Jesús ena tuparairucana natiarihiqueneanapahi eta nacaratasirahi éma, énapa ena aquenuca-rahana, énapa ena oficiáleana tayehe eta Templo. Macajachavacapa:

—¿Tájaha tacayema ecasiña eta espada, ecaepuchiriquipahivare eta etanurisanupahi, tímicutijiricavapa námerahihini núti? ⁵³ Étayapasica cape juca tamutuhí sácheana nucachanehehi tayehe eta Templo. Váhivare epatsicavahini ecaratacanuhini. Étisera iúricapuca eta tamapicuvahi eta yátimuhuhi eta íchirahi eta tamauriqueneanahi taicha mávaháruhehi ema Satanás. Máisapaquenéhevarepa ema Tata eta ecaratasiranuyarehi —máichavacapa.

Éma Pedro tépiyacavapa vahi máimati éma Jesús
(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Tacahe, nacaratacapa éma Jesús. Námapa te mapena éma corregidor Caifás. Émasera éma Pedro máehiequenehavacapaipa. ⁵⁵ Ánaqui te tajuhe te canchón, ticamururecanapa eta yucu násasiavayarehi. Téjamurihanapa te tachacaya eta yucu. Téjacavarepa éma Pedro te namuri. ⁵⁶ Sucahepaipahi esu sirviente, suímahapa éma Pedro eta máejasirahi te tachacaya eta yucu. Suímararacaripahi. Tásiha, suíchapa:

—Eñi ñica achane éñirichu ñichamuri eñi Jesús.

⁵⁷ Émasera éma Pedro tépiyacavapa vahi máimati. Máichapa:

—Pímaha, esena, vahi nímati nútí éma píchaquenehi.

⁵⁸ Te tiyererehachichavare, máimarácaripavare éma apana. Máichapa:

—Píti pítirichu machamurivi éma maca.

Éma Pedro majicapavarepa:

—Vahi, tata. Vahi machamurinuina —máichapa.

⁵⁹ Te hórapapuca eta táetavisiravahi, máimahavarepa éma apana, máimatipa eta máechajirisirava éma Pedro. Máichapa:

—Yátupiquene pítirichu machamuri éma maena Jesús, taicha eti ecavasana te Galilea, tímaticarehi eta échajisira —máichapa.

⁶⁰ Éma Pedro majicapapa:

—Vahi nímati, tata, nájahapuca éma maena píchaquenehi —macahepa.

Tacahe, téchajiricavainirichaha éma Pedro, énevanepa téchajicanecha eta varayu. ⁶¹ Éma Viáquenu máesenicapa éma Pedro. Enévanerinehi téchava éma Pedro eta mametarapianahi éma Viáquenu eta máichirahi: “Te tamirahuirichaha eta táechajisirayare eta varayu, píti mapaheyare pépiyacavayare vahi pímatinu”. ⁶² Tásiha, tiúchucavanepa éma Pedro. Tíyahapa taicha máimati- vanepa eta táichapevahi eta máejecapiravahi.

Nacaecahijiricapa éma Jesús
(Mt 26.67-68; Mr 14.65)

⁶³ Éna suntaruana tijaneacanahi éma Jesús, nacaecahijiricapa éma. Náehararacapa. ⁶⁴ Náitiuquichavare. Náehamirahavare. Tásiha, náichapa:

—Vímahasejicacha, te pijarauquipuca, pímatihaviyare nájahapuca éma téhamirahavíhi —nacahepa.

⁶⁵ Ichapemurivare eta napanararachirahi éma.

Nacatupihapa éma Jesús te namirahu éna aquenucana
(Mt 26.59-66; Mr 14.55-64; Jn 18.19-24)

⁶⁶ Te tijarahipa, ticurujicacanapa éna tupairucana, énapa éna aquenu- carahana, énapa éna escribánoana. Námapa éma Jesús, nacatupihapa te namirahu. Nayaserecapa:

⁶⁷ —Viyaserecaviyare. ¿Pítisaréji Cristo, éma vicuchapaquenehi? — náichapa.

Majicapapa éma Jesús:

—Tiuri, te numetacahe eta nútirahi, éti vahi esuapanuimahi. ⁶⁸ Téhevare nímechahepuca eta ícutiaraina eta nútirahi, éti váhivare esuapanuimahi. Énerichuvare váhivare ecaitanuimahi. ⁶⁹ Étainapasera nucaijuheyare te anuma nuti Manerejirunuhi éma Viya eta néjasirainapa te mavaure éma Tata, máitupajijihauenehi éma —máichapa éma Jesús.

⁷⁰ Nayaserecavare namutu, náichapa:

—Tacahe piti, ¿pímijachavapuca machichavi ema Viya?

Ema majicapavacapa:

—Yátupi machichanu —máichapa.

⁷¹ Tacahe, éna nacahepa:

—Vaipa tácomesa vicayasesereruhini ena testígoana. Émaquenepa visamahi puiti eta juca máechajiriruvahi, étapa ticaviureya —nacahepa.

23

Námapa ema Jesús te mamirahu ema Pilato

(Mt 27.1-2, 11-14; Mr 15.1-5; Jn 18.28-38)

¹ Tacahe, téchepumurihanapa namutu. Námapa ema Jesús te mamirahu ema Pilato. ² Te nacaitecapa, náepiyaequenehapa éma. Ánipa nacahe:

—Viámaphi ema maca achane ani te pimirahu. Mavarahahi mahapapisinahaviyare ena vichaneranahi. Énerichuvare macahehi váhiji táurica vivachachahini eta impuesto mayehe ema viyehe Presidente Emperador. Énerichuvare, macahevare eta émairahíji Cristo, ema réy-yarehíji —náichapa.

³ Tásiha, ema Pilato mayaserecapa ema Jesús:

—¿Yátupisareji réyvihi píti nayehe ena pijaneanana israelítana? — máichapa.

Ema Jesús majicapapa:

—Pitupiruvahi eta juca piyaseseriranuhi. Yátupihi eta nurreyvahi — máichapa ema Jesús.

⁴ Tacahe, ema Pilato máichavacapa ena tuparairucana énapa ena achaneana natiarihiqueneanahi:

—Tájina maviurevaina eta nímairahi ema maca achane —máichavacapa.

⁵ Énasea nayurucapa muraca ema Pilato. Ánipa naicha:

—Ema maca, ichape eta mahapapisirahi eta napaneruana namutu ena achaneana vijaneanana israelítana, énaripa ena ticavasanahi te Galilea étapa ani te juca Jerusalén —náichapa.

Ema Jesús námavare te mamirahu ema Herodes

⁶ Eta masamiravacahi ema Pilato, macayasesererupa te étahipuca te Galilea macavasahi ema Jesús. ⁷ Te nametacapa eta étairahi macavasa ema Jesús, macavanairipipa ema Pilato nama mayehe ema Herodes, aquenucahi tayehe eta Galilea, taicha ema Herodes matiarihahi tayehe eta Jerusalén eta jena sácheana páscuairahi. ⁸ Tacahe, tiúrisamuréinehi ema Herodes eta máimairahi ema Jesús. Ichapemurihi eta mavarairahi máimati taicha masamairiricahi tamutu eta tiáramicareana máichaqueneanapahi ema Jesús.

Mavarahainehi tíjahúchava máimamahini eta jácani tiáramicare. ⁹ Ichape-murihi eta mayaseseresirahi. Émasera ema Jesús, tájina vahi majicapahini.

¹⁰ Natiarihipahivare ena tuparairucana. Tétavicavahi eta nasemanevahi eta náepiyaequenehairapahi. ¹¹ Tásiha, ema Herodes énapa ena masuntarurana, ichaperinehi eta náepuruirahi. Tacahe, ema Herodes mavehapa eta mamuirihaini manaquiraruvaipahi, táepahamequeneripahi eta tajanutumésirainihi. Mamuriachapa ema Jesús. Táicutiarahi eta nacaechirahi éma. Tásiha, macavanairipivarepa ema Herodes námichava te mamirahu ema Pilato. ¹² Ema Herodes émapa ema Pilato ticatianacacanainihi eta náitaresirahi. Étasera te jena sáchequenehi tichavapa eta námunasiracacahi.

*Emá Pilato macavanairipipa eta náetatasiraya emá Jesús
(Mt 27.15-26; Mr 15.6-15; Jn 18.39-19.16)*

¹³ Tacahe, emá Pilato eta máimairahi náimichavirahi eta mayehe, macurujimurihapa ena tuparairucanahi énapa ena achaneana. ¹⁴ Tacahe, máichavacapa:

—Eta iámirapahi emá maca achane te numirahu, ímijachahi mahapapicavaca ena achaneana. Nútisera nímahahi tájina maviurevainahi eta nuyaseseresirahi te emirahu eta ímijachaquenehi eta májecapiravanahi. ¹⁵ Émaripa emá Herodes máimichavavare eta ani nuyehe taicha tájinavare máimahahini eta májecapiravainahini. Étainahipucaini taviuchahini táimicapacahini. ¹⁶ Tiúriserapuca nímivanereca macaemecharahi, tásiha, nucaitica —máichavacapa.

¹⁷ Eta mayeherepi emá Pilato te Páscuamuhuana te áñoana macaiticayarehi emá émana preso te jena sáchequenehi. ¹⁸ Tacahe, ena achaneana vahi návarahahini máuchucuhahini emá Jesús. Tipiaracanapa muraca. Ánipa nacahe:

—Vahi vavaraha máuchucuha emá maca. Émaina máuchucuha emá Barrabás —nacahepa.

¹⁹ Éma Barrabás te cárcel mávihahi, Táimicuñaruhi eta máichirahi eta revolución éropa eta macapahivahi. ²⁰ Émasera emá Pilato mavarahaichucha macaiticayarehi emá Jesús. Mayaseremurihavarepa. ²¹ Énasera muracapa-napaichucha eta napiarasirahi:

—¡Pémetatareca te crusu! ¡Pémetatareca te crusu! —nacahepa.

²² Mapahequenepa eta mayasesiravacahi éma:

—¿Tájasica eta maviurevahi emá maca? Núti tájina nímaha maviurevainahi táimicapacahini. Tiúriserapuca nímivanereca macaemecharahi, tásiha, nucaitica —máichavacapa.

²³ Énasera timitujiricananapa eta napiarasiraina nayaseasiraina eta macaetatairaya te crusu. ²⁴ Jéhesaréinehi, emá Pilato masuapavacapa eta nayasearapihi ena tuparairucana. ²⁵ Émapa tiúchucuhahi emá Barrabás emá nayasesereruhi, táimicuñaruhi eta máichirahi eta revolución éropa eta macapahivahi. Macavanairipipa táitauchava eta navarahaquenehi éna, eta nacapasiraya emá Jesús te crusu.

*Náetatacapa emá Jesús te crusu
(Mt 27.32-44; Mr 15.21-32; Jn 19.17-27)*

²⁶ Tacahe, námapa emá Jesús tayehe eta macaetataiyayarehi. Eta napaisirapahi te calle, nácapajicapa emá achane ticaijare Simón ticavasahi te Cirene. Éma, másihapahi te máesane. Napamicapa máevachacaya manaracuhayarehi eta macurusura emá Jesús, máehicapaipahi te máequene emá Jesús.

²⁷ Ichapemuriana ena achaneana téhicanapahi. Énaripa ena esenana, tipiararecanapaipa eta náiyairapahi taicha eta nacatisamurevahi, náimararasirahi eta máejapanuravapahi éma. ²⁸ Máesenimurihapa éma. Máichavacapa:

—Vahi ecuiyauchanu, eti esenana tachichanaveanahi eta Jerusalén. Étina íyauchava, náichavenéna ena echichanaveana. ²⁹ Taicha tatiarhiyare eta sáchevayare nacapacayarevare ena. Ichape eta nacajapanuravairaya eta nacapasiraya. Tásiha ecahénapa: “Tétavicavapa náuriva ena esenana macheruana. Nájina náimipanererechahini”. ³⁰ Tásiha, ena achaneana, eta

napisirayare, tijunanainapa te céroana, tásiha, nacahénapa: “Tiúripána-pucaini viyumurucavahini eta te juca cerro.” Ena apamuriana nacahenavarepapuca: “Étapucaini te juca simena viyumurusiavahini”. ³¹ Apanasica nútí ichapemuri eta nucatajivairahi, tájinahinéni taviuchanuhini. Navetijiyarecha éta nátajivayare ena echichanaveana* —máichavacapa.

³² Énerichuvare natiarihivare ena apinana tiámerahiana macutique-neanayarehi ema Jesús eta macaetatairayare. ³³ Tacahe, nacaitecapapa tayehe eta masihi nacaetatairare ticajirehi Calavera. Náetatacapa te crusu ema Jesús, énapa ena apinana tiámerahiana. Ema émana nanacapa te mavaure, ema apana te sapa. ³⁴ Te náetatacapa ema Jesús, macahepa eta máechajiriruvahi:

—Tata, piperdonachavaca ena nani, taicha vahi nácaicutiarahini eta juca náichiranuhi —macahepa.

Tacahe, ena suntaruana nasuertehachapa eta mamuirihaini eta náijarajirisiracahi. ³⁵ Natiarihini ena achaneana tímararacanahi tamutu. Énaripa ena tuparairucana natiarihivare. Nacaecahijiricaripa éma. Ánipa nacahe:

—Ema mácacacha, macahehi eta máechajiriruvahi eta maratahairahíji macuchucuhavaca ena apamuriana achaneana. Tásiha puiti, vivaraha vímaha máimereuchava eta máitupajijiasiravahíji, te yátupihupuca Cristo éma, Manerejiruhíji ema Viya —nacahepa.

³⁶ Énerichuvare ena suntaruana nacaecahijiricahivare éma. Navarahapa náesichayarehi eta tasisiru vino. ³⁷ Náichapa éma:

—Te yátupinapuca piti reyvihi nayehe ena israelíta, pítijivaina picuchuhava —náichapa.

³⁸ Tatiarihivare eta ajureca nanacaquenehi te tachutisi eta macurusura. Eta juca ajureca tacajuquenehi te náechajiriruva te griego, te latín, téhapa hebreo. Ani tacahehi eta táechajiriruvahi: “Ema maca ema Rey nayehe ena israelítana”.

³⁹ Ema émana tiámerahi macaetataquenehi te machacaya, énerichuvare éma macaecaíhi. Ani macahehi:

—Te yátupinapuca pítiquenehi Cristo, picuchucuhava pítijivaina. Tásiha, picuchucuhavivare víti apana —máichapa.

⁴⁰ Émasera ema apana macaetataquenehi macahepa:

—Váhipuca pipicahini píti ema Viya. Váhipuca péchahi étarichuhi viávacuha víti eta juca vícuñahi. ⁴¹ Víti, vivachachahi eta juca vitapiravahi taicha ichapequenehi eta véjecapiravanahi. Émasera ema maca Jesús, ticatajivahi tájinahinéni taviuchahini.

⁴² Tacahe, máichapa:

—Tata Jesús, péchanupaini te péjacapa tayehe eta piávacureya —máichapa.

⁴³ Ema Jesús majicapapa:

—Numetacavivane, puiti píti nucachaneviyare te paraíso —máichapa.

*Eta máepenirahi ema Jesús
(Mt 27.45-56; Mr 15.33-41; Jn 19.28-30)*

* **23:31** Eta juca mayeherepi proverbial ema Jesús te máechajiriruva, ani tacahe: “Te náichahi eta juca eta náimairahi eta yucuquí vérepacavacaichahahi, tétavacavahi eta navairahi náquipaica te tájiquipa”. Tatiaríhi eta tacayemaquenehi tayumurevahi.

⁴⁴⁻⁴⁵ Tacahe, te las dócequenepa, témahapa eta sache. Timapicupa tamutu eta apaquehe. Mapana hora eta tamapicuirahi. Étarichuhi eta jena máepenirahi éma, tǵahúchavapa tétsayumeca eta tayehe cortina eta Templo. Ticutimecaca eta taetsayumesirahi. ⁴⁶ Ema Jesús tipiaracapa:

—Tata, pijacapananu eta náchaneva —macahepa.

Te títapiricapa, tépenapa.

⁴⁷ Tacahe, ema nacapitara ena suntaruana romanoana, tipicarinehi eta máimairahi eta júca. Étapa macacutiarapa, macunachapa ema Jesús, ánipa macahe:

—Yátupiquenéchuyapa ema maca achane matapiravarehi —macahepa.

⁴⁸ Namutu ena achaneana natiarihiqueneanahi, eta náimairahi eta júcana, ichaperinehi eta napisirahi. Téhatupachávanapáipa eta nacatisamurévairahi. ⁴⁹ Énasea ena téhicanapahi ema Jesús te másihainapa te Galilea, énapa ena esenana, namutuhi nanecapararecahi eta juca táichavaquenevanahi. Nayererehiserahi eta náimararasirahi.

*Nacucupaicapa te crusu ema Jesús, náecarapa
(Mt 27.57-61; Mr 15.42-47; Jn 19.38-42)*

⁵⁰⁻⁵¹ Matiarihivare ema achane ticaijare José. Ticavasahi te Arimatea te Judea. Tipicaurahihi éma. Tétavicavahivare eta máuriva. Masuapahi ema Jesús, eta émairahi ema Cristo mavaneruhi ema Viya, étaripa eta émairahi ema téchayarehi namutu ena achaneana. Ema maca José, náumurivahi ena aquenucarahana, váhisera mapauchavacahini ena machamurianahi tayehe eta juca náichaqueneanahi tauriqueneanahi. ⁵² Te cáperehichichapa, eta máimairahi máepenirahipahi ema Jesús, tiyanapa mayehe ema Pilato, mayaseapanahi eta máquehe ema Jesús, mavarairahi máecarayare. ⁵³ Te tichavapa, macucupaicapa eta máquehe tayehe eta crusu. Máyuruacapa eta te sávana tǵapu. Náiyaracuhapa tayehe eta máecari eta te mari nasecajueruhi. Nájinachaha nacaecarasihini tayehe. ⁵⁴ Titatajianapa taicha cáperehichichapahi. Taicha vahi táisapacarehini náecararecahini te yati, váhivare te tijarahiacaimahi taicha sávarumuhuyarepa.

⁵⁵ Ena esenana téhicanapahi ema Jesús te másihainapa te Galilea, tiyananapa tayehe eta máecari, náimatiyarehi eta máviahahi. ⁵⁶ Te náimatipa, tichavanapa te napena. Natsecapa eta perfume mayajihayarehi. Tinaracanapasera te jena sáchequenehi, napicauchahi eta tapicauchacarevahi.

24

*Eta máechepusirahi ema Jesús te máecari
(Mt 28.1-10; Mr 16.1-8; Jn 20.1-10)*

¹ Te apanapa sache, te tijarahichichapa eta lumíncuquenehi, tiyananapa ena esenana tayehe eta máecari. Námapaipa eta perfumeana náicurevanahi, nacachanevacapaipa ena apamuriana esenana. ² Te títécapanapa tayehe eta ecari, náimahirinehi eta ticheyame mari tajihainihi eta ecari, téquehepuichavaipa. ³ Tisiapanapa éna, náejiacinehi eta máquehe ema Viáquenu Jesús. Májinaripahi. ⁴ Tiáramecanarinehi eta náejasirahi. Váipa náimatiequenehahini tájahahipuca eta máchararacavahi. Tásiha, tiáramicarepa náimahahi

ena apinana ajairana titupihanahi te nachacaya. Tijanunucavacahi eta namuirihana. ⁵ Eta náramesirahi éna, tétipaimurihanapa. Énasera ena ajairana náimahaqueneanahi náichapa:

⁶⁻⁷ —Éti ímijachaipapuca manasihi tépenahi ema Jesucristo, Manerejiruhi ema Viya. Májinaripa, tichavaripahi títareca. Échavarichuhipuca eta macaye-maqueneanahi te achanerichaha te manasiquenerichaha te Galilea. Macahehi eta máechajiriruvahi eta nacaratásirayarehi ena ticatianacanahi éma, náetatasirayarehiva te crusu. Téchepucayarehisera te mapanaquénéapa sache —nacahepa ena ajairana.

⁸ Tacahe éna, enurujirinehi náechavane eta máechajiriruvanahi ema Jesús. ⁹⁻¹⁰ Te tichavanapa te napena, nametacapa ena óncequeneana apóstoleana, énapa ena apamuriana nachamurianahi. Te nataracu ena esenana tímahanahi ena ángeleana, sutiarhipahi esu María Magdalena, esu Juana, ésupa esu apanavare María, máenahi ema Jacobo. ¹¹ Énasera ena apóstoleana vahi nasuapahini, náimijachaichucha náepiyahiraivahi namaurishivahi ena esenana.

¹² Tiyavanepasera ema Pedro tayehe eta ecarí. Tijunapapaipahi. Te títecapapa, máimahapa tacarinehi eta sávana. Mapanerequenehainehi eta juca táichararacavahi. Tacahe, tichavavarepa.

Tímerecavapa ema Jesús nayehe ena apinana máimitureana te táchehu ticaijuhe eta avasarechicha Emaús (Mr 16.12-13)

¹³ Étarichu te jena sáchequenehi, tipaicanapahi te achene ena apinana máimitureana ema Jesús. Násihahi éna te Jerusalén nacaijuheyarehi eta avasarechicha Emaús. Once kilometro eta tayerehivahi. ¹⁴ Eta napaisirapahi nacasamurepaipahi eta nasamaiririruhi. Téchajiricavanapaipa. ¹⁵ Eta náechajisihairapahi eta juca táichararacavanahi, tiáramicarepa macapayamurihapa ema Jesús, macachanevacapaipa. ¹⁶ Énasera vahi náimatihini, taicha éma vahi máisapahini náimati. ¹⁷ Tacahe, ema Jesús mayaserecavacapa:

—¿Tájahasica eta juca échajisihapahi eta epaisirapahi? ¿Tájaha eta tímipanererecahepahi? —máichavacapa.

¹⁸ Ema émana ticaijarehi Cleofas majicapapa:

—Namutu ena achaneana náechahi eta juca táichararacavahi te Jerusalén puiti juca sácheanahi. ¿Picarichuhipuca píti vahi péchahini eta juca, eta piávihairahi te Jerusalén?

¹⁹ Éma máichavarepa:

—¿Tájahasica eta téchacarehi?

Éna náichapa:

—Émara véchajisihapahi eta máichavaquénévahi ema Jesús Nazareno, ema profeta máuriquenehini nayehe ena achaneana. Tamutuinihi tiuri eta máimiturapiana, tétávicavahivare eta máitupajijiasiravahi taicha ema Viya, éma tíjaracahi tamutu. ²⁰ Énasera ena tuparairucana te viávasa, éna tíjararecanahi nayehe ena apavasanana taicha navarahahi náimicapaca. Tásiha, náetatacapa te crusu. ²¹ Víti ichapemuri eta vicasifnavairainihi eta mayehe. Víuchapavainihi eta macatiuchirahaviyarehi vimutu viti

israelítana. Tamapurujipasera puiti, taicha tépenapa éma. Puiti mapanaripa sache eta táetávisiravahi eta juca. ²² Icháquenesera te yáticarahichichapa, ticaramecahavianapa ena esenana vichamurianahi eta nayatiruirahi tiyanana tayehe eta máecari. ²³ Vaipa nachimapahini eta máquehe. Májinaipahi. Te tichavanapa, timetacahavianaipe eta náimairahi ena apinana ángeleana. Nametacavacapaji eta machaviraipahi titareca ema Jesús.

²⁴ Tásiha, tiyanavaneanapa ena apamuriana vichamuriana tayehe eta ecari. Jéhesaréinehi májinaipa ema Jesús, étarichuhi eta nacayemaqueneanapahi ena esenana —náichapa.

²⁵⁻²⁶ Ema Jesús máichavacapa:

—Tétávicavapa tájinaira ácaicutiaraquenéna eti páureana. Váhivarepuca ácaicutiarahini eta náechajiriruvanahi ena profetanaini tayehe eta tacaheyarehi eta macatajivairayarehi ema Cristo eta máepeniranumaya, tásiha tichavayarehi titareca. Váhivarepuca ácaicutiarahini eta tacaheyarehi eta mápanirayarehi tichava éma te mávasa anuma —máichavacapa.

²⁷ Tásiha, mametacavacapasera tamutu eta táechajiriruvanahi eta Sagrada Escritura, eta táechajisihairahi éma. Tépanavapa tayehe eta májureanahi ema víyarahaini Moisés; étape eta apamuriana nájureanahi ena profetanaini.

²⁸ Títecapananecha tayehe eta avasarechicha nacaijuhequenepahi. Mavarahapa ema Jesús majunijicavacayarehini. ²⁹ Énasera nacumpirachapa máehicavacahini te napena. Náichapa:

—Pácaherine eta ani viyehe, taicha yátinapa eta jena —náichapa.

Tásiha, ema Jesús manasipa tisiapapa eta nayehe. ³⁰ Te tiúripa eta tinicacare, mavehapa eta pan, mahasulupayachapa ema Viya, mayuvetucapa, máijaracavacapa éna. ³¹ Enévanerinehi náimativanepa éma. Émasera tñjahúchavapa témitiacahi te namirahu. ³² Tésenijiricanapa éna. Tásiha, nacahepa:

—¿Tájaha tacayema eta vahi vímativanehini ichaquene te achene te ticapayacahavipa éma? Étape eta vicachanerapahi, váhivare vímaticavanehini, véjapusamurechapaipahinéni eta visamiravahi eta máimitusirahavipahi tayehe eta Sagrada Escritura —nacahepa.

³³ Tacahe, enévanepa téquequecavanahi tichavana te Jerusalén. Te títecapanapa, tisiapanapa tayehe eta návihahi ena óncequeneana apóstoleana énapa ena apamuriana nachamuriana. ³⁴ Ánaqui ticametacasianaripavare éna. Nacahevarepa ena apóstoleana:

—Yátupi eta máechepusiraipa ema Viáquenu. Máimaharipa ema Pedro —nacahepa.

³⁵ Ena apinana najicapavarepa:

—Énerichuware víti vímahaipavare éma, te achene eta vipaisirapahi. Váhisera vímativanehini. Tapaenumava te mayuvetucapa eta pan, vímatipa éma —náichapa.

*Tíápechavare tímerecava ema Jesús nayehe ena máimitureana
(Mt 28.16-20; Mr 16.14-18; Jn 20.19-23)*

³⁶ Tacahe, téchajiricavanarichaha éna, tñjahúchavavarepa tímerecava ema Jesús te namuri. Máechajicavacapa, ánipa macahe:

—Íchararacava, nuchichanaveana.

³⁷ Énasera tipicanarichucha, náimijachaichucha cunarehi éma. ³⁸ Émasera ema Jesús máichavacapa:

—Vahi ecupicanu. Étumecha eta esamureana. ³⁹ Ímaha eta juca nuvahuana étapa eta nívapeana. Émamahacanu apaesa écha eta nútiquenériahi. Eta cunare, tájina táechena, tájinavare táperaina. Vahi tácutihini eta nucaqueherahi nútí — máichavacapa.

⁴⁰ Tacahe, eta máichiravacahi, ticajaruvauchavaipa eta mavahuana, étapa eta máivapeana. ⁴¹ Vuíchahasera nasuapahini éna, tiúrisamureanaripahinéni eta náimairahi, tacachanehisera eta napisirahi. Eta tacahe, máichavarepa:

—¿Jararihi nunica?

⁴² Éna náijaracapa eta nájimarú jima, étasipa vasu eta mápama. ⁴³ Majacapa-vacapa éma, tinicapa te namirahu éna. ⁴⁴ Tásiha, máechajiricavacapa:

—Éta juca níchavaquenevahi, étara eta numetaruhehi cape juca nucachanejiricahéichahahi. Eta tacaheyarehi eta tátauchiravayarehi eta májuchaqueneanahi ema víyahaini Moisés nútí táechajisihaquenehi. Étapa eta nájuchaqueneanahivare ena profetanaini, étapa eta Salmo.

⁴⁵ Máemechavacapaihi eta táechajiriruvana eta Sagrada Escritura. ⁴⁶ Tásiha, máichavarepa:

—Étara eta juca tacajuqueneanahi eta népenirayarehi nuti Cristo. Néchepucayarehisera tayehe eta nécari te mapanaquenepa sache. ⁴⁷ Étayaréichuhivare iámapicayare eta níjare eta ímituresiraya ena achaneana ticavasanahi te tamutu avasareana. Étaripa te juca Jerusalén, emetacavacayare ena achaneana eta náeneuchiravaina apaesa macaepaha ema Viya eta napecaturana. ⁴⁸ Éti, nutupararuheya eta ímituresiraya eta júcana. ⁴⁹ Enasiyarechahasera ani te juca Jerusalén. Tiámainucava te máitecapauchahevacapa ema Espíritu Santo nuvaneruyare, máijararunuyarehi ema Tata. Éma, tíjaracheyare eta ítupajijiasiravanayare —máichapa.

Eta mayapirahi ema Jesús te anuma
(Mr 16.19-20)

⁵⁰ Te títapiricapa eta máimitusiravacahi, mámamurihapa te tachachacu eta avasare Jerusalén, te tachacayahi eta avasarechicha Betania. Macanunquechapa eta mavahuana, mayujarauchavacapa éna. ⁵¹ Te títapiricapa eta mayujarauchiravacahi, tímutserahavapaipa ticanunquechavapaipa eta mayapirahi te anuma. ⁵² Eta náimairahi éna eta macanunquechiravapaipahi, tépuyumurihanapa eta nanecapararesirahi eta mayanirahi. Tásiha, tíchavanapa tayehe eta Jerusalén. Tiúrisamureanapaipa. ⁵³ Tájina vahi náejicavahini tayehe eta Templo. Tiyujarauchavanaparacahi eta nacunachirahi ema Viya.

Tamutupa eta juca numetasiravihi puiti.

Éma Apóstole Juan májuequenehahi eta máichararacavahi ema Jesucristo, ticaijare puiti eta EVANGELIO SEGÚN SAN JUAN

¹ Eta acane, te táepaniravahi tamutu, matiarhiqueneípahi ema Jesucristo, ema Tímimatirahi me Viya*. Éma, macachanehi ema Maiya eta máitare-sirahi, Víyahivare éma apanavare. ² Ena apinana, nacuticacahi eta napane-reruana. ³ Eta táepaniravahi eta acane, émaríhi ema Cristo ticaemata-neacahi tamutu eta tatiarihiqueneanahi puiti, máitachirahi eta mapane-reruanahi ema Maiya. Tájina máejequeruinahini, nájinavare apanainahini náepiyacahini eta tatiarihiqueneana. ⁴ Émarichuvare ticaitarecavahi viti achaneana. Émarichuvare tinacapa te viáchanevana eta tamichahu eta vítaresirahi. ⁵ Éma tímianava tímicauchahavi taicha mavaraha máimijunijisi-nahaviyare eta tamapicu te viáchanevana. Nararihisera ena vahi náuricahini eta mamicauchinavaca. Navaraha nacaemaha eta mamicauchiravacahi.

⁶ Tacahe, te máimahapa tiuri, ema Jesucristo tiúcupaicapa te juca apaquehe. Tiáchanechavapa. Yátupiquenehi achane, macaechehi eta veche viti achaneana. Ticasiriquihavihi te jena áñoanahi majurusirahi. Matiarhivare ema apana achane ticaijarehi Juan Tícachasiricarahi. Tacahe, ema Viya, te máimahapa tiuri, ticavanahipa ema Juan. ⁷ Máinapumirauchayarehi eta macametairuyare eta máimeresiravaya ema Cristo, ema namicahuyare nácani ticasíñanayare mayehe. Ehanachavapa. Yátupiquenehi achane, macaechehi eta veche viti achaneana. Ticama Juan mametacayarehi ena achaneana natsecava eta najacapiraya ema Cristo. ⁸ Éma Juan, vahi émainahini tímícauchamurimahi ena achaneana. Émahisera ticametarairura-hiyarehi eta máucupaisirapa ema tiámahavihi eta yátupiqueneana mapane-reruanahi ema Viya. ⁹ Éma maca máechajisihaquene ema Juan, éma yátupiquenehi eta mamicauchirahaviyarehi vímutu viti achaneana, taicha tímieche viti achaneana. Ticatuchavi eta mapanereruana ema Viya.

¹⁰⁻¹¹ Éma Jesucristo, émahí acane tépiyacahi tamutu eta apaquehe, énapa ena viáchucanaveanaini. Puíticha éma téchahavi vímutu. Téhesera te tiúcupaicapa éma, namaimatiquenehi ena achaneana Viáquenuirahi éma, váhivare navara-hahini najacapanahini éma. ¹² Natiarihisera ena tinerejicavanahi tijacapanahi, téhicanahi éma. Ena nani, ichaperinehi eta macunachiravacahi táichavene eta nacasiñairavahi mayehe. Éna, yátupiqueneripa machichanaveanahi ema Viya. ¹³ Éta macachichairahavihi ema Viya víti, émahí ema Viya tinereji-cahavi táichavene eta vicasiñairavahi mayehe. Vahi étaparacainahipucaini eta náehisirainahipucaini ena ticachichahaviana. Váhivare étaparacaina-hipucaini vivarahahipucaini ichape víti. Váhivare étaparacainahipucaini ichapenahipucaini eta mavarairahini mácani apana achane.

¹⁴⁻¹⁷ Viti véhicanahi ema Jesús eta matiarhirahi te juca apaquehe, yátupi eta vímatirahi éma. Vímahahi te víuquihana. Vímativarepa eta másíhairahi te

* **1:1** Éma Apóstole Juan, te májuchapa eta juca libro, manacahi amairiha te letra griega λογος (eta táechajicuirava: “logos”). Eta tacayemaquene te véchajirirupa: “Tímimatirahi me Viya”. Étarichueche viti achaneana. Ticavare tacahe eta táechajisihaquene eta apamuriana líbroana te castellanorupi, ani tacahehi: “la Palabra” étape “el Verbo”.

anuma, eta émairahi ema macarichuquenehi Machicha ema Viya. Yátupihivare eta víyairahi éma, macutihi ema Maiya. Éma, tímimatirahi me Viya, taicha éma máimerecahi eta máetaviuchirahi eta máemunasirahavihi, máimechirahavihivare eta yátupiqueneana mapanereruana ema Maiya. Ema víyarahaini Moisés ticatuparahahi me Viya eta máimitusirahavihi viti achaneana eta vanairipiana. Émasera ema Jesucristo ticatuparahahi me Maiya eta máimitusirahavihi eta máemunasirahavihi, étapa eta máechajiriruvana yátupiqueneana ema Viya. Ema Cristo, tétavicavahi eta máuriva eta viyehe vimutu. Eta majaneasirahavipahi, tjaracahavihi eta vitumevahi te tamutu sácheana. Émaripa ema Juan, ani macahehi eta máechajisihairahi ema Jesús: “Émara ema maca ema néchajisiquenehi eta eyehe cape juca. Yátupi núti nínapucahi eta núchusirahi, émasera matiarihiqueneipahi eta acane, májinauichahahi núti. Eta tacahe, típicauchacarepanahi eta nuyehe” macahepa.

18 Yátupiquene nájina náimatihini eta máimahi ema Viya. Émasera ema macarichuquene Machicha, tímimatichahavihi eta máuriva ema Maiya taicha étaquenehi másiha te masamure ema Maiya.

Ena Juan Tícachasiricarahi timetacavacahi ena achaneana tayehe eta máimeresiravayarehi ema Jesucristo

(Mt 3.11-12; Mr 1.7-8; Lc 3.15-17)

19 Tacahe, te jena sácheana, ena tuparairucanahi ticavasanahi te Jerusalén navanecapa ena náevanachana†, nayanaucha ema Juan Tícachasiricarahi. Éna, nayaserecapa, ánipa nacahe:

—Tamutu arairuhi eta pímiturapiana. ¿Pítinaripa ema Cristo vicuchapaquenehi? —nacahepa.

20 Matupiruvapa eta majicapiravacahi. Ánipa macahe:

—Núti mavanerunuhi ema Viya. Váhisera nútina ema ecuchapaquenehi ema ticajare Cristo —macahepa.

21 Tacahe, nápechavarepa nayasereca:

—¿Nájahavisica píti? ¿Pítipuca picajare Profeta Elías? ¿Pichavahi eta te juca apaquehe? —náichapa.

Émasera majicapavarepa:

—Vahi nútina.

Tásiha, nápechavarepa nayasereca:

—¿Nájahavisica píti? ¿Pítipapuca ema apana profeta vicuchapaquenehi? —náichapa.

Émasera majicapavarepa:

—Vahi nútina.

22 Tacahe, náichavarepa:

—¿Nájahaviquenesica píti? Pimetacahavichucha te nájahavipuca píti. Vi-varaha véchayare, apaesa vimetacavaca ena tivanecahavianahi —náichapa.

23 Tacahe, ema Juan majicapavarepa:

† 1:19 Ena nani vanairucana, nararihihi ena tiyujarahiana te Templo, énapa ena téchapajirahiana eta tayereruvana eta Templo te Jerusalén.

—Nútichucha máechajisihaquenehi te ajureca ema víyarahaini profeta Isaías. Núti nucametarairuhi nayehe ena achaneana vámahicurúhana. Níchuha-
vacahi éna apaesa natsecava eta jácani máitecapiraya ema Viáquenu —
macahepa.

²⁴ Natiarihihivare ena navaneruanahi ena fariséoana. ²⁵ Nayasereca-
varepa éna apanava:

—¿Tájahasica tacayemahi eta pícachasirisirahi ena vijaneanana, te váhipuca
pítinahíni ema Cristo, váhivare pítinahíni ema profeta Elías, váhivare pítinahíni
ema apana profeta vicuchapaquenehi? Ena vijaneanana vahi tácamunuhini
nacaicachasihini. Énaserá ena apavasanana, jéhesare tacamunu eta nácaica-
chasivaca —nacahepa.

²⁶ Tacahe, éma majicapavacapa:

—Tiuri, núti yátupi nícachasicavacahi te une ena achaneana, apaesa nat-
secava eta jácani máitecapiraya ema vicuchapaquenehi. Matiarihipasera
puiti te vitaracu. Étisera vahi ímatihini éma. ²⁷ Tímerecavavanénapa. Ticuna-
chacarepanayaresera eta nuyehe. Váiparinehi nácutisamimahi eta máitupa-
jijiasiravahi. Váiparinehivare nácaemuñavaimahi macamusuranuhini núti
páuresami —máichavacapa éna ema Juan.

²⁸ Eta mávihahi ema Juan máicachasirisinehi ticaijare Betábara, te apachara
eta cajacure ticaijare Jordán, tinapaicahi te táuchusine eta sache. Eta nayase-
resinepanahi ena vanairucanahi.

*Éma Juan máimicaeheracha ema Jesús eta émairahi ema Cordero, vanairucahi
me Viya*

²⁹ Te apanapa sache, máimahapa ema Juan eta mapauchirapaipahi ema
Jesús. Tacahe, máichavacapa ena achaneana:

—Ímaha, márajapa ema Cordero, matapiravarequene éma, vanairucahi
me Viya. Éma, táimicaparuyare eta macaepahairayare eta vipecaturana
viti achaneana te juca apaquehe. ³⁰ Émara ema maca ema néchajisiha-
quenehi eta eyehe cape juca. Núti nínapucahi mayehe éma, émasera matiari-
hiquenéipahi eta acane, májinauichahahi núti. Eta tacahe, tipicauchaca-
repanahi eta nuyehe. ³¹ Nútiripa néchajisihahi éma, vuíchahasera nímatihini.
Numetacahehisera eti nujaneanana israelítana eta ecaicachasiraina apaesa
etsecavahi eta ejaçapiraina éma te jácani máimerecavapa. ³² Tacahe, cape
sache, títecapauchapupa ema Jesús, mavarairahi nícachasicayare éma. Tásiha,
te viúcupaicapa te une, nímahapa ema Espíritu Santo eta máucupaisirahi te
anuma, ticutiparine eta paloma. Masiapahacapa ema Jesús. ³³ Tacahe, te
nímahapa, nupaenumavapa nímati éma eta émairahi ema vicuchapaquenehi
Cristo, taicha ema Viya tímitucanupa eta máicutiarayare. Ani macahehi: “Te
pímaha ema Espíritu Santo máucupaucha te mápusi mácani achane, pímatiya eta
émairahi ema Nuchicha nuvaneruhi. Éma, tjaracahevacayare ema Espíritu
Santo, tisiapahacahevacainapa éti achaneana. Nuchaneraheinapa éti”
máichanupa ema Viya. ³⁴ Tásiha puiti, nímatipa éma. Táitusiava numetacahe
puiti eta émairahi ema Cristo, Machicha ema Viya —máichavacapa ema Juan.

Éna náinapuiruana máichuhaqueneana ema Jesús ena máimitureanaya

³⁵ Tacahe, te apanavarepa sache, ema Juan matiarihihi tayehe eta mávira-
reasahi, vítipa viti apinahavi máimitureanahi. ³⁶ Tásiha, máimahapa ema Jesús
tíanucuhapaipahi. Tacahe, ema Juan máichahavipa:

—Ímaha. Ema maena Jesús, émahí ema Cordero matapiravarequene, vanairucahi me Viya —macahepa.

³⁷ Tacahe, eta vímairahi viti apinahavi máimitureana ema Juan, viyanapa véhicahi ema Jesús. ³⁸ Tásiha, ema Jesús téseniequenehavapa. Máimahapa eta véhisirapahi. Tiyaserecavapiva:

—¿Tájaha ecamunu nuyehe? —máichavapiva.

Víti vijicapapa:

—Tata maestro, ¿távihapuca eta pítecapirare?

³⁹ Ema Jesús tijicapahaviva:

—Yare, ímaha apaesa ímativa.

Tacahe, viyaninapa vímatipa eta mávirarehi. Vítaipahi eta jena sache eta viávihairahi eta mayehe, taicha las cuátroripahi sache te vítecapapa ánaqui.

⁴⁰⁻⁴¹ Andrés máijare éma nuchamuri téhicapahi ema Jesús. Tacahe, eta máurisamurevahi ema Andrés, tiyanavanepa matanucahi ema maparape Simón Pedro. Te máichimavapa, máichapa:

—Vímaharipa ema vicuchapaquene Mesías ema Cristo —macahepa.

⁴² Tacahe, ema Andrés tichavapa mámapa ema maparape Simón eta te mávihahi ema Jesús. Te náitecapauchapa, ema Jesús máesenicapa ema Simón. Tásiha, máichapa:

—Píti Simón, machichavihi ema Jonás. Nútisera nítivachaya eta píjare. Núti níjarechaviya Pedro, táichavenehi eta pétaviuchirayare eta pitumeva —máichapa ema Jesús.

Ema Jesús máichuhapa ema Felipe émapa ema Natanael

⁴³ Te apanapa sache, ema Jesús mavarahapa tiyanayarehi te tinapaica eta Galilea. Tásiha, macainunapa ema Felipe. Tásiha, máichapa:

—Yare, péhicanu.

⁴⁴ Eta mávasahi ema Felipe eta te avasare ticaijare Betsaida, étarichuvare mávasahi ema Andrés émapa ema Pedro. ⁴⁵ Tacahe, ema Felipe tiyanavarepa, matanucahi ema Natanael. Te máetupiacapa, máichapa:

—Vímaharipa ema achane máechajisihaquenehi te libro májuchaquenehi ema víyarahaini Moisés, émarichuvare éma táechajisihaquenehi eta libro nájureanahi ena profetanaini. Ema ticaijarehi Jesús, machicha ema José. Ticavasahi te Nazaret —macahepa.

⁴⁶ Tásiha, ema Natanael majicapapa:

—Váiparinehi étainahini máuchusinehini ema achane tiuri tayehe eta avasare Nazaret —macahepa.

Tásiha, ema Felipe máichavarepa:

—Viyana, apaesa pímati —máichapa.

⁴⁷ Tacahe, te náitecapauchapa, ema Jesús máimararacaripa ema Natanael. Tásiha, macahepa:

—Nímativi eta pipanereru. Píti yátupiquenevi israelíta. Tétavicavahi táurivahi eta pítaresirahi. Vahi pituca pivayureca —máichapa. ⁴⁸ Tásiha, ema Natanael majicapapa:

—¿Táviha pímatinenuhi?

Ema Jesús máichapa:

—Núti nímativipahi te vuíchaha máetupiacavihinini ema Felipe eta máichuira-viyarehi, te piáviharipa te tápecu eta yucuqui higo.

⁴⁹ Tacahe, ema Natanael masuapavanepa ema Jesús. Máichapa:

—Tata Maestro, pítiripa piti yátupiquene Machicha ema Viya. Píti yátupiquenévivare Reyvihi viyehe viti israelítana. Núti ńjaracavapa néhicaviya — máichapa.

⁵⁰ Ema Jesús majicapapa:

—Étachucha eta juca níchiravihi eta nímairavihi te tápecu eta yucuqui, pipatsicavapa píjaracava péhicanuya. Vahi tácarichu eta juca. Pímahayareva eta apana tíaramicareanapana tayehe eta juca.

⁵¹ Tásiha, ema Jesús máichahavipa vimutu:

—Éti ímahayare eta anuma téjiacayare, énapa ena ángeleana tiúcupauchanuanayare núti Manerejirunuhi ema Viya — máichahavipa.

2

Natiarihi ena araimanayarehi eta te avasare Caná

¹ Te mapanaquenepa sache eta táetavisiravahi, natiarihi ena araimanahi eta te avasare Caná te tinapaica eta Galilea. ² Tásiha, esu maena ema Jesús, ánaqui suávinehi taicha sucaichuhasiquenehi ésu. Énerichuvare ticaichuhasivivare ema Jesús, vítipa viti máimitureana.

³ Tacahe, ema arayenahi tacaimamarapa téchuriacapa eta máeresahi vino. Esu maena ema Jesús suíchapa ema suchicha:

—Téchuriacanapa eta náeresahi.

⁴ Tásiha, ema Jesús majicapapa:

—Picatajicanu, mémechicha. Vuíchaha picucamesanu. Nímahaine núti te táuripa. Nútipa néchinava — máichapa.

⁵ Tásiha, suíchavacapa ena tésiricanahi:

—Tiuri, nímaháinepa éñi. Esuapayare éti eta ñivanairipiana — suíchapa.

⁶ Tacahe, tatiarihihi eta sáisihi ichapehiana tinajana, márihiana. Nayupisareana ena israelítana tayehe eta nayeherepiana. Eta táichapehivavacahi eta tinajana, cíncóhi lata eta tacavacu. ⁷ Tacahe, ema Jesús mavanecavacapa ena tésiricanahi:

—Eyana eyereca eta une. Ínicachayare eta juca tinajana — máichapa.

Tacahe, náinicajicavacapa éna eta tinajana.

⁸ Tásiha, ema Jesús mavanecavacapa:

—Tiuri puiti, eveha ániamaína, eyana íjaraca ema téchapajirica eta juca piesta — máichavacapa.

Tacahe, tiyananapa éna, náijarapanahi. ⁹ Mavehapa masamaecapa eta une, vínoripahi éta. Váhisera máechahini éma táviahhipuca tásihahi éta. Nacarichu ena tésiricanahi náechahi eta únerahi.

¹⁰ Tacahe, ema téchapajiricahi eta piesta máichuhapa ema arayenahi. Máichapa:

—Namutu ena achaneana te térana, tativa naera eta tiúriamapana vino. Tapaenumava te ticavahahasianapa, náerapa eta vino váhipanaichu táuriamahini. Pítisera, apana eta pipanereruhi. Tiúrihi eta vino píjararuhavihi tativa. Puítisera eta juca vino, tétavicavahi eta táuriamavahi. Tacachuricarinehi tamutu — máichapa.

¹¹ Eta juca tánapuiruhi tíaramicare máimerechahi ema Jesús, tayehe eta avasare Caná. Ichaperinehi eta viáramirahi viti vinecapanahi eta juca máimeresirahi eta máitupajijiasiravahi. Tacahe, ichaperinehi eta visuapirahi viti máimitureanahi.

¹² Te táequenepa eta juca, viyanavarepa te apana avasare ticaijare Capernaum. Vimutupaipa, esu maena, ena maparapenaveana, vítipa viti máimitureana. Vinasipa jácani sácheana eta ánaqui. Vipaenumava viyanaya te Jerusalén.

Ena Jesús macuchuchujicavacapa ena tjararecanahi eta sárareana, cáyureana te tajuhe eta Templo

(Mt 21.12-13; Mr 11.15-18; Lc 19.45-46)

¹³ Tacahe, eta jena sácheanahi, tiánehiripa eta Pascua, vippiestarahi viti israelítana. Ena Jesús tiyanapa tayehe eta avasare Jerusalén, vítipa viti máimitureana. ¹⁴ Te vítecapapa, viyanapa visiapahi tayehe eta Templo. Máimahinehi ema Jesús ena titsiriperecarahiana eta plata, énapa ena tjararecanahi eta vuíyeana, eta uvesana, étapa eta palómana. ¹⁵ Eta máimairahi éna, máepiyacapa eta machicute. Máquijimuríhapa eta naplataneana te apaquehe. Máequehepuichavacapa eta namesarana. Macuchuchujicavacapa namutu, étapa eta sárareana nájararermanahi. ¹⁶ Tásiha, máichavacapa ena tjararecanahi eta paloma:

—¡Ecuchuca eta jácana eta te juca mapenahi ema Tata! ¡Vahi étaina ícuchina éti íjararecana eta tájiparacana! —máichavacapa.

¹⁷ Tacahe, viti máimitureana, eta vímairahi eta juca, enevanerine véchava eta táechajiriruva eta Salmo tayehe eta tamuracavahi eta máichararacavahi ema víyarahaini David táichavenehi eta máetaviuchirahi eta máimipicauchirahi eta, mapena ema Viya.

¹⁸ Jéhesare, enurujipa títecapanapa ena tuparairucana. Nayaserecapa éma: —¿Tájaha tacayema eta picuchusiravaca ena vichamuriana? Pímijachavahipuca vanairucavi me Viya. ¡Pímechahavi eta tiáramicare te yátupihipuca pivanahi eta juca! —náichapa.

¹⁹ Ena Jesús majicapavacapa:

—Te íáquipaicayarepuca éti eta juca templo, nútisera nucaechepuca te mapanaquenéna sache —máichapa.

²⁰ Ena tuparairucana najicapavarepa:

—Cuarenta y seis año eta tayerevahi eta náepiyaresirahi eta Templo. ¡Tétavicavahi eta pisiñavavaisirahi picaemuñavayarehi picaechepucayare te mapanaquenéna sache! —nacahepa.

²¹ Eta máchiravacahi ema Jesús, máechajisihahi éma eta táechepusirayare eta máquehe. ²² Eta tacahe, te tiyerehi, te táequenepa eta máechepusirapa ema Jesús te máecari, véchavahi viti máimitureana eta juca mametarapihi tayehe eta máechepusirayarehi. Eta tacahe, visuaparinehi eta táechajisihairahi eta Sagrada Escritura eta mayehe.

Ena Jesús máimati eta napanereruana ena achaneana

²³ Eta manasiraichahahi ema Jesús te Jerusalén, te Páscuamuhu, camurihi eta tíramicareana máichaqueneanahi. Camurianahivare ena achaneana tímahanahi. Tásiha, nasuapahi eta émairahi ema Cristo nacuchapaquenehi.

²⁴ Émasera vahi macasiñavahini eta nayehe taicha máimativacahi éna, vuíchaha yátupinahini eta náehisirahi éna. ²⁵ Taicha éma, tétavicavahi eta máitupajijasiravahi, máimatirahi tamutu eta napanereruana ena achaneana te amahe eta nasamureana.

3

Emá Nicodemo máejirapana emá Jesús

¹ Matiaríhi emá achane téhicaaríricahi ena fariséoana. Ticaijare Nicodemo. Emá maca achane, tétavícvahí eta macunachacarevahí taicha máestrohí emá. ² Tacahe, eta jena yátiquenehí, emá Nicodemo tiyanapa mapaiupachapanahí emá Jesús. Tacahe, eta náechajirisiravahí, macahepa emá Nicodemo: —Tata maestro, véchahi eta vanairucavíhi me Viya eta juca pítesirahí pímitusirahavipanahí. Taicha nájina apanaina achane títuruequenehaimahí eta juca tíáramicareana píchaqueneanahí píti —macahepa.

³ Emá Jesús májicapapa:

—Puiti numetacaví eta juca yátupiqueneana: Nácani navarahaya títuji-cavana tisiapana tayehe eta mávasa emá Viya, tacamunuhi náitsivachayare eta náitaresira. Te vahí yátupina eta náijarasiravaina eta máitsivachiravaca emá Espíritu Santo, vahí títuji-cavanaimahí tisiapana eta te mávasa emá Viya. Tímicutijiricavayahí tíápechavanayahí tíuchucana —máichapa.

⁴ Tacahe, emá Nicodemo vahí mácaicutiarahíni eta máichirahí emá Jesús. Váhísera macuchapaimahí eta máitametasirahí emá Jesús. Ánipa macahe: —Váiparinehí vichavaimahí eta amúyahavinahíni viti ichasiana, vichavahivarepucainí visiapahíni te sujuhe esu ticachichahaví —macahepa.

⁵⁻⁶ Májicapavare emá Jesús:

—Písamanuchaha. Te tíuchuca eta amuya te sujuhe esu taena, tímatí-carehí eta machichairahí emá suima. Tacutiquenehí, nácani mávaháruana emá Espíritu Santo, tíápechavanayahí tépanava eta náitaresiranayahí, taicha machicharipahí. Nutupíruva numetacaví: Nacarichu ena machichanaveana emá Espíritu Santo tisiapana eta mávasa emá Viya. Te tacuíja eta machichairahéna éti, tájina vahí ítuji-cavaimahí esiapa. ⁷ Vahí picuaramí eta juca níchiravíhi: Táitaurevaquene ticachichaheyahí emá Espíritu Santo.

⁸ Eta juca tímicutijiricavahí eta técatícava, tacarichu visama eta tacaemaira. Váhísera tácacherahíni. Ene nacahehí ena mávaháruanaípa emá Espíritu Santo. Nanasirichu eta náimahí. Tícaitsivaipasera eta náitaresira —máichapa emá Jesús.

⁹ Tásiha, emá Nicodemo mápechavarepa mayasereca:

—¿Tájahasica tacayema eta juca?

¹⁰ Emá Jesús máichavarepa:

—Tétavícvahí eta picunachacareva píti, taicha tíúríhi eta pímitusiravachí ena vijaneana. Tasapíhasera vahí pímatiequenehahíni eta júcana.

¹¹ Písamanuchaha. Yátupiquene eta numétasirávíhi. Tatupíruvahí eta néchajisihahí eta táichararacavanahí te anuma taicha nímahaípa. Étísera vahí esuapanuimahí eta numetasirahehí eta nímahaqueneanahí. ¹² Te cape juca sácheana, nímicutichinahehí eta táichararacavanahí te juca apaquehe tayehe eta táichararacavanahí te anuma. Étísera vahí esuapanuhíni. Tavetijípa eta emasuapiranuya te nutupíruvahí numetacahe eta táichararacavanahí te anuma. ¹³ Nuti Manerejirunuhi emá Viya, nucavasahí núti te anuma. Tásiha, núcupaicahí eta numetasiraheya. Nájina apanainahíni mácani mametacahehíni eta táichararacavanahí te anuquehe, taicha nájina nayanahíni nápanahíni te anuma, eta jácani náimatihíni.

¹⁴ Acane, eta napaisira ena víáchucanaveanainíni eta te mávapahí apaquehe, táechucapahí eta quichareana ena masuapajirairahanapahí mayehe emá

Viya. Tacahe, ema víyahaini Moisés máepiyacahi eta metal eta táimahi eta quichare. Manacahi te anuquehe eta te yucuqui. Tásiha, ena achaneana táechureana eta quichare, te náesenica eta quichare máepiyaru ema Moisés, tinacananapahi, vahi náepenapahíni. ¹⁵ Ene nucaheyare nútí apana, tinacananayareva te anuquehe. Eta nícharacavayare apaesa nucuchucuhapahi namutu ena nácani ticasíñanayanarepahi. Tásiha, máíhecuarquirenapa eta náitaresirayare. Tájina ticamítiequenehavacaimahi.

Emá Viya, tétavícavahi eta máemunásirahavíhi

¹⁶ Taicha ema Viya, tétavícavahi eta máemunásirahaví viti achaneana te juca apaquehe. Eta máemunásirahaví, máíjaracahi ema macarichuquenehi Machicha eta máucupaisirahi eta ani viyehe. Mavarahapa tíjarachaviya máíhecuarquirénapa eta vítaresiraya vimutu viti vicasiñanahi éma. Tájina ticamítiequenehavimahi. ¹⁷ Taicha ema Viya, vahi tácahehíni eta mapanereruhi eta máucupaisirahi ema Machicha máícuñacahavíhíni viti achaneana. Étasera eta tímitécahi éma, ticuchucuhavíyare vimutu. ¹⁸⁻¹⁹ Taicha nácani ticasíñanayare ema Machicha ema Viya, vahi ticaicunáimahi. Nácanisera vahi nácasíñahíni éma táimicuñacavacayarehi eta naviurevanahi éna. Taicha vahi náuricahíni eta tamícauchiravacahi eta majaraíva ema Cristo táucupairuhi te juca apaquehe. Étachucha náurica eta tímápicu taicha vahi návarahahíni tácaecherahíni eta náíchirahi eta tamauriqueneana. ²⁰ Taicha nácani tíchanahi eta tamauriqueneana, nacaticha eta majaraíva ema Viya. Váíparínehí napauchaimahi, namavarairahi tacaecherahíni eta náíchirahi eta tamauriqueneana. ²¹ Énasera ena tisupapanahi yátupi eta máechajiriruva ema Viya, náuricayarehi napaucha eta majaraíva. Jéhesare ticaecheranasarepa eta machaneranaripahi ema Viya.

Emá Juan Tícachasíricarahi tíápechavavare máéchajisíhahi emá Jesús

²² Te táequenepa eta juca, tíyanavarepa ema Jesús, tayehe eta avasarechichana te táunava eta provincia Judea. Véhicahi viti máímitureana. Vinasipa jácani sácheana eta ánaquí. Viti máímitureana vícachasíricarípa ena achaneana tívarahanahi náehicaya ema Jesús. ²³ Tásiha, ema Juan tícachasíricahíyare te jena Enón tachacayahi eta Salim, taicha ánaquí tatiaríhíhi eta une. Ena achaneana napauchahi éma. Jéhesare máícachasívacapaípa ena tívarahanahi náínajicayare eta napecaturana. ²⁴ (Eta juca máíchahi ema Juan tamirahupaíchaha eta jena sache eta náeratasirayarehi éma.)

²⁵ Tacahe, te jena sácheana, ena religiósoana tíyananapa náímíyusemacavacapa ena máímitureana ema Juan, nametacahi eta vícachurísiravacahi viti máímitureana ema Jesús taicha tíápajumúriavanapanahi ena vícachasíruanahi. ²⁶ Tacahe, eta nasemirahi ena máímitureana ema Juan, tíyananapa nametapanahi éma. Náíchapa éma:

—Tata maestro, pímahíni ema maena péchajiriruhi cape te tachausi eta juca cajacure Jordán. Ema Jesús pímiñarecha Cristo, tícachasíricahi puití éma. Jéhesare, namutuyarehíni náehica éma —náíchapa.

²⁷ Tásiha, ema Juan majicapavacapa:

—Vahi ecueñamava. Ema Viya, éma téchahi eta máíjarasirahi eta máítuquenehi nácani manerejiruana. Németeaca tíjaracahi ema Viya eta máítupajijiasirava ema maca Jesús. ²⁸ Éti échavahi eta numetasirahehi eta vahi

nútinahini ema Cristo. Yátupisera nucavanahini eta nínapumirauchirayarepahi éma, numetacavaca ena achaneana natsecavahi. ²⁹ Núti nímicutijirisihahe: Te natiarihi ena araimanahi, namutu ena nacaichuhasiqueneana tíurisamureanahi eta náimairahi ena araimana. Nacunachahi ema arayena. Ene nucaherihi núti eta núrismurevahi eta nímairahi puiti eta nacunachirahi ema Jesús. ³⁰ Éma, te jácani mapaisihayarepahi, tiápajucavayarepaipa eta macunachacarevaya. Éma, mapaenumavapa tépanava eta macaemataneasira ema Viya. Núti núrismurehi tayehe éta. Núti, tiánehipa eta nítauchirainapa eta nématane. Tásiha, váhirichu nucunachacare núti —macahepa ema Juan.

Éma Jesús másihaquenehi te anuma

³¹ Éma Jesús, máimatirinehi tamutu eta táichararacavanahi te anuma taicha másihaquenehi éma te anuma. Víti achaneana viávihihi vicavasanahi te juca apaquehe, vímatihí étachucha eta táichararacavanahi te juca apaquehe. Émasera ema Jesús, eta másihairahi te anuma, tímatihí tamutu, tiápajupanavahi eta máitupajjiasiravahi. Ticachuricahavihi. ³² Éma, tímitcehahi eta mametasirahavi tamutu eta máimahaqueneanahi étapa eta masamaqueneana te anuma. Nájinayarénisera nasuapahini eta macayemaqueneanahi. ³³ Vítisera viti visuapanahi eta mametarapiana, vímatihí eta yátupihí eta máechajiriruvana ema Viya mámaqueneanahi ema maca Jesús. ³⁴ Taicha éma, vanairucahi me Viya, máechajisihayarehi eta máechajiriruvana ema Viya. Énerichuvare tétavicavahi eta máimicatasirahi ema Espíritu Santo taicha mávahácahi éma. ³⁵ Éma Vicaiaquene máemunacahi ema Machicha. Eta tacahe, matuparacahi eta émairyarehi téchayare tamutu. ³⁶ Eta tacahe, nácani ticasíñanayare ema Machicha, máichecuaraquireyare eta náitaresiraya. Namutusera ena macasíñarahanahi ema Machicha ema Viya, vahi títarecainamahi, taicha tanasihi eta naviurevana táichavenehi eta napecaturanahi. Ticaicuñanayarehi máitavacac ayare.

4

Éma Jesús tiánucuha eta provincia Samaria. Ánaqui máechajicahi esu ésuna esena.

¹⁻³ Tacahe, camurianahi ena tivarahanahi tíjaracavanaya náehicaya ema Viáquenu. Tásiha, viti máimitureana vícachasicavacahi éna. Émasera ema Jesús vahi máicachasiricahini. Camuripanana ena vícachasiruana nayehe ena máicachasiruana ema Juan. Tacahe, ena fariséoana nasamairiricapa. Náramipa. Navanecapa ena tíyaserecanaya. Tacahe, te tisamauchavapa ema Jesús eta napanereuchirahi, majunijicapa eta Judea. Tiyanapa tichavahi tayehe eta Galilea, vítipa víti.

⁴ Eta vipaisirapahi te achene, viánucuhapaipa eta te provincia Samaria. ⁵⁻⁶ Te la dócepa te sache eta vítecapirahi te távihahi eta nória máepiyaruhi ema víyahaini Jacob. Máijaracasicharipahi ema machicha José eta juca mayeheni apaquehe. Eta nória, tachacayahi eta avasarechicha ticaijare Sicar. Tacahe, eta mavitairapaipahi ema Jesús, tíchecanumapa te tachausi eta nória. ⁷⁻⁸ Eta víchesirahi, viyanapa viti máimitureana vívacharepanayarehi eta tinicacare te avasare. Macarichuipahi ema Jesús. Sucahepainecha esu ésuna esena indigenahi samaritana tícapanayarehi. Tacahe, máechajicapa ema Jesús:

—Nuchicha, picatajicanu picajinu une —máichapa.

⁹ Tásiha, esu esena sujicapapa:

—Píti israelítavihi. ¿Tájaha tacayema piyaseacanu eta une, nuti samarítá-nanuhi, vahi pijaneananuinahini? —suíchapa. (Ani tacahehi eta suéchajirisirahi, taicha ena israelítana énapa ena samarítánoana vahi náurianacacahini.) ¹⁰ Tásiha, ema Jesús majicapapa:

—Te pímatihini eta mavarahaqueneanahi tjaracavi ema Viya, téhevare pímatinuhivaréni nútí nuyaseacavihi eta une, németeaca piyaseacanuipahíni eta une ticaitarecarahi. Tásiha, nútí níjaracavíhíni —máichapa.

¹¹ Tásiha, esu esena suíchapa:

—Tata, tiúpenahi eta juca nória. Píti, tájina enurena piviyahini eta une. ¿Távihasca tásihayare eta une ticaitarecarahi eta pivarahaquenehi píjaracanu?

¹² Eñi viáchucaquenéni Jacob, vímaequenéhahi eta juca nória ñépiyaruhi. Nérirarénihí eñi énapa ena ñichichanaveana. Énerichuhi táerihahi eta ñiyeheana sárareana. ¿Píti pímijachavapuca picuchucahíni eta tiúriamapana une? —suíchapa.

¹³ Ema Jesús majicapavarepa:

—Namutu nácani térana eta juca une tiápechavanayarehi timauneanaya.

¹⁴ Nácanisera téranayare eta une níjararuyarehi nútí, vaipa tiápechavanaimahi timauneana. Taicha tacajurucayarehi eta náuricacareva. Tiúrinainavarepa eta náitaresira. Ticaitarecavacayare máepenacacayare —máichapa.

¹⁵ Tacahe, esu esena, eta susamirahi eta máechajiriruvanahi, suíchapa:

—Tata, píjaracanupaini eta une ticaitarecarahi, apaesa vaipa nucapechavaini numaune. Váipavare nuquitecahíni eta te juca nória népanahini une —suíchapa.

¹⁶ Ema Jesús majicapavarepa:

—Piyana, píchuhapana ema pima. Piáma eta ani.

¹⁷ Ésusera sujicapapa:

—Nájina nímaina.

Tásiha, ema Jesús máichapa:

—Pítupiruva eta juca pímetasiranuhi eta nájinairahi pímainahini.

¹⁸ Cíncoanapaipahi ena pímanaveanainihí. Tásiha puiti, ema picachanequenehi váhivare pímainahini. Pítupiruvahi eta péchajiriruvahi —máichapa.

¹⁹ Tacahe, tíramecarinehi esu esena eta susamirahi éma eta máichirahi. Tásiha, suíchapa:

—Tátachicha, németeacavihi eta pítiquenéravihi profeta. Nuvaraha pímetacanuya puiti, ¿távihapuca eta yátupiquene viyujarasirareyarehi? ²⁰ Taicha ena viáchucanaveanaini samarítánoanaini eta nayujarasiraréni eta te juca táinahu eta cerro. Puíticha tanasirichuhi eta viyujarasirarehi. Étisera eti israelítana, eta emetarapi eta viyujarasirareyare ñe Viya téhenapa te Jerusalén —suíchapa.

²¹ Ema Jesús mametacapa:

—Nutupiruva numetacavi, nuchicha, ánipa táenasihayare puiti váipa tácomesaimahi íteca eyujaraca me Tata te juca táinahu eta cerro étaripa eyanahipucaini te Jerusalén. Tamutuina eta táurivayare eta eyujarasihayare.

²² Eti samarítánoana, apaesachicharichu eta ímatirahi ema Tata eyujaraurehi. Vítisera vímatihí ema viyujaraurehi, taicha víti israelítana víti vicatuparahahi

viámayare eta máechajiriruvana ema Tata eta macuchucuirayare namutu ena achaneana ticasíñavanahi mayehe. ²³⁻²⁴ Numetacaviya eta apana: Ema Tata, tiávihahi te anuma, jéhevare éma, yátupiquenehi Viya. Vahi mátejinhini eta maeché macutihini viti achaneana. Eta tacahe, nácani tiyujaracana mayehe, tatupiruvayarehi eta nasamure, tisuapajirahianahivare tayehe eta máechajiriruvana. Vahi tácomesaimahi ticasíñarajiana. Eta juca tacaheyarehi eta mavarahaqueneanahi ema Tata eta eyujarasirayarehi —máichapa.

²⁵ Tásiha, esu esena suíchapa ema Jesús:

—Téchacarehi eta ñítecapirayare te juca apaquehe eñi Cristo, ñivaneruya eñi Viya. Téchacarehivare eta ñimetasirahaviyare tamutu eta yátupiqueneanahi. ¿Píti, péchapuca tájamuhuyarepuca eta ñítecapihayare?

²⁶ Ema Jesús majicapapa:

—Nútira nuti mavanerunuhi ema Viya. Nútira ecuchapaquenenuhi —máichapa.

²⁷ Tásiha, vítecapanecha viti máimitureana. Tacahe, viáraminehi eta máechajiriravahi eta suyehe esu esena indigenahi. Vivarahahi viyasereca esu esena tájahapuca suvaraha eta mayehe. Vivarahivare viyasereca ema Jesús tájaha tacayema eta máechajisirahi esu esena. Váhisera vipatsicava viyaserecahini.

²⁸ Tásiha, esu esena sunaquicapa eta suyupi. Tijunapapa tiyana te avasare, sumetapanavacapa ena achaneana. Te títecapapa, suíchavacapa:

²⁹ —Yare, ímahaya eñi achane profeta. Ñímatihí tamutu eta níchaqueneanahi néjecapiravanahi. Tamutuhi ñícuchuchujisinánuhi. Núti németeaca éñiripa eñi Ñivaneruhi eñi Viya, éñiripavare eñi vicuchapaquenehi ticajare Cristo —suíchapa.

³⁰ Ena achaneana sumetaruanahi tiyananapa náehica esu eta te mávihahi ema Jesús, náimahapanayarehi. ³¹ Eta nayerevapaichaha ena achaneana suíchuhaqueneanahi esu esena, viti máimitureana víchuhapa ema Jesús tinicanumayarehi. Víchapa:

—Tata maestro, yare pinicanuma, apaesaina piávamina.

³² Tásiha, éma tijicapahavipa:

—Núti, jucarihi eta tinicacare tanicasarehi eta náchaneva emáimatiéque-neruhi éti —máichahavipa.

³³ Tásiha, véjecapavasamurepa víti. Víchacacapa:

—¿Náenicai papuca jácani?

³⁴ Ema Jesús máimatihí eta vipanereruanahi. Máichahavipa:

—Eta ticaitarecanuhi núti, eta nítauchirahi eta mavanairipiana ema Nucaiyaquene, taicha nuvaraha nítauchaya tamutu eta nucaemataneasira éma.

³⁵ Eta viyeherepi te véchajiriruva: “Puiti vítapa eta vévasirapa eta trigo, cuátroyare caje eta vicuchapira eta vicurujisiraya” vicahehi. Puítisera numetacahe núti: Vaipa táyeremahi eta vicurujisirainapa. ¡Ésenica puiti te achene! Nárajapa ena achaneana ena névaraquianahi. ³⁶ Ema Tata tíjaracaheya eta ícuchiyare te ímicatcanuyare eta vicurujisira ena nani achaneana apaesa náuchucuhayare, máichecuaraquireyare eta náitaresira. Tásiha, tétaavicavaya eta víurisamureva vimutu: éti, nútípa. ³⁷ Ena achaneana, ticatisamurevanahi eta náechajirisira: “Vítira vévacahi eta vépane; apanapasera ema ticurujica” nacahehi. ³⁸ Vítisera te juca vivapinavayare. Núti níchuhahehi eta ecurujisiraya eta névaruhi. Énerichuvare nararihihi ena tínapucanahi viyehe eta

nacaematanerahi eta juca. Puiti vivapinavaya eta vícuchiyare taicha vicuti-cacahi eta vicaemataneeasirahi ema Viya —máichahavipa ema Jesús.

³⁹ Ena ticavasanahi te jena avasare, camuriqueneanahi ena tisuapanahi eta émairahi Mavaneruhi ema Viya táichavenehi eta suíchirahi eta macuchuchujisinaquenehi tamutu eta suíchaqueneanahi. ⁴⁰ Tásiha, tiyananapa tiácapahaviana. Te títecapanapa, émaquenepa nasamahi. Tásiha, náechajicapa mánasipanahini nayehe. Masuapahisera ema Jesús. Apina sache eta mayerevahi, vítipa. ⁴¹ Tacahe, eta manasipanairahi tayehe eta avasare, namutupa nasamahi eta máimiturapiana. Tacahe, camurianainehi ena tisuapanahi, téhicanahivare éma. ⁴² Tásiha, náichavarepa esu esena:

—Puiti émaquenepa visamahi. Vaipa tácarichuhini visuapahini eta pimetarapihi. Véchapa viti apanava eta émaquenérahí ema Cristo, ema vicuchapaquenehi, ema ticuchucuhahiviyare vímutu viti achaneana —náichapa.

Ena Jesús macanaraca ema machicha ema aquenuca majupahahi ema rey

⁴³ Te táequenepa eta apinaquenehi sache, tiyanavarepa ema Jesús; macaijuhe eta te provincia Galilea. Véhicapaichuhivare víti apanava. ⁴⁴ Eta mayanirayarehi eta Galilea, vahi mácasíñavahichaini eta masuapacarevainahini nayehe ena achaneana. Émarichuhi, ani macahehi eta máechajiriruvahi: “Mácani profeta, vahi tivapinavanahi eta najacapirahi ena achaneana te mávasa”. ⁴⁵ Téhesera te máitecapauchapaipa ema Jesús eta avasarechichana tinapaicanahi te Galilea, namutu najacapahi. Taicha náimatipa éma taicha náimahapa eta tíaramicareana máichaqueneana te mávihaipa te Jerusalén te jena piéstairahi eta Pascua.

⁴⁶ Tásiha, tíapechavavarepa mayanaucha ema Jesús eta avasare Caná, te máepiyasinehi vino eta une. Te apanahivare avasare ticajare Capernaúm, matiarihíhi ema majupaha ema rey. Macajumaquenehi ema machicha. ⁴⁷ Te masamairiricapa ema achane eta máitecapiraipahi ema Jesús te Caná, tiyanapa matanupanahi. Eta máichimavapa, mayaseacapa eta macatajicahini máehicavanehini te mapena, macanarapanahini ema machicha taicha ema macajumaquene tíánehiripa tépenayarehini. ⁴⁸ Émasera ema Jesús máimatipa eta masamure ema achane, tásiha, máichapa:

—Éti vahi esuapanuimahi, te vahi númechahehi eta tíaramicareana —máichapa.

⁴⁹ Émasera ema achane máichapa:

—Picatajicanuchucha, tátachicha. Péhicanu, machu máepenacaru ema nuchichasami —máichapa.

⁵⁰ Ema Jesús majicapapa:

—Tiuri, piyana. Vahi picueñamava, ema pichicha vahi tépenaimahi. Máenahi tinaracaipahi nícha —macahepa.

Tacahe, ema achane masuapapa eta máichirahi ema Jesús. Tiyanapa tichavahi te mapena. ⁵¹ Te tíánehipaipahi títecapa te mapena, nácapapa ena macajurureana. Náichapa:

—Tata, ema pichicha tinaracaipahi.

⁵² Tacahe, ema mayaserecavacapa:

—¿Tájaha hora te tinaracapa ema nuchicha?

Éna náichapa:

—Cape te la una te cáperehi, táetaviacapa eta fiebre —nacahepa.

⁵³ Tásiha, ema achane máechapa étairaiçuhui eta hora eta mametasirahi ema Jesús eta manarasiraipa ema machicha. Tacahe, ichaperinehi eta masuapirahi éma, énapa éna machichanaveanahi te peti, eta émairahi ema Cristo, Mavaneruhi ema Viya.

⁵⁴ Eta juca eta tápinanehi eta tiáramicarehi máichaquenehi te Galilea, te táequenepa eta machavirahi eta te Judea.

5

Emá Jesús macanaraca ema achane macajumaquene eta muracaquiha, ema tiávihihi te tachacaya eta noque ticaijare Betesda

¹ Te táequenepa eta juca, tatiarihihi eta apana piesta eta viúrujisirávana te Jerusalén. Tiyanavarepa ema Jesús. ² Te jena viávasa, tatiarihihi eta ichape tapaja náimisiapirare eta uvesana nacaparuasana. Tatiarihihivare eta ichape noque vímijarechahi Betesda. Ticayehehi cinco eta cúlerureana. ³⁻⁴ Eta návihihi ena nacajumaqueneana púchuquiána, masariana, énapa ena muracaquiána. Namutu éna, ticuchapanahi eta macayamurisira eta une ema ángele. Tásiha, namutu tiyanana téchipapaicavana te une, taicha tímijachavana mácani tinapuca téchipaicava, tacanaracayarehi eta jácani majuma. ⁵ Tacahe, matiaríhi ema achane macajumaquene. Tréintayocho áñoripahi eta macatajivairahi. ⁶ Tacahe, te tisiapapaipahi ema Jesús, máimahapa ema achane macajumaquene tivecáhi. Máimatívare eta tayerevaipahi eta macajumairahi. Mayaserecapa:

—¿Pivaraha pinaraca, nuchícha? —máichapa.

⁷ Tásiha, ema achane majicapapa:

—Nuvaraha, tata. Nájinasera ticasiapanuimahi tayehe eta noque, te tiyamuríeca eta une. Ticachuricanuanaparaca ena apamuriana nucuti-queneana nacajumaqueneana —máichapa.

⁸ Tacahe, ema Jesús máichapa:

—Pécheputa, piveha eta pímacaraji. Piyana pipaica —máichapa.

⁹ Tásiha, eta máichirahi ema Jesús, enevanerinehi tinaraca ema achane. Mavehapa eta máimacaraji. Tiyanapa tipaica. ¹⁰ Eta sache manarasirahi ema achane, sávarumuhui. Ticapícahuhi eta jena sache nayehe ena israelítana. Tacahepa, te náimahapa ena tuparairucana, nacajachapa éma. Ánipa ná icha:

—¿Tájaha tacayema vahi pipícaucha puiti juca sache tacapícahuquenehi? Vahi vísapa piámahini eta pímacaraji puiti juca —náichapa.

¹¹ Ema achane majicapavacapa:

—Vahi nútina tásiha. Ema maca achane ticanaracanuhi, tivanecanuhi. Máichanuhi: “Piveha eta pímacaraji. Piyana pipaica” —máichavacapa.

¹² Tásiha, éna nayaserecapa:

—¿Nájahasica ema tivanecavíhi pipaica eta piámirapahi eta pímacaraji? —náichapa.

¹³ Émasera ema achane vaipa máimatíhini eta máijare ema ticanaracáhi. Váipavare náetupiacacarehini ema Jesús te namuri ena camuríqueneana achaneana taicha tiyanaripáhi. ¹⁴ Téhesera te táequenepa, tiyanapa ema achane eta te Templo. Ánaqui títicapavarepa ema Jesús. Te máimahapa ema Jesús ema achane macanararuhi, máichapa:

—Pímaha, vaipa picuapechava picucapecatura, machu tachavauchavi eta pijuma, máchuvare pávetíji —máichapa ema Jesús.

¹⁵ Tacahe, eta máimatirapa, ema achane tiyanapa mametapanavaca ena tuparairucana eta émairahi ema Jesús ema ticanaracahi. ¹⁶⁻¹⁸ Eta tacahe, ena tuparairucana tise manapa. Ichaperinehi eta nacatianasirahi ema Jesús táichavenehi eta macanarasirahi te jena sache sávarumuhuhi tacapicahuquenehi. Tásiha, títecapanapa, éna ticaratacanayarehini ema Jesús. Émasera máimatihí eta napanereruana. Tacahe, máichavacapa:

—Ema Tata tamutuchucha sache ticaematane. Ene nucaheyarehi nuti apana. Nítauchayare eta mavanairipiana —macahepa.

Eta nasamirahi ena tuparairucana eta máichiravacahi, navetijipaicha eta nasemirahi. Navarahapa nacapacavaneyarehi éma. Eta tiviuchahi eta macanarasesirahi te sávarumuhuana, náimijachirahi máepuruhi eta nayeherepi. Tavetijipaicha eta máimicaeherachiravahi Machichairahi ema Viya, Víyairahi ema apana.

Ema Jesús macatuparahaquenehi me Maiya

¹⁹ Énerichuvare ema Jesús máichavacapa:

—Nutupiruva numetacahe: Nuti Machicha ema Viya, eta nutuparahanahi mayehe, váiparinehi nútijiricavaimahi nícha jácani nuvarahaqueneanahi. Núti nímatiequenehahi tamutu eta máematanerepíhi ema Ticachichanu. Étayareichuhi níchayarehi nútí. ²⁰ Taicha yátupíhi eta máemunasiranuhi ema Ticachichanu. Eta tacahe, tímechanuhi tamutu eta máematanerepiana. Énerichuvare tíjaracanuyareva eta nímechiraheya eta apamuri tíaramicareana. Tíápajucavayare eta tíaramicarevayare, apaesa íaramirineyare, epicayareva. ²¹ Ema Tata marataha macahepuca ena náepenaqueneana, máimichavayarehi macaitarecavacaya. Énerichuva nuti Machicha, nuratahavare nucaitareca nácani nuvarahaqueneanaya, níjaraca eta náitaresiraya. ²² Nucaturahahivare mayehe ema Tata eta nímaraya eta nacaicuñairayare namutu ena náejecapaqueneanahi. Vaipa émainahi tícuñareca éma. ²³ Taicha mavarahahi epicauchanu nuti Machicha, tácutirichu eta epicauchirahi ema Tata. Nácanisera vahi típicauchanuanahi nútí, váhivare napicauchaimahi ema Tata.

²⁴ Yátupiquenevare numetacahe eta juca apana. Nácani ticaquiñanayare tisuapanayare eta néchajiriruvana, nasuapavare eta nucavanahirahi mayehe ema Tata, éna títarecanayare, vaipa ticaicuñanaimahi. Taicha éna, tíuchuchanaripa tayehe eta náicuñayaréni te yucu. Náicuchihi eta náitaresiraya. ²⁵ Tacutiquene nutupiruva numetacahe nuti Machicha ema Viya. Táitecapaquenepa púiti juca sácheana, tisanuanayare ena achaneana, tayanapane tépenahi eta náchanevana. Te nasuapajirahipuca, nucaitarecavacayare eta náchanevana. ²⁶ Taicha ema Tata namutuhi marataha macaitareca. Ene tacahe eta máíjarasiranuhi nútí Machicha eta namutuyareva nurataha nucaitarecavaca. ²⁷ Énerichuvare tituparacanuhi eta nícuñasiravacayarehivare taicha yátupiquenenuhi manerejirunuhi. ²⁸ Vahi ecuarami eta juca numetasirahehi. Járajapa eta sácheyare eta nasamirayare namutu ena náepenaqueneana eta nahu nútí. ²⁹ Téchepecanainapa namutu te náecariana. Nácani tíchanahi eta táuriqueneana, títarecanainapa. Énasera ena tíchanahi eta tamauriqueneana, ticaicuñanainapa.

Ema Jesús máimereca eta macavanahirahi me Viya

³⁰ Núti vahi nútijiricaváimahi nícuñareca. Nucuchapayarehi eta manairipi ema Tata, ema tivanecanuhi. Tacahe, te nícuñareca, vahi numapachichijicaimahi, tatupiruvayarehi nícha. Taicha tacahehi eta mavarahaquenehi ema Tata. ³¹ Te nácarichu núti nútijiruvainachuchaini eta nímere-ruanahi, vahi tácomesahini esuapanuhini. ³² Váhisera nucarichuimahi, taicha matiarihíhi ema apana tíametasinanuhi, émaripa ema Juan Ticachasiricarahi. Nímatíhi núti eta matupiruvahi eta máichaqueneanahi eta tímereuchanuhi. ³³ Éti ecavanairipipa nayasereca ema Juan te nájahanuhipuca núti. Matupiruvahisera éma eta majicapiravacahi eta nútiqueneipahi éma ecuchapaquenehi. ³⁴ Váhisera étaparacaimahi eta juca eta matiaríhirahi ema tímereuchanuhi. Eta ticamunucarepanahi eta esuapiranuina apaesa iúchucuhaiya éti nícha núti. ³⁵ Ema Juan tímicitijiricavahi tímícauchahehi tayehe eta mametarapihi eta eyehe, te jena sácheanahi esamararasirahi éma. Iúrisamureinehi ichape, taicha eta tamícauchirahéhi eta máechajiriruva. ³⁶ Váhisera mácarichu eta máimícaecherachiranuhi ema Juan. Jararihi eta apana táimícaecherachiranuhi, tíápajupanavahi eta táramicareva. Taicha núti nícha eta nématanerepiana máíjararunuhi ema Tata. ³⁷ Émaripa ema Tata tivanecanuhi. Éma, vahi macutihémahi éti achaneana. Vahi esamahini eta mahu, váhivare ímahaimahi eta máquehe. Téhesera te jena Sagrada Escritura, tíméticahehi eta nítecapiraya. ³⁸ Éti vahi evarahahini esuapanuhini nuti mavaneruhi éma. Éta tímereuchahehi eta váhivare iúnacahini eta máechajiriruvana te esamureana. ³⁹ Éti, tamapuruji eta ecaravahuirahi eta Sagrada Escritura. Ímijacharipapuca eta ticaitarecaheyarehi. Váhisera ímatiequenehahini, váhivare ácautiarahini eta nútirahi táechajisihahi núti nucaitarecayarehi. ⁴⁰ Tacutíquene vahi ávarahahini epauchanuhini éti, níjaracahehinehi eta ítaresiraya máitavacacainahini.

⁴¹ Núti vahi nácomesa nacunachanuhini ena achaneana. ⁴² Títecapa, nímatíhevachahi emutu éti eta emaemunasirahi ema Viya. ⁴³ Núti nuvanecasivarichuhi me Tata eta nítesirahi. Étisera vahi esuapanuhini, váhivare ejacapanuhini. Téhesera te máítecahinehi mácani apana achane, tímijachavapuca Cristo ema ecuchapaquenehi, masapíhapucaini ema tisuapacarehinehi eta eyehe. ⁴⁴ Éti, vahi esuapanuhini taicha eta evarairahi ecanachacareva ena achaneana. Esapíhachucha éti vahi ávarahahini ecanachacare me Viya. ⁴⁵ Váhisera nútínayare numetauchahe eta me Tata. Máimahahérinepa ema Moisés. Éma tíméticaheheyare. Éti ímijachavahi ticuchucuchaheyare eta evarairahi ítaucha eta mavanairipiana éma. Tamapurujíhisamisera. ⁴⁶ Te yátupinahini esuapahini eta mametarapiana ema Moiséini, esuapanuhivarepucaini núti táechajisíhaquenehi eta májúreanahi ema Moiséini. ⁴⁷ Váhisera esuapahini eta májúchaqueneanahi éma. Tavetijipa eta emasuapiranuhi eta juca numetarapiana eyehe —macahepa ema Jesús.

6

Éma Jesús máitaparahahi máenicavaca ena camuríqueneana achaneana
(Mt 14.13-21; Mr 6.30-44; Lc 9.10-17)

¹⁻⁴ Te táequenepe, te jena sácheana tíánehipa eta Pascua, vipiestarasahi viti israelítana. Émasera ema Jesús, tiyanavarepa tíamahavivare eta víánuecahi eta cáquiure Galilea (ticajarehivare Tiberias). Camurianasera ena achaneana

tipaicanapahi téhicanapahi éma, taicha eta náimairahi eta tiáramicareana máichaqueneanahi eta macanarasiravacahi ena nacajumaqueneana. Te vítecapapa te apachara, viyanapa te jácani anuquerehi mávapai. Tacahe, véjacapa vinaracayarehi. ⁵ Téhesera te máimahapa ema Jesús ena camuriana achaneana eta náitecapauchirahi, máichapa ema vichamuri Felipe:

—¿Távihapucaini vivacharesihaini eta tinicacare vénisihahini namutu ena nani achaneana? —máichapa.

⁶ Eta juca mayaseresirahi étachuchanéni eta mavarairahi éma macaicu-tiarayarehi te tájahapuca macayemayarehi ema Felipe. Taicha ema Jesús máechahi eta máichaqueneayarehi. ⁷ Tásiha ema Felipe majicapapa:

—Tacamunuhi vácayehhini eta camuri plata apaesa namutupaini vítaparahahini vénichahini apaesainahini návaminahini. ¡Vahi taratahahini eta dies mil páneana! —macahepa.

⁸ Tásiha, téchajicapa ema nuchamuri Andrés, maparapehi ema Pedro. Máichapa:

⁹ —Mararihi ani ema émana amaperu tiámapahi eta cíncochichapahi eta pan, apinapa eta jima. ¡Váiparinehisera nárataimahi ena nani camuriqueneana achaneana! —macahepa.

¹⁰ Émasera ema Jesús máichahavipa:

—Evaneca náejahapaica námutu ena achaneana —macahepa.

Taicha tiúrinapahichíchahi eta apaquehe, muñjipahihivare. Cinco mil eta náichapemurivahi ena ajairana. Vahi náimitupachahini ena esenana énapa ena amaperuana. ¹¹ Tacahe, ema Jesús mavehapa eta páneana. Te tamutupa eta mahasulupayachirahi ema Viya, tíjaracahavipa. Véniricapa víti, víjaracavacapaipa eta pan étapa eta jima. Tisimurivacapaipahi eta víjaraca. ¹² Tinicanapa namutu. Tisatuheanapa, nacaemacharichahavare. Tásiha, ema Jesús máichahavivarepa:

—Ecurujica eta náemacharajianahi, machu támapuruji —macahepa.

¹³ Tásiha, víti vicurujicapa eta pan náemacharajianahi. Táinicachaichahavare eta dócehiquene ichapehiana saye. ¹⁴ Tacahe, eta náimairahi ena achaneana eta juca máichaqueneanahi ema Jesús, ichaperinehi nárami. Tásiha, nacahepa:

—Émaripa ema maca profeta ema vicuchapaquenehi máiteruyarehi te juca apaquehe —nacahepa.

¹⁵ Eta tacahe, navarahapa námayarehini nayeheyarepa rey. Émasera máimatipa eta napanereruhi. Tacahe, térajicavavarepa eta nayehe. Tiyanapa macarichuhi te tápusi eta cerro.

Ema Jesús mapaicaeca eta une
(Mt 14.22-27; Mr 6.45-52)

¹⁶ Tacahe, te jena cáperehichichapa, viyanapa víti máimitureana tayehe eta cáquiure. ¹⁷ Te vítecapapa, viávachapa te pacure. Viánuecayarehi te apachara. Vicaijuheyarehi eta avasare Capernaum. Tivehahavipa eta yati eta viánuesirahi. Ema Jesús májinahi macachanehavipahini. ¹⁸ Eta vipaisirapahi, tachimaracapa eta muraca técativaca. Tépacupaca muraca eta cáquiure. ¹⁹ Cinco kilómetroipahi eta viyerehivahi, vétupiecapaipahi, te vímahapa ema Jesús. Mapaicaecapaipahi eta une, tipauchahavipaipa. Víti vipicapa eta vímairahi. ²⁰ Émasera máichahavipa:

—Vahi ecupicanu. Nútichucha.

²¹ Tacahe, vímatipa éma. Viúrisamuréinehi eta vijacapirahi eta mávacuirapa eta te vipacure. Tásiha, vítecapanecha eta te vicaijuheyarehi.

Ena achaneana natanujiricaipahi ema Jesús

²² Te apanapa sache, ena achaneana manaquiruanahi ema Jesús, natanujiricaipahi éma. Námatiacapa eta vicarichuirahi viánueca viti máimitureana. Tájinahivare apanainahini pacure. ²³ Tásiha, tacahepainecha eta apana pacureana, nayehihi ena tiásihanahi te avasare Tiberias. Títecapanapa te tachacaya eta nanisinehi eta pan ena camuriqueneana achaneana. ²⁴ Tacahe, ena achaneana eta namaimairahi ema Jesús vítipa viti máimitureana, tiávacuhanapa te pacureana. Tiyananapa ticapayacahavianayarehi te Capernaum, natanusirapahi ema Jesús.

Ema Jesús ticaitarecarahi

²⁵ Te títecapanapa ena achaneana te apachara, náetupiacapa ema Jesús. Tásiha, nayaserecapa:

—Tata maestro, ¿tájamuhu pítecapahi eta ani? —náichapa.

²⁶ Ema Jesús majicapavacapa:

—Nutupiruva numetacahe: Eti etanucanupahi táichavenehi eta nénisirahehi nésatuhechirahehi. Váhisera ácaicutiarahini eta nímechirahehi eta tíaramicareana. ²⁷ Eti tamapurujipa eta ecañamarasiravahi etanuca eta enicaquenerepi taicha títavayarehi. Tatuparacahisera etanucayare eta tinicacare ticaitarecaheyarehi, máitavacacahi éta. Étara eta juca níjararuheyarehi nuti Manerejirunuhi ema Viya. Éta tímereuchanuhi eta yátupirahi nuvanecasivahi eta mayehe ema Tata —máichavacapa.

²⁸ Tacahe, éna nayaserecapa:

—¿Tájahapucaini eta mavarahaqueneanahi ema Viya eta vicaemataneasirahi éma? —nacahepa.

²⁹ Ema Jesús majicapavacapa:

—Eta mavarahaqueneanahi ema Viya íchaquenyare, esuapanuyare nuti mavanerunuhi —macahepa.

³⁰ Tásiha, ena nayaserecavarepa:

—¿Tájahasica eta tíaramicare pímechahaviyare apaesa visuapavipa? Vi-varaha vímaha. ³¹ Eta acane ema víyarahaini Moisés tíjaracavacahi ena víachucaequeneanaini tinicanahi eta tícaijare maná, ánaqui te apaquehe mávupahi. Taicha tacatehi eta táechajiriruvahi eta Sagrada Escritura ani tacatehi: “Máenicavacahi eta tinicacare tísiha te anuma”. Piti, ¿pímijachavapa pirataha picachurica ema víyarahaini Moisés? —nacahepa.

³² Ema Jesús majicapavacapa:

—Nutupiruvavare numetacahe. Éti, ichape eta éjecapirava. Ema víyarahaini Moisés, vahi émainahini macucupaicahini eta maná. Ema Tata, émahí ticucupaicahi eta maná. ³³ Jararihi eta apana numetarapi eyehe: Puiti ema Tata mavaraha máijaracaheya eta yátupiquenehi tinicacarehi. Étaripa tinicacarehi tísihahi te anuma ticaitarecavacayarehi namutu nácani tijacapanaya. Étara eta tímitecanuhi —macahepa.

³⁴ Tásiha, najicapapa éna:

—Tata maestro, piyaseasinahavi ema Viya máijaracahavipaini máejehainahini eta tinicacare péchajisihaquenehi —náichapa.

³⁵ Tásiha, éma máichavarepa:

—Nútira eta yátupiquene tinicacare nucaitarecaheyarehi. Eta tacahe, nácani tisuapanuanayare, vaipa tiápechavanaimahi técuhana. Váipavare timauneanaimahi. ³⁶ Étasera eta níchaquene, ímahanuipaneni éti, váhisera esuapanuhini. ³⁷ Nuvaraha ácaicutiaraquenéna yátupina. Namutu nácani tipauchanuanayare, nútí vahi névatajicavacáimahi taicha tásihaquenéichuhi me Tata eta májjarasiranuhi éna. ³⁸ Taicha nútí, eta núcupaisirahi te anuma, tímitecanuhi nítauchayarehi eta mavanairipiana ema Tata. Vahi nútijiruvainahini eta nítésirahi níchayarehi eta nuvarahaquenahini nútí. ³⁹⁻⁴⁰ Eta mavarahaquenehi ema Tata eta mavanésiranuhi, nucaitarecayarehi nácani májjararunuanayarehi éma. Nácani tésenicanuanayare nuti Machicha, tisuapanuanayarevare, máichecuaraquireyare eta náitaresiraya te nucaehepucapa éna te náecariana te jena sache táitecapapa eta népaníravacayare. Váhiquene nucamitiacaimahi ema émanaimahi —máichavacapa.

⁴¹ Tásiha, nararihi ena ticaecahirahiana eta máichiravacahi ema Jesús eta émairahi eta yátupiquene tinicacare, máucupairuhi te anuma, ticaitarecarihiyare. ⁴² Ánipa náichacacahi:

—Tépiyahirahipa ema maca. Vítí, vímatíhi ema maiya, ticaijare José. Énerichuvare vímatíhivare esu máena. ¿Tájaha tacayema eta macahechajiruvahi eta másihairahi te anuma? —nacahepa.

⁴³ Ema Jesús máichavacapa:

—Ámatina. ¿Tájaha tacayema épururahi? ⁴⁴ Nacarichu témunahiricavanaya tipauchanuana nácani máichuhaqueneanahi ema Tata. Eta tacahe, ena máichuhaqueneanayarehi éma, nucaehepucavacayare nútí te táitecapapa eta sache népaníravacayare nútí. ⁴⁵ Taicha tacahehi eta májurehi ema profeta víyarahaini Isaías, ani tacahehi: “Náimitucasivayareichuhi me Viya namutu ena achaneana”. Tacahe, namutu ena máimitureana ema Tata, énara tipauchanuanayare puití. ⁴⁶ Tayanapane váhihinéni náimahaimahi eta mamira ema Tata. Nucarichu nútí nímahapa éma taicha étaquenehi eta násinehi eta mayehe. ⁴⁷ Nutupiruvahi numetacáhe: Nácani tisuapanuanayare, níjaracayare eta náitaresirayare máitavacacayare. ⁴⁸ Nútí, yátupiquenehi eta nucaitaresiravacahi ena ticasíñavanahi eta nuyehe tacuti eta tinicacare tacaitarecáhi eta víaqueheana. ⁴⁹ Éti, ena iáchucanaveanaini tinicanahi eta maná te mávapahi apaquehe. Váhisera náitarecáhini. Namutuhi tépenaracánahi. ⁵⁰⁻⁵¹ Nácanserá tinicanahi eta néche, vahi tépenanaimahi. Taicha nútí núcupaicaripa te anuma. Eta neche, yátupiquenehi tinicacarehi ticaitarecaráhi. Nácani tinicanayare eta neche, máichecuaraquireyare eta náitaresiraya. Nútí níjaracayare eta neche taicha nuvaraha tacaitarecavacáhini namutu ena achaneana —máichavacapa.

⁵² Tásiha, ena natiarihiqueneana tiácapaemajiricácanapa. Ena apamuriana, ánipa nacahe:

—¿Tájahapuca macayemahi eta májjarasirahavi eta maeche viniruyarehi?

Ena apamuriana, ánipa nacahe:

—Vaipa tétupicava eta juca mapanereruhi. Mavaraha vinicayarecacha eta máechenaváji —nacahepa.

⁵³ Émasera ema Jesús máichavarepa:

—Nutupiruva numetacáhe: Te épuruhupuca enica eta neche, nuti Maneréjirunuhi ema Viya, te épuruhivarepuca éra eta nítine, vahi itarecaimahi.

⁵⁴ Taicha nácani tinicanayare eta neche, téranayareva eta nítine, éna

máichecuaquireyare eta náitaresira. Tásiha, núti nucaehepucavacayare te náecariana te jena sache népanírvacayare. ⁵⁵ Taicha eta neche yátupiquenehi tinicacare tacaitarecarahi. Énerichuhi eta nítine, yátupiquenehivare téracare ticaitarecarahi. ⁵⁶ Esamanuchaha. Nácani tinicanayare eta neche, téranayareva eta nítine, éna tiávahácanuanayarehi núti. Tásiha, núti návahácavacayareva éna. ⁵⁷ Taicha ene nucahehi núti, tiávahácanuhi ema Tata. Tásiha, núti návahácahivare éma. Máitavacacahi eta máitaresira. Éma ticaitarecanuhi. Tivanecanuhiwere nucaitarecaheyarehi. Tásiha, nácani tinicanayare eta neche, máitavacacayare eta náitaresira nícha. ⁵⁸ Núti núcupaichi te anuma eta níjarasiraheyarehi eta juca yátupiquenehi tinicacare. Vahi tácutihi eta maná nanicaquenehi ena iáchucanaveanaini éti. Tépenaracanárichuchaséra. Énasera ena tinicanayare eta neche, máichecuaquireyare eta náitaresiraya —máichavacapa.

⁵⁹ Tamutu eta juca máimiturapiana ema Jesús te mávihaipahi te náurujsirave ticaicare sínagoga tayehe eta jena avasare Capernaum.

Tacarichu eta máimiturapiana ema Jesús ticaitarerahi te visuapa

⁶⁰ Tacahe, ena téhicanahi ema Jesús, eta nasamirahi eta juca máimiturapianahi, camuriana ena vaipa návarahahini náehica. Ánipa nacahe:

—Ticajerapicha eta vicaicutiarirainahini eta juca máimiturapiana. Nájinavare tisuapanaimahi —nacahepa.

⁶¹ Émasera ema Jesús máimatihí eta napanereruanahi eta namavarairaripa náimiyavahini náehicahini. Tacahe, máichavacapa:

—Páurehehi éti eta evaraha ínajica eta éhisiranu taicha eta emacacutiarairahi eta nímiturapianahi. ⁶² Németeaca ímijanavaichucha eta emasuapajiravahi, tayanapanepuca ímahanupuca eta nárairaya nuchavirayarehi te anuma, te návinehi acane, taicha núti Manerejirunuhi ema Viya.

⁶³ Ácaicutiara eta nuayemaquenehi. Vahi étaracaini eta néchaquene. Eta juca nímiturapiana, te esuapapa, é tara ticaitarecaheya taicha yátupiquenerihi. ⁶⁴ ¡Páurehehi eti váhiquenehi evarahahini esuapanu! —máichavacapa.

Eta juca macayemaqueneanahi ema Jesús, matupiruvahi eta máichiravacahi taicha máimatipahi eta napanereruana ena tijunijicanayarehi, émapa ema tíjararecayarehi. ⁶⁵ Tacahe, máichavacapa:

—Puiti, evaraha ínajicanu. Eta tacahehi eta níchirahehi: “Nacarichu témunahiricavanaya tipauchanuana nácani máichuhaqueneanahi ema Tata” —máichavacapa.

⁶⁶ Eta nasamirahi eta nacayemaqueneanahi, tinajicavanapa ena camuriqueneanainihi. Vaipa náimiyavahini náehicahini ema Jesús. ⁶⁷ Tacahe, tíyaserecavahipa viti dócequeneana máimitureanahi. Máichavahipa:

—¿Evarahainapapuca ejunijicanuyare éti apanavare?

⁶⁸ Tacahe, ema Simón Pedro majicapapa:

—Tata maestro, vahi vijunijicavimahi, taicha nájina pácuti eta péchajiruvana. Tétavicavahi eta tacaitarecaravahi. ⁶⁹ Vítí vitupiruvahi eta visuapiravíhi. Véchahivare eta yátupiquenévavihi Cristo, Machichaquenevíhi ema yátupiquenehi Viya —máichapa.

⁷⁰ Ema Jesús majicapapa:

—Dócehehinéni eti nunerejiruanahi. Mararihisera ema émana te etaracu, ema mávaháruhi ema Váinaraji —máichavahipa.

⁷¹ Ema Jesús, máechajisihahi ema Júlasí. Taicha ema Jesús máimatihí eta émaírayarehí tjarareca, tayanapane éma vidocenénihí viti apóstoleana.

7

Ena maparapenaveana ema Jesús váhivare nasuapa

¹ Tacahe, ema Jesús tímiyanapaipahí tipaícapaipahí eta avasareana te tinapaíca eta Galilea. Vahi mavarahahíní machavahíní tayehe eta avasareana tinapaíca eta Judea, taicha ena tuparairucanahí te Jerusalén napane-rechaipahí nacapacayarehí éma. ² Tacahe, te jena sácheanahí, tiánehipa eta vipiéstara viti israelítana eta vicapenahuyivacahí eta viyusujiana. Étahi eta vítecapihavacahí te Jerusalén, vihasulupayacha me Viya eta macajurusinahavíhí eta visucureana te véसानeana. ³ Tiuri puiti, natiarihíhí ena maparapenaveana ema Jesús. Tacahe, náichapa éma:

—Te pímijachava píтира máestrovi, vahí pánasi eta te ani. Piyana te Judea, apaesa ena pímitureana tiávihanahí ánaqui náimaha eta píchaqueneanayare. ⁴ Taicha te pívarahahípuca náimatívi ena achaneana, tacamunuhi pímerrecava yátupina te namirahu namutu. Vahi picuyumuruca eta pítucaqueneana — náichapa.

⁵ Taicha ena maparapenaveana váhiquenevare nasuapahíní éma. ⁶ Tacahe, ema Jesús máichavacapa:

—Vuíchaha táitecapauchanuhíní eta nuyanirayare te Jerusalén. Étisera tamutuchucha tíuri eta eyaniraina. ⁷ Nútisera ticatichanuanahí ena achaneana táichavenehí eta nímereuchiravacahí eta náichaqueneana tamauri-queneana. Étisera vahí ticatichaheanaimahí taicha tájina taviuchahehíní. ⁸ Te evarahapuca, eyana éti te piesta. Nútisera vuíchaha nuyanaimahí taicha vuíchaha táitecapauchanuhíní eta nuyanirayare — máichavacapa.

⁹ Máevatacahí ema Jesús ena maparapenaveana, émasera ticaequenehavapa. Manasipanaíchaha te Galilea.

Ema Jesús tiyanarichuchanéni tayehe eta piesta

¹⁰ Te tiyananapa te piesta ena maparapenaveana ema Jesús, énerichuvaréni éma tiyanavarepa. Váhísera máimerecavahichainí. ¹¹ Énasera ena tuparairucana natanucaipa éma, te jena pístaquenehí. Tásiha, nacahepa:

—¿Macáñárihipucacacha ema mácani achane? —nacahepa.

¹² Énerichuvare ena achaneana natiarihiqueneanahí te piesta, náechajisihahí éma. Ánipa nacahehí: “Vahí tíuri ema maena achane. Macaetemavaca ena achaneana”. Ena apamuriana ánivare nacahe: “Tiúrihí ema maca. Vémeteaca tétavícava eta máurivahí”.

¹³ Váhísera nacuchujipicahíní eta nacayemaqueneanahí taicha tipicacarcavanarichucha nayehe ena tuparairucana.

¹⁴ Te enumuhiquenenepa eta piesta, mapaenumavapa tímerecava ema Jesús. Tiyanapa tisiapahí tayehe eta Templo. Tinahacavapa tímíturacahí. ¹⁵ Ichape eta náramirahí ena tuparairucana, eta náimairahí eta máitusirahí yátupi. Tásiha, ánipa nacahehí:

—Ema maca vahí vímiturenahíní. ¿Táviha maviyahí eta máitucaquenehí ema maca? Vahí mávamirahuíní eta máímitusiravacahí ena achaneana — nacahepa.

¹⁶ Émasera ema Jesús máimatihí eta napanereruanahí. Tacahe, máichavacapa:

—Vahi nútijiriruvaina nuvehahini te nuchuti eta juca nímiturapianahi. Ema Tata tivanecanuhi, émahí tituparacanuhi eta nímitusiraya eta máimiturapiana. ¹⁷ Te etiarihinapuca eti evarahahi ítaucha eta mavanairipiana ema Viya, ímatiacavaneyare eta juca nímiturapianahi étairahi tíasíhahi eta me Viya. Vahi nútijiricávainahini eta nímitusirahi. ¹⁸ Mácani achane émajiricavahi téchajisíhava, mavarairahi ticunachacareyarehi. Nútisera, eta nuvarairahi ecunachayare ema Tata tivanecanuhi, vahi népiyahirahimahi. Nutupiruvahi néchajisíha eta yátupiqueneana tisuapacareana.

¹⁹ Échavarichu éti eta máíjarasirahehi ema víyarahaini Moisés eta mavanairipiana éhiruyarehi. Váhísera ítauchahini éti émanainahini. ¿Tájahasica eta nuviureva eta evarairahi ecapacanuya? —máichavacapa ena tuparairucana.

²⁰ Ena achaneana najicapapa:

—¡Péjcapava píti eta pípanereru! ¡Máurishivipapuca píti! ¿Nájaha ticahehi eta vivarairahi vicapacavi? —náichapa.

²¹ Ema Jesús tímiyanava téchajiricava nayehe ena tuparairucana, ánipa máicha:

—Táichavenehi eta nípuresirahi te jena sache tacapicahuquenehi sávarumuhuquenehi, éta tivíuchanuhi ichape eta eyehe. ²² Étiyapa epamicavahi eta emarcachiraya mácani amuya ajaira te óchopa eta masacherahi, tayanapane sávarumuhupuca. Taicha íchape evaraha ítauchayare eta mayeherepini ema víyarahaini Moisés. (Váhísera émainahini máinapuchahini manacuchahini eta juca eyeherepi. Ema víáchucaini Abraham énapa ena machichanaveana tínapucanahi nanacucha eta viyeherepiyarehi.) ²³ Te tíuríhi ímaha eta emarcachirahi mácani amuya alauchu te sávarumuhuana, ítauchirapaipahi eta mavanairipi ema Moisés, tatuparacáhe vahi ecusemahini eta nuyehe táichavenehi eta nucanarasirahi ema maca achane te sávarumuhu. ²⁴ Vahi ecuémunanásicava eta epanereruana. Epanerechinava tayehe eta táuriqueneana. Ácaicutiara eta táurivahi eta vicanarasirahi ena achaneana, tayanapane eta sávarumuhupuca —máichavacapa.

Emá Jesús máechajisíhapa eta másínehi

²⁵ Tacahe, natiaríhi ena tinerejicavana ena ticavasanahi te Jerusalén, nacahepa éna:

—Ema maca, émara ema natanujiriruasa ena tuparairucana, ema navarahaquenehi nacapaca táichavenehi eta máimijachirava ema Cristo mavaneruhi ema Viya. ²⁶ Ímahasera éma, vahi mapicacaracavahini eta macametarairuirahi te juca Templo. Nájinavare ena tuparairucana nájaracavahini nacaratcahíni. Nájinavare nacamatínacahíni. ¿Nasuaparípapuca puítí éna, eta émairahi ema Cristo? ²⁷ Vémetecasera vuíchaha émaina ema Cristo, taicha vímatíhi ema maca, étapa eta máuchusínehi. Te máitecapa ema yátupiquene Cristo, nájina téchaimahi távihuapuca eta máuchusíhayare —nacahepa.

²⁸ Émasera ema Jesús máimatíhi eta napanereruana. Tásiha, muracapanapa eta máechajisírahí eta te Templo máimituresirahí. Ánipa macahe:

—¡Éti ímíjachava ímatínuhi, étapa eta núchusínehi! ¡Váhísera ímati eta tímitecanuhi! ¡Váhíavare ímati ema Eternoquenehi, ema tivanecanuhi! Núti, vahi nútijiriruvainahini eta nítesirahi. ²⁹ Nútisera nímatíhi éma taicha étaquenehi násínehi eta mayehe eta nítecapauchirahéhi —máichavacapa.

³⁰ Eta nasamirahi éna tuparairucana, tiápajupanavahi eta nasemanevahi. Navarahapa nacaratacayarehini, náeratacayarepaini, vuíchahasera máisapahini ema Viya eta nacaratasira éma. ³¹ Natiarihiserá camuriana ena tisuapanahi. Tásiha, nacahepa:

—¡Víti vémeteaca émaripa ema Cristo ema maca! ¡Taicha nájina mácuti eta máichirahi eta tiáramicareana máichaqueneanahi ema maca! —nacahepa.

Ena tuparairucana náevatacapa ena suntaruana nacaratapanayarehi ema Jesús

³² Ena fariséoana nasamaemachapa ena achaneana eta nacunachirahi ema Jesús. Tásiha, napanereuchavanepa ticurujicacanapa ena tuparairucana. Náevatacapa ena suntaruana nacaratapanayarehi ema Jesús te Templo te mávihahi. ³³ Tacahe, ema Jesús máichavacapa ena suntaruana:

—Vuíchaha tituparacahe eta ecaratacanhini. Yátupisera ánipirine eta nucaheyare eta eyehe. Tásiha, nuchavainapa mayehe ema tivanecanuhi.

³⁴ Éti, etanucanuinapa, váhisera íchimavanuimahi. Taicha vahi ítujicavaimahi ecapayacanu te návihayare núti —máichavacapa.

³⁵ Tacahe, ena ticitanacanahi tiyaserejiricacanapa. Ánipa nacahe:

—¿Távihapapuca macaijuhénapa eta vaipa viratahaimahi vicapaya-caimahi víti? ¿Mavarahapuca tiyanayare te tayerehiquene avasare, macapayacaya ena vijaneanana israelítana tiávihanahi te tayerehiquene? ¿Mavarahapuca máimitucayare ena apavasanana? ³⁶ ¿Tájahapucáji tacayemahi eta juca máechajiriruvahi eta vaipa viratahaimahi vicapayaca te jácani macaijuheyare? —nacahepa.

Tétavicavayare eta viúricacarevana maicha ema Jesús, tacutiya eta ichape cajacure táuchurehi eta te máriana. Ticaitarecahaviya éma.

³⁷ Te jena téqueneha sache eta piéstairahi, tímahacarepana eta jena sache. Tiyanavarepa ema Jesús te namuri ena achaneana. Titupihapa, téchajicapa muraca. Ánipa nacahe:

—Te natiarihinapuca nácani timauneanahi, náitecapauchanu. Núti níjaracayare eta náerayare nácani tisuapanuanayare —macahepa.

³⁸ Taicha ani tacahehi eta Sagrada Escritura: “Ema Mavaneruhi ema Viya, tétavicavaya eta viúricacarevana máicha, tacutiya eta ichape cajacure táuchurehi eta te máriana. Ticaitarecahaviya éma” tacahepa. ³⁹ Eta juca macayemaqueneanahi ema Jesús, máimicaecherachahi eta masiapahasi-ravacayarehi ema Espíritu Santo te nasamureana nácani tisuapanayarehi éma. Vuíchahasera táitauchavahini, taicha vuíchaha machavahini mápanahini te mávasa te anuma ema Jesús.

Apanapanepa eta napaneremuanahi ena achaneana mayehe ema Jesús

⁴⁰⁻⁴³ Tacahe, ena achaneana apanapanepa eta napanereruana mayehe ema Jesús. Ena apamuriana achaneana, nacunachapa éma. Ánipa nacahe:

—Yátupiquene ema maca achane, émaripa ema profeta ema vicuchapagunehi máiteruyarehi.

Ena apamuriana, ánivare nacahe:

—Émaripa ema maca ema Cristo.

Énasea ena apamuriana, téjecapavanarichucha. Ánipa nacahe:

—Galileo ema maca Jesús. Váiparinehiséra étainahi máuchusiha ema Cristo tayehe eta avasare Galilea. Taicha eta Sagrada Escritura táechajisihahi ema

Cristo émayarehi mámariequeneyarehi ema víyarahaini Rey David. Téhesera te avasare Belén eta máuchusihayare, étaichuhi te mávasahi ema víyarahaini Rey David —nacahepa.

⁴⁴ Natiarihihivare ena apamuriana navarahaichucha náemeratacyarehi, váhisera napatsicavahini nacaratacahini.

Ena tuparairucana vahi náurica eta nasuapirahi ema Jesús ena achaneana

⁴⁵ Tacahe, ena suntaruana vanairucanahi tichavanapa nayehe ena tivane-canahi tuparairucanahi. Vahi náíjaracavahini nacaratacahini éma. Tacahe, náichapa ena tuparairucana:

—¿Tájaha tacayema vahi íámapahini éma?

⁴⁶ Ena suntaruana najicapapa:

—Víti vahi vipatsicavahini vicaratacahini éma, taicha tétavicava eta máitupajijiasirava ema maca. Émahipuca ema Cristo vicuchapaquenehi. Nájina mácuti eta máechajisira ema maca achane —nacahepa.

⁴⁷ Tacahe, ena fariséoana náichapa:

—¡Éti apanavare ísapavaipahi tivayaracahe ema mácara! ⁴⁸ Nájina émanaina ema tuparairuca viyehé viti nasuapahini ema máenataaji. Váhivare émanaripa vichamuri fariséo, vahi masuapahini. ⁴⁹ Énasea ena nani achane-tatajiana máimatirahanahi eta viyehé ley, náehicávanetatajipa. Táurica nacaícuñahini táicha —nacahepa.

⁵⁰ Matiarhihivare ema Nicodemo, ema tipaipiuchahi ema Jesús te jena yátiquenehi. Fariséohivare éma. Máichavacapa:

⁵¹ —Váiparinehi vétavicaímahi eta viyehé ley vítijiricavahini vicapacahini ema achane. Tacamunuhi véchanumayarehi eta maviurevahi —macahepa.

⁵² Éna najicapapa:

—Vémeteaca píti apanavare pijaneanahipuca éma, pítirichupuca galiléovihi. Vivanecevi péchajicuha eta Sagrada Escritura apaesa pecha vahi étaímahi te Galilea máuchusihayare ema profeta Cristo vicuchapaquene —nacahepa.

⁵³ Tacahe, te títapiricanapa eta náechajisihairahi ema Jesús, téjanerecanapa. Tiyanaracanapa te napenana.

8

Esu esena ticayepéhi

¹ Ema Jesús májinaripahi. Tiyanaripa te tachachacu eta avasare, te cerro ticaijarehi Olivoquiji. Tatiarihihi eta avasarechicha ticaijarehi Betania, eta máitecapihahi éma. ² Te apanavarepa sache, te tijarahichichapa, tiyanavarepa éma tayehe eta Templo. Téjacapa éma, tímiturecapa. Namutu ena achaneana tiyananahi napauca, nasamararacayarehi éma. ³ Tacahe, sutiarhihi esu esena ticayepéhipuca, esu suvehahi ema apana achane. Ena escribánoana énapa ena fariséona, eta náimereuchirahi ésu, námapa te mamirahu ema Jesús te namurihi ena achaneana. ⁴ Tacahe, náichapa ema Jesús:

—Tata maestro, esu suca esena nachimaracahi ticayepéhi, suvehahi ema apana achane. ⁵ Eta viyehé ley máíjararuhavi ema víyarahaini Moisés, tímitucahavihi vicapacayarehi eta vitupisisirayare te márijahiana nácani ticapecaturanahi. ¿Tájahapuca picayema piti? —nacahepa.

⁶ Éna nayaseserecahi ema Jesús, taicha natanucahi eta tiviuchayarehi éma. Émasera ema Jesús tétipaicapa tiájupairicapa te apaquehe te mavauqui.

⁷ Énasera tímiyanavanarichucha nayaserecahi. Tacahe, máesenimurihapa. Máichavacapa:

—Te etiarhipuca éti mapecaturareanahi, enerejicava ínapuca eyuca esu suca esena —máichavacapa.

⁸ Tacahe, tétipaicavarepa tiájupairicavarepa éma. ⁹ Eta nasamirahi eta juca, téchavanarichuhinéni eta napecaturana. Titsirihacavanapa. Tásiha, timutse-rahavanapa tiúchuchujicana. Nativapa tiúchucanahi ena ichavicapanana.

¹⁰ Te máesenicavarepa ema Jesús, nájinaripahi éna. Sucarineipahi esu esena. Tásiha, máichapa esu esena:

—Nuchicha, tiyananapa namutu ena timetauchavianahi. ¿Nájinapa apanainahini ena navaraha ticapacaviana?

¹¹ Tásiha, ésu suíchapa:

—Nájina, tata.

Éma máichavarepa:

—Núti apanavare, váhivare nímicapacavimahi. Piyana pichava. Váipasera picuapechava picuquicha eta pecatu —máichapa.

Éma Jesús, ema namicahu ena achaneana

¹² Te táequenepa eta juca, tépanavavarepa tímitureca ema Jesús. Máichavacapa ena achaneana:

—Núтира numicaucahehi eti achaneana te juca apaquehe. Eta tacahe, nácani téhicanuanayare, vahi téjecapavanaimahi. Taicha eta nímiturapiana, étapa tímícauchavacahi. Tásiha, nacatichainapa eta timapicu, vaipa napauchaimahi —máichavacapa.

¹³ Tásiha, ena fariséoana natiarhipahivare. Tacahe, náichapa:

—Pítijiváichucha péchajisiavahi. Tájina pisuapacarevaina.

¹⁴ Éma Jesús majicapavarepa:

—Tisuapacare eta juca néchajiriruvana, tayanapane nútijivahi néchajisiava. Taicha nímatihini nutuparahaichuhi eta nímeresiravayare. Nímatihivare eta nucaijuheyare. Étísera vahi ímatihini távihapuca eta násihehi, váhivare ímati eta nucaijuheyare. ¹⁵ Éti étachucha éhícahi eta nayeherepiana nanacauqueneana ena íachucanaveanaini. Étasera tíchahehi eta épuruiranuhi. Nútisera vahi népuruhéimahi éti. ¹⁶ Jéhevareséra, te jácani sáchehare, népuruhépapuca táichavenehi eta emasuapirahi, tatupiruvayarehi eta népuruirahéya taicha vahi nácarichuimahi népuruhe núti. Matiaríhi ema Tata tivanecanuhi. Éma apana máimahahi eta emasuapajiraivahi. Tépuruhéyahivare éma. ¹⁷ Te eyeherepi éti, te natiarhipuca apinana ena títametacarahiana, te ticuticanahi eta náechajiriruva, tisuapacareanayarehi éna. ¹⁸ Ene nucahehi núti. Yátupíhi eta numetarapiana. Émapa ema Ticachichanuhi, éma títametacahehi eta yátupirahi eta numetarapiana —máichavacapa.

¹⁹ Énasera nayaserecavarepa:

—¿Távihasica mávihahi ema ticachichavihi?

Éma Jesús majicapavarepa:

—Éti vahi ímatínu. Váhivare ímatimahi ema Ticachichanu. Te ímatínuhini, ímatipahivareini ema Ticachichanu —máichavacapa.

²⁰ Eta juca eta máechajiriruvanahi ema Jesús eta máimituresirahi tayehe eta Templo. Eta máejasinehi te tachacaya eta nanasirareana eta námavahuana. Nájinasera napatsicavahini nacaratatahahini taicha vuíchaha máisapavacaimahi ema Viya eta nacaratasirainahini éma.

Éma Jesús tímereuchavapa eta émairahi Cristo

²¹ Éma Jesús tíápechavavare mametacavaca:

—Puiti tíánehipa eta nuyanirayare. Éti etanucanuinapa. Váhisera íchimanuimahi. Émepenainapa eta epecaturana. Tímicuñacaheyare te infierno taicha vahi ecamapuravahini eta nutiarahirahi, esuapanuhini. Taicha vahi ítujicavaimahi ítecapa te návihaya núti —macahepa.

²² Tásiha, ena ticatianacanaahi náichacacapa:

—Mavarahainapuca ticapacavayare. Táitusiava macahehi eta máechajiriruvahi eta váhiji víratahaimahi véhica éma. ¿Távihapuca eta macaijuheya? —nacahepa.

²³ Éma Jesús máichavarepa:

—Éti tayehehi eta apaquehe. Nútisera tayehenuhi te anuquehe. Eta iávasahi éti te apaquehe iáviyahahi. Núti návasaichuhi te anuquehe. ²⁴ Eta tacahe, numetacahenumahi eta tanasinapa eta epecaturana te épenapa. Taicha te vahi esuapanuhini eta nútiqenériahi ema ecuchapaquenehi, tanasiyare eta epecaturana te épena —máichavacapa.

²⁵ Tacahe, nayaserecapa éna:

—Piti pímiyachava mavaneruhi ema Viya. ¿Nájahavisica pítinavaji?

Éma máichavarepa:

—¿Áyahapapuca numetacahe? ²⁶ ¡Tétavicavahi eta tamuracavahi eta esamureana! Tavaraha muraca eta nucajachiraheya. Vuíchahasera nicha. Émasera ema tivanecanuhi, tatupiruvahi eta máechajiriruvana. Eta tacahe, eta néchajiriruvana núti eyehe eti achaneana, étarichuhi eta nusamaqueneanahi mayehe —macahepa.

²⁷ Énasera váhiquene nácaicutiarahini eta mametasiravacahi eta mayehe ema Maiya. ²⁸ Tásiha, máichavarepa:

—Jéhevaresera te ecatupihanupa te anuquehe, tapaenumavainapa ímatinuyare eta nútiqenerahi ema Cristo ecuchapaquenehi. Ecaicutiarayareva yátupihí nímitucahe eta máimiturapiana ema Tata. Vahi étaina nuviyahini te nuchuti nútijiriruvainahini. ²⁹ Puiticha, ema Tata ticachanenuhi, vahi majunijiacanuhini, váhivare nácarichuhini taicha nítauchaipahisera núti eta mavarahaqueneanahi éma —máichavacapa éna.

³⁰ Eta nasamirahi ena achaneana eta mametarapianahi, ichaperinehi eta nasuapirahi ema Jesús ena camuriqueneana achaneana.

Tímaticareana ena mavanarana ema Viya énapa ena tavanarana eta pecatu

³¹ Tacahe, ema Jesús máichavacapa ena tisuapanaripahi. Máichavacapa:

—Te ímiyanava ecaratacava eta esuapirahi eta nímiturapiana, éti yátupiquenehe nímiturehehi. ³² Tásiha, ímatinapa eta yátupiqueneana táuriqueneana. Vaipa vanaracahémahi éti —máichavacapa.

³³ Nararihiserá ena ticanarajiricanahi éma. Náichapa:

—Viti mámariequeneháviní ema víachucainí Abraham. Tájina vímatiyahini eta vítaresirahi nacavanarahavihiní. ¿Tájaha tacayema eta picahehi vaipa vanaracahavimahi? —nacahepa.

³⁴ Ema Jesús máichavarepa:

—Nutupiruva numetacahe: Namutu nácani tíchanahi eta pecatu, tavayuaruanahi éna. Nacutihí ena vanaracana taicha tétavicava eta tavayuasiravacahi. ³⁵⁻³⁶ Ímijachavaipahi machichahehi ema Viya. Váhiserá tacahehíni, taicha tavayuaruhehi eta pecatu. Nútiserá nuti Machicha ema Viya nuratatahahi nucuchucahe. Vaipa vanaracahémahi. Vaipa tivayucacahémahi eta pecatu. Jéhesare, yátupina eta machichaheyaya, máichecuaraquireyare éta. ³⁷ Néchahivare nútí eta mámariequenehérahi ema viáchucaini Abraham. Epanerechaichuchasera ecapacanu, taicha ecaticahí eta nímiturapianahi. ³⁸ Nútí néchajisihahi eta máimechaquenénuanahi ema Tata. Étiserá étachucha íchahi eta mavanairipianarichuhi ema ticachichahe —macahepa.

³⁹ Éna najicapapa:

—Vítí machichaequeneánaichaha ema viáchucaini Abraham —nacahepa.

Ema Jesús máichavarepa:

—Te yátupinahíni machichaequenehénahíni ema Abraham, ecutihíni éma eta yátupirahí eta macemataneasirahí ema Viya. ⁴⁰ Esapihahí éti, epanerechaichucha ecapacanu. Ema Abraham, vahí tácahehíni eta mapaneruhí éma. Nútí numetacahehi eta yátupiqueneana mapaneruana ema Viya. Váhiserá esupanuimahisami. ⁴¹ Éti ícharichucha eta máichaqueneasahi ema ticachichahe —máichavacapa.

Ena najicapavarepa:

—Vítí vahí apáchichahávina. Émanaichu ema ticachichahaví, ema Viya —nacahepa.

⁴² Ema Jesús majicapavarepa:

—Te yátupinahíni machichahenahíni ema Viya, etupiruvaipahíni émunacanu. Taicha nútí étaquenehi násiha me Viya. Vahí nútijiriruvainahíni eta nítesirahí puití. Nuvanecasivahí mayehe. ⁴³ ¿Tájaha tacayema vahí árataha ecaicutiara eta nímiturapiana? Étaserapuca eta emavarairahí esama. ⁴⁴ Nútiserá nímicaecherachinaheyare ema ticachichahe. Émara ema Váinarají. Ema téchahehi, taicha evarahahi íchayare eta máichaqueneana éma. Taicha éma, ticapahí eta máítaresirahí te tépanavainapa. Váhiquene mávarahahíni máehicahíni eta yátupiqueneana. Étachucha máurica tivayuarereca. Tépiyahirahipaipa. Máuríhayapara eta máímahi. Éma, náiyahí ena tépiyahirahiana. ⁴⁵ Eta echichairahí ema maca tépiyahirahí, váhiquenehíni esuapa eta juca nímiturapiana yátupiqueneana. ⁴⁶ Éti, ímijachanupuca jararíhi eta néjecapiravahí. Nutupiruvahíneniserá eta numetasirahéhi eta yátupiqueneana. ¿Tájaha tacayema vahí esupanu? ⁴⁷ Taicha nácani mayeaneanahi ema Viya, náuricayarehi nasamararaca eta máechajiriruvana ema Viya. Étiserá vahí machichahénahíni ema Viya. Eta tacahe, vahí iúricahíni esamararacahíni eta máechajiriruvana numetaruheanahi —máichavacapa.

Te májinaichahahi ema Abraham, manasiqueneripahi ema Cristo

⁴⁸ Tacahe, ena ticatianacanahi náichavarepa:

—Pítí achane picachequenetatajichucha. Yátupiquenehi mávaháruvihí ema Váinarají. Táitusiava, máurishivihí máicha —nacahepa.

⁴⁹ Ema Jesús majicapavarepa:

—Vahi máurishinuinahini. Eta juca nucaemataneasirahi ema Tata, nuvarairahi ecunachayare éma. Étiserá épurunuichucha. ⁵⁰ Núti vahi nucunachavaimahi. Matiarhisera ema ticunachanuhi. Éma téchahavihi, te nútupuca nétupicavahi eyehe, téhesera étihipuca. ⁵¹ Nutupiruva numetacahe: Nácani tisuapanayare eta numetarapiana, máepenacacanayare éna —máichavacapa.

⁵² Najicapavarepa ena ticatianacanahi:

—Jéhevare puiti, vímatiacavipa eta pimáurishivaquenehi. Apanasicáji ena profetana tépenanahi, émapa ema Abraham. Tásiha puiti, picachehajiruvavare eta nácani tisuapanayare eta pimetarapiana máepenacacanayarehi. ⁵³ Pivarahapapuca picachuricayare ema viáchucaini Abraham, apanasica ema tépenahi, énapa ena profetanaini. ¿Nájahavisica piti pivayuyucavapa? —nacahepa.

⁵⁴ Ema Jesús majicapavarepa:

—Tájina nucunachacarémahi, te nútijiricavaríchuchapuca nucunachavahi. Mararihsera ema Tata ticunachanuhi, ema ímijachaquenehi ema ecasiña éti. ⁵⁵ Éti ímijachavahi ímati éma. Váhinéni ímatihini. Jéhevare nútí nímatihí éma. Téhesera numetacahehíni eta numaimatirahí, népiyahahiripapucaini nácutiherípahíni éti. Étaserá yátupiquenehi eta nímatirahí éma, nusuapahivare eta mavanairipiana. ⁵⁶ Ema víyarahaini Abraham ema iáchucaini, tétavicavahi eta máurisamurevahi eta máimatiranuhi nútí —máichavacapa.

⁵⁷ Tacahe, ena ticatianacanahi náichapa:

—¡Vuúchaha pácayehe cincuenta áñoinal! ¡Picaemuñavapa pímati ema víyarahaini Abraham!

⁵⁸ Ema Jesús majicapavare:

—Nutupiruva numetacahe: Májinaichahahi ema Abraham, nunasiquene-ripahi nútí —máichavacapa.

⁵⁹ Tacahe, tiápajucavapa eta nasemanevahi. Navehapa eta márijahiana, nayucayarepaini éma. Tiúchucapasera éma eta te Templo. Tiyanapa tiyumucavapa.

9

Ema Jesús macanaraca ema achane máimiuchurehi eta mapuchuquiva

¹ Tacahe, eta mapaisirahi ema Jesús te tajuhe eta avasare, máetupiacapa ema achane máimiuchurehi eta mapuchuquivahi. ² Eta véhisirapahi ema Jesús viti máimitureana, víyaserecapa éma:

—Tata maestro, ¿tájahapuca tiviuchahi ema maca eta mapuchuquivahi te tiúchucainapa? ¿Énapuca tiviuchanahi ena ticachichana, téhesera mapecaturáichuhipuca éma? —vicahepa.

³ Tacahe, tijicapahavipa:

—Váhinéni étaina taviuchahini eta mapecatura éma. Énaripa ena ticachichana, váhivare énaparacaina. Matuparahaichuhi me Víya, mavarairahi númerecayarehi puiti eta máitupajijiasiravahi ema Tata. ⁴ Núti apanava nucasapurayare eta sache níchirayare eta máematanerepiana ema Tata eta mavanairanuhi taicha járajapavare eta yati nájina ticaematanena. ⁵ Ticamapuravacarerichaha eta nutiarahirahi te juca apaquehe nuti namicahuhi ena achaneana —macahepa.

⁶ Tásiha, tiátutuicapa te apaquehe ema Jesús. Máepiyacapa eta tiúrajichicha te matuture. Mayajihauquichapa ema púchuqui. ⁷ Tásiha, máichapa:

—Piyana picasipauquipana tayehe eta noque ticaijare Siloé —máichapa. (Te véchajiriruva, eta Siloé ticaijare Vanairuca.)

Tacahe, ema púchuqui tiyanapa ticasipauquipanahi. Tijahúchava tímairirica. Tichavapa te mapena. ⁸ Náraminehi ichape ena machacayapenanahi énapa ena tímatianahi eta mapuchuquívainihi. Tásiha, nacahepa:

—Vímatihi ema émana limosnerohi púchuquihí. Émasera ema maca achane tímairiricahí. ¿Apanapuca éma? —nacahepa.

⁹ Najicapapa ena tímatianahi yátupi:

—Émara ema maca.

Ema apana, macahevare:

—Vahí émaina. Mavasichucha.

Émasera ema achane púchuquinihi máichavacapa:

—Nútira núti púchuquinihi —macahepa.

¹⁰ Tásiha, nayaserecapa ema achane:

—¿Tájaha pícharacavahi eta pímaírisirahi? —náichapa.

¹¹ Éma majicapapa:

—Ema maena achane ticaijare Jesús máepiyacahi eta tiúrajichicha. Tásiha, tiyajihauquichanupa. Tivanecanupa nucasipauquipana te noque Siloé. Te nuyanapa nucasipauquipanahi, nímaíricarinehi —máichavacapa.

¹² Éna náichapa:

—¿Táviha ema mácara achane?

Éma majicapapa:

—Jéhepuca, vahí nécha.

Ena tuparairucana navaraha náecha eta manarasirahi ema púchuquinihi

¹³⁻¹⁴ Tacahe, nasamairiricapa ena fariséoana eta manarasirahi ema púchuquinihi. Tásiha, nacavanairipipa náepana ema púchuquinihi, taicha natanucahi éna eta tiviuchayarehi ema Jesús. Ichaperinehi eta nacatiasirahi éma táichavenehi eta máipuresirahi te jena sache sávarumuhuquenehi. ¹⁵ Te títecapapa ema púchuquinihi, nacatupihapa éma te namirahu. Nayaserecapa tájahápuca táicharacavahi eta máímaírisiraipahi. Éma, máichavacapa:

—Ema achane típuchanuhi tiyajihauquichanuhi eta mátuture. Tásiha, nucasipauquipa. Nímaíricapa —macahepa.

¹⁶ Nararihi ena nacahepa:

—¡Ema mácara achane vahí machaneraina ema Viya, taicha vahí mapicauhachahini eta sávarumuhuana tacapicahuquene!

Ema apamuriana, ánvare nacahe:

—Váiparinehisera máíturuequenehaimahi maicha eta tiáramicareana te yátupinahini macapeaturarahihini —nacahepa.

Tacahe, apanapanenejiana eta napanereruana.

¹⁷ Tásiha, nápechavare nayasereca ema achane:

—¿Tájaha picayema píti mayehe ema achane ticaimairiricavahi?

Éma, máichavacapa:

—Núti németeaca émahi ema profeta.

¹⁸ Énasera ena tuparairucana váhiquene nasuapahini eta émaírahi ema púchuquini. Tásiha, náímichuhapa ena ticachichanahí. ¹⁹ Nayaserecapa:

—Vivaraha viyaserecahe: ¿Yátupihí eta máimiuchurehí eta mapuchuquiva ema pichicha? ¿Tájaha táicharacavahí eta máimairirisirahí puití?

²⁰ Ena ticachichanahí najicapapa:

—Yátupi ema maca ema vichicha. Máimiuchurehivare eta mapuchuquívainihí. ²¹ Váhiserá véchahiní tájahapuca táicharacavahí eta máimairirisirahí. Váhivare vecha nájahapuca ticaimairiricahí. Émaina eyasereca. Ajairarípa éma. Émapa téchinavahí eta mametasiraheyare —náichapa.

²² Tacahehí eta najicapirahí taicha tipicanahí éna nacaicuñahiní, nacaquijihivaréni te náurujisirarevana taicha ena ticationacanáhi ema Jesús nacuchucapa eta vantu, nacavanarípirapa nacuija nasuapa ema Jesús émairahí ema Cristo. ²³ Eta tacahehí eta náichirahí: “Émaina eyasereca. Émapa téchinavahí”.

²⁴ Tacahe, ena tuparairucana nápechavare náicha ema achane púchuquini. Ánipa nacahepa:

—Pátupiruva pimetacahaví te máijarepuca ema Viya eta pinarasirahí. Vítiserá vímatihí ema maena achane tisipecaturarahí —nacahepa.

²⁵ Éma majicapavarepa:

—Jéhepuca, vahí necha núti te tisipecaturarahíhipuca éma. Tacarichu néchahí eta nupuchuquívainihí nutí, puítiserá nímairiricarípa máicha —macahepa.

²⁶ Nápechavare nayasereca éna:

—¿Tájaha máicharacavihí eta macaimairirisiravihí?

²⁷ Majicapavarepa éma:

—Cápachí numetacaherípa. Vuíchahacaru esuapanu. ¿Evarahahipucasera éhicayare éma éti apanavare? —máichavacapa.

²⁸ Tacahe, nacajachapa éma:

—¡Pítiserá péhicaipahí éma! Vítiserá véhicahí ema víyahainí Moisés. ²⁹ Taicha véchahí eta máechajisihahí ema Viya ema Moisés. Émasera ema máenatajají, vahí vecha távihapuca másiha —nacahepa.

³⁰ Ema achane majicapavarepa:

—¡Tájina échaquenéna éti páureanasamí! Vahí ímatiequenehá távihapuca másihahí ema ticaimairiricanuhi. ³¹ Váhipuca echa váiparinehí tismacaremahí mayehe ema Viya mácaní achane ticapecaturarahí. Nacarichu tisuapacareanáhi nácaní títauchanáhi eta mavanairípianáhi ema Viya. ³² Váhivare visamairirica nácaní nacaimairiricahiní ema mácaní máimiuchurehí eta napuchuquiva. ³³ Núti németeaca te tacuijahiní eta vanairucirahí me Viya ema maena achane, váhiva macuratahahiní maicha eta tíaramicareana máchaqueneanáhi —máichavacapa.

³⁴ Tacahe, tise-manapa éna eta máichiravacahí. Nacahepa:

—¡Pítí pétaviurequenehí eta picapeaturaivahí! ¡Éta tivíuchavihí! ¡Puití pisapíhapa pívarahaya pímitucahaví víti! —náichapa.

Tásiha, nacuchucapa éma.

Ena tépiyacavanahí púchuquiana taicha eta namasuapajiravahí

³⁵ Ema Jesús masamairiricapa eta náquijisirahí ema máipuchaquenehí. Tásiha, te macainunavarepa, máichapa:

—¿Pisuapapuca píti ema Machicha ema Viya?

³⁶ Ema achane majicapapa:

—Pimetacanupaini, tata. ¿Nájahapuca ema Machicha ema Viya, apaesa -nusuapahini? —macahepa.

³⁷ Ema Jesús majicapapa:

—Nútiripara nuti pímahaquenehi, nuti péchajirunuhi.

³⁸ Tacahe, ema achane tépuyucapa te mamirahu ema Jesús. Tásiha, máichapa:

—Nusuapavi, Tata —macahepa.

³⁹ Ema Jesús máichavarepa:

—Núti tímitecanuhi te juca apaquehe, nímimatichayare ena máimatirahanahi eta yátupiqueneana máechajiriruvanahi ema Viya, apaesa náimatiequeneha. Eta juca tímicutijiricavahi nucaimairiricayarehi nácani púchuquianahi tayehe eta máechajiriruvanahi ema Viya. Nácanisera tímijachavanahi téchemarahiana, nímahaya te najacapapuca eta nímiturapi, tísapavanayarepuca eta nucaimairirisiravacayare. Téhesera vahi nacuisapava, tiápajupanavainapa eta napuchuquivayare. Éta naviurevayarehi —macahepa.

⁴⁰ Tacahe, ena fariséoana natirihiqueneana te machacaya, eta nasamirahi, nayaserecapa:

—Píti pímiachahaviripapuca púchuquihavihi. ¡Váhira púchuquihavinahini! —nacahepa.

⁴¹ Ema Jesús majicapavacapa:

—¡Éti épiyacavahi púchuquihe! Taicha vahi evaraha esuapanuhini. Tásiha, tanasipa eta eviurevahi táichavenehi eta epecaturana. Te yátupinahipucaini esuapanuhini, tacuijahini taviuchahehini —máichavacapa.

10

Ema Jesús tímicaecherachava eta majaneasirayare ena téhicanahi éma

¹⁻² Tacahe, ema Jesús máechajisihahi eta tajaneacasiva eta uvesa, máimicutichirahi eta macatiuchirahi ena téhicanahi éma. Ánipa macahe:

—Nutupiruva numetacahe: Mácani tijanearecahi eta uvesa, tétavicavahi eta máechapajirisirayarehi. Te yátiana, máimisipayarehi te tapena, tásiha, máeratacapa eta tapajacura eta majaneasirahi, apaesa tájina tacuquichiravaina. Taicha nararihi ena tiámerahiana, ticaetemarahanavare. Navarahahi ticayumuruquianayarehi eta nasiapirayarehi te tapena eta uvesa, námehayarehi. ³ Émasera ema pástulero, te yáticarahi mavejiéquenehahi eta tapaja, máichuhahi eta tájareana eta uvesana. Eta máichuirahi, tiúchuchujicanapaipa táehicapaipa, taicha táimatiahuchahi ema pástulero. ⁴ Éma, máinapumirauchapaipa eta mayeheana uvesa. Táehimurihapaipa tamutu eta uvesana, taicha táimatihí eta mahu. ⁵ Váiparinehiséra táehicaímahi mácani apanaquene achane. Tavarahayarehi tijunaracana taicha vahi táimatiahuchahini ema apanaquene —máichapa ema Jesús.

⁶ Ema Jesús máimicutichinahi eta juca. Váhisera nácaicutiarahini éna eta máimitusiravacahi.

Ema Jesús ema yátupiquenehi tijaneacahavihi taicha máuriquenehi éma

⁷ Ema Jesús mápechavaca máimitucavaca. Ánipa macahe:

—Nutupiruva numetacahe: Núti nímicutijiricavahi tapajacurahi eta tapena eta uvesa te tanarasirarehi éta. ⁸Tínapumirauchanuanahi ena tépiyacavana máestroana, váhisera máimitureanainahini ema Viya. Tiámerahianachucha éna, ticaetemarahiana. Váhisera táehicaimahi eta uvesana taicha vahi táimatiahuchahini éna. ⁹Núti nujaneacavacahi ena nuchanerana, nucutihi eta tapena eta uvesa. Nácani ticasañavana eta nuyeha, nucatiuchayarehi núti. Tájina náichavaimahi, tájinavare náechuriacaimahi. Néchavacahi núti.

¹⁰ Ema tiámerahi, tímitecahi éma tiámerecayare, ticaparecayare. Macaejanerepaicayareva. Nútisera tímitecanuhi níjaracayare eta náitaresiraya. Máitavacayare eta náuricacarevayare nícha. ¹¹ Énerichuvare núti yátupiquenehi eta nujaneasiravacahi ena nuchanerana, tacutihi eta majaneasiravacahi mácani achane eta mayeheana uvesa. Núti níjarareca eta nítaresira eta nucatiuchiravacahi. ¹² Mácanisera tuparairucachucha, vahi macatiuchaimahi eta uvesa. Te máimahapa eta tinícarahi sárare, tijunayarehi. Vahi tipatsicavaimahi macatiucha eta uvesa, taicha vahi mayehenahini. Tacahe, eta tinícarahi ticamapuravainapa tacapacayare eta uvesa. Eta tacatiruana, téjanerepaicanapa. ¹³ Ema maca achane tijunaya taicha vahi téñamavaimahi tayehe eta uvesa. Éma tímijachavahi majaneacavaca, étachuchasera macenehi eta mavacha.

¹⁴⁻¹⁵ Núti yátupiquenenu pastulérunu taicha tíurihi eta nujaneasiravaca ena nuchanerana. Tímatinuhivare ema Tata, tacutihi eta nímatirahi núti éma. Énerichuvare tacahehi eta nímatiravacahi ena nuchanerana. Éna tímatinuanahivare. Eta néñamairavacahi, núti nímiararecavahi eta nítaresira náichavenehi éna. ¹⁶ Nararihivare ena apamuriana nuchanerana. Váhisera ánina nacavasa. Nucurujicavacayaresera, népanayareva. Tisuapanuanayareva namutu. Étanayaréichupa eta náumuriva. Nucarinena núti néchavaca.

¹⁷ Ema Tata, yátupihí eta máemunasiranu taicha nímiararecahi eta nítaresira náichavenehi ena nuchanerana. Nuchavayaresera nítareca. ¹⁸ Nájinanéni napamicanuhini eta nísapiravaya ticapacanuana. Níjararuvahi núti eta nacapasiranuya. Taicha nutuparahaichuhi me Tata núti néchinavayarehi. Níjararuvayare. Tásiha, nuchavayareva nítareca —máichavacapa.

¹⁹ Eta nasamirahi ena achaneana eta juca máechajiriruvanahi ema Jesús, típutsimuriavavacavarepa. ²⁰ Natiaríhihi ena ticatianacana. Nacahepa:

—¿Tájaha tacayema esupa ema mara? Máurishi éma, mávahárupuca ema Váinaraji —nacahepa.

²¹ Énaserá ena apamuriana, ánivare nacahe:

—Te yátupinahini mávaháruinahini ema Váinaraji, vahi macuratahahini macaimairirica ema púchuqui. Nájinavare mácuti eta máechajisira —nacahepa.

Ena tuparairucana vahi návarahahini najacapa ema Jesús

²² Te jena sácheanahi diciembrequenehi eta ticasarahimuhuana te Jerusalén, ena achaneana napiestachahi eta año táepaniravahi náetupirica eta Templo. ²³ Ema Jesús matiaríhihi te tajuhe eta te Templo te tayehe eta alar máepiyaruhi ema Reyni Salomón. ²⁴ Te náimahapa ena ticatianacana, nachayacapa ema Jesús. Tásiha, náichapa:

—¿Tájaha tacayema pímpanererechahavihi? Pátupiruvapa pimetacahavi te yátupivihipuca pítiquenehi Cristo —náichapa.

²⁵ Ema Jesús majicapavacapa:

—Cápachi numetacaheripahi. Vuíchahacaru esuapanu. Eta juca níchaqueneanahi ímahaqueneanahi tásihaqueneanahi me Tata, étaripara tímereuchanuhi. ²⁶ Étiserá váhiquene esuapanu. Taicha vahi étinahíni nuyehehenahíni uvesa. ²⁷ Eta nuyeheana uvesa tímataihuchanuanahi éta. Núti apanavare nímativacahivare. Eta tacahe, téhicanuanahi. ²⁸ Níjaracavacayareresera núti eta náitaresirayare máichecuaraquireyare. Váhiquene náimahahíni eta náicuñayaréni. Nájinavare tiverejicanuanaimahi ena nujanearuanahi. ²⁹ Taicha májjararunuanahi ema Tata. Éma, nájina ticachuriacainahíni. Nájinavare tiratahaimahi tiverejicaimahi ena majanearuanahi. ³⁰ Taicha núti émapa ema Tata vicuticacahi eta vítupajijiasiravavacahi —máichavacapa.

³¹ Tacahe, ena ticatianacana natanucapa eta máríjahiana. Navarahapa natupisicayahíni ema Jesús. ³² Máichavacapasera éna:

—Íchapemurihi eta níchirahi eta táuriqueneana ímahaqueneanahi, májjararuanahi ema Tata. ¿Étaserapuca tivíuchanuhi eta evarairahi etupisicanu te máríjahí?

³³ Tacahe, najicapavarepa:

—Vahi étaparacaina eta píchirapuca jácani táuriqueneanahi. Eta tivíuchavihi pímiyachiravahi machichavi ema Viya. Pítrichuhi vicutiquenehi achane. ¡Pítiserá pímiyachavaipahi Víyavi! —nacahepa.

³⁴ Ema Jesús majicapavarepa:

—Eta ajureca te Salmo, vahi ímatiequenehahíni eta táechajisiaherahi eta macayemaquenehi ema Viya: “Víyahéhi nícha eti nunerejiruheanahi”. ³⁵ Véchahi eta tacayemaquenehi eta ajureca, vahi tépiyahirahímahi. Taicha tamutu eta táechajiriruvana eta Sagrada Escritura táechajisihairahi eta juca máechajiriruvanahi ema Viya. Nácani nacatuparahahi me Viya, éma tímijarechavacahi “Víanahi”. ³⁶ Nútiripa puiti, nuvetijipa nímiyarechacare “Viya” taicha émarichu ema Viya tinerejicanuhi, tivanecanuhi eta núcupaisiraya te juca apaquehe. ³⁷⁻³⁸ Núti nítaucharahi eta mavanairipiana ema Tata tivanecanuhi. Tásiha, tatuparacahe esuapanuvaneyarehi. Tayanapane vahi tisuapacarehi eta nímiturapiana eta eyehe, étapaseraíni esuapahíni eta tíaramicareana níchaqueneanahi. Étara tímereuchanuhi eta mávahásiranuhi ema Tata, návahásirahivare núti apanava éma —máichavacapa.

³⁹ Tacahe, tíápechavanavarepa navaraha nacaratacayahíni ema Jesús, napresuchayahíni. Émasera tíúchucavanepa.

⁴⁰ Tásiha, tiyanavarepa ema Jesús te tinapaica te apachara eta cajacure Jordán. Manasipanapa eta te avasarechicha Betábara te máicachasirisinehíni ema Juan. ⁴¹ Camuriana ena achaneana tiyanaracanaíni eta mayehe. Tásiha, nacahepa éna:

—Ema víyahahíni Juan, tayanapanehi tájina máimerecahíni eta tíaramicareana, yátupihisera eta profetaírahíni éma, taicha tamutupa eta mametarapiana mayehe ema maca Jesús, vímaharipa puiti eta yátupiqueneanahi —nacahepa.

⁴² Tacahe, ánaqui camurianahi ena achaneana tisuapanahi ema Jesús, téhicanahivare.

¹ Matiarahi ema achane ticaijare Lázaro. Éma, máemunacasarehi ema Jesús. Ticavasahi tayehe eta avasarechicha ticaijare Betania, návasahivare ena maparapenaveana, esu María ésupa esu Marta. Te jena sácheana, ticajumahi muraca ema achane. ² (Esu suca María, ésuhi esu tisipapevachahi ema Jesús tayehe eta táijiyequenehi perfumeama. Suájapevachahivare te suchuti-maca.) ³ Tacahe, ena náni apinana esenana ticaparapeacana náimivanerecapa, nametapanayarehi ema Jesús eta macajumairahi muraca ema Lázaro. ⁴ Te máechapa ema Jesús, macahepa:

—Eta juca jumare, vahi títaimahi ema Lázaro. Matuparahaichusera me Viya, mavarairahi nímereca eta máitupajijiasirava éma, nímeresirayareva eta nítipajijiasiravahi nuti Machicha, apaesa nacunachahavi ena achaneana — macahepa.

⁵ Jéhesare, ema Jesús yátupihí eta máemunasirahi ema Lázaro, énapa ena esenana maparapenaveana. ⁶ Váhisera mayanavanehini máimahapanahíni ema máemunacasare. Manasirichaha apinahi sache. ⁷ Tásiha, te apanapa sache, ema Jesús máichahavipa viti máimitureana:

—Viyana vichava te Judea.

⁸ Vítí vijicapapa:

—Tata maestro, cáperichaha ena ticatianacavianahi navarahahi ticapacaviana. Tásiha, puiti pivarahaichaha piyanayare ánaqui nayehe —víchapa.

⁹ Ema Jesús máechajisihahi eta mavanecasivahi. Máichahavipa:

—Vahi táeñamavácarehini. Yátupi eta sache ticayehe doce hora. Te vipaica te sáchemuhu, vahi vicáyutetuímahi taicha vímairiricahi tayehe eta tijarahi.

¹⁰ Nácanisera tipaicanahi te yátimuhu, ticayuteterejianayarehi taicha vahi náimairicahini. Ema Tata tijaneacanuhi níti taicha nítauchahi tamutu eta mávarahaqueneana. Vahi máisapahini jácani máichanuhini; tapaenumava máimaha tiuri —macahepa.

¹¹ Tacahe, te táequenepa, macahevarepa:

—Ema vémunacasare Lázaro máenahi tímacahi. Nuyanayaresera nucajami-panayare.

¹² Vítí víchapa:

—Tata, te tímacahipuca éma, étapa táicutiarahi eta mativareraya —víchapa ema.

¹³⁻¹⁴ Vítí vímijachaichucha yátupihí tímaca. Tásiha, ema Jesús matupirupa timetacahavihi:

—Tépenaipa ema Lázaro. ¹⁵ Núrisamuresera eta májinnanuirahi eta ánaqui. Tiúripanaya eta eyehe taicha ímahaya eta níchaquenyare apaesa esuapanu. Puiti viyanaya vímahapanayare —macahepa.

¹⁶ Tacahe, ema vichamuri Tomás máichahavipa viti machamuriana:

—Viyana víti apanavare. Te nacapacapuca éma, nacapacahavirineva víti apanava —máichahavipa ema Tomás. (Tatiarivare eta máchucarapi Chame.)

Ema Jesús, ema téchahi eta macaechepusirayare ena náepenaqueneana, máimichavayare macaitareca

¹⁷⁻¹⁸ Tiuri, viyanapa vicaijuhe eta avasarechicha Betania. (Eta Betania tachacayahí eta Jerusalén, apina kilómetro y medio eta tayerehivahi.) Tásiha, te viánehipaipa, timetacahavianapa cuátroripa sache eta náecarairahi ema Lázaroini. ¹⁹ Camurianahichahasera ena achaneana te napena ena maparapenaveana, esu Marta ésupa esu María. Nacamitisiripanahi apaesa vahi nacuiyharacavaicha ena apinana. ²⁰ Tacahe, te suéchapa esu Marta

eta máitecapirayarehi ema Jesús, tiyanapa suácapahi. Éusera esu María sunasirichuhi te tajuhe eta peti. ²¹ Te suéchajicapa esu Marta ema Jesús, sumetacapa eta máepenirahi ema suparapeini. Tásiha, suíchapa:

—Tátachicha, te pitiarihinahini eta ani, vahi ñicuepenahini eñi nuparapeini. ²² Váhisera néñamava. Nucasiñavihi eta piyehe. Pímahainepa píti eta pícharacaya eta piyaseasirayare eñi Viya —suíchapa.

²³ Ema Jesús majicapapa:

—Tiuri eta péñamirahi ema piparape. Váhisera picupica. Tichavayare títareca te pimirahu —máichapa.

²⁴ Esu Marta suíchavarepa:

—Yátupi, Tata, néchahi eta ñichavirayare títareca te táitecapapa eta sáchezare náechepusiraya ena náepenaqueneana —sucahepa.

²⁵ Ema Jesús máichavarepa:

—Jéhezare nútí, nucaitarerahi nácani nucaechepureanaya. Táitusiava nu-metacavi: Nácani tisuapanuanayare, tayanapanepuca náepena, nucaita-recayaresera nútí. ²⁶ Ene ecaheyare éti éhicanuanahi, tayanapanepuca épenayare, nútisera nucaitarecaheyare. Tásiha, tájinapa tímiapchaimahi épenahini. ¿Pisuapanupuca eta níchiravihi? —máichapa.

²⁷ Ésu sujicapapa:

—Nusuapavi, Tata. Pítira yátupiquenévihi Cristo, Ñichichavi eñi Viya. Pítiripa píti vichupaquenévihi píteruyarehi te juca apaquehe —suíchapa.

Ema Jesús tíyaha te tachacaya eta máecari ema Lázaro

²⁸ Te títapiricapa eta suéchajisirahi esu Marta mayehe ema Jesús, tiyanapa suíchuhapanahi esu suparape María. Sujajacapa, ani tacachehi eta suíchirahi: —Eñi Maestro ñirarihi eta ani. Ñicavanairipi piyanayaréji —suíchapa.

²⁹ Te susamapa esu María eta matiarahirahi ema Jesús, téchepurucavanepa. Tiyanavarepa suácapahi. ³⁰ Taicha ema Jesús vuíchaha máitecapahini te napena. Manasirichuhi eta te suácapinehi esu Marta. ³¹ Eta náimairahi ena suchimarana eta suéchepusirahi súchusirahi esu María, tiyananapa náehieque-nehahi. Náimijachahi éna tiyanayarehi ésu te máecari ema suparapeini, tíyahapanayarehi.

³² Tacahe, te suítecapauchapa ema Jesús, esu María sutupirupa tépuyucahi te máivapechacaya. Tásiha, suíchapa:

—Tátachicha, te pitiarihinahini eta ani vahi ñicuepenahini eñi nuparapeini —suíchapa.

³³⁻³⁵ Tásiha, tíyahapa esu María, énapa ena téhicanapahi ésu. Eta máimairahi ema Jesús eta náiyairahi, ticatisamurevavarepa éma apanavare. Tíyahavarepa. Tásiha, mayaserecapa:

—¿Táviha écarihahi? —máichapa.

Ena najicapapa:

—Yare, Tata, pímaha.

³⁶ Tacahe, ena natiarihiqueneana eta náimairahi eta máiyairahi ema Jesús, téchajicacanapa:

—Piáha. Tíyahavaréra éma apanava. Tétavicavahipucáji eta máemunasirahi —nacahepa.

³⁷ Ena apamuriana, ánivare nacahe:

—Ema maca ticaimairiricahi ema púchuqui. ¿Tájahapuca vahi macanaracahini ema Lázaroínisami, apaesa vahi macuepenahini? —nacahepa.

Eta máechepusira ema Lázaro te máecari

³⁸ Tacahe, ichape eta macatisamurevairahi ema Jesús. Mapauchapa eta ecari nasecajueruhi te mari. Tatiarihivare eta márime tajihajacahi eta tapajacura eta ecari. ³⁹ Tacahe, ema Jesús mavanecavacapa:

—Ecaerajica eta jara tachujihí eta máecari.

Ésusera esu Marta suíchapa:

—Tata, németeaca tijeheripa jácani taicha cuátrorípahi sache eta ñépenirahi —suahepa.

⁴⁰ Ema Jesús máichavarepa:

—Cápachi numetacavipa, te pisuapanu yátupina, pímahayare eta macunachacarevahi ema Viya taicha nímerecaya eta tamutuirahi marataha — máichapa.

⁴¹ Tacahe, nacaerajicapa eta márime. Tásiha, ema Jesús máesenicapa te anuma, tiyujaracanamapa:

—Tata, nuhasulupayachavi eta pisamiranuhi. ⁴² Váhiquene péñauchanu eta jácani nuyasearuviana. Puiti nuyaseacavi eta pítupajijiásirava, apaesa náimaha ena nani achaneana natiarihiqueneanahi, apaesa nacunachavi. Náechavare eta pítirahi pivanecanu —machahepa éma.

⁴³ Te títapiricapa eta mayujarasirahi, máimararacapa eta ecari. Tipiaracapa muraca, ánipa macahe:

—Lázaro, péchepuca eta te jara piávihahi. Yare, piúchuca —máichapa.

⁴⁴ Tacahe, ema máepenaquenénihí tiúchucapa. Mámapaichuhi eta máyuruhanahi étapa eta máepacamirahi. Tásiha, ema Jesús mavanecavacapa naveruruca eta máyuruhanahi, apaesa tiyanayarepa te peti.

Eta tuparairucana napanerechapa nacaratacayarehi ema Jesús
(Mt 26.1-5; Mr 14.1-2; Lc 22.1-2)

⁴⁵ Tacahe, ena suchimaranahi esu María, eta náimairahi eta juca máichaquenehi ema Jesús, camurianarinehi ena tisuapanahi éma.

⁴⁶ Natiarihiserá ena apamuriana tiyananapa nayehe ena fariséana ticatianacahahi ema Jesús. Eta namaurisirahi eta juca, tiyanana nametapanavaca ena tuparairucana. ⁴⁷ Tacahe, ena tuparairucana náimichuhapa namutu ena juéseana, ticurujicacanapa. Tásiha, nacahepa:

—¿Tájaha vícharacavayare, tátanaveana? Ema maena achane Jesús, tétavicavahi eta máitupajijiásiravahi máichahi eta tíamicareana.

⁴⁸ Vahi táuricahini vísapahini máimiyannahini máitarecahini, machu námaturiana náehica ena achaneana, masapihainapapuca nasuapayare éma. Machu ena aquenucana romanoana náimijachinapapuca tatiarihiyare eta tíñepiyare. Tisemanainapapuca. Nárajapainapapuca eta ani. Náquipaisinahavinapapuca eta viávasa. Nasapihainapapuca tiverejicahavianayare eta viávacureanahi —nacahepa.

⁴⁹ Matiarihíhi ema achane ticaijarehi Caifás. Émahi ema ichapequenehi tiyujaracarahi te jena áñohi. Tacahe, máichavacapa éna:

—Éti vahi ímatiequeneha eta vícharacavayare. ⁵⁰ Németeaca núti tiúripana máepena ema émanaina achane mavachareca eta náitaresiraina namutu ena apamuriana achaneana —máichavacapa.

⁵¹ Eta juca máechajiriruvahi ema Caifás, váhinéni étainahini táichahini eta máechemaraivahíni éma. Étahi eta émairahi ema ichapequenehi tiyujaracarahi te jena áñohi. Manacasamureruichuhi ema Viya eta máechajisihahi

eta máepenirayare ema Jesús náichavene ena israelítana. ⁵² Étasera juca máepenirayarehi ema Jesús, mavacharecainapa eta naviurevahi namutu nácani machaneranyarehi ema Viya te apanapanenequeneana avasareana. Vahi tácarichuhini eta naviurevana ena israelítana. Taicha te táequenénapa, mavarahahi macurujimurihayarehi, étamurianayarehi namutu éna.

⁵³ Tacahe, tacutipa eta napanereruhi ena tuparairucana eta nacapasi-rayare ema Jesús. ⁵⁴ Eta tacahe, ema Jesús vaipa máimerecavahini eta te Jerusalén. Majunijicapa eta Judea. Tiyanapa eta te mávapahi apaquehe tachacaya eta avasare ticaijare Efraín. Manasipanapa ánaqui, vítipa viti máimitureana.

⁵⁵ Tacahe, semanayare eta Pascua, vipiéstara viti israelítana. Namutu ena achaneana tiávihana te apanana avasareana tiyanaracanapa tayehe eta Jerusalén. Tisipahacavanayarehi taicha náimijachahi aní tacahehi tacuija nacuquichiravaina eta náimeresiravayare me Viya. ⁵⁶ Tacahe, ena achaneana nacunepaipahi te Jerusalén ema Jesús. Eta návihairahi te Templo, téchajiricacanaripa. Ánipa nacahe:

—¿Tájaha ecayema? ¿Títecayarepucáji ema Jesús puiti juca piéstaya? — nacahepa.

⁵⁷ Énaripa ena tuparairucana tivanerecanapa ena ticuneánayare ema Jesús. Te matiarihinapuca, nametapanayarepa ena tuparairucana. Tásiha, éna náimicaratacayarepa.

12

Esu María susipapevacha ema Jesús te perfumeama (Mt 26.6-13; Mr 14.3-9)

¹ Séisirinehi sache eta piéstayarehi eta Pascua. Tichavavarepa ema Jesús tayehe eta avasarechicha Betania, mávasahi ema Lázaro, ema macaeche-purehi te máecari. Tacahe, ena máemunacasareana tiúrisamureanarinehi eta náimairahi eta máitecapirahi ema Jesús eta nayehe. ² Ticacherujianapa náenicayarehi. Ema Lázaro macachanehi te mesa eta nanisirahi. Esu Marta téchapajiricavacahi. ³ Tacahe, esu María suámapaipa eta táijijequene perfumeama te bótechicha. (Te navirare eta juca perfumeama te nasucure ticaijare nardo.) Tétavicavahi eta tasivachavahi. Ticutiamacacahi te botella eta tasiamavahi. Tacahe, suépusapevachapa ema Jesús, suájapevachapa te suchutimaca. Enevanerine táinicajuecha eta peti eta táijijevahi. ⁴ Matiarihihi ema vichamuri Júlasí. Ema maca émarichu tíjararecayarehi ema Jesús. Témechajicavapa éma:

⁵ —¿Tájaha tacayema váhivaréyapa tacaijararecasihini eta juca tasivachaquenehi perfumeama? Vivehahini eta camuriquene plata, tásiha, vímicatasi-hahini ena páureana —macahepa.

⁶ Ema maca Júlasí, vahi étainahini eta majapanuirainahini ena páureana. Étachuchanéni mavarairahi mayumuruca eta plata, taicha ema tiámerahihi. Títecapa émarichuhivare tiúnarecarahi eta plata. ⁷ Tacahe, ema Jesús máichapa:

—Pésamirica esu suca esena. Suíchachaha ésu eta suvarahaquene taicha nícumunuichuhi eta juca tayeheyarehi eta nécari. ⁸ Ena páureana, tamutuchucha sácheana eta ecachaneravacayare éna. Te jácani ávarahapapuca

ímicatacayare, nararihi ena ticamunuana. Nútisera vahi nánasiquenémahi eta eyehe —macahepa.

Ena Lázaro, navarahavare nacapaca

⁹ Tacahe, camuriana ena tisamairicanahi eta matiarahirahi ema Jesús te Betania. Tiyananapa náimahapanayarehi. Énerichuvare náimahapanayarehiva ema Lázaro, ema máechepurehi te máecari. ¹⁰ Tacahe, ena tuparairucana napanerechavarepa nacapacayarehi ema Lázaro. ¹¹ Taicha émavenehi tíchahi eta nasuapiraipahi ema Jesús ena camuriqueneana achaneana. Vaipa nasuapahini eta navanairipiana ena tuparairucana.

Títecapapa ema Jesús te Jerusalén

(Mt 21.1-11; Mr 11.1-11; Lc 19.28-40)

¹² Te apanapa sache, ena nani achaneana táimiyanaqueneanahi eta piéstayarehi eta Pascua, nasamairiricapa eta máitecapirayarehi ema Jesús tayehe eta avasare. ¹³ Tiúrisamureanarinehi. Eta náurisamurevahi, navehapa eta tajuru eta cáchipaca. Tiyananapa nácapahi éma. Eta napiarasirapahi, ánipa nacahe:

—¡Yare, Tata! ¡Piti yátupiquenévihi rey viyehe viti israelítana! ¡Asulupaya! ¡Piti vanáirucaquenévihi me Viya! ¡Ichape eta vicunachiravi piti! ¡Viva ema Viáquenu! ¡Viva! —nacahepa.

¹⁴ Ema Jesús ticaperapahi eta burricu eta masiapirahi, taicha ene tacahehi eta táechajiriruvahi eta Sagrada Escritura: ¹⁵ “Eti ecavasanahi te Jerusalén, vaipa ecupica, taicha márajapa ema eyeheyare Rey. Tímaticareyarehi éma, ticaperayare eta burricuchicha. Mámapahi eta iúritaresirayare” tacahehi eta Sagrada Escritura.

¹⁶ Eta juca ajureca eta vimacaicutiaraquenehi viti máimitureana. Tapaenu-mava te máechepucapa ema Jesús, vicaicutiarahi eta tacayemahi eta Sagrada Escritura, táechajisihairahi éma, étapa eta tamutu eta apamuriana máichara-cavanahi.

¹⁷ Tiuri puiti, ena apamuriana achaneana tímararacanaripa ema Jesús eta macaechepusirahi ema Lázaro te máecari, náechajisihaipahi éna eta náimahaquenehi. ¹⁸ Eta tacahe, camuriqueneanahi ena achaneana tiyananahi nácapahi éma, taicha navarahahi náimati ema tíchahi eta tíáramicare. ¹⁹ Tásiha, ena náimairahi ena fariséoana eta camurianairahi ena tiácapanahi, náichacacapa:

—¡Váhichara viturucaimahi taicha tétavicavahi eta nasimutuvahi ena téhicanahi éma!

Ena apavasaqueneana navarahavare náimati ema Jesús

²⁰ Natiarshivare ena apamuriana achaneana apajuecuruhana tayehe eta Jerusalén. Énerichuhi éna tímitecanahi tiyujarapananahi te jena piéstairahi. ²¹ Tiyananapa napauchahi ema vichamuri Felipe. Ánipa tacahe eta nayasea-sirahi:

—Tata, víti apanava vivaraha vímati ema Jesús —nacahepa.

²² Tacahe, ema Felipe tiyanapa mametacahi ema Andrés. Tásiha, ena apinana tiyananapa nametapanahi ema Jesús. ²³ Tásiha, ema Jesús máichavacapa:

—Jéhevare puiti, tiánehipa eta népeniraya nuti Manerejirunuhi ema Viya. Nápechavayaresera nítareca, apaesa nucunachacareyare eyehe.

²⁴ Nutupiruva numetacahe: Te vahi vicuevaca eta evaraqui te apaquehe, vahi téjapacaimahi. Tanasiyareichuhi eta tasimutuva eta evaraqui. Téhesera vévacahi, tétavicavaya eta táejapasiraya. ²⁵ Nácani téñamavanahi eta náitaresira, tiávamirahuana eta náehisiranu, énajivayare ticamitiequenehavanayare eta náitaresira. Nácani tíjaracavanayare eta náehisiranuyare, tájinavare vahi náeñamavahini eta náitaresira te juca apaquehe, tíuchucuhanayare éna. Máichecuaraquireyare eta náitaresirayare. ²⁶ Énerichuvare nácani tivarahanayare ticaemataneacanuana, tacamunu tímerecavanayare yátupi eta náehisiranuhi. Tásiha, núti nucaejacavacayare éna te néjasihayare núti. Ena nani, tétavicavayare eta macunachirayare ema Tata.

Ena Jesús tímereuchava eta máepeniraya

²⁷ Ena Jesús táimipanererecahi eta máepenirayare. Ánipa macahehi eta máechajiriruvahi:

—Tiánehinapa eta népeniraya. ¡Chape eta nupisirahi! ¿Tiúripuca nuyaseaca ema Tata macatiuchanuini apaesa vahi nucucatajivaini? ¡Váhiquene nuyaseacaimahi, taicha núti tímitecanuhi te juca apaquehe eta népeninavacaya ena achaneana!

²⁸ Tacahe, macahevarepa:

—Tata, pímereca eta pítipujijíásirava apaesa nacunachavi ena achaneana —macahepa.

Tásiha, tíjahúchavapa nasamahi eta mahu ema Viya te anuma. Ánipa macahe:

—Nímerecaripa eta nítipujijíásiravahi. Jéhesare, nápechavayareva nímerecayare —macahepa.

²⁹ Tacahe, ena achaneana natirihiqueneanahi nasamahi eta máechajisirahi ema Viya. Váhisera nácaicutiarahini, náimijachaichucha tirureca. Tásiha, ena apamuriana, ángelepuca éma téchajicahi nacahevare.

³⁰ Ena Jesús máichavacapa:

—Vahi nútivenéna eta juca esamaquenehi. Ena Tata tímisamahehi, mavarairahi esuapayare. ³¹ Achichu juca sácheanayare, ticapacuanainapa ena achaneana téhicanahi ema Váinaraji. Eta nacapasiranuya, tacaviureyare namutu ena achaneana te juca apaquehe eta náicuñayare. Eta népenirayare nuvachachainapa eta nuratahairaya nucuchucuhavaca nácani ticasiñavanahi nuyehe. Téquecavanainapa eta nuyehe ena machanerainaihi ema Váinaraji. ³² Eta tacahe, te nacatupihanupa te anuquehe te crusu, te nacaicutiarapa ena achaneana apanapanenejiana eta nasamairirisiraya, énajivainapa típauchuananaya téhicanuanainapa —máichavacapa.

³³ Eta juca máichiravacahi ema Jesús, mavarahahi nacaicutiarayarehi eta táicharacavayarehi eta máepenira. ³⁴ Tacahe, ena achaneana tisamararacanaahi najicapapa éma:

—¿Tájahasica tacayema eta péchajisihahi eta pépeniraya te crusu? Viti vímijachaipahi pítipa ema Cristo, piti Manerejiruvahi ema Viya. Viti visamahi eta Sagrada Escritura te náechajicuha máichecuaraquireyarehi eta máitaresiraya ema Cristo. Vahi vicaicutiarahini —náichapa.

³⁵ Ena Jesús máichavacapa:

—Ecamapurava esamararacanu mapurare nutiarichaha eta eyehe. Numicauchahechaha taicha ánipirine eta juca ímairanuyare apaesa vahi ecucayutete tayehe eta timapicu. Taicha nácani tájinahi náechaquenénahi,

ticayutetuanayare. ³⁶ Esuapanu eta juca numicauchaherichaha apaesa ímiturecaya éti apanava, iámayare eta juca tajarahiquene —máichapa.

Te títapiricapa ema Jesús eta máichiravacahi, tiyanapa majunijimurihapa. Vaipa máimerecavahini eta nayehe.

Tétavicava eta namuracasamurevanahi ena ticavasanahi te Jerusalén

³⁷ Ichapemurihi eta náimairahi ena ticavasanahi te Jerusalén eta tíaramicareana máichaqueneanahi ema Jesús, váhiquenesera nasuapahini éna. ³⁸⁻³⁹ Étahisera tacahehi títauchavayarehi eta májuchaqueneanahi te ajureca ema profetaini Isaías tayehe eta tamuracavahi eta namasuapirayare. Ani tacahehi eta táechajiruvahi: “Tata Viáquenu, nájina ticaicutiaranaina eta péchajiruvana vimiturapianahi víti. Píti pímerecaripahi eta pitupajijiasiravahi, váhiquenesera nasuapavihini”.

Énerichuvare ani tacahehi eta májuchaqueneanahi ema Isaías: ⁴⁰ “Ema Viya, eta máimairahi eta namuracasamurevanahi, máisapahi tíapajucava eta namasuapajirairavahi, tímicutijiricavahi púchuquiana éna. Váhiquene tétupirisamurechavanaimahi. Váhivare navarahaimahi nacasiñavahini me Viya, apaesa macanaracavacahini” tacahehi eta májuchaquenehi ema víyahaini Isaías. ⁴¹ (Ema profetaini Isaías, tíramecahi eta máimairahi te mavapure eta táetavisiraya eta majaraiva ema Cristo, éta eta masantuvahi eta te máejasihahi.)

⁴² Nararihiserá ena aquenucarahana tinerejicavanaripahi ena tisuapanahi. Váhisera návarahahini náimerecavahini eta náehisirahi, napsirahi nacaquijihini eta te návacureana. ⁴³ Taicha étachucha náuricahi eta nacunchacarevahi nayehe ena nachamuriana, ena fariséona. Tasapihaichucha náepuruhi eta nacunchacarevayarehini me Viya.

Tímicuñarahi te vahi visuapa eta máechajiruvana ema Jesús

⁴⁴ Ema Jesús tijaranupa eta máechajisiravacahi ena achaneana. Máichavacapa:

—Nácani navarahahi tisuapanuana, tímaticareanaripa eta nasuapirahivare ema Tata, ema tivanecanuhi. ⁴⁵ Tacutiquene nácani tímatinuanahi eta nímiturapiana, náimatipahivare eta mapanereruana ema Tata. ⁴⁶ Taicha núti yátupiquenénuhi eta numicauchiravacahi ena téhicanuanahi te juca apaquehe. Váipasera tavehaimahi eta timapicu. ⁴⁷⁻⁴⁸ Tacutiquene núti, vahi étaina táimitecanuhini te juca apaquehe eta nícuñacahéhini eti achaneana. Eta tímitecanuhi, nucuchuhaheyarehi. Nácanisera nasamairicaripahínipuca eta néchajiruvana, váhisera nasuapanuhini, nasapiha tépurunuanahi, muracayarehi eta náicuñayare. Eta náepuruirahi eta néchajiruvana, étaripa tivichavacainapa te jena sácheyare nacayaseserehipa te mamirahu ema Viya. ⁴⁹ Taicha vahi nútijiruvainahini eta nímituresirahi. Ema Tata tivanecanuhi, éma tijaranuahi eta nímiturapianayarehi. ⁵⁰ Eta tacahe, numetacahehi puiti tamatu eta numetacasionahi. Vahi nuhapicaímahi, taicha nímatihi tacaitarecayarehi nácani tisuapanahi eta máimiturapiana ema Tata —macahepa.

¹ Tiuri, te jena sácheanahi tamirahupaipahi eta Pascua, ema Jesús máecharipa táitecapauchayarepa eta majunijisirayarehi eta juca apaquehe. Tiyanayarepa mayehe ema Maiya. Tétavicavahi eta máemunasirahavihi viti máimitureana. ²⁻⁴ Jéhesare ema Júlasí, máimipanerecharipa ema Váinaraji eta máijararesirayarehi ema Jesús. Émasera ema Jesús, máecharipa eta machavi-rayarepa mayehe ema Maiya taicha eta másinehi. Émarichuhi ema Maiya tjaracahi eta tamutuirayarehi máituruequeneha. Tacahe, te jena yati, eta máenisirahavihi viti máimitureana, téchepucapa ema Jesús. Tivejamuhia-cavapa eta mamuiríha. Tiáyuruñequechavapa te mayehe paño. ⁵ Tásiha, majucuhapa eta une te bañadora. Tépanavapa tisipapevachahavihi eta vívapeana viti máimitureana. Mavehavarepa eta paño, tiájapevachahavipa.

⁶ Tásiha, te macapayacapa ema Pedro, éma vahi máisapavahini eta masipapevachira eta máivape. Máichapa:

—Tata maestro, vahi táurica eta pisipapevachiranuhini núti —macahepa.

⁷ Tásiha, ema Jesús majicapapa:

—Páuresamivíhi píti. Vuíchaha picaicutiarahini eta tacayemaqueneanahi eta juca. Achichuinapasera picaicutiarainapa.

⁸ Ema Pedro máichavarepa:

—Nútisera, vahi pisipapevachanuimahi.

Ema Jesús máichavarepa:

—Te vahi nucusipapevachavi, vaipa pítiparacaimahi eta nuyehe.

⁹ Tacahe, ema Pedro máichapa:

—Tata, vahi tácarichuimahi pisipaca eta nívapeana. Énerichuvare eta nuvahuana étapa juca nuchuti.

¹⁰ Tásiha, máichavarepa ema Jesús:

—Nácani nacaviravahi vahi tácomesaimahi tiápechavana ticasipana. Tacarichu ticasipayarehi eta náivapeana. Éti, epachihavacaripa; váhisera ámutuhini epachihahini —máichapa.

¹¹ Ema Jesús máichahavihi eta juca vahi vámutuhini vipachihahini taicha máimatíhi ema tjararecayarehi.

¹² Te títavapa eta masipapevachirahavihi, ticamuirihavarepa eta mamuiríha. Tásiha, téjacapa te mesa. Máichahavipa:

—¿Ímatiequenehapuca éti eta juca níchirahehi? ¹³ Eti ímijarechanu “Tata Maestro”. Étipicahisera, taicha yátupiquenénuhi eta numaestruvahi. ¹⁴ Eta níchirahehi núti emaestro nusipapevachirahehi, ene ecaheyare éti eta ítare-siraya. Esipapevachacayare eta ívapeana. ¹⁵ Éhicayare eta juca níchaquenehi. Étayareichu eta nímitusirahehi. ¹⁶ Nutupiruva numetacahe: Ema musu vahi macachuricaimahi ema máquenu. Émaripa ema vanairucahi váhivare macachuricaimahi ema tivanecahi. ¹⁷ Te yátupina ecaravahuinapa eta juca nímiturapiana, tájina íchiravaimahi. Ecunachacareyareva eta ítauchiraya tamutu.

¹⁸ Néchahinéni núti vahi ámutuhini esuapanu. Nímatíhehivare eti yátupiqueneana nunerejiruanahi. Títauchavayarehisera eta táechajiriruvahi eta Sagrada Escritura, ani tacahehi: “Ema néniruasahi, masapíhahi ticitiana-canuhi”. ¹⁹ Puiti nucaínapucava numetacahe apaesa te táitauchavapa eta juca numetarapi, ímatinuinapa nuti yátupiquenénuhi Cristo. ²⁰ Nutupiruva numetacahe: Nácani tijacapaheanayare éti nuvaneruana, ticaecheranahi

eta najacapiraniuhi núti apana. Énerichuvare, najacpahivare ema Tata Nucaiya quene.

Emá Jesús máechajisihá eta májjararesirayare ema Júlasí
(Mt 26.20-25; Mr 14.17-21; Lc 22.21-23)

²¹ Te titapiricapa eta máichirahavihi ema Jesús, téñamavaipa te masamure eta májjararesirayarehi ema émana vichamurihi. Tacahe, matupiruvapa máichahavihi:

—Nutupiruva numetacahe: Mararihi ani te etaracu ema tíjararecanuyare —macahepa.

²² Tacahe, viáramecarinehi eta máichirahavihi. Véseniuquijiricacapa. Vahi vímatihini nájahahipuca ema máichaquenehi. ²³ Nutiarihisera nuti nachamuri máemunarupananuhi ema Jesús. Nucachacayahi éma eta véjasirahi te mesa.

²⁴ Tacahe, ema Pedro tíumatsiuquichanupa nuyaserecáhini nájahahipuca ema máichaquenehi ema Jesús. ²⁵ Tásiha, núti nujajaicapa ema Jesús:

—Tata, ¿nájahasica ema píchahi?

²⁶ Tásiha, tíjicapanupa:

—Nuyuvetumecaya eta pan, néchipejicaya. Ema níjararuyare, émara ema tíjararecanuyare —macahepa.

Tacahe, máechipejicapa eta pan, májjaracapa ema Júlasí. ²⁷ Jéhesaréinehi, ema Váinaraji enevanepa mávahácáhi éma. Tásiha, ema Jesús máichavanepa:

—Júlasí, eta juca pipanereruhi, táitachavavanepa puítinaichu —máichapa.

²⁸ Váhisera vácautiarahini eta juca máichirahi ema Jesús ema Júlasí. ²⁹ Vímjachahichucha eta mavacharesirayarehivare eta tinicacare tayeheyare eta piesta, mácajihivarepucaini ena páureana, taicha émahí técha eta tarera máunasirarehi eta plata eta matesorerovahi. ³⁰ Te títanésipa ema Júlasí eta manisirahi eta pan, tiyanapa tíuchuchahi. Tíjunijicahavipa te jena yátiquenehi.

Emá Jesús macavanairipípa eta vémunasiracacayare

³¹ Eta máuchusiraípa ema Júlasí eta viyehe, ema Jesús máichahavípa:

—Títecapapa puiti eta táitachiravayare ímahainapa éti eta máitupajijiasirava ema Viya étapa eta nítupajijiasiravayare núti Manerejirunuhi éma. Éti ecunachahavinapa. ³² Nímerecainapa eta máitupajijiasiravahi ema Tata, ema apana máimerecayareva eta nítupajijiasiravahi nuti Machicha. Puiti juca sácheanayare títauchavainapa. ³³ Nuchichanaveana, ánipirine eta juca ecachaneranyare. Tásiha, nuyanainapa. Éti, etanucanuinapa; vuíchahasera ítuji-cavaimahi ecapayacanu. Étarichuhi eta numetarapihi nayehe ena ticatiana-canuana eta níchiravacáhi vahi títujicavanaimahi ticapayacanuana. ³⁴ Puiti nunaquicayare eta juca arairu nuvanairipi eta eyehe. Émunacacayarehi ena echamuriana. Ecutinuyarehi eta némunasiráhehi núti. Ene ecaheyare éti apanavare. ³⁵ Te yátupina émunacaca, eta tímatiacáheanayare ena achaneana étirahi eti nímitureanahi —máichahavípa.

Emá Jesús máimereucha ema Pedro eta máepiyasiravaya vahi máimati ema Jesús

(Mt 26.31-35; Mr 14.27-31; Lc 22.31-34)

³⁶ Tásiha, ema Pedro mayaserecapa:

—Tata Maestro, ¿távihainapa picaijuheya?

Emá Jesús majicapavarepa:

—Eta nucaijuheya puiti, éti vuíchaha ítujicavaimahi éhicanu. Ecapayacanu-yaresera. Váhivare ánasimahi éti. Vuíchahasera tǵahúchavaimahi —máichapa.

³⁷ Ema Pedro majicapavarepa:

—¿Tájaha tacuichavaini vahi nucuratahahini néhicavi, Tata? Núti níjaracava népena píchavenénahi píti —máichapa.

³⁸ Tacahe, ema Jesús máichapa:

—Píti, pímijachavapuca píjaracava pépena eta picatiuchiranuya. Numetacavisera: Puiti juca yati, te tamirahuinarichaha eta táechajisiraya eta varayu te tijararahi, píti mapaheyare pépiyacavayare vahi pímatinu, eta picatiuchiravayarehi píti —máichapa.

14

Ema Jesús, jéhevare éma téhicacare eta vítecapiraya me Viya

¹ Vahi ecueñamava éti. Ácasiñava eta me Viya; ácasiñavavare eta nuyehe.

² Taicha ánaqui te mávasa ema Tata, camuri eta tiáviravacare iávihayare éti, taicha ícuchihi éti. Tacahe, tatuparacahi nuyanayare nétupiricayare eta iávihayare. ³ Te táuripa eta iávihayare, nútijapainavarepa nuchavainapa népanahénapa apaesa ácchanenu éti tayehe eta návihayare núti. ⁴ Eti ímatiripa eta nucaijuheya. Ímatipahivare eta achene nuyanihayare.

⁵ Tásiha, ema Tomás majicapapa:

—Tata, váhira vímati távihapuca eta picaijuheyare; váhivare vímati eta achene piyanihayare —macahepa.

⁶ Ema Jesús majicapavarepa:

—Nútira néhicacare. Nútirichuva nuti yátupiquenénuhi. Nútivare nucaitarerahi, nájina apanaina ácasiñaimahi eta ítecapirayare me Tata. ⁷ Eta ímatiranuipa núti, ímatiripahivare ema Tata, taicha ímahanuripa puiti eta juca nucachanérahehi —macahepa.

⁸ Ema Felipe máichapa:

—Tata, pímechahavipaini ema Viya apaesa viúrisamurepaini eta vímatirainahini.

⁹ Ema Jesús majicapavarepa:

—Ánaquiaparipa eta picachaneranuhi, piti Felipe, vuíchahacaruvare pímatinu. Eti ímahanuripahi, ímatinuipavare yátupihi. Tímicutijiricavaipahi émainahini ímararachahini ema Tata. ¿Tájaha tacayema pivarahaichahavare nímechavi ema Tata? ¹⁰ ¿Váhipuca pisuapanuhi eta mávahásiranuhi ema Tata, tásiha, étapa eta návahásirahivare núti apanava? Eta juca nucayemaqueneanahi, vahi nuvehaqueneanaina te nuchuti. Étara eta mávahásiranuhi ema Tata, títauchavahi eta mavarahaqueneanahi.

¹¹ Esuapanu eta návahásirahi núti ema Tata, étapa eta mávahásiranuhivare éma. Te vuíchahapuca esuapanuhini eta numetarapi, étavanerécainaséra esuapa eta tiáramicareanahi níchaqueneanahi. ¹² Nutupiruva numetacahe: Nuyanainapa eta me Tata. Eta tacahe, éti yátupi eta esuapiranuhi, nítsivahe éti. Níjaracahe eta eratahairaya ecuchuca eta tiáramicareana, ecutinuyare. Níjaracahevare eta eratahairaya ímitupirucha eta náchanevana ena achaneana. Jéhesare, eta juca tiápajupanavayare eta tacunachacareva tayehe eta tiáramicareana íchaqueneanayare. ¹³⁻¹⁴ Núti níjaracaheyaeva tamutu jácani eyasearunuanayare te níjare, taicha nuvaraha ichape eta ecunachirayare ema Tata.

Emá Jesús macametarapi eta mácupaisiraya emá Espíritu Santo

¹⁵ Eta esuapiranuhi tímereuchaheya eta yátupirahi eta émunasiranuhi. ¹⁶ Tásiha, núti nuyaseacainapa emá Tata máevataca emá Espíritu Santo. Éma, tímícatacaheyare, ticurisamurechaheyareva. Yátupiquenevare eta mávahásiraheyare eta ítaresirayare. Vahi tinajiacahémahi. ¹⁷ Éma, tímítucaheyare, máitametacayare tamutu eta yátupiqueneanahi tásihaqueneana eta me Tata. Énaserá ena achaneana, vahi ticaijaracasianaimahi, taicha vahi návarahahini najacpahini éma. Eta namaratahairahi náimaha éma, náimijachahi vahi máimaticarehíni éma. Étiserá ímatiyare éma, taicha máitavacayare eta mávahásiraheyare. ¹⁸ Núti, váhivare nujunijiacahémahi. Nuchavayare eyehe, ecachanenuyareva. ¹⁹ Puiti juca sácheanayare, ena achaneana vaipa tímahanuparacaya, taicha nuchavayarehi nítareca. Éti apanavare ítarecayareva nícha núti. ²⁰ Te nuchavapa nítareca, échavainapa éti eta mávahásiranuhi emá Tata, échavainavarepa eta návahásirahevare núti, éti apana ívahácanuhivare. ²¹ Nácani náimatiyare eta nuvanairipiana, náitauchayareva, éta tímicaecherachayare eta yátupíhi eta náemunasiranuhi. Tásiha, íchapeyare eta namunavayare me Tata táichavenénahi eta náemunasiranuhi. Núti apanavare íchapeyareva eta némunasiravacayare. Tásiha, nímercavayareva nayehe —macahepa.

²² Emá Tadeo máichapa:

—¿Táicharacavayare, Tata, eta vicarichuirayare pímerécava eta viyehe; tásiha, ena apamuriana achaneana, vaipa tímahavianaimahi? —macahepa.

²³ Tacahe, emá Jesús majicapapa:

—Nácani témunacanuanayare, nasuapayare eta nuvanairipianahi. Tásiha, emá Tata, tétavicavayarehi eta máemunasiravacaya. Tásiha, vítijapainapa viávahácavacayare éna. ²⁴ Nácaniserá vahi témunacanuanaimahi, váhivare nasuapaimahi eta nuvanairipiana. Eta juca esamaqueneanahi puiti, vahi tásihaquenenahini te nuchuti. Tásihaquenehi me Tata, emá tivanecanuhi.

²⁵ Nucamapurava numetacahe puiti taicha ánipirine eta juca nucayare eta eyehe. ²⁶ Émasera emá Espíritu Santo mavaneruyare emá Tata níchavenénahi núti, emá tímícatacaheyare, ticurisamurechaheyareva. Énerichu tímítucaheyare, témechaheyare tamutu eta juca numetarapiana eyehe.

²⁷ Puiti nucametavaya eta eyehe. Nuvarahasera tacuijahini íchiravainahini, ecanarasiraina eta epanereruana. Núti vahi nácutinuhini ena apamuriana achaneana eta nujunijisiraheya. Vahi ecuvayuchava eta éñamavairaina. Váhivare ecupica. ²⁸ Puiti numetacaheripa eta nuyanirayare; tásiha, étapa eta nuchavirayare eta eyehe. Eta tacahe, te yátupina émunacanu, evapinavayarehi nuyehe núti eta nuchavirainapa mayehe emá Tata, nápechavaya nuachane éma tayehe eta máetaviuchirahí eta majaraivahi étapa eta máitupajjiasirava. ²⁹ Nucametarapivane eta juca, apaesa te ímaha táitauchavapa, esuapainapa yátupi.

³⁰ Ánipirine puiti eta juca néchajirisiravahi eta eyehe taicha ávanepaipa títecapa emá Váinaraji eta mavarairahi tíaquipaicanuyare. Éma, yátupíhi táquenuhi eta juca apaquehe. Váhiquenesera tíhacanuimahi núti. ³¹ Nuvarahasera náimatiya ena achaneana eta némunasirahi yátupi emá Tata; tásiha,

nítauchaparacahi tamutu eta mavanairipiana. Échepuca. Viyana viyejecava eta te juca —máichahavipa.

15

Eta táenaqui eta uva étapa eta tasimutuquene eta tatavavajiana

¹ Núti nucutihi eta sucureca uva. Étiripa éti ecuti eta tatavana. Ema ticachichanu tímicutijiricavahi ema tijaneacahi eta sucureca. ² Éma máechuca eta máhíriquerahi tatava. Máepachiacavare eta apana tatava eta ticahirisi apaesa tacahipana. ³ Eti epachihavacaipahi taicha eta nímiturapiana emeta-casivanahi. ⁴ Eta tacahe, ímiyanavayare eta iúrujasiranuyare taicha eta návahásirahehi núti, apaesa ácuti eta tatava ticahíríqui. Taicha te viyuvetuca eta tatava eta uva, vaipa ticahimahi. Ene ecahehi éti, te vahi ecuimiyana va iúrujiacanu, tájina vaipa ecaemataneacanuimahi.

⁵ Nápechava nímicutichinahe puiti. Núti nucutihi eta táenaquihi. Éti tímicutijiricavahi nutavahehi. Te ímiyanava iúrujiacanu, ichapemuriyarehi eta ecaemataneasiranuya. Téhesera ácarichu éti, tájina eratahaquenémahi ícha. ⁶ Nácani tijunijiacuanayare, ticutianayare te ticaechu eta tatava. Tiájiquiyarehi. Tásiha, nacurujicainapa, náijuchainapa te yucu.

⁷ Ímiyanava yátupina eta iúrujasiranu. Yátupinavare eta ítauchiraina eta nímiturapiana. Tásiha, te eyaseacanupuca jácani evarahaqueneanahi, núti níjaracaheya. ⁸ Nuvaraha ímerezavaya eta táurivayare eta ecaemataneasiranu, apaesa tétavacavainapa eta macunachacarevaya ema Tata. Tásiha, ecaecheraipahi eta yátupirahi nímiturehe. ⁹ Ímiyanava eta iávahásiranu taicha tétavacavahi eta némunasirahehi tacuti eta máemunasinuhi ema Tata. ¹⁰ Eta ímiyanírava ítauchapaipa eta nuvanairipiana, tijurucapaipa eta ímatirahi eta némunasirahehi. Tacuti eta nítauchirahi núti eta mavanairipiana ema Tata, nímatipaipa eta máemunasinuhi éma. ¹¹ Eta juca nímicutiarachirahi, nuvaraha íápajuca eta iúrisamurevahi tásihaquenehi eta iávahásiranuhi núti. Ecutinuya eta núrísamurevahi. ¹² Nápechahe numetacahe eta juca nuvanairipi eta eyehe: Yátupina eta émunasiracacaina. Ácutinu eta némunasirahehi núti. ¹³ Ena achaneana, te navarahahi náimercaya eta námunasirahi nácani námunaruanahi, natanucayarehi nájaracasicha. Nácani tíjararecavanapuca eta náepenirahi énavenehi ena námunacasareana, éna yátupíhi náimereca eta námunasirahi. Ene nucahehi núti, níjararecavayare eta népeniraya íchavene eti námunacasareanahi. ¹⁴ Jéhevare, éti yátupiquenehi námunacasareanahi, eta ítauchirahi eta nuvanairipianahi. ¹⁵ Vahi vánarachéna nuyehé, taicha ena vanaracanahehi vahi náimatimahi eta mapanereruanahi ema náquenu. Étísera námunacasareanahi. Eta tacahe, numetacahe tamutu eta mapaneruana ema Tata. ¹⁶ Vahi étinahini enerejicanuhini eta éhisiranuhi. Núti nunerejicahehi. Puiti nutuparacahe, nuvaraha táuri eta ecaemataneasiranu eta epáisiraya eta ecametarairuirayare. Nuvaraha ecajimuyacahini ena achaneana náehicanuhini. Yátupina eta ímitusiraina apaesa náimiyana eta náehisiranuhi. Tásiha, ema Tata tíjaracaheyare tamutu eta eyasearuanayare te níjare. ¹⁷ Nuvaraha ítaucha eta juca nuvanairipiana. Yátupina émunacaca.

Ena achaneana ticitianacaheanayare tacutiya eta nacatiasiranuhi núti

¹⁸ Puiti numetacahevare, te nacatianacahe ena achaneana, échavayare éti vahi étinahini nacatianaca. Núti nacatianacahi. ¹⁹ Taicha, te étainaichahini iávachahini eta tayeherepiana eta apaquehe, ena achaneana témunacaheanaripahini, tacutihini eta náemunajirisiracacahi éna. Étasera eta nunerejisi-rahehi te nataracu ena achaneana, éta^a tiviuchahehi eta nacatianasirahehi taicha ínjajicaipa eta máeperajiquene tayehe eta apaquehe. ²⁰ Échavavare eta juca numetaruhehi: “Vahi másapihaimahi ticaemunacasi ema musu mayehe ema máquenuhi”. Núti ticatianacuanahi; ene ecaheyarehi éti, eta nacatianasiraheyareva. Vahi nasuapahini eta nímiturapiana. Váhivare nasuapaimahi eta ímiturapiana éti apanava. ²¹ Eta éhisiranuhi núti, étaripa tiviuchaheyare tamutu eta juca nacatianasiraheinapa táichavenehi vahi náimatihini ema Tata tivanecanuhi.

²² Tacuijarichuhipucaini naviurevainahini éna, te vahi nucuitechahini eta nímitusiravacahini. Tépurunuanahiséra, náepuruhivare eta nímiturapiana; tásiha, tétavicavahi eta naviurevanahi. ²³ Taicha nácani ticaticahuanahi núti, nacatianacahivare ema Tata. ²⁴ Énerichuvare tacuijahini taviuchavacahini te vahi nucuimerecchahini eta tiáramicareana níchaqueneanahi. Mamaratahaquenehi máichahini mácani apana achane tacutihini eta níchaqueneanahi núti. Étasera náimaharipahi, váhiquenesera nasuapahini. Nasapiha ticatianacuanarichucha, nacatianacahivare ema Tata. ²⁵ Étasera tacaheyarehi eta táitauchiravayarehi eta táechajiriruvana eta Sagrada Escritura te Salmo, aní tacahehi: “Tájina taviuchanuhini eta nacatianasiranuhi”.

²⁶ Étisera, mararihiyare ema tímícatacaheyare, ticurisamurechaheyareva. Te nítecapauchayarepa ema Tata, nuyaseacaya mavaneca ema Espíritu Santo. Éma, te máitecapapa, tímereuchaheyare eta yátupiqueneana. Tímereuchanuyareva núti eta eyehe. ²⁷ Éti apanavare ímereuchanuyareva taicha tiyereripahi eta ecachaneranuhi, tépanavapa te nunérejicahéna.

16

¹ Núti numetacahe eta juca apaesa vahi ecuarani eta nacatianasirahe, váhivare ecuínajicava eta éhisiranuhi. ² Taicha tiáquijicaheanayare tayehe eta viúrujisirarevana. Énerichuvare navarahayare ticapacaheana. Éna, náimijachayarehi tiúriyarehi eta náichirayare te mamirahu ema Viya. ³ Éna, náichayare eta juca táichavene eta namáimatirahi ema Tata, váhivare náimatinuhini núti. ⁴ Numetacahe eta juca apaesa te táitecapapa eta íchavaquenevaya, vaipa ecuarameca. Échainapa eta numetasirahehi.

Ema Espíritu Santo tímícatacahavihi

⁵ Puiti tiánehinapa eta nuyaniraya nuchava eta me Tata. Eta nucachaneirahehi, ticatianacuanahi núti ena achaneana. Puítisera eta májínairanuyare, ticatianacaheanainapa éti. Eta juca tacahehi, nupaenumava numetacahehi puiti. Étisera németeaca vuíchaha ecaicutiara eta numetarapi, taicha váhivare eyaserecanuhini eta nítametasirayare, étahinéni eta nucaijuehaye. ⁶ Esapiha éti ecatisamurevahi taicha eta juca numetasirahehi eta nuyaniraya. ⁷ Tayanapane vahi eyaserecanuhini, nutupiruvasea numetacahe: Tatuparacahi eta nuyaniraya nuchava mayehe ema Tata, taicha te vahi nucuyana, vahi títecaimahi ema nuvanerya. Éma tiúrichaheyare, tímícatacaheyare, ticurisamurechaheyareva. ⁸ Énerichuvare ena achaneana

te juca apaquehe, manacasamurechaya eta nacatuparahairahi náichayarehi eta táuriqueneana, náehicanuvare núti. Manacasamurechavacayareva éna eta náimatiraina eta nasipecuraravahi. Taicha te vahi nacubaraha náinajica eta tauriqueneana, téhevere vahi nacubaraha náehicanu núti, ticaicunainapa te yucu. ⁹⁻¹⁰ Ema Espiritu Santo manacasamurechavacayare ena achaneana eta najacapacarevaya me Tata nácani ticasifanapuca eta nuyehé, taicha nuyanaya eta me Tata, néchajuchavacayare éna. (Vaipa ímahanuimahi éti.) Nácanisera vahi nasuapanuhini núti, tanasiquenehi eta napecaturanahi. ¹¹ Manacasamurechavacayareva ema Espiritu Santo eta yátupina táiturevayare éna eta máicuñayare ema Váinaraji náehiruhi te juca apaquehe. Éna apanava náepujuquichainapa tayehe eta yucu infierno.

¹² Maverachahaneni eta juca nuvarahaqueneanahi numetacahe. Váhisera eratahaimahi eacutiara puiti. ¹³ Téhesera máitecapapa ema Espiritu Santo, éma tiámayarepahi eta yátupiqueneana numaimiturehanarichaha, émainapa túmitucaheyare. Taicha mametacasivahi eta máechajisiraheyare, énerichuvare timetacaheyareva eta íchavaquenévanyare. ¹⁴ Ichapenapa eta nucunachacarevayare máicha. Émainapa timetacaheyare eta nuvanairipianayarehi eyehe. ¹⁵ Taicha ema Tata tituparacanuhi eta nútirayarehi nécha tamutu. Eta tacahe, eta juca mametarapianayare ema Espiritu Santo tásihaqueneanayare nuyehé.

Vahi tánasimahi ecatisamureva. Tichavayare eta iúrisamurevaya

¹⁶ Ánipiyareichusera eta emaimairanuyare. Téhesera táequenénapa, iápechavainavarepa ímahanuyare. Taicha nuyanayarepa te mávihahi ema Tata.

¹⁷⁻¹⁸ Tacahe ena apamuriana nuchamuriana tiyaserecanuana:

—¿Tájahapuca tacayema eta juca mametarapihi, eta macahehi ánipirine eta vimaimairayare, tásiha, te táequenénapa víápechavainavarepa vímaha? ¿Tichavavanepuca eta mayanirayare eta me Maiya? ¿Váhipuca mánasimahi eta machaviraya? Váipavare vácacutiara eta ánipirine eta macaheyare eta viyehé —nacahepa.

¹⁹ Ema Jesús macacutiavacahi eta navarairahi nayasereca. Máichavacapa:

—Núti numetacahehi eta ánipirine eta emaimairanuyare. Tásiha, te táequenénapa eta emaimairanuyare, iápechavainavarepa ímahanuya. Eta juca emacacutiaraqenehi. ²⁰ Tásiha puiti, nutupiruva numetacahe eta íyahairainasamipa éti, ejanuvairayareva. Énasera ena apamuriana achaneana, tiúrisamureanainapa éna. Tásihasera te táequenénapa, vaipa íyahaimahi. Tétavicasera eta iúrisamurevainapa eta táitsivaya. ²¹ Eta juca túmicutijiricavahi te tínacayare esu esena. Ánipichuhi eta sucatiruhavahi taicha eta suínasirayarehi. Téhesera te tamutupa eta suínasirahi, suémítiscainapa eta sucatiruhavainihi. Tiúrisamuréinapa eta suímairahi eta suchicha, tajurusirayarehi te juca apaquehe. ²² Ene ecaheya éti, ecatisamurehi puiti, ánipirichusera. Téhesera te víápechava vímahacacaya, tétavacava eta iúrisamurevaya. Nájinainavarepa tihapapicahémahi eta iúrisamureva.

²³ Te jena sáchevare, vahi nútimahi eyaserecanu. Émasera ema Tata eyaserecayarehi. Éma, tíjaracaheyarehi tamutu jácani eyasearuanayare te níjare. ²⁴ Púiticha tájinaichaha eyasearapinahini me Tata te níjare. Ticamunucarehi eyaseacayare. Éma tíjaracahénapa. Étainapa ticurismurerecaheyare ichape.

Numetacahe eta nucapaquechiravacayare ena nánaranayare

²⁵ Núti nímicutichinahehi eta juca numetasirahehi. Téhesera te táequenénapa, nutupiruvainapa numetacaheyare eta yátupiqueneana mapanereruanahi ema Tata. ²⁶ Te jena sache, eyaseacainapa ema Tata te níjare. Váipayare tacamunuimahi nuyaseuchahe eta mayehe. ²⁷ Taicha émaripa ema Tata témunacahehi éti, táichavénehi eta émunasiranuhivare núti. Éti esuaparipa eta yátupirahi eta mavanesisranuhi ema Tata. Tíjaracahénavanepa eta eyasearuanayare. ²⁸ Núti, eta násihahi mayehe eta nítisirahi te juca apaquehe. Puítisera nujunijicainavarepa eta apaquehe, nuchavainavarepa mayehe ema Tata —máichahavipa.

²⁹ Tacahe, viti máimitureana víchapa:

—Jéhevare puiti pitupiruvapa eta péchajisihahi. Vaipa pímicutiara-chinahávihi. ³⁰ Vímativarepa eta yátupirahi pímatiequeneha tamutu. Jéhesare, pímatiequeneha tamutu eta vipanereruana, étaripa eta juca vivarairahi víyasecaviyare. Visuaparipa puiti eta yátupiquenévavihi Machichavi ema Viya —víchapa.

³¹ Tacahe, ema Jesús máichahavipa:

—Jéhepuca eta esuapiranu puiti. ³² Puítisera juca yati, títecapainapa eta éjanerepáisirayare éti. Ejunijicanuinapa, nucarichuinapa núti. Matiarihiyaresera ema Tata. Éma, ticachanenuyare. ³³ Numetacahevare tamutu eta juca apaesa vahi ecuarameca. Ácasiñava yátupina nuyehé apaesa tacuija ecuichiravaina, tayanapane ecatajivayare muraca te juca apaquehe. Ácasiñavahisera eta nuyehé, taicha núti májjarunuhi ema Tata eta nucapaque-murhairayare namutu ena nánaranahi —máichahavipa.

17*Eta mayujarasirahi ema Jesús, mayaseuchavacahi me Maiya eta náurivaina ena máimitureana*

¹ Te títapiricapa ema Jesús eta máechajisirahavihi viti máimitureana, tépanavapa tiyujaracahi. Máesenicapa te anuma. Ánipa macahe:

—Tata Nucaiyaquene, títecapauchanupa puiti eta táitauchiravayare eta pipanereruana. Nuvarahasera nuncachacaréni eta piyehe, tácutini eta nuncachiravihi píti. ² Yátupihí eta píjarasiranuhi eta aquenucairanuyare, te namirahu namutu ena achaneana. Nucaitairesirayahivare namutu ena píchuhaqueneanahi píjararunuanahi. ³ Níjaracayare eta náitaresirayare máíhecuaraquireyare ena píjararunuanayare apaesa náimativi, píti Tata yátupiquenévihí Viya, nútípa nútí Jesucristo, nútí pivanerunuhi te juca apaquehe. ⁴ Núti nímerecahi ne achaneana eta picunachacarevahi. Nítauchaipahi tamutu eta pivanairipianahi pivarahaquenehi níchayahéhi. ⁵ Puítisera nuchavainavarepa eta piyehe. Píjaracanuyare eta nuchavirayare te píjaraivahi. Néjacainavarepa te pívaure tayehe eta návinehi acane te tépanavainapa eta apaquehe.

⁶ Nítamuturucaripahi eta nímitusiravacahi ena píchuhaqueneanahi píjararunuanahi píti. Nímimatichavacahivare eta píúrivahi píti. Yátupihisera eta píchichanaveanahi éna, taicha nasuapahi eta nímiturapiana píjararunuanahi nútí. ⁷ Náecharipahi tamutu eta juca nímiturapiana tásihaqueneanahi piyehe.

⁸ Náecharipahivare eta yátupiquenévahi eta pivanesisranuhi. Eta tacahe, natupiruvahi najacapa eta nímitusiravacahi eta péchajiriruvana.

⁹ Eta tacahe, puiti nuyaseacavi, Tata, eta pijaneasiravacaina ena pįjararunuanahi téhicanuanahi, taicha pichaneranihi éna. Vahi éna ena nuyaseuchavaca ena masupajirairahanahi te juca apaquehe. ¹⁰ Núti néchahi eta piyehervacahi éna. Eta tacahe, néñamavahi eta nayehe, nuyehenaipahi éna. Yátupihí eta náimatiranuhi eta pivanerunuhi, tásiha ticunachuanuhi ichape.

¹¹ Puiti núti nujunjicavacainapa ena pįjararunua. Énaserá nanasiyarechaha te juca apaquehe. Nútisera nútijapainapa eta piyehe. Tata Nucaiyaquene, piti yátupiquenévihi eta pisantuvahi. Nuyaseacavi pijaneasinu-
vacachucha éna, apaesa náimiyavahi eta náurujiásiracacaina, návahási-
racacayare nácutihini eta viávahásiracacahi víti. ¹² Núti nímimaticavihi píti
eta nayehe, étapa eta pįjare, apaesa yátupina eta náehisiravina. Ichapemurihi
eta nujaneasiravacahi éna eta nucachaneravacaichaha. Eta tacahehi, vahi
náinajicavahini eta náehisirahavihi. Émanarichu ema téjecapavahi, ema tijara-
recanuyare. Étaserá tacaheyarehi eta tátauchiravayarehi eta Sagrada Escrit-
ura.

¹³ Puiti nútijapainapa, Tata, tayehe eta jara piávihahi. Eta nucachanerava-
caichaha éna, numetacavacahi eta pipanereruana, taicha nuvaraha vácuti-
cacahini eta viúrisamurevaina. ¹⁴ Taicha ena achaneana te juca apaquehe,
ichapemurihi eta nacatianasiravacahi táichavenehi eta najacapirahi eta
péchajiriruvana nímitusiravacahi. Éna, vaipa náehicahini eta tayeheana eta
juca apaquehe, ticutinuanaripahi núti eta numaehisirahi eta tayeheana
eta te juca apaquehe. ¹⁵ Vahi nuyaseacavi eta piviravacainahini te juca
apaquehe. Nuyaseacavi núti eta picatiuchiravacainahini mayehe ema
Váinaraji. ¹⁶ Taicha yátupihí éna vaipa tayeheanainahini eta juca apaquehe,
ticutinuanaripa núti vahi tayehenuinahini eta juca apaquehe. ¹⁷ Pįjaraca-
vacahini eta náurivainahini eta piyehe, náitusirainahini cápachi eta péchaji-
riruvana yátupiqueneana. ¹⁸ Píti pivanecanuhi nímiturecayarehi eta péchaji-
riruvana nayehe ena achaneana te juca apaquehe. Tásiha, núti nuvanecava-
cayareva ena nímitureana, náimituca ena apamuriana achaneana. ¹⁹ Puiti, eta
némunasiravacahi éna, nįjararecava núti, nítauchayare eta pivarahaquenehi.
Nuvaraha ene nácahehíni éna, yátupinahini náįjaracavahini eta nacaema-
taneasiraviyarehi. Yátupinahivaréni nasupa eta péchajiriruvana yátupi-
queneana.

²⁰ Váhivaresera nacarichuhi éna nuyaseuchavacahi eta piyehe. Énerichu
nuyaseuchavaca ena tisuapanayare eta táunavayare eta áñoana, ena tįjaca-
panayare eta péchajiriruvana. ²¹ Nuyaseacavivare váhini tacutivahini eta
náurujiásiracacayare éna. Pįjaracahivaréni, Tata, te nasamureana eta návahá-
sirahavinahini tácutihini eta viávahásiracacahi víti. Náurujiásirahavinavare
víti, apaesa ena achaneana te juca apaquehe náimatihini yátupina eta pivane-
siranuhi.

²² Núti nįjaracavacaipahi éna eta náitupajįiasiravacayarehi tamutuiray-
arehi narataha. Vicutihí víti eta tamutuíra virataha. Návahácacahini
éna, vácutihini víti eta viávahásiracacahi. ²³ Píti piávahácanuhi núti. Tásiha,
núti návahácavacahi éna apaesa yátupinahini éna étanainarichuyare eta
napanereruana, apaesa ena apamuriana achaneana te juca apaquehe
étainahini náimatiarainahini eta pivanesiranuhi, étapa eta pémunasiravacahi
ena nímitureana tacutihí eta pémunasiranuhi núti.

²⁴ Tata Nucaiyaquene, píti píjaracanuhi ena nani píchuhaqueneanahi. Nuyaseacavi puiti eta nucachaneravacainahini tayehe eta návihayare núti. Náimahahini eta nujaraíva píjararunuhi taicha eta pémunasiranuhi te tépanavainapa eta tacaepiyairahi eta apaquehe. ²⁵ Tata Nucaiyaquene, píti yátupiquenévihi eta pisantuvahi. Ena achaneana te juca apaquehe vahi náimativihini. Nútisera nímativihini. ²⁶ Ena nani píjararunuhi nímatichaviripahi. Tétavicavahi eta pémunasiranuhi. Tásiha, nuvaraha yátupina nasamava eta táetaviuchirahi eta pémunasiravacahi taicha éna tiávahácanuanahi núti.

18

Títecapanapa ena ticaratacanaya ema Jesús

(Mt 26.47-56; Mr 14.43-50; Lc 22.47-53)

¹ Te titápicapa ema Jesús eta mayujarasirahi, tianapa tiámamurihahavipa te apachara eta tatavarapi ticaijare Cedrón. Ánaqui tatiarihi eta huerta ticaijare Getsemani. Visiapapa tayehe. ² Tacahe, ema Júlasí máimatihí eta juca viávirarehi taicha ichapemurihi eta vicachanerahi ema Jesús tayehe eta huerta. ³ Tacahe, te jena yátiquenehi, títecapapa ema Júlasí. Mámamurihapaipahi ena oficialeana énapa ena camuriqueneanahi suntaruana romanoana, vanairucanahi éna nayehe ena tuparairucana, taicha napamicavacahi ena fariséoana. Ticamicahuanapaipahi. Ticaepuchiriquianapaipa, étapa eta nayehe espada. ⁴ Émasera ema Jesús máecharipa eta nacaratasirayarehi. Tacahe, mácapavacapa éna. Máichavacapa:

—¿Nájaha etánuca?

⁵ Ena najicapapa:

—Ema Jesús Nazareno vitanucapahi.

Éma máichavarepa:

—Nútira etánurepahi.

Ema Júlasí mapauchapa, máetserarecapa. Tásiha, titupihachaha te machacaya. ⁶ Eta majicapirahi ema Jesús, máichirahi: “Nútira etánurepahi”, tiáquipaimuriavnapa ena suntaruana te apaquehe. ⁷ Tásiha, mayaserecavarepa ema Jesús:

—¿Nájaha ema etánucapahi?

—Ema Jesús Nazareno —najicapavarepa.

⁸ Éma, máichavarepa:

—Cápachi numetacaheripahi nútihira etánurepahi. Te nútichucha etánucapahí, ísapayare nayana ena nani —máichavacapa.

⁹ Étaapichuhi eta máechajiriruvahi ema Jesús te tiyujaracaipa nájina émanainahini náemiticahini te namuri ena májararuanahi ema Maiya. ¹⁰ Tacahe, ema Pedro, tatiarihihi eta mayehe espada te mañahe. Mavehapa, máechuchacachapa eta machaca te vaure ema achane ticaijare Malco, mavanarahi ema aquenuca Caifás. ¹¹ Émasera ema Jesús macahepa:

—Pinaca te tatumaramuhi eta piyehe espada. Vahi pihapapicaimahi eta táitauchiravaya eta mavarahaquenehi ema Tata, taicha nutuparahaichuhi mayehe eta juca nucatajivairaya —macahepa.

Nacaratacapa ema Jesús, námapa te mamirahu ema corregidor

(Mt 26.57-58; Mr 14.53-54; Lc 22.54)

¹² Tacahe, ena suntaruana émapa ema comandante nacaratacapa ema Jesús, náitijivauchapa. ¹³ Tiyananapa námapa te mapena ema Anás.

Étarichu mapena ema Caifás, taicha ema maca Anás máimachucahi ema Caifás, émapasera tugarairucahi te jena áñohe máitsivaequenehi ema máimachuca. ¹⁴ Ema maca Caifás, émarichuvare ticaechajiriruvahi eta máepenirainahini ema émana achane tivachachayarehi eta náitaresirana namutu ena achaneana.

*Éma Pedro tépiyacavapa vahi máimati ema Jesús
(Mt 26.69-70; Mr 14.66-68; Lc 22.55-57)*

¹⁵ Ema Pedro, nútipa nuti Juan viyanapa véhiequenehapaipa ema Jesús. Nusiapapa nútite te tajuhe eta canchón mapenahi ema aquenuca Anás, taicha náimaticasarenuhi ena mavanarana. ¹⁶ Émasera ema Pedro manasipa te aneca te tapajachacaya. Tásiha, néchajiacapa esu vanaracahi téchahi eta tapaja, sucasiapahini ema Pedro. ¹⁷ Tásiha, esu suyaserecapa ema Pedro, ánipa suicha:

—¿Pítirichu jácani apanava nímiture eñi ñica Jesús?

Éma Pedro majicapapa:

—Vahi nútina.

¹⁸ Tásiha, eta jena yátiquenehi táetaviuchahi eta tacasaraivahi. Ena mavanaranahi ema Anás, énapa ena suntaruana ticamururecanapa eta yucu, násasiavayarehi. Eta náurujiarasiraipahi eta yucu, titupihapavare ema Pedro te nachacaya, másasiavahivare.

*Ticayaserehipa ema Jesús te mamirahu ema Anás
(Mt 26.59-66; Mr 14.55-64; Lc 22.66-71)*

¹⁹ Tacahe, ema Anás mayaserecapa ema Jesús áyananapuca ena téhicanahi éma, tájahahivarepuca eta máimiturapihi eta nayehe. ²⁰ Ema Jesús majicapapa, ánipa macahe:

—Núti vahi nuyumurucavahini eta nímituresirahi. Nímerecavahi te namuri namutu ena achaneana te viúrujisirarevana, étapa te Templo. Éta nímituresirareanahi. ²¹ ¿Tájaha tacayema piyaserecanu nútite? Piyaserecapaini ena tisamararacuanahi. Énaina nametacavi eta nímiturapianahi nútite —macahepa.

²² Matiarihihini ema émana suntaru te machacaya. Eta masamirahi eta máechajiriruvahi ema Jesús, máehamirahapa éma. Tásiha, máichapa:

—¿Tájaha tacayema tíñemahi eta pijicapirahi ema aquenuca macapichaquenehi? —máichapa.

²³ Tacahe, ema Jesús majicapapa:

—Váhira táíñemahihini eta nujicapirahi ema aquenuca eta taviuchanuhini. ¿Tájaha tacayema péhanu? —macahepa.

²⁴ Tacahe, ema Anás máevatacapa mayehe ema Caifás, émarichuhi correjidor. Ticaitihapaipahi eta námirapahi éma.

*Éma Pedro tíapechavavare tépiyacava vahi máimati ema Jesús
(Mt 26.71-75; Mr 14.69-72; Lc 22.58-62)*

²⁵ Tacahe, ema Pedro manasirichuhi titupihahi te tachacaya eta yucu, tiásacavahi éma. Nayaserecavarepa nápechahi:

—¿Pítirichu jácani máimiture ema maca achane? —náichapa.

Éma Pedro majicapapa:

—Vahi nútina —macahepa.

²⁶ Tásiha, matiarihihivare titupihahi ema mavanarahi ema aquenuca, macheji ema máechaticacaruhi ema Pedro. Tacahe, éma téchajicapa, máichapa:

—Núti németeaca nímahavihi picachanehi éma tayehe eta huerta te vicarasinehi ema maca —máichapa.

²⁷ Émasera ema Pedro macahevarepa:

—Váhiquene nímati éma —macahepa.

Tásiha, enurujipa téchajicanecha eta varayu.

Emá Jesús námápa te mamirahu ema Pilato

(Mt 27.1-2, 11-14; Mr 15.1-5; Lc 23.1-5)

²⁸ Te jena yáticarahi, te tijararaha, nacuchucapa ema Jesús te mapena ema Caifás. Námápa tayehe eta palacio mávihahi ema Pilato. Váipasera nasiapahini ena tuparairucana. Náimichuhahi ema Pilato. Nanasipa te aneca, namavarairahi náechipejicavahini eta nanisirayarehi eta cordero pascual te jena sache. ²⁹ Tacahe, ema Pilato tiúchucapa, máechajimurihapa éna. Máichavacapa:

—¿Tájaha eta maviurevahi ema maca achane íamaquenepahi eta ani nuyehe? —macahepa ema Pilato.

³⁰ Éna najicapapa:

—Jucarihi eta maviurevahi. Eta tacahe, viámápaahi eta piyehe.

³¹ Tásiha, ema Pilato, máichavacapa:

—Eyana iama. Étina ícuñaca ema maca, taicha jararihi eta eyeherepichuhi eti israelítana —máichapa.

Éna najicapapa:

—Étaseva víti, vaipa ísapahavihini vítaucha eta viyeherepi vímicapaca mácani ticaviurevahi, vitupisica te márijahi. Émasera ema maca vivaraha máepena. Vivaraha pémetatacaini te crusu —nacahepa.

³² Tacahehi eta táitauchiravapaipa tamutu eta máechajiriruvanapahi ema Jesús eta máepenirayarehi te crusu.

³³ Tisiapavarepa ema Pilato te tajuhe. Máichuhapa ema Jesús. Tacahe, mayaserecapa:

—¿Yátupisareji réyvihí píti nayehe ena pijaneanana israelítana? —macahepa.

³⁴ Ema Jesús máichapa:

—¿Pitupiruvahipuca eta juca píchiranuhi, pivarairahi pecha te yátupihipuca eta nurreyvahi? ¿Pitanucahipucasera eta nuviurevayare, picutihipuca eta napanereruhi ena nujaneanana israelítana? —máichapa ema Jesús.

³⁵ Ema Pilato majicapavarepa:

—Vahi nímati eta epanereruana eti israelítana. Énarichuhi ena pijaneanana ena tuparairucana, éna tiámavianapahi eta ani nuyehe. ¿Tájaha eta piviorevahi eta nayehe? —máichapa.

³⁶ Tásiha, ema Jesús majicapavarepa:

—Jéhesare, jararihi eta návacurehi; váhisera étaina te juca apaquehe. Te étainahini te juca apaquehe eta návacurehi, téhacacauchanuanaripahini ena nímitureanahi, váhivare nacucaratacanuhini ena ticatianacananahi. Taicha yátupiquenehi eta návacurehi, vahi étaina te juca apaquehe —macahepa.

³⁷ Tacahe, ema Pilato mápechavarepa mayasereca:

—Tacahe, ¿yátupihí eta pirreyvahi? —máichapa.

Éma Jesús majicapapa:

—Yátupi réynuhi núti. Eta núcupaisirahi, núchucahi te juca apaquehe, nímiturecayarehí eta yátupiqueneana. Nácani tisuapajirahianayare, nasamararacayare eta yátupiqueneana —macahepa.

³⁸ Tacahe, éma Pilato macahevarepa:

—¿Píti pímiyachava pímati eta yátupiqueneana? Núti, németeaca nájina narataha náimatimahi eta yátupiqueneana —macahepa.

*Éma Pilato macavanairipipa náetataca éma Jesús te crusu
(Mt 27.15-31; Mr 15.6-20; Lc 23.13-25)*

³⁹ Te tamutupa eta mayaseresirahi, tiúchucavarepa éma Pilato. Máechajimurihapa éna ticitianacanáhi éma Jesús:

—Tájina maviurevaina éma maca achane eta nímairahí núti. Étísera jucarihi eta eyeherepi te Páscuamuhuana eta nucaitisirayare éma émana presu. ¿Evarahapuca nucaítica éma eyehe Rey, íaquenumuri eti israelítana? —máichavacapa éna.

⁴⁰ Énasera tipiararecanapa eta najicapirahi:

—¡Vahí vivaraha picaitica éma maca! ¡Émaina picaitica éma Barrabás! —nacahepa.

Éma Barrabás táemerataruhi eta máetaviuchirahi eta mámeraivahi.

19

¹ Tacahe, éma Pilato macavanairipipa náestaca éma Jesús. ² Tásiha, éna suntaruana navehapa eta épire itapepi, náítsamemacapa. Nanacapa te machuti éma Jesús, majarapiyarehí náiha. Namuiriachavarepa eta muíriare mularume. ³ Tásiha, nachayacapa éma, nacavayuemarajipa nacaecahijiricapa. Ánipa nacahe:

—Tata, ¡pítitataji nayehevihí Rey éna israelítana! —nacahepa.

Náehamirahavare te mamira.

⁴ Éma Pilato tíapechavarepa tiúchucahi. Tásiha, máichavacapa éna achaneana:

—Nímereca te emirahu éma maca achane. Nuvarahasera ácaicutiaraini eta tamajinairahi maviurevainahini eta nímairahí núti —máichavacapa.

⁵ Tacahe, nacuchucapa éma Jesús, mámapaipa eta itapepi te machuti, majarapihí náepiyarúhi éna, étapa eta namuriarúhi mularume. Tásiha, máichavacapa éma Pilato:

—Mácaripa éma maca achane. Ticaemecharáhiripa, ticaestaripavare. Maratapa —macahepa.

⁶ Te náimahapa éna tupairucana énapa éna nasuntaruana, tipiaracanapa:

—¡Pémetatareca te crusu! ¡Pémetatareca te crusu! —nacahepa.

Éma Pilato máichavacavare:

—Núti tájina maviurevainahini eta nímairahí. Étina écha eta íámairaya éma. Étina émetatareca te crusu —máichavacapa.

⁷ Éna najicapavarepa:

—Ichape eta maviurevahi éma maca eta viyehe, taicha tímijachavahi Machíha éma Viya. Vivaraha máepena, taicha váhiquene vísapahini eta juca —nacahepa.

⁸ Eta masamirahi ema Pilato eta machichairahipuca ema Viya ema Jesús, ichaperinehi eta mapisirahi. ⁹ Tisiapavarepa tayehe eta mayehe palacio. Máichuhavarepa ema Jesús. Mayaserecavarepa:

—¿Nájahavisica píti? ¿Távihásica eta piásinehi? —macahepa.

Émasera ema Jesús, tájina vahi majicapahini.

¹⁰ Tásiha, ema Pilato máichavarepa:

—¡Vahi pivaraha pijicapanu! Péchapuca píti eta nuratahairahi nucuchuhavi, énerichuvare nuratahavare nucavanairipi náetatacavi te crusu —macahepa.

¹¹ Ema Jesús mapaenunavapa majicapa:

—Váhiquene piratahaimahi pítijsiva pémetatarecanuhini te crusu. Émasera ema Tata tituparacavihi, mavarairahi títauchava eta mavarahaqueneanahi. Eta tacahe, ichape eta napecaturana eta tíjararecanuani eta piyehe. Píti váhipanaichuhinéni eta pipecaturahi eta píchiranuhi —macahepa.

¹² Tacahe, ema Pilato mavarahainipa macuchucuhayarehini ema Jesús.

Énasera ena tuparairucana tipiaracanavarepa:

—¡Te picaitica ema maca, vépiyaequenehaviyare mayehe ema ichapequene aquenuca Emperador! ¡Ema maca achane macatianaruhi ema Emperador taicha tímijachavahi rey! —nacahepa.

¹³⁻¹⁴ Tacahe, te masamapa ema Pilato eta náechajiriruvahi éna, tiyanapa te anuqehe, téjacapa tayehe eta máejasirare apaesa namutuyarepa náimaha. (Eta mávacurehi, amairiha máripahi. Eta jena sache, vírnesi táequenereruhi eta Pascua.) Tacahe, tiánehiripa las dóceyarehi eta sache macavanairipipa nama ema Jesús. Tásiha, máichavacapa ena achaneana:

—¡Mácaripa ema eyehe Rey! —macahepa.

¹⁵ Énasera tipiaracanavarepa:

—¡Pémetatarecavane! ¡Máepenavanepa! ¡Váhiquene vivaraha ema maca! —nacahepa.

Tásiha, ema Pilato máichavarepa:

—¡Vahi németatarecaimahi ema eyehe Rey! —macahepa.

Énasera ena tuparairucana najicapavarepa:

—¡Nájina apanaina viyehena Rey! ¡Macarichu ema Emperador! —nacahepa.

¹⁶ Tacahe, ema Pilato máisapapa. Máijaracavacapa ena masuntarurana eta náetatasirayare ema Jesús. Jéhesaréinehi námapa éma.

Náetatacava te crusu ema Jesús

(Mt 27.32-44; Mr 15.21-32; Lc 23.26-43)

¹⁷ Tacahe, náijaracapa ema Jesús eta macurusuraya. Tiúchucapa éma, mámapaipahi te majihu. Námapa eta te Calvario (te hebreo ticaijare Gólgota). ¹⁸⁻¹⁹ Tásiha, ema Pilato máepiyacapa eta ajureca eta táechajiriruvahi, ánipa tacahehi: “Ema Jesús Nazareno, Rey nayehe ena israelítana”. Te tápusi eta macurusura nanacapa eta juca ajureca. Natiarihivare ena apinana ticaetatanahivare te machacaya. Émasera ema Jesús, te enumuho mávihahi. ²⁰ Camuriana ena achaneana téchajicuhanahi eta ajureca, taicha eta macaetataiyahi ema Jesús tachachacayaichuhi eta avasare. Eta ajureca, te hebreo, te griego, téhepa latín. Mapana eta táechajiriruvanahi. ²¹ Eta tacahe, ena tuparairucana tiyananapa mayehe ema Pilato nayaseapanahi máitsivachahini eta ajureca. Éna navarahahi áni tacaheyarehi eta ajureca:

“Ema maca tímijachavahi Rey nayehe ena israelítana”. ²² Émasera ema Pilato máichavacapa:

—Eta ajureca nunacaquenehi, nájina tihapapicaimahi —macahepa.

²³ Te náitauchapa ena suntaruana eta náetatasirahi ema Jesús, nasuerte-hachapa eta mamuiriha nayehe ena cuátroqueneana. Navehavarepa eta apana mamuiriha. Étasa tájina taparinahini, amairijuheichucha eta it-sameruca. ²⁴ Vaipa návarahahini navetsayucahini. Tásiha, nasuertehachavarepa, náimairayarehi nájahayarehipuca mácani tivecuhayarehi.

Tacahehi eta táitauchiravahi eta Sagrada Escritura eta táechajiriruvahi: “Ticajjiricanapana eta numuirihaini. Nasuertehachavare eta apana numuiriha”. Jéhesare, tacahehi naicha ena suntaruana.

²⁵ Te tápecu eta macurusura ema Jesús, sutiarihihi esu maena, ésupa esu mápenaru, ésupa esu apana María mayena ema Cleofas, ésupa esu María Magdalena. ²⁶ Tacahe, te máimahapa esu maena eta sutiarihirahi te machacaya, nútupa nuti máimiturehi máemunaruquenehi, ánipa máicha ésu:

—Mémechicha, márahi ema nítivayare ema pichichayare. Éma títativiyare.

²⁷ Tásiha, énerichuvare tituparacanuvarerepa nútí:

—Némunacasare, nutuparacavi esu meme. Esu pényare. Pímainanu — máichanupa.

Jéhesaresera, nútí Juan ichaperinehi eta nujacpirahi esu maena. Námapa te nupena.

Eta máepenirahi ema Jesús

(Mt 27.45-56; Mr 15.33-41; Lc 23.44-49)

²⁸ Tacahe, eta máimairahi ema Jesús eta táitauchiravaripa tamutu eta táechajiriruvanahi eta Sagrada Escritura, ánvare macahehi:

—Tétavicava eta numauneva —macahepa.

²⁹ Tatiarihihi eta tisisica vino te tinaja. Náechipajicapa eta machuchujiruyarehi. Náimicapayacapa tayehe eta majaca te tiúqui curina. ³⁰ Tacahe, machuchujicapa ema Jesús eta tisisica vino. Tásiha, macahepa:

—Jéhevare púiti, títauchavapa tamutu —macahepa.

Tásiha, téyusicapa. Tépenapa.

Ema émana suntaru mayuvaracapa te machene ema Jesús tayehe eta lanza

³¹ Tacahe, ena tuparairucana vahi návarahahini nánasihini ena ticaetanahi te crusu te jena sache sávaru páscuairahi. Tacahe, tiyananapa mayehe ema Pilato, nayaseapanahi macavanairipihini eta nacavetupaiquechavacayarehi apaesa náepenavanehini. Navarahahi náecarávane, taicha tétavicavahi eta tacapicahuirahi nayehe éna eta jena sácheana páscuairahi.

³² Jéhesaréinehi, tiyananapa ena suntaruana, nacavetupaiquechavacapa ena apinana tíamerahiana nacaetataquenehi te crusu te machacaya ema Jesús.

³³ Tásiha, éneyareichuhivaréni ema Jesus. Téhesera te náitecapauchapa, náimahapa eta máepeniraipahi. Tacahe, vaipa nacavetupaiquechahini éma.

³⁴ Táitsivahisera ema émana suntaru mayuvaracapa te machene tayehe eta lanza. Enevanepa tiúchucahi eta iti étapa eta une. ³⁵ Nútí Juan nájuequenehahi tamutu eta juca, nímahaqueneanahi. Nuvaraha nítametacahe tamutu. Yátupihivare eta numetasirahéhi, taicha nuvaraha esetapahini éti apanavare.

³⁶ Títauchavahi eta juca táechajiriruvahi eta Sagrada Escritura: “Tájina vahi nacavetucaimahi eta máperana”. ³⁷ Jararihivare eta apana Escritura, ánvare tacahe: “Náimahayare ema najarachaquenehi”.

Nacucupaicapa te crusu ema Jesús, náecarayarepa
(Mt 27.57-61; Mr 15.42-47; Lc 23.50-56)

³⁸ Te tamutupa eta juca, matiarhihi ema achane José, ticavasahi te Arimatea. Émarichuhi tisuapajirahihi mayehe ema Jesús. Váhisera máimerecavahini, mapisiravacahi ena machamuriana aquenucarahana. Tiyanapa éma mayaseapanahi ema Pilato eta máquehe ema Jesús. Tacahepera ema Pilato máisapapa. Tiyanapa ema José, macucupaipanapa eta máquehe ema Jesús. ³⁹ Émapa ema Nicodemo macachanehi, ema téjirapanahi ema Jesús te jena yátimuhuquenehi. Mámapahi éma eta treinta kilo eta perfume mayajihayarehi. ⁴⁰ Tacahe, ema José émapa ema Nicodemo navehapa eta máquehe ema Jesús, náyuruacapa eta te sávana tijapu táurinaquenehi. Nayajihacavarepa tayehe eta táijiyequene perfume. Tacahehi eta viyeherepi te vécarayare ena náepenaqueneana. ⁴¹⁻⁴² Tacahe, te tachacaya eta máepeninehi ema Jesús, tatiarihihi eta huerta te távihahi eta mari natsecajueruhi ecariyare tacutihi eta covacha. Nájinaichaha nacaecarasihini tayehe. Éta náecarihahi eta máquehe. Tiputuvahuanapa taicha cáperehichicharipahi. Vahi táisapacarehini náecarahini te yati, váhivare táisapacarehini te apanapa sache taicha sávarumuhupahi.

20

Eta máechepusira ema Jesús te máecari
(Mt 28.1-10; Mr 16.1-8; Lc 24.1-12)

¹ Tacahe, te jena sache lumincuquenehi, te tijararahichichapa, tiyanapa esu María Magdalena tayehe eta máecari. Timapicuichaha te suítecapauchapa eta ecari, suímahapa tájinaripahi eta márieme tajihainihi eta tapajacurahahi eta ecari. ² Te suímahapa, tichavavanepa tijunapapaipahi. Suíchuhanayarehi ema Pedro nútupa nuti Juan. Timetacahavipa ésu:

—Námechapa jácani eta ñáquehéni eñi Viáquenu. Vaipa vecha távihahipuca nanasihahi —suahepa.

³⁻⁴ Tacahe, nútupa émapa ema Pedro viúchucapa viyanapa vijunapapaipahi. Nucachuricapa ema Pedro. Nítecapavanepa nútupa tayehe eta máecari ema Viáquenu. ⁵ Nétupaicapa. Nujiñañajuechapa. Tacarinehi nímaha eta máyuruhanainihi. Váhisera nusiapahini. ⁶⁻⁷ Te títecapapa ema Pedro, tisiapapa éma tayehe eta ecari. Máimahapa eta máyuruhanainihi. Tanasirinecha enurujuhehi, éta eta mamuhisiequene ema Jesús. ⁸ Tacahe, nusiapavarepa nútupa tayehe eta ecari. Nímahapa eta táicharacavahi. Tásiha, ichaperinehi eta nusuapirahi. ⁹ Vipaenumavapa vicaicutiarahi eta táechajiriruvahi eta Sagrada Escritura, eta máechepusirayarehi ema Viáquenu te máecari. ¹⁰ Te tamutupa eta vímairahi, vichavapa te vipena.

Ema Jesús tímerecavapa suyehe esu María Magdalena
(Mr 16.9-11)

¹¹ Esu María Magdalena, énerichuvare tiápechavaripa tichava eta te máecari. Sunasipa, tiyahaipa. Tásiha, tétupaicapa sujiñañacahi te tajuhe. ¹² Tiáramicarepa suímaha ena apinana ángeleana, tijapumuirihavacahi. Téjacanahi éna te tajuhe eta máecarini. Ema émana te tanapainihi eta machuti, ema apana te máivape. ¹³ Tásiha, ena ángeleana nayaserecapa ésu:

—¿Tájaha ticaiyacavi, nuchicha? —náichapa.

—Ticaiyacanuhi eta námechirahi eta ñaquehe eñi Viáquenu. Vahi nécha távihapapuca nanasihahi —sucahepa.

¹⁴ Te titapiricapa eta suíchiravacahi, téviurucavapa, suímaharinehi ema Jesús. ¹⁵ Tásiha, éma apanava mayaserecapa:

—¿Tájaha ticaiyacavihi, nuchicha? ¿Nájaha pitanucahi? —máichapa.

Ésusera suímijachaichucha ema tijanearecarahi eta huerta. Tásiha, suíchapa: —Tata, te pítihipuca piámahi eta ñaquehe eñi Viáquenu, picatajicanu pimeta-canu távihapuca pinasihahi. Nuvaraha námayare núti —suíchapa.

¹⁶ —¡María! —máichapa.

Suésenicainehi ésu. Supaenumavapa suímatihí éma. Tásiha, suíchapa:

—¡Pítiquenehi, Tata Náquenu!

¹⁷ Tásiha, ema Jesús máichapa:

—Vahi picuemamahacanu, taicha vuíchaha nápanahini te mávihahi ema Tata. Piyana pimetaçavaca ena apamuriana nímitureana eta nápanirayare mayehe ema Tata, Ecaiyaquenehivare éti apanava —máichapa.

¹⁸ Tacahe, esu María Magdalena tiyanapa sumetapanavacahi ena suchamuriana eta suímairahi ema Jesús, étapa eta mametarapianahi.

*Tímerecava ema Jesús nayehe ena máimitureana
(Mt 28.16-20; Mr 16.14-18; Lc 24.36-49)*

¹⁹ Étarichu te jena sáchequenehi lumincuquene, yátiripahi, viúrujicavahi viti máimitureana ema Jesús te tajuhe eta peti. Vérateaquenerecavahi taicha eta vipisirahi ena tuparairucana. Tiáramicarepa titupihahi ema Jesús te vimuri. Téçhajicahavipa:

—¿Ícharacava, nuchichanaveana? —máichahavipa.

²⁰ Tásiha, tímechahavipa eta majarana te mavahuana étapa te machene. Tacahe, víti ichaperinehi eta viúrisamurevahi eta vímairahi éma. ²¹ Tásiha, máichahavipa:

—Vahi ecueñamava. Núti, mavanerunuhi ema Tata núcupaicayare te juca apaquehe, nímitucaheyarehi éti. Puiti nuvanecaheyare núti ímitucavacayarehi ena achaneana, apaesa náehicanuhini éna apanava —macahepa.

²² Tásiha, tiáchajuacahavipa víti. Tásiha, máichahavivarepa:

—Táuri eta ejacapiraina ema Espíritu Santo eta máitecapauchiraheya, mávahásiraheya. ²³ Éma, tímítucaheya eta ítametasiravacaya ena achaneana eta naperdonachacarevahi me Viya ena téneuchavanahi. Te vahi nacu-varaha téneuchavana, tanasiyare eta naviurevana taicha eta napecaturana —macahepa.

Ema Tomás vahi masuapa eta máeçhepusiraipahi ema Jesús

²⁴ Te jena sache eta máimeresiravahi ema Jesús eta viyehe, májinahi ema vichamuri Tomás. ²⁵ Tásihasera, ena apamuriana vichamuriana nametacapa éma eta vímairaipahi ema Jesús. Émasera macahepa:

—Vahi nusuapa. Téhesera te nímaha eta majara te mavahu taicha eta clavo, nímisipavare eta nuvaquí tayehe eta majara te machene, tapaenumava nusuapayare eta máeçhepusiraipahi —macahepa.

²⁶ Te óchopa sache eta táetavisiravahi, viúrujicavaipavare te viúrujisirareva. Matiarhipahi ema Tomás te vimuri. Tásiha, tiáramicarevarepa tímerecavahi ema Jesús. Titupihahi te vimuri. Téçhajicahavivarepa.

—Ícharacava, nuchichanaveana —macahepa.

²⁷ Tásiha, máichuhapa ema Tomás:

—Yare, nuchicha —máichapa—. Pímaha eta nujarana te nuvahuana. Pímisiapa eta pivauqui eta te juca nuchene, apaesa pisuapanu.

²⁸ Tacahe, ema Tomás majicapapa:

—Tátachicha, piti yátupiquenévi Viya. Tétavicavahi eta nucasiñairavihi —máichapa.

²⁹ Ema Jesús majicapapa:

—Nuchichasami Tomás, pipaenumava pisuapanu eta pímairanuipahi. Tétavicavasera náuricacareva nácani tisuapajirahianahi vahi tácomesahini náimahanuhini —macahepa.

Nuvaraha esuapa eta juca libro nájurehi

³⁰ Jucarihichahavare eta apamuriana tiáramicareana máichaqueneanahi ema Jesús, eta vímahaqueneanahi viti máimitureana. Váipasera tamutuhini tacajuhini te juca libro. ³¹ Nuvarahasera ácaicutiara eta nájureanahi apaesa esuapahini ema Jesús eta émairaquenehi Cristo, Machichaquenehi ema Viya. Taicha te esuapapuca éma, máitavacacayare eta ítaresirayare.

21

Tiápechavavare tímercava ema Jesús nayehe ena siétequeneana máimitureana

¹⁻⁴ Tiuri, te táequenepa eta juca, viyanapa viti te Galilea, vicuchapayarehi ema Jesús. Ánaqui matiarihihhi ema Pedro, ema Tomás, ema Natanael, ema nuparape Jacobo, nútipa nuti Juan. Natiarivare ena apinanahi vichamuriana. Tacahe, ema Pedro máichahavipa:

—Nuyanayare nénipanayare te cáquiure —macahepa.

Tásiha, víti vijicapapa éma:

—Véhicaviyare víti apanava —víchapa.

Tacahe, te vítecapapa, viávacuhapa tayehe eta pacure. Vénicaipahi te jena yátiquenehi. Tájinasera vítucavahini. Te tijárahichichayaréipa, vímahapa ema Jesús. Titupihaiipahi te tachausi. Váhisera vímativanehini. ⁵ Tásiha, téhajicahavipa:

—¿Ícharacava, nuchichanaveana? ¿Tájina ítucava eta jima? —macahepa.

Vijicapapa víti:

—Tájina vítucava —víchapa.

⁶ Tásiha, éma tivanecahavipa viáquijieca eta veyehe tarrafa te apachacaya eta pacure tinapaicahi te vaure.

—Eta ítusiavayare eta jima —máichahavipa.

Viupahisera víti. Tásiha, te vichuruecapa eta veyehe tarrafa, vaipa víchinahini taicha táetaviuchahi eta camurirahi eta jima. Tijitacarenecha.

⁷ Tásiha, nútí níchapa ema Pedro:

—¡Émara ema Viáquenu! —níchapa.

Masaminenurichuhi ema Pedro eta níchirahi, ticamuirihavanepa taicha tijejamuhiacavahi éma eta mamuiriha. Tépuhecavapa, mavarairahi macapayacavaneyarehi ema Viáquenu. ⁸ Víti apamuriana vipauchapa eta tachausi. Vichuruecapaipahi eta veyehe tarrafa; tíncapaipahi eta camuriquene jima. Cien métrichuhiserapuca eta viyerehirahi eta tachausi.

⁹ Te víucupaicapa te tachausi, vímaharinehi tatiarihihhi eta yucu, étapa eta jima jitaruca, étapa eta pan. ¹⁰ Tásiha, ema Jesús máichahavipa:

—Iáma eta íturevahi jima —máichahavipa.

¹¹ Ema Pedro machurupaicapa eta tarrafa. Vímaharinehi eta ichapemuriquene jima. Ciento cincuenta y tres eta tasimurivahi. Váhisera táetsayucahíni eta vyehe tarrafa. ¹² Tásiha, tíchuhahavipa ema Jesús:

—Yare, enica —macahepa.

Tásiha, viyanapa víti, vinicayarehi. Váhisera vipatsicavahini viyaserecahíni te nájahahipuca éma taicha tétavicavahi eta viáramesirahi. Vímatia-cahisera eta émaírahi ema Viáquenu. ¹³ Tásiha, ema Jesús témeñahavapa. Mavehapa eta pan. Tíjaracahavipa. Éta pa eta jima táimaquiquenepa, tíjaracahavivarepa.

¹⁴ Eta juca eta mapahequenepa eta máimeresiravahi ema Jesús eta vyehe eta máechepusirahi te máecari.

Ema Jesús mavaraha macaicutiara te yátupipuca máemunaca ema Pedro

¹⁵ Te vítanésipa eta vinisirahi, ema Jesús mayaserecapa ema Pedro. Ánipa máicha:

—Píti Pedro, nuvaraha nuyaserecavi: ¿Picachuricapuca píti ena nani apamuriana eta pémunasiranuhi? —máichapa.

Éma majicapapa:

—Némunacavi, Tata. Pécharichuhi píti jácani némunasiravihi —macahepa.

Ema Jesús máichavarepa:

—Tiuri, te yátupihipuca pémunacanu, nuvaraha pijaneasinanuvaca ena téhicanuanayare, taicha vahi náitucahini nacatiuchavahini. Téñamacareanahi —macahepa.

¹⁶ Te táequenepa, mápechavare mayasereca:

—Pedro, nuvaraha nuyaserecavi: ¿Yátupi eta pémunasiranuhi? —máichapa.

—Némunacavi, Tata. Pécharichuhi píti eta némunasiravihi —máichapa ema Pedro.

Ema Jesús máichavarepa:

—Tiuri, te yátupipuca pémunacanu, pijaneasinanuvaca ena téhicanuanahi —macahepa.

¹⁷ Te táequenepa, mapahequene mayasereca:

—Pedro, ¿yátupi eta pémunasiranu? —máichapa.

Émasera ema Pedro titsirihapa taicha mapaheripa eta mayaseresirahi. Majicapavarepa:

—Pécharichuhi, Tata, eta némunasiravihi —macahepa.

Tásiha, máichavarepa ema Jesús:

—Tiuri, te yátupihipuca pémunacanu, pijaneasinanuvacayare ena téhicanuanahi. ¹⁸ Nutupiruva numetacavi: Eta piámaperuvahi, píti péchinavahi eta pítaresirahi. Picamuirihahi, piyanahivare te jácani pivarahaqueneanahi picaijuhe. Jácanisera áñoanayare eta pichávicavaipa, apanainapa eta pítare-sirayare. Apananainapa ena timuriachavianayare, taicha títijivauchavianayare, tásiha tiámavianainapa te jácani pimavarahaquenénihi picaijuhe —máichapa.

¹⁹ Eta juca máichirahi ema Jesús, mavarairahi máiminecapaequeneharehi eta máicharacavayarehi eta máepenirayare ema Pedro. Tétavica-vainapa eta macunachacareva ema Viya máicha ema Pedro, taicha vahi téquecavaimahi eta máimairahi eta macatajivairaya. Tásiha, máichavare ema Jesús:

—Piti Pedro, tacuija tahapapiricahini eta pítauchira tamutu eta nutuparasiravianahi —máichapa.

Eta táichecuine eta májurehi ema Juan, máemunaruquenehi ema Jesús

²⁰ Tásiha, téseniequenehavapa ema Pedro, tímahanupa eta néhiequenehairapahi nuti máemunarunuhi ema Jesús. (Nútirichu núti nuyaserecahi te mesa te nájahahipuca ema tjararecayarehi.) ²¹ Eta máimairanuhi ema Pedro, mayaserecapa ema Jesús tájahapuca eta nícharacavayarehi núti apana. Ánipa macahe ema Pedro:

—Tata, ¿tájahapuca máicharacavayare ema apanava ema maca?

²² Ema Jesús majicapapa:

—Núti nécha. Te nuvarahapuca máitareca máimahayare eta nápechiravayare nuchavirayare, vahi tacuimipanerrecavi. Pítisamisera, pítaucha tamutu eta nutuparasiraviana. Tacuija tahapapiricahini eta péhisiranuhi.

²³ Tacahe, ena nuchamuriana, ichaperinehi eta napanerequenehairahi eta numaepenirayarehi. Váhisera mametacahini eta numaepenirayarehi. Tacarichu macahehi: “Te nuvarahapuca núti máitareca máimahayare eta nápechiravayare nuchavirayare, vahi tacuimipanerrecavi” macahepa.

²⁴ Nuparapenaveana, núti yátupiquenenuhi eta máimiturenuirahi ema Jesús. Nutupiruvahi néchajisiha te juca nájurehi eta yátupiqueneana nímaqueneanahi.

²⁵ Jucarihichaha eta apamuriana máichaqueneanahi ema Jesús. Váipasera támutuhini nájuequeneháhini, taicha tétavicavahi eta táichapemurivahi. Te vítametacapucaini tamutu eta máichaqueneanahi, váipapuca vicuratahahini vítuca, namutuhinéni ena achaneana te juca apaquehe tíajuequenerahiana.

Tamutupa eta juca nájurehi.

Ena San Lucas májuequenehahi eta náichararacavahi ena Apóstoleana eta náehisirahi ena Jesucristo, ticajare LOS HECHOS

¹ Piti Teófilo, títecapáuchaviripa eta táinapure nájure tayehe eta máichavaqueneváhi ena Jesucristo te títecapapa te juca apaquehe. Nájuchahi tamutu eta máichaqueneanahi, étapa eta máimiturapianahi. ² Nararihihi ena manerejiruana apóstoleana. Émaripa ena Espiritu Santo máimicatacahi eta matúparasíravacahi éna. Nájuchavarepa eta mayapirahi te anuma. Puiti nímiama-recavare eta piyehe eta juca nájure, apaesa pímati tamutu eta téchacareana tayehe eta máichavaqueneváhi ena Jesús. ³ Te táequenepa eta máepenirahi, téchepucapa te máecari, tiápechavavare títareca. Tásiha, cuarentaquenehi sache eta macáchanéravacaríchaha ena máimitureana. Máimerecahi íchape eta machavirahi títareca. Máimitucavacahi éna, eta táichararacavayare eta náehisirayare ena Viya ena achaneana te tamutu avasareana.

Ena Jesucristo mametaca eta máucupaisirayare ena Espiritu Santo

⁴ Te jena sache, macáchanevacaríchaha ena apóstoleana, mametacavacapa. Ánipa maicha:

—Vahi ecújúnijica eta juca viávasa Jerusalén. Ecuchapayare eta táitauchiravayare eta májjararuvahi ena Vicaiyaquene. Étaripa eta juca numetarpianahi. ⁵ Échavarichu ena Juan, máicachasicavacahi te une ena achaneana. Étiserá, puiti juca sácheanayare, tiúcupaicayare ena Espiritu Santo. Ena tícachasícaheyare, tiávahácahénapa —macahepa ena Jesús.

Eta mayapira ena Jesús te anuma

⁶ Tacahe, nayaserecapa ena tiúrujiácanahi ena Jesús. Ánipa naicha:

—Tata Viáquenu, ¿puítinaríchu píjaracahavi viti israelítana eta vítináini vigóvernachacáca te juca viávasa? —nacahepa.

⁷ Ena Jesús majicapapa, ánipa maicha:

—Vuíchaha táechacare. Vahi tatuparaca étinahíni echa tájahapuca sáchevayare, tájahapuca cájevayare títauchavaya. Taicha tayumururevahi eta juca maicha ena Tata Vicaiyaquene. Macarichu éma máituruéqueneha eta juca. ⁸ Jucaríhisera eta ítucaquenezare. Ena Tata tíjaracaheyare ena Espiritu Santo, tiávahácaheyare tímícatacaheyare. Tacahe, échajísianuínapa núti. Tamutu-yare avasareana eta epaisíha, te Jerusalén, te Judea, te Samaria, étapa te jácani tayerehiqueneana avasareana tayehe te juca apaquehe —máichapa ena Jesús.

⁹ Tacahe, te títavapa eta máechajirísiravahi, tiyanapa tiyapa te anuma. Tacahe, ena máimitureana náimararacáqueneháipa eta mayanirahi. Táepacuchirahi eta úcaji. Vaípa macaecherahini te anuquehe. ¹⁰ Eta mayanirahi ena Jesús te anuma, náimararacáichaha ena máimitureana. Tacahe, tíaramicareanapa tímerecavana ena apinana ángeleana. Tijapumuirihavaca. ¹¹ Tacahe, náichapa ena ángeleana:

—¿Tájaha íchahi ímararacahi eta anuma, eti máimitureana ena Jesús? Puiti enecapararecahi ena Jesús eta majunijisiraheripa, mayanirapa te anuma.

Vimetacahe: Te jácani sáchezare, ema Jesús tichavayare te juca apaquehe. Tiúcupaicayare tacutiyaareichu eta mayanirahi —náichavacapa ena ángeleana.

Nanerejicapa ema Matías, máitsivayarehi ema Júlasí

¹² Tiuri, eta návilhairahi te anuquehe masihi ticaijare Olivoquiji. Tachacayahi eta Jerusalén, apina kilómetro eta tayerehivahi. Tiyananapa tichavana tayehe eta avasare. ¹³ Te títecapanapa te avasare, tisiapanapa te peti apina piso, eta náitecapihahi. Tiápananapa te téqueneha piso. Natarihihi ema Pedro, ema Jacobo, ema Juan, ema Andrés, ema Felipe, ema Tomás, ema Bartolomé*, ema Mateo, ema apana Jacobo, ema Simón, émapa ema Judas. ¹⁴ Natarihivare ena maparapaveana ema Jesús, ésupa esu maena María, énapa ena apamuriana esenana. Tamutu sácheana, ena nani tiúrujicavanahi eta nayujarasirahi.

¹⁵ Tacahe, te jena sácheana, ena náurujiruvanahi náetavicahi ciento veinte eta nasimutuva ena máimitureana ema Jesús. Tacahe, téchepucapa ema Pedro te namuri, titupihapa. Máichapa:

¹⁶ —Nuparapaveana, ema víyarahaini David macaimitucasiquenehi mayehe ema Espíritu Santo, ánaquiríchaha eta áñoana eta matiaríhiraya ema Júlasí, ema títapumiráuchaya ena suntaruana nacaratacaya ema Jesús. Títauchavapa eta mametarapíhi ema Espíritu Santo. ¹⁷ Taicha ema Júlasí, émainichuhi vichamurini tayehe eta juca vématanerepíhi —macahepa ema Pedro. ¹⁸ (Émasera ema Júlasí ticapacavahi tichumucavapa. Tiáquipaicavahiséra eta máquehe. Tiúchumuriapa eta maturupiana. Te táequeneha, navehapa eta mavachainíhi eta máijaresirahi ema Jesús. Navacharecapa eta apaquehe. ¹⁹ Te náechapa ena ticavasana te Jerusalén, nanacapa eta táijarehi Acéldama. Eta ticaijarehi puiti “Apaquehe máitinevacha ema Jesús.”)

²⁰ Tímiyanava eta máechajisirahi ema Pedro, ánipa maicha:

—Ema víyarahaini David májucunachahi eta mametarapiana ema Espíritu Santo eta te Salmo. Áni macahehi: “Machu nacuija nacusiapa eta mapena majunijiruipa nácani macutipanereruana eta mavainarajiva”. Ánivarepa macahe: “Tatuparacahi masiapaya ema apana achane máitsivaya te mávacuréníhi” macahepaji ema Espíritu Santo.

²¹⁻²² Tacahe, tituparacahavi vinerejicayare ema apana, máitsivaina ema Júlasí, apaesa vahi macuejiacava te vimuri viti dócequeneana. Máimicatacahavi eta véchajisiha eta máechepusirahi ema Jesús. Nararihi ani te vitaracu ena vichamurianahi te juca áñoana te matiaríhichaha ema Jesús te vimuri. Ena ticachanehavianahi te ticaicachasinapa ema Jesús me Juan. Vahi najunijicahavíhini. Natarihiquenehi te tiyapapa ema Jesús te anuma —macahepa ema Pedro.

²³ Tacahe, ticanerejianapa ena apinana: ema ticaijare Matías, émapa ema apana ticaijare José Barsabás (énerichuvare náimijarechahi Justo). ²⁴⁻²⁵ Tacahe, tiyujaracanapa, ánipa nacahe:

* **1:13** Ema Bartolomé ticaijarehivare Natanael. Ema apana Jacobo, machichahi ema Alfeo (váipasera véchapíríca eta máítaresira ema Alfeo). Ema Simón, nachamurinihi ena revolucionario ticaijareana “cananístana”. Ena nani cananístana nacanarajirícahi ena apavasana romanoana, navairahi náquijica, nacuchucayare te návasa Judea. Ema maca Judas, matiaríhi ema maparape ticaijarehivare Jacobo, váhisera nachamurínahini ena apóstoleana. Ema maca Judas, mapanahi eta máijare: eta Tadeo émapa eta Labeo, émapa eta Judas. (Te pívaraha pecha, pitanuca te libro Marcos 3.18 émapa te Mateo 10.3.)

—Tata Viáquenu, piti pímati eta visamureana vimutu. Pímechahavi nájahapuca ema tiuri nayehe ena nani apinava vinerejiruanahi máitsivayare ema máemitiaruhi apóstoleni Júlasí, táimicuñaruhi eta mapecatura —nacahepa.

²⁶ Tacahe, nasuertehachapa ena apinana. Tatocachapa ema Matías. Tásiha, natuparacapa eta mávacureyare nachamurirayarehi ena apamuriana apóstoleana.

2

Eta mácupaisirahi ema Espíritu Santo

¹ Tiuri, títecapapa eta sache napiestara ena israelítana ticaijarehi Pentecostés. Tiúrujicavanahi ena apóstoleana énapa ena apamuriana nasimutu-vaqueneana máimitureana ema Jesús. ² Tacahe, tiáramicarepa eta ticaema te anuquehe tiásiha te anuma ticutipahi eta muraca técticava. Ticaemapa muraca te táinahu eta peti návihahi éna. ³ Tacahe, tiáramicarepa tímerecava eta tacuti eta tanene eta yucu. Tijarahivacapa te nápusiana namutu ena náuruji-ruvanahi. ⁴ Tacahe, ena mávahácavacaripe ema Espíritu Santo. Tiáramicarepana apáechajiríruvavacapa taicha eta mávahásiravacáipahi ema Espíritu Santo. ⁵ Te jena sache, natiarihivare ena camuriqueneana israelítana te Jerusalén tiásihana te tamútyaréini avasareana. Tipicaurahianahi tayehe eta nayehe religión. ⁶ Te nasamapa eta tacaemairahi te anuquehe, ticuruji-capanapa ena achaneana. Náraminehi ichape táichavenehi eta nasamirahi ena apáechajiríruvavacaripehi.

⁷ Ichaperinehi nárami. Tacahe, náichacacapa:

—¿Tájaha tacayema eta juca? Ena nani, váhira vichamurianaina tayehe eta avasare viávihahi. Ticavasana te Galilea ena nani. ⁸ Tásihasera, náitucahivare eta véchajiríruvapachu vímiuchurehi víti. ¿Tájahapapuca tacayema eta juca?

⁹ Camuriana eta véchajiríruvana taicha viti viásihahajiruanahi te apanapanejiana avasareana. Nararihi ena tiásihana te Partia, te Media, te Elam, te Mesopotamia, te Judea, te Capadocia, te Ponto, te Asia, te Frigia, te Panflia, te Egipto. ¹⁰ Nararihivare ena tiásihana te Cirene te Libia. Nararihivare ena tiásihana te Roma, ena yátupiqueneana israelítana énapa ena tépiyacavanaripe israelítana. ¹¹ Nararihivare ena tiásihana te Creta étapa te Arabia. Vimutusera visama eta véchajiríruvapachu. ¿Tájahapuca tacayema? Ena nani téchajicanahi timetacahavianahi eta táuricacarequeneana tásihaqueneanayare me Viya. Viacautiarahi tamutu taicha téchajicanahi te véchajiríruvapachu —nacahepa.

¹² Namutu napanerequenehahi. Vaipa náimatihini tájahapuca tacayema. Tiyaserejiricanavarepa:

—¿Tájahapuca tacayema eta juca? —nacahepa.

¹³ Natiarihisera ena apamuriana nacaecahirichucha, ánipa nacahe:

—Nacavaqueneana ena nani —nacahepa.

Ema Pedro máechajicapa ena achaneana

¹⁴ Tacahe, titupihapa ema Pedro te namirahu ena achaneana. Natiarihivare ena óncequeneana apóstoleana. Téchajicapa muraca ema Pedro eta máechajisirahi, ánipa macahe:

—Tátanaveana nujaneanana, emutu eti ecavasana te juca Jerusalén, ecatajicanu esamanuchaha. Ácaicutiaraquenéna eta juca nucayemayare. ¹⁵ Eti imijachahi vicavaqueneana. Vahi vicavaquenéna. Tapaenumava

las nuéverava yáticarahi. Écharichuhi éti vahi vítuca vera viti israelítana te yáticarahi. ¹⁶ Eta juca ímahaquenehi íaramiquenehi puiti, eta tacaheyarehi taicha mametarapihi ema Viya mayehe ema víyarahaini profeta Joel. Tásiha, ema Joel májucunachapa eta mametarapihi ema Viya, ánipa tacahe: ¹⁷ “Jararihiya eta sácheanaya nívaracayare ema Espíritu Santo nayehe namutu ena achaneana. Tásiha, ena echichanaveana, ajairana énapa ena esenana, nacametairuinapa eta néchajiriruva. Ena amaperuana, nívaracayare eta náechirayare eta táicharacavayare. Ena ichavicachichana ticame-tacasianayare te navapure. ¹⁸ Taicha nuvanecayare ema Espíritu Santo, nívaracayare mávahácavaca namutu ena nuchanerana. Tasiha, nacametairuinapa eta néchajiriruva tásihaquenehi nuyehe. ¹⁹ Te juca anuma nímerecayare eta tiáramicareana. Te juca apaquehe nucuchucayare eta ecutiáreanaya, apaesa ímatinu nuti nuçarichu nurataha nicha tamutu. Nucamiricaya eta ecuñaraqú. Tépusaicavayare eta náitine ena achaneana váinarajiqueneanahi. Nucamiricayare te avasareana eta yucu étpa eta ichape quiare. ²⁰ Eta sache, nucaemahayare eta tajaraiwa. Énerichuvare nítsivachayare eta táimahi eta caje. Ítimeyare nícha. Tásiha, títecapainapa eta nusacherayare nuchaviraya nuti láquenu. Te jena sáchezare, ichape eta napisirainapa ena achaneana taicha nícuñacavacainapa namutu ena ticapecaturarahianaichaha. ²¹ Étisera eti ecasiñanuhi échajicanuhi eta te níjare nuti láquenu, nucuchucuhaheyare” macahepa ema Viya.

²² Tiuri puiti, nuparapenaveana nujaneeana, esamavare eta juca apana numetaruheyare. Ímatihí ema Jesús Nazareno. Ema maca ajaira, mavaneruhi ema Viya. Écharichuhi éti eta tiáramicareanahi máichaqueneanahi ema Jesús. Ema Viya májjaracahi eta máitupajijiásiravayare, mavarairahi máimerecayarehi te emirahu eta émairahi mavaneru ema Viya. ²³ Tiyerehichahahi eta juca, ema Viya mapanerecharipahi eta máicharacavayarehi ema Machicha. Eta tacahe, máisapahi eta íjararesirahi ema Machicha nayehe ena váinarajiqueneana achaneana. Éma, émetataruhi te crusu. Éma, ímicaparuhi. ²⁴ Émasera ema Viya macaechepucahi ema Machicha. Macaitarecahi tayehe eta máepenirahi, taicha vahi mávarahahini mánasihini máepenahini. ²⁵ Ema víyarahaini rey David timetacahavihi eta te Salmo eta máechajiriruva ema Jesús. Ánipa macahe: “Tata, piti pímararacanuhi eta picáchanéranuhi. Piti pijaneacanuhi te nuchacaya. Pétumechanuhi tamutu sácheana. ²⁶⁻²⁷ Tacahe, núsismure ichape. Nuvarahavare nujirauchaviyare néchajisihaviyare. Núti, te népenapa, tájina néñamavaimahi, taicha nucasiñavahi piyehe eta pínichavirayarehi piáchanechanu. Vahi písapaimahi témitiequeneha eta náquehe nuti pichicha pémunaruquenehi. ²⁸ Piti píjaracanuhi eta picaechepusiranuyarehi te nécari, náechiravayarehi nífareca. Tásiha, nuvapinavayare eta nutiarihirayare te pímirahu” tacahepa eta Salmo.

²⁹ Nuparapenaveana, véchahi vimutu eta máepenirahi macaecarasirahi ema viáchucaini David, taicha vímaharichaha puiti eta máecari. ³⁰ Ema víyarahaini David, yátupiquenehi profeta. Macuchapahi eta táitachiravayare eta mametacasiavahi me Viya, eta matiarhirayarehi ema émana mámaríequenezarehi ema ticajireyarehi Cristo ema téjacayarehi te trono. Máitsivayarehi ema máchucaini. ³¹ Ema Viya máimechahi ema David eta máicharacavayarehi ema Cristo máechepusirayarehi te máecari. Tacahe, ema David májucunacharipa eta vahi tánasimahi tépena eta máchaneva ema Cristo; váhivare

témítiequenehaimahi eta máquehe. ³² Puíticha, ema Viya macaechepucahi ema maca Jesús. Tásiha, víti véchajisihahi eta juca taicha vímahaquenehi eta mápechiravahi títareca. ³³ Tacahe, ema Maiya macayapapa te anuma ema Machicha, macaejacaripa te mavaure. Tacahe, máijaracaripa ema Espíritu Santo ema máitsivayarehi taicha ema matuparaharichuhi. Tacahe, ema Jesús máevatacapa ema Espíritu Santo eta viyehé. Étara eta juca ímahaquenehi puiti, esamaquenehi eta máucupaisirahi ema Espíritu Santo.

³⁴⁻³⁵ Vahi ecuimijachahini émainahini ema David mápanahini te anuma. Émahisera téchajisihahi eta matiarahirayarehi ema apana tíápanayarehi te anuma. Ánipa macahehi: “Ema Viya máíchapa ema Tata Náquenu Cristo: Yare, péjaca te nuvaure, eta picuchapihayare eta nucaepuyusiraya te pimirahu ena ticatianacavianahi, máichapaji ema Viya”. Étara eta juca macayemaquenehi ema víyarahaini David.

³⁶ Tiuri puiti, emutu eti nujaneanana israelítana, nuvaraha ímatiyare ema Jesús émetataruhi, émara ema Viáquenu, émairahivare ema Cristo, maicha ema Viya —macahepa ema Pedro eta máechajiriruvahi.

³⁷ Tacahe, eta nasamirahi eta juca ena achaneana, ichaperinehi eta náeñamiravahi te nasamureana. Tásiha, nayaserecapa ema Pedro énapa ena apamuriana apóstoleana, ánipa nacahe:

—Viparapenaveana, ¿tájahapuca vícharacavaini víti? —nacahepa.

³⁸ Tacahe, ema Pedro majicapapa:

—Ítsivacha eta juca ítaresiraina te mamirahu ema Viya. Eta íjarasiravaya mayehe ema Jesucristo, ecaicachasiya emutu éti. Tásiha, ema Viya macaepahainapa eta epecaturana. Tíjaracahénavarepa ema Espíritu Santo. ³⁹ Taicha ema Viya mavarahahi tíjaracaheyare ema Espíritu Santo emutu éti énapa ena echichanaveana énapa ena apavasanana, namutupa nácani manerejiruanahi máichuhaqueneanahi ema Viya, tayanapane ticavasanahi te tiyerehigueneana avasareana —macahepa ema Pedro.

⁴⁰ Tacahehi eta juca máechajiriruvanahi ema Pedro. Ichape eta maconsejachiravacahi, ánivarepa máichahi:

—Ácaijuhe ema Jesús. Ínajica eta eváinarajivana. Érajicava nayehe ena tíchana eta tamaurigueneana —macahepa.

⁴¹ Tacahe, natiarihi ena tisuapanahi eta máechajiriruvahi. Enevanepa ticaicachasiana éna. Mapanaqueneana mil ena tisuapajirahianahivare.

Eta náitaresirahi ena náinapureana téhicanahi ema Cristo

⁴² Ena achaneana, eta nasamararasirahi eta náimiturapiana ena apóstoleana, ichaperinehi nasuapa. Tásiha, tíuririnehi eta náitaresirana. Náemunacaine ena nachamuriana. Tamutu sácheana ticurujicacananahi eta nayujarasirayarehi étapa eta nanisirayarehi eta pan táicutiarahi eta máepenirahi ema Viáquenu. ⁴³ Ichape eta náramirahi ena achaneana, taicha náimaharipa eta tíáramicareana náichaqueneana ena apóstoleana, máimicatasiravacahi ema Viya. ⁴⁴ Namutu ena tisuapajirahiana tíurujicavanaparácachi ticajicacananahi eta náimahaqueneana. ⁴⁵ Te náimaha ema mácani nachamuri ticamunuvahi, náijarareca eta náimahaqueneana. Tásiha, náijaracapa eta plata ema ticamunuvahi, náimicatasihayare. ⁴⁶ Tamutu sácheana tíurujicavanahi eta te Templo. Tásiha, te napenana tíchuhacacananahi ténicacananahi. Ticachanecacananahivare eta nanisirahi eta pan táicutiarahi eta máepenirahi ema Viáquenu. Náurisamurevahi, táurivaipahi

te nasamureana. ⁴⁷ Najiraucha nacunachahi ema Viya. Tacahe, namutu ena apamuriana achaneana napicauchahi éna. Tásiha, tamutu sácheana ema Viya máichuhavacahi ena apamuriana tisuapanavare.

3

Eta manarasirahi ema achane masarini

¹ Tiuri, étana sache, te las trespa cáperehi, ema Pedro émapa ema Juan tiyananapa tisiapanayarehi eta te Templo. Te jena hora, las trésquenepa sache, hora eta nayujarasira ena israelítana. ² Matiarahi ema achane masari. Máimiuchurehi eta mamásariva. Tamutu sácheana nanapana eta te Templo. Nanaquica eta te ichapepana tapaja ticaijare Tiúrinapana, mayaseseresihayarehi eta limosna nayehe nácani achaneana tisiapanapahi. ³ Tacahe, ema masari, te máimahavacapa tisiapanayarehi ema Pedro ema Juan, mayaseacavacapa eta limosna. ⁴ Tacahe éna, náesenicapa ema masari. Tasiha, máichapa ema Pedro:

—Pímararacahavi.

⁵ Tacahe, máimararacaripahi. Máimijachaipa nájaracayarehi eta plata. ⁶ Tásiha, ema Pedro máichapa:

—Tájina nuviya eta plata níjaracavihini. Jucarihiserá eta juca nucatajicaviyare. Nucanaracaviyare. Táichavene eta máitupajijiásirava ema Jesucristo ema Nazareno, nuvanecavi: Péchepuca, pipaica —máichapa.

⁷ Tacahe, ema Pedro machuruvauchavanepa te mavahu vaure, macaechepucapa. Énevanerínehi túmevaca eta mapaiqueana eta mayucarana. ⁸ Tacahe, ema masarini títahúchavapa titupíha, típaicapa. Tacahe, tisiapanapa te Templo máehicavacapa éna. Máeteresinapaipa eta mapaisirapahi. Macunachapaipa ema Viya, mahasulupayachavare eta macanarasirahi. ⁹ Namutu ena achaneana náimararacahi eta mapaisiraipahi, macunacharinehi ema Viya. ¹⁰ Te náimatipa ena achaneana ema masarini, ichaperinehi eta náramirahi. Ánipa nacahehi:

—Ánaquiaparipa eta mayaseseresirahi eta limosna ema maca, máejasiraparaca te tapaja ticaijare Tiúrinapana taicha eta mamasarivahi. Puítisera típaicapa, téterecavarepa. ¿Tájahapuca máicharacavahi eta manarasirahi? —nacahepa.

Ticametarairu ema Pedro te Templo

¹¹ Tacahe, ema masarini vaipa máinajiacavacahini ema Pedro ema Juan. Tacahe, náurujiacapa namutu ena achaneana te návihahi ena apóstoleana te tajuhe eta Templo, te tayehe eta alar máepiyaruihí ema reyni Salomón. ¹² Tacahe, eta máimairahi ema Pedro ena achaneana náramirahi eta juca, máichavacapa:

—Tátanaveana, nujaneanana israelítana. Iáramihí éti eta juca víchirahí víti. Ímijachapa vítijivahí vicanaraca ema maca achane masarini. Ímijachapapuca víti vítupajijiacavahi táichavene eta víjarasiravahi mayehe ema Viya. Eta juca ánira tacahehi, vahí vítina vicanaracahini ema maca. Ema ticanaracahi,

émaquenehi ema Jesús Nazareno, ¹³ taicha ema Viya* tjaracahi eta tamutui-rayare marataha ema Machicha Jesús. Émara ema maca Jesús ema épuru-quenehi éti, íjarareruhi mayehe ema aquenuca apavasajuecu Pilato. ¹⁴ Éma, mavarahahineni macaitica ema Jesús, étisera vahi ávarahahini máuchucuhahini ema máuriquenénihi yátupiquenehi santo. Masapihapa eyaseserecahi máuchucuha ema ticapahi. ¹⁵ Tásiha, émapa ímicapacahi ema Ticaitarecahavihi. Émasera ema Viya macaechepucahi te máecari. Véchajisihahi víti éma taicha vímahaquenehi eta mápechiravahi títareca. ¹⁶ Puiti, ímararacahi eta manarasirahi ema maca masarini. Eta juca eta tímicaecherachahi eta machavirahi títareca ema Jesús. Taicha émahí ema tjaracahavihi eta vítupajijiasiravahi eta vicanarasirahi ema maca achane, táichavenehi eta vícasiñairahi éma.

¹⁷ Tiuri puiti, nuparapenaveana, éti ímicapacahi ema Jesús taicha vahi ímatihini eta émaírahi ema Cristo ema vicuchapaquenehi. Énaripa ena tuparairucana eyehe, váhivare náimatihini éma. ¹⁸ Étasea tacaheyarehi eta juca taicha máechajiriruvaichuhi ema Viya nametacasi vahi ena profetana eta macatajivairayarehi ema Cristo.

¹⁹ Tásiha puiti, éneuchavainapa ecájuhénapa ema Viya, apaesa macaepaha éma tamutu eta epecaturana. Énerichuvare ema Viya técasarechaheyarepa éti. ²⁰ Ene ecahehi etsecava ejacapyare ema Jesucristo te machavapa. Éma, iáquenuyare taicha manerejiruhi ema Viya te tépanavainapa tamutu. ²¹ Ema maca Jesucristo puiti téjacahi te anuma. Jararihiyasesera eta sache eta machavirayare, máetupiricayareva tamutu. Ánaquiaparipa, eta juca mametarapihi ema Viya nayehe ena mayeheana santo profetanaini eta náimitisirayare ena achaneana. ²² Ema émana víyarahaini profeta ema Moisés, mametacahi ena víáchucanaveanaini, ani macahehi: “Ema Viya Dios tivanecanuhi nútí numetacaheyare eta máechajiriruva. Títecayare ema apanayare profeta mavaneruyareva ema Viya, tacutiyare eta mavanesaranuhi nútí. Éma, tíuchucayare te namuri ena víamariéqueneana. Tatu-paraca nasuapayare tamutu eta mavanairipianayare. ²³ Taicha ema Viya máimicapacayare namutu ena masuápajirárahánayare mayehe ema profeta máiteruyarehi, taicha mamavarahahi nacasiapahini ena machanerana” macahepa ema Moisés.

²⁴ Namutu ena apamuriana profetana, émaripa ema Samuél énapa ena náequenereruana profetana, náechajisihahi eta juca vímahaqueneanahi puiti juca sácheana. ²⁵ Ánaquiaparichaha, te vuíchaha máuchucuhahini ema víyarahaini Moisés, ema Viya mametacaipa ema víáchucaini Abraham, ánipa macahe: “Nunerejicayare ema émana piámariéquene tíuchucayare. Éma, tjaracaya eta táurivaya eta náitaresiraya namutu ena achaneana apánapaneníqueneána te juca apaquehe” macahepa ema Viya. Tíápechava mametacaipa étarichuhi máechajiriruvana mayehe ema machichaini Isaac, énapa ena mámarina-veánaini. Puiti títauchavaripa eta juca máechajiriruvaichuhi ema Viya. Tásiha puiti, éti tíuparacahehi ínapucayare ejacapa eta máijjararuheya ema Cristo, taicha étirichuhi israelítahehi. Ímatihivare eta apamuriana máechajiriruvana

* **3:13** Ema Pedro téchajicahi te náechajiriruva ena israelítana, máimijarechirahi ema Viya: “ema nacasiñaquehehi ena víáchucanaveanaini ema Abraham, ema Isaac, ema Jacob, énapa ena apamurianaini víáchucanaveanaini”.

ema Viya, nájuchaqueneana ena víyarahanaíni profetana. ²⁶ Tásiha, eta macaechepusirahi ema Viya ema Machicha Jesús, tivanecahavipa vimetac-ahe éti. Te ecasiñavapuca eta mayehe, máquijisinaheyare eta evainarajivana. Tíjaracahenapa eta iúricacarevayare —macahepa ema Pedro.

4

Emapa Pedro émapa ema Juan námaqueneanahi te namirahu ena tuparairucana

¹ Téhajicanarichaha ema Pedro ema Juan te namirahu ena achaneana, títecapanapa ena tuparairucana, énapa ena tímítrecarahiana ticaijareana saducéohana. Námapahivare ema náquenuruha ena tasuntarurana eta Templo.

² Tisemanapa taicha vahi náuricahini eta nasamairirisirahi ena apinana apóstoleana námitusirahi ena achaneana. Vahi náuricahini eta nametasirahi eta yátupiquenerahi eta máechepusirahi ema Jesús te máecari, mápechiravahi títareca. ³ Tacahe, nacaratacavacapa, náimisipavacapa te cárcel.

Váipasera nacayaseserehíhíni, taicha cáperehíhícharínehi. Tíámainucavapa te apanapa sache, nacuchucavacaya ticayaseserehianayarehi. ⁴ Camurianasera ena tisuapanahi táichavenehi eta nasamararasirahi eta náechajiriruvahi ena apóstoleana. Eta natupahi ena téhicanaripa ema Viáquenu Jesucristo cinco mil ena achaneana ajairana. Camurianavare ena esenana énapa ena amaperuana. ⁵⁻⁶ Te apanaquenepa sache, ema corregidor Caifás ticurujicapa ena apamuriana aqenucarahana tayehe eta ichapequene cabildo te Jerusalén. Natiarihihivare ena escribánoana. Matiaríhíhivare ema Anás ema pasado corregidorhi, énapa ena machichanaveana: ema ticaijarehivare Juan émapa Alejandro. Natiarihihivare ena apamuriana machichanaveana.

⁷ Tacahe, náemepanapa ema Pedro ema Juan te cárcel. Nacatupiacapa te namirahu, nayaseserecapa. Ánipa naicha:

—Éti, vahi vituparacahéhini eta ímitusirahi eta juca. ¿Nájaha tivanecahehi icha eta juca? ¿Nájaha ema tíjaracahehi eta ítupajijíásiravahi? —nacahepa.

⁸ Tacahe, ema Espíritu Santo máimicatacáhi ema Pedro eta majicapirahi ena tiyaseserecanahi, ánipa macahe:

—Tátanaveana juéseana, tátanaveana víyácarana te juca víávasa. ⁹ Evaraha echa eta juca táuriqueneana táicharacavahi eta vicanarasirahi ema maca achane macajumaquenenihi. ¹⁰ Vimetacaheyare puiti. Vivaraha vémechahéyare, eti énapa namutu ena achaneana te juca víávasa Israel. Ema maca achane, ímahaquenehi eta manarasirahi. Vivaraha vímimaticahahe eta máitupajijiasirava ema Jesucristo ema Nazareno tacanaracáhi eta vipiarasirahi te máijare. Éma, émetatáruhi te crusu, ecaparúhi. Émasera ema Viya macaechepucáhi te máecari. ¹¹ Éti, épurúhi ema Jesús, ema manerejiruquenehi ema Viya. Puiti, ecutipa ena máitucarahana tépiyarecana peti, te náepurupuca eta tatumequene esuíqui táesuíquirayarehini eta peti. ¹² Macarichu ema Jesucristo eta marataha eta macatiuchirahaviya macuchucuirahaviyarehi. Taicha ema Viya manerejiruhichuhi ema Jesús eta macuchucuirahaviyare. Nájina apanaina manerejiruinahi te vimuri viti achaneana eta te juca apaquhe —macahepa ema Pedro.

¹³ Tacahe, ena tuparairucana náraminehi eta náitusirahi téhajicana ema Pedro ema Juan. Náichacacapa:

—¡Tájina vahi napicacaracavahini eta veyehe! Ena nani tájina náitucakenéna eta letra. Máiturreanahi. Tájina náimatíyahini eta veyehe escuela.

¿Máijaracavacahipuca ema Jesús eta náitupajjiasiravahi te macachaneva-caichaha ema? —náichacapa.

¹⁴ Tájina naviyahini nacayema taicha matiarahi ema achane masarini, titupihahi te namirahu. Taicha náimahahi eta yátupirahi eta manarasirahi.

¹⁵ Tacahe, navanecapa eta nacuchusiraya ena apóstoleana eta te náuruji-siavahi. Nanasipa ena aquenucana téchajiricavanaripa. ¹⁶ Ánipa nacahe:

—¿Tájaha vícharacavayare nayehe ena nani? Taicha namutu ena achaneana ticavasanahi te juca Jerusalén náechahi eta náichirahi ena nani eta tiáramicare. Tásiha, vahi visuapacaremahi te vépiyaequenehavacapuca.

¹⁷ Váhisera távaraha vísapa náimiyana náimitureca nayehe ena achaneana. Vípícararecavacaya apaesa vahi nacuimiyana náechajisiha eta máechepusirahipuca ema mácanínavaji Jesús —nacahepa.

¹⁸ Tacahe, nacasiapavarepa ema Pedro ema Juan. Navanecapa éna, ánipa naicha:

—Vahi vivaraha ímiana échajisiha eta juca, váhivare ecuimitureca nayehe ena achaneana eta máechepusirahipuca ema Jesús —náichapa.

¹⁹ Najicapapasera ema Pedro ema Juan, ánipa naicha:

—Esamahavichaha. Ema Viya timetacahavi eta véchajisiháirayare. Étisera ecatichapa véchajisiha éma. Émaquenehisera tisuapacarepanahi eyehe éti. Epanerecha yátupina. ²⁰ Víti, vahi vimatinaimahi eta véchajisiháiraya tamutu eta juca vímahaqueneanahi visamaqueneanahivare mayehe ema Jesucristo —nacahepa.

²¹ Tacahe, ena tupairucana eta nasamirahi eta namasuapirahi, tise-manapa. Tacahe, náipícararecapa. Tájinasera náicharachini. Nacaitcapa taicha tájina naviurevainahini jácani táimicuñacahini. Taicha namutuhi ena achaneana nacunachahi ema Viya táichavenehi eta náimahaquenehi.

²² Cuarenta áñoripa eta mahañora ema maca achane masarini. Tétavacavahi eta tiáramicarevahi eta manarasirahi maicha ema Vi ya.

Ena téhicana ema Jesús tiyaseserecana eta natumesamurevaina

²³ Eta náuchucuiraripa ema Pedro émapa ema Juan, tiyananapa eta te návihahi ena nachamuriana. Nametacapa tamutu eta nacatianasirahi ena tupairucana. ²⁴ Te náechapa, ena nachamuriana tiyujaracanapa namutu. Ánipa nacahe eta nayujarasirahi:

—Tata Viáquenu, píti pépiyacahi eta anuma, eta apaquehe étapa eta ichapequene une mar. Pétipiricahi tamutu eta juca vímahaqueneanahi puiti. ²⁵ Píti pimetacahi ema víyarahaini David pivanarainihi eta májucunachiraya eta te Salmo. Ani tacahehi eta májurehi: “Tatiarihiya eta avasareana, ena achaneana navarahaya nacanara ema Viya. Énaparichu ena nujaneanana, énerichuvare napanerechaya nacanara ema Viya. Máetupicushiana éna.

²⁶ Ena réyeana te juca apaquehe tísecavanayare eta nacanarairayare. Énaripa ena aquenucarhana nacapanereruya nacanaraya ema Viya, nacanaraveva ema Cristo manerejiruhi éma” tacahehi eta májurehi ema David.

²⁷ Étaripa te juca víávasa, ticutitacahi eta napanerechirahi ema Herodes Antipas, ema Poncio Pilato, ena apavasanana, énapa ena vijaneanana israelítana, navarairahi nacapaca ema sántoque ne pichicha Jesús, ema pinerejiruquenehi. ²⁸ Títauchavahi naicha eta juca pipanereruana étairayarehi tacaheyarehi eta péchajiriruvana. ²⁹ Pítisera, Tata Viáquenu, pímararacahavihi

puiti eta náichirahavihi viti pivanaranahi. Píjaracahavisera vitumesamu-revaina eta véchajisihairaya eta péchajiriruva. ³⁰ Píjaracahavi eta vítupajijiá-siravaina viratahairaina vicanaraca ena nacajumaqueneana, vímeresiraina eta tiáramicareana táichavenehi eta vicasifñairahi ema sántoquenehi pichicha Jesús —nacahepa.

³¹ Te titápiricanapa eta nayujarasirahi, tíjahúchavapa tiyayacare eta apaquehe návihahi éna. Tacahehi eta mávahásiravácahivare namutu ema Espíritu Santo. Váipasare napicacaracavahini eta náechajisirahi eta máechajiriruva ema Viya.

Ticajicacanahi tamutu eta náimahaqueneana

³² Namutu ena nasimutuvaqueneana tisuapajirahianahi, ticiticacahi eta napanereruana eta nacajicacairahi. Namutu nácani téchanahi eta náimahaqueneana nacayehequeneanahi, vahi nayavanihacacahini. Tatupiruvahi te nasamureana eta nacajirahi. ³³ Tacahe, tímiyanavanahi ena apóstoleana eta náechajisihairahi eta máechepusirahi ema Viáquenu Jesucristo. Tisuapacarepaicha eta náimiturapianahi. Máimicatavacahivare ema Viya ena téhicanapahi ema Jesús. Namutu éna, típicauchacareanahivare ne achaneana. ³⁴ Nájina émanáinahíni te nataracu máemepaurechavahíni. Taicha ena ticayeheana apaquehe, pétipuca, náijararecapaipa. ³⁵ Tásiha, náijaracavare eta plata ena apóstoleana. Tásiha, ena apóstoleana náijaracavacavare nácani páurepananahi.

³⁶ Matiarihivare ema achane ticaijare José. (Éma máuchurehi eta te tiúrupuhi te mar ticaijare Chipre.) Ema maca José náumurivaichaha ena levítana. Ena apóstoleana nanacapa eta máijarehi Bernabé (te véchajiriruva ticaijare Ticaurisamurerahi). ³⁷ Ema maca máijararecapa eta mapenapahini. Tásiha, máijaracapa eta plata ena apóstoleana.

5

Eta mapecaturahi ema Ananías ésupa esu mayena Safira

¹ Matiarihivare ema achane ticaijarehi Ananías ésupa esu mayena ticaijaru Safira. Énerichuvare náijararecapa éna eta nayehe apaquehe napenapahini. ² Ema maca achane macaerajicapa ticutimuriahacaca eta plata tavachahi eta mayehe apaquehe. Esu mayena suéchahi eta mayumurusirahi eta ticutimuriahacaca eta plata.

Tacahe, te títicapapa ema achane nayehe ena apóstoleana, máichapa:

—Níjararecahi eta nuyehe apaquehe. Júcahi tamutu eta plata tavachahi —macahepa.

³ Tásiha, ema Pedro máichapa:

—Píti, Ananías, ztájaha tacayema písapavahi ticaetemavi ema Satanás? Pípanerechaipa pivayuaracayare ema Espíritu Santo eta piyumurusirahi ticutimuriahacaca eta tavachahi eta piyehe apaquehe. ⁴ Pímaha, Ananías. Piyeherichuhi eta apaquehe píjarareruhi. Nájina tipamicavinahi eta pínaiquisiravahi. Puiti eta juca píjarasiravahi pinaquicava, pépiyahirahipaipa pímiyahachi tamutu eta juca plata tavachahi eta piyehe apaquehe. Pátupiruvapaini eta pivarahaquenehi pinaquica. Émasera ema Viya máimarracachi eta juca pépiyahiraivahi. Vahi vítinahini pivayuaracahini —máichapa ema Pedro.

⁵ Te masamapa ema Ananías eta juca, tiáquipaicavapa, matupiru tépena. Te nasamairiricapa ena achaneana, namuturinehi tipicana ichape. ⁶ Tacahe, nararihi ena natuparaháichuhi técararecana. Navehapa eta máquehe ema Ananías. Náyuruacapa. Námapa te ecari, náecarapanapa.

⁷ Te táequenepa eta mapanaquene hora, titecapapa esu Safira, mayena ema Ananías. Vuíchaha suéchahini eta máicharacavahi ema suima eta máepeni-raipahi. ⁸ Tacahe, ema Pedro mayaserecapa, ánipa maicha:

—Pimetacanu. Eta juca plata mámaquenepahi ema pima, ¿étahipuca tamutu eta tavachahi eta eyehe apaquehe? —máichapa ema Pedro.

Tásiha, sujicapapa:

—Eta tavachahi tamutu —suíchapa.

⁹ Tacahe, ema Pedro máichapa:

—¿Tájaha tacayema ecuticacahi eta juca épiyahiraivahi evayuarasirahi ema Espiritu Santo? Ávane tichavana ena técarapananahi ema pímaini. Tásiha, puiti pítipavayare tiámavianayare —máichapa.

¹⁰ Tacahe, eta máichirahi ema Pedro, enevanepa tiáquipaicavahi ésu te máivapechacaya ema Pedro. Tépenavarepa. Te tichavanapa ena técarapananahi ema suímaini, náimaharinehi ésu tépenaipavare. Navehavarepa esu, námavarepa náecarapana te machacaya ema suímaini. ¹¹ Te nasamairiricapa namutu ena achaneana, ichaperinehi eta napisira ema Viya, navetijipa eta napisirahi ena téhicanahi ema Cristo.

Májaracahi ema Viya ena apóstoleana eta náimeresiraya eta tiáramicareana

¹² Tacahe, ena apóstoleana, ichape eta májarasiravacahi ema Viya eta náimeresirayare eta tiáramicareana te namirahu ena apamuriana achaneana. Ticurujicacánahivare tamutu sácheana ena tisuapajirahiana te náurujisirareva te tajuhe eta Templo, te tayehe eta alar máepiyaruhi ema reyni Salomón. ¹³ Namutu ena apamuriana achaneana máehicarahanaríchaha ema Jesucristo, vahi napatsicavahini nacanara taicha namutu napicauchahi. ¹⁴ Camurianapaipasera ena ajairana énapa ena esenana ena téhicanapaipahi ema Jesús. ¹⁵ Camurianaipa ena nacanararuanapáipahi ena apóstoleana. Tacahe, námavacapai ena apamuriana nacajumaqueneana, nanaquicapaipa te calle mayanihayarehi ema Pedro. Eta máetavisirayarehi éma, távichayare eta macuna, tacanaracayarehi eta najumana. ¹⁶ Énerichuvare, titecapanapa te Jerusalén ena achaneana tiásihana te avasareana nachacayarahanahi. Námapai ena nacajumaqueneana énapa ena návaháruana ena éreanana. Namutu ena nani tinaracanapai tayehe eta náichavaquenévanahi.

Naémeratacapa ema Pedro émapa ema Juan

¹⁷ Váipasera máuricahini eta juca ema corregidor, énapa ena machamuriana. (Saduceóanahi éna.) Tisemanarinehi táichavenehi eta náehisirahi ena camuriqueneana achaneana eta náimiturapihi ena apóstoleana. ¹⁸ Tacahe, nacavnairipipa nacaratatajica ena apóstoleana. Náimisipapa te cárcel, ticaeratanapa. ¹⁹ Émasera ema Viya majaneacavacahi éna. Te jena yati, mavanecapa ema mayehe ángele. Mavejiapana eta cárcel návihahi éna. Mavanecapa náuchuca, ánipa maicha:

²⁰ —Eyana ímerecava te jena Templo. Emetaca ena achaneana eta mavarairahi ema Viya máitsivachaya arairuya eta náitaresirayare ena téhicanaya ema Jesucristo —máichavacapa ema ángele.

²¹ Náuchusihapa ena apóstoleana te cárcel, timapicucuhichaha te tiyananapa tayehe eta te Templo. Tinahacavanavarepa títiturecana.

Tacahe, te jena yáticarahi ema corregidor mavanecapa ena comisarioana máimichuhapa namutu ena apamuriana tuparairucana énapa ena náiyacarana israelítana. Te tiúrujicavanapa namutu, nacavanairipipa náepana ena apóstoleana eta te cárcel. ²² Te títicapana eta te cárcel ena suntaruana, navejiacapa eta tapaja. Nájinaripahisera. Tacahe, tichavanapa nayehe ena náquenuruhana. Nametacapa eta nájinaripahi ena apóstoleana. ²³ Tacahe, náichapa:

—Te vítecapauchapa eta cárcel, vímahapa tanasihi ticaeratahi eta tapaja. Natiarihivare ena séntinelana tijaneacanahi eta tapaja. Tacahe, te vivejiacapa eta tapaja, nájina émanainahini vichimapahini te tajuhe —nacahepa ena vanairucana.

²⁴ Te máechapa ema corregidor, énapa ena machamuriana tuparairucana, émapa ema náquenumuri ena tasuntarurana eta Templo, náramirinehi ichape. Tacahe, náichacacapa:

—¿Tájaha tacayema eta juca? Vaipa vímatiequeneha. ¿Tájahapuca vícharacavaya? —náichacacapa.

²⁵ Téchajiricavanarichaha éna, títicapanecha ema émana achane. Mametacavacapa éna. Ánipa macahe:

—Ena naena ajairana érataruanahi te cárcel, náenahi ánaqui te Templo títiturecanahi nayehe ena achaneana —máichapa.

²⁶ Tacahe, ema náquenuruha ena suntaruana, émajacaruva tiyana. Mámamurihapaipahi ena suntaruana, náepanayarehi ena apóstoleana. Jéhesare, námamurihapa, tájinasera náicharacpahini eta námirapahi taicha napicahi ena apamuriana achaneana natupisicavacahini te márijahiana. ²⁷ Te nacaitcapapa, nacatupihapa te namuri ena tuparairucana. Tásiha, ema corregidor ánipa maicha:

²⁸ —Víti vivanecahehi muraca eta vaipa ecuapechava ecuítitureca eta máchepusirahipuca ema Jesús, tasiha, éti ímiyanavarichucha ímitureca. Namutupa ena achaneana tayehe eta juca viávasa Jerusalén náitucapa eta ímiturapiana éti. Visapihapa evaraha vítiyare táecatiha eta máepenirahi ema achane Jesús. ¿Tájaha tacayema vahi esuapahavihini? —macahepa.

²⁹ Tacahe, ema Pedro énapa ena apamuriana apóstoleana najicapapa, ánipa naicha:

—Tatúparáca mativayare visuapa ema Viya. Éma tisuapacarepana eyehe éti. ³⁰ Víti, véhicahi ema Viya, émarichuhi nacasiñaquenehi ena viáchuca-naveanaini. Émahi ema ticaechepucahi ema Jesús, ema ímicaparuhi eta émetatasirahi te crusu. ³¹ Tásiha puiti, ema Viya máunacahi te anuquehe anuma. Macaejacahi te mavauere tayehe eta trono. Májaracaripa eta matuparahayarehi Aquenucaharehi Ticatiurahiyareva. Taicha mavarahahi ema Viya vimutuyare viti israelítana véneuchavaya mayehe, apaesa éma tiperdonachahaviyare tamutu eta vipecaturana. ³² Víti véchajisihahi eta juca taicha vímahaquenehi eta mápechiravahi títareca. Víti véchajisihahi maicha ema Espíritu Santo májararuhavihi ema Viya veyehe viti visuapana éma —náichapa ena apóstoleana.

³³ Te nasamapa eta juca ena aquenucana, tiseamana. Navarahapa nacapacavacayarehini. ³⁴ Matiarihisera te nataracu ema achane ticaijare Gamaliel. Ema tuparairucahi doctrinero fariseo. Ema maca achane

ticapicahuhi nayehe namutu ena achaneana. Tacahe, titupihapa te nami-
rahu. Macavanairipipa náuchucachaha ánipina ena apóstoleana. ³⁵ Tacahe,
máichavacapa ena machamuriana aguenucarahana:

—Tátanaveana, nujaneanana israelítana. Échapava eta evarahaquenehi
íchaya nayehe ena nani achaneana. ³⁶ Échapuca éti cape juca táitaresirahi,
téchepucahi ema émana achane ticaijare Teudas. Éma macahehi eta máitupa-
jijíásiravahi. Tásiha, camuriana ena achaneana téhicanahi. Cuátrocie-
ntoanahi ena ajairana ena machanerana. Tásihasera, nacapacahi ena
mánarana. Tásiha, namutu ena téhicanainihi téjanerepaicanahi. Títavapa
tamutu. ³⁷ Tásiha, te táequenevarepa, te jena sache eta nacatupairahi ena
achaneana, téchepucavarepa ema apana ema ticaijare Judas, ema ticavasa te
Galilea. Camurianavare ena téhicanahi. Énerichuhivareséra nacapacahi ena
mánarana. Namutuhivare téjanerepaicana ena téhicanainihi. ³⁸ Tiuri puiti,
esamanu eta juca numetaruheya. Ésamiricachucha ena nani achaneana.
Vahi ecuimicasiapava nayehe. Taicha eta juca náichaquenehi te nayehe-
chuchapuca éna, títavayarehi. ³⁹ Téheserapuca mayehihi ema Viya, vahi
eratahaimahi ecamitiaca. Échapavachucha. Machu ecucaemuñava ecanara
ema Viya —máichavacapa.

⁴⁰ Tacahe, tésamiricavanapa namutu. Náimisipavarepa ena apóstoleana.
Náestacavacapa. Tásiha, navanecavarepa eta vaipa nacuapechava nacuecha-
jisiha eta máechepusirahi ema Jesús. Tásiha, nacaicavacapa. ⁴¹ Tacahe,
tiúchucanapa ena apóstoleana te náurujisiavahi ena tuparairucana. Tiúrisamu-
reanapáichucha eta nacaestairahi. Ánipa nacahe:

—Ema Viya máimarracahi eta vicamichirahi tamutu eta náimicatsiriasira-
havíhi táichavene eta véhisirahi ema Jesús —nacahepa.

⁴² Váhiquene nacatsimavahini. Tímiturecanáichucha tamutu sácheana,
náechajisihahi ema Jesucristo. Tímiturecanahi te Templo étapa te pétiana.

6

Ticatuparacasiana ena siéteana ajairana

¹ Te jena sácheana, eta nasimutuvaipa ena téhicanahi ema Jesús tisiapa-
napaipa ticajanemurianapaichucha. Natiarihivare ena israelítana, apáecha-
jírírúvanarípa éna. Natiarihíhi ena páurepanana te nataracu énapa ena
máimaruana. Ena nani najacapahi eta nayehe ración tamutu sácheana. Étana
sache, ena nani apáechajírírúvanarípa vaipa náurisamurehini taicha vaipa
nácuticacahini náechapajirícahíni ena máimaruana. Ánipa nacahe:

—Váipa nácuticacahini eta najacapirahi eta tinicacare ena vijaneanana-
richuhi máimaruana —nacahepa.

² Tacahe, ena dócequeneana apóstoleana nacurujicapa namutu ena
téhicanahi ema Jesús. Tásiha, náichapa:

—Vahi táuricahini víchepaichahini eta vicametarairuira eta máechajiriruva
ema Viya. Ticaichepairicahavipa eta vijarasirahi eta tinicacare ena
vichamuriana. ³ Tiuri puiti, nuparapenaveana, tacamunu vinacayare
siéteanaina ena ajairana te emuri éti, nácani ímatiqueneana tiúriana achane,
téchemarahiana náimatiequeneha tamutu, mávaháruanahivare ema Espíritu
Santo. Énaina vituparaca naicha eta juca. ⁴ Taicha víti vímíyanavayare

viyujaraca vímiturecayare eta máechajiriruva ema Viya —náichapa ena apóstoleana.

⁵ Tacahe, namutu navaraha eta náechajiriruvahi. Tacahe, ticanerejianapa ena ticatuparahanayare. Navehapa ema Esteban, achane tiuri, tisuapajirahiquene mayeheni ema Viya, mávaháruhivare ema Espíritu Santo. Navehavarepa ema Felipe, ema Prócoro, ema Nicanor, ema Tímón, ema Parmenas, émapa ema Nicolás*. ⁶ Tacahe, náichuhapa te namirahu ena apóstoleana. Tásiha, nanacapa eta navahuana te nachutiana, nayujarauchapa, náijarasihapa eta náematanerepiyarehi.

⁷ Tiuri, eta nasamirahi eta máechajiriruva ema Viya, camurianapaipaicha ena téhicanahi tayehe eta avasare Jerusalén. Tisimutuanavare ena tiyujaracarahiana israelítana náunacaipa te nasamureana eta náehisiraipa ema Jesucristo.

Eta nacaratasirahi ema Esteban

⁸ Tiuri, ema Viya máimicatacahi ema maca Esteban. Máijaracahivarehi eta ichape eta máichirahi eta tiáramicareana te namirahu ena achaneana. ⁹ Tatiarihivare te Jerusalén eta apana náurujisirareva. Tiúrujicavanahi ena israelítana prisionéroanaini náuchucureanapasera. Éna tiásihanahi te apanana avasareana, te Cirene, te Alejandría, te Cilicia, étapa te Asia. Nácapaemajiricapa ema Esteban te yátupihipuca ema Jesús émaquenehi Cristo. Vahi nasuapahini taicha tétavicavahi eta namasuapajiraivahi. ¹⁰ Ema Espíritu Santo máijaracahi ichape ema Esteban eta máitusiraya téchajica. Eta tacahe, vahi náratahahini nacachuriaca éma. Tisemanapa eta máitahasiravacahi. ¹¹ Tacahe, náimitucapa ena apinana ajairana navachachaqueneanahi eta náepiyequenehairaya ema Esteban. Ánipa naicha eta náimitusirahi:

—Visamahi ema maca macaeca-hihi ema víyarahaini Moisés, macaechivare ema Viya —náichapa.

¹² Tacahehi, eta nacaechepusirahi eta semanere nayehe ena achaneana, énapa ena aquenucarahana, énapa ena escribánoana. Náimiyusemacavacapa. Tásiha, nacaratacapa ema Esteban. Námapa ticayaserehiya te namirahu ena tuparairucana. ¹³ Tásiha, náichuhavare ena apamuriana tépiyaequenehanaya. Ánipa nacahehi eta náepiyahiraivahi:

—Ema maca achane vahi máituca timatina macaeca-hi eta viyehe Santo Templo. Máepuruvare eta viyeherepiana. ¹⁴ Énerichuvare macahehi ema Jesús Nazareno máquipaipayareji eta Templo, máitsivachayarehiji eta viyeherepiana máijararuhavihi ema víyarahaini Moisés —náichapa ena tépiyahira-hianahi.

¹⁵ Tacahe, namutu ena natiarhiqueneanahi náejaruanahi náimaracaripa ema Esteban. Eta mamira macavasirahi ema ángele.

7

Eta maconsejapapi ema Esteban

¹ Tacahe, ema corregidor mayaserecapa ema Esteban, ánipa maicha:

—¿Yátupihí ene picahehi eta juca nametarapianahi ena nani? —máichapa.

² Tacahe, majicapapa ema Esteban, ánipa maicha:

* **6:5** Ema maca Nicolás, ticavasainihi eta te avasare Antioquía eta máuchusinehi. Éma, apavasanahi, máehicahinivare eta nayeherepiana ena israelítana. Tásiha puiti, máehicaipa ema Jesucristo.

—Tátanaveana, nuparapenaveana. Esamanuchaha. Eta acane, ema Viya tiúcupaicahi másihahi te mávasa anuma. Tímerecavapa mayehe ema viáchucaini Abraham. Ema Abraham, mávichaichaha te tinapaica te apaquehe ticaijare Mesopotamia, ticaijarevare Caldea. Vuíchaha mayanahini macavasa-hini te Harán. ³ Máechajicahi ema Viya ema Abraham, ánipa maicha: “Pijunijica eta juca piávasa, énapa namutu ena pijaneanana. Piyana eta te apana apaquehe. Núti níjaracaviya eta arairu piávasaya” máichapa ema Viya. ⁴ Tacahe, ema Abraham masuapapa; tiúchucapa eta te tinapaica te Caldea. Tiyanapa eta te avasare Harán. Te táequenepa eta máepenirahi ema máiyaini, mavanecapa ema Viya ema Abraham máiteca eta te juca apaquehe viávihahi puiti víti. (Te jena añoana ticaijarehi Canaán.) ⁵ Tájinasera máijaracahini mayehenahini apaquehe, ánicuchicháinahipucáini. Mametacahisera eta máijarasirayarehi eta mayehyarehi apaquehe. Taicha eta apaquehe máijaracayarehi nayeheyarehi ena machichanavequeneana te maépenapa ema Abraham. Nájinarichahasera machichanaveanainahini te jena añoanahi. ⁶ Énerichuvare mametacahi ema Viya, ánipa maicha: “Ena pichichanavequeneanayare ticavasarecanaya nayehe ena apavasa-jucua. Ticatajivanayaresera naicha ena napaureanaya. Nacajireyare. Cuatrociento añoayare eta náichirayare. ⁷ Nútisera, níjaracayare eta náicufayare ena achaneana te jena avasare nácani ticajireanayare ena pichichanavequeneanayare. Tásiha, te táequenenapa, nucuchucuhavacainapa. Tásiha, títecanainapa ani te juca najirauchihanuyare” máichapa ema Viya.

⁸ Ema Viya mafirmachapa eta matratune eta máitauchirayarehi eta juca máechajiriruvahi mayehe ema Abraham. Énerichuvare mavanecapa ema Abraham timarcachavayare, máicutiarayarehi eta macasiñavairahi me Viya. Namarcachayareva namutu ena machichanaveana ajairana, énapa ena mámariequeneana ajairana. Eta tacahehi, te óchoquenepa sache eta máuchusirahi ema Isaac machicha ema Abraham, mamarcachapa. Énerichuvare, máichahi ema Isaac te macachichapa ema Jacob. Ema Jacob, énerichuhivare máichavacapahi ena dócequeneana machichanaveana, ena víyanaveanaini víti. ⁹ Ema José, nacapinaruhi ena maparapenaveana taicha máemunacapanahi ema naiya. Eta tacahe, náijararecapa ena maparape-naveana nayehe ena apavasanana. Tásiha, éna náequcapa náijararecapa mayehe ema ticvasa te apana avasare Egipto. Émasera ema Viya majaneac-ahi ema amaperu José. ¹⁰ Macatiuchahivare tayehe eta macatajivairana. Máijaracahivare eta máitucaquenyare. Ema rey aquenucahi tayehe eta Egipto máemunacahi ema José. Máimatiacahi eta máitusirahi. Eta tacahe, ema rey macajupahahi eta majaneasirahi tamutu eta máimahaqueneana. Aquenucahi máicha, nayehe namutu ena ticavasana te Egipto.

¹¹ Tásiha, te jena añoanahi, táitecapauchapa eta ecuha te tamutu eta avasareana tayehe eta táunavahi eta Egipto éapa eta Canaán. Tétavicavahi eta nacatajivairahi ena achaneana. Tásiha, ena viáchucanaveanaini, tájina naviyahini eta nanicaquene. ¹² Émasera ema Jacob te masamairiricapa eta tatiarahirahi eta tinicacare te Egipto máunaruhi ema rey, máevatacapa ena machichanaveana eta navacharepana eta tinicacare. Te téchuricanavare eta tinicacare, mápechavarepa máevataca ena machichanaveana. ¹³ Te apihe-quenepa eta nachavirahi, ema José tímimatichavapa nayehe ena mapara-penaveana. Tacahe, ema rey mapaenumavapa máimati énairahi maparape-

naveana ema José. ¹⁴ Tacahe, ema José máimichuhapa ema maiya Jacob énapa ena natiarihiqueneanahi te mapena. Setenta y cincoqueneana eta nasimutuva éna. ¹⁵ Tacahehi eta mayanirahi ema Jacob macavasairahi tayehe eta te Egipto. Étapa máepenihahi. Te táequenepa, étarichuvare náepenihahi ena machichanaveanaini viáchucanaveánaini. ¹⁶ Váhisera nacaecarasihini eta náperanaini te Egipto. Nacayecapa eta nacaecarasirahi eta te ecari te tachachacu eta avasare Siquem te tinapaica eta Canaán. Étarichuhi eta máecari ema Abraham*.

¹⁷ Tiuri, tiánehipa eta máitauchirayarehi eta máechajiruvahi ema Viya matratunehi mayehe ema Abraham, ánaquiaparíhaha eta áñoana eta máíjarasirayarehi eta apaquehe nayeheyarehi ena machichanavequeneana. Ena nachichanaveana ena viáchucanaveanaini, ánaquipa náejapasihahi te Egipto. ¹⁸ Tayerevahi eta año, titupihapa ema apana rey te Egipto. Éma arairuhi rey, vaipa macapayacahini máimatihini ema José. Váipavare mávarahahini maecha eta manaquiruanainihi máemataneanainihi ema José. ¹⁹ Masapihapa macatianacavacahi ena viáchucanaveanaini taicha eta náejapasirahi éna. Macaetemajiricavacapa. Macavanairipipa eta vahi nacueperajica ena amuyana ajairachichana náuchusiravanahi. Najunijica apaesa vahi nacuitareca. ²⁰ Tacahe, te jena sácheanahi, tiúchucapa ema amuya alauchu Moisés. Ema Viya máemunacahi ichape ema maca amuya. Mapana caje eta nacajurusirahi ena ticachichana te napena. ²¹ Te náimahapa téchemarahipaipa ema amuya, vaipa mayumurucacarehini. Tacahe, nayumurucapa ema amuya te pacurechicha te curichepiraquiana távihahi te cajacure. Ésusera esu machicha ema rey suíchimavapa, suvehapa. Ésupa ticajurucahi suchichayarehi. ²² Tacahe, ema amaperu Moisés ticaimitucasipa tamutu eta náitupajijiásiravanahi ena ticavasanahi te Egipto. Tacahe, ichape eta máitupajijiásiravahi eta máechajisirapahi étapa eta máemataneanianahi. ²³ Te ticayehepa cuarenta año ema Moisés, mavarahapa tiyana máejirapanavaca ena majaneana israelítana. ²⁴ Te títecapapa ema Moisés, máimahapa ema émana achane ticavasa te Egipto téhararecahi, máehahi ema majaneana ema Moisés. Tacahe, macatiuchapa ema majaneana. Émapa títsirijiequenehahi. Macapacapa ema ticavasa te Egipto. ²⁵ Eta mapanereruhi ema Moisés, mavarahahi nacaicutiarayare ena majaneana eta mavaneruirahi me Viya eta macuchucuiravacayarehi eta te nacatajivairahi. Váhisera nácaicutiarahini éna. ²⁶ Tacahe, te apanaquehepa sache, ema Moisés máimahapa téhacacani ena apinana majaneana. Mavarahapa macaichepaica. Máichapa: “¿Tájaha tacayema éhacaca éti? Ímaha eparapecahi” máichapa. ²⁷ Tacahe, ema túmepanahi mayehe ema apana, máevatajicapa ema Moisés, máichapa: “¿Tájaha tacayema pímisipava píti eta viyehé? ¿Nájahapuca tivanejavíhi juéseviyarehi eta viyehé, viáquenumuriviyarepuca víti? ²⁸ ¿Pivarahapapuca picapacanuyareva núti, tacutiya repuca eta picapasirahi cape ema egipcio?” máichapa.

* **7:16** Ánaquiaparipa tatiarihi eta avasareni Siquem, návasa ena mámariequeneana ema achane ticaijare Hamor. Te tachacaya eta jena avasareni, tatiarihihi eta mari enurujuhe. Tacahe, ánaquiaparipa ema Abraham mavacharecapa eta apaquehe táimivehapa eta mari enurujuhe, mavarairahi sucaecarasiyarehi esu mayena Sara, énapa namutu ena machichanaveana. Émaripa étarichuyareva macaecarasiyahi. Ena machichanaveana ichapemuríhi áñoana eta máechapajirisirahi eta ecari, taicha étarichuyarehi nacaecarasiyarehi éna, énapa ena apamuriana mámariequeneana ema Abraham.

²⁹ Te masamapa ema Moisés eta náechirahi ena achaneana émairahi ticapaca, tiyanapa tijunahi eta te apaquehe ticajare Madián. Ánaquipa eta máerajisiavahi máitatijiyavahi. Mavehapa esu mayena, ticaparapepa. Apinana ena machichanaveanahi ajairana suyehe esu mayena.

³⁰ Te cuarenta áñoa eta mávhairahi ánaqui, te étana sache, tipairiricahi te mávaphiana apaquehe tachacaya eta cerro ticajare Sinaí, majanearesirahi eta uvesana. Tacahe, tiúcupaicapa ema Viya eta te távihahi eta chéyaraji yucuqui. Timurujirinehi eta yucuqui maicha ema Viya. Váhisera tájuchahini táitahini eta tapacajiana. ³¹ Eta máimararasirahi eta juca ema Moisés, máramirinehi. Tiyanapa mapaucha, máimatiyarehi. Te macachacayapa, masamapa eta mahu ema Viya. Ánipa máichahi: ³² “Nútichucha Viya nacasiñaquenehi ena piáchucanaveanaini. Nútirichu macasiñaquenehi ema Abraham, ema Isaac, émapa ema Jacob” máichapa ema Viya. Tacahe, ema Moisés tiyayacareinehi eta mapisirahi. Vaipa mapatsicavahini máimararacahini. ³³ Tásiha, ema Viya máichavarepa: “Pivejuchupevachava eta péparupeva taicha santo eta juca apaquehe piávihahi piácatayapairuhi. ³⁴⁻³⁵ Pisamanuya puiti, jucarihi numetacaviyare. Núti nímararacahi eta nacatajivairahi ena nuchanerana tiávianahi te Egipto. Nusamahi eta náiyairahi. Nuvaraha nucatiuchavacayare. Eta tacahe, núcupaicahi numetapanaviya. Nuvanecaviyare puítirichu piyana tayehe eta Egipto, picuchucuhavacayarehi” máichapa ema Viya.

Tacahehi eta matuparasirahi ema Moisés mayehe ema Viya, mavaneruhi náquenumuriyarehi ena majaneanana, macuchucuhaya éna eta te nacatajivaiyahi. Étasera te tinapucainapa vahi náesachahini éma. ³⁶ Tásiha, émarichuhi ema maca Moisés macuchucuhavacapa namutu ena majaneanana tiásihanahi te Egipto. Eta macuchucuiravacahi, máimerecahi eta tiáramicareana te jena avasare Egipto, étapa eta te mar ticajare Títsiama Une, étapa te mávaphiana vamáhi. Cuarenta año macahehi ema Moisés eta máichirahi eta juca. ³⁷ Émarichuva ema Moisés ticaechajiriruvahi nayehe ena majaneanana israelítana eta máuchusirayarehi ema profetayare. Máichapa: “Ema Viya Dios tivanecanuhi núti numetacaheyare eta máechajiriruva. Títecyare ema apanayare profeta mavaneruyare ema Viya, tacutiyare eta mavanesianuhi núti. Éma, tiúchucayare te namuri ena viámariequeneanayarehi. Tatuparaca nasuapayare tamutu eta mavanairipianayare” macahehi ema Moisés. ³⁸ Émarichuvare ema Moisés, ema máichuhaquenehi ema ángele tiápanaya eta te jena cerro Sinaí, nacuchapirahi ena achaneana machamuriana te vamáhi. Tasiha, máechajicahi ema Viya ema Moisés. Te títipiricapa ema Viya, ema Moisés tiúcupaicapa, mametacavacapa ena achaneana tamutu eta mametacasivanahi me Viya. Énerichuvare ema Moisés májuchapahi te libro eta mavanairipiana ema Viya, tisuapacareanahi viyehe viti israelítana véhicanaya. ³⁹ Eta mávhairahi ema Moisés te cerro, vaipa náimahahini ena viáchucanaveanaini. Tásiha, vaipa návarahahini náehicahíni éma. Navarahapa tichavanayarehi te Egipto. ⁴⁰ Tacáhénapa, te náichapa ema Aarón: “Vivaraha pépiyasinahavi eta visiñarajina táinapumirauchahaviya, taicha vaipa vecha tájahapuca máicharacavahi ema Moisés, ema ticuchucuhahavihi tayehe eta viávínénihi te Egipto” náichapa. ⁴¹ Tacahe, náepiyacapa eta nasiñarajiyarehi, amairiha oro, tavasimahi eta torillo. Napiestachayarepa eta náepiyaruhi nasiñaraji. Tacahe, ticaparecanavare eta vaca; náijaracasichahi eta nasiñaraji

eta námavahuhi, náimicutichaipa ema Viya. Ténicacanapa. Tiúrisamureanapa eta náimairahi táurinavahi eta nasiñaraji náepiyaruhi. ⁴² Émasera ema Viya, eta máimairahi eta juca, vaipa máuricahini. Tásiha, vaipa majaneacavacahini éna. Váhiserá máicuñacavanehini. Máisapapa ticasiñarajiana, téneuchavanapa te tamirahu eta nasiñarajiana. Tásiha, tamutupa nacasiñaraji eta jarairiquiana. Taicha ánipa tacahehi eta Sagrada Escritura nájurehi ena profetana. Ánipa maicha ema Viya: “Émitiscanuhi núti, eti israelítana. Vaipa nútinahini ácasíña eta jena cuarentaquenehi año te mávapahi vámahí. ⁴³ Étapa ecasiñahi épuyumirauchahi eta esiñarajiana ticaijare Moloc. Énerichuvare ecasiñahi eta jarairiqui ticaijare Renfán. Eta ecaparuhi, vahi nútinahini íjaraca. Étapa íjaracahi eta esiñarajiana. Éti, éperajiricapa eta esiñarajiana te tayeheana trono tapenahuana épiyruanahi. Eta tacahe, nucajanerepaicaheya te apachacaya apaquehe ticaijare Babilonia” máichapa ema Viya.

⁴⁴ Te jena mávapahi vámahí ema Moisés mavanecapa ena viáchuca-naveanaini náepiyaca eta mapenayarehi máucupaisirareyarehi ema Viya. Mavecunaruhi eta tiáviha te anuma máimechaquenehi ema Viya. Étarichu náunasirare eta ajureca tiáma eta mavanairipiana ema Viya. ⁴⁵ Te tépenapa ema Moisés, máevachacapa ema Josué émapa máitsivahi téchapajiricayarehi ena achaneana. Tacahe, tiyananapa mámamurihapa ema Josué. Ena achaneana námaphi éna eta mapena máucupaisirare ema Viya. Nacaijuhépa eta apaquehe natuparahahi. Natarihisera ena achaneana ticavasana tayehe. Váhiserá tácajerahichaini eta náitahasiravacahi ena nánaranahi taicha ema Viya máimicatacavacahi. Tacahe, tayerevahi eta áñoana ena náeperajicahi eta mapena ema Viya. Te tijurucapa ema rey David, ticatuparahapa, machimapapa eta tatiaríhírichaha. Émapavavare máechapajirica. ⁴⁶ Taicha ema maca rey David máemunaruhi ema Viya. Tacahe, ema David mavarahapa tépiyarecaya eta mapenaya ema Viya amairihayarepa mari. ⁴⁷ Váhiserá táitauchahini eta mapanereruhi ema David, taicha ema Viya vahi máisapahini. Émapa títauchahi ema machicha ticaijare Salomón. Émapa tépiyacahi eta Templo.

⁴⁸ Tiuri puiti, numetacahévere, ema Viya ticavasahi te anuquehequene anuma. Vahi títecaimahi macapena te témploana vépiyruanasami viti páureanasami achaneana. Taicha ema Viya máichapa eta máechajiriruva: ⁴⁹ “Te anuma táviha eta nuyehe trono néjasihahi. Ánaqui tásiha eta nuvanairipiana tayehe te juca apaquehe. Núti vahi nácamunu eta peti te juca apaquehe. Núti vahi nácamunu eta nunarasirarena. ⁵⁰ ¿Váhipuca échava eta nútirahi népiyaca tamutu eta juca ímahaqueneanahi te juca apaquehe?” macahepa ema Viya eta máechajiriruvahi.

⁵¹ Puítiripa eti esamararacuananahi, ¿tájaha tacayema éhicahi eta namuracsamurevanaini ena iáchucanaveanaini? Váhivare ávarahahini esama puiti eta máechajiriruvahi ema Viya táichavenehi eta evainarajisamurevavacahi étapa eta emasupirahi ema Espíritu Santo. Éti, eta epaneruana tacuti eta napanereruana ena iáchucanaveanaini eta navainarajivana. ⁵² Éna, náemecatajivachahi namutu ena profetanaini. Nacapacavacahi nácani téchajisihanahi eta máitesirayarehi ema Cristo. Tásiha puiti, eta máitesiraipa aní, épururipa éma, masapihapa íjararecahi ímicapacahi éma taicha tétavicavahi eta máurivahi. ⁵³ Étaripa eta mavanairipiana ema Viya, ángeleana ena tíjarapa-

nanahi ema Moisés. Échajicuhaipahinéni éti, esamaripahinéni; váhiqueneséra esuapahini —máichapa ema Esteban eta maconsejachiravacahi.

Eta máepenira ema Esteban

⁵⁴ Te nasamapa ema Esteban eta máichirahi, tiseanmarinehi. Tinicavamarinehi eta nasemaneva. ⁵⁵ Émasera ema Esteban vahi mapicaracavacahini éna taicha mávaháruhi ema Espíritu Santo. Máesenicapa te anuma. Máimaharine eta majaraiva ema Viya, émapa ema Jesús titupihahi te vaure tinapaicahi eta majaraiva ema Viya. ⁵⁶ Tacahe, ema Esteban máichavacapa ena achaneana natiarihiqueneanahi:

—Ésenica te anuquehe. Núti nímahahi eta anuma téjiacahi. Émapa ema Jesucristo, máenahi titupihahi te mavaure ema Maiya —máichavacapa ema Esteban.

⁵⁷ Énasera eta nasemanevahi, tichujiquíñhavanapa. Tijajamurihanapa náetereuchapa namutu. ⁵⁸ Nacaratacapa, námapa te tachachacu eta avasare. Ánaqui eta natupisisihayarehi nacapasihayarehi te márijahiana. Ena téhanahi nanaquicapa eta náepacuhána, natuparacapa ema nayehehi comisario ticaijarehi Saulo. ⁵⁹ Tacahe, nanahacaripa natupisicahi ema Esteban. Tiánehiripa nacapaca. Émasera tiyujarauchavaichaha. Ánipa macahehi:

—Tata Náquenu Jesús, pijacapinanu eta náchaneva.

⁶⁰ Eta máquipaisiravahi, tépuyucapa tipiaracapa muraca. Ánipa macahe:

—Tata, pipardonachavaca ena nani eta juca náichiranuhi napecaturahi —macahepa.

Te títipiricapa eta mayujarasirahi, tépenapa.

8

Ema Saulo mapanerecha mapanajiricavaca eta macatichiravacahi ena téhicanahi ema Jesús

(Hch 22.6-16; 26.12-18)

¹⁻² Ema maca Saulo, eta mapanereruhi tacutíhi eta napanereruana ena ticapacanahi ema Esteban. Tiúrisamurepa éma. Natiarihivaresera ena apamuriana ajairana tiúripanereruanahi. Navehapa eta máquehe ema Esteban, náecarapanapa. Tíyahanapa ichape eta nacatiequenerahi. Étarichu te jena sache tépanavanapa napanajiricavaca muraca ena téhicanahi ema Jesús tayehe eta avasare Jerusalén. Téjanerecanapa náicha, ena camuriqueneana. Tiyananapa te apana avasareana tinapaica te Judea étapa te Samaria. Énasera ena apóstoleana nanasirichuhi te Jerusalén.

³ Tacahe, ema Saulo, ema náinapuarauqipahi ena tipanajiricanahi ena téhicanahi ema Jesús. Tisiapanapaípa te napenana. Nacaratacavacapaípa ena nachimapaqueneanapahi ajairana, esenana. Nachururupaícavacapaípa eta námirapahi te cárcel.

Ema Felipe ticametarairu te avasare Samaria

⁴ Te jácani avasareana náitecapihapahi ena najunaqueneanahi, tímiyananarichucha ticametarairuana eta máimiturapiana ema Jesucristo. ⁵ Ema maca Felipe majunaquenehivare. Títecapapa eta te avasare ticaijare Samaria. Tacahe, ticametarairupa nayehe ena achaneana eta náehisiraya ema Jesús, émaírahi Cristo ema nacuchapaquenehi. Tiúrujicavanapa ena achaneana. ⁶ Namutu nasamararacahi eta macametarairuirahi ema Felipe.

⁷Taicha náimahapa eta macanarasiravacahi ena nacajumaqueneana camuri-queneana: ena muracaquihana, ena tiyayacareana, énapa ena masariana. Camuriana ena éreanana máimijunaqueneanahi te náquehe ena achaneana návaháruanahi. Tipiáreacanapáipa eta náuchusirapahi. ⁸Eta tacahe, ichape-rinehi eta náurisamurevahi ena achaneana tayehe eta jena avasare.

⁹Te jena avasare Samaria, matiarihahi ema émana achane ticaijare Simón. Iápmarehi éma. Ánaquiaparipa eta macaetemajirisiravacahi ena achaneana. Títupajijiácavahi tépiyacava éma. ¹⁰Namutuhi ena nasimutuvaqueneana achaneana énapa ena ticaimahaqueneana nasamararacahi nasuapahi eta macayemaqueneanahi. Nacunacharinehi, ánipa nacahe eta náechajiriruvahi:

—Ema maca achane títupajijiácavahi ichape maicha ema Viya —nacahepa.

¹¹Ánaquiaparipa eta mavayuarasiravacahi éna, tayehe eta mahiápemarevahi. Eta tacahe, napicauchahi éma. ¹²Téhesera nasamapa ema Felipe, nasuapapa eta nasamirahi eta máechajiriruva ema Viya. Náehicapa eta mametarairuhi mayehe ema Jesús eta émairahi Cristo, ema nacuchapaquenehi. Tacahe, camuriana ena ajairana énapa ena esenana ena ticaicachasianahi taicha eta nasuapirahi ema Jesús. ¹³Émaripa ema iápmaréni Simón, masuapavare éma. Ticaicachasivarepa. Máehicapa macachanepaipa ema Felipe. Ichape máramipahi eta ichapequeneana tiáramicareana máichaqueneánapahi ema Felipe.

¹⁴Tiuri, te Jerusalén, nasamairiricapa ena apóstoleana eta náehisiraipahi ema Jesús ena achaneana ticavasanahi te avasare Samaria. Tásiha, ticaevatavaneanapa ema Pedro ema Juan. ¹⁵⁻¹⁶Tiuri, ena téhicanaripa ema Jesús, vuíchaha máucupauchahini ema Espíritu Santo, mávahácavacahini éna. Tacarichuichaha eta nacaicachasirahi eta navarairahi náehica ema Viáquenu Jesús. Tásiha, te títetapanapa ema Pedro ema Juan, tiyujaracanapa nayaseacapa ema Viya máijarasiraina ema Espíritu Santo eta mávahásiravacaina ena téhicanaripahi. ¹⁷Tacahe, ema Pedro émapa ema Juan nanacapa eta navahuana te nápusiana éna. Tacahe, ema Espíritu Santo mávahácavacaripa eta náemamachutíchiravacahi éna. ¹⁸Tacahe, ema Simón eta manecapirahi eta mávahásiravacahi ema Espíritu Santo te náemamachutíchiravacahi éna, mavarahapa éma mavachachavaca ena apóstoleana. ¹⁹Ánipa máichavaca:

—Íjaracanu núti apana eta nítusiraina eta ítucaquenehi, apaesa te nunaca eta nuvahuana te nápusiana ena nácani achaneana, máucupaicapaini ema Espíritu Santo, mávahácaini éna —máichavacapa.

²⁰Tacahe, ema Pedro máichapa:

—Pémitiequenehaya píti étapa eta piplatane. Taicha píti vahi tiuri eta pipanereru. Pímijachahipuca vicavacharapiyare eta máijararuhaviana ema Viya. ²¹Vahi pítiparacaina píti, taicha eta pipanereruana vahi tátupiruvahini mayehe ema Viya. ²²Pínajica eta pivainarajivana. Piyaseaca ema Viya, tijuricati tiperdonachavi eta tamaurivahi eta pipanereruhi píti. ²³Taicha nímaticavíhi eta pétáviuchirahi eta picapinaruraivahi. Eta juca picahehi taicha vahi tínajiacavimahi eta pivainarajiva —máichapa ema Pedro.

²⁴Tacahe, tipicapa ema Simón. Ánipa maicha:

—Ímicatacanu éti, eyujarauchanu me Viya apaesa vahi tacuitauchava eta juca ecayemaqueneanahi —máichapa.

25 Tacahe, ema Pedro ema Juan tinahacavanapa títimurecana eta máimiturapiana ema Viáquenu Jesucristo. Te tamutupa eta náimituresirahi, tiyananapa tichavanayarepa te Jerusalén. Tétávajicanapa te avasarechichana tayehe eta Samaria. Ticametarairuanapa nayehe ena achaneana.

Em Felipe máimituca ema achane ticavasa te Etiopía

26 Tiuri, te jena sácheana, tiúcupaicapa ema émana ángele mavaneruhi ema Viya. Máechajicapa ema Felipe. Ánipa maicha:

—Felipe, pétupiricava, piyana te tinapaica te vana. Pivenacuhayare eta achene tíasiha te Jerusalén, tiyana te avasare Gaza. Pétavicayare eta mávaphiana vámahí —máichapa.

27 Tacahe, tétupiricavapa ema Felipe, tiyanapa. Te achene ticainunacanapa ema achane ticavasa te avasare ticajare Etiopía. Ema maca achane*, sujupaha esu Candace, reina tayehe eta apaquehe ticajare Etiopía. Ema maca achane ema tijaneaca eta suímahaqueneana esu reina. Éma, másinehi te Jerusalén, máejirapanahi ema Viya. 28 Ema maca achane machavaquene-paipahi te mávasa. Eta mapaisirahi, téjacapahi te mayehe carro. Téchajicurecapahi eta Sagrada Escritura májure ema profetaini Isaías. 29 Tacahe, ema Espiritu Santo mametacapa ema Felipe, ánipa maicha:

—Pémeñahava te tachacaya eta jena carro —máichapa ema Espiritu Santo.

30 Tacahe, te témeñahavapa ema Felipe, te macachacayapa eta carro, masamapa ema achane téchajicurecapahi. Tásiha, mayaserecapa. Máichapa:

—¿Picaicutiara eta jara péchajicurepahi?

31 Ema achane majicapapa:

—Váiparinehi nucaicutiaraimahi taicha nájina nametacanupahini eta tacayemapahi. Te pítucapuca píti pimetacanu, picatajicanu. Yare, piávacuha péjaca te juca nuchacaya —máichapa ema achane.

32 Tiuri, eta máechajicurepahi ema achane, ani tacahehi: “Eta uvesa, te nacaratata nacapacayarepuca, vahi ticatiuchavaimahi. Te nachuca-mecapuca, váhivare tipiararecaimahi. Ene macahehi ema maca achane, vahi mácapauchavahini, váhivare máechajiuchavahini te námapa tayehe eta nacapasihayarehi. 33 Tétavicavahi eta nacatsirirairahi éma, tayanapane tájinanéni maviurevainahini. Nájinavare nacatiuchahini. Ena mámariequeneanaini, nájina náechajisihahini éna”.

34 Tacahe, ema maca achane mayaserecapa ema Felipe. Máichapa:

—Picatajicanu pimetacanu. ¿Nájaha ema táechajisihahi eta juca libro májurehi ema profeta? ¿Ema táechajisihahi ema maca profeta, vahi apanapuca? —macahepa.

35 Tacahe, ema Felipe tépanavapa mametaca ema táechajisihahinehi eta libro. Mametacapa eta émairahi táechajisihahi ema Jesús, ema Cristo ema nacuchapaquenehi. 36 Tacahe, te máechapa ema achane, mapanerequenehainehi eta napaisirapahi. Tacahe, te nacapayacapa eta únequire, macahepa ema achane:

—Te juca jararihi une. Nuvaraha picachasicanu —macahepa.

37 Tacahe, ema Felipe majicapapa:

—Tiuri, te yátupihipuca eta písuapirahi te pisamure eta picasiñairaya ema Jesús, nícachasicavi —máichapa.

* 8:27 Eunucohi ema maca achane.

Majicapapa éma:

—Yátupi nusuapa ema Jesucristo eta émairahi machicha ema Viya — macahepa.

³⁸ Tacahe, macavanairipipa nacaicheca eta carro. Tiúcupaicanapa éna, tiyananapa te únequire. Tacahe, ema Felipe máicachasicapa ema achane. ³⁹ Te tichavanapa tayehe eta únequire, títahúchavapa témitiaca ema Felipe, taicha ema Espíritu Santo manaracuhapa. Váipa macaecherahihini. Váipavare máimahahini ema achane. Tímiyanavapasepa tipaica ema achane. Tiúrisa-murepaipahi. ⁴⁰ Eta máucupaisinehi ema Felipe eta te avasare ticaijare Azoto. Tacahe, tétavajicapaipa eta te avasareana. Ticametarairupaipahi eta máitecapirapahi eta te apana avasare ticaijare Cesarea.

9

Éma Saulo masuapa eta máichuirahi ema Jesucristo
(Hch 22.6-16; 26.12-18)

¹ Tímiyanavarichucha ema Saulo eta mapánajirisiravácahi ena téhicanahi ema Jesús, mavarairahi máimicapacavacaya. Tiyanapa tiyasesereca eta órdeno mayehe ema corregidor tayehe eta Jerusalén. ² Máichapa ema Saulo:

—Nuvaraha nuyanaya te jena avasare Damasco. Nuvarahavare píjaracanu eta órdeno, eta nucaratasiravacaina ena téhicanahicacha ema Jesús, namutu nácani nétupiaruanayarepahi ajairana, esenanapuca. Nutanucavacayare te náurujisirarevana ena vijaneanana. Présoanayarepahi eta námirayare eta te juca Jerusalén — máichapa.

³ Tacahe, tiyanapa ema Saulo. Eta mapaisirapahi éma te achene, tiánehipa títecapa te avasare Damasco, tiáramicarepa eta majaraiva ema Viya tiásiha te anuna. Tamicauchapa éma. ⁴ Tásiha, tiáquipaicavapa eta mapisirahi. Tásiha, masamapa eta mahu ema Jesús. Máichapa:

—Saulo, Saulo, ¿tájaha tacayema picatianacanu pipánájiricanu? — máichapa.

⁵ Majicapapa ema Saulo, mayaserecapa:

—¿Nájahavi piti Tata?

Majicapapa:

—Nutí Jesús. Núti picatianaruhi, eta pipanajirisiravaca ena téhicanuanahi. Pésamiricavachucha, taicha pítijsivaichucha píchavahi. Vahi piúrimahi te pímiyanava picatianacanu. Péhicanusera píti — máichapa ema Jesús.

⁶ Tacahe, ema Saulo tiyayacarenecha eta mapisirahi eta máechajisirahi ema Jesús. Macahepa:

—¿Tájahapuca eta pivarahaquene nítauchaquenéna piyehe, Tata? — máichapa.

Tacahe, ema Jesús máichapa:

—Pécheputa. Piyana pítecapa te jena avasare. Ánaqui mararihi ema timetacaviyare eta pítauchaqueneyare nuyehe — máichapa ema Jesús.

⁷ Éna apamuriana ajairana macachanequeneanapahi ema Saulo, ichape eta tiáramecana. Taicha nasamahi ema téchajicahi, váhisera náimahahini.

⁸ Tacahe, ema Saulo técheputa eta te máquipaisinevahi. Vaipa máimairiricahini. Tacahe, nachurucapaipahi eta nacaitecapiraya tayehe eta avasare Damasco. ⁹ Mapana sache eta mapuchuquivahi. Váhivare tinica. Tájinvare máerahini.

¹⁰ Tiuri, eta te jena avasare Damasco, matiarihahi ema apana téhichahivare ema Jesús, ema ticajare Ananías. Émarichuvare máechajiruhi ema Viáquenu Jesús. Ánipa tacahe eta máechajisirahi:

—¡Ananías!

Éma majicapapa:

—Nutiarihí, Tata —macahepa.

¹¹ Tacahe, ema Viáquenu Jesús máichapa:

—Piyana pitupiruya te jena calle ticajare Titupina. Te jena mapena ema Judas, picayasesereruyare ema achane ticajare Saulo, ema tiásihahi te avasare Tarso. Puiti máenahi tiyujaracahi. ¹² Núti néchajicahi éma. Numetacahi éma eta pítecapiraya mayehe. Nuvanecavi pinacaya eta pivahu te mápusi apaesa tachava eta máimairirisira —máichapa ema Jesús.

¹³ Te masamapa ema Ananías, macahepa:

—Tata, namutu tímecanuana eta máicharacavanahi ema achane eta mavainarajivahi nayehe ena téhichaviana ticavasana te Jerusalén. ¹⁴ Éma, tímitecahi puiti eta ani, mámapahi eta órdené nájararuhi ena tuparairucana eta te Jerusalén eta máepanirahaviya mapresuchirahaviya vimutu viti véhichavianahi —macahepa ema Ananías.

¹⁵ Émasera ema Jesús máichapa:

—Piyanchucha, taicha ema maca, nunerejiruhichuhi núti. Nuvanarayarehi éma. Nuvanecayare mayana macametarairu eta níjare nayehe ena achaneana te apanana avasareana étapa eta nayehe ena vijaneanana israelítana. Nuvanecayareva máechajisiha eta níjare nayehe ena ichapequeneana aquenucana réyeana. ¹⁶ Núti nímechayare eta macatajivairayare ichape táchavenenahi eta máehisiranuyare —máichapa ema Jesús.

¹⁷ Tacahe, masuapahi ema Ananías. Tiyana tayehe eta peti mávihahi ema Saulo. Tisiapapa. Máechajicapa. Manacapa eta mavahu te mápusi. Tásiha, máichapa:

—Nuparape Saulo, ema Viáquenu Jesús tímerecavahi eta piyehe te achene te pítecinapa. Éma, tivanecanuhi níteca eta piyehe. Mavarahahi tichavayare eta pímairisira. Mavarahavare tiávahácaviya ema Espíritu Santo —máichapa.

¹⁸ Tacahe, enevanepa témitiaca eta tépacuchainihi eta máuquiha, téjamihaquicha. Tichavapa eta máimairirisira. Tásiha, ema Saulo téchepucapa, matupirupa ticaicachasi. ¹⁹ Te tamutupa, tinicapa. Tichavapa eta matumeva. Manasipanapa jena sácheana nayehe ena machamurianarípahi téhicanahi ema Jesús tayehe eta avasare Damasco.

Tépanavapa ticametarairu ema Saulo

²⁰ Tacahe, tépanavapa ticametarairu ema Saulo te nárujisirareva ena israelítana. Máechajisihapa ema Jesús émairahi Machicha ema Viya. ²¹ Namutu ena tisamararacana, ichaperinehi nárami. Tásiha, nacahepa:

—¿Tájaha tacayema? Émara ema maca ema tipánajirícavacahi ena téhicanahi ema Jesús, ena ticavasana te Jerusalén. Tímitecahi te juca eta mapresuchirapanavacayarehi ena apamuriana, mámamurihayarehi nayehe ena tuparairucana eta te Jerusalén. ¡Tásiha puiti, émarinechavare ticametarairuhi mayehe ema Jesús! —nacahepa.

²² Émasera ema Saulo tiápajucavapanapa eta máitusira ticametarairu. Máimerecachi eta yátupiquenerahi ema Jesús émairahi ema Cristo, ema

nacuchapaquenehi. Te tamutu eta náurujisirarevana ena israelítana eta te Damasco, macapaquechamuripa nácani ticatianacanahi eta véhiruhi.

Éma Saulo nacaratacayarepaini ena israelítana. Émasera tiyanapa tijuna.

²³Tayerevahi eta añoana,* ena israelítana napanerechapa nacapacaya éma Saulo. ²⁴Émasera masamairiricapa eta náemauchirahi. Tamutu sácheana, yátiana nacunehi eta te acheneana máuchujisihayarehi, taicha ichape eta navarairahi nacapaca éna. ²⁵Énaserá ena machamuriana náitucahi eta nayumurusirahi náiyaracuhapa eta te ichape saye. Náitiacapa te tiupi enure. Tacahe, nacajuchuchucapa eta te apachacaya eta yúchama. Tacahehi eta máitujisiravahi tijuna.

Éma Saulo títecaparipa te Jerusalén

²⁶Te títecapapa éma Saulo te Jerusalén, mavarahapa masiapamuriha ena náinapureanahi téhicanahi éma Jesús. Énaserá napicarichucha éma, taicha vuíchaha nasupahini eta máehisiraipa éma Jesús. ²⁷Matiarihisera éma achane Bernabé. Émapa tiámahi éma Saulo tímimaticahahi nayehe ena apóstoleana. Mametamurihapa eta máichararacavahi éma Saulo eta máimairahi éma Viáquenu Jesús eta te achene, étapa eta máechajisirahi, máichuirahivare éma Saulo. Mametacavare eta yátupirahi máituca ticametarairu éma Saulo mayehe éma Jesús eta te avasare Damasco. ²⁸Tacahe, éma Saulo manasipa te Jerusalén. Masiapamurihapa éna, énapa macachanejiricavacahi. Vahi mapícararácavahíni eta macametarairuirahi mayehe éma Viáquenu Jesús. ²⁹Máechajiricavacapahi ena israelítana† te jácani mácapajisihavacapahi. Macanaraemachavacahi éna. Vahi náuricahini eta máimiturapianahi. Tisemanapa mayehe. Tásiha, navarahapa nacapacaya éma. ³⁰Nasamairicapasera ena machamuriana. Tacahe, náevatacapa mayana tayehe eta te mávasa Tarso. Náehicapa ena apamuriana tinapananayarehi tayehe eta avasare Cesarea, étapa nachavinehi. Tiánucuhapa éma, tiyanapa macarichupa.

³¹Tacahe, tiúricavanapa ena náumurivana ena téhicanahi éma Jesús tiávihana te apanana avasareana tayehe te Judea, te Galilea, étapa te Samaria. Tásiha, tétumechacacacanaahi eta náimiyániravaya napicauchiraya éma Viáquenu. Máimicatamurihahivare éma Espíritu Santo. Eta tacahe, camurianapáipavare ena téhicanahi.

Éta manarasirahi éma achane ticaijare Eneas

³²Tiuri, éma Pedro tiyanapa máejiravacapaipa ena machamuriana eta te avasareana. Títecapapa nayehe ena apamuriana machamuriana ticavasanahi eta te avasare ticaijare Lida. ³³Matiarihi éma émana achane ticaijarehi Eneas. Macajumaquenehi éma. Ocho añooripahi eta macajumairahi. Vaipa táurihini tiyamuriaca, váhivare máechepucahini te macamane. Tacahe, máitecapauchapa éma Pedro. ³⁴Máichapa:

—Pésenicanu, Eneas. Éma Viáquenu Jesucristo ticanaracaviya. Puiti tájinapa eta pijumaini. ¡Pécheputa! —máichapa.

* **9:23** Te pivaraha pecha, pitanuca te libro Gálatas 1.18. † **9:29** Éna nani, yátupiqueneanahi israelítanahi, náuchureanahisera te jácaniana apanana avasareana. Táitusiava, apaechajiriruvanaripa eta ticaijare griego. Puiti tichavanaripa eta te Jerusalén, návasahi ena ticachichanaini.

Tacahe, ema Eneas enevanepa téchepuca. Tájina pa máichiravainahini. ³⁵ Tacahe, náimahapa eta manarasirahi namutu ena ticavasanahi tayehe eta te avasare Lida énapa ena ticavasanahi te tachacaya ticaijare Sarón. Eta náimairahi, náinajicapa eta nayeherepianaini. Tásiha, náehicapa ema Viáquenu Jesús.

Eta suápechirava títareca esu Tabita

³⁶ Te jena sácheanahi, sutiaríhi esu esena ticaijaru Tabita, eta suátserepihi Dorcas. Ésu, ticavasahi eta te avasare ticaijare Jope. Ésurichuhivare téhichahi ema Jesús. Eta suítaresirahi esu suca esena, sucajivaca ena páureana eta suímahaqueneana. Tímícatarahi nayehe nácani ticaijuheanapahi. ³⁷ Te jena sácheanahi, esu Dorcas ticajumapa. Suvayuhapa, tépenapa. Tacahe, navehapa, náicachapa eta suáquehe. Nacasiapapa te tajuhe te anuquehe téqueneha piso.

³⁸ Eta juca avasare Jope tachacayaichuhi eta apana avasare Lida, eta mávihahi ema Pedro. Náecharipahi eta matiaríhirahi ema Pedro te Lida. Tacahe, navanecapa ena apinana ajairana, náichuhapanayare éma. Te náitecapauchapa, náichapa:

—Vívaraha viámavi puítirichu ánaqui te Jope. Pímahapanaini esu vémunaruquenehi vichamuri Tabita. Tépenaipahi —náichapa.

³⁹ Tacahe, tiyanapa ema Pedro, máehicavacapa éna. Te títecapanapa, náimisiapapa eta te tajuhe suávihahi esu Dorcas. Namutu ena esenana máimaruanahi, te náimahapa ema Pedro, náurujiacapa. Tíyahanapa, náimechapa ema Pedro eta namuríhana supariruanahi ésu te achanerichaha. ⁴⁰ Tacahe, ema Pedro macavanairipipa náuchuca namutu. Tacahe, tépuyucapa éma, tiyujaracapa. Tacahe, máimaracaripa esu esena suépenaquene. Tásiha, máichapa:

—Tabita, péchepuca.

Tacahe, ésu téjamihauquichapa. Suímahapa ema Pedro. Téjahapaicapa.

⁴¹ Tacahe, macaratacapa eta suvahu, macaechepucapa. Énevanepa máichuhavaca ena máimaruana énapa ena apamuriana machamuriana. Máimechapa eta suchaviraipa títareca. ⁴² Tacahe, náechapa namutu ena ticavasanahi eta te avasare Jope. Camurianarine ena tisuapanahi ema Viáquenu Jesús. ⁴³ Ema Pedro manasipanapa jena sácheana tayehe eta avasare te mapena ema machamuríhivare ticaijare Simón, náimijarechavare Suélareru.

10

Ema Viya mavaneca ema Pedro máimitupanayare ema Cornelio

¹ Te jena avasare ticaijare Cesarea matiaríhi ema émana achane romano ticaijare Cornelio. Militar ema achane. Eta mávacure ema capitán, comandante te étana compañía tayehe eta batallón ticaijare Italiano. ² Ema maca achane mapicauchahi ema Viya. Tamutuhi sácheana tiyujaravahahi. Máimitucavacahivare namutu ena machichanaveana énapa ena tíavihanahi te mapena. Énerichuvare máimicatavacahi ena israelítana páurequeneana, máijaracahi eta camuri plata. ³ Te jena sache, las tréscupachahi ema émana ángele mavaneruhi ema Viya. Máechajicapa ema ángele, máichapa:

—¿Pícharacava? Cornelio —máichapa.

4 Tásiha, ema Cornelio tipicarinehi eta máimararasirahi ema ángele. Majicapapa:

—¿Tájaha pivaraha eta nuyehe, tata?

Tásiha, máichapa ema ángele:

—Tímitcanuhi numetacavi. Eta piyeheana oración piyujarauchiravana étapa eta pímicatasiravacahi ena ticamunuvana páureana, táitecapauchahi tamutu ema Viya. ⁵ Pímvanereca puiti náepana ema achane ticajare Simón, eta máchucarapihivare Pedro. Ema tiávihahi puiti te jena avasare ticajare Jope. ⁶⁻⁷ Eta peti máitecapihahi mapena ema apanavare Simón ema náimijarechaqueneva Suélareru. Eta táviha eta peti mapenahi te tachausi eta mar. Ema maca Pedro ema timetacaviyare eta pítauchaqueneánayare —máichapa ema ángele.

Te tamutupa eta máechajisirahi ema ángele, tiyanapa tichava. Tacahe, máichuhapa ema Cornelio ena apinana mamusurana. Máichuhavare ema émana masuntarura. Énerichuvare tipicaurahi mayehe ema Viya, títaurahivare mayehe ema máquenuhi. ⁸ Tacahe, mametacavacapa eta mametarapi ema ángele. Tacahe, máevatacapa tayehe eta avasare Jope.

⁹ Te apanapa sache, tiánehianapáipa ena vanairucana tayehe eta avasare. Te jena las dócequenepa sache, ema Pedro tiápanapa eta te téqueneha piso. Tiyujaracayarehi. ¹⁰ Técuháipaicha éma, taicha tájinarichaha manicahini. Vuíchaha náimaquerecachini eta tinicacare. Tacahe, eta mayujarasirahi máimahapa téjiacahi eta anuma. ¹¹ Máimahavare eta tiúcupaicapahi eta te mávihahi éma, tacutiyaréni eta ichape sávana. Ticaitiapusivacapahi te esquinana. ¹² Camuri eta sárareana, quichareana, cáyureana, támaqueneanapahi eta sávana, tamutu eta apánapanenéjiqueneána sárareana. ¹³ Tásiha, masamapa ema téchajicahi te anuquehe. Máichapa:

—Pécheputa, Pedro. Picapaca étanaina sárare. Pinica.

¹⁴ Émasera ema Pedro, majicapapa:

—Vahi, Tata. Tituparacahavi vahi vicunicahini vinica viti israelítana eta juca sárareana vicajachaqueneana, vinicahini. Tájina nímatiya nunicahini eta juca —macahepa.

¹⁵ Tiápechavavare máechajica ema Viya, máichapa:

—Vahi picuimijarecha ticajachacareana eta níjararuvianahi tinicacareana —máichapa ema Viya.

¹⁶ Mapahe eta máechajisirahi ema Viya ema Pedro. Tacahe, tichavapa eta sávana tiápana te anuma. ¹⁷ Ema Pedro manasirichaha macájarasamúrehi eta mapanerechirahi tájahapuca tacayemahi eta máimahaquenehi. Titecapananecha te tapaja ena vanairucana mayehe ema Cornelio. Nacayasessererupa eta mapena ema Simón Suélareru. ¹⁸ Eta náitecapirahi, nacayasessererupa te étahipuca mávihahi ema Simón Pedro. ¹⁹ Émasera ema Pedro manasirichaha tipanererecarichaha taicha eta máimahaquenehi. Tásiha, ema Espíritu Santo máichapa:

—Nararihi te juca ena mapanana ajairana titanucavianapahi. ²⁰ Piyana pímahavaca éna. Vahi picueñamava eta péhisiravacayare, taicha núti nuvenacavacahi éna —máichapa ema Espíritu Santo.

²¹ Tacahe, masuapapa ema Pedro. Tiúchucapa tiyanapa nayehe ena titanucanapahi. Te máitecapauchavacapa, máichapa:

—Nútira etanurepahi éti. ¿Tájaha tímitcahehi?

²² Tásiha, najicapapa éna:

—Tivanecahavihi ema capitán Cornelio. Ema achane tipicaurahi mayehe ema Viya. Títurahivare nayehe ena achaneana. Namutu ena israelítana napicaucha náemunacavare éma. Puiti víti, vítecapauchavipa, taicha cape juca, ema ángele mavaneruhi ema Viya mametapanahi ema Cornelio máimichuhavi píteca te mapena, apaesa masama eta pimetarapianaya —nacahepa éna.

²³ Tacahe, ema Pedro macasiapavacapa te tajuhe. Nanasipa jena yati mayehe ema Pedro. Te apanapa sache, tiyananapa. Náhicapa ema Pedro ena apamuriana machamuriana ticavasanahi te Jope.

²⁴ Te apanaquenepa sache, napaenumavapa títecapana te avasare Cesarea. Ema Cornelio macuchapaipahi te mapena. Tiúrujicavanaripa ena majaneanana énapa ena máemunacasáreana máichuhaqueneánahi. ²⁵ Te títecapapa ema Pedro te mapena ema Cornelio, mácapapa máepuyumi-rauchapa matsiucayarepa. ²⁶ Émasera ema Pedro máichapa:

—Péhepucachucha pitupiha. Vahi táurichahini pitsiucanu, taicha nútirichuhi picutiquenehi achane —máichapa.

²⁷ Te tamutupa eta náechajisirahi, tisiapanapa te tajuhe. Máimaharine camurianahi ena náurujiruvanahi. ²⁸ Tacahe, ema Pedro máichavacapa:

—Écharichu éti eta viyeherepiana viti israelítana. Vahi tituparacahavi visiapamurihahe eti apavasanana. Émasera ema Viya tivanecanuhi eta vahi nucupica eta nusiapamurihairaheyare. Nájinavare nunerejiruimahi nácani ticajachacreana. ²⁹ Eta tacahehi, nítecevanepa. Tájina nácyemahini. Tiuri puiti, nuvaraha néchaya. ¿Tájahapuca eta tímichuhanuhi? —macahepa.

³⁰ Tacahe, ema Cornelio majicapapa:

—Cuátropa sache eta táetavisiravahi eta juca nímahaquenehi. Te jena cáperehi sache hora las tres, núti nunasiquenehi te juca nupena. Ayu-nanuhi nuyujaracahivare. Tíjuhúchavapa tímerecava ema ángele. Tijanunuca eta mamuiriha. ³¹ Máichanupa: “Cornelio, ema Viya masamahi eta piyehaana oración piyujarasirana. Táitecapáuchahíivare eta pímicatasiravacahi ena ticamunuvana páureana. ³² Pímivanerecaya puiti náepana ema achane ticaijare Simón, eta máchucarapi naicha Pedro. Ema tiávihihi puiti te jena avasare ticaijare Jope. Eta peti máitecapihahi ema apanavare Simón ema náimijarechaqueneva Suélareru. Eta távihihi eta peti mapenahi te tachusi eta jena mar. Te máitecapapa ema Pedro, éma tímítucaviyare” máichanupa ema ángele. ³³ Tacahe, enevanepa nímichuhavihi. Tájinasera táichiravainahini eta pítesirahi. Tímararacahávihi ema Viya eta juca viúrujisiravahi puiti. Vivaraha visamaviya tamutu eta pimetacasiavanahi mayehe ema Viya —máichapa ema Cornelio.

Ticametarairupa ema Pedro te mapena ema Cornelio

³⁴ Tacahe, tépanavapa ticametarairu ema Pedro. Ánipa macahe:

—Nucaicutiarapa puiti vahi vácarichu viti israelítana vijacapacare mayehe ema Viya. ³⁵ Namutuchucha majacapavaca nácani tipicauchanahi éma, tíchanahivare eta táuriqueneana. ³⁶ Taicha cape juca ema Viya macaitecapahi eta máechajiruruva viyehé viti israelítana. Tivanecahavihi vimetacavacayare eta najacapacarevahi me Viya nácani ticasiñavanahi mayehe ema Jesucristo, maperdonachiraripa ema Viya eta napecaturana. Émara Viáquenu vitu-paraha téchapajiricahaviya vimutu viti achaneana: viti israelítana, étipa eti

apavasanana. ³⁷⁻³⁸ Écharichupuca éti eta táichararacavahi te viávasa Judea cape juca táitaresirahi. Te ticaicachasipa ema Jesús Nazareno mayehe ema Juan, máucupauchapa ema Espiritu Santo máijjararuihí ema Viya. Mávahácapa éma, máijjaracaripa eta máitupajijíásiravaya. Tacahe, tépanavapa ticametarairu nayehe ena achaneana ticavasana te Galilea. Te jácani mapaisihapahi, máichapahi eta táuriqueneana. Macanaracavacapahi ena nacatjivaqueneana mávaháruanahi ema Váinaraji. Maratahahi éma máichahi eta juca, taicha ema Viya máimicatapahi. ³⁹ Tiuri, víti véchajisiha eta juca, taicha vímahaquenehi tamutu eta máichaqueneanapahi ema Jesús tayehe eta mapaisineanapahi avasareana te Judea, éta pa te Jerusalén. Énasea ena tuparairucana nacatichahi éma; náemetatarecapa te crusu eta náimicapasirahi. ⁴⁰ Émasera ema Viya macaechepucahi te máecari te mapanquene pa sache. Tásiha, máimerecavare te vimuri eta machavirahi títareca. ⁴¹ Vaipa námutuhini ena achaneana náimahahini. Vítinecha vímahaparacahi víti manerejiruanahi ema Viya. Vinecapaequenehahi tamutu eta vicachanerahi ema Jesús te vinisirana. Tásiha puiti, vimetacahiva ena achaneana eta vímahaqueneanahi. ⁴² Taicha tivanechavipa vicametarairuya. Vimetacayare eta émairahi ema Jesús víyehyarehi Juez víti achaneana énapa ena náepenaqueneana. Taicha ema Viya ema títiparacahi eta mávacureyare juésyarehi. ⁴³ Étaripa eta acane namutu ena profetanaini náechajisihahi ema Cristo. Ánipa nacahehi: “Namutu ena tisuapanaya ticasíñanaya ema Cristo, maperdonachavacayare ema Viya tamutu eta napecaturana táichavene eta nacasiñairaya ema Cristo”.

Eta mávahásiravacahi ema Espiritu Santo ena apavasanana

⁴⁴ Tímiyanavarichaha eta máechajisirahi ema Pedro, tíucupaicapa ema Espiritu Santo. Mávahácapa namutu ena tisamararacanahi eta mametarairuhi ema Pedro. ⁴⁵⁻⁴⁶ Tíjahúchavapa ena mávaháruanahi apáechajírúvanapa. Nacunacharipa ema Viya. Nasamapa ena machamurianapahi ema Pedro tíásihanahi te Jope. Náraminehi éna eta mávahásiravacahi ema Espiritu Santo ena apavasananahi, taicha ena israelítana náimijachahi nacarichu ena mávaháruanahi ema Espiritu Santo. ⁴⁷ Tacahe, ema Pedro máichavacapa:

—Tájina náechajisiacarevaimahi eta nacaicachasiraya ena nani, cápachi mávahácaripa ema Espiritu Santo vicutiripa víti eta mávahásirahavíhi — máichapa.

⁴⁸ Tacahe, macavanairipipa nacaicachasi namutu te máijare ema Viáquenu Jesucristo. Te tamutupa, nayaseacapa ema Pedro vahi macuyanavanehini. Tacahe, manasipanapa te jena sácheana eta nayehe.

11

Eta mametarapiana ema Pedro nayehe ena machamuriana te Jerusalén

¹ Tacahe, téchacarevanepa te Jerusalén eta nasuapirahi ena apavasanana eta máechajirirupa ema Viya. Tásiha, napanerequenehapa ena apamuriana apóstoleana énapa ena námurivana. ² Tásiha, te títecapa ema Pedro te Jerusalén, nacajachapa ena apamuriana máinajicarahanai chaha eta nayehe repiana ena israelítana. ³ Ánipa naicha:

—¿Tájaha tacayema péjirapanavacahi ena apavasanana? ¡Písapavavare pinica te namesara! —náichapa.

⁴ Tacahe, ema Pedro majicapapa mametacapa eta máichararacavahi eta mapaisirahi. Ánipa maicha:

⁵ —Esamanuchaha. Te návihaipe te avasare Jope, nuyujaracaipahi. Nímahapa téjiacahi eta anuma. Nímahavare eta tiúcupaicapahi tiásiha te anuma tacutiyareni eta ichape sávana. Ticaitiapusivacapaihi te esquinana. Títecapapa te návihahi núti. ⁶ Nímahapa eta apánapanenéjiqueneána sárareana támaqueneanapahi eta sávana. Tátarihi eta táíñehiqueneana sárareana, quichareana, cáyureana. ⁷ Tacahe, nusamapa eta mahu ema Viya, máichanupa: “Pécheputa, Pedro. Picapaca étanaina sárare. Pinica”. ⁸ Nútisera nujicapapa: “Vahi, Tata. Tituparacahavi viti israelítana vahi vicunicahini eta juca sárareana vicajachaqueneana. Tájina nímatiya nunicahini eta juca”. ⁹ Tacahe, típechanuvare téchajicanu ema Viya, máichanupa: “Vahi picuimijarecha ticajachacareana eta níjararuvianahi tinicacareana” máichanupa. ¹⁰ Mapahe eta juca máechajisirvanuhi ema Viya. Te tamutupa, tichavapa tiyapa te anuma tamutu. ¹¹ Étarichu jena hora, títecapanapa ena mapanana ajairana titanucuanapahi eta te peti nítecapihahi núti. Mavaneruanahi ema émana achane ticavasahi te Cesarea. ¹² Tacahe, ema Espíritu Santo tivanecanupa néhicavaca éna, taicha tájina táeñamavacarehini. Énerichuvare téhicanuanapa ena nani sáisiqueneana vichamuriana. Vimutuhi visiapa eta mapena ema achane. ¹³ Timetacahavipa éma eta máimairahi ema ángele tiúcupauchahi eta te mapena. Titupihahi te mamirahu. Tacahe máichapa: “Pímivanereca puiti náepana ema achane ticajare Simón, eta máchucarapi naicha Pedro. ¹⁴ Ema maca Pedro, ema timetacaviyare eta piúchucuiraya, píti, esu piyena, énapa ena pichichanaveanahi” máichapa ema ángele. ¹⁵ Tacahe, népanavapa nímitucavaca ena náurujiruvanahi. Te néchajicaipa, tíjahúchavapa tiúcupaica ema Espíritu Santo nayehe éna. Mávahácavacapa tacutihi eta mávahásirahavihi víti te tépanavainapa. ¹⁶ Tacahe, enevanepa néchavahi eta mametaruhavihi ema Viáquenu Jesús. Áni macahehi: “Échavarichu ema Juan máicachasicahi te une ena achaneana. Étiserá tiúcupauchaheyare ema Espíritu Santo. Éma, tícachasacahayare tiávahácáhénapa” tacahehi eta máechajiriruvahi. ¹⁷ Tiuri, ema Viya máijaracavacahi ena apavasanana ema Espíritu Santo táichavenehi eta náehisirahi ema Viáquenu Jesucristo, tacutihi eta máijarasirahavihi víti. Tásiha, váiparinehi nácapaemachaimahi núti eta mavarahaquenehi ema Viya —máichavacapa ema Pedro.

¹⁸ Tacahe, ena ticajachanahi ema Pedro, te náechapa, timatinanapa. Nacunachainehi ema Viya, nacahepa:

—Yátupirichuhi eta majacapiravaca ema Viya ena apavasanana eta náeneuchiravaina. Nácutihavihini víti eta visiapiarayare te anuma, máichecuaraquirénapa eta vítaresiraya maicha ema Viya —nacahepa.

Náhechavare ema Jesús ena achaneana ticavasana te avasare Antioquía

¹⁹ Te jena sácheana, te nacapacapa ema Esteban, napanajicavare ena apamuriana téhicanahi ema Jesús. Eta tacahe, tijunanapa. Téjanerepáicanapa tiyananapa te Siria, ena apamuriana tiyananapa te tiúrupuhi te mar ticajaire Chipre, ena apamuriana te avasare Antioquía. Te jácáni náitecapihapaihi, ticametarairuanapaihi mayehe ema Jesucristo nayehe ena najáneanana israelítana. Vuíchaha nametacahini ena apavasanana. ²⁰ Tásiha, títecapanapa

ena apamuriana* eta te avasare Antioquía. Énasera ticametarairuanapa nayehe ena apavasanana. Nametacavacapa, ánipa naicha:

—Te esuapa éhica ema Viáquenu Jesucristo, éma ticuchucuhaheyare eta ícuñayaréni taicha eta epecaturana —náichapa.

²¹ Ichape eta tasuapacarevahi eta nametarairuana taicha ema Viya máimicatacavacahi. Eta tacahehi, nasuapahi ena camuriqueneana achaneana. Náinajicapaipa eta nayeherépiníhi tamauriqueneana, náehicapa ema Jesús.

²² Te nasamairicapa ena nachamuriana ticavasananahi te Jerusalén eta juca téchacareanahi te avasare Antioquía, ticaevatapa ema Bernabé, mayana macaicutiarapana te yátupihpuca. ²³ Tacahe, te títicapapa éma te Antioquía, máimahapa eta máimicatasiravacahi ema Viya. Tiúrisamureinehi. Maconsejachavacapa namutu éna eta náetumechiracacaina eta náehisirahi ema Viáquenu. Vahi nacucainajiruva te tatiarihinapuca jácani náichavaquenevaya. ²⁴ Taicha ema Bernabé, tétávicavahi eta máuriva. Mávaháruhivare ema Espíritu Santo. Tisuapajirahi éma. Tacahe, camurianahi ena tisua-panahi téhicanahi ema Viáquenu maicha ema Bernabé.

²⁵ Te táequenepa eta juca, ema Bernabé tiyanapa te avasare Tarso. Matanupanapa ema Saulo. ²⁶ Te máetupiacapa, mámapa te avasare Antioquía. Tacahe, nanasipa ánaqui. Étana año nacahe eta nacachaneravacahi ena nachamur-ianahi. Camuriana ena náimitureanahi. Te jena avasare Antioquía, táepani-nevahi eta nacaijarerahi cristianoana namutu ena téhicanahi ema Jesús.

²⁷ Te jena sácheana, natiarihihi te Jerusalén ena profetana máijjaruanahi ema Viya eta máéchajiriruvana. Tacahe, tiyananapa nacaijuhe te Antioquía. ²⁸ Te títicapana, ema émana ticaijare Agabo titupihapa te namuri ena machamuriana. Macaimitucasiquenehi éma mayehe ema Espíritu Santo. Mametacavacapa eta tatiarihiyare eta ecuha te tamutu avasareana. (Eta juca táichavaquenevahi eta ecuha te avasareana te jena añoanahi matupihairahi ema aquenucaini Emperador Claudio.) ²⁹ Tacahe, ena téhicanahi ema Jesús ticavasana te Antioquía napanerechainapa náimiamarecaya eta nanaquiruana, náimicatasiraya ena nachamuriana ticamunuvanahi, énaripa ena ticavasanahi te Judea. ³⁰ Tacahe, tinaquiquicavanapaipa eta naratahaquenevaya nanaquica. Tacahe, náimiamarecapa mayehe ema Bernabé émapa ema Saulo. Náijaracayarehi ena náiyarahana pastoreana. Énapa tíjaracana-yarehi ena ticamunuvanahi.

12

Nacapacapa ema Jacobo. Náeratacapa ema Pedro.

¹ Te jena sácheana, matiaríhi ema rey ticaijare Herodes Agripa. Ema macavanairipipa nacaratacavaca ena tachutirihanapahi ena téhicanapahi ema Jesús, náemecharecavacapa. ² Énerichuvare, máimicapacavare ema apóstole Jacobo maparapeni ema Juan. Nayuchatipiquenuhapa eta nacapasirahi. ³ Tacahe, ema rey, eta máimairahi náurisirahi ena ticatianacanahi ema Jesús, mámicaeratacavare ema Pedro. Te jena semanahi, napiestarahi ena israelítana eta nanisíraya eta pan mayehere levadura. ⁴ Eta nacaeratasirahi

* **11:20** Ena nani téhicanahi ema Jesús, yátupíhi israelítanahi éna. Náuchusinehisera éna te apanana avasareana: te jena avasare Cirene, étapa eta avasareana táunavanahi eta tiúrúpuhi ticaijare Chipre.

ema Pedro, náimisipapa te cárcel. Navanecapa ena dies y seis suntaruana tijaneacanaya te machacaya. Cuátromurianahi ena patrullanahi. Ema Herodes Agripa, mapanerechahi macapacayareva ema Pedro te namirahu ena achaneana te táequeneraya eta napiestara. ⁵ Tacahe, ema Pedro, muracahi eta najaneasirahi te cárcel. Énaserá ena machamuriana tiyujaracanahi me Viya. Nayaseacahi ichape eta nasamacarevaina máuchucuiraina ema Pedro.

Ena Viya macuchucuha ema Pedro tayehe eta cárcel

⁶ Tacahe, ema Herodes Agripa májarechapa eta sache eta máemepaniraya te cárcel ema Pedro eta nacapasiraya te namirahu ena achaneana. Te jena yati tamirahupa jena sache, ema Pedro tímacahi te nachacaya ena apinana suntaruana. Ticaitiahi te apipi cadenana. Ena apinavare suntaruana najaneacahivare eta tapaja. ⁷ Tíjuhúchavapa tímerecava ema ángele mavaneruhi ema Viya. Tijarahijuheinehi eta cárcel. Tacahe, ema ángele macayamuricapa ema Pedro. Macajamicapa. Ánipa maicha:

—Pedro, péjamica. Péchepuca —máichapa ema ángele.

Tíjuhúchavapa téjapumuriha eta cadenana máitihanahi te mavahu ema Pedro. ⁸ Máichavare ema ángele:

—Picapitijuechava eta píttijue. Pinaca eta péparupevana.

Tacahe, ema Pedro masuapahi. Tacahe, ema ángele máichavarepa:

—Pinaca eta pépacuhasa. Yare, péhicanu —máichapa.

⁹ Tacahe, ema Pedro máehicavanepa ema ángele. Ema Pedro váhi máimatihini eta máicharacavapahi, máimijacharichucha mavapure.

¹⁰ Tacahe, náetavicapa ena títapucana sentinélana, náetavicavare ena apamuriana. Títecanapapa eta te tapajacura eta cárcel. Eta tapajacura amairihahi fierro tijitacarehi. Témunahiricavapa téjiaca. Tiúchucanapa te aneca te calle. Te tiyerehianapa eta napaisirahi, majunijicapa ema ángele.

¹¹ Tacahe, ema Pedro mapaenumavapa macaicutiara. Macahepa:

—Nímahapa puiti eta yátupirahi tijaneacanuhi ema Viya. Mavanecahi ema ángele ticuchucuhapananuhi eta macapasiranuyarehini ema Herodes énapa ena nujaneanana —macahepa.

¹² Tipanererecapaipa eta mapaisirapahi. Matupirupa te supena esu María, maena ema Juan ticaijarehi puiti Marcos. Éta, náurujsihavahi nayujarahisihahi ena camuriqueneana machamurianahi. ¹³ Títecapapa ema Pedro te tapajacura eta nayehe canchón. Máehahamecapa eta tapaja. Tacahe, esu esena amaperu ticaijaru Rode, tiyanapa suímahapana nájahapuca ema téhahamecachi eta tapaja. ¹⁴ Suímatiahuchavanepa ema Pedro, váhisera suvéjiáequenehahini eta súrisamurevahi. Tiyana tapajacura te tajuhe, sumetapanavacapa eta matiarahirahi ema Pedro te aneca te tapaja. ¹⁵ Énaserá vahi nasuapahini. Tacahe, náichapa:

—Máurishivipapuca píti.

Ésusera sumetacarichucha eta yátupirahi. Énaserá náichavarepa:

—¡Váhipuca émaina! Émapuca ema mayehe ángele ema tijaneacahi —nacahepa.

¹⁶ Émasera ema Pedro tímiyanavarichucha máehahamecahi eta tapaja. Tacahe, tiyananapa navéjiáequeneha. Náimaharine émasarehi. Tiáramecanarinehi éna. ¹⁷ Émasera máimicutiarachapa te mavahuana eta namatina. Tacahe, mametacavacapa eta macuchucuirahi ema Viáquenu tayehe eta cárcel. Te tamutupa eta mametasiravacahi, máichapa:

—Emetapana ema Santiago* énapa ena apamuriana vichamuriana — máichapa.

Tacahe, tiúchucapa tiyanapa te apana avasare.

¹⁸ Te tijarahipa, ena suntaruana tinanesicarajianaipa taicha vahi náechahini tájahapuca eta máicharacavahi ema Pedro. ¹⁹ Tacahe, ema Herodes Agripa máimivanerecapa natanuca ema Pedro. Májinasera náetupiacahini. Eta namaetupasirahi, ticayaserehianapa ena suntaruana tijaneacanahi. Nájinasera émanainahini nanecapahini eta máuchusirahi ema Pedro. Tacahe, macavanairipipa ema Herodes nacapacavaca ena suntaruana. Te tamutupa eta juca, tiyanapa ema Herodes te apana avasare Cesarea; étapa mávihahi.

Eta máepenirahi ema Herodes Agripa

²⁰ Te táequenepa, ema Herodes Agripa tisemapa nayehe ena achaneana ticavasana te Tiro étapa te Sidón. Énasera náimivanerecapa mayehe ema Herodes. Tiyaseserecanapa eta náurivaina mayehe éma. Taicha eta návasanahi táitecapauchahi eta tinicacare tiásihahi eta te mávasa ema rey. Tacahe, nacasiñapa ema Blasto, ema majupaha ema rey, máechajuchavacaya eta náurivaina. ²¹ Tacahe, ema Herodes máijarechapa eta sache, máimichuhairaya ena achaneana eta jena sáchequenehi. Ticamuirihapa ema rey eta mamuiríha tíurina. Téjacapa ema Herodes te máejasirare. Téchajicapa. ²² Tacahe, ena achaneana eta nasamirahi éma, tipiaracanapa. Nacahepa:

—¡Ema maca téchajicahi váhiya achanena! ¡Viya ema maca! —nacahepa eta nacunachirahi éma.

²³ Tacahe, tájuhúchavapa ema émana ángle mavaneruhi ema Viya máijaracapa eta majumahi ema Herodes Agripa. Taicha ema Herodes tímijachavahi Viya, máuricaipahi eta náejirairahi natsiusirahi ena achaneana. Eta tacahe, tanicapa eta vusanuana te majuhe. Tacapacapa.

²⁴ Tacahe, tavetijipaipaicha camurianapaipa ena achaneana tisuapana eta máechajiriruvana ema Viya.

²⁵ Te títavanapa eta natuparahahi ema Bernabé ema Saulo, tichavanavarepa te avasare Antioquía. Námapa ema Marcos.

13

Ema Bernabé émapa ema Saulo tépanavanapa tipaicana ticametarairuanayare

¹ Ena téhicana ema Jesús ticavasanihi te avasare Antioquía, natiarihi te namuri ena ticametarairurahiana eta máechajiriruva ema Viya. Tímiturahianahi éna. Natiarihichaha ema Bernabé émapa ema Saulo. Natiarihivare ema Simón (ema náimijarechavare Negro), émapa ema Lucio (eta máuchusinehi te avasare Cirene), émapa ema Manaén (ema machajuruhi ema Herodes Antipas, machicha ema Aluresini). ² Étana sache, ticurujicanapa

* **12:17** Ema maca achane, maparapehi ema Jesucristo. Te náechajiriruva ena israelítana, ticajare Jacobo. Te véchajiriruva ticajarehi Santiago. Émarichuhi ema tájucharahi eta carta ticajarehi Santiago.

eta nayujarasirahi me Viáquenu. Náichahivare eta ayuna. Tacahe, máechajicavacapa ema Espíritu Santo. Máichapa:

—Ema maca Bernabé émapa ema Saulo, natuparahaichuhi ticametarairuanaya taicha nunerejiruanahi éna. Évatasinanuya puiti ena nani apinana —máichapa.

³ Tacahe, titsecavanapa ena apinana eta napaisiraya. Te tamutupa, tiápechavanapa nahayunacha namutu. Eta nayujarauchirahi, nanacapa eta navahuana te nápusiana ena tipaicanyare. Nayasecapa ema Viya eta táurivainapahi eta napaisiraya. Tacahe, ticametavanapa. Tiyananapa.

Ema Bernabé émapa ema Saulo tépanavanapa ticametarairuana te tiúrupuhi Chipre

⁴⁻⁵ Tacahe, ena nani ema Bernabé ema Saulo, mavaneruanahi ema Espíritu Santo, tiyananapa te puerto ticaijare Seleucia. Máehicapahivare ema Juan Marcos. Tímicatarecapahi nayehe. Tacahe, tiánuecanainapa nacaijuheya eta tiúrupuhi ticaijare Chipre. Te títecapanapa te puerto ticaijare Salamina, tiyananapa eta te náurujisirárevana ena israelítana (taicha tamutu avasareana tatiarihipahi eta nayehe sinagoga). Ticametarairuana eta máechajiriruva ema Viya. ⁶ Tamutu napaica eta táichapevahi eta tiúrupuhi. Títecapanapa te avasare ticaijare Pafos. Ánaqui matiarihihi ema émana israelíta ticaijare Elimas Barjesús. Iápemare ema maca. Tépiyahirahivare tímijachavahi máimati ema Viya. ⁷ Ema maca iápemare macachanejiricahi ema Prefecto Sergio Paulo. Ema maca Prefecto, téchemarahi. Tásiha, máimivannerecapa náichuhapana ema Bernabé émapa ema Saulo, taicha mavarahahi masamaya eta máechajiriruva ema Viya. ⁸ Émasera ema maca iápemare macatianacavacapa éna. Mayurucapa ema Prefecto eta vahi macusuapa eta máechajiriruva ema Viya. ⁹ Tacahe, ema Saulo (éma ticaijarehi puiti Pablo), mávaháruquenehi ema Espíritu Santo, máimarracapa ema iápemare. ¹⁰ Tacahe, máichapa:

—¡Tivyuarahitataji matsiriarairaha! ¡Piti machicha ema Váinaraji! ¡Piti picatianaca tamutu eta táuriqueneana! Píti píchejimiráuchavacahi ena tivarahana téhicana ema Viáquenu. ¡Pínajica eta juca pivainarajivahi! ¹¹ Puiti ema Viya tícuñacaviyare. Púchuqiviyare máicha. Tiyereyare eta vahi pímahaimahi eta tajaraiva eta sache —máichapa ema Pablo.

Jéhesaréinehi, tíjahúchavapa témaha eta máimairirisira, púchuquipa ema iápemare. Tacahe, matanucapa ena tichurucanaya te mavahu. ¹² Te máimahapa ema Prefecto eta juca, tipicarinehi. Tásiha, masuapapa eta masamirahi eta náimiturapiana ena apóstoleana mayehe ema Viáquenu Jesús.

Ema Pablo émapa ema Bernabé tiyananapa tayehe eta avasare ticaijarevare Antioquía Ichipichu

¹³ Tacahe, ema Pablo énapa ena macompañeroana tiávacuhanapa. Najunijicapa eta Pafos. Tiyananapa tayehe eta avasare Perge táunavahi eta provincia Panfilia. Te títecapanapa te Perge, eta jena sácheanahi, ema Juan Marcos majunijicavacapa éna. Tichavapa te Jerusalén. ¹⁴ Éna, tiánucuhanapa nacaijuhepa eta avasare Antioquía Ichipichu te tinapaica eta Pisidia. Te títecapanapa, te apanapa sache sávaru, tisiapanapa eta te náurujisirareva ena israelítana eta nayujarauchirahi. Téjacanapa. ¹⁵ Tacahe, tisiapanavarepa ena tuparairucana tayehe eta náurujisirareva. Náechajicuhapa ánipi eta Sagrada

Escritura májurehi ema Moisés étapa eta nájurehi ena profetana. Te tamutupa eta náechajicuirahi, nayaserecapa ena araitēcapihana. Náichapa:

—Viparapenaveana, te tatiarihipuca eta échajisihayare consejo viyehe víti, táuricapa econsejachahavipa —náichapa.

¹⁶ Tacahe, ema Pablo titupihapa. Macanuquechapa eta mavahuana eta máechajisirayarehi, mavarahahi tauri eta nasamiraina (taicha tacahehi eta nayehepe). Ánipa macahe:

—Esamanuchaha, nuparapenaveana israelítana. Étipa eti epicaurhianahi mayehe ema Viya. ¹⁷ Ema Viya vicasañaquenehi viti israelítana manerejicavacahi ena viáchucanaveánaini. Te návihaichaha te apanaquene avasare ticajare Egipto, macaejapacavacahi ena nachichanaveana. Énerichuvare, te máiputsicavacapa te jena avasare návinénihi, máimerecapahi eta máitupajijiasiravahi máimicatasiravacapahi éna. ¹⁸ Tásihasea, cuarenta año eta májecapirávana tayehe eta návihairahi te mávapahi vámahí. ¹⁹ Te táequenepa, macamitiequenehavare eta siétequene avasareana ena apánapanéjiqueneána ticavasanainihi te Canaán. Tásiha, májaracapa ena viáchucanaveanaini eta jena apaquehe natuparahaquenehi maicha ema Viya. ²⁰ Tacahe, 450 año eta majaneasiravacahi, mavanecapa ena juéseanaya téchapajiricanayarehi. Tacahe, tiámainucavapa te tijurucapa ema profeta ticajare Samuel, máequeneréruhi nayehehi juez. ²¹ Tacahe, éna nayaseacapa ema Viya ema nayeheyarehi rey. Tásiha, májarasihapa ema Viya ema nayeheyarehi rey ticajare Saúl, machicha ema Cis, mámaríequenéni ema viáchucaequenéni Benjamín. Cuarenta año eta macatuparahairahi. ²² Te táequenepa, ema Viya máitsivachapa ema Saúl. Ticajarapa ema David, émapavapa reyhi. Taicha macahepa ema Viya: “Nímararacahi ema David, machicha ema Isaí, núrca eta máurivahi. Taicha máitachayare tamutu eta nuvanairipianaya” macahepa ema Viya. ²³ Tiuri, eta máechajiriruvahi ema Viya, matiarihiyare ema émana mámariequeneayare ema maca David tiúchucayarehi ema Ticatiurahiyare viyehe viti israelítana. Puiti vimetacahé eta máimeresiravaipa ema Jesús ema Ticatiurahíquene viyehe. ²⁴ Te tamirahupaichaha eta máimeresiravayarehi ema Jesús, ticametarairuripa ema Juan nayehe ena achaneana vijaneanana israelítana. Mavanecapahi eta náeneuchiravaina náinajisiraina eta napecaturana, étapa eta nacaicahashiraina. Títecapapa eta sache máitachiraipa ema Juan tamutu eta mavanhianahi me Viya. Ticametarairurichaha ema, máichavacapa ena achaneana: ²⁵ “Ímijachaipapuca nútihí ema Cristo, ema vicuchapaquenehi. Váhira nútina. Títecapainapasera éma, téhicanupahi te néquene. Malayarinehi nútí nácutinasihini eta máitupajijiasiravahi éma. Váiparinehi nácaemuñavaimahi macamururanuhini nuti páuresami” máichavacapa ema Juan.

²⁶ Esamanuchaha, emutu eti nujaneanana, eti nucutiqueneanahi eta mámariequenerahavihi ema viáchucaini Abraham, étipa eti apamuriana epicaurahianahi mayehe ema Viya. Ema Viáquemu vívanecahavi vimetacahayare yátupina eta iúchucuirayare éti apanava, te ecasiñava me Jesús.

²⁷⁻²⁹ Máchusera ácutihini ena tuparairucana te Jerusalén, énapa ena ticavasanahi te jena avasare. Tamutu eta sávaruana eta náurujisiravana, náechajicuhaparacahi eta libro nájuchaquenehi ena profetanaini. Váhiserá nácaicutia-rahini. Eta tacahehi, vahí náimatihini ema Jesús eta émairahi Cristo. Váhivare

najacapahini. Éma, tájinhinéni matapiravainahini taviuchahini eta táimicapahini. Énasea nayaseacapa ema Pilato eta máimicapasiraya. Tacahepa masuapapa éma eta nayasearapihi. Tásiha, te títauchavapa eta nacapasirahi, ena máimitureana nacucupaicapa te macurusura, náecarapa. Tacahehi eta táitauchiravahi tamutu eta nametarapiana ena profetanaini eta máicharacavayarehi ema Cristo eta máepenirahi, taicha tacajuquenehi éta te Sagrada Escritura. ³⁰ Émasera ema Viya macaehepucahi te máecari. ³¹ Tacahe, camuri eta sácheana máimeresiravahi ema Jesús nayehe ena máimitureana, ena nani macachanevacapahi te másihapa te Galilea, téhepa te tiyanapa te Jerusalén. Ena nani tímahanahi, énara ena téchajisihanahi puiti eta máechepusirahi.

³²⁻³³ Acane, ema Viya macametarapihi nayehe ena viáchucanaveanaini eta macucupaisirayarehi ema Cristo. Títauchavaipahisera puiti eta máechajiriruvahi taicha vímatiripa ema Cristo viti nachíchanavéqueneana. ¡Tímerecavaipa ema Jesús, émairahi yátupiquenehi Cristo manerejiruhi ema Viya! Máimerecavaipa ema Viya ema Jesús eta émairahi yátupiquenehi Cristo, taicha macaehepucahi te máecari. Étara tímitecavahi vimetapanaha eta juca táuriquene téchacareana. Étara tacayemaquenehi eta máechajiriruva ema Viya eta te Salmo 2, ániapa macahehi: “Pítira nuchichavi. Puiti jena sache, nímimatichaviyare nayehe ena achaneana eta nuchichairavihi eta nucaehepusiravihi te pécarí” máichapa. ³⁴ Eta máechepusirahi ema Jesús te máecari, vaipa tíapechavaimahi tépena. Taicha máechajicahi ema Viya ena israelítana, ániapa máichahi: “Níjaracaheyare ema máuriquene Iáquenuyare. Éma ticatiuchaheyare tamutu sácheana. Máichecuaraquiyare eta itaresiraya máicha, eta ecachanerayare éma. Taicha níjararuvahi eta juca néchajiriruvahi mayehe ema David” máichapa ema Viya. ³⁵ Énerichuvare, acane ema Cristo macahehi eta máechajiriruvahi te apana Salmo: “Vahi písapaimahi témitiequeneha eta náquehe nuti pichicha pémunaruquenehi” máichapa. ³⁶ Tiuri, ema David, yátupihí eta máechapajirisiravacahí ena machanerana. Te títecapapa eta matuparahahi mayehe ema Viya, tépenapa ema David. Tacahe, náecarapanapa éma. Tépaichavahi eta máeche te máecari. ³⁷ Émasera ema Jesús vahi táepachaicavahini eta máeche te máecari taicha macaehepucahi ema Viya. ³⁸ Nuparapenaveana, nuvaraha numetacahe puiti apaesa ímatiéqueneha. Ema Viya mavaraha tiperdonachahe eta epecaturana te ácasíña ema machicha Jesús. ³⁹ Viti israelítana, ichape eta véjecapiravahi me Viya taicha vimaitauchirahi eta viyeherepiana májararuhavihi ema Moisés. Téhesera véhica puiti ema Jesucristo, viperdonachacareya víti mayehe ema Viya. ⁴⁰ Tásiha puiti, ecaunevayare éti, machu ácutiriana ena achaneanaini máechajiruanahi ema Viya eta acane. Ani máichahi: ⁴¹ “Ímahayare, eti épuruanahí núti. Núti níchayare eta tíaramicare te emirahu te juca sácheana. Te nímimetacahepa eta juca, váhiquene esuapahini éti. Tásiha, tapaenumavainapa te ímahapa eta níchaqueneya, íraminapa. Nímatihesera eta emásuapajiráivanahi. Épenainapa táicha” máichapa ema Viya.

⁴²⁻⁴³ Te tamutupa eta máechajisirahi ema Pablo, nayaseacapa ena achaneana, ániapa naicha:

—Picatajicahaví. Piápechahavini pímitucavahi eta juca te apanainavare sávaru —náichapa.

Te tíuchucanapa eta te náurujisirareva, tiyananapa ena apinana apóstoleana eta te náitecapihahi. Náehicapa ena camuriana israelítana, énapa ena

apavasanana tépiyacavanaripa israelítana taicha napicauchaipa ema Viya. Ticaimitucasianapa táurivaina eta najicapiraya eta máurivahi ema Viya, nacasiñairava me Machicha Jesús.

⁴⁴ Te apanavarepa sávaru, namutuyareni ena achaneana ticavasanahi te avasare tiúrujicavana nasamaracayarehi eta máechajiriruva ema Viya mametarapiyarehi ema Pablo. ⁴⁵ Énasera ena israelítana masuapajirairahanahi, te náimahapa eta natiarihahi ena apavasanana, tiseananapa eta mametasiravacahi ema Pablo eta najacapacarevahi me Viya éna apanava. Eta tacahe, nácapaemachapa ema Pablo, nacajachapa. ⁴⁶ Te nasamapa ema Pablo émapa ema Bernabé eta náichirahi ena ticatianacanahi, tájina vahi nayútutuémahini. Náichavacapa:

—Tatuparacahi étivayarehi eti vijaneanana vímitucahe eta juca máechajiriruva ema Viya. Étisera vahi iúricahini eta esamirahi, váhivare éсахahini ésenica eta mávasa ema Viya. Tacahe puiti, énainarinepuca vímitucavacaya ena apavasanana. ⁴⁷ Taicha víti vivanecasivahi me Viya. Vítauchayare eta juca mavanairipi, ani macahehi: “Nutuparacaviyare píti pipaicayare tamutu avasareana te juca apaquehe. Picametarairuyare eta néchajiriruvana nayehe ena achaneana eta nucuchucuiraya nácani tisuapanuanaya” —macahepa ema Pablo.

⁴⁸ Te nasamapa eta juca ena apavasanana, tiúrisamureanapa. Tásiha, nacahepa:

—Tétavacavapa táurinava eta juca máechajiriruva ema Viya —nacahepa.

Énerichuvare, nasuapapa ena máichuhaqueneanahi ema Viya eta náitare-siraya máichecuarquireya te táequenenapa eta náepeniraya. ⁴⁹ Tacahe, ena tisuapanaripa nacametarairuvare eta máechajiriruva ema Viya nayehe ena achaneana ticavasanahi te tachacayahana eta avasare Antioquía Ichipichu. ⁵⁰ Nararihiserá ena ticatianacanahi ema Pablo émapa ema Bernabé. Israelítanahi éna. Tacahe, náimitucapa ena tuparairucana te avasare, énapa ena ésenana ticapicahucareanahi, téhicanahi eta nayeherepiana ena israelítana. Énerichuvare napamicapa ena achaneana, navarairahi náquijicaya tayehe eta avasare ena apóstoleana. Jéhesareinehi, ticuticacanapa eta nacatichiravacahi, nacuchucavacapa ena apinana. ⁵¹ Tacahe, eta nayanirayarepa ena apóstoleana, náetatapevachavaca eta náeparupevana te namirahu ena ticatianacanahi. Táicutiarahi eta namáimitucacárevahi éna, tájinavarepa tímiapechaimahi náimitucavacahini. Tacahe, tiyananapa nacaijuhepa eta te avasare Iconio. ⁵² Énasera ena apamuriana téhicanaripa tímiyanavanapa eta nasuapirahi ema Viya. Tiúrisamureanahivare éna taicha eta mávahásirahi ema Espíritu Santo.

14

Éma Pablo émapa ema Bernabé títecapanapa eta te Iconio

¹ Tacahe, títecapanapa ema Pablo émapa ema Bernabé eta te avasare ticaijare Iconio. Tiyananavare natupiru eta te náurujisirareva ena israelítana. Ticámetaráruanavarepa. Tacahe, camurianavare ena achaneana tisuapanahi eta nametarairuhi: ena israelítana énapa ena apavasanana. ² Váhiserá téjiacavana ena apamuriana israelítana masuapajirairahanahi. Nayurucavacapa ena apamuriana achaneana apavasanahi. Navarahapa náimiyusemacavaca. Navarahahivare ticuticacanayare nacatichavaca ena

téhicanaripa ema Viya. ³ Eta tacahe, nanasipanapa ena apóstoleana. Vahi nayanavanehini. Tiyerehi eta náimituresirahi, taicha navarahahi náetumechavacaya eta nacasiñairahi ema Viya. Tacahe, ema Viya máimicatavacahi. Májaracahi eta náichiraya eta tíaramicareana. Eta juca, máicutiarahi eta mavanésiravacahi eta nacametarairuirayarehi eta majacapiravacahi nácani achaneana ticasíñavana mayehe. ⁴ Tásiha, típutsimurihavanapa ena achaneana ticavasanahi tayehe. Ena apamuriana náehicapa ena israelítana masuapajirairahana. Ena apamuriana náehicapa ena apóstoleana. ⁵ Tacahe, ticuticacanapa eta napanereruana ena apavasanana énapa ena israelítana énapa ena náquenuruhana, eta nacajachiraya ena apóstoleana. Navarahapa nacapacaya natupisicaya te márijahiana. ⁶⁻⁷ Énaserá, ema Pablo émapa ema Bernabé, te nasamairiricapa, tijunanapa nacaijuhepa eta te provincia ticajare Licaonia. Ánaqui ticametarairuanapa tayehe eta avasare Listra, tásiha, tiyanavarepa te avasare Derbe, étapa te avasareana tachacayarahanahi.

Ena Pablo macanaracahi ema masari ticavasahi te avasare Listra

⁸ Te jena avasare ticajare Listra, matiarihíhi ema émana achane masarihi eta máitaresirahi. Vahi táurihini típaica, taicha máimiuchurehi eta mamasarivahi. ⁹ Macaheripa ticasamarahíhi éma eta mametarairuhi ema Pablo. Tacahe, ema Pablo máesenicapa, máimatiacapa eta macasiñavairahi ema masari mayehe ema Viya macanarasirayarehi. ¹⁰ Tacahe, ema Pablo mapiaracapa: —Péhepuca píti. Pétumecha eta jara piápeana. Pitupíha —máichapa.

Eta masamairahi eta juca ema masarini, enevanepa téchepuraca. Titupíhapa. Típaicapa. ¹¹ Eta náimairahi ena achaneana eta macanarasirahi ema Pablo ema masarini, náraminehi ichape. Tipiaracanapa te náechajiriruvaichu, ánipa nacahehi:

—Viyana ena nani. Achanemahianahiséra eta náimahi eta náucupauchirahávihi. ¹² Ema maca ticajare Bernabé, émara Viya Júpiter. Ema maca apana ticajare Pablo, émara Viya Mercurio taicha ema ticametarairurahi —nacahepa.

¹³ Tiúri, tatiarihi eta peti te tasiaparacu eta avasare, mayujarasirarehi ema achane tavanarahi eta nasiñaraji ticajare Júpiter. Tatiarihivare eta apina turu mamansurehi. Tacahe, ema maca achane máepanapa eta turu. Mayehehecapa eta flure taicha mavaraha macapacayarehi eta turu. Májaracasihayarehi ema Pablo émapa ema Bernabé. Énerichuvare ena achaneana navarahahi náejirayarehi ena nani apinana apóstoleana taicha náimijachaipa énaripa ena nasiñarajianahi. ¹⁴ Étasera te nasamairiricapa ena apóstoleana eta náichirayarehi, ichape eta náefamirava. Tiúchucanapa, nasiapamurihapa ena achaneana. Tipiaracanapa, ánipa nacahe:

¹⁵ —¡Tátanaveana, mémenaveana! ¡Váhirine táurihini eta juca íchirayare! Vítirichu ecutiqueneana achaneana. Tímetecahavihi vimetapanáhe ínajica eta juca eyeherepianahi. Taicha vahi tiuri, tamapurujíhi eta eyehheasiraparacahi eta esiñarajiana. Ínajicaya eta juca. Éhicayaresera ema Viya, ema yátupiquenehi tisamahavi. Éma tépiyacahi eta anuma, eta apaquehe, eta ichapequene mar. Tétupiricahi tamutu eta vímahaqueneanahi puiti.

¹⁶ Ánaquiaparipa eta macamichirahi ema Viya eta náichirahi eta navarahaqueneana ena achaneana. ¹⁷ Máimerecahinéniséra eta émairahi tépiyaca eta juca táuriqueneana. Tíjaracahavihi eta tíquiva. Tiúrinachayare eta sucurecana vinicaqueneana máicha. Májarasirahavihi tamutu eta vicamunuqueneana.

Ticurisamurechahavivare. Eta tacahe, ímatiquenéha yátupina eta émairahi Viya esiñarajiya —náichapa ena apóstoleana.

¹⁸ Eta tacahehi, nametacari pahinéni eta taurivahi eta juca navarahaquenehi naicha. Énaser ticamesavanarichucha eta navarairahi ticaparecana eta túruana. Váhiqeneséra náisapahíni ena apóstoleana náichahini eta juca.

Natupisicapa te márijahiana ema Pablo

¹⁹ Tayerevahi eta sácheana, títecapanapa ena israelítana tiásihanahi te Antioquía Ichipichu étapa te Iconio. Éna ticatianacanahi ena apóstoleana. Nayurucavacapa ena achaneana, náimiyusemacavacapa. Eta nachimapirahi ema Pablo te calle, natupisihapa te márijahiana. Náquipaica. Eta náimairahi máquipaisiravahi, náimijachaipapuca tépenahi. Nachururupaicapa náquijicarehi te tachachacu eta avasare. ²⁰ Tacahe, tiyananapa ena machamuriana ema Pablo, náimahapanayarehi. Te náitecapauchapa, náurujiacaripa. Émasera téchararahaipa téchepucapa. Máehicavacapa tiyanapa eta te máitecapihahi. Te apanapa sache, tiyananapa ema Pablo émapa ema Bernabé te avasare Derbe.

²¹ Te títecapanapa tayehe eta avasare Derbe, nanasipanapa tayehe. Ticametarairuanahi eta máechajiriruva ema Viya. Camuriana ena tisuanapanahi téhicanahi ema Jesús. Te tamutupa eta náimitusiravacahi, tiyananavarepa tichavanapaipa eta te avasareana náimituresinepahi eta te Listra, te Iconio, étapa te Antioquía Ichipichu. ²² Eta te juca avasareana, náimitucavarepa ena téhicanaripa ema Jesús. Náetumechavacapa eta táurivaina eta náehisraya ema Viya. Náichavarepa:

—Vahi ecuarameca eta nacatianasiráhe ena achaneana táichavene eta éhisira ema Viáquenu. Ecamichachucha tamutu. Échava eta esiapiraya eta mávasa ema Viya —náichapa.

²³ Énerichuvare, natanucapa ena nayeheanapachu pastor nácani náijamuripachu. Téchanayarehi eta nayujarasirana. Tacahe, natuparacapa eta náavacureanaya. Te tamutupa eta natuparasiravacahi, tiyujaracanapa nahayunachavarepa, nayaseacapa ema Viya eta majaneasiraina táurivaina eta náehisraya namutu ena ticasíñanaripa ema Viya.

Ema Pablo, ema Bernabé tichavanavare tayehe eta avasare Antioquía

²⁴ Tacahe, tiyananapa ema Pablo émapa ema Bernabé, tétavajicanapa eta te avasarechichana tayehe eta Pisidia. Náitecapirapa tayehe eta avasare Perge táunavahi eta provincia Pamfilia. ²⁵ Ticametarairuanapa eta máechajiriruva ema Viya nayehe ena achaneana ticavasana tayehe eta avasare. Te tamutupa eta nacametarairuahi, tiyananavarepa nacaijuhepa eta Atalia.

²⁶ Étapa návacuinehi eta nánuesiraya eta mar, nacaijuhepa eta avasare Antioquía. Tichavanapa tayehe eta juca avasare náuchusinehi te ticavanahianapa mayehe ema Espíritu Santo. Étarichuvare nayujarauchinehi ena nachamuriana eta majaneasirayare ema Viya ena apóstoleana eta napaisirayare. Puiti eta juca náitauchaquenéipa eta náematanehi. ²⁷ Eta náitecapiraipa, nacurujicapa ena nachamuriana. Nametacapa tamutu eta máimicatasiravacahi ema Viya tayehe eta napaisirapahi. Étapa eta majacapiravacahi ema Viya ena apavasanana eta nasuapiravacahi nacasiñairahi éma. ²⁸ Tacahe, ema Pablo émapa ema Bernabé, tiyerehi eta nanasirahi nacachaneravacahi ena nachamuriana.

15

Ticurujicacanapa te Jerusalén. Ticaechacasinapa eta panererucanahi.

¹ Te jena sácheana, títecapana te Antioquía ena apamuriana israelítana, tíasihanahi te Jerusalén. Navarahapa nahapapiricavaca ena apavasanana téhicanaripa ema Jesús. Ánipa naicha eta náimituresirahi:

—Te evaraha iúchucuha eta ícuñayaréni, tacamunu itauchayare eta mavanairipihí ema Moisés eta vicamarcairaya* —nacahepa.

²⁻³ Émasera ema Pablo, émapa ema Bernabé nacapaemachavacapa muraca ena tipamicanahi ena apavasanana eta nacamarcairahi. Ichape eta nacapaemachiracacahi. Tacahe, ena nachamuriana navarahahi náetupirica eta juca. Tásiha, natuparacapa ema Pablo émapa ema Bernabé, nayanahini eta te Jerusalén. Eta ánaqui, ticaechacasiyarehi nayehe ena apóstoleana énapa ena náiyarahanahi. Náevatacavare ena apamuriana téhicanayarepahi ena apinana.

Tacahe, eta napaisirapahi te achene, tétavajicanapaipahi tayehe eta avasarechichana táunavanahi eta Siria, étapa te Samaria, návihahi ena apamuriana nachamurianahi. Nametacapaipa eta náinajisirahi ena apavasanana eta nayeherepianaini tauriqueneana, taicha eta náehisiraipa ema Jesús. Tacahe, ena nachamuriana, eta nasamairirisirahi eta juca, tiúrisamureanarínehi éna.

⁴ Tacahe, eta náitecapirahi eta te Jerusalén ema Pablo émapa ema Bernabé, ena apóstoleana énapa ena náiyarahanahi pastoreanahi nacurujicapa ena nachamuriana eta najacapiraya ena araitecapianahi. Tacahe, ena apinana nametacapa eta máimicatasiravacapahi ema Viya eta napaisirapahi éna. ⁵ Natiarihivare ena religiósoana téhicanaripahi ema Jesús. Titupihanapa éna. Téchajicanapa, ánipa nacahe:

—Táitauvaguene tacamunurichu nacamarca ena apavasanana téhicanaripa ema Viáquenu Jesús. Tacamunuhivare nacaravahu náehica eta juca mavanairipianahi ema Moisés —nacahepa.

⁶ Tacahe, te apanapa sache, tiúrujicavanapa ena apóstoleana énapa ena náiyarahanana. Navarahapa náetupirica eta juca. ⁷ Nacemataneacaripa eta juca náechajisihahi. Tacahe, titupihapa ema Pedro. Máichavacapa:

—Nuparapenevana, écharichuhi éti ánaquiaparipa eta manerejisiranuhi ema Viya eta nucametarairuya eta nayehe ena apavasanana eta náuchucuirayarehi táichavenénahi eta nasuapirayare ena apana. ⁸ Ema Viya máimatihí eta nasamureana ena apavasanana eta nasuapirahi. Tásiha, máimerecachi eta majacapiravacahi eta mávahásiravacahi ema Espíritu Santo tacutihí eta mávahásirahavihí víti. ⁹ Ema Viya, nájina manerejiruina eta máemunasirahavi. Témunacahavihí vimutu: víti israelítana, énapa ena apavasanana. Eta tacahehi, masípasinavacarípa eta nasamureana éna táichavénehi eta nasuapirahi. ¹⁰ Étisera evarahapa épuruyare eta máichaqueneanahi ema Viya. Ticaje-raequenepa eta véhisirainahini eta nayeherepianahi ena viáchucanaveanaini. Énaripa vahi náitachapahini tamutu eta nayeherepianapahi. Vítiripa váhivare váratahahini vítauchahini. Tacahe, váipa táurichahini vécatihavacahini ena

* **15:1** Eta mavanairipini ema víyarahaini Moisés ticamarcanayarehi namutu ena amuyana ajairana israelítana. Éta tímereuchayarehi eta yátupiquenerahi israelítana. Te juca, ena napaipiruanahi tíasihanahi te Judea, navarahapa nacamesaqueeneha nacamarcavaya ena ajairana ichanaruanaripa, apavasananhivare.

vichamuriana apavasanana náichahini eta juca. ¹¹ Vécharipahisera yátupi eta viúchucuiraya táichavénehi eta macatajisirahavihi ema Viáquenu Jesucristo. Viti israelítana, vahi étaparacaina eta vicamarcairahi. Ena apavasanana, váhivare étaparacaina eta tájinairahini namarcainahini —máichapa ema Pedro.

¹² Tacahe, timatinanapa namutu. Nasamararacaripa ema Bernabé, émapa ema Pablo. Nametamurihapa eta máimechirahi ema Viya eta mavanésiravacahi éna, taicha máijaracavacahi eta náichirahi eta tiáramicareana te namirahu ena apavasanana. ¹³ Te títapiricanapa eta nametarapianahi, émapavapa ema Santiago téchajica. Macahepa:

—Nuparapenaveana, esamanuchaha. ¹⁴ Ema Simón Pedro timetacahaviripa te tépanavainapa majacapavacainapa ema Viya ena apavasanana machaneranayarehi. ¹⁵ Eta juca eta náechajisihaquenehi namutu ena víyarahaini profetana. Émaripa ema víyarahaini profeta Amos májuchahi eta juca máechajiriruvana ema Viya, ani macahehi: ¹⁶ “Te táequenénapa eta juca, nápechavaya núcupaicayare te juca apaquehe. Nétupiripanaya eta nupena táquipairuvahi. Tásiha, tiápechavanayare tiyujarauchanuanayare ena achaneana, tacutiayare eta náejirairanuhi ena machaneranaini ema rey David. Tisuapanuanayareva. ¹⁷ Énerichuvare títanucanuanayare namutu ena apavasanana. Nuchaneranayareva éna, taicha námayare eta nájare”. ¹⁸ Étara eta juca macayemaquenehi ema Viya. Ánaquiaparipa eta mavarairahi vicaicutiaraya eta juca.

¹⁹ Tímiyanava eta máechajiriruvana ema Santiago, ánipa macahe:

—Tiuri, eta juca eta nupanereruhi núti: Tiúripa vésamiricavacachuca ena vichamuriana apavasanana náequeruvanaripa mayehe ema Viya. ²⁰ Taratarichu vicajurevaca tametaca eta vaipa nacuaepechava nacunica eta taeche eta sárare náijaracasiruana eta nasiñarajiana. Váhivare nacuveha súcani apana esena. Énaripa ena esenana, váhivare nacuveha ema apana achane. Váhivare nacunica eta taeche eta sárare namaechatinure. Étaripa eta táitine, váhivare nacunica. ²¹ Eta vimetacavacayare ena vichamuriana apavasanana eta juca, apaesa vahi nacusemaracavaca ena téhicanarichaha eta mavanairipiana ema Moiséini. Taicha ánaquiáparipa te avasareana eta náechajicuiraparacahi ena vijaneanana israelítana eta mavanairipiana ema Moiséini te náurujisiravana. Puiticha nararihichaha ena náimicapicaucharichucha —macahepa ema Santiago.

²² Tacahe, ena apóstoleana, énapa ena náiyarahana, énapa ena námurivana, tiúrihi nasama eta mapanereruhi ema Santiago. Tacahe, ticavanahianapa ena apinana téchemarahiana ticapichuanahi, ema Judas Barsabás émapa ema Silas. Éna téhicanayarehi ema Pablo émapa ema Bernabé eta nachaviraya te Antioquía. ²³ Tiuri, eta juca táechajiriruvahi eta carta. Ani tacahehi: “Vímiamareca eta juca véchajiriruva viti apóstoleana, énapa ena víyarahana, énapa ena vichamuriana te juca Jerusalén. Vívaraha tativayare véchajicahe eti viparapenaveanahi te mavahuana ema Viáquenu: eti apavasanana tiáviañahi te Antioquía, étipa eti tiáviañahi te táunavanahi eta Siria étapa eta Cilicia. ²⁴ Visamairicahi eta nayanirahi ena tiásihanahi ani te juca. Tiávajiriricaheanapa. Navarahahi nahapapicayare eta epanereruana. Ticamesaheanahi ítauchayare eta mavanairipiana ema Moisés eta ecamarcaraya. Váhiserá vanairucanaina eta

viyehe eta náimitusirahehi eta juca. ²⁵⁻²⁷ Vévatacahi ema Judas émapa ema Silas, vanairucanahi viyehe. Éna, timetacaheanayare tamutu eta juca téchacareanahi viyehe. Ena nani téhicanapahi ema Bernabé ema Pablo, ena viparapenaveana vémunaruqueneana. Ema maca Bernabé émapa ema Pablo, tjaracavanahi éna náepenacaya ema Viáquenu Jesucristo taicha eta nacametairuirahi. ²⁸ Áni te juca víti, vicuticacahi eta vipanereruanahi, máimitusirahavihi ema Espíritu Santo. Vahi vávarahahini tacajeraequenehini eta éhisirayare ema Viáquenu. ²⁹ Tacarichu vimetacahe eta juca ticamunucarepana te mamirahu ema Viya:

1. Vahi ecunica eta taeche eta sárare nayujaraurehi ena achaneana te tamirahu eta nasiñarajiana.
2. Váhivare ecunica eta táitine eta sárareana.
3. Váhivare ecunica eta taeche eta sárare ñamaechatinure.
4. Váhivare ecuveha esu apana esena. Énerichuvare eti esenana, vahi ecuveha ema apana achane. Énerichuvare ímitucavaca ena echichanaveana tacuija eta natuhusivaina.

Te yátupina esuapa eta júcana, tájina íchiravaimahi te mamirahu ema Viya. Éma tímicitacaheyare tijaneacaheyareva tamutu sácheana. Tamutupa eta juca véchajiriruvanahi eta eyehe”.

³⁰ Tacahe, tiyananapa ena tiámana eta carta, nacaijuhepa eta Antioquía. Te títecapanapa ánaqui, nacurujicapa ena nacaijuhequeneanahi nachamuriana. Náijaracapa eta námaquenepahi carta. ³¹ Te najacapapa eta carta, navejiacapa. Náechajicuhapa te namirahu namutu ena nachamuriana. Tétavicavahi eta náurisamurevahi eta nasamirahi.

³²⁻³³ Nanasipanapa jena cájeanahi ema Judas émapa ema Silas. Éna, énerichuvare eta títucanahi eta máechajiriruva ema Viya. Tiúrihi eta náimitusiravacahi ena nachamuriana. Naconsejachavacahi, náetumesámurechavacáinehi náicha. Te tamutupa eta náimituresirahi, tichavanayarepa nayehe ena tivanecanahi. Tacahe, ena nachamurianahi náechejemachavacapa. Nayaseacapa ema Viya táurivainapahi eta napaisiraina. ³⁴ Émasera ema Silas mavarahapa manasiyare. ³⁵ Énerichuvare, ema Pablo émapa ema Bernabé nanasivarepa tayehe eta avasare Antioquía. Tímiyanavanapa ena tímiturecana nayehe ena nachamuriana. Ticametairuнавare nayehe ena apamuriana achaneana. Natiarihivare ena apamuriana tímicitacananahi.

Tiápechavánavare tiyanana ena apóstoleana te avasareana

³⁶ Te táequenepa eta juca semanana, ema Pablo máichapa ema Bernabé:

—Viyanavare viápechava vipaica tayehe eta avasareana, véjiravacapahi ena vichamuriana te vipaisineanapahi cape juca te tñapucainapa viyanahi. Vímaha tájahapuca náicharacavahi —máichapa.

³⁷ Tacahe, ema Bernabé tísapavahi tiyana. Mavarahapasera mama ema Marcos. ³⁸ Émasera ema Pablo vahi mávarahahini mayanahini ema Marcos. Taicha te tñapucainapa tipaicana manaquimurirahi ema Marcos te avasare Perge tayehe eta Panfilia. Vahi máimicitacahini tayehe eta náemataneanapahi. ³⁹ Nacaemataneacaripa eta mamavarairahi mayanahini ema Marcos. Tacahe, tñajicacanapa. Ema Bernabé tiyanapa, macachanehi ema Marcos. Tiávacuhanapa, nacaijuheyarepa eta tiúrupuhi Chipre. ⁴⁰ Tacahe, ema

Pablo mapanerechapa mámayare ema Silas. Te tétupiricavanapa, nayujarau-
chanumapa ena nachamuriana. Nayaseacapa ema Viya eta máimicatasirai-
napahi eta napaisiraya. Ticametavanapa tiyananapa. ⁴¹ Eta napaisirapahi
te achene tétavajicanapaipa tayehe eta avasarechichana Siria étapa te Cilicia.
Náejiravacapaipa ena nachamuriana natiarihiqueneanapahi. Náetumesá-
murechávacapáipahi.

16

Emá Timoteo máehicavacapa ema Pablo, ema Silas

¹ Tacahe, ema Pablo émapa ema Silas náejiravacapaipa ena nachamuriana
ticavasanahi te Derbe. Tásiha, tiánucuhanavarepa te Listra. Ánaqui te Listra
matiarihíhi ema Timoteo, suchicha esu ésuna esena israelíta, téhichavare
ema Jesús. Émasera ema maiya, apavasanahi griego éma. Ema maca
Timoteo émarichuvare téhichahi ema Jesús. ² Énerichuvare, nacunachahi eta
máurivahi ena machamuriana ticavasanahi te Listra énapa ena ticavasanahi
te Iconio. ³ Tacahe, ema Pablo mavarahapa mámayare ema Timoteo eta
napaisiraya. Tacahe, mavanecapa macamarca* apaesa tacuija nacucayema
ena israelítana ticavasanahi tayehe eta napaisihayare. Taicha náimatihi éma
eta machichairahi ema apavasanahi. ⁴ Tacahe, tiyananapa. Náejirava-
capaipa ena nachamuriana te tamutu avasareana. Nametacapahi éna eta
táchajiriruvapahi eta carta náimiamareruhivare ena apóstoleana énapa ena
náiyarahana tiávihanahi te Jerusalén. ⁵ Ena nachamuriana, eta nasamirapahi
eta mametarairu ema Pablo, tétumechacacanapaipa eta nasuapajirairapahi.
Tamutu sácheana ticajanemuriánapáichucha ena téhicanapahi.

Emá Viya máehajicahi ema Pablo mayana eta te Macedonia

⁶ Tiuri, ema Espíritu Santo mametacahi vahi nacuyana eta te tinapaicahi
eta avasareana te Asia. Tásiha, náetavicapa eta avasarechichana táunavanahi
eta Frigia (ticaijarehivare Galacia). ⁷⁻⁸ Nacaijuheyarehi eta provincia ticai-
jare Bitinia. Téhesera te tiánéhianapa, ema Espíritu Santo mavanecavarepa
vahi nacuyana tayehe. Tacahe, náetaviequenehapa. Tiánucuhanapa tayehe
eta táunavahi eta Mísia. Náitecapirapa te puerto ticaijare Troas. ⁹ Te jena
yati, máimahapa ema Pablo te mavapure ema émana achane ticavasahi te
tinapaica te Macedonia. Titupihahiji éma. Máichapaji eta máechajisirahi:

—Picatajicahavi, piánueca te juca viávihahi Macedonia. Pímicatapanahavi
—máichapaji.

¹⁰ Eta máimairahi ema Pablo te mavapure eta juca, enevanepa vétupi-
ricavapa eta viyaniraya tayehe eta Macedonia, taicha véteteacahi eta
mavarairahi ema Viya eta viyaniraya eta ánaqui, vicametarairuirayare.

Títecapanapa te avasare ticaijare Filipos

¹¹ Tacahe, viávacuhapa eta te puerto Troas. Viyanapa tayehe eta tiúrupuhi
ticaijare Samotracia. Te apanapa sache, vítecapapa te Neápolis. ¹² Viúcupaicapa
viyanapa te avasare Filipos. Eta juca avasare nayehe colonia ena ro-
manoana. Eta ichapepanahivare tayehe eta avasarechichana tinapaicahi

* **16:3** Eta juca nayeherépi eta nacamarcairahi ena israelítana, te tiúchucha ema amuya ajairachicha,
te óchopa sache eta máuchusirahi, namarcachayarepa. Émaripa ema Timoteo ichanaruipahinéni. Éma-
sera ema Pablo macavanairipipa macamarcahivaréni éma apanavare, apaesa tacuija nayunacahi ena
israelítana.

eta te tacunahu táuchusine eta sache eta Macedonia. Vinasipanapa tayehe te jena sácheana.

¹³ Te jena sache sávaru, viyanapa eta te nayujarasirarehi te tachachacu eta avasare te tachaui eta cajacure. Véjacapa tayehe. Vicametarairupa nayehe ena esenana náurujiruvanahi tayehe. ¹⁴ Sutiarihi esu ésuna esena ticaijaruhi Lidia. Ésu, tiásihai eta avasare eta suchusinehi. Esu suca tjararecarahi eta yérerucava sédana mularumeana. Ésurichu, tipicaurahi me Viya. Susamaracaripa eta mametarairuhi ema Pablo. Éma Viya mavejiasinaipa eta susamure sujacapirayarepahi eta mametarairu ema Pablo. ¹⁵ Enevanehi ticaicachasihi esu esena énapa namutu ena tiávihanahi te supena. Tacahe, suvarahapa tiámahavi eta te supena. Sucahepa:

—Te esuapapuca eta yátupirahi eta néhisirahi núti eñi Viáquenu Jesús, ítecauchanupáini te nupena —sucuhepa.

Tásiha, ticamesahavipa tiámahavi te supena. Tacahe, vísapavapa véhica.

¹⁶ Te apana sache, te viápechavavarepa viyana tayehe eta nayujarasirare, vicainunapa esu ésuna amaperu mávaháruhi ema éreana. Tijarauquihi ésu máicha. Esu suca amaperu vanaracahi. Ichapemurihi eta plata suvachanahi, sujaracaphisera ena suáquenuana. ¹⁷ Te tímahahavivare viánucuha, téhica-havivare esu suca amaperu. Tipiaracapai te véquene. Ánipa sucahe:

—Ena nani ajairana ñivanarana eñi Viya Viáquenu vimutu viti achaneana. Náechajisihavare eta eyehe eta achene ticaijuhe ñe Viya nayanihayare ena náuchucureanayare —sucuhepa.

¹⁸ Ichapemuri eta sácheana eta suéhicarairisirahavihi. Mapuñacapa ema Pablo. Téquerucavapa. Tásiha, máichapa ema éreana ema tiávahácahi ésu:

—Te máijare ema Náquenu Jesucristo, nuvanecavi piúchuca te suáquehe esu suca amaperu —máichapa.

Enevanepe tiúchuca ema éreana. Majunijiacapa ésu.

¹⁹ Te náechapa ena suáquenuanahi, tise-manapa taicha tájinapa suviahini eta suplatanechihavacahini. Tacahe, nacaratapaca ema Pablo émapa ema Silas. Námapa te plaza te namirahu ena tuparairucanahi. ²⁰⁻²¹ Tacahe, nametauchavacapa nayehe ena tuparairucanahi. Ánipa nacahe:

—Ena nani ajairana israelitanacacha. Nacahepuca eta tamauri-queneana. Navarahapa tímajicahaviana eta viyeherepiana. Navarahavare véhica eta vimaímatiequeneruhi viti romanoana. Váhivare táisapacarehini vítauchahini eta nayeherepianahi énatatajiana —náichapa.

²² Tacahe, ena achaneana tise-manapa nayehe ema Pablo émapa ema Silas. Tacahe, ena tuparairucana juéseanahi nacavanairipipa navejamuhiacavaca, náestacavacapa te yucupiiana. ²³ Te tamutupa eta náestasiravacahi, námapa te cárcel. Navanecapa ema nacapitara ena carceléroana máechapajirica muraca eta tapaja. ²⁴ Te masamapa ema nacapitara eta navanairipihini, máimisipavacapa tayehe eta téqueneha cuarto. Máeratapaiquechavacapa te cepo. Manacapa cantavu eta tapaja.

²⁵ Tacahe, eta jena enumuhuquenepa yati, eta nacaeratairahi ema Pablo émapa ema Silas, tijiranaichucha tiyujaracanahivare me Viya. Ena apamuriana présuanahi nasamaracaripa eta jirasare. ²⁶ Tjahúchavapa tiyamuraica muraca eta apaquehe. Tiyamuricapa eta yúchamana. Tjahúchavapa téjiacavaca eta tapajacurana eta cárcel. Téjapucapa eta cadenana náitihanahi ena présuana. ²⁷ Téjamiuchavapa ema nacapitara ena carceléroana.

Máimaharine eta tapajana téjiacavacarihiri. Máimijachapa nájinaripahi ena présoanahi. Tásiha, mavehapa eta mayehe espada. Mavarahapa ticapacavayahini táichavenehi eta mapisirahi. ²⁸ Émasera ema Pablo mapiaracapa:

—Vahi picucapacava. Vitiarihirichuhi vimutu. Nájina émanaina téjiacavaina —máichapa.

²⁹ Tacahe, ema nacapitara tiyaseserecapa eta namicahuyare. Tisiapapa máimamurihayarehi éna. Tiyayacarepainecha eta mapisirapahi. Tépuycapa te namirahu ema Pablo émapa ema Silas. ³⁰ Máichuhavacapa éna, mámapa te mapena. Mayaserecavacapa:

—Tátanaveana, ¿tájahapucaini nícharacavaini eta núchucuirayare núti apana?

³¹ Éna najicapapa:

—Pácasíña pisuapa ema Viáquenu Jesucristo. Tásiha, éma ticuchucuhaviyare píti, énapa ena pichichanaveana —náichapa.

³² Tacahe, náimitucapa éma eta máechajiriruva ema Viya, énapa namutu ena tiávihanahi te mapena. ³³ Étarichu jena yati ema nacapitara masipasina-vacapa eta najarana ema Pablo émapa ema Silas. Tacahe, tícaichasípa éma, esu mayena, ena machichanaveana, énapa ena apamuriana tiávihanahi te mapena. ³⁴ Te táequenepa eta juca, mámamurihavarepa te mapena. Máenica-vacapa. Tiúrisamureripa éma, énapa namutu ena tiávihanahi te mapena, eta macuchucuiravacayare ema Viya eta nasuapiraipa.

³⁵ Te las nuévepa sache, ena juéseanahi navanecapa ena nasuntarurana nacuchupanavacayarehi ena náerataruanahi. ³⁶ Tacahe, ema nacapitara ena cárceléroana máichapa ema Pablo:

—Jucarihi eta órdena nayehe ena juéseana eta nacaitisiraheya. Tiúripa eyana iúchuca. Vaipa táéñamavacare —máichapa.

³⁷ Émasera ema Pablo máechajicavacapa ena suntaruana. Máichapa:

—Víti tavanarahavi eta Estado te Roma. Viávacuhahi eta ley. Vahi táuricahini náichahavihiní ena juéseana ticaratacavahanapa téstacavahanapa te namirahu ena achaneana. Vahi nayaserecavahinumahini te tatiarhipuca eta viviurevahi. Tásiha puiti, navarahapa nayumurucayare eta nacuchusirahaviyare. ¡Vahi ene tácahe! Emetaca énaína náiteca nacuchupanahavi —máichapa ema Pablo.

³⁸ Tacahe, tichavanapa ena vanairucana. Nametacapa ena juéseana eta máechajiriruva ema Pablo. Ichaperine tipicana ena juéseana eta nasamirahi tavanaranairahi eta Roma. ³⁹ Tacahe, tiyananapa ena juéseana nacuchupana. Tiperdonachavanapa nayehe. Náichapa:

—Ájapanuhavi. Eperdonachahavi eta juca víchirahehi. Ecatajicahavi, vahi ecumetauchahavi. Ájapanuhavichucha, tiúripanahipucáini iúchucaini eta te juca avasare viávihi, apaesa náesamiricahepa ena iánananahi —náichapa.

⁴⁰ Tacahe, te tiúchucanapa te cárcel ena Pablo émapa ema Silas, tiyananapa tichavana te supena esu Lidia, viávihihi víti. Vicurujicapa ena víchamuriana. Tásiha, náetumechavacapa, náimitusiranumapa eta náimiyavachucha eta nasuapajiraivaina mayehe ema Viya. Tásiha, tiyananapa.

¹ Eta nayanirahi ema Pablo émapa ema Silas, tiánucuhanapa tayehe eta avasareana Anfípolis étapa te Apolonia. Títecapanapa tayehe eta apanavare avasare Tesalónica. Tatiarihihi ánaqui eta náurujisirareva ena israelítana. ² Eta mayeherepihi ema Pablo, matupiru te náurujisirareva. Mapana sávaru eta macametarairuirahi nayehe ena achaneana. ³ Manerejicapahi eta te Sagrada Escritura eta máechajicurepahi. Máimitucavacahi eta máitesiraipahi ema Cristo. Ánipa máichavacahi:

—Tiyerehi eta vicuchapirahi eta máimeresiravayare ema Cristo eta viyehe viti israelítana. Tímitucahavihi eta Sagrada Escritura eta macatajivairayarehi, nacapacayarehi. Émasera téchepucayarehi te máecari. Puiti numetacahé: Nímatipa ema Jesús Nazareno, ema nacaparuhi. Téchepucaipahi éma. Eta juca tímicaecherachahi émahi ema Cristo —máichapa.

⁴ Tacahe, tinerejicavanahi ena achaneana. Natiarihi ena tisuapanahi, náurujiacahi ema Pablo émapa ema Silas. Camurianavare ena griégoana apavasanana tipicauchanahi ema Viya, téhicanahivare. Énerichuvare ena esenana nayenana ena táiyarahana eta avasare tinerejicavanahivare ena téhicanahi. ⁵ Énaserá ena apamuriana israelítana masuapajirairahanahi, ticapinaruanahi eta náimairahi ena camuriqueneanahi achaneana téhicanahi ena apóstoleana. Tisemasamureanarichucha. Nacurujicapa ena ajairana váinarajipanereruana, máematanereanahi te cálleana. Tíchuhajiricacanapa eta nacaechepusiraya eta semanere. Natanucapa ema Pablo émapa ema Silas, navarairahi nacaetemajiricavaca te namira ena achaneana. Tiyananapa eta te mapena ema Jasón. Náquipaicapa eta tapaja. Tisiapanapa. ⁶ Eta namaichimavirahi ema Pablo émapa ema Silas, nacaratacapa ema Jasón énapa ena apamuriana machamuriana. Nachururupaicavacapaipahi eta námirapahi te namirahu ena tuparairucanahi. Tipiaracanapa eta nasemanevahi, nacahepa:

—Títecapauchahavianahi ena nani achanetatajiana náitecapaurehavianahi. Najararecapahi eta viyeherepiana, nahapapicahivare eta napanereruana ena vijaneanana. ⁷ Éna majacapaqueneanahi ema Jasón te mapena. Namutu ena nani nacaecahihi ema aquenuca viyehe Emperador romano, náepuruvare eta mavanairipiana. Náimijachahiji mararihi ema apana rey ticajarehipuca Jesús —nacahepa.

⁸ Te nasamapa eta juca, ena tuparairucana énapa ena apamuriana achaneana, napanerequeneháinehi. ⁹ Tájinasera apanainahini náicharachini, nayaseacapa nanaquica eta prenda eta náuchusirayare ema Jasón énapa ena machamuriana. Tiámainucava te náuchucapa te avasare ema Pablo ema Silas, náimichavayarepa eta prenda.

Éma Pablo, ema Silas títecapanapa te avasare Berea

¹⁰ Te jena yátiquenehi, ena vichamuriana námapa nayumurucapa eta nacuchusirahi ema Pablo émapa ema Silas tayehe eta avasare. Tiyananapa nacaijuhe eta avasare Berea. Te títecapanapa ánaqui, tiyanavare tayehe eta náurujisirareva ena israelítana. ¹¹ Ena nani israelítana ticavasanahi te Berea, tiúripanereruanapana nayehe ena ticavasanahi te Tesalónica. Navapina éna, nasamaracapa eta mametarairuhi ema Pablo. Tamutu sácheana nacaravahuhi eta Sagrada Escritura. Navarahahi náechayare te yátupihipuca eta mametarapihi ema Pablo. ¹² Jéhesareinehi, camuriana ena tisuapanahi. Camurianavare ena apavasanana tisuapanahi. Te namuri, natiarihivare

ena esenana ticapicahuqueneanahi, énapa ena ajairana. ¹³ Nasamairica-varepatera ena israelítana ticavasanahi te Tesalónica eta macametarairuri-pahiva ema Pablo eta te Berea. Enevanepa tiyanana nacapayaca. Te títicapana, náimiyusemacavarepa ena achaneana. ¹⁴ Énasera ena machamuriana ema Pablo enevanepa náevataca éma te tachausi eta mar. Nanasipasera te Berea ema Silas, ema Timoteo. ¹⁵ Ena tiámanahi ema Pablo, te títicapana te puerto, tiávacuhanapa tiyananapa tayehe eta avasare Atenas. Te títicapana, etapa nachavinehi ena tinapananahi ema Pablo. Tacahe, ema Pablo matuparacavacapa nametaca ema Silas, ema Timoteo nayanavane nacapayaca éma eta te mávihahi.

Títirecapa ema Pablo te avasare Atenas

¹⁶ Eta macuchapiravacahi náitecapiraya ema Silas, ema Timoteo, vaipa máitucacarehini ema Pablo eta máimairavacahi ena achaneana nayehe-hearacahi eta camuriquene nasiñarajiana. ¹⁷ Tacahe, tamutu sávaruana, tiyana eta te náurujisirareva ena israelítana. Máechajisihahi eta tiúrina échajirucava nayehe éna, énapa ena apavasanana griego tipicauhanahi ema Viya. Tamutuvare sache máechajisihahi éma te plaza nayehe ena achaneana natiarihiqueneanahi. ¹⁸ Natiarihihi ena ajairana ena téhicanahi eta máimiturapi ema ticajare Epicuro, énapa ena apamuriana ticaravahanahivare eta náimiturapiana ena estoicoana. Te jena sácheana, téchajiricavanapa mayehe ema Pablo. Váhiserá nácacutiarapahini eta macayemapahi. Nacahepa:

—¿Tájahasamipucara tacayemahicácha eta mapanereruhi ema maca?

Ena apamuriana ánivare nacahe:

—Ema maca ticametarairurahi tayehe jácani apanavare masiñarajianarichu —nacahepa.

Nacahehi éna eta juca, taicha ema Pablo mametacavacahi eta máepenirahi ema Jesús etapa eta máechepusirahi, máechiravahi títareca. ¹⁹ Tacahe, tiyananapa tayehe eta cabildo náurujisirareva ticajarehi Areópago. Ánaqui nayaserecapa ema Pablo:

—Vivaraha vímati víti eta juca arairuhi pímiturapihi eta viyehe. ²⁰ Taicha tiáramicarehi eta juca vimaimatiquenehi. Vivaraha véchayare tájahapuca tacayemahi eta juca —náichapa.

²¹ Taicha ene nacahehi namutu ena ticavasanahi te Atenas, énapa ena náiteruanapahi. Náuricarinehi náechajisiha tamutu sácheana eta náimahuqueneana nasamaqueneanapahi arairuqueneana.

²² Tacahe, ema Pablo titupihapa te namirahu te nayehe cabildo. Máichavacapa:

—Tátanaveana, eti ecavasana te juca Atenas. Nímararacahehi eta yátupirahi religióshe. ²³ Taicha te nítecapapa núti eta ani eyehe, nupaicahi tamutu eta eyujarasirareana. Nímahapa eta eyehe altar tatiarihihi eta ajureca ani tacahehi: “Ema Viya vimaimatiquene”. Tiuri, ema maca Viya eyujaraureasa emáimatiquénehi éti, émara ema Viya néchajisihaquenehi núti.

²⁴ Émara tépiyacahi eta apaquehe, etapa eta vímahaqueneanahi távaphianahi eta juca apaquehe. Émara téchahi ticavanairipihhi te anuquehe etapa te juca apaquehe. Éma Viya vahi tácarichuimahi máucupaisihaya eta te vépiyuanahi templo, taicha vahi mácamunu eta mapenainachuhini eta te juca apaquehe. ²⁵ Váhivare mácamunu víjaracasichahini eta víámavahu

viti achaneana. Vítira vicamunuvahi eta mayehe. Éma, téchapajirichavihi vimutu. Tíjaracahavihi eta táurivahi eta vítaresira.

²⁶ Acane te tépanavainapa tamutu, ema Viya máepiyacapa ema máinapuiru achane ticaijare Adán. Vimutu viti achaneana, mámariequenehavi ema Adán. Apánapanenéhjavihiséra maicha ema Viya. Tamutu eta apaquehe viávapaicahi máicha. Máimicutiarachapahisera eta táenasihayarepahi eta viávasanapachuyarehi. Énerichuvare, máimicutiarachahivare eta táichecui-rayare eta vítaresirana. ²⁷ Vítirihisera viti achaneana vémitisicaipa ema Viya. Émasera mavarahahi vitanucayare. Váhinéni máyerehíhávihini. Titsecavahi éma te vichacaya. Mácani mavaraha matanuca, máichimavávane-yarehi. ²⁸ Taicha vítarecahi máicha, tímipaicahavihi, achanehavihi máicha. Émaripa éma ichapequene escribáno te emuri éti macahehi eta máechajiriruvahi: “Viti achaneana cáitarecahavihi ema Viya”. ²⁹ Víti vímatihí eta máchanechirahavihi ema Viya, macaitaresirahavihi. Viyamuricahi vipaicahi máicha. Tacahe, véjecapiravahi víti te vímijachapuca virataha viáchanecha eta visiñaraji. Vímviasichahineni eta jácani, váhisera tasamarahihini, váhivare tapaicahini, váhivare tayamuricahipucaini. Tayanapanepuca táurina te vépiyaca eta óropuca, plátapuca, chínapuca. Váhivare vátatahaimahi nacasiñacarehini vicha. ³⁰ Te vicasiñarajhipuca eta vépiyaruana, vimáimatirarichaha. Ánaquiaparípa eta macamichirahi ema Viya ena achaneana eta nacasiñairahi eta nasiñarajiana. Puítisera vaipa macamicha eta juca. Tivanecahavipa vimutu viti achaneana vínajica eta juca, tátupiruvapa eta véneuchiravaina eta mayehe. ³¹ Taicha tatiarihiyarehi eta jena sáchezare máicuñacayare namutu ena tíchanahi eta juca. Tamutuínapa máetupiricayare. Mararihi ema achane manerejiruhi ema Viya, juésezare eta veyehe. Éma, ticaijare Jesús. Ema Viya máimerecahi eta manerejisirahi ema Jesús juésezarehi, taicha macaechepucahi te máecari te táequenepa eta máepenirahi —macahepa ema Pablo.

³² Te nasamapa eta máechajisihairahi eta máechepusirahi te máecari ema Jesús, natiarihi ena nacaecahiríchucha. Énasera ena apamuriana napanerequenehapa. Tacahe, náichapa:

—Téhenarinevare apahena péchajisihavare eta juca, apaesa visamavi — náichapa.

³³ Tacahe, tíuchucapa ema Pablo eta te náurujisirareva. Tiyanapa. ³⁴ Natiarihisera ena apamuriana nasupahi náehicapa eta mametarapi ema Pablo. Matiarihihi ema Dionisio táiyaraha eta nayehe cabildo, ésupa esu ésuna esena ticaijaru Dámaris. Natiarihivare ena apamurianahi.

18

Ema Pablo tiyanapa te avasare Corinto

¹ Te táequenepa eta juca, tiyanapa ema Pablo. Tíuchucapa eta avasare Atenas. Ticaijuhe eta apana avasare ticaijare Corinto. ² Ánaqui macainunapa ema émana israelíta ticaijarehi Aquila, ésupa esu mayena ticaijaru Priscila. Ema maca Aquila máachusinehi te tinapaica eta departamento Ponto. Tayerevahisera eta áñoana, tiyananapa tayehe eta avasare Roma. Macáemataneínehi ánipihi. Émasera ema aquenucaini Emperador Claudio macavanairipipa náuchuca namutu ena israelítana eta te Roma. Tacahe, tiyanapa ema Aquila tayehe eta avasare Corinto, étapa macainunainehi ema

Pablo. ³ Énapa mávayechavacahi ema Pablo. Ena nani ticuticacanahi eta náematanerepiana tálabarteroana. Tímicatacacanapa eta nacaematanerahi.

⁴ Tiuri, tamutu sávaruana ema Pablo tiyanahi tayehe eta náurujisirareva. Maconsejachavacahi ena achaneana. Macajimuyacahi eta nasamureana ena israelítana énapa ena apavasanana.

⁵ Tacahe, napaenumavapa nacapayaca ema Silas émapa ema Timoteo, tíásihanahi te Macedonia. Eta natiarihirahi éna, tépanavapa ema Pablo ticame-tarairu tamutu sácheana eta máechajiriruva ema Viya. Mavarahapa macajimuyacavacaya ena israelítana ema Jesús émairahi Cristo ema nacuchapa-quenahi. ⁶ Natiarihisera ena apamuriana masuapajirairahanahi. Nacati-nacapa ema Pablo, napanararachavare. Tásiha, tétatajiacavapa ema Pablo eta máepacuhasa, táicutiarahi eta namaimitucacarevahi ena nani. Majunijica-yarepa. Tásiha, máichavacapa:

—Étipa ecatapiravayare vaipa iúchucuhaimahi tayehe eta eçuñaraqui te apana vítaresira taicha eta emajacpirahi eta máechajiriruva ema Viya. Vaipa necha núti. Puiti juca nuyaninapa, nímiturecaya nayehe ena apavasanana — máichavacapa.

⁷ Tacahe, tiúchucapa tayehe eta náurujisirarevahi. Tiyanapa te mapena ema apana machamurihi ticaijare Justo. Ánaquipa eta máimituresihahi. Ema maca Justo, vahi israelítana, mapícauchahisera ema Viya. Eta mapenahi te tachacaya eta náurujisirareva ena israelítana. ⁸ Matiarahi ema apana achane ticaijare Crispo, tuparairuacahi tayehe eta náurujisirarevahi. Masua-pahi éma, ésupa esu mayena, ena machichanaveana, énapa ena apamuriana tíávihanahi te mapena. Camurianavare ena tisuapanahi ticavasanahi tayehe eta avasare Corinto eta nasamirahi eta máechajiriruva ema Viya. Namutu ticaicachasianahi. ⁹ Tacahe, étana yati, ema Viáquenu Jesús máechajicapa ema Pablo, ánipa maicha:

—Vahi picupica. Pímiyanavachucha picametarairu te juca avasare, ¹⁰ taicha camuriana ena nuchaneranaya. Núti nutiarhiya te pichacaya. Tájina náicharacavimahi ena piánarana —macahepa ema Jesús.

¹¹ Tacahe, ema Pablo manasipa. Étana año y medio macahehi tayehe eta avasare Corinto. Tímiturecahi nayehe ena achaneana eta máechajiriruva ema Viya.

¹² Étasera jena sácheana matupihairahi ema Prefecto ticaijare Galión. Aquenucahi éma tayehe eta avasare Corinto tayehehi capital eta departamento Acaya. Tiuri, ticurujicacanapa ena nacanarayarepa ema Pablo. Nacara-tacapa námapa te mamirahu ema aquenuca, nametauchayarehi. ¹³ Tacahe, náichapa ema aquenuca:

—Ema maca achane macontracha eta viyeherepi. Ema máimitucavaca ena vijaneanana, náitsivachayare eta véjirairaya ema Viya —náichapa.

¹⁴ Téchajiuchavayarepaini ema Pablo, émasera ema Galión macachuricapa. Máichapa ena israelítana:

—Tiuri, esamanuchaha éti. Te tíñehihipuca eta májecapiravahi ema maca, ticaparecahipuca, núti apana nímisipavahini juésenuinahini eta eyehe eta nusamirahénahini. ¹⁵ Étasera echájirirucavánachucha te máijare ema mácani apana, étapa eta eyeherepiana éti. Tájina táíñehicaréna eta juca. Vahi nímisipavaimahi núti, juésenuinahini tayehe eta juca. Ímahainepa éti — máichapa.

¹⁶ Tacahe, máevatacavacapa náuchuca te mamirahu. ¹⁷ Tacahe, namutu ena apavasanana griégoana nacaratacapa ema Sóstenes, nacapitarahi ena israelítana. Náestacapa te mamirahu ema Prefecto Galión. Émasera váhiquene máimisipavahini. Váhivare macatiuchahini. Ema Pablo tichavapa tayehe eta Antioquía

¹⁸⁻¹⁹ Tiyerehichaha eta jena sácheana manasirichaha ema Pablo. Te ticaicutiaravapa, mavarahapa tiyanaya eta te Jerusalén, tétavajisirayarepahi eta te avasare Efeso, étapa te avasare Tiro, táunavahi eta Siria. Tásiha, ticame-tavapa nayehe ena machamuriana. Macachanevacapaipa ema Aquila ésupa esu mayena Priscila. Tiyanapa tipaicana eta te puerto ticaijare Cencrea. Te tiánuecanayarepa, ema Pablo ticachucasinumapa tíhahisinumapa eta machuti, máitachirayarehi eta mayehe promesa. Te títecapanapa te avasare Efeso, nanasihayarehi ema Aquila ésupa esu Priscila. Te jena sache sávaru, tiyanapa ema Pablo tayehe eta náurujisirareva ena israelítana. Téchajiricavaipa nayehe, máimitusiravacahi éna. ²⁰ Tacahe, éna navarahapa náiminasicha, émasera vahi máisapavahini. ²¹ Téhesera te ticametavapa nayehe, máichapa:

—Nuyanayare tayehe eta Jerusalén. Ánaqui nunarasihayare eta jena sácheana piéstairayare. Nuchavayaresera nímahapanaheyare éti, te mavaraha ema Viya tacuijaichu níchava —máichavacapa.

Tacahe, tíavacuhavarepa. Majunijicapa eta Efeso. ²² Te títecapapa ema Pablo tayehe eta avasare Cesarea, tiánucuhapa tayehe eta Jerusalén. Máechajipánavacapa ena machamuriana. Te táequenepa, tiyanapa te avasare Antioquía. ²³ Tiyerehi eta cájeana manasiranumahi tayehe eta avasare Antioquía. Tacahe, tíapechavavare tipaica. Máejiravacapahi ena machamuriana te jácani návihavacapahi tayehe eta avasarechichana te Galacia étapa eta Frigia. Maconsejachavacapahi ena machamuriana. Matiarahi ema Apolo te Efeso

²⁴ Te jena sácheanahi, títecapahi te avasare Efeso ema émana israelíta ticaijare Apolo. Éma máuchurehi te avasare Alejandría. Máituca ticametairuru éma. Máimativare yátupi tamutu eta Sagrada Escritura ticaijare Antiguo Testamento. ²⁵⁻²⁶ Mavapinahí éma tamutu, étaripa eta máechajisirana. Ema Apolo máitucahi eta máimiturapiana ema Juan Tícachasiricarahi eta máitecapirayare ema Cristo ema nacuchapaquenehi. Máechahi eta máicachasisirahi ema Juan ema Jesús, ema yátupiquenehi Cristo. Váhiserá tamutuhini maecha eta máichavaquenevahi ema Jesús. Tamutu sávaruana, tiyanapa tayehe eta náurujisirareva ena israelítana. Ticametairupa, vahi mapicacaracavahini. Ánipa macahe:

—¡Títecapaipa ema Cristo ema vicuchapaquenehi! Ema ticaijare puiti Jesús. Vétupiricavaya vimutu eta viyaniraya te Jerusalén. Ema véhicaya taicha ema viáquenuya —macahepa.

Étaserá te nasamapa ema Aquila ésupa esu Priscila, námapa éma te napena. Tásiha, náimitucapa tamutu eta apamuriana téchacareana mayehe ema Jesús. ²⁷ Manasipanapa ema Apolo te jena cájeana. Tacahe, mavarahapa tiyanayare te tinapaica eta departamento Acaya. Tásiha, ena machamuriana náimicatatacapa. Ticajureanapa eta carta nayehe ena nachamurianahi tayehe eta avasareana macaijuheyarehi apaesa táuri eta najacapiraina. Te títecapapa éma tayehe eta Acaya, ichape eta máimicatasiravaca ena machamuriana taicha ema Viya máíjaracahi eta máitupajjiasiravahi. ²⁸ Máimitucahivare ena

israelítana eta te náurujisiravana. Máiminecapáequenehávacahi tayehe eta Sagrada Escritura ema Jesús émahí ema Cristo ema nacuchapaquenehi.

19

Títecapapa ema Pablo te avasare Efeso

¹ Tiuri, manasipa ema Apolo eta te avasare Corinto. Te jena sácheana, ema Pablo tíuchucahi eta avasareana táunavanahi eta Frigia. Eta mayanihapahi te achene te márijuecuana. Tacahe, títecapapa tayehe eta avasare Efeso. Te jena avasare, natiarihihi ena apamuriana tisuapajirahianahi. Máimativacapaipa éna. ² Tacahe, mayaserecavacapa:

—¿Mávaháruhépa ema Espíritu Santo te ecáijuhéinapa ema Viya? — máichavacapa.

Tásiha, éna najicapapa:

—Váhira visamairirica eta matiarahirahi ema Espíritu Santo.

³ Mápechavare ema Pablo mayaserecavaca:

—¿Tájahasica tacayemahi eta ecaicachasirahi éti? — máichavacapa.

Éna najicapapa:

—Eta vícaicachasirahi véhicahi eta máimiturapianahi ema Juan Tícachasiricarahi — náichapa.

⁴ Ema Pablo mametacavacapa:

—Tiuri, yátupi ema Juan máicachasicavacahi ena achaneana eta náitsiva-chiraya eta náitaresirana. Énerichuvare, mametacavacahi eta nasuapirayare ema achane téhiequenehapahi éma. Puiti numetacahe: Ema maca téhiequenehapahi ema Juan ticaijare Jesús. Émaqueneripahi ema Cristo — máichavacapa.

⁵ Tacahe, te nasamapa eta juca, navarahapa ticaicachasiana te máijare ema Viáquenu Jesucristo. Tacahe, ema Pablo máicachasicavacapa. ⁶ Tacahe, manacapa eta mavahu te nápusiana. Tásiha, tíucupaicapa ema Espíritu Santo, mávahácavacapa. Témunahiricavanapa apáechajirírúvána. Ticametarairuanapa eta máechajiriruva ema Viya. ⁷ Eta nasimutuvahi ena nani, dóceanahi ena ajairana.

⁸ Tamutuhi sávaruana tiyana ema Pablo te náurujisirareva ena israelítana. Mapana caje ticametarairu nayehe ena achaneana. Vahi mapicacarcavahini eta macametarairuirahi. Macajimuyacavacahi ena achaneana, náehisiráina ema Jesús, náimatiraina eta émairahi Cristo, ema nacuchapaquenehi. ⁹ Natiarihisera ena apamuriana murácasamureánaríchucha. Váhivare návarahahini náehicahini ema Jesús. Te jácani náurujisiravana, nacaecahirichucha eta arairu máimiturapihi ema Jesús. Tacahe, ema Pablo térajicavapa eta nayehe. Máiputsimurihapa ena tisuapajirahianahi, mámamurihapa tayehe eta colegio máimituresirahi ema ticaijare Tirano. Tacahe, ema Pablo tímiyanavapa tímitureca tamutu sácheana nayehe ena machamuriana. ¹⁰ Apina año eta máimituresirahi. Tacahe, ena máimitureanahi tiyananapa típaicana. Ticametarairuanapaipa eta máechajiriruva ema Viya nayehe ena achaneana ticavasanahi eta te avasarechichana táunavanahi eta avasare Efeso, tayehehi capital eta departamento Asia. Tásiha, nasamairirícapa namutu ena achaneana: ena israelítana énapa ena apavasanana. ¹¹ Ema Viya máimicatacahi ichape ema Pablo eta máichirayare eta tiáramicareana. ¹² Ichapemuriana ena achaneana macanararuanapahi tayehe eta páñoana, camisapuca macaratajiruanapahi. Májaracavare

nacaitecapaya nayehe ena nacajumaqueneana, tásiha tacanaracapaipa. Énerichuvare táquijicapahi ena éreanana.

13-14 Te jena avasare, natiarihihi ena siéteana israelítana ticaparapejiri-cacana, machichanaveanahi ema ticaijarehi Esceva, náiyarahaini ena tiyuja-racarahiana te Jerusalén. Tacahe, ena nani siétequeneana napaiririruanahi. Náitucahi naveha eta itiriji. Éna, eta navehairahi eta itiriji, navarahapa éna apanava napiaracayare eta máijare ema Jesús. (Váhisera náehichahini eta máimiturapiana.) Matiarihivare ema achane macajumaquenehi maicha ema éreana. Tacahe, te napauchapa ema macajumaquenehi, náichapa:

—Piti éreana, vivanecavi te máijare ema Jesús máechajisihaquenepahi ema Pablo. Piúchuca te máquehe ema maca macajumaquene —náichapa.

15 Tásiha, ema éreana majicapapa:

—Nímati ema Jesús, émapa ema Pablo. Étiserá vahi nímatihe. ¿Nájahahepuca? ¡Ásajipucaini nusuapahehini! —máichapa.

16 Tacahe, ema achane mávaháruhi ema éreana majunauchavacapa éna. Máehavacapa máquipapaicavacapa namutu ena siétequeneana. Tiyananapa tijunana, najunijicapa eta mapena ema macajumaquene. Mamuiiriaréa-napaipa, ticajaranapaipa. 17 Tásiha, téchacarehi eta juca nayehe namutu ena ticavasanahi tayehe eta avasare Efeso, énaripa ena israelítana. Te nasamairiricapa, típicanarinehi. Tásiha, nacahepa:

—Tétavicavapa tamutuirá tarataha eta máijare ema Jesús, náquenu ena nani —nacahepa.

18 Tacahe, ena téhicanapaipa ema Jesús, te náurujisiravana te tiyuja-racana, timetaurecavanapaipa tamutu eta nájecapiravana eta náitare-sirahi. 19 Natiarihi ena apamuriana ticaratacanahi eta iápemarecare. Nánavacapaipa eta náitucaqueneanaini nasiñarajianainihi, nayehepuca libro. Náijuquechavacapaipa te namirahu ena nachamuriana. Vaipa nacatie-quenehapahini. Natupaequenehapasera eta tavachanahi te navachare-cainapa tacapayacahi eta \$b250,000. 20 Tacahe, ichape eta nasuapira ena achaneana eta máechajiriruva ema Viya. Camurianapaipa ena téhicanapahi.

21 Te táequenepa eta juca, ema Pablo macahepa:

—Nuvarahapa néjirapanaya ena vichamuriana ticavasana te Macedonia énapa ena apamuriana ticavasana te Acaya. Tásiha, nánucuhayare te Jerusalén. Te tamutupa eta juca, nuyaninavarepa te Roma —macahepa.

22 Tacahe, máevatacavacapa náinapuca ena apinana machamuriana ema Timoteo émapa ema Erasto. Tiyananapa tayehe eta Macedonia. Émasera manasipanarichaha tayehe eta Efeso.

Tisemamurianapa ena achaneana te avasare Efeso

23 Tacahe, te jena sácheanahi, tisemamurianapa ena apamuriana achaneana taicha camurianapaipa ena téhicanapahi ema Viáquenu Jesús. Áni tacahehi eta nasemirahi. 24 Matiarihihí ema achane ticaijare Demetrio. Ema maca achane, máepiyacahi eta suyehe trónochicha esu nasiñaraji ticaijaru Diana. Ticutihí eta pétiichá eta táimahi eta templo suávihahi ésu. Amairihahi plata. Tiúrihi eta maganaresira éma, énapa ena apamuriana plateroana macutiqueneanahi. 25 Tacahe, macurujicapa ena apamuriana plateroana. Tásiha, máichavacapa:

—Tátanaveana, éti ímatihi eta juca vématanerepihi, tiúrihi eta viganaresira. ²⁶ Ímaharichuhi puiti éti, esamahivare ema maca Pablo macahehi eta máechajiruvahi ena nani visiñarajiana vépiyaruana viti achaneana váhiji yátupinahini vénainahini. Ichapemurianaripa ena tisuapanahi, taicha nasamaripa eta máimiturapiana namutuyareni ena achaneana ticavasanahi te juca viávasa Efeso, énerichuhivare eta ticavasanahi eta te avasarechichana táunavana eta Asia. ²⁷ Ticauyayacarehi eta juca. Táemitiequenehahini eta juca táurivahi eta viganaresira. Étaripa eta templo suáviyahahi esu súrinaquene visiñaraji Diana témitiequenénapapuca, nacuijapapuca nacuechahi. Náemitiscáinapapúca eta táurivainihi eta náejirairahi namutu ena achaneana te juca apaquehe —máichavacapa.

²⁸ Tacahe, eta nasamirahi ena apamuriana, tiseanmarinehi, tipiarcanapa. Ánipa nacahe:

—¡Viva esu Diana visiñaraji viti efesioana! —nacahepa.

²⁹ Tacahe, tisemamurianapa ena apamuriana achaneana. Apanapa eta napanerecha. Tiuri, natiarihihi ema Gayo émapa ema Aristarco, macompañeroana ema Pablo náuchureanahi eta te avasare Macedonia. Tacahe, ena achaneana nacaratacapa ena nani apinana. Námapa tayehe eta náurujisiráeva. ³⁰ Émapa ema Pablo mavarahapa masiámapuriháyahéhi máechajicavacayarehi, énasera ena machamuriana vahi náisapahini. ³¹ Natiarihivare ena apamuriana, tuparairucanahi tayehe eta departamento Asia, mayeahanahi amigo ema Pablo. Nacametarapipa vahi macuímisiápava. ³² Tacahe, eta náurujisirávahi tájajamurihanahi. Ema émana tipiarcacahi, apanahi eta macayema. Ema apana, énerichuvare tipiarcachivare apanahivare eta macayema. Namutuyareni ena achaneana apápipijivácachucha eta nacayemaqueneana. Vahi náimatiéquenehahini tájahapuca tacayemahi eta náurujisirávahi. ³³ Tacahe, ena apamuriana israelítana náichuhapa ema Alejandro. Nametacapa eta táicharacávahi eta náurujisirávahi. Tacahe, navanecapa téchajica, maconsejachavacayarehi ena achaneana. Tásiha, ena titupihapa te namirahu. Máimicutiarachapa te mavahu namatinachaha. ³⁴ Tásiha, náimativanepa ema émarichuhi israelítahi. Tépanavanavarepa tipiarcana. Apina hora nacahe eta napiarareresirahi:

—¡Viva esu Diana visiñaraji viti efesioana! —nacahepa.

³⁵ Tacahe, titecapanecha ema tayehehi alcalde eta avasare. Macamatina-cavacapa. Tásiha, téchajicapa. Ánipa macahe:

—Tátanaveana, mémenaveana. Emutu eti tachichanaveana eta juca viávasa Efeso. Nájina émanáina achane vahi macuechahini eta véchapajirisira vimutu eta templo suáviyahahi esu súrinaquene visiñaraji Diana, esu sucapicahuquenehi taicha eta juca mari suáquehehi ánaquiaparipa eta táemirisirahi te anuma. ³⁶ Nájina tépuruina eta juca. Ésamiricavachucha. Vahi ecuijajahuchava. Epanerechínava te tiúriyarepuca. ³⁷ Taicha ena nani ajairana ímaqueneanapahi, tájina natapiravainahini. Vahi nacaecahi esu visiñaraji, váhivare námeyecha ésu eta suyereruvana. ³⁸ Tiuri puiti, ema Demetrio, énapa ena machamuriana, te navarahapuca timetaurecana, nararihi ena juéseana. Nacaunehi nácani timetaurecanaya. Táuchusihayare eta natapiravana. ³⁹ Téheserapuca apana jácani evarahaquene, ticaechacasiyahéhi te reunión tásihaqueneyahéhi viyehe viti tuparairucana. ⁴⁰ Tíñehicare eta juca íchaquenehi. Náimijachaipa ena achaneana víchahi eta revolución puiti jena

sache. Tijuricati natiarihi tiyaserecáhavianaya eta táicharacavahi eta juca. Tájina viviyavaimahi —macahepa ema alcalde.

⁴¹ Te tamutupa eta máechajisirahi, mavanecapa téjanerecana ena achaneana. Titavapa eta náurujisirávahi. Tacahe, téjanerecanapa ena achaneana, tamutupa eta nasemirahi.

20

Tiyanavare ema Pablo te departamento Macedonia étapa te Acaya

¹ Tacahe, te táequenepa eta jácani sácheana, ema Pablo máichuhavacapa ena machamuriana, maconsejachavacapa. Tásiha, ticametavapa nayehe. Tiyanapa tiánueca macaijuhepa eta te departamento Macedonia.

² Máejiravacapaipa namutu ena machamuriana ticavasanapahi te avasarechichana. Máetumechavácapahi éna eta maconsejachiravacapahi, máitecapirapa tayehe eta avasare Corinto, táunavahi eta departamento Grecia (ticaijarehivare Acaya). ³ Ánaqui manasipanapa tayehe, mapana caje eta mávihairahi. Tásiha, mapanerechaipa tiávacuhaya te pacure eta mánesirayare macaijuheraya eta te Siria. Étasera te máechapa eta navarairahi nacapaca ena israelítana mánarana, téquecavapa eta mapanereru. Tiyanapa tipaica tichavapa tayehe eta Macedonia eta mávacuíyayarehi.

⁴ Eta machavirapa, náehicapa ena machamuriana ema ticaijare Sopater ticavasahi te Berea, ema Aristarco émapa ema Segundo ticavasanahi te Tesalónica, ema Gayo ticavasahi te Derbe. Máehicavare ema Timoteo. Natiarihivare ema Tíquico émapa ema Trófimo ticavasanahi te tinapaica eta Asia. ⁵ Tacahe, títecanapa te Filipos, návihahi núti. Tacahe, ena sítequeneana vichamuriana tínapucanapa tiyanana tiánuecanapa, nacaijuhepa eta apana puerto ticaijare Troas. Ánaquipa nacuchapihahavihi.

⁶ Tásiha víti, te táequenepa eta Pascua vinisirahi eta pan mayehere levadura, vipaenumavapa viúchuca tayehe eta Filipos. Viávacuhapa viyanapa. Cinco sache eta viánuesira. Vicápayamuríhapa te Troas. Vinasipanapa tayehe, siete sache vicahe.

Máejirapa ema Pablo ena machamuriana ticavasanahi te Troas

⁷ Te jena tínapuca sáche tayehe eta semana, tiúrujicavanapa ena vichamuriana. Viyuvetucayare, vinicayare eta pan táicutiarahi eta máepenirahi ema Viáquenu Jesucristo. Tacahe, ema Pablo maconsejachavacapa jena yati, taicha tiúchucayarehi te jena yáticarahi. Tiúnahi eta máechajisirávacahi. Te énumuhupa yati tímiyanavaríchaha téchajica. ⁸ Eta viúrujisirávahi te anuquehe peti te mapanaquene piso. Tatiarihihi camuri eta namicahuana.

⁹ Matiarhihi ema émana amaperu ticaijare Eutico. Téjacahi éma eta te ventana. Tacahe, eta táunavahi eta máechajisirahi ema Pablo, ema amaperu téyucaipahi. Eta máimasirahi, tiáquipaicavapa te anuquehe ventana. Tacahe éna, tiúcupaicavaneánapa nacáechepupánayarehi. Éma tépenaripahi.

¹⁰ Tacahe, ema Pablo tiúcupaicapa, mapauchapa ema amaperu. Mayurata-
nachapa majupahacapa. Tacahe, máichapa ena machamuriana:

—Vahi ecueñamava. Tichavayare títareca —máichapa.

Jéhesaréinehi, tichavapa títareca ema amaperu. ¹¹ Tacahe, tichavanavare tiápanana te náurujisirávahi. Tacahe, tinicanapa. Tásiha, ema Pablo tijaráhi-
caríchaha eta máechajisirávacahi. Te titapiricapa, tiyanapa. ¹² Tacahe, te

téjanerecanapa, námapa ema amaperu máitareruhi. Ichape eta náurisamurevahi.

Tiúchucanapa tayehe eta Troas, nacaijuhepa te Mileto

¹³ Viti viávacuharipa, viyanapa vicainapucavahi tayehe eta apanavare puerto Asón eta mávacuiyarehi ema Pablo, taicha ichape eta táepiñu. Émasera ema Pablo tipaicayarehi timitupiruchavapa. ¹⁴ Te vítecapapa te Asón, tiávacuhapa éma. Tacahe, viyanapa vicaijuhehi eta apanavare puerto Mitilene. ¹⁵ Te apanapa sache viúchucavarepa tayehe, viánucuhapa te tacha-caya eta tiúrupuhi ticaijarehi Quío. Te apanavarepa sache, vítecapapa te apanavare tiúrupuhi ticaijarehi Samos. Víhecapa tayehe, vinaracanumapa eta te puerto ticaijarehi Trogilio. Te apanapa sache viyanavarepa, vítecapapa te puerto ticaijarehi Mileto. ¹⁶ Váipa vétavajicahini te Efeso, taicha ema Pablo vaipa mávarahahini váyereréjipahini eta vipaisirapahi te táunavahi te Asia. Taicha mavarahahi títecapavaneyare te Jerusalén, eta máimaiyayarehi eta napiestara ticaijare Pentecostés. Éta tiámahaviyare te viratavayarepuca.

Eta maconsejachira ema Pablo nayehe ena náiyarahana pastoreana ticavasana te Efeso

¹⁷ Etasera eta viávihairahi te Mileto, ema Pablo máimichuhavacapa ena náiyarahana pastoreana tayehe eta avasare te Efeso. ¹⁸ Te títecapanapa éna, majacapavacapa. Tásiha, tépanavapa máechajiricavaca, máichavaca:

—Éti ímatinuhi táicharacavahi eta nítaresirahi eta jena sácheana te nítecapachahénapa. Tájina níchahini núti eta nuyehéchiravana. ¹⁹ Tájinvare vahi népiyacavahini aquenucanuinahini eta eyehe. Nucaemataneacahi ema Viáquenu. Vahi nusemáimahi tayehe tamutu eta níchavaquenévanahi naicha ena nujaneanana israelítana, navarairahi títaequenehanuana. Tasapiha ticaiyacanu naicha eta namásuapajiráivana. ²⁰ Tamutu numetacahehi eta táuriqueneana tiúrichaheyare éti apanava. Nímitucahehi te jácani viúrujisirávana éta te epenana. ²¹ Nuconsejachahivare namutu ena achaneana, eta náeneuchiravaina me Viya, eta náitsivachiraina eta náitaesirana, éta te nasuapiraina nacasiñairaina ema Viáquenu Jesucristo. ²² Puítisera nuyaninapa te Jerusalén. Taicha nuvanecasi vahi mayehe ema Espíritu Santo. Vahi necha núti tájahapuca nícharacavaya eta ánaqui. ²³ Tacarichu necha eta mametasiranuana ema Espíritu Santo. Tamutu eta avasareana nupaisihanapahi, timetacanupahi éma eta nucatajivairaya, napresuchiranuya te cárcel te Jerusalén. ²⁴ Tájinasera vahi nupicacava. Tayanapanéine népenapuca, vahi néñama eta nítaesira. Nuvaraha nímiyanavaya eta núrivahi mayehe ema Viya. Nuvapinavahi eta nítauchiraya eta nutuparacasi vahi mayehe ema Viáquenu Jesucristo. Taicha éma tituparacanuhi nucametarairuya eta máemunasirahavihi ema Viya vimutu viti achaneana.

²⁵ Numetacahe: Puíti juca nuyaniraya, vaipa iápechavaimahi ímahanu. Eti ínapureanahi nímitureanahi emutu éti te iávasanapachuhi. Nímitucahehi tamutu eta véhisiraya ema Viáquenu Jesucristo. ²⁶ Eta tacahe, numetacahe puíti: Vaipa nútiparacáina te natiarihinapuca téjcapavanaya te etaracu éti. ²⁷ Tamutuhi numetacahe eta mavarahaqueneana ema Viya. Tájina vahi nuyumurupicahini. ²⁸ Tiuri puíti, ejaneacavayare éti, énerichuvare ejaneacayare ena iúmuvivana taicha etuparahaipa mayehe ema Espíritu Santo eta ejaneasirayare ena manerejiruanahi ema Viáquenu, énavenehi tépenahi éma,

máepusaicahi eta máitine. ²⁹ Ecaunevaicha muraca, taicha puiti juca nujuni-jisiraheya, tijuricati títecanaya ena navarahaya témejecapávachaheánaya. Navarahaya ticajanerecaheanaya tacutiyare eta chuye tinicarahi te tacajanereca eta varayuana. ³⁰ Énaparichu ena vichamuriana te etaracu, natiarihiyare ena tímiturecanaya nahapapicayare témejecapávachanaya ena nácani apamuriana vichamuriana, navarairainahi éhicayare eta napanereruana. ³¹ Tásiha, ecaunevaicha yátupina. Échavayare eta mapanaquene año eta nutiarihirahi eyehe. Tamutuhi sácheana, yátiana nuconsejachahehi, émanapachuhi numetaca. Níyahasamurehi taicha eta nímairahehi.

³² Puítisera, nuparapenaveana, nuyanainapa. Nuyáseuchahéyareséra me Viya eta majaneasiraheya. Ecaravahuirainapa yátupina eta máechajiriruvana ema Viya. Túmeheyarepaipa táicha. Ema Viya mavarahahi ímijuruchayare eta juca máechajiriruva; taicha mavaraha tíjaracaheya eta ícuchianahi te anuma eta iáviyahare, ecachaneraya ena apamuriana masántuchaqueneánarípa. ³³ Eta návihairahi eyehe, vahi nujamurachahini eta emuirihana étaripa eta plata íjaracanhini.

³⁴ Ímararacanuhi éti eta táichararacavahi eta nucaematanera. Nucaematanehi tíasihanahi te nuvahuana, nuviyahi eta nucamunqueneana, énapa ena tímicatacanuanahi. ³⁵ Tamutu nímitucahehi tacaheyare eta vicáematanéraya, vímicatasirayareva ena ticamunuvana, nacajumaqueneana. Véchavayare tativa eta máechajiriruvahi ema Viáquenu Jesucristo, ani macahehi: “Viúripanaya me Viya, te vicajirica eta vímahaqueneana nayehe ena apamuriana. Vahi vicujamuracha nájaracasichahavi” macahepa.

³⁶ Te tamutupa eta juca maconsejachiravacahi ema Pablo, tépuyucanapa namutu. Tiyujaracapa mayaseuchavacapa me Viya. ³⁷ Tásiha, tíyahanapa namutu, najupacapa náetserarecapa ema Pablo. ³⁸ Tipanererecanaipa taicha eta mametasiravacahi váipa típechavanaimahi náimaha éma. Tásiha, tiyananapa nanapana eta te mávacuiyayarehi.

21

Eta viyanirapa eta te Jerusalén

¹ Te vijunijicapa ena vichamuriana, viávacuhapa viyanapa vitupiruru-chapaipa eta tíurupuhi ticaijare Cos. Te apanapa sache vicaijuhepa eta tíurupuhi ticaijare Rodas. Te apanavarepa sache viánucuhavarepa eta puerto ticaijare Pátara. ² Éta pa vicainunainehi eta apana pacure tiyanayarehi tayehe eta apachara apanavare departamento Siria. Tacahe, viávacuhapa tayehe, viyanapa. ³ Eta vipaisirapahi, viánucuhapa eta tíurupuhi Chipre tanapaicapahi te sapa eta viyehe. Vímiyanavachucha vipaica vítecapira te puerto ticaijarehi Tiro tayehe eta Siria. Taicha eta pacure véhirupahi tanaquicayarehi eta carga támaquenepahi tayehe eta puerto. ⁴ Éta pa vicainunainehi ena apamuriana vichamuriana. Vinasipanapa nayehe, siete sache vicahe. Te juca, ema Espíritu Santo mametacavacahi ena vichamuriana eta máichavayare ema Pablo te Jerusalén. Tacahe, nametacapa ema Pablo eta vahi macuíticapa te Jerusalén. ⁵ Téhesera tíuchucayarepa eta pacure véhirupahi, viyanapa te puerto. Téhicahavianapa namutu ena vichamuriana, énapa ena nayanana énapa ena nachichanaveana. Tinapanahavianapa te pacure. Te vítecapapa te playa, vépuyucapa vimutu, viyujaracapa.

⁶ Te tamutupa, vémamavauchavacapa vicametavapa eta nayehe, viávacuhapa. Tásiha, tichavanapa éna te napenana.

⁷ Eta viásihairahi te Tiro, vítecapapa te Tolemaida. Éta pa táenasihahi eta vipaisirahi te une. Viyanapa véchajicavacahi ena vichamuriana. Vinasipa étana sache eta nayehe. ⁸ Te apanaquenepa sache viyanapa vicaijuhapa eta avasare Cesarea. Te vítecapapa, viyanapa te mapena ema Felipe ema ticametairuirahi, ema nasietenehi ena nanerejiruanahi téchapajiricanahi eta nirureana nayeheana ena máimaruana. Vinasipa eta mayehe. ⁹ Ema Felipe, natiarihi ena cuátroana machichanaveana esenana, máimaruana-richaha. Ena nani máijaracahi ema Viya eta náitusirahi ticametairuana. ¹⁰ Eta jena sácheana viávihairahi mayehe ema Felipe, títecapapa ema émana profeta ticaijarehi Agabo. Éma tiásihahi te Judea. ¹¹ Títecapauchavipa tímahapanahaviyarehi. Tacahe, mayaseacapa eta máitijue ema Pablo. Tásiha, títiapechavapa, étapa eta mavahuana. Tásiha, macahepa:

—Ema Espíritu Santo ani macahehi eta máechajiriruvahi: “Ena vijaneanana te Jerusalén nacaratacayare ema ticayehe eta juca itijuere. Náitiacaya, náijararecayareva nayehe ena apavasanana” —macahepa ema Agabo.

¹² Tacahe, vimutu viti, énapa ena ticavasanahi tayehe, viyaseacapa ema Pablo eta vahi macuyana te Jerusalén. ¹³ Émasera ema Pablo máichahavipa:

—¿Tájaha tacayema ímpanererecanu eta juca íyáuchiranuhi? Vahi nupica te náiticianupuca. Núti níjaracava népena te Jerusalén máichavenénahi ema Viáquenu Jesucristo —máichapa.

¹⁴ Te vimahapa vahi váratahahini víchejica, vísapapa tiyana. Vicahepa:

—Énenarinepuca tácahe, máimahavirinepa ema Viya —vicahepa.

¹⁵ Te tamutupa, vétupiricavapa. Viyanapa te Jerusalén. ¹⁶ Téhicahavianapa ena vichamuriana ticavasanahi te Cesarea. Téhicahavipahivare ema vichamuri ticaijare Nasón. Ánaquiripahi eta máehisirahi ema Jesús. Éma, máuchurehi eta te tiúrupuhi Chipre. Tatiarihisera eta mapena te Jerusalén, eta vítecapihavarehi.

Ena Pablo máejirapanapa ema Santiago

¹⁷ Te vítecapapa te Jerusalén, ena vichamuriana tiúrisamureanaríne eta najacapirahavihi. ¹⁸ Te apanapa sache ema Pablo tiámahavipa, viúrujicavayarehi te mapena ema Santiago. Vichimapapa natiarihipa namutu ena víyarahana pastoreana. ¹⁹ Tacahe, ema Pablo máechajicavacapa éna. Mametacavacapa tamutu eta máimicatasirapahi ema Viya eta macametairuirapahi nayehe ena apavasanana étapa eta máichirapahi eta tiáramicareana.

²⁰ Te nasamapa ena mametaruanahi, nacunacharinehi ema Viya. Tacahe, náichapa ema Pablo:

—Tétavicavapa táuriva eta juca pimetarapiana. Pímahapasera natiarihihira ena camuriqueneana ena vijaneanana téhicanahi ema Jesús. Énasera, muracaqueneanahi religiósoanahi, téhicanahi eta mayherepini ema Moisés. ²¹ Puiti, jucarihi eta pépiyaequenehi eta pihápapicahíji eta pímitusiravacahi ena vijaneanana ticavasanahi te avasareana estranjeroana. Pímitucavacahiji eta váhiji nacusuapa eta mavanairipiana ema Moisés, váhivaréji nacumarcacha ena nachichanaveana ajairana, váhivaréji nacuehica eta viyeherepiana. ²² ¿Tájahapuca táicharacava eta juca? Tijuricati ena achaneana

tiúrujicavanainapa, te nasamairiricapa eta pitirihirahi. ²³ Tiúripa eta juca píchayare. Nararihi te juca vitaracu ena cuátroana ajairana. Títáuchanapáipa eta nayehe promesa. ²⁴ Pisipahacavaya, piámamuriha éna eta pímere-siravaya tayehe eta Templo. Pivachachinaya eta uvesa navehaqueneana apaesa éna náisapava nacachucasi eta nachutimacana. Eta táicutiarayare eta vahi yátupinahí eta pépiyaequenehi, apaesa náimahavi eta pipicauchirahi eta mavanairipiana ema Moisés. ²⁵ Énaserá ena vichamuriana apavasanana, vímiamarecaripa eta vicartane. Náecharipa eta vaipa étaparacáinahíni nayehe eta juca. Tacarichu vahi nacunica eta taeche eta sárare nayujaraurehi te tamirahu eta nasiñarajiana, váhivare nacunica eta táitine eta sárareana, váhivare nacunica eta taeche eta sárare namaechatinure. Énerichuvare vahi nacuveha esu súcaini apana esena. Énaripa ena amaperuana, tacuija eta natuhusivaina —náichapa ena pastoreana.

Nacaratacapa ema Pablo eta te Templo

²⁶ Tacahe, ema Pablo tísapavapa. Te apanaquenepa sache, tisipahacavapa, énapa ena cuátroqueneana ajairana. Mámavacapa, tiyananapa te Templo. Nametapanayarehi ena téchapajicarahiana eta Templo, semanayareipahi eta nanaquisiravayare eta námavahuana. ²⁷ Tacahe, te náitauchapa eta siete sache eta nasipahasiravahi, tichavanapa te Templo. Te jena sache, natiarihipavare ena apamuriana najaneanana tiásihanahi te tinapaica eta Asia. Eta mávihairarichaha ema Pablo te Templo, náimahapa éma. Tacahe, náimiyusemacapa namutu ena achaneana. Nacaratacapa ema Pablo. ²⁸ Tipiaracanapa:

—¡Tátanaveana israelítana! ¡Yare, ímicatachavi! Émara ema maca achane ema tipaichí tamutu avasareana. Timiturecapahi nayehe ena achaneana eta macontrachirahi eta víávasa. Énerichuvare macatianacahi eta mayherepi ema Moisés, étapa eta juca viyehe Templo. Puiti macasiapavare te juca Templo ema apavasanatataji. Majararecapa eta juca tacapicahuquenehi —nacahepa.

²⁹ Ena nayunacahi eta juca, taicha náimahahi te calle ema Pablo macachanepahi ema Trófimo ticavasahi te Efeso. Náimijachahi mámahí ema Pablo te tajuhe eta Templo.

³⁰ Tacahe, tíjúnapacarajíanapáipa namutu ena achaneana te tajuhe eta avasare. Ena ticatianacanáhi ema Pablo nacaratacapa éma, nachururu-paicapaipa eta nacuchusirahi tayehe eta Templo. Tacahe, ena apamuriana náeratacavanepa eta tapajacura eta Templo. ³¹ Navarahapa nacapacavaneyarehini. Masámairiricavánepaséra ema comandante nayehe ena suntaruana, tatiarirahí eta revolución te tajuhe eta avasare. ³² Tacahe, ema comandante máichuhapa ena masuntarurana énapa ena oficialeana. Tiyananapa tijunapanapaipa. Ena achaneana, te náimahapa eta máitecapauchirahi ema comandante, náinajicapa eta náehairahi ema Pablo. ³³ Tacahe, ema comandante mapauchapa ema Pablo, macavanairipipa nacarataca, náitiacapa te apipi cadena. Tásiha, mayaserreca te nájaháhipuca, tájahapuca maviurevahi. ³⁴ Énaserá ena achaneana tipiaracanarichucha, apapipijipa eta nacayema. Vaipa mácaicutiarahíni ema comandante tájahapuca eta nacayemahi taicha eta najajasirahi. Tásiha, macavanairipipa náma te cuartel. ³⁵ Ticajerahisera eta nápanirapaipa te tayehe grada eta cuartel. Nanarahapapa ema Pablo, taicha ena achaneana navaraháichucha nacapacavane. ³⁶ Taicha namutu náehicapahi tipiaracanapaipa:

—Máepenávanetataji —nacahepa.

³⁷ Te tisiapanayarepa te tajuhe te cuartel, ema Pablo máichapa ema comandante:

—¿Písapanupuca néchajica?

Tacahe, ema comandante majicapapa:

—¡Jéhepuca, píti pítuca péchajica te véchajiriruva griego! ³⁸ Tacahe, ¿váhiyara pítna ema ticavasa te Egipto, ema tíchahi eta revolución ticaeteharecahi cape juca viásinequenehi, ema majunaquenehi tiámamurihahi te mávapahi ena cuatro mílqueneana ticapahiana? —máichapa.

³⁹ Tacahe, ema Pablo máichapa:

—Vahi nútina, tata. Nútirichu israelítanu. Eta núchusine te Tarso. Tavanaranu eta ichape avasare capital te Cilicia. Picatajicanusera písapanu néchajicaya nayehe ena achaneana —máichapa.

Téchajicapa ema Pablo te namirahu ena achaneana

⁴⁰ Tacahe, ema comandante máisapapa téchajica. Titupihapa ema Pablo te tayehe grada eta cuartel. Tacahe, macanuquechapa eta mavahu, macamatinacapa ena achaneana. Te timatinanapa, tépanavapa téchajica eta náechajiriruva ena majaneanana, ánipa macahe:

22

¹ —Tátanaveana, nuparapenaveana. Esamanuchaha eta néchajisiraheya nucatiuchiravaya —macahepa.

² Tacahe, te nasamapa eta máechajisiravacahi te náechajiriruva, tésamirimuriávanapa ticasamarahianapa. Tinahacavapa téchajica ema Pablo, máichavacapa:

³ —Nútirichu ejaneana, israelítanu. Eta núchusine te avasare Tarso tayehe capital eta Cilicia. Ánipasera nujurusinehi te juca viávasa Jerusalén. Ema tímítucanuhi ema víyacara Gamaliel. Nujuruchahi eta nupicauchirahi yátupi eta viyeherepi náijjararuhavihi ena viáchucanaveanaini. Eta nítaresirahi, nímicapicáuchahi ema Viya, tacutihi puiti eta ímicapicáuchirahi éti te juca sácheana. ⁴ Eta nítaresirahi, nucatianacavacainihi ena téhicanahi ema Jesús. Nupresuchavacahi nucasiapavacahi te cárcel ena ajairana énapa ena esenana. Nímicapacavacahi éna. ⁵ Tímatinuanarichuhi namutu ena aquencarahana émapa ema corregidor. Taicha éna tíjaracuananahi eta órden nayeheya ena vijaneanana ticavasanahi te Damasco, náimicatasiranuyare eta nucaratasiraya ena téhicanahi ema Jesús. Tacahe, nuyanapa népanavacayarehini éna, ticaemecharahianayarehi.

Ema Pablo mametacavacapa eta máehisirahiva éma apanava ema Jesús (Hch 9.1-19; 26.12-18)

⁶ Tacahe, eta nupaisirapahi te achene, nánehiripa eta avasare Damasco. Te jena las dócequeneýarepa sache, tiáramicarepa eta tijarahi tímícauchanuhi tíásiha te anuma. ⁷ Náquipaicavapa te apaquehe. Nusamapa ema téchajicanuhi, máichanupa: “Saulo, Saulo, ¿tájaha tacayema picatianacanu pipáná-jiricanu?” ⁸ Tacahe, nuyaserecapa: “¿Nájahavi píti tata?” níchapa. Tásiha, tíjicapanupa: “Nutí Jesús Nazareno, nutí picatianaruhi, eta pipáná-jirisiravaca ena téhicanuanahi” máichanupa. ⁹ Énerichuvare ena téhicanuanapahi náimahahi eta tijarahi tímícauchanuhi. Tiáramecanarinehivare éna apanava. Váhisera nácaicutiarahini ema téchajicanuhi. ¹⁰ Tacahe, nujicapapa nútí:

“¿Tájahasica níchayare, Tata?” Tásiha, ema Viya máichanupa: “Pécheputa, piyana pítecapa te avasare Damasco. Ánaqui mararihi ema timetacaviyare tamutu eta pématanerepiyare pítauchaquenéyare nuyehé” máichanupa. ¹¹ Tásiha, píchuquinupa taicha eta tijarahi. Tacahe, ena nucompañeroanapahi tiámanuanapa tichurucanuanapaipa te nuvahu, nacaitecapiranupa te avasare Damasco. ¹² Eta ánaqui, matiaríhihi ema émana vijaneana ticajjare Ananías. Títaurahi éma tayehe eta mavanairipiana ema Moisés. Namutuhi ena vijaneana ticavasanaahi te Damasco nacunachahi éma. ¹³ Títécapa ema Ananías, tímahapananuhi. Te títécapauchanupa, máichanupa: “Nuparape Saulo, tachava eta pímairisira”. Tacahe, tjahúchavapa nímairisira. Nímahapa éma. ¹⁴ Tacahe, máichanupa éma: “Ema Viya nacasiñaquenehi ena viáchucanaveánaini, píti manerejiruvihi taicha mavarahahi tímimatchaviya eta mapanereru. Énerichuvare mavarahapa tímimatchavi ema máuriquene Cristo, émaquenehi téhajicavihi eta cape. ¹⁵ Péchajisihayare éma eta picametairuirayare nayehé namutu ena achaneana picainunaqueneanaya. Pimeta-cayare eta juca pímairahi étapa eta pisamirahi éma. ¹⁶ Tiuri puiti, enevane picaicachasiya te máijare ema Viáquenu Jesucristo. Picasiñava mayehé eta tacasipairaya eta pipecaturana” máichanupa ema Ananías.

Ena Pablo mametacavacapa eta macavanahirahi nayehé ena apavasanana

¹⁷ Tásiha, te nuchavapa ani te Jerusalén, nítecapa ani te juca Templo. Te nuyujaracaipa, tiápechanuvarepa téhajicanu ema Viya. ¹⁸ Eta nímairahi éma, máichanupa: “Piyayauchavayare eta piúchusiraya te juca Jerusalén, taicha vahi tisuapavianaimahi eta péchajisiháiranuya”. ¹⁹ Tacahe, núti níchapa: “Tiuri, Tata. Énasera, timatinuanahi eta néstarasiravacahi nupresuchiravacahi ena téhacavianahi. Tamutuhi te náurujsirarevana nutanusihavacapahi éna. ²⁰ Énerichuvare, te nacapacapa ema Esteban ema pivanarainihi, nutiaríhivare. Nímícatacahivare ena ticapacanahi, nujaneasiravacahi eta namuirihana. Tijuricatipuca nasamararacanu eta numetasiravaca eta péchajisiranuhi” níchapa. ²¹ Émasera ema Viáquenu tipamicanuichucha: “Piyanyaresera. Núti nuvanecavi pipaicyare nayehé ena apavasanana ticavasanaahi te tayerehiqueneana” máichanupa.

²² Tacahe, ena achaneana, eta nasamirahi eta juca, vaipa návarahahini nasamararaca. Tisemanapaicha. Tipiaracanapa:

—Tiúripana máepenachucha ema maca achanetataji. Vaipa táuricahini máitarecaríchahahini —nacahepa ena mánarana ema Pablo.

Ena comandante macasiapapa te tajuhe ema Pablo

²³ Muracapanapa eta napiarasira. Tivejamuhiacavanapa eta nacamisana eta nasemaneva. Navehavare eta máteji. Náevajasicapa ema Pablo. ²⁴ Tacahe, ema comandante macavanairipipa nacasiapa ema Pablo te tajuhe eta cuartel. Macavanairipivare náestaca, mavarairahi máimicaecherachaya ema Pablo eta maviurevahi, tájahapuca tacayemahi eta nasamirahi ena achaneana eta mayehé. ²⁵ Étasera te náitiacayarepa eta náestasirayarehi, téhajuichavanunapa ema Pablo eta mayehé ema nacapítara ena suntarunana. Máichapa:

—Núti tavanaranuhi eta viávava Roma. Picunevachucha, machu péjecapava eta péstasiranu, vuíchaha táimaticarehini eta nutapiravapuca —máichapa.

²⁶ Te masamapa ema nacapitara eta juca, tiyanapa mametaca ema comandante. Máichapa:

—Péchapavachucha eta pivarairahi pémostareca ema maena achane. Taicha tavanaráji eta Roma —macahepa ema nacapitara.

²⁷ Tacahe, ema comandante tiyanapa mapauchahi ema Pablo. Máichapa:

—¿Yátupisaréji tavanaravi eta Roma? —macahepa.

Ema Pablo majicapapa:

—Yátupi —máichapa.

²⁸ Tásiha, macahepa ema comandante:

—Núti, ichapemuri plata náquijica eta nusiapirayare eta tavanaranuirayare eta Roma. Píti, ¿tájahapuca eta pítujisiravahi eta pisiapirahi? —máichapa.

Ema Pablo máichavarepa:

—Núti tavanaranuhi eta Roma taicha étarichuvare náuchusinehi ena ticachichanuana —máichapa.

²⁹ Tacahe, térajicavanapa ena téstacanayarehini ema Pablo. Émaripa ema comandante, te máechapa eta tavanarairahi eta Roma, tipicarinehi eta máitiasirahi.

Ema Pablo námapa te namirahu ena aquenucarahana

³⁰ Te apanapa sache, ema comandante mavarahapa máechayare tájahapuca eta maviurevahi ema Pablo eta nayehe ena majaneanana. Mavejapuacapa eta cadenana máitihanahi. Macurujicapa ema corregidor énapa ena aquenucarahana. Tiyanapa mámahi ema Pablo, macatupihapa te namirahu.

23

¹ Tacahe, ema Pablo máesenimurihapa ena aquenucarahana, máichavacapa:

—Nuparapenaveana. Núti eta nítaesirahi puíticha juca nucahehi, tájina níchiraváinahi eta nusamiravahi te mamirahu ema Viya —macahepa.

² Ema corregidor Ananías, tisemapa eta masamirahi eta máechajiriruvana ema Pablo. Macavanairipipa ena titupihanahi te machacaya ema Pablo. Máichapa:

—¡Ésapajacacha ema mácatátaji!

³ Émasera ema Pablo majicapapa:

—¡Pítira téhaviyare ema Viya, táchavene eta apimirairavi! Te juésvihipuca píti eta péjasirahi eta te jara, tatuparacavi pímatinuma te tatiarhipuca eta néjecapirava apaesa pémehanu. ¿Tájaha tacayema eta juca pivanairipihí? —máichapa.

⁴ Ena apamuriana achaneana natiarhiqueneanahi náichapa ema Pablo:

—¿Tájaha tacayema piácapaemacha ema corregidor, macapichahuquenehi tiyujaracarahi mayehe ema Viya? —náichapa.

⁵ Ema Pablo majicapapa:

—Tátanaveana, eperdonachanu. Vahi néchahini eta émairahipuca corregidor, macapichahuquenehi tiyujaracarahi. Tájina nímatiya nucajachareca ena tuparairucana, taicha nusuapa eta máechajiriruva ema Viya. Ani tacahe: “Vahi picucajacha mácani tuparairuca tayehe eta piávasa”.

⁶ Tacahe, ema Pablo máimativacapa ena aqenucarahana, natiarirahahi ena saducéoana, énapa ena apamuriana fariséoana. Tásiha, tijaranupa eta máechajisirahi:

—Nuparapenaveana. Nútirichuvare fariséonu. Énerichuvare ena ticachichanuana fariséoanahivare. Ecatupiacanuhi te juca emirahu táichavenehi eta nucuchapirahi eta véchepusiraya te táequenenapa eta vépenira —máichavacapa.

⁷ Te nasamapa eta juca, ena fariséoana énapa ena saducéoana típutsimuríavanapa, napanerequenhapa. ⁸ (Taicha ena saducéoana, vahi nasuapa eta náechepusiraya ena náepenaqueneana; váhivare nasuapa eta natiarirahahi ena ángeleana; váhivare nasuapa eta tatiarirahahi eta náchaneva ena náepenaqueneana. Énaserá ena fariséoana nasuapa tamutu eta juca.) ⁹ Tacahe, téchajicanapa muraca. Tacahe, te nataracu ena fariséoana, natiarirahi ena escribánoana. Téchepucana. Nacahepa:

—Ema maca achane, tájina matapiravaina. Éneserapuca táechajicahi eta máchaneva ema Jesús, ángelepuca mácani. Vahi vicucanara ema Viya —nacahepa.

¹⁰ Tacahe, ichape eta semanere. Tíñepipa náicha. Tacahe, ema comandante, eta máimairahi eta nasemavahi, tipicanecha tájahapuca náicharachahini ema Pablo. Tásiha, máimichuhavanepa ena suntaruana navehapa ema Pablo, náimijunijicapa te namirahu ena mánanarahi. Náimichavavárepa ema Pablo te cuartel.

¹¹ Tásiha, te jena yátiquenehi máechajicapa ema Viya ema Pablo, máichapa:

—Túmevinachucha, Pablo. Taicha tíurihi eta péchajisihairahi eta níjare te juca Jerusalén. Puiti piyanayare eta te Roma, éneyareichu tacaheyare eta péchajisiraya —máichapa.

Napanerechapa eta nacapasiraya ema Pablo

¹² Te apanaquenepa sache, natiarirahi ena apamuriana napanerechapa eta nacapasiraya ema Pablo. Nacahepa eta náechajiriruvahi:

—Tacamunurine máepenavane ema mácatátaji Pablo. Tásiha puiti, víti vinacaya eta juca vícutiaraya. Vuíchaha vinicaimahi, vuíchahavare véraimahi, machu vásapiha vicaicuña me Viya te vahi vicuitaucha eta juca vipanereruhi. Tiámainucava te víturucapa vicapaca ema maca, vinicapa —nacahepa.

¹³ Náetavicahipuca cuarentana ena ajairana, ena tijaracavanahi ticaechajiriruvanahi eta juca. ¹⁴ Tacahe, tiyanavarepa nayehe ena tuparairucana. Náichapa:

—Víti víjaracavapa eta vítaequeneháiraya ema mácatátaji Pablo. Vinacaripa eta juca vícutiaraya. Vuíchaha vinicaimahi, vuíchahavare véraimahi, machu vásapiha vicaicuña me Viya te vuíchaha vicuitaucha eta juca vipanereruhi. ¹⁵ Tacahe, puiti eti tuparairucana eyaseacayare ema comandante máma achichu te emirahu, etanuca eta etseraruina macayaserehi ema Pablo eta juca máichavaquénévahi. Tásiha, víti vitsecavayare eta vicapasirayare éma te vímahapa máuchuca —náichapa.

¹⁶ Tiuri, matiarahi ema suchicha esu maparape ema Pablo. Masamairiricapa eta juca. Tiyanapa te cuartel mametapana ema Pablo. ¹⁷ Tacahe, ema Pablo máichuhapa ema nacapitara ena suntaruana, máichapa:

—Piáma ema maca amaperu te mamirahu ema comandante. Jucarihi eta juca mametacaya —máichapa.

18 Tásiha, ema nacapitara mámapa ema amaperu mayehe ema comandante. Máichapa:

—Ema máena macaerataquene Pablo tiyaseacanuhi náma eta piyehe ema maca amaperu. Jucarihiji eta timetacaviya —máichapa.

19 Tacahe, ema comandante macaratavauchapa ema amaperu, mámapa máiputsiacapa. Tásiha, mayaserecapa, máichapa:

—¿Tájahasica eta pimetacanuya?

20 Ema amaperu máichapa:

—Nararihi ena nujaneanana navarahahi nacapaca ema nécuca. Achichu tiyaseacavianayare piama éma te namirahu ena tuparairucana te cabildo. Nacaetseraruya ticayaseserehiyare eta juca máichavaqueneváhi. ²¹ Váhisera picusuapavaca taicha cuarentana ena ajairana ticuchapanahi te picuchucapa éma, nacapacayarepa. Taicha najurachahi eta nacapasiraya ema Pablo, tásiha napaenumavainapa te náitauchapa eta napaneruhi, tinipananainapa. Puiti éna, pítinecha nacuchapahi te pisuapayarepuca éna —máichapa ema amaperu.

22 Tacahe, ema comandante macahepa:

—Tiuri, piyana te pipena. Nacuijaseca picumetaca eta juca pimetarunuhi —macahepa.

Ema comandante máevatacapa ema Pablo mayehe ema Prefecto Félix

23 Tiuri, ema comandante máichuhapa ena apinana nacapitarana ena suntaruana. Máichapa:

—Etsecayare ena docientoana suntaruana tiámanaya eta espada, docientoanavare ena tiámanaya eta lanza, setentana ena ticaperanayarepahi. Enápanayare ema Pablo te Cesarea. Iúchuca puiti te las nueve yati.

24 Énerichuva etsecayare étanaina cavayu maperainapahi ema Pablo. Táurisera eta iámirainapahi. Íjaracaya ema Prefecto Félix —máichavacapa.

25 Tacahe, máimiamarecavarepa eta carta. Eta juca táechajiriruvapahi eta carta:

26 “Nutí Claudio Lisias nímiámareca eta juca carta piyehe piti piúriquene excelentísimo aguenuca. Néchajicavinuma tativa.

27 Jucarihí eta juca téchacarehi. Ena israelítana nacaratacachi ema émana achane ticaijare Pablo. Navarahahi nacapacaya. Étaseca te néchapa nútí tavanarairahi éma eta Roma, nuyanapa námahi ena nusuntarurana nucatiuchapanapa. ²⁸ Eta nuvarairahi necha eta maviureva, námapa te namirahu ena tuparairucana israelítana te juca.

²⁹ Nímahapa tájina matapiravainahini táimicacpahini táemeratacáhipucáini te cárcel. Étachuchanénipuca tímícatichahi eta nayeherepiana.

³⁰ Tásiha, nusamairiricavarepa eta nacamesairayarehi nacapaca. Tacahe, nímiámarecapa puiti eta piyehe. Énerichuvare nuvanecahi ena timetauchanahi náiteca ara piyehe, étaina macayaserehiya.

Tamutupa eta juca néchajiriruvanahi piyehe”.

31 Tacahe, ena suntaruana náitauchahi eta vanairipi. Námapa ema Pablo te jena yati. Títecapanapa te avasarechicha ticaijare Antípatris. ³² Étapa nachavinehi te apanapa sache ena suntaruana ena tipaicapanahi. Énaseca ena ticaperana tímiyanavánapa eta nanapaniraya ema Pablo. ³³ Tacahe, te títecapanapa te Cesarea, náijaracapa ema prefecto eta carta, émapa ema Pablo.

³⁴ Te tamutupa eta máechajicuirahi eta carta, ema prefecto mayaserecapa ema Pablo:

—¿Táviha eta piúchusine píti? —macahepa.

—Núti núchusine te Cilicia —máichapa ema Pablo.

³⁵ Tacahe, ema prefecto máichapa:

—Tiuri, véchayare te náitecapa ena piánarana —máichapa.

Tásiha, macavanairipipa macajaneha te palacio máepiyaruinihi ema ichav-icaini Aluresi.

24

Téchajiuchavapa ema Pablo te mamirahu ema Félix

¹ Te táequenepa eta cincoquene sache, títécapanapa te Cesarea ena tuparairucana tiásihanahi te Jerusalén. Matiarihíhi ema Ananías corregidorhi, énapa ena apamuriana náiyacaranahi. Matiarhipahiva ema abogado ticaijare Tértulo. Tiyananapa mayehe ema prefecto, timetaurecanapa. ² Tacahe, náepanapa ema Pablo. Te títécapapa, tépanavapa téchajicapa ema Tértulo, ánipa macahe:

—Vihasulupayachavi, tátachicha Prefecto, eta viúrivahi pícha. Tájina víchiravainahini eta pítsirahi, pijaneacahavi eta juca aquenucairavihi eta viyehe.

³ Vimutu viti achaneana te avasareana, tamutuvare sácheana vicunachavihi. Vihasulupayachavihi, tátachicha Félix, eta piúrivahi eta viyehe. ⁴ Picatajicahavi, tata, pisamahavi. Vahi picuyacujihavi eta juca viyasearuvianaya.

⁵ Puiti vímatipa ema maca achametataji, tihapapirahi éma. Tamutu avasareana te jácani viávihapahi viti israelítana, mayurucavaca ena vijaneanana.

Émarichuva tachutirihahi nayehe ena téhicana ema Jesús Nazareno. ⁶ Énerichuvare mavarahapa máechipejicayare eta tacapicahuquene Templo. Eta tacahehi vicaratacapa. Vícuñacayarehi taicha tacahehi eta tavanésirahavihi eta viyehe ley. ⁷ Émasera ema comandante macatiuchapa tiverejimirauchahavipa taicha camuriana ena masuntarurana. ⁸ Tásiha, máichahavipa: “Te evarahapuca emetaucha ema maca, eyana te mamirahu ema viáquenuruha Prefecto” máichahavipa. Tiuri, puiti vitupiruvahi víti eta vimetasiravi. Te pivaraha, picayasesereru éma eta yátupirahi eta máichavaquenevahi ema maca eta vimetauchirahi puiti —macahepa ema Tértulo.

⁹ Tacahe, ena apamuriana natiarihiqueneanahi, énerichuvare nacahehi:

—Yátupi eta juca máechajirivanahi —nacahepa namutu.

¹⁰ Tacahe, ema prefecto máimicutiarachapa máechajiuchava ema Pablo. Tépanavapa téchajica ema Pablo, ánipa macahe:

—Tájina táichava néchajiuchavaya te pimirahu taicha néchahi núti ánaquíaparipa eta juéseravihi tayehe eta viávasa. ¹¹ Tiúripana picayasesereru. Núti, dóceravahi sache eta nítecapirahi te jena viávasa Jerusalén eta néjirairayarehi ema Viya. ¹² Nájina nucájachaquenéna. Nájinavare nímiyusemaruina te tajuhe eta Templo, étaripa te náurujisirareva ena nujaneanana. Téhepucaini cálleana nucajacharecahini. ¹³ Ena nani ticatianacanuana, tájina naviya náetseraruinaini eta nametauchiranuhi. Vaipa tisuapacareana. ¹⁴ Ena nani náimijachahi vahi nétupicava eta nímituresirahi. Nútisera nusuapa tacutihíhi eta nasuapirahi namutu ena viáchucanaveanaini. Émarichuhi nucasíñahi ema Viya, ema nacasiñaquenehivare ena viáchucanaveanaini. Núti nusuapahi tamutu eta táechajiriruva eta Sagrada Escritura. ¹⁵ Núti nucasíñavahi mayehe

ema Viya, nucuchapavahi eta véchepusiraya te vécarí vimutu viti matapiravareanahi, énapa ena ticatapiravana. Puiti, énaripa ena timetauchanuanahi ticutinuanahi eta nasuapirahi eta macaechepusiraya ema Viya ena náepenaqueneana. ¹⁶ Núti, eta nusuapirahi tamutu eta juca, vahi návarahahini néjcapavahini te mamirahu ema Viya. Váhivare návarahahini néjcapava te namirahu ena achaneana.

¹⁷ Tiuri, camuripa áñoana nupaisirahi. Tacahe, nuchavapa te návasa Jerusalén. Náminapahivare eta nanicavachaya ena nujaneanana páureana. Énerichuvare nucamavahupahiva me Viya. ¹⁸ Te tamutupa eta tacasipairahi eta náchaneva étapa eta nuvahuana, nuyanapa te Templo eta nunapanayarehi eta námavahuana me Viya. Eta návihairahi te Templo, tichimapanuanapa ena nujaneanana tiásihanahi te departamento Asia. Nájinasera achaneanahini nachimapahini te nuchacaya. Váhivare náimahanuini nímiyusemacavachahini ena achaneana. ¹⁹ Ena nani nujaneanana tiásihanahi te Asia, énará títecanayarehini timetaurecana, te tatiarihinahipucaini eta nuviureva. ²⁰ Piyasereca ena nani natiarihiqueneanahi puiti, te náimicaecherachapuca eta nuviurevahi te ticatupiacanuanapa te namirahu ena tuparairucana. ²¹ Téheserapuca eta tímiciaviuchanuhi eta numetasiravacahi éna: “Puiti juca sache ecatupihanuhi te juca emirahu táichavenehi eta nusuapirahi eta véchepusiraya te táequenénapa eta vépenira” níchavacapa núti —máichapa ema Pablo.

²² Émasera ema Prefecto Félix máecharipahi tamutu eta náehisirahi ena achaneana ema Jesús, étapa eta táurivahi eta nayeherepiana. Tásiha, te tamutupa eta náechajirisiravahi, máichavacapa:

—Tiuri, tácaheine achichupaine vécha eta juca, te máitecapa ema comandante Lisias. Nuyaserecaya éma eta juca íchavaquenevahi éti —máichavacapa.

²³ Tacahe, ema prefecto Félix mavanecapa ema mayehe capitán máimichava te palacio ema Pablo. Macavanairipivare vahi nacueratata, táuri eta manarasiraina. Táuri eta náechapajirisiraina ena vichamuriana, téjiranayarepahi.

²⁴ Te jena sácheana, tiyanapa ema Félix te apana avasare. Te tichavapa, mámapa esu mayena ticaijaru Drusila. Ésurichuvare israelíta. Náimichuhapa ema Pablo, téchajiricavanayare. Tacahe, ema Pablo mametacavacapa eta táicharacavahi eta máehisirahi ema Jesucristo. ²⁵ Eta máechajirisiravahi ema Pablo, máichavacapa:

—Te ecasiñava me Jesucristo, éhicavare eta máimiturapiana, tiperdonachaheyare ema Viya. Matapiravarehena te mamirahu. Énerichuvare, tíúrinapa eta ítaresiraya, eratahainapa ecaratacavayare. Puiti, táuricapa ecasiñavavane, taicha járajapa eta sácheyare nacayaserehirayare nácani ticatapiravani. Ticaicuñanainapa te yucu —máichavacapa ema Pablo.

Te masamapa eta juca ema Félix, tipicarinehi. Máichapa:

—Tiuri, taratapa puiti eta juca. Nuvarahasera nápechavaya nusamaracavi. Te apahenavare nímicuhaviyare —máichapa.

²⁶ Ema Félix ticuchapavahi te máijaracayarepuca eta plata ema Pablo eta máuchucuiraya. Eta tacahehi máimichuhaparacahi téchajiricavanayarehi.

²⁷ Váhiserá máuchucuhahini ema Pablo, taicha ema Félix mavarahahi tíúriyarehi nayehe ena israelítana. Apina año eta tayerevahi. Ticaitsivanecha ema Félix. Tisiapapa ema Porcio Festo, émapavapa prefectohi.

25

Nacatupiacapa ema Pablo te mamirahu ema Festo

¹ Te émapavapa aquenucahi ema Festo, te mapanaquenepa sache, tiyanapa te Jerusalén. ² Tacahe, ema corregidor énapa ena apamuriana tuparairucanahi, ticurujicacanapa mayehe ema aquenuca Festo. Nametauchapa ema Pablo. ³ Nayaseacapa ema Festo macátajicavacahini eta máevataca te Jerusalén ema Pablo. Taicha navarahahi titsecavanayarehi te achene eta nacapasiraya. ⁴ Émasera ema Festo majicapapa:

—Tiuri, ema Pablo ticaeratahi te Cesarea. Núti achichupaichu nuyanyare nuchavaya tayehe. ⁵ Eta tacahe, te tatiarhipuca eta échaqueneanahi eti tuparairucana, tiúripa éhicanu te Cesarea apaesa vecha te ticaviurevhipuca ema maena achane —máichavacapa.

⁶ Te tiánehipa eta diésquene sache eta mávihairahi ema Festo te Jerusalén, tichavapa te Cesarea. Te apanapa sache téjacapa tayehe eta mávacure. Máimichuhapa ema Pablo. ⁷ Te títecapapa ema Pablo, tisiapapa te mamirahu ema Festo. Témeñahavanapa ena mánarana tíasihani te Jerusalén. Timetaurecanapa ema Pablo. Camuri eta májecapiravahiji. Ichape eta maviurevahiji nayehe. Tájinasera naviyahini eta náetserarúinahíni. ⁸ Émasera ema Pablo máichavacapa eta macatiuchiravahi:

—Núti tájina nutapiravaina tayehe eta nayeherepiana ena nujaneanana, étainapucáini eta Templo, émainahivarepucáini nucaecahi ema ichapequene aquenuca Emperador —máichavacapa.

⁹ Émasera ema Festo, énerichuhivare mavarahahi tiúriyare nayehe ena israelítana. Tacahe, mayaserecapa ema Pablo:

—¿Pivarahapuca piyana te Jerusalén, étaina tacaechacasiya te numirahu eta juca píchavaquenévahi?

¹⁰ Tacahe, ema Pablo majicapapa:

—Étaripa návihahi puiti te pimirahu píti viyehe juez manacaquenevihi ema Emperador. Pítipa tituparacavi picuchucuhanuyarehi taicha pécharichuhi píti tájina nuviurevainahini nayehe ena nujaneanana. ¹¹ Téheserapuca nucaviurevahini, táimicapacanuríne eta nuviureva. Vahi nucatiuchavaimahi. Tájinasera nuviurevaina eta nametauchiranuhi ena nani. Váhivare tituparacavi píjararecanuhini eta nayehe ena nani. Téheserapuca te vahi picucaitanu, nuyasesereca puiti nuyana te mamirahu ema Emperador. Étaina nucametauchacasiya mayehe —máichapa ema Pablo.

¹² Tacahe, ema Festo macayasesererupa nayehe ena mayeheana abogado. Tásiha, máichapa:

—Píti Pablo, piyaseserecahi piyana te mamirahu ema Emperador. Nísapavi piyana —máichapa.

Títecapapa ema rey Agripa, ésupa esu Berenice

¹³ Te jena sácheana, títecapapa te Cesarea ema rey Agripa, ésupa esu Berenice. Náechajipanayarehi ema Festo. ¹⁴ Eta nanasiquenerahi te jena sácheana, ema Festo mametacapa ema rey eta máichavaquenévahi ema Pablo. Máichapa:

—Mararihi ani ema achane ticaeratahi ticaijare Pablo. Manaquiruhi ema Félix. ¹⁵ Te nuyanapa te Jerusalén, ena tuparairucana timetacananapa eta máichavaquenevahi, tiyaseacananapa eta nímicapasiraina. ¹⁶ Tásiha,

núti nujicapavacapa: “Viti aquenucarahana tayehe eta Roma, vahi tituparacahavi vímicapacahini mácani ticametauchacasihí te vuíchaha ticamírachucacanáhi ema mánarahi” níchavacapa. ¹⁷ Tacahe, te títecapanapa aní, vahi náyererejihini núti. Te apanaquenepa sache néjacavanepa te návacure, nímicuhapa ema Pablo. ¹⁸ Núti nímiyachapa ichape eta maviureva. Étasera eta nametauchirahi, tájina vahi táíñepihini. ¹⁹ Étachuchanénipuca tímiviuchahi eta nayeheana religión. Émapa ema náehiruhi ticaijarehipuca Jesús, ema mácani tépenahi. Puítisera ema Pablo máéchajisihahi eta mápechiravahi títareca. ²⁰ Núti vahi nímatiequeneha eta táicharacavaya eta juca. Tacahe, níchapa ema Pablo: “¿Pivarahapuca piyana te Jerusalén, étaina tacaechacasiya eta juca píchavaquenévahi?” ²¹ Émasera tiyaseuchavapa eta mayaniraya te mamirahu ema Emperador Augusto. Tacahe, nímvivanerecapa macajaneha tíamainucava te nítujicava nímvivanerecapa nanapana mayehe ema Emperador —máichapa ema Festo.

²² Tacahe, ema Agripa máichapa ema Festo:

—Núti apana nuvarahasa nusamaini ema mácara achane —máichapa.

Tacahe, ema Festo máichapa:

—Tiuri, achichu pisamaya éma.

²³ Tacahe, te apanapa sache tisiapanapa ema Agripa ésupa esu Berenice tayehe eta náejasirare ena aquenucana. Tiúrina eta náitecapira. Jánunuhacavaca eta namuirihana. Énapa ena aquenucana tachutirihana nayehe ena militáreana énapa ena tuparairucana tayehe eta avasare. Tacahe, ema Festo máimichuhapa ema Pablo. ²⁴ Tacahe, téchajicapa ema Festo, ánipa macahe:

—Tata Rey Agripa. Tátanaveana. Emutu eti etiarihiqueneanahi te juca viúrujisirávahi. Mácahi ema maca achane nametaurehi ena majaneanana eta nuyehe, ánaqui te Jerusalén, étapa aní te juca Cesarea. Nararihi camuriana navaraha náimicapaca ema maca. ²⁵ Nútisera tájina nímaha matapiravaina táimicapacahini. Émasera tiyaseuchavapa tiyanayare te mamirahu ema Emperador Augusto. Nísapahisera mayana eta mayehe. ²⁶ Vuíchahasera nucajurehini ema náquenu Emperador, taicha tájina nuviyahini eta matapiravainahini. Puítisera nucatupíha éma te pímirahu píti rey Agripa, étipa eti tátanaveana. Nuvaraha ímicatacanu eta táicharacavaya eta juca, apaesa nucajurepáini ema Emperador. ²⁷ Taicha vahi tiuri vévataca ema présuhi te tájina matapiravaina —macahepa ema Festo.

26

Em a Pablo téchajiuçavapa te mamirahu ema rey Agripa. Mametacavacapa eta máitaresirahi te vuíchaha máehicahini ema Jesús.

¹ Tacahe, ema Agripa máichapa ema Pablo:

—Tiuri, nímaha péchajica —máichapa.

Tacahe, ema Pablo macanuquechapa eta mavahu. Tépanavapa téchajica, ánipa macahe:

²—Tiúrisamurécare eta nítujisiravahi néchajica te pímirahu, píti rey Agripa, eta nucatiuchiravaya núti apanava eta juca nametauchiranuhi ena nujaneanana israelítana. ³ Núrisamure ichape taicha píti pímatihí tamutu eta juca viyeherepiana viti israelítana, étapa eta véchapajirisirahi. Eta tacahe, nuyaseacavi puiti písamano eta nuçayemaya. Páçayehe paciencia nuyehe.

4-5 Eta námaperuvahi núti, fariséonuhi te návasa núchusinehi étapa te Jerusalén nujurusinehi. Néhicahi eta viyeherepiana viti israelítana eta nítaresirahi. Nucachanevacahi ena fariséoana ena típícauchacareánapána. Namutu ena nuchajuruanahi tímatinuanahi eta nítaresirahi. Ena títameta-cavianaya eta nítaresirahi. 6-7 Puiti ticatupiacanuanahi te pimirahu, piti rey, táichavene eta vicuchapiravahi eta macaechepusirahaviya ema Viya te vépena, taicha tacahehi eta máechajiriruvahi nayehe ena viáchucanaveánaini. Vimutu viti tachichanaveanahi eta viávapairu Israel, vimutu vicuchapavahi eta juca táitauchiravaya eta máijjararuhaviya ema Viya. Eta tacahehi, tamu-tuhi sácheana, yátiana vítatíhi ema Viya, viyujaracahi mayehe. Táichavenehi eta nucuchapiravahi núti, timetauchanuanahi ena nujaneeana. 8 Tiuri puiti éti, németeaca tisuapacarehi eyehe eta macaechepusiraya ema Viya ena náepenaqueneana.

Ena Pablo mametacavacapa eta mapánajirisírvaca ena téhicanahi ema Jesús (Hch 8.1-3; 9.1-2)

9 Nútiripa acane nímiachahi nétupicava eta me Viya eta níchaqueneánahi nucatianasiravacahi ena téhicanahi ema Jesús Nazareno. 10 Eta juca níchirahi te Jerusalén. Tímícatacanuanahi ena tuparairucana eta nucaratasiravacahi ena matapiravareanahi téhicanahi ema Jesús; nímiapiiravacahi te cárcel. Eta nímairahi eta nacapasiravarepahi, néhicahi eta napanereru éna. 11 Ichapemurianahi ena nucarataruana. Némecharecavacapahi ena nétupiaruanapahi te náurujisirarevana. Níminajicavacápápa eta náehisirahi ema Jesús. Nécatihavare eta náepuruiraya. Muraca eta nuvainarajichiravahi nayehe. Tamu-tuhi nutanusihavaca te apanaqueneana avasareana tayerehiqueneana.

Ena Pablo mametacavarepa eta máehisiraipe éma apanava ema Jesús (Hch 9.1-19; 22.6-16)

12 Étarichuvare tímiyananuhi te avasare Damasco. Tivanecanuanapa comisiónnuhi ena tuparairucana; tíjaracanuanahi eta órdena. 13 Tacahe, tata rey, te nánehípa te avasare, te jena sache las dócequenepa, tíjahúchavapa tímícauchanu eta majaraíva ema Viya, tíásiha te anuma. Tijarahípana tayehe eta sache. Tímícauchanupa, énapa ena téhicanuanapahi. 14 Tacahe, viáquipáicavapa vimutu eta vipisirahi. Nusamapa ema Viya, téchajicanuhi te véchajiriruva viti israelítana. Máichanupa: “Saulo, Saulo, ¿tájaha tacayema picatianacanuhi? Pésamiricavachucha, taicha pítijiváichucha píchavahi. Vahi piúrimahi te pímiyanava pipanajiricavaca ena téhicanuanahi” — máichanupa. 15 Tacahe, níchapa: “¿Nájahavi, piti Tata?” Tijicapanupa éma: “Núti Jesús. Núti picatianaruhi, eta pipanajirisiravaca ena téhicanuanahi. 16 Péchepuca, pitupiha. Núti nímeracavahi eta piyehe, taicha nunerejiruvíhi nuvanaraviya. Puiti numetacaviya eta juca pématanerepiyare eta nuyehe. Péchajisihayare eta níjare nayehe ena achaneana eta juca pímairanuhi puiti, étapa eta apamuriana nímerereruanayare. 17 Núti nucatiuchaviya te tájahapuca náicharacavi ena vijaneana israelítana énapa ena apavasanana. Puiti nuvanecavihi péchajisihanuya eta nayehe ena apavasanana. 18 Pímitucavacayare eta mavanairipiana ema Vicaiyaquene. Nacaijuhe éma, apaesa náitujicava náimaha eta majaraíva. Náinajicapa eta náichaqueneasana te timapicu. Vaipa nacuehica ema Satanás. Ena tisuapanuanaya téhicanuanaya, nuperdonachavacaya eta napecaturana. Nasiapamuríhaya ena náinapureanahi nunerejiruana” máichanupa ema Jesús.

Ema Pablo mametacavacapa eta masuapirahi eta matuparacasivanahi me Jesús

¹⁹ Tacahe, tata rey Agripa, nusuapahi núti ema Jesús eta mavanesianuhi. ²⁰ Nucametarairupa tativahi nayehe ena ticavasanahi te Damasco. Te nuchavapa, étapa te Jerusalén, étapa te avasarechichana te Judea. Tásiha, núchucapa tayehe eta avasareana tayerehiqueneana nayehe ena apavasanana. Numetacavacapahi eta nácaijuherraina ema Viya, náneuchi-ravaina náitsivachiraina eta náitairesiraina, táuripa eta náitairesiraina. ²¹ Étara eta juca tivichuanuhi nayehe ena nujaneanana eta nacaratasiranuhi te Templo, navarairahi ticapacanuana. ²² Émasera ema Viya tímicitacanuhi. Puitirichucha tímicitacanuhi éma. Eta tacahe, nutiarihichucha puiti. Tásiha, vahi nuchávacuéjchavahíni nucametarairuyarechucha nayehe namutu ena achaneana, ena páureana énapa ena rícoana. Tájinasera vahi nuhapapicahini eta táchajirivanahi eta Sagrada Escritura eta táitachiravayarehi eta macatajivairayarehi máepenirayarehi ema Cristo. ²³ Tásiha, émayarehi títapuca téchepuca te máecari. Éta, táicutiarahi eta véchepusiraya víti apana te vécarí vimutu viti achaneana, viti israelítana énapa ena apavasanana. Tásiha, tivanecahavipa vimetacaya ena achaneana, apaesa nácasíñava mayehe éma.

Ema Pablo mavarahapa macajimuyasamurechayare ema Agripa eta máehisiraya ema Jesús

²⁴ Tímiyanavarichaha téchajica ema Pablo eta máechajiuchiravahi, témechajicavapa muraca ema Festo, macahepa:

—Máurishivipa piti Pablo, táichavene eta pivayuchiravapa picaravahu. Étapa timaurishichavihi.

²⁵ Émasera ema Pablo majicapapa, macahepa:

—Váhiya máurishinuina, tata aquenuca Festo. Nutupiruvahi eta juca nucayemaqueneanahi. Jéhevare eta yátupiqueneanahi. ²⁶ Émaripa ema maca rey Agripa máimativare tamutu eta juca. Eta tacahehi vahi nupicacaracavahini eta néchajisirahi te mamirahu taicha nucasíñavahi núti eta máimatirahi ema. Namutuhivare ena achaneana náechahi, taicha tájina vahi tayumuruca-vahini. ²⁷ Pítiripa piti rey Agripa ¿pisuapahi jácani eta nacayemaqueneanahi ena profetanaini? Núti németeacahi pisuapahi píti.

²⁸ Ema rey Agripa majicapapa:

—Picájimuyacayaréni eta nusamure. Núti apanavare néhicayare jácani ema Jesús.

²⁹ Tacahe, ema Pablo máichavarepa:

—Tiúripána pisuapavane puítinrichu, yátupina te pisamure. Nuyaseacaya ema Viya eta pisuapiraina. Énerichuvare nuyaseacayare eta esuapiraina emutu eti apamuriana eti esamararacananahi. Éhicavanéni ema Jesús, tácutihini eta néhisirahi núti. Váhisera nacuératacahéni, vahi ecucutinuhini núti eta nucaeratairahi táichavenehi eta néhisirahi ema Jesús —máichapa.

³⁰ Te nasamapa eta juca máechajiriruvahi ema Pablo, téchepucapa ema rey, ema prefecto, esu Berenice, énapa namutu ena natirihiqueneanahi náejaruanahi. ³¹ Tásiha, tiyananapa típutsiacavanapa, náechajisihayarehi eta juca. Náichacapa:

—Ema maca achane, tájina maviurevaina táimicapacahini. Váhivare táurichahini macaeratahini te cárcel.

³² Ema Agripa mametacapa ema Festo:

—Tiúrihini picaitica ema maca achane te vahi macúyaseserécahini eta mayaniraya te mamirahu ema Emperador —máichapa.

27

Ticaevatapa ema Pablo te Roma

¹ Tiuri, matiarihahi ema capitán ticaijare Julio, nacapitarahi ena masuntarurana ema aguenucaini Augusto. Tacahe, te tiúriipa eta napanereru eta náevatasirahaviya te Roma, natuparacapa ema Julio mámaya ema Pablo énapa ena apamuriana présoana. ² Viávacuhapa te ichape pacure tiásihahi tayehe eta puerto Adramitio. Tiyanayarehi te apanavare puértoana te Asia. Téhicahavipahi ema Aristarco ticavasahi te Tesalónica tayehehi capital eta departamento Macedonia. ³ Te apanapa sache, vítecapapa te puerto Sidón. Tacahe, ema Julio majapanupahi ema Pablo, máisapahi tiyana máejirapanavaca ena vichamuriana. Náechapajiricahi ema Pablo. ⁴ Te viásihavarepa te Sidón, vétavicapa eta tiúrupuhi Chipre tinapaicapahi te sapa, váipasare viácapapahini eta técatícava. ⁵ Tacahe, vijuchecherecapaipa eta mar te tachacayapahi eta Cilicia, étapa eta Pamfilia, vítecapirapa te avasare Mira tayehe eta Licia.

⁶ Eta tayehe, viávacuhavarepa tayehe eta apanapa pacure máechajiaruhi ema capitán Julio. Eta juca pacure tiásihahi te avasare Alejandría. Puiti tacaijuheyarepa te Italia. ⁷ Te jena sácheana vahi vijuricatipahicháini eta vipaisira. Muracarichucha eta técatícava eta viácapirapahi. Muraca eta nacaemataneasirapahi, vítecapirapa te tánara eta puerto Gnido. Tacahe, vétavicavarepa eta puerto Salmón te tasumuqui eta apanavare tiúrupuhi ticaijare Creta. Viávicuchapáipa eta tiúrupuhi, étapa tiávichahávipahi tayehe eta técatícava. ⁸ Ticajerapahi eta vipaisirapahi. Vijúchecherecapáichucha, vítecapiravarepa tayehe eta apanavare puerto Buen Puertohiji eta ticaijare te tachacaya eta avasarechicha Lasea.

⁹ Ticachuricahavipa eta tiempo taicha eta viyérejevapahi. Tíñehiripa eta tapaisirava te mar, taicha tinacuchavaipa eta muracana técatícava. Eta tacahehi ema Pablo maconsejachavacapa, macahepa:

¹⁰ —Tiuri, tátanaveana. Váipara tiuri vímianavahini vipaica, taicha tíñehicarepa vécharicava. Machu vicamitiaca eta pacure, eta carga, vítipa machu vérica —macahepa.

¹¹ Émasera ema capitán Julio, ema comandante tayehe eta pacure, émapa ema piloto vahi návarahahini nánasihini. Vahi nasuapahini ema Pablo. ¹² Taicha vahi táurihini eta puerto, tájina távichahini tayehe eta muracana técatícava. Napanerechaichucha tiyananayare. Ánipa nacahehi:

—Vahi tiuri eta vánasi te juca. Viyanachucha tayehe eta apanavare puerto Fenice tayehe eta juca Creta. Tiúripana eta jena, távichahi tayehe eta muracana técatícava. Étaina vicuchapiha eta te táetupiricavapa eta sácheana —nacahepa.

Muraca técatícava te mar

13 Tacahe, tépanavapa eta técatiticavahi te vana. Tiápajuecavanapa éna. Náimijachapa tímiyanavanayarehi tiuri eta náehisirayarepahi eta técatícava* . Vahi náemeteacahini táequēcavahini te cajaha. Viánehipaipa vicachacaya eta tiúrupuhi Creta. 14 Te ticaicutiaravapa, tijahúchavapa téquēcava, muracapa técatícava tásiha te cajaha. 15 Tavehapa eta vipacure. Tiámahavipa. Viyerehipa eta tachausi. Navarahainipa náimichava eta pacure te tachausipahi, váhisera náratahahini. Tásiha, náisapapa tiámahavi eta técatícava. 16-17 Témétavichavavipa te apachacaya eta tiúrupuhichicha ticajjare Clauda, étapa tiávichahavihi. Váiparichu muracainahini eta técatícava. Étapa víturusine vijataca eta étasi pacure vichururepahi. Vinacacuhapa te tajuhe eta ichapepana pacure. Ichapesera eta vicaemataneasirapahi. Tacahe, náinunuacapa eta pacure te enureana apaesa vahi tacuvejajuecha eta táepacuruha. Nacamiricapa eta ichapepana tavanterame tévatajicapahi eta pacure taicha napicahi támahini eta técatícava, táejahapaicahini eta pacure tayehe eta playa ticajjare Náeharisirareva. Tacahe, táevatajicapaipa eta vipacure, vétaviequenehairapa eta playa. 18 Tíñehichucha eta táepacuruhana. Eta napisirahi éna, náepuhecavacapa te une eta támaquenepahi. 19 Te mapanaquenepa sache, vivehavarepa eta apamuri támaqueneanapahi tayereruvanapaichuhi eta pacure, véchicapavarepa. 20 Jéhesare, ichapemurihi eta sácheana vahi tacaecherahini eta sache, étapa eta jarairiquiana. Eta vímairahi vahi tarasahini eta muraca tépacuca, vaipa vémeteacavahini víuchucuhahini.

21 Ichapemurihi eta sácheana tájina vinicahini. Tacahe, ema Pablo titupiha te vimirahu, máichahavipa:

—Tátanaveana, tiúripanáichuhipucáini esuapanuhini te vuíchaha víuchucahini tayehe eta Creta. Puiti vahi vicucatajivahini. 22 Puítisera, vahi ecupica, taicha nájina tépenaimahi. Técharicavayaresera eta pacure, témitiacaya. 23 Néchahi núti eta juca, taicha yati téchajicanuhi ema ángele mavaneruhi ema Viya, ema náquenuhi nucaematanearuhi. 24 Ani macahehi eta mametasiranuhi ema ángele: “Vahi picupica, Pablo. Vahi pépenaimahi. Énaripa ena nani picachanequeneanapahi, váhivare tépenanámahi táichavenehi eta pitarihirapahi eta nayehe. Picamesavayare pítecapaucha ema Emperador pitupihamiraureya” máichanupa ema ángele. 25 Eta tacahe, tátanaveana, túmehénachucha, taicha núti nucasiñavahi mayehe ema Viya. Nusuapahi eta mametarapiana ema ángele eta nuyehé. 26 Tiámahaviyaresera eta técatícava tayehe eta tiúrupuhi —máichavacapa ema Pablo.

27 Apinaquenepa semana eta támirahavipahi eta muraca técatícava te ichapequenehi mar. Te jena enumuhuquenepa yati, ena marinéroana náimijachaipa tiánehanaripa eta tájipahi taicha nasamahi eta cachuela te tachausi. 28 Náicutiecapa eta táupenava eta une. Náimahapa treinta y seis metro eta táupenavahi. Te tiyererehavare, náicutiecavarepa, veinte y siete metro eta táupenava. Náemeteacapa tiánehanaripa eta tachausi. 29 Tacahe, nacajuchucupa eta cuatro áncana te tahivu eta pacure, taicha napicahi táemestaquihahini eta vipacure tayehe eta máriana. Navarahaipaicha tájiahúchavahini tijarahi. 30 Eta napisiraipaicha, ena marinéroana navarahapa tijunanayarehini, tijunjicahavianayarepa. Nacucupaicapa eta étasi

* 27:13 Acane eta ichapequeneana pacure, amairihaichaha te náurape eta napaisihahi te une. Camurianahi ena achaneana tinaucanapahi. Nacatupihavare eta ichapemequeneana sábanana tímecatayarepahi tévatajica eta técatícava.

pacure vicavacurehi. Nacaetserarupa nacajuchucuyare eta apana ancla te tasumu eta pacure. ³¹ Ema Pablo máimatiacavacapa eta navarairahi tijunana. Tacahe, mametacapa ema capitán Julio énapa ena masuntarurana. Máichavacapa:

—Te vahi nacunasi te juca pacure ena nani, éricayare éti, vahi iúchucu-haimahi —máichavacapa.

³² Tacahe, ena suntaruana náechupicavacapa eta enureana táitihapahi eta étasi pacure. Náinajicapa te une.

³³⁻³⁴ Te tijarahipa, ema Pablo tivanecahavipa vimutu vinicanuma. Máichahavipa:

—Enicanumapa apaesaina, taicha apinapa semana eta juca iávamina, emaimasirahivare. Tatuparaca enicanuma apaesa táetumechahe eta iávaresirayare. Nájinasera témtiacaimahi te vitaracu —máichavacapa.

³⁵ Tacahe, te tamutupa eta mavanésiravacahi, ema Pablo mavehapa eta pan; mabendiciónchapa te vimirahu. Mavejecapa, tinicapa. ³⁶ Vétumechavapa vimutu, vinicapa víti apanava. ³⁷ Camurihavihi viti támaqueneanapahi eta pacure. ²⁷⁶ eta visimutuvapahi. ³⁸ Te vítanésipa eta vinisirahi, navehapa ena marinéroana eta apamuri trigo, náquijicapa te une, navarairahi téchacayare eta támaquene eta pacure.

Técharicavapa eta pacure

³⁹ Te tijarahipa, ena marinéroana vahi náimativahini távihahipuca eta viávihihi. Náimahasera eta tachausi ticayehehi playa. Navarahapa náimipauchayare eta pacure, viúcupaisihayarehi te playa. ⁴⁰ Tacahe, náechuacavarepa eta enureana ticaratacanahi eta áncana. Tanasivacapa te amahe une. Nacaesimucavarepa eta tayeheana leme eta pacure. Tacahe, nacanunquechapa eta étana tavanterame ticarataca eta técaticava tiávihapahi te tasumu. Táimicatapaca eta napauchiraya eta playa. ⁴¹ Tiámahavipasera tayehe eta remanso. Vaipa táupenahini. Tásiha, ticaratacahavipa eta playa. Tachuchucapa eta tavaparú. Vaipa tayamurichahini. Tacahe, eta tamuracavahi eta tépacuca, tacavaracapa eta tahivu eta pacure. ⁴² Ena suntaruana navarahapa nacapacayarehi ena présoana, napisirahi náitujicavahini tijunana eta návaresiraya. ⁴³ Émasera ema capitán Julio vahi máisapahini taicha mavarahahi macuchucuhayarehi ema Pablo. Macavanairipipa ena náitucanahi tiávarecana napaucha eta tachausi. ⁴⁴ Ena apamuriana máitucarahanahi tiávarecana nayuratamecavacapa eta tabla, nacuchucuiyavahi te tiájipahi. Tacahehi eta viúchucuirahi vimutu.

28

Ema Pablo mávahaipa te tiúrupuhi Malta

¹⁻² Tacahe, te vimutupa viúchucuhahi, tiúchujiuchahavianapa ena ticavasanahi tayehe eta tiúrupuhi. Timetacahavianapa eta táijarehi Malta eta viúcupaisihahi. Nacamuruequechapa eta yucu, tíchuhahavianapa viásacavayarehi taicha vicasarechavacaipahi taicha eta une étapa eta tiquiva. Énapa titátihavianahi. ³ Tacahe, ema Pablo tinerecapa eta yucuqi máijuquechapa. Tatiarihhipuca eta quichare te manereru. Tásiha, tiúchujicapa eta quichare, táimijunapa eta yucu. Táechucapa te mavahu ema Pablo. ⁴ Te náimahapa ena ticavasanahi tayehe eta tiúrupuhi eta táechusirahi ema Pablo te mavahu, nacahepa:

—Ema maca achane ticaviurevapuca jácani, ticáparecahíchupuca. Tiúchucuhahi te une, ánipasera taviyihahi te tiájipahi eta matuparahahi. Vaipa máuchucuhahíni —nacahepa.

⁵ Émasera ema Pablo máquijipicapa te yucu eta quichare. Tájina máichavahini. ⁶ Tacahe, ena tímararacanáhi nacuchapaipa máepenahini, támahipucahini eta mavahu. Eta náimairahi tájina máichavahini, napanerequenehapa.

—Viyachupuca ema maca —nacahepa.

⁷ Te tachacaya eta vécharisinevahi, tatiarihíhi eta barraca, maverahi eta pétiána napananáhi ena machaneranáhi ema subprefecto, tuparairucahi tayehe eta tíurupuhi. Ema ticaijarehi Publio. Émapa tíchuhahivíhi téchapajirícahivíhi eta jena mapanaquenehi sache. ⁸ Matiaríhíhivare ema maiya ema Publio. Ticajumahi éma, eta muraca fiebre. Tisacahivare iti. Tívecahi éma te matuleta. Tíyanapa ema Pablo, máejirapanahi. Tiyujaracapa, mayaseacapa ema Viya eta macanarasiraina ema macajumaquene. Tásiha, manacapa eta mavahu te máinahu. Jéhesare, tinaracapa ema achane. ⁹ Eta náimairahi ena apamuriana achaneana eta macanarasirahi ema macajumaquene, náepanavacapa ena apamuriana nacajumaqueneana. Macanaracavacapaipa ema Pablo. ¹⁰ Mapana caje eta viávihairahi tayehe eta tíurupuhi. Ichaperínehi eta náitátrahavíhi ena achaneana. Te viávacuhayarepa, tíjaracasichahávianapa eta vicamunuqueneánayarehi eta vipaisirayareva.

Tímíyanavanavarepa eta napaisirahi, nacajuherahi eta Roma

¹¹ Tasiha, viávacuhavarepa tayehe eta apanavare pacure tachimarahivare eta muracana técatícava tayehe eta puerto viávihahi. Eta juca pacure ticaijarehi Castor-Polux, Chámeana. Tiásíhahivare te Alejandría. ¹² Eta vipaisirahi, vítecapapa te apanavare puerto ticaijarehi Siracusa. Víchecapa tayehe mapana sache vicahe. ¹³ Te viyanavarepa, vijuchechecapaipa vítecapirapa tayehe eta puerto Regio. Te apanapa sache tépanavavarepa eta técatícava te vana. Tímícatacahavípa eta vipaisirapahi. Te apanapa sache, vítecapapa tayehe eta puerto Puteoli. ¹⁴ Te jena avasare, vicainunapa ena apamuriana vichamuriana, tíminasichahávianapa. Étana semana vicahe eta nayehe. Tásiha, vipaicapa te tiájipahi, vicaijuhepa eta te Roma. ¹⁵ Ena apamuriana vichamuriana ticavasanahi te Roma tisamairíricahávianáipa eta vítecapirayarehi. Nárájapapa tíacpahávianahi te achene te apanahivare avasare ticaijarehi Foro de Apio. Énerichuvare ena apamuriana tíacpahávianahivare, ticuchapahávianáipa tayehe eta apanahivare avasarechíca ticaijare Tres Tabernas. Te máímahavacapa ema Pablo, tíurísamuréinehi naicha eta nácapirahavíhi ena vichamuriana. Tétumechavapa ema apana. Mahasalupayachapa ema Viya. ¹⁶ Te vítecapapa te Roma, ema capitán Julio mahentregachapa ema comandante tayehe eta guardia ena présoana. Émasera ema Pablo náisapapa títecapapa te apana peti, matiaríhíhísera ema émana suntaru tíjneacahi.

Ema Pablo máimitucavacapahi ena téjirapanana te máítecapihahi

¹⁷ Te mapanapa sache eta vítecapirahi te Roma, ema Pablo máimichuvavacapa ena náiyarahana ena israelítana ticavasanahi te jena avasare. Te tíurujicavanapa, ema Pablo máichavacapa:

—Nuparapenaveana, tájinanéni nutapiravainahini. Tájinavare nícharacahini ena vijaneanana. Váhivare nucaecahi eta nayeherepianaini ena viáchucanaveanaini. Nucaeratahisera te Jerusalén, timetauchanuanahi te namirahu ena tuparairucana romanoana. ¹⁸ Eta nayaseresiranuhi, navarahahineni ticaiticanuana taicha náimahahi éna tájina taviuchanuhini táimicapacanuhini. ¹⁹ Énasea ena vijaneanana tuparairucanahi váhiquene návarahahini nacaiticanuhini. Eta tacahehi nuyaseserecapa núti étaina nucame-tauchacasiya te mamirahu ema Emperador. Tájinasea vahi numetauchaimahi ena nujaneanana ticaetemajiricanuanahi. ²⁰ Eta tacahe, nímuchuhahehi nuvarahahi nímatiheyare éti, numetacheyareva eta juca níchavaquenevahi. Ticaviurenuhi eta néhisirahi ema Cristo, ema vicuchapaquenehi vimutu viti israelítana, eta tímitiacanuhi puíticha te juca cadena — máichavacapa.

²¹ Tásiha, ena náichapa:

—Tájina váhiya visamairiricavi. Váhivare vijacapa eta carta tiásiha te Judea táechajisihavihini píti. Énapa ena vichamuriana israelítana tiásihanapahi eta ánaqui, váhivare náechajisihahini eta piviuerevahipuca píti. ²² Vívarahasera visamavi puiti péchajisiha eta pipanereruanahi, taicha visamairiricahi eta nacaticirahi ena vijaneanana tiávihanapahi te avasareana eta juca arairuhi éhiruhi —náichapa.

²³ Tacahe, náijarechapa eta sache máechajisiraya. Te jena sache, títecapana ena camuriqueneana israelítana tayehe eta máitecapihahi ema Pablo. Tépanavapa te jena yáticarahi téchajicahi éma. Tiámainucava te cáperehichichapa títapiricapa eta macametarairuirahi eta máechajiriruva ema Viya. Máimivehapicapahi eta máechajicuirapahi eta Sagrada Escritura. Máimitucavacahi éna eta náimatiraya ema Jesús eta émarahi Cristo, ema nacuchapaquenehi. Macajimuyacavacahi eta náehisiraina éma.

²⁴ Tásiha, típutsimurihavanapa ena tisamararacanahi. Natiarihíhi ena apamuriana nasuapa eta macayemaqueneanahi ema Pablo. Natiarihísera ena apamuriana vahi nasuapahini. ²⁵ Éna, vahi návarahapahini nasama, timutserahavanapaipa tiyanana. Tacahe, ema Pablo máichavacapa:

²⁶⁻²⁷ —Machu ecucutihini ena viáchucanaveánaini acane. Matupiruvahi ema Espíritu Santo eta máechajisihavacahi éna te mametacapa ema víyarahaini profeta Isaías. Máichapa: “Piyana pimetaca ena naena achaneana. Ani píchayare: Nímatihe éti eta emasuapajiravahi. Épiyacavahi religiósöhehi; tétavicavahisera eta tamuracavahi eta esamureana. Eta juca emasuapajiravahi, tahapapiricahi eta ecaicutiarairahi eta numetarapiana étapa eta nímereuchaqueneana. Tájinapa táichahíni vicuchapahini eta éneuchiraváina, evarairapucaini ecasiñahini me Viya, apaesa macanaracahehíni” máichapa ema Espíritu Santo.

²⁸ Ácaicutiaraqúenéna éti, puiti juca vicaijuheya vimetacaya ena apavanana eta mavarairahi macuchucuhaya éna apana ema Viya. Tásiha, éna nasapihayare nasamararacayare —máichavacapa ema Pablo.

²⁹ Te tamutupa eta máechajisirahi ema Pablo, tiyananapa ena majaneanana, tíumehavanapaipahi.

³⁰ Apina año macahehi ema Pablo tayehe eta máitecapihahi. Tamutu sácheana majacapavacahi ena tipaiiuchanapahi. ³¹ Máechajisihahi eta máechajiriruva ema Viya, máimitucahivare eta náehisiraina ema Viáquenu

Jesús, émairahi yátupiquenehi Cristo. Nájina nacamatinacahini. Náisapahi ticametarairu.

Tamutupa eta néchajiriruvana eta piyehe.

Eta macartane ema Apóstole Pablo nayehe ena machamuriana ticavasanahi te Roma, ticajare ROMANOS

¹ Nuti Pablo, mavanaranuhi ema Viáquenu Jesucristo, manerejirunuhivare eta mayehenuyarehi apóstole. Tituparacanuhi eta nucametarairuirayare eta mapanerechirahi ema Viya eta mavarairahi macuchucuhaya namutu ena ticasañavanaya mayehe ema Machicha.

² Ema Viya, ánaquiapariipahi eta juca mametasiravacahi ena víyarahánaini santo profetana eta mapanerechirahi eta macuchucuiraya ena achaneana. Tásiha, nájuequeneharipahivare éna. ³ Eta Sagrada Escritura táechajisihaipa ema Machicha ema Viya eta máucupaisirayarehi te juca apaquehe. Yátupiyarehi Crístohi éma. Achanequenehi eta máimahi. ⁴ Natirihihisera ena ticatianacanáhi éma. Náimicapacahi éma. Émasera ema Espíritu Santo, tíamicarehi eta macaechepusirahi éma te máecari. Éta pa tímereuchahi eta yátupiquenérahí Machicha ema Viya. ⁵ Puiti ema Viáquenu Jesucristo tijapanunuhi eta matuparasiranuhi eta nuyaniraya nupaicaya te tamutu avasareana, nucametarairuyarehi eta najacapacarevayarehi me Viya namutu ena tisuapanayare, náehica éma. ⁶⁻⁷ Te namuri ena nasimutuqueneana, etiarihivare éti apanava. Tíchuhahéhivare ema Viya, machanerayarehi ema Machicha Jesucristo, mavaraha tauri eta ecaemataneasiraya éma. Puiti nucajurehe eta juca nucartane emutu eti nuchamuriana ecavasanahi te avasare Roma, máemunaruqueneanahi ema Viya. Nuvaraha macatajicahehíni ichape ema Tata Vicaiyaquene, émapa ema Viáquenu Jesucristo; náijaracahéhíni táurivaina eta epanereruana.

Ema Pablo mapanerechaipa tiyanayare te Roma

⁸ Núti, tétavicavahi eta nucunachirahi ema Viáquenu Jesucristo, nuhasulupayachahi ema Viya íchavenehi emutu éti. Namutu ena achaneana te avasareana téchajisiaheanahi eta yátupirariipahi éhica ema Viya. ⁹ Núti nuvapiNAVahi eta nucaemataneasirahi ema Viya, eta nucametarairuirahi eta máimiturapiana ema Machicha Jesucristo. Ema Viya tímararacanuhi eta néñamiravahi eyehe éti. Núti, tamutu sácheana te nunarasirana, te néchepusirana, nuyaseuchahehi me Viya, máijaracahehíni eta iúriváinahíni éti. ¹⁰ Nuyaseuchavahivare eta máisapiranuínahíni nítujisiravainahíni nupaipiuchahe. ¹¹ Ichape eta nuvarairahi nímahahe, nímicatacahehíni eta tajurusiraya eta iáchanevana apaesa muracaquenénapaini eta éhisiraya ema Viya. ¹² Éti apanava ímicatacanuhíni. Vétumejiricacahivaréni eta véhisirahi ema Viáquenu.

¹³ Nuparapenaveana, nuvaraha numetacahe apaesa echa. Ichapemurihi eta nuvarairahi níteca nímahapanaha. Puíticha, vuíchahasera nítujicava. Tijuricati nétupicavahíni eta nítesirainahíni eyehe, natirihichuhupucaini nucajimuyacavahíni eta nanerejisiravainahíni náehicahíni ema Viáquenu, tácutihíni te nupaicainapa te apana avasareana. ¹⁴ Taicha ichape eta néñamiravahi núti eta nucatuparahairahi nucametarairuirayare nayehe namutu ena achaneana te ichapeana avasareana énapa ena tíávihana te vámahiana,

ena tiávihana te isanítiana. Nájina nunerejiruimahi. Namutuyare numeta-cavaca: ena cráyanana rícoana énapa ena páureana. ¹⁵ Tacahe, núti nutsere-reacavahi eta nupai piuchiraheya te iávasa Roma, nuvarairahi nímitucahe eta máechajiriruva ema Viya tayehe eta véhiruhi.

Vijacapacareipahi mayehe ema Viya táichavene eta vicasiñavairahi mayehe

¹⁶ Núti nuvavinavahi eta nímitusirahehi tayehe eta véhisirahi ema Cristo. Tájiná vahi nutsirihahini, taicha tétavicavahi eta macasiñacarevahi ema Viya máitauchayare tamutu eta macuchucuirahavi. Éma, tétavicavahi eta mavarairahi nacasiñavahini ena israelítana eta mayehe, énapa namutu ena apamuriana achaneana. Tétavicavahi eta máitupajijiasiravahi máitsiva-chinahi eta náitaresirana, tamutupa arairuhi máicha. ¹⁷ Taicha ema Viya máimerecaripa eta vijacapacarevahi eta mayehe vimutu viti vicasiñavanahi mayehe. Tájinapa vácamunuhini. Tarataripa eta vicasiñavairahi mayehe. Tásiha, éma ticuchucuhahaviripa. Taicha eta Sagrada Escritura, ani tacahehi eta táechajiriruvahi: “Nácani ticasíñavanahi eta me Viya, tijacapacareanahi, máichecuarauireyare eta náitaresiraya táicha”.

Ticaviurevana namutu ena achaneana táichavene eta nájecapiravana

¹⁸⁻¹⁹ Acane ema Viya manacasamurechahi ena achaneana eta matiarirahiri éma. Manacasamurechahivare eta máicuñasiraya namutu ena téjecapavanahi, máurirahanahi. Yátupihí eta nacaicuñairayare táichavenehi eta namasuapirahi eta yátupiqueneana, váhivare návarahahini náinajicahini eta navainarajivana. ²⁰ Máimahasihinéni ema Viya Eterno eta viyehe, véchahisera eta matiarirahiri, taicha tamutu vímaha eta máepiyaruanahi, étaripa eta apaquehe éta pa eta tatiaririqueneanahi. Émarichuhi ema Viya téchapajiricahi tamutu eta táepaniravahi eta juca apaquehe, puíticha eta juca víávacurehi. Étara vímatiarahi eta matiarirahiri ema máitupajijiaruvaquenehi. Énasera ena achaneana, vai návarahahini nacasiñavahini eta mayehe. Éta pa naviurevahi éna. ²¹ Tamapurujihisera eta náimatirahi ema Viya, vahi návarahahini nasuapahini; váhivare napicauchahini. Váhivare nahasulupayachahini éma. Tétavicavahi eta tájecapiravahi eta napanereruana. Étachucha napanerechahi eta tájiparacana. Muracasamureanahivare. ²² Ticasíñavavaicanahi taicha tímijachavanahi títupajijiacavana. Tétavicavahisera eta namaiturerevanahi. ²³ Vaipa najirauchahini ema Viya máepenacacahi. Váipavare mapicauchacarehini nayehe. Tásiha, náemitisicaípa éma. Nasapihapa najirauchahi eta nasiñarajiana achanemirana matumerairahanahi náipunechucha ena achaneana. Tamutuchucha nacasiñarajipahi cáyurepuca, quicharepuca, sáraremirapuca.

²⁴ Tacahe, eta máimairahi ema Viya eta náichirahi eta júcana, máisapapa éma. Máinajiacavacapa. Puíticha navaraharichucha tímijanavana naicha eta natuhusivana titsiriacareanahi. Tavayuacahivare eta najamuraraivana tamauriqueneana. Tétavicavahi eta namaeperajisiracacahi. ²⁵ Tétavicavahivare eta náepuirahi ema Viya, émayarehi najiraureyarehini. Tasapihapa téjecapavanahi, eta náimijachirahi tíuripana eta najirauchira eta nasiñarajiana náepiyaruanahi. Tásiha, náemitisicaípa ema yátupiquenehi. Jéhevarequenehi máichecuarauireyarehi eta majirauchacareva. Amén.

²⁶ Eta tacahe, ema Viya macaerajicavacapa. Vaipa mávarahahini máemechavacahini. Máisapapa náichahi eta navarahaqueneanahi. Tásiha,

tétavicavahi eta náichaqueneanahi. Nararihi ena esenana, énjacacapa náichacacahi eta napecaturana. Vaipa nácomesahini ema ajaira. ²⁷ Énaripa ena ajairana, nararihivare énjacacahi náichacacahi eta pecatuana. Vaipa nácomesahini esu esena. Navayuchaipa eta najamurachiracacahi. Váhiquene nátsirihahini. Táichavenehi eta náejecapiravahi, énjavipa tímitaequenehavana tayehe eta náicuñayare.

²⁸ Ena nani, ichape eta nacaerajisiravahi eta me Viya. Vaipa návarahahini náesenicahini éma. Váhivare návarahahini napanerechahini eta táuriqueneana. Tásiha, ema Viya máinajiacavacapa, vaipa émainahini máechavacahini. Máisapapa tímiyanavana eta náichirahi eta tájiparacana tamauriqueneana. ²⁹ Tétavicavahi eta náepiyaresirahi eta napecaturana tamauriqueneana: Navehahi esu esena apayena. Ena amaperuana náichahi eta natuhusivanahi. Téharahiana nayehe nácani matapiravareanahi. Tamutupa navaraha nacayehe, cáetemarahiana, ticapinarurahiana, ticapahiana, tipiararecana te tise mana, tivayurecana, sémarairhiana, téchejihiana. ³⁰ Tíñemahi eta náechejisirana nayehe ena apana achaneana. Nacatichavare ema Viya. Tiácapaemarahiana, cájamuravana, píncanillana, tisiñavavairicana. Tisipanerehiana eta náichirayare eta apana pecatu navarahaqueneana. Masupajirairahanavare nayehe ena ticachichana. ³¹ Tímijachavanahi tétupicavana eta náichirahi eta tamauriqueneana. Tivayarahiana eta náechajirisiravana. Vahi témunarahiana. Váhivare tiperdonarahiana, nájina najapanuquenéna. ³² Náechahinéni éna eta tamaurivahi eta júcana me Viya. Náechahivare éna, eta táimicapacasiravacayarehi, tímiyanavanarichuchasera eta náichirahi. Náimiquipaicahi nácani apamuriana. Émasera ema Viya máitachayarehi eta náicuñayare.

2

Ena Viya titupiruvahi eta máitachirayarehi eta náicuñayare

¹ Étiarhisera éti ímijachahi tájina eviurevaimahi eta vahi ácutimahi ena apamuriana máimatirahanahi ema Viya. Ímijachavahi tájina epecaturaina. Éti ecaecahivacahi ena tíchanahi eta tamauriqueneanahi. Váhiserá étupicavahini eta ecaecahirahi, taicha étirichuhi nacutiqueneanahi eta íchaqueneana. Énerichuhivare eti ecaviurevahivare. ² Vítí véchahi matupiruvahi ema Viya eta máicuñasiravacaya ena tíchanahi eta juca tamauriqueneana. ³ Étipa, éjecapavahi eta ímijachirahi ticaitcaheyare eta ícuñayare, eti ícharahiana eta tavasiqueneana ecutirichuhinéni ena ecaecahiqueneana. ⁴ Émasera ema Viya, tétavicavahi eta máurivahi eta eyehe. Vahi maícuñacahevanehini. Ticamichahehi, ticuchapahehivare, mavarairahi éneuchavahini eta mayehe, ínajicahini eta íchira eta tamauriqueneana. Tásiha, vahi ecuemepurureca eta máurivahi eta eyehe. ⁵ Taicha táíñehiqueneyare eta ícuñasamiyare éti, te vahi ecueneuchava, ínajicavare eta tamuracavahi eta esamureana. Taicha evayuchapaichucha eta ecurumutusirahi eta etapiravana. ⁶ Taicha éma, matupiruvahi eta májjarasirayare eta táitsivayare eta víchaquenepachu. ⁷ Vitiripa viti machanerana ema Viya, tíjaracahavinapa éma máíchecuaraquireyare eta vítaresiraya, taicha vivaraha puiti vicurisamurechaya éma, vímiyanavaya eta vivapínairavayare vicha eta táuriqueneana. Vicuchapavaya

eta visiapiraya eta te majaraivahi, vicunachacareya mayehe, máichecua-raquireya eta viúricacarevaya. ⁸ Muracainapasera eta máicuñasiravacaya namutu ena masuapajirairahanahi énaripa ena ticatianacanahi eta yátupiqueneana, tasapihahi náuricahi eta tamauriqueneanahi. Navayucharipa eta náimiyusemasirahi ema Viya. ⁹ Ichape eta nacatajivairaya, týahahacavayare namutu ena tíchanahi eta juca tamauriqueneana. Ticuticacanayare namutu eta náicuñayare, ena israelítana énapa ena apavasanana. ¹⁰ Étiserá eti íchanahi eta táuriqueneana, tíjaracahénapa ema Viya eta iávihaya te majaraivahi. Tétavicavaya eta ecunachacarevaya mayehe. Tinaracainavarepa eta epaneresiranainihi. Ecuticacaya emutu eta iúricacarevaya. Eti israelítana, vahi ecachuricaimahi ena apavasanana.

¹¹ Ema Viya vahi manerejicaimahi ena máicuñaruanaya. Ticuticacanayarehi máicha. ¹² Nácani máimatirahanahi eta mavanairipiana ema víyahaini Moisés, ticaicuñanayare. Énerichu nácani náimatihínipuca, tavetijinapa ticaicuñanayare taicha vahi nasuapahini. ¹³ Taicha vahi tijacapacareanaimahi mayehe ema Viya nácani vahi náitauchahini eta nasamaqueneanahi. Tijacapacareanayaresera nácani títauchanahi típicauchanahi eta vanairipiana. ¹⁴ Nararihivare ena tinerejicavanahi ena apavasanana, váhinéni náimatihini eta vanairipiana, nasapihasera natupiruvahi te nasamureana eta náichirahi eta táuriqueneanahi, taicha yátupihí eta nasuapirahi eta manacasamurechaquenehi ema Viya. ¹⁵ Éna, náimerecahi eta manacasamurechirahi ema Viya eta vanairipi te nasamureana. Énajivaya tisamavana te napanereruana eta táurivahi eta náichaqueneana, éta ticatiuchavacahi. Te téjcapavanapuca, tisamavanahivare eta tamaurivahi eta náichaqueneana. Tásiha, napicahi eta náicuñayarehi táicha. ¹⁶ Járajapa eta sáchezare, ticayaseserehianainapa namutu ena achaneana te mamirahu ema Viáquenu Jesucristo. Éma, máimatiya tamutu eta náichaqueneana tayumurrevanahi. Étarichuhi eta numetarapihi te nucametarairupa.

Éna israelítana, ena ticatuparahainihi eta vanairipiana, váhiserá náitauchahini

¹⁷ Étiserá eti israelítana, ímijachavahi yátupihí ítaucha eta vanairipiana, ecunachavaipahi mayehe ema Viya. ¹⁸ Ímijachahivare ítuca eta mavarahaqueneanahi ema Viya. Énerichuvare eta vanairipi éhiruhi ímitucahehi eta enerejisirayare icha eta táuriqueneana. ¹⁹⁻²⁰ Tétavicavaipahivare eta ecunachiravahi taicha ímijachavaripa ecaturaraha eta ímitusiraya ena apavasanana apaesa náesenicahini ema Viya, náimatiyareva eta máechajiriruvana, náinajicayareva eta napecaturana, váipavare nanasimahi eta te timapicu. Ímijachahivare ímatiequeneha tamutu eta vanairipiana, ítamuturusirahi tamutu eta tayeheana yátupiqueneana. ²¹ Éti evarahahipuca ímitureca. Tituparacahéhisera étivaya ítaurahi. Éti, ímiturecahi vahi nacuamereca ena achaneana; étiserá epanerechahi eta íámeresiraya. ²² Tacutiquene váhivare iúrica nacaesenarahini ena eparajairavana; étiserá epanerechahi eta ecaesenaraya. Ecatichavare eta nasiñarajiana; étiserá matsirairahahehi eta evehairahi eta tájaracasiana eta nasiñarajiana. ²³ Ecunachavahi eta ímijachiravahi ítuca eta mavanairipiana ema Viya; étiserá tamutu sácheana íacatayajicahi eta mavanairipiana. Tétavicavahi eta emapicauchirahi éma. ²⁴ Ani

tacahe eta Sagrada Escritura: “Ena achaneana vahi napicauchahini ema Viya íchavenehi éti israelítana” tacahepa.

²⁵ Eti ecunachavaipahi eta israelítairahehi. Tacamunuhisera eta ítauchirainahini eta vanairipiana. Taicha eta juca emaitauchirahi, tímicutijiricavaichucha vahi étinahini israelítanainahini. ²⁶ Ticachuricaheanaripa nácani apavasanana, nasapihaipa náitauchahi eta vanairipianahi. Ema Viya máimahahi eta táurivahi eta náitauchirahi, váhineni israelítanainahini éna. ²⁷ Ena apavasanana títaurahianahi tayehe eta vanairipiana, éna tiyaseserecanainapa eta ícuñayare emutu eti emaitauchanahi, émeपुरurecavaipahi israelítairahehi, étapa eta ecaravahuirahi eta vanairipiana. ²⁸ Váhivare étaimahi ecunachacarevaya eta ecamarcairahi te íáquehe eti israelítana. ²⁹ Nácanisera yátupiquenehi eta nasuapajiraiva, jéhevare ena yátupiqueneanahi israelítana. Vahi tácomesaimahi ticamarcana te náqueheana, taicha éna yátupiquenehi te nasamureana námahi eta nacamarcairahi eta machanerairavacahi ema Viya. Vahi étaparacainahini eta nacaravahuirahipuca eta vanairipiana, étainapapucaini nacunachacarevainahini nayehe ena achaneana. Eta ticamunucarehi eta náitauchirayare eta mavanairipiana ema Viya. Étapa nacunachacarevaya eta mayehe.

3

Ena israelítana tímijachavanahi nacarichu ticunachacareana

¹ Eti nujaneeana ímijachavaipa ecunachacarehi taicha eta israelítairahehi, ecamarcairahivare te íáquehe. ² Jéhesare, jararihi eta ecunachacarevahi, máicha ema Viya. Éma, matuparacavacahi ena víáchucanaveanaini eta náimituresirahi eta yátupiqueneana máechajiriruvana, vítipa viti námariqueneana. ³⁻⁴ Tayanapane natiarihihi ena vijaneana vahi náitauchahini eta natuparahahi, émasera ema Viya, váhiquene títavaimahi eta máitauchiraya tamutu eta májararuvanahi eta nayehe. Taicha tétavicavahi eta máitauravahi éma. Tayanapanepuca natiarihi ena achaneana éna náepiyahirahi, émasera ema Viya máitauchayare tamutu. Eta Sagrada Escritura, ani tacahe: “Tayanapane ena achaneana vahi navarahahini nasuapa eta pítauravahi, píti Tátachicha, tamutu sácheana pímerechahi píti eta pítauravahi. Tayanapane natiarihi náimijachahi vahi tátupiruvahini eta píchaqueneana, tétavicavahisera eta pitupiruvahi te tamutu” tacahepa. ⁵⁻⁶ Vimutu vímati tétavicavahi eta majapanuravahi ema Viya. Németeacasera etiarihi eti ímijachahi tíapajucavayarehi eta macunachacareva taicha eta esipeaturairavacahi. Ímijachavavare vahi tátupiruvahini eta masemairahi eta ecapeaturairahi. ¡Tétavicavahi eta éjecapiravahi! Ecuti ena achaneana mapanererureana. Ema Viya, tatuparacahi máicuñacavacayare namutu ena téjecapavanahi, taicha tétavicavahi eta masantovahi. ⁷⁻⁸ Ímijachavahi tísapacarehi eta épíyahiraiva, taicha ímijachavahi títametacahe eta yátupirahi eta tatupiruvahi eta máechajiriruvana ema Viya. Ánipapuca tacahe eta epanereruana: “Ema Viya ticajare tíjapanurahi. Tacahe, tíapajucavayare eta macunachacarevahi éma, taicha táetaviuchayare eta majapanuirahavi eta máimairainapa eta vivayuchiravahi eta vivainarajivana. Tásiha, vahi tátupiruvahini eta mavarairahi tícuñacahavi, taicha tíapajucava eta macunachacareva vícha, ¿masi?” ecahepuca eta epanereru. Natiarihivare ena tépiyaequenehahavi náimijachahiji tacahe eta

vímiturapi viti apóstoleana. Muracayaresera eta náicuña namutu ena tacahehi eta napanereruana.

Vimutu viti achaneana vicaviurevahi eta me Viya

⁹ Eti nujaneanana, vahi ecuimijachava viti israelítana viúripanahi nayehe ena apamuriana achaneana. Tájinaquene viúrivainahini te mamirahu ema Viya. Taicha vímatiequenehapa eta vimutuirahi vicaviureva me Viya viti achaneana, viti israelítana énapa ena apavasanana. ¹⁰ Eta Sagrada Escritura, ani tacahe: “Nájina náurihini, émanainahipucáini máurihini, ésunainahipucáini esena súrihini. ¹¹ Nájina nájina émajivainahini náimatihini ema Viya, váhivare navaraha náesenica ema Viya. ¹² Namutuhi téjcapavana, namutuhi vare táquipacahi eta tamauriqueneana. Nájina náichahini eta táuriqueneana, émanainahipucaini máichahini. ¹³⁻¹⁴ Tíñemahipi eta náechejirisiravana. Tétavica-vavare eta navayuraivanahi. Éna nacuti eta quichare téchurahi, tétavicavahi eta nacaetemaraiva. Náematanechucha namaldicióncha nácani apamuriana. ¹⁵ Apaesarichu nacamunu navarahaipavare ticaparecana. ¹⁶ Sirujiana eta náitaresirana, ticaetemarecana. ¹⁷ Vahi natanucaimahi eta náurivainahini nayehe ena apamuriana. ¹⁸ Tájina vahi napicauchaimahi ema Viya” tacahepa eta Sagrada Escritura.

¹⁹ Nujaneanana, eti ímijachavaipapuca vahi étinahini táechajisiha eta Sagrada Escritura. Téchajisihahehisera, taicha eti iávacuhanahi eta vanairipiana. Emutuhi ecaviurevahi. Te jena sácheyare, vaipa ecatiuchavaimahi. Ematinainaripa emutu taicha eta eviurevanahi. Táurica eta ecaicuñairayare emutu. ²⁰ Natiarihipucasera nácani tímijachavanaripahi tijacapacareana taicha navarahainapa náitachaya eta vanairipiana. Váhiquenesera tijacapacareanaimahi me Viya, taicha vahi étaparacaimahi eta náitachirahi. Taicha eta vanairipiana, tímimatichahavichucha eta vicapecaturairahi.

Vijacapacarehi mayehe ema Viya táichavenehi eta vicasiñavairahi mayehe ema Machicha Jesucristo

²¹ Puítisera, ema Viya tímimatichahaviripa eta vijacapacarevayarehi eta viúchucuiraya. Vahi étaparacaina eta vivarairahipuca vítaucha eta vanairipiana. Tanasiqueneripa eta Sagrada Escritura, táechajisihaipahi eta máitecapiraya ema ticatiuchahaviya, vijacapacareya máicha. ²² Eta tacahehi puiti, yátupihí eta vijacapacarevahi vimutu viti vicasiñavanahi mayehe ema Jesucristo. Ema Viya vahi manerejicaimahi nácarichuhini ena tíuriana. Váhivare máepuruimahi ena achaneana tisipecaturanahi. Eta nacasiñairavahi eta mayehe, majacapavacahi namutu. ²³ Taicha yátupihí eta vicapecaturairahi vimutu. Vimutu véchuriaca eta viúrivana, vijacapacaréni me Viya. Nájina émanainahíni mátipuruhíni. ²⁴ Étasera eta máemunasirahavihi ema Viya, tijapanuhavihi. Tijacapahavihi táichavenehi eta vicasiñairahi ema Machicha Jesucristo. Émapa tivachachinahavihi eta vitapiravana táichavenehi eta vipecaturana. ²⁵⁻²⁶ Ema Viya, tétavicavahi eta matupiruvairahi. Vahi macamichaimahi ena téjcapavanahi te machacaya. Tásihasera, tijapanuhavihi. Májararecahi ema Machicha eta mavachachirahi eta vipecaturana, vímicapacahi éma. Eta vicasiñaira ema Jesucristo, macapahahi eta téjcapiravanahi vipecaturanahi. Tásiha, vijacapacarehi mayehe ema Viya.

²⁷⁻²⁸ Tacahe, puiti visamaripahi eta majacapirahaviripa ema Viya, étachucha tíchahi eta vicasiñairahi ema Jesucristo. Vahi vétupicavahini eta

vicasiñavavairisiraahi eta vítauchiraipa eta vanairipiana. Váhiquenevare étaparacaina.

²⁹⁻³⁰ Vahi ácarichuimahi eti israelítana ejacapacarehi me Viya. Énerichuvare tijacapacareanahi namutu ena apavasanana ticasíñanahi. Tijacapahavihi ema Viya vimutu viti vicasiñavanahi eta mayehe. ³¹ Váhivare ecuimijacha nútinahipucaini nímitucahe vaipa tasuapacarehni viyehe eta mavanairipiana me Viya. Viti véhicanaahi ema Jesús, táitusiava vicarichuhi virataha vítaucha eta mavanairipiana ema Viya. Vahi vínajicaimahi.

4

Vicutiyarehi ema víyahaini Abraham eta macasiñavairahi mayehe ema Viya

¹⁻² Németeaca etiaríhi eti evarahaipa échajisiha ema viáchucaini Abraham. Evaraha ecunacha eta macaemataneasiranahi ema Viya, ímijachirahi éta tíchahi eta majacapacarevahi me Viya. Ímijachahivare táuriha eta macasiñavavaisiravapuca éma. Numetacahesera: Éta majacapacarevahi me Viya, vahi étainahini táichahini eta macaemataneasiraahi ema Viya. ³ Eta Sagrada Escritura, ani tacahe: “Ema Abraham, tétavicavahi eta macasiñavairahi me Viya. Eta tacahe, tijacapacaréinehi me Viya” tacahepa.

⁴⁻⁵ Tiuri puiti, viti achaneana, te vicaematanerecahi, tatuparacahi ena vicaemataneyeruanahi eta navachachirahaviyarehi. Vahi tíjaracasichahivianamahi eta najapanuirahavihini. Émasera ema Viya tíjapanuhavihi, tíjacapahavihi táichavenehi eta vicasiñavairahi eta mayehe. Vahi étaparacaimahi eta vicaemataneasiraahi. ⁶ Énerichuva ema víyahaini David máéchajisihahi eta náuricacarevahi ena ticapecaturarahiana eta majacapiravacahi ema Viya, tájina étaparacaina eta nacaemataneasiraahi. ⁷⁻⁸ Ánipa macahehi: “Tétavicavapa eta náuricacarevahi nácani maperdonachaqueneanahi ema Viya eta napecaturanaini, tíjacapahavihi tímicutijiricavainehi tacuijahini véjecapiravainahini” macahepa.

⁹ Tacahe, eta juca viúricacarevahi, vahi vácarichu vícatuparahahini viti israelítana. Énerichuvare tatuparacahivare ena apavasanana. Vécharipahi eta majapanuirahi ema Viya ema Abraham. Tacarichuhi eta macasiñavairahi, majacapahi ema Viya. ¹⁰⁻¹² Ímijachaipapuca éti, eta majacapacarevahi ema Abraham tásihaquenehi eta macamarcairaahi. Numetacahesera: Váhiquene étainahi táichahini eta macamarcairaahi éma, taicha te táequenepa eta majacapiraahi ema Viya, mapaenumavahi ticamarca ema Abraham. Éta pa táicutiarayarehi eta majacapiraipa ema Viya táichavenehi eta macasiñavairahi. Émara ema achane máinapuiruhi ticasíñavahi me Viya. Puíticha ema Abraham, émapa vicaiyaquenehi vimutu viti vicasiñavanahi me Viya, víjacapacareipa viti apanava. Tacamunuiipasera vácuticacahini vicasiñavahini mayehe, viti israelítana étipa eti apavasanana.

Ema Viya máitauchayare eta máijarasirahaviya eta vícuchihi táichavene eta vicasiñavairahi eta mayehe

¹³ Ema Viya tíjaracavahi eta máijarasirayare ema Abraham énapa ena mámariequeneana tamutu eta apaquehe, návapairuyare. Máijaracayare táichavenehi eta macasiñavairahi ema Abraham. Vahi étaparacainahini eta masupirainahini eta vanairipiana. ¹⁴ Taicha te tatiaríhinahini eta

náicuchihi ena títauchanahi eta vanairipiana, tamapurujipapucaini eta vicasiñavairahi, tamapurujipavarepucaini eta máijarasiravahi ema Viya eta majacapirahaviyare. ¹⁵ Taicha eta vanairipiana, étachucha támaparaucha eta náicuña ena téjecapavanahi. Tásiha, vimutu vicaicuchiayahini eta vícuña, taicha vimutu véjecapavahi*.

¹⁶ Ema Viya, tétavicavahi eta majapanuraivahi. Tásiha, yátupi máitauchayare eta máijarasiravana nayehe namutu ena mámariéqueneana ema Abraham. Vahi nácarichuhini ena téhicanahi eta vanairipiana. Nayeheyareva namutu ena ticasíñavanahivare mayehe, ticutianahi ema Abraham eta macasiñavairahi. Eta tacahe puiti, eta vicaiyairahi vimutu víti ema Abraham te mavahuana ema Viya. ¹⁷ Taicha ema Viya, ánipa maicha ema Abraham: “Puiti nunacaviyare píti nacaiyaqueneyare ena achaneana te camuriquene avasareana”. Tásiha, ema Abraham, ticasíñavahi muraca me Viya eta máitauchiravayare eta máijarasirayare ema machichaya, tayanapane eta mácheruanahi éma, ésupa esu mayena. Taicha ema Viya, tamutuhi máituruequeneha. Ema Abraham ticasíñavahivare eta majacapirayare eta máicuchihi, tayanapane tájinaichaha máimahahini.

¹⁸ Ema Viya mametacavarepa ema Abraham eta macachichairayare, camurianayare ena mámariéqueneanayare. Eta nasimutuvayare, tamutu nacavasayarepahi, camurianayarehi eta návasanaya. Ema Abraham, ticasíñavahi eta táitauchiravayarehi tamutu. Ticuchapavaipa eta máchusirayare ema machichayarehi. ¹⁹⁻²¹ Ema Abraham, ichavicaipa éma, cien año eta mañora. Ésupa esu Sara, ichavicaipavare, macheruhivare. Vaipa náuriahini eta nacachichairayarehi. Váhisera máeñamavahini ema Abraham. Ticasíñavahi muraca eta mayehe ema Viya eta tamutuirahi máituruequeneha eta máitauchirayarehi tamutu eta máijarasiravanahi. Váhivare mapicacaracavahini. Eta macasiñavairahi, tétavicavahi eta macunachirahi ema Viya. ²² Eta tacahe, ichape eta majacapacarevahi me Viya táichavenehi eta macasiñavairahi muraca.

²³ Tacahe, eta vicaravahuirá eta Sagrada Escritura, vímatiequeneha vahi mácarichuhini ema Abraham majacapacarehini me Viya. ²⁴⁻²⁵ Puiti, víti apanava vijacapacarehi me Viya eta vicasiñavairahi mayehe. Taicha ema Viáquenu Jesucristo táimicapacahi eta vipecaturana. Émasera ema Viya macahepucahi ema Machicha te máecari apaesa vijacapacareyarehi mayehe vimutu víti vicasiñavanahi mayehe.

5

Tétavicava eta viúricacarevahi táichavene eta majacapirahavihi ema Viya

¹ Puitiripa vijacapacareipa me Viya táichavenehi eta vicasiñavairahi eta mayehe. Tásiha, tétavicavaipa viúrivahi eta mayehe. Vaipa vipicacaracavahini tayehe eta vícuñayarehini, taicha ema vímicuñaruhi ema Viáquenu Jesucristo, macaepaharipa eta vícuñayarehini. ² Máichavenehi ema Cristo, tétavicavahi eta majapanuirahavihi ema Viya. Tásiha, tijacpahaviripa táichavenehi eta vicasiñavairahi eta mayehe. Tamutu sácheana viúrisamurehi

* **4:15** Ema Pablo te mayeherepi eta máechajiriruvana, ani macahe: “Te táviha tájina vanairipi, nájinavare ticaviurevahini eta nájecapira tayehe”. Étasera eta macayemaquenehi, ani tacahe: “Tatiaríhi eta viviurevahi vimutu, taicha tatiaríhi eta vanairipi te tamutu jácani vicaijuhepuca”.

eta vicuchapiraipa eta vijacapirayare eta vícuchihi visiapirayare te marenaivahi ema Viya. ³ Te tatiarihinapuca eta vicatajvairayare, vivapinavachucha eta vicamichirahi taicha tétumechahaviya eta vímianirava véhica ema Viáquenu. ⁴ Táichavenehi eta vímianirava véhica, vijacaparipavare eta vitumevayare viratahairayare vicamícha tamutu. Tásiha, eta vicamichirahi tamutu, vicuchapainapa eta táitsivayare vícuchihi. ⁵ Tájina tímipanererécahavimahi taicha yátupiyarehi eta vijacapirayare eta vícuchihi. Vicasiñavahi mayehe ema Viya taicha tímimaticahaviripa te visamureana eta máemunasirahavihi máichavenehi ema máijjararuhavihi Espíritu Santo.

⁶ Víti, tájina viviyaimahi eta vicuchucuiraváinahini. Émasera ema Cristo, te tíurihi eta máimairahi, tíjaracavahi tépena víchavenehi víti máurirahanahi, eta macuchucuirahaviya. ⁷ Váhisera tácuticacahini eta visamureana víti achaneana. Vimutuhi véñama eta vítaesira. Téhesera tatiarahinapucaini eta véñamirainahini mácani achane máetaviuchahi eta máuriva, víjaracavapapucaini vépena eta vicatiuchirainahini éma. ⁸ Émasera ema Viya, tétavicavahi eta máemunasirahavihi, tayanapane eta vicapecaturarahirichahanéni. Máijjararecahisera ema Machicha Jesucristo máepeninahavihi. ⁹⁻¹⁰ Tásiha puiti, vijacapacareipa me Viya táichavenehi eta vicasiñairahi ema Jesucristo eta máepeninahavihi. Ichapehinéni eta véjecapiravahi, vimaesenisirahi ema Viya, mavarahahisera éma macaepahayarehini eta vícuñayarehini táichavenehi eta vípecaturana. Eta máepenirahi te crusu ema Machicha, puiti ema Viya tíchuhahavihi vipauchayare éma. Tájina vipicahini eta vívahásiraipa éma. Tásiha puiti, eta vicasiñavairahi eta mayehe, vaipa véñamavahini tayehe eta víuchucuirayare taicha eta máechepusirahi te máecari, eta tímicaecherachahi eta máitupajijiasiravahi eta macuchucuirahaviya. ¹¹ Puiti, tétavicavaipa eta víúrisamurevahi mayehe ema Viya máichavene ema Viáquenu Jesucristo. Tétavicavahi eta víúrivahi mayehe.

Éma Adán tímiaquipaicahavi vimutu. Émasera ema Cristo émapa ticuchucuhaviyare.

¹² Tacahe, ema Adán, ema máinapuiruhi achane tiávapaicahi eta juca apaquehe, éma tinacuchahi eta pecatu. Tásiha, táichavenehi eta pecatu, járajapapa eta vépenira, tavachaequenehi eta pecatu, taicha tímirijicahaviripa tayehe eta pecatu. ¹³ Te tájinaichaha májuchahini ema Moisés eta vanairipiana, tatiarihipahi eta pecatu te juca apaquehe. Étasera tamajinairaichaha eta vanairipiana, vuíchaha nacaviurevahini ena achaneana. ¹⁴ Namutusera ena mámaríequeneana ema Adán tépenanapaipahi taicha mámaparaucharipahi eta mapecatura éma, tayanapanepuca eta napecaturana vahi tácutihini eta mamasuapajiravahi, tayanapanehivare tájinaichaha eta vanairipi májurehi ema Moisés. Éma Adán, émapa ticaetehahavihi. Te táequenepa, márajapainapa ema apana, émainapa tétupiripanahaviyare. ¹⁵⁻¹⁶ Víti, tétavicavaipahi eta visímutuvahi víti vícaicuñanayarehini tayehe eta ecuñaraquí te yucu infierno, étanaichuhinéni eta máejecapiravahi ema víáchucaini Adán. Émasera ema Viya, ichaperinehi eta majapanuirahavihi vimutu, mavarairahi ticuchucuhaviyare máichavenehi ema Machicha Jesucristo. Tamuturipahi macaepahahi eta tasimutuqueneana vípecaturana. Tájina tavachaequenénahini. Tájinavare jácani vícaematanearamahi. ¹⁷ Étanarichuhinéni eta pecatu máejecapiravahi ema émana achane, émaripa ema víáchucaini Adán. Tiámairijicahaviripasera eta vépeniraya

vimutu. Émasera ema Viya tiápajucavaipa eta majapanuirahavihi. Tijacpahaviripa máichavenehi ema émanaquenerichuvare achane, ema Jesucristo. Tijaracahavinavarepa eta arairuyare vítaresirayare vimutu viti vicasiñavanahi eta mayehe.

¹⁸ Eta mapecaturahi ema Adán, yátupi tiámaparáuchahaviripa vimutu eta vicaicuñairaya. Émasera ema Jesucristo, tájina matapiravainahini eta máitaresirahi. Éma, tiámaparáuchahaviripa eta vítaresiraya víti, vijacapacareipa me Viya. ¹⁹ Camurihavihi viti tacaerajiruanahi me Viya, táichavenehi eta mamasuapajiraivahi ema émana achane. Puítisera camurihavihi viti vijacapacareanaripahi me Viya táichavenehi eta masuapajiraivahi ema apana achane Jesús, taicha tájina matapiravainahini eta máitaresirahi.

²⁰ Te táequenepa eta máejecepirahi ema Adán, ema Viya manaquicahi eta vanairipi. Éta tímítucahaviyarehi eta tavayuchiravahi eta vipecaturanahi. Puiticha tiápajucavapaipaicha eta pecatu, émasera ema Viya tiápajucavaichucha eta majapanuirahavi. ²¹ Tacahe, eta pecatu, ichape eta támapaaráuchirahavihi tayehe eta vépenira. Étasera eta majapanuirahavi ema Viya tiámaparáuchahaviripahivare eta vijacapacarevahi mayehe. Tásiha, píjaracahavinavarepa eta vítaresiraya máichecuarquireyare máichavenehi ema Viáquenu Jesucristo.

6

Puiti eta majacapirahavipa ema Viya, vicutuparahapa vitupiruvainapa eta vítaresiraya. Vínajicainapa eta pecatuana.

¹ Tiuri puiti, németeaca etiaríhi eti ímijachaipapuca tíurihi vímíyanava vicha eta pecatu apaesapuca tácaecherapaipa eta táetaviuchirahi eta majapanuirahavi ema Viya. ²⁻³ Váhiquenesera táuricahini vímíyanavahini vicha. Taicha tépaharipa eta tapamisirahavini eta pecatu. Nuvaraha vahi ecuemitisica eta ímitucasivanahi. Eta vicaicachasirahi eta víjarasiravahi véhicaya ema Viáquenu Jesucristo, víurujiacaripa éma. Tásiha, tímícutijiricavaipa vácachanehíni eta máepenirahi, vépenahívaréni víti. Vaipa tárataha tipamicahavi eta pecatu. ⁴ Eta vicaicachasiraipa te une, tímícutijiricavahi vícaecarasíhi, vícachanepa ema Cristo eta máepenirahi. Énerichuvare eta víúchusirahi te une, vícutípa éma eta máechepusirahi te máecari. Tanasiripa eta íchasini vítaresira. Tásiha puiti, arairupa eta vítaresirahi taicha máetaviuchirahi ema Viya eta macemataneasirahavi tacuti eta ichape máitupajijiasiravahi te macaechepucapa ema Machicha. Vaipa táuricahini víchahini eta pecatu.

⁵ Taicha eta víurujiásiraipa ema Cristo, vícutiripahi éma eta máepenirahi. Tásiha, étarichu vícaheyarehi viti apanava eta véchepusirayarehi, vícutiyarehi éma eta máitaresirahi, tájina matapiravainahini. Tásiha víti, arairuinapa eta vítaresira. ⁶ Tacutiquene, eta taurivainíhi eta íchasini vítaresira tacapecaturavainíhi, tímícutijiricavahi te vícaquenureca. Tétavícaivahi eta tacavanarairahavihi, tipamicahavihi eta víchirayarehi eta tamauriqueneana. Puítisera táecarasipa eta íchasi vítaresira, tacutíhi eta náecarairaipema Viáquenu Jesús. Vaipa tipamicahavimahi. ⁷ Taicha mácani achane eta máepeniraipahi, tícheapahi eta macapecaturairahi. ⁸⁻⁹ Puiti vécharipa eta máechepusirahi te máecari ema Viáquenu Jesucristo, tájinapa tímiapéchaimahi máepenahívaréni taicha tájinapa tárataha táimicapachahini. Ene vícahehi víti

eta viúrujasirahi ema Cristo. Vécaraipahi eta tamaurivahi eta ichasihi vítare-sirahi. Puiti, tamutupa ticaitsivahi. Vicutinapa éma eta vítaresirainapa. ¹⁰ Eta máepenirahi ema Cristo, éta tímicapacahi eta vipecaturana. Éma, vaipa tiápechavaimahi tépena. Tamuturipahi. Tásiha, eta máechepusiraipahi, máichecuarquirénapa eta máitaresira te mavaure ema Maiya. ¹¹ Ene ecaheyare éti, écarainapa tamutu eta tapamisirahéni eta epecaturana. Puiti eta ítasesirainapa, macarichu ema Viya ecaematanearya, táichavenehi eta iúrujasirahi ema Viáquenu Jesucristo.

¹²⁻¹³ Vaipa ecuisapa eta tapamisirahe eta pecatu. Váhivare ecusuapa jácani tajamurachaqueneanahi eta iáqueheana, taicha tétavicavahi eta tamaurivahi eta tajamurachaqueneanahi. Tímicutijiricavainapa épenaquene, vaipa échaimahi eta pecatu. Ítarecainapasera mayehe ema Viya, íjararecainapa eta iáqueheana mayehe. Ísapainapa ema Espíritu Santo tipamicahe eta ecaemataneasiraya ema Viya, eta íchiraya eta táuriqueneana. ¹⁴ Eta pecatu, vaipa ticavanarahémahi. Émainapasera puiti ema Viya, tímicatacahénapa eta íchirahi eta táuriqueneana. Énerichuvara vaipa tácamunuhini eta táipicararesirahe eta vanairipiana apaesa vahi ecuquicha eta tamauriqueneana.

Ene ticapecaturarahiana tímicutijiricavahi ena ticaquenurecana eta tapamisirahi eta náichirahi eta pecatu

¹⁵ Puiti, németeaca etiaríhi éti ímijachahi tísapacarechaha eta vicapecaturaira taicha vaipa táipicararechavihilini eta vanairipiana. Étiserá, tétavicavahi eta táejecapiravahi eta epanereruana. Ímipanapa eta majapanuraivahi ema Viya. Vaipa epicauchahini. ¹⁶ Écharichuhi éti, te ímiyanavayarrechuchapuca eta tapamisirahehi eta pecatuana, ecutirichahapuca mácani ticaquenurecahi, tipamicavayarehi eta masuapirayarehi ema máquenu. Ene ecahehi eta esuapiraichaha eta pecatu. Éta tiámaparáuchahehi eta esiapiraya te yucu infierno. Téheserapuca émainapa esuapaya ema Viya, tatupiruvainapa eta ítasesiraya. ¹⁷⁻¹⁸ Nuhasulupayachasera ema Viya eta ínajisiraipa eta tapamisirahénihini eta pecatuana. Puiti tatupiruvaipa te esamureana eta esuapirahi eta véhiruhi ímitucasivahi. Puiti íjaracavainapa ecaemataneaca ema Viya, iávácuharipa eta táuriva eta ítasesiraya. ¹⁹ (Nímicutichinahehi eta juca, taicha vahi máejerarena eta ecaicutiarairaina éta. Nuvaraha yátupina ecaicutiaraya.) Cape eta ítasesirahi, étarichaha íjararecachi eta iáquehe tayehe eta tamauriqueneana, étaviuchahi eta evainarajivanainihini. Puiti íjararecaya eta iáquehe íchayare eta táuriqueneana, táurivaya eta ítasesira. Tacuija tahapapicahe eta ecaemataneasiraya ema Viya.

²⁰ Taicha cape juca ítasesirahi étarichaha tipamicahehi eta epecaturana. Vuíchaha étainahini ecaemataneaca eta táurivaya eta ítasesira. ²¹ Tájinavare ímaequenehahini eta íchirahi eta tamauriqueneana. Puítiserá, tétavicavahi puiti eta etsirihacarevahi tayehe, taicha ímatipa tiámaparáuchahehi eta esiapirayarehini te yucu infierno. ²² Puíti iúchurepa tayehe eta tapamisirahehi eta pecatu. Iávacuhaipa eta ecaemataneasiraya ema Viya. Jéhevare eta iúritaresirayare me Viya, máichecuarquirenapa eta ítasesiraya. ²³ Eta víchirahi eta tamauriqueneana, tacarichu tiámaparáuchahavi eta visiapirayarehi te yucu infierno. Émasera ema Viya mavaraha tíjaracasichahaviya eta vítaresirayare máichecuarquireya, te yátupina eta vicasiñairayare mayehe ema Viáquenu Jesucristo.

7

Viti véhicanahi ema Jesucristo, títavaripa eta tapamisirahavihi eta vanairipiana

¹ Nuparapenaveana, écharichu éti eta yátupirahi tisuapacarehi eta vanairipiana nayehe ena achaneana, étachuchasera te titarecanarichaha. ²⁻³ Tímicu-tijiricavahi súcani esena sucaimaquene. Tatuparacahi ésu sucachaneyarehi macarichuhi ema suima, vahi sucucaecahi éma, te jácani achanerichaha éma. Te suvehapuca ema apana achane, ticapecaturaipa ésu. Téhesera te tépenaipapuca ema suima, ésupa téchinava. Tísapacare suápechava suácaima mayehe mácani suvarahaquenezare suímayare. Vahi pecatuina eta suápechiravayare ticaima.

⁴ Ene ecahehi eti nuparapenaveana. Ema Cristo, máepeninahehi te crusu, macaepaharipa eta tapamisirahénihini eta vanairipiana. Puiti émapa téchahéhi ema Cristo. Ecutiripa esu esena suépenaimaquene te tiápechava ticaima, tásiha apanapa ema téchahi ésu. Puiti mavanaraheripa ema Cristo, ema máechepurequenehi te máecari. Mavarahahi ichapeyarehi eta ecaemataneasiraina eta mayehe ema Viya. ⁵ Taicha cape juca ítairesiraichaha, esupahi eta tavarahaqueneana eta íáqueheana. Te esamapa eta vanairipi tiápajucavahi eta evairárahí ícha eta tamauriqueneana. Tásiha éta, tiámaparáuchahehi eta ícuchihí eta esiapirayare te yucu infierno. ⁶ Puítisera vaipa tapamicahavihini eta vanairipiana. Puiti viúchucurepa eta ichasi vítaresiraini. Émapa vicaemataneacayare ema Viya taicha tépanavaripa eta arairu vítaresira eta mávahásirahaviripa ema Espíritu Santo.

Eta víáquehe tichurucavahi eta tavarairahi vicha eta tamauriqueneana

⁷ Etiarhipuca eti ímijachahi tipamicahéhi eta vanairipiana eta ecapeaturairaya. Váhiquenesera étaina. Vítiripa vahi vímatiequenehavanehini eta tamaurivahi eta vicapecaturairahi, te vuíchaha vímatihini eta vanairipiana. Vuíchahavare vímatihini eta tamaurivahi eta vijamurachirana eta apayehe. Eta vanairipi, ani tacahehi: “Vahi picujamuracha eta apayehe”. ⁸ Téhesera te vímatipa eta juca vanairipi, viápajucavapa vijamuracha tamutu eta vímahaqueneana tájiparacana. Te tacuijahini eta juca vanairipiana, váhirichuhini vicujamurachahini eta apayeheana. ⁹ Eta viámaperuvaichaha apaicape, vuíchaha vímatihini eta vanairipiana. Téhesera te vímatiequenehapa, visamavapa eta tatiarhipa eta véjecapiravahi eta vimaitauchirahi eta vanairipiana. Tásiha, véchapa eta vépenirayare, tatiarirahí eta vícuchihí eta vícuñayarehi. ¹⁰ Tacahe, víti vímijachaipahi viúchucuhayare te vítauchapapuca eta vanairipiana. Tájinchuchasera tájaracahavihini eta viúchucuirainahini. Étachucha tiámaparáuchahavi tayehe eta vépenirayarehi. ¹¹ Téhesera te amahe eta visamure, jararihi eta pecatu. Tavayuarachavipaipa, tacamapurairavahi eta tatiarirahí eta vanairipiana, taicha tavaraha táimicapacahavi.

¹² Nuvaraha numetacahe: Tiúrihisera eta vanairipi, sántohivare, tatupiruvahivare. ¹³ Németeacasa etiarihi eti ímijachapuca vahi tiuri eta vanairipi taicha támapuricahi eta vépenirayarehi. Vahi tacucahe eta epanereruana. Numetacahe: Váhiquene étainahini eta vanairipi támaparauchahavihini eta vépeniraya. Étarichu eta vicapecaturairahi, étapa tiámaparáuchahavihi eta vépenirayarehi. Étasera eta vanairipi tímereuchahavi eta vimaaurivahi víti te visamureana, tétavicavahivare eta vimasuapajiravahi.

¹⁴ Eta vanairipiana tavarahahinéni tímitupiruchahavi. Étasera eta veche máteji, tavayuararuhi eta tavarairahi víchaya eta tamauriqueneana. ¹⁵ Taicha víti váhiquene vímatiequeneha tájahapuca eta vícharacavaya. Vahi véhicahini eta vipanerechaquenehi vivarahaquenehi vicha. Tasapíhachucha víchahi eta vicatichaquenehi vimavaraquenehi vicha. ¹⁶ Tatupiruvahi eta vanairipiana eta tametasirahavi eta vícaicuñairayare táichavenehi eta vípecurana. Tásiha, te víchapapuca eta tamauriqueneana, visamava te visamure eta tamarivahi eta víchirahi, vémechaemachirava eta tametasirahavíhi eta vícaicuñairayare. ¹⁷ Tatiarihi te víáchaneva eta pecatu. Tásiha, váipanéni vítijricavahini víchahini eta pecatu. Étasera eta távahásirahavíhi te visamure eta pecatu, étapa tipamicahavíhi eta víchirayarehi eta tamauriqueneana. ¹⁸ Véchahivare víti eta tamarivainíhi eta táitaresiraini eta víáquehe. Tétavicavahi eta tamasuapajiraivainíhi. Tímicutijricavaipa tichururerecahavihi. Vivarahahinéni vétupiricavahini, váhiquenesera táisapahavíhi eta víáquehe vétupiricavahini. ¹⁹ Te vivarahainipa vicha eta táuriqueneana, vahi váratahaimahi vicha. Étachucha víchahi eta tamauriqueneana vimavaraquenehi vicha. ²⁰ Te víchahipuca jácani vimavaraquenehi vicha, vaipa vítinahini tásihahini eta víchirahi, étapa eta pecatu tipamicahavíhi, taicha tiávahácahavi víti.

²¹ Te vivarahainipa vicha eta táuriqueneana, tasapíhachucha eta pecatu tímiapitaváiricavahí tichejimirauchahavíhi. Eta tacahehi eta víchavaquenevahi. ²² Étasera eta víáchaneva, tétavicavahinéni eta tajamurachirahi víchahini eta mavaraqueneanahi ema Viya. ²³ Jararihísera eta pecatu te amahe eta víáquehe. Ichapemurihi eta táehacacairahi tacanarahi eta paure víáchaneva. Tavaraha tichejimirauchahavi apaesa vahi vícuitauchahini eta mavaraqueneana ema Viya. Tétavicavahi eta táitiasirahavíhi, tímicutijiricavaipa vícaerata.

²⁴ ¡Tétavicavapa eta véjapanuraivasamíhi víti páureana! ¡Tacahehi eta víchararacavahi! Németeaca eta vipanereruanahi víti, ticitimahinepa nájinapa tíratahaimahi ticuchucuhahavi tayehe eta tavayuasirahi eta víáquehe eta pecatu, támirahavíyare tayehe eta vépenira. ²⁵ ¡Mararihísera ema Víáquenu Jesucristo! ¡Macarichu éma marataha ticuchucuhahavi tayehe eta juca tamauriqueneana! Puítiripa núti, ichape eta nuhasulupayachirahi ema Viya. Tétavicavahi eta nuvapinairavahi eta níchirahi eta mavaraqueneanahi. Étasera eta íchasiqúenetataji náquehe, ticavanaranuichucha tayehe eta pecatu.

8

Tíuriyarehi eta vítaresira taicha eta mávahásirahavíhi ema Espíritu Santo

¹⁻⁴ Puítiserá témitiacarípa eta vícuñayarehíni víti víávahácanaípahi ema Cristo Jesús. Eta mávahásirahavíhi ema Jesucristo, tiávahácahavíripavare ema Espíritu Santo. Émapa, ticaepahahi eta tapamisirahavíhi eta pecatu, étapa eta támaparauchirahavíhi eta visiapiraya te yucu infierno. Ema Viya, eta máimairahi eta vimaetumechiravahi, vimaratahairahi vítauchahini eta vanairipiana, mavanecapa tícupaicahi ema Machicha, macaqueheyarehi eta juca víáquehe víti achaneana. Eta májjarasiravahi, macamítiequenehaipa eta tapamisirahavíhi eta víáquehe eta vícapecurairana. Puítí émainapa téchahavíyare ema Espíritu Santo. Véhicainapa eta mavaraquenehi. Tásiha

vínajicainapa eta visuapirainihi eta tavarahaqueneanainihi eta viáquehe tacapecaturarivaini. Émapa tétumechahavihi eta vítauchiraya eta mavarahaqueneana ema Viya.

⁵ Nácánisera nasuapahi eta tavarahaqueneana eta náquehe, étachucha napanerechahi eta náichiraya eta tamauriqueneana. Vítisera viti visupanahi eta mavarahaqueneana ema Espíritu Santo étainapa vipanerechaya eta vicurismurechiraya ema Viya. ⁶ Nácani napanerechahi eta tavarahaqueneana eta náquehe, támaparaucharipa eta nasiapiraya te yucu. Vítisera viti vipanerechanahi eta mavarahaqueneanahi ema Espíritu Santo, viti vítarecayare. Viúrinapa mayehe ema Viya. ⁷ Nácani napanerechaichucha eta tavarahaqueneana eta náquehe, éna macatianaruanahi ema Viya. Taicha váhiquene návarahaimahi nasuapa eta mavanairipi. ⁸ Tacahe, éna étachucha nacurismurerechahi eta náquehe, vahi náitucahini nacurismurechahini ema Viya eta mavarahaquenehi.

⁹ Puítisera éti, eta mávahásiraheripahi ema Espíritu Santo, vaipa étaimahi epanerecha eta tavarahaqueneanahi eta iáquehe. Étapa epanerechaya eta mavarahaqueneanahi éma. Nácani vahi mávaháruanainahini ema Espíritu Santo, váhivare machaneranainahini ema Cristo. ¹⁰ Étisera, eta mávahásiraheripa ema Cristo, tayanapane táicuchirichuhi eta iáquehe eta táepeniraya táichavenehi eta pecatu, étasera eta iáchaneva títarecayarechucha, taicha ejacaparéipahi me Viya. ¹¹ Táichavene eta mávahásiraheripa puiti éti ema Espíritu Santo, ema Viya macaechepucayare eta iáqueheana, tayanapanepuca épenaquenénaripa. Tacutiyahehi eta macaechepusirahi ema Machicha Jesucristo te máecari. Éti iápechavayare ítareca maicha ema Espíritu Santo.

¹² Tacahe, nuparapenaveana, vicatuparahapa eta visuapiraya ema Espíritu Santo. Vaipa étaimahi visuapa eta tavarahaquene eta viáquehe. ¹³ Taicha te étachuchapuca esuapa eta tamauriqueneana tavarahaqueneanahi eta iáquehe, tájinapa iúchucuiyaimahi, ecaicuchihi eta épeniraya. Téhesera éhichahi eta mavarahaquenehi ema Espíritu Santo, ínajicayareva eta íchira eta tavarahaqueneanahi eta iáquehe, ejacapainapa eta ícuchihi eta ítaresirainapa.

¹⁴ Taicha vimutuhi viti visuapanahi ema Espíritu Santo, machichahaviripa ema Viya. ¹⁵⁻¹⁶ Émaripa ema Espíritu Santo timetacahaviripa eta machichairahaviripa ema Viya. Visamavaipa te amahe eta visamure. Éma, vahi tipamicahémahi. Váhivare típcararecahémahi tayehe eta ícuñayarehini. Tímimaticahénapasera eta yátupirahi macachichairahehi ema Viya. Tásiha, ecasiñavaipa eta mayehe ema Viya, émairipahi ecaiyaquenehi. “Tátachicha Nucaiyaquene” ecaheyarehi. ¹⁷ Eta macachichahaviraipa ema Viya, vijacapainapa eta vícuchihi májjararuhaviya. Vicutinapa ema Cristo eta májjarasirahi eta máicuchihi éma. Puiti, eta vicatajivairahi te juca vítaresirahi, vicutihi ema Cristo eta macatajivairahi, tásiha, vicachanéna éma tayehe eta mávihahi eta majaraivahi.

¹⁸ Puiti németeacahi núti, tayanapane ichapepuca eta vicatajivairahi puiti juca sácheana, tájinachucha táichavahi taicha jararihiyare eta ichape táitsivayare, vijacapaya eta ichape víuricacarevaya te majaraiva ema Viya. ¹⁹ Jéhevale, tétavicavahi eta tajamurachacarevahi te táitecapapa eta sácheyare eta vímairaya eta vicuchapaquenehi eta tacaitsivairaya eta viáquehe vimutu viti machichanaveana ema Viya. ²⁰⁻²² Tacutiquene te jena sácheyare

vicuchapaquenehi, tamutuina pa tēmitiacayare eta tēmecatajivachahavianainihi te juca apaquehe. Tamutuina pa arairuyare, tētavicavainapa eta táurivaya eta apaquehe. Vímaha puiti ticatajivanahi tamutu te juca apaquehe: Eta sárareana, ticajumanahi, táepenana; étapa eta sicurecana. Eta tacatajivairahi tacutihi eta sucatajivaira esu súcani esena ticacatiruhahi eta súnasira. Étasera eta arairuyare apaquehe, ticaitsivainapa tamutu. Vaipa pecatupairemahi, tamicauchainevarepa eta majaraiva ema Viya eta viáviyhaya viti machichanaveanahi. ²³ Ema Espiritu Santo máitsivacharipa eta viáchanevana. Vaipa táesachaimahi vicha eta pecatu. Váipavare víchaimahi eta tamauriqueneana. Tásiha, viti, ichaperipa eta vicuchapiraipaicha eta jena sácheyare eta tacaitsivairayare eta viáqueheana. Títauchavainapa eta macachichairahavinapa ema Viya. Yátupinapa mayehahavinapa.

²⁴⁻²⁵ Yátupih puiti eta machichahavirahi ema Viya. Ichapevare eta vicasíñavahi eta mayehe eta vicuchapirahi eta viúchucuírarayare te jena sácheyare. Vácamicha tamutu, vímijanava eta vicasíñavairahi eta mayehe támutu sácheana. Tapaenumavainapa vímahainapa, tájinapa vicuchapaimahi.

²⁶ Énerichuvare, ema Espiritu Santo tímicitacahavihi te tamutu eta vimaratahaqueneanahi. Tavetiji tímicitacahavihi eta vimaitusirahi eta viyaseuchiravayarehi te viyujarasirana. Éma, tiyaseuchahavi te viáchanevana. Viúmitichahi taicha muraca eta vivarairahi eta mayasearuana. Vaipa virataha véchajicahini. ²⁷ Émasera ema Viya máimatih eta visamureana jácani vivarahaqueneana viyaseaca, étaripa eta mayasearapi ema Espiritu Santo. Taicha ema Espiritu Santo máimatih eta mavarahaqueneanahi ema Viya, tásiha tiyaseuchahavihi viti machaneranahi.

Éma Viya mavaraha ticachanehaviyare viti te majaraivahi

²⁸ Vécharipahivare tētavicavahi eta majaneasirahavihi ema Viya vimutu viti vémunacana; éma. Tayanapane vicatajivahipuca, éma tamutuhi tiuri máicha. Títauchavayare eta mapanereruana éma eta viúricacareyarehi eta máichuirahavihi. ²⁹ Acaneripahi eta máimatirahavihi, tinerejicahavipa machichahaviyarehi. Mavarahahi éma vicutiya; ema Machicha Jesucristo eta máurivahi. Tímicutijiricavayarehi viparapeya éma, véchavimurihi eta macachichairahavihi ema Viya. ³⁰ Tásiha, te máimahapa tiuri, tíchuhahavipa viti manerejiruanahi. Eta visuapirahi vipauchaipa éma, tijacpahavipa. Tásiha, tíjaracahavipa eta vícuchihi eta visiapiraya tayehe eta majaraiva.

Tájinaquene ticaerajicahavimahi mayehe ema Viya taicha yátupih eta máemunasirahavihi

³¹ Tásiha puiti, nuvaraha yátupina eta ecaicutiarairaya eta juca: ¡Tētavicavahi eta macatiuchirahavihi ema Viya! Tájina táichava eta nacatianasirahavipuca nácani achaneana. ¡Váhisera nárataha ticapaquechahavianaimahi! ³² Eta majapanuirahavihi ema Viya, vahi mavayuacahini májararecapa ema Machicha eta nacapasirahi víchavenehi vimutu viti. Tásiha, mavetijinapa eta macatiuchirahaviyare puiti te tamutu eta jácani víchavaquenevana. ³³ Puiti tájinapa viviurevaina táimicuñacahavihin viti manerejiruanahi, taicha ema Viya tépachiacahaviripa eta majacapirahavihi. ³⁴ Tájinaquenepa tímicuñacahavimahi taicha ema Cristo máepeninahaviripa, tichavaripavare títareca. Púiticha téjacahi te mavaure ema Viya, téchajirucahaviripa éma. ³⁵ Ema Cristo, tájinaquene vahi máinajicaimahi eta máemunasirahavihi. Tásiha, yátupina eta vicasíñairaina éma. Tayanapanepuca vicatajivahi, váhivarepuca

vicuitucahi vétupirica eta víchavaquenevanahi, vicamichahisera máicha. Te vécuhapuca, te vítajihapuca, vahi vicainajirucahini máicha. Te típícararechavianapuca, te tipanajiricahavianapuca, te navarahapuca ticapacahaviana, váhiquenesera vicainajiruvahini máicha. ³⁶ Te tamutu eta juca, vicuti ena machanerana ema Viya ena táechajisihauenenahi acane eta Sagrada Escritura, ani tacahehi: “Tamutu sácheana ena ticitianacanáhi ema Viya titanucahavianahi viti machanerana, navaraha ticapacahaviyare. Tivapinavanahi eta nacapasirahavihi, ticuti ena ticaparecanahi eta vaca te náichayare eta ichape piesta”. ³⁷⁻³⁹ Váhiquenesera vípicaimahi eta náipicaresirahavianahi. Tétavicavahi eta máetumechirahavihi ema Jesucristo táichavenehi eta máemunasirahavihi. Tájínavare tihapapicahavímahi eta véhisirahi éma. Núti nucasiñava ema Viáquenu eta majaneasirahaviya. Tájínaquene ticaerajicahavímahi eta máemunasirahavihi. Vahi étainapucaini eta vicatajivapuca eta vítaresira, étainapucaini eta vépenira, étainapucaini náipicaresirahavipuca puiti juca vítaresiraichaha, étainahipucaini táimipanererechavíhíni, jácani víchavaquenevaya eta vítaresiraya. Tájínaquene vahi vipicahini eta tipicacareanahi te juca apaquehe, énaínapucaini ena ichapevuriqueaneana mayeheana ángele ema Váinaraji, étainahipucaini eta náííehivanahi. ¡Tájínaquene ticaerajicahavímahi mayehe ema Tata taicha yátupíhi eta máemunasirahavihi taicha víávahácahi ema Viáquenu Jesucristo!

9

Ena israelítana, éna manerejiruanahi ema Viya

¹⁻³ Nuparapenaveana, tétavicavahi eta némunasirahi ena nujaneanana israelítana. Eta tacahe, ichape eta náimipanerechiranuhi nucatisamurehivare, táichavenehi eta namaehisirahi ema Viáquenu Jesucristo. Táetaviucha eta néñamiravahi eta nayehe, nuvarahainehi nijararecavahini nuyannahini núti te jena yucu, apaesa vahi nacuyannahini éna. Énainahini náuríhíni éna mayehe ema Cristo. (Núti nutupiruva puiti juca numetasirahehi. Ema Espíritu Santo, émaripa téchahi tamutu eta nupanereruanahi. Tímismanuhi eta nétupirisirahi eta numetasirahehi.) ⁴⁻⁵ Tétavicavahi eta náuricacarevayahini éna, taicha manerejiruanahi ema Viya, máichavenehi ema náchucaequenéni Israel, mavarairahi ema Viya machichanaveanayarehi. Ichapemuríhi eta macachaneravacahi, máimechirahi eta majaraíva. Máijaracavaca eta matratune eta majaneasiravacayare. Máimimaticahivare eta mavanairipiana. Máimimaticahivare eta náechajisiraya émachuca te nayujarasirana. Mametacahivare eta máitesirayarehi ema ticatiurahiyare nayehe. Ena nani, tétavicavahi eta táurivahi eta náicuchiyarehini taicha manerejicavacahi ema Viya éna máumurivanrichuhi ema Cristo, najaneanarichuhi eta máucupaisirahi te juca apaquehe. Émasera, Víyahi éma. Puíticha émaripa téchahi tamutu. Máitavacacaípa eta vijirauchirahi. Amén.

⁶ Tayanapane eta macatajisiravacahi ichape ema Viya ena nujaneanana israelítana, tamapurujisera, éna namutuyaréni témpururecavana. Vahi návarahahini náehica. Váhísera étainahini táichahini eta mamaitauchirahi eta matratune ema Viya. Nasapihapa namapurují namutuyaréni, vahi machichanaveanainahini ema Viya, táichavenehi eta namasuapajiravahanahi. ⁷⁻⁹ Nuvaraha némechahe eta manerejisirahi ema Viya ena apinana machichanaveana ema Abraham. Matiaríhihi ema Ismael, émapa ema Isaac. Ema Viya vahi manerejicahini ema Ismael, máijarasiravacayarehi eta náicuchihi

ena māmariéqueneana. Macarichu ema Isaac, manerejiruquenehi ema Viya. Eta mametacativahi ema Abraham eta me Viya, ani tacahehi: “Puiti juca cájeyare, níjaracaviyare píti ésupa esu Sara ema echichayare, ticaijareyare Isaac. Núti níjaracayare eta máicuchiyahehi ema Isaac, énapa ena māmariéqueneana” macahepa. Puiti nuvaraha ecaicutiaraya eta juca: Ema Viya máimijarechahi “nuchichanaveana” nacarichuhi ena navaraha najacapayare eta náicuchihi, nasuapirahi eta máijarasiravahi nayehe.

¹⁰ Numetacaheyareva eta táicharacavahi eta macachichairahi ema Isaac ésupa esu mayena Rebeca. Chámeanahi ena náinapureanahi nachichanaveana. ¹¹⁻¹³ Tacahe, vuíchaha náuchucahini ena nani amuyana, tájinaichahavare napecurainahini, táimaticarepahipucaini eta táuriva eta náichaquene. Te tánehipa eta suínasirayare, ema Viya mametacapa esu Rebeca, ánipa macahe: “Chámeanayarehi ena pichichanaveana. Émasera ema tinapucayare tiúchuca, éma, mósoyare mayehe ema máti”. Étapachuhi eta macayemaquenehi ema Viya te Sagrada Escritura, ani macahehi: “Némunacahi ema Jacob, máequenereruhi tiúchuca. Émasera ema Esaú, máinapurehi tiúchuca, vahi núrianaca éma” macahepa. Tacahe puiti, vímatiequenehaipahi eta táicharacavahi eta manerejisiravacahi ema Viya, máichuiravacahivare nácani mavarahaqueneana. Vahi étaparacainahini jácani táurivainahini eta náichaqueneana.

¹⁴ Puiti, vahi ecuimijachahini vahi tétupicava ema Viya eta manerejisiravacahi ena achaneana. Váhiquenesera énéna tácahe. ¹⁵ Ema Viya mametacahivare ema Moisés, ani macahe: “Núti necha mácani nujapanuquenezare” macahepa. ¹⁶ Tacahe, vahi vámutu vácuticaca eta majapanuirahavi ema Viya máichuirahaviyarehi. Éma téchahi eta manerejisiravacahi nácani majapanuqueneana máichuhaqueneanayare. Vahi étainahini eta náimijachiravahi tíchuhacareana taicha eta náurivahíji, napamisirahipuca naicha eta táuriqueneana. ¹⁷ Ema Viya ánvare macahehi eta te Sagrada Escritura mayehe ema rey te avasare Egipto: “Núti nunacavihi eta piávacurehi pirreyvayarehi, taicha nímativi eta pímuracasamurevahi. Nuvarahasera núti nímitichaviyare eta tamutuirahi nurataha nítupajijiasirava, apaesa táimaticare eta níjare te tamutu eta juca apaquehe” macahepa ema Viya. ¹⁸ Tacahe, ema Viya manerejicahi nácani mavarahaqueneanayare máichuha. Máisapahisera ena masuapajirairahana tajurucachuchaini eta namuracasamurevahi.

¹⁹ Németeaca, áninapapuca ecaheyare éti: “Ene tacahe jácani, ¿tájahapuca tacayema eta vicaviurevahi eta mayehe? Taicha vahi véchavahini eta víchirahi eta tamauriqueneana. Émarichuhiníni tíchahavihi” ecahénapapuca éti. ²⁰ Vahi tacucahe eta epanereruana. ¿Vahi epicahini iácapaemachirahi ema Viya? Eta cachapare mátejisi vahi táuricaimahi tácapaemachahini súcani tépiyacahi: “¿Tájaha tacayema pímpipanajicanu eta pépiyasiranuhi, váhiyapa nucunachacarehini eta pépiyasiranuhi?” vahi táichaimahi. ²¹ Esu típuarecarahi, ésu téchinavahi jácani táimahanayare eta suípune, suíchayarehi eta suícarahiyare, tásiha suépiyacavare eta suyehe vásenilla, tacahehi eta suvarahaquenehi.

²² Tatuparacahi ema Viya máicuñacavaneya namutu ena achaneana váinarajiqueneana, máimitaequenehavacavane éna. Tatuparacahivare máimerecavane eta máitupajijiasirava étapa eta masemirahi tayehe eta namaurivahi. Tétavicavahisera eta macayehevahi paciencia.

²³ Vítí apana, ene tacahehi eta táetaviuchirahi eta majapanuirahavihi, máimerecahi eta táichapeva eta macunachacareva. Acaneripahi eta manerejisirahavihi eta vicachaneraya éma tayehe eta majaraiva. ²⁴ Vahi vácarichuhini viti israelítana manerejiruhavihi; énerichuhi eti apavasanana manerejiruhehivare. ²⁵⁻²⁶ Eta Sagrada Escritura májurehi éma víyarahaini Oseas, eta máechajiriruva éma Viya, éma yátupiquenehi eta macasiñacarevahi, ani macahehi: “Núti nunerejicayare níchuhavacayare éna ichapemuriqueneana éna achaneana apavasanana. Tayanapane vahi náesenicanuhini cape eta náitaresirahi, tijacapacareanahisera nuyehé. Ichape eta némunasiravacayare taicha nuchichanaveanayarehi éna” macahepa. ²⁷ Énasera éna nujaneanana israelítana, ánimurianarichuhi éna tisuapanahi eta máichuarapi éma Viya. Nacuti éna ánimuriqueneana náechajisihahi éma víyarahaini profeta Isaías, ani macahehi: “Tétavicavahinéni visimutuva viti israelítana, ánimurihavirichuchasera viti viúchuchuanayare. ²⁸ Éma Viya, vaipa macamichaimahi eta nájecapiravanahi éna achaneana. Tjahúchavayarepa eta máicuñasirayare eta apaquehe. Máijahúchayarehi máítaequeneha tamutu”. ²⁹ Ánivare macahehi éma Isaías: “Muracarinehi eta náquipaisirahi eta víavasa. Te tacuijahini eta majapanuirahavihi éma Viya viti vinerejiruanahi véhica éma, vítaequenehini vimutu. Nájina nánasihini te víavasa. Vicutiyaréni éna ticavasanahi te Sodoma, énapa te Gomorra, máítaequeneruanahi éma Viya, éma tétavicava eta máitupajjiasirava, máituruequenehahi tamutu” macahepa éma Isaías.

Éna israelítana, vahi návaraha náehica éma Jesucristo

³⁰ Nuvaraha numetacáhe eta juca, apaesa écha. Éna apavasanana nasapihahi tijacapacareanahi me Viya, váhinéni náesenicahini éma cape eta náitare-sirahi. Tacarichusera puiti, táichavenéhi eta nacasiñavairahi éma mayehé, tijacapacareanaripahi éna. ³¹ Énasera éna nujaneanana, tímijachavanahi tijacapacareanayarehi me Viya táichavenéhi eta navarairahi náehica éta vanairipiana. Váhisera najacapacarehini. ³² Taicha éna, náemepururecahi éta najacapacarevayarehini me Viya. Vahi návarahahini nacasiñavahini mayehé éma Machicha Jesús. Éna tímijachavanahi étachucha nacunachiavahi tayehe éta náitauchirahi éta navanesiracacanahi. Éta tiviuchahi éta nacatiasirahi muracaquenehi éma Viáquenu Jesús, vahi návarahahini nacasiñavahini éta mayehé. ³³ Éma Viya, éta máechajiriruvana éta Sagrada Escritura, ani macahehi: “Puiti névatacaya éma Nuchicha Cristo nayehé éna israelítana. Nímahaya nájahapuca ticatianacanaya éma, énapa éna ticasíñavanayare éta mayehé. Nácani ticatianacanapuca, énajivayare ticamítequenehavanayare, ticaicuñanayareva táicha. Nácansera ticasíñavanayare éta mayehé éma nuvaneruyare, vahi máinajiacavacaimahi” macahepa éma Viya.

10

¹ Nuparapenaveana, tétavicavahi éta néñamiravahi nayehé éna nujaneana israelítana. Éta nuyaseserepi me Viya te nuujarasirana, nuvarahahi náuchuchahini. ²⁻³ Nucunachavacahi éna éta náetaviuchirahi éta napicau-chirahi éma Viya. Téjcapavanahisera éna éta táichararacavahi éta vijacapacareva me Viya. Éna, tímiuriacavanahi tíurianahi, tímijachavanahi tijacapacareanahi me Viya táichavenéhi éta náitauchirahíji éta vanairipiana. Vuíchaha

náimatihini eta táichararacavayarehi eta najacapacareva eta nacasiñavairaya me Viya. Váhivare návarahahini nasuapahini. ⁴ Taicha ema Cristo macaepaharipa eta tasuapacarevahi eta viyehé eta mavanairipiana ema Moisés. Vaipa étaparacaina eta víuchucuiraya. Tacarichu eta vicasíñavairahi mayehé éma, vijacapacareyare me Viya.

⁵ Émarichuhi ema Moisés, muracahi eta matuparasirahi ena achaneana, ánipa macahe: “Éti, tapamiruanahi eta ítauchirayarehi tamutu eta vanairipiana. Te yátupipuca ítauchahi tamutu sácheana, te tájinapuca eta éjecapiravainahi, tásiha ejacapacarenapa me Viya” macahepa. Nájinasera náratahahini náitauchahini eta vanairipiana. ⁶⁻⁸ Máejererepanasera eta vijacapacarevahi me Viya táichavenehi eta vicasíñavaira eta mayehé. Vahi tácomesahini vitanupanahini ema Cristo te anuma, taicha tíucupauchahaviripa éma. Váhivare tácomesahini vitanupanahini te máecari vicaechepupanahini éma, taicha téchepucaripahi éma. Tacamunuhisera eta vicasíñavairaina mayehé ema Cristo te visamureana. Eta vipiarasiraina eta máijare eta víjarasirava eta véhisirayare éma.

Tásiha núti, eta nucemetarairuirahi, néchajisiha étachucha eta arairu véhiruhi eta majacapirahavihi ema Viya viti vicasíñavanahi eta mayehé. ⁹⁻¹⁰ Eta juca eta nímiturapi: Eta víuchucuiraya viti achaneana, tacamunuhi eta visuapiraina ema Viya eta macaechepusirahi ema Machicha te máecari. Éma, macaepahayare eta vipecurana, te yátupina eta vicasíñavairahi te visamure ema Jesucristo. Tacamunuhivare yátupina eta víjarasiravahi véhica éma. Víchayarehi éma: “Núti níjaracavahi néhicavi, Tata Jesús. Pítipa náquenuvihi, péchanupa píti” vicahepaha.

¹¹ Eta Sagrada Escritura, ani tacahehi: “Nácani ticasíñavanayare mayehé ema nuvaneruyare, tájina náichiraváimahi. Tamutu tíuriyare eta náitaresira”. ¹² Ema Viya, vahi máepurimahi nácani ticasíñavanahi mayehé. Ticuticacayarehi eta majacapiravaca ena israelítana énapa ena apavasanana, taicha émaichuhi ema Viáquenuhi vimutu. Tétavicava eta majapanuirahavihi, ticuchucuhaviya vimutu viti vicasíñavanahi mayehé. ¹³ Taicha ánivare tacahehi eta Sagrada Escritura: “Ema Viáquenu macuchucuhavacayare namutu nácani tipiaracanahi eta máijare táichavenehi eta nacasiñavairahi mayehé” tacahepa.

¹⁴ Tásiha, eta náuchucuhairayare, tacamunu napiaracaya eta máijare ema Viáquenu táichavenehi eta nacasiñavaira mayehé. Táurivaina eta nasamirahi eta námitucasivana. Tacahe, tacamunuhivare eta viyana vipaicayare viti te tamutu avasareana eta vicemetarairuiraya nayehé éna. ¹⁵ Émaripa ema Viáquenu, ichape eta máichuhairahavihi viti visuapajirahiana, mavaraha eta vicemetarairuirayare. Títauchavayare eta tacayemaquene eta Sagrada Escritura, ani tacahehi: “Tétavicavahi eta náurisamurevana ena achaneana eta nasamirahi eta táuriquenehi máichuarapi ema Viya eta majacapiravacaya. Tásiha tíuriyare eta majacapirahavihi viti mavaneruana ema Viya” tacahepa.

¹⁶ Váhiserá námutihini nasuapahini eta juca arairuhi véhiruhi vímitucacenehi. Ema Isaías, ani macahehi te Sagrada Escritura: “Tata Náquenu, ánimurianarichu ena tisuapanahi eta juca nímiturapiána nuvanahiana piyehé” macahepa. ¹⁷ Téhesera te táurihini nasama ena achaneana eta vímiturapiána mayehé ema Cristo, titupiruvanayarehi ticasíñavana mayehé.

18-19 Esamanuchaha. Ena nujaneanana israelítana, tájina naviyahini nayunaca eta namacasiñavairahini mayehe ema Cristo. Nasamapa eta máechajiriruvana ema Viya, taicha te tamutu avasareana tisamacarepaipa. Eta Sagrada Escritura, ani tacahehi: “Tamuturipahi te juca apaquehe ticasamahuhi. Eta máechajiriruva ema Viya tamuturipahivare tacaitatapahihi te juca taquiñacucujana te apaquehe” tacahepa. Náimatipavare. Váhivare návarahahini nasuapa. Eta máechajiriruvanahi ema Viya májurehi ema Moisés, ani macahehi: “Ímaha, eti israelítana. Nasapihaya nujacapavacayare nuti ena apamuriana achaneana, énaripa ena máesenicanurahanahi. Nuvaraha etsirihaini éti, éneuchavayare eta nuyehe” macahepa. ²⁰Jararihivare eta apana máechajiriruvahi, májurehi ema víyarahaini Isaías, ani macahehi: “Núti nímerercaipa nayehe ena nani váhiquenehi náesenicanuhini, váhivare nacayaseseruruhini”. ²¹Ánivare macahe ema Viya: “Tamutuhi sácheana eta nichuiravacahi ena nani israelítana. Tétavacavahisera eta namasuapajiravahi. Vahi návarahahini nachavahini eta nuyehe” macahepa.

11

Ánimurianarichu ena israelítana ena tisuapajirahianahi, macuchucureanayare ema Viya

¹ Esamanuchaha. Nuvaraha vahi ecuimijachaimahi macaerajicavacahipuca ema Viya ena machanerana israelítana. ¡Váhiquene énéna tácahe! Éti ématinuhi nútirichuhi israelítanuhi, mámariequenenuhivare ema Abraham, émpa ema apanavare náchuca Benjamín. ² Eta acane, tétavacavahi eta máemunasirahavihi ema Viya viti israelítana. Puíticha vahi máinjaciachavihini. Échava éti eta tacayemahi eta Sagrada Escritura eta máichavaquenevahi ema víyarahaini profeta Elías. Ani tacahehi eta mametauresiravahi me Viya eta mayujarasirahi: ³ “Tátachicha Nucaiyaquene, ena nani apamuriana nujaneanana israelítana nacapapajicavacahi namutu ena piyeheana profetana nuchamuriana. Puiti navarahivare ticapacanuana. Navetataicapavare eta pipena. Nucarinehi núti nítarecachi puiti” macahepa. ⁴ Tásiha, ema Viya majicapapa, ánipa macahe: “Vahi picarichuhini píti. Nararihi siete mil ena ajairana nujanearuanahi, ticasiñanuanahi. Vahi náisapavahini éna náepuyumirauchahini ema nasiñaraji Baál ena masuapajirairahanatatajiji” macahepa ema Viya. ⁵ Ene vicahehi víti, vahi vámutuhini viti israelítana masuapajirairahanahi me Viya. Vitiarihichaha ánimurihavihi viti manerejiruanahi majapanuquenehavihi. ⁶ Numetacahe: Ema Viya, eta majapanuirahavihi viti israelítana, váhiquene táchavenénahini jácani víchirainahipucaini eta táuriqueneana. Jéhesare, tíjapanuhavihi táichavenehi eta táetaviuchirahi eta máemunasirahavihi. Tájina étaparacaina eta víchirapuca eta táuriqueneana.

⁷ Tacahe, vímaha puiti ena nujaneanana, ánimurianarichuhi ena ticasiñavanahi me Cristo, manerejiruanahi majacapaqueneanahi. Énasamisera ena apamuriana, vahi nacasiñavahini mayehe, muracanaichucha te nasamureana. Étapa tiviuchahi vahi tijacapacareanaimahi me Viya, tayanapane nácani navarahahi. ⁸ Títavacavapai eta táechajiriruvahi eta Sagrada Escritura eta nayehe. Émarichuhi ema Viya ticamitisicavacahi apaesa vahi nacucaicutiara eta máimiturapiana ema Cristo. Puíticha ene nacahehi. ⁹ Ema víyarahaini David, ánivare macahehi tayehe eta Sagrada Escritura: “Ena nani, ticasínavavaicana eta tavayuchirahi eta náimahaqueneana. Ichapemurihi

eta nacapiestarairana náenisiracacana. Ichapevaresera eta náichirahi eta tamauriqueneana. Puiti, Tátachicha, pítsivachayare eta náurisamurevahi. Járjapainapa eta picuñasiravacayare. ¹⁰ Nuvaraha púchuquianaina picha. Vahi nacucaicutiara eta náitaresira. Tacaetipapaicainapa eta tajitacareva eta napsirahi. Tájjinapa nanarasiraimahi” macahehi ema David.

Eta majacapirahi ema Viya ena apanapanenejiqueneana

¹¹ Esamanuchaha. Nuvaraha vahi ecuímijacha tanasiyarehi eta náquipaisirahi ena nujaneanana. ¡Váhiquene énéna tácahe! Púitsera nasapiha ena apavasanana najacapacarehi me Viya, taicha mavaraha máimicatsiriacavaca ena israelítana, apaesa náeneuchavayare eta mayehe. ¹² Puiti tijacacareanahi me Viya namuturipa ena apanapanenejiqueneana achaneana te juca apaquehe, taicha eta náquipaisiravaipa ena nujaneanana. Puiti eti apavasanana, tétavicavahi eta iúricacarevaipa. Jéhesare tiápajucavapanayaresera eta iúricacarevaya éti, étapa eta náuricacarevayare éna, te nachavapa náeneuchava.

¹³ Németeaca ímatinuhi núti eta nucatuparahairapa eta nímitusiraheyaere eti apavasanana. Táitusiava puiti tétavicavahi eta nucunachiravahi eta nucaemataneasirahehi. ¹⁴ Numetacavacahi ena nujaneanana eta yátupirahi eta ejacapacareirahi me Viya, apaesa nímahahini éna, te najamurachayarepuca eta najacapacarevahi éna apanava, ticutiheanayarepuca éti. Nuvaraha nanerejicavahini nácani náeneuchavahini, apaesa náuchuchayare. ¹⁵ Páureanasami éna eta náquipaisirahi. Esapihahi éti apanapanenejiqueneana te juca apaquehe, tétavicavahi táuriva eta ejacapacarevahi me Viya. Jéhesaresera, tétavicavapaini eta tajaraivainahini te visamure te nachavírainahini, náeneuchavapaini éna, náehicapaini ema Cristo. Tímicutijiricavapaini eta navayuchirahi eta náurisamureva ena achaneana te macaechepusiravacaya namutu ena náepenaqueneana tiúrianahi. ¹⁶ Eta natiarahirapa puiti ena nujaneanana tinerejicavanahi téhicana ema Cristo, németeaca namutuyare jácani náehicayare ena apamuriana.

Tacutiquene, viti machaneranahi ema Viya vicuti eta ichape yucuqui. Ema Abraham macutihi eta táquehequi. Viti israelítana mámariequeneanaini vicutihi eta tatavavajiana. Ema viáchucaini majacapaqueneripa ema Viya. Tásiha, németeaca namutuyaréni ena nujaneanana, énerichuvare náeneuchavapucaini nacasiñavahini me Viya te jácani sácheyaere, apaesa najacapacarevarepaini éna apanava. ¹⁷ Puiti ena nujaneanana náquipairuvahi, vuíchaha nasiapahini eta náicuchihi te namuri ena machaneranahi ema Viya. Étipa eti apavasanana, esapihaipa machaneraheripa ema Viya. Tíjaracaheripa éma eta táuricacarequene iávihayarehini te majaraivahi eta náicuchinihi ena israelítana. ¹⁸ Puiti étipavaipahi machanerahehi ema Viya. Nutuparacahesera, vahi ecucasiñavavaica eta ítujsiravahi esiapá tayehe eta náicuchihi ena nujaneanana israelítana. Taicha vahi ecachuriacavacaimahi éna eta iúrivahinéni eta ejacapacarevahi me Viya. Vahi ecuemitisica eta esiapirahi táichahi eta náquipaisiravahi ena masuapajirairahana. Éti máetumechaqueneana ema Viya; vahi étina étumechahini éma.

¹⁹ Váhivaresera ecupanerecha te esamureana: “Yátupi éna máquijicavacahi ema Viya eta namasuapajiraivahi. Tásiha, tinerejicavapi viti, taicha viúripanahi viti eta máimairahavihi ema Viya” váhinéni tácahehini eta epanereru. ²⁰ Tacahe, échapava éti apanava, machu ácutiriana ena

nujaneanana. Éna, eta náquipaisiravahi tímicutijiricahi ticaechuanahi, táichavenehi eta namacasiñavairahi me Viya. Puiti étipa náitsivahi éna eta ecasiñavairahi mayehe. Váhisera ecucasiñavavaica. Ecuneuchava éti apanava. Epicaucha ema Viya. ²¹ Ena nujaneanana israelítana, éna títapucanayarehíni nasiapamuriha ena machanerana ema Viya. Váhisera nacasiñavahini eta mayehe. Éti apanava, tacamunuhivare ecasiñava eta mayehe apaesa esiapahini. ²² Tacahe, ticaecheravapa eta máurivahi ema Viya, étapa eta matupiruvahi. Tétavicavahi eta matupiruvairahi eta náerajisiravacahi ena masuapajirairahana. Tétavicavahivare eta máurivahi eta eyehe, eta ímianiravahi eta ecasiñavairahi eta máurivahi. Nácanisera vahi nacasiñaimahi, macaerajicavacayare. ²³ Tiuri puiti, te náeneuchavapuca me Viya ena nujaneanana, nacasiñavahivarepuca mayehe, éma majacavacayarehi éna, machichanaveanavarepa. Taicha éma, tétavicavahi eta majapanuirahi. ²⁴ Taicha éti cape juca eta itaresira, énerichuvare masuapajirairahahi éti, emaesisirahi ema Viya, tásiha, tájinahinéni ejacapacarevainahini. Esapihasera éti esiapamuriharipa ena apamuriana machaneranahi ema Viya. Ene nacaheyarehi ena israelítana. Éna, te náesenicapa ema Viya, camuriqueneanayarehi ena ticasíñavanaya mayehe. Tisiapanayareva tayehe eta náicuhíhi.

Te namutupa ena apavasanana manerejiruanahi ema Viya, tapaenumavainapa náesenicayare ema Viya ena israelítana

²⁵ Tiuri puiti, nuparapenaveana, vahi nuvaraha ecasiñavavaica eta ítupajijiasirava. Tásiha, nuvaraha numetacahe eta juca tayumururevainihi, máimimatichaquenénuhisera ema Viya. Eta namuracasamurevavacahi ena nujaneanana, vahi tánasimahi. Téhesera námutupa nasiapa ena apavasanana manerejiruanahi ema Viya, napaenumavainapa ena nujaneanana náesenicayare ema Viya. ²⁶ Tacahe, eta nacasiñavaira me Viya, tíuchuchuanayare namutu éna. Títauchavayare eta máechajiriruvahi ema Viya te Sagrada Escritura, ani macahehi: “Nuvanecayare ema Ticatiurahiyare nayehe ena achaneana. Ticavacureyarehi te Jerusalén. Masipahacavacayare ena majaneanana israelítana eta navainarajivana, máitsivachirayareva eta náitare-sirana. ²⁷ Núti nítauchayare eta nutratunehi nayehe eta népachiasiravacayare namutu eta napecaturana” macahepa.

²⁸ Tacahe, ena nujaneanana nacatianacapa puiti eta juca véhiruhi. Étasarepa ítujisiavayare éti. Émasera ema Viya máemunacavacarichucha, taicha manerejiruanahi ena náchucanaveanaini. ²⁹ Taicha ema Viya, tamutu eta máijjaruanahani, vahi máemepururecainahi. Máítauchayarehiva tamutu eta máichuarapiana. ³⁰ Éti acane eta itaresirana, vahi ávarahahini esuapahini ema Viya. Puítisera eta namasuapajiraivahi ena israelítana, ichaperipahi eta majapanuirahahi éma. ³¹ Énerichuvare éna, te jena sáchezare, majapanuvacayarehi éna, tacuti eta majapanuirahahi éti puiti. ³² Taicha ema Viya máimatíhi eta emutuirahi emasuapajiraivahi éti apavasanana, vítipa víti israelítana. Mavarahasera vicuticacayarehi eta majapanuirahavihi vimutu.

³³ Ema Viya, ¡tétavicavahi eta majapanuraivahi eta viyehe, tavayuchahi eta víuricacarevahi máicha! ¡Tétavicavahivare eta máitupajijiasiravahi! ¡Tétavicavahivare eta macachuriasirahavihi eta máimatiequenehairahi tamutu! ¡Matupiruvahi éma tamutu eta manerejirisirahi! ¡Vahi víturuequenehaimahi vicaicutiara eta mapanereruana! ³⁴ Taicha nájina

tímatiequenehaimahi eta mapanereruana. Nájjinavare náimitucahini éma. ³⁵ Nájjinavare nájaracasichahini tájaháinahipucáini, étanainahipucáini máitsirijicavacahipucaini eta máijarasirahi éma. ³⁶ Taicha tamutu eta tatarihiqueneanahi, tacarichu tásihaqueneanahi mayehe, étaripa eta víjararuanahi mayehe, mavaraha táitauchavapaini eta mapanereruanahi táuriqueneanahi. ¡Máitavacacahi eta vicunachirahi éma! Amén.

12

Vicatuparahahi yátupina víjaracava eta véhisira ema Viya

¹ Tacahe, nuparapenaveana, nuvaraha ácaicutiara yátupina eta majapanuirahéhi ema Viya. Eta táetaviuchirahi eta majapanuirahéhi, ecaturarahahi íjaracava yátupina eta iáqueheana étapa eta iáchanevana eta éhisiraina émainachucha ema Jesucristo. Tacutihi eta iámavahuhi me Viya. Jéhesare, tétavivacaya eta ecurisamurechiraya éma tayehe tamutu eta ecaemataneasirana éma. ² Énerichuvare eta itaresirana, vaipa ecuehica eta tayeherepi eta juca apaquehe. Ítsivachapasera eta epanereruana, apaesa támutupa apanainahi eta itaresiraina. Tásiha, ímatisarepa eta mavarahaqueneanahi ema Viya, ítucayareva icha eta táuriqueneana. Ecurisamurechayare éma eta íchira eta tatupiruvaqueneanahi.

³ Núti mayehenuhi apóstole ema Viya. Tituparacanuhi numetacaheyare: Emutu éti, tátupiruva eta epanereruana tayehe eta ítucaqueneana máijararuehanahi ema Viya, apaesa tauri eta ecaemataneasiraina mayehe. Nacuija nacasiñavaica. ⁴ Tacutihi eta víaquehe viti achaneana. Camurianahi eta táunavanahi, táematanepachuhivare. Vahi étainarichuhini eta táitucaqueneanahi. ⁵ Ene vicahehi víti. Camurihavihi, étanaichuhisera eta víaquehehi eta víurujiasiracacahi eta véhisirahi ema Cristo, vímicatcacairahi eta vicaemataneasirahi éma.

⁶ Ema Viya, apanapanenejihí eta vítucaqueneana eta máijarasirahavihi eta vématanepachuyarehi máicha. Tacamunuhisera vahi vicuemepururecava eta vítucaqueneanahi máijararuhavianahi, apaesa táuri eta vicaemataneasiraya. Te tíjaracahavipuca éma eta vítusirayare vicametarairu, vijaneacavainapa, machu vihapapiricahini eta táimiturapiana eta véhiruhi. ⁷ Te tíjaracahavipuca eta vítusirayare vímicataca ena vichamuriana, tatupiruvayarehi te visamure eta vímicatasiravacaya. Nácani náitucahi tímiturecana, vahi nayacujimahi eta náimituresiraya. ⁸ Nácani náituruequenehahi eta náetumechiraya nácani apana, váhivare nayacujimahi. Nácani tíjaracasírecanahi eta náimahaqueneana, tátupiruvayarehi te nasamure eta nacajirahi ena ticamunuvanahi. Nácani cátparahanahi téchapajiricarahianayare, tivapinavanyare eta náitauchirahi eta natuparacasivahi. Nácani tímicitacananahi ena tijapanucareanahi, tíurisamureanaya eta náimicataresirahi.

Eta víurivahi nayehe ena achaneana ticaecherayare eta yátupirahi eta véhisirahi ema Víaquenu Jesucristo

⁹ Nuparapenaveana, yátupina eta émunasiracacaina ena echamuriana. Vahi apimirahemahi, ímijachava eta émunasiracaca. Evapinavaya eta íchira eta táuriqueneana. Épuruyare eta tamauriqueneana. ¹⁰ Tiápajucavainapa eta émunajirisiracacaina eta echamuricacairahi. Ecunachainapa namutu ena echamuriana. Yátupina eta epicauchiracacahi. ¹¹ Étumechavaina eta

ecaemataneasirahi ema Viáquenu. Tavapinava eta esamureana. Tacuija eplujuvavacaina.

¹² Iúrisamurereacavayare eta ejacapiraya eta ecuchapaquenehi. Ecayeheyare paciencia tayehe eta ecatajivairana. Vahi tacuechuquiha eta eyujasirana.

¹³ Ímicatajiricaca ena echamuriana, tayehe eta nacamunuiravana. Tiúriyare eta ejacapiracaca te epaipuchacaca.

¹⁴ Te natiarihinapuca nácani náehahe, napanajiricahepuca, eJapanuyare éna. Eyaseuchaya me Viya eta náuricacarevaina. Váhisera ecuyaseucha jácani náicuñavanéna.

¹⁵ Te tatiarihinapuca jácani tiúrisamurecare nayehe nácani, éti apanava iúrisamureyareva. Téhesera te tatiarihinapuca eta ticatisamurecarehi nayehe nácani, eJapanuvacayare éna, íyahayareva éti apana.

¹⁶ Ecurisamurechacacaya ena echamuriana. Vahi ecucasiñavavairica. Ácuticacahi nayehe ena mánsuanahi, váhivare ecucasiñava eta ítusirahi.

¹⁷ Te tatiarihinapuca náicharacahe eta nacatichirahe, vahi ecuitsicava. Íchayaresera eta jácani táuriqueneanahi nayehe namutu ena achaneana.

¹⁸ Nacuija ecucaticaha. Te natiarihinapuca nacatianacahe eyanauchayare te napena émemunacavayare apaesa vaipa nacucaticaha. ¹⁹ Némunaruqueneana, te tájahapuca náicharacahe, vahi ecuitsicava. Cápachi mararíhi ema Viya, máimahainepa éma téchayare eta náicuñayare. Taicha ema Viáquenu, aní macahehi tayehe eta Sagrada Escritura: “Nímahainepa núti eta táitsivayare. Núti néchahi eta náicuñayare ena ticaviurevanahi eyehe” macahepa. ²⁰ Ánivare macahe éma: “Te pímaha máecuhapahi mácani ticatianacavihi, pénicayare. Te mamaunepahipuca, péscihayare. Eta máimairainahi eta pémunasirahi, ticatisamurevainapa titsirihainapa” macahepa. ²¹ Vahi ecuisapava ísicava eta náichiraheya te táíñehiqueneana. Étumechavasera eta íchiraya eta táuriqueneana. Éta ticaepahayare eta nasemaneva.

13

¹ Éti, emutu esuapajirahiyare nayehe ena tuparairucana, taicha éna manacaqueneanahi ema Viya eta návacureanahi. Nájina émanaina máemunasiricavahini. ² Eta tacahe, nácani tiácapauchavanahi nayehe ena tuparairucana, tímicutijiricavahi nácapaemachahivare ema Viya. Jéhesare, ticaicunayarehi ena téjecapavanaripahi. ³ Taicha ena tuparairucana, vahi étaina tímínacavacahi éna eta náipicararesiraya nácani tíchanahi eta táuriqueneana. Nácanisera ticaviurevanahi, táuricahi tipicanayarehi. Te evarahhipuca iúri nayehe, esuapajirahiya nayehe, tásiha, éna ticunachaheanainapa. ⁴ Taicha ema Viya, émahí macaejacavaca te návacureanahi, náurichayarehi ena achaneana. Téhesera ecaviurevahi, epicayarehi taicha éna vahi támapurujimahi eta nacatuparahairahi. Natuparacasivahi me Viya eta náicuñasirayare ena ticaviurevana. ⁵ Eta tacahe, tavarahaichu esuapajirahiyare nayehe ena tuparairucana, apaesa vahi nacuicuñacahe. Tavetijipa esuapajirahiyare taicha éti etuparacasivahi me Viya. ⁶ Tacutiquene tatuparacahehi eta evachachirayare eta impuesto. Taicha ena tuparairucana, natuparacasivaichuhi mayehe ema Viya, náitauchiraya eta nacemataneasira éma.

⁷ Tásiha, ítaurahiyare te jácani nayaseasiraheana eta cuota étapa eta nayaseasiraheana eta impuesto. Epicauchavare nácani tipicauchacareanahi. Émunacavare nácani témunacacareanahi. ⁸ Nacuija ecantevéya.

Tituparacahe evachachavaneyare jácani entévehi nayehe. Tituparacahavare émunacacayare ena echamuriana. Nácani títauchanahi eta juca náemunasira, náitauchahi eta mavanairipi ema Viya. ⁹⁻¹⁰ Te pémunarahihi píti nayehe ena achaneana piparaepiyanahi ticutiyarehi eta pémunasiravahi píti, vahi pipanerechaimahi picapinaru, váhivare picaparecaimahi, váhivare piámerecaimahi, váhivare pivehaimahi esu apana esena mayena ema apana achane, váhivare pépiyaequenerecaimahi. Taicha nácani témunarahanahi, vahi nacaetemaimahi ena naparaepiyana. Te yátupi eta émunaraivaya, máejerare eta ítauchirayare tamutu eta vanairipiana.

¹¹ Eta tacaheyare eta ítaresirayare. Vaipa véjekaracha eta sácheana. Vahi vímacacaracavaimahi. Vitsecavayahisera taicha viánehipaicha eta jena sácheyare eta máitecapiraya ema véhiruhi. ¹² Eta vicuchapiraipa eta machavirayare ema Viáquenu, tacutihi te vicuchapaipa te jena yati eta tijararahi. Puiti vímahapa eta tajarahiquene. Tásiha, ínajicapa eta íchaqueneanaini te timapicu. Puiti tiápajucavasera eta iúrivana, étapa eta íchaqueneanaina te tijararahi. ¹³ Ímicapicauchavayare eta ítaresirana. Iúrisiyare tamutu sácheana. Vahi ecavahaimahi. Váhivare ímisiapavaimahi nayehe ena ticapiestaranahi. Váhivare túhusihémahi. Vahi tivayuacahémahi eta tájiparacana. Vaipa iúmeharerecaimahi, váhivare ecapinarurahimahi. ¹⁴ Tásihasera, ímereca eta iúrivaina. Ácuti ema Viáquenu Jesucristo eta máurivahi éma. Vaipa ecusuapa eta tajamurachaqueneanahi eta iáqueheana. Váhivare ecupanerecha eta íchiraya éta.

14

Vahi ecucaecahi ena echamuriana

¹ Te napauchahépuca nácani navarahahi tisiapamurihaheana, echamurianayare, vahi ecuepuruvaca. Ejamanuvacasera eta ejacapiraya. Te jácani apaesarichuhi eta nacasiñavairahi mayehe ema Viáquenu, napicauchaichaha eta nayeherepiana ichasiana, vahi ecucapaemachahini éna. ²⁻³ Nararihi ena títuca nanica tamutu eta tinicacareanahi. Nararihivare ena apanahi eta nayeherepi, náimijachahi vahi tiuri nanica eta vaca. Tásiha, máechejirechucha eta nanica. Éna, vuíchaha muracanainahichaini tayehe eta véhiruhi. Eti ítuca enica tamutu, vahi ecuepuruvaca éna vahi tinicanahi eta vaca. Étipa eti máechejirehi eta enica, váhivare ecuepuruvaca ena tinicanahi tamutu. Taicha majacapaquenehevacaipahi ema Viya emutu. ⁴ Vahi ecuimijachavaimahi étinahi échavaca eyaseserecarahi ena machaneranahi ema Viya. Éma, téchavacahi ena mavanaranahi. Máimarahacahi eta táurivahi náicha, macunachavacahi éna. Te váhipuca, émainahi techa eta máemechiravacaya.

⁵ Tacutiquene váhivare ecuepurucaca tayehe eta sache iúrujisiravana eyujarasirana. Nararihi náimijachahi tiúripiana te sávarumuhuana. Nararihivare tiúripianahi nasama te lumincumuhuana. Nararihivare tamutuchucha sácheana tiúrihi eta náimairahi. Étipa échinava eta sache éhiruyare. ⁶ Nácani tiyujarauchavanahi te jena sache, ena navarahahi napicaucha ema Viáquenu. Ena apamuriana, vahi tácomesahini nanerejichahini eta sache, éna apanava napicauchahi ema Viáquenu. Ena nacahehi nácani tamutuchucha nanicahi, eta napicauchirahi ema Viáquenu, nahasulupayachahi éma. Nácansera náepuruhi nanica eta jácani tinicacareana, táichavenehivare

eta napicauchirahi ema Viya, nahasulupayachavare éma. Tamutuhi tiuri naicha.

⁷⁻⁸ Taicha vahi vítijiruváinahini eta vítaresira. Émaripa téchahavihi ema Viáquenu. Émachucha vicaematanearuhi, visuapirayarehi éma te tamutu. Étaripa eta vépenirapuca, váhivare vítijiruváinahíni véchinavahini. Émarichuhi téchahavihivare te tamutu. ⁹ Ema Jesucristo, tatuparacahi eta máepeninahaviyarehi, tíápechavayahivare tichava títareca, apaesa émainapa Viáquenuya víti vítareuanaichaha, énapa ena náepenaqueneanaripa.

¹⁰ Étisera, vahi étinahini tátuparacahehini échavaca eyaseserecarahi ena echamuriana. Váhivare étupicavahini eta épurujujirisiracacahi. Échavarichu eta vimutuirayare vicayaseserehi te mamirahu ema Viáquenu Jesucristo. ¹¹ Ema Viáquenu, ani macahehi te Sagrada Escritura: “Núti acaneripahi eta nítaresirahi; puíticha máepenacacanhivare eta nutiarihirayare. Tásiha, nútirichu nucatuparahahi nuyaseserecavacayare namutu ena achaneana. Namutu tépuyumirauchanuanayare te numirahu. Tímatinuanayare eta yátupirahi núti tituparacanu júesnuhi nayehe, nuti Iáquenu” macahepa. ¹² Tacahe, vimutu émanapachuhaviya vimetaurecava mayehe ema Viya. Éma máimatiya tamutu. Tájina virataha viyumurucahini.

Vahi ecuímiaquipaica ena echamuriana

¹³ Tásiha éti, vaipa ímijachavaimahi étinahí échavaca, eyaseserecarahi ena echamuriana. Táurisera eta ecachanéracacaina. Tasapihasera, te tamutu jácani íchaqueneana, étaviuchaya eta íurivahi nayehe. Tacuijá jácani táimiaquipaicavaca éna ícha. ¹⁴ Núti, eta mavanaranuirahi ema Jesucristo, numetacahe: Tájina eta tinicacareana tamaeperajicahavimahi eta vinisirahi. Nararhisera ena vichamuriana, tépuruana eta jácani tinicacareana, napisirahi eta tamaeperajisiravacayahijí. ¹⁵ Tásiha, nuconsejachahe: Vahi ecuímiyusemaca ena nani, váhivare ecuacapaemachahini tayehe eta jácani tinicacare, machu ímicainajiruchavaca ena echamuriana mavachareruanahi ema Cristo eta máepenirahi. ¹⁶ Máchuvare émechajisiava tayehe eta ímatiquenehi tíuri. ¹⁷ Taicha eta véhiruhi ema Viya, vahi étaparacaina jácani vinicaquenerrepiana, véraqueneana. Étaripa eta ticunachacarehi mayehe, eta víchirapaipa eta táuriqueneana, navetijiva nayehe ena vichamuriana. Mavarahivare vítucavahini tájina tahapapiricahini eta vicurujujisiracacahi, apaesa táimiyanavaini eta víúrisamureva vimutu, maicha ema Espíritu Santo. ¹⁸ Éti, te yátupina eta émunasiravacahi ena echamuriana tépuruanahi eta jácani tinicacare, tíuriyare eta ecamataneasiraya ema Cristo. Tétavicavahi eta ecurisamurechirahi ema Viya, ecunachacarehivare nayehe ena achaneana.

¹⁹ Tacahe, vitanucayare eta víúrivaya nayehe ena vichamuriana, apaesa vétumechacaca tayehe eta véhiruhi. ²⁰ Vaipa iácapaemachacacaimahi tayehe eta jácani tinicacare. Váipavare ecuiputsicacaimahi, machu émitiaca eta echamuricacairahi eti majanearuanahi ema Viya. Yátupiquene eta táurivahi tamutu eta tinicacare. Tájina táímanéna. Énasera nácani tépuruanahi jácani tinicacare, te nanicapuca, ticauyayacare táimiaquipaica tayehe eta pecatu. ²¹ Tíuripanaichu vahi ecunica eta vaca, váhivare ecuera eta cátsiama, machu étaina táimiaquipaicapuca ena echamuriana tayehe eta pecatu, máchuvare nacainajiruva eta véhiruhi. ²² Éti, yátupihí eta esuapirahi ema Viya tayehe eta tinicacareana. Ejaneacavasera te mamirahu éma. Tétavicava eta

náuricacareva nácani náimatihini eta náurivahi te nasamure, vahi nacaecahira-hihini énajivainahini. ²³ Nácánisera tísapavanahi tinicana, tiávamirahuanahi, énajivapa tímiaquipaicavanahi eta nanisirahi, taicha vahi tátupiruvahini eta nanisirahi. Tamutu jácani vahi tátupiruvahi eta visamure eta víchira, pecatunahi éta.

15

Ecurisamurechaya ena eparaepiyana. Vahi étijiricavaimahi ecaurisamurechava.

¹ Tacahe, viti vímatianahi eta táurivahi eta vinisirahi eta jácani tinicacareana, tituparacahaviripa véchapajiricavacaya ena vichamuriana tímijachanahi vahi táurihini eta nanisirapuca. Vácayehe paciencia nayehe. Vaipa vipanerechahini étachucha vicurisamurechirava vítijiricáva. ² Emutuchuchasera éti, ecurisamurechaya ena eparaepiyana. Éñamava éti eta náuricacarevayare, apaesa tápajucavapaipa eta nasuapiraina eta véhiruhi. ³ Taicha ema Cristo, vahi mácarichuhini macurisamurechavahini. Éma, ticurisamurechahi ema Maiya te tamutu. Eta tacahe, nacatianacahi ena achaneana váinarajiqueneana. Tásiha, títauchavahi eta tametarapi eta Sagrada Escritura, ani tacahehi: “Núti nímiyanavahi eta nítauchirahi eta pivanaíripiana eta nuyehe, tayanapane eta náumehairanuanahi ena piánaranahi” tacahepa eta Sagrada Escritura. ⁴ Ema Viya tivanecahi ena víyarahaini profetana nájuchahi eta máechajiriruvana te Sagrada Escritura. Éta, ticamapuravacareyarehi eta táimitusirahaviyarehi, apaesa táetumechahavi eta véhisira, tacurisamurechahavinavare. Tímitucahavihivare yátupina eta vicasíñava me Viya eta májjarasiraparaca eta víuricacarevaya. ⁵ Puiti nuvaraha májjaracahehini ema Viya eta evarairahi ecutiya ema Jesucristo eta mapanereruana, étaripa vahi mácarichuhini macurisamurechavahini. Ema Viya máetumechahehine emutu, macurisamurechahevaréni te jácani ícharacavanapuca, apaesa táuri eta ecachanecacaira. ⁶ Nuvarahavare ácuticacahini eta epanereru. Tásiha, te iúrujisiravana, étanainarichuhini eta iáhuana eta ecunachirayare ema Viya, Macaiyaquene ema Viáquenu Jesucristo.

Ema Pablo ticatuparahahi ticametarairuyare nayehe ena apavasanana

⁷ Tacahe, nuparapenaveana, ejacapacacayare eti echamuricacanahi, apaesa macunachacarehi ema Viya nayehe namutu ena achaneana. Ecutiyare ema Viáquenu Jesucristo eta majacapirahavihi viti. ⁸ Écharichuhivare eta máucupaisirahi éma te juca. Tétavicavahi eta mamansuvahi eta máimitusiravacahi ena majaneanana israelítana. Mavarahahi máimimaticahavaca éna eta máitauravahi ena Viya tamutu eta máechajiriruvana májjararuvana nayehe ena víáchucanaveanaini. Váhiquene tivayuarahi. ⁹ Énerichuvare máimimaticahahi ena apavasanana eta majapanuiravacahi ema Viya apaesa nacunachayarehi éna apanava éma. Titauchavayarehi eta máechajiriruvahi ema Cristo eta Sagrada Escritura, ani macahehi: “Puiti núti, énapa ena nuchaneranahi apavasanana vicuticacahi eta vicunachiravihi, pití Tata, vijirauchiravihi eta vipicauchiravihi”. ¹⁰ Te apana Escritura, ánvare tacahe: “Éti apavasanana, étipa eti israelítana, étamurihéipa ecuticacainapa eta iúrisamurevaya me Viya”. ¹¹ Te apanavare Escritura, ánvare tacahe: “Étamurihénapa eta ecunachirahi ema Viya, eti apavasaqueneanahi. Váhivare ínajicahini eta ecunachiraya éma”. ¹² Eta májurehi ema víyarahaini Isaías te

Sagrada Escritura, áñivare tacahe: “Tíjahúchavainapa ema Cristo, te nájina nacuchapaimahi. Éma, aquenucayare nayehe ena apavasanana. Macari-chuyare éma ticasíñavanayare mayehe, eta nacuneraya éma” tacahepa.

¹³ Ema Viya, tétavicavahi eta macunecarevahi, ticasíñacarehivare. Tásiha puiti, tétavicavahi eta nuvarairahi májjaracahéni éti eta tavayuchiraina eta iúrisamurevaina, tavayuchirainavare eta ecasiñaira mayehe, apaesa tanaracaina tamutu eta epanereruana. Eta mávahásirahehi ema Espiritu Santo, máetumechahéni muraca apaesa táetaviuchiravaya eta ecasiñavai-rayare mayehe ema Viya eta májjarasiraparaca eta iúricacarevaya.

¹⁴ Tiuri puiti, némunaruqueneana nuparapenaveana, nucasiñavahi núti eta eyehe, eta étaviuchiraipa eta iúriava étapa eta ímatiequenehairahi tamutu eta máimiturapiana ema Viáquenu. Yátupihivare ítucahi econsejachacaca.

¹⁵ Nucasiñahéhivare eyehe puiti juca eta nájjarasirava nucajurehe eta juca nucartane étapa eta juca táechajisihaqueneanahi, apaesa vahi ecuemitisica, taicha nutuparahahi me Viya eta nujaneasiraheya eti apavasanana. ¹⁶ Éma, tituparacanuhi eta nuyanirayare nupaipica te tamutu avasareana, nucemetarairuiraya nayehe namutu ena achaneana eta najacapacareipahi me Viya eta nacasiñavairahi eta mayehe. Tituparacanuhevare eta nujaneasiraheya emutu eti esuapanahi éma. Tásiha, nuvaraha núti nímerecaheya te mamirahu ema Viya te jena sache ticutiyarehi námavahuhe. Éma tíurisamuréna eta majacpirahéya, taicha máepachiaruhéipahi ema Espiritu Santo.

¹⁷ Eta mavanaranuirahi ema Jesucristo, nucunachava eta nucemataneasirahi ema Viya. ¹⁸ Váhisera nucasiñavaimahi, nucuneuchavaimahi tayehe eta jácani nacaemataneasiranahi ena apamuriana mavanarana. Nútisera nítauchahi eta nucatuparahairahi me Cristo eta nímatiechiravacahi ena apavasanana eta nasuapirahi ema Viya, náehisirapaipahi eta nímiturapihi étapa eta núrivahi eta nayehe. ¹⁹ Nímechavacahi ichape eta tíaramicareana eta nítipajijiasirava maicha ema Espiritu Santo. Tacahehi eta nítauchirahi tamutu eta nucemetarairuirahi eta máimiturapiana ema Jesucristo. Tamutuhi nupaica, népanavahi te Jerusalén, níchecuhapa tayehe eta departamento Ilírico.

²⁰ Taicha ichape eta nuvarairahi nítecapauchaya tamutu avasare, te jácani nájinaichaha nacemetarairuhini. Nuvarahaya nucemetarairuyare nayehe ena achaneana tájinahi nasamihahini eta májzare ema Cristo. ²¹ Nítauchahi eta táechajiriruvahi eta Sagrada Escritura, ani tacahehi: “Náechapa puiti eta májzare ema Cristo ena achaneana tájinaquenehi apaesainahini nasamairicahini eta májzare. Náimatiequenehapa eta máimiturapi, éna eta namaituquenehi namasamaquenehivare” tacahepa.

Ema Pablo mapanerechapa tiyanayare te Roma

²²⁻²³ Ichapemurihi eta áñoana nuvarairahi nupaipiuchahe éti, nucachaneheya apaesaina. Váhisera nítujicava, taicha eta nupaipiuchirapahi eta apana avasareana. Puítisera nítauchapa eta nupaisirahi tayehe eta avasareana. ²⁴ Tásiha, puiti nupanerechahi nétavauchaheyare achichu juca, nuyaniraya te avasare España. Nuvaraha vicaurisamurechacacainapa. Te támutupa eta nucachaneraheya eta nétavauchiraheyare, németeaca ímicatcanuyare jácani eta nuyaniravareva. ²⁵ Nuyanumayaresera te Jerusalén. Nunapanumayare eta nanaquiruvana ena vichamuriana nayeheyare ena apamuriana vichamurianahivare ticavasanahi ánaqui. ²⁶ Taicha ena vichamuriana te Macedonia, éna ticavasanahi te juca Acaya, tinaquiquicavanahi

eta náimicatasihaya ena apamuriana vichamuriana páureana ticavasanahi te Jerusalén. ²⁷ Tétavicavahi eta náurisamurevahi eta nanaquisiravahi, navarairahi títsirijicavanaya nayehe. Táurica eta juca náitsirijisiravaya, taicha ena nachamuriana israelítana tímimatchanahi ena apavasanana eta máimiturapiana ema Viáquenu. Tásiha puiti, énapavaya ena vichamuriana apavasanana, nacajiyare ena nachamuriana israelítana. ²⁸ Tacahe, te támutupa eta níjarasiravacayare ena vichamuriana páureana eta nanaquiruvana ena nuchamuriana te juca, nuyaninavarepa nucaijuhe te España. Nétavajicainapasera eta ara eyehe. ²⁹ Németeaca eta nítecapauchiraheya, ichapeyare eta viúrisamurevaya eta vétumechiracacayare taicha eta véhisirahi ema Cristo.

³⁰ Nuparapenaveana, nuyaseacahe te máijare ema Viáquenu Jesucristo étapa eta vémunasiracacahi maicha ema Espíritu Santo. Nuyaseacahe ímicatanuhíni eyaseuchanu me Viya te eyujarasirana. ³¹ Eyaseacahini eta majaneasiranuhini eta nítecapauchiravacayare ena masupajirairahanahi ticavasanahi te Judea. Étapa eta juca námaqueneyarepahi nanaquiruvanahi ena vichamuriana, táurihini eta najacapirayare ena vichamuriana ticavasanahi te Jerusalén. ³² Eyaseacahivaréni ema Viya máisapanuhini eta núrisamurevainahini eta nítecapauchiraheya, ímicatasiranuhíni eta nítujsiravaina nucachanehe. ³³ Ema Tata Vicaiyaquene, tétavicava eta macanarasirahi tamutu eta vipaneruana. Nuvaraha puiti yátupina esamava eta macanarasirahehi éti. Amén.

16

Ema Pablo mámechajirisihá te macartane namutu ena máimatiqueneana machamuriana

¹ Nutuparacahe emutu échapajirisinanu eta suítecapauchiraheyare esu apana vichamuri Febe. Taicha ésu, tétavicavahi eta suítatiravacahi ena vichamuriana te avasare Cencrea. ² Tauri eta ejacapiraina esu, evapinavayare te máijare ema Viáquenu Jesucristo. Ímerecayare eta yátupirahi eparapehivare ésu eta echamurirahi tayehe eta véhiruhi. Ímicatacayare te jácani sucamunuiravana. Taicha ésu, camurianahi ena suímicataruanahi. Nútiripa, tétavicavahivare eta suímicatasiranuhi.

³ Échajisinanuyare ema Aquila ésupa esu mayena Priscila. Vahi némiticavaca éna eta nucachamurirahi tayehe eta vicaemataneasirahi ema Jesucristo. ⁴ Ena, vahi nacatiequenehahini eta náitaresirana eta nacatiuchiranuhi. Nuhasulupayachavaca éna. Énerichuvare nahasulupayachavare namutu ena apamuriana vichamuriana apavasanana. ⁵ Échajisinanuvare ena apamuriana vichamuriana tíurujicavaráhianahi te napena ema Aquila ésupa esu Priscila. Échajisinanuvare ema némunarquenehi nínutacasare Epeneto. Éma tínapucahi majacapahi ema Cristo apaicape te nuyanapa te Acaya. ⁶ Échajisinanuvare esu María. Nusamairiricahi eta ichapemurirahi eta suímicatasirahehi éti. ⁷ Échajisinanuvare ena nujaneanana Andrónico émapa ema Junias. Éna, nuchamurianainihi eta vicaeratairahi te cárcel. Tétavicavahi vémunasirahi éna viti apóstoleana. Éna, tínapucanahi nuyehe eta náehisirahi ema Cristo.

8 Échajisinanuvare ema Amplias, émarichuvare némunarquenehi eta véhisirahi ema Viáquenu. 9 Échajisinanuvare ema Urbano, ema vichamurihi tayehe eta vicaemataneasirahi ema Viáquenu Jesucristo. Échajisinanuvare ema némunarquene Estaquis. 10 Échajisinanuvare ema Apeles. Yátupihí éma eta máimeresirahi tíurihi eta máehisirahi ema Cristo. Échajisinanuvare ena machichanaveana ema víyahaini Aristóbulo. 11 Échajisinanuvare éma apanavare nujaneana Heredión. Éna ena machichanaveana ema víyahaini Narciso, tétavicavahi eta nasuapajiravahi éna me Viáquenu Jesucristo. 12 Échajisinanuvare esu Trifena ésupa esu Trifosa. Énarichuvare ticaemataneacanahi ema Viáquenu. Échajisinanuvare esu vémunarquene vichamuri Pérsida. Tétavicavahivare eta sucaemataneasirahi ema Viáquenu. 13 Échajisinanuvare ema Rufo. Éma, tétavicavahivare eta masuapirahi ema Viáquenu. Échajisinanuvare esu maena. Ésu, tímicutijiricavahi mémenahini eta nuyehe ésu. 14 Échajisinanu ema Asíncrito, ema Flegonte, ema Hermas, ema Patrobas, ema Hermes. Échajisinanu ena vichamuriana tírujicavarahiana te napena. 15 Échajisinanu ena Filólogo, ésupa esu Julia, ésupa esu Olimpas émapa ema Nereo, ésupa esu maparape. Échajisinanuvare ena vichamuriana tírujicavarahiana te napena.

16 Puiti eta néchajisirahehi emutu eti nuchamuriana, nuvaraha nétserarecahe emutu te máijare ema Cristo. Ani te juca, téchajicaheana namutu ena apamuriana vichamuriana te tamutu avasareana.

17 Nuparapenaveana, nuvaraha ecuneuchavare nayehe ena tipanerechanahi típutsimurahaheana taicha navarahahi tihapapicaheana eta te éhiruhi. Ena nani nacatianacahi eta juca vímiturapihi iáravahuhi. 18 Érajicavayare eta nayehe, taicha éna vahi émainahini nacaemataneacahini ema Viáquenu Jesucristo. Énajivachucha navaraha tíurichavana. Tétavicavahivare eta náitusirahi téchajiricavana. Títivehi eta náechajirisirava. Étachuchasera navarahahi tivayurecana te nasamureana ena achaneana tijimuyapanerueruana. 19 Namutuhi tímatiheana éti, náechahivare eta esuapajiravahi. Eta tacahe, tétavicavahi eta núrismurevahi ícha. Ecajurucaseraini eta íchirahi eta táuriqueneana. Vahi ecuquicha eta tauriqueneana. 20 Nuti nucasiñavahi me Viya, máimicatasiraheya íputsicavaneya ena machanerana ema Satanás. Tásiha, tíuriyare eta íchararacavahi maicha ema Viya. Nuyaseacaparacavare ema Viáquenu Jesucristo táetaviuchahíni eta iúricacarevaya máicha.

21 Téchajicahe ema Timoteo, ema nuchamurihi eta vicaemataneasirahi ema Viáquenu. Éna ena nujaneanana: ema Lucio, ema Jasón, émapa ema Sosípater.

22 Núti apana nuti Tercio, núti nájuchahi eta juca carta, néchajicahe núti apana te máijare ema Viáquenu Jesucristo.

23 Téchajicahevare ema Gayo, ema nítecapaurehi te mapena. Étarichuhivare víurujisirarevahi te víyujarasirana. Téchajicahevare ema Erasto, ema tayehehi secretario tésorerohi eta te alcaldía. Téchajicahevare ema viparape Cuarto.

24 Nuyaseuchaheparaca emutu éti me Viáquenu Jesucristo, táetaviuchahíni eta iúricacarevaya máicha. Amén.

Eta táichecuaráqui eta macartane ema Pablo

²⁵⁻²⁶ Nuvarahahi vácuticacaini eta vijirauchira ema Viya. Éma, mavarahahi tétumechaheya tayehe eta éhisirahi ema Viáquenu Jesucristo. Eta tac-
 ahehi eta nucametairuirahi, nímitucavacahi namutu ena achaneana eta
 majacapiravacahi ema Viya eta nacasiñavairahi me Machicha. Acane eta
 táepaniravahi eta apaquehe, ema Viya Eterno mapanerechapa eta majacapi-
 rayare namutu ena achaneana ticasañavanaya eta mayehe. Ena israelítana
 énapa ena apanapanenejiqueneana achaneana, namutu tijacapacareana-
 yarehi. Étaripa eta náechajisihaqueneanahi ena víyarahánaini profetana
 tayehe eta Sagrada Escritura. Nájinasera nácaicutiarahini. Mapaenumavapa
 tímimatichanuhi núti ema Viya eta mapanereruhi.

²⁷ Ema Viya, ¡tétavicavahi eta máitupajijiasirava! ¡Macarichuhi tijiraucha-
 carehi ticunachacarevare tayehe tamutu! ¡Máitavacacayarehi eta vihasulu-
 payachirayare éma tivanecahavihi ema Jesucristo eta macuchucuirahavi-
 yarehi! Amén. Tamutupa.

Eta macartane ema Apóstole Pablo nayehe ena machamuriana ticavasanahi te avasare Corinto, ticaijare 1 CORINTIOS

¹⁻² Nuti Pablo, mayehenuhi apóstole ema Jesucristo. Níchuarecasivaichuhi mayehe, manerejirunuichuhi ema Tata Vicaiyaquene, mavarairahi nímitucaya eta náechajiriruvana éna. Puiti nucajurehe núti émapa ema vichamuri Sóstenes, eta juca carta eyehe eti vichamuriana ecavasanahi tayehe eta avasare Corinto. Puiti éti iávaháurupa ema Viya taicha etupiruvahi esuapa eta máichuirahéhi éti apanava, mavarairahi émayarepa ema Machicha Jesucristo ecaemataneacayarehi. Ecutiripa ena apamuriana vichamuriana ticavasanahi te tamutu avasareana, taicha ecasiñavahi eta eyujarasirana eta mayehe. Vimutu víti, émanarichuhi ema Viáquenu Jesucristo ema visuapaquenehi. ³ Nuvaraha macatajicahehíni ichape ema Tata Vicaiyaquene, émapa ema Viáquenu Jesucristo; náijaracahéhíni táurivaina eta epanereruana.

Viúricarepa ichape maicha ema Cristo

⁴ Núti nuhasulupayachaparaca ema Viya táichavene eta majapanuíraheripa. Eta iávahásirahi ema Jesucristo, ichaperinehi eta iúricarevahi. ⁵ Tíjaraca heripa eta ítupajijiasiravahi eta échajisirana, échemaharipihi tamutu. ⁶ Écharipa eta numetacahequenehi eta máijarasiraheya ema Cristo eta iúrivaya. Puítipa tíjaraca heripahi. ⁷ Tamuturipa tíjaracahehi ema Viya. Tájínapa iátajivainahíni eta ítupajijiasiravaipahi. Étanecha ecuchapayare eta jena sáchezare machavirayare ema Viáquenu Jesucristo. ⁸ Puiti ema Viya tétumechaheyare puiti juca vicaijuheyare eta ítaresiraya apaesa tacuija ecuavamirahu te jena sáchezare machaviraya ema Viáquenu Jesucristo. ⁹ Ema Viya vahi mahapapicaimahi eta mapanereruanahi. Yátupi eta máitauchirayarehi eta máichuirahéhi, mavarahahi iúrujicavayare ecachanenapa ema Machicha Jesucristo ema Viáquenu.

Vahi táurica vicaerajicaca

¹⁰⁻¹¹ Nuparapenaveana, ¿tájahapapuca ecayema éti vaipa tétupicava eta epanereruana? Núti nusamairiricahi eta íputsiaravavacaripa. Taicha tacahehi eta nametasiranuhi ena suchichanaveana esu vichamuri vénaraha Cloé. Nuparapenaveana, nutuparacaheyare te máijare ema Viáquenu Jesucristo, tácuticáca eta epanereruana. Nuvaraha étanainarichu eta epanereruana. Vaipa ecpuitsiacaca. ¹² Taicha ani tacahehi eta nusamairirisirahehi. Ena apamuriana ánipaji nacahehi: “Víti viúripanahi viti véhicanahi ema Pablo”. Ena apamuriana énerichuvare nacahehíji: “Vítira viúripanahi viti véhicanahi ema Apolo”. Ena apamuriana énerichuvaréji nacahehi: “Jéhevaesera viti viúripanahi viti véhicanahi ema Pedro”. Ena apamurianavare nacahepaji: “Vítira víapajupánavahi viúripanahi viti véhicanahi ema Cristo”. ¹³ Váhira tíuri énenahíni ácahehíni, taicha ema Cristo vahi apapíjijnahíni eta máimiturapiana. Nuti Pablo, váhira nútinahíni népenahíni te crusu íchavenénahíni éti. Eta ecaicachasirahi, váhivare étainahíni te njare. ¹⁴⁻¹⁵ Tiúririchuhi vahi nútinahíni nícachasicahehíni éti. Nájina tiyunacaimahi eta nútinahíni

nícachasicahehini te níjare, náepiyaequenehanuhipucai. Yátupi nícachasicavacahi ema Crispo émapa ema Gayo. Téhesera te máijare ema Cristo eta nícachasisiravacahi. ¹⁶ (Néchavapasera eta nícachasisirahivare ema Estéfnas, énapa ena machichanaveana. Váipasera néchava nájahapuca nácani nícachasi-ruanahi.) ¹⁷ Ema Náquenu Jesucristo tituparacanuhi nucemetarairuyare eta víuchucuirayare máicha. Váhira étainahini mavanecanuhi nícachasiricahini. Tacahe, tatupiruvahi eta nucemetarairuirahi. Váhiserá nuvayuyujicaimahi nútinapapucaini nápajucavahini eta nusupacareva, tásápihapucaini vahi tacusupacarehini eta máepenirahi ema Cristo te crusu.

Éma Viya máijaracahi ema Machicha Jesús eta máitupajjiasiravahi

¹⁸ Natiarihihi ena achaneana náimijachahi súnsurupiana eta juca nucemetarairuirahi eta víuchucuiraya taicha eta máepeninahavihi te crusu ema Viáquenu Jesucristo. Ena nani masupajirairahanahi énará táiturevanayare eta ecuñaraqui. Vítiserá viti macuchucureanayare, tíurihi visama eta yátupi-queneana tásíhaquenehi me Viya. ¹⁹ Ema Viya ani macahehi eta máéchajiriruva eta te Sagrada Escritura: “Tamapurujíhi eta náitucaqueneanaini ena títapajjijihanainihi, énarípa máehicanurahanahi. Súnsurupíhi nuyehé eta náéchemaraívanahi” macahepa.

²⁰ Eta tacahe puiti, tájina tacunachacarevainasami me Viya eta máitucaquenehi ema achane títapajjijiacavahi, mácani máestropuca, tayanapane macarichuhi nayehe ena apamuriana tímatiequenehanahivare eta tayeheana eta juca apaquehe. Taicha tájina vahi étaparacaina mayehé ema Viya eta júcana taicha súnsurupianachucha eta mayehé éma. ²¹ Tamutusera eta mapaneruanahi ema Viya, tétavicavahi eta tapachinavavacahi. Éma, tivanecahavihi viti vicemetarairuanayare. Nararíhi ena tisuapanapahi eta vimetarairuana. Énarípa tíuchucuhanayarepahi. Tayanapane ena apamuriana náimijachahi súnsurupianahi eta vimetarairuana. Ena nani achaneana, tamapurují eta náéchemaraívanahi, taicha vahi táimimatichavacahini me Viya. ²² Ena nani nujaneanana israelítana náepiyarichuhi tíyaseserecana, navaraha náimaha eta tíaramicareana tíásihana me Viya. Ena griégoana eta nayeherepi natanucahi eta tápajusiravaya eta náéchemaraíavaya. ²³ Eta tacahe, vahi tasuapacarehini nayehe eta vimetasirahi eta víuchucuirayare táichavene eta máepenirahi te crusu ema Cristo. Ena nujaneanana titsirihanahi eta juca, tásíha náepuru náéhica éma. Ena apamuriana apavasanana náimijachaichucha súnsurupiana eta juca. ²⁴ Natiarihisera ena tisuapanapahi eta máichuirahi ema Viya, ena israelítana énapa ena apavasanahi. Náimatirípa ema Cristo, eta vanairucairahi mayehé ema Maiya taicha éma tíjaracahi ema Machicha eta máitupajjiasiravahi étapa eta matumeva. ²⁵ Tayanapaneinesera te súnsurupíhipuca nasama ena achaneana eta vimetarairuana, étasera tíápajucavahi tíúripanahi tayehe eta náitucaqueneanahi éna. Tayanapanevare náimijachahi mamaratahairainahi ema Viya, émahiserá túmepanahi nayehe namutu éna. ²⁶ Ímativaichuhi, eti nuparapenaveana, te tíchuhahepa ema Viya, vahi ámutuhini ímatihini eta tíchararacavahi eta ítaesirahi te juca apaquehe. Váhivarenéni ámutuhini tuparairucahevacainahini. Váhivarenéni ámutuhini ecaimahaquenevacahini. ²⁷ Tayanapane ena achaneana náimijachahepuca súnsuhéna éti, manerejiruhehisera ema Viya, taicha mavarahahi máimicatsiriavacayarehi ena tímijachavanahi títapajjijiacavana.

Tinerejcaheripa éti váhirichu túmejicuhénahini, mavarairahi máimicatsiriavacayarehi ena tímijachavanahi túmejicuana. ²⁸ Tayanapane eta épurucarehi, náimijachavare máiturerehe, manerejiruhehisera ema Viya. Eta tímicaecherachavacahi eta táejecapiravahi eta napanereruana mayehe ema Viya, taicha vahi énaina matanuca ema Viya ena títupajijiacavana, aguenucarahana, ticaimahaqueneanapuca. ²⁹ Eta juca mapanereruhi ema Viya, mamavarairahi nacuija nacucasiñavavaica te mamirahu éma, náimijachirapuca matuparaca éma nayehe éna. ³⁰ Puítisera éti, majacapaqueneanaripa ema Viya. Mávaháruhevarepa ema Jesucristo maicha ema Maiya. Tacahe, ichaperipa eta échemaraivahi máicha. Sántuheripa máicha, ecutipaipa eta masantuvahi éma. Iúchucurepaipahi tayehe eta ticaviurecarevana. ³¹ Tavaraha vítaucha eta táechajiriruvanahi eta Sagrada Escritura, ani tacahe: “Vahi vítijivaimahi vicunachava taicha eta vítupajijiasiravana. Éma vicunachayare ema Viáquenu taicha ema tíúrichahavihi”.

2

Ema Pablo macametarairuhi eta máepenirahi ema Jesucristo te crusu

¹ Nuparapenaveana, échavarichuhi te nítecapauchahénapa cape juca víásinequenehi. Eta nímitusirahéhi eta máechajiriruva ema Viya, tíúrihi eta níminecapaequenehairahéhi, tamutuhi ticaicutiaracare eta néchajirisirahéhi. Vahi tácajerapihini eta néchajirisirahéhi. ² Taicha nuvarahahi nímmitchaheyare ema Jesucristo, nuvarahahivare yátupinahini ácaicutiara eta masivachaquenehi macatajivairahi éma eta máepenirahi te crusu íchavenéhi éti. Éta tacahe, nupamicavahi núti eta nímitusirahéhi. ³ Núti, te nímitucahénapa, vahi nítipajijihahini eta nusamiravahi. Nupicacarácavahi támapurujihini eta nímitusirahéhi. Ichape eta tayyacarevahi eta náquehe taicha eta néñamiravahi vahi tacusuapacarehini eta eyehe eta nímiturapiana. ⁴ Núti, vahi nácutihini mácani achane mavayuyupica eta máechajirisirava. Étisera ecaicutiaravanehi eta nímitusirahéhi maicha ema Espíritu Santo. Ecaicutiaravanehi étairahi eta yátupiqueneana tásihaqueneana me Viya. ⁵ Taicha nuvarahahi yátupina muracaina eta ecasiñavairahi mayehe ema Jesucristo taicha ímatihí te esamureana eta yátupirahi másihairahi me Maiya. Vaipa ecuehica eta nayeherepianaini ena víáchucanaveanaini.

Ema Espíritu Santo tímimatchahavihi eta mapanereruana ema Viya

⁶ Étisera ánaquiaparipa eta éhisirahi. Ímatiquenehávacaripa. Tacahe, táuricapa puiti vímitucaca eta apamuri échajirirucava títuacareana ticajerapianahi. Eta juca títuacareana tiásihanahi me Viya. Vahi tásihaquenehahini mayehe mácani vicutiquene achane. Énainahipucaini tásihahini nayehe ena ichapequeneana aguenucana, taicha vahi tánasimahi eta napanereruana éna. ⁷ Eta júcana títuacareana tásihaqueneanahi me Viya, mapanere-ruanahi te tépanavainapa acanevaca. Ánaquiaparipasera eta macaerajisira-rahini. Tapaenumavapa puiti máimicaecherachinahavihi viti achaneana, mavarairahi visiapaya tayehe eta mávasa anuma. ⁸ Ena aguenucanahi, vahi náimatihini eta mapanereruana ema Viya. Nájina émanainahini ema ichape-que ne aguenuca máimatihini. Taicha te náimatihini eta mapanereruana ema Viya, váhirichuhipucaini nacuémetatacahíni te crusu ema Viáquenu.

Tájina náimatihini eta émairaquenehi Viya, tiásihahi te anuma. ⁹⁻¹⁰ Vítisera víti, máimitureanahi ema Espíritu Santo. Vímatihí eta mapanereruana ema Viya. Émahí ema tímimatichahavihi taicha macarichu máimatihí eta tayumuruvenanahí te mapanereruana ema Viya. Taicha aní tacahe eta Sagrada Escritura: “Tétavicavaya eta náuricareva ena nani témunacanahí ema Viya. Taicha máijaracavaya eta náicuchihi natuparahahí maicha éma. Máimahasirichaha eta tacutiquenehi eta náuricarevaya. Váhivare tisamairicacarehini eta tacutiquenehi te jácani tiyerehi avasareana. Nájina naratahahini náimijachaimahi eta táetaviuchiravaya” tacahepa eta Sagrada Escritura.

¹¹ Vítí achaneana, vicarichu vecha eta vipanereruanapachu tásihaqueneanahí te visamureana. Nájina apanaina náratahahini naecha. Ene macahehi ema Espíritu Santo. Macarichu éma téchahi tamutu eta mapanereruana ema Viya, taicha émarichuhi máchanevahi. ¹² Vítí, tájina vahí vítijivainahini vímipanerechavahini mayehe ema Viya. Émasera ema Espíritu Santo tímítucahavihi tamutu eta titucareana tásihaqueneanahí me Viya, taicha mavarahahi véchayare. ¹³ Eta tacahe, eta juca vímiturapianahí tásihaqueneanahí mayehe ema Espíritu Santo. Vahí tásihaquenénahini te vipanereruana. Táitusiava, ena vímitureanahí natupiruvahí najacapa taicha mávaháruanahí ema Espíritu Santo.

¹⁴ Énasera nácani achaneana vahí mávaháruanaina ema Espíritu Santo, vahí najacapaimahi eta máimiturapiana, taicha náimijachahí súnsurupiana. Váhivare nárataha nacaicutiarahini, taicha ticamunucarehi eta máimitusiravacainahini ema Espíritu Santo. ¹⁵ Vítisera víti yátupiqueneanahí mávaháruana, vicaicutiarahi tamutu eta máimiturapiana éma. Énasera ena máehicarahanahí, vahí nacaicutiaraimahi eta apanairaipahí eta viyehe-repianahí víti. ¹⁶ Tacahehi eta táechajiriruvana eta Sagrada Escritura: “Nájina émanaina achane máemunahiricavahini máimatihini eta mapanereruana ema Viáquenu. Tavetijicha májina mácani máítucahini máimituca ema Viya eta mamaitucaqueneanapucainí” tacahepa. Nájnavare nácutihavíhíni víti vicaravahuquenehi eta máechajiriruanahí ema Cristo. Vímatiripa eta mapanereruana.

3

Vi mutu vicompañeroca tayehe eta vicaemataneasirahi ema Viya

¹ Nuparapenaveana, cape te nítecapauchéhéna, vahí tacajerapahini eta nímitusirahehi. Tacutihí te vicajuruca eta amuya, vépiyayasinahí eta vímitusira. Tatí vahí nímitucahe eta epaisirayare éhisirayarehi ema Jesucristo. Taicha éti vuíchaha támutihini ínajicahini eta tajamurachaqueneana eta íaqueheana. Vuíchahavare éhichahini eta mavarahaquene ema Espíritu Santo. ² Vahí námáinuñucahehini eta nímitusirahehi. Éti ecutihí ena nácani amuyana tiájicanarichaha. Vahí námáinucavahini nanicahini eta cheruji. Ene ecahehi éti, vahí íamáinucavaimahi ácaicutiarahini támutihini. Puítirichucha vuíchahavare áratahaimahi ácaicutiarahini eta apamuriana titucareanahí murácapanáhi. ³ Taicha éti vuíchaha támutihini ínajicahini eta tajamurachaqueneana eta íaqueheana. Taicha ecapinarujiricacachaha, ecatianajiricacachaha, íputsimurajiricacachaha. Eta epanereruana ecutirichaha eta napanereruanahí ena apamuriana achaneana

masuapajirairahanarichaha. ⁴ Éti épurujiricacahi nayehe ena echamurianahi, ánípa ecahe: “Víti viúripanahi viti véhicanahi ema Pablo”. Éti apamuri ecahepa: “Vítira viúripanahi viti véhicanahi ema Apolo”. Eta juca ecahehi, tacutirichaha eta napanereruana ena apamuriana achaneana masuapajirairahanarichaha.

⁵ Váhira nútínayarehi éhica nuti Pablo. Váhivare émaimahi ema maca Apolo éhicayare. Vahi véhicacare víti, taicha mavanarahavichucha ema Viáquenu Jesús. Yátupi víti vímitucahehi. Tamutuhisera mayeaneanahi ema Viya eta esamaqueneanahi. Ema Viáquenu tjaracahavihi eta vituparahapachuyarehi. ⁶ Yátupi nútí nínapucahi nímisamahehi eta máechajiriruva ema Viya. Te néquenepa, títécapauchahepa ema Apolo, émapa títametacahehi tamutu. Émasera ema Viya, ema ticajurusinahehi eta esuapajiraivanahi. ⁷ Táitaurevaquene nútihinéni névacahi te esamureana eta echajirirucavana, tájinasera vahi nútina néchahe. Émaripa ema Apolo, ema títametacahehi, váhivare émaina téchahe. Émara ema Viya, ema téchahi tamutu eta juca. Éma ticunachacare. ⁸ Nútí, émapa ema Apolo, vicuticacahi vínunahi eta vicaematane. Vituparahapachuhisera. Ema Viya tjaracahaviya eta vícuchianapachu, te tíurihi eta vicáematanérana. ⁹ Víti mamusurahavihi ema Viya. Éti ecutihí eta sucurecana eta macajurusirahehi ema Viya.

Eta éhisirahi ema Jesús tacutihí eta náepiyasirahi eta ichapequene peti. ¹⁰⁻¹² Tativa, ema maestro tépiyarecarahi peti arquitecto, éma tinacucha eta labriyu eta tatumearaya eta yúchama. Tásiha, ena apamuriana máestroana, énapa tíunachana eta yúchama étapa eta tamaiquehe. Tíúriyare eta nacaemataneraya. Nanerejicayare eta táuriqueneana tasivachaqueneana, navarairahi tjanunucayarehi eta náematane. Váhiya nanacaimahi eta tjtuchacareana, yucuquí, muiji, cáchipaca; apaesa vahi tacuiju eta peti. Taicha títécyare máimahapanaya ema ticayeheyarehi eta peti. Tásiha, te máimahapa tíurihi, mavachachainapa namutu ena ticaemataneanahi. Nuti manerajirunuhi ema Viya eta nímimatichirahehi ema Jesucristo, éhicapaipa éma. Puiticha eta ecajuherapaipa te anuma, nájina apanaina naratahahini námahehini. Macarichuhi marataha éma. Puiti, ena apamuriana mamusurana ema Viya títitucahehi apaesa tajuruca eta esuapirahi. Tacamunusera tíúriyarehi eta náimitusiraheya. ¹³⁻¹⁴ Taicha tatiarihiyare eta sácheyare máimahayare ema Viya eta vémataneanapachu, te tíuripuca. Te tíurihi eta vémataneanahi, ema Viya tjaracahaviya eta táitsivayare eta vématanerepihi. Téhesera vahi táurihini, eta mayucune táijuchayarehi eta vémataneanahi. ¹⁵ Tacamitiequenehayare tamutu jácani tájina tacunachacarevainahini. Tájina táimaequenénaimahi. Yátupi víuchucuhahi víti, tájinasera vímaequenéhaimahi.

¹⁶⁻¹⁷ Écharichuhi éti eta mávahásirahehi ema Espíritu Santo. Éti ecutihí mayehehi templo ema Viya, étarichuhi eta máucupaisirarehi máemunaruquenehi. Éma, máicuñacayare muraca nácani tjararecanahi éta. Táitusiava, ejaneacava éti, machu ejarareca eta iúrujasiracacahi, ímiyusemaca ema Viya.

¹⁸ Vahi ecuejecapava eta ímijachirahi ímatipa tamutu eta juca vítaresirahi. Étiserá ecaravahuya eta me Viya. Éma, títitucahe eta ítupajijiasiravanaya yátupiqueneana. Échemaraivaina máicha. ¹⁹ Taicha eta náitucaqueneanahi ena achaneana te juca apaquehe, súnsurupianachucha eta máimairahi ema Viya. Taicha eta Sagrada Escritura, aní tacahe: “Ena tímijachavanahi

náimatiequeneha, énajivachucha tímiaquipaicavanahi maicha ema Viya, taicha eta namáetupisirávanahi”. ²⁰ Ánivare tacahe eta Sagrada Escritura: “Ema Viya máimati eta napanereruana ena tímijachavanahi títupajjiacavana. Tájina eta tacunachacarevanahi eta mayehe”. ²¹ Táitusiava, vahi tiuri ecasiñavavaicahini. Vahi étupicava eta éhisiravacahi ena enerejiruanahi éhica. ²² Ecaravahuinasera tamutu eta vímiturapiana viti mavanaranahi ema Viya: ema Apolo, émapa ema Pedro, nútupa nuti Pablo. Ecamapurava eta itaresiraichaha te juca apaquehe. Jararihiyarehi eta iúricacareva puiti étapa eta sácheana vicaijuhequeneana. Vaipa ecupica eta épeniraya. ²³ Échava ema Viya ema téchahehi, taicha éti mayeheheripa ema Machicha Cristo.

4

Eta nacatuparahairahi ena apóstoleana

¹ Nuvaraha némechahe eta vicutuparahairahi viti mayeaneanahi apóstole ema Cristo. Mamusurahavihi víti. Tivanecahavihi eta vímitusiraheyare eta mapanereruana ema Viya, eta tayumurevanainihi. ² Púiticha, mácani ticutuparahayare tayehe eta ematanecana, tacamunuhi yátupiyare eta máitauchiraina. ³ Natiarihipuca ena ticaunenuanahi te nítaurahihhipuca. Étiripa, enevanehipuca ecaunenu. Núti, tájinavare tácyema te ticaunenuanahhipuca. Németeaca nítauchapaipa tamutu eta nucatuparahairahi me Viáquenu. ⁴ Váhisera nucasiñavavaicahini, taicha néchahi ema Viáquenu, máimahahi éma tamutu eta nucaemataneasirahi éma, te tiúrihipuca, váhipuca. ⁵ Eta tacahe, vahi táuricahini tativainahini ecaunehini eta júcana, te vuíchaha ímatiequenehahi. Ecuchapaya eta mápechiravayare títeca ema Viáquenu. Éma tímicaecherachayare eta tayumurevahi te timapicu. Éma tímereuchahaviya eta vipanereruana te visamureanapachu. Tacahe, ema Viya ticunachahavinapa eta viúriivanahi.

⁶ Nuparapenaveana, numetacahe eta juca eta tiúrichaheyare apaesa ácuti eta máuriva ema Apolo, ácutinuvare nútí apana eta núrivahi, taicha étanarichuhi eta vímiturapianahi tayehe eta véhiruhi. Vahi táurica enerejicahini nácani émunaranaya. Vácuticacasaera eta émunasirahavina viti vímiturahianahi. Nacujavare épuruquenéna nácani tímíturahianahi. ⁷ ¿Tájaha tacayema ímijachavahi éti iúripana nayehe ena apamuriana? Tájina apanaina ecasiñavaiya, tacarichu ecasiñavaiyaya tayehe eta máijararuheanahi ema Viya. Váchuripa tíjaracaheeripa éma eta iúriivanahi, vahi étiñivainahini iúrichavahini. Tásiha, ¿tájaha tacayema ecasiñavavaicarichucha éti?

⁸ Éti, eta esamiravahi ecaemuñavaipa tímicitijiricavaipa ecayehéhini tamutu, ecaimahaquenehini. Ímicutichavaipavare aquenucahenahini eta esamiravahi. Ímijachavapa vaipa nucamunucarehi eyehe. Jéhechapucaini malayarine yátupinahini aquenucahenahini apaesa víti apanava vémeñahavapaini eta eyehe. ⁹ Ímatirichu éti eta procesión náichaqueneasa ena tiverearecanapahi tayehe eta guerra. Nacacahi te náijiquimuri ena ticutuparahianahi eta náepeniraya taniruanayare eta sárareana. Ichape eta náimacharevahi nayehe ena achaneana. Viti apóstoleana ticutimahí tinacahavi ema Viya eta vicutihi ena nani páureanasamí. Ichape eta vímahacarevahi nayehe ena achaneana, énapa ena ángeleana. ¹⁰ Viti apóstoleana, eta vicaemataneasirahi

ema Cristo, tisunsuchahavianasamihiji ena achaneana. Étiserá étaviucha-ripahiji eta ítupajijiasiravahi tayehe eta títuacareana mayehe ema Cristo. Tacutiquene náimijachahivare matumerairahahavisami. Éti, tétavicavaipáji eta etumevavacahi. Tipicauchaheanaripáji ena achaneana. Vítisami tájinapa vipicauchacarevainahini nacahehi éna eta náechajiriruvahi. ¹¹ Puítiripa vinasrichuhi eta vicatajivairahi eta vinicaquenerepi, eta vimauneva, étapa eta véchuriasirapa eta vimuiriharapi. Ena achaneana téhahaviana. Tájina viviyava vijunaiya. ¹² Vicávitarcávahi te vivahuana eta vicaematnera. Ena achaneana ticajachachajicahaviana. Vítiserá tájina vácayemahini nayehe. Tiúrihi eta vijicapiravacahi éna. Tipanajiricahavianapa, vítiserá vicamichahi tamutu. ¹³ Tamutu sácheana téchajicanahi eta viyehé. Tíñemahi eta nacayemainahavi. Ichape eta vépurucarevahi nayehe. Vítiserá vicayehéhi paciencia nayehe, viconsejachavacahi.

Eta mahapasamuresiravahi ema Pablo nayehe ena machamuriana

¹⁴ Eta juca nucajureheirahi, vahi étaina nupanerecha nímicatsiriacahe. Nuvarahahisera nuconsejachahevare. Tétavicava eta némunasirahehi, tacutirihu eta nucachichairahéhi. ¹⁵ Tayanapane camurianahi ena eyeheanahi máestroana tímítucaheanahi eta éhisiraina ema Cristo, diez mílnáinahipucaini; nútiserá tímícutijiricavahi nácarichuhini éyanuinahini maestro taicha nútí nímitatchahehi tayehe eta iúchucuirayare maicha ema Jesucristo. ¹⁶ Eta tacahe, nécatiacahehi eta éhisiraina eta núrivahi nútí.

¹⁷ Eta tacahe, névatacayare eta ara eyehe ema némunarquene nuchicha Timoteo. Éma, títaurahi eta macaemataneasirahi ema Viáquenu. Éma, tímítucaheyare, máemechiraheyareva eta tacayemaqueneana eta nímiturapiana eta véhisirahi ema Cristo. Táuriquenehi eta máimiturapiana taicha étarichuhi eta nímiturapihi nayehe ena vichamuriana te jácani nupaisineanapahi. ¹⁸ Etiarirhipapuca eti ecasiñavaripa eta numaitujisiravaripa néjirapanahéhini. Ímijachaipapuca nupicahi. ¹⁹ Nuvarahapaicha nútí níjahuchavahini níteca-pauchahehini. Nucuchapahi eta nítujisiravainahini maicha ema Viáquenu. Te níteca-pauchahepa, nímahainapa ena nácarana tisiñavavaicanahi, te yátupihipuca eta nacaemataneasirapa. Vahi tisuapacareimahi eta nacunachiravana te vahi náimicaecherachahini eta táurivahi eta nacaemataneasirahi ema Viya. ²⁰ Taicha eta véhisirahi ema Cristo, tacamunuhi vítauchayare vicaemataneacayare. Vahi tácarichuimahiya eta véchajiriruvana. ²¹ Tiuri puiti, te ímianava ene ecahehi, némecharecaheyarehi te níteca-pauchahepa. Téhesera te étupiricava eta epanereruana, ichape eta núrísamurevayarepahi eta nímairaheyare, nétserajicahénapa.

5

Ema Pablo mavaraha nacaerajica mácani téjecapavahi

¹ Jucarihivare eta juca apana téchacarehi eta matiarahirahi ema émana echamuri téjecapavahi, tíñehicarehi eta juca máichaquenehi. Mavehahiji esu máenaharuva. ¡Váhicha tiuri eta juca máichaquenehi! Énaripa ena navayureva-queneana ticapacaturarahiana vahi náuricaimahi eta juca. ² Esapihachucha éti, ¡tétavicavahi eta tahapasamurechirahehi eta íputsimuricacairahi tásiha-quenehi eta ecasiñavavaisirahi! ¡Íúrihaipa etsirihapaini, táichavenéhi eta máichaquenehi ema echamuri! ¡Íúrihaipavare étupiricahini ema maca! Taicha

ema Viáquenu Jesús tituparacahavi vicuchucayare te vimuri nácani téjecapavanahi te vahi návarahahini náetupiricava. ³⁻⁴ Puiti, nuvaraha iúrujicavayare éti. Eyaseacayare ema Viáquenu Jesucristo máimicatacahe eta étupirisirayare eta juca. Núti apanavare, tayanapane eta nuyerehihehi, étasera eta náchaneva ticachaneheya. ⁵ Íchayare: “Te máijare ema Viáquenu Jesucristo, víti émapa ema Pablo, vicuchucavi te vimuri. Vaipa tijaneacavimahi ema Viya. Máimaha-vinepa ema Satanás, émainapa téchaviyare. Vivaraha pínajicaini eta juca pímaurivahi, apaesa táuchucuhaini eta piáchaneva te táitecapapa eta jena sáchezare machavirayare ema Viáquenu Jesús” íchayare.

⁶⁻⁷ Éti, vahi táuricachini ecasiñavaicahini. Tacamunu ecuchucavane ema mácara achane téjecapavahi apaesa vahi macupareacahe eti apamuriana, machu mámairijicahe. Taicha éma macutiripa eta levadura te nanaca te masa eta pan, tayanajicahi tamutu. Étisera, nuvaraha ecutiya eta pan mayehere levadura vinasare te páscuamuhuana. Yátupiquenehi arairu taicha vahi tasisijicahini. Ene ecaheyare éti, vahi tépahaimahi eta iásinequenehi te arairuhepa tacuti eta épaniravahi te éhicainapa ema Jesucristo. Taicha éma, tamutuhí mavachacha eta vímicapasirahi, macutihi eta uvesa eta vímijarare-sirahi. ⁸ Táitusiava puiti, vicutinapa ena nujaneanana israelítana eta nacaerajisira eta levadura te napenana te páscuamuhuana. Tamutusera sácheana vicauneuchavaya tayehe eta tamauríqueneana, vahi pecatumarehavamahi. Tamutu sácheana eta juca vítaresirahi matapiravarehavinahi, tájinasarepa víchiravaimahi te mamirahu ema Viya.

⁹ Cape eta nucartanehivare eyehe, nímimetacahehi eta tamarivahi eta ecachanevacahini ena tíchanahi eta juca pecatuana tivehajiricanahi: Súcani esena suvehahi ema apana achane, mácani achane mavehahivare esu apana esena. ¹⁰ Tiuri, núti eta numetasirahehi, váhisera énaína nicha ena nani máehicarahanarichaha ema Viya ena nani tivehanahi esu apana esena apayena, énapa ena tavayuaruana eta plata, énapa ena tiámerahiana, énapa ena ticasiñarajiana. Ena nani, náetaviuchahi eta nasimutuvavacahi, tamutuhí návihávaca. Tacamunui papuca vérajicavahíni eta te juca apaquehe, apaesa vaipa nacuitecapauchahavíhíni. Váhira énaína níchaquenénahíni. ¹¹ Mácanisera tímijachavahi echamuri, vahi nuvaraha ecachanejirica ema tivehahi esu esena apayena, émapa ema tivehahi esu esena amaperu máimaruchaha, émapa ema tavayuaruhi eta plata, émapa ema ticasiñarajiji, émapa ema titupiarahi, émapa ema ticavaharasi, émapa ema tiámerahi. Mácani echamuri, te ene macahehi, tájina vahi táuricachini ácachanevacahini te enisirana. ¹²⁻¹³ Vahi nútina tatuparaca eta nacayaseserehiyayare te numirahu ena anecaqueneanahi eta viyehe. Téhesera te mamirahu ema Viya eta nacayaseserehiraya. Éma téchavacahi éna. Étisera éti, échahi ena echamurianahi. Éti eyaserejiricacayare étijicacaya. Eta tacahe, ecaevuisihayare ema mácara téjecapavahi te emuri.

6

Vahi táurica vimetauchacacahini te namirahu ena máehicarahanahi ema Viya

¹ Énerichuvare nuvaraha numetacahe eta apana: Te natiarihinapuca ena echamurianahi navaraha tímetauchacacana, vahi távaraha nayanahini nayehe ena tuparairucana máehicarahanahi ema Viya. Étarichu nacami-rahucacaiyayare te emirahu eti nachamuriana. ² Tativayare échava eta

machaneraherahi ema Viya. Étjivayarehi étupiricaca eta íchavaquenevanahi. Vahi étinayare etanuca ena masuapajirairahanahi taicha járajapayare eta sáchezare ticayaseserehianaya te emirahu éti ena masuapajirairahanahi. Puítisera eta íchavaquenevanahi ánichichaqueneanahi, éti tatu-paraca étupiricaya. ³ Écharichu éti tituparacahaviyareva ticayaseserehianayareva eta ángeleana te vimirahu. Tacumapurujichapucaini eta tayeheanahi te juca vítaresirahi, vahi vicuituruequenehahini. ⁴ Puiti éti, te tatiarhipuca eta íchavaquenevahi tayehe eta juca vítaresira puiti, váhiquenesera etanucaimahi ena emetauresihahini nácani vahi énaparacaimahi nayehe ena echamurianahi. ⁵⁻⁶ Némechahe eta juca, nímaha te etsirihapuca. Váhiquene táuricahini mayanahini mácani vichamurihi matanucahini ena tuparairucana máehicarahanahi ema Viya. Tasapiahahini étainahini mametauchihahini mácani machamurihi. Cúverarecapa nacuijahini te etaracu mácani émanainahini vahi macuituruequenehahini mayasesereca jácani téchacareanahi nayehe ena vichamuriana.

⁷ Vahi táuricahini íchahini eta juca. Étjicacainahini eta echamuricacahi evarahapa ejararecaca. Tivarahacarepana eta eratahairaina ecamicha, tayanapanerine ecatajivahi naicha, tiámeyechaheanapuca. ⁸ Étisera etiva-vaicapa íchahi eta juca émecatajivachacacapa. Vahi táuricahini eta juca; nácapiahahini énahini echamuriana ena etupiaruanahi.

⁹⁻¹⁰ Váhipuca échahi éti eta namaitujisiravaya tisiapana te mávasa ema Viya ena tichanahi eta tamauriqueneana. Taicha yátupihí eta namaitujisiravayare tisiapana ena ajairana tivehanahi esu apana esena apayena énapa ena vahi nayenacacaquenena, énapa nácani tivehana esu esena amaperu máimaruchaha. Énerichuvare ena esenana, váhivare títujicavanaimahi tisiapana te mávasa ema Viya, súcani tivehahi ema achane vahi suímaquenena, ésupa súcani amaperu esena namutuchucha suvehapahi. Váhivare títujicavanaimahi tisiapana ena nani tivehacacana ajiracacana, énapa ena nani ticasiñarajiana, ena nani tiámerahiana, ena nani ticapinarurahiana, ena nani ticavaharasiana, ena nani titupiarahiana, énapa ena nani náipicararecapahi eta námeresirayare. ¹¹ Ene ecaheni éti eta iásinequenéni. Puítisera títsivachavaipahi eta ítaresira, sántuheripa maicha ema Espíritu Santo, ejacapacarepa mayehe ema Viya, máichavenehi ema Viáquenu Jesucristo.

Tiávaháchaviripa ema Espíritu Santo eta te viáquehe viti machanerana ema Viya; tásiha, tituparacahavipa tacuija eta vituhusivaina

¹²⁻¹³ Puiti jucarihivare eta numetacaheyare. Nararhipuca ena nacahehi: “Núti néchinava eta nítaresirahi. Eta náquehe tajamurachahi eta tavarahaqueneanahi. Eta tinicacare táicuchihí eta viami. Eta viami tatuparahaichuhi tajacapaya eta vinicaqueneyare. Ene tacahe eta náquehe tavarahahi nuveha esu esena tacutihí eta viami tavarairahi tinica” nacahepa. Nútisera te nupanereru, vahi énéna tácahe. Yátupi víti véchinavahi. Váhiserá távarahacarehini támutuhichaini víchahini eta tavarahaqueneanahi eta viáquehe, vivayuchahini víchahini eta tamauriqueneana. Yátupi tísapacarehi eta vinisiraya eta tinicacareana. Tatiarhisera eta sáchezare, vaipa vácamunaimahi eta tinicacare, maicha ema Viya. Ema Viya máepiyacahi eta viáquehe, mavarairahi vicaemataneacayare éma. Émapa téchahavihí puiti eta juca vítaresirahi. Vahi étainahini táemepiyacahavihíni eta víchiraya eta pecatuana esenamarehavinahini. ¹⁴ Ema Viya macaehepucahi ema Viáquenu Jesús

te máecari. Ene vicaheyare víti eta macaechepusirahaviyare víti apanava, taicha tétavacavahi eta máitupajjiasiravahi.

¹⁵ Écharichuhi emutu éti, eta iáqueheana mayeheripahi ema Cristo. Émaripahi téchahehi. Etiarhipucasera ímijachapuca táuricachini vímicachanechahini eta viáquehe tayehe eta suáquehe esu esena túhusi. Váiparinéhi táuricaímahi. ¹⁶ Nuvarahavare némechahe, te mavehahi ema achane súcani esena túhusi, tiánecacahi eta náqueheana eta nacamujichiracacahi. Acane, ema Viya máijaracapa esu Eva mayehe ema Adán. Tásiha, eta Sagrada Escritura, ani tacahe: “Te tivehacacapa, tímicutijiricavapa étanarinéhi eta náqueheana”. ¹⁷ Ene tacahehi eta vítaresira mayehe ema Viya, eta mávahásirahavi ema Viáquenu, eta viáchaneva tacachaneripa éma.

¹⁸ Eta tacahe, ejaneacava yátupina, machu iáquipaicava tayehe eta túhusicare. Tamutu eta pecatua náchaqueneanahi nácani achaneana, tajararecahi eta náchanevapachu. Tavetijipa, mácani achane tivehahi esu esena vahi mayenaquenenahini máimijararechavare ichape eta máquehe. Ticajachacareinehi eyehe éti eta juca. ¹⁹ Écharichuhivare éti eta mávahásiraheeripa ema Espíritu Santo eta te iáqueheana, taicha mavaneruichuhi ema Viya eta mávahásiraheyarehi ema Espíritu Santo. Vaipa étinahini écha eta iáqueheana. ²⁰ Taicha mavachareruhehi ema Viya. Ichapemurihi eta macatajivairahi íchavenéhi éti. Puiti, eta iáqueheana éta eta iáchanevana mayeheripahi ema Viya. Tacahe, puiti, ejaneacavapa eta ítaresiranahi te namirahu ena achaneana, apaesa namutu nacunachaya ema Viya.

7

Eta maconsejarapi ema Pablo nayehe ena máimaruana, énapa ena nacaimaqueneana

¹ Tiuri puiti, nujicapaheyare eta juca eyaseresiranuhi te ecartane. Yátupi tíurihinéni máyénarénahini mácani achane. ² Táichavenesera eta tavayuaráivahi eta pecatu, ticamunucarehi ena ajairana nayenapachuina, énaripa ena esenana ticamunucarehivare náimapachuina. ³ Mácani achane te sutiarhipapuca esu mayena, tacamunuhi máitachayare eta máitátiraya máemunasiraya esu mayena. Ésuripa esu esena te ticaimaripapuca, énerichuvare suítauchayare eta suítátiraya suémunasiraya ema suima. ⁴ Taicha esu esena vaipa ésuinahini téchinava eta suáquehe. Émapa téchahi ema suima. Ene macahehi ema achane, váipavare émainahini téchinava eta máquehe. Ésuripahi téchahi esu mayena.

⁵ Éti ecaimaqueneanaripa, vahi ecuepurucaca tayehe eta iánesiracacairana. Téhesera tatiarihinapuca eta eyujarauchiravayare me Viya, ecuticacahipuca eta epanereruhi, tísapacare ínajica ánipina eta iánesiracacana. Te táequenénapa, táuricavare échávauchacacavare, apaesa ema Satanás vahi macuituracahe eta máimijamurachirahe ena apanana.

⁶ Tiuri, eta juca numetasirahehi, vahi nútina nucavanairipi. Nísapasera eta énéna ácahe. ⁷ Nuvarahahinéni ácutinuhini nútí eta mayénarenuirahi. Vájarcasipachusera me Viya eta vítaresiraya. Nararihi ena ajairana máyénareana eta náitaresira. Nararihivare ena esenana máimaruana eta náitaresira. Nararihivare ena apamuriana máijararuichu ema Viya ticaimana.

⁸ Énaripa ena nácara vichamuriana máyénareanachaha, énapa ena máimaruanaachaha, énapa ena tépenaimana, tíuripanahinéni nánasihini

máimaruanaínahini; nácutinuhini nútí. ⁹ Étasera te vahi náratahahi ticaratacavana, tacamunuichuhi ticaimanayare, apaesa vahi nacuepujuquichava tayehe eta pecatu.

¹⁰⁻¹¹ Tásiha puiti, nutuparacavacayare ena nacaimaqueneanaripa. Ema ajaira vahi macuinajica esu mayena. Esu esena váhivare sucuinajica ema suima. Eta juca vanairipi tásihaquenehi mayehe ema Viáquenu, vahi tásihaquenéna nuyehe nútí. Téhesera natarihnapuca ena vichamuriana náinajicaca, vahi táuricahini nápechavahini nacaimahini, nacacachanehi-pucaini. Tacamunuhi tichavauchacacanayare tivehacacana.

¹² Tiuri puiti, tájinachaha vanairipina tásihaquenéna me Viáquenu tayehe eta náinajisiracaca ena nacaimaqueneana. Níjaracahesera eta juca nupanereru nútí. Te matiarhipuca mácani vichamuri esu mayena vuíchaha vichamurinahi, te tiúrihipuca eta nacachaneracacahi, vahi táuricahini máinajicahini ésu. ¹³ Énerichuvare, te sutiarhipuca súcani esena vichamuri ema suima vuíchahavare vichamurinahi, te tiúrihipuca eta nacachaneracacahi, váhivare táuricahini suínajicahini éma. ¹⁴ Taicha ema suima, ichape eta majapanucareva me Viya táichavenehi eta sucaimairahi esu mayena. Énerichuvare esu esena mayenahi ema vichamuri, ichape eta sujapanucareva me Viya táichavenehi eta mayenairahi ema achane vichamuri. Énaripa ena nachichanaveana majapanuhivare ema Viya náichavenehi ena ticachichana, vaipa náepurucarehini me Viya. ¹⁵ Téhesera mácani vuíchaha vichamurina suímahi esu vichamurihí mavarahapuca máinajica esu mayena, suísaparine máinajica. Ema Viya vahi macavanairipi eta suíchejiricahini éma, mayanarine. Taicha ema Viya mavarahahi viúriyare, tacuijapa tahapapiricahavihi eta vipaneruana. Énerichuvare súcani esena vuíchaha vichamurinahi mayenahi mácani vichamuri, te suvarahapuca suínajica ema suima, énerichuvare máisaparinevare suyana. ¹⁶ Taicha piti esena, vahi pecha te pimaitacayarepuca picajayayasamurecha ema pima eta máehisiraina ema Viya. Pítiripa piti achane, váhivare pecha te pimaitacayarepuca picajayayasamurecha esu pitiyena eta suéhisiraina ema Viya.

¹⁷ Ema Viáquenu tíjaracahehi eta ématanerepianahi te tíchuhahenapa. Etuparahapachuhi eta ématanerepiya. Váhiserá ínjicaimahi, ímiyanavare ítauchaya eta etuparahanahi. Étara eta juca nuvanairipi nayehe ena vichamuriana ticavasanahi te tamutu avasareana. ¹⁸ Nácani ticamarcanaripa te máichuhavacapa ema Viya, vaipa táuricahini nacaepahavahini eta nacamarcairahi. Nácani mámarcareanarichaha te máichuhavacapa ema Viya, vaipa táurica nacamarcahíni. ¹⁹ Tájina vahi étaparacaina te vicamarcahipuca, étasera tivarahacarehi vicaemataneacayare eta mavarahaqueneanahi ema Viya. ²⁰ Namutu nácani máichuhaqueneana ema Viya, vahi náitsivachaimahí eta náematanerepianahi náíjaracahi te máichuhainapa ema Viya. ²¹ Te ecaquenuhipuca éti te tíchuhahenapa ema Viya, vahi ecueñamava eta ecaquenuirahi. Téhesera ímaha eta íuchucuiraina, tájinachucha táichava. ²² Taicha mácani achane músuhi eta máitaresira, tayanapanerine matiarihinahi ema máquenuinahí; téhesera te mamirahu ema Viya, túnúnaripahí mácani achane nájina máquenuinahini eta máitaresira. Puiti ena apinana mavanaranaripahí ema Viáquenu Jesucristo, taicha ticuticacanaripa eta nacaemataneasiraipa éma. ²³ Taicha mavachareruhehi ema Viya. Ichape-murihi eta macatajivairahi íchavenehi éti. Puiti machaneraheripa éma.

Eta tacahe, te navarahapuca nayurucahe ena achaneana, vahi ecuisapava nahapapicahe eta ecaemataneasirayare ema Viya. ²⁴ Eta tacahe, nuparapenaveana, ímíyanavayare ecaematane mayehe ema Viya. Ítauchayare eta ématanerepipachu íjaracasíhi me Viya.

²⁵ Tiuri puiti, tájina vanairipina tásihaquenéna me Viáquenu nayehe ena amaperuana máyéñareanaríchaha énapa ena máímaruanachaha. Nútisera numetacaheya eta nupanereruhi. Nuvarahasera esuapanu taicha nútí nucaímitucasiquenehi mayehe ema Viáquenu, táichavenehi eta majapanuiranuhi. ²⁶⁻²⁷ Puiti juca vítaresirahi, tétavícvahi eta vícatajívairahi. Eta tacahe, németeaca nútí tíuririchu nánasi ena ajairana nayehe ena nayenana nácani nacayenaqueneanaripahi. Vahi nacuinajicaca. Énaripa ena máyéñareanaríchaha, vahi nacutanuca ena nayenaina. ²⁸ Mácanisera sutiarihi esu mayena, tájinachucha pecatuína eta mavirahi esu esena. Ésuripa súcáni amaperu esena, te tatupíruvahi eta sucaimaira, tájinachuchavare pecatuína eta sucaimairahi. Táitsivasea ichapeyare eta nacatajívairaya eta náitátiracacaya, tavetijípa te natiaríhinapa ena nachichanaveanaya. Eta tacahe, nuvaraha numetacahe apaesa vahi ecucatajívahini.

²⁹ Tiuri, nuparapenaveana, nuvaraha numetacahe ticutimahi ánipirine eta juca vítaresiraya puiti juca vícaíjuheyare. Eta tacahe, táurica eta íjarasíravahi yátupina eta ecaemataneasira ema Viáquenu. Étiripa, éti natiarihi ena eyenana, vahi tacucarichu eta ecañamasirava nayehe ena eyenana, énerichuvare me Viya. ³⁰ Te jararihipapuca eta tacáíyasíráhe écatísamurepuca, vahi ecuisapa tahapapícahehíni eta ecaemataneasira ema Viáquenu. Te jararihipapuca eta tacaurísamurechirahe, váhíivare ecuisapava tahapapícahehíni. Te ecaímahaquenehipuca, tísapacare eta ecamapura eta ímahaqueneana eta máíjararuhehi ema Viya, váhíivare ecuisapa tahapapícahehíni eta ecaemataneasirahi ema Viáquenu. ³¹ Nuvaraha táuríhíni eta ítaresirayare te juca. Váhisera ecuisapava ecañamaracava eta ecayeheirayare eta ímahaqueneana te juca apaquehe. Taicha tamutuyarehí témitiaca te táitecapapa eta táitavíraya eta juca apaquehe.

³² Eta tacahe, vahi nuvaraha ecañamaracava tayehe eta júcana, taicha mácáni achane máyéñarehí, tájina tahapapíricahíni eta macaemataneasirahi ema Viáquenu, mavarahahi máícutíchíravaya eta macurísamurechíraya ema Viáquenu. ³³ Mácanisera achane te sutiarihipa esu mayena, ticañamaracavainapa taicha eta máitátírayare esu mayena, mavairahi macurísamurechaya ésu.

³⁴ Ene nacáhehí ena esenana. Vahi tácutícaca eta napanereruana suyehe esu esena sucaímaquene ésupa esu esena máímaruchaha. Taicha súcáni máímaruhi tahapasamurechahi eta suítátíraya ema Viáquenu, suvarairahi suítauchaya eta mavarahaqueneana. Suíjaracayarehí ema Viya eta suáchaneva étapa eta suáquehe. Ésusera esu esena sucaímaquenepa tahapasamurechapa eta suítátíraya ema suíma, suvarairahi sucurísamurechaya éma.

³⁵ Eta júcana nuconsejarapianahi eyehe, nuvaraha eta táurívaina eta ícharacavaya. Vahi nuvaraha nupamícahe tayehe eta tacajeraqueneana. Nuvarahasera tacuíjahíni eta tíhapapícahe eta ítátírayare ema Viáquenu.

³⁶ Tiuri puiti, eta juca nuconsejarapi mayehe mácáni achane te sutiarihipuca esu machíca esena máímaruchaha. Te tahapapíricaípapuca eta sucaimairayare esu machíca, táichavenehi eta suítanahasíraípa; te tíuríhi eta

máimairahi, máisapayarehi ticaima esu machicha. Tatupiruvayaresera eta sucaparaperayare. Tájinachucha táimanena; váhivare pecatuina. ³⁷ Mácanisera achane, te tájina máichiravainahini, nájinavare tipamicaimahi; te mavaraha-papuca suánasi máimaruina esu machicha, tiúrihi maicha. ³⁸ Tacahe, tiuri máichayare mácani achane máimachayarehi, tatuparacahi ticaparapeyare esu machicha. Mácanisera vahi máimachahini esu machicha, éma tiúripána maicha.

³⁹ Esu esena ticaima tatuparacahi suítauchayare eta suíjarasiravahi ticaima, sunasirichuya eta mayehe ema suima eta náitairesirana. Tiámainucava te táitecapapa eta máitaviraya ema suima, tiúchucuhapa ésu. Ésupa téchinava eta suítaresirayare. Tísapacarepa eta suápechava sucaima. Tacamunuhisera mácani vicutiquenehi vichamurihi tisuapajirahi me Viya. ⁴⁰ Tiápajucavasera tiúripanaya te suánasipa máimaruina. Eta juca tásihaquenepa te nupanereru. Németeacahi núti tétupicavapahi eta nuconsejarapiana taicha mávahárunuhi ema Espíritu Santo.

8

Éma Pablo mametacavaca eta nayaseresirahi te tiúrihipuca nanica eta tinicacareana tacayujarahuquene te tamirahu eta nasiñarajiana ena achaneana

¹ Puiti numetacaheya eta táicharacavahi eta enisira eta tinicacareana nayujaraurehi te tamirahu eta nasiñarajiana ena achaneana. Yátupi vimutu vímatiequeneha tájinachucha táimanena eta juca. Váhisera vácasíñavaimahi eta vítusirahi. Tacamunuhisera tajurucaya eta vémunasiravaca ena vichamuriana, vímicatasairacaya eta véhisira ema Viáquenu. ² Taicha nararihi ena ticasiñavavaicanapa, tímijachavanapa náimatiequeneha tamutu. Eta juca náichahi táimerecahi vuíchaha náitucahini, vuíchaha nacapayayaracahini eta mapanereru mácani yátupipa máituca. ³ Nácanisera yátupihí témunacanahi ema Viya, éta tímicaecherachahi eta machichanaveanairahi éma.

⁴ Tiuri puiti, numetacaheyare eta juca nuconsejarapi tayehe eta juca enisirana eta tinicacareana tacayujarahuquenehi te tamirahu eta nasiñarajiana ena achaneana. Tájinachucha táichava, taicha eta nasiñarajiana vahi yátupinahini víyanainahini te juca apaquehe, taicha émanarichuhi ema yátupiquenehi Viya. ⁵ Ena achaneana náimijachahi camurianahi ena víyana te anuma, étaripa te juca apaquehe. Namaveracapa ena náquenuanahi nayeheanahi viya, camurianapa naicha eta nasiñarajiana. ⁶ Vítisera viti vímatiequenehanahi émanarichuhi ema Viya Vicaiyaquene te anuma. Éma Jesucristo, émanarichuhi ema Viáquenuhi. Éma Tata Vicaiyaquene mapanerechapa eta tatiarihiyare tamutu eta vímahaqueneanahi; vítipa vimutu achaneana, mavaraha vitarihiya eta vicaematanesiraya éma. Tásiha, ema Machicha tépiyacahi tamutu. Puiti émapa téchahavihi vimutu. Éma, tíjaracahavihi eta arairu vítaresira.

⁷ Tisimutuanasera ena vahi náimatiequeneha eta juca. Énaripa ena vichamuriana, nararihi ena vuíchaha náemitisicahini eta navaraira napi-caucha eta nasiñarajianaini. Éna, tisamavanahi vaipa náetupicavanahi eta nanisirahi eta tinicacare tacayujarahuquenehi, vahi táuricahini eta nasamirahi. ⁸ Numetacahesera puiti, vahi étaparacaina eta tinicacare, vijacacacareyare me Viya táicha. Váhivare étaimahi tiúrichahavihi mayehe ema Viya, te vahi vinicahi. Váhivare tijararecavimahi mayehe te tiúrihipuca eta vinisira. ⁹ Eta tacahe, ecauneuchava yátupina machu émejecapavacha

ena apamuriana vichamuriana vuíchaha náimatiequenehahini eta júcana. ¹⁰ Étiserá éti ímatiequeneanaripa, te ísapavayarehipuca enica eta tinicacare nayujaraureanahi te tamirahu eta nasiñarajiana; tacahe, te máimahahepuca ema echamuri, énerichuvare tísapavayarehi tinica. Táitsivahiserá tipicacarcavahi jácáni te masamure. ¹¹ Eta tacahe, échapavaya éti tayehe eta ímatiequenehairaripa machu émejecapavacha ema echamuri mácáni vuíchahapiravahi máimatiequenehahini eta júcana. Émarichuhi iúmurivahi eta mavacharesirahehi ema Cristo eta máepenirahi te crusu. ¹² Éti, te ehapapicapuca eta táurivahi eta napanereruana ena echamuriana, éti ecapecaturaipa eta mayehe ema Cristo, taicha eta émejecapavachirahi ena echamuriana. ¹³ Ácutinu eta juca nuyeherepihi: Te nútinahipucaini némejecapavachaini mácáni nuchamuri táichavene eta nunisirainahini eta vaca, váhirine nuni-caimahi, apaesa vaipa nucemejecapavachahini éma. Éti apanava, ene ecaheyare. Váhivare ecumejecapavacha ena echamuriana.

9

Ena apóstole Pablo, tatuparacahi náitátiyare ena máimitureana

¹ Núti, nájina náquenuinahini te juca apaquehe. Yátupi apóstolenuhi mayehenuhi ema Viáquenu Jesucristo. Nucutinasivacahi eta návacurehi nayehe ena apamuriana apóstoleana taicha nímahaquenehi ema Viáquenu Jesús. Étiripa, etupiruvahi esuapanu eta nímitusirahehi. Éta tímereuchanuhi eta táurivahi eta nucaemataneasirahi ema Viáquenu. ² Tayanapane nacañajivarinepuca nácani vahi tisuapapajicanuanahi eta apóstolenuirahi. Étiserá esuapanuyarehi, taicha etiaríhi eti nímitureanahi, étira ímereuchanuhi eta yátupirahi apóstolenuirahi mayehe ema Viáquenu. ³ Étara nucatiuchiavahi eta juca nayehe ena tépurujiricanuanahi.

⁴ Éti tituparacahehinéni ítátinuhini núti tayehe eta nunaquenehepi táichavenehi eta apóstolenuirahi. ⁵ Énerichuvare tituparacahehi ítátihivaréni te sutiaríhinahini esu esena nuyenainahini, súcani nucutiquenehi tisuapajirahi. Tácutihini eta ítátiravacahi ena esenana nayenanahi ena apamuriana apóstoleana, émaripa ema Pedro, énapa ena maparapenaveanahi ema Viáquenu. ⁶ Éti, ímijachaipapuca núti émapa ema Bernabé, vicarichuhi vahi tatuparacahavihini eta ítátirahavinahini eta vicametairuirahi. ⁷ Puiti nuvaraha nímicutiarachinaheyare eta nacaitaticasira ena ticaematanagerahiana. Aní tacahe: Namutu ena suntaruana ticaitaticasianayarehi nayehe ena comandanteana. Énerichuvare, ema tisucurecahi eta tinicacare, tatuparacahi masamapuhayarehi eta tahi eta masucureanahi. Émaripa ticayehehi vaca tatuparacahi máerayarehi eta tacheneama eta mavacane. ⁸ Eta juca níchirahehi, vahi nácarichu núti nucapanereruhi eta júcana. Énerichuvare eta Sagrada Escritura májurehi ema Moiséini tíametacahavíhivare. ⁹ Anípa tacahehi eta táechajiriruvahi: “Vahi picuitisumucha eta pivuierana, te ticaemataneahi taicha técuhanapahi éta”. Táitaurevaquene ema Viya vahi tácarichuhini eta vuyé eta máechajisihahi. ¹⁰ Énerichuvare víti mayunacahi te máechajiriruvahi. Mavaraháhi vícaenicasiyare vímutu víti vícaematanagerahiana. Tacutihí mácáni achane ticaematanagerahi. Macaemataneacahi muraca eta máesane, mavarairahi máimaequenehayare eta távameanahi eta máesane. ¹¹ Ene vícahehi víti eta vévasirahi eta máechajiriruva ema Viya te

esamureana. Éta tiúrichahehi. Tásiha, éti ecutinapa eta sucureca tímecavahi eta táhi. Tájina táichava eta ítátirahaviyarehi víti. ¹² Ena apamuriana ticasíñavanahi eta eyehe. Tásiha éti, tiúrihi eta ítátirahi. Vivetijipa víti vítáticarehi eta eyehe.

Váhiserá vávarahahini vicasiñavahini víti eta eyehe, viyaseacahehine eta ítátirahavinahini. Vicamichahi tamutu, vimavarairahi tatiarihinahini jácane apanainahini tahapapiricahini eta esamirayarehi eta máechajiriruva ema Cristo. ¹³ Écharichuhi éti eta mavanairipi ema Viya nayehe ena téchapajiricana eta mayehe Templo, nanicayarehi eta tinicacare námaqueneasana ena achaneana nájaracasiruanahi ema Viya. Cájaracasianayareva éna eta vaca táeche eta námavahuanahi ena achaneana. ¹⁴ Ene tacahehi eta mavanairipihine ema Viáquenu eta viyehe víti vicametarairuanahi eta tapachinaquene máechajiriruva, tituparachavihi vijacapayarehi eta vinicaquene taicha eta vicametarairuirahi. ¹⁵ Nútiserá tájina nímatiyahini nuyaseacahehine eta ítátiranuinahine. Étaripa puiti te juca nucartane, váhivare nuyaseacahe íjaracanhine. Nucamichahi tamutu. Tiúrinéhipucaini népenavanehine, machu tachimaracancuaru táitava eta juca núsamurevahi nútí tamajinairahi nuyaseacahehine.

¹⁶ Nútí vahi étaparacaina nucasiñavahi taicha eta nucametarairuirahi. Nutuparahaichuhi eta juca. ¡Páurechichanusami te némunahacava níñajica eta juca nucametarairuirahi! ¹⁷ Taicha nútí, vahi nútíjivainahine níjaracavahine mayehe ema Viáquenu eta nucametarairuiraya, étapapucaini nujacapihahine eta nuvachayarehi eta mayehe. Nuvanecasivahiserá me Viya eta matuparasiranuhi eta juca némataneyarehi. ¹⁸ Ichapesera eta nuvarairahi eta nucametarairuirahi, taicha tíjarahi te nusamure eta nuratahairahi nucametarairu, tamajinairahivare nuyaseacahehine eyehe éti. Vahi nupamicahehine eta ítátiranuinahine táichavenénahine eta nucatuparairahi eta apóstolenuirahi.

¹⁹ Nájinahinéni te juca apaquehe napamicanhine eta nucaemataneasirainahine táichavénehipucaini jácane náitátiranuhine, éñainahipucaini náechanuhine. Nútiserá níjaracavahi nítauchayarehi tamutu eta nucamunucarevahi nayehe ena achaneana, apaesa étainahipucaini níurusihavacahine ena nasimutuvaqueneana, machanerainahine ema Cristo. ²⁰ Étaripa te nítecapauchavacavare ena nujaneanana israelítana, ichaperinehivare eta nupicauchiravacahi éna, apaesa najimuyasamurepupucaini eta náehisirainahine ema Cristo, étainapupucaini níurusihavacahine éna. Ena nani, ichape eta nasuapirahi eta mayeherepiana ema Moiséini. Tásiha, te nucainunavaca éna, tájinavare vahi nucaecahihine eta nayeherepihi, nupicauchahivare éna apanava. Váhine nítiparacainahine tayehe eta náehiruhi. ²¹ Tatiarihiserá eta yátupiquenehi néhiruhi nuvanahihine mayehe ema Viya, májararunuhi ema Cristo. Énerichuvare te nucainunavaca nácani apavasanana máehicarahanahi eta mayeherepianahi ema Moiséini, váhivare nucaecahivaca. Nupicauchahivare éna, nuvarairahi nucajimuyasamurechavacahine éna apanava. ²² Te nucainunahivarepuca ena vichamuriana nácani vuíchahine náitamuturucahine náimatiequenehahine eta véhisirahi ema Cristo, váhivare nucaecahivaca eta namaimatiequenehairichaha. Ichaperinehi eta nujapanuiravacahi. Nímicatavacapa, nuvarairahi náimatiequenehapaini yátupinahine eta véhiruhi. Namutu ena achaneana,

nujanuvacahi. Nutanucahi eta nucajimuyasihayare eta nasamureana apaesa nanerejicavapaini náehicahini ema Cristo, machanerainahini éna. ²³ Núti nítauchahi tamutu eta júcana apaesa najacapa eta tapachinaquene máechajiriruva ema Viya, apaesa vácuticacapai ní vámutuhini vijacapa eta viúrivayare maicha ema Viya.

²⁴⁻²⁵ Écharichuhi éti, ena ticavijarurahiana pelota, tijaneacavanayarehi muraca, ichape eta ticaravahunumanayare apaesa túmeanainapa eta naratahairaya navereasihaya ena nánaranayarehi. Te vahi najaneacavahini, vahi tiverearecanaimahi. Ene ecaheyare éti, ichape eta étumechiravayare apaesa tauri eta ecaemataneasiraya ema Viáquenu, ejacapihainasarepa eta etuparahahi mayehe. Eta navereareruanahi ena ticavijarurahiana, vahi tánasimahi. Témitiequenehavaneyarehi. Vahi tácutimahi eta vijacapaquenezare me Viya. Éta, tájinapa ticamitiequenehaimahi. ²⁶ Nútiripa eta nucaemataneasirahi ema Viáquenu, ichape eta nupamisiravahi, taicha eta nímatirahi eta mavarahaquene. Vahi némpururecavaimahi. ²⁷ Nucaratacavahi muraca. Vahi nusuapahini eta tajamurachaqueneanahi eta náquehe. Nupamicahi eta táemisisirainahini eta tamauriqueneana, machu néjecapavapapucaini, tásiha váipapucaini nucujacpahini eta nícutihihi. Ichape eta nutsirihacarevapapucaini, tavetijipa eta camurianairahi ena nímitureana tayehe eta véhisira ema Cristo.

10

Ena Pablo maconsejachavaca vahi nacucuti ena ticasíñarajijiana

¹ Nuparapenaveana, nuvaraha némechaheyare eta náicharacavahi acane ena víachucanaveanaini máumurivanaini ema Moiséini. Eta náehisirahi éma, tatiaríhi eta úcaji tímícauchavacapai namutu éna. Eta nánuesirahi eta mar ticaíjarehi Títsiama Une, namutu náimahahi eta tájjíivahi eta nánuesiraya. ² Namutu ena nani tjaracavanahi eta náítauchiraya eta náehisiraya ema Moisés, eta nánuesirahi eta ichape une mar, náehisirahi eta úcaji*. ³ Énerichuvare namutu ticuticacanahi eta nanisirahi eta tinicacare tásihaquenehi me Viya. ⁴ Namutihivare térana eta une tásihaquenehi me Viya. Eta juca une náeresapacahi éna, táuchurehi tayehe eta mari, maicha ema Cristo. Émairahi ema tnapumirauchapahi éna, máitátivacapai eta napaisirapahi. ⁵ Tamapurujihisera eta majaneasiravacahi ema Viya. Vahi émainahini éma náesenicahini. Tájinachucha vahi nacaurisamurechahini éma. Eta tacahe, máicuñacavacapa ema Viya. Namutuyaréni tépenaracánahi tayehe eta mávapahi apaquehe. Tiúchucuhanahisera ena nachichanaveana.

⁶ Ena víachucanaveanaini, táimicuñacahi eta najamurachirahi eta tamauriqueneana. Étara eta juca ticauyayacarehi eta viyehe, énémahihávinahini víti apanavare vácutihini éna eta najamurachirahi eta tamauriqueneana. ⁷ Váhivare eucicutipa éna eta nacasiñarajirana. Échava eta Sagrada Escritura ani tacahehi: “Ena achaneana náichapa eta napiestachirahi eta nasiñaraji. Ticaejacacanapa eta nanisiraya, téranapa. Téchepucanapa trímaicanapa te tamirahu eta nasiñarajíhi” tacahepa eta Sagrada Escritura. ⁸ Váhira énéna vicucahe víti. Váhivare vicuveha esu apana esena. Tacuija eta vituhusivaina. Machu vácutiriana éna eta nacaicuñairahi táichavenehi eta náichirahi eta juca

* **10:2** Ena Pablo máimicuticha eta nánuesirahi eta ichapequene mar, tímícutijiricavahi eta nacaicachasihini te une, étapa te jara úcaji.

tamauriqueneana. Tépenaracanapa. 23,000 achane ena tépenanahi te jena étanaquenehi sache. ⁹ Váhira vicuyururujica tayehe eta mapanereruanahi ema Viáquenu. Ena nani tiyuruchavanahi, vaipa nasuapahini ema Viya. Tásiha, máicuñacavacapa éma, táechucavacapa eta quichare. Tépenaracanapa. ¹⁰ Váhira tacucarasacava eta échajisirana mayehe ema Viya. Vahi ecucuti eta náejecapiravahi ena viáchucanaveanaini. Macapapajiruanahi ema ángele mavaneruhi ema Viya. ¹¹ Tacahehira eta juca náichavaquenevahi ena viáchucanaveanaini. Púiticha tanasihi te ajureca téjacahi tamutu maicha ema Viya. Tamutu eta juca témechahavihi víti, ticatsimavacarehivare viyehe víti vinecapaequenehanahi eta juca táitavirainapa puiti juca sácheana vicaijuheyare. ¹² Éta tacahe, vahi ecuimijachahini tájina tiáquipaicahena. Tatuparacahi ecauneuchavayare tayehe eta tamauriqueneanahi. ¹³ Puiti juca eta vítaresira, jararihi eta tavaraha témejecapavachahavi. Váhiserá ecuaramihini, taicha eta tacahehi eta náicharacavahi namutu ena achaneana te juca apaquehe. Ecasiñavayaresera muraca mayehe ema Viya, taicha yátupi eta macasiñacarevahi. Éma, vaipa máisapaimahi távayuchavahichaini eta tapamisiraha. Jéhesare éma, tíjaracahénapa eta etumevayare, ecamichirayare tamutu.

¹⁴ Tásiha puiti, eti nuparapenaveana némunaruqueneana, érajicavayare nayehe ena ticasíñarajijiana. ¹⁵ Éti ímatiequenehahi tamutu. Eta tacahe, numetacahe apaesa táuri eta epanerequenehairaya. ¹⁶ Étaripa eta juca vérasahi vimutu viyujaraureasahi te vinicayare, étarichuhi táicutiarahi eta máitine máepusairuhi te crusu ema Viáquenu Jesucristo. Étaripa eta pan vinicaqueneasa viyuvetuhejiricacahi, étarichuhivare táicutiarahi eta máeche ema Viáquenu. Eta vérirahi étapa eta vinisirahi, táicutiarahi eta víúrujasiracacahi te máijare, tásiha éma tiávahácahavihivare vimutu viti víúrujicacacahi éma. ¹⁷ Yátupi apanapanenejihavihi víti, visimutuvaqueneanahi. Émanarichuhisera emá víavaháruhi. Eta vinisirahi eta pan, étarichuhi te máijare eta viyujarauchirahi.

¹⁸ Eta juca víúrujasiracacahi, vicutivacaipa ena nujaneanana israelítana. Éna, tíúrujicacacacacahi eta nanisiraya eta tacayujarahuquenehi me Viya eta tinicacare, navarairahi mávahácavacaini ema Viya táichavenehi eta nanisira. ¹⁹ Tiuri puiti, vímatiequenehahi tájinachucha táimanéna eta vaca nayujaraurehi náijaracasiruhi eta nasiñaraji ena achaneana. Tacutirichu eta vaca mayujaraurehi. Taicha eta nasiñaraji, tájinachucha tasamacarevainahini. ²⁰ Nuvarahasera témechahe, eta nayeherépiana ena nani máimatirahanahi ema Viya, énachucha náijaracasichahi ena éreanana eta tinicacare. Vahi émainahini ema Viya náijaracasichahini. Eta tacahe, vahi nuvaraha ímicasiapava éti eta nayehe, machu náimivehahe nayehe ena éreanana. ²¹ Vahi táuricahini apiquerehahavinahini: eta véhisirahi ema Viáquenu, tásiha véhichahivarepucaini ena éreanana. Te enicayare eta tinicacare, te érayarepuca, tatupírúva eta ecurujisiracacaina mayehe ema Viya. Mácarichu émaina ecasiña. ²² Machu ímiyusemaca ema Viáquenu, taicha vahi áratahaimahi ecanara éma.

Vímerecaya eta vémunaravanaya nayehe ena vichamuriana

²³ Yátupinéni víti véchinavahi, viyeherepipachuyarehi eta vinisiraya, váhisera tácuticacahini táetupicavahini mayehe ema Viya, váhivare tácuticacahini táimicatacavahihini eta vipauchiraya ema Viya. ²⁴ Tásiha,

nuconsejachahe puiti: Vahi ácarichuimahi eti iúrichavayarehi; énerichuvare etanucayarehi eta táurichiravacayarehi ena apamuriana.

²⁵ Te enicayarepuca eta vaca tíasiha te mercado, vahi ecuavamirahu eta enisirayare, váhivare ecucamesa ecuecha te ticayujarahuhipuca eta vaca, apaesa tacuija tahapasamurechahe. ²⁶ Taicha ema Viáquenu, éma tépiyacahi eta apaquehe, étapa tamutu eta távapahianahi. Vituparahaichuhi eta vinisiraya máicha.

²⁷ Títecapa te náichuhahepuca enica nácani vahi vichamurianainahini, te ísapavayarepuca tíamaheana, tiúrichucha enica eta náijararuheyare. Váhisera ecuyasereca te ticayujarahuhipuca eta tinicacare. ²⁸⁻²⁹ Téhesera natarihinapuca nácani tincapaequenehanahi, te nametacahepuca eta nayujarauhichirahi te tamirahu eta nasiñaraji, tiúripana vahi ecunica, apaesa tacuija tahapasamurecha eta mapanereru ema timetacahehi. Éti, émitisicapuca eta epicauchirahi eta nasiñarajiana. Émasera ema echamuri, vuíchaha máemitisicahini. Tásiha, nuvaraha tacuija tahapapicahini eta mapanereruana icha éti.

³⁰ Téhesera etiarihinapupuca ecahe: “Vahi núrica nucarinepupuca núti tituparacanuhi nujaneacavayare apaesapuca vaipa nucuemejecapavacha eta mapanereru ema apana. Núti nuhasulupayachaparaca ema Viya eta nunisirayare” ecahepuca. ³¹ Tiuri puiti, nuconsejachaheya: Tamutu eta enisirana étapa eta érirana, étapa eta ecaematanerana, tiúriyare tamutu eta íchirayare te mamirahu ema Viya énapa ena achaneana. Jéhesare, ena achaneana nacunachainapa ema Viya taicha eta náimairaheyarehi tiúrihi icha tamutu. ³² Jéhesare, nájinapa émejecapavaruímahi, énaripa ena ísraelítana, énaripa ena apavasanana, navetijipa ena vichamurianahi, taicha viciticacahi eta machichairahavihi ema Viya. ³³ Ácutinu núti eta nuyehe-repihi. Ichapemurihi eta nuvarairahi nucurisamurechavaca namutu. Vahi nácarichuhini núti nutanucahini eta núrichiravayare. Énerichuva nutanucuhivare eta núrichiravacaya ena apamuriana, taicha nuvarahahi tauri eta náehisiraina ema Viya, náuchucuiraina éna apanavare.

11

¹ Núti puiti juca nítaresirahi, étapa nupanahi eta máítaresirahi ema Cristo. Nuvaraha éne ácahéni éti apanavare, epananuyare núti eta juca nítaresirahi.

Esu esena témetserajicavaya nayehe ena suchamuriana te iúrujisiravana

² Ichape eta nucunachahe eti nuparapenaveana, taicha eta emaemisisiranuhi. Ímianavahivare éhica eta ímitucasivanahi nuyehe. ³ Nuvarahasera némechaheyare eta juca apanavare téchacarehi. Ema Tata Vicaiyaquene, éma machutirihahicha ema Cristo. Ema Cristo, émapa vichutirihahi vimutu viti ajairana. Ene nacahehi ena ajairana nacayenaqueneanapa, éna nachutirihanahivare ena esenana nayenana. ⁴ Eta tacahe, viti ajairana vahi viúriahini vicaepacasihini te viyujarauhavaya étaripa te vicametarairuyare. Taicha te vicaepacasihi, tímicitijiricavaipa vémpuruhi ema Cristo eta vichutirihairahi éma. ⁵ Ésusera esu esena tatuparacahi ticaepacasiyarehi te tiyujarauhavayare, étaripa te ticametarairuyare. Taicha te vahi ticaepacasihi, tímicitijiricavaipa suémepuruhi ema suima eta suchutirihairahi éma. Te vahi ticaepacasihi ésu, tímicitijiricavaipa sucachucasiquenénahini ésu. Sucutihi ena túhusiana. ⁶ Esu súcani esena vahi suávarahahini ticaepacasi, ésu

tivaraha sucutiyare ema mácani ajaira. Tásiha, te suvarahapuca suácutihavi viti ajairana, tiúripanahi sucachucasipaini, suítahisivanepaini. Téhesera te tímitsiriacavayarehipuca eta suítahisiraya, tiúripanaichuhi sucaepacasihini, suácutihini ena supáraseenávana. ⁷⁻⁹ Taicha te tépanavanainapa ena achaneana, ema máinapuiruhi ajaira vahi étainahini máuchusinenahini suyehe esu esena. Te mavahuana ema Viya máepiyasinehi ema ajaira. Ema Viya manacahi eta máimahi, mavasirichuhi eta máimahihi ema Viya. Eta máurinavahi tásihaquenehi me Viya. Ésusera esu esena suínapuiruhi, súchurepa esu te máquehe ema ajaira, étaripa eta súrinavahi tásihaquenehi mayehe. Eta témepiyacahi esu esena, macompañerayare ema ajaira, mayenayarehi ésu. Vahi ésuina esu suémepiyacahini ema ajaira eta sucaimairaya. Eta tacache, eta viyujarauchiravana, viti ajairana tatuparacahavi vahi vicaepacasihini, taicha viti vicaquehehi ema Viya, vicuticacahi ema viáchucaini Adán. ¹⁰ Énasera ena esenana, tatuparacavacahi ticaepacasianayare eta nayujarauchiravana, nacutiyarehi ena ángeleana ticaepacamiranahi te natupihami-
 rauchayare ema Viya, navarairahi náimereca eta napicauchirahi. ¹¹ Puítisera, eta juca vítaresirahi véhisirahi ema Viáquenu, íchapemurihi eta véjiasiraipa eta náitátirahaviya ena esenana. Vítiripa íchapemurihivare eta náejiasirahavihi éna eta vítátiraya viti ajairana. ¹² Esu esena, yátupihí eta súchusirahi ésu te maeche ema ajaira, puítisera viti ajairana étapa víuchusihahi te sujuhe esu esena ticachichahavi. Viásihaquenehisera vimutu mayehe ema Viya.

¹³ Nuvaraha epanerequenehaya yátupina eta juca. Németeaca nájina éti ímijachavahini tiúrihi esu súcani máepacasinávehi eta suyujarauchiravahi me Viya. ¹⁴ Viti ajairana véchahi eta tatsirihacarévahi víújjiquihini eta vichutimaca. ¹⁵ Suímiturevahisera esu súcani esena súrihahi tiújjiquiyarehi eta suchutimaca. Étara tiúrinachahi ena esenana. Nájaraichuhi éna eta nacaepacsiraya taicha natuparahaichuhi éna. ¹⁶ Te natiarihinapuca nácani vahi navaraha nasama eta juca nímiturapihi, tacamunuhi napanerechinavayare tatívaina. Tájina vímatiyahini eta juca apayeheripi. Énaripa namutu ena vichamuriana, tájina apanaina nayeherepinahini.

Éma Pablo macajachavaca eta namaetupisiravahi te tinicanayare eta tinicacare táicutirahi eta máepeninahavihi ema Viáquenu

¹⁷ Tiuri puiti, numetacaheyare eta juca apana. Tájinapa ecunachacarevainahini nuyehe, taicha vaipa táetupicavahini eta iúrujisiravanahi eyujarauchiravana. ¹⁸ Jucarihisera eta juca ticatihí nuyehe. Nusamairicahi te iúrujisiravana íchirana eta culto, vaipa tacuticacahini eta epanereruana, íputsimuriavavacapa. Németeaca núti cañarihihi eta íchavaquenévahi. ¹⁹ Páurehesami eta íputsimuriavairacacahi. Étainapasera ecaecheraiyaya eti yátupique-
 neanahi machaneranahi ema Viya, énapa ena vahi machaneranainahini. ²⁰ Eta juca tíchahéhi vaipa táetupicavahini te ecurujicaca enisirayare eta tinicacare táicutiara eta máepeninahavihi ema Viáquenu te crusu. Váipasera émainahini tatupiruruchahini. ²¹ Títecapa vaipa ecuchapacacahini. Nararihi tícinapupuiricavanapa tinicana nayéhechirávavacapa. Tinahacavanapa térana técvahachávanapa. Nararihisera ena apamuriana técuhanaripaicha. ²² Tájinapa táurivainahini eta juca íchaquenehi. Ticutipa tacuijaquenéahini epenainahini, étainapaini enisihahini érihahini. Tímicutijiricavaipa épuru-
 vacahi ena apamuriana machaneranahi ema Viya. Ímicatsiriacavare nácani

tájinaquenehi naviyavahini. Étupicavaipapuca eta juca ecahehi. Tájinaque-
nepasera ecunachacarevaina eta nuyehe.

Eta táetupisiravahi eta vinisirahi eta tinicacare táemechahavihi eta máepeninahavihi ema Viáquenu te crusu

(Mt 26.26-29; Mr 14.22-25; Lc 22.14-20)

²³ Núti tatupiruvahi eta nucáimitucasirahi mayehe ema Viáquenu. Tásiha, étarichuhivare eta nímiturapihi eyehe. Taicha ani tacahehi eta nímitusi-
rahehi: Te jena yátiqunehi te ticaijararecasiyavare ema Viáquenu Jesús,
mavehapa te mavahuana eta pan. ²⁴ Te tamutupa eta mahasulupayachirahi
ema Viya, mayuvetucapa eta pan. Tásiha, máichavacapa ena máimitureana:
“Enica eta juca néche. Étivenehi nímiararecavahi eta népeniraya. Eta juca
aparahiyare te apaquehe, te étipava énicaca, éta témechaheyare nuyehe”
macahepa. ²⁵ Te tamutupa eta nanisirahi, mavehavarepa te mavahuana
eta máerirare, mahasulupayachavare ema Viya. Tásiha, máichavarepa ena
máimitureana: “Era eta juca nítimeama táepusairuvavare. Eta juca táicutiarahi
eta nucaejasirayare eta arairu matratune ema Tata Vicaiyaquene eta eyehe,
majacapiraheyare eti ecasiñanuanayare, arairupa eta éhiruyare. Eta íchira-
paracayare te énicaca, éta témechaheya eta nuyehe” macahepa ema Viáquenu.
²⁶ Puíticha tanasi eta juca. Aparahiyarehi viyehe. Te vénicaca étapa
eta vésicacaca, vémechacacahi ena vichamuriana eta máepeninahavihi ema
Viáquenu. Tiámáinucava vicainajiruyare te mápechavavare máiteca.

Tacamunu eta vipicauchirayarehi te vinicaya

²⁷ Namunu nácani tinicanahi téranahi eta táicutiarahi eta máepeninahavi
ema Viáquenu, te vahi tétupicavahi eta napaneruanahi, váhivare napicauc-
chahini, ticapecaturanaripa éna. Náemepurarecaripa eta máitime étapa eta
máepenirahi. ²⁸ Eta tacahe, nácani tinicanayare, tativanumayare tipanerea-
cavanayare te tájinahipuca náichiravainahini te mamirahu ema Viya. Te
tájinahini nasama, tísapavanayarehi eta nanisirayare, náerirayare. ²⁹ Taicha
te vahi tipicauchacarehi eta náimairahi eta máeche ema Viáquenu eta nanisi-
rayare, náerirayare, énajivaichucha tichavanahi, tímicuñacavanaripahi eta
nanisirahi. ³⁰ Étara tichahehi eta juca táitusiava esimutupa eti ecajumanahi,
tájinapa tatumevainahini eta iáqueheana. Ena apamuriana tépenanapaipa
táicha. ³¹ Téhesera vítijivahi vétupirica eta vítaresirahi, ema Viáquenu vahi
tícuñacahavimahi. ³² Taicha mavarahahi vétupiricayarehi. Vaipa vicai-
cuñaimahi tayehe eta nacaicuñairayare ena apamuriana achaneana máimatira-
hanahi ema Viya.

³³ Eta tacahe, eti nuparapenaveana, te ecurujicacayare eta enisirayare,
ecuchapacacayare apaesa ínuna eta enisirayare. ³⁴ Téhesera matiarhipuca
mácani técuhasamureripaicha, tíuripana manicanuma te mapena, apaesa
vaipa macuemecharecahe ema Viya taicha eta tamaetupisiravahi eta íuruji-
siravahi. Étasera eta juca apamuriana téchacareanahi viyehe, nímaharinepa
núti. Nétupiricaya te níteca eta ara eyehe.

12

Vimutu viti vítupajjiasiravapachuyare maicha ema Espíritu Santo

¹ Nuparapenaveana, nuvaraha numetacaheyare eta apana téchacareana,
apaesa yátupina ácaicutiara. Jucarihi apanapanenejihi eta vítupajjiasirava-
nayare maicha ema Espíritu Santo.

² Écharichuhi éti, te vuíchaha émainahini éhica ema Viáquenu Jesucristo, ísapajiricavaichaha tipamicaheana éhica eta nasiñarajiana tájinaquenehi eta tájicaparaiváinahini. ³ Nuvaraha némechaheyare eta juca ímatirayare nayehe nácani vahi mávaháruanaimahi ema Espíritu Santo. Te nacahepuca: “Másáji-tatajipucaini ema iáquenu éti”, te nacahepuca eta juca, ímativacaya éna. Taicha ena mávaháruanahi ema Espíritu Santo, nacarichu ena tatuparacahi náimatiyare eta aquenucairahi ema Jesús. Énasesa éna vahi mávaháruanainahini ema Espíritu Santo vahi tatuparacahini nácahepucaini: “Ema Jesús émara Viya Viáquenuhi”.

⁴ Vítí mávaháruanahi ema Espíritu Santo, apanapanenejihi eta vítupajijiasiravana máijjararuhavianahi. Émanarichuhisera éma. ⁵ Énerichuvare apanapanenejihi eta vémataneana máijjaruanahi ema Viáquenu. Émanarichuhisera éma. ⁶ Te tamutu eta vicaemataneasira, ema Viya émarichuhi ema téchahavihi, tjaracahavihi eta vitumevahi, viratahairaya vimutu. ⁷ Énerichuvare ema Espíritu Santo, víjaracasipachuhi eta vítupajijiasiravayare máicha, vímitsi-hayarehi eta tasimutuqueneanahi namutu ena vichamuriana. ⁸ Nararihi ena máimicatavaca ema Espíritu Santo eta náitusiraya téchajicana, náimitu-resiraya. Ena apamuriana máijjaracavacavare máejerareyare eta nacaicutiarairaya eta mapanereruana ema Viya. Émanarichuhisera ema Espíritu Santo tjaracahi eta juca. ⁹ Nararihivare ena máijjaruanahi eta nacuchapi-rayare muraca eta nayasearuanahi ema Viya táichavene eta nacasiñavairahi eta mayehe. Nararihivare ena máijjaruanahi eta nacanarasirayare ena nacajumaqueneana. ¹⁰ Nararihivare ena máijjaruanahi eta nacuchusiraya eta tíaramicareana. Ena apamuriana náijjaraiçuvare eta ticameticasianaya mayehe ema Espíritu Santo eta máechajiriruvanahi ema Viya. Ena apamuriana máijjaracavare eta náimatiasiravaneya ena achaneana nájahapuca nácani mávaháruanahi ema Espíritu Santo, nájahavarepuca ena mávaháruanahi ena éreanana. Ena apamuriana máijjaracavare eta tíuririchuya eta náechajisiraya eta apaechajiriruvana. Ena apamuriana máijjaracavare eta náitusirayare, nápepica náechajisiha eta apaechajiriruva, trépeteanayarehi. ¹¹ Tamutu eta juca máichaqueneanahi ema Espíritu Santo. Macarichuhi ema máitaparahaahi máijjaracavaca eta náitucaquenepachuyare namutu ena mavarahaqueneanahi máijjaraca.

Émanarichuhi ema véhiruhi

¹² Viti achaneana, apanapaneneji eta táijareana eta viáquehe. Tisimutuhi eta táitupajijiasiravana. Étanarichuhisera eta táuchusihahi te viáquehe. Ene tacahehi eta véhisirahi ema Viáquenu Jesucristo. Vimutu viti véhicanahi éma, apanapanenejihavihi, visimutihivare. Émanarichuhisera ema véhiruhi. ¹³ Tacahe, vahi étaparacaina te israelítahávipuca, te apavasasajuecuhavivarepuca, étaripa te máquenurehavihipuca. Téhesera te vicaicachasipa eta véhisirayare ema Viáquenu, étanarinepa eta vímahi maicha ema Espíritu Santo. Énerichuvare, eta mávahásirahaviripa, vicuticacaripe eta máecasarechirahavihi eta viáchanevana.

¹⁴ Yátupi eta viáquehe vahi étanainarichuhini eta táimahanahi, étape eta táitupajijiasiravanahi. ¹⁵ Étaripa eta vívape, vahi távasihini eta vívahu, váhivare tacuticacahini eta táitupajijiasiravanahi. Étarichuhisera táunavahi

eta viáquehe. ¹⁶ Étaripa eta vichaca, vahi távasihini eta viúquiha. Étarichuhivaresera táunavahi eta viáquehe. ¹⁷ Váiparinehi táuricaímahi amairihainahini eta viáquehe tacauquihahini. Tásiha, tacuijapucaini viquiñainahini, tacuijapaini visamaquenénahini. Váhivare táuricaímahi amairihainahini eta viáquehe tacaquiñahini. Tásiha, tacuijapucaini visirinahini, tacuijapaini vijuirenahini. ¹⁸ Ema Viya manacahi eta táematanerepianayarepachui eta juca táunavanahi eta viáquehe. Taicha tacahehi eta mapanereruhi ema Viya te tépiyacahavinapa. ¹⁹ Vahi mávarahahini étanainarichuhini eta táitupajijiasiravainahini eta viáquehe, amairiquihahavinahipucaini. ²⁰ Yátupi tisimutuhi eta táitupajijiasiravanahi eta viáquehe, étanarichuhisera eta távihahi.

²¹ Tamutu eta juca viáquehe ticamunujiricacahi. Étaripa eta viúquiha tacamunuhi eta vivahuana. Étaripa eta vichuti tacamunuhivare eta vívapeana, vipaisihayare. ²² Étaripa eta tiávihanahi te amahe vijuhe, matumeairairahapahi eta vímairahi, étahisera tiápajucavahi ticamunucarepanahi. ²³ Jucarihi eta viáquehe ticutimahi vahi múnainahi eta vímairahi. Étahisera tiápajucavapanahi vimuriachahi. Jucarihivare eta viáquehe vaipa táuricahini vímererahini. Tásiha, tiápajucavapanahi vépacucurehi, vicatiuchahivare. ²⁴ Jucarihivare eta apana táunavahi eta viáquehe ticutimahi vaipa vicamunuhi vépacuchahini. Tímererecavahi nayehe ena achaneana. Tamutu eta juca máepiyaruanahi ema Viya, máicuchahi eta táimahianapachuhi, mavarahahi tácuticacahi eta vémunasiraya tamutu eta táunavanahi eta viáquehe. ²⁵ Eta tacahe, te vicaematane, tamutu eta viáquehe tiyamuricahi, tímicitajiricacahi. Ichapehi eta táejasiracacahi. Vahi táiputsiacachahini. ²⁶ Étaripa te tatiarihipuca eta táichavaquenevahini eta táunavahi eta viáquehe, támairiachahi ticati eta viáquehe. Téhesera tatiarihipuca eta táurismurevahini taicha eta táitupajijiasiravanahi, tamutyarehi eta viáquehe tiúrisamure.

²⁷ Ene ecahehi éti eta éhisirahi ema Viáquenu Jesucristo. Eta iúrujisiravahi mayehe, ecuticacahi eta táunavanahi eta máquehe. ²⁸ Énerichuvare, ema Viya tituparacahavipachu eta viávacurepachuhi, mavairairahi vijaneacahayare eti vichamuriana, machaneranahi. Tituparacahavihi viti apóstoleana vímahaheya, énapa ena profetana, énapa ena tímiturecarahianahi eta máechajiriruvana ema Viya, énapa ena títurequenehanahi nacuchuca eta tiáramicareana, énapa ena ticanararecanahi ena nacajumaqueneana, énapa ena tímicitarahianahi nayehe ena nacamunuquenévana, énapa ena tiúrianahi eta nacavanairipirana, énapa ena tiúririchu eta náechajisiha eta apaechajiriruvana, énapa ena trépeteana titucanahi nápepica eta apaechajiriruvana. ²⁹ Vahi étanainarichuhini eta viávacureanahi. Vahi vámutuhini apóstolehavinahini, vahi vámutuhini profetahavinahini. Vahi vámutuhini vímiturecaini. Vahi vámutuhini vicuchuca eta tiáramicareana. ³⁰ Vahi vámutuhini vítipajijiacavahini vicanararecaini ena nacajumaqueneana. Vahi vámutuhini véchajicanahini te apaechajiriruvana. Váhivare vámutuhini trépetehavinahini. ³¹ Tiuri puiti, étipa tacamunu eyaseaca ema Viya máíjaracahe eta ítipajijiasiravaina eta ticamunucarepana. Jéhesare, nuvaraha nímitucaheyare eta apana táurinaquenepana. Esamanuchaha.

13

Eta ticamunucarepanahi eta vémunaravaya

¹ Vítiripa, te tacuijahipucaini eta vémunaraivainahíni, vaipa tisuapacaré mahi eta vimetarairuana. Vémunasiricavapa. Tayanapane vítucahipuca véchajica tamutu eta apaechajiriruvana, vácutipucaini eta náechajisira ena ángeleana. ² Te tacuijahipucaini eta vémunaraivainahíni, tájinapa vicunachacaré mahi me Viya. Tayanapane vicametarairuhipucaini eta vimetacasi vanahi te anuma, támutuhivarepucaini víturuequeneháni, étaripa te máijahúchapucaini macayejecahini ema Viya eta ichapequene mari táichavené nahíni eta viyaseasirainahini eta vicasiñavairainahini eta mayehe. ³ Tásiha, te tacuijahipucaini eta vémunaraivainahini, tájina vijacapacaré mahi me Viya táicha. Tayanapanevare vicajiricahipucaini tamutu eta vímahaqueneana te vipena, téhevare vísapapucaini náijuchaini eta víaquehe táichavené nahini eta namaurisirahi véhica ema Viáquenu. ⁴ Téhesera yátupihí vémunarahi, vicayeheyarehí paciencia, vijapanurahiyare. Vahi vicapinarurecaini. Váhivare píncanillahavimahi. Váhivare vicasiñavavaicaini. ⁵ Váhivare vicavapajaimahi jáceni táíñemahiqueneana. Váhivare viverejimirauchaimahi ena apamuriana achaneana. Váhivare tijuricati visemaimahi. Váhivare vicatiana recaini. ⁶ Váhivare táuricahini vícaecahirahihini te vímaha nácani ticaejeanahi. Viúrisamuresera te vímaha ena achaneana tíurihi eta náitaresira. ⁷ Te yátupihí vémunarahi, vicamichayare tamutu. Vahi énevanémahi visuapa eta echajirirucavana náepiyapiruanahi ena achaneana. Vicuchapayarehi eta táetupirisiravayare eta panerercana. Vahi víjahúchavaimahi vínajicava, vicuchapínávayare. ⁸ Tájinapa títaimahi eta vémunaraivayare, vímiyanavainapa eta vítaresiraya. Eta jena sácheanayare, vímatiequeneha tamutu. Vaipa vicamunu eta vimetacasi vana eta metarapianayare tásihaqueneanayare me Viya. Tájinapa víatájivaimahi eta visamirayare eta apaechajiriruvana. Váipavare tácajerainahi eta visamirayare vímatiequenehavané napa. ⁹ Taicha puiti te juca vítaresirahi, apaesachicharichu eta vímatiequenehairahi, apaesachicharichu eta vítusirahi eta metarapiana tásihaqueneanahi me Viya. ¹⁰ Járjapainapasera eta sácheayare, vímatiequenehainapa yátupi eta mapanereruana ema Viya, eta vímáimatiequeneruanahi puiti. Vaipa vácamunu ena tímítucahaviana.

¹¹ Nímicutichavahi núti eta víamaperuvahi. Vuíchaha vítuchahini vipanerereca, vimapachichijiricavaichaha. Téhesera te ajairahavipa, te esenapuca, títsivachavapa eta vipanereruana. Vínajicapa eta víamaperuvainihi. ¹² Ene vicahehi víti eta juca vítaresirahi. Puiti vuíchaha támutuhíni vímatiequenehahini. Ticutirichaha te vímararacaicha eta vicuna te jáceni ichasí espejo, vahi tacaecherahini. Járjapainapasera eta sácheayare ticaecherainapa tamutu. Puiti, ticajera eta vicaicutiarairahi víti. Ema Viya vuíchaha tímítucahávihi níni tamutu eta mapanereruana. Téhesera te aparahinapa, tamutuya vicaicutiara máicha. Tacutirichu eta máimairahi puiti eta vipanereruana víti te amahe eta visamureana. ¹³ Puiti, eta juca vicaijuheya, vímiyanava vámutu muracaina eta vicasiñavairahi me Viya, váhivare vicuyacujihini eta vicuchapirapaipa eta víurivainapaipa, tacuijavareni tahapapiricahini eta vémunaraivayare. Jéhesare, tiápajucavapanayarehi eta vémunaraiva. Étara ticunachacarepanahi me Viya.

¹ Tacahe, nuvaraha núti yátupina eta émunaraivaina. Nuvarahahivare eyaseaca ema Espíritu Santo eta ítupajijiasiravaina, étaripa eta ítusiraina ecametarairu eta máechajiriruva tásihaqueneanahi mayehe ema Viya. ² Tájjina táichava, nácani téchajicana ema Viya eta apaechajiriruva. Éma masamahi. Vítipasera viti apamuri vaipa vácacutiarahini eta náechajiriruvahi. Yátupihipuca máimitureanahi ema Espíritu Santo, váhisera náimereuchavahini eta máimiturapihi éma. ³ Vahi tácuti nácani nacametarairuhi eta máechajiriruvana tásihaqueneanahi mayehe ema Viya, ticaicutiaracarehi tamutu eta nametarapianahi. Tatupiruvahi eta náimitusiravacahi ena apamuriana. Náetumechahi eta náchanevana eta nasuapiraina. Éta nacurisamurechihavacahi te jácani napanereresirana. ⁴ Ema mácani téchajicahi ema Viya te apaechajiriruva, mayehechivarichuhi te máchaneva eta macajurusiraya eta masuapajiraivaya. Émasera mácani ticametarairuhi eta máechajiriruvana tásihaqueneanahi mayehe ema Viya, macajurusinahi eta nasuapajiraivayaheni ena machamuriana.

⁵ Nuvarahahinéni núti ámutuhini ítupajijiacavahini maicha ema Espíritu Santo, échajicahipucaini te apaechajiriruvana. Tiápajucavahisera eta nuvarairahi ecametarairuhini eta máechajiriruvana tásihaqueneanahi mayehe ema Viya, taicha étara tiúripanahi eta juca tayehe eta échajisirainahini te apaechajiriruvana. Tiúrihinéni échajicahini, tacamunuhisera natarihinahini nácani trépete, nametacavacasarepaini ena apamuriana eta tacayemaqueneanahi apaesa tajurusihapaini eta nasuapajiraivainahini. ⁶ Nútiripa, nuparapenaveana, nítecapauchahepucaini néjirapanaheni, tásiha néchajicapahipucaini te apaechajiriruva eta eyehe, éti vahi ácaicutiaraimahi, váipavare tímecatadahémahi eta tajurusirainahini eta ecasiñavairahi me Viya. Tacamunuhi néchajicahini te échajiriruvaichu eta nímitusirahénahini, éti ecaicutiarasarepaini tamutu eta numetacasionahi me Viya, étapa eta máimerechaquenuhi, étapapuca eta máimatiquenehi, arairu eta viyehe.

⁷ Eta juca tímcutijiricavahi te mapacharajihí eta masiviviripi ema ticasi-vivihi. Vaipa tacaicutiaracarehini tájahapuca eta masiviviripi. Émaripa ema violinista, váhivare ticaicutiaracarehini tájahapuca eta mapununerapi. ⁸ Énerichu tacutihí mácani cúrnetéru nayehe ena suntaruana, te váhivare ticaicutiaracarehi eta macachujairahi, váiparinehi tiúrujicavanaimahi ena suntaruana táichuhaqueneanahi, taicha vahi nácaicutiarahini. ⁹ Ene ecahehi éti, eta échajisirahi eta apaechajiriruva, nájina nacaicutiarahini. Tímcutijiricavaipa nacujahini nasamararacaheni eta échajisirahi. ¹⁰ Yátupi tisimutuhi eta apaechajiriruvanahi te juca apaquehe. Nayehepachuhisera nácani ticaechajiriruvanapahi. ¹¹ Vítiripa te náechajicahavipuca ena extranjeroana te náechajiriruva, váiparinehi vácaicutiaraimahi. Énaripa váhivare ticaicutiarahavianaimahi viti. ¹² Tiuri puiti, vahi tacumapurují eta evarairahi ejaçapa eta ítupajijiasiravanaya májjararuheyarehi ema Espíritu Santo. Tiúripana eyasesereca eta ítusiraina ímitucavaca ena echamuriana apaesa tajuruçapaipa eta nasuapajiraivaina éna apanava.

¹³ Tásiha, mácani téchajicahi te apaechajiriruva, tacamunuhi mayaseacahini ema Viya eta máitusirainahini mametacavaca eta tacayemaquenehi eta máechajiriruvahi apaesa nacaicutiarasarepaini nácani tisamararacanaahi.

¹⁴ Taicha eta viyujarasirahi viti te apaechajiriruvana, te vítapiricapa

eta viyujarasirahi, vahi tánasihini véchavahini eta vicayemaqueneanapahi, vémitisicavanehi tamutu. ¹⁵ Eta tacahe, tiúripanahi viyujaraca te véchajiriruvaichu, tásihaqueneanahi te visamure. Te vijirayarepuca, tiúripanahivare te véchajiriruvaichuvare, tásihaquenénahivare te visamure, vicaicutiarsarepaipa eta vicayemaqueneanapahi. ¹⁶ Téhesera apaechajiriruvahi eta eyujarasirahi me Viya, yátupihí eta ecunachirahi éma. Énasea ena tisamaracaheanahi vahi náehicaímahi eta eyujarasirahi náimicatasirahehíni eta nayujarasirahi; taicha vahi nácaicutiarapahíni eta ecayemaqueneanapahi. ¹⁷ Tiúrihinéni eta eyujaracasahi eta ehasulupayachirahi éma Viya, énasea ena echamuriana vaipa táimicacavacahíni eta eyujaracasahi. ¹⁸ Jéheveresera núti, ichape eta nuhasulupayachirahi éma Viya taicha eta nítusirahi néchajica eta apaechajiriruvana. Nucachuriacahehi emutu éti. ¹⁹ Étasea te nucametarairuyare te namuri ena vichamuriana, vahi nuvaraha nácuti ena tíupiemana eta náechajisira te apaechajiriruvana. Núti ánipirichu te néchajica, tamutuhisera ticaicutiaracarehi nayehe ena nítimureanahi.

²⁰ Nuparapenaveana, éti vaipa amaperuhénahini. Nuvaraha táuripaini eta epanereruana, eta íchirayare eta táuriqueneana. Nuvarahasera ácutihíni ena amaperuana vuíchaha náitucahíni naicha eta tamauriqueneana. Énenapaini ácahehíni éti. ²¹ Ema Viya, ani macahe eta te Sagrada Escritura: “Nutuparacayare ena apanaqueneana achaneana apaechajiriruana náimitureca eta nuvanairipiana eta nayehe ena achaneana távacuanahi eta avasare. Váhiquesera nasuapaimahi” macahepa éma Viya.

²² Tacahe, nácani tiyujaracanahe te apaechajiriruvana, táicutiarahi eta májjarasiravacahi éma Viya náichavenehi ena máehicarahanarichaha éma Viáquenu. Jéhesare, tayuchusamurechavacayare eta nasamararasirahi. Énasea nácani ticametarairuanahi eta máechajiriruvana éma Viya, tayuchusamurechavacayare ena téhicanahi éma Jesús, taicha ticaravahuanayare eta nasamararasirahi. ²³ Étasea te jácani iúrujisiravana, te eyujaracahipuca emutu te apaechajiriruvana, tásiha, te natiarihipuca nácani masuapajirairahanarichaha, ticaecahiheanayarehi éna, náimijachayarehi máurishihehi. ²⁴ Tiúripanayare eta ecametarairuiraya emutu eta máechajiriruvana éma Viya, te échajiriruvaichu. Tásiha, te natiarihipuca te iúrujirisiravahi ena masuapajirairahanarichaha, ticatisamurevanayarehi taicha eta nasamararasiraya. Tipanerequenehavanainapa eta nacapecaturairahi. ²⁵ Tacahe, tímatiacavanainapa eta máimatirahi éma Viya tamutu eta napecaturana tayumurevanainíni. Tépuycanainapa téneuchavanainapa mayehe éma Viya. Téchajisiaheanainapa: “Yátupiquenéyapa mávahácavacahi éma Viya ena nániana” nacahenapa.

Tacapicahu tamutu eta iúrujisiravana

²⁶ Nuparapenaveana, áni tacaheyare eta iúrujisiravanayare. Enerejicava éti íputsiacavayare eta ejirairaya. Énerichuvare tinerejicavayare mácani tíjaracavayare éma tímiturecayare. Énerichuvare te matiaríhinapuca mácani mavarahahi ticametarairuyare eta mametacasilanahi me Viya, tájinachucha táichavahi. Tísapacarehivare eta échajisirayare te apaechajiriruvana. Tacamunuhisera matiaríhiyare éma trépeteyare. Tamutu eta júcana, étara ticajurucayare eta nasuapajiraivainapaipaicha ena echamuriana. ²⁷ Téhesera te natiarihinapuca apinana, mapananapuca

ena tivarahanahi téchajicana te apaechajiriruva, tájinachucha táichava. Tísapacarechucha. Tévacajiricacanayarehisera te jácani náechajisirayare. Váhivare téjiacavaimahi ema nayeheyare trépete. ²⁸ Téhesera nájinapuca naviyavahi ema nayeheyare trépete, tiúripanaichuhi vahi nacuechajica te apaechajiriruva te namuri ena echamuriana náurujiruvanahi. Tiúri, te navarahhipuca náechajica ema Viya, tavarahahi nacarichuyarechucha eta náechajisiraya. ²⁹ Nácani ticametarairuanayare eta máechajiriruvana tásihaqueneanahi mayehe ema Viya, te apinanahhipuca, mapananahhipuca, tájinachucha táichavahi, tiúrichucha. Ticamunucarehisera ena náurujiruvanahi tisamararacani napaneréquenehayarehi tamutu eta nacayemaqueneanapahi ena ticametarairuanahi. ³⁰ Téheserapuca matiarihini mácani máejaruhi, ticametacasihiquenehi me Viya; tásiha mavarahhipuca macuchujipica eta mametacasiuhi, tísapacarechucha eta máechajisiraina. Macuchapavayaresera máitapiricanuma mácani máinapuiruhi téchajica. ³¹ Emutu eti ecametacasiqueneanahi eta máechajiriruvana ema Viya, ítsivajiricayare. Émanainapachu mácani téchajicayare, apaesa ena ímitureanahi namutu nacaravahu, náetumechavahivare éna apanava. ³² Ena ticametarairurahiana tatuparacahi ticuchapavanayare. Vahi ticainapupuicavanaimahi. ³³ Taicha ema Viya vahi mávaraha mapacharajinahini nácani ticametarairuanayare. Tásiha, éti ecajarusinavayare apaesa ecurisamurecha ema Viya.

Táepiyarichuhi eta juca viyeherepi víti te viúrujisiravana. ³⁴ Ena vichamuriana esenana timatinanayarehi. Vahi téchajicanaimahi. Nasamararasinavaichucha. Taicha sufjaraichuhi me Viya esu esena susamararasirayareichuhi. ³⁵ Te tatiarhipuca eta suvarahaquenehi suecha esu esena, tiúripanahi te náitecapa te napena suyaserecapa ema suima. Taicha vahi súriahini esu esena sucayaseseruruhini eta suvarahaquenehi suecha te namuri ena echamuriana.

³⁶ ¿Tájaha tacayema eta ecasiñavavaisirahi? Vahi étinahini ínapuchahini mametacahini ema Viya eta máechajiriruva. Váhivare ácarichuhini éti tatuparacahini eta ejacpirahi. ³⁷ Te natiarhipuca nácani tímijachavanaripa náimatiequeneharipa tamutu eta máechajiriruva ema Viya, náimijachaihpuca mávahácavacaripa ema Espíritu Santo, tatuparacahi éna napáne-rechinávanumayare eta juca nájurehi eyehe, tásihaquenehi me Viáquenu, mavanairipichuhi éma. ³⁸ Téhesera matiarihhipuca mácani tépuruyare eta juca numetarapianahi, émaina máepurucare, vaipa tisamacaremahi eta eyehe.

³⁹ Tiuri, nuparapenaveana, epamicavachucha ecametarairu eta máechajiriruva ema Viya. Tásiha, táuricachucha ísapa nácani téchajicanaparacahi te apaechajiriruva. ⁴⁰ Tacapicahuhisera támutu eta iúrujisiravana. Ecajarusinarivavahi tamutu eta íchaqueneanayare te iúrujisiravanahi.

15

Eta máechepusirahi ema Cristo te máecari

¹ Nuparapenaveana, nuvaraha némechaheyare eta numetarairuhi eyehe eta máechajiriruvahi ema Viya tayehe eta viúchucuirayare. Étara táemesiavahi eta juca te esamainapa, etupiruvavanehi ejacapa. Puíticha tanasihi eta esuapirahi. ² Tásiha, puítu íuchucuhapaipa táichavenehi eta ímianiravahi

esuapa eta numetarairuanahi eyehe. Németeaca yátupihí eta íjarasiravahi eta éhisiraya eta juca esamaquenehi.

³Écharichuhi eta nímiturapianahi eyehe, étarichuhivare tacahehi eta nímitucasivahi. Eta júcana eta tisuapacarepanahi: Yátupirahi máepeninahavihi ema Cristo táichavenehi eta vipecaturana, émairahi ema táechajisihaquenehi eta Sagrada Escritura. ⁴Eta náimairahi tépenapa éma, náecarapa. Técheputahisera éma te mapanaqueneпа sache, taicha tacahehi eta tametarapihi eta Sagrada Escritura, timetacahavihi tamutu eta máichararacavayarehi éma. ⁵Tímerecavahi mayehe ema vichamuri Pedro, énerichuvare ena apamuriana apóstoleana. ⁶Tásihapa tímerecavavarepa nayehe ena quinientoqueaneana eta nasimutuvanahi ena vichamuriana. Puíticha nararihichaha maverana ena tímahanahi. Nararhipasera ena tépenanapaipahi. ⁷Te táequenevarepa, tímerecavavarepa mayehe ema Santiago. Tásiha, tiápechavavarepa tímerecava nayehe namutu ena apóstoleana.

⁸Tásiha, te táequenevarepa eta júcana, tiápechavapa tímerecava nuyehe, nútípavapa nímahahi éma. Ichape eta táramicarevahi nuyehe eta máichuiranuhi nútí néquenereruhi mayehenuyarehi apóstole, tacuti eta tájahúchirava te tiújuçayare esu esena. ⁹Ichapemurihinéni eta némepuruirávahi nútí nayehe ena apamuriana apóstoleana. Váhivare táuricachini apóstolenuinahini eta nímairavahi, taicha ichapemurihi eta nupanajirisirávacahi ena náinapureanahi machaneranihi ema Viya. ¹⁰Tíchuhahanhisera ema Viya, taicha eta máemunasiranusamihi. Apóstolenuhi puiti eta mayehe. Váhisera némepururecavahini eta máemunasiranuhi. Jéhevare nútí, nucachuricahi ena apamuriana apóstoleana. Ichapemuripanihi eta nucaemataneasirahi éma. Váhisera níputsaracavahini nútí. Eta máemunasiranuhi ema Viya, tímicitacanuhi eta nucaematanerahi. Tíjaracanuhi vare eta nétumechiravahi. ¹¹Tájinasera vahi étaparacaina eta juca nájahapuca nácani ena ticaemataneapanahi. Étarichuhi eta vímiturapiana eyehe, eta esuapaquenehi puiti.

Tayanapane vépenaipapuca, vécheputayarehisera

¹²Víti vímitucaheripa eta máecheputsirahi ema Cristo te máecari. Németeacasa etarihichaha eti vuíchaha esuapahini taicha nusamairiricahi eta ecahehiji: “Vahi técheputcanaimahi ena náepenaqueneana”. ¿Tájahapuca tacayema vuíchahacaruhi tasuapacarehini eyehe? ¹³Éti éjecapavahi eta epanereruana. Ímijachaipapuca vahi máratahaimahi ema Viya mácaechepucavaca ena náepenaqueneana. Te vahi macuratahahini, váhivarepuacaini macuacachepucanihi ema Cristo te máecari. ¹⁴Tacahe, te vahi macuacachepucanihi ema Cristo, váipapucaini tacusuapacarehini eta vímiturapianahi eyehe, tamapurujipapucaini eta esuapirahi. ¹⁵Te yátupinahini vahi tacusuapacarehini eyehe eta náecheputsirayare ena náepenaqueneana, váhivare tacusuapacarehini eta macaechepusirahi ema Viya ema machicha Cristo. Tímicutitjiricavaipahini vépiyahirahihini vivyuarerecaipapucaini víti te májare ema Viya, taicha eta vímitusirahahi eta macaechepusirahi ema Viya ema Cristo. ¹⁶Te yátupinapuca vahi tisuapacarehi eta náecheputsirayare ena náepenaqueneana, váipavarepuca tásuapacarehi eta máecheputsirahi ema Cristo. ¹⁷Énerichuvare, te váhipuca tisuapacarehi eyehe eta máecheputsirahi ema Cristo, tásiha énerichuvare váipapuca tisuapacarehivare eta macaepahaira ema Viáquenu eta epecaturana táichavenehi eta ecasiñairahi éma. ¹⁸Te

yátupinapuca vahi tisuapacarehi eta júcana, tímicutijiricavaipa témítiequeneanaripa ena náepenaqueneanahi téhicanahi ema Cristo te achaneanarichaha. ¹⁹ Te yátupinapuca vahi tisuapacarehi eyehe eta júcana, tamapurujiripa eta vijaneasiravahi eta vítaresirahi puiti juca táichavenehi eta vicuchapiravahi vivarairahi vicachane ema Cristo te apana vítaesira. Te vahi tacuitauchava eta juca, ichapeyare eta vicatisamurevairaya.

²⁰ ¡Yátupiquenehisera eta máechepusirahi ema Cristo te máecari! Tacahe, éma ecutiararehi viyehe eta véchepusirayare víti apanavare te vépenaripapuca. ²¹ Taicha eta vépenira manaquipairuhi ema máinapuiruhi ajaira te juca apaquehe ticajare Adán. Ene macahehi ema Cristo, éma tinaquipaicaahi eta máinapuisirahi tayehe eta véchepusiraya te vécarí. ²² Táichavenehi eta mámariequenerahavihi ema Adán, émapa tiámahavihi tayehe eta vépenira. Puítisera táichavenehivare eta véhisirahi ema Cristo, émapa tiámahaviyare tayehe eta viápechiravayare vítareca. ²³ Yátupiquenehi táejarurevahi eta juca. Tínapucahi ema Cristo téchepuca. Éma ecutiararehi viyehe. Tásiha, te mápechavavare máiteca te juca apaquehe, émainapa téchepucanayare ena náepenaqueneanaripa machaneranahi. ²⁴⁻²⁷ Tacahe, tiánehinapa eta táichecuaraguiyare eta tamauriqueneanahi te apaquehe. Taicha ema Cristo macamítiequenehainapa tamutu eta náitupajijiasiravanainihi ena táquenuruhanainihi eta tamauriqueneana. Ema Viya máijaracayarehi eta matumevayare macapaquechirayarehi namutu ena mánananahi, étainapa mácatayanusihavacayare. Tacahe, macaepahainapa eta vépeniraini. Nájinainapa tépenaimahi. Taicha ema Cristo matuparahaichuhi mayehe ema Maiya eta aquenucairayarehi, émayarehi téchayarehi tamutu. Taicha ánipa macahehi ema Viya eta te Sagrada Escritura: “Éma nutuparacahi téchayarehi tamutu”. ²⁸ Tájinasera vahi ticasíñavaicaimahi ema Cristo eta émairaipa técha. Te máimahapa támutupa máetupirica, macuchapainapa eta vanairipianayarehi mayehe ema Maiya, taicha éma tíjaracahi ema Machicha eta máitupajijiasirava. Tásiha, ema Cristo máimereuchainapa étairahi tásiha eta vanairipiana mayehe ema Maiya. Émarichuhi téchahi tamutu.

²⁹ Tiuri puiti, nararihi ena apamuriana ticaicachasianahi náitsivahi ena náepenaqueneanaripa, namavarairahi náemitiequenehahini tayehe eta náechepusirayare. Ena nani, muracahi eta nasuapirahi eta yátupirahi eta náechepusirayare ena náepenaqueneanaini.

³⁰ Nuvaraha ácutihavi víti eta vicasíñairavahi me Viya. Tayanapane ichape eta tacauyayacarevahi eta vépenirainahini puiti juca sácheana, vicamichahisera tamutu taicha vicuchapavahi eta macaechepusirahaviya ema Cristo. ³¹ Nútiripa, nuparapenaveana, tamutuhi sácheana ticauyayacarehi eta vépenirainahini. Ichape eta tapicacarevahi. Nucurisamurechavasera eta núrisamurevahi icha éti eta iúrivaipahi mayehe ema Viáquenu Jesucristo. ³² Núti muracahi eta nusuapirahi eta véchepusiraya te vécariana. Te váhipuca nusuapahini, vahi nacucanaranuhini te juca avasare Efeso. (Náetaviuchahi eta navainarajivanahi, nacutihi éna eta sárareana táíñehiqueneanahi.) Tájinchuchasera táímaequenéhanini nuyehe eta nímiyanavayare eta nucatiuchira eta véhiruhi, te tacuija yátupinahini eta véchepusirayare te vépena. Nararihisera ena téjcapavanahi eta napanereruna. Tímijachavanahi vaipa téchepucanaimahi te náepenapa, taicha ani nacahehi: “Vicamapuravachucha puiti vera vinica, viúrisamureyare taicha achichupuca vépenacaru. Tásiha, títavainapa tamutu eta viyehe” nacahepa.

³³ Vahi tacucahe eta epanereruana éti. Taicha éna, vahi tétupicavahi eta nayeherepianahi. Ticauyayacarehi najarareca eta táurinavaipahi eta eyeherepiana. ³⁴ Tátupiruvapa táuri eta ítaresiraina éti. Váipavare ecuquicha eta pecatuana. Taicha nararihi ena vuíchaha náimatihini ema Viya te emuri. Titsiriacareripahi eta nacasiriquirahehi eti machaneraqueneanahi ema Viya.

Apanainapa eta vicaqueheyare eta véchepusirainapa

³⁵ Németeaca núti nararihi vuíchaha nasuapahini. Navarahapuca tiyase-recanuanaya: “¿Tájahapuca náicharacavayare eta náechepusirayare ena náepenaqueneanaini? ¿Tájaimahinapapuca eta nacaqueheyare?” ³⁶ Ena tiyase-recanuanaya, tájina náechaquenéna. Puiti, nuvaraha epanerequeneha. Nímicutiarachinaheyare tayehe eta evaraquí. Eta evaraquí váhira tímaruca te vahi vémuriahahini te apaquehe. Ene vicahe viti achaneana. Tínapuca eta vépenira étapa eta náecarairahavi. Tásiha, te táequenepa, vijacapaya eta viáqueheana arairuya. ³⁷ Te vévacapa eta jácani evaraquí, vémuriahapa te apaquehe. Te tinanapahi eta apaquehe, tímarucapa eta vévaraquí. Váhisera étainahíni tachavahini táuchucahini eta evaraquíhi. ³⁸ Táquehepachuhi eta táimarusirahi eta evaraquí maicha ema Viya. Vahi apaimamajinahini eta táimaru. ³⁹ Étaripa eta veche viti achaneana, vahi távasimahihíni eta taeche eta sárare. Apanahi eta táimahi. Eta taeche eta cáyure, apanahivare eta táimahi. Eta taeche eta jima, énerichuvare apanahivare eta táimahi. ⁴⁰ Énerichuvare, eta nacaquehera ena tiávihanahi te anuma, vahi távasihini eta vicaqueherahi viti viávihanahi te juca apaquehe. Apanahivare eta táurinavahi eta nacaqueherahi éna. Víti, apanahivare eta táurinavahi eta vicaqueherahi. ⁴¹ Énerichuvare nuvaraha ácaicutiara eta tajaraivahi eta sache, apanahivare eta táimahi. Vahi távasihini eta tajaraivahi eta caje. Étaripa eta tajaraiva eta jarairiquiana, apanahivare. Jararihivare eta tijarahipana-vacahi tayehe eta apamuriana. ⁴² Ene tacaheyare eta vicaquehera víti te véchepucapa. Apanayare eta táimahi. Te vépenapapuca, ticaecarasiyarehi eta viáquehe, timuyuyarepa eta véche, tépachaicavayarehi. Téchepecayarehisera eta apana viáqueheyare eta máepenacacainapa. ⁴³ Ticaecarasiyarehi eta viáquehe, taicha ticajachacarepuhapa eta véche. Téchepecayarehisera eta tapachinaqueneyare viáqueheyare. Ticaecarasiyarehi eta viáquehe, matume-rairahahi. Téchepecayarehisera eta viáquehe, tétavicavainapa eta tatume-vayare. ⁴⁴ Ticaecarasiyarehi eta enaha viáquehe. Téchepecayarehisera eta viáqueheyare apaimahinapa, tijarahinapa eta vicaqueheraya vicutinapa eta macaqueherahi ema Cristo eta máechepusiraipa. Tanasiyareichuhi eta táimahi eta viáquehe, espírituinapasera.

⁴⁵⁻⁴⁶ Eta Sagrada Escritura, tacahehi eta táechajiriruvahi: “Ema Adán, máinapuiruhi ajairahi máchaneruhi ema Viya”. Éma ticaejaparecahi eta vímarusirahi viti achaneana, vicutihi éma eta vijurusirahi eta vítaresirahi. Tásiha, te táequenénapa, ema apana ajaira ticaijare Cristo, émapa tíjaracahaviyare eta apanayare vítaresirayare, vicaquehenapa eta máquehe. ⁴⁷ Ema ajaira máinapuiruhi, te ticaepiyainapa, máteji eta máquehehi. Éma, távapahiyarehi eta apaquehe. Émasera ema apana ajaira, mávasarichuhi te anuma. Éma Viáquenuhi.

48-49 Viti achaneana, énerichuhivare mátejhi eta viáquehe, taicha mámariequenehavihi ema máinapuiru ajaira. Eta vicaqueherahi tavasimahihi eta macaqueherahi éma. Tipachinayahisera eta viáqueheyare, tacutiyare eta tapachinavahi eta macaqueherahi ema ticavasahi te anuma. Eta vicaqueheyare tavasimahiye eta macaqueherahi ema ticavasahi te anuma, taicha machichahavihi viti.

50 Nuvaraha nímínecapáequenehahéyare, nuparapenaveana, eta veche máteji vahi étaimahi tisiapayare te mávasa ema Viya. Tínapucayarehi ticait-siva eta veche máteji, máepenacayarehi éta. 51 Énerichuvare nuvaraha nímínecapáequenehahéyare eta juca tayumururevainihi: Vahi vámutuimahi vépenayare viti vitareruanáichaha. Ticaitsivayaresera eta viáquehe, víti énapa ena náepenaqueneanaripahi. 52 Ticaema eta chujare, tíchuhahavinapa viti véhicanahi ema Cristo. Tíjuhúchavainapa eta táitsivachiravainapa eta viáquehe viti vitareruanáichaha, tacutiyarechucha viúmatsisina. Tíjuhúchavainavarepa téchepucanayare ena náepenaqueneana, máepenacacainavarepa éna. 53 Taicha tatuparahahi eta viáquehe ticaitsivayare, máepenacacainapa. Máichecuaraquírenapa eta vítaresiraya. 54 Te tamutupa eta táitsivachiravayare eta viáquehe, títauchavainavarepa eta tametarapianahi eta Sagrada Escritura: “Ema Viáquenu macaepahaiha eta vépeniraini”. 55 ¡Vaipa tápicacarehi viyehe eta vépenirapapuca, taicha vahi vánasimahi vépena! ¡Yátupihí eta véchepusiraya te vécarí! 56-57 Eta tacahe, vihasulupayacha ema Viya, taicha éma ticatiuchahaviyare tayehe eta vépenira. Tájina vahi vémitiequenémahi, véchepucayarehisera máichavenehi ema Viáquenu Jesucristo. Tásiha, te jena sácheyare, vaipa vicapecaturaimahi. Váipavare vicaicuñaimahi táicha. Vaipa vépenaimahi.

58 Táitusiava, eti némunaruqueneanahi nuparapenaveana, ímiyanavachucha eta étumechiravaina tayehe eta juca véhiruhi. Vahi tacuequeuérecava eta epanereruana. Ecaemataneacaquenenaya yátupina ema Viáquenu, taicha écharichuhi éti vahi támapurujimahi eta ecaemataneasirahi éma.

16

Eta nanaquiruvanayare

1 Étasera eta juca enaquisiravayare eta nayeheyare ena vichamuriana ticavasanahi te Jerusalén, étarichu éhicayare eta nímítusiravacahi ena vichamuriana ticavasanahi te avasareana eta táichapevahi eta departamento eta Galacia. 2 Puiti, nuvaraha nutuparachaheyare: Te lumincumuhuana, íputsisinavayarepahi, émanapachu eta manaquiruvanayare. Étisera échinavahi áyanahipuca jácani evachasanahi te semanamuhuana. Iúnasinávapaipa apaesa tacuijapa étaparacaimahi te nítecapauchahépa. 3 Te nítecapapa eta ara eyehe, vévatapapa ena enerejiruanahi éti nayana te Jerusalén. Éna tíamanayare eta enaquiruvanahi éti. Níjaracayaresera eta nucartane eta náimeraquíyarepahi. 4 Téheserapuca nútinapaichu návaraha nuyana apaesa nútinapaipa nácáchanenupahi ena vanairucanayare.

Ema Pablo mavarahapa tiyanaya máejirapanavacaya

⁵ Eta nítēsirayare, nuvaraha nétavajicayarepahi te avasareana tayeheana provincia eta Macedonia, nítecapirainapa eta ara eyehe. ⁶ Nuvaraha nunasi-panayare eta eyehe. Tijuricati nucuchapa eta táetavisirahavina eta mura- cana técativava. Tijuricati ímicatapanupahi éti apanava eta nímiyaniravayare nupaica. ⁷ Taicha vahi návarahahini ánipinarichuhini eta néjirairaheyare. Nuvarahahi nunasipanayare. Émapasera téchanuyare ema Viáquenu. ⁸ Nuvara- hahivaresera nunasipanunumayare ani te juca Efeso. Tiámainucava te táetavi- cavapa eta piesta ticaijare Pentecostés, nútijapainapa. ⁹ Taicha nuvarahahi nucamapuravanumayare nucametairu taicha camurianahi ena tivara- hanahi tisamararacanuana. Énerichuvaresera nararihivare camuriana ena viáñaranahi.

¹⁰ Nutuparacaheya, te máitecapauchahepa ema Timoteo, tauri eta ejacapiraina. Échapajirisinanuyare, taicha émarichuhi nucutiquenehi eta vicaemataneasirahi ema Viáquenu. ¹¹ Nutuparacahevare nacuija nacuepuru éma. Ímicatacasera eta mapaisirayare éma apaesa máitecapauchanúvane, émapaicha nucuchapahi núti, énapa ena apamuriana nuchamuriana te juca.

¹² Nuvarahahivaréni mayanahini ema vichamuri Apolo eta ara eyehe, máhicavacahini ena tiámanahi eta nucartane. Váhisera máisapavahini mayanahini puiti. Téhénarínevare apahenavare, mayanapa.

Táichecuaraqui eta macartane ema Pablo

¹³ Ecuneuchava yátupina. Túmhénahi tayehe eta juca véhiruhi. Yátupina eta éjairavavacáina. Vahi ecupica eta vicatajivairanahi. ¹⁴ Eta émunaraivayare yátupina táuchurena te esamureana, étaina táemesiava tamutu jácani íchaque- neanayare.

¹⁵ Puiti nuvaraha némechahe ena tñapucanahi téhicana ema Viáquenu te avasare Corinto, ema Estéfnas, esu mayena, énapa ena machichanaveana. Ichapemurihi eta náijarasiravahi eta náitátirahi ena apamuriana vichamu- rianahi. ¹⁶ Puiti nuvaraha epicauchavaca esuapavaca ena nani. Éneri- chuvare epicauchavare esuapa ena apamuriana tímicatachavianahi eta vicaemataneasirahi ema Viáquenu.

¹⁷ Ichaperinehivare eta núsismurevahi puiti eta náitecapauchiranuhi ema Estéfnas, ema Fortunato, émapa ema Acaico. Tímicitijiricavainehi ámutuhini ítecapauchanuhini éti eta nímairavacahi ena nani mapanana tiásihanahi eta ara eyehe. ¹⁸ Téchararahainehi eta nusamure, túmenuinevare eta nusamiravahi. Ene ecaheyare éti eta táetumechiravayare eta esamure- ana eta ímairainahi ena nani mapanaqueneana te nachavapa eta eyehe. Epicauchayare ena nani, émunasinavayare.

¹⁹⁻²⁰ Téchajicaheana namutu ena vichamuriana ticvasanahi tayehe eta avasareana te juca Asia. Téchajicahevare ema Aquila ésupa esu Priscila, énapa namutu ena tiúrujiricavanahi te napena, taicha énarichuhi vicutique- neanahivare eta véhisirahi ema Viáquenu. Te iúrujicavapa, ejupacacayare éti, táicutiarainahi eta émunajirisiracacahi.

²¹ Nuti Pablo eta nímiamaresirahi eta néchajiriruva eta eyehe, nútijaca- rupapa nájuca eta táichecuaraquihí eta nucartane.

²² Nácanisera máesacharahanahi ema Viáquenu náimainavapainepa éna eta náicuñayare te machavapa. ¡Tata Viáquenu, pítecávanéni!

²³ Nuyaseuchaheparaca me Viáquenu Jesucristo táetaviuchahíni eta iúrica- carevaya máicha. ²⁴ Nuvaraha ejacapaini ámutu eta némunasiráhevacahi

máichavenehi ema Viáquenu Jesucristo. Tamutupa eta néchajirivanahi eyehe.

Eta macartane ema Apóstole Pablo nayehe ena machamuriana ticavasanahi te avasare Corinto, ticaijare 2 CORINTIOS

¹ Nuti Pablo, mayehenuhi apóstole ema Jesucristo. Manerejirunuichuhi ema Tata Vicaiyaquene, mavarairahi nímitucaya ena achaneana eta máechajiriruvana éma. Puiti juca nucartane, nápechava nucajurehe núti, émapa ema viparape Timoteo. Véchajicahehi emutu eti machaneranahi ema Viya ecavasanahi tayehe eta avasare Corinto, énapa namutu ena vichamurianahi machaneranahivare ema Viya ticavasanahi te avasareana tayehe eta departamento Acaya. ² Nuvaraha macatajicahehini ichape ema Tata Vicaiyaquene, émapa ema Viáquenu Jesucristo. Nájaracahehini eta táurivaina eta epanereruana.

Tétavicavahi eta macurisamurechirahavi ema Viya, macaepahairahi eta vicatajivairanahi

³ Núti nuvaraha nucunachaparaca ema Viya Macaiyaquene ema Viáquenu Jesucristo. Taicha éma, Vicaiyaquenehivare víti. Tétavicavahi eta majapanuirahavihi, tétavicavahivare eta macurisamurechirahavihi. ⁴ Puiti éma, ticurisamurerechavihi tayehe tamutu eta viátajivana, apaesa viratahahivaréni víti apanava vicurisamurechavacahivaréni nácani ticatajivanahivare, tacutihí eta macurisamurechirahavihi víti ema Viya. ⁵ Tayanapanehipuca ichapepuca eta vicatajivairahi eta véhisirahi ema Cristo, táetaviuchaquenehivare eta táichapevahi eta macurisamurechirahavihi ema Espiritu Santo májararuhavihi ema Cristo. ⁶ Yátupiquene ichape eta vicatajivairahi táichavenehi eta vímitusirahehi eta máechajiriruvana ema Viya, vivarairahi vétumechaheyare apaesa iúchucuhayare. Émapasera ema Viya ticurisamurechahavipa tayehe eta vicamichirahi tamutu. Taicha éma, mavarahahi ímatiequenehayare eta macurisamurechirahe éti apanava te tamutu jácani ecatajivairana. ⁷ Víti vicasiñavahi eyehe eta ecamichirayare taicha vicuticacahi eta vicatajivairahi étapa eta macurisamurechirahavihi vimutu.

Eta macatajivairana ema Pablo

⁸ Nuparapenaveana, nuvarahavare numetacahe eta vícharacavahi víti tayehe eta jena avasare departamento Asia. Ichapemurihi eta vicatajivairahi. Tiánehipa véchurihayaréni eta vitumevanahi tayehe eta vicamichirana tamutu. Váipavare vémeteacahini víúchucuhahini tayehe eta vépenira. ⁹ Vicutiripa nácani nacaparuasana te navahu ena aguenucana. Ema Viya máisapapa eta juca, mavarairahi vaipa vítijivaimahi vicasiñava. Mavarahapa yátupina eta vicasiñairayarehi eta mayehe, taicha éma, macarichu maratahahi máimichava ticaitarechavi te vépenapapuca. ¹⁰ Cape juca ticatiuchahaviripa tayehe eta vépenirayarehini. Puíticha ticatiuchahavirichaha. Tétavicavainehivare eta vicasiñavairahi eta mayehe, vahi tísapahavimahi vépenávanehíni. ¹¹ Tacahe, nuvaraha ímicatachavini eyujarauchahavini víti. Éti, németeaca camurihénapa éti eyujarauchahaviyare, camuriheyareva éti ehasulupayachainapa ema Viya eta máimiyansirava ticatiuchahavi.

Emá Pablo vahi máitujicavavanehini mayanahini tayehe eta avasare Corinto

¹² Visamavahisera víti eta vicunachiravahi eta tájinairahi víchiravainahini, váhivare apiapiemahavinahini. Sánturuhahaviripa te nataracu namutu ena achaneana, evetijipa éti. Émahisera emá Viya tímícatacahavihi táuríhi eta vítaresirahi táichavenehi eta máemunasirahavihi. Vahi vítijiriruvainahini eta vítupajijiasiravanahi. ¹³ Puiti, tacahehi eta nucartaneana. Vahi apiapiema-nuinahini. Váhivare tácajerahini eta ímatiequenehairayare. ¹⁴ Éti, ímatieque-nehapaipa eta nímiturapiana. Puiti nuvaraha esamayareva eta nuconseja-rapiana apaesa vácuticaca vivapínacaca vítijicaca te jena sache te machavapa emá Viáquenu Jesucristo.

¹⁵⁻¹⁶ Tacahe puiti, eta táinapuíruhi nupanereruhi, nuvarahahi néjirapanahéyarehini, nétauvaichirahéyarehini te nuyanirayarehi tayehe eta departamento Macedonia. Tásiha, te nuchavayarepaini, nápechavavare néjirapanáhe, apiheyaehini eta nucurísamurechirahéyarehini. Tacahe, te tamutuyarepa, ímicatancupapucaini éti eta nuyanirayareva tayehe eta departamento Judea. ¹⁷ Apanaripahisera eta nupanereruhi. Vuíchaha néjirapanahémahi. Váhivare nuvayuacahemahi eta nuvarairahi néjirapanahé. Nítauchayare núti. Vahi ímijachaimahi éti nucuti mácani achane te mapanerechahi, váhisera máitauchahini. ¹⁸ Núti nucasíñavahi eta máimatiranuhi emá Viya. Vahi nuvayuacahemahi éti. ¹⁹ Cape juca, te nímitucahepa núti, émapa emá Silvano, émapa emá Timoteo, vímimatichahehi emá Jesucristo, Machichaquenehi emá Viya. Puiti ímatipa éma, tájinaquenehi mavayuaravaina éma. Núti apanava, tájina nuvayuacahéhiní taicha mavanaranuhi núti. ²⁰ Máichavenehi éma, títauchavahi tamutu eta mapanereruanahi emá Viya. Víti, te visamavaipa eta májjararuvanahi emá Viya, vijirauchahi éma. Vicahehi: ¡Amén! ¡Vicasíñava vímahainapa eta máitauchirainapa! ²¹⁻²² Émaripa emá Viya témuracachahavihi eta víúrujasirahi emá Cristo, víti étipa éti. Timarcachahaviripahivare éma, táicutiarahi eta machichairahavipa, taicha manerejiruhavihi. Tíjaracahaviripavare eta mávahásirahavihi emá Espíritu Santo te visamureana, máitametasirahaviparaca títauchavaya tamutu eta víúricareyarehi.

²³ Núti, vuíchaha nítecaimahi eta ara eyehe, taicha némunacahehi, numavairairahi nucaramécahehini éti. Emá Viya tímatínuhi eta nutupiruvairahi. ²⁴ Vahi nuvaraha rupamicáhe eta esuapiranuinahini nápepejicahéhiní, taicha éti muracaheripahi eta esuapirahi eta juca véhíruhi. Nuvarahahisera nímicatacahe eta tápajusiravaina eta iúrisamurevayare éti.

2

¹ Eta tacahe, vuíchaha nítecaimahi. Taicha vahi návarahahini nápechavahini némecatajivachahehini te esamureana eta néjirairahéyare. ² Taicha te ecatisamureva nícha, tímaticaréipahi nájina ticurísamurechanuimahi núti. Ecarichuyarehi éti ecurísamurechanuyarehi. ³ Tacahe, eta táitsivahi eta néjirapanairahe, nucajurehepa eta táinapuíru nucartane, nuvarairahi ésamiricavayare apaesa vaipa nucatisamurevaimahi icha éti. Nuvarahahisera núsamurehini icha. Tacahe, németeaca étiripa iúrisamurehivaréni ámutu eta nuyehe. ⁴ Jéhevare, te jena sache, te nucajurehepa eta nucartane, ichape-murihi eta nupanereresirahi, nucatisamurehivare. Níyahacavahi ichape. Váhiserá étaparacainahini nuvaraha némecatajivachahehini te esamureana. Núti nuvarahahi ímatihini eta táichapevahi eta némunasirahéhi.

Em a Pablo máijaracahi eta maconsejarapi eta naperdonachirayarehi em a téjicapavahi

⁵⁻⁶ Tiuri puiti, em a maca téjicapavahi máichahi eta pecatu, tétavicavahi eta ecatisamurevahi máicha. Núti apanavare nucatisamurevahivare. Váhisera táurica vivayuchava eta vémecharesira éma. Puiti, tarataharipa eta ecuchurirahi te emuri éti. ⁷ Puiti táurica eperdonachayare eta máichavaquenevahi. Ecurisamurechainapa éma apaesa vahi macuvayuchava eta macatisamurevahi, máinajicavapuca. ⁸ Nuvaraha puiti iápechavahini ímereco eta émunasirasamihi éma. Ejacapavare te emuri. ⁹ Eta tacahe, nucajurehi cape juca, nuvarairahivare nucaicutiaraha te esuapayarepuca eta nuvanairipianahi. ¹⁰ Núti nuperdonacharipa em a maca achane te máijare em a Cristo. Táurica eperdonachayareva, ecutiranuyare eta nuperdonachirahi. ¹¹ Taicha te váhipuca víperdonachacahi, tífehicarehi macamapurava em a Satanás, taicha tímaticarehi eta mavarairahi tímiáquipaichaviyare.

Vaipa máitucacarahini em a Pablo

¹²⁻¹³ Núti, te nítecapapa eta te avasare Troas, nímijachahi nuchimaphini em a nuparape Tito. Tétavicava eta néñamiravahi, nuvarairahi néchayarehi tájahapuca eta ícharacavahi éti. Yátupihinéni natiarihini ena camuriqueneana ena tivarahanahi tisamana eta nímituresirahi eta máimiturapiana em a Jesucristo. Étasera eta néñamiravahi eta eyehe émapa em a Tito, nucame-tavarepa nayehe ena vichamuriana. Nuyanavarepa tayehe eta juca departamento Macedonia, nutanusirayare éma.

Em a Viya, tétavicavahi eta majaneasiravacahi em a mavanaranahi

¹⁴ Tásiha, tétavicavahi eta núsamurevahi eta nuchimahirahi em a Tito eta te juca. Puiti, íchape eta nuhasulupayachirahi em a Viya eta majaneasirahaviparaca, tíjaracahavivare eta máitupajijiasirava eta viratahairahi vicanara tamutu, táichavenehi eta mávahásirahavihi em a Jesucristo. Tituparacahivare vicametarairuyarehi eta máimiturapiana, mavarairahi tíúriyarehi eta nasamiraya namutu ena achaneana tacuti eta najiusira jácane tájijyequeneana. ¹⁵⁻¹⁶ Taicha eta vicametarairuirahi tímicutijiricavahi eta tájijyeva eta incienso, eta máijarasirahi em a Cristo te mamirahu em a Maiya. Tacapusisiacahi namutu ena tisamahaviana. Natiarihi ena masuapajirairahana, náemitiaruanayare taicha namavarairahi nasuapahini. Tíjechehi eta najiusira tacutihí eta máquehe mácane máepenaquenehi. Natiarihivare ena tisuapanapahi náuchucureanayarehi; ticutirinehi najiucachini eta tájijyequene. ¡Tétavicavahi eta néñamiravahi eta vicatuparahairahi! ¹⁷ Viratahasera vítaucha eta vituparahahi. Taicha víti, eta vicametarairuira, tájina vahi vicavacharapi eta máechajiriruva em a Viya, vétupiripicapahipucaini, vivarairainahini tajamurachacarehini, tácutihini eta náichira ena apamuriana tímijachavanahi yátupiqueneana mavaneruana em a Viya. Vítisera yátupiquenehavahi mavanarahavihi em a Viya; vitupiruvahi eta vicametarairuira eta máimiturapi em a Cristo.

3

Viti vicametarairuhiana eta téqueneha matrature em a Viya

¹ Vahi nuvaraha ímijachahavi eta vicunachiravainahini puiti. Váhivare vácutihini ena nácani apamuriana tímiturahianahí, típairiricana tíamanahi eta carta táechajisihahi eta nacunachacarevahi. Tájinavare vímatiyahini

viyaseacahehini víti eta carta vímeraquinapahini táechajisihahini eta ecunachirahavinahini. ²⁻³ Étiserá, tájina véñamiravaimahi eyehe. Taicha tímaticarehi te avasareana eta táurivahi eta ítaresirana éti, táichavenehi eta vinacasamurechirahéhi eta máechajiriruva ema Viya. Eta juca tímereuchahavi víti eta yátupirahi mavanarahavianahi ema Viya. Éti, ecutihí eta carta vímeraquianapahi. Émaquene ema Cristo, ema íájuchahi, taicha tíjaracahehi ema Espíritu Santo máitsivachaheyahehi eta ítaresirana, táuriyahehi eta esamureana. Arairuripa eta ítaresirahi. Puiti juca eta ítaresirahi, tájinapa étaparacaina esuapahini eta vanairipiana tacajuquenehi acane te márime tabla.

⁴ Éta tacahe, tájina vahi néñamavaimahi tayehe eta apóstolenuirahi. Nétumechava ichape, taicha nusiñavahi eta manerejirunuirahi ema Cristo, májjarasiranuhivare ema Viya eta máitupajjiasiravana. ⁵ Taicha víti vahi vítijivainahini víjaracava eta vítupajjiasirava. Émaquenehi ema Viya tíjaracahavihi eta vítumevanahi eta vícaemataneasirahi éma. ⁶ Émaquenehi tituparacahavi vícametarairuyarehi eta arairu matratune. Vahi étainahini nupamicaheyare eta esuapirayarehi eta vanairipiana. Taicha eta juca arairu matratune ema Viya, tíjaracahehi emutu ema Espíritu Santo, máitsivachinaheyahehi eta ítaresirana, arairuinapa. Étasera eta vanairipi tacarichu táimivanerecahi eta náepeniraya ena téjecapavana.

⁷ Acane, te jena sache te tíucupaicapa ema Moisés te cerro, mámapahi eta vanairipiana tacajuquenehi te márime tabla. Eta mamira, tétavicavahi eta tarapepesirapahi táichavenehi eta macachanerahi ema Viya. Ena achaneana, vaipa náratahahini náimarraca eta mamira. Ichapehinéni eta tapicauhacarevahi eta vanairipiana taicha tétavicavahi eta tarapepesirapahi eta mamira ema tiámapahi. Étasera eta mayerevapa, tímutserahavapaipahi témitiaca eta tarapepesirahi. Eta vanairipiana, tacarichuhi táimicapacahi nácani téjecapavanahi. ⁸ Étasera eta arairu matratune ema Viya, eta nucametarairuquenehi puiti, tétavicavahi eta tápajusiravahi eta tasuapacarevahi taicha tiámahavihi eta mávahásirahavihi ema Espíritu Santo. ⁹ Yátupihí eta tasuapacarevahi eta vanairipiana, tiápajucavahísera eta tasuapacarevapanahi eta máichuarapi ema Viya, víjacapacarehi mayehe táichavenehi éta. ¹⁰ Yátupi tirapepecahi eta mamira ema tiámapahi eta vanairipiana, váhisera étaparacainahini táurichahavihini. Jéhevarequenehi puiti, tétavicavahi eta víúrivahi maicha ema Espíritu Santo. ¹¹ Éta tarapepesirahi eta mamira ema Moisés, tímutserahavapaipahi témitiaca. Éta juca táicutiharahi eta ánipirichuhi eta tasuapacarevayarehi eta mavanairipiana. Étasera eta juca máichuhairahavi ema Viya, tiápajucavahi eta tasuapacarevahi taicha máichecuaraquireyahehi eta víúrivaya táicha.

¹² Étavenehi eta vicasiñavairahi vímahayare éta juca sache vicuchapaguenehi, víti matupararuana vétumechavahi eta vícametarairuirana. ¹³ Váhi vácutihini ema víyarahaini Moisés, tépacamirahavahi te páñome, tíuriyarepa eta náimarrasirayarehi ena machamuriana. Váipasare nanecapahini te tímutserahavapa eta táemahairapahi eta tarapepesirahi eta mamira, táicutiharahi eta táepahairaya eta tujamisirahavini eta vanairipiana eta vítauchirayarehi. ¹⁴⁻¹⁵ Puiticha ena nupaneana israelítana vahi nácaicutiarahini éta juca. Tacahe, te náechejicuha eta ichasiquene matratune ema Viya tacajuquenehi eta te libro májurehi ema Moisés, vuíchaha nácaicutiarahini. Tímicutijiricaváichucha táepacuchahi eta máepacamirahi ema Moisés. Ticajeraichucha

eta nacaicutiarairayarehi. ¹⁶ Mácanisera achane, esenapuca, tjaracavapa eta máehisirayarehi ema Viáquenu, ichapenapa eta macaicutiarairayare. Tájina pa táepacaquiñahaimahi. ¹⁷ Jéhesare, ema Viáquenu tjaracahavisarepa ema Espíritu Santo. Tásiha, vaipa vipicacaracavahini eta vipauchiraya éma. Yátupina eta vivapinairavahi maicha ema Espíritu Santo. ¹⁸ Tacahe, vimutu víti véhicaniha ema Viáquenu vicutiripa eta espejo eta tarapepesirahi eta tajaravahi eta sache. Víti, yátupihí vímerecohi eta máurivahi ema Viáquenu. Vaipa vicaepacamirahini. Eta tacahe, víti puiti tiápajucavainapaipa eta vicutirayare ema Viáquenu taicha tiápajucavahi eta majaravahi te visamureana. Étavenehivare eta mávahásirahavihi ema Espíritu Santo máijjararuhi ema Viáquenu.

4

¹ Eta tacahe, váhiquene viyacujiequenehavaimahi eta vicametarairuira, taicha ema Viya tímechahavihi eta máemunaraiva eta matuparasirahavihi eta juca vicaemataneasirayarehi éma. ² Víti, tájina vímatiyahini viyumurujiricahini eta víchaqueneana. Váhivare víchahini eta titsirihacareana. Váhivare víútserrupinahipucaini vihapapicahipucaini eta máimiturapiana ema Viya, taicha vivaraha vicurisarumrechaya éma. Tamutuhi véchajisihahi eta yátupiqueneana. Jéhesare, vivaraha nacaicutiarahini ena achaneana eta vímiturapianahi tásihaqueneanahi me Viya. ³⁻⁴ Nararihisamisera nácani vahi nacaicutiarahini eta vímiturapiana, taicha ema Váinaraji, tacaiyaquenehi eta juca apaquehe, éma tépacaquiñahavacahi éna. Taicha vahi mávarahahini náimatiequenehahini eta máimiturapiana ema Jesucristo, tétavicavahi eta tajarahiquenérahí taicha émaquenehi macunaquenehi ema Viya. Táitusiava éna, vaipa nácaicutiarahini eta vímiturapi. Náemitiaruanayarehi tayehe eta ecuñaraqúí táicha. ⁵ Te vicametarairu víti, váhi vítinahini vicunachavahini, vivarahahini éhichahí. Vivarahahisera esuapahini ema Jesucristo, eaque-nuyarehivare éma. Víti vanairucahavichucha eta eyehe, taicha vicaemataneacahi ema Jesús. ⁶ Ema Viya, te máepiyacainapa eta juca apaquehe, macavanairipipa tatiarihiyarehi eta tjarahí, témitiacayarepa eta tímapicquenénihi. Ene macahehi eta viyehé. Tímimaticahávihi eta majaraiva ema Machicha. Tétavicavahi eta tajaravahi te visamureana. Éma, tímimaticahavipaipahi eta máetaviuchaquenehi máurivahi ema Viya.

Puiti eta vítaresirahi, vímerecovaya yátupihí eta vicasiñairahi eta macatiuchirahavipaipa ema Viya

⁷ Eta juca véhiruhi vímiturapianahi, tétavicavahi eta tacunachacarevahi. Vahi vítinahini vicunachacarehini. Taicha víti páureanasami, vicutichucha eta muñeca náipune. Émasera ema Viya máimerecohi eta máitupajjiasiravahi, máijjarasirapa eta tatumevayarehi eta viáquehe. Váhiserá vítijivainahini. ⁸ Táichavenehi eta vicametarairuira, tatiarihihi jácani víchavaquénévahi; ticatiuchahavahisera ema Viya apaesa víúchuchuhaparaca. Ichapevare jácani eta táimipanerererirahavihi; vicasíñavahisera eta majaneasirahavihi ema Viya. ⁹ Tipanajiricahavianahi ena viánarana, váhisera tijunijiacahavimahi ema Viya eta majaneasirahavihi. Tayanapane nachururupacahavihi, émasera ema Viya vahi máisapaimahi ticapacahaviana. ¹⁰⁻¹¹ Tamutu te jácani vicaijuheanapahi, natiarihi ena navaraha ticapacahaviana táichavenehi eta véhisirahi ema Jesús. Tamutu sácheana víamarairicapahi eta vépenira, vicutihí

ema Jesús eta napanereuchirahi éma. Émarichuhisera ema Jesús máechepu-
requenehi. Éma máimerecahi eta máitupajijiasirava eta macuchucuirahavi-
paipahi tayehe tamutu eta víchararacavaqueneanahi. ¹² Tayanapane víti
viámairicaahi eta vépenira táichavenehi eta vímituresirahi, táitsivahisera eja-
capahi éti eta tamaichecuaraquireyarehi eta ítaresira táichavenehi eta esuapi-
rahavihi. ¹³ Ema víyarahaini David, ani macahehi eta máechajiriruvana eta
te Salmo: “Núti nucasíñavahi mayehe ema Viya, tásiha vahi nupicacaraca-
vahini eta néchajisirayare mayehe” macahepa. Énerichuhi vicahehi víti puiti.
Vicasíñavahi mayehe eta macatiuchirahaviyare. Táitusiava, vahi vipicacara-
cavaimahi eta vímituresiraya. ¹⁴ Taicha véchahi eta macaechepusirahavi-
yarehi ema Viya, vicutiyahehi eta macaechepusirahi ema Machicha Jesús
te máecari. Tásiha, étamurihavinapa, éti apanavare, eta vímeresiravayare te
mamirahu éma. ¹⁵ Tamutu eta juca víchavaquenevanahi, támahi eta iúrivaya-
yarehi. Vicamichahi tamutu, taicha vivarahahi eti esimutuqueneanahi
ejacpahini eta iúrivayare máijjararuhehi ema Viya, apaesa ámutuhivaréni eti
esimutuqueneanahi ehasulupayachahini éma, ecunachahivaréni.

¹⁶ Eta tacahe, váiparinehi vicainajiruvaimahi. Tayanapanepuca tivitaji
eta viáquehe, étasera eta viáchaneva tétavicavaichucha eta tatumeva tamutu
sácheana. ¹⁷ Taicha eta viátajivanahi puiti juca vítaresiraichaha, vahi
táunacacare. Técativánachucha, táinucuhávanepa. Énerichuvare, jararihi
eta táitsivahi, taicha vijacapai eta táetaviuchiravaya eta viúricacarevayare.
Puiti tájina tácutimahi eta viúricacarevaya, taicha máichecuaraquirénapa éta.
¹⁸ Eta tacahe, vahi vipicacaracavaimahi eta viátajivanahi, taicha vahi
táunacacarehini. Vicasíñavahisera mayehe ema Viya eta máimisiapirahaviya
eta te mávasa anuma. Tásiha, máichecuaraquirénapa eta viúricacarevaya eta
viávihairaya tayehe.

5

¹ Vimutuhi vímati te náquipaicapuca eta viáquehe, tépenayarehi éta. Taicha
éta, vahi muracainahini. Tacutihi te viáquipaica eta peti. Máejerarehi
vicha taicha vahi muracainahini. Jararihisera eta viáqueheyarehi te anuma
vícuchihi mayehe ema Viya. Éta, nájinapa tiratahaimahi tiáquipaica taicha
máepiyaruihi éma. ² Puiti, tétavicavahi eta tacatajivairahi eta viáquehe. Tamu-
tuhi tasama. Eta tacahe, vivarahainehi tájjahúchavahini tacaitsivahini eta
viáqueheyare te anuma. ³ Taicha vicamunurinehi eta arairu viáquehe, apaesa
vahi vitsirihaimahi eta vicachanerayare ema Viáquenu taicha vicutiyahe
éma. ⁴ Puiti eta juca vítaresiraichaha, tamutuhi tasama eta viáquehe. Ichape-
murihi eta táimipaneresirahavihi. Váhisera étainahini eta vivarairainahini
vépenávane, étasera vivarairahi tacaitsivahini eta viáquehe arairuinahini.
⁵ Tacahe, ema Viya tamutuhi máicucha eta táichararacavayare te apana
vítaresira. Puiti tájaracahavivare ema Espíritu Santo. Émapa útametacaha-
vaparaca eta vijacapirayare eta vícuchianahi.

⁶⁻⁷ Tacahe, núti vahi nupicahini eta népenirayarepuca, taicha ichape
eta nucasíñavairahi mayehe ema Viya. Tájjina vahi néñamavaimahi
mayehe eta máijjarasiranuinapa eta arairu náquehe, tayanapane vuíchaha
nímahahini. Eta táimiyániravaya eta nítaresirahi, nuyerehi eta nícuchihi
náqueheyare. ⁸ Nuvarahainehisera tájjahúchavahini tacaitsivahini eta juca

náquehe, nuyanasarepaini nucachanehini ema Viáquenu. ⁹ Eta tacahe, vi-
varaha ichapemurihi eta vicurismurechirahi eta vícaemataneasira ema
Viáquenu puiti juca vítaresiraichaha. Tásiha éma, tiúrisamureyare eta viyehe
te vímerekavainapa te mamirahu. ¹⁰ Taicha vimutu vímerekavayare te mami-
rahu ema Cristo te mávacureyare. Ánaqui tímaticareyare tamutu eta víchaque-
neanapachuhi puiti juca vítaresiraichaha, te víchahipuca eta táuriqueneana,
te étahipuca eta tamauriqueneana. Te víchahipuca eta táuriqueneana, víjaca-
painapa eta vícuchianapahi.

*Em a Viya mavaraha vipauchayarehi éma, macaepahairaya eta vipi-
cacarasiravahi eta vícuñayare*

¹¹ Nútisera, ichape eta nupicauchirahi ema Viya. Eta tacahe, nímiyanava
numetacavacahi ena achaneana eta mayehe, taicha nuvarahahi námutihini
napicauchahivaréni éma. Émasera, tétavicavahi eta máimatiranuhi táurivahi
eta nupanereruana eta nucaemataneasirahi éma. Puiti nuvaraha échahi-
varéni éti apanava eta táurivahi eta nupanereruana. ¹² Tacahe, eta juca
néchajisihahi, vahi nútinahini nucunachavahini. Nuvarahahisera nucuna-
chacarehini eta eyehe, apaesa áratahahini ecaminatína ena tímijachavanahi
náimatiequeneha. Váhisera yátupinahini táuchurequenénahini te nasamure-
ana. ¹³ Éna, tépiyaequenehanuanahi, máurishinuhíji náicha, taicha ichape eta
nuvapinairavahi eta nucaemataneasirahi ema Viya. Tiúrihisera eta nuchuti.
Nuvarahaparaca ichapenaini eta iúricacarevaina éti. ¹⁴⁻¹⁵ Núti nímatihí eta
táetavichirahi eta máemunasirahavíhi ema Cristo, taicha máepeninahavíhi
te crusu. Vimutu víti achaneana vítuparahaichu vépenirapachu. Mavacha-
chaipasera tamutu ema Cristo. Eta tacahe, tatuparaca vítsirijicava vícaema-
taneaca éma. Tásiha puiti, víti machanerahavípa. Vaípa vítijiricavaimahi.
Émapa téchahi eta vítaresira, taicha eta machavirahi títareca. ¹⁶ Eta tacahe,
víti véhicanarípa ema Cristo, étainapa vipanerechayare eta vítsivachirípa
eta vítaresira. Vaípa véhicaimahi eta apana panereruca tayeheanahi te juca
apaquehe. Étarípa cape juca víásinequenehi váhirichu visuapapajicahini
ema Cristo, vímijacharichucha éma vícutíhi víti achaneasamí. Puítisera
vaípa tácahehi eta vipanereruana. Visuapahi émaírahi Máchichaquenehi ema
Viya. ¹⁷ Puítirípa víti víúrujiacanahi ema Cristo, apanahavirípa. Vínajicaípa
eta víyeherepiníhi tamauriqueneana. Tamutupa arairuhi puiti eta víyehe-
repiana.

¹⁸⁻¹⁹ Ema Viya, tétavicavahi eta máurivahi eta víyehe. Éma, mavarahahi
vipauchayarehi éma. Mavarahahivare macaepahayarehini eta vipicacarasiravahi
eta vícuñayare táichavenehi eta vípecaturana. Tásiha, mavaneca ema
Machicha Jesucristo apaesa macaepahayarehi eta vípecaturana vimutu víti
vícasíñavana eta mayehe, vaípa máecharairicaimahi. Tásiha, tájina eta vipica-
carasiravaimahi eta vícuñainahini. Tásiha puiti, ema Viya tituparacahavípa
víti véhicanahi eta víchuhairavacayare namutu ena apamuriana achaneana,
apaesa éna apanava nacasíñavavare eta mayehe, váipavare típicacaracava-
naimahi eta mayehe. ²⁰ Tacahe, víti mavaneruhavíhi ema Cristo víchuhava-
cayarehi namutu. Tímicutíjiricavaípa émaquenénahini máechajicavacahini
ema Viya. Puiti víyaseacavacahí namutu nacasíñava mayehe ema Jesu-
cristo; váipavare típicacaracavanayarehini eta náicuñainahini náicuchiyaréni.
²¹ Ema Cristo, tájina mapecaturainahini. Étasera mavarairahi ema Viya
víuchucuhayare víti, émapa ema Cristo tamuriacahí eta vípecaturana. Puiti,

tájinasarepa víchiravaimahi, tájinavarepa viviurevaina te mamirahu ema Viya vimutu viti viúrujarianahi ema Cristo.

6

¹ Tásiha, núti mavanaranuhi ema Viya, nuyaseacaheyare ímiyanava tauri eta éhisirahi éma. Vahi ecuemepurureca eta máemunasirahehi, majacapirahehivare. ² (Taicha ani macahehi eta máechajiriruvahi tayehe eta Sagrada Escritura: “Nuchicha, tétavicava eta pisamacarevayare eta nuyehe te pipiaracanu. Nucatiuchavivaneyare” macahepa. Jéhesare, puiti juca sache ticamapuracarehi eta epiarasirayarehi éma, ejacapacarechaha me Viya mapurare achanehechaha. Esamacarechaha puiti, taicha ema Viya mavaraha ticuchucuhaheyare eta te ícuñayaréni taicha eta epecaturana.)

³ Núti nuvaraha nacuija nacaecahini eta vématanerepi viti apóstoleana. Eta tacahe, nupamicavahi núti tiúriyare eta nuyeherepiana. ⁴ Eta tacahe, ichape eta néchapiravahi te nímitureca. Nímerecavahi yátupi eta mavanarairanuhi ema Viya. Ichapemuri eta nucamichirahi eta nucatajivairana, eta néchuriasirana, étapa eta tacajeravana eta nítátijirisirava. ⁵ Vahi nucaínajiruvaimahi táichavene eta náestasiranuhi ena nánarana, náeratasiranuhivare, tájinanéni viviurevainahini. Te apana avasareana tímurijiacanuanahi taicha eta nasemanevahi. Eta nítátijirisiravahi, ichape eta tamuracavahi eta nucaematanerahi. Camurihivare eta numacaimasiravahi. Camurihivare eta nécuava eta nupaisirana. ⁶ Éti ímatinuhi yátupihí eta táurivahi eta nítaresira. Ímatinuhivare eta nucaimitucasihi mayehe ema Jesucristo. Táichavenehi eta mávahásiranuhi ema Espíritu Santo, nucayehehi eta paciencia nayehe namutu, nujapanurahihivare. Yátupiquenehi eta némunaraivahi. ⁷ Nímitucahi eta yátupihí máimiturapiana ema Viáquenu. Énerichuvare ema Viya tímícatacanuhi tayehe eta máítupajijiasiravahi te tamutu eta nucametarairuirahi eta máechajiriruvahi, étapa eta nucatiuchirahi eta véhiruhi. ⁸ Eta nupaisirapaipahi, natiarihihi ena ticunachanuanahi, tiúriemanahi eta nuyehe. Natiarihihivare ena tépurunuanahi, tífemahipivare eta nacayemaquene eta nuyehe. Natiarihihivare ena tímijarechanuana tépiyahirahi. Nutupiruvahisera tamutu eta nítaresirahi. ⁹ Natiarihivare ena vahi tisuapanuanaimahi, taicha tépuruanahi eta apóstolenuirahi. Natiarihisamivaresera ena tisuapanuana taicha tisamairircanuanahi eta yátupirahi eta nímiturapiana. Tatiarihihivare te tiánehipa eta népenirayaréni. Núchuchisera, maicha ema Viya. Natiarihihivare ena téhanacanuana muraca. Váhiserá máisapavaca ema Viya eta nacapasiranuinahini. ¹⁰ Tatiarihihivare te nucatisamurevahi ichape. Nútisera nucurisamurereacavahi tamutu sácheana. Páurenuhi eta náimairanuhi ena achaneana. Ichapemurianahisera ena níjararuanahi eta tacaimahaquenehi eta náchanevana. Ani, tájina nímahaquenéna. Téhesera apana nítaresira, tétavicavaya eta nucaimahaqueneraya.

¹¹ Nuparapenaveana némunaruqueneana, nutupiruvahi te nusamure eta juca nuconsejarapianahi eyehé. ¹² Vahi nuvaraha ecumijachahini nínjaiacahe eta némunasirahehi. Németeacahisera éti ínajiicanuhi eta émunasiranuhi. ¹³ Éti, ecutihí nuchichanavehénahini eta némunasirahehi. Nuvaraha tachavahini eta émunasiranuhi, esuapiranuhivaréni.

Viti, tiávahácahavihi ema Viya taicha machanerahavihi

¹⁴ Nuparapenaveana, vahi ecuávahácavaca nácani máehicarahanahi ema Viáquenu. Étaripa te arayenaheyare, vahi ecuveha nácani máehicarahanahi.

Taicha téjecacayarehi eta panererucana. Viti véhicanahi ema Viáquenu, tatupiruvahi eta vipanereru. Énasera ena máehicarahanahi, tavayuacahi eta tauriqueneana. Viti viúricahi eta tijarahi; énasera náuricahi eta tímápicu. ¹⁵ Taicha víti, mávaháruhavihi ema Cristo. Váiparinehi vicachánemahi ema Váinaraji. Tásiha, te viávahácavaca ena masuapajirairahana, tiápitavairicanahi eta véhisirahi ema Viáquenu. ¹⁶ Énerichuvare, tiávahácavahipa ema Viya, émaripa ema Vicaiyaquene. Taicha ani macahehi: “Núti návahácavacaya ena téhicanuanahi. Néhavacayareva éna, taicha éna yátupiqueneanahi nuchaneranahi” macahepa. Eta tacahe, váhiquene táuricahini eta vicasiapiravahini eta nayehe ena vahi machanerainahini ema Viya, taicha apanahi ema nasiñarajihini. ¹⁷ Taicha acane macavanairipipa ema Viya, ani macahehi: “Érajicava eta te namuri ena vahi nuchanerainaina, machu napareacahe eta namaeperajivana éna. Tacahe, éti nujacapahe-yarehi. ¹⁸ Núti yátupiquenénuyarehi Ecaiyaquenenuhi. Éti nuchichanaveanahi” macahepa ema Viya máitupajijihaquehenehi.

7

¹ Tacahe, némunaruruqueneana nuparapenaveana, vahi távarahahini vínajicavahini tayehe eta juca vicuchapaquenehi puiti. Tacahe, vépachinachayarehi tamutu eta viáquehe étapa eta viáchaneva. Víjaracavayarehi tamutu te visamureana me Viya taicha eta vipicauchirahi éma.

Eta máurisamurevahi ema Pablo táurivaipa eta náitaresira ena machamuriana

² Nuparapenaveana, nuvaraha ímivanavahini esuapanuhini. Taicha nájinahi te taracu éti nacatajivahini náinajicavahini níchavenénahini núti. Nájinavare nucaetemaqueneahini, nímpipananájicavacahipucaini. ³ Váhivare nuvaraha nucajachahe puiti. Nutupiruvahi eta numetasirahehi cape juca: “Tétavicavahi eta nucasamurerahehi. Tájina ticamitisicanuimahi, tayanapanepuca népena”. ⁴ Ichape eta nucasínavairahi eta eyehe, nucunachahehi eta ecurisamurechiranuhi. Tayanapanehinéni ichape eta nucatajivairahi, tétavíjavahisera eta étumechiranuhi ecurisamurechiranuhi.

⁵ Étaripa te nítecapapa tayehe eta Macedonia, tájina nunarasirainahini. Ichape eta nucatajivairahi naicha ena ticitianacuanahi. Ichaperinehivare eta néñamiravahi eta eyehe. ⁶ Émasera ema Viya tétavicavahi eta máetumeravahi nayehe nácani téñamavasamureanahi. Nútiripa nétumechavainehi maicha éma, eta nímairapa máitecapauchiranuhi ema Tito. ⁷ Tavetijipa eta mametasiranupa ema Tito eta ecurisamurechirarinehi éma. Timetacanutvare ichape eta éñamiravahi eta nuyehe; evarairaipacha ímahanu; ichapevare eta evarairahi esuapanu eta étupirisirahi ema maca achane téjecapavahi. ¡Eta juca, tétavicavainehi eta ecurisamurechiranuhi!

⁸ Ichapehinéni eta táimipaneresirahehi eta nucartane. Nútiripa, ichaperinehivare eta táimipaneresiranuhi nucatisamurevahi te nucajurepa. Némitisicapasera puiti, taicha ánipi eta táimipaneresirahehi. ⁹ Puítisera, tétavicavainehi eta núrisamurevahi icha, eta táetaviasiraheripahi eta ecatisamurevahi. Eta núrisamurevahi, vahi étainahini taicha eta ecatisamurevahi. Núti núrisamurevahi taicha títsivachavaipahi eta táurivaipahi eta epanereruana, evarairahi ecurisamurecha ema Viya. Eta tacahe, víti tájinapa vácayemahini eta eyehe. ¹⁰ Taicha tatiarihini eta jácani máijjaruhi ema Viya, táimipaneresirahehi, mavarairahi eta éneuchiravaya tayehe

eta ejacpiravahi apaesa macuchucuhahe. Eta ecatisamurevahi tiámahi eta iúricacarevaya. Énasera ena apamuriana achaneana tayehe eta juca apaquehe, yátupi ticatisamurevanahi, váhisera náeneuchavahini eta me Viya. Éta, tiáma eta náepenira. ¹¹ Étiserá, ¡tétavícavahi eta iúrivahi tásihaquenehi eta ecatisamurevairahi! Enevanerinehi ínajicahi eta éjcapiravahi taicha evarahahi ímíyanava ecurisamurecha ema Viya. Ichaperinehi eta nucunachirahehi taicha epicauchainehi ema Viya tayehe eta juca íchavaquenéahi. Evarahainehi níjahúchavahini nítecahini eta eyehe nímicatacahehini. Étiserá enevanepa ecurujicacahi taicha eta esemanevahi maicha ema téjcapavahi te etaracu. Enevanepa émecharecapa éma. Ímerekavahi eta tamajinairahi éjcapiravainahini éti. ¹² Núti, te nucajurehénapa eta táinapure nucartane, vahi émainahíni máimipanererecanuhini ema téjcapavahi, váhivare émainahíni máimipanererecanuhini ema maiya, émaripa ema majarareruhi. Íchavenehi éti eta ímipanereresiranuhi te nucajurehénapa, nuvarairahi ímereuchavayarehi eta yátupipapuca eta esupiranuinahini te mavahuana ema Viya. ¹³ Eta tacahe, tétavícavainehi eta étumechiranuhi núti eta nusamairisirahehi eta esupiranuípa.

Tavetijipa eta núrísamurevapa eta táurivahi eta ejacpirahi ema Tito. Tétavícavahi eta máúrisamurevapahi ícha éti eta ésamirisiravaipa. ¹⁴ Váhirichu támapurujihini eta nucunachirahehi mayehe ema Tito eta núrísamurevahi ícha éti. Puítiripa, ímereuchavapa yátupíhi eta ecunachacarevahi. ¹⁵ Éma, tiápajucavapaipa eta máemunásirahehi éti. Máecharairicahi eta táurivahi eta ejacpirahi éma, esuparinehivare, táichavenehi eta emansuiravahi étapa eta epicauchirahi ichape ema Viáquenu. ¹⁶ Núti apanavare, tétavícavahivare eta núrísamurevahi ícha éti. Nucasiñavahi táimíyanava eta esupiranuína te tamutu.

8

Tatupiruvayare te visamure te vivaraha vicajirica

¹ Tiuri puiti, nuparapenaveana, vivaraha vimetacahe eta nanaquisiravahi ichape ena apamuriana vichamuriana ticavasanahi te avasareana tina-paica te juca Macedonia. Éna, nasuapavanepa eta manacasamurechirahi ema Viya eta nacajirisirayarehi. ² Ichapemurihinéni eta náichirahi ena ticitianacanahi náemepaurechavacahi, váhisera náinajicavahini. Tivapinarichucha. Tatupiruvahi te nasamureana eta nájarasirahi eta nanaquiruvana. Páureanahinéni, tímecavahisera eta nanaquiruvana, ticutirine rícoanainahini. ³ Núti néchajisihahi eta juca taicha nunecapaequenehahi eta tápajusiravahi eta nanaquiruvana. Vahi náeñamahini, náijaracahi jácani nacayehequene. Vahi vipamicavacahini víti. ⁴ Énasera, ichapemurihivare eta nayaseasirahavíhi vísapahini tinaquicavana éna apanava, navarairahi nacajiyare ena vichamuriana ticavasanahi te Jerusalén. ⁵ Éna, náetaviuchahi eta navapinairavahi. Tínapucapa tinaquicavanahi eta nacaemataneasirahi ema Viya, navarairahi nacurísamurecha éma. Tásiha, étapa eta náicurehi ena vichamuriana. ⁶ Eta nímaírahí núti eta navapinavairahi eta nacajirisiraya, nupanerechahi nuvanecaya ema Tito machava máiteca eta ara eyehe apaesa táitauchavapaini eta enaquiruvanahi éti apanava. Cape juca épaniravainapa. Puiti ítauchavanepaini. ⁷ Taicha éti, ichapemuri eta ecasiñavairahi me Viya.

Tétavicavahivare eta échemaraivahi. Camurihevare éti ímiturahiana. Evapinavahivare eta ecaemataneasirahi ema Viya. Tétavicavahivare eta émunaraivahi eta viyehé. Eta tacahe, táurica tápajucavahivaréni eta enaquiruvana ecajirisiraya.

⁸ Váhisera nupamicahé eta nuanesirahénahini. Nuvarahahisera ímatiequenehahi eta navapinaraivahi ena apamuriana vichamuriana apaesa ímerecahini éti apanava eta yátupiquenérahí émunaraivahi. ⁹ Ímatirichuhi éti eta máemunasirahavihi ema Viáquenu Jesucristo. Éma, tamutu tíuricacarehi te máviahí te anuma, tájinahinéni mácamunuhini. Étivenehisera tíucupaicapa te juca apaquehe. Páurehi éma eta máitaresirahi apaesa éti ejacpahini eta íuricacareva maicha éma.

¹⁰⁻¹¹ Németeaca táurica ítauchavanéni eta juca enaquisiravahi, váchupa épanavaqueneripahi cape año. Táimiyana va eta evapinairavayahéni eta ítauchiraya eta enaquiruvanyare tásihaquenehi eta jácáni tatiarihiqueneanahi ecayehéqueneahí. ¹² Etiarihi erataha enaquica apaesachicha. Etiarihihvare erataha íápajucava eta enaquisiravahi. Etiarihi erataha enaquica camuri. Tacamunuchucha tátupiruva te esamureana, evapinavahi eta enaquiruvaya apaesa tijacapacareya mayehé ema Viya.

¹³ Vahi nuyaseacahe échuriahini éti táichavénenahini eta ímicatasirayare ena apamuriana. ¹⁴ Nuvarahahisera ímerecavahini eta ímicatasiravacayare ena vichamurianahi. Puití ecáimahaquenevacahí, eratahahí ecajirica ena náechuriaruanahi. Tijuricati te apana año, étipavainapapuca échuriaca. Éna títsirijicavanainapa eta eyehe, énapavainapa tinaquicavanayare. Ene tacahéyare eta ítaresirayare, ecuticacayare. Nacuija nacucatajiva tayehe eta ecamunuqueneana. ¹⁵ Vítauchayare eta tacayemaquenehi eta Sagrada Escritura, aní tacahe: “Namutuhi ticaniruana. Nájina nácatajivahini, nájinvare náechuriahini, váhivare náemepururecahíni” tacahepa.

Éma Tito énapa ena apinana vanairucanahi mayehé ema Pablo

¹⁶ Núti nuhasulupayachahi ema Viya eta manacasamurechirahi ema Tito máeñamiravahi eta eyehe, tacutihi eta nusamure néñamiravahi eta eyehe. ¹⁷ Éma, matupiruvahi tijicapanuhi eta nutuparasirahi téchapajiricaheyare. Ichape eta mavarairahi téjirapanahéyare, taicha tétavicavahi eta máemunasirahéhi.

¹⁸ Eta mayanirayare ema Tito eta ara eyehe, vévatacayare macachaneyarepahi ema apana vichamurihvare. Tímaticarehi éma eta macunachacarevahi te jácáni máimituresirapahi nayehe ena vichamuriana tayehe eta véhiruhi. ¹⁹ Éma maca nerejihí ne vichamuriana eta máimicatasiranuyare eta vipaisirayare, víjarasirayare ena vichamuriana eta enaquiruvanyahí. Víchahi eta juca, vivarairahi vicurisamurechaya ema Viáquenu. Vímereuchaheyareva eta evapinairavahi éti ecajiravahi. ²⁰⁻²¹ Taicha núti eta víamirayare eta ichapequene enaquiruvana, nuvaraha nímerecayare eta táuriva eta víchira, apaesa vahí nacuechajisianu nácani achaneana. Éma Viya tímararacanuhi eta táuriva eta nupanereruana. Nuvarahavare tíuri eta náimairahi ena vichamuriana.

²² Énerichuvare vévatacayareva ema apanavare vichamuri. Éma, ichapemurihi tímerechava eta mavapinairahi eta macaemataneasirahi ema Viáquenu. Puití éma, tivapinavavarepa eta máitecapauchiraheya, taicha macasiñavahi eta máimatirainapa eta evapinavahi eta ecajiravahi éti.

²³ Núti nuvarahahi náimatiyarehi namutu ema Tito, eta émairahi nujupaha tayehe eta juca vématanerepi. Viciticacahi eta vicaemataneasirahe, véchapajirisirahehi éti. Étaripa te nacayasesererupuca nayehe ena apinana vichamuriana macachanequeneanayarehi ema Tito, énerichuvare emetacayare eta nerejanahi ena apamuriana vichamuriana, táichavenehi eta táurivahi eta nacaemataneasirahi ema Cristo. ²⁴ Nuvarahahi ímerecavayare eta nayehe ena nani apinana vichamuriana eta yátupirahi eta émunaraivahi, apaesa ecurisamurecha namutu ena vichamuriana te nasamairiricapa, náimatirayare vahi támapuruji eta nucunachirahehi.

9

Tiúripana vivapinavayarehi eta vinaquisiravana nayeheyare ena vichamuriana

¹ Tiuri puiti, núti nímatiheripahi eta evapinairava tayehe eta ecajirisira nayeheyarehi ena vichamuriana ticavasanahi te Jerusalén. Vaipa tácamunucarehini nápepejiricahehini. ² Ichapemurihi eta nucunachirahehi nayehe ena vichamuriana ticavasanahi te juca Macedonia. Numetacavacahi eta evapinairavahi eta épaniravahi enaquicava cápequenerípahi te apanahi año. Tacahe, eta nasamairirisirahi eta evapinairavahi éti, éna apanava tivapinavanavarepa ichape. ³ Eta tacahe, névatacahi puiti ena nani mapanana vichamuriana, apaesa vahi ecuvayuaracanu. Vahi tacunapuruji eta nucunachirahehi eta enaquisirava. Nuvaraha tatsecavaipa támutu te nítecapauchahepa. ⁴ Tijuricati náehicanupahi te níteca ena vichamuriana ticavasanahi te juca, tacuijarichaha tatsecavahi machu átsirihacare, machu támapurujiha eta nucunachirahehi. Váipasare ecuimicatsiriacanu núti apanava. ⁵ Tásiha, tacahehi eta nupanereruana eta névatasirahi puiti ena nani vichamuriana, náinapumirauchanu náitecapauchahe, náimicacacahe eta ecurujisirayare eta enaquiruvana. Nuvaraha evapinavayarehi eta enaquisiravahi. Nájina vahi náimijachanu nútinachucha nupamicaha.

⁶ Némechaheyare jucarihi eta échajirirucava, ani tacahehi: “Mácani achane ánicuchicharichu eta máesane máevaruhi, ánimurichicharichu eta mavehayare eta távame máesane. Mácanisera ichapepana eta máesane, ichapemurivare eta távame mavehaqueneyare” tacahepa. ⁷ Namutu nácani tinaquicavanayare, tavarahahi tatupiruvayarehi te nasamureana eta nanaquisiravaya. Vahi nacatiequenehaimahi, taicha nájina tipamicaimahi. Taicha ema Viya, tétavícava eta máemunasirahi mácani tatupiruvahi eta máijaracasi-resirahi. ⁸ Ecasiñavaya yátupina mayehe ema Viya, taicha éma, tétavicavahi eta máitupajijiasiravahi. Mavarahahi tíjaracaheya tamutu eta ecamunqueneana. Vaipa échurihaimahi maicha éma. Ecayehenasarepa eta ímicatasiravacaya nácani apamuriana ticamunuvanahi. ⁹ Ecutiyarehi ema achane tiuri, ema táechajisihahi eta Sagrada Escritura, ani tacahehi: “Ema achane tiúrihi ticunachacarehi me Viya, tivapinavahi eta macajiraparacahi ena páureana. Tájina vahi téchuriacaímahi eta macajirisira te tamutu eta máitare-sirahi” tacahepa. ¹⁰ Ema Viya, émahí ema tinaquicahi eta evaraquiana. Éma, macaejapacahivare eta tinicacare, étapa víachanechiavayarehi. Ene macaheya eyehe éti. Tíjaracahepa eta enaquisiravaya, tímicitijiricavahi eta táejapasira eta evaraquí. Éma, ticajurucayareva eta enaquiruhi apaesa camurianaina ena ecatajiruanayare. ¹¹ Tásiha, ema Viya tíjaracahenapa eta ímahaqueneanayare apaesa ímijanavayarehi íjaracasireca. Puítiripa eta

viámaqueneyare enaquiruvanahi nayehe ena vichamuriana, ichape eta nahasulupayachirayarehi ema Viya. ¹² Taicha eta ímicatasiravacahi ena vichamuriana, ecuchucuhavacayarehi tayehe eta nacamunuiravahi. Tásiha éna, tiápajucavainapa te nasamureana eta nahasulupayachirayarehi ema Viya. ¹³ Ichapeyarehivare eta najirauchirayarehi ema Viya, nacunachirayareva éma. Eta evapinairavahi eta ecajirisirahi eta ímeresiravahi eta esuapirahi yátupi eta véhiruhi, étaripa eta máimiturapihi ema Cristo. Tímereuchahehivare eta íáchanevahi nayehe nácani ticamunuanahi. ¹⁴ Tásiha, tiyaseuchaeanainapa me Viya te nayujarasirana. Ichape eta náemunasirahe- yarehi, navarairayareva náimahahevane táichavenehi eta itsirijisiravahi eta máemunasirahehi ema Viya.

¹⁵ ¡Tétavicavahi eta viúricacarehi maicha éma! ¡Tájina viyiviya apanaina vácyema eta vihasulupayachira ema Viya táichavenehi eta juca víjaracasi!

10

Yátupi eta masuapacarevahi eta apóstolériahi ema Pablo

¹ Nuti Pablo, yátupiquenénuhi eta apóstolenuira. Puiti nuyaseacahe eta ímatiranuína eta námunasirahehi. Nucutihi eta máemunaraivahi ema Cristo étapa eta majapanuraivahi. Etiarihipuca eti ímijachahi népiyacavahi núri te emirahu; tásiha, te nuyerehihevare, tétavicavahíji eta nuvainarajivahi mapicaurairahanuhíji. ² Puiti nutuparacahe: Étupirisamurechavaipahini te tamirahu eta nítecapauchiraheya, apaesa vahi tacuitaurecha nucusema- racahehini. Ena nani náimijachahi nucutihi mácani achanetataji, étachucha nutanuca eta nuvarahaquenehi. Nucamatinacavacayaresera te nítecapa- uchahépa. ³ Yátupi ecutiquenenuhi achanenuhi. Váhisera nácutihini ena apa- muriana ajairana nápicararecanuma eta náeharavana, navarairahi tisuapa- careanayarehi. ⁴ Taicha núti vahi néhacacaimahi te nuvahuana, tájinavare nácesiñaimahi. Mararihisera ema Viya ema tjaracanuhi eta nítupajijiasiravaya nucamatinasihayare éna. Ema Viya, nájina ticachuricaimahi. ⁵ Eta tacachehi eta nucaepahirahi eta semanereana, ena ticasíñavavaicanahi, tímijachavanahivare ena téchinavanahi, vahi návarahahini máimicatacava- cahini ema Viya. Váhivare návarahahini náesenicahini éma. Níturucayare- hisera nácani muracapanereruanahi eta nasuapiraina yátupi ema Cristo. ⁶ Nucuchapahesera eta yátupina eta esuapajiraivaina. Tásiha, te nítecapa, nímiratahacava eta nítivachirayare eta napanereruana ena masuapajiraíra- hanahi. Te váhipuca náeneuchava, némechavacayare.

Natiarihi ena tímijachavanahi apóstoleana, tímicitichavanahi ema Pablo

⁷ Éti ímijachaipapuca tájinaquenénuhi nítupajijiasiravainahini, eta ímairanuhi eta nímahisami. Németeacavare natiarihi ena ticunachavanahi machaneranahi ema Cristo. Nuvarahasera náimatínuhini eta machanerairanuhi núti apanava. ⁸ Natiarihipapuca náimijachaipapuca vahi nítupicavahi núti eta nupamisirahehi eta esuapiranuhi. Váhisera nutsirihahini taicha yátupihini nutuparahaichuhi eta návacure apóstolenuhi. Taicha ema Cristo mavarahahahi nétumechaheyare eta éhisirahi éma. Tájina vahi nucamítiequenéhémahi núti. ⁹ Numetacahehi eta juca, váhisera tácarichuimahi nípicararecahehini te juca nucartane. Tamutuyare títauchava te nítecapauchahepa. ¹⁰ Ena nacahehi eta náechajiriruvahi: “Vahi ecusuapa eta macartane. Tayanapane muracapaihi eta táechajiriruvana, émasera tájina

mamuracavaina. Énerichuvare muracacaema eta máechajisira” nacahepa. ¹¹ Éna náimijachahi tacarichuhi muraca eta táechajiriruvahi eta nucartane. Tímahanuanayaresera te váhipuca nusuapacarehi te nítecapauchahaeta eta ara eyehe.

¹² Núti vahi nímicutichaimahi nayehe ena tímijachavanahi ticunachacareanapanahi. Ena nani énjiricavaichucha ticunachavana, tímijachavanahi nájina ticachuricanaina éna. Súnurupichucha eta juca náichaquenehi.

¹³ Nútisera vahi nútijivaimahi nucunachavahini. Émayarehi ema Viya ticunachanuyarehi, taicha éma tíjaracanuhi eta nusuapacarevahi eta eyehe, tásihaquenehi eta níjarasirahehi eta táurinaqueneana máechajiriruvana ema Cristo.

¹⁴ Váhivare nétaviviriacavahini eta nusuapacarevahi eta eyehe. Nútihinéni nínapucahi te nítecapauchahénapa te nímitucahepa eta máechajiriruva ema Cristo. Tacahe, tituparacanuhi eta esuapiranuyarehi. ¹⁵ Váhivare nucunachavaimahi tayehe eta apaematanehi násapihahipucaini. Nuvarahasera tápajucavaini eta esuapajiraivaina mayehe ema Cristo. Nuvarahavare nímitucaheyare eta apamuriana yátupiqueneana, nítauchiraina eta nucatuparahairahi me Viya. Tájina vahi nétaviviriacavahini eta nusuapacarevahi eta eyehe. ¹⁶ Núti, váhiquene nímicasiapavaimahi te jácani avasare nacametairuquenéipa nácani apana, nucunachiravayarepuca tayehe eta tátaurevapaipa apaemataneana.

¹⁷ Numetacahe: Nácani tímijachavanahi ticunachacareana, yátupinahi seráini eta nacunachacarevaina mayehe ema Viya. ¹⁸ Taicha mácani achane, te yátupihí eta macunachacarevahi, vahi émajivaimahi ticunachava. Émayarehi ema Viya ticunachayarehi.

11

Ichape eta máeñamiravahi ema Pablo nayehe ena machamuriana

¹ Tiuri puiti, nuvaraha ecamichaini eta juca nucayemaqueneanayare eta eyehe. Ticutiyaere súnurupiana. Nuvarahasera ítasamahini. ² Puiti, tétavivacavahi eta néñamiravahi ícha éti, tásihaquenehisera me Viya. Nucutiripa mácani achane suiya esu amaperu eta majaneasirahi ésu. Taicha nuvaraha táurihini eta majacapiraheyare ema Cristo te jena sáchezare. Ácutihini súcani esena amaperu te sutupiruvahi eta sucaimaira, tájinasarepa mácayemahini ema suima. ³ Eta néñamiravahi eyehe, nuvarahahi ecuijahini iáquipaicava, ecucamítiequenehahini eta táurivahi eta éhisirahi ema Cristo. Vahi ecucuti eta suáquipaisiravahi esu vénarahaini Eva, maicha ema Váinaraji Satanás.

⁴ Ímicatisamurechanuhi eta esuapiravanehi ena tépiyahirahiana, apapipahi eta nametarairu tayehe eta náuchucuiraya. Núti, émahí ema Jesucristo ema néchajisihahí. Énasea, apanahi ema náechajisihahí. Émaripa ema Espíritu Santo, váhivare émainahini náechajisihahini éna. Apanachucha ema nacasiñahi. Éti ejacaparipahi ema yátupiquenehi Espíritu Santo. ⁵ Núti németeaca vahi ticachuricanuanaimahi eta nucametairuiru ena tímijachavanahi apóstolequeneana ticametairurahianahíji náichava. ⁶ Tayanapanepuca táepurucarehi nayehe eta néchajisirasamí, étasea eta nítupajijiasirava, tamutuhi nímatiequeneha. Ímatinuhi éti tayehe tamutu jácani nímitusiraheana níchaqueneana.

⁷ Etiarisherapuca éti ímijachahi néjecapava eta némeppurechiravahi. Táitusiava népurucarehi eyehe, ichaperipahisera núríchaheripahi éti.

8 Váhivare nuyaseacahehipucaini eta nunicaquenerepi eta nímitusirahehi. Yátupi tjaracanuanahi ena apamuriana vichamuriana eta nénisiavayare. 9 Tásiha, te nítahapa eta plata, váhivare nuyaseacahehini eta nunicaquene. Taicha ena vichamuriana ticavasanahi te provincia Macedonia náimiamarecahi eta nucamunuqueneanahi. Tacahe, nujaneacavahi, vahi nuyaseacahehini éti. Váhivare nuyaseacahémahi puiti. 10 Jéhesare, nájina tiratahaimahi tihapapica eta nucunachacarevahi tayehe eta tájina nucobrachirahehini eta nímitusirahehi emutu eti ecavasanahi te Acaya, taicha yátupihí eta nímatiequenehairahi tamutu eta yátupiqueneanahi máimiturapiana ema Cristo. 11 Eta juca nuyayemaqueneana, vahi ímijachaimahi étainahipucaini táichanu eta numaemunasirahénahini. Ema Viya máimatihí eta yátupirahí némunacahe.

12 Énesera nuchaeyare núti. Váhiquene nuyaseacahémahi. Nímiyanavaya eta nujaneasirava apaesa tacuija naviya eta taviuchanu nayehe ena tímijachavanahi tímiturahiana nácutinuhini eta apóstolenuirahí núti. Taicha navarahahi ticunachacareanayarehi tímicutichavanayarehi eta nucunachacarevahi núti. 13 Éna, tépiyacavanahi apóstoleana. Tivayarahanasera eta náitaresirahí. Váhiquenevare vanairucanaimahi me Viáquenu Jesucristo. 14 Ena nani, vahi tíamicareana éna eta navayuraivahi, taicha ema Satanás, yátupiquenehi náquenu éna, tépiyacavahi macuti ema ángele vanairucahi me Viya, mavarairahí tivayureca. 15 Ene nacaheyarehi ena nani mavanaranahi ema Satanás, tépiyacavanapahí pastoreana náuriqueneana. Járájapayaréhiserá eta sácheyare najacapirayare eta náicuñayare táichaveneyare eta juca náimiaquipaisirahéhi.

Ichapemuri eta macatajivairahi ema Apóstole Pablo taicha eta macametairuirahi

16 Nuvaraha nápechava numetacahe: Vahi ecusuapa eta náimijachiranuhi máurishinu. Te etiarihipuca éti ímijachanu máurishi, ecayehe paciencia eta nuyehe. Ecamichanu eta juca nucunachiravasamipaini apaesachichainahini nácutipaini eta nacunachiravahi ena apamuriana. 17 Tájina mavanairipina ema Viáquenu tayehe eta vicunachacarevahi. Tíchanuhiserá nucunachava taicha éti ímijachanu máurishinuhi. 18 Táichavenehiserá eta nusamairirisirahí eta nacunachiravahi eyehe eta náitupajijiasiravahíji, énenapa nuchaeyare núti eta nucunachirava. 19 Éti, ímijachavahi ichape eta échema-raivavacahí. Evapinavahiserá eta esuapirahí eta nayaseasirahéhi ena máurishiana. 20 Ecamichahivare tamutu eta napamisirahe ítaucha eta tivita-careana vanairipiana. Tiverejicaheanahi eta ecayehequeneana. Tiyurucacheana éhicavaca éna. Tasapihapa éti ecamichahi tamutu eta juca. 21 Núti, tétavicavahi nutsirihahi énemahinuhinahini nácahehini. Te ímijachahipuca tíúrihi tamutu eta juca náichirahéhi, eperdonachanuhini vahi níchahini éta.

Ena nani ticunachavanahi eta náurivahi. Núti apanava núriha eta nucunachiravayarehi, tayanapane ímijachanupuca máurishinuhi. 22 Éna ticunachavanahi énaírahí hebreo israelítana. Núti apana hebreónuvare, israelítanuvare. Énerichuvare núti mámariequenenu ema viáchucaini Abraham, nucutirichuhivare éna. 23 Éna, tímijachavanahi mavanarana ema Cristo. Nútisera, jéhevarequenenuhi mavanaranuhi ema Cristo. Nápapujanavahi núti eta nayehe. (Máurishinuhi eta nímaíravahi eta juca nucunachiravahi.)

Jéhevare núti nápapujanavahi eta nucaemataneasirahi ema Viya, nucachuricavacahi namutu éna. Eta juca nucaemataneasirahi me Viya, témestacanuhi, témeratacanuhi. Énerichuvare ichapemurihi eta táimicapasiranuyarehini. Ena nani nánarana, vahi náichahini, nájina nacatianacavacahini. ²⁴ Tacutiquene cíncohevere nucaesta naicha ena nujaneanana israelítana te jácane nupaisiranapahi. Mapana arropa eta náestasiranuhi. ²⁵ Mapahevare tépuchiricanuanahi. Étahevare tiyucararacuanahi te márijahiana. Mapahevare térica eta pacure tiámanupahi. Tásiha, étanavare sache étanapa yati nucahehi te táinahu eta une te ichapequene mar. ²⁶ Ichapemurihivare eta nupaisiranahi. Nímahavahivare eta táíñehicarevahi eta tamuracava tajunapirahi eta une te ichape cajacure. Nupicacavahivare naicha ena tiámerahiana. Tipanereuchanuanapahi ticapacuanana ena nujaneanana, énapa ena apavasanapa. Tamutuhi náemauchianupahi te jácane avasare, téhepa te mávapahi apaquehe, étapa te jácane nupaisirana te une tayehe eta pacure. Énerichuvare témauchuanana ena tímijachavanahi nuchamuriana táichavenehi eta népiyaequeneanahi. ²⁷ Ichapemuri eta nucaematanerahi. Nucatajivahi muraca. Ichapemurihivare eta numacaimarasiravahi. Nucatajivahivare tayehe eta nécuava étapa eta numauneva. Ichapemurihivare eta nucamichira eta ayunanuiranuhi. Nucatajivahivare taicha eta ticasarahi. Néchurihavare eta numuiriharapi.

²⁸ Tayanapanesera eta nucatajivairahi ichape, nímiyanavahisera eta néñamiravahi ícha emutu eti nuchamuriana te tamutu avasareana, nuvarairahi tacuijahini tahapapiricahini tayehe eta éhisirahi ema Cristo. ²⁹ Te etiarhipuca eti vahi túmehénahini eta éhisirahi ema Viáquenu, ichaperehinehi eta néñamiravahi núti. Tacutiquene te etiarhipuca éti náimiauipairuhehi, tétavacavahi eta nutsirahivare, nusemasamurevarepa.

³⁰ Téhesera tatiarhipuca eta nacunachiravahi, núti apnavare nucunachavavare. Étasera numaitupajijiasiravahi, étachucha ticunachacarehi eta nuyehé. ³¹ Émasera ema Tata Vicaiyaquene, Maiya ema Viáquenu Jesucristo, máimatihí éma eta tatupiruvairahi eta nucayemaqueneanahi te juca nucartane. Éma, máitavacacahi eta majirauchacarevahi.

³² Tacutiquene te návihaipahi te Damasco, ema tuparairucahi tayehe, majupahahi ema rey Aretas, máimivanerecahi ena séntinelana te tapajana tayehe eta avasare, mavarairahi ticaratacanuana. ³³ Énasera ena nuchamuriana tinacacuhanuana tayehe eta ichape saye túmehi, ticuchucuanapa te ventana, ticajuchucuanuana te tíupi enure te apachacaya eta yúchama tayehe eta avasare. Tacahehi eta núchucuirahi. Vaipa nacaratacanuhini.

12

Ema Pablo mavapuchahi tímerecava ema Viya

¹ Yátupi tájina nuvehaimahi eta nútijivairahi nucunachava. Numetacahayoresera eta nímairahi te nuvapure máechajisiranuhi ema Viáquenu. ²⁻³ Catorce áñoa eta táetavisiravahi eta nímairahi tiámanuanapa tímipairicanuanahíji te anuma te mávasa ema Viya. Váhiserá necha te étahipuca eta náquehe námapahi eta nuyanirahi, te étachuchapuca eta náchaneva. Émasera ema Viya, éma téchahi eta nícharacavapahi eta mámiranuhi te mávasa anuma. ⁴ Ánaqui nusamapa eta mahu. Timetacanupa eta téchacareanahi tayumururevahi. Váhiserá táisapacarehini numetajiricahini. ⁵ Étapapucaini

nucunachiravahini tayehe eta nímahaquenehi nusamaquenehivare, taicha tímimatichanuhi ema Viya. Váhiserá nucunachavaimahi tayehe. Núti nucunachavahi tayehe eta numáitupajijiasiravahi. Étachucha nucasíñavaiyahi tayehe. ⁶ Yátupihinéni eta nucunachacarevahi. Váhiserá nucajamaravahini, taicha tájina nímatihini nutanuca eta nacunachiranuhini ena achaneana. Nuvarahasera nanecapaequenehahini eta táurivahi eta nútare-sirahi.

⁷ Tétavicavahi eta tiáramicare eta nímahaqueneana te anuma. Tásiha, ema Viya vahi mávarahaimahi nucasíñavavaicahini eta nímairahi. Máisapahi ema Váinarajiquene Satanás técajumachanuhi, cútirine tatiarihinahini itape tayuvaraca te neche. Taicha ema Viya mavaraha vahi nucuvayuchava eta nucunachacarevaina. ⁸ Mapahe eta nuyaseasirahi ema Viya eta macanasiranuuhini eta nucatiruhavahi. ⁹ Émasera ema Viya, ánipa máichanuhi: “Vuichaha nuncanaracavimahi. Nujapanuvisera. Níjaracaviyare ichape eta pitumevaya, tayanapane eta pimaitupajijiasiravahi. Taicha nuvaraha náimatiyarehi ena achaneana eta nútupajijiasiravahi piyehe” máichanupa. Eta tacahe, núsamuréichucha puiti eta tamajinairahi eta nútupajijiasiravainahini apaesa máimerecavahini ema Cristo eta máijarasiranuhi eta máitupajijiasiravahi. ¹⁰ Tásiha, nuvavinavahi puiti eta napanajisiranuhi, nucatajivairahi náicha, náumehairanuhivare táichavenehi eta mavanarairanuhi ema Cristo. Nuvavinavahivare eta numaitupajijiasiravahi étapa eta néchuriasirana, taicha eta nímairavahi tamajinairahi nútupajijiasiravainahini, nútisera nusamavahi eta nutumevapaipaicha maicha ema Viáquenu.

Emá Pablo tétavicava eta máeñamiravahi nayehe ena machamuriana

¹¹ Yátupi puiti eta néchajisiavairahi nucatiuchiravahi, tímicutijirícavaipa máurishinuínahini. Íchavenehisera éti, taicha éti tatuparacáhi ecatiuchanuyarehini, váipasare nucuechajisavahini núti, vahi nútijivainahini nucunachavahini. Navetijisera ena tímijachavanahi apóstoleanahiji ena éhiruanahi, jéhevare éna, tájinaquenepa nacunachacarevaina. ¹² Nímerecavahisera eta eyehe eta yátupiquenénuirahi apóstolenu eta nucaemataneasirahehi. Tayanapane camuri eta nucatiruhavana, nucamichahisera tamutu. Nímechaheripahinéni eta tiáramicareana níchaqueneanahi, maicha ema Espíritu Santo. Éta tímicaecherachanuhi eta yátupiquenénuirahi apóstolenu. ¹³ Ena apamuriana vichamuriana te apana avasareana ticajinuanahi éna eta nucamunuqueneanahi. Étisera, tájina vahi nuyaseacahehine étainahipucaini eta nunicaquene, nítecahipucaini íjaracanuini. ¡Váhiserá ecusema eta juca numaitepauchirahihí!

¹⁴ Puiti nutserereacavaipa eta mapaherayarepa níteca eta ara eyehe, nupaiipiuchiraheya. Váhivaresera nácamunuimahi ítátinuhini. Váhivare étaina nutanucapahini eta ecayehequeneana. Étiquesera nucamunhepahi eta esuapiranuuhini. Taicha nuchichanavehehi éti. Vahi étinayare ítátinu. Núti nítátiheyare taicha núti ecaiyaquenuhi. ¹⁵ Váhivare néñamiáhemahi eta nacayehequenehi eta nítátirahéyare. Váhivare nuyacujimahi eta nucaemataneasiraheyare táurivayare eta íachanevana. Tayanapane váhipuca ecuemunanajicanuhi, nútisera tétavicavahi eta némunasirahehi.

¹⁶ Nararihivare ena téchajicanahi eta nuyehe. Ani tacahehi eta náechajiruvahi: “Yátupi te tipaiipiuchahavi éma, váhinenicacha tiyaseacahavi eta

macamunuquene. Máitucasera eta mavereasirahaviya eta viplatane” nac-
ahehi. ¹⁷ Eti ímatihi vahi énavanerecainahipucaini ena névataruasanahi
eyehe, énaiahipucaini navereacahehine níchavenénahini núti. ¹⁸ Te nu-
vanecapa ema Tito émapa ema macachanequenepahi, téjirapanahana-
yarehi, ítájinavare mayaseacahehine éma! Taicha viciticacahi víti eta
viúrivahi eta eyehe, táichavenehi eta vémunasirahéhi ichape.

¹⁹ Eti ímjachaipapuca nutanucahi núti eta nucatiuchiravayarehi eta
eyehe. Váhisera tácahehine. Vahi tácamunucarémahi eta nucatiuchiravaya
taicha núti nutupiruvahi eta néchajisirahehi te mamirahu ema Viya éta-
pa te máijare ema Cristo, nuvarairahi tajurucahine eta táurivaina eta íachanevana, eti
némunaruqueneanahi nuchamurichichana. ²⁰ Núti, te níteca eta ara eyehe,
nupicahi vahi núricaimahi ácahemahihíni eta nuchimapiraheya: éhajiricá-
cahipucaini, ecapinarujiricacahipucaini, esemajiricacahipucaini, íputsimu-
riácaahipucaini, épiyéquenerejiricacahipucaini, iúmehajiricacahipucaini,
ecasiñavavairicahipucaini, váhipuca tacuaquejiricacahi eta epanereruana.
Te ecahehipuca, vahi iúricaimahi némecharecahehine. ²¹ Nupicahisera nátsiri-
hacarehine núti mayehe ema Viya íchavenénahine éti, vuúchaha étupirica-
vahine eta nuchimapiraheyare. Vahi nuvaraha ecaiyacanu éti enereji-
cavana éjecapavanahi, taicha eta ánaquiaparipahi eta émainajisiraichaha
eta ecapecaturairana. Ímijanavaichucha eta esenamarerahéhi, éta-
pa eta emapicaurahivaichucha.

13

Eta máipicararesirahi ema Pablo eta táichecuaaqui eta macartane

¹⁻² Puiti mapahenapa eta néjirairaheya. Cape te nítesinehi, numetaca-
hevanehi nútijacaruvahi, camuriripa eta nuconsejachirahehi eti éjecapa-
vanahi. Iúrihapaini ínajica eta emaurivana. Puiti te nucartane, nápechavahi
numetacahe emutu. Vaipa nucaiticaimahi nácani téjecapavanahi. Núti
nétipiricavacaya. ³ Etiarihíhi eti épurunuhi eta mavanesisranuhi ema Cristo.
Ímahayaresera ichape eta máimicatasiránuhi eta nétipirisiraheyare. Taicha
éma, ítupajijiacavahi eta mámecharesiraheya. Tipicacare ema máicuñaraqui.
⁴ Yátupi éma tísapavahi ticaetata, tímicutijiricavaipahi vahi macuratahahine
ticatiuchava. Váhisera mánasihine máepenahine, tichavahi títareca puiti taicha
eta máítupajijiasiravahi ema Viya. Ene nucahehi núti nísapayarehi, tímicu-
tijiricavahi vahi nucuratahairainahine. Ímahanuyaresera eta májjarasi-
ranuhi eta máítupajijiasirava táichavenehi eta mávahásiranuhi eta nétipirica-
heyarehi taicha nucatuparahahi eta nujaneasiraheyarehi emutu éti.

⁵ Nuvaraha esamavayare étijiva, te yátupihipuca túirihí eta éhisirahi ema
Viáquenu Jesucristo, te yátupipuca eta mávahásirahehi éma. Taicha éma
mávahácavacahi namutu ena machichanaveana yátupiqueneana. Machu
émepururecava eta íjarasiravahi éhica éma. ⁶ Nuvarahasera némechahe
ímatinuhine yátupinahine eta mávahásiranuhi ema Cristo, jéhevare núti
yátupiquenenuhi machaneranuhi. ⁷ Núti, ichape eta nuyujarauchirahehi,
nuyaseacahi ema Viya eta étupirisiravayarehi apaesa tacuija eviurevaina
mayehe. Ichape eta nuvarairahi íchahine eta táuriqueneana. Tayanapa-
nerinehipuca náepurunuhine, nuvarahasera ímijanavayare éti íchayare eta
táuriqueneana. ⁸ Taicha núti nutupiruvahi nicha eta táuriqueneana yátupi-
queneana. Váhiquene nísapavaimahi nuhapapica eta yátupiqueneana. Eta

tacahe, yátupina ésamiricava. Vaipa ecucamesa eta nápepejiricahe numetac-ahe. ⁹ Ichape eta ecurisamurechiranuya te yátupinapa étupiricava. Étiji-vainapa eratahayare ecaratacava. Vaipa nútiparacaimahi eyehe. Puiti eta nuyasearapi nútí me Viya, tamutuyarepa tichavaya eta táurivahi eta ítaresira. ¹⁰ Puiti nucajurehe eta juca carta, nucuchapavahi nútí eta néjirai-raheyare, támuturipahini étupirica apaesa tacuijahini nucucayema. Váhivare nucusemaini eyehe. Nuvarahasera nétumechaya eta iáchanevana. Étahi eta nutuparacasivanahi me Viáquenu eta apóstolenuirahi mayehe.

¹¹ Tiuri puiti, nuparapenaveana, ítátijirícavahi. Etanucayare eta táuriqueneana eta ítaresirana. Ecurisamurechacaca. Tacuijahini eta semanerena eta eyehe. Tácuticaca eta epanereruana. Máíjaracahehíni ema Viya eta tanarasiraina eta iáchanevana, taicha tétavicavahi eta máemunaraivahi éma.

¹² Nútí néchajicahe emutu. Nuvaraha nétserarecahevacayare tácutiarahi eta táetavisiravahi eta némunasirahehi te mavahuana ema Viáquenu. ¹³ Ani te juca téchajicaheana namutu ena vichamuriana.

¹⁴ Nuyaseuchaheparaca emutu éti me Viáquenu Jesucristo táetaviuchahini eta íuricacarevaya máicha, evapinavavaréni taicha eta máetaviuchirahi eta máemunasirahehi ema Viya. Macurisamurechaheparacaini tamutu sácheana ema Espíritu Santo. Tamutupa eta néchajiriruvanahi eyehe.

Eta macartane ema Apóstole Pablo nayehe ena machamuriana ticavasanahi te Galacia, ticajare GÁLATAS

¹ Nuti Pablo, yátupiquenenuhi mayehenu apóstole ema Jesucristo taicha manerejirunuhi. Ema Tata Vicaiyaquene ticutihi eta mapanereruhi ema Machicha eta máichuiranuhi. Puíticha émaquenehi ema Jesucristo tinacanuhi eta juca návacurehi apóstole, émarichuhi ema macáechepucasiquénehi te máecari. Vahi apanainahini achane ema tinacanuhi, énainahipucaini ena nucutiquneeanahi apóstoleana nanacanuhi eta juca návacurehi. ² Puiti nucajurehe eta juca carta eyehe eti nuchamuriana ecavasanahi tayehe eta avasareana tayeheana provincia eta Galacia. Téchajicaheana ena apamuriana vichamuriana te juca návihahi.

³ Nuvaraha macatajicahehine ichape ema Tata Vicaiyaquene, émapa ema Viáquenu Jesucristo. Nájaracahehine eta táurivaina eta epanereruana. ⁴ Ema Viáquenu tíjaracavahi tépena te crusu taicha mavarahahi ticuchucuhahaviyare tayehe eta vícuñayarehine táichavene eta vipecaturana, macámítiásinaháviri pahivare eta vijamurachirainihi eta tamauriqueeneana tayehe eta juca apaquehe. Eta tacahehi eta mapanereruhi ema Tata Vicaiyaquene. ⁵ ¡Máichecuaraquireyarehi eta vijirauchiraya éma! Amén.

Étanarichu eta doctrina véhiruhi, tájina apanaina

⁶ Ichaperinehi eta ímipaneresiranuhi. Váhicha németeaca ene ácahehine eti éhicahine eta apanaquene doctrina. Tasapihapa esuapahi eta juca, vaipa émainahine esuapa ema Viya. Ínajicavanepa eta esuapirainihi éma. Émepururecapa eta máichuirarehi. Tasapiha émepururecapa eta máepenahéhi ema Jesucristo eta máemunasirahehi. ⁷ Nutupiruva numetacahe, tájina apanaina doctrinaina tácuti eta juca véhiruhi víti. Néchahi eta juca íchararacavahi éti, nararihi ena témejecapavachaheanahi, navarahahi nahapapicayare eta vímiturapianahi tásihaqueneanahi mayehe ema Cristo. ⁸⁻⁹ Víti vímitucahe-ripahi eta juca yátupiqueneana, étarichuhi eta máechajiriruva ema Viya. Cape juca, te víavihaichaha eyehe, vimetacahévanehi eta macatichira ema Viya eta apanapanequeneana doctrina nahapapiruanahi. Puiti nápechaheare numetacahe: Ticaticacareya me Viya nácani nahapapica eta vímitureheanaripa yátupiqueneanahi. Nútiripa, te nápechavahivaréni níteca eyehe, apánainapáipahivarepucaini eta nímiturapiana, ticaticahanuhine ema Viya taicha eta nuhapapisirainahine eta máechajiriruvana. Téhehare máitecapucaini mácani émana máimicutichavapahine ema ángele másihaquenénahipucaini te anuma, te mavarahavarepuca mahapapica eta vímitureheanaripa víti, énerichuvare macatichayarehi ema Viya.

¹⁰ Nararihipuca ena témeteacuananahi nuhapapicahi eta máechajiriruvahi ema Viya, étainahipucaini níturusihahine ena achaneana, némemunasiravainahine nayehe. ¡Tájinasera vahi nuhapapicahine nútí! Nutupiruvahi eta nímituresirahi taicha nuvarahahi nucurisamurechaya ema Viya, nímerecavayarehi eta núriva eta mavanaranuirahi ema Jesucristo.

Ema Pablo tímerechava eta táichararacavahi eta masiampirahi apóstoleyare

¹¹ Nuvaraha numetacahe eti nuparapenaveana eta juca nucametaraíruirahi, vahi tásihaquenénahi te nupanereru nútí. ¹² Váhivare nímitucasi-vainahi mayehe mácani apana achane nucutiquenehi apóstole. Émaquenehi tímítucanuhi ema Jesucristo.

¹³⁻¹⁴ Éti esamairircanuhi jácani eta níchararacavahi eta nítaresirahi cape juca násinequenehi, te étarichaha néhicahi eta nayeherepiana ena israelítana náchucanaveanainihi nútí. Nútí, eta nujurusirahi, nímahahi eta tacapica-huirahi eta viyeherepiana. Ichapehi eta némuracachiravahi, nucachurica-vacahi ena nuparajuruanahi. Nímicapicauchahi muraca, numavarairahi táemtiequenehini eta viyeherepianahi nanaquipairuanahi ena náchucanaveanaini. Eta tacahehi, ichapemurihi eta nupanajirisiravacahi ena machaneranahi ema Viya, nuvarairahi núcámítiequenehavacayahéhini eta náehisirahi ema Jesucristo. ¹⁵ Námavaqueneváhiséra eta manerejisiranuhi ema Viya, te vuíchaha núchuchahini te sujehe esu ticachichanu; tacahehi eta mapanereruhi eta máichuiranuyarehi, taicha eta máemunasiranuhi. ¹⁶ Tásiha, tímimatichanuhi ema Machicha, taicha mavarahahi nucametaraíruiyare nayehe ena apavasanana eta macuchucuirayare namutu ena tisuapana ema Machicha. Váhisera nutanuchahini nácani náimitucanuhini eta nucametaraíruiyare. Nájinavare nuyasereruina. ¹⁷ Váhivare nuyanahini te Jerusalén nutanupanahipucaini ena nánapureanahi apóstoleana. Téhechucha apaquehe Arabia nucaijuhehi. Émasera ema Jesús, éma tímítucanuparacahi. Te váchupa, nuchavavarepa te avasare Damasco. ¹⁸ Te mapanaquenepa año, nupaenumavapa nuyanahi te Jerusalén, etapa nímatinehi ema Pedro. Nunasipanapa quince sache nucahehi eta mayehe. ¹⁹ Émapa ema Santiago, maparape ema Viáquenu, ema nímahaquenehivare. Énasera ena apamuriana apóstoleana, nájina nímahavacahini. ²⁰ (Puiti tímamaracanuhi ema Viya, tájina vahi népiyahiraivaina eta juca núcáyemaqueneánapahi te juca nucartane. Nutupiruvahi eta numetasirahehi.) ²¹ Tájinasera vahi nucaímitucasihini nayehe taicha nuyanavanevarepa nucaijuhehi eta te Cilicia, nánuçuhapa tayehe eta Siria. ²² Tacahe, ena vichamuriana ticavasanahi te Judea, váhivare náimatinuhini taicha vahi náyerehini tayehe. ²³ Tisamairircanuanahisera eta néquesiravaripahi. Ánipaji tacahehi eta nasamairirisiranuhi: “Ema maca Pablo tipanajiricahavihi cape juca viásinequenehi, ¡téquecavaripahi! Cape juca mavarahahi ticámítiequeneháviyahéhini eta juca véhiruhi. ¡Puiti émarinecha tétucaracavahi ticametaraíruhi eta juca véhiruhi víti!” nacahepaji. ²⁴ Tacahe, ichaperinehi eta nacunachirahi ema Viya níchavenehi nútí eta néquesiravahi.

2

Éma Pablo tímereuchava eta masiapamurihairapa ena apóstoleana, tásiha natupiruva najacapa éma

¹ Catorce añoripa eta táetavisiravahi, nupaenumavapa nápechavahi nuchava te Jerusalén. Émapasera ema Bernabé nucachanehi, émapa ema Tito. ² Taicha numetacasihivi me Viya te nuvapure eta nuyanirayarehi tayehe eta Jerusalén, véchajicacayare nayehe ena tachutirihanahi. Eta nítecapirapa, viúrujicavapa, énachuchasera vicachanehi ena tachutirihanahi. Tásiha numetacavacapa eta nímiturapianahi eyehe eti apavasanana etapa eta esuapirahi. Taicha nuvarahahi ena vichamuriana israelítana

najacapahehini eti apavasanana vichamurianaripahi. ³⁻⁴ Te jena, natiarihini ena tépiyacavanahi vichamurianahi, tépiyahirahianapahi eta nasiapamurihairahavihi. Éna, navarahahi tipamicahavianayarehi eta vímitusirahe éti apavasanana éhica eta nayeherépiana ena israelítana. Taicha tacahehi eta náechajiriruvahi éna, ítauchayarehiji eta nayeherépiana éna, váhiji tacarichuimahi eta éhisirahi ema Jesucristo. Navarahavivare napamicayarehini eta macamarca ema Tito, eta apavasanarahi éma. ⁵ Tájinasera vahi vísapavahini nacachuriacahavihini, taicha víti vivarahahi tacuijahini tahapapicahehini eta éhisirahi eta yátupiqueneana téhicacareanahi. ⁶⁻⁹ Tacahe, énaripa ema Santiago, ema Pedro, émapa ema Juan, énapa ena apamuriana náiyarahana ticutinuanahi eta nupanereruhi. Tájinavare vahi nametacanuhi eta apamuriana téhcacareanahi nayehe. Étasera eta nasamiranihi, náimativanepa eta émairahi ema Viya tituparacanuhi eta nucametairuiraya nayehe ena apavasanana. Nucutihi eta macatuparahairahi ema Pedro mámitusirayarehi ena israelítana. Ema Viya máijaracahi eta mávacurehi ema Pedro apóstolehi nayehe ena israelítana. Máijarachavivare eta máitupajijiasiravahi. Ene nucahehi núti tjaracanuhi eta návacurehi apóstolenuhi nayehe ena apavasanana. Tjaracanhivare eta nútupajijiasiravahi. Eta tacahehi, náimatipa eta émairahi ema Viya tjaracasichanuhi eta juca nítucaquenehi. Tacahe, tijupacahavianapa, núti émapa ema Bernabé. Eta juca náichirahavihi táicutiarahi eta náisapirahaviyarehi vímiyanava vímitucavacayare ena apavasanana. Éna, tímiyanavanayare tímiturecanahivare ena israelítana. (Tépurunuanarichuchapuca eta náimairanuhi. Tayanapanesera váhipuca nujacapacarehi nayehe eta apóstolenúirahi. Nútisera néchahi eta manerejisiranuhi ema Viya eta apóstolenúirayare.) ¹⁰ Tacarichu tituparacahavianahi eta vímicatasirayarehi ena páureana. Eta tacahehi puíti, nítauchahi núti eta nuvaneasivahi nímicatasiravacaya ena páureana.

Éma Pablo tímereuchava eta macajachirahi ema Pedro

¹¹ Te táequenepa, te jena áñoanahi, títecapauchahavipa ema Pedro te avasare Antioquía. Étasera eta mávhairahi viyehe, téjcapavainapa. Eta tacahe, nucajachapa éma. ¹² Eta máitecapirapa ema Pedro, tájinaipa máichiravainahini eta masamiravahi eta macachanejirisiravacahi ena apavasanana vichamurianahi, tinicahi eta nayehe. Tacahe, te jena sácheana, títecapanapa ena máemunacasareanahi ema Santiago, israelítana vichamurianahivare. Te máimahavacapa ema Pedro, titsirihapa éma eta macachaneravacahi ena apavasanana vichamurianahi. Vaipa mávarahahini macasiriquivacahini. Tipicahi eta nacaecahirahi ena tímicapicauchanahi eta nayeherépianahi ena israelítana. ¹³ Tacahe, ena apamuriana israelítana vichamurianahi, énerichuvare éna náehicapa eta máejecapiravahi ema Pedro. Térájicavanavare éna apanava. Émaripa ema Bernabé máehicavarepa eta náejecapiravahi éna. ¹⁴ Tacahe, te nímahapa núti eta náejecapiravahi, vahí táurihini eta náichaquenehi, nucajachapa ema Pedro te namirahu ena vichamuriana taicha májequihapa eta tavanairipihí eta yátupiqueneana máechajiriruvana ema Jesús. Níchapa ema Pedro: “¿Tájaha tacayema eta pitsirihahi ena víjaneanana israelítana eta picachaneravacahi ena apamuriana vichamuriana apavasanana? Pémitisicavapapuca eta israelítavirahi cape juca pítaresirahí, táitusiava eta picachanejiricavacahi ena apavasanana

vichamurianahi. Tásiha puiti, eta pímairapa náitecapirahi ena vijaneanarichu násihaqueneanahi te Jerusalén, péquecavavarepa nayehe. Váipa pávaraha picachanehini ena apavasananahi vichamurianahi ticutiripahi eta vahi vichamurianainahini éna. Pivarahapuca náepiyacava israelítanáina éna apanavare” níchapa ema Pedro.

Namutuchucha tijacapacareanaya me Viya nácani navarahaya téhicanayare ema Jesús

¹⁵⁻¹⁶ Tacahe, numetacavacapa namutu eta juca yátupiquenehi: Véchahi víti eta vahi tácomesaimahi vítauchahini eta nayeherepianaini ena víachucanaveanaini. Tarataripahi eta véhisirahi ema Jesucristo, vijacaparéipa vimutu eta mayehe ema Viya. Énaripa ena apavasanana, tayanapanehi náetaviuchahi éna eta nasipecuraraivahi viyehe viti israelítana, títujicavanayarehisera tijacapacareanaya me Viya taicha eta náehisirahi ema Jesucristo. Tayanapané vítamaturucahipuca eta mavanairipiana ema Moiséini, tájina vahi vájacaparémahi víti eta me Viya táicha. Vimutu vijacapacare eta me Viya táichavenechucha eta véhisirahi ema Jesús.

¹⁷ Natiarihipuca ena téjcapavanahi te napanereruana, ánipuca nacahehi eta náechajiriruvahi: “Yátupucáji eta vijacapacarehi me Viya táichavenechucha eta véhisiraya ema Cristo, vivetijnapaserapuca tiápajucavainapapuca eta visipecuraravaya taicha vínajicainapa eta vanairipiana. Tacahe, émapapuca ema Cristo táemesiavaya eta vicapecaturavaya” tacahenapapuca eta napanereruhi. Éna, tímápachichijíruvachucha te napanereruana. Ema Cristo váhiquene émaina tásiha eta pecatuana.

¹⁸⁻¹⁹ Eta néhisirainihi apaicape eta vanairipiana, tájinachucha vahi táimicatcanuhini eta nujacapacarevarehi me Viya taicha váhiquene étaparacaina. Eta tacahe, núnajicahi eta néhisirainihi. Nímatiripasera eta nujacapacarevarehi me Viya táichavene eta nucasíñairahi eta mayehe. Puíticha tíúripa eta nítaresirahi me Viya. Tásiha, ichapenapahini eta néjecapiravaya núti apana, te nuchavapuca néhica eta mavanairipiana ema Moiséini. ²⁰ Eta nusuapirahi eta máepenirahi ema Cristo te crusu, nujacapacarehi me Viya. Puiti, vaipa nútijivaina necha eta nítaresirahi. Émapa téchanuhi ema Cristo tamutu eta nítaresirahi. Émapa nucasíñahi taicha yátupihí eta macasíñacarevahi taicha yátupiquenehi Machichahi ema Viya. Eta máemunasiranuhi, tímijararecavahi níchavenehi núti. ²¹ Vahi némepururecaimahi núti eta máemunasiranuhi ema Viya. Nararihiserá ena tímijachavanahi tijacapacareana mayehe táichavenechucha eta navarairahi náitaucha eta vanairipiana. Ena nani, tímicutijiricavahi námepururecahi eta mapanereru étapa eta máemunasiravacahi. Tímicutijiricavahi námepururecahivare eta máepenirahi ema Jesucristo te crusu.

3

Tacarichuchucha eta vicasiñairahi ema Jesús, vijacaparéipa me Viya

¹ ¡Páurehechapucaini, eti nuparapenaveana gálatana! Ímijachaipuca étupicavahi eta juca ecahehi. Ínajicavanepa eta éhisirainihi eta yátupiqueneanahi. Vímicatichaheripahi eta iúricacarevahi tásihaquenehi eta máepenirahi ema Víáquenu Jesucristo te crusu. ¿Tájaha tacayema émpururecahi eta juca iúricacarevarehini? ² Esamanuchaha, puiti nuvaraha

numetacaheyare. Eta mávahásirahehi ema Espíritu Santo, éta tíchahi eta éhisirahi ema Jesucristo. Vahi étainahini taicha eta ítauraivainahipucaini eta vanairipiana. ³ ¡Tétavicavapa eta esunsuvavaca étil Te épanavapa eta éhisirahi, tájinainiripahi íchiravainahíni máicha ema Espíritu Santo. Éma tétumechahehi. Puítisera éti evarahapa ínajicaya eta mávahásirahénihi, ímijachaipapuca eta ticuchucuhayare eta éjairavanahi. ⁴ Tamapurujinapapuca eta máimicasirahehi ema Espíritu Santo. Németeacasa núti víuchaha émpururecavaimahi. ⁵ Ema Viya tjaracaheripahi ema Espíritu Santo eta mávahásirahehi. Tímechahehivare eta tiáramicareana. Étaripa macatajisirahehi táichavenehi eta ecasiñavairahi tayehe eta máechajiriruvana. Étasera eta ítauraivainahipucaini eta vanairipiana, tájinainapa táimijaracahehíni.

⁶ Énerichuvare macahehi ema viáchucaini Abraham. Ticasiñavahi éma tayehe eta máechajiriruvana ema Viya. Tásiha, ema Viya, ichape eta majacapirahi éma. Máemitisicahi tamutu eta máejecapiravanahi. ⁷ Puiti, yátupina ácaicutiara eta juca: Te yátupina vicasiñava me Viya, vijacapacareya mayehe, taicha vicutyare ema viáchucaini Abraham eta macasiñavairahi me Viya. ⁸ Ema Viya mametacahi ema Abraham eta najacapacarevahi mayehe, nácani ticasíñavanayare éma. Áni macahehi eta máichirahi: “Tétavicavayare eta náuricacarevayare ena achaneana te tamutu avasareana nácani ticutivianayare eta picasiñairanuhi núti” máichapa ema Viya. ⁹ Tásiha, víti vicasiñanahi puiti, tétavicavayarehi eta viúricacarevayare, taicha vicutinapa ema Abraham eta macasiñairahi ema Viya.

¹⁰⁻¹² Natiarihísera ema tímijachavanahi tijacapacareanayare me Viya táichavenehi eta navarairahi náitamuturuca eta vanairipiana. Téjcapavana-pahisera. Taicha ani tacahe eta vanairipi: “Tamutu sácheana ítauchayare tamutu eta juca vanairipiana. Te éjequiha apaesachichaina, éta tímicuñacahayare”. Váhiquesera naratahahíni náitaucha tamutu eta vanairipiana. Eta tacahe, náviraichu ticaicuñaya, vahi tijacapacareanimahi. Ánivare tacahe eta vanairipi: “Te ítamuturuca eta vanairipiana, máichecuaraquireyare eta ítairesirayare táicha”. Tásiha, vímatiequeneha eta juca: Eta náitamuturúsira ena achaneana, éta tavaraha eta vanairipiana. Tájina étaparacaina eta nacasiñairava me Viya. Ánisera tacahe eta Sagrada Escritura: “Nácani ticasíñavanahi me Viya, tijacapacareanahi, máichecuaraquireyare eta náitairesiraya táicha”. Tásiha, nuvaraha ácaicutiara eta juca: Eta vijacapacarevahi tásihahi eta vicasiñavairahi me Viya. Eta vítauchirapuca eta vanairipiana, tájina étaparacainahíni tayehe eta vijacapacareva me Viya. ¹³ Ánivare tacahe eta Sagrada Escritura: “Mácani achane ichape eta maviureva, ticaetatacasiyarehi te yucuquí. Eta táicutirahi eta máicuñasirayare ema Viya eta máchaneva”. Víti achaneana, ichape eta vícuñayarehíni taicha eta vimaitauchirahi tamutu eta vanairipiana. Émasera ema Jesucristo, tépeninahavihi te crusu, tamuriasirahi tamutu eta vícuñayarehíni víti. ¹⁴ Éma máichahi eta juca, mavarairahi eta iúricacarevayare eti apavasanana táichavenehi eta ecutirahi ema Abraham eta macasiñairahi ema Viya. Puiti, tétavicavahi eta viúricacareva vimutu, taicha tiávahácahavihi ema Espíritu Santo máijjaruhavihi ema Viya táichavenehi eta vicasiñairahi ema Jesucristo.

Tájinachucha tájaracahavi eta véhisirahi eta mavanairipiana ema Moiséini. Macarichu ema Viya tjaracahaviya eta viúricacarevaya.

15 Nuparapenaveana, nuvaraha nímicutiarachináheyare eta juca. Te matiarihipuca ema achane, te tépiyarecahi tratu mayehe ema apana achane, nafiarmachayarehi eta natratunehi. Tásiha, nafiarmacharipa eta natratunehi, vaipa táuricaímahi macaepaha eta tacajuquenehi. Nájínápavare tihapapicaimahi. 16 Ene macahehi ema Viya eta matratunehi mayehe ema Abraham. Ani macahehi: “Níjaracaviyare píti eta piúricacarevayare. Énerichuvare níjaracayare eta máuricacarevayare ema piámariéquenezare” macahepa ema Viya. Tacahe, émanarichuhi ema mámariequenehi ema táimijarechiquenehi eta matratune, vahi námutihini ena nasimutuvaqueneanayarehi mámariequeneanayarehi ema Abraham. Émahi ema ticaijarehi Cristo. 17 Tiuri puiti, nuvaraha nímicacherachaya eta eyehe: Eta juca matratunehi ema Viya mayehe ema Abraham, mafirmachaquenehi eta májjarasirayare eta náuricacarevaya nácani ticasíñavana eta mayehe. Étasera eta táetavisiravahi eta 430 añoripahi, te májuchapa ema Moiséini eta vanairipianahi, vahi macaepahahini ema Viya eta matratunehi, váhivare máitsivachahini eta májjarasirayarehi ema Jesús, mámariequénehi ema Abraham. 18 Ema Viya mametacahi ema Abraham eta májjarasirayare eta máuricacarevayare, taicha eta máemunasirahí éma. Ene vicahehi víti. Ema Viya tíjaracahaviyare eta viúricacareva taicha témunacahavihi. Eta viúricacarevaya, vahi étainahini eta vítauchirainahipucaini eta vanairipiana. 19-20 Etiarihipuca eti evaraha eyaserecanu, ánipapuca ecaheya: “Te yátupipuca vaipa étaparacaina eta vítauchiraina eta vanairipiana, ¿tájahasera puca tacayemahi eta mavanasirahi ema Viya májucha ema Moiséini eta juca mavanairipiana?” Tiuri, puiti numetacaheya: Yátupi ema Viya máimivanerecahi ema Moiséini májucha eta vanairipiana, taicha mavarahahi máimimatichayare ena achaneana eta taurivahi eta pecatuana. Téhesera te títecapapa ema Cristo, vaipa táimiyanavahini tasuapacarehini eta mavanairipianahi ema Moiséini. Arairupa tamutu eta véhiruhi maicha ema Jesús. Yátupi ema Viya matupiruvahi eta máechajisirahi ema Abraham. Vahi máimivanerecahini ema Viya, émajacarávahi éma, eta máechajisirahi. Émasera ema Moiséini macaimitucasique-nechucha nayehe ena ángleana.

Eta mavanairipiana ema Moiséini tivanecahavi vahi vicuquicha eta pecatuana taicha tíñehicarehi eta júcana mayehe ema Viya

21 Puiti németeaca etiarihichaha eti ímijachahipuca tacarichuhi téhicacarehi eta vanairipiana. Esamanuchaha. Váhiquene étaimhi vájacapacarehini eta me Viya. Váhivare étainayare ticaitarechaviyare. 22 Esama eta juca máechajiriruvahi ema Viya eta te Sagrada Escritura, ani tacahe: “Náicuchirichuhi eta náicuñayarehi namutu ena achaneana taicha eta napecaturanahi” tacahepa. Jararihiserá eta viúchucuirayare taicha tíjaracavahi ema Viya ticuchucuhaviyare vimutu víti vicasíñanaya ema Machicha Jesucristo. 23 Ánaquiaparipa eta taratasiravacani eta mavanairipiana ema Moiséini nayehe ena ísraelítana náchucanaveanaini nútí. Vahi táisapahini tasimutihichaini eta napecaturana. Tiámánuvacapa te títecapapa ema Jesucristo, émpa tímítucahavihi eta arairuyarehi eta véhiruyare. 24 Táitaurevaquene eta mavanairipiana ema Moiséini eta típicararéchávihi tayehe eta táíñehicarevahi eta vicapecaturairana. Éta, tétupiricahavihi tacutihí mácani profesor eta máetupirisiravacahi eta napanereruana ena máimitureana.

Ene tacahehi eta táechapajirisirahavihi eta mavanairipiana ema Moiséini. Puitisera eta máitecapiraipahi ema Jesucristo, émapa véhicayare, vijacaparénapa me Viya taicha eta vicasñairahi ema Jesús. ²⁵ Puíticha, émainapa véhicayare éma, vaipa étaimahi véhica eta mavanairipiana ema Moiséini. ²⁶ Puiti, eta ecasiñairapa ema Jesucristo, machichaheripa ema Viya. ²⁷ Puiti, eta ecaicachasirahi te máijare ema Jesucristo, tiávahácheripa éma, éti ecutinapa eta máurivahi. ²⁸ Tayanapane apavasasajuecuhehi éti; tayanapanehivare ecasiriquiquíjihi eti ajairana, ena esenana; tayanapanehivare músuanapuca, libreanapuca. Téhesera te mamirahu ema Viya, étanarichuhi eta vímahi. ²⁹ Puiti machichaheripa ema Cristo; tásiha, ecutiripa mámariequenehénahini ema Abraham. Ímaequenharichucha eta matratunehi ema Viya eta máijarasiraheyare eta iúricacareyare táicha.

4

¹⁻² Esamanuchaha. Nuvaraha nímicutiarachináheyare. Te matiarhipuca ema achane camurihi eta máimahaqueneana te mapena, te matiarhipuca ema machicha, téhesera te amaperurichaha éma, natiarhiyaherhi ena téchapa-jiricanayare, énapa ena túmitucanayareva. Vahi náisapaimahi mamápachichijicaimahi eta máimahaqueneanahi ema maiya, tayanapane émahinéni ticayehere tamutu. Tíamainucavaserá te máimahapa ema maiya eta máechemaraivahi ema machicha, máisapainapa eta máemamaca eta máimahaqueneanahi. ³ Ene vicahehi víti cape juca viásinequene te vuíchaha vímatihini ema Cristo, vicutinihi ena amaperuana. Tipamicahavianahi véhica eta nayeherepiana ena viáchucanaveanaini. ⁴ Émasera ema Viya, te máimaha tiuri eta táitauchiravayarepa eta mapanereruhi, máevatacapa ema Machicha te juca apaquehe. Ema Jesús, tiáchanechavapa te sujuhe esu maena. Eta máuchusirahi, vivasimahi eta vicaqueherahi víti achaneana. Eta majurusirahi, ticaravahupa eta viyeherepiana víti israelítana. ⁵ Eta túmitecahi éma, mavarahahi ticuchucuhaviyare víti achaneana. Mavarahavivare vimutu vijacapacareyarepa me Viya, machichahaviyarepa. ⁶ Puiti, eta machichairaheripa ema Viya, tíjaracaheripa ema Espíritu Santo tiávahácheripa te esamureana. Émapa témechahehi mayehe ema Viya, túmitucahepa eta eyujarauchiravaya: “Tátachicha Vicaiyaquene” ecahenapa. ⁷ Tacahehira eta machichairaheripa, vaipa ísapaimahi nácani napamicahéhini tayehe eta nayeherepiana. Tíjaracaheripa ema Cristo eta iúrivaya, iúchucuirayare máicha.

Éma Pablo, nahapasamurechahi ena machamuriana

⁸ Cape juca iásinequenehi éti, vuíchaha ímatihini ema Viya, váhivare epicauchahini éma. Énachucha epicauchavacahi ena esiñarajiana. Tájina eratahaimahi émitisica eta eyujarauchirahi tayehe. Éna, vahi yátupinahini víyanainahini, váhivare távahácavacaimahi eta máchaneva ema Viya. ⁹ Puítisera, ímatipa ema yátupiquenehi Viya. Tásiha, énerichuvare éma túmatihvacapa, esamacarepa mayehe, taicha machichaheripa. Tásiha puiti, ¿tájaha tacayema evarahavarepa echavayare eta ecasiñayare eta esiñarajiana? Eta ecasiñasanahi, tájina vahi tisamaheanaimahi, váhivare túmicatacheanaimahi tayehe eta panererucana. ¿Tájaha tacayema ísapava napamicahé eta itauchira eta nayeherepiana? ¹⁰ ¿Tájaha tacayema enasirichuhi epicaucha eta

piéstamuhuana, étapa eta aracherumuhuana caje? ¹¹ ¡Ichape eta néñamiravahi eyehe! ¡Tájuricati támápurujipahi eta juca nímitusirahehi!

¹² Esamanuchaha, nuparapenaveana. Nuvaraha vácuticacahini eta vipanereruana. Váhini vicuehicaini eta nayeherepiana ena achaneana. Németeaca esuapanu taicha vahi eyacujiequenehanuhini. ¹³ Éti etupiruvahi ejacapanu cape te nítecinapa eta ara eyehe. Écharichuhi eta nucajumairapahi te nítecapauchahepa. Etupiruvahisera esuapa eta numetarairuhi eta eyehe. ¹⁴ Vahi ecaecahinuhini eta nucajumairapahi. Váhivare épurunuhini. Tiúrihi eta ejacapiranuhi tímicutijiricavainehi ángelenuinahini, Crístonuinahipucaini. ¹⁵ Ichape eta iúrisamurevahi te jena sácheana eta návilhairahi eyehe. Nímatihi tétavicavahi eta émunasiranuhi. Te nucamunuvahi, evarahahi íjaracanu eta ecayehequeneana. Tájina éñamahini. Ichape eta nucunachirahehi. Tacahe, májeja néchajisihaha eta émunasiranuhi.

¹⁶ Eti ímjachaipapuca nucatichirahehi eta numetasirahehi puiti eta juca yátupiqueneana. ¹⁷ Ena nani téchapajiricaheanahi, váhisera tátupiruvahini eta námunasirahehi, navarairachucha típichasicaheanayare apaesa vahi ecusuapanu núti, eta vaipa ecuehicanuhi. Navarahahivare éhicayare eta nayeherepiana apaesa énaínapa échapajiricayarehi. ¹⁸ Tiuri, núti vahi nucaticha eta ítatiraina ena apamuriana achaneana. Táurisera eta námunasiráhena tácuti eta námunasirahehi núti. Éti apanavare evapinavayare tácutirichu te nutiarihihi eyehe. ¹⁹ Nuchichanavechichana, tétavicavapa tacativa nusama taicha eta ímipaneresiranuhi. Ticutirinehi súcáni esena ticatiruhapa, taicha ticatíhi susama eta amuya. Ene nucahehi núti eta nucatisamureravahi, néñamiravahi icha éti. Nuvaraha ácutini ema Cristo eta máurivahi. Tiámainucava te námahahepa ecutinasípa éma eta máurivahi, núsamurenapa ícha. ²⁰ Eta tacahe, nuvarahanecha níjahúchavahini nítecapauchahe. Nútijacaruvainapáini néchajiricavahini eta eyehe eta nímitusirahehanihini. Ichapemurihi eta ímipaneresiranuhi.

Éma Pablo máimicuticha ena apinana machichana ema Abraham

²¹ Éti evarahapa éhica eta mayeherepianaini ema Moiséini, puiti nuvaraha níminecapaequenehaheya eta táechajiriruvahi eta Sagrada Escritura mayehe ema Abraham. ²² Táechajisihahi éma, apinanairahi ena machichanaveana ajairana. Éma máinapurehi machicha ticaijarehi Ismael, esu maena ticaijaru Agar. Éma máequenereruhi machicha ticaijarehi Isaac, esu maena ticaijaru Sara. Esu Sara, mayenaquenehi ema Abraham. Esu Agar, suvanarahi esu Sara. ²³ Esu Agar, araitanaichahahi ésu, te sucachichainapa ema Ismael. Ésusera esu Sara macheruhi eta suítaresirahi. Étasesa eta máitupajijiasiravahi ema Viya, májaracapa ema suchichahi Isaac. Taicha ema Viya máechajicahi ema Abraham, ánipa macahe: “Esu piyena Sara ticachichayare. Ajairayare ema suchicha”. ²⁴⁻²⁵ Puiti, nuvaraha nímicutiachinaheya nayehe ena nani apinana esenana. Esu Sara, tájina súmatiyahini eta vanaracacare, nájina nahapapirichahini ésu. Ene vícahehi víti eta véhisirahi ema Cristo, nájina tihapapirichavimahi. Vahi suácutihini esu Agar, tapamicahi eta suématanerepi taicha sirvientahi ésu. Ene nacahehi ena israelítana náchucanaveanaini núti, napamicasivahi naicha tayehe eta nayeherepianaini. Étarichuhi eta vanairipiana májuchaqueneanahi ema Moiséini te mávilhaipahi eta te anuquehe mari ticaijarehi Sinaí, táupahiva eta provincia Arabia, návasahi ena suámariequeneanaini esu Agar. Púiticha ena

nujaneanana tachichanaveanahi eta Jerusalén nanasirichuhi eta tapamisiravacahi eta vanairipiana. ²⁶Jararihisera eta apanahivare avasare ticajare Jerusalén, tiávihihi te anuma. Víti tachichanaveanahi. Vaipa vítiparacainahini tapamicahavihini eta vanairipianaini. ²⁷Ema Viya máechajisihahi eta te Sagrada Escritura eta juca arairu Jerusalén. Máimicutichinahi esu ésuna esena. Ánipa macahe: “Piti esena macheruvinihi eta pítaresirahi, tájina vahi pímatihini eta tacativa eta amuya. Puítisera tétavicavainapa eta piúrisamurevaya. Vaipa pánasimahi macheruvimahi taicha nárajapainapa ena pichichanaveanaya níjararuviyare núti. Picachuricainapa nácani esenana ticachicharahiana” —macahepa ema Viya.

²⁸Nuparapenaveana, viti véhicanahi ema Jesus, vítura tachichahavianahi eta arairu Jerusalén, taicha vituparahaichuhi eta tachichairahaviyare tacuti eta sucatuparahairahi esu Sará mayehe ema Viya, eta sucachichairayare ema Isaac. ²⁹Tacahe, ema Ismael, suchicha esu Agar, macatianacapa ema amuya Isaac, ema suchicha esu Sara máijjaruhi ema Espíritu Santo. Puíticha, tanasirichuhi eta nacatianasirahavihi ena téhicanahi eta vanairipiana vimutu viti mávaháruanahi ema Espíritu Santo. ³⁰Ánivarepa tacahe eta Sagrada Escritura: “Pivaneca esu Agar émapa ema suchicha, nayana náchuca eta piyehe. Taicha vahi táuricahini mavehahini eta pímahaqueneana te táitecapapa eta pépeniraina. Macarichuyare ema pichicha suyehe esu piyenaquene tivehayare tamutu” tacahepa. ³¹Nuparapenaveana, ene vicahehi víti. Vahi vácutihini ema suchicha esu sirvienta. Vicutihi víti ema Isaac eta tamajinairahi eta vipamicasivainahini eta vítauchiraya eta vanairipiana, maicha ema Jesús.

5

Vímiyanavachucha véhica ema Jesús. Vahi vicuehica eta mavanairipiana ema Moiséini.

¹Puiti nuvaraha yátupina ácaicutiara eta macatiuchirahehi ema Cristo, eta vaipa étaparacainayare ítaucha eta vanairipiana. Váipavare ecuisapava te náviraichupuca napamicahe, taicha ticajerayare eta ítauchiraina, machu ajirehéna táicha. Étipasera tacamunu étumechava te nayehe ena nani.

²Nuti Pablo nutupiruva numetacahe: Te ísapavapuca namarcachahe, tímicutijiricavahi tépurcarehi eyehe ema Cristo. Tímicutijiricahivare vahi márataha ticuchucuhahe éti. ³Énerichuvare numetacahe: Namutu nácani ajairana ísapavanayare ticamarcana, tacamunuhi náitauchayare tamutu eta vanairipiana. Tájina ánichichaimahi náejequihaimahi éta. ⁴Eti enerejiruvana éhica eta vanairipiana, ímijachaipapuca ejacapacareipa mayehe ema Viya. Émepurarecaripasera eta máemunasirahehi ema Viya. Émepurarechivare eta máimicatasirahehi ema Cristo. ⁵Vítisera viti vicasíñanahi ema Jesucristo vicunearipa eta majacapirahaviya ema Viya máichavenehi ema Espíritu Santo eta mávahásirahavihi. ⁶Eta mávahásirahavi ema Jesucristo, vahi étaparacaimahi eta vicamarcapucaini. Tacarichu ticamunucarehi eta vicasíñairayare yátupina éma, vémunarahinapa eta vítaesiraya.

⁷Éti, iúrinipahi eta éhisirahi ema Jesús. ¿Tájahaserapuca tacayemahi eta evarairahi ecainajiruva? Ísapavayarepa tiyurucaheana, tímínajicaheanayarépaini eta yátupiqueneanahi. ⁸Éti máichuhaqueneanarichuhi ema Viya eta éhisiraya eta yátupiqueneanahi. Váhiquene mávarahahini ísapavahini nácani

nahapapicahehini. ⁹ Échapavaicha nayehe ena tiyururahiana, machu naporeacahe. ¹⁰ Nútisera nucasiñavahi eta me Viáquenu eta mamaisapiraheyare ínjacava. Németeacahi vahi ínjacaimahi eta nímiturapianahi. Émasera ema Viya téchahi eta juca náicuñayare nácani tivarahanahi tihapapicaheana.

¹¹ Esamanurichuhi, eti nuparapenaveana. Natarihihipuca nácani tépiyaequenehanuanahi eta nupamisirahehi ecamarca eti nuchamurianahi apavasananahi. Étasera eta nímitusirahehi, tájina váhiquene nupamicahehini eta ecamarcairayare. Nasapihapa ena nujaneanana israelítana tipanajiricanuanahi taicha vahi nupamicahehini ecamarca. Étara tímiyusemacavacahi eta nasamirahi eta nucametairuirahi eta viúchucuiraya táichavenehi eta máepenirahi te crusu ema Jesús. ¹² Ena nani tipamicaheanahi ecamarca, ¡náechaticavaichaha énajivaina! ¡Nuvarahasa yátupinapaini náechatihicavaini!

¹³ Taicha eti nuparapenaveana, vahi étaina tímichuhahehi mayehe ema Viya eta éhicayare eta mavanairipiana ema Moiséini. Váhivaresera étijiricavaimahi íchayarehi eta evarahaqueneanahi tamauriqueneana. Ema Viya tíchuhahehi, mavarairahi étijivaya ítájiricacayarehi taicha eta émunasiracainahi. ¹⁴ Ema ticavanairipi, ánipa macahe: “Pémunaca ema piparaepiya tacuti eta pémunasiravahi píti” macahepa. Te vítauchapuca yátupi eta juca mavanairipi, vahi tácajera eta vítauchiraina jácani apana vanairipi. ¹⁵ Vahi táurica ecatichajiricacahini. Váhivare táurica ecatianajiricacahini, machu étijivaina ecamitiequenehacaca.

Ema Espíritu Santo tímícatacahavi eta vahi vicusuapa eta tajamurachaqueneanahi eta viáquehe

¹⁶⁻¹⁷ Esamanuchaha. Ema Espíritu Santo mavaraha tímícatacahavi eta vahi vicusuapa eta tajamurachaqueneanahi eta viáqueheana. Étasera eta viáquehe vahi táisapa eta víchiraina eta táuriqueneana. Étachucha tavaraha vicha eta tajamurachaqueneanahi. Eta tacahe, íchapemurihi eta tacanarairahi ema Espíritu Santo. Tacahe, nécatiacachecha puiti eta esuapirainaiicha eta mavarahaqueneanahi maicha ema Espíritu Santo eta eyehe. ¹⁸ Eta tacahe, éti, te émainapuca ema Espíritu Santo tímítucae, máejeha eta íchiraina eta táuriqueneana. Vahi étaparacaimahi eta episira eta ícuñayarepuca, táichavenehi eta jácani éjecapiravanapuca tayehe eta vanairipiana.

¹⁹ Tímaticareanahi eta tamauriquenehi eta náichaqueneana ena tisuapanahi eta tavarahaquenehi eta náquehe: Navehapa esu apana esena, ésupa esu esena suvehapa ema apana achane. Ena amaperuana náichahi eta natuhusivanahi. Nararihi ena tivehacacani ena nacutiqueneana ajairana. Tavayuasiravacahi eta najamuraraivanahi. ²⁰ Natanucahi eta nasiunarajiyare. Nacaravahuhi eta iápemarecáre. Ticatianarecanahi tisemacacani. Téteajiricacani. Apaesarichu nacamunu tisemanaripavare. Énachucha navaraha titucavana, nacachuriaracapa mácani achane. Típutsimuríávanapa nayehe nácani apamuriana. Vaipa navaraha tipauchacacana. ²¹ Ticapinarucacana. Ticapahanapa. Ticavaharasanavare. Piéstamareana. Tamutuchucha naicha eta tájiparacana. Puiti numetachevare nápechava, tacutihi eta numetasirahehi cape juca viásinequenehi. Vahi títujicavanaimahi tisiapana te mávasa ema Viya ena tíchanahi eta juca tamauriqueneanahi.

²² Vítisera, tiávahácahavihi ema Espíritu Santo. Te vísapa éma, tíjara-cahavihi eta vémunaravaya. Viúrisamurerecavayare, tinaracainapa eta

vipanereruana máicha. Tíjaracahavi eta vicayehera paciencia. Vijapanurahiya máicha. Vicajiravayareva máicha. Vítaurahiyare. Vétaviuchaya eta viúrivayare. Tímicatacaviya eta vijaneasiravaya apaesa vahi vicuquicha eta tauriqueneanahi. ²³ Te vítauchahi tamutu eta júcana, vicurisamurechahi ema Viya*. ²⁴ Tacahe, viti véhicaripa ema Jesucristo, vaipa víchaimahi eta tauriqueneanahi tajamurachaqueneanahi eta víaquehe. ²⁵ Tásapíhapapuca, eta mávahásirahaviripa ema Espíritu Santo, vísapavaya vámutu eta mavarahaqueneana máichayare te víaquehe. ²⁶ Vaipa táuricahini ecasínavavaicahini ecapinarujiricacahipucaini. Váhivare etanucaimahi eta semanere mayehe mácani echamuri.

6

Vímicatajiricayare

¹ Nuparapenaveana, te natirihipuca ímaha téjecapavanahi ena vichamuriana, consejachayare éti ímatiequeneharipa maicha ema Espíritu Santo. Táuriserá eta échajirisiraina. Ecauneuchava éti apanava, machu íáquipaicava tayehe eta máquipaisiavahi ema echamuri. ² Ímicatacaca eta ecatiuchiravaina eta jácani ícharacavanahi. Ene tacahehi eta ítauchirahi eta mavanairipi ema Víaquenu Jesucristo, étaripa eta vémunasiracayarehi. ³ Taicha nararihi ena tímijachavanahi vahi tíáquipaicavanaimahi tayehe eta pecatuana. Vahi ecucahe éti. Vahi tacaemuñavacarehini, taicha eta juca vahi tánecapácare. ⁴ Váhivare tácaemuñavacare vácahehipucaini: “Núti, váhirichu nusipeatura. Núripána nayehe ena apamurirana”. Te viúrihipuca, vimatinarayarechucha. Víti véchinavahi eta viúrivahi eta vítaresirahi. ⁵ Véchaquenevapáchupa víti eta vítaresiraya mayehe ema Viya.

⁶ Nutuparacahe eta apana. Ecajiyare eta ímahaqueneana mácani tímítucahe eta máechajiriruva ema Viya, taicha eyeheyarehi eta máimiturapiana eta tíúrichaheyarehi.

⁷ Numetacahevare eta apana. Nuvaraha étupiricaya eta epanereruana. Machu ecatianaca ema Viya. Taicha te icha eta pecatuana, yátupiqueneyare eta ecamítiequenehavayare. ⁸ Te icha eta tájiparácana tavarahaqueneanahi eta íaqueheana, étarichuhi ticamítiequenehaheyare eta ítaresirana, tímicuñacaheyareva. Téhesera icha eta táuriqueneana mavarahaqueneanahi ema Espíritu Santo, yátupina táurina eta ítaresira. Ímahayareva eta íuchucuiraya, máichecuarquirénapa eta iúricarevaya. ⁹ Eta tacahe, vahi vicucainajiruva eta víchirahi eta táuriqueneana. Váhivare vicuyacujiequenehava eta vicuchapirahi eta vícuchihi mayehe ema Viya te táitecapapa eta jena sácheyare májjarasirahaviyare. ¹⁰ Táitusiava, te tatiarhinapuca eta vicamunucarevana nayehe ena achaneana, te vímahahipuca eta nacamunuiravahi, vítijivayare víchayare eta táuriqueneana nayehe. Tavetijipa te énahipuca típauchahavianahi ena vichamurianahi tayehe eta juca véhiruhi, vicajiyarehi éna.

Eta táichecuarqui eta máechajiriruva ema Pablo

¹¹ Ímaha ichapevacanecha eta juca nuletrana. Nuvahurupajipa núti eta juca nucajureirahehi éti. ¹² Ena nujaneanana israelítana, tétavicavahi eta

* **5:23** Ema Pablo te mayherepi eta máechajiriruvana, ani macahe: “Tájina jácani vanairipi tapamicahavihini vahi vícha eta juca táuriqueneana”. Étásera eta macayemaquenehi, ani tacahe: “Vicatuparaha víchayarehi tamutu eta juca táuriqueneana”.

nasemanevahi viyehe viti vicametarairuhi eta viúchucuiraya táichavenehi eta máepenirahi ema Cristo te crusu. Tásiha, ena nani ticamesajiricaheanahi navaraha ecamarcaya, éna navaraha témemunacavanayare nayehe ena nujaneanana, apaesa vaipa nacupanajiricavaca. Navaraha nahapapicayarehi eta nasemaneva. ¹³ Navarahahivare ticunachavanayare eta nacamesairahahi ecamarca te iáquehe, náimiturehéna éti eta éhisiraina eta vanairipiana. Énayapasica vahi náitauchahini támutuhini eta vanairipiana. ¹⁴ Nútisera, eta nítaresirahi, nuvavinavahi ichape maicha ema Jesucristo, máepeninanuhi te crusu níchavenehi núti. Tacahe, núti apana nínajicaripa eta néhisirainahini eta tayeherepiana eta apaquehe. Vaipa nútiparacaina tayehe, taicha eta máepenirahi níchavenehi núti.

¹⁵ Eta mávahásirahavihi ema Jesucristo, tamuturipa arairuhi eta vítaresira. Apanapa eta viyeherepiyare. Vaipa étaparacaimahi eta viyeherepiana ichasiqueneanahi, váhivare eta vicamarcapucaini te viáquehe. ¹⁶ Éti, te esuapa eta juca nímiturapianahi eyehe, nuvaraha májapanuhehinehi ema Viya, máijaracahehinehi táurivaina eta epanereruana taicha eti yátupiquenehi machanerahehi ema Viya.

¹⁷ Tiuri puiti, németeaca núti tájina táeñamavacarehíni eta esuapajiraivahi eta nuyehe, váhivare ísapavahíni ena nácani ticamesajiricaheanahipuca éhica eta nayeherepiana. Núti, yátupiquenenuhi apóstolenuhi mayehe ema Viáquenu Jesús. Eta juca nujaranahi te náquehe, éta tímereuchanuhi eta yátupiquenérahi eta nucaemataneasirahi éma.

¹⁸ Nuparapenaveana, nuyaseuchaheparaca emutu éti me Viáquenu Jesucristo, táetaviuchahini eta iúricacarevaya máicha.

Tamutupa eta juca néchajiriruvahi eyehe.

Eta macartane ema Apóstole Pablo nayehe ena machamuriana ticavasanahi te avasare Efeso, ticajare EFESIOS

¹ Nuti Pablo, mayehenuhi apóstole ema Jesucristo, taicha manerejiru-nuichuhi ema Tata Vicaiyaquene, navarairahi nímitucaya ena achaneana eta máechajiriruvana. Tásiha puiti, nucajurehe eta juca carta eyehe eti nuchamuriana ecavasanahi tayehe eta avasare Efeso, taicha éti machane-raheripa ema Viya, táuriquenehi eta éhisirahi ema Jesucristo. ² Nuvaraha macatajicahehíni ichape ema Tata Vicaiyaquene, émapa ema Viáquenu Jesucristo. Nájaracahehíni eta táurivaina eta epanereruana.

Tétavicavahi eta viúricacarevana táichavenehi eta viúrujasirahi ema Jesucristo

³ Núti nucunachaparaca ema Viya, ema Macaiyaquene ema Viáquenu Jesucristo taicha ichape eta máimicatasirahavihi táichavenehi eta viúrujasirahi ema Cristo. Puiti tachichahaviripa eta anuma. Ichape eta viúricacarevahi maicha ema Espíritu Santo. ⁴⁻⁵ Acane, te tamirahu eta táepaniravapa eta apaquehe, ema Viya tétavicavahi eta máemunasirahi namutu ena achaneana natiarihiqueneanayarehi. Tásiha, émajivapa manacahi eta mapanereruhi eta mavarahaquenehi, étarichuhi eta majacapirayarehi namutu ena ticasíñavayare mayehe ema Machicha Jesucristo. Eta viúrujasirayare ema Jesucristo, yátupiqueneyarehi machichahavi, matapiravarehaviyarehi te mami-rahú, sántohaviyarevare. ⁶ Taicha mavarahahi vijirauchayare éma, vítsirijicavayarehi eta táetaviuchirava eta máemunasirahavihi. Mavarahahivare ichape eta viúricacarevana táichavenehi eta viúrujasiraya ema máemunaruquene Machicha. ⁷⁻⁹ Tásiha ema Viya, tiúrihi eta máimaira, máimerecahi eta máemunasirahavihi ichape. Tíjaracahavihi ema Machicha tépeninahaviyarehi eta macaepahairayare eta vipeaturana, viúchuchayarehi máicha. Énerichuvare tíjaracahavivare eta véchemaraivaya vímatiequenehairaya ichape, taicha tímitucavahihi eta mapanereruana. Váhisera máimerecavanehíni eta juca mapanereruanahi acane; tapaemunava te tiúcupaicapa ema Machicha. Tivapinavahi éma eta máitauchiraya eta mapanereruanahi ema Maiya. ¹⁰ Tamutu eta juca mapanereruanahi títauchavayarepahi, jácani tatuparaqúipahi. Te jena sáchezare manerejicaripa, ema Viya manacainapa ema Machicha Jesucristo aqenucaqueneyarehi, téchayarehi tamutu eta táichararacavana. Nasuapayarehiva namutu ena tiávihanahi te anuma, énapa ena tiávihanahi te juca apaquehe.

¹¹ Eta acane te tépanavainapa, ema Viya máetupiricapa eta mapanereruhi. Vahi máejequihahíni. Tásiha, manacapa eta mavarahaquenehi. Acane tinerejicahavihi machichahaviyarehi vimutu viti viúrujiacanayarehi ema Jesucristo, mavarairahi tíjaracahavi eta vícuchianahi. ¹² Viti vínapuicanahi véhica ema Cristo, mavarahahi tíuriyare eta vítaresiraya, apaesa nacuna-chayare ema Viya ena apamuriana achaneana eta máimicatasirahavi ichape. ¹³ Tacutiquene éti, te tínapucainapa esama eta máechajiriruva ema Viya eta mavarairahi ticuchucuhahe, enévanehi éhícahi ema Cristo. Tásiha, eta

iúrujasiraipa éma, tiávahácheripavare ema Espíritu Santo. Émapa tíame-tacahe eta machichairahepa ema Viya. Ema Espíritu Santo, ema vituparahahi vimutu viti vicasíñanahi ema Cristo. ¹⁴ Eta mávahásirahavihi éma, tíametacahaviparaca eta vijacampiraya eta vícuchianahi mayehe ema Viya te táitecapapa eta víuchucuiraya viti machichanaveanahi. Tásiha, tétavicavainapa eta vicunachirayare ema Viya taicha ichapequene eta máimicatasirahavihi.

Te tiyujaraca ema Pablo, mayaseaca ema Viya eta náitupajijiasiravaina ena téhicanahi ema Jesús

¹⁵⁻¹⁶ Eta tacahe, núti néchahehi éti tamutu te nuyujarasirana, taicha nusamairiricapa eta yátupirahi éhica ema Viáquenu Jesucristo étapa eta émunajirisiracacahi emutu eti machaneranahi ema Viya. Nuhasulupayachahi ema Viya eyehe. ¹⁷ Éma, macaiyaquenehi ema Viáquenu Jesucristo. Máetaviurehi eta majaraiva te mávihahi te anuma. Nuyaseacahi májaracahehíni eta échemaraivainahíni maicha ema Espíritu Santo, apaesa ímatiequenehahíni yátupina eta emetacasivanaya eta mapanereruanahi ema Viya. Nuvaraha ímatipaichaini éma. ¹⁸ Nuyaseacahivare éma yátupina eta ecaicutiarairaya, eti máichuhaqueneanahi éma, eta táetaviuchirayarehi eta víuricacarevayare te jena sácheyare vícuchapaquenehi. Nuyaseacahivare ecaicutiaraya eta táetaviuchirayarehi eta táuricacarevayare eta víávihiya te anuma, vícuchihi viti machanerana ema Viya. ¹⁹ Nuvaraha ecaicutiaravare eta táetaviuchirahi eta máitupajijiasiravahi ema Viya, váhiquene tivítaimahi. Éma, macaemataneacahi eta vítaresira, mavarairahi víúripanayare viti vicasíñavanahi mayehe. ²⁰ Ema Viya máimerecahi eta máitupajijiasirava ichape te macaechepucapa ema Cristo te máecari, macaejacapa éma te mavaure tayehe eta anuma mávihahi puiti. ²¹ Ema Cristo, émaripa ichapequenehi aquenuca nayehe ena ángeleana. Tétavicavahi eta masuapacarevahi nayehe. Énerichuvare ena éreanana, mapamicavaca eta nasuapiraina. Éma, tétavicava eta macapicahuirahi. Nájina nácutihíni éma. Nájinavare ticachuricaimahi. Apajarahiyarehi eta aquenucaira éma. ²² Ema Viya macaejacahi éma téchahi tamutu eta tatiaríhiqueneana. Émaripa vicaiyaquenehi vimutu viti machanerana. ²³ Vítí, eta víúrujasirahi éma, tímicitijiricavahíni máquehehavihi te juca apaquehe. Vicaemataneacahi eta táuriqueneana tímicitijiricavahi émainahíni macaematanehíni, taicha tamutu eta víchaqueneanahi, éma téchahavihi, tétumechahavíhivare.

2

Eta máemunasirahavi, ema Viya ticuchucuhahavihi tayehe eta vícañayarehíni

¹ Ema Viya tíjaracahehipa arairupa eta ítaresira. Tichavapa títareca eta íachanevana, tacuti eta machavirahi títareca ema Cristo te máecari. Taicha éti, cape juca ítaresirahi, tímicitijiricavaichaha épenaquenéñahíni táichavenehi eta evainarajivanaini étapa eta epecaturanaini. ² Cape juca ítaresirahi éti, éhichavare eta tayeherépiana eta apaquehe, tamauriqueneanahi. Esuapahivare eta mavarahaqueneana ema Váinaraji, éma mapamicavacahi ena achaneana masuapajirairahanahi me Viya. ³ Vimutu viti, tacahenihíni eta vítaresirahi eta acane. Étachucha véhicahi eta tavarahaqueneana eta víaquehe. Vítijiricavaripahi víchahi eta tajarurachaqueneana eta víaquehe, étapa eta vipanereruana tamaríqueneanahi. Ichapemurihi eta vímíyusemasirahi ema Viya, vícutihíni ena apamuriana masuapajirairahanahi mayehe.

4-5 Tímicutijiricavaichaha vépenaquenénahini táichavenehi eta vipecatura-nainihi. Tétavicavasea eta majapanuirahavihi ema Viya. Ichapevare eta máemunasirahavihi. Tíjaracahaviripa arairupa eta vítaresa táichavenehi eta viúrujasirahi ema Cristo. (Táichavenehi eta majapanuirahahi, ticuchucu-haheyarehi.) ⁶ Puiti, eta viávahásirahi ema Cristo, yátupihi eta véchepu-siraya, vícicachipa eta macaejasirahavinapa tayehe eta viávacureyare te anuma, vícachaneya ema Cristo. ⁷ Eta juca émavenehi ema Viya, mavarahahi máimereca maverahi eta viúricacarevana máijjararuhaviyare eta viyehe te jena sácheyare, taicha tétavicavahi eta máemunasirahavihi táichavenehi eta viúrujasirahi ema Jesucristo. ⁸⁻⁹ Taicha eta viúchucuirayare eta viápechi-ravaya vítareca, étavenehi eta majapanuirahavihi ema Viya. Vijacapacareripa eta mayehe, táichavenehi eta vícasiñairahi ema Jesús. Vahi étaparacaina tacuchucuhavivihini eta víchaqueneanahi, taicha vahi vítijivainahini várata-hahini vijacapacarehini. Tacahehi éta, apaesa nacuija nacucasiñavavaica eta nacuchucuiravapuca. ¹⁰ Arairuinapa eta vítaresa maicha ema Viya. Émarichuvare ticajurucahavi eta véhisirahi ema Jesucristo, mavarairahi víchayare eta táuriqueneana. Eta víchirahi, vítauchahi eta mapanereruana acane.

Eta véhisira ema Jesucristo, étamurihavinapa. Vaipa víputsimuriavavacaimahi.

¹¹ Németeaca échavahi éti eta nacatianasiráhehi ena nujaneanana táichavenehi vahi éhichahini eta nayeherepiana. ¹² Éti, cape juca, tájina ímatiyahini eta máimiturapianahi ema Jesucristo. Vuíchahavare ímatihini eta iúricacarevayarehi táichavenehi eta matratune ema Viya viyehe viti israelítana, taicha ticaerajicaheanahi te vimuri. Vuíchahavare ímatihini eta ícuchianayare máijjararuheanaya ema Viya. Eta tacahehi, éti ímijachaipa vahi ejacapacare eta mayehe. Vuíchahavare ácasiñavahini eta mayehe. ¹³ Puitipasera eta éhisirahi ema Jesucristo, iúrujiacari-pahi éma. Tásiha, émeñahavaipahi mayehe ema Viya, taicha ecasiñavahi eta máepeninahehi ema Jesucristo. ¹⁴ Énerichuvare, étavenehi eta viúrujasirahi éma, tíhétamurichahaviripahi vimutu: éti apavasanana, vítipa viti israelítana. Vaipa víputsimuriavavacahini. Tímicutijiricavaipahi étanainehi eta viúchusine. Macaepaharipahi eta vícatianajirísiracacáinihi. ¹⁵⁻¹⁶ Eta máijjararesirahi eta máquehe te crusu ema Jesucristo, macaepaharipavare eta tapamisirahavini véhica eta vanairipiana étapa eta nayeherepiana típicauchacareana. Puiti, vaipa étaparacainahini eta viúchucuiraya. Énerichuvare macaepaharipa tamutu eta vícatianajirísiracacáinihi táichavenehi eta apavasanahavirahi. Puiti vimutu viti véhicanahi ema Jesucristo, étamurihaviripahi máicha. Tájina víchiravaimahi. Táitusiava tíurichahaviripa vimutu mayehe ema Viya.

¹⁷ Eta tímitecahi ema Jesucristo, timetapanahavihi eta táurinaquene echajirucava eta najacapacarevaya namutu ena achaneana. Éma, tíurichahaviyarehi mayehe ema Viya vimutu: viti vínapucanahi vímati eta máechajiriruvana, étipa eti epaenumavahi ímati eta máechajiriruvana. ¹⁸ Puiti, eta viúrujasirahi ema Jesucristo, tiávahácavahi ema Espíritu Santo. Tásiha, máichavenehi ema Jesucristo, vimutu vícuticacai-pahi eta vípachuraipa ema Tata Vicaiyaquene. ¹⁹ Eta tacahe, tájinapa táeñamacarehini eta ejacapacareva eta viyehe viti machanerana ema Viya. Esiapamurihahaviripahi víti. Tachichaheripa eta mávasa anuma. ²⁰⁻²² Eta esiapamurihavirahi

te vimuri, nímicuticharipa te náepiyaca eta ichape peti. Ema Jesucristo, tétavicavahi eta máetumechirahavihi vimutu viti véhicanahi éma. Macuti eta tatumearaya eta yúchamana, eta manasirahi eta máimiturapiana. Tásiha, visiapa viti apóstoleana énapa ena profetana. Tacahe éti, eta esuapirahi eta vímiturapiana, esiaparipahivare. Ecuti eta labriyuana étape eta yucucuhiana. Ema Espiritu Santo, tétavicavahi eta máitupajijiasiravahi tihétamurichahavihi. Vituparahapachuhi eta manasirahavihi. Máepiyacavacapaipa. Te máitachapa tamutu, tétavicavainapa táurinavaya eta ichapequenehi templo, mapenayare ema Viáquenu, sántoquenehi.

3

Ema Pablo, éma ticutuparahahi ticametarairuyare nayehe ena apavasanana

¹⁻² Németeaca nuti ímatiequeneharipa eta máetaviuchirahi eta máemunasirahehi ema Viya. Éma, tivanecanuhi níchuhaheya eti apavasanana, mavarairahi éhicayare ema Machicha Jesucristo. Eta juca nucametarairuirahi eta eyehe, étara tiviuchanuhi puiti juca nucaeratairahi. Nútisera nuyaseuchaheparaca éti te nuyujarasirana. ³⁻⁴ Taicha ema Viya timetacanu-riphati te nuvapure eta mapaneruhi tapaemunava téchacarehi. Puiti te juca nucartane, eta échajicuirá eta nájurehi, németeaca ímatiequenehayare tamuripa nímatiequenehahi eta mapaneruhi ema Viya tayehe eta macuchusirahavihi ema Jesucristo. ⁵ Eta juca mapaneruhi ema Viya, nájina náimatiequenehahini cape juca tásienequenehi. Puítisera, ema Espiritu Santo tímechahaviripa viti mayeheana santo apóstoleana énapa ena profetana. ⁶ Ani tacahehi eta juca tayumurevanainihi: Eti apavasanana, éti apavayare ejacapacarehivare mayehe ema Viya maicha ema Jesucristo. Iúchuchayare táichavenehi eta éhisirayare eta vimetarairuana. Esiapamuriahaviyare viti machanerana ema Viya. Étamuriahaviripa. Vicuticacainapa eta vícuchihi viti israelítana.

⁷ ¡Tétavicavahi eta majapanuiranuhi ema Viya! Nútisamipa máichuhaquenehi eta nucametarairuyarehi eyehe. Tásiha éma, tétavicavahivare eta máetumechiranuhi te tamutu eta nucametarairuirahi. ⁸ Vahi németeacavahini nútinasamihini manerejica, taicha nararihíhi ena títipajijiapanavanahi eta nuyehe. Tijapanunuhisera ema Viya. Nútisamipa manerejiruhi, mavarairahi numetapanahe eta máichuirahéhi éti apana eti apavasanana, eta ejacapiraya eta táuricacarequene vícuchi maicha ema Cristo. Tétavicavaya eta víuricacárevayare. ⁹ Tacahehi eta mapaneruhi ema Viya eta viyehé acane te tépanavainapa máepiyacaya tamutu. Váhisera táijahúchavahini mametacahavihini. Tapaenumava timetacanuhi nútí, matuparasiranuhi eta numetasisraheyare tamutu. ¹⁰⁻¹¹ Taicha mavarahahi natiarihiyare camurianayare ena tisuapanayare yátupi. Eta táurivayare eta náehisira, tímereuchayarehi eta máetaviuchirahi eta máitupajijiasiravahi ema Viya. Náraminehi ena aquenucanahi tíavihanahi te anuma eta náimairahi eta juca. Eta tacahehi eta mámirapahi ema Viáquenu Jesucristo tamutu eta mapaneruana eta acane ema Maiya. ¹² Tásiha puiti, tájina táeñamavacaréimahi eta vipauchira ema Viya. Vicasiñavahi eta mayehe, taicha ema Jesucristo émahí ema vicasiñasarequenehi. ¹³ Eta tacahe, nutuparacaheya: Vahi ecuinajicava eta juca éhiruhi, váhivare ecupica eta esamairirisirahi eta nucaeratairahi táichavenehi eta

nucametarairuirahi eyehe. Evapinavasera eta nucamichirahi eta nátajivana, taicha nuvarahahi nímereca eta táetaviuchirahi eta némunasirahehi.

Éma Pablo mayujaraucha ena machamuriana

¹⁴ Eta némechirana eta táetaviuchirahi eta máitupajijiasiravahi éma Viya eta juca mapanereruanahi, núti népuyumiraucha éma Macaiyaquene éma Viáquenu Jesucristo, nucunachirahi éma. ¹⁵ Éma, Táiyaquenehi tamutu te anuma. Émarichuvare téchahi tamutu te juca apaquehe. ¹⁶ Nuyaseaca éma máijaracaheni éti, ichapenahini eta ítupajijiasirava étapa eta etumevainahini te iáchanevana, maicha éma Espíritu Santo. Taicha éma Viya, tétavicava eta máitupajijiasirava, váhivare mayavanaimahi. ¹⁷ Nuyaseacavare yátupina eta ecasiñairaya éma Cristo, yátupinavare eta éhisiraina eta máimiturapiana. Túmeheyare eta émunaravahi. Tájina tihapapicahémahi eta éhisirahi. ¹⁸⁻¹⁹ Nuyaseacavare ácutihini éna apamuriana echamuriana te tamutu avasareana, te yátupina ecaicutiara eta táichapevahi eta máemunasirahavi éma Cristo. Tájina títaina éta. Tayanapane vahi vicúcaicutiaraquénéna. Nuyaseacahivare yátupina émainahini ecasamure éma Viya.

²⁰ Tétavicavahi eta nucunachirahi éma Viya, taicha máituruequenehahi tjaracahavi tamutu, máemetavicahi eta viyasearuanahi, étapa eta vipanerechirana. Tétavicava eta máitupajijiasirava éma Espíritu Santo eta máetupirisirahi eta visamureana. ²¹ ¡Vicunachaparacahini éma Viya vámutu víti véhicanahi éma Jesucristo! ¡Máichecuarquirénapa eta vicunachira! ¡Amén!

4

Viúrujiacacahi maicha éma Espíritu Santo

¹ Yátupi núti tipresuchanuhi puiti táichavenehi eta néhisirahi éma Viáquenu. Eta tacahe, nutuparacaheya: Tacuija íchiravaina eta itaresira te mamirahu éma Viya; taicha éti máichuhaquenéherichuhi éma, mavarairahi machaneraheyare. ² Yátupina eta emansuvaina, étapa eta iúrivaina. Ecayehe paciencia. Ecamichayare jácani te ticaviurevanapuca nácani echamuriana, táichavenénahi eta émunasiracacainahi. ³⁻⁴ Émanarichuvare éma tiávahácahe, émaripa éma Espíritu Santo. Ísapava eta macurujisirahehi. Tacuija íchiravaina eta iúrujisiravahi. Étanainarichuhi eta epanereruana. Taicha éma Viya tichuhahehi. Puiti ecuchapahi eta iápechiravayare itareca. ⁵ Émanarichuhi éma Viáquenu. Tacarichuhi véhica eta máimiturapiana. Étanarichuhivare eta vicaicachasira eta viúrujisira éma. ⁶ Émanarichuhivare éma Viya, Vicaiyaquenehi vimutu. Éma téchahavihi vimutu. Ticaemataneacahavihi vimutu. Émavare tijaneacahavihi vimutu.

Vítucaquenepachuhi maicha éma Espíritu Santo

⁷ Énerichuvare éma Cristo, éma tjaracahavihi eta vítucaqueneyarepachu, jácani mavarahaquenehi. ⁸ Taicha eta Sagrada Escritura, ani tacahehi: “Te tiárapa éma te anuma, mámamurihapaipa éna macuchureanahi. Máijaracasihavacapa eta náitupujijiasiravaya éna machanerana” tacahepa. ⁹ Épane-rechavaya puiti eta tacayemaquenehi eta márairahi. Eta juca tavaraha vicaicutiara eta máucupaisirahi tativa te juca apaquehe. ¹⁰ Te títachavapa eta tímiucupaicahi, tiárapa tichavapa te mávasa anuma. Tichavavarepa eta émairayare técha tamutu. ¹¹ Tásiha, éma Viáquenu tituparacahavi víti, tjaracahavivare

eta vítucaqueneanayarepachu. Taicha tinacahavipa eta víavacurepachuya apóstolehaviya viti manerejiruqueneanahi. Ena apamuriana, manacahivare profetanahi náimatiequenehayarehi eta mapanereruanahi ema Viya apaesa náitametacavaca ena vichamuriana. Ena apamuriana, manacavare ticame-tarairurahianayare, náichuhayare ena achaneana náehica ema Viáquenu. Ena apamuriana, manacavacavare pastóreanayarehi, najaneacavacavare ena vichamuriana. Énapa ena apamuriana, manacavacavare máestroana, náimitucavacayare eta máimiturapiana ema Viáquenu. ¹²Taicha éma, mavarahahi máetupiricayarehi tamutu te etaracu eti machanerana; mavarahavare vitiarihiyare viti vítátijiricaheyare eti vichamuriana, vicajurusirahayarehi eta éhisirahi éma. ¹³Apaesa yátupina vácuti vámutu eta máurivahi ema Machicha ema Viya; táitecapavanevaréni eta sache eta viúrujisiravaya, tájinapa tahapapicahavimahi eta véhisirahi; vítamuturucaripahini tamutu eta vítucaqueneanahi tásihaqueneanahi me Cristo. Vácutipaini éma tamutu eta máitupajijiasiravahi. ¹⁴Mavarahavare vimutuyare vímatiequeneha. Vaipa vácutimahi ena amuyana, témunanasiricavanarichaha éna. Tísapajiricavanarichaha navayuaca tayehe eta apana náimiturapiana ena títurúequenehana tivayuarecana, napamisiravacahi namutu náehica eta tamauri-queneana. ¹⁵Eta tacahe, vétumechavayare eta véhisirahi eta máimiturapiana yátupiqueneana, yátupinavare eta vémunarivahi, vicajurucacayarehivare eta viúrivá, vicutiyare ema Viáquenu Jesucristo, taicha émahí ema téchahavihi. ¹⁶Nímicutichahehi eta viáquehe. Camurihi eta táunavahi eta viáquehe; étanai-chuhisera. Camurihivare eta táitupajijiasiravanahi; tamutuhisera ticaematanehi, víchirahi eta vivarahaquenehi. Tájina vahi táejiacavahini. Tamutu tíjaneacacahi. Ene vicahehi viti machanerananahi ema Jesucristo. Éma, vétumechahavihi vimutu víti. Eta viúrujasirahi mayehe éma, étamurihavihi. Vimutu vítucaqueneapachuhi máicha. Vématanerepípacuhui máicha. Vijaneacacahivare. Vicajurucapapahi táichavenehi eta vémunasiracacahi.

Apanainapa eta vítaresira taicha eta víavahásirahi ema Cristo

¹⁷Eta juca numetarapiana eyehe, nutuparacahéicha taicha matupararunuhi ema Viáquenu. Nucavanairipipa puiti: Vaipa ecuapecha ecuquicha eta náichaqueneanahi ena máimatirahanahi ema Viya, náichahi éna eta náitaesirahi jácani tavarahaqueneanahi eta napanereruana súnsurupiana. ¹⁸Tamutu eta napanereruana tétavacavahi eta tamapicuvahi. Vahi apaesainahini tavehahini eta tijarahi. Máecharaireanahi éna, táichavenehi eta tamuracavahi eta nasamureana. Váhiquene navarahaimahi napaucha ema Viya apaesa macanaracavacahini éna. ¹⁹Tájinapa apaesainahini náimatihini eta títsirihacare. Tijaracavanapa tayehe tamutu eta najamuraraivana. Tétavacavahi eta navapinairahi náichahi eta tamauriqueneana tájiparacana. ²⁰Étisera vahi tacucahe eta ítaesiraya puiti eta éhisirahi ema Cristo. ²¹Taicha németeaca yátupihí esamararacahi eta vímitusirahehi. Ímatiripahi eta táuriqueneanahi yátupiqueneanahi tásihaqueneanahi mayehe ema Jesucristo. ²²Tásiha puiti, vaipa ecuesacha echavaucha eta ítaesirainihí acane echipejiricavahi taicha tivayuacahe eta ejamurachirahi eta tamauri-queneana. ²³Puiti éti, ísapaya ema Espíritu Santo mávahácahe, máitsivachirayare eta epanereruana étapa eta ejamurachirana te íachanevana. ²⁴Tásiha, apanainapa eta ítaesiraya. Yátupi eta ecaquehéraina ema Viya, ácutini éma eta máurivahi étapa eta masantuvahi.

Étupiricayare tamutu eta ítasesirana

²⁵ Tásiha puiti, vaipa épiyahirahimahi. Étupiruvayare tamutu eta échajirisiravaya nayehe ena echamuriana eparaepiyana, taicha étanarichuhi eta echamuriracacairahi, émanarichuhivare ema Viúrujiaruhi, ema Jesús.

²⁶ Te tatiarihpuca eta táimiyusemacahe, ejaneacavaicha machu ecapeatura. Te esemapuca, vahi tacunasi eyehe. Énevanéna eperdonachacaca. ²⁷ Ecaunevayare, machu máiturucahe ema Váinaraji, táichavenénahi eta esemanevahi.

²⁸ Mácani tiámerahinihi, vaipa macuapechava macuamereca. Mácaematane apaesa macunachacare, apaesavare eta jácani máematanevachayare eta maviyihayare eta macajirayare ena ticamunuvanahi.

²⁹ Váhivare ecunacajacachava eta tájiparácana echájirirucavana tamauriqueneana. Tátupiruva eta échajirisiraváina apaesa étaina eyuchusiha eta nasuapiraina nácani tismaheanayare, éta tétupirisamurechavacayare éna.

³⁰ Vahi ecuisapava ícha jácani tamauriqueneana, machu ímipanerereca ema Espíritu Santo, émaripa ema sántoquenehi, tiávahácaheripa éma. Eta mávahásirahehi tímicutijiricavaipahi eta ecamarcahi, taicha ímaticaréipahi eta machanerahéirahi ema Viya; púiticha, étapa eta te titecapapa eta jena sáchezare viúchucuirayare.

³¹ Váipavare ecunaca eta semanereana. Váipavare ecatianarahimahi. Váipavare ecusemarairihi, váhivare ecuijajachava ecapiaracava. Vahi ecuichanareca. Ínajicaya éti tamutu eta júcana tamauriqueneana. ³² Táitsiva étaviuchayare eta iúrivayare nayehe nácani apamuriana, ejapanurahiyare. Te tatiarihpuca eta náejecapirava, eperdonachacacayare taicha ene macahehi ema Viya eta maperdonachirahehi máichavenehi ema Cristo.

5

Tiúriyarehi eta náitatesirayare ena machichanaveanahi ema Viya

¹ Puiti éti machichaheripahi ema Viya, máemunaruqueneheripa, tásiha ácutipa éma eta máurivahi. ² Émunajiricacayare eta ítasesiraya. Ecutiyare ema Cristo eta máemunasirahavihi. Éma, macurisamurecharipa ema Maiya eta máimijararesiravahi víchavenehi víti, macutíhi eta sárarechicha uvesa nacaparuhí eta námavahuhi me Viya.

³ Eta machaneraherripa ema Viya, vaipa táuricahini íchahini eta túhusicare. Tiñehi te mamirahu ema Viya. Váhivare ecupanerecha ícha jácani tiámanahi eta tamauriqueneana. Váhivare tacuvayuacahe eta tájiparácana. ⁴ Vahi ecunacajacachava eta échajirirucavana titsirihacarepiana, súnsurupiana, tájiparácaqueneana, taicha tájina tacunachacalévaina éta. Tamutusera eta échajisiranaya, amairipiquenéna eta ehasulupayachiraya ema Viya. Jéhevere, éta iúrihaquenehi. ⁵ Németeaca ímatiequeneharipa éti eta vahi tiúchuchanaimahi nácani ticaecahicacanayare, ema achane te mavehapuca esu esena apayena, esu esena te suvehapuca ema achane apaima; nácanivare ena amaperuana tivehajiricacanahi; mácanivare achane mavehapuca ema maparajairava; nácanivare tijamurachana tamutu jácani náimahaqueneanahi. (Ena tavayuacavacahi eta najamurachirana, énarichuhi ticasíñarajiana.) Namutu ena nani tímereuchavanahi vahi machanerainainahini ema Cristo. Vahi tisiapanaimahi te mávasa ema Viya. ⁶ Tásiha éti, vahi ecuisapava nácani navaraha navayuacahe te náechajiriruva súnsurupiana,

napamisiraheya ícha eta júcana tamauriqueneana, taicha eta júcana, éta tívichavacayare nácani masuapajirairahanahi me Viya, muracayare eta náicuñayare. ⁷ Tásiha, ejaneacava, machu ácuti ena nani tíchanahi eta júcana tamauriqueneana.

⁸⁻⁹ Échavaripa tacáhénihí eta ítaresirahi acane étarichu íamapiricainihí íávacuhahi te timapicu. Puítisera eta íurujiasiraipa ema Viáquenu, tijarahiripa eta ítaresirahi. Tásiha, ímerecayare eta emicahuchirayare ena apamuriana achaneana, ímeresirayare eta íuriva, étaipa eta tipachinaqueneana eta ítaresira, étaipa eta yátupirahi eta éhisirahi ema Viya. ¹⁰ Tamutu sácheana ecaravahuinavarepa eta mavarahaqueneanahi máuriruanahi ema Viáquenu. ¹¹⁻¹³ Ejaneacava éti, machu íápechava ícha eta tamauriqueneana náichaqueneásahi ena achaneana te timapicu. Taicha tétavicavahi eta tatsirihacarevahi eta náichaqueneanahi eta nayumurusiravahi. Étisera ímitucavacayare éna. Emicauchayare eta tamaurivahi eta náichaqueneana, apaesa náimaha eta táífehivahi eta náichaqueneanahi. Tásiha, natiarhipuca ena tivarahanaya náinajicayare. ¹⁴ Eta emicahuchiravaca éna, tacuti eta táechajiriruva eta jirasare, ani tacahe:

Pítisami pímicutijiricava pépenaquene taicha
eta tavayuasiravíhi eta pecatuana.

Péjamiuchavaichu eta pímacacarasiravahi
te timapicu.

Písapava macaechepucavi ema Cristo,
mavarahahi tímícauchaviyare.

¹⁵ Eta tacahe, yátupina eta ejaneasiravaina. Vahi ecucuti ena máecharaireana. Ímerecavaya eta ítupajijiasiravahi. ¹⁶ Ecamapuravachaha tamutu sácheana eta ímitusiravacahi ena achaneana, taicha maverana ena tíchanahi eta tamauriqueneana. ¹⁷ Tacuija eta esunsuvanaina. Epanerechayare apaesa ácaicutiara yátupi eta mavarahaquenehi ema Viáquenu. ¹⁸ Vahi ecucavaha taicha éta ticauyayacarehi ticamitiacahe. Ísapavasera émaira máechahe ema Espíritu Santo tamutu eta ítaresira. ¹⁹ Eta ímiturapiyare nayehe ena echamuriana, eta salmo étaipa eta jirasareana majiriahuana ema Viya. Eta ecunachirainahi ema Viáquenu, íúrisamureyarehi eta ejiraira. ²⁰ Ehasulupayachaparacaya ema Vicaiyaquenehi te máijare ema Viáquenu Jesucristo tayehe tamutu jácani íchararacavana taicha tásihaqueneanahi eta mayehe.

²¹ Emutu éti, ímereca eta íuriva táíchavenehi eta epicauchirahi ema Viya. Ísapava eta nacamunuirahahi ena echamuriana. Vahi étainachucha éhica eta evarahaqueneana.

Éma achane ésupa esu mayena náimerecayarehi eta náuriva énajicacayarehi

²² Étiripa eti esenana ecaimaqueneanaripahi, títparacahehi epicauchayarehi ena ímanaveana. Esuapajirahiyarehiva nayehe, tacutiyaieichu eta esuapirahi ema Viáquenu. ²³ Taicha mácani achane, tatuparacahi éma, téchaya eta máitátiraya esu mayena, tacutihi ema Jesucristo tatuparacahi éma téchahaviyarehi vimutu viti véhicanahi éma. Émarichuvare ema ticatiuchahaviya vimutu viti machaneranahi. ²⁴ Tásiha, yátupíhi eta vípicauchirahi visuapahi ema Cristo. Ene nacaheyarehi ena esenana, nasuapayarehi napicauchayarehi ena náimanaveanahi te tamutu.

²⁵ Étiripa eti náimanaveanahi, tituparacahehi émunacavacayare ena eyenana, tacutihi eta máemunasirahavihi ema Jesucristo viti machaneranahi. Éma, tímijararecavahi víchavenehi, ²⁶ taicha mavarahahi tisantuchahaviyarehi. Tásiha, masipahasinahavipa eta viáchanevana eta visuapirahi eta máimiturapiana. Eta masipahasirahavi tacuti eta sucavira te une esu araimayare te tétupiricavapa tayehe eta sucaimairayare. ²⁷ Taicha mavaraha tacuija víchiravaina viti machanerana te táitecapa eta sache vitupihamirauchirayare éma. Vétaviuchayarehi eta viúrinavaya. Tájina véchipejicaimahi, tájinavare tijararecavimahi, apanaimahi víchava. Mavarahavare tétavicavayarehi eta visantovaya. Yátupi matapiravarehaviya víti. ²⁸ Ene ecaheyarehi eti náimanaveanahi, ímerecayarehi eta émunasirahi ena eyenana, tacutihi eta émunasirahi eta íaqueheana. Mácani máemunacahi esu mayena, tímicitijiricavahi eta máemunasiravahi éma. ²⁹ Taicha viti achaneana, eta vítaresirahi, váhiquene vicatichaimahi eta vécheana. Tétavicavahi eta vijaneasirahi, véchapajiricahi, vénicahivare eta véche. Ene macahehi ema Cristo eta majaneasirahavihi, máechapajirisirahavivare viti machanerana. ³⁰ Víti tímicitijiricava eta táunavanahi eta máquehe táichavenehi eta viávahásirahi éma. Vicutijiricavavare eta maeche, máperanavare. ³¹ Échavaya eta táechajirisirahi eta Sagrada Escritura, ani tacahe: “Mácani amaperu achane ésupa esu mayenayare, te ticaimanapa, tatuparacavacahi típutsicavanayarehi eta napenana ena ticachichana. Énajivainapa titáticacanayare. Eta navehacacairahi, tímicitijiricavaipa étanarinehi eta náqueheana” tacahepa. ³² Te juca tametarapi, jararihi eta tacayemaquene tayumurevaquenehi. Puiti nímitucahe: Víti machanerana ema Cristo, eta viúrujasirahi éma, étanamuriháviripa tacuti eta étanarinehi eta náqueheana ena ticaimanahi. ³³ Tásiha, nuvaraha yátupina ácaicutiara eta juca nucayemaquenehi. Tituparacahehi eti ajairana, yátupina eta émunasiraina ena eyenana tacuti eta émunasirahi eta íaquehe. Énerichuvare eti esenana, tituparacahehi epicauchayarehi ena ímanaveana.

6

Ena amaperuana, náimerecayarehi eta náuriva nayehe ena ticachichana

¹ Étiripa eti amaperuana, yátupina eta esuapajiraivaina nayehe ena ticachichaheana, taicha tituparacahehi ene ecaheyarehi eta éhisirahi ema Viáquenu. ²⁻³ Ema Viya tíjaracavapa tíjaracaheyare eta iúricacarevaya eti esuapajirahiana, taicha ani tacahe eta máechajiriruva: “Epicauchayare ena ticachichaheana. Te esuapajirahi éti, nucajurucaheya te apaquehe. Tájina íchiravaimahi, iúritaresirainapa” macahepa. Tétavicavahi eta tasuapacarevahi eta juca mavanairipi ema Viya eta eyehe.

Ena náiyana, náenana, táurini eta náimitusiravacaina ena nachichanaveana

⁴ Énerichuvare, eti náiyana, náenana, vahi ecuimiyusemaca ena echichanaveana tayehe eta evanesirana. Tauri eta ecavanairipira, apaesa napicaurahi eta najurusiraina, énajivayare ticaratapavana. Ímitucavaca tamutu eta máimiturapiana ema Viáquenu, apaesa nasuapajirahi.

Ena ticaquensurecana, táurini eta nacaemataneasiraina

⁵ Énerichuvare eti ecaquenureana, tituparacahehi esuapajirahiyare nayehe ena iáquenuanahi. Epicauchavacayareva, émunacayareva. Táurivainahini eta ecaemataneasirahi, tacutirichu eta táurivahi eta ecaemataneasirahi ema Cristo. ⁶⁻⁷ Evapinavayarehi te esamureana eta ecaematanera, vahi tacurichu te natiarihi ena iáquenuanahi te emirahu. Vahi ecuyacujiriraha. Evapinavayaresera eta ecaemataneasirahi éna, taicha émarichuvare ema Viáquenu ema ecaematanearuhi. Ímrecavayare eta yátupirahi mavanarahehi éma. Tacaheyarehi eta ítauchirayare eta mavarahaqueneana ema Viya. ⁸ Taicha écharipahi émutu éti, vijacapayare eta vícuchihi mayehe ema Viáquenu te vítauchahi tamutu eta táuriqueneana. Vahi manerejicaimahi nácani líbreanahi énapa ena ticaquenureanahi; vínunayarehi tayehe eta vícuchihi.

Énapa ena náquenuana, tituparacavaca eta náurivaina nayehe ena nachanerana

⁹ Énerichuvare eti náquenuana, tituparacahehi iúriyareva nayehe ena echanerana, eجانuyare éna tayehe eta evanesirana. Vahi ípicararerecaimahi te evanesirana. Ínunayarehi échava eta matiarahirahi ema Iáquenuhivare éti apanava, ema tiávihihi te anuma. Taicha éma, nájina máepuruquenéna ena acha neana.

Yátupina eta vicasíñavairahi me Viya; vétumechavavare eta véhisirahi

¹⁰ Puiti nutuparacavevare, nuparapenevaneana, ecasíñava yátupina mayehe ema Viáquenu apaesa máíjaracahe éma eta matumeva étapa eta máitupajijiasirava. ¹¹⁻¹³ Nuvaraha numetacahe eta juca: Ema Váinaraji ticanarahavihi víti machaneranahavihi ema Viya. Tétavicavahi eta mavarairahi tíaquipaicahavi. Tásiha, tituparacahavi eta véchapajirisiravaya eta vicatiuchiravaya mayehe éma. Natiarivare ena camuriqueneana majupahana, énapa ena masuntarurana. Váhisera achaneanainahini, váhivare víparaepiyanainahini. Éreananahi éna, váinarajiqueneanahi. Tétavicavahi eta nasimutuvahi éna. Tétavicavahivare eta náitupajijiasiravahi étapa eta natumeva eta nacaematana tayehe eta juca apaquehe, tamapicuquenehi náicha. Eta tacahe, échapajiricavayare eta ecatiuchiravayare tayehe eta mavayaruquiana ema Váinaraji. Étumechava eta éhisira. Ecuti ema suntaru ticasíñavahi tayehe eta mamuiraha vahi tasiapahacaimahi eta espada. Tásiha, eratahayare ecamicha tamutu eta ecatajivairana. Vahi ecainajiruvaimahi. Iáquipaicayareva namutu ena machamuriana ema Váinaraji. ¹⁴ Yátupinahisera esupa eta vímiturapiana yátupiqueneana. Vahi ecuchavacuéchava. Átupiruvahini eta ítaresirahi. Ecutiyare ema suntaru, manacahi eta máitijuhe, étapa eta fiéromehi tiávichayarehi eta matupa, tájinasarepa náicharaca ena mánarana. ¹⁵ Vahi tacuechuqiha eta cametarairuyare eta majacapiraya ema Viya namutu ena achaneana. Etanucayareva eta eparupevaya apaesa erataha eta epaisirayare te acheneana eta ítecapirayare tayehe eta tayerehiqueneana avasareana. ¹⁶ Tacutiquene eta ticamunucarehicha, yátupinahini eta ecasíñavairaina mayehe ema Viya. Eta ecasíñavairayare táimicutijiricavahi iávihuinahini eta ticaemahaequenehayarehi eta tamuruirapahi eta mayucaraquí ema Váinaraji. ¹⁷ Tacutiquene, ecasíñavahi yátupina eta iúchucuirayare, tácuti eta macasíñavaira ema suntaru eta mayehe casco te machuti. Iúnacahi eta máéchajiriruva ema Viya, máimiturehequenehi ema Espíritu Santo. Eta juca tímicutijiricavahi eyehenahini espada eta ecatiuchiravahi.

¹⁸ Te eyujaraca, eyaseacaya ema Viya máijaracahe eta etumevaina. Eta eyujarasirana, tacuija tahapapiricahe eta máimitusirahehi ema Espíritu Santo. Vahi ecuyacuji eta eyaseuchiravaca namutu ena vichamuriana, majaneacavacahini ema Viya, táurivaina eta náehisirahehi. ¹⁹ Énerichuvare, te eyujarasirana, eyaseuchanuhini me Viya, apaesa máijaracanhini éma eta nuvapinairava, tacuijavare tahapapiricanu eta néchajisirayare ena achaneana. Nuvaraha tasuapacarehini nayehe eta najacapacarevahi mayehe ema Viya. ²⁰ Ema Viáquenu tinacanuhi núti námayarehi eta máechajiriruva, nucutiyarehi mácani achane embajador mayehe ema aquenuca Emperador. Éta tíchanuhi ticaviurenuhi eta napresuchiranuhi puiŋi. Eta tacáhehi, nutuparacahe eyujarauchanu, eyaseuchanu me Viya, máijaracanhini eta nutumevaina eta nucametarairuirayarehi nayehe namutu ena achaneana te avasareana, váhivare nucuyacujihini eta nucametarairuirayarehi.

Eta táichecuaraqui eta macartane ema Pablo

²¹ Tiuri puiti, máimahaherinesera ema vémunaruquenehi vichamuri Tíquico. Éma, títametacaheyare tamutu eta níchararacávahi núti. Tétavicavahi eta máimicatasiranuhi eta vicaemataneasirahehi ema Viáquenu. ²² Eta tacahe, névatacahi éma eta ara eyehe. Títametacaheyare eta víchararacavahi, tétumechaheyareva éti eta éhisiraya ema Viáquenu.

²³ Puiti nuyaseacahi ema Vicaiyaquenehi émapa ema Viáquenu Jesucristo, náijaracahehini eti nuchamuriana eta enarasirahehi te esamureana tamutu eta epanereruana, tajurucahivaréni eta ecasiñavairahi eta nayehe, éta eta émunasiracacahi. ²⁴ Nuyaseuchahevare táetaviuchahini eta iúricacárevaya emutu eti yátupihini éta émunasirahehi ema Viáquenu Jesucristo.

Tamutupa eta néchajirivanahi eyehe.

Eta macartane ema Apóstole Pablo nayehe ena machamuriana ticavasanahi te avasare Filipos, ticaijare FILIPENSES

¹ Nuti Pablo émapa ema Timoteo, mavanarahavihi ema Viáquenu Jesucristo, vímiamareca puiti eta juca vicartane eyehe emutu eti vichamurianahi ecavasanahi te Filipos, énaripa ena pastoreana énapa ena najupahana. Taicha eti machaneranahi ema Viya eta iúrujasiravahi ema Jesucristo. ² Nuvaraha máetaviuchahini eta macatajisirahe ema Tata Vicaiyaquene, émapa ema Viáquenu Jesucristo; náijaracahehini táurivaina eta epanereruana.

Ema Pablo mayaseuchavaca te mayujarasirana ena machamuriana

³ Tatiarihi eta te néchahe, nuhasulupayachahi ema Viya íchavenehi éti. ⁴ Te tamutu eta nuyujarasirana, tétavicavahi núrismureva eta nuyaseuchirahehi emutu éti. ⁵ Taicha te jena tínapucainapa sache eta nucemetarairuirahehi eta eyehe, ichapequene eta ímicatasiranuhi. Púiticha enasirichuhi. ⁶ Ema Viya, tétavicava eta máurichirahe eta ítaresira cape juca. Núti, tétavicavahi eta nucasiñavairahi mayehe eta máimiyansiravaina eta máurichiraheyare, mavarairahi iuri eta machimapiraheya ema Jesucristo te jena sache machavirayare. ⁷ Énerichuvare nucasiñavahi eyehe eta ejacapiraya eta máurichirahehi éma, taicha némunacahehi ichape emutu éti. Nucasiñavahirare vicuticacaipahi eta vijacapirahi eta máimicatansirahavihi ema Viya, tayanapane viyerehicacahipuca, étaripa te juca návihahi cárcel. Étaripa te nutupihamirauchavaca ena tuparairucana eta nucatiuchirayarehi eta yátupira eta viúchucuiraya maicha ema Jesucristo, apaesa te nasuapapuca éna apanava. ⁸ Tímaracananuhi ema Viya eta némunasirahehi emutu éti, nucutihi ema Jesucristo eta máemunasirahehi éma. ⁹ Nuyasecachivare ema Viya eta íapajusiravainahini eta émunaraivaya. Ítupajjiacavahini, támutuhini ímatiequeneha, apaesa ímatiparacahini eta enerejisiraya eta táuriquenehi. ¹⁰ Taicha nuvaraha tápajupanávainahini eta iúrivaina eta ítaresirana, tájina téchipejicahémahi. Matapiravarehéyare, tiúriyarepa eta machimapiraheyare te machava ema Jesucristo. ¹¹ Nuvarahavare íapajusiravainahini eta íchaqueneana táuriqueneana eta ecaemataneasirahehi ema Viáquenu Jesucristo. Tásiha, tétavicavayarehi eta nacunachirayarehi ema Viya ena achaneana eta náimairahahi éti.

Eta vítaresirahi, puiti émapa ema Cristo téchahavihi

¹² Nuparapenaveana, nuvaraha numetacahe tájinaichucha táichavahini eta nucaeratairahi. Eta návihairahi núti te juca cárcel, camuriana ena numetaruanahehi eta máemunaraivahi ema Viya eta nayehe. ¹³ Énaripa ena tasuntarurana eta palacio énapa ena apamuriana achaneana náecharipahi eta táemeratasiranuhi eta néhisirahi ema Cristo. ¹⁴ Tacutiquene, eta náimairanuhi eta nupresuvahi, ena camuriqueneana nuchamuriana táetumechavacainehi eta nacametarairuira eta máechajiriruva ema Viya. Vaipa napicahini taicha ichape eta nacasiñavairahi mayehe ema Viáquenu. ¹⁵⁻¹⁷ Nararihi éna, tiúrihi

eta napanereruana eta náimituresirahi te máijare ema Cristo. Tatupiruvahi eta náichirahi, tásihaquenehi eta náemunasiranuhi, taicha náechahi éna eta návihairahi ani, nucatiuchirayarehi eta yátupira eta viúchucuiraya maicha ema Jesucristo. Nararihismisera ena tímiturecanahi te máijare ema Cristo, váhisera tátupiruvaquenénahini eta napanereruana. Nacapinaruraivarichucha, navarairahi ticachuricanuana. Napanerechaichuchavare tiápajucavayarehi eta néñamiravana, tavetijipa eta návihairahi nuti te juca cárcel. ¹⁸ Tájinachuchasera táichavahi. Núti vahi nucapinaruvacaimahi ena nani páureanasami. Ticurisamurechanuanarichucha núti eta náechajishairahi ema Cristo namutu.

Énerichu ichapemuriyarechucha eta núrismurevaya, ¹⁹ taicha németeaca tíuriyare tamutu eta níchavaquenevayare. Taicha tisamacarehi me Viya eta eyaseuchiranuhi. Émaripa ema Espíritu Santo, ichape eta máimicatasiranuhi. ²⁰ Núti, ichape eta nuvarairahi váhini nucutsirihaini. Nuvaraha nuvapinava eta nímiyanirava nucasiñavaya mayehe ema Cristo eta majaneasiranuhi apaesa náimatihini ena achaneana eta yátupirahi eta macasiñacarevahi ema Cristo. Tájina vahi nupicacavahini eta náimicatichiranuhipuca, táimicapacanuca. ²¹ Taicha, eta nítaresirahi puiti, ema téchahi ema Cristo. Te népenapuca, tiápajucavainapa eta núricacarevaya. ²² Téhesera te nítarecarichahapuca, nucamapuravayarehi nucaemataneacayare ema Viáquenu. Eta juca, vaipa nímatiequeneha tájahapuca tíuripanayarehi nuyehé. ²³ Nuvarahai-panéni níjahúchavahini népenahini apaesa nunaracapai te machacaya ema Cristo. Eta juca tíuripahani eta nímairahi. Váhisera nímatiequeneha tájahapuca eta néhiruyare. ²⁴ Néchahevaresera éti, néñamahevere nujunijicahé. Tíuripanaichupuca vuíchaha nucuepena. ²⁵⁻²⁶ Tásiha, németeaca vuíchaha mavaraha népenahini ema Viáquenu. Nucuchapa nápechavahivaréni níteca eta ara eyehe, nucachaneheyaréchaha éti. Nímicatacahenumayare apaesa tápajucavahini eta iúrisamurevana eta ecasiñavairahi me Viáquenu Jesucristo. Tacahe, tétavicavapai eta viúrisamurevainahini eta viúrujiacacairaya.

²⁷ Eta itaresiraya, ímerea yátupina eta éhisiraina eta máimiturapiana ema Cristo. Tayanapane váhipuca nucuiteca eta eyehe, ímiyanavasera eta étumechiravaina eta iúrujasiracacahi. Nusamairiracahéhini táurihini eta ímiyaniravahi éhica emutu, étanainarichuhi eta epanereru, evapinavahi eta ecame-tarairuira eta véhiruhi tayehe eta viúchucuiraya. ²⁸ Vahi ecuarameca naicha nácani iánaranahi. Eta nacatianasirahehi, tímicaecherachahi eta nacaicuchirahi eta náicuñayare. Táimicaecherachahi eta iúchucuirayarehi éti maicha ema Viya. ²⁹ Éti, iúricacarehi maicha ema Viya eta ejacapacarevahi mayehe, táichavenehi eta ecasiñavairahi me Cristo. Tacamunúhisera eta ecatajivairayare táichavenehi eta éhisirahi éma, ecaicuchirahi éta. ³⁰ Ecutinuripahi eta vicanarajirisiravacahi ena viánaranahi. Éti ímahanurichuhi cape juca eta nuncanariravacahi, puíticha esamairicanuipahivare eta nunasirichuhi nuncanaravacahi.

2

Tétavicavahi eta masuapajiraivahi ema Cristo. Tásiha puiti, tétavicavayarevare eta masuapacarevayare.

¹ Tacahe puiti, németeaca esamavahi eta máetumechirahehi ema Cristo, iúrisamurerahivare táichavenehi eta máemunasirahehi; evapinavahivare eta

mávahásirahehi ema Espíritu Santo, máimitusirahehi eta ecajirahi ejapanurahihivare. ² Tacahe puiti, nuvaraha étanainarichuvare eta epanereru, ácuticacaini eta ecaemataneasiraina ema Viya; tácuticacahivaréni eta émunasiracacahi. Tásiha, tétavicavayare eta núrismurevaya ícha. ³⁻⁴ Éti eta ítaresiraina, tacuija eta ecañavavaisiraina, váhivare ecuimijuquiha eta evarahaqueneana. Nuvarahasera ímrechahini eta emansuvaina nayehe ena echamuriana; énahi émunaruqueneanahi. Nativaina ímicatavaca éna, táetaviuchiravainahini eta náuricacareva ícha. Vahi ecuítátijiva.

⁵ Emutu éti íámanahini eta táurivahi eta juca mapanereru ema Jesucristo, tisuapajirahi éma. ⁶ Éma, tacahehi eta mapanereruanahi: Vahi macasiñavahini eta víyairahi éma. Tétavicavahisera eta mamansuvahi, étapa eta máurivahi. Tísapajiricavahi. ⁷⁻⁸ Tacahe, manaquicahi eta mávacuréni. Eta mácupauchirahavihi, macutipaipe mácani achane macahequenechucha eta máchusirahi. Tamutusera eta máitaresirahi, tétavicavahi eta masuapajiraivahi, macutihi mácani moso. Eta masuapajiraivahi, étapa tímaparauchahi eta máepenirahi te crusu. Titsirihacavahineni, máitachahisera. ⁹ Eta tacahe, ema Viya máijaracapa eta máejasihayarehi tayehe eta anuquehepana mávacureyarehi, étapa eta tacapicahuirahi ichape eta máijare, ¹⁰ apaesa námutu nácani tisamanahi eta máijare Jesús, tépyucanayarehi: ena tiávihanahi te anuma, énapa ena tiávihanahi te apaquehe, énapa ena nacaerataquenehi puiti te amahe apaquehe. ¹¹ Namutu náichayare: “Yátupi Aquenucaquene éma”. Tacahe, tétavicavahi eta vicunachirayarehi ema Tata Vícaiyaquenehi.

Tétavicava eta najaraiva ena téhicana ema Jesús, nacuti eta jarairiqui

¹²⁻¹³ Núti nucunachahehi, eti nuparapenaveana némunaruqueneanahi, taicha tétavicavahi eta esuapiranuhi te nutiarahirichaha te echacaya. Puítisera nuvaraha tápajucavaini eta esuapiranuyare, puiti eta nuyerehirahehi. Ema Viya, émarichuhi ema tinacahi te esamureana eta evarairayare ecurismurechayare éma; tiávahácahevare eta ítauchirayare tamutu. Tásiha, muracaina eta ejaneasirava tayehe eta tájiparacana, epicavareni eta ímicatisamurechira ema Viya. Tacuija táemitiequenehahini eta tapachinavahi eta íchanevana.

¹⁴ Te tatiarhinapuca jácani íchaqueneanayare, vahi ecuevataemachavaca, váhivare ecuacapauchava, ¹⁵ apaesa tacuija échajisiacarevaina emutu. Tacuijavare etapiravainahi eta náimairaheyare ena achaneana. Ímrechavayarehi eta machichahériahi ema Viya, tájina táechipejicahehini nayehe ena achaneana váinarajipaneréruana. Nímicutichinahe eta táurinavahi eta jarairiquiana vímahaqueneana te anuma te jácani yati timapicuquenehi. ¹⁶ Ímitucavacahini eta máéchajiriruva ema Viya, eta íchuhairavacavare náehicavare, apaesa náuchucuhahini tayehe eta apana náitaresira. Tacahe, te máiteca machava ema Viáquenu Jesucristo, eta máimairaheyarehi eta juca táuriqueneana íchaqueneanahi, tétavicavainapa eta nucunachiravaya núti íchavenehi éti eta táurivahi eta nímitusirahehi. Vahi támapurujihini eta nuaemataneasirahi. ¹⁷⁻¹⁸ Nímicutichahe eta esuapajiraivahi tayehe eta ecaemataneasirahi ema Viya. Ticutihi eta íámavahuhi mayehe. Núti, tijuricati táimicapacanupuca eta nucametarairuirahi eta eyehe. Eta népenirainapucai tacutiyaeva eta námavahuhi mayehe ema Viya, tacachane

eta iámavahuhi éti. Núti nuvapinavahi eta níjarasiravahi népena, núrissamu-rehivare eta nucamavahuirahi me Viya. Nuvaraha iúrisamureyareva éti apanava. Vahi ecucatiequenehanu. Ácutinu eta núrissamurevahi núti.

Éma Timoteo émapa éma Epafrodito, vanairucanayare me Pablo

¹⁹ Nupanerechahi névatacayaréni éma Timoteo eta ara eyehe, máimaha-panahe apaesa núrissamurepaini eta nusamairirisiraheya te machavapa. (Máimahahavirinesera éma Viáquenu Jesús eta vítujisiravaya.) ²⁰ Taicha éma Timoteo, yátupihí macutinuhí eta nuhapasamurechirava eta iúricacarevainahini éti. Nájina apanainahini nácutihini éma. ²¹ Nararihinéni éna apamuriana, énachuchasera tiyayauruicavanahi. Vahi tihapasamurechavainaimahi eta iúricacarevaina eti machaneranahi éma Jesucristo. ²² Ímatiripahi éti eta máurivahi éma Timoteo eta máimicatasíranuhí tayehe eta vicametarairuirahi, tacutihí mácani machicha éma achane, eta táurivahi eta máimicatasírahí éma máiya. ²³ Vuíchahasera névatacáimahi éma. Néchanumayare eta juca níchararacavayare te juca. ²⁴ Nucasiñavahinénisera mayehe éma Viáquenu Jesucristo eta nútijacarúvainahini nímahapanahe.

²⁵ Tásihasera, nupanerechahi névatachivaréni puítirichu éma apana viparape Epafrodito, éma évataruhi tímicatacanuyarehí, tiámaphíhvare eta enaquíruvana. Puiti éma, tétavícvahí eta máimicatasíranuhí tayehe eta juca vématanerepihí, vícanarairahí eta tamauríqueneana. ²⁶ Mavarahaípaichavare tímahe éma apanava. Téñamavaípahí eta eyehe emutu éti taicha máechahí eta esamairirisirahí eta macajumairahí. ²⁷ Yátupihí eta macajumairahí, tiánehiyarehíni tépena. Majapanuhíséra éma Viya; tinaracahí. Tijapanunuhíhvare núti apana apaesa vahí nucueñamavahichainí, vahí tacuapíquihanuhíni eta néñamiravahí puiti. ²⁸ Éta tacahe, nuyayaucha puiti névataca éma, apaesa eta ímairainahíni éti, iúrisamurevarepainí. Te néchapa eta iúrisamurevahi, étpa tacaepaha eta néñamavahí eyehe. ²⁹ Táuríséra eta ejacapírahí éma te esamureana, taicha yátupihí echamuríhí éma eta éhisirahí éma Viáquenu. ³⁰ Taicha éma, yátupihí tiánehipa eta máepenira, táichavenehí eta táetaviuchirahí eta mavaraira macaemataneaca éma Cristo. Váhíquene tiyavanavahíni eta máítaresirahí, taicha muraca eta mavarairahí máítaucha eta etuparasíranahí mayehe. Taicha éma ítsivahí éti, eta vahí ítujícvahíni ítecahíni étíjacarúvainahíni ítátínuhíni.

3

Tiúripána véhíca eta juca yátupíqueneana

¹ Nuparapenaveana, evapínava eta macachaneraherípa éma Viáquenu. Núti, vahí nuyacují eta nápechírayare numetacahe te juca néchajíríruvahí te nájure taicha eta tíúrichaheyare éti. ² Échapavayare nayehe nácani achaneana típamacaheana éhíca eta mavanairípiana éma Moiséini, navarairahíhvare ecamarcaýare, náimíjáchahí machaneraheya éma Viya taicha eta ecamarcaírahí. Éna naní, tétavícvahí eta náíñehívahí eta náemejcapírahíra éna víchamuriana. Éna, nacutihí eta jácani tamucu tétavícvahí eta tanícaravahí. ³ Jéhesaresera vítíquenehí machaneranahí éma Viya yátupíquenehí. Vícamarcaqueneanahí vítí te vísamureana maícha éma Espíritu

Santo. Vítiquenehi yátupiquenehavihivare viti véneuchavahi me Viya. Vivapinavahivare táichavenehi eta vicasiñairahi eta machanerahavirahi ema Jesucristo. Véchahi vahi étaparacainahini vítauchahini eta vanairipiana, étainapucaini visamacarehini táicha. ⁴ Jéhevare núti, táurichahinéni nucasíñavahini núti nusamacarehini, taicha nítauchahi tamutu eta viyeherepiana viti israelítana. Nucachiricahi ena nujaneanana. ⁵ Núti yátupiquenenuhi israelítanuhi taicha nucamarcarihiri te óchopa sache eta núchusirahi, náítauchahi éna eta viyeherepi. Mámariéquenenuíni ema Benjamín. Yátupiquenenuhi hebreo. Yátupiqueneanahivare hebreoana ena ticachichanuana, énapa ena náchucanaveanaini. Núti náchamurinuínihivare ena fariseoana. Nitucahi nímicapicaucha eta náítauchiraina yátupi eta víapajusiravahi religiohavíhi nayehe ena apamuriana nujaneanana israelítana. ⁶ Eta nímicapicauchira, ichape eta nupanajirisiravacahi ena náinapureana creyéntean. Nucasíñavahi núti eta nítauchirahi yátupi eta viyeherepiana. Tájina néchajisiacarevahini nayehe ena achaneana. ⁷ Puítisera eta néhisira ema Cristo, vaipa tacunachacarehini eta nusamiravahi tamutu eta juca níchaqueneanahi nusíñavirainíhi. ⁸ Tacahe, eta nímairahi, váhinéni étaparacainahini tayehe eta víuchucuiraya. Puiti nínajicapa tamutu eta júcana, taicha tihapapanuhi eta néhisirayarehi ema Cristo; táichavare vahi tácutihini eta táetaviuchiravahi eta táurivahi eta néhisirahi ema Náquenu Jesucristo. Puíticha tamutupa némitisica. Émachucha nucaemataneacahi. ⁹ Puiti eta návahásirahi éma, vahi étainahini eta táurivahi eta néhisirahi eta viyeherepiana. Ema Viya tijacapanupa táichavenehi eta nucasíñavairahi me Cristo. Taicha namutu ena ticasíñavanahi éma, tijacapacareanaya me Viya. ¹⁰ Nuvarahahi núti tajurucachucha eta nímairayarehi ema Cristo. Nuvarahavare tacuija tahapapica eta macaemataneasiranuhi, máimeresirahi eta táetaviuchiravahi eta máitupajijiasiravahi, tacutipa eta máechepusiraipa éma te máecari. Nuvarahavare nucapayayarácahivaréni eta macatajivairahi. Étape eta népenira, nuvarahavare táurichavacayare ena nuchamuriana, tácutihini eta táurichirahavíhi eta máepenirahi ema Jesús. ¹¹ Taicha núti nucaunevahi eta néchepusiraya núti apavana te nécari.

Yátupiya eta vicaratasiravaya te vivaraha vítujicava viveha eta vícuchihi

¹² Núti vahi nímijachavaimahi tamutuhini nítaucha eta nítujisiravaya. Vuíchaha nítamuturuca. Nímijanavaichuchasera eta nupamisiravahi, nuvarairahi nucurismurechayare ema Cristo te tamutu, taicha eta tachehi eta máichuiranuhi néhisirayare. ¹³ Nuparapenaveana, yátupiquenehi vuíchaha támutu nucapayayaracahini. Nuvarahaipasera némitisicayare tamutu eta nunaquiruana. Tásiha, nétumechavainapa eta nítauchiraya tamutu eta mavarahaqueneanahi níchaqueneanayarehi. ¹⁴ Nupamicavahi taicha ichape eta nuvarairahi nucurismurechahini ema Viya, nuvehahini eta nícuchihi mayehe. Taicha eta tacahehi eta máichuirahavíhi, mavarairahi tíjaracahavi eta víurujiasirahi ema Jesucristo.

¹⁵ Tacaheyarehi eta epanerechirayare éti. Ecutinuyarehi emutu eti échemachanaripahi eta juca véhiruhi. Te vuíchaha ecaicutiarahini eta juca, németeaca tímítucaheyare ema Viya. ¹⁶ Jéhesare, yátupina vímijanava véhica tamutu eta vímitucasivanahi.

¹⁷ Nuparapenaveana, nuvaraha yátupina ácutinu núti eta núrivahi eta nítairesira, éhícaréni eta náurivahi ena apamuriana téchemachanaripa.

¹⁸ Ichapemurihi eta nutuparasirahehi tayehe eta juca. Puiti eta nápechi-rahehi numetacahehi, níyahasamurehi taicha nararihichaha ena vuíchaha náimatiequeneha eta tacayemaquenehi eta máepenirahi ema Cristo te crusu. Eta nacatichirahi, vahi navaraha nasamararaca te véchajisiha.

¹⁹ Ena nánisami témitiequeneanayare taicha tétavicava eta tavayuasiravacahi eta najamurachaqueneana. Nacasamurechucha eta tájiparacana te juca apaquehe. Tisiñavavaicanahi, tivapinavanahi eta náichirahi eta tamauri-queneana titsirihacareana. ²⁰ Vítisera tachanerahavihi eta anuma. Eta tacahe, vicunevaipa eta vicuchapirahi ema Viáquenu Jesucristo ticatiurahi-quene, másíhairaya te anuma. ²¹ Máitsivachainapa éma eta juca viáquehesami. Apanainapa eta táimahiya. Tacutinapa eta macáquehéra éma, tapachinaquenehi. Tétavicavainapa eta tatumevayare taicha ichapequene eta máitupajjiasiravahi éma. Maratahahi macapaquecha tamutu.

4

Iúrisamurereacavayare me Viáquenu

¹ Nuparapenaveana némunarúqueneanahi, tétavicavahi eta nuvarairahi nímahaha, taicha nucajamurahehi éti, tétavicavahi eta núrissamurevahi ícha. Puiti nuvaraha ímiyanava túmehéna tayehe eta éhisirahi ema Viáquenu, eti némunarúqueneanahi.

² Nuvarahavene nutuparacavaca ena vichamuriana esu Evodia ésupa esu Síntique: Tachavaini eta námunasiracaca. Vahi tacunasi eta nacatichiracacahi, taicha naparapejiricacahi te mavahuana ema Viáquenu. ³ Nutuparacavivare, piti némunarúquenehi nucompañeruvihí: Pímicatacavacahini ena nani apinana esenana viparapenaveanahi, taicha éna ichapemurihi eta náimicatasiranuhi tayehe vicametarairuirahi. Náimicatacahi ema Clemente, énapa ena apamuriana ena nucompañeruanahi. Eta náijareana ena nani ticajuanaripa tayehe eta libro tiana eta víjareana víti vítareeruanayare.

⁴ Támutuhini sácheana iúrisamurereacavahini me Viáquenu. Nuvaraha nápechahe numetacahe: Iúrisamurereacavahini mayehe. ⁵ Námutuhini ena achaneana náimatihéhini éti eta táetaviuchirahi eta iúriya. Taicha ema Viáquenu, tiánehípa eta máitesiraya.

⁶ Vahi ecueñamava, te tatiarihinapapuca eta íchava. Ecasiñavasera eta eyaseasira ema Viya te eyujarasirana. Ehasulupayachavare tayehe jácani máijararuheanahi. ⁷ Jéhesare, ema Viya macaepahayare eta jácani ecatisamurevana eta juca máijarasiraheyarehi táurivayare eta esamureana étapa eta epanereruana, táichavene eta iúrujasirahi ema Jesucristo. Eta macurissamurechirahavihi ema Viya, tétavicavahi eta tacachuriasirahi eta nacurissamurechira nácani achaneana.

Epanerechayare eta táuriqueneana

⁸ Títecapa, nuparapenaveana, epanerechinavayare tayehe tamutu eta yátupíqueneana, tayehe tamutu eta típicauchacareana, tayehe tamutu eta itauravaya tacuija taviuchahe, tayehe tamutu eta ticatajicaheyare eta íchirahi eta táuriqueneana. Epanerechayareva tayehe tamutu eta ecurissamurechirahi ema Viya, tayehevare tamutu eta ticunachacareana. Ecasamure tamutu jácani táuriqueneana apaesa ticunachacareyare tamutu eta íchaqueneanaya.

⁹ Ímiyanava éhica eta nímiturapiana. Ítauchayare eta numetarapianahi esamarararuanahi. Ácutinu eta níchaqueneanahi ímahaqueneanahi. Ítauchaya

eta juca, tásiha ema Viya, tamutuina pa tjaracaheyare eta táurivaya eta epanereruana éti.

Tinaquiquicavanapa ena machamuriana ema Pablo, náimicatasiraya éma

¹⁰ Tétavicava eta núrismurevahi eta mayehe ema Viáquenu eta máijarasirahehi éma eta epanerechiranuhi tayehe eta íápechavahi ímiámareca eta nuyehe. Németeaca váhiquene émitiscanuhini. Étachucha eta emaitujisiravavanehi ímiámareca eta ímicatarapi eta nuyehe, tapaenumavahi. ¹¹ Vahi táichavenénahíni jácani nuvayuchiravainahini eta nucamunuirava. Núrismuréchucha, nítucasamihi nútí eta nitátiravahi tayehe jácani tatiarihiquenehi. ¹² Nítucahi eta nítaresirahi puiti eta nupaurévavahi. Nítucahivare te nucaimahaquenéchaha. Nítucahi eta nucamichirahi eta nátajivanahi, te nunicapuca, váhipuca; te nucaimahaquenehipuca, te tájinahivarepuca nímaahaquenénahini. ¹³ Nútí nuratahahi nucamicha tamutu, taicha ema Cristo éma tétumecanuhi. ¹⁴ Tájinasera táichavahini eta ímicatasiranuhi tayehe eta ímiámareruhi, evarairahi ímercanu eta émunasiranuhi, ítátiranuhi eta numaitujisiravahi nutanuchavahini.

¹⁵⁻¹⁶ Eti nuchamuriana, nucunachahe eta némechirahehi eta ímicatasiranuhi eta nupaisirahi eta nucametarairuirahi te apanana avasareana. Tayanapane epaenumavahinéni épanava éhica ema Viáquenu, camurianahi eta ímiámaresinanuhi eta enaquiruvana te náviharipa te Tesalónica. Énerichuvare, te núchucapa te provincia Macedonia, éti íápechavahi ímiámareca eta enaquiruvana. Jéhevare nájina apamurianainahini nacutihehíni eta ímicatasiranuhi. ¹⁷ Váhisera étainahini jácani nuvarairahini íápechavahini ímiámareca eta nuyehe eta enaquiruvana. Nuvarahahi nímincapaque-nehahe: Eta ímicataraivahi te juca apaquehe, puiti te anuma ánaqui táurujisiavahi eta enaquiruvana te mamirahu ema Viya. ¹⁸ Nuti ichapemuripa eta nujacpirahi eta enaquiruvana, eta mámaquenepahi ema Epafrodito. ¡Tétavicavahi eta ecajirivahi! Eta ímiámareruana, tacutirínehi eta inciensoinahini, eta táijiyevahi te mamirahu ema Viya. Tivapinava ema Viáquenu eta majacpirahi. Tacutihivare eta nanaquisira eta námavahuana te Templo. ¹⁹ Máimahahéine ema Viya. Éma, máitsivachayare tamutu eta enaquiruvanahi. Tjaracaheyare te jácani ecamunuiravana. Émarihi téchayarehi ema Viáquenu Jesucristo. Éma, tétavicavahi eta tamutuirá marataha. ²⁰ ¡Máichecuaraquireyare eta vicunachiraya ema Tata Vicaiyaquenehi, tjarahi eta vijirauchira éma! Amén.

Eta táichecuaraqui eta macartane ema Pablo

²¹ Eta iúrujasiracacahi mayehe ema Viáquenu Jesucristo, nuvaraha échajisinanuíni namutu ena machanerani ema Viya, vichamurianahi eta véhisirahi ema Viáquenu Jesucristo. Téchajicaheanahi éti ena nucompañeruana, ena nucachanequeneanahi ani te juca. ²² Téchajicaheanahivare namutu ena vichamuriana machanerana ema Viya, ena ticavasanahi ani te juca. Nararihivare ena tiávihanahi te mayehe palacio ema Emperador, énarichuvare vichamuriana. Téchajicaheanahivare éna apana.

²³ Nuyaseuchaeparaca emutu éti me Viáquenu Jesucristo táetavicavahini eta iúricacarevaya máicha.

Tamutupa eta néchajiriruvanahi eyehe.

Eta macartane ema Apóstole Pablo nayehe ena machamuriana ticavasanahi te avasare Colosas, ticajare COLOSENSES

1-2 Nuti Pablo, mayehenuhi apóstole ema Jesucristo, taicha manerejirunuichuhi ema Tata Vicaiyaquene, navarairahi nímitucaya eta náechajiriruva. Puiti nucajurehe eta juca carta eyehe eti nuchamuriana ecavasanahi tayehe eta avasare Colosas, taicha éti machaneraheripa ema Viya, tíurihi eta éhisirahi ema Jesucristo. Téchajicahe ema vichamuri Timoteo.

Nuvaraha macatajicahehini ichape ema Tata Vicaiyaquene, máijaracahhini eta táurivaina eta epanereruana.

Em a Pablo masamairica eta náehisirahi ema Jesús ena ticavasanahi te avasare Colosas

3-8 Puiti títecapauchahaviripa ema vémunaruquene Epafras, ema vichamurihi eta vicametarairuirahi. Éma, ichape eta macunachacarevahi. Tíurihi eta máitauchirahi tamutu eta macavanarairahi ema Cristo, máimitusirahehi yátupi eta máimiturapiana ema Viáquenu. Ema Epafras tímetacahavihi eta ícharacavahi, eta éhisiraipa ema Jesucristo, étapa eta émunasiracairahi emutu éti, émunasirahivare ena íumurivanahi te apana avasareana, machaneranahivare ema Viya, taicha ecuchapavainapa eta esiapiraya tayehe eta mávasa anuma. Viúrisamurevahi eta visamairisirahi eyehe, vihasulupayachaparacahi ema Viya Macaiyaquene ema Viáquenu Jesucristo. Tamutu sácheana te viyujarasirana, viyaseuchahehi me Viya. Ichape eta viúrisamurevahi eta táurivahi esama eta macametarairuirahi ema Epafras eta yátupiquene máechajiriruva ema Viya, etupiruvahi esupa eta ímitucasivahi, te esamainapa eta máemunasirahehi éti apanava ema Viya. Étarichuhi eta juca vimiturapihi nayehe ena apamuriana achaneana ticavasanahi te apanana avasareana. Natirihipahi ena tisuapanapahi eta vimiturapiana.

Em a Pablo mayaseuchavaca te mayujarasirana ena machamuriana

9 Eta tacahe, te visamairiricahepa, viyaseuchaheparaca me Viya tamutu te viyujarasirana. Viyaseuchahehi máijaracahéni eta ítusraina, ímatiraina yatupina eta mapanereruhi ema Viya. Máijaracahévaréni eta échema-raivainahini, eacutiarayare eta máechajiriruvana, máichavenénahini ema Espíritu Santo. 10 Víti viyaseacahi ema Viya tacuijahini etapiravaina te mamirahu taicha eti machanerahehi éma, ítauchahini tamutu eta ecaurisamurechirayare éma. Táurihini eta ecaemataneasirahi, támutihini ítaparaha eta táuriqueneana. Iápajucavapáipahivaréni eta ímatirayare éma. 11 Énerichuvare viyaseacahi ema Viya máijaracahéni eta ichapequene máitupajijiásirava apaesa ecamichahini tamutu eta ecatajivairana, ácayehhini paciencia muraca, iúrisamurereacavachuchaini. 12 Ehasulupayachahini ema Tata Vicaiyaquene eta máichuirahéni éti apanava, mavarairahi tíjaracahiviyare vimutu eta tajarahiquene vícuchianahi viti machaneranahi éma.

Em a Viya mavaraha ticuchucuhahaviyare

¹³ Ema Viya ticatiuchahaviripa mayehe ema Váinaraji ticaratacavinihi. Téquecaviripasera véhicayarehi ema Machicha Jesucristo máemunaruquenehi. Vaipa véhicaimahi eta nayeherepiana ena timapicumareana. Émapa téchahavihi puiti. Viávacuhaipa eta mavanairipiana. ¹⁴ Taicha ema Viáquenu Jesucristo tépenahi te crusu eta macaepahairaya eta vipecaturana, viúchucuhaipahi máicha.

Ema Jesucristo, ema tinacuchahi tamutu. Émarichuvare téchahi puiti.

¹⁵ Yátupi máimahasihhi ema Tata Vicaiyaquene. Émasera ema Jesucristo tétaavicavahi eta macavasirahi ema Maiya, émapa tímimaticahavihi eta máurivahi ema Maiya. Éma, ichapequenepanahi Aquenuca. Éma, téchahi tamutu. ¹⁶ Éma, mavanahihi me Maiya eta máepiyasirahi tamutu eta vímahaqueneanahi puiti: te anuma, étapa te juca apaquehe, étapa tamutu eta vimaratahaqueneanapa vímaha. Ticavacureanahivare máicha ena ángeleana. Nararihi ena majupahaqueneanahi te machacaya, énapa ena túparairucanahi, énapa ena apamuriana tijacapanahi eta vanairipi nayehe ena majupahanahi, énapa ena apamuriana ángeleana masuntaruranahi. Máepiyacahi tamutu, máítauchiriripa tamutu eta mapanereruanahi. ¹⁷ Ema Cristo manasiqueneripa acane te tamirahuichaha eta táepanirávayarehi tamutu. Puíticha éma téchahi tamutu. ¹⁸ Énerichuvare ema téchahavihi vimutu víti véhicanahi éma, taicha machichaquenehaviripa. Éma, vínapuaraquihi víti véhicanahi, taicha éma tinacuchahi eta juca arairuhi véhiruhi. Énerichuvare maratahahi ticaechepucava te máecari, éne tacaheyare eta macaechepusirahaviyare víti apanavare. Puíticha, éma téjacahi tayehe eta mávacurehi aquenucairahi. Ichapequeneya eta vipicauchira vimutu. ¹⁹ Taicha ema Viya máíjaracapa ema Machicha macutiyahehi eta masantuvahi, étapa eta máurivahi, étapa eta máítupajijiasiravahi. ²⁰ Eta mapanereruhi ema Viya eta mavanesisirahi ema Machicha te juca apaquehe, tépenayare te crusu taicha máetupiricayarehi tamutu eta juca apaquehe pecatupaire, étapa tamutu eta anuma. Macaepahayarehiva eta majarareruquenehi ema Satanás émapa ema Adán. Tichavayarehi tiuri tamutu.

Eta máepenirahi ema Jesucristo, mavacharecahi eta mámirahaviyare mayehe ema Maiya

²¹ Étiripa eti, cape juca iásinequenehi ecatianacainihi ema Viya. Vahi táurihini eta epanereruana, taicha eta íchirahi eta tamauriqueneanahi. Iávamirahuinihi epauchahini ema Viya. Epicainihi éma. Émasera mavarahahi macamitiasinaheyare eta ecatianasirainihi. ²² Eta tacahehi eta máimite-sirahi ema Jesucristo te juca apaquehe. Tépenahi te crusu táichavenehi eta macaepahairayare eta etapiravanainihi, masantochiraheyareva, apaesa tacujipa ecuavamirahu te jena sáchehare eta mámirahayare te mamirahu ema Viya. ²³ Tacahe, nuvaraha étumechavayarechucha, ímiyanava táuri eta éhisirahi. Vahi ecúyacujiéquenehava eta ecuchapirahi eta iúchucuiraya. Vahi ecuemepurureca eta esuapiraipahi eta máechajiriruva ema Viya. Tétavica-vahi tasuapacarevahi nayehe namutu ena achaneana te juca apaquehe, nájina tanerejiruina. Nútiripa nuti Pablo vanairucaquenuhi, étarichuhivare tacahehi eta nucametarairuirahi.

Ema Pablo matuparahaichuhi máechapajiricayare ena máumurivana

²⁴ Puiti núti, vahi nucatiequenehavahini eta nucatajivairahi táichavenehi eta nucatuparahairahi nucametarairu eyehe eti apavasanana. Ema Viáquenu Jesucristo, ichape eta macatajivairahi te crusu víchavenehi víti. Tatiarihichahasera eta macatajivairayarehi. Eta juca nucatajivairahi, tácutihini eta macatajivairahi éma. Nucatajivanumapaipahi íchavenehi eti machichanaveana, eti vichamurianahi. ²⁵ Taicha tituparacanuhi ema Viya eta néchapajiricaheyarehi emutu éti. Nuvanecasivahi mayehe eta nímitusi-raheyare tamutu eta máechajiriruvana.

²⁶ Nímimatchaheyare tamutu eta juca mapanereruanahi ema Viya, tayumurevainihi eta táitaresirahi acane, énaripa ena viáchucanaveanaini vahi támutihini náimatihini. Púitiserá ema Viya tímimatchahaviripa víti machaneranahi tamutu eta júcana. ²⁷ Tétavicavahi táramicarevahi maicha ema Viya eta máimimatchirahavihi eta juca tayumurevainihi ímitucasivahi puiti eti apavasananahi. Eta juca tayumurevainihi, émahí ema Jesucristo títecapauchaheripahi tiávahácaheripa. Puiti, ejaacaparépaihi me Viya. Ecunevainapa maicha ema Jesucristo eta esiapiraya te mávasa anuma. ²⁸ Eta tacahe, émaquenehi ema Cristo véchajisihahi víti te vicametarairu. Étaripa te viconsejareca, te vímiturecapahi nayehe namutu nácani achaneana vicaimunaqueneanapahi, émarichuhi véchejisihahi, apaesa nácaicutiaraini tamutu eta mapanereruanahi ema Viya, náchemarahivacahini táicha. Vivaraha ítamuturucaripahini te táitecapapa eta sache vímeresiraheyare te mamirahu ema Cristo. ²⁹ Eta tacahe, nupamicavahi núti eta nucaemataneasirahi ema Viáquenu. Émaquenehi tétumechanuhi eta nuratahairahi tamutu eta nímitusirahehi emutu eti nuchamurianahi.

2

Ema Pablo tímereuchava eta máemunasiravacahi ena machamuriana

¹ Núti ichapemurihi eta néñamiravahi eyehe eti numaimatiqueneanarichaha, énapa ena apamuriana vichamurianahivare ticavasanahi te Laodicea. ² Nuvarahahi ámutuhini étumechavahini te esamureana. Evapinavahini te iúrujisiravana taicha eta émunasiracacahi. Nuvaraha yátupina ímati ema Cristo, émahí arañumahi vanairucahi me Viya. Nuvarahavare ímatiequenehayare eta mapanereruana ema Viya apaesa ichapenahini eta ecasiñairavainahini eta mayehe. ³ Nájina mácuti ema Cristo, ema tjaracahavihi tamutu eta vítupajijiasiravanahi, véchemarahivacahi máicha. ⁴ Eta tacahe, nutuparacahecha: Vahi ecuisapava nahapapicahe ena tiyururahiana. ⁵ Tayanapane viyerehicacahi, vahi vímahacacahini, núrismurehisera ticutirinehi étainahini návihahini eta ara eyehe, néchirahi eta tamajinairahi íchiravainahini, yátupihí esuapa eta éhisirahi ema Cristo.

Vímiyanava tauri eta véhisirahi ema Jesucristo

⁶ Tásiha puiti, tauri eta iávahásiraina ema Viáquenu Jesucristo. Ímiyanava eta ítauchira eta íjarasiravahi éhica éma. ⁷ Etupihayare muraca mayehe ema Cristo, apaesa tápajucavapaipa eta ítupajijiasiravaina, ímatirainapáipaicha éma. Émuracachavayare eta éhisirahi éma, yátupina esuapa taicha tacahehi eta ímitucasivanahi. Vahi ecucainajiruva eta ehasulupayachiraya ema Viya.

⁸ Échapavayaresera, taicha nararihi ena navarahayare tiyurucaheana, navarairaya éhica eta napanereruana. Vahi ecuisapava námejecapavachahe éna. Machu náimitucahe eta nayeherepiana, náehiruhi ena náinapureanaini ticayeherepianahi tásihaquenechucha te napanereruana éna. Eta júcana, tájina tavehápica apaesainahini eta máimiturapiana ema Cristo. Vahi ecusuapa ena nani.

⁹ Ema Viáquenu Jesucristo, jéhevare éma, yátupiquenehi santo. Taicha ticuticacanahi ema Tata Vicaiyaquene eta nasantuvanahi éna. Ticuticacanahivare eta náurivahi, étapa eta náitupajijiasiravahi. ¹⁰ Éti apanavare, puiti eta iávahásiraripa ema Cristo, tisantuchahevacaripahi éma. Tájinapa ácamunuhini puiti eta iúchucuirapa. Taicha ema Viáquenu, téchavacahi ena ángeleana. Éma, túmepanahi nayehere ena éreanana. ¹¹ Ema Cristo, timarchaheripa eta iáchanevana puiti eta iávahásiraipa éma. Ticamitischaheripahi eta tajamurachaqueneanainihi eta iáquehe tavarahaqueneanainihi icha eta tamauriqueneanahi. Jéhevarequene, eta emarachi éti, ecachuricahi eta nacamarcairahi ena israelítana náechatisirahi eta náquehe. ¹²⁻¹³ Éti, cape juca iásinequenehi, vahi ímatihini ema Cristo. Vuíchaha ecamarrahini mayehere. Tímicutijiricavahi táepenaqueneánahini eta iáchanevana taicha eta epecaturanahi. Tímicutijiricavahi épenaqueneánahini, ecaecarasihini tacutihini eta macaecarasirahi ema Cristo te máecari. Púitiserá, eta ecasiñairaripa ema Jesucristo, ema Viya macaitaresinaheripa eta iáchanevana. Puiti ticutiripa échepurénaripahini éti, tacutiripahi eta máechepusirahi ema Cristo, maicha ema Maiya. Eta ecaicachasiraripa eta mayehere ema Cristo, táicutiarahi eta juca macaechepusiraripa eta iáchanevana. ¹⁴ Taicha ema Viya, eta máimairahi eta macatajivairahi ema Machicha máepenirahi te crusu, tiperdonachahaviripa eta vipecaturana. Énerichuvare macaepaharipa eta vitapiravana tímicuñachahaviyarehini. Puiti matapiravarehviripa eta máimairahavihi éma. ¹⁵ Eta máepenirahi ema Jesús tayehe eta crusu, máitahacavacaripa ema Váinaraji énapa ena machanerana éreanana. Tájinarinehi natumevainahini eta mayehere. Puiti táquijicavacahi éna, te vipiaraca te máijare ema Jesús. Vaipa tipauchahavi anaimahi.

Ema Pablo mavanecavaca vahi nacusuapa ena tiyururahiana

¹⁶ Puiti nutuparacahe: Vahi ecusuapavaca ena navarahahi éhica eta nayeherepiana, apanapanenejiqueneana, nácani vahi tísapaheanaimahi enica eta apamuriana tinicacareana. Váhivare ecusuapavaca te ticamesajiricaheanahipuca epicaucha eta napiestarana. Étaripa eta ecaematanerana te aracheruana caje, navarahaya epicaucha. Étaripa eta sache sávarumuhuana, navarahayareva epicaucha. ¹⁷ Tamutu eta júcana, vaipa tásuapacare taicha náchucarapianachucha éna. Étasera eta juca máechajiririvanahi ema Cristo, jéhevare eta yátupiqueneanahi. Tisuapacareanahi. ¹⁸ Eta tacahe, vahi ecusuapa ena nácani navaraha típcararecaheana, te náichahepuca: “Vahi tiuri eta juca éhiruhi”. Váhivare ecusuapavaca, te ticamesajiricaheanahipuca éstacava, étapa eta ejirauchirainaji ecasiñairainaji ena ángeleana. Éna námijachahi tacarichu eta ejacapacareya me Viya taicha eta juca. Ena nani, ticasíñavavaicanahi taicha tímijachavanaripahi máechajicavacahiji ema Viya. Vaipa navaraha nacainajiru eta navayuacasivanahi. Tamutu eta juca tímereuchavacahi éna, máehicarahanahi ema Cristo. ¹⁹ Vítiserá

vimutu viti apanapanenejiquenehavianahi véhicanahi ema Jesucristo. Eta viúrujasiraipahi éma, vaipa apaimamajihavinahini máicha. Tímicutijirica-vaipahi mácani achane máitucahi eta macajurusirahi ena machichanaveana. Náurujiacahi namutu nácani machinanaveana, machinenana, mámarinavea-
napuca. Émanarichuhisera ema téchahi. Ene vicahehi viti véhicanahi ema Cristo. Macarichu ema téchahavihi. Vímicatajiricacahi vicatiujiricacahivare vimutu maicha ema Viya.

²⁰⁻²² Puiti, eta éhisiraipa ema Cristo tíminajicaheripa eta éhisirainihi eta nayeherepiana ena achaneana tamauriqueneana. Tacahe, vaipa ecusuapa ena ticamesajiricaheanahi te navanecahepuca: “Éhicahehi eta viyeherepiana tayehe eta vinisiraya, apaesa eJapanucare eta me Viya”. Machu navayuacahe ena nani, taicha tamutu eta juca nayeherepianahi, tájina vahi étaparacaina tayehe eta viyapiraina te anuma. Eta juca nayeherepianahi, tásihaqueneanachucha te nachuti ena náchucanaveanaini. ²³ Eta juca nayeherepiana cútirinehi yátupiquenénahini tásihaquenénahini eta me Viya. Tásihasera vahi táimanaca. Ichape tayerehi eta máechajiriruvana. Ena nani, tímijachavanahi nacurisamurechahi ema Viya. Tépiyacavanaripahi mánsuanahi eta náichirahi eta muraca penitencia. Téstacavanapa nájararecaripa eta naeche tayehe eta tacatiquene. Tamapurujihisera eta náichirahi, návirachuhi náichahi eta tajamuraravahi eta náqueheana.

3

Tihapasamurerecahaviyare eta vivarairayare véhica eta máurivahi ema Cristo

¹⁻² Puítisera arairupa eta ítaresira maicha ema Cristo. Étainapa tihapasamurerecaheyare eta máurivahi éma étapa eta ítecapauchira éma tayehe eta anuma máejasihahi te mavaure ema Maiya. Vaipa étaimahi tihapasamurerecaheyare eta eyeherepianainihi tamauriqueneanaini. ³ Taicha íjararuvaipa eta ínjisirayare eta júcana. Puiti ticaitarecaheripa éma táichavenehi eta iávahásiraipa ema Jesucristo. Iúricahi puiti. Vuíchahasera ímahahini tamutu eta táetaviuchiraya eta iúricacarevaya. ⁴ Téhesera te machava ema Viáquenu Jesucristo, máitsivachainapa eta iáqueheanayare, tajarahiqueneanayare. Tásiha, ecachanenapaipa éma. Tétavicavaya eta viúricacarevaya vimutu máicha.

Vínajicayare eta viyeherepini eta viásinequene

⁵ Tásiha puiti, ínajicainapa eta eyeherepianaini tamauriqueneanahi. Nacuijapa nacuveha esu apana esena. Vaipa ecupanerecha eta panerucana tamauriqueneana. Vaipa ecujamuracha icha eta tamauriqueneanahi. Vaipa tihapapiricahemahi eta ecaimahaquénéraina, taicha ena titanucanahi eta juca, nacutihi nácani ticasañarajiana. ⁶ Ena masupajirirahana, náichahi tamutu eta juca tamauriqueneana. Étapa tímicuñacayarehi éna, taicha táimiyusemacaichucha ema Viya. ⁷ Éti apanavare étainchuhivare iávacuhainihi cape juca iásinequenehi. ⁸ Puítisera ínajica tamutu eta júcana: esemarajivana, ecatianaraviana, evainarajivana, iúmeharaviana, étapa eta táíñemahiqueneana eta échajiriruvana. ⁹ Vahi ecuépiyaequenehacáca. Ímereuchava yátupina eta ínjisirahi tamutu eta eyeherepianaini cape juca ítaresirainihi. ¹⁰ Puíticha, amairiharipahi arairupa eta juca ítaresirahi, machichaheripa ema Viya. Tajurucapaini eta ecutirayare éma

eta masantuvahi étapa eta máurivahi éma. ¹¹ Tayanapane apavasanana-jihavihi viti véhicanahi ema Viáquenu, émasera tihetamurichahaviripa viti israelítana, étipa eti apavasanana, énapa ena máicachasianana. Te mamirahu ema Cristo, vaipa apavasananjihavinahini, étanarinepa eta vímahi maicha éma. Tayanapane tájina emarcainahini te iáqueheana. Váhisera ticachuricaheanaimahi ena ticamarcanahi. Tayanapanevare ecaquenuhipuca. Váhivaresera vicachuriacahemahi viti líbreanahi. Ema Cristo tiávahácahavihi vimutu.

Vicaravahuinapa tíuriyare eta vítaresira

¹² Ema Viya tétavicavahi eta máemunasirahehi. Eta tacahe, tinerejicahehi eti machaneranayarehi éma, ecutipaipe éma, eta masantuvahi. Eta tacahe, puiti étijiváinapa ecaravahuyare eta táurivayare eta ítaresirayare. Étaviuchayare eta eJapanuraivaya, émunarahiyareva. Ímerecaya eta emansuvayare. Ecamicha tamutu. ¹³ Te tatiarihinapuca eta náejecapiravaina ena echamuriana eta eyehe, vahi ecucaticha, ácayehavare paciencia. Eperdonachacayare, ecutiyaire ema Cristo eta maperdonachirahehi éti. ¹⁴ Tamutu eta juca numetaruheanahi, ítauchayare. Énerichuvare tiápajucavayare eta émunarai-vayare. Taicha te vémunajírícahahi, tétavicavayarehi eta víúricarevaya eta víúrujíásiracacahi. ¹⁵ Vahi ecuempurureca eta iúrivahi maicha ema Cristo. Ísapavavare mayehe ema Cristo macanaracahe tamutu eta epanereruana. Taicha tacahehi eta máichuirahahi, mavarahahi étanayaréichuhi eta epanereruana eta iúrujíasiracacahi. Ehasulupayachahivaréni tamutu sácheana.

¹⁶ Étaviuchahini eta iúnasiráina te esamureana eta máechajiriruvana ema Cristo. Étumechacacahini eta ímitusiracacaya eta échemaráivayare. Evapinavahini te esamureana eta ejiraira te iúrujíasiravana. Ejirayare eta majiriahuana ema Viya, eta ehasulupayachirayarehi éma. ¹⁷ Tamutu jácani ecaematanerana, échajirisiravana, ímereuchava eta machaneraheirahi ema Viáquenu Jesucristo, iámirapaipa eta máijare. Te tamutu eta jácani íchararacavana, ehasulupayachayarehi ema Tata Vicaiyaquene.

Vímerecayare eta víúriiva nayehe ena vichamuriana

¹⁸ Étiripa eti esenana ecaimaqueneanaripahi, epicauchayarehi ena ímanaveana. Esuapajirahiyare eta nayehe, taicha etuparahahi eta éhisirahi ema Viáquenu. ¹⁹ Éti apanavare eti náimanaveanahi, émunacayare ena eyenana. Vahi ecuímipananajica éna. ²⁰ Éti apanava eti amaperuana, esuapayare ena ticachichaheana, esamararasinavaya te jácani náechajisiraheana. Te ítaucha eta juca, ecurisamurechayare ema Viya. ²¹ Énerichuva eti náiyana, vahi ecuímiyusémaraca ena echichanaveana apaesa vahi nacuiapuñacava eta eyehe.

²² Étiripa eti ecaquenurecanahi, esuapajirahiyare nayehe ena iáquenuanahi. Ítauchayare eta navanairipianahi. Tátipiruva te esamureana eta ecaematanerana. Vahi tácarichuimahi ítaurahiyare te natirihite te echaca ena iáquenuanahi. Te nájinahipuca, tacutiyarerichu eta ecaematanerayare. Taicha ema Viya tímararacahehi. Éma epicauchayarehi. ²³ Evapinavayare icha eta evanecasivanahi nayehe ena iáquenuana, táimicutijiricavahi émainahini ecaemataneaca ema Viáquenu. ²⁴ Taicha eti mamusurahehivare ema Cristo, ema tiápajucavahi iáquenupanahi. Écharichuhi éti eta tatiaríhirahi

eta ícuchihi íjaracasiyarehi eta mayehe. ²⁵ Énasera ena téjecipavanapuca, máímararacahi ema Viya eta náejecipiravanahi. Étáinapa tímicuñacayarehi. Nájina mamunanequeneanaimahi.

4

¹ Éti apanavare eti náquenuanahi ena músuana, tiúriyareva eta ecavanairipiraya, vahi ecuimipananajicavaca. Ítauchayare íjaraca eta nacamunuque-
neanahi. Échavayare éti apanavare eta máímararasirahehi ema Viya, émahí
láquenuquenehi.

Eta téqueneha matuparasirahavihi ema Pablo viti véhicanahi ema Viáquenu

² Puiti emutu éti, étumechavachucha eta eyujarasirahi eta me Viya. Vahi ecuyacujihini. Énerichuvare ehasulupayachaparacayare tamutu me Viya. ³ Énerichuvare ímicatacahavi eyujarauchahavi, apaesa vítujica-
vapaini víúchucuha, vímiyanavapaini vímimatichahini ena achaneana eta
juca tayumururevainihi mayehe ema Cristo. Étavenehi puiti présunuhi táicha. ⁴ Nécatiachecha ímicatacanu eyujarauchanu apaesa nítujicava nucame-
tarairu, taicha nutuparahaichuhi me Viya.

⁵⁻⁶ Táuri eta ítaesiraina nayehe ena máehicarahanarichaha ema Jesús. Tátupiruva tauri eta échajirisiravana, tapicauchacarehi. Táurivare eta
ejicapiraina te natiarihinapuca nácani tiyaserecaheanayare. Ecamapura-
vachaha puiti juca sácheana eta ímitusiravacahi.

Eta táichecuaraqui eta máechajiriruva ema Pablo

⁷ Máimahaherinesera ena vémunaruquenehi vichamuri Tíquico. Éma, títametacaheyare tamutu eta níchararacavahi núti taicha éma nucachanehi
eta te juca návihahi. Tétavicavahi eta máimicatasiranuhi eta viceamata-
neasirahi me Viáquenu. ⁸ Eta tacahe, névatacachi máiteca eta ara eyehe. Éma timetacaheyare eta víchararacavahi. Énerichuvare tétumechaheyare éti
apanava. ⁹ Énerichuhivare névatacachi ema Onésimo némunaruquenehivare. Éma, tiásihahi eta ara eyehe. Puiti émarichuhi vichamurihi eta te juca. Tétavi-
cavahi eta máitauravahi eta macaemataneasirahi ema Viáquenu. Ena nani
apinana, éna títametacaheanayare eta víchararacavahi víti te juca viávihahi.

¹⁰ Téchajicahe ema Aristarco, ema nucutiquenehi eta nucaeratairahi. Téchajicahe-
vare ema Marcos, ema macheji ema Bernabé. Éti écharipa eta máitesirayare eta ara eyehe ema Marcos. Te máitecapauchahépa, tiúriyare eta
ejacapirayare éma. ¹¹ Énerichuvare téchajicahe ema Jesús Justo. Nacarichuhi
ena nani mapanana nujaneananahi israelítana tímicatacanuanahi. Nacachu-
ricahi ena apamuriana nujaneanana vichamurianahi. Ichape eta náimicata-
siranuhi eta vicametarairuirahi eta máechajiriruvana ema Viya. Ichape eta
nacurisamurechiranuhi éna.

¹² Téchajicahevare ema Epafras, ema eyehe pastor. Ema maca, yátupi-
quenehi mavanara ema Jesucristo. Tétavicavahi eta máecharairisirahéhi
éti te mayujarasirana, mavarairahi ímiyanavahini étumechava yátupinahini
ítauchahini eta mavarahaqueneana ema Viya. ¹³ Ichapemurihi eta nímarara-
sirahi núti ema Epafras eta máecharairisiráhehi éti, énapa ena ticavasanahi
te avasareana Laodicea étapa Hierápolis. ¹⁴ Énerichuhivare téchajicahe ema
médico Lucas, ema vémunaruquenehivare. Téchajicahevare ema Demas.

¹⁵⁻¹⁶ Tacahe, te támutupa eta échajicuirayare eta juca nucartane, ímiamarecaya nayehe ena apamuriana víchamurianahi ticavasanahi te avasare Laodicea. Nuvarahavare échajisinanuini éna. Échajisinanuvare ema Nínfas, énapa namutu ena tiúrujicavarahianahi te mapena. Nímiamarécahivareséra eta nucartane nayeheyare namutu éna. Te táitecapauchahe, échajicuhayarevare éti apanava. ¹⁷ Piti apanavare piti Arquipo, nutuparacaviyare: Pítauchayare tamutu eta juca pématanerepianahi, taicha eta pituparahahi me Viáquenu.

¹⁸ Nuti Pablo nútiquenepa nájucha eta juca táichecuaraquihi eta nucartane tayehe eta némechajirisirahehi. Nutuparacahe vahi ecuemitisicanu te eyujarasirana. Eyaseasinanu eta núchucuirávanéna.

Nuyaseuchaheparaca me Viáquenu Jesucristo, táetaviuchahini eta iúricacarevaya máicha.

Tamutupa eta juca néchajiriruvahi e yehe.

Eta macartane ema Apóstole Pablo nayehe ena machamuriana ticavasanahi te avasare Tesalónica, ticajare

1 TESALONISENSES

¹ Nuti Pablo, némechajiricahe eti nuchamuriana ecavasanahi te Tesalónica. Téchajicahe ema Silas*, émapa ema Timoteo. Vímiámarecahi eta juca vicartane taicha eta íavahásiraipa ema Tata Vicaiyaquene, táichavene eta éhisiraipa ema Viáquenu Jesucristo. Nuvaraha macatajicahehíni ema Tata Vicaiyaquene, émapa ema Viáquenu Jesucristo; náijaracahehíni eta táurivaina eta epane-rerua.

Éma Pablo tíúrisamure eta máechirahi náimyaniravahi náehisirahi éma Cristo

² Viti vihasulupayachaparaca ema Viya eyehe emutu eti. Tamutu sácheana, te viyujarasirana, viyaseuchahe me Viya. ³ Taicha tamutu sácheana véchara-ricaheparaca eta ímeresirahi eta esuapirahi éhisirahi ema Viáquenu Jesu-cristo, étape eta epamisiravahi ecaemataneacahi yátupi táichavene eta émunasirahi éma, étape eta ecamichirahi tamutu táichavene eta ecuchapiravahi eta machaviraya. Éma Tata Vicaiyaquene máímaha tamutu eta ícharacavana. ⁴ Nuparapenaveana, éti, máemunaruanaripa ema Viya. Véchahi eta manere-jisirahehi éma.

⁵ Taicha te vímitucahepa eta máechajiriruva ema Viya tayehe eta viúchucuiraya, éti etupiruvahi ejacapa eta vimetarairuana taicha ímatíhi yátupiquenérahi mayehe ema Viya. Éma Espíritu Santo tinacasamurechahehi eta táurivahi esama eta vímitusirahehi. Ímatihavíhi eta mavanesirahavíhi ema Viya. Ímahahívere eta víúrivahi eyehe.

⁶ Jéhesare puiti, étijivapa eta épaniravahi éhicahavi eta víúrivahi víti, vicuti-yare eta máuriva ema Viáquenu. Ecátajivanúmahi ichape taicha eta ejaca-pirahi eta vimetarapiana. Íúrisamurehísera maicha ema Espíritu Santo. ⁷ Tacahe, ena apamuriana vichamuriana ticavasanahi te tinapaíca eta Macedonia étape te Acaya, eta náimairahi eta yátupirahi eta esuapirahi, étarichuhi náehicahi éna. ⁸ Éti ímisamahi eta máechajiriruva ema Viya namutu ena achaneana ticavasanahi te Macedonia étape te Acaya. Téchacarehivare te tamutu avasareana te jácani vítecapihapahi eta juca yátupirahi esuapa ema Viya. Vaipa tácomesahíni vimetataracavacahíni éna eta esuapajiravahi éti. ⁹ Timetacahavianapahívere eta etupiruvairahi ejacapa eta vimetarapiana, étape eta ínajísiraipa eta esiñarajanaini, équesiravarípa eta ecajuherapa yátupi ema Viya. Puíticha tépanavarípa eta ecaemataneasirahi éma. Éma, yátupiquenehi Viya. Yátupiquenehivare eta masamaraíva. ¹⁰ Énerichuvare tímatacaviana eta ecuchapirahi eta machaviraya ema Machicha ema Viya másihairaya te anuma, ema maca Jesús émarichu ema macaechepucasi-quehehi te máecari maicha ema Maiya. Émara ticatiuchahavívere tayehe eta ecuñaraqú náicuchíhi ena masuapajirairahana.

* **1:1** Éma Silas, eta máijarequene Silvano te náechajiriruva ena romanoana.

2

Eta máematanerepihi ema Pablo nayehe ena ticavasanahi te Tesalónica

¹⁻² Écharichuhi eti nuparapenaveana, tamutu eta náichirahavihi ena achaneana, tímicuñacahavianahi ánaqui te avasare Filipos. Váhisera vácatsimavahini te vítecapachahepa ani, vímijanavaríchucha vicametarairu taicha tétumechahávirichucha ema Viya eta vímitusirahehi eta máechajiriruva, camurianahineni ena ticatianacahavianapahi. Váhisera támapurujihíni eta véjirairahehi. Éti etupiruvahi ejacapa eta vimetarairuanahi. ³ Taicha vahi véjicapavahini eta vímitusirahehi. Váhivare étainahini vipaneréchapahini eta tájiparacana tamauriqueneana, váhivare vivayuararquina eta véchajisirapahi. ⁴ Víti manerejiruhavihi ema Viya taicha máechahi eta vítauchirayarehi eta vituparacasivayarehi mayehe. Eta tacahe, tituparacahavihi muraca víámayare eta máechajiriruva nayehe ena achaneana eta náuchucuiraina. Éta paichuhi eta juca véchajiriruvanapahi. Vahi étaina vivaraha táememunacahávihihi nayehe ena achaneana. Vítauchahi eta mavarahaqueneana ema Viya eta vicurísamurechihahi éma, taicha éma, máimararacahi eta visamureana. ⁵ Écharichuhi éti eta vicayemaqueneanapahi, vahi vémetserajiricavapahini eyehe. Váhivare étaina vétseraruinapahini vivereacahehíni eta eplata. Vitupiruvapahi eta vicayemaquenehi te mamirahu ema Viya. ⁶ Vahi vápanerechahini náetserajicahavihihi ena achaneana, étiripa, viratahahineni vímereco eta vituparahaquenehi mayehe ema Viáquenu Jesucristo. Váhisera vávarahahíni vímerecava vácutihini mácani achane ticamusura. ⁷ Véchapajiricahehiséra tacutihíni eta suéchapajirisira suémunasira súcani esena ena suchichanaveana. ⁸ Ichape eta vémunasirahehi. Vímitucahehi eta máechajiriruva ema Viya eta iúchucuiraya. Víjaracavahi ichape te visamureana, vivarairahi esupa éti apanava, taicha vémunacahehi. ⁹ Nuparapenaveana, te vinasiqueneripa eta eyehe, eta vicametarairuirahi eta máechajiriruva ema Viya, ímararacahavirichuhi éti eta vicaematanerahi muraca eta vítatíjirisiravahi. Tamutuhi sácheana, yátiana vicaematanehi, taicha vahi vávarahahíni vétsepanáracahéhihi eta vinicaquenerepi.

¹⁰ Éti enecapaequenehahi tamutu eta víchararacavahi. Tímararacahávi-hivare ema Viya. Vitupiruvahi yátupi eta víurivahi eta eyehe eti vichamurianahi. Tájina naviyahini nayunaca ena apamuriana achaneana. ¹¹ Énerichuvare échahi eta vétumechirahehi, émanapachuhi viconsejacha vicutihíni mácani achane tiuri eta maconsejachira ema machicha. ¹² Vécatiacahehi ichape eta iúrivaina éti, ímerecoya eta macáchichairaherípa ema Viya, taicha íchuarecasivaipa mayehe eta ecachaneraya éma tayehe eta mávasa te anuma, te távihahi eta majaraiva.

¹³ Eta tacahe, vihasulupayachaparaca ema Viya eta táurivahi esama eta máechajiriruva vimetarapianahi. Éti, etupiruvahi ejacapa eta vimetasi-rahehi taicha eta esamirahi yátupiquenehi, tásihaquenehi ema Viya. Ímativanehi vahi vipanereruinachuchaini víti, émainapucaini mácani apana achane. Eta juca eta tíurichahéhi eti esuapanahi. ¹⁴ Énerichuvare tíuríni eta ecamichirahi eta ecatajivairahi nacatianasirahehi ena ejaneana, ecutihíni ena apamuriana vichamuriana ticavasanahi te Judea. Nuparapenaveana, ene nacahehi eta nacatajivairahi naicha ena najaneananarichu israelítana, táichavene eta náehisirahi ema Viáquenu Jesucristo. ¹⁵ Ena nani nujaneanana

nacapacahi ema Viáquenu Jesucristo nacutihi ena náchucanaveánaini eta nacapasiravacahi apaicape ena profetanaini. Tipanajiricahavianavare víti. Ena nani náimiyusemacahi ema Viya. Váhivare návaraha nasamahini ena apamuriana achaneana eta máechajiriruva ema Viya. ¹⁶ Taicha te vivarahainipa vímitucavaca ena apavasanana apaesa náuchucuhahini éna apanava, nacatichavare ena nujanenana eta vímitucavaca éna. Tíchejimiráuchahavianapa. Eta tivichahi, tivayuchavapaichucha eta natapiravana. Ema Viya vaipa macamichahini eta náejecapirávana. Puítisera táitecapáuchainapa eta náicuñaya máicha.

Éma Pablo mavaraha tíápechava máejiravaca ena machamuriana

¹⁷ Nuparapenaveana, tayanapane viyerehichacahi puiti juca cájeana, vahi vímahacacahini, tanasihisera vícaimairuhehi te víúquihana. Vívarahaine víjahúchavahini vítecapauchahe vímahahehíni. ¹⁸ Nútiripa nuti Pablo, ichapemurihineni nuvaraha níteca eta ara eyehe, énapa ena apinana nucompañeroana. Émasera ema Satanás tíchejimiráurucahávichuchapúca jácani. ¹⁹⁻²⁰ Véñamavahi víti eta eyehe taicha vivarahahi tánasihíni eta iúri va eta machimápirahéya eta machaviraya ema Viáquenu Jesucristo. Tásiha, víti vícuchapavainapa eta víjacapirayare eta vícuchihi mayehe éma. Víúrisamurénapa víti te jena sache, íchavenehi éti.

3

¹⁻² Eta tayerevaipahi eta vimaimanasirahéhi, téta vicavahi eta véñamiravahi eta eyehe. Vaipa víúrisamuréhini. Vivarahaipaicha vecha tájahapuca eta ícharacavahi. Tásiha, vípanerechapa vévatata ema víchamuri Timoteo, máiteca máimahapanáhe. Vinasipa víti vicarichu te Atena. Taicha ema maca Timoteo, émarichuhi mavanara ema Viya, émarichuvare vícutiquenehi eta vícaematanerahi tayehe eta máechajiriruva ema Viáquenu Jesucristo. Nuvanecahi tímicatapanáhe yare témuracacháhe yare eta esuapajiravaina, ³ apaesa nacuija nacuchavacuejehava tayehe eta ecatajivairana naicha ena tícatianarahiana. Écharichuhi éti eta vícatajivairaya táichavene eta véhisirahi ema Jesucristo. ⁴ Váhisera táamicare eta juca, taicha vímetacahévanehi te vinasiquenerichaha eta eyehe, eta vícatajivairayarehi. Jéhesaréinehi títauchavahi puitiripa, ímaharipahi éti. ⁵ Eta tacahe, téta vicavahi eta néñamiravahi núti eta eyehe. Vaipa núrisamuréhini íchavenehi éti. Tacahe, nuvanecapa ema Timoteo máimahapanáhe te enasirichuhípuca eta éhisirahi ema Jesús. Taicha nímicauyayahehi máquipaicahehíni ema Satanás, támapurujihini eta vícaemataneasirápa ema Viya.

⁶ Puítisera eta machaviraipa ema Timoteo, másihairahi eta ara eyehe, tímetacahavipa tájinairahi íchiravainahini eta éhisirahi ema Viáquenu Jesucristo, étapa eta émunasiracacahi. Tímetacahavivare eta écharairisrahávihíni émunasirahavíhi víti, evarairahi íjahúchavahini ímahahaví. Vícuticacahi eta vívarairahi vímahahe víti. ⁷⁻⁸ Eta tacahe, nuparapenaveana, vécharaháinehi eta vísamairirisirahéhi eta táurivahi eta éhisirahi ema Viáquenu. Tacamitiacarine eta véñamiravahi. Étumechahavirinehi eta vícatajivairana. Tíchavarinehi eta víúrisamuréva. ⁹ ¡Chape eta víhasulupayachirahi ema Viya táichavenehi eta iúrivahi! ¡Tájinarine tácutihini eta víúrisamurévahi mayehe ema Viya, íchavenehi éti! ¹⁰ Tamutu sácheana, yátiana, víyujaracahi mayehe

ema Viya, viyaseacahi vítujisirávainahíni víápechava vímahahe. Vímituca-hehíni eta apamuriana títucaareana tayehe eta juca véhisirahi ema Jesús. Támutuhíni ítuca.

¹¹ Eta tacache, viyaseacahi ema Tata Vicaiyaquene émapa ema Viáquenu Jesucristo náijaracahavíhíni eta vítujisiraváina víteca véjirapanáhe. ¹² Énerichuvare macajurucahíni ichape ema Viya eta émunaraívaina nayehe ena echamuriana, énapa ena apamuriana achaneana, tácutihíni eta vémunasirahehí víti. ¹³ Máijaracahéni táurivaina eta esamureana tacuíja etápíravaina, máepachínachahíni eta íáchanevana apaesa ecurisamurecha ema Tata Vicaiyaquene te jena sácheyare machavíraya ema Viáquenu Jesucristo, másihairaya te anuma, mámirayarepahi ena apamuriana manerejíruanahi.

4

Mavaraha ema Viya táuri eta vítaresiraina

¹ Tiuri puiti, nuparapenaveana, vituparacahecha muraca te máijare ema Viáquenu Jesucristo. Táuri eta ítaresiraina puiti juca epaisirayare. Te tauri eta ítaresiraina, ecurisamuréchayare ema Viya. Puiti íápajupanávinápáipa eta íúrivaya. ² Ítucarípahi eta juca ímitucasivanahi víyehe. Étarichuhi vivanecasivanahi mayehe ema Viáquenu Jesucristo.

³ Taicha eta juca mavarahaquenehí ema Viya, tíápajucavayare eta íávahásirahí éma. Vaípa ecuquícha eta pecatuana. Nacuíjapa nacuveha súcáni apana esena. Ésurípa esu esena, vahí sucuveha ema apana achane. Énarípa ena echichanaveana, tacuíja eta natuhúsivaina. ⁴ Nacuchapa eta náítauchíraváina yátupína te mamírahu ema Viya. Emutu éti, yátupína eta émunasiraina ena eyenanaveana. Tauri eta ítaresiraina te epenana. ⁵ Vahí ecucutípa ena ajairana esenamareana. (Éna náichahi eta juca taicha eta namaimatírahí ema Viya.) ⁶ Nacuíja nacuveha esu mayena ema mácani echamurí. Taicha ema Viya, yátupí eta máicuñasirayare nácáni ena tíchanahi eta juca. Étarichuhi eta vímiturapíanahi eyehe cape juca te vítecanípa eta ara eyehe. ⁷ Taicha víti máichuhaqueneánarípa ema Viya, mavaraha tíúrinayare eta vítaresiraya, vaípa víchaimahí eta juca támaraíqueneana. ⁸ Tacache, ema mácani tépuruhí eta juca vímiturapíanahi, máepuruhívaré ema Viya; taicha mavanairípíanahi eta juca, vímetacasívahí víti mayehe ema Espírítu Santo, eta mávahásiravahí.

⁹ Puiti numetacache nútí: Tájínapa vaípa néñamava eta eyehe eta émunasiracacahí, taicha ema Viya tíjaracaherípa eta émunasiracacahí. ¹⁰ Vaípa néñamavahíni taicha nusamairírícaheípa eta émunaraívahí nayehe ena echamuriana títecapaucháheanahi tíásíhanahi tayehe eta táunavanahi eta íávása Macedonía. Nuparapenaveana, puiti vituparacahecha íápajucavayare éti eta émunaraívaya. ¹¹ Énerichuva víápechava vituparacahe tauri eta ítaresiraina. Échapajíríca eta émataneana. Ecaemataneacava yátupína, eviyíhayare eta ecamunuqueneana tásihaqueneánayare te evahuana, ¹² apaesa tacuíja ecucamunu te epenana. Te ítaucha eta juca, típicachuáheanayare ena apamuriana achaneana.

Vahí téñamavacareana ena víchamuríanainí náepenaqueneana taicha tíápechavanayare títarecanayare

¹³ Nuparapenaveana, énerichuvare vívaraha vímetacache eta náícharacavayare ena víchamuriana náepenaqueneanarípa. Vahí ecucatisamureva

nayehe. Ena apamuriana achaneana ticatisamurevanapa te náecarapana ena náepenaqueneana, taicha vahi nácasíñavahini me Viya, nacunevahini eta nápechiravaya téchepucana te náecari. Vahi ecucahe éti. ¹⁴Viti visuapahi eta máechepusirahi ema Jesús te táequenepa eta máepenirahi. Tásiha, visuapahivare eta macaechepusirahaviya ema Viya te vépenapa, vicáchanénapa ema Jesús viti véhicanahi éma. ¹⁵Eta tacahe, vimetacahe eta juca vímitucasíñavahini mayehe ema Viya. Te machavapa ema Viáquenu Jesús, te vuíchahapuca vicuepenahi víti, vahi vicainapucávaimahi nayehe ena náepenaqueneana. ¹⁶Taicha émarichu ema Viáquenu tíucupaicaya tichavayare, tíasihaya te anuma. Tipiaracaya muraca tíchuarecaya. Ema Arcángele énerichuvare tipiaracayareva. Ticaemayareva eta machuja ema Viya. Tacahe, téchepucanainapa tínapucanaya ena náepenaqueneana ena tisuapajirahianahi mayehe ema Cristo. ¹⁷Tacahe, viti vítareruanaichaha viyanainapa. Vimutu vicáchanénapa ena náepenaqueneánaini. Viácapajicáinapa ema Viáquenu te anuquehe te távihahi eta úcaji. Tásiha, máichecuarquireyare eta vicachaneraya ema Viáquenu. ¹⁸Eta tacahe, emetajiricayare nayehe ena echamuriana tamutu eta juca vímiturapianahi, apaesa nacurisamurechavaya éna apavana.

5

Tiáramicareyarechucha eta machaviraya ema Viáquenu

¹⁻²Nuparapenaveana, vahi ecuemitiscava. Ecunevaicha yátupina, taicha téchacaréipa eta táramicarevaya eta máitesirayare ema Viáquenu. Tacutiyare mácani tíámereca te yati, nájina tinecapaina. Ene tacaheyare eta máitesirayare ema Viáquenu. Váhisera vécha tájamuhuyarepuca. ³Énaripa ena achaneana vuíchaha náemeteacaimahi eta tánehiraripa eta máitecapiraya. “Viúririchucha puiti. Tájina víchiravaimahi” nacaheyare éna. Vahi tinecapauchavanaimahi eta táitecapauchiraya eta náicuñayare tacutiyare esu súcani esena ticajari, tíjahúchavapa ticatí eta sujuhe eta suínasiraya. Ene nacaheyare éna. Tájina najunaiyaimahi. ⁴Étiserá, nuparapenaveana, écharipa eta juca. Vaipa íaramecaimahi te jena sache máitecapiraya ema Viáquenu, taicha tamutu sácheana ecuchapahi eta máitecapiraya. ⁵Taicha víti víávihahi te majaraivahi ema Viya, víti vipaicahi te sáchemuhu. Vahi táíñehavina eta yati, taicha vínjajicaipa eta tamapicuquene. ⁶Eta tacahe, tavaraha vicuneuchava tamutu sácheana, vijaneasiravainahini muraca. Váhini vicucutihini ena tivayuchavanahi tímaccarácavana, tájina náechaquenena éna. Vítiserá vijaneacavaya tamutu sácheana, yátiana. Tájina víchiraváimahi. ⁷Ena achaneana, tímaccarácavanahi te yátiana, ena apamuriana ticávahaháracavánahi te yátiana. Vahi najaneacavahini éna. ⁸Vítiserá tamutu sácheana vicunevayare. Tiúriyarehi eta vipaisira, tájina víchiravaimahi. Yátupina eta véhisira ema Jesús. Vímiyanavahini eta vémunasiracacaina. Vácasiñavahini eta macuchucuirahaviya éma. Tájina vahi vicuyacujiequenehava eta vicuchapiraya eta jena sache. ⁹Taicha ema Viya manerejiruhavihi eta macuchucuirahaviya máichavenehi ema Viáquenu Jesucristo. Vaipa vicaicuñaimahi. ¹⁰Ema Jesucristo tépenahi te crusu vítivenehi, mavarairahi vítarecayare vicachaneyare éma. Te máitecapa éma, macaechepucainapa ena náepenaqueneana vichamurianaini. Tásiha, viti vítareruanaichaha tíhetamurichahavinapa, taicha mavarahahi vicachaneyare éma. ¹¹Eta tacahe, étumechacaca, ecatiacacavare. Núti nucasiñavahi eta eyehe eta íchirapaipa puiti eta juca.

Ena Pablo tímijanava eta maconsejachiravaca ena machamuriana

¹² Nuparapenaveana, énerichuvare vituparacahe eta epicauchiraina ena víyarahana pastoreana taicha ena ticonsejachaheanahi, tímitucaheanahi eta juca éhisirahi ema Viya. ¹³ Échapajiricavacaya éna. Émunasinávaicha, taicha éna tíurihi eta náimicatasirahehi. Tacuija ecuichiravaina éti eta nayehe.

¹⁴ Énerichuvare vituparacahe, nuparapenaveana, epamicayare muraca nacaematane ena plújuana, vahi náesachahi ticaemataneana. Énerichuvare étumechavaca ena tiyacujiririhana. Ena nani tíanájiricavanahi, muracaina eta ímitusiraina. Ecayeheyaresera paciencia nayehe namutu.

¹⁵ Échapavayare. Tijuricati natiarihína navaraha titupiacacheana, vahi ecujicapa. Váhivare ecuitsicava. Ímerezayaresera eta iúrivaya nayehe ena echamuriana, énapa namutu ena apamuriana achaneana.

¹⁶ Iúrisamurerecaya tamutu sácheana. ¹⁷ Vahi ecucainajiruva eta eyujasarirana mayehe ema Viya. ¹⁸ Tamutu jácani íchararacavanahi, ehasulupayacha ema Viya, taicha eta mavarahahi ema Viya ecaheyare eti éhicanahi ema Viáquenu Jesucristo.

¹⁹ Váhivare ecuemepurureca eta mavarahaqueneanahi maicha ema Espíritu Santo eta eyehe. ²⁰ Te esama nácani téchajisihanahi ema Viya, vahi ecuepuru. ²¹ Vahi ecuemunanasicava. Epanerechinavayare te tájahapuca jácani esamaqueneanahi, ímahaqueneanahi. Éhicaya eta táuriqueneana. ²² Téhesera vahi tíurihi, vahi ecuisapava, taicha eta tamauriqueneanahi.

²³ Tiuri puiti, májjaracahéni ema Viya táurivaina eta epanereruana. Yátupinahini tacuijahini ecuichiravaina eta iávahásirahi éma. Majaneasinahehíni eta iáchanavana, eta iáqueheana. Tacuija eta etapiravainahíni te machavapa ema Viáquenu Jesucristo. ²⁴ Taicha éti máichuhaqueneanahi éma. Yátupi eta macasiñacarevahi. Máitauchayareva tamutu eta juca.

Ena téqueneha matuparaha ema Pablo

²⁵ Nuparapenaveana, ímicatacavahi eyujarauchavahi me Viya.

²⁶ Échajisinahavi namutu ena vichamuriana.

²⁷ Nutuparacahe te májzare ema Viáquenu échajicuha eta juca vicartane te namurí ena vichamuriana apaesa námutu nasama.

²⁸ Nuyaseachaheparaca me Viáquenu Jesucristo táetaviuchahíni eta iúricarevaya máicha.

Eta macartane ema Apóstole Pablo nayehe ena machamuriana ticavasanahi te avasare Tesalónica, ticaijare

2 TESALONICENSES

¹ Nuti Pablo, némechajiricahe eti nuchamuriana ecavasanahi te Tesalónica. Téchajicahe ema Silas*, émapa ema Timoteo. Vímiama recahi eta juca vicartane taicha eta iávahásiraipa ema Tata Vicaiyaquene, táichavene eta éhisiraipa ema Viáquenu Jesucristo. ² Nuvaraha macatajicahehini ema Tata Vicaiyaquene, émapa ema Viáquenu Jesucristo; náijaracahehini eta táurivaina eta epane-rerua.

Ena Viya máicuñacayare ena ticapecaturarahiana te táitecapapa eta machaviraya ema Cristo

³ Nuparapenaveana, tatuparaca vihasulupayachaparaca ema Viya, taicha visamairiricahi eta tápajusiravapaipaicha eta esuapirahi ema Viya. Tajurusirapaipahi eta émunasiracairahi. Eta tacahe, vihasulupayachaparacahi ema Viya. ⁴ Tájinarine tácuti eta vicajamurairahehi nayehe ena vichamuriana te viúruijisirávana te jácani vítecapihapahi. Vimetacavacapahi eta táimiyánirávahi eta éhisirahi, ecamichirahivare tamutu eta nacatianasirahahi ena achaneana étapa eta ecatajivairana, táichavene eta éhisirahi ema Viya. ⁵ Tímararacahehisera ema Viya eta ecamichirahi eta ecatajivairahi. Máimerecahi éma eta máuriva, máítauchirahi tamutu. Éma tijacapaheyare eta esiapirayare tayehe eta mávasa.

⁶ Máimaháinepaséra ema Viya eta máicuñasiravacayare ena ticatianacahianahi éti, taicha macarichu éma ticatuparahahi juésyarehi téchayarehi. ⁷ Étisera, ticanaracaheyare ema Viya eta ecatajivairana, viciticacainapa eta vinarasirayare te mamirahu ema Viya. Vinaracainapa vimutu, te máitecapapa ema Viáquenu Jesús, mápechiravaya títeca, másiháiraya te anuma. Te jena sáchehare, mámayarepahi ena mayeheana ángeleana, tíñehianainapáipa máicha. Tacutinapaipa eta ichapequene yucu eta máucupaisirayare.

⁸ Eta tímitecayare éma, máicuñacayare ena váhiquene návarahahini náimati ema Viya, váhivare návarahahini nasuapa eta máechajiriruva. ⁹ Ena nani máehicarahanahi ema Viáquenu Jesucristo, ticaquijianainapa eta te infierno. Váhivare nacamichahini náimararaca eta mamira taicha táetaviuchahi eta máifehivahi. Tájina náuchucuiraimahi. ¹⁰ Te jena sáchehare te máitecapapa ema Viáquenu, viáramimícainapa ichape eta mayehe vimutu viti manerejiruanahi. Tétavicavaya eta vicunachirainapa éma. (Éti apanava etiarhiyarehi, taicha esuapahi eta vímiturapianahi.)

¹¹ Eta tacahe, tamutu sácheana te viyujarasirana, viyaseuchahehi me Viya eta ímianiravaina eta iúriya, taicha éti ichuarecasivahi eta mayehe. Énerichuvare viyaseuchahe me Viya eta máijarasirahéna eta ítupajijíásiraváina tayehe eta juca ématanerepihi táichavenénahi eta esuapajiravahi. Eta juca, ichape tacurisamurecha ema Viya. ¹² Tásiha, ena apamuriana achaneana nacunachayare ema Viáquenu Jesucristo táichaveneni eta náimairahi eta

* **1:1** Ena Silas, eta máijarequene Silvano te náechajiriruva ena romanoana.

Íchirahi éti eta táuriqueneana. Énerichuvare, éti ecunachacarénapa me Viya, taicha tétavicavahi eta máemunasirahehi, émapa ema Viáquenu Jesucristo.

2

Emachane Váinarajiquene

¹⁻⁴ Puitiripa, nuparapenaveana, naririhí ena tépiyaequenehanaripa ema Jesús, náimijacharipa matiaririhiripa, tichavaripa puití. Vituparacahecha vahí ecusuapa nácani tépiyahirahianapahi. Tayanapane nácahepuca: “Eta juca vimetacasivahi me Espírítu Santo”. Nácahepuca: “Ema Pablo timitucahavihi eta juca”. Te náepiyaequenehahavipuca náimechahepuca eta carta, náimijachayarehí tásihaquene viyehé, váhiquesera ecusuapavane. Váhi tacuimipanererecahe eta juca. Váhivare ecuarameca. Taicha te máitecapa yátupina ema Jesús, ticurujicahávinumayare viti manerejiruanahi.

Nuvaraha numetacahe eta apana. Te tánehipaicha eta máitesiraya ema Jesús, ena achaneana vaipa napicauchaimahi ema Viya. Náepuruinapa eta máechajiriruva. Tásiha, tímerécavánapa ema Achane Váinarajiquene. Ema maca achane, macatichainapa masama eta máijare ema Viya. Étaripa eta nasiñarajiana ena achaneana, váipavare máuricaimahí. Macavanairipinapa ena achaneana te tamutu avasareana náepuyumirauchayare éma. “Nuti Víanu. Núti ecasiñayare” macahénapa. Masapihainapa, ticaejacavainapa tayehe eta Templo. Téhesera támutupa, yátupiquenenapa eta máicuñayare muraca.

⁵ Échavarichuhi éti eta nímitusiraheparacahi cape juca te návihaichahahi eyehe. Numetacahehi eta táichararacavayarehí. ⁶⁻⁷ Puiti ena achaneana, nararihipa tivainarajichavanapaipahi. Vuúchahasera máisapahini ema Viya navayuchavahini. Mararihi ema mavaneruhi tíchejimiráuchavacaríchaha. Eta tacahe, vuúchaha máuchujicahíni máimerecavahíni ema Achane Váinarajiquene. (Éti ímatichuhi ema tíchejimiráurucahi.) Tacahe, ema Viya máisapainapa térajicava ema tíchejimiráurucahi. ⁸⁻¹⁰ Tásiha, mapaenumavainapa tímerécavayare ema Achane Váinarajiquene. Tuparairucayare mayehé ema Satanás. Éma, tíjaracayarehí eta máitupajijíásiravayarehí. Tamutuyare máimereca eta tíaramicareana tacutiyare yátupiquenénahíni mayehénahíni ema Viya. Ema maca, máetaviuchainapa eta mavayuaraiwa nayehe ena achaneana. Éna, tísapavanainapaipa náehica eta táíñehiqueneana mavayuaráquianapahi. Váhiserá máyerémahi. Tiúcupaicavanénapa ema Viáquenu Jesús. Tíaramicarénapa eta majaraivayarepahi. Te máchajurapa, máquipaicainapa macapacainavarepa ema Achane Váinarajiqueneni. Tacahe, ena nani achaneana máiturevanahi témitiequenehanainapa. Ticaicunainapa taicha vahí návarahahíni náehica eta yátupiqueneana tíúriana echájirirucavana. Te nasuapahini, tíuchucuhanahíni tayehe eta ecuñaraqú. ¹¹ Taicha eta namasuapirahí ema Viya, máisapayarehí ena nani achaneana nasuapa eta mavayuaráquiana ema Achane Váinarajiquene. ¹² Tacahe, namutuyare ticaicuñanayare éna, taicha vahí návarahahíni nasuapa eta yátupiqueneana vímiturapiana. Navapinaichucha eta náichiraya eta tamauri-queneana.

Tíuchucuhanayare ena téhicanahi ema Viya taicha manerejiruanahi

13-14 Étiserá, nuparapenaveana, máemunaruanahi ema Viya. Víti tatu-paraca vihásulupayachaparácayare ema Viya íchavenehi éti, taicha manereji-ruhehi ema Viya te tépanavainapa. Táitusiava, te esamapa eta vimetarairuhi, etupiruvapa ejacapahi; taicha esamapa eta máichuirahahi éma. Éma ticuchucuaheyare taicha ímiyanavahi esuapa eta yátupiqueneana máimiturapiana ema Cristo. Émapa ema Espíritu Santo máimiyanava eta mávahásirahahi, máijaracahe eta esantuvainapaipaicha puiti juca ecaijuheyare. Tásiha, ítujicavainapa esiapa tayehe eta mávihahi ema Viáquenu Jesucristo, ímahainapa eta majaraiva.

15 Tiuri puiti, nuparapenaveana, ímiyanava eta éhisiraina ema Jesucristo. Vahi ecuemitisica eta vímiturapianahi, te vimuturichaha eta eyehe, étapa eta juca véchajiriruvanahi te carta, vémevataruanahi eyehe.

16 Nuparapenaveana, tétavicavahi eta máemunasirahavihi ema Viáquenu Jesucristo, émapa ema Tata Vicaiyaquene. Tayanapane vahi viúrihíni, énasera navarahahi ticurismurechahavianaya. Tásiha, vicunevainapa eta viúricacarevaya, máíhecuaráquirénapa náicha. 17 Puiti nuvaraha esamavaini éti eta nacurismurechiraha te esamureana. Náetumechavaréni eta ímiyaniravaya icha eta táuriqueneana, táurihivaréni eta échajirisiravana.

3

Ema Pablo mayaseacavaca eta nayujarauchiraina me Viya

1 Títecapa, vivaraha vituparacahe puiti, eti nuparapenaveana: Eyaseuchahavi te eyujarasirana mayehe ema Viya. Tasuápacarevínahíni muraca nayehe ena achaneana eta vimetarairuana máéchajiriruvana ema Viya, tácutihini eta esupirávanehi éti. Táítecapauchavanehíni ena ticavasanahi te tayerehiqueneana te juca apaquehe. 2 Énerichuvare, eyaseuchahavi macátiuchirahávínahíni ema Viya nayehe ena achaneana váinarajiqueneána titupiarahiana. Taicha camuriana ena masuapajirairahanahi me Viya. 3 Váhiserá táéñamavacarehini eta máurivahi ema Viya eta viyehe, yátupihí eta máítauchirahi tamutu. Tétumechaheyare éma eta ímiyanavairaya. Tijanea-caheyareva mayehe ema Váinaraji. 4 Víti vicasiñavahi eyehe eta esupirahaviya tamutu eta vitupararuheanahi taicha éti éhicahi ema Viáquenu, táicha esuaparipa eta táinapureanahi vitupararuheanahi cape juca. 5 Máimicatacahehini ema Viya eta ímatiraina eta máemunasirahahi. Máijaracahevéni eta ecayeheraya paciencia, ácutihini ema Cristo.

Tatuparaca vicaematanezare

6 Nuparapenaveana, te natiarihinapuca ena echamurianahi plújuana, váhipuca náesachahi ticaemataneana, te váhipuca návarahahíni náetumechavahini, nasuapahini eta vímiturapianahi, vivanecahe éti te máijare ema Viáquenu Jesucristo: Vahi ecumeñahava nayehe. 7 Écharichuhi éti eta etuparahahi ítusiraina ítátijirícava, éhisirayarehi eta viyeherepianahi víti te víavíhaichaha eta ara eyehe. Vahi plújuhávímahi. 8 Váhivare vinicairihihini te epenana. Víti vicaematanehi muraca eta vítátijirisiravahi. Tamutu sácheana, yátiana, vicaematanehi, taicha vahi vávarahahini vétsepanáracahéhini eta vinicaquenerepi. 9 Tatuparacahinéni víyaseacahehini eta énisirahavinahíni,

vivarahahisera vímechaheyahehi eta vicaemataneraivana, apaesa étainarichuhíni éhica éti. ¹⁰ Étaripa te vinasiqueneichaha eta eyehe, vivane-cahehi: Vahi ecuenica mácani vahi mavarahahi ticaematane. ¹¹ Puítiripasera visamairiricahi eta natiarirahahi ena echamuriana tinerejicavanahi plújuana. Vahi náesachahini ticaemataneana, tinicairihianahi. Tímiapitavairicavanapaipahi te pétiana. ¹² Étihi íchanahi eta juca, vivanecahe te máijare ema Viáquenu Jesucristo: Yátupina táuri eta ecaématanérainá, eviyayare eta ecamunuqueneana. ¹³ Éti apamuriana nuparapenaveana, vahi ecuinajica eta táurivahi eta ecaematanerana. ¹⁴ Te natiarihinapuca nácani vahi nacusuapa eta vivanairipianahi te juca carta, ecauneyare éna. Tásiha, emetacapa ena echamuriana vaipa nacucachane éna, apaesa nátsiriháichu ena nani eta namasuapajiravahi. ¹⁵ Váhisera ecucatichavaca, econsejachavacachucha taicha echamurianahi éna.

Ema Pablo mayujarauchahi ena machamuriana

¹⁶ Tiuri puiti, nuyaseacahi ema Viáquenu ema tíurichahavirahi, máimiyanavahíni máijaracahéni eta iúrivaya te epanereruana, tijuricati tájahapuca ícharacava te sácheana, taicha mavarahahi eta iúrivaya. Ámutuhíni mávahácahehíni ema Viya.

¹⁷ Nuti Pablo, nútijacaruvapa nájucha eta juca táichecuaráquihi eta nucartane, apaesa ímati eta táimahíhi eta nuyehe letra nuvahurupajíhi.

¹⁸ Nuyaseuchaheparacahi emutu éti me Viáquenu Jesucristo, táetaviuchahini eta iúricacarevaya máicha.

Tamutupa eta juca néchajiriruvahi eyehe.

Eta macartane ema Apóstole Pablo mayehe ema machamuri Timoteo, ticaijare

1 TIMOTEO

¹ Nuti Pablo mayehenu apóstole ema Jesucristo. Nuvanecasivahi mayehe ema Viya Macatiurahiquenehi viyehe, émapa ema Viáquenu Jesucristo, ema vicunequenehi eta mápechiravayare tichava. ² Nímiámareca eta juca nucartane piyehe piti nuparape Timoteo. Némunacavihi tímicitujiricavahi nuchichavinahíni táichavénehi eta péhisiranuhi eta nusuapajiravahi mayehe ema Cristo. Nuvaraha macatajicavini majapanuvini ema Tata Vicaiyaquene, émapa ema Viáquenu Jesucristo. Nájaracavini eta táurivaina eta pipanereruana.

Emá Pablo mametaca ema Timoteo eta macunerayare ena tihapapirahiana

³ Pécharipahi eta juca numetaruvihi, te nuyanayarepa tayehe te tina-paica eta Macedonia, eta nutuparasiravihi pinasiyaréhi tayehe eta avasare Efeso. Vuíchaha pijunijicaimahi taicha pímatirípahi píti ena nani navarahahi tihapapicana eta vímiturapiana. Vahi picuisapavaca. ⁴ Pécatiacaicha ena vichamurianahi, vahi nacusuapa eta échájirirucavana náepiyapiruanahi ena achaneana, taicha eta juca tacutirichucha eta náchucarapiana. Ena nani achaneana, súnsurupiana eta náechajiriruvana te náechajisiha ena viáchuca-naveanani. Eta juca náechajiriruvanahi, ticauyayacarehi táemejecapavachavaca ena vichamuriana, machu nachavacuejchava táicha. Étavanerecáinahipucáini náimicatacáhávihipucáini eta vítauchiráinahini eta véhisirahi ema Viya. ⁵ Nutuparacavihi taicha nuvarahahi náimerecaya ena vichamuriana yátupina eta náemunasiracacaina táuchurenavare te nasamureana, tapachinavareni eta napanereruana. Tacuíja nacúquichiraváinahini eta nasamiravahi te mamirahu ema Viya. Tauri eta náehisiraina ema Viáquenu. Yátupina nasuapa. ⁶ Taicha nararihi ena téjecapavanapaipa, nasuaparichucha eta tájiparacana súnsurupiana. Eta juca táiminajicavacapaipa tayehe eta vímiturapiana. ⁷ Tásiha, tépiyacavanapa náimatihí tamutu eta Sagrada Escritura. Navarahavare tímiturecana, váhisera nácaicutiarahíni eta tacayemaqueneana eta táechajisihaqueneanahi. Ena nacahehi: “Víti véchahi tamutu”, tájinanéni náechihahíni.

⁸ Tájina táichava eta tatiaríhirahi eta mavanairipianahi ema víyarahaini Moisés. Véchahi eta táuriva eta mavanairipiana, taicha éta, táimitucavacahi ena achaneana eta vahi nacuejecapava. ⁹ Taicha véchahi eta tacaemaneasirahi eta vanairipiana eta táimitupiruchiravacaya ena ticapecaturarahiana. Nácani achaneana tíuriana, vahi énaina tatuparaca eta vanairipianahi. Tatuparacahisera ena nácani mapicauruirahana masuapajirarahana; énapa nácani váinarajipaneréruana ticapecaturarahiana; énapa nácani mapicaucharahana ema Viya, ena ticatichana eta máechajiriruvána; énapa nácani téhana ena náiyana, ena náenana; énapa nácani ticapahiana; ¹⁰ énapa ena túhusiana énapa nácani ticaeahiana ena nayenana, navehapa esu apana esena; énapa nácani tivehana ena nacutiqueneanahi ajaira; énapa nácani tíamerecana achane, amaperupuca, esenapuca; énapa ena tépiyahirahiana;

énapa ena tépiyaequenerahiána. Énerichuvare eta vanairipi tatuparaca ena ticatichana eta táuriqueneana vímiturapiana. ¹¹ Taicha núti nutuparacasivahi me Viya eta nimituresiraya eta táurinaqueneanahi máechajiriruvana, eta tímicaíjuhechahaviya tayehe eta táurinaquene mávasa ema Viya. Tétavicavahi eta macunachacarevahi éma.

Éma Pablo mahasulupayacha ema Jesucristo taicha eta máichuirahi

¹² Núti nuhasulupayacha ema Viáquenu Jesucristo, taicha eta máichuiranuhi mavanaranuyarehi. Tétumechanuhi yátupi taicha máimahahi eta nítauchi-rayarehi eta nutuparacasivayarehi mayehe. ¹³ Éma, tituparacaruhi eta juca, ichapemurihinéni eta néjecapiravahi mayehe, tíñmahihi eta néchajiriruvanahi mayehe. Nupanajiricavacahi ena náinapureanahi téhicanahi éma. Tijapanunuhisera éma, vuíchahahinéni nusuapahini néhicanahi éma. Taicha vahí néchahini émahinéni puca nucatianacahi, eta níchirahi ena machanerana éma. ¹⁴ Tásihasera tétavicavahi eta máemunasiranuhi ema Viáquenu Jesucristo. Ichaperinehi eta máijarasiranuhi eta nusuapirahi yátupi éma, étapa eta máijarasiranuhi eta némunaraivahi.

¹⁵ Nuvaraha námutuhini ena achaneana nasuapa eta véhiruhi taicha yátupihí eta juca vímiturapiana: Ema Viáquenu Jesucristo tímitecahi te juca apaquehe macuchucuhavacayarehi ena ticapecaturarahiana.

Nútiripahi nuváyuchapanaváinihi eta nucapecaturaraváinihi. ¹⁶ Émasera ema Viáquenu Jesucristo tijapanunuhi, táitusiava tíchuhanuhi núti. Taicha mavarahahi máimerecayare ichape eta mayehe paciencia eta nuyehe, nuvayurevaquenénihi eta nucapecaturaraváinihi. Eta tacahe, nucaicutiarapa eta majacapirayareva namutu ena tisuapanayare, máichecuaraquirénapa eta náitaresiraya máicha.

¹⁷ Eta tacahe, macarichu vicunachayare vijirauchayare tamutu sácheana ema Viya, taicha macarichuhi éma tamutu máituruequeneha. Éma, máimahasiquenehi, máepenacacahivare. Jéhevarequene éma, víyehéhi Rey acanequene te tépanavainapa, étapa puiti juca vicaijuheyare. Amén.

Éma Pablo matuparacahi ema Timoteo

¹⁸ Nuchicha Timoteo, nutuparacavicha muraca eta piratahairaina picanara eta tauriqueneana. Tiúriyare eta péhisiraya ema Viya. Tájina píchiravaimahi te mamirahu ema Viya. Péchavahi eta náechajisiavirahi eta piúrivahi ena vichamuriana mametaruanahi ema Espíritu Santo. Vahi picuemepurureca. ¹⁹ Taicha nararihi ena ticainajiruvanapaipa, náechahinéni eta táíñehivahi eta náichaqueneanahi, váhisera návarahahini nácaínajiruvahini eta tauriqueneanahi. Tíñajicavanarichucha eta náehisrainihi ema Viya. ²⁰ Émaripa ema Himeneo émapa ema Alejandro, tacahehi eta náinajisiravahi eta náehisrainihi ema Viya. Puitisera, ena nani níjararupa ema Satanás, taicha nuvaraha nachava, náinajicayare eta nacaecahirahi ema Viya.

2

Éma Pablo máimituca eta nayujarauchiravaya

¹ Tatívyaresera nutuparacahe, vahí tacuechuquiha eta eyujarasiraina. Eyaseuchava. Tamutu ehasulupayachayare ema Viya. Eyaseuchayareva namutu ena achaneana. ² Énerichuvare eyaseuchayare ena aquenucana énapa ena apamuriana tuparairucana, apaesa táuri eta náechapajirisiraina

eta avasareana, váhini vicuimahaini eta táíñehiqueneana. Víti vímiyanavahini viúrihini te mamirahu ema Viya, vicapicahuhini nayehe ena achaneana. ³ Taicha ema Viya Macatiurahiquene máuricahi eta víchirahi víti eta júcana. ⁴ Taicha mavarahahi éma máimimatichayare namutu ena achaneana eta yátupiqueneana máechajiruvana apaesa náuchucuha éna apanava. ⁵ Taicha májina apanainahini ticatiuchavacaina éna, macarichu ema Tata Vicaiyaquene. Émapa ema Machicha ema achane Cristo Jesús, macarichuhi ema téchajirahi viyehe viti achaneana te mamirahu ema Tata Vicaiyaquene. Nájina apanaina téchajirahínahi viyehe. ⁶ Ema Viáquenu Jesucristo tjaracavahi tépena taicha eta macuchucuirahaviya vimutu viti achaneana. Puitisera mavaraha máimimatichayare namutu eta juca arairuhi vímiturapiana. ⁷ Eta tacahehi, manerejirunuichuhi mayehenuhi apóstole, nucametariruyare tamutu avasareana, nímitucayarehi ena apavasanana eta nasuapiraina éna eta yátupiqueneana máechajiruvana ema Viya. Nutupiruvahi núti eta juca néchajisirahi, vahi népiyahiraivainahi.

Éma Pablo máimitucavaca eta náicharacavaya te náurujsiravana

⁸ Tiuri, nutuparacavehare pímitucavacavare ena vichamuriana eta juca apana: Tauri eta náurujsiravaina te nayujarasirana. Éna ajairana, vahi nacueñamavahini me Viya eta máitachirayare eta nayasearuhi. Tátupiruvahini te nasamureana. Vahi nacúsemamajuhehíni eta nayujarasirayarehi nacajapavaquichavapuca. ⁹ Énaripa ena esenana, táurihini eta nacamuirihairana. Vahi nacúyeheécaicha eta nacamuirihaira. Náetupiricavahiséraini. Váhivare nacuvayuchaini eta nacatatasirana. Váhivare nacuvayuchaini nacuyeheacavahini eta oro, eta tasivachaqueneana múriareana. ¹⁰ Étaripa náurinavahi yátupiquenehi, eta náimeresiravaina eta yátupina náehisirahi ema Viya, náichirainavare eta táuriqueneanapa. ¹¹ Énerichuvare, tíuriyare eta nasamararasira eta náimitucasivana. Vahi nacúcapae-marahi nácani túmitucanahi. ¹² Énerichuvare ena esenana, vahi tatuparaca náimitucahíni ena víyarananapa te viúrujsiravana, taicha vahi tatuparacahini náimiturecahíni éna. Nasamararacayarechucha eta náimitucasivana. ¹³ Taicha te máepiyacainapa ema Viya ena viáchucanaveánaini, tnapuca máepiyacahi ema Adan, téquenehapa esu Eva. ¹⁴ Váhivare émainahini ema Adan máinapucahini máquipaicavahíni. Ésuhi esu esena, tísapavahi mavayuca ema Satanás. Éta súsapiravahi, tíaquipaicanapa tayehe eta pecatu. ¹⁵ Tásiha, ticatajivainapa eta súnasirana. Púiticha tanasihi nayehe ena esenana. Túchucuhanayaresera, te náimiyana náehica ema Jesús, étapa eta náemunasiraina ena vichamuriana. Tacuijavare natapiravaina te mamirahu ema Viya, táurihini eta napanereruana.

3

Tíurianayarehi eta náitairesira nácani tatupararuanayare eta avacurecacare pastorecare

¹ Étaripa eta juca evacureca pastorecare, puiti nutupiruva numetacahe. Te natarihinapuca nácani ajairana návaraha ticavacureana eta pastorecare, tájina táichiravaina, taicha eta juca evacureca pastorecare, éta tíuriana evacureca ticaijuhecare. ² Tacamunuhisera mácani ticavacureya eta pastorecare, tájina matapiravainaya eta máitairesirahi, tacuija nacuyunaca ena

achaneana. Mácani ésunarichuhi esu mayena. Mácani ticapicahuhi. Mácani tijaneacavahi eta máitaresira, máitucahi tipanerereca. Mácani achanesamure tijacaparahi nayehe nácani tichimarachanaya. Mácani máituca timitureca. ³Mácani vahi tavayuaruina eta téracare. Váhivare macueharahi. Vahi macujamurarahi. Váhivare macutupiarahi. Váhivare tacuvayuaca eta plata. Tatuparacayare mácani tijapanurahi. ⁴Ticaiyacareyare te mapena. Máitucayare eta macajurusirayare ena machichanaveana, tisuapajirahianayare tipicaurahianayare máicha. ⁵Vahi tisiapaimahi mácani achane vahi máitucahi ticavanairipi te mapena. Taicha nararihi ena vahi náituca ticavanairipiana. Tavetijipapuca eta juca evacureca, vaipa náitucaimahi eta náechajirisiraina najaneasirayarehi ena vichamuriana. ⁶Vahi tisiapaimahi eta pastorecare mácani mapaemunavahi máehica ema Viáquenu, machu macasiñavavaica eta masiapirahi eta matuparahahi. Eta tacahe eta máquipaisiravahi ema Váinaraji. ⁷Énerichuvare tacamunuhi mácani pastoreyare ticapicahu nayehe ena apamuriana achaneana, apaesa vahi nacuechajica eta mayehe. Machu máituruca ema Váinaraji.

Tiúrianayarehi eta náitaresira nácani tatupararuanayare eta avacurecacare ticajare diácono

⁸Énerichuvare, nácani ticavacureya eta diáconocare, tacamunuhi ticapicahuanayare eta náitaresirahi. Vahi apipiemanaimahi eta náechajirisiravana. Váhivare ticavaharasianaimahi. Váhivare tijamurarahianaimahi. ⁹Tacamunuhivare náimatiyare yátupi eta tisuapacareanahi mayehe ema Jesús, náitachiraripa tamutu, tájinapa náichiravaimahi te mamirahu ema Viya. ¹⁰Nacasamairunumaya te yátupihipuca tiuri, tájinapuca náichiravaimahi. Téhesera tiúrianahi, énara tuparairucanayarehi eta evacureca diáconocare.

¹¹Énerichuvare, ena esenana, tacamunuhi ticapicahuana. Vahi nacuechajihí. Súcani tijaneacavahi eta suítaresira. Tájina náichiravaimahi, títaurahíanayare.

¹²Ema tuparairucayare, tacamunuhi mácani ésunarichuvare esu mayena. Máitucayare eta máimitusirayare ena machichanaveana. Ticaiyacareyare te mapena. ¹³Taicha te náitachahi tamutu eta natuparahana ena tuparairucana, ticunachacareanahi tipícauchacareánahivare. Tásiha, énerichuvare tétumesamúrechaváinapa eta nacametarairuirahi eta máimiturapiana ema Jesucristo.

Jéhevare eta juca téhicacare

¹⁴⁻¹⁵Puiti nucunevaipa eta nítecapiravaneya eta ara piyehe, téhesera vuíchahapuca nucuitujicava níteca. Nucajurevihísera eta juca carta, apaesa pítuca eta táurivaina eta pítaresiraya, taicha machichavihi píti ema Viya. Viti manerejiruanahi ema yátupiquenehi Viya. Viúnacahi vímiturecahi yátupi eta máechajiriruvana. ¹⁶Taicha eta juca véhiruhi vimutu, tétavicavahi eta táuriva: Vimutuhi visuapahi eta máucupaisirahi te juca apaquehe ema Jesucristo, macaqueherahi eta juca víaquehehi viti achaneana.

Émaripa ema Espíritu Santo macametarapihivare eta yátupirahi Machicha ema Viya.

Náimahahivare ena ángleana eta máechepusirahi te máecari. Te tamutupa, tichavapa éma te mávasa anuma.

Tásiha, viti mavanarana véchajisihahi tamutu avasareana eta macuchucui-rahaviyare vimutu viti achaneana. Ichapemuriana ena ticasñaavanahi mayehe, téhicanahi éma.

4

Natiarihiyare ena tñajicavanaya eta náehisira ema Jesús

¹ Eta mametarapi ema Espíritu Santo, puiti juca vicaijuheyare, natiarihinapa ena tímúterahávanayarepahi tñajicavana eta náehisirahi ema Jesús. Nasuapainapa ena tiyurarahiana. Náehicainapa eta náimiturapiana ena éreanana. ² Nasapihainapa tisamacareanayare ena apipiemana tépiyahirahiana. Ena nani, máimatiacavarahánahi eta náepiyahiraviana taicha náitunaipahi eta nacahirana. ³ Ena nani achaneana nayurucainapa ena vichamuriana. Ánipa nacaheyare: “Vahi táurica vitanucahini esu esena viyenainahini. Jucarihivare eta tinicacare, énerichuvare vahi táurica vinicahini” nacaheyare. Tamutusera eta juca tinicacareana máepiyaruana ema Viya vinicayarehi viti vímatiequenehanahi eta máechajiriruvana. Vihasulupayachayarehi te vinicayare eta máijarahavianahi ema Viya. ⁴⁻⁵ Taicha tamutuhi tiuri eta máepiyaruana ema Viya. Vahi táuricahíni vépuruhíni. Vijacayarehi tamutu, vihasulupayachayarehi te vinicaya; taicha vjaracasihí mayehe ema Viya, timetacahavihi eta táurivahi. Tacaurisamurechahi ema Viya eta viyujarasirana. Púiticha tanasihí viyehé víti. Te vinica, vihasulupayachayarehi ema Viya.

Ema yátupiquene mavanara ema Jesucristo

⁶ Te pímitucavaca eta juca ena vichamuriana, pímerecahi eta yátupirahi mavanaravi ema Jesucristo. Eta juca táurinaquenehi échájirirucava, étarichuhi eta vímiturapianahi eta piyehé, éta tétumechaviyare eta pímiyaniravahi pisuapa eta juca véhiruhi. ⁷ Váhisera picusuapavaca ena nani tíchanahi eta juca échájirirucavana tauriqueneana. Súnsurupianachucha éta. Pimiyanavasera picaravahu eta piúritaresiráina mayehe ema Viya. ⁸⁻¹⁰ Tacuti eta náimicaravahuchirava ena ticavijarahiana eta pelota, navaraha náetumecha eta náqueheana. Tacamunuhisera nápepejiricava te sácheana. Píti, vahi tacuechuquiha eta picaravahuirahi. Te yátupihí vicaravahu viúritaresiraya mayehe ema Viya, tétavicavaya eta viúrivaya eta visamiravaya puiti juca vicahehi, énerichuvare véchapajiricavainapa eta vicaijuheraya eta mávasa ema Viya, vicachaneraya éma. Eta tacahe, vétumechavachucha apaesa viúritaresira eta mayehe. Vímiyanavachucha vímitucavaca ena achaneana apaesa náurítairesira éna apanava mayehe ema Viya. Taicha yátupiquene eta échájirirucava ani tacahe:

Ema vicasñaquenehi, éma yátupiquenehi Viya.

Éma, téchahavi vimutu viti achaneana.

Vivetiji viti véhicanaripa éma,

tétavicavahi eta macatiuchirahavipahi.

¹¹ Ena pímitureanaya, pituparacavacaicha muraca eta júcana.

¹² Picuneuchava yátupina apaesa vahi nacuepuruvi eta pímituresirahi, taicha eta piámaperuváichaha. Pímerecayare eta piúriava apaesa étaina náehicavi ena vichamuriana. Tauri eta péchajisiráina. Tauri eta pítaresiraina, tájina pitapiravaimahi. Pémunarahi nayehe ena vichamuriana, énapa ena apamuriana achaneana. Yátupina eta péhisirahi, étapa eta picasñaavairahi

mayehe ema Viáquenu. ¹³ Te vuíchahapuca nucuítecapa, pímiyanava eta pímitusirayare ena vichamuriana. Pímiyanavavare eta pétumechiravacaina. Péchajicuínayare eta Sagrada Escritura apaesa nasama namutu. ¹⁴ Pémechavayare eta nametarapianahi ena víyahana mametaruanahi ema Espíritu Santo eta picavacureraya. Péchavare eta nanasirahi éna eta navahuana te piápusi. Puiti, vahi picuemepurureca eta péchemaravahi maicha ema Viya.

¹⁵ Pipanerecha yátupina eta juca pimetacasicavanahi. Pímereca eta táurivahi eta péhisirahi, apaesa náimaha namutu eta piúriváinapaicha. ¹⁶ Péchapavaicha yátupina eta pímituresirahi eta juca véhiruhi. Pítijiva pipamicava pitauchayare tamutu. Te pítaucha eta juca, picuchucuhavayare píti, énapa ena pímitureanahi.

5

Vímerecayare eta viúrivayare nayehe ena vichamuriana

¹ Te natiarihnapuca nájecapava ena víyahana ichavicapananahi piyehe, vahi picucajachavaca éna. Piconsejachavacaséra tauri, tácuti te péchajica ema ticachichavi. Énerichuvare ena amaperuquijiana ajairana, tauri eta piconsejachiravacáina tácuti eta péchajisira ena pichuquiqueneana. ² Énerichuvare ena vénarahana ichavicapananahi piyehe, te nájecapavapuca, piconsejachavaca tauri tácuti eta péchajisira esu ticachichavi. Énapa ena amaperuana esenana, piconsejachavaca tauri tácuti eta péchajisira ena pichuquiqueneana. Tátupiruva eta péchajirisiravacaina éna.

³ Pímicatacavacaya ena tépenaimanahi, nácani tájinahi naviyavahini, yátupihí eta nacamunuiravana. ⁴ Téheserapuca natiarihíhi ena suchichanaveana esu tépenaimahi, suámarianapuca, énapa títátianayarehi. Ticaravahuanainapa eta náitátijirisiravaya. Títisiriicavánainapa eta nacajurusiravacahi ena náenana, nátseanapuca. Eta juca, máurica ema Viya. Taicha tatuparacahi ena echichanaveana eta náitsirijisiraváina eta nacajurusira ena ticachichana. ⁵ Pímicatacayaresera súcani tépenaimahi sucarichuhipuca, nájina suchichainahi, nájinavare suviyavahi. Sucuchapainapa eta tásihaqueneya mayehe ema Viya, taicha suijararuvaipa yátupi eta mayehe. Tiyujaracainapa tamutu sácheana, tamutu yátiana.

⁶ Ésusera súcani suícutichiravahi suicha eta suvarahaqueneanahi, ésu tímicutijiricavaipa suáquijiruvahi eta mayehe ema Viya. ⁷ Pímitucavacayare ena tépenaimanahi, apaesa táuri eta nacaemataneasiraina ema Viya, tacuija natapiravaina. ⁸ Taicha ena vichamuriana, tatuparacavacahi náeñamayarehi tayehe eta náitátira ena náenana, ena nátseana. Nácani vahi nacuquicha eta juca, tímicutijiricavaipa vahi náitauchahini eta náehisirahi ema Viya. Tiápajucavapanapa éma eta nayehe ena masuápajirairahánahi.

⁹ Nacarichu pinacayare te nalista ena tépenaimana ena ticayehearipa sesenta año eta nahañora. Súcani émanarichuhi ema suímaini eta suítare-sirahi. ¹⁰ Ésupa súcani tímaticarehi eta táurivanahi eta suématanerepiana. Súcani tiúrihi eta sucajurusirahi ena suchichanaveana. Súcani tijacaparahi te supena nayehe nácani tichimarachanapahi. Súcani tiuri eta suéchapajirísira ena vichamuriana. Súcani téchapajirahi nayehe nácani ticatájivanahi ticajumanahi, ticatiruhanahi. Súcani tamutuhi suítaparaha suicha eta táuriqueneana.

11 Énaserá ena tépenaimanahi amaperuanarichaha, vahi picunaca te lista. Tijuricati tíaquipaicavana taicha tavayuacavacarichaha eta tájiparacana, natanucarichaha ema ajaira, navarahaichaha tíápechavanayarehi ticaimana. Tijuricati ticainajiruana eta náehisirahi ema Cristo. 12 Tacamitiscavacapaípa, énapa tíminajicanapahi eta náehisirahi ema Cristo. 13 Énerichuvare ticauyacarehi nayehe ena amaperuanarichaha, te pinaca eta te nalista, tijuricati tépiyacavanapa plújuana. Náematanepa tipaipiricana te pétiana, námapaipa eta cuéntoana. Tímisiáparacavánapáípa. Nacaematanecaca náechajisihapáípa jácani náimahaqueneanapahi te pétiana. Vahi tácatuparaha náichahíni eta juca. 14 Eta tacahe, ena tépenaimanahi amaperuanarichaha, nuvaraha nápechava nacaimavare, nacachicha, nacaenacarehi te peti, apaesa tacuija nacucayema ena ticunerahiana. 15 Taicha nararihi ena tépenaimanahi tínajicavanapaípa eta náehisirahi ema Jesús, náehicapa ema Satanás.

16 Te sutiarihhipuca tépenaimahi esu vichamurihi, te natiarivharepuca ena sujaneanahi vichamurianahivare, ena títátianayarehi ena sujaneanarichu; apaesa vahi sucupitavairicahi nayehe ena máimaruanahi ítátijíríruana, táichavenehisera jácani tamajinairahi naviyahini éna.

Tatuparacavacahi ena vichamuriana náimicatacayare ena pastoreana eta náitátiravahi

17 Ena pastoreana, te tíurhipuca eta náechapajirisiravaca ena vichamuriana, ichapeyare eta náemunacacarevayarehi. Tatuparacavacahi ena vichamuriana náimicatacayare tayehe eta nanicaquenerepi ena pastoreana, taicha éna, eta náematanerepihi tímiturecanahi ticametarairuana. 18 Taicha ani tacahehi eta Sagrada Escritura: “Vahi picuitisumucha eta pivuyera te ticaematanepahi taicha técuhapahi”. Ánivare tacahe: “Ema achane ticaematanehi, tatuparacahi ticavachayarehi mayehe ema macaematanearuhi”.

19 Vahi picusuapavane te tatiarihinapuca eta máepiyaequenenena mácani náiyacarahi ena vichamuriana. Téhesera natiarihinapuca ena apinana, mapananapuca tinecapaequenehanahi eta máejecapiravahi, jéhesare tisua pacare éta. 20 Téhesera yátupiquenehipuca eta máejecapiravahi, picajachayare muraca te namirahu ena machamurianahi náiyacarana, apaesa nátsirihá napica ena apamuriana, vaipa nacuquicha eta juca. 21 Nutuparacavicha muraca, pítauchayare yátupina eta juca numetarapianahi piyehe. Vahi picunerejicavaca, nácuticaca eta píjarasiraina eta piyehe justicia. Vahi pépacuchaimahi eta máichavaquenevahi mácani téjecapavahi, taicha máimamaracahi ema Tata Vicaiyaquene, émapa ema Viáquenu Jesucristo, énapa ena mayeheana ángeleana manerejiruana. 22 Te matiarihinapuca mácani navaraha nacasiapa pastor, picasamairunumaya te tíurhipuca éma. Vahi picuíjahúcha picunacavane éma. Tijuricati tatiarihinapahi eta máejecapiravahi. Machu pítna tamuriaca taicha eta pímisipiraina éma. Pijaneacavaicha tayehe eta juca. 23 (Puiti néchavahi eta picajumamajipa eta pítaresirahi te piami. Tásiha, nuconsejachavi: Pímisiriquicha apaesainarichu eta vino eta péresarama une, pípurujinahi.)

24 Tacamunehisera eta picasamairunumaya náesani tisiapanayare eta pastorecare, taicha nararihi ena máchasihi eta napecaturana. Vahi táimaticarevane, tapaenumavaya picasamairunuma éna. Nararihisera ena ticaeche-ravane eta napecaturana. Tímaticareanavane. 25 Ene tacahehi, narar-

ihí ena tímaticareanavanehi eta náichirahi eta táuriqueneanahi. Nararihivare ena tacamunuhi eta picasamairunuma, apaesa ticaecheravanehi eta táuriqueneana náichaqueneanahi.

6

¹ Ena vichamuriana músuanahipuca, tatuparacavacahi napicauchayare ichape ena náquenuanahi. Vahi tijicapairihianaimahi apaesa vahi nacuyunaca ena achaneana eta máijare ema Viya, váhivare nacucaecahi eta vímiturapiana. ² Étaripa te nacaquenuhipuca mácani vichamurihi, tiápajucavayare eta napicauchirayare. Vahi tímipanavanáimahi eta nachamurirahi éma. Náimerecayare yátupi eta táurivaya eta náemataneana, taicha ema nacaemataneyeruhi, nachamurihi máemunaruvare ema Viya.

Ticurisamurechahavihi eta véhisira ema Jesús

Píti nuchicha Timoteo, pímitucayare tamutu eta juca nayehe ena vichamuriana. Pémechavacayare eta vímiturapiana. ³ Natiarihinaipuca ena nácani navaraha tímiturecana eta apana doctrina. Nahapapicainapa eta vímiturapiana, tájinasera vahi tavehapicaimahi eta juca yátupiqueneanahi tásihaqueneanahi mayehe ema Viáquenu Jesucristo. ⁴ Ena nani, ticasínavaváicanahi, tájinahineni náitucaquenénahíni. Ena nani, náurica téchajicana. Navayurevanapahi nácapaemachapahi tayehe eta tacayemaqueneana eta véchajiriruvana te vímiturecahi. Ticapinarurahiana éna, tiúmeharahiana, tíchanarahiana, tipícaarácavanapa. ⁵ Tamutu sácheana ticatianarerecana taicha máuripanererurahána ena, máimatirahanahi eta yátupiqueneana. Navaraha nacavacharapiyare eta nayehe religión. Píti vahi picupauchavaca ena nani.

⁶ Jéhesareva, tétavicava eta viúricacareva máicha ema Viya, eta véhisirahi éma. Tavetiji te vicurisamurechava tayehe eta vicayehequeneanahi máijarahavianahi éma. ⁷ Taicha te viúchucapa suyehe esu ticachichahavi, tájina viámapahini vímahaquenenahíni. Ene tacaheyare eta vítavirayare, tájinavare viámaimahi eta vímahaqueneanahi. ⁸ Eta tacahe, te tatiarihhipuca eta vinícaquenéna te vipenana, vicamuirihahhipuca, tarataripa visuapayarehi. ⁹ Énasera nácani tipanerechanahi tirricuchavana, apanapanepa eta najamurachaqueneana. Tacananesiricapa eta naplatanechiavaya. Énajivapa tímicuñacavana taicha eta najamuraraivana súnsurupianahi. Eta juca tícauyayacarehi étaina táimicuñaca eta náchanevana. ¹⁰ Táitsivahisera ena achaneana, náetaviuchahi eta tavayuasirahi náichapa tamutu eta tájiparacana, táichavenehi eta najamurachira eta plata. Namapurujipaipa ena vichamurianaini. Natiarihinaipaipa timutserahavanapaipa eta tayurusiraina eta najamuraraivana. Tásapihapapuca táiminajícapahi eta náehisirainihi ema Jesús. Énajivapa titanucavanahi eta naviurevahi, timutserahavanapaipa eta nacatajivairanahi eta náitaresiranahi.

Yátupina eta véhisiraina ema Jesucristo

¹¹ Pítisera vahi picupanerecha eta juca mamavarahaqueneana ema Viya. Pérajicava tayehe, taicha mavanaraviripa éma. Tátupiruvahi eta pisamure mayehe éma. Táimiyavana eta juca táurivahi eta pítaresira. Tauri eta péhisiraina. Pémunaca yátupina. Picamichayare tamutu. Yátupina eta piman-suvaina te pisamure. ¹² Pétumechavachucha eta picaemataneasirahi ema Viáquenu. Muracaina eta picasínavaira mayehe. Vahi picuyacujiequenehava

eta picuchapirahi eta pítaresiraya máichecuarequireyare, taicha máichuahuenevirichuhi ema Viya. Vahi picuemepurureca eta péchajiriruvanahi te namuri ena vichamuriana, te píjaracavainapa eta péhisirayare ema Viya.

¹³ Puiti, tímararacavihi ema Viya eta nutuparasiraviya. Éma, ticaitarecahi tamutu eta vímahaqueneanahi eta te juca apaquehe. Tímararacavihivare ema Viáquenu Jesucristo. Pécharichuhivare eta matupiruvairahi eta máimereuchiravahi éma te mamirahu ema Poncio Pilato. ¹⁴ Pítauchayare píti tamutu eta juca nuvanairipianahi taicha tásihaqueneanahi me Viáquenu. Vahi pihapapicaimahi, apaesa tacuija táimicajachavi mayehe. Tauri eta machimapiravina ema Viáquenu Jesucristo te máitecapa te tátauchavapa te jena sácheyare máicutiarahi ema Tata Vicaiyaquene. ¹⁵ Ichapenapa vicunachainapa ema Tata Vicaiyaquene taicha macarichuhi éma yátupiquenehi tamutu marataha. Émahi Réyquenehi, Viáquenuquenehi. Tivanecahi namutu ena réyeana énapa ena aquenucana. ¹⁶ Macarichu éma, yátupiquenehi máepenacaca. Máetaviuchahi eta maváyuháquiráivahi. Nájina tíratahaina ticachacayaina eta majaraiva tayehe eta mávihahi. Éma, nájina tímahaina, taicha máímahasiquenehi éma. Éma, vipicauchaquenehi vivapinaquenehi ichape. Máitavacacainapa eta vicunachirayare éma. Jéhevare éma, tamutu marataha. Amén.

¹⁷ Énerichuvare ena vichamurianahi ticaimahaqueneanahi rícuana, pímitucavacayare eta vahi nacucajamurava. Váhivare nacucasiñava eta nacaimahaquenérahí, taicha tijuricati titava eta náimahaqueneanahi, témtiequenehapa tamutu. Nácasiñavasera mayehe ema Viya, jéhevarequene ema ticasíñacare. Éma tíjaracahavihi tamutu eta vicamunuqueneana, víurisamurerecahi máicha. ¹⁸ Tacahe, ena vichamuriana rícuana, pímitucavacachavare eta náurivainaicha. Náimicatarahi ichape tayehe eta ematanecana. Nájapanuráhi nacajirahi nayehe ena ticamunuvanapahi. Tátupiruva te nasamure eta náijarasiraina ena ticamunuvanahi. ¹⁹ Te yátupina náitaucha eta juca, tatiaríhi eta sácheyare najacapiraya eta apanayare náimahaqueneanayare te anuma. Éna, ticaijaranainapa eta nápechiravaya títarecana, taicha éna yátupíhi eta náimicataráivahi eta náitaresirahi te apaquehe. Máichecuarequirénapa eta náuricacarevaya.

Eta téqueneha matuparaha ema Timoteo

²⁰ Tiuri puiti, Timoteo, péperajica yátupina eta juca vímitucasivahi mayehe ema Jesucristo taicha tacapicahuquenehi ichape. Vahi picujicapavaca ena nácani téchajisihana eta tájiparacana, técativánachucha. Váhivare picujicapa ena nácani navaraha ticanaraemachaviana. Ena nani tímijachavanahi náimatihíji eta táuriqueneana, tásihasera ichape nayerehi eta náehisirainahíni ema Viya. ²¹ Nararíhipaipa ena vichamurianaini tímajicavanapa eta náehisirahi ema Jesús, taicha nasuapahi ena nani tépiyahirahiana.

Nuyaseuchaviparaca me Viáquenu Jesucristo táetaviuchahini eta piúricacarevaya máicha.

Tamutupa eta néchajiriruvahi piyehe.

Eta macartane ema Apóstole Pablo mayehe ema machamuri Timoteo, ticajare 2 TIMOTEO

¹ Nuti Pablo mayehenu apóstole ema Jesucristo. Ema Viya tivanecanuhi eta nucametairuirayare eta máechajiriruva, taicha macaechajiriruvahi eta máijarasirahaviya víti eta vítaresiraya táichavenehi eta mávahásirahavihi ema Machicha Jesucristo. Máichecuarquirénapa eta vítaresira máicha. ² Puiti nápechavavare nucajurevi eta juca apana nucartane piyehe piti nuchicha Timoteo némunaraguene. Nuvaraha macatajicavini majapanuvini ema Tata Vicaiyaquene, émapa ema Viáquenu Jesucristo. Nájaracavini eta táurivaina eta pipaneruana.

Ema Pablo máetumehahi ema Timoteo

³ Núti nécharairicavihi te sácheana yátiana te nuyujarasirana, nuyaseuchavihi me Viya. Nuhasulupayachahi éma eta piúrivahi máicha. Éma nucasiñahi núti, tacutihi eta nacasiñairahi ena viáchucanaveanaini. Tájina níchiravainahi eta nusamiravahi te mamirahu. ⁴ Tétavicavahi eta nuvarairahi nápechavahini nímahavi. Vahi némitisicavahini eta píyairahi te nujunijicavinapa. Nuvarahahi píjahúchavahini pítecapauchanuhíni, núrismurepáini eta nímairavinahíni. ⁵ Taicha némechavahi yátupihí eta pímiyaniravahi pisuapa ema Viáquenu. Picápayayarácavacáinehi eta susuapirahi yátupi esu piátse Loida ésupa esu pena Eunice. Ichaperinehi pémechanuhi eta nayehe éna. Eta tacahe puiti, vahi néñamavahini eta piyehe.

⁶ Puiti nutuparacavicha muraca vahi picucaemaha eta péchemaravahi maicha ema Viya. Pímiyanavachucha. Vahi tacumapuruji eta nunasirahi eta nuvahuana te piápusi. ⁷ Taicha ema Viya vahi mavaraha vipícaracavahini. Éma tíjaracavahi eta vitumesamurevana eta vicituparahairahi. Éma tímitucavahi eta vémunaravaya. Tíjaracahavivare eta vicaratasiravayare yátupi eta vítaresira. ⁸ Eta tacahe, vahi picutsiriha eta picametairuiraya eta máechajiriruvana ema Viáquenu. Váhivare picutsiriha eta táemeratasiránuhi eta nucametairuiranahi núti apana. Yátupina picamicha eta picatajiváiraya. Taicha ema Viya, éma tíjaracaviya eta pitumevaya eta pímiyaniravaya picametairu. ⁹ Ema Viya tíámavahi eta máemunasirahavihi acane te tépanavainapa tamutu. Tijapanuhavihi máichavenehi ema Machicha Jesucristo. Eta tacahehi te mapanerechainapa eta máichuirahavivare vimutu víti véhicanayare ema Machicha, mavarairahi ticuchucuhavivare, váhinéni víámavahini víúrihíni eta vítaresirahi. Púitiserá ema Viya mavaraha mapecaturarehaviya te mamirahu. ¹⁰ Púiticha, eta majapanuirahavihi ema Viya, máevatasinahavihi ema Machicha Jesucristo ticatiuchavivarehi. Éma, máechepurehi te máecari. Puiti manaquicahi eta máechajiriruvahi eta macaitaresirahaviya víti apana. Te jena sácheyare máitsivachainapa eta viáquehe, máepenacacahávinapa. ¹¹ Ema Viya tituparacanuhi nucametairuyare eta juca. Éma tinacanuhi apóstolenuhi, nímitucayarehi ena apavasanana. ¹² Eta tímicaviuchanuhi eta juca, púiticha nucatajivahi ichape, taicha eta nítauchirahi eta nutuparacasivahi. Váhisera nutsiriha eta néhisirahi, taicha nímatihí núti eta yátupirahi eta macasiñacarévahi ema nucasiñaquenehi.

Néchahivare eta majacapirahi tamutu eta nématanerepiana. Nucunevainapa eta jena sácheyare eta máijarasiranuyare eta nícuchihi mayehe.

¹³ Píti apana, eta péhicayare eta juca yátupiqueneana nímiturapianahi piyehe, tájina vahi pihapapicaimahi. Yátupina pisuapa, yátupina eta pémunaraivaina taicha tiávahácaviripa ema Jesucristo. ¹⁴ Piúnacaicha yátupina eta juca máechajiriruvana ema Viáquenu. Te natiarhipuca návaraha nahapapica eta vímiturapiana, vahi picuisapava. Máimahavinesera ema Espíritu Santo, ema tiávahácaviripa. Éma tímícatacaviyare.

¹⁵ Títecapa, pécharichuhi píti eta namáimicatasíránuhi ena náiyarahanahi ena vichamuriana ticavasanahi te Asia. Émavanénahíni máitecahíni ema Figelo, émainahipucaini ema Hermógenes. ¹⁶⁻¹⁸ Macarichu títecapauchanuhi ema Onesíforo. Te títecapa éma te Roma, matupiruhi titanucanu, tétupiacanupa te juca cárcel nucaerataiyahi. Éma, tájina mapicaimahi ena ticitianacanua. Ticajínuhi eta nucamunuqueneanahi. Pímaharichuhi píti apana eta máimicatasirahavíhi te viávihaiachaha te Efeso. Eta tacahe, nuyaseacahi ema Viya macatajicahíni máimicatacahíni éma, énapa ena machichanaveana. Majapanuhíni te jena sácheyare vítecapauchiraya ema Viya.

2

Yátupina eta véhisiraya ema Jesucristo

¹ Pítisera némunaruguene nuchicha Timoteo, nuvaraha yátupina máetumechavíni ema Viáquenu Jesucristo. ² Píti pímatirichuhi tamutu eta nímiturapiana, taicha pisamahi eta nímitusiravacahi ena vichamuriana te avasareana. Púiti pitanucaya ena apamuriana vichamuriana nácani pímitureana títaurahianahi. Pituparacaya éna tauri eta náimitusiraina ena apamuriana vichamurianayareva, tácutirichu eta nímitusiravíhi núti.

³ Nutuparacavi: Picamichayare píti tamutu eta picatajivairana. Yátupina eta masuntaruravina ema Jesucristo. ⁴ Picutiyaire eta máuriva ema suntaru, tacarichu máechapajiricahi eta mavanairipiana ema mayehe comandante. Vahi máemitisicaimahi eta mavanahiana, tahapapicahipucáini jácani tájiparacana. Ene picaheyare píti eta pítauchirayare eta mavanairipiana ema Viáquenu. ⁵ Eta juca tacutihi ena ticavijarurahiana eta pelota. Te vahi náitauchahi tamutu eta tavanairipianahi, vahi tivérearecanáimahi. ⁶ Píti pipamicavaya muraca eta pítauchiraya eta pituparahana. Picutiya eta mapamisirava mácani isanítireru eta macaematana te máesane, mavarairahi tíuchucuhayare eta máematane. ⁷ Pipanerecha yátupina eta juca numetaruvianahi. Németeaca tímícatacaviyare ema Viáquenu eta picaicutiararayare tamutu.

⁸ Vahi picuemitisica eta juca nímiturapianahi mayehe ema Jesús, eta émairahi yátupiquene Cristo, mámariequenenihi ema rey David. Éma, máepenquenénihi. Macaechepucahisera ema Viya. ⁹ Eta tímícaviuchanuhi eta juca, puíticha nucatajivahi ichape taicha eta nucametarairuirahi. Étara témeratatanuhi púiti, ticutirinehi nucaviurevahini. Váhisera vicainajiruvaimahi eta vicametarairuirahi eta máechajiriruva ema Viya, cápachi etiarihipa éti. Étinapa nítisivaheyare. ¹⁰ Nucamichahisera tamutu eta náichiranuhi, nuvarairahi nasuapahini nácani máichuhaqueneánayarepahi ema Viáquenu Jesucristo, apaesa náuchucuhahíni éna apanava, náitujicavahíni nasiapa tayehe

eta táuricacarequene mávasa. Máichecuaraquirequene eta vicachaneraya éma. ¹¹⁻¹³ Jéhesare, yátupiquenehi eta juca véhiruhi vimutu:

Te vépenaca mayehavahi eta Viaquenu,

éma ticaitarecavayare vicachanenapa

éma tayehe eta mávasa.

Te vicamicha eta vicatajivairanahi

máichavenénahi éma, vítujicavayare vicajupahayare

éma eta macavacureraya.

Téhesera vicaerajicavahi eta véhisirahi éma,

éma apanavare ticaerajicavayareva te mamirahu.

Te vínajicavahipuca eta véhisirahi éma,

émasera vahi máinajicavahíni.

Manasirichucha ticuchapavahi te

viápechavayarepuca vichavayare mayehe.

Taicha éma, vahi apánapanéna eta mapaneruana.

¹⁴ Nutuparacavi: Pémechavaca ena pímitureana tamutu eta júcana. Pécatiacaicha muraca te máijare eta Viáquenu. Vahi nacuevataemajiricáca te jáceni náechajirisiravána. Taicha tájina táijaracaimahi, machu étaina tahapapica eta napaneruanahi ena vichamuriana eta nasámararásirainahi.

Yátupiyare eta náurivaya ena mavanarana eta Viya

¹⁵ Píti, yátupina tauri picha eta picaematanerahi eta Viya, picurisamu-rechirayare éma. Tájinasarépa piávamirahuimahi taicha tamutuhi tiuri eta pémataneana. Tatupiruvayarehi eta pímituresirahi eta yátupiqueneanahi máechajiriruva eta Viya.

¹⁶ Téhesera natiarihinapuca ena téchajisihanahi eta tájiparacana técativana, vahi picujicapajiricavaca éna. Pérajicava nayehe, taicha ena nani navetijiyarepáichucha eta náichira eta tamauriqueneana.

¹⁷ Tíñehiqueneanahi eta náechajirisiravana taicha eta tavayuarasiravahi, ticauyacarehi nahapapica ena vichamuriana. Ene tacahehi eta náejecapiravanahi eta Himeneo, émapa eta Fileto.

¹⁸ Péchapavayare nayehe ena nani apinana, taicha nacaerajiruvaipahi tayehe eta yátupiqueneana vímiturapiana. Taicha ena nani tépiyaequenehanahi eta táetavisiravaripahiji eta náechepusiraipahiji ena náepenaqueneana. Jéhesare, natiarhipahi ena náemejecapavaruanaipahi.

¹⁹ Vitiaríhichahasera viti vímijanavahi véhicahi eta Viya. Taicha muraca eta vicasíñavairahi eta majaneasiravahi, taicha éma tímatihavihi eta machanerairavahi. Yátupivare visuapa eta juca máechajiriruva, ani macahe: “Náinajicayarehi eta tamauriqueneana namutu ena tíamanahi eta máijare eta Nuchicha Jesucristo” macahepa.

²⁰⁻²¹ Eta tacahe, víti, ichape eta vijaneasiravayare tayehe eta tamauriqueneana. Yátupiyarehi eta vicamunucarevaina mayehe eta Viya, vítauchirayarehi eta vicaematanneasira éma. Jéhesare, ichapenapa eta vimunavayarehi mayehe. Véperajicavayarehiséra mayehe tacutiyare eta náeperajisira ena rícoana eta nayereruvana táuriqueneanahi nayeheana jarra oro, nacurujana plata. Vahi náimipananajicáimahi. Vahi náimicutichaimahi eta apamuriana nayereruvana yucuquisiana: eta raveta, eta yuvaraquí, étapa eta nacasuelana mátejisiana.

²² Eta tacahe, vahi picuehica eta natuhusivana ena amaperuquijiana. Tamutuhi najamuracha éna, nacaravahuhi jáceni tamauriqueneanahi. Pítisera pímiyanava eta táurivahi eta pítaresirahi. Táuri eta picasíñairahi eta

Viáquenu. Yátupinavare eta pémunaraivaina. Pétupiricayareva eta náichavaqueneva ena achaneana. Énaina pitanuca pácachanevaca nácani pichamuriarichu tíuripanereruanahi, taicha éna nacasamurehi ema Viáquenu tamutu sácheana.

²³ Énerichuvare vahi picujicapajiricavaca nácani navarahahi tiyaserecaviana eta súnsurupiana. Taicha pímatipahi ena nani eta nacahirana, étachucha natanuca eta semanereana. ²⁴ Viti mavanarana ema Viáquenu, vahi viúriha vímisiaparacavahíni tayehe eta semanereana. Táitsivasera vétaviuchayarehi eta viúri va eta nayehe namutu. Vicayehyareva paciencia eta nayehe namutu ena achaneana. Vímiturahiyareva eta táuriqueneana. ²⁵ Énaripa ena viánaranahi, tíuriyare eta véchajirisirayare. Vicuchapayare eta táetupirisiravaina eta napanereruana, májjaracahini ema Viya nasuapiraina eta máechajiriruvana, ²⁶ apaesa nacuchucuhavahini eta náchanevana eta tacaera-tairahi maicha ema Váinaraji. Taicha eta máiturisiravacahi éma, mavarahahi náitauchaya eta mavarahaqueneanahi éma.

3

Ena achaneana téváinarajichavanáinapáipa

¹ Eta apana eta juca nuvaraha péchayare. Puiti juca vicaijuhuyare tavetijinapaipa eta táejeravayare nasamira ena achaneana eta náehisiraina ema Jesús. ² Taicha tivayuchavainapa eta náichirayare eta najamuraraivana. Tavayuacainapa eta plata. Ticasiñavanainapa, navayuchayare eta náechajirisiravana. Tipanarahiana. Énerichuvare, masuápajiráirahánainapa nayehe ena ticachichana. Tájjinainapa eta náitsirijirápinaya. Váipavare napicauchaimahi ema Viya, nasapihayarechucha nacaechiyare éma. ³ Nájinapa náemunaruimahi. Nájinavarepa najapanuquenémahi. Téchajihianainapa. Vaipa téchajicacareanámahi. Titupiarahianainapa. Nacatichainapa eta táuriqueneana. ⁴ Cáetemarrahiana. Mapicauruirahanainapa. Ticasiñavaváicanainapa. Náuricainapa náicha eta piesta, tasapihainapa napauchayare, vaipa émaimahi napauchaimahi ema Viya. ⁵ Nararihipuca ena tímijachavanainapa yátupinahini nácaijuhe ema Viya. Váhisera náunacaimahi eta máechajiriruvana, váhivare tísapavanaimahi máemetupirucha ema Espiritu Santo eta napanereruana.

Púitiripa nararihipa ena achaneana, étapa návacuha eta juca. Pérajicava eta nayehe ena nani. Vahi picuimisiapava nayehe. ⁶ Taicha nararihi ena achaneana tiyurarahiana tépiyacavanapaipa típaipicana te pétiana, nayurucavacapaipa nácani esenana máechaireana. Ena nani esenana tisipecaturanahi, tavayuaruanahi eta tájiparacana. ⁷ Nametainipa ticaravahuanahi, tájinasera vahi nacaicutiaraimahi eta yátupiqueneana. ⁸ Púiticha ena nani tiyurarahianahi, éna ticaeahiana eta vímiturapiana yátupiqueneana taicha máuripanererúrahíana éna. Tacutihi acane ena iápemareana ema Janes émapa ema Jambres tiácapaemachanahi ema víyarahaini Moiséini. Tímaticareanahisera eta namaimatirahi eta yátupiqueneana. ⁹ Váhisera camurianaimahi ena náiturevanaya, taicha ena achaneana náimaticavaneharehi eta náepiyahiraivana súnsurupianahi éta, tacutiyaehi eta náimatiasiravacahi acane ena achaneana ena nani apina iápemareana tiácapaemachanainihi ema Moiséini.

Eta téqueneha matuparacasivahi ema Timoteo mayehe ema Pablo

¹⁰ Pítisera péhichahi yátupi eta nímiturapiana. Picutinuhi eta núrivahi nayehe namutu achaneana, étaripa eta nupamisiravahi eta néhisirahi ema Jesús, nucasíñavahi yátupi mayehe. Picutinuhivare eta nucayeherahi paciencia, étaripa eta némunaravahi, étaripa eta nucamichirahi tamutu. ¹¹ Péchahivare eta náichiranuhi ena achaneana, eta nucatajivairahi náicha. Ichapemurihi eta napanajirisiranuhi eta te avasareana Antioquía Ichipichu, te Iconio, étapa te Listra. Émasera ema Viya ticatiuchanuhi tayehe eta juca náichiranuanahi. ¹² Énesera tacaheyarehi eta juca. Tímiyanavanayare tipanajirichavianayarehi vimutu víti vivarahana véhica yátupi ema Jesucristo. ¹³ Énerichuvare, ena achaneana váinarajiqueneana tiápajucavainapa eta navainarajivanaya. Énerichuvare ena ticaetemarahlana, tiápajucavainapa eta nacaetemaravaya. Énajicacainapa ticaetemacacanayare.

¹⁴ Pítisera pímiyanavahi eta péhisirahi eta juca pímitucasivanahi. Yátupihí pímerechahi eta písuapirahi. Píti pímatihavirichuhi viti vímitucavianahi, nútiripa. ¹⁵ Píamavahi te amuyavichaha pímatihí eta Sagrada Escritura. Éta, tímitucavíhi tayehe eta víúchucuiraya te apana vítaresira, táichavenehi eta vísuapirahí yátupi ema Jesucristo. ¹⁶ Taicha tamutu eta Sagrada Escritura tásihaqueneanahi mayehe ema Viya. Jéhevarequene eta viviyihayare eta ticaravahucareana, eta vímitusihaya véchajisihayare ena achaneana eta viconsejachihayareva, vímitupiruchihavacaya tayehe eta táurivayare eta náitaresirana. ¹⁷ Tacahe, ena vichamuriana mávaháruana ema Viya téchemarahianayarehi, yátupi náitucayarehi tamutu eta náichiraya eta táuriqueneana.

4

¹ Puiti nutuparacaviyare muraca te máijare ema Viya, émapa ema Viáquenu Jesucristo. Taicha éma, títecavaneyare eta macavacureiraya te juca apaquehe. Viti vítareruaichaha énapa ena náepenaqueneanaripa vicayaseserehinapa te mamirahu tájahahipuca eta vicaemataneasiranahi éma. ² Eta tacahe, pímiyanavachucha picametarairu eta máechajiriruva ema Viya te jácani pítujsiravana. Vahi picúyacujiéquenehava. Pécatiavacacaicha muraca ena téjecapavanahi eta náeneuchirávaina. Piconsejachavaca. Pétumechavaca ena tíuripanereruanahi. Pácayehesera paciencia eta pímitusiravacaya namutu. ³ Taicha tatiarihiyare eta sáchezare ena achaneana vaipa nasuapaimahi eta vímiturapiana táuriqueneana, étainapa náichayare eta navarahaqueneanarichu. Natanucainapa ena nácani tímitucanayare tayehe eta tájiparacana, nacarichuinapa tisamacareanayare nayehe. ⁴ Tasapihinapa náepuruyare eta yátupiqueneana, nacaepaquecuihana. Étasera eta náepiyapirua ena achaneana, tasapihayare eta tisuapacareyarehi nayehe.

⁵ Pítisera pinasiyareichu tájina píchiravaimahi. Picamichayare tamutu eta picatajivairana. Pímiyanavachucha picametarairu eta máechajiriruva ema Viya. Pítauchayare eta pituparacasivahi.

⁶ Puítisera, núti tiánehipa eta nítaviraya te apaquehe. Nucutiripa eta yúcupi te títavayarepa témahayarepa, éneripa nucahehi núti. ⁷ Váhiquene néñamavacare. Nítavavarerupa eta nucanarairahi eta tamauriqueneana. Vahi nuvitaequenehanahi. Nítauchahi eta nutuparacasivahi mayehe ema Viáquenu. Núnacahi muraca eta nusupirahi ema Jesús. ⁸ Puiti núti étanecha nucuchapahi eta jena sáchezare eta májjarasiranuyare eta níjaracasiya me Viáquenu, taicha eta néhisirahi yátupi. Taicha éma, máítauchayarehi eta májjarasiránuyare

eta nícuchihí mayehe. Váhivareséra nácarichuimahi núti nucaijaracasiyare. Énerichuva máijaracayareva namutu nácani ticuchapanahi eta machaviraya.

Éma Pablo máimichuha éma Timoteo

⁹ Pítátijiricavaicha eta pítésirávaneyare ani nuyehe. ¹⁰ Puiti tijunijica-nuripa éma Demos, taicha tétavícavahi majamurachirahi eta mavaraha ticaímahaqueneyare te juca apaquehe. Tíyanapa macaijuhehi tayehe eta Tesalónica. Émasera éma Crescente, névatacachi te departamento Galacia. Énerichuvare éma Tito, névatacáhvare te departamento Dalmacia. ¹¹ Macarinehi nucachanehi éma Lucas. Pivenumapahi éma Marcos, máiteca éma apanavare. Tétavícavahi eta nucamunuirahi éma. ¹² Éma Tíquico, nuvanecahi máiteca ara piyehe te avasare Efeso. Émainachaha pítsivaina. ¹³ Te píteca, pétavajicayarepahi te Troas, pivenuminanuya eta nuyehe capa nunaquiruhi mayehe éma Carpo, étapa eta nuyeheana libro, étapa eta apamuri ájumerucana.

¹⁴ Numetacavivare eta máejecapiravahi éma Alejandro eta nuyehe; tétavícavahi eta macatichiranuhi éma maca herrero. Máimahainesera éma Viáquenu. Éma títsirijiequenehayare eta máichiranuhi. ¹⁵ Éta tacahe, picuneuchavaicha eta mayehe, taicha tétavícavahi eta macatichirahi eta vicametarairurahi.

¹⁶ Étaripa, te títapucainapa nucatiuchavahi te mamirahu éna tuparairucana juéseana, nájina náimicatacanhini. Namutuhi tijunijicanuanahi. Tiuri, tacuijaseraini macúcharacáini éma Viya, maperdonachavacaini éna tijunijicanuanahi. ¹⁷ Émasera éma Viáquenu tijaneacanhui, tímicitacanhui. Vahi máisapanuhini nanacanhini te tapena eta sárareana tinicarahiana. Nítujicavahi núchuca nuyana tayehe eta apanaqueneana avasareana, nucametarairuhi nayehe éna apavasaqueneana. ¹⁸ Éne tacaheyare eta máimiyániravayare ticatiuchanu éma Viáquenu tayehe eta táíñehiqueneana. Tíamanuyarehi tayehe eta mávasa anuma. Máichecuaraquireyarehi eta vijirauchiraya éma. Amén.

Éta táichecuaraquí eta máechajiriruva éma Pablo

¹⁹ Péchajisínanuvaca éma Águila ésupa esu mayena Priscila, énapa éna machíchanaveana éma Onesíforo.

²⁰ Émasera éma Erasto, nunaquicahi te Corinto. Émapa éma Trófimo nunaquicáhvare te Mileto taicha ticajumahi éma.

²¹ Pítécavanecha te tamirahuinarichaha eta muracana técatícava. Téchajicaviana éna vichamuriana éma Eubulo, éma Pudente, éma Lino, esu Claudia, énapa éna apamuriana vichamuriana.

²² Núti nuyaseuchaviparaca me Viáquenu Jesucristo majaneacavihiní tamutu sácheana, táetaviuchavaréni eta iúricacarevaya emutu éti máicha.

Tamutupa eta néchajiriruvahi piyehe.

Eta macartane ema Apóstole Pablo mayehe ema machamuri TITO

¹⁻⁴ Nuti Pablo, nucajurevi piti nuparape Tito. Némunacavihi tímicitijiricavahi nuchichavinahini táichavenehi eta péhisiranuhi eta nusuapajiraivahi mayehe ema Cristo. Nuvaraha macatajicavini ichape, májapanuvini ema Tata Vicaiyaquene, émapa ema Viáquenu Jesucristo, émaripahi ema Macatiurahiquene viyehe. Náíjaracavini eta táurivaina eta pipanereruana.

Acane, eta táepaniravahi eta juca apaquehe, ema Viya macametarapihi eta máíjarasirahaviya eta vítaresiraya máichecuaraquireyare. Ene tacaheyare, taicha ema Viya tájina máepiyahiraivaina. Puiti, títecapauchahaviripa eta sache máicutiarahi ema Viya, eta máíjarasirahaviripa viti apóstoleana eta máechajiriruvana, étaripa vémechaquenehi puiti ema achaneana. Tacahe, núti mavanaranuhi ema Viya. Manerejirunuhi ema Jesucristo, ema Macatiurahiquenehi viyehe. Tituparacanuhi nítauchayare núti eta námirayare eta máechajiriruva. Tivanecanuhi eta nímitusiraya ena apamuriana manerejiruana ema Viya eta nasuapajiraivanayare, mavarairahi náimatiequeneha tamutu eta tímitucacareana yátupiqueneana apaesa tauri eta náítaresiraina. Tacahe, nacunevaina eta jena sáchehare te máíjaracahavipa eta vítaresiraya máichecuaraquirénapa.

Eta macatuparahaira ema Tito

⁵ Péchavarichuhi te nunaquicavinapa eta te tíurupuhi te mar ticaijare Creta. Nutuparacavihi pítauchayare tamutu eta numaitaureanahi. Eta nutupararuvihí pinerejicaya ena pinacaqueneanayare eta návacureanaya ena pastoreanaya téchapajiricanayare nácani náíjamuripachu tisuapajirahiana. ⁶ Nayehepachuina pastor, tacamunusera mácani achane maoporavare eta máítaresira. Mácani, ésunarichuhi esu mayena. Tisuapajirahianahivare ena machichanaveana. Tacuija natapiravaina. Tisamarahiana éna. ⁷ Taicha tacamunu matapiravarena nácani pitupararuanayare; taicha éna, tuparairucanayarevare mayehe ema Viya. Mácani, tímitucacarehi. Mácani, vahi tiseमारिहि. Váhivare tavayuaruina eta téracare. Váhivare macueharahi. Váhivare tijamurarahi. ⁸ Mácanisera achanesamure tijacaparahi nácani tichimarachana. Máurica macachane ena tíúripaneréruana. Mácani, máituca tipanerereca. Mácani, títaurahi tamutu nayehe ena achaneana. Mácani, macaijuhe ema Viya, títaurahihivare mayehe. Mácani, táuriquene eta macaratasirava. ⁹ Énerichuvare tacamunu ema mácani tisuápajiráhiquene tayehe eta vímiturapiana tisuapacareana, apaesa éma táurivare eta máimituresiraina. Taicha tacamunu eta máíjarasirayare eta natumevaina ena tisuapajirahianahi. Tacamunuhivare eta macajimuyasiravacaina ena nácani ticatiana-canarichaha eta máimiturapiana. Máíjaracainavare eta nasuapajiraivaina.

¹⁰ Taicha nararihi camuriana ena titupiarahiana. Náetaviucha eta náechajiricavarasivana, tivayuarahiana éna. Nararihi ena nujaneanana tíápajucavana eta natupiaraviana. ¹¹ Picamatinacayare ena nani. Vahi picuisapa eta náimitureca eta tamauriqueneana, machu náemejecapavacha ena

vichamurianahi. Taicha vahi táuricacarehíni eta náimiturapiana. Ena nani náichahi eta juca taicha navarahahi navereacavaca eta naplataneana.

¹² Matiarihinihi ema nayehenihi profeta najaneanaichu ena cretenseana. Macahehi eta máechajiriruvahi nayehe: “Ena nujaneanana cretenseana, tépiyahirahiana éna. Tíñehi eta náichaquene nacuti eta sárare tíñehi. Cánisiuquiana. Plújuanavare éna” macahepa éma. ¹³ Yátupi tacahehi eta náitaresirahi puiti ena cretenseana. Eta tacahe, pituparacaicha muraca ena vichamuriana cretenseana, apaesa vaipa nacuaquipaicava tayehe eta tájiparácana. Tauri eta náehisira eta véhiruhi. ¹⁴ Vaipa nacusuapa eta náimiturapiana navayarapiana ena nujaneanana israelítana. Machu nacusuapa eta náimiturapiana ena nácani navaraha tihapapiricavaca ena vichamuriana eta náehisira eta yátupiqueneana tímitucacareana.

¹⁵ Ena tipachinanahi te napanereruana téhepa nasamureana, énara ena nani nacaijuhe eta táuriqueneana taicha náurica eta nasamararasira tamutu eta táuriqueneanahi. Énasera ena masupajirairahana váinarajipanereruana, éna vahi táurihini nasamira eta tíuriana echajirirucava yátupiqueneana. Taicha tachipejiquenehi tamutu eta napanereruana, muracasamureanapa táicha. Tájina nasamahini eta tamaurivahi eta náichirahi. ¹⁶ Éna nacahehi: “Véhica ema Viya”. Tímaticareanahisera eta namáehisirahi ema Viya, taicha náicharichucha eta tamauriqueneana tíñemahiana. Émasera ema Viya macaticha tamutu eta juca náichaqueneana táíñemahiqueneana. Ena nani, masupajirairahanahi eta mayehe. Tájinasera vahi náituruequenehaimahi ena nani náichahini eta táuriqueneana.

2

Eta yátupiquene vímiturapiana

¹⁻² Pítisera pímiturecaya tamutu eta táuriqueneana. Ena víyarahana ichanaruana, pímitucayareva eta najaneasiravaina eta náitaresira, náitaurahivaina, náitusiraina tipanererecana, nasuápajiráhiquenéna tayehe eta mavanairipiana ema Jesucristo. Náemunarahi nayehe ena achaneana. Yátupina eta nacamichiraina tamutu. ³ Énerichuvare ena vénarahana ichanaruana, pímitucayareva éna tauri eta náitaresiraina taicha éna, tuparairucanahivare mayehe ema Viya. Vaipa téchajihianaimahi. Váhivare tacuvayuaca eta téracare. Náimiturahisera eta táuriqueneana. ⁴ Náimitucayareva ena amaperuana esenana apaesa náituca eta náemunasiraina ena náimanaveana énapa ena nachichanaveana. ⁵ Náitusirayareva tipanererecana. Napicaucha ena náimanaveana. Nasupajirahivare nayehe. Napicauchacare nacaenacare te napenana, náitusiraina náechapajirica eta nayereruvana. Náurivaina éna, apaesa tacuija náechajisicacareváina tayehe eta náehisirahi eta máechajiriruva ema Viya.

⁶ Énerichuvare piconsejachayare ena amaperuana ajairana, yátupina eta náitusiraina tipanererecana. ⁷ Tamutu eta juca, pinaquipairuyare píti eta piúrivaina, apaesa étaina náehica ena vichamuriana eta piúrivahi píti. Étanarichu eta pímiturapiya, vahi pihapapicaimahi eta pímitucasivahi. Váhivare picuitsivacha. Tapicauchacare eta pímituresiraya. ⁸ Táuri eta pímimehapisirayare eta jácani péchajirisiravanaya, apaesa tacuija nacuviyava eta nacaecahiravina ena piánaranahi, titsirihavianayarechucha táicha.

⁹ Piconsejachayare ena músuana eta nasuapajiraivaina nayehe ena náquenuana. Náítaucha támutu jácani navarahaqueneana ena náquenuana. Vahi nacujicapairihi tayehe eta vanairipiana. ¹⁰ Váhivare nacuavijaca eta nacayehequeneana ena náquenuana. Yátupina eta nacasiñacarevaina tayehe tamutu eta natuparahanahi. Náimereca yátupina eta náurivaina apaesa tajamurachacare eta véhiruhi, étarichuhi eta vímiturapiana mayehe ema Macatiurahiquenehi Viya.

¹¹ Ema Viya, acaneripa eta majapanuirahavihi vimutu viti achaneana. Eta tacahe, máimitesinahavihi puiti ema Machicha eta macuchucuirahaviya. Eta juca tímicaecherachahi víti eta majapanuirahavihi ema Viya. ¹² Puiti ema Viya mavaraha eta táuri eta vítaresiraina te juca apaquehe. Mavaraha yátupina eta vítusiraina vipanerereca, étapa eta víturaivaina tamutu nayehe ena achaneana, étapa eta víturaivaina mayehe ema Viya. Vaipa víchaimahi eta tájiparacana tauriqueneanahi. Váipavare víchaimahi eta tajamura-chaqueneana eta viáquehe. ¹³ Tásiha, vicunevainapa eta machavirayare ema Viáquenu Jesucristo ema Macatiurahiquenehi viyehe. Eta máitesiraya mámayarepahi eta tapachinaquene majaraiva. Tétavicava eta viúrisamurevaina te jena sáchezare. ¹⁴ Éma, máepeninahavihi, mavarairahi macaichepaicaya tamutu eta víchirahi eta tauriqueneanahi. Máepachinachayare tamutu eta tamaeperajivana eta viáchanevana. Taicha mavarahahi machane-raquenehaviyare. Tacahe, puiti vivapinavayarehi vicha eta táuri queneana.

¹⁵ Tiuri, pímitucayare eta júcana nutupararuvianahi, tamutu piconsejachavacayareva ena achaneana. Tijuricati natiarhi navaraha téjecapavana, picortachavaneyare. Pétumechava eta pímitusirahi taicha eta pituparacasivahi. Piúriyare eta pítaresira apaesa námutu napicauchavi, váhivare nacuepuru eta pituparahahi.

3

Eta vítaresira viti véhicana ema Cristo

¹ Pémechayareva ena vichamuriana eta nasuapiraina ema ichapequenehi aguenuca, tásiha, énapa ena tuparairucana. Énerichu pémechavare ena vichamuriana énaína nápajucava eta návanacare tayehe jácani ematane-canaya. ² Vahi nacuechajica nayehe nácani achaneana. Váhivare nacumehareca. Váhivare nacutupiarahi. Mánsuanáinasera, najapanurahi nayehe ena achaneana.

³ Víti, acane eta masuápajirárahavirichaha, vimáimatiéquenehanivare. Víchahi tamutu eta tájiparacana tavarahaqueneana eta viáquehe. Tétavicavahi eta viváinarajívainihi eta vítaresirahi. Vicapinarurahini. Vímicatichavainihi nayehe ena achaneana. Vicatianarahinivare nayehe éna. ⁴⁻⁵ Púitiserá, vaipa vácahehini, taicha máitsivacharipa eta vítaresira ema Macatiurahiquenehi Viya. Émasera, tétavicava eta máuriva eta viyehe. Témunacahaviripa. Váhinéni víchahini eta táuriqueneana, tijapanuhavisera éma. Masipacaipa eta visamureana, máquijicaipa eta tauriqueneanahi eta viyehe. Énerichuvare tíjaracahavipa ema Espíritu Santo. Ema Espíritu Santo máitsivachinahávipaipahi eta vítaresira, tímitucahavipa eta viúrivayare eta viyeherepiyare. ⁶ Tétavicavahi eta viúricacarevanahi maicha ema Espíritu

Santo májjararuihema Jesucristo Macatiurahiquenehi eta viyehe. ⁷ Majacapahaviripa emaviya, tiásihaquenehi eta máemunasirahavihi ichape. Énerichuvare timetacahavihi eta májjarasirahaviyare eta vítaresiraya máichecuarquirénapa. Tásiha, vivapinavahi víti eta vicuneiravahi eta jena sácheyare.

⁸ Yátupiquenehi tasuapacareva eta juca vímitucasivahi. Eta juca néchajisihaqueneanahi puiti, nuvaraha pímitucayare tamutu sácheana apaesa náimiyánava naicha eta táuriqueneana ena vicutiqueneana tisuapajirahiana me viya. Tétavicavahi táuriva eta vímiturapiana. Tájina táichiravaina, taicha eta juca tíjaracarahi eta náurivaya nayehe namutu ena achaneana.

⁹ Puíticha nararihi ena tisuapanarichaha eta nahapapiruanahi nayeherépiana ena viáchucanaveánaini. Te návarahapuca náevataemachavi, vahi picujicapajiricavaca, taicha súnsurupianachucha eta nayaseruvianaya. Váhivare picuímicasiapava nayehe nácani tiyuanacana eta mayeherepiana em Moiséini. Te navarahapuca nácani ticajachaviana, vahi picujicapa. Pihapapicayaresera eta tajuricatira eta nasemanevanahi. Técaticavachucha éta.

¹⁰ Te matiarhipuca emamácani mavaraha mahapapica eta napaneruana ena vichamuriana, pímicuhayare picórtachávaneya eta mapaneruhi. Te apihequenénapa eta pímicuha, te máviraihu vahi macusuapavi, pévatacayare mayana máuchuca. ¹¹ Taicha tímaticarepahi emachane eta mamaimitucarevaya. Étavenérahie eta mapecaturana táimicuñacaya.

Eta téqueneha matuparacasivahi emaito mayehe emapablo

¹² Tiúri, névatacayare pítsivayare em Artemas eta arapiyehe, téhesera émapuca névataca em Tíquico. Te máitecapauchavipa arapiyehe, pítecávaneyare aninuyehe te juca avasare Nicópolis, taicha nunasiyarechaha ani.

Nuvaraha táetavicavanúmachaha eta muracana técticava, nupaenumavainapa nuyanaya. ¹³ Énerichuva títecapauchaviya emavichamuri abogado Zenas, émapa emavichamurivare Apolos. Pímicatacavacayare éna eta nayanirayare. Péchapajiricayare éna, te náechuriapuca eta napaisiraya. ¹⁴ Pímitucayare emavichamuriana eta achanesamurevacaina, máejeraréna eta nacajiraivaina nayehe ena achaneana. Yátupina náitaucha eta nacamunucarevanahi.

¹⁵ Téchajicaviana namutu ena natiarhiqueneanahi nuyehe. Tásiha, péchajisinanuya namutu ena némunacasáreana vicutiqueneana eta visuapajiraivanahi mayehe emaviya.

Nuyaseuchaheparaca emutu éti me viáquenu Jesucristo, táetaviuchahini eta iúricarevaya máicha.

Tamutupa eta néchajirivanahi piyehe.

Eta macartane ema Apóstole Pablo mayehe ema machamuri FILEMÓN

¹ Nuti Pablo tapresuchaquenenuhi eta néhisirahi ema Jesucristo, puiti nucachane ema Timoteo eta vicajureravihi eta carta piti Filemón, vichamurivihí vémunaruviquenehi tayehe eta vématanerepianahi. ² Vémechajisihavare namutu ena vichamurianahi tíurujicavarahianahi te pipena. Péchajisinhavivare esu vichamuri Apia, émapa ema Arquipo, vicompañeroquenehi muraca tayehe eta vématanerepianahi. ³ Nuvaraha macatajicahehini ichape ema Tata Vicaiyaquene, émapa ema Viáquenu Jesucristo. Náijaracahehini táurivaina eta epanereruana.

Eta máurivahi ema Filemón

⁴ Néchaviparaca te nuyujarasirana, nuhasulupayachahi ema Viya. ⁵ Taicha nusamairiricahi eta pímiyanirávahi pémunaca ema Viáquenu Jesús, péhica yátupi. Pémunacahivare namutu ena machanerana ema Viya. ⁶ Nuyaseuchavacahi me Viya nayehe namutu ena téhicavianapaipahi táichavenehi eta náimairahi eta pisuapirahi yátupi. Nuvaraha nácautiaraquené naini muraca tamutu eta táuriqueneana májjararuhavianahi ema Cristo Jesús. ⁷ Ichaperinehi eta núsamurevahi picha piti nuparape. Tijarahinehi picha te nusamure eta nusamairirísirahí eta pímiyaniravahi pémunacavaca yátupi ena vichamuriana, éta pa eta picurisamurechiravacahi ichape éna.

Ema Pablo máechejiucha ema Onésimo mayehe ema Filemón

⁸⁻¹⁰ Tiuri puiti, nuvaraha néchajiucha ema Onésimo. Picatajicanu piperdonachinanu éma. Núti yátupiquenenuhi mayehenuhi apóstole ema Cristo. Tituparacanuhení nuvanecavihiní. Étasera eta vémunasiracacahi, nuyaseacavi nuti paure ichavica, nucaerataquenehi puiti máichavenehi ema Cristo. Puiti éma, nuchichahi némunaruquenehi te juca cárcel taicha éma téhica viripa eta visuapirahi ema Jesús.

¹¹ Ema maca Onésimo, cape juca másinequenehi, vahi máitaurahini eta picamusurairahi. Tijunahivare. Púitiserá éma, ichaperinehi eta máitátiranuhi. Eta máitátiranuhi núti tacutiyare eta máitátiraviyareva píti apana. ¹² Puiti névatacayare éma eta ara piyehe. Picatajicanu pijacapanuyare táimicutijiricava nútinayarehi nítecapauchavi piyehe. ¹³ Nuvarahahineni mánasihini eta ani nuyehe. Émainahini pítsivainahini eta pivarairahi píteca pítátinuya eta návihairahi te juca cárcel táichavenehi eta nucametarairuirahi eta máechejiriruvana ema Viya. ¹⁴ Nuvarahahineni níminasicha éma, nucuchaphisera tájahapuca picayemayare píti. Váhisera nuvaraha nupamicavi eta juca picatajisiranuya, nucuchapayare eta pijicapiranuyare. Nuvaraha étachucha tásihaquenyarehi eta táurivaina eta pipanereru. ¹⁵ Táitaurevaquene tijunijicavihi áni pi ema Onésimo. Émarichuserapuca jácáni ema Viya tásihahi máisapahi eta macahyarehi ema Onésimo. Púitiserá tétupiricavapa éma. Májajapainapa tichavayare eta ara piyehe, aparahinapa eta máitátiraviya. ¹⁶ Váipa tácutimahi cape juca másinequenehi. Puiti pímahainapa eta máurivayare macamunucarevayare eta piyehe, taicha váchupa puiti vichamuripahi éma

te mavahuana ema Viáquenu. Núti, ichape eta némunasirahi ema maca. Énénapa picaheyare píti apanava, tiápajucavainapaipa eta pémunasiraya ema maca.

¹⁷ Te yátupina pémunacanu eta nuchamurivírahi, pijacapinanuyare éma táimicutijiricava nútinayarehi pijacapa. ¹⁸ Te tatiarihinapuca eta máejecapiravahi piyehe, ticantevehipuca, nútinarine picobracha. ¹⁹ Nuvachachaviyare núti. Nuti Pablo, nútiquenehi nájuchahi eta nufirmachirahi puiti eta nuvachachiraviyare. Nuvarahahinéni némechavi píti apana eta pintevehi nuyehe eta nucatiuchiravihi. ²⁰ Tiuri, nuparape, picatajicanuchaha eta juca nuyasearuvíhi táichavenehi eta nucachamurivírahi mayehe ema Viáquenu. Picurisamuréchanuya.

²¹ Németeaca vahi táeñamavacare eta juca pisuapiranuyare. Eta tacahe, nucajurevahi puiti. Taicha néchahivare eta vahi tácarichuimahi pítauchaya eta juca nuyasearuvianahi. Tatiarihiyare jácani apanayare píjararuvanayare píti tásihaqueneyare te pisamure. ²² Énerichuvare nuvaraha pétupirisi-nanuya eta nítecapihaya. Étanecha nucuchapahi eta tasamacarevaina eta eyujaracasana me Viya eta nítujsiravaina nítecapauchahe.

Eta táichecuaraqui eta máechajiriruva ema Pablo

²³ Téchajicavi ema Epafra, ema nucompañerohi te juca cárcel, tapresucha-quehivare ema apana eta véhisirahi ema Jesucristo. ²⁴ Énerichuvare téchajicaheana ena apamuriana vicompañeroanahi tayehe eta vématanerepianahi: ema Marcos, ema Aristarco, ema Demas, émapa ema Lucas.

²⁵ Nuyaseuchaparaca ema Viáquenu Jesucristo táetaviuchahíni eta iúricacarevaya máicha.

Tamu tupa.

Eta apanavare carta nayehe ena israelítana téhicanahi ema Jesús, ticajare HEBREOS

Emá Jesús títametacahavi eta máechajiriruvana eta Tata Vicaiyaquene

¹ Acane eta náitaresirahi ena viáchucanaveanaini, natiarihihi ena camuri-queneana santo profetana mavanaranahi ema Viya. Éna, náitametacahi ena achaneana eta máechajiriruvana mapanereruanahi. Ichapemurivare eta náimeresirahi eta máitupajjiasiravanahi ema Viya. Apanapanenéjivare eta náitupajjiasiravahi eta máechajiriruvana. ²⁻³ Puítisera viti vítareruanahi puiti juca áñoana, ema Viya mavanecahi ema Machicha eta veyehe, títametacahaviya eta táequenereruana mapanereruana. Ema maca Jesucristo, Viyahivare éma, taicha machichahi ema Viya. Acane émahí tépiyacahi eta apaquehe, eta anuma, étapa eta vímahaqueneanahi puiti, máitachirahi tamutu eta mapanereruana ema Maiya. Émarichuvare ticatuparahahi me Maiya eta émarahi téchahi tamutu. Puíticha émahí téchahi tamutu, máetaviuchahi eta máitupajjiasiravahi. Ema Cristo ticayehehi eta majaraivahi máijararuhi ema Maiya. Eta máucupaisirahi eta veyehe, tímimaticahavipa eta máurivahi ema Maiya. Tásiha, te tamutupa eta macaepahirahi eta vipecaturana vimutu viti achaneana, tichavapa te anuma. Ánaquí ema Maiya macaejacapa te mayehe trono te mavaure.

Emá Cristo, éma ticapichupanahi nayehe ena ángeleana

⁴ Tacahe, ema Cristo, éma ticapichupanahi nayehe namutu ena ángeleana, taicha ema Maiya máijaracahi eta ichapequene mávacurehi ticapichuhi. ⁵ Taicha eta máechajiriruvahi ema Viya mayehe ema Cristo, ani macahehi: “Píti yátupiquenévihi nuchicha. Púiti nucaejacavihi te piávacure” macahepa. Tacahe, ena ángeleana, tájina vahi máichahini: “Píti nuchichavi”. Váhivare máichahini: “Núti picaiyaquenehi”. Ema Viya máechajisihahi ema Cristo, ani macahehi: “Ema maca, ema yátupiquenehi nuchicha, taicha nútiquenenuhivare máiyánu” macahepa. ⁶ Tacahe, te macucupaicapa ema macarichuquene Machicha te juca apaquehe, macavanairipipa eta natsiusirayare nacunachirayare namutu ena ángeleana. ⁷ Énasera ena ángeleana, táechajisihahi eta Sagrada Escritura, ani tacahehi: “Ema ángeleana vanairucanachucha éna. Nacutihi eta técatcava eta najuricava te ticavanahiana. Nacutihivare eta yucu eta nasipasirayare jácáni tamaeperajiqueneana” tacahépa eta Sagrada Escritura. ⁸ Ánisera tacahehi eta táechajisihairahi ema Cristo: “Píti yátupiquenevihi Viya. Máitavacayarehi eta aquenucavirayare. Téavicava eta tatupiruvairayarehi eta pívanairipi. ⁹ Píjaracayarehi eta táurivayare eta náitaresira ena achaneana tíuriana tisuapavianaya. Énerichu píjaracayare eta náicuñayare ena achaneana váinarajiana masuapajirairahanahi eta piyehe. Eta tacahe, ema Tata Vicaiyaquene, ema Ticachichavihi, tíjaracavihi tamutu eta picapichuirayare nayehe ena pichamuriana téhicanahianahi. Téavicavahi eta náurisamureva pícha”. ¹⁰ Ánivare tacahehi: “Píti yátupiquenévihi Viáquenu. Píti pítucahi eta táimahiyare eta táepaniravahi eta apaquehe étapa eta anuma, pépiyruanahi te pivahuana. ¹¹⁻¹² Tayanapané

títavayarehi tamutu eta juca vímahaqueneanahi, ichasipaipahi tacutipaipa eta táichasivapaipa eta vimuiriha. Pítisera pinasiyarehi. Te pímahapa táuricapa eta pítisvachiraya tamutu, máejerareyarehi pícha. Picañapupujicainapa tamutu. Taicha píti, máitavacacaviyarehi eta pítaresirahi” tacahepa. ¹³ Jararihi eta apana máéchajiriruvahi ema Viya, ani macahehi mayehe ema Cristo: “Yare, péjaca te nuvaure, eta picuchapihayare eta nucaepuyusiraya te pimirahu ena ticitianacavianahi” macahepa. Enasera ena ángeleana, tájina vahi máichahini: “Péjaca ani te nuvaure”. ¹⁴ Taicha ena ángeleana, mavanaranahi ema Viya. Éna, espírituanahi. Vahi énajivainahini nacapicahuhini. Eta natuparahahi éna, tijaneacahavianaya víti macuchucureanayare ema Jesús.

2

Tacamunuhi eta vipamisirava tayehe eta véhisirahi ema Jesús

¹ Eta tacahe, tituparacahe yátupina eta ecaravahuiraya eta ímitucasiqúeneanahi, machu émitisica, machu étaina taviuchahe vahi iúchucuhahini. ² Eta acane, ena ángeleana, éna títitucanahi ema víyarahaini Moisés eta vanairipiana. Tétavicavahi eta tasuapacarevahi. Ticaícuñavaneanahi ena téjecapavanahi, timasuapanahi eta nasamaquenehi. ³ Puiti numetacahe: Tisuapacarepanahi eta véhiruhi. Tájina vahi ticaíticahémahi eta ícuñayare te váhipuca ecucamapuravahi eta iúchucuirayare. Taicha émarichuhi ema Viáquenu títapucahi máichuhavacahi ena achaneana eta náuchucuirayare. Tacahe, ena tísamanahi éma, tíchuhahavianapa víti. ⁴ Énerichuvare, ema Viya máimerecapahi eta tíáramicareana, máicutiaranahi eta émarahi vanairuca, mavarairahi tisuapacareyarehi eta nametarapiana. Énerichuvare puiti ema Espíritu Santo, éma tíjaracahavihi eta vítucaquenepachuyare apaesa vítauchayarehi eta vématanerepipachuhi víjarahi máicha.

Ema Jesucristo, achanehi eta máimahi eta máitesirahi te vitaracu

⁵ Ema Viya, váhivare énainahini matuparacavacahini ena ángeleana eta énaireyare téchanaya eta arairuyare avasare eta vicuchapaquenehi, étaripa eta véchajisihaqueneyarehi. ⁶ Eta Sagrada Escritura, ani tacahehi eta táéchajiriruva: “Píti Tata Viáquenu, tétavicavahi eta pijapanuirahavihi viti achaneanasami. Víti, váhinéni táunahini eta vítaresirahi. Váhivare véñamacarehini. Pítisera péñamavahi eta víyehe, váhivare pémitisicahavihini viti pépiyaruanahi. ⁷ Te pépiyacapa ema viáchucaini Adán, vahi mácutinasivacahini ena ángeleana. Ena, nacachuricahi éma eta náitupajjiasiravana. Váhiserá tánasimahi eta nacachuriasirahi. Taicha pijapanuhavihi viti mámariequenehana ema Adán. Píjaracahavihi eta viávacurehi tajarahiquenehivare, tétavicavahivare eta vícapicahuirahi. Aquenucahavihi pícha. Véchahi tamutu eta pépiyaruanahi. ⁸ Visuapacarehi viti tamutu eta pituparasirahavihi” tacahepa eta Sagrada Escritura.

Tacahe, téchajisihahavihi eta Sagrada Escritura eta véchirahi tamutu eta máepiyaruanahi ema Viya, tájina ticaejeraimahi, maicha ema Viya. Vuíchahasera vímahahini vícayamuricahini tamutu táichavenénahini eta visuapacarevahi. ⁹ Mararihisera ema Jesús. Tiúcupaichahi ánipihi te juca apaquehe, nacachuriacaripa ena ángeleana eta náitupajjiasiravana. Eta máemunasirahavihi vimutu viti achaneana, ema Viya máimicapacarichahavare te crusu vítivenehi. Téhesera te

táequenepa, macaejacapa ema Jesús tayehe eta tajarahiquene mávacurehi tacapicahuquene, táitsivahi eta macatajivairahi eta máepenirahi.

¹⁰ Ema Viya émarichuhi téchahi tamutu. Ema, tétavicavahi eta máechema-raivahi eta manerejisirahi ema Machicha eta macuchucuirahaviyarehi, tiámahaviyarehi eta te mávasa, viti machichanayarehi. Émaripa ema Jesús, eta macamichirahi tamutu eta mátajivana, títauchavahi tamutu eta matupar-arahahi. ¹¹ Eta máepachinachiraripa eta viáchanevana, visiapamurihaipa ena machichanaveanahi ema Viya, vícutiripa ema Jesús eta machichairahi ema Maiya. Eta tacahe, ema Jesucristo, ichape eta máurisamurevahi eta veyehe eta majacapirahavihi maparapehaviyare. ¹² Eta te Sagrada Escritura, ani tacahehi eta máechajiriruvahi ema Cristo: “Nuvapinava eta néchajisihairaviyare, Tata, nayehe ena nuparapenaveana. Nuvaraha nujirauchaviyareva, nacachanenuhivare éna”. ¹³ Ánivare tacahehi: “Tétavicava eta nucasíñavairahi mayehe ema Tata Nucaiyaquene”. Eta apana, ánivare tacahehi: “Ani návihahi núti, énapa ena pichichanaveanahi, ena pinerejiruanahi píjararunuanahi piti Tata” macahepa.

¹⁴ Viti achaneana, étanarichuhi eta vicaechera étapa eta vítine. Ene macahehi ema Jesucristo, macaechehi, macaitnehivare étarichuhi tacutihi eta vítine viti. Eta tacahe, eta máepeninahavihi, macapaquechihayarehi ema Váinaraji, émarichuhi muracaquenénihí eta máitupajijiasiravahi eta macaparesirahi. ¹⁵ Viti achaneana, ichapequenénihí eta vipisirahi eta vépenirayarehi, taicha vipicahi eta vícuñayare. Eta vipisirahi tahapiricahi eta vítaresira. Émasera ema Jesucristo macaepaharipa eta vícuñayarehini, vaipa tápicacarehini eta veyehe. ¹⁶ Éma, eta máitesirahi, vahi étainahini táimitecahíni eta máimicatasiravacayarehi ena ángeleana. Yátupihisera viti achaneana, viti máimicataruanayarehi, taicha eta vicasiñavairahi eta mayehe, vicitirahi ema víarahaini Abraham eta macasiñavairahi me Viya. ¹⁷ Eta tacahe, eta mácupaisirahi ema Viáquenu, tatuparacahi macaqueheyarehi eta viáquehe eta máitaresirahi, ticutihaviyarehi viti maparapenaveana te tamutu eta vítaresirahi, yátupiyarehi eta máetaviuchiraya eta majapanuirahaviya, máetaviuchayareva eta macasiñacarevaya eta veyehe. Taicha macarichuhi ema tiyaseuchahaviparacahi te mamirahu ema Viya Macaiyaquene, macaepaháinahaviyarehi eta viviurevanahi táichavenehi eta vípecatarana viti achaneana. ¹⁸ Ema Jesús, ichape eta macatajivairahi, macaitsamarajiquenehi ema Váinaraji. Macamichahisera tamutu, vahi máisapavahini. Tásiha puiti, éma marataha tímicitacahaviyare viti eta vicamichirayare eta viátajivana táichavenehi eta macaitsamarajirahavihi ema Váinaraji.

3

Ema Cristo tiápajucavahi eta macunachacarevapanahi mayehe ema víarahaini Moisés

¹ Nuvaraha numetacaheya eta apana, eti nuparapenaveana máepachiaruanahi ema Viya, máichuhaqueneanahivare eta esiapiraya eta mávasa. Nuvaraha epanerecha apaesa ácaicutiara eta táetaviuchirahi eta máitupajijiasiravahi ema Jesús. Éma, yátupihi mavaneruhi ema Viya eta máimitusirahaviyarehi eta juca véhiruhi. Macarichuhi ema tiyaseuchahaviparacahi te mamirahu ema Viya. ²⁻⁶ Ema Jesús, tétavicavahi eta máitauahirahi

tamutu eta mavanahiana matuparacasivanahi me Viya. Énerichuvare ema víyarahaini Moisés, títaurahivare eta mavanahi eta maconsejaraivahi, máimitusirahivare ena achaneana tamutu eta mavanairipiana ema Viya. Énerichuvare máechajisihahi tatiarihiyare eta apana mapanereruana ema Viya vuíchahasera máimerecaini ema Viya. Émasera ema Jesucristo, ema tiápajucavapanahi eta macunachacareva, macachuricahi ema víyarahaini Moisés. Ticunachacarepanahi taicha machichahi ema Viya, ticatuparahaivare téchahavihi vimutu viti machanerana ema Viya. Émasera ema Moisés vanairucaichucha. Ema Moisés máichuhavacahi ena achaneana. Émasera ema Jesucristo, émahí tépachinachahi eta viáchanevana viti machanerana, tihetamurichahavivare. Vítí yátupihí machanerahavihi, te vímíyanava eta juca véhisirahi éma, vicasiñavavare eta mayehe, viúrisamurevare eta vicuchapirahi eta viúchucuiraya te jena sácheyare.

Ema Viya tícuchahavihi eta vinarasihayare viti machanerana

⁷ Eta tacahe, nuvaraha ejaneacava. Ema Espíritu Santo, aní macahehi eta máechajiriruvahi tayehe eta Sagrada Escritura: “Puiti jena sache, esamayare esuapayare éti eta numetarapiana nútí. ⁸ Tacuija eta tamuracavaina eta esamureana. Vahi ecucuti ena achaneana mámaqueneanahi ema Moisés te mávapahi apaquehe. Ichape eta namasuapajiraivahi eta nuyehe, náetaviuchirahi eta nacaitsamarajiranuhi nútí. ⁹ Tétavicavahisera eta nucamichiravacahi eta namasuapajiraivahi. Cuarenta áñoripahinéni eta nímechiravacahi eta tiáramicareana níchaqueneanahi, váhisera nasuapanuhini. ¹⁰ Eta tacahe, te táequenepa, nusemapa nayehe ena nani achaneana. Taicha éna, táetaviuchahi eta táejecapiravahi eta nasamureana. Vahi návarahahini náimatihini eta táurinaquene achene, nuvarahaquenehi nímechavaca. ¹¹ Nútí nétupiricaripahi eta náicuchihi nanarasihayarehini eta nuyehe. Tétavicavahisera eta náimiyusemasiranuhi. Tásiha, nucahepa nútí: Ena nánitátaji váhiquene nasiapaimahi tinaracanaimahi eta nuyehe” macahepa ema Espíritu Santo.

¹² Eta tacahe, nuparapenaveana, nuvaraha ejaneacavayare yátupina. Machu éhica eta napanereru ena masuapajirairahana, machu emutserahava íminajcava eta éhisirahi ema yátupiquenehi Viya Vicaiyaquene.

¹³ Étumechacacayaresera nayehe ena apamuriana echamuriana támutuhi sácheana puiti juca vicaijuheyare, apaesa nacuija navayuca ena tivayuarahiana tayehe eta pecatu, machu étaina táemuracacha eta esamureana.

¹⁴ Taicha viti machamurihavianahi ema Cristo. Vijacapainasarepa eta vícuchihi mayehe éma, te vímíyanavahi eta vicasiñairava mayehe, vétumechiravahivare eta véhisirahi. ¹⁵ Eta tacahe, nápechavavare némechahe eta máechajiriruva ema Espíritu Santo: “Puiti jena sache, esamayare esuapayare éti eta numetarapiana nútí. Tacuija eta tamuracavaina eta esamureana. Vahi ecucuti ena achaneana mámaqueneanahi ema Moisés te mávapahi apaquehe. Ichape eta namasuapajiraivahi eta nuyehe, náetaviuchirahi eta nacaitsamarajiranuhi nútí” macahepa.

¹⁶ Puiti nuvaraha epanerechaya eta juca. Némechaheya ema víyarahaini Moisés eta machusiravacahi ena viáchucanaveanaini tayehe eta avasare Egipto. Tétavicavayaréni eta náuricacareva. Tamapurujisera eta nasamirahi eta mahu ema Viya, máijarasirahi eta mavanairipiana. Náimiyusemcapaipa éma eta namasuapirahi. ¹⁷ Tamapurujivare eta cuarenta áño

eta macamichiravacahi ema Viya. Taicha tavayucacahi eta napecaturana éna, étapa tiviuchahi eta náepenarasirahi te mávapahi apaquehe. ¹⁸ Eta namavarairavacahi nasuapahini, éma manacapa eta mayehe juramento eta namaitujisiravayare tisiapana nanarachahini eta mayehe. ¹⁹ ¡Ácaicutiara éti! Táichavenehi eta namasuapajiraivahi, puiti vímahaipahi eta namaitujisiravahi tisiapana tayehe eta mávasa ema Viya.

4

¹ Tacahe puiti, vicasiñavayare me Viya apaesa vítujicava vinaraca mayehe. Ticamunucarehisera eta ejaneasiravayare muraca machu émpururecava éti, tijuricati vahi ecuitujicava esiapa. ² Taicha víti vicametacasihivare eta víuchucuirayare tacutihí eta nacametacasirahi éna. Tamapurujihisera eta nacametacasirahi eta náuchucuirayarehini, váhiquenesera nasuapahini. ³ Yátupisera jararihi eta vinarasihayarehi, taicha ánipa macahe ema Viya: “Núti nétupiricaripahi eta náicuchihi nanarasihayarehini eta nuyehe. Tétavacavahisera eta náimiyusemasiranuhi. Tásiha, nucahepa núti: Ena nánitáji váhiquene nasiapaimahi tinaracanaimahi eta nuyehe” macahepa ema Viya. Vítisera viti visuapajirahiana, vítujicavayare visiapa tayehe eta juca vinarasihayare eta mayehe ema Viya.

Émarichuhi ema Viya máetupiricaripahi eta vinarasihaya, taicha tinarcapaca éma, te táequenepa eta máitachirahi macaemataneasirahi tamutu eta juca apaquehe. ⁴ Taicha eta Sagrada Escritura, ánipa tacahe: “Saisi sache eta macaemataneasirahi ema Viya. Téhesera te siétequenepa sache, tinaracapa éma, taicha máitacharipahi tamutu” tacahepa. ⁵ Tásiha, nápechavavare némechahe eta juca máechajiriruvana ema Viya: “Váhiquene nasiapaimahi tinaracanaimahi eta nuyehe” macahepa. ⁶ Tacahe puiti, mávacuichahahi eta nanarasihayarehini ena tinapucanahi tisamanahi eta náuchucuirayare, táichavenehi eta namasuapajiraivahi. Étainapasera víávihayare viti véquenereruana visuapajirahianayare. ⁷ Ánaquiaparipahi eta táetavisiravahi eta áñoanahi te táequenepa eta namasuapirahi ena nani, máichapa ema Viya eta te Salmo, ánipa macahe: “Puiti jena sache, esamayare esuapayare éti eta numetarapi núti. Tacuija eta tamuracavaina eta esamureana”. Eta macaheirahi eta juca, ema Viya máimicutiarachahi eta apana sache ticamapuravacarehi eta visiapirayare eta te vinarasihayare eta mayehe. ⁸ Yátupihí ema víyarahaini Josué macaitecapavacahi ena nani achaneana tayehe eta apaquehe natuparahahi. Váhisera étainahini eta nanarasihayare mavarahaquenehi ema Viya. Eta tacahe, eta máechajisihapa eta apana sácheyare visiapiraya víti. ⁹ Tacahe, jararihichaha eta juca tacapichuquenehi vinarasihayare, táicuchihi eta víáchaneva víyehe viti machaneranihi ema Viya. ¹⁰ Eta visiapirayare vinaracaya eta mayehe ema Viya, yátupi máitavacayare eta vinarasiraya, vaipa vícaemataneamáhi. Vicutiayare ema Viya eta manarasirahi tayehe eta máemataneanahi. ¹¹ Eta tacahe, tavarahahi vétumechavayarehi tayehe eta visuapiraina éma, apaesa vítujicava visiapa tayehe eta vinarasihaya. Machu vémpurureca eta vícuchihi, machu vácuti ena masuapajirairahanahi.

¹² Taicha eta máechajiriruva ema Viya, tétavacavahi eta táitupajijiasiravahi máicha, tamutuhi tarataha. Tacachuricahi eta tacasiriva eta espada. Tacapayacayarehi te amahe tayehe eta víáchanevana viti achaneana. Tímechahavi eta

tamaurivahi eta visamureana. Tasiapavare eta vipanereruana. Tímitucahivivare eta vétupirisieca eta vítaresirana. ¹³ Ema Viya máimarakahi tamutu. Tájina vahi viratahaimahi viyumuruca eta víchaqueneanahi. Tamutuyarehi tíuchujica te mamirahu éma vépuyumiraureyarehi te máichuhahavipa eta vimetauresiravayare mayehe.

Ema Jesús macarichu éma tiyaseurahi eta viyehe

¹⁴ Ema Jesús, yátupiquenehi Machicha ema Viya. Macarichuhivare ema tiyaseurahi eta viyehe taicha mávaháruhi puiti ema Maiya mávihahi te machacaya. Eta tacahe, vicaratacavayarehi muraca tayehe eta véhiruhi. ¹⁵ Éma, yátupihí tiyaseurahiquenehi eta viyehe, taicha tímatihavi eta vimatumevahi. Tijapanuhaviserá, taicha éma énerichuvare ticatajivahi tamutuhi macaitsamaraji ema Váinaraji, tacuti eta macaitsamarajirahavihi víti. Váhisera macapeaturahini ema Jesús. ¹⁶ Eta tacahe, vicasiñavayarehi te viyujarasirana, vémeñahairavahi me Viya témunarahiquene. Taicha tétavicavahi eta majapanuraiva táichavenehi eta máemunasirahavihi. Éma, yátupihí eta máimicatasirahavi tayehe tamutu eta vicamunuiravana.

5

¹ Nuvaraha epanerechaya nayehe ena nácani catuparahanayare tiyujaracarahiana viyehe viti israelítana. Éna, nerejianahi te nataracu ena achaneana. Natuparacasivaichuhi éna ticaitecapanayarehi me Viya eta námavahuana ena achaneana, étapa eta nanaquíruvana táichavenehi eta napecaturana, nayaseuchirayarehi ena achaneana mayehe ema Viya. ² Éna, tijapanurahianayarehi nayehe ena máiturereana énapa ena téjecapavana, taicha énarichuvare ticatajivanahi tayehe eta naeche máteji. ³ Étaripa eta nacatajivairana, ticamunuvanahi éna apana ticamavahuanahi mayehe ema Viya táichavenehi eta napecaturana.

⁴ Tacahe, mácani ticatuparahayare tiyaseurahiyarehi, vahi émajiriruvaimahi máichuhacasivarichuhi. Émahi ema Viya tíjaracahi eta matuparahahi mapicahuyarehi, tacutihi eta májjarasirahi ema víyarahaini Aarón eta matuparahahi macapicahuirahivare. ⁵ Ene macahehi ema Cristo. Vahi émajiriruvainahini eta macatuparahairahi tiyaseurahiyarehi eta viyehe. Émarichuhi ema Viya tíjaracahi eta matuparahahi mapicahuyarehi, taicha aní macahehi ema Viya: “Píti yátupiquenévihi nuchicha. Puiti nucaejacavihi te piávacure” macahepa. ⁶ Eta apana máechajiriruva, ánivare tacache: “Nunerejicavihi píti piyaseurahiyare. Nutuparacavihi péchajiurahiyare nayehe ena achaneana. Máitavacacayare eta juca pituparaha, picutiyaare ema nuvanaraini Melquisedec” macahepa ema Viya. ⁷ Tacahe, ema Cristo, te matiarichichaha aní te juca apaquעה, tiyaseuchavahi te mayujarasirana eta me Maiya. Muraca eta máumitirahi, máiyahairahivare. Tiyaseuchavahi vahi máemitsicahini ema Maiya eta macaechepusirayarehi te máecari te táequenepa eta máepenirahi te crusu. Jéhesare, tisamacarehi te mayujarasirana, táichavenehi eta mavarairahi máitaucha tamutu eta mapanereruana ema Maiya. ⁸ Taicha ema Cristo, machichahi yátupiquene ema Viya. Váhisera máeñamavahini. Váhivare majunjicahini eta macatajivairanahi. Macamichahi tamutu, macaravahirahi eta masuapajiraivahi. ⁹ Eta tamutuirapa eta máepenirahi, téchepucavarepa, tásiha maratahapa eta macuchucuhairahiyare vimuti viti visuapanahi éma. Máitavacacayarehi

eta vítaresiraya máicha. ¹⁰ Eta tacahe, ema Viya manacahi eta mávacure téchajirahi eta vyehe macutihi ema víyarahaini Melquisedec.

Ecunevahi machu ánasi ácuti ena amuyana

¹¹ Ichapemuriyare eta táechajisiquenehi eta juca numetaruhehi. Ticajerahisera nítametacahehine taicha tétavicavahi eta tamuracavahi eta echutiana. ¹² Ánaquiaparipahinéni eta ecaravahuirahi, iúrihaipahini puiti máestrohevacainaipahini. Ecamunuichahahisera natiarihiyarehi nácani tíapechaheanaya títametacaheanayarehi jácani vahi tácajerahini eta vímitucasivanahi me Viya. Puiti éti épiyacavaripahi máiturerehe. Ecutiripa ena amuyana, tacamunuhi vésicayarehi eta leche eta ticaitarecayarehi, taicha vuíchaha táitucahini tanicahini eta tinicacareana. ¹³ Taicha ena amuyana tiájicanachaha, vuíchaha técharecana, vuíchahavare napanerequenehaimahi eta táurivayare eta náitaresira. Ene ecahehi éti, apaesarichuhi ecaratacavahi eta éhisira eta táuriqueneana. ¹⁴ Énaserá ena yátupihí eta nacaravahuirahi, ena nacutihi ena ichanaruanahi. Téchanaripa náitucaripa tinerejiuchavana eta táuriqueneana, náepurupa eta tamauriqueneana.

6

¹ Núti, nuvaraha ímiyanavayare eta ecajurusiraya eta échemaravahi tayehe eta juca véhiruhi. Ichanaruhénahini tayehe, vaipa ecucutihini ena amuyana. Éhicapaini yátupi eta máimiturapi ema Cristo. Vaipa ecuápechavahíni épanaequenereca eta táinapureanahi iárvahuanahi. Éti, vaipa ecamunuhini víapechahehine vímitucahehine eta éneuchiravayarehi eta epecaturana tímicapacaheyaréni, váhivare víapechavahini vímitucahe eta ecamunuirahi yátupina eta ecasiñavairayarehi me Viya. ² Éti ímatipa eta táichararacavahi te ecaicachasinapa, étapa eta táichararacavahi te nanacapa eta navahu te echuti. Ímativarepa tamutu eta vímiturapiána tayehe eta náechepusirayare ena náepenaqueneana, étapa eta ecuñaraqú máitavacacayare. ³ Tásiha puiti, nímitucaheyare eta apamuri, te máijaracanurichahapucaini ema Viya eta nítupajijasiravaya, étapa eta ecaravahuiraya.

Ecunevahi, machu ínjicava eta véhiruhi

⁴⁻⁶ Páureanasamisera ena tinajicavanapuca eta véhiruhi, tichavanayarepuca. Taicha nácani natupiruvahi najacapa ema Jesús, tásiha énévanehi najirica te nasamure eta majacapiravacapa ema Viya, machichanaipa; mávahácaripa ema Espíritu Santo; tacurisamurechavacavarepa eta máechajiriruva ema Viya; náimatiequenehavarepa eta náuricacarevaya tayehe eta arairuyare avasare, téhesera te nácani náinajicapuca eta náehisirahi, vaipa táitujicacareimahi tíapechavana náneuchavahini. Taicha eta náinajisiravapa, náepuruipahi ema Machicha ema Viya. Tímicutijiricavaripa nacaecahihini éma te namirahu ena achaneana, nápechavahini náetataca te crusu éma. ⁷ Nímicutichayare. Eta macamirisirahi ema Viya eta tiquiva, táerapisiravanehi tamutu eta apaquehe. Jararihi eta apaquehe, tíurinasarepa eta tasucucureruvana, maicha ema Viya. ⁸ Jararihivare eta apana apaquehe, tájina tasucucureruvaina. Itapepairechucha, ijarevare. Ema Viya máijaracayarehi eta táicuñayare, tíjuinapa te yucu táicuchihí.

Vahi vínjicavaimahi taicha tatiarihi eta vicuchapaquenehi

⁹ Puiti, muracacaha apaesa eta numetasirahehi, nútisera nucasiñavahi eta eyehe eta vahi ínajicavaimahi, eti némunaruanahi nuparapenaveanahi. Nucasiñavahi eta máijarasiraheya ema Viya eta iúricacarevayare te macuchuhavipa. ¹⁰ Ema Viya tétavicavahi eta máitauravahi, váiparinehi máemiti-sicaimahi eta ecaemataneasiranahi. Éta pa tímereuchahehi eta émunasiravacahi ímicatasiravacahivare ena echamurianahi tayehe eta juca véhiruhi. Máimahahi eta ímiyanavairahi ecaemataneaca. ¹¹ Nuvarahavare ímiyanavahini eta evapinavairavaca ámutu éti eta ecaemataneasirahi, yátupina ecasiñava mayehe ema Viáquenu, ecuchapaya eta machaviraya. ¹² Váhivare nuvaraha plújuhéna. Ímiyanavahi éhica ácuti ena echamurianaini yátupiquenehi eta nacasiñavairahi me Viáquenu, nacamichahi tamutu. Jéhesare, ecuticasarepa éna eta ejaçapiraya eta ícuchihi mayehe ema Viya.

¹³⁻¹⁴ Émechava eta acane eta máechajiriruvana ema Viya eta máijarasiravahi eta máuricacarevayare ema Abraham. Ánipa máicha: “Yátupiyare eta níjarasiraviyare eta piúricacarevayare, tásiha, níjaracaviyareva eta náichapemurivaya ena piámariéqueana. Nútijiva nupamicava eta nítauchirayare eta juca néchajiriruvana níjararuviyare” máichapa. Ani tacahehi eta máechajiriruvana, taicha nájina apanainahini tipamicaimahi éma. Tásiha, émajiva tipamicavayare. ¹⁵ Ema víyarahaini Abraham, ichapemurishi eta macasiñavairahi me Viya, eta macuchapirahi eta máijararuvanahi ema Viya. Tásiha, tétavicavahi eta máuricacarevahi. Máimahahivare ema machicha Isaac éna ena mámarinaveana. ¹⁶ Tacutihi mácani achane, te maicha eta juramento, majurachahi te mamirahu ema Viya, mavaraha ema Viya mapamicayarehi eta máitauchiraina. Te mácani achane majurachapuca, tájina táeñamavacarehini eta máitauchirayare. ¹⁷⁻¹⁸ Ene macahehi ema Viya, tíjaracavahi eta mapamisiravayarehi máitaucha eta máijarasirahaviyare eta viúricacarevayare. Tipamicavayare, taicha mavaraha vahi véñamavaimahi. Tímaticarehi eta máurivahi ema Viya. Tájina táeñamavacaréna eta vicasíñavairaya muraca eta mayehe, taicha éma vahi máitsivachaimahi eta mapanereruana, váiparinehivare tépiyahirahimahi. Tájina véñamavaimahi eta vicuchapirahi eta máijarasirahaviyare eta vícuchihi. ¹⁹ Eta juca vicuchapaquenehi, étara tétumechahavihi muraca te viáchanevana. Tétavicavayarehi eta vicasíñavaira eta vipauchirayare ema Viya, taicha mararihiyare ema tímisiapahaviyare te mávihahi ema Maiya. ²⁰ Taicha ema Jesús, ema títapumirauchayarepahi eta máetupirisirayare eta viyanirayarehi, taicha macarichuhi éma ticatuparahahi eta mayaseuchirahaviyare, macutihi ema víyarahaini Melquisedec.

7

Ema Jesús, ema tiyaseurahi eta viyehé, macutihi ema víyarahaini Melquisedec

¹ Ema maca Melquisedec, émahí maparajuruhi ema Abraham. Taicha acane, te jena año, ema viáchucaini Abraham éna ena masuntarurana téhacacapaná nacanarapa ena réyeana, navarairahi nacuchucuha ena námereruana, émaripa ema máneva Lot, éna ena machichanaveana. Máitahacacavachisera. Matiarihivare ema apena rey, táquenuhi eta avasare Salem. Émahí ema Melquisedec. Éma, mavanarahivare ema Viya, tiyuja-racarahi éma. Tacahe, te tichavapa te mapena ema Abraham, mácapapa ema Melquisedec, mavarahapa mayujarauchaya ema Abraham. ² Tacahe,

ema viáchucaini Abraham títsirijicavapa. Máijaracapa ema Melquisedec eta diésmuri tayehe eta maganareruanahi nayehe ena mánarana. Étahi eta mámvahuhi me Viya. Ema Melquisedec, aqenucahi éma tayehe eta avasare ticaijare Salem. Eta máijare, te véchajiriruva ticaijare: “Ema Rey máuriquenehi, tájina táichava tamutu te mávasa”. ³ Ema maca Melquisedec, eta majurusirahi, vahi táimaticarehini nájahahipuca ena ticachichanahi, nájinavare majaneanaina. Váhivare táechacare eta máuchusira étapa eta máepenirahi. Énerichuvare, nájina ema máitsivainahini ema Melquisedec. Eta matuparahahi, ene macahehi puiti ema Machicha ema Viya, nájina máitsivainahini. Máíchequaraquirehi eta mávacure tiyaseurahi.

⁴ Nuvaraha epanerequeneha. Ema maca Melquisedec ticapicahupanahi maicha ema Viya. Eta tacahe, ema viáchucaini Abraham máijaracahi eta diésmuri eta maganareruhi nayehe ena réyeana máítajaruanahi. ⁵ Ácane, matiarihíhi ema mámariequenéni ema Abraham, ticaijare Leví. Te táequenepa, matiarihíhi ema mámariequenéni ema Leví, ticaijare Aarón, maparapehi ema Moisés. Tásiha, ema Moisés manacapa eta vanairipi, tatuparacahi namutu ena mámariequeneana ema Aarón, tiyujaracarahianayare éna. Tavanecahi ticobraracanayare eta diésmuri eta navachayare ena najaneananarichuhi, mámariequeneánaini ema Abraham. Nájina tacaitiruinahini. ⁶ Émasera ema Melquisedec, vahi mámarinahini ema Leví. Majacapahisera eta diésmuri mayehe ema Abraham, te tamutupa eta mayujarauchirahi éma. Tayanapane tímijachavahipuca ticunachacarepanahi ema Abraham táichavenehi eta máijaruaruanahi ema Viya eta mayehe ema Abraham. ⁷ Eta tacahe, vimutu vecha víti, mácani tiyujarauchahi ema apana, éma ticunachacarepanahi mayehe mácani mayujarauchaquenehi. ⁸ Tacahe, ena apamuriana tiyujaracarahiana tépenanapaipahi, tásihasera namutu ticaitsivanapahi. Émasera ema Melquisedec vahi macaitsivahini. Puiti eta Sagrada Escritura táechajisihahi éma, máíchequaraquire eta máítaresirahi. ⁹⁻¹⁰ Émaripa ema Leví énapa namutu ena tiyujaracarahiana mámariequeneanánínihi, natuparahaichuhi náicuchihí ema náuchusirayare mámariequeneanayare ema Abraham. Tásiha, tímicitijiricavahi éna apanava navachachahi eta diésmuri ema Melquisedec te jena sache eta mavachachirahi ema Abraham. Énarichuyarehini najacapaya eta diésmuri.

¹¹ Ena tiyujaracarahiana mámariequeneanánínihi ema víyarahaini Aarón, éna tímítucanahi ena achaneana eta vanairipiana májureenahi ema víyarahaini Moisés. Váhisera naratahaimahi napamicavaca ena achaneana náítaucha tamutu. Taicha te náítauchapucaini, váipapucaini tacucamunuini ema apana tiyujaracarahi macutiyahehi ema Melquisedec, vaipa mámariequenénahini ema víyarahaini Aarón. ¹² Émasera ema Viya máechajisihahi ema apana tiyujaracarahiyare matupararuyarehi. Émapa tímechahaviyare eta máitsivachirayare eta viyanihayare mayehe. ¹³⁻¹⁴ Jararihi puiti eta apana. Taicha ema Víaquenu Jesús, vahi mámariequeneánahini ema Aarón. Éma, máchucaini ema Judá. Te nataracu namutu ena majaneanaini, nájina émanainahini mayujaracarahihini. Ema Moisés vahi máechajisihahini matiarihiyare ema tiyujaracarahiyare, mámariequenehi ema Judá. Émasera ema Jesús táechajisiquenehi eta Sagrada Escritura eta émarayare tiyujaracarahiyare.

¹⁵ Tacahe, vímatiequenehahi yátupi eta máitsivachirapa ema Viya eta

viyanihayare eta mayehe, taicha ema arairuyare tiyujaracarahi, tacamunuhi eta macutirayarehi ema Melquisedec. ¹⁶⁻¹⁷ Taicha tacahehi eta máechajiriruvahi ema Viya, ani macahehi: “Nunerejicavihi píti, piyaseurahiya. Nutuparacavihi péchajirahiyare nayehe ena achaneana. Máitavacacayare eta juca pituparaha, picutiyaere ema nuvanaraini Melquisedec” macahepa. Tásiha, vimatiequenehahi puiti ema ticatuparahahi ema Jesús táichavenehi eta máitaresirayare máitavacacahi. Vahi étaparacainahíni eta nájahahipuca ema máchucaini. ¹⁸⁻¹⁹ Tacahe, tépahapa eta vanairipiana náehiruinihi ena náinapureana tiyujaracarahiana, étaripa eta vanairipiana manaquiruanahi ema Moisés. Taicha tájina táratahaini tacuchucuhahavihini táichavenehi eta vimáitachirahini víti. Vahi tacaitecapahavihini me Viya. Puítisera ema arairuhi, tétavicavapa eta macasiñacarévahi éma. Émapa ticaitecapahavihi mayehe ema Viya.

²⁰⁻²² Ena náinapureana tiyujaracarahiana, tájina eta júramentoinahíni eta nacatuparahairahi. Émasera ema Jesús, ticapicahupanahi eta mávacurehi taicha tíjaracavahi ema Viya eta juramento, te matuparacapa ema Machicha. Taicha eta Sagrada Escritura táechajisihahi, ani tacahe: “Ema Viya, váhiquene máitsivachaimahi eta máechajiriruvana. Majurachapa, ánipa macahe: Nunerejicavihi píti, piyaseurahiya. Nutuparacavihi péchajirahiyare nayehe ena achaneana. Máitavacacayare eta juca pituparaha, picutiyaere ema nuvanara Melquisedec” macahepa. Jéhesare ema Jesús, tétavicavahi eta macasiñacarevahi eta máitachiraya tamutu eta máijararuvanahi ema Viya. Tiúripanahi eta arairu viyanihayare me Viya. ²³ Tiuri, eta tayerevahi eta áñoanahi, camurianahi ena tiyujaracarahiana mámariequeneánaini ema Aarón, taicha ticaitsivanapahi, arairuanapahi éna. Étasera tíchahi ena tépenanapaichucha, vahi náimiyannahini náitarecahíni. ²⁴ Émasera ema maca Jesús, máepenacacahi éma. Nájina nasiapahini máitsivainahini tayehe eta mávacurehi. ²⁵ Tásiha puiti, macarichu éma maratahahi ticatiuchahavihi viti vicasiñanahi éma. Éma, ticaitecapahavivare me Viya. Máitavacacayarehi eta máechajirahavihi taicha váiparinehi tépenaequenehahavimahi. ²⁶ Tacahehi puiti eta macatuparahairahi ema Jesús téchajirahaviyaere. Tétavicavahi eta vicamunuirahi éma, taicha yátupiquenehi santo, matapiravarehi éma. Tájinavare máimatyahini macapeaturahini. Váhiquene mácutihini ena pecatumareana eta napanereruana. Puíticha éma mávihahi tayehe eta anuquehe anuma te machacaya ema Viya. ²⁷ Éma, váhivare mácutihini ena apamuriana tiyujaracarahiana. Éna, nacamunichaha tamutuyarehi sácheana nacapaca eta sárare nájuchaqueneyaerehi, tásiha nativayarepa tiyaseuchavana tayehe eta napecaturaichu. Te tamutupa, tapaenumavapa nayaseucha tayehe eta napecaturana ena achaneana. Émasera ema Jesús, étaheichuhi eta mavachahirahi eta vipecaturana vimutu, tíjaracavainapa eta máepenirahi te crusu. ²⁸ Ena nani ajairana ticatuparahana tiyujaracarahianayarehi taicha eta vanairipiana, étasera vahi nánasihini te juca apaquehe, náepenaequenehapaichucha eta náematanerepianaini. Émasera ema Jesucristo tiyaseurahiquenehi yátupihí. Eta macatuparahairahi tacachuricahi eta nacatuparahairahi ena nani. Máitavacacahivare eta máechajirahíni. Taicha ema Viya máichahi eta juramento eta matuparasirahi ema Machicha.

8

Emá Jesús ema vituparahahi téchajichahavihi viti véhicahi eta arairu viyani-hayarehi

¹ Tiuri puiti, nuvaraha yátupi ácaicutiara eta juca: Ticunachacarepanahi ema téchajirahi eta viyehe víti. Taicha matiarahi te anuma, téjacahi éma te mayehe trono te mavaure ema Viya. ² Ánaqui, eta máitachihahi eta mávacure tayehe eta yátupiquenehi Santuario tiávihihi te anuma, máepiyaruihí ema Viya. Vahi tácutihini eta náepiyaruihí ena achaneana. ³ Namutu ena tiyujaracarahiana, tatuparacahi náimerecayare eta námavahuana étapa eta nanaquiruvana. Éne macahehi ema Jesucristo, tatuparacahi máimerecaya eta námavahuyarehi, tiúripanahisera éta. ⁴ Ena náinapureana tiyujaracarahiana, nacarichuhi ena ticatuparahanahi náimerecayarehi eta námavahuana tacamunuqueneanahi eta nayujarasirahi eta te Templo te jena Jerusalén. Émasera ema Jesucristo, tájina vahi mácamunuimahi ticamavahu tayehe eta Templo. Taicha éma, anuma eta mayujarasirarehi. ⁵ Énasera ena tiyujaracarahiana te juca apaquehe, eta námamacasareana te nayujarasirana, étachucha eta tavasíhi eta tiávihanahi te anuma. Véchahi eta tavasichucha, taicha ema Viya máemehachi ema víyarahaini Moisés eta yátupiquene Santuário tiávihihi te anuma. Ánipa maicha: “Pépiyacayare eta Santuário tavasiyare picha eta tiávihihi te anuma númerovihu te piávihaipa te cerro” macahepa. ⁶ Émasera ema Jesús, tiúripanahi eta máematanerepi taicha te anuma eta máechajichirahavihi. Éma, téchajirahi tayehe eta arairu matratune ema Viya. Eta arairu matratune, tiúripanahi eta táinapurehi, taicha tétavicavahi eta viúricacarevayarehi taicha máijaracahi eta máechajiruva ema Viya. ⁷ Jéhesare, eta táinapuiru matratune, vahi náitauchaimahi ena achaneana. Taicha te náitauchahipucaini, vahi tácamunuhini máijaracahini eta apana arairu. ⁸ Émasera ema Viya, eta máimairahi vahi náitauchahini, tíapechavarepa eta máechajiruvahi, ánipa macahe: “Tatiarihiyare eta sáchevayare tépanavayare arairu eta nutratune nayehe ena achaneana israelítana. ⁹ Vaipa tácutimahi eta natratunehi nayehe ena náchucanaveanaini te jena sache te nuvecuhainapa te nuvahu, nucuchucavacapa tayehe eta avasare Egípto. Váhisera náitauchahini eta nutratunehi eta nuyehe. Eta tacahe, nujunijiacavacapa. ¹⁰ Eta nutratuneyare nayehe ena nani israelítana te jena sáchevayare, nunachutchayare te nachutiana eta nuvanairipiana. Najiricainapa te nasamureana. Jéhevarénapa nútí nacaiyaqueneyare. Tásiha, éna, jéhevarénapa nuchichanavequeneanainapa. ¹¹ Vaipa nácomesaimahi ticaimitucasiana nayehe ena nachamuriana, énaripa ena naporapenaveana eta náimatiranuyare. Nútí yátupiquenenuhi náquenunuhi. Namutuinaipa tímatinuanayare: ena amaperuana, ena ichanaruana, énapa ena ichavicana. ¹² Énerichuvare nuperdonachavacainapa nútí eta napecaturana navainarajivana. Vaipa nécharairicaimahi eta natapiravanaini” macahepa ema Viya. ¹³ Tacahe, ema Viya, te máechajisiha eta arairu matratune, tépaharipahi eta táinapurénihi. Éta táemitariuripahi. Vaipa tasuapacarehini.

9

Eta santuário tiávihihi te Jerusalén, tavasíhi eta táimahi eta Santuário tiávihihi te anuma

¹ Tacahe, eta táinapuiruhi matratune ema Viya nayehe ena nani náinapureana tiyujaracarahiana, tatiarihíhi eta nayeherepichuhi te tiyujaracana me Viya. Jéhesare, te jena Jerusalén eta távihahi eta santuario nayujarasirare. ² Ani tacahehi eta táimahi te náepiyacainapa: Eta tnapuca cuarto ticaijarehi “Lugar Santo”. Tacapichahuquenehi éta. Éta távihahi eta candelero étapa eta mesa távirare eta pan sagrado. ³ Eta apana cuarto, ticaijarehi “Lugar Santísimo”. Éta tétavicavapanapa eta tacapichahira. Tatiarihíhi eta ichapequene cortina. ⁴ Te tachacaya eta ichapequene cortina, tatiarihivare eta mesa náijuchirare eta incienso, amairiha oro. Te tajuhe, tatiarihi eta cajune, amairihavare oro, tacaunaiyahi eta márimeana ajureca eta diez mandamiento, étapa eta cajeta amairihavare oro tacaunaiyahi eta maná, étapa eta matsucurupa ema Aarón eta tímarutsicaipahi. ⁵ Te táinahu eta cajune, natiarihíhi ena apinana ángeleana, ticaijare “querubín”. Eta juca querubín táimahi eta majaraivahi ema Viya. Tásiha, eta napavana táepacuhicahi eta cajune, eta náepusaisirarehi eta iti tavachasarehi eta napecaturana namutu ena achaneana. Jararihivare eta apamuriana tayereruvanainíhi eta santuario, váhisera nuvaraha nájuchahini te juca puiti.

⁶ Eta tacahehi eta táimahi eta náemamacasareana eta te santuario. Tacahe, tamutu sácheana ena tiyujaracarahiana tisiapaparacanahi tayehe eta tnapuca cuarto eta náitachuihparacahi eta náematanerepiani. ⁷ Étasera eta te apajuhe, táetaviuchahi eta tacapichahuvahi. Macarichuhi tisiapa ema náquenumuri ena tiyujaracarahiana. Étaherichuvare tisiapa te étana año, mámayarepahi eta táitine eta sárareana. Éta tivachachayarehi eta mapecatura ema tisiapahi, étapa eta napecaturana ena achaneana. ⁸ Émasera ema Espíritu Santo mavaraha vímatiequenehaya eta juca. Eta cortina, éta tiávimirauchahi eta Lugar Santísimo, vahi táisapahini tisiapana ena achaneana. Puitisera vísapacarehi víti eta vítecapauchaya ema Viya. ⁹ Tamutu eta juca tacamunuhi vímatiequenehayare. Eta jena náichasareanahi ena nani tiyujaracarahiana eta nacamavahuirahi, vahi tacanarasinávachahini eta napananeruana ena téneuchavanahi, apaesa tiúriyarepahini eta náitaresirana. ¹⁰ Vahi étapara-cainahini tayehe eta náchaneva, taicha eta námavahusana éna, tinicacareanachucha téracarechucha, étapa eta nacasipavahura te tisiapana tayehe eta Templo. Eta júcana nayeherepianahi, vahi tímiyanavaimahi. Taicha te tépenapa ema Cristo te crusu, máitsivachahi ema Viya eta vítecapauchirayarehi éma.

Tiúripanahi eta yátupiquenehi Santuário tiávihahi te anuma

¹¹ Puitisera, tímercavapa ema Cristo. Jéhevare éma, yátupiquenehi tiyujaracarahi eta viyehé. Tétavicavahi eta táuriva eta viáchanevana máicha. Eta Santuario te anuma távihahi eta mayujarasirare, vahi tayahena te juca apaquehe tauriquenehi. Te jena, tamutu tiúrihi, tipachinahivare. Tétavicavahi eta tacunachacareva. Tacachuricahi eta santuario nayujarasirare ena apamuriana tiyujaracarahiana, náepiyaruchucha ena vicitiqueneana achaneana. ¹² Ema Cristo, jéhevare éma mávihahi tayehe eta yátupiquene Lugar Santísimo te anuma. Vaipa mámvahuhini eta táitine eta sárareana chiqueru, chívanahipucaini. Eta mámvahuhi éma, étaquenepa eta máitine. Étaherichuhi máicha éma. Vimutuhisera viti macuchucureanahi. Tásiha,

máitavacacaipa eta vítaresiraya. ¹³ Ena nani tiyujaracarahiana náepusasa-paicarichaha te náinahu ena nachipejiqueneanahi. Eta náepusasapairuhi, eta táitineana eta toro étapuca eta chívachicha, étapa eta tsimapama tayehe eta esena chiqueru náijureasa. Eta júcana, tépachinachinavacahi eta náqueheana, apaesa táisapacarepa nasiapa tayehe eta Templo. ¹⁴ Étasera eta máitine ana Cristo ema matapiravarequenehi, tétavicavahi eta táitupajijiasiravahi. Tacachuricahi eta náepusasapairuhi ena nani tiyujaracarahiana. Taicha taratahahi tacaepaha tamutu eta vipecaturana, viperdonachacarepa táicha. Tímicutijiricavahi tisipacahavihi tamutu eta vipanereruanaini tamaepera-jiquenehi, étaripa eta tímicapacahaviyarehini. Puítisera eta vítaresiraya, émainapa vicaemataneacainapa ema yátupiquenehi Viya. Ema Espíritu Santo máetumechahi muraca ema Jesús eta máijarasiravahi tímicapacava te crusu, taicha mavarahahi eta mámahuyarehi me Viya.

Éma Jesucristo, éma yátupiquenehi abogado eta viyehe

¹⁵ Puíticha ema Cristo, éma yátupiquenehi viyehe abogado, téchajiuruca-havihi tayehe eta táequenereruhi matratunehi ema Viya. Eta máepenirahi ema Cristo, mavachacharipahi tamutu eta vipecaturanaini viti máichuha-queneanahi éma: viti, énapa ena náinapureanaini tijacapanahi eta táinapu-rénihí matratune ema Viya. Tásiha, yátupihí eta macuchucuirahaviya, máijaracahavi eta vítaresiraya máitavacacayarehi. ¹⁶ Nuvaraha nímicuti-chinahe: Mácani achane te manaquicahi eta testamento, májuchapa eta mavarairahi máijaracasihavacayarehi ena machichanaveana te máepenapapuca. Eta tasuapacarevayarehi, eta ley tacamesaequenehayarehi tacaya-sesereru te yátupipuca tépenaripa ema achane. Te yátupihí tépenaripahi, eta testamento tisuapacarehi. ¹⁷ Vuíchahasera tasuapacarehini eta testamento, te vuíchahahi tépena ema maca tépiyacahi. ¹⁸ Tacutiquenehi, eta táepani-ravahi eta táinapuiruhi matratune ema Viya, tacamunupa tépena eta sárareana, apaesa navehaya eta táitine. ¹⁹ Ema víyarahaini Moisés macametarapipa tamutu eta vanairipiana nayehe namutu ena achaneana. Tacahe, mave-hapa eta titsi lana máitiapusichapa eta yucuquí, máepusapaisihayarehi eta ítiama, táitineana eta chiqueruana, chívana. Tativa máepusasaca eta libro tíamahi eta vanairipiana. Máepusasacavare ena achaneana náurujiruvanahi. ²⁰ Tacahe, mametacavacapa éma: “Eta juca ítiama népusaruhehi, eta táicutiara eta íjarasiravahi ítauchayare tamutu eta matratune ema Viya eta eyehe éti” máichavacapa ema Moisés. ²¹ Énerichuvare ema víyarahaini Moisés máepusasa-cavare eta ítiama te tapaja eta santuário étapa tamutu eta námamacasareana te nayujarasirana. ²² Taicha tacahehi eta vanairipi: Ticaepusasahayarehi te iti tamutuyaréni eta námamacasareanahi eta nayujarasirayarehi, náepachia-sihayarehi. Taicha te vahi tacuepusaicavahini eta iti, váhivare tacuepahahini eta pecatuana.

Éta máitine ema Cristo tacaepaha eta pecatuana

²³ Tacahe, eta juca námamacasareanahi ena nani, tacamunuhi náepusasa-cayarehi eta nayujarasirayarehi apaesa tapachinavacahini. Eta santuário te Jerusalén náepiyarui ena achaneana étapa eta námamacasareanahi, náicuti-paqueneanahi eta tíavihanahi te anuma. Étasera eta Santuário tíavihahi te anuma, tacamunuhi eta apana iti tasivachaquene, tacachuricayarehi eta iti náepusasarui tayehe eta santuário tíavihahi te juca apaquehe. ²⁴ Ema Jesucristo, tájina máimatiyahini mayujaracahini eta te jena santuário te juca

apaquehe. Étaquenehisera masiapa eta mayujarasirayare eta te Santuário tiávihihi te anuma. Puíticha matupihamirauchahi ema Viya eta mayaseuchi-rahavihi víti. ²⁵⁻²⁶ Ema maca tiyujaracarahi te juca apaquehe, áñopahi eta masiapira tayehe eta téqueneha cuarto Santísimo. Ticamavahupahi eta táitine eta sárare, vahi máitínénarichuhíni éma. Émasera ema Cristo, étaherichuhi eta máepusairahi eta máitine. Vahi mápepejiricavahini te áñoana. Te mápepejiricavahini, énerichuhivaréni tíápepejicavahini eta máepenirahi puíti juca táepaniravahi eta apaquehe. Ema Viya mapanerequenehapa eta táichararacavayarehi tamutu. Te máimahapa tiuri, mavanecapa ema Machicha te juca apaquehe. Tímitecahi eta macaepahairayarehi eta pecatu, máijarasiravaripa eta máepenirayarehi. Étaherichuhi máicha. ²⁷ Víti achaneana, eta víchararacavahi eta vítaresirahi, étaherichuhi eta vépeniraya vimutu. Te táequenepa, járajapainapa eta viyaseserehiyare. ²⁸ Énerichuvare, eta máitaresirahi ema Cristo, étaherichuhi eta máepenirahi te crusu eta macaepahairayare eta vipecaturana viyehe víti camuriqueneana achaneana. Yátupisera tíápechavaya tímerecava. Váipasera étaimahi tímiteca mavachachaya eta pecatuana. Eta tímitecayare éma, tépanahaviyarepa víti véhicanahi vícuchapanahi éma eta macuchucuirahaviyarehi.

10

Eta máitine máepusairuhi ema Cristo, tacarichuhi tarataha tépachiacahaviyare

¹ Eta mavanairipiana ema Moisés, étachucha táicutiarahi eta arairuyarehi viyanihayare me Viya, eta tíúrichahaviyarehi. Ticutíhi eta tacuna eta yucuquí. Vahi tánasihini máitavacainahini eta mavanairipiana, taicha vahi táurichahini ena achaneana nácani tivarahanahi ticaijuheana ema Viya, taicha váhivare nasamavahini eta náuchucuirahi, tayanapane nápepejiricavahini te áñoana eta nacapasirahi eta sárareana. ² Te yátupinahini táurichavacahini eta náichirahi eta nayeherepi, vahi nacuapepejiricavahini nacamavahuhini ena tiyujaracarahiana, énerichuvare ena achaneana tisamavannairipahini eta náuchucuirahi. ³ Taicha tacamunuhi nápechava te áñoana eta nacapasirahi eta sárareana, taicha tíápechavana ticapecaturanahi. Étaripa eta táepeniranahi eta sárareana táemecharairicavaca eta nacapecaturairaripa. ⁴ Taicha eta táitineana eta toro, étapa eta chivu, yátupiquenehi váhiquene táratahaimahi tacaepaha eta pecatuana.

⁵ Étasera te tíucupaicayareipahi te juca apaquehe ema Cristo, ánipa macahe mayehe ema Maiya: “Píti Tata, vahi pácamunu eta nucamavahuhini nunaquicavahipucaini te piyehe, táitinehi eta sárareana. Píti píjaracanuhi eta juca náquehehi. Váhisera táemepururecavaimahi eta píjarasiranuhi. Eta náquehe tisuapaviyare jácani pivanesiranuya. ⁶ Váipavare pácamunu eta nacamavahuirá ena achaneana eta sárareana, náijuchahini te pimirahu, táimicapachahini eta tacaepahairayarehi eta pecatuana. ⁷ Núti, tímitecanuhi puíti nítauchayare tamutu eta pivarahaqueneanayare eta nuyehe, píti Tata. Nusuapaviyare te tamutu eta pituparasiranuhi tacaquenehi eta te Sagrada Escritura” macahepa.

⁸ Tiuri puíti, nuvaraha eacutiarayare eta vaipa mácamunuhini ema Viya, váipavare máurica nácamavahuhini eta sárare náijuchahipucaini ena achaneana, navarairahi táepahayare eta napecaturana, tayanapane nayehe-repichucha eta nátauchirahi eta vanairipiana. ⁹ Énerichuvare, nuvaraha

epanerechavare eta juca máechajiriruva ema Cristo: “Tímitecanuhi puiti nítauchayare tamutu eta pivarahaqueneanayare, piti Tata”. Eta tacahe, vímatiequenehahi vaipa tácamunuhini eta táinapure nayujarasirahi ena achaneana. Taicha ema Viya máitsivachahi eta apana, arairupa, taicha ema Cristo macarichuhi máitauchahi eta mavarahaqueneana ema Maiya.¹⁰ Jéhevare, ema Viya tépachiahaviripa máichavenehi ema Cristo, eta masupirahi máitauchirahi eta mavarahaqueneana ema Maiya, máijararecahi eta máquehe eta máepeninahavihi. Étaherichuhi máicha, vahi mápepejiricavahini.

¹¹ Namutu ena nani tiyujaracarahiana vahi nanaracahini. Tamutuhi sácheana ticamesavana nanacahi eta námavahuana. Vahi táechuquihahini eta náichirahi eta juca. Tájinasera váhiquene tacaepahahini eta pecatuana.¹² Émasera ema Jesucristo étaherichuhi eta máichirahi. Váhiquene mápepejiricavahini. Tacahe, téjacaripahi te mavaure ema Viya.¹³ Énerichuvare puiti eta máejasiripahi, macuchapavacaripa eta macaepuyusiraya ema Viya te mamirahu ena ticitianacanahi éma.¹⁴ Taicha eta máepenirahi, eta mámvahuhi me Viya eta máquehe. Tétavicavainehi eta tajacapacarevahi me Viya eta máepachiasihaviyarehi viti máichuhaqueneanahi. Váhiquene tacamunuhini mápepejiricavahini.¹⁵ Ema Espíritu Santo, étarichuhivare tacutihi eta máechajiriruvahi, títametacahavihi.¹⁶ Ani macahehi: “Eta nutratuneyare arairu nayehe ena nani te jena sáchehare, níjaracavayare nuratucamurechayare te nasamureana eta nuvanairipiana. Najiricainapa te napanereruana”.¹⁷ Ánivare macahe: “Yátupina eta nucaepahairayare eta napecaturana. Vaipa néchaimahi eta natapiravanaini éta pa eta navainarajivanaini” macahepa.¹⁸ Tacahe, nuvaraha eacutiara eta juca: Te yátupihí táepahairahi eta pecatuana eta mámvahuhi, vaipa tácomesahini tápepejiricavahini nacamavahuhini ena apamuriana.

Vicasíñavayare eta vicaijuheiraya ema Viya

¹⁹ Tacahe, nuparapenaveana, vácasiñava yátupi eta vítecapauchirayare ema Viya tayehe eta mávihahi Santísimo, táichavenehi eta máepachiasirahavihi te máitine ema Jesucristo.²⁰ Véhicayare eta juca arairu achene mavejiaruihi, yátupi eta tacaijuhériahi me Viya. Tájinapa táichejimirauchahavihini taicha mavejiacahi tamutu ema Cristo, eta máepenirahi te crusu.²¹ Tacahe éma, yátupiquene tiyujaracarahi eta veyehe taicha émaquenehi téchahi namutu ena machichanaveana ema Viya.²² Eta tacahe, tatupiruvayarehi eta visamureana eta vicaijuhéraya ema Viya. Vácasiñavaini eta mayehe, vahi véñamavaimahi taicha éma masipacaripahi eta visamureana apaesa tacuija vitapiravaina tayehe eta vipecurana. Tájinapa eta táechipejicahavihini eta vipecurana, tímicutijiricavahi vicavahini eta te tapachinaquene une.²³ Eta tacahe, vímianava vétumechava eta véhisirahi. Vahi viyacujimahi. Yátupina eta vicuchapira eta vícuchihí taicha ema Viya máitauchayare tamutu eta máijararuvahi eta veyehe.²⁴ Puiti vétumechavayare vímicatajiricacayare eta tápajusiravaina eta vémunaravainaya. Vímitucacayareva eta víchirayare eta táuriqneana.²⁵ Váhivare viyacujimahi eta viúrujisiravana. Vahi ecucutihini ena vichamuriana, tinerejicavanahi mayanarahanahi te viúrujicava. Vétumejiricacayaresera, tavetijipa puiti eta vímairapa eta tánehirapa eta masacheraya ema Viáquenu eta machavirayare.

²⁶ Taicha te ímiyanavaichuchapuca icha eta pecatuana, tayanapanehi ímatiripahi puiti eta yátupiqueneana, eti émepururecaripahi ema Cristo eta ímicapasirahi táichavenehi eta epecaturana. Páurehesami, taicha nájina apanainahini ecaseñahini. ²⁷ Ena nani náemepururecaripahi ema Cristo, tétavicavahi eta tamuracavaya eta náicuñayare. Tisiapanayare eta táíñehiquene yucu táijurequene. Eta juca eta náicuchihi návihayare ena ticitianacanáhi ema Viya. ²⁸ Tacutihi acane eta macaicuñaira mácani téjecapavahi tayehe eta mavaniripiana ema Moisés. Te natiarihhipuca apinanahi, mapananahipuca ena testigoanahi, tímahanahi eta máejecapiravahi, tatuparacahi nacapacavaneyarehi ena tuparairucana. Vahi tíjapanucaremahi éma. ²⁹ Tásiha, tétavicava muraca eta náicuñayare ena témepururecanahi ema Machicha ema Viya, ¿masi? Taicha náemepururecavahivare eta máitine máepusairuhi, nacaecahivare ema Espíritu Santo, náemepururecavahivare eta máemunasi-ravacahi ema Viya. Váhivare návarahahi náimati eta máitine máepusairuhi, étara vivachahi eta majacapirahaviyarehi ema Viya. ³⁰ Vimutuhi vecha eta máechajiriruvahi ema Viáquenu, ani macahehi: “Núti tituparacanu nícuñasi-ravacayare. Nútichucha némecharecavacayare éna”. Tásiha, ánvare macahehi: “Ticayaserehianayare ena achaneana te numirahu”. ³¹ ¡Tipicacarequenehi eta náicuñayare ena témepururecanahi te mamirahu ema Viya, tamutuquene máimaha!

³² Németeacaserá ímiyanavayare éti tauri eta éhisirahi. Écharichuhi eta ítaresirahi cape juca, te épanavainapa eta ejacapirahi eta juca tajarahiquene máechajiriruva ema Viya. Ichapemurihi eta ecatajivairahi naicha ena ticitianacaheanahi. Ecamichahisera éti. ³³ Etiarihihí éti ecaumehacasihí ecaehanahi te namirahu ena achaneana. Etiarihivare éti ímicatacanahi tayehe eta náichavaquenevanahi ena ticaehanahí. ³⁴ Ejanuhivare nácani ticaeratanahi te cárcel. Tacutiquene ecurisamurechavachucha eta naverejisiraheanahi eta ímahaqueneana, taicha échahi éti tatiarihihí eta ímahaqueneanayarehi te anuma. Tétavicavahi tíuripanahi tayehe, máitavacacahi éta. ³⁵ Tásiha puiti, vahi ecuyacujihini. Étumechavasera eta ímitusirahi eta máechajiriruva ema Viya. Éta tíurichaheyare, ejacapayare eta mavachachiraheyare ichapequeneya. ³⁶ Ecayehechahavare paciencia. Ímiyanavare ítaucha eta mavarahaquenehi ema Viya, tásiha yátupina ejacapainapa eta ícuchi eta mayehe. ³⁷ Taicha eta Sagrada Escritura, ani tacahehi: “Vaipa máyeremahi márajapainapa ema Cristo ema vicuchapaquenehi”. ³⁸ “Nácani natupiruvahi eta nasamureana, ticasíñanuanayarehi eta náitare-sirahi. Énasera nácani tichavacuejehavanahi, nucaerajicavacayare táicha” tacahepa. ³⁹ Vítisera vahi vácutimahi ena tichavacuejehavanahi, énajivaya tímítaequenehavanayare. Vítisera viti vímiyanavanahi eta vicasiñavaira me Viya, vicuchuchayarehi eta víachanevana táicha.

11

Tétavicavaya eta viúricacareva te vicasiñavahi mayehe ema Viya eta vítaresira

¹ Te yátupi visuapa eta máechajiriruva ema Viya, vicasiñayare éma, vicasiñavare eta mayehe eta máitachirayare tamutu eta májjararuvanahi, tayanapane vuíchaha vímahaimahi. ² Ena víachucanaveanaini, tétavicavahi eta nasuapajiraivahi. Macunachavacahi ema Viya taicha eta nasuapajiraivahi.

³ Tacutiquene, te visuapa eta máechajiriruva ema Viya, vímatiequeneha eta máepiyasirahi acane eta juca apaquehe, tájinarichahasera eta táimahacarehini. Visuapahi tamutuhi máítaucha eta mapanereruhi, máetupirisirahi tamutu eta vímahaqueneanahi puiti.

⁴ Émaripa ema víyarahaini Abel, eta masuapajiraivahi mayehe ema Viya, tétavicavahi eta tajacapacarevahi eta mámavahuhi mayehe ema Viya, tacachuricahi eta mámavahuhi ema maparape Caín. Tásiha, ema Viya macametarapihi eta majacapacarevahi ema Abel. Puíticha, májinaripahinéni, ánaquiaparipahi eta máepenirahi, tanasihisera eta tacunachacareva eta masuapajiraivahi.

⁵ Étapa eta masuapajiraivahivare ema víyarahaini Enoc, vahi máepenamahini te juca apaquehe eta mayaniraya te anuma. Tamutuhi eta máquehe mámahi tayehe eta apana vítaresira, eta mámirahi ema Viya. Eta Sagrada Escritura táechajisihahi eta macurismurechirahi ema Viya. Táitusiava, mámapa éma. ⁶ Tásihasera víti, te tájinahi eta visuapajiraivainahini me Viya, váiparinehi vicurismurechaimahi éma. Eta vicaijuheiraya éma, tativayarehi tacamunu yátupina eta vicasíñavaira mayehe, eta majacapirahaviya, viúricareyare máicha.

⁷ Émaripa ema víyarahaini Noé, ticasíñavahi me Viya. Tásiha, tijacapacarepa. Taicha masuapahi eta mavanecasivahi máepiyasirayarehi eta ichapequene pacure, eta macuchucuiyavayarehi éma, énapa ena machichanaveana tayehe eta ichapequene une. Tájinaichahanéni ecutiararenahini eta taquivairayarehi. Máichuhavacavarepa ena apamuriana achaneana nasiapavare. Tícaicuñanapasera, taicha eta namasuapirahi.

⁸ Émapa ema víyarahaini Abraham, masuapahivare eta máichuirahi ema Viya, májjarasirayare eta apana apaquehe mávasayarehi. Tacahe, ema Abraham tíuchucapa te mávasaini, váhinéni máimatihini távihuapuca eta macaijuheyarehi. Ticasíñavahisera me Viya eta mámirahi. ⁹ Eta máitecapirahi, tímiyanava eta macasíñavairahi me Viya. Manasipa macavasahi eta apaquehe májjararuihi ema Viya, tayanapane vuíchaha mayehenahi eta apaquehe. Tájinavare mapenainahini. Cárpachucha eta mapenahi. (Ema machicha Isaac, ene macahehi eta máítaresirahi, émapa ema mámari Jacob. Taicha éna, énerichuvare natuparacahi eta juca apaquehe návasayarehi.)

¹⁰ Émasera ema Abraham, vahi máeñamavahini. Yátupihí eta macasíñavairahi, ticuchapavaichucha eta májjarasirayare ema Viya eta mávasayare máepahacacayarehi eta tísihaquenyarehi te mavahuana ema Viya, máetupiriruihi tamutu.

¹¹ Ésuripa, esu Sara ticasíñavahivare mayehe ema Viya, máítachayarehi eta májjarasirava eta sucachichairaya, ichavicachicharipahinéni. Macheruhivare ésu. Májjaracahisera ema Viya eta suchicha taicha eta susuapirahi eta máítauchirayare ema Viya tamutu eta májjararuvanahi eta suyehe. ¹² Tacahe, ema Abraham ichavicachicharipahivare, mapaenu-mavapa ticachicha. Tásiha, tíuchucanapa ena camuriqueneana mámaríequeneana. ¡Tétavicavahi eta nasimutuvahi! ¡Vaipa natupachacarehini!

¹³⁻¹⁴ Tacahe, namutu ena nani néchajisihagueneana, tímiyanavana eta nasuapirahi ema Viya tamutu eta náitaresiranahi. Tétavicavahi eta nacasíñavairahi eta máítauchiraya eta májjararuvanahi. Te navapureana, náimahapa eta návasaquenyarehi. Tásiha, vahi náetupiricavahini eta nanasirayare te juca apaquehe. Navarahaipahi náitecapauchavaneyarehi eta arairu avasare

natanujiriruhi. ¹⁵ Éta tímicaecherachahi vahi nacatiequenehahini eta apaquehe návinénihi, taicha vahi náechajisihahini nachavahini. ¹⁶ Natanucahísera eta arairu apaquehe tíuripana, eta tiáviha te anuma. Eta tacáhe, tétavicavahi eta máurismurevahi ema Viya eta nayehe, táichavenehi eta nacasiñavairahi eta mayehe éma. Taicha máicuchavacahi eta arairu návasayarehi, émairahi nacaiyaquenehi éma.

¹⁷ Apanavare eta máimerechirahi ema Abraham eta masuapajiraivahi, te ticavanahipa eta macapasirayarehi ema machicha Isaac, máijuchirayarehi eta macamavahuiraya me Viya. Vahi macatiequenehahini ema émanaracavahi machicha. Taicha yátupihí eta masuapirahi ema Viya eta máechajiriruva, ani macahehi: ¹⁸ “Ema pichicha Isaac, níjaracayare ena camuriqueneana mámariequeneanayare”. ¹⁹ Taicha ema Abraham máimatihí eta tamutuirahí máituruequeneha ema Viya. Maratahahi macaechepuca ema Isaac te táequenepa eta máepenirahi. Téhesera te macapacayarepáini ema machicha, ema Viya téchajicapa. Vaipa máisapahini eta macapasirayarehi, taicha máimahapa yátupihí eta masuapajirairavahi ema Abraham. Tásiha, tímicutijiricavahini máechepurénahini ema amaperu Isaac.

²⁰ Émapa ema Isaac, yátupihivare eta macasiñavairahi me Viya eta máitachirayare eta máechajiriruvana. Te ichavicapa, mabendiciónchapa ema machicha Jacob émapa ema maparape Esaú, mavarairahi najacapayare eta táurinaqueneana máijararuana ya ema Viya.

²¹ Émaripa ema Jacob, yátupihivare eta macasiñavairahi me Viya. Te tiánehipa eta máepenirayarehi, énerichuvare mabendiciónchapa ena apinana machichanaveana ema José, mavarairahi najacapayarehi eta náicuchiana. Te títipiricapa tamutu, téneuchavapa me Viya, ticayupaicaripa eta te mayupairiquí.

²² Émapa ema José, te tiánehipa eta máepenirayarehi, macaechajiriruvapa eta náuchusirayare ena israelítana tayehe eta apaquehe Egipto, nayanirayare te apaquehe náicuchihi. Eta macasiñavairahi mayehe ema Viya, macavanairipipa eta náunasirayarehi eta máperana éma, tásiha, námayarehi te náuchucapa.

²³ Énerichu eta nasuapajiraivahí ena ticachichanahi ema Moisés, ticasiñavanahi mayehe ema Viya. Vahi napicahini eta mavanairipiana ema rey eta nacapapajisirayarehi ena amuyana ajairana. Eta náimairahi eta máurinavahi ema amuya, nayumurucapa éma. Mapana caje eta nayumurujirisirahi.

²⁴ Tásiha, náitucahi eta sucajurusirahi esu esena rícoquenehi, taicha ésu, machichahi ema rey.

Tacahe, ema Moisés, te ichanarupa énerichuvare tisuapajirahíhi. Vahi macatiequenehahini eta majunijiasirayarehi esu ticajurucahi. ²⁵ Váhivare mapicarahini eta macatajivairayarehi eta macachanerayare ena majaneanana machaneranahi ema Viya. Vahi tavayuacahini jácani tájiparacana pecatuanahi te apaquehe. ²⁶ Ticasiñavaipahí éma eta tatiaríhirayare eta máimahaqueneanayare táitsivanayare eta macatajivairaya táichavenehi eta macatiuchirahí ena machamuriana, tacutihí eta macatiuchirahavihi víti ema Cristo. Tájinahinéni mácamunuhini eta táimahaquenehi tayehe eta avasare Egipto.

²⁷ Táichavenehivare eta masuapajiraivahi ema Moisés, vahi mapicarahini eta masemirayare ema rey tayehe eta Egipto eta macuchucuiravaca, má mavacahi ena machamuriana israelítana. Tétumechavarichucha taicha

ticasifñavahi eta majaneasiravacaya ema Viya, tayanapane máimahasi ema Viya.

²⁸ Eta masuapajiraivahi ema Moisés, máitachupa eta mavanairipi ema Viya. Mavanecavaca ena machamuriana nacapacayare eta uvesachicha, nátsiquiriacaya eta iti te tapaja eta napenana, apaesa vahi macuesirujicavaca ema ángele ema tiámayarehi eta náepenira ena náechavimuri te jácani peti.

²⁹ Énaripa ena machumariana ema Moisés, eta nasuapajiraivahi, naratahahi nánueca eta ichape Mar Titsi. Témunahiricavahi tiájiji te túpiricuha eta nayanihayarepahi. Tásiha, ena masuntarurana ema rey te Egipto, navarahavarepa tiánuecana. Tichavapasera eta une. Téricanapa namutu. ³⁰ Táichavenehivare eta nasuapajiraivahi ena israelítana, tiáquipaicavapa naicha eta tayuchamarana eta avasare Jericó, te jena siétequenepa sache eta návicuuarasirahi eta avasare.

³¹ Ésuripa esu Rahab túhusini, eta susuapajiraivahi, vahi suépenahini te tépenaracanapa ena masuapajirairahanahi. Taicha ésu sucatiuchapa ena vanairucana me Josué.

³² Nuvarahahineni numetacahe tamutu eta nasuapajiraivanahi ena apamuriana: ema víyahaini Gedeón, ema víyahaini Barac, ema víyahaini Sansón, ema víyahaini Jefté, ema víyahaini David, ema víyahaini Samuel, énapa ena víyahaini profetanaini. Nararihivare ena apamuriana, tétavichavahivare eta nacasiñavairahi mayehe ema Viya. Váhiserá nunaca támutu te juca eta náijareana. ³³ Eta nasuapajiraivahi éna, nararihihi ena titahacanapahi ena nánarana te avasareana. Nararihihi ena apamuriana aquenucanahi, tatupiruhi eta nagobernachirahi eta návasana. Ema Viya, eta majaneasiravaca ena apamuriana, máeratajacachavacahi eta tadjacana eta táifehiqueneana sárareana. ³⁴ Ena apamuriana, macaemahinehivare eta táijurequene yucu te jórnu. Ena apamuriana, macuchucuhavacahi te navaraha náechatinucavacayarehi ena nánarana. Nararihihivare ena matumerahanahi, máetumechavachiserá eta nacaemataneasirahi éma. Ena apamuriana, tétavichavapa eta náitupajijiasiravapahi tayehe eta guerra, náitahavacapaipa eta ichapequeneana ejército ena nánaranahi. ³⁵ Natiarihivare ena esenana, eta nasuapajiraivahi, mápechava máimichava ema Viya títarecana ena najaneananaini náepenaqueneanahi. Natiarihivare ena apamuriana náemépenahi eta nacatajivairasamihi. Nacamichahiserá tamutu taicha eta nasuapajiraivahi, namavarairahi náinajiacahini ema Viya, navarairahivare náimayaharehi eta táuricacarequene eta náitaresirayare te náechepucapa. ³⁶ Natiarihivare ena apamuriana, ichapemuríhi eta nacaehirasamihi, ticaestanahivare, táimitiacavachivare te cadena tayehe eta cárcel te nacaerataiyapahi. ³⁷ Ena apamuriana, natupisiruanapahi te márijahiana eta nacapasirapahi ena achaneana. Ena achaneana, eta návarairahi náiminajicayarehi eta náehisirahi ema Viya, nayuchatihecavare. Ena apamuriana náechatinucavacapahi te espada. Napanajiricavaca ena apamuriana, náimijunavacavarepa te napenana. Tiyananapa témostajiricavanapaipa. Tépacuchavanapa te taparumachichana eta sárareana eta náechuriasirapa eta nacamuiríhaquene. Tájinapa naviyavapahini taicha eta napaurevavacapaipa. ³⁸ Ena nani páureanasamí, ichape eta napicauchacarevainihi. Vaipa náuríhahini eta najunanairisirahi te mávapahiana

apaquehe eta tataracuana eta máriaana, nacapenajuechapahi eta enuru-juheana. ³⁹ Jéhesare, namutu ena nani néchajisihagueneanahi, ticatajivanahi eta náitaresirahi. Majacapavacaipahi ema Viya táichavenehi eta nasuapajiraivanahi. Vuíchahasera náijahúchavahini nacaijaracasihini eta náicuchianahi me Viya. ⁴⁰ Taicha mavarahahi éma tihetamurichahaviyarepa viti véquenehanahi visuapanahi ema Jesús énapa namutu éna. Vicuticacayarepa eta viúricacarevayare vimutu.

12

Vicutiyare ema Jesús eta macamichirahi tamutu

¹ Puíticha viti apanavare vicamichayare tamutu eta vicatajivairana, vácutivaca eta nacamichira ena nani náinapureanahi téhicanahi ema Viya. Taicha puiti éna tímararacahavianahi víti tájahapuca táicharacavahi eta vipaisirahi viti. Eta tacahe, tituparacahavi vínajicayarehi eta táitiasirahavihi eta tájiparacana, tiámaparaurahiana tayehe eta pecatuana. Tacahe, vicamichayare tamutu, táurivaya eta vicaemataneasirahi ema Viya, apaesa vijacapa eta vícuchihi. ² Vicutiyareva ema Viáquenu Jesús. Éma, túmitucahavihi eta véhiruhi, éma tínapuisinahavivare eta masuapajiraivahi. Tayanapane ichape eta matsirihahi te máimahapa eta macatajivairayare eta macaetatairayare te crusu, vahi machavacuejehavahini. Tétumechavahisera taicha máechahi éma tatiarihíhi eta táitsivayarehi. Tétavicavahi eta máurisamureva eta máejasirahi te mayehe trono te mavaure ema Maiya.

³ Puíticha éta, epanerequenehayare éhicayareva eta macamichirahi ema Jesús tamutu eta macatajivairahi naicha ena ticatianacanahi. Ene ecahe-yaere éti, vahi ecuyacujihini, étumechavayaresera eta éhisirahi éma. ⁴ Táitaurevaquene éti, tájinaichaha ímahahini ecatajivahini táimicapacahehipucaini eta ínajiasiraipa eta tájiparacana te juca apaquehe pecatupaire. ⁵ Vahi ecuemítisica eta máemunasirahehi ema Viya te jácani máemecharésiraheana táichavenehi eta machichaheirahi. Taicha ani tacahehi eta Sagrada Escritura: “Piti nuchicha, vahi picueñamava jácani máemecharésiraviana ema Viya, mavarairahi máetupiricayare eta pipanereruana. Váhivare picuina- jicava tayehe eta maconsejachiraviana. ⁶ Taicha éma, máemecharecayarehi nácani máemunaruanahi machichanaveanahi” tacahepa. ⁷ Tacahe, ecami- chayare éti jácani máemecharésiraheyare ema Viya táichavenehi eta máemuna- sirahéhi eti machichanaveana. Tácuti mácani achane, te matiaríhi ema machicha, túmerecavahi eta tacaiyairahi eta mapena eta máemecharésirahi ema machicha, mavarairahi máetupiricayare eta mapanereruana. ⁸ Yátupíhi eta máemecharésirahavi ema Viya vimutu viti machichanaveana. Téhesera te tacuija ímaha eta máemecharésiraheana éma, máimerecaripa éma vahi yátupinahini machíchahénahíni. ⁹ Tacutihi eta vijurusirahi viti te amuya- havirichaha. Témecharecavahi ena ticachichahaviana, visuapavacapa táicha. Tásiha, tavetijipa eta visuapirayarehi ema Tata Vicaiyaquenehi apaesa éma tíjaracahaviyarehi eta táurivayarehi eta vítaesiraya. ¹⁰ Ena ticachichahaviana, ánipirichu eta náimitusirahavihi jácani eta navarairahi éna viúriyarehi nayehe ena achaneana. Émasera ema Viya, tiúripanahi eta vímitucasivahi mayehe. Éta tiápajucava tiúrichahaviyare. Tépacinachahavi- yarehivare éta. Mavarahahi vicutiyarehi eta masantuvahi éma. ¹¹ Jéhevaere, te tatiarihípuca eta vicaemecharahirana, vahi viúrisamurémahí táicha. Ticatihi

visama. Téhesera te vétupiricava táicha, tétavicavayarehi eta viúricacarevaya te visamureana taicha tatupiruhi eta vítaresira.

Tétavicava tavarahacareva te visama eta máechajiriruva ema Viya

¹² Tacahe, nuparapenaveana, nutuparacahe étumechacaca nácani nayacujhipuca. Ímicatacaca eta etupihaira muraca eta éhisirahi. ¹³ Énerichuvare eta ecaijuheira eta me Viya, etanucayare tatupiruina eta ecaijuheira eta me Viya, etanucayare etupiruina eta eyanirayare. Vahi ecuepiñuñuica, machu náevejuca ena matumerahana ena téhicaheanahi te équene. Táuri eta íámiracacaina, apaesa nacaravahuyare náetupirica eta napanereruana, náetumechavavare énajiva.

¹⁴ Tacuijavare ecuichiravainahi nayehe namutu ena achaneana. Yátupina eta epachinavaina te esamureana étapa eta iúriya eta ítaresirana. Taicha te vahi tiúrihi eta ítaresirana, vahi eratahaimahi ítecapaucha ema Viáquenu. ¹⁵ Ejaneacavaicha yátupina, machu etiarhipuca eyacujhi, tásiha émpurureca eta máimicatasirahe ema Viya. Tacuija eta ecuimipananajicava eta esemirana. Machu tapareacavaca ena echamuriana eta evainarajivana, tacuti jácani sucureca máurirahana, tapareacayare eta apana sucureca táurinaquenehi, táimicapacapa. ¹⁶ Nacuijavare te etaracu nacuveha esu apana esena. Nacuija nacuepuru jácani tipicauchacareanahi. Vahi ecucuti ema achane ticaijare Esaú. Eta mavarairahi tíjahúchava tinica, máijararecapa eta máicuchinihi mayeheníhi, taicha éma, máechavihi ema maparape. ¹⁷ Écharichuhi éti, te táequenepa, te mavarahainipa majacapa eta mayehe bendición ema maiya, vaipa majacapacarehini, mametainipa tíyahahi. Vahi maratahahini ticajimuyacahini ema maiya.

¹⁸ Éti, tájina étaparacaina eta napisirahi ichapequenehi ena achaneana israelítana, acane te náitecapauchapa eta cerro Sinaí. Eta jara cerro, tatiarihihi eta yucu timuruhi te tápusi. Énerichuvare te távihahi eta timapicuquenehi, távihahivare eta táíñehiquene emarere. ¹⁹ Muracaquene eta machuja ema ángele. Muracavare eta mahu ema Viya eta máechajisiravacahi éna. Ichapequenehi eta napisirahi ena tisananahi. Eta tacahe, tiyaseserecanapa vaipa macuechajicavacahini. ²⁰ Eta napticacarasiravahi, navaraha tichavacuejchavana. Ichapequenehi eta tapicahucareva eta cerro, taicha tatiarihihi eta muraca vanairipi, ani tacahehi: “Ecapaca nácani achane, jácanivare sárare tiápanapuca te juca cerro. Ecapacavaneyarehi te márijahi, te váhipuca ticayubarayarehi te lanza” tacahepa. ²¹ Tacahe, tétavicavahi eta táíñehiva, émaripa ema Moisés ani macahehi: “Nuyayacarenecha eta nupisirahi” macahepa. Nuparapenaveana, numetacahe: Tájina étaparacaina eyehe tamutu eta juca tipicacareanahi.

²² Étisera tachichaheanapa puiti eta mávasa ema Viya Vicaiyaquene, ticaijare Arairu Jerusalén*, eta távihahi eta cerro Sión te anuma, te náurujisihavahi ena camuriqueneana ángeleana eta najirauchirahi ema Viya. ²³ Éti esiapapa eta nasimutuva ena ecutiqueneanahi machichanaveanahi ema Viya. Ecajucunavare eta nalista. Natiarihipa ánaqui eta náchanevana ena

* **12:22** Te pivaraha pecha eta apana tayehe eta Arairu Jerusalén, pitanuca te libro Apocalipsis 21.2-27 étapa 22.1-5.

machichanaveana náepenaqueneana. Natupiruhi eta náitaresirahi. Tipachinavaqueneanaripahi puiti, sántohivare. Matiarhivare ema Viya, yátupiquenehi Juese viyehe vimutu víti. ²⁴ Matiarhivare ema Jesús ema tiyaseurahiquene eta viyehe. Émahi ema tiámahi eta arairu matratune ema Viya. Émaripa máepusaicapa eta máitine tasipahacahaviyarehi, apaesa vijacapacareyarehi me Maiya. Eta máitine ticunachacarepanahi tayehe eta máitine ema víyahaini Abel.

²⁵ Eta tacache, échapavaicha éti. Vahi ecuepuru eta máichuarapianahi ema Jesucristo. Machu ácuti ena tépuruanahi eta mavanairipiana ema Viya, máimiturapianahi ema Moisés. Éta pa tímicuñacavacahi éna. Vivetijinapapuca víti eta vícuñayare, te vicaepaquecupuca eta máichuarapiana puiti ema Viáquenu, taicha éma tiásihahi te machacaya ema Viya te anuma. ²⁶ Taicha eta acane, eta mahu ema Viya, tétavicava eta tamuracava. Tiyayacarehi taicha eta apaquehe. Puítisera, ani macahehi éma: “Étaherineyare tiyayacare nicha eta apaquehe. Váhisera tácarichuimahi. Éneyareichuvare te anuma” macahepa. ²⁷ Eta juca máechajiriruvahi, tímaticareipahi eta táitavirayare tamutu jácani tyamuricanahi máepiyaruanahi ema Viya te juca apaquehe. Tacarichu tanasiyare jácani máitavacacaqueneana taicha mayamurianahi.

²⁸ Étaripa eta mávasa ema Viya, mavarahaquenehi máimiávihahavihi, máitavacacaquenehi éta. Eta tacache, vihasulupayachaparaca éma. Vétaviuchainavare eta vipicauchiraya éma. Tásiha, vicurisamurechaina éma eta vivapinava ichape eta vijirauchirahi éma. ²⁹ Taicha ema Viáquenu macutihi eta yucu, maratahahi máítaequeneha mámainuca.

13

Vicurisamurechayare ema Viya

¹ Tiuri, nuparapenaveana, vahi ecucainajiruva eta émunajirisiracacahi, táichavenehi eta echamuricacairahi te mavahuana ema Viya. ² Vahi ecuemitiscava eta táurirayare eta ejacapiraya ena echimarana te epenana. Taicha tajuricati ángeleanainapahi nácani tipaipiuchaheanahi, éta vahi ecuimatihí.

³ Énerichuva échayareva nayehe ena ticaeratana. Ejanuvaca éna, táimicutijiricavahini étinahini ecaeratahíni ecachanevacahini. Énerichuvare ejanuvare nácani námejapanuráruana taicha éna étarichuhi eta náqueheana tacutihi eta iáqueheana éti.

⁴ Ámutu epicauchacaca éti ecaimaqueneanaripa: eti esenana, étipa eti ajairana. Taicha máimaha tiuri ema Viya eta evehacacairahi. Tacuijasea eta échipeacava eta evehacacairahi ena apanana. Ema Viya máicuñacayarehi nácani tivehacacanahi vahi nacuchapahini náitachavahini, énapa ena ticayepacacanahi.

⁵ Váhivare tacuvayuacache eta plata. Taratarichu tacurisamurechahe jácani ítrevahi ecayehequenehi. Ema Viya ani macahehi eta máechajiriruvahi: “Vahi nujunijicavimahi, váhivare némitisicavimahi” macahepa. ⁶ Tacache, vicasíñavayare mayehe ema Viya te viyaseaca. Ani vicaheyare te visamure: “Ema Viáquenu ema tímicatacanuhi. Vahi nupicaimahí jácani náichiranuhi nácani achaneana” vicaheyare.

⁷Échavayare ena timitucaheanapaini tímisamaheanahini eta máechajiriruva ema Viya. Natupiruhi eta náitaresiraini. Éti, epamicava ecutiyaire éna eta nacasiñavairahi me Viya.

⁸Ema Viáquenu Jesucristo, vahi máitsivacha eta máurivahi eta viyehe. Manasihi puíticha, étapa eta apajarahiyare. ⁹Eta tacahe, vahi ecuisapava ecuehica eta jácani apanapenejeiqueneana náimiturapiana. Tiúripa étumehicayare eta esamureana, táichavenehi yátupiquene eta máemunasirahavihi ema Viya. Étapasera eta nayeherepiana tayehe eta tinicacareana, vahi étaparacaina taicha tájinachucha táimicatavacahini ena ticayeherepianahi.

¹⁰⁻¹¹Eta nayeherepinihi ena tiyujaracarahiana tayehe eta santuario te Jerusalén, natuparahahi eta nanicasarehi eta námavahuana ena achaneana. Étahi eta navachachahi eta nacaemataneasirahi. Étasera eta sárareana námavahuanahi, navarahahi tacaepahayarehi eta napecaturana, éta, tituparacavaca vahi nacunicahini. Étachucha eta táitine mámahí ema náquenu ena tiyujaracarahiana tayehe eta téqueneha cuarto Lugar Santísimo. Étasera eta táqueheana, náijuchaquenyarehi te tachachacu eta avasare. Vítisera, mararihi ema apana tiyujaracarahi eta viyehe, apanapavare eta mayujarauhichahavi. Vahi énaparacaimahi ena náinapureana tiyujaracarahiana. ¹²Ema Cristo, ticatajivahi eta máepenirahi te tachachacu eta avasare, mavarairahi máepachiacahaviyarehi viti achaneana tayehe eta máitinerichu éma. ¹³Tacahe puítí, vínajicavayarehi eta nayeherepiana ena vijaneanana. Vahi étaparacaina viyehe. Yátupina véhicayare ema Jesús. Tayanapane vicatajivayarepuca, vicutiyaesera éma eta macatajivairahi. ¹⁴Taicha te juca apaquehe, tájina vahi táyeremahi eta avasareana étapa eta tayeherrepiana. Vítisera tachichahavipa eta avasareyare arairuyare. Apanainapa eta viyeherepiana víchaqueneanayare. Tétavicava eta vijamurachirahi viyápávane. ¹⁵Tásiha puítí, eta véhisirahi ema Jesús, tavaraha eta vijirauchiraparacayarehi ema Viya tamutu sácheana, yátiana. Te jácani tájahapuca víchararacava, váhasulupayachavare éma. Eta juca eta viámavahuhi eta mayehe. Éma vicavapayarehi. ¹⁶Énerichuvare, vahi ecuemitísica eta íchirahi eta táuriqueneana. Ecajiyareva ena echamuriana eta ecayehequeneana. Eta tímicutijiricavaipa eta iámavahuhi me Viya. Éta ecurisamurechirahi éma.

¹⁷Esuapayareva nácani timitucaheanahi, evapinavayare nayehe eta esuapajiraivahi. Taicha éna, tijaneacaheanahi eta iáchanevanahi éti. Náechahi éna eta ticayaserehianayarehi te mamirahu ema Viya. Ecurisamurechavaca éna eta esuapajiraivahi, tavapinacarénapa eta nacaemataneasirahena éti. Vahi ecuimipanerechavaca eta eyacujiva, emasuapajiraivapuca.

¹⁸Eyaseuchanuyare núti te eyujarasirana. Nucasiñavaipahinéni núti táurivaipahi eta nupanereru. Tájinapa níchiravainahini. Nuvaraha níchayare eta táuriqueneana nayehe namutu ena achaneana. ¹⁹Nuvarahasera eta eyaseuchinanu me Viya, máisapanuhini éma níjahúchavahini nuchavahini eta eyehe.

Ema Apóstole mayaseuchavacahi ena machamuriana me Viya

²⁰Ema Viya, tétavicavahi eta macanarasirahavihi eta vipanereruana. Éma tétavicavahivare eta máitupajijiasirava taicha macaechepucahi ema Viáquenu Jesucristo te máecari, apaesa émayarehi yátupiquenehi Pastoryare, tijanearahi viyehe viti machichanaveana. Tisipahacahavipa eta te máitine

apaesa máitavacacayarehi eta vicachanerayare éma. ²¹ Núti nuyaseuchahe me Viya, máimicatacahehini ítauchayare tamutu eta mavarahaqueneana, íchirahi eta táuriqueneana apaesa ecurisamurechahini éma te tamutu eta ítaesira eta éhisirahi ema Machicha Jesucristo. ¡Máitavacacayare eta vicu-nachira ema Cristo! Amén.

Eta táichecuaraqui eta natuparacasivahi

²² Nuparapenaveana, nuvaraha nuyaseacahe ácayehéni paciencia tayehe eta juca nuconsejarapihi eta eyehe. Ánipichichahi nájurehi tayehe eta juca nucartane. Jararihiserá camuriqueneana eta apana nuvarahahi numeta-ruheyarehini. ²³ Numetacahevare ema viparape Timoteo tiúchucuharipa te cárcel. Te máitecapavanepuca éma, nucachaneyarepahi te níteca eta ara eyehe. Nuvarahahi nímahapanahe.

²⁴ Néchajicahe emutu eti ejanearahiana ena vichamuriana. Échajisina-nuvaca namutu ena vichamuriana vicutiqueneanahi tisuapajirahianahi te jácani návihahi éna. Ani te juca, nucachanevaca ena vichamuriana náiteruana te Italia. Téchajicaheanavare éna.

²⁵ Nuyaseuchaheparaca emutu éti me Viáquenu Jesucristo, táetaviuchahini eta iúricarevaya máicha. Amén.

Tamutupa eta juca néchajiriruvahi eyehe.

**Eta macartane ema Santiago nayehe ena
majaneanana machamurianahivare,
náejanerepairuanahi te avasareana, ticaijare
SANTIAGO**

¹ Nuti Santiago, mavanaranuhi ema Viya, mavanaranuhivare ema Viáquenu Jesucristo. Nuvaraha nucaitecapa eta juca néchajiriruva eyehe emutu eti nujaneanana israelítana éjanerepairuanahi te tamutu avasareana.

Eyaseacayare eta ítupajijiasiravaina

²⁻⁴ Nuparapenaveana, nuvaraha nuconsejachahe: Te tatiarihinapuca eta ecatajivairana puiti juca ítasesirahi, vahi ecucainajiruva. Evapinavachucha, ácaseñava mayehe ema Viya. Taicha te yátupina ecasiñava mayehe, vahi tiáquipaicahémahi ema Váinaraji. Énerichuva ácamicha yátupina jácani apana táitecapaureheanaya. Ácuti nácani achaneana náitucahi ticaratacavana. Mavarahahi ema Viya tátupiruvahini eta ítasesirana. Eta tacahe, te tatiarihipuca eta ecatajivairana, ecaurisamurechavachucha. Evapinavaya, taicha iúripanayare eta iúchucuirayare.

⁵ Tacahe, te tatiarihinapuca eta téchacare, te váhipuca íturuequenehahini, eyaseacayare ema Viya eta ítupajijiasiravaina. Éma, tíjaracaheyare, taicha tájina mayavana éma. Váhivare ticajachahavimahi eta viyaseasirana jácani vicamunuqueneana. ⁶ Yátupinahisera ácaseñava me Viya eta eyaseasirana yare eta ítupajijiasiravaya. Vahi ecueñamava mayehe. Taicha te éñamavapuca, tímicutijiricavaipahi ecutihí eta táepacuruha eta une téquequerecavahi. ⁷⁻⁸ Taicha nararihi ena téquequerecavanachucha eta napanereruana. Vahi étanainarichuhini jácani navarahaquenyare náicha. Nácani tacahehi eta napanereru, éna tájina májaracaimahi ema Viya.

⁹ Émaripa mácani vichamuri, te páurehipuca eta máitasesirahi, tivapinavayaresera taicha eta máimicatasiraipa ema Viya taicha eta máemunasirahi. ¹⁰ Émaripa mácani vichamuri rícoquenehi eta máitasesirahi, énerichuvare tivapinavayareva, tayanapane títahapuca eta máimahaqueneanahi. Taicha eta vímahaqueneanahi te juca apaquehe, vahi táéñamacarehini, taicha títavayarehi tamutu. ¹¹ Ánipirichu eta táurinajiva eta flureana; taicha te járajapapa eta muracana sache, tacajiyujicapa. Tamutu títava eta táurinajivainihi. Témiricaipavare eta taflurena. Ene macahe mácani rico, vahi tánasimahi eta máimahaqueneana, tayanapane vahi macuvaraha táitava, máituchahipuca eta macaematamera.

¹² Tétavicava eta náurivayare nácani vichamuriana ticamichanahi tamutu eta nátajivanahi. Járajapayare eta sácheanayare eta najacapiraya eta táitsivayarehi maicha ema Viya, májaracainapa eta táurivayare eta náitasesirayare, taicha ticunachacareanahi. Tacahehi eta mapanereruhi ema Viya nayehe ena témunacanahi éma.

Máisapa ema Viya eta jácani víchavaquenevanaya, mavarairahi tétupiricahaviyare

¹³ Téhevare tatiarihinapuca eta éjecapiravaya jácani tamauriqueneanahi, vahi émimahi émeteaca ema Viya. Taicha vahi tásihaquenéna me Viya eta juca tájiparacana. Nájinavare mapamiruumahi náichahini eta júcana.

14-15 Nácanserá náquipairuvana tayehe eta tamauriqueneana, táuchurepa te napanereru tamauriqueneana, tásiha navaraha náichayarehi eta pecatuvana. Vaipa nanecapavahini eta náichiraipa. Téhesera te táequenénapa, étapa tivuchayarehi. Tíñehicha eta táimicapsiravacaina.

16 Némunarugueneana nuparapenaveana, machu éjcapava tayehe eta juca numetaruheanahi. 17 Ema Viya, étanarichuhi eta mapanereru. Vahi apananejinahi eta máuriva viyehe. Éma, tíjaracahivihi viti achaneana eta majaraiva, étapa tamicahuhi eta viáchanevana. Taicha tamutu eta juca táuriqueneanahi vijacapaquenehi puiti, tásihaqueneanahi me Viya. Vahi apaesasajiruinaichuhini eta táurivahi. Jéhevare eta yátupiqueneanahi. 18 Taicha acane tacahehi eta mapanereruana, mavarairahi vijacapayarehi eta yátupiqueneanahi máechajiriruvana apaesa machichahaviyarehi. Eta máitsivachirahi eta viáchanevana, ticaeherahi máitsivachayarehi tamutu eta apamuriana máepiyaruana te juca apaquehe.

Vímerecavaya yátupi eta visuapirayare eta máechajiriruva ema Viya

19 Eta tacahe, eti némunarugueneana nuparapenaveana, nutuparacachecha yátupina tauri eta esamiraina eta máechajiriruvana ema Viya. Vahi ecuijajahúchava esema. Epanerechinava eta échajisiraya. 20 Taicha nácani tiseमारairihiana, vahi étainahini náichahini eta mavarahaqueneana ema Viya. 21 Puiti te juca vítaesirahi, jararihi eta tavarairahi vípanerechaya tayehe eta tájiparacana, tamaeperajisira eta viáchanevana. Tétavicavavare eta tapamisirahivihi vicha eta tamauriqueneana. Púitiserá nutuparacache: Ínjajicapa tamutu eta júcana. Ecasamureyareva eta máechajiriruva ema Viya eta ímitucasivanahi. Yátupina esuapa. Jéhevare, éta ticuchucuhayare eta íáchanevana.

22 Ítauchayare eta tametarapianahi eta máechajiriruvana ema Viya. Vahi tacuejcapava eta epanereruana, machu ímijachapuca taratarichuhi eta esamararasirahi. 23 Vahi ecucuti nácani nasamararuchucha, tásiha vahi náitachahini eta tavanairipihi, tímicutijiricavaipa nácani tímacunachavanahi te espejo. 24 Tásihasera, vahi nasipacahini eta náimahaquenehi nachipeuquivahi. Tásiha, tiyananavanepa, náemitiscavanepa. 25 Étiserá ecutiyare ena natupiruvanahi eta nasamirahi táuriva eta yátupiqueneana vímiturapiana tásihaqueneanahi me Viáquenu. Vahi ecuemitisica. Tásiha, ítucayare enerejica eta táuriqueneana, esuapayareva eta ímitucasiqueneanahi. Tásiha, tétavicavaya eta íúrvaya táicha.

26 Nararihipuca nácani tímijachavanahi religiósana. Téhesera vahi náitucahini ticaratajachavana, ena nani téjcapavanahi eta napanereruana. Tájinachucha vahi émainahini nasuapahini ema Viya. 27 Vítiserá, eta vítauchirahi eta yátupiquene téhicacare, te vivaraha tájina véchajisiacarevaina te mampirahu ema Tata Vicaiyaquene, tatuparacahi vijapanuyare vítátiyare ena amaperuana váchachichana énapa ena náepenaimaqueneana tayehe eta nacamunuiravanahi. Tituparacahavihivare vahi víchaimahi eta pecatuvana te juca apaquehe.

2

Nácuticaca ejacapa ena achaneana

1 Nuparapenaveana, éti éhicanahi ema máitupajijihaquenehi Viáquenu Jesucristo, vahi táurichahini enerejicavaca ena echamuriana ejacapaqueneanaya.

² Étaripa te natiarihinapuca nácani nasiapauchahe te iúrujisirarevana íchirana eta culto, vahi macarichuimahi tiuri eta ejacampiraya mácani tiúrinahapahi eta macamuirihairahi, ticasurutijapahipuca eta oro. Énerichuvare ejacapyare mácani paure, tévichijihapahípuca. ³⁻⁴ Taicha téjecapavahi eta epanereruana, te macarichuhi mácani tiúrinamuirihapahi, échapajiricahi eta ecaejasirahi, mácanisera paure, te váipapuca ecuechajiricahi, váipapucaini ecuijaracahi eta máejasiha, tasapiha evanecainapapuca téjhapaica. Éti, vaipa étupicavaimahi eta juca enerejisiravacaichucha nácani ejacapaqueneanaya.

⁵ Némunaruqueneana nuparapeneveana, esamanuchaha. Ena páureanahi te juca apaquehe, majacapavacahi ema Viya, táichavenehi eta nacasiñairahi ema Machicha. Éna, tiápajupananahi eta náurivaya taicha ena ticaicuchianahi eta mávasa ema Viya taicha machaneranahi. Nacachaneyarehi ena apamuriana témunacanahi éma. ⁶ Étisera evarahapa ímitsirihavaca ena páureana, nasapihapa échapajiricahi ena rícoana. Ticutiripa vahi ímativacahini eta náemeratasiraheripa, te apaesachichapa éjecapava. ⁷ Ticutiripavare vahi ímativacahini eta nacaecahirahi ema Cristo, nacaecahihivare eta íamirahi eta máijare tacapicahuquenehi.

⁸ Puítisera éti, yátupiyare ítaucha eta ticunachacarepanaquenehi manairipi ema Viya tayehe eta Sagrada Escritura. Ani tacahehi: “Pémunacayare ema piparaepiya tácuti eta pémunasiravahi píti”. ⁹ Téhesera enerejicaichucha nácani émunaruanahi, ecapecaturaichucha eta emasuapirahi eta mavanairipi ema Viya, éta tiviucaheya. ¹⁰ Taicha te natiarhipuca nácani náitaucha tamutuyaréni eta vanairipiana, téhesera apaesarichu eta néjecapiravahi, étapa tiviucahehi eta náicufayare, tímicitijiricavahi vahi náitauchahini. ¹¹ Taicha ema Viya, ani tacahehi eta mavanairipihi: “Vahi picuveha esu apana esena. Váhivare picucapareca”. Piti, te váhipuca pivehahini esu apana esena, picaparecahiserapuca, piáviraichuhi picaviurevahi.

¹² Íurihainehi ejacaparalihini nayehe namutu, táurihini eta échajirisiravana. Vahi ecuemitisica eta tatiarhiraya eta sache ecayaserehiraya tayehe eta juca vanairipiana. Étara tétupiricahavihi. ¹³ Taicha nácani majapanurairahanahi nayehe nácani apamuriana, tájijnavare najapanucarevaimahi te nacayaserehipa. Nácansera tijapanurahianahi, ichape eta najacapacarevanaya me Viya te jena sáchezare.

Vímerecaya eta visuapajiraivaya étapa eta vicaemataneasiraya ema Viya

¹⁴ Nuparapenevana, nuvaraha níminecapaequenehaheyare. Te natiarihinapapuca nácani nacahehi: “Núti nusuapa ema Viáquenu”, tásiha vahi náichahini eta táuriqueneanahi, vahi tisuapacare eta náechajiriruvahi. Németeaca vahi yátupinahini nasuapahini ema Viáquenu. ¹⁵ Nuvaraha nímicutichinaheyare eta juca. Te mararhipuca mácani vichamuri ticamunuvahi eta mamuiriharapiyare, manicaquenerepipuca te sácheana. ¹⁶ Tásiha, mácani echamurihi tépiyacavahipuca tijapanurahihini. Máichahipuca: “Páurevisami piti, te picasarechahipuca, pépacuchava. Te pécupapuca, pinica”. Tásihasera, te vahi máijaracahini eta macamunquenehi, tamapurujichucha eta máichirahi. ¹⁷ Ene vicahe viti véhicana ema Viáquenu. Te vahi víchahini eta táuriqueneana, tamapurujichucha eta véhisirahi, vaipa tásuapacarehini.

¹⁸ Tiuri puiti, németeaca etiarhiyarepuca eti épuruyare eta juca numetarueanahi. Áninapapuca ecaheyare: “Tarataripa eta vicasañavairahi me

Viya. Vaipa étaparacaina víchahini jácani apamuriana táuriqueneana” ecáhë-
napapuca. Nútisera numetacahe: Vahi tisuapacaremahi eta ecasiñavai-
rahiji, te vahi íchahini eta táuriqueneana. Taicha eta íchirahi eta táuriqueneana,
étapa tímereuchaheya eta yátupirahi eta ecasiñavairahi mayehe ema Viya.
¹⁹ Éti ímijachaipapuca tarataripahi ticuchuchuhaheyare eta esuapirahi eta
matiarahirahi émanarichu ema Viya. Táitaurevaquene esuapahi eta matiarihirahi
ema Viya. Apanasica ena éreanana nasuapahivare eta matiarahirahi
ema Viya. Tayanapane eta nasuapirahi, váhiquene tiúchucuhanaimahi éna.
Énaripa, tiyayacareanahi éna te nasama eta máijare ema Viya. ²⁰ ¿Vuíchahacaru
ácaicutiarahini? Tiuri puiti, níminecapaequenehaheyare, taicha nuvaraha
ácaicutiara: Tacamunuhi íchayare eta táuriqueneana tacachaneyarehi eta ecasi-
ñavairahi. Tamapurujicha eta ecasiñavairahi te vahi ecuquichahini eta
táuriqueneana.

²¹ Nuvaraha némechahe mayehe ema viáchucaini Abraham. Eta acane,
émaripa macaitsamarajihí ema Viya, te yátupihipuca eta masuapajiraiva.
Mavanecahi máechatinucayarehi ema machicha Isaac. Tacahe, ema
Abraham, máechatinucayarepaini ema machicha, máimeresirayarehi eta
masuapajiraivahi yátupi. Eta tacahe, ema Abraham, tétavicavahi eta majaca-
pacarevahi mayehe ema Viya. ²² Étara ícutiaraya eta juca masuapajiraivahi
yátupi ema Abraham. Vahi máëñamahini ema machicha eta mavarairahi
máimerecayare yátupihí eta masuapirahi. ²³ Taicha eta táechajiriruvahi eta
Sagrada Escritura, ani tacahehi: “Ema Abraham masuapahi ema Viya.
Tásiha, tétavicavainehi eta majacapacarevahi ema Abraham. Éma, máemunac-
casarehi ema Viya”.

²⁴ Ácaicutiara yátupina eta juca. Viti achaneana vijacapacare me Viya
táichavene eta vímeresira eta visuapirahi. Vahi tarataha eta vicaheira: “Núti
nusuapa ema Viya”. ²⁵ Níminecapaequenehahe eta acane tacahehivare
eta súchucuirahi esu esena túhusiquenénihí ticaijaru Rahab. Ésu, ticatiu-
chavacahí ena vanairucanahi mayehe ema víyaraha Josué, suímicatacava-
cavivare eta náitujisiravayarehi tijunana nayehe ena ticaratacanayarehini.
Eta máimairahi ema Viya eta juca suíchirahi, ichaperinehivare eta majaca-
pirahi ésu. ²⁶ Eta juca tacutihí eta viáquehe te tajunjica eta viáchaneva,
enevanerinehi tésamiricava eta viáquehe, tépenavaneyarehi. Ene tacahehi
eta visuapajiraiva. Títavavare te vaipa vímeracahi eta viúrivahi, víchirahi eta
táuriqueneana.

3

Eta vijaca, tamutu tajarareca

¹⁻² Nuparapenaveana, yátupi vimutu véjicapava tayehe eta véchajisirana.
Nájina émanaina vahi macuejecapavaini eta máechajisira. Te matiaríhinaini
mácani achane vahi macuejecapavaini, ichapehini eta macunachacarevai-
nahini, taicha éma, yátupihí eta máitupajjiasiravahi, máituchavare ticara-
tacava eta máquehe. Eta tacahe, nuvaraha nuconsejachahe: Tacamunu na-
janeacava muraca nácani náimereca eta navarairahi máestroanayarehi tayehe
eta máimiturapiana ema Viáquenu. Échavayare eta vicayaseserehirayarehi
muraca me Viya viti máestroanahi.

³ Nuvaraha nímicutichinahe. Eta juca tímicutijiricavahi te vicapera eta cavayu: vinacapa eta freno, vichurujacachapa, viámapa te jácani vivarahaquene viámaha. ⁴ Tacutiquene eta ichape lancha, táevatajicaneni muraca eta técatícava, étapa eta tajunapira muraca eta une, taratahayarehisera táimitupirucha eta tayehe leme váhineni ichapenahini, ema piloto máimitupiruchayarehi te jácani mavarahaquene mámihayarepahi. ⁵⁻⁶ Ene tacahehi eta juca vijaca. Ánichicharichunéni tayehe eta viáquehe. Tasapiahisera táechajisihahi eta ichapequeneana. Tacutiquene eta yucu. Ánichicharichunéni eta táepanirava táijucha, taratahahisera táijucha eta ichapequene vámahí. Nácani achaneana te vahi náitucachini ticaratajacachavana, amairijipa tamutu eta náitaresira. Tíñehicarehi najarareca ena nácani camuriana achaneana taicha eta náechajiriruvana. Ena nani téchajisihanahi eta tamauriqueneana, éna mávaháruanahi ema Váinaraji, téchahi eta infierno. ⁷ Ena achaneana narataha namansucha eta cáyureana étapa eta quichareana étapa eta táíñehiqueneana sárareana táivihana te apaquehe étapa te une. ⁸ Étatera eta jacare, nájina ticaratacaina, táechajisihayarehi eta tamauriqueneana. Tacutihi eta jumare te nájina tiratahaimahi típuchaina, tiámahivare eta tacapasiravacayare ena achaneana. ⁹⁻¹⁰ Eta jacare, étarichuvare táuchusiha eta náechajiriruvana ena ticunachanayarehi ema Tata Vicaiyaquene. Ticunachacarehi eta juca. Váhisera ticunachacaremani te tiúchuchi eta jacare eta náumehaira ena natutiqueneana achaneana naparaepíyanahi me Viya. Nuparapenevana, tatuparacahi vahi eacacahihini ena ecutiqueneana tiámanahi eta macaquehera ema Viya. ¹¹ Tacutiquene eta une, te tipachinahi eta tajututurusirahi te apaquehe, vahi tíjahúchavaimahi titsiriecava, táuchucapucaini tisucareamahini, ticheveamapuchahini. ¹² Tacutiquene vahi tiúchucaimahi eta aceite tayehe eta tahi eta yana. Étaripa eta narasa, vahi tiúchucaimahi eta tahi siñávehinapahini. Ene tacahehi eta une, vahi tajututuruchahini te apaquehe eta tipachina une tacachanepahipucaini eta ticheveama. Nuconsejachahe: Ecutinachachucha. Vahi ecumehareca.

Te yátupihí eta véchemaraivahí, tatuparacahí víchayarehí eta táuriqueneana

¹³ Te natiarihinapuca te etaracu nácani náechemahahi tamutu, tatuparacahi náichayare eta táuriqueneana, yátupinavare eta namansuvayare. Étapa tímicaecherachayarehi eta náitusirahi. ¹⁴ Te etiarhipuca eti ímijachavahi échemahahi tamutu, tásiha ecapinarurecarichuchasera te esamureana, evarahapa iápajupanavayarehi nayehe ena apamuriana eta ítupajijiasiravaya, vahi yátupinahini eta ítupajijiasiravainahini. ¹⁵ Eta juca échemaraivavacahi, vahi étainahini tásihaquenénahini me Viya. Teyehechucha te juca apaquehe tásihaquenechucha eta ne achaneana, máevaequeneruhi ema Váinaraji. ¹⁶ Taicha ena ticapinarujiricacanahe téhajiricacana. Vahi tácuticacahini eta napanereruana. Náicharichucha eta tájiparacana. ¹⁷ Nararihisera ena yátupiquenehi eta náechemaraiva, tásihaquenehi me Viya eta náitupajijiasiravanahi. Náimerecahi tivata tatupiruvahi eta napanereruhi. Táurivahivare eta náitaresira. Ticiaturahianahivare nayehe ena apamuriana. Tisamarahianavare. Tijapanurahianavare. Eta náichirahi eta táuriqueneana, ticajirahianahi. Nájina nanerejiruina. Tatupiruvahi eta náechajirisiravana. ¹⁸ Nácani ticatiurahianahi, náetupiricahi eta náitaresira ena apamuriana. Jéhesare, tájinasarepa náichiravainahi. Nanaquipaichahi eta táuriqueneana.

4

Emá Viya mavaraha vínajica eta tájiparacana

¹ Puítiripa, ¿tájaha tacayema eta éhajiricácahi? Éti ecuticacahi ena apamuriana eta ejamuraraivanahi. Éta, timaurichahehi eta tájiparacana, étijivaichucha íchavahi. ² Éti ejamurachahi ecaimahaquene. Étasera emaitusiravahi, evarahapa ecapaca ena ticaimahaqueneanahi. Éti ecapinarurecahi. Éta emaitusiravahi, téhacacapa eta échajirisiravana; tásiha, éhacacauchapa. Nuconsejachaheyare: Eyaseaca emá Viya eta ecamunuqueneanahi. ³ Éti eyaseacahinéni éma, váhisera májjaracahehini, taicha vahi táetupicavahini eta eyasearapiana, étachucha eta tajamurachaqueneanahi eta íáquehe.

⁴ ¡Tétavicavapa eta emáetupisiravahi eti achaneana! ¡Éjécavavahi ichape mayehe emá Viya! Evarahapa éhica eta nayeherepianahi ena achaneana masuapajirairahanahi. Tihapapicahepa eta tájiparacana te juca apaquehe. Masapihapa epuruyarehi emá Viya, ecatianacapa éma. ⁵ Éti ímijachai-papuca táepiyevahi eta táechajiriruvahi eta Sagrada Escritura. Ani tacahehi: “Éta mávahásirahavihi emá Espíritu Santo, téñmahaviripa vahi vihapasamurechaimahi tayehe eta tamauriqueneana”. ⁶ Étaripa eta máemunasirahavihi emá Viya, tétumechahavihi, mamavarairahi víchahini eta tamauriqueneanahi. Taicha ánvare tacahe eta Sagrada Escritura: “Emá Viya macatianacavaca ena tisiñavavairicana. Máemunacavacahisera máimicatavacavahiva ena másuana”.

⁷ Eta tacahe, esuapa yátupina emá Viya. Ecanaraya emá Váinaraji, te mavaraha mavayuacahe. Jéhesare, tijunijicahénapa éma. ⁸ Puiti, yátupina eta epauchirahi emá Viya. Tásiha, emá apanavare tipauchaheyare. Ínajicapa puiti eta íchira eta tamauriqueneana. Émitisicainapa eta ejamurachira eta tájiparacana te esamureana. Taicha éhicasareipa emá Viya. Vaipa ecupanerecha eta nayeherepiana ena achaneana masuapajirairahana te juca apaquehe. ⁹ Puiti, éneuchava me Viya. Íyauchava táichavenehi eta éjécapiravanahi. Vaipa ecuecarairicava, vaipa ecurisamure eta íchira eta tamauriqueneana. Ácatismurevasera táichavenehi eta tamutu eta tamauriqueneana íchaqueneanahi. ¹⁰ Ecajapanuravayare eta éneuchiravayare te mamirahu emá Viáquenu. Tásiha, tétavicavayare eta ejacapacarevaina emá Viya.

Vahi picucaecahi emá pichamuri

¹¹ Nuparapenaveana, vahi ecuechajica mayehe mácani echamurihi. Taicha mácani téchajicahi mayehe mácani machamuri, macaecahipuca, mavaraha máicuñaca mácani machamuri. Émaripa máepururipahi eta mavanairipi emá Viya. Nuvaraha numetacahe: Te épuruhi éti eta mavanairipi emá Viya, eta tímicaecherachahehi eta emasuapirahi éma. ¹² Emá Viya, émahiticanairipihí. Macarichu éma tatuparacahi téchayarehi te tíurhipuca eta náichaqueneana ena achaneana. Téchayarehivare eta máicuñasiravacahi ena téjécapavanahi. Vahi étina tatuparacahehini ícuñachahini ena echamuriana.

Vahi vítina vecha eta vítaresira

¹³ Esamanuchaha. Vahi táuricahini ácahehini: “Puiti juca sácheana, achichupuca, nuyanaya te apana avasare. Níjararecaya eta nucayehequeneana. Tiámainucava nuchava te apana año. Ichapeyare eta nuganare-ruyare”. ¹⁴ Éti, vahi échahini tájahapuca eta íchavaquenévaya achichu. Taicha vahi evachareruina eta ítaresira. Tacutichucha eta iyarú. Ánipirichu eta tacaecheraira. Tásiha, témitiacaripavare. ¹⁵ Íurihainehi ácahehini: “Ema Viya téchahivihi eta vítaresira. Te mavaraha éma, vítauchayarehi eta juca vipanereruhi” ácahehini. ¹⁶ Étiserá, tétavicavapa eta ecasiñavavaisirahi eta échajisirana. Ticutirinehi étinahini échinavahini eta ítaresirana. Vahi táurihini eta ecasiñavavaisirahi. ¹⁷ Némechahe eta juca yátupiquenehi: Mácani máimatihí eta macatuparahairahi máichaya eta táuriqueneana, tásiha te vahi máitachahini máichahini, ticapecaturaipahi te mamirahu ema Viya.

5

Eta náichavaquenévaya ena rícoana

¹ Tiuri puiti, nuvaraha numetacahe eta náichararacavaya ena rícoqueneana. Éna, ichape eta nacatajivairayare. Náuríhaipa náiyahasamureripahini taicha eta nacatajivairaya. ² Taicha títavainapa eta náimahaqueneana. Étaripa eta nacamuirhairana eta táurinaqueneana, tanicacamecinapa eta cachusiri. ³ Tájinapa táichaquenemahi eta naplataneana étapa eta nayehe oro. Ichape eta nacatajivairaya, taicha eta náeñamirahi, tájina náimicatarapínahini. Étainapa tímicuñacavacayare te jena yucu te táitecapapa eta jena sáchehare. ⁴ Nararíhi ena nani rícoqueneana, ichape eta navayuasiravacahi eta navachachirahi ena ticaemataneacanahi eta nayehe. Tatiarihiyaresera eta sáchehare táitecapauchayare eta náicuñayare, taicha ema Viya máimamaracahi tamutu, masamahivare eta nayaseserepianahi ena páureanasami músuana. ⁵ Ena rícoana puiti te juca apaquehe, tétavicavahi eta náuritaresirahi. Tamutuhi nanica eta táurinisiqueneana, tísatuheherecanahi. Tésinanacavanahi nacuti eta cuchi te náesinacha. Éna, tójahúchavayare eta náepenirayare, nacutiyare eta tájahúchirava nacapaca eta cuchi náesinaruhi. ⁶ Tacutiquene náimicaviurehi náimicapacavare ena matapiravareanahi, náimipanapa eta namaitusirahi tiácapauchavana nacatiuchavahini.

Vicamichayare tamutu, taicha táetumehahavi eta vicuchapirahi eta machavirayare ema Viáquenu

⁷ Étiserá, nuparapeanaveana, ecamichayare tamutu, táichavenehi eta ecuchapirahi eta machavirayare ema Viáquenu. Ecutiyare mácani achane ticaematanerahi. Macamichahi tamutu eta macatajivairana. Tiámainucava te tíuchucuhapa eta máevaru, mapaenumavapa majacapa eta macuchapaquenehi máevaraqui. ⁸ Ene ecaheyare éti, yátupina ecamicha tamutu, váhivare ecuñajicava eta juca éhiruhi. Ecuchapavachucha, taicha tiánehipa eta máitesirayare ema Viáquenu.

⁹ Nuparapenaveana, vahi ecuquicha eta tájiparacana nayehe ena echamuriana. Váhivare ecumeteaca éna, apaesa tacuíja eta támicatsiriacahe te ecayaseserehipa te mamirahu ema Viya. Écharichuhi éti eta tánehirapa eta máuchujisirayare ema Juez, ecayaseserehinapa.

¹⁰ Nuparapenavechichana, nuvaraha ácutini ena profetanaini eta nacamichirahi tamutu eta nacatajivairahi, táichavenehi eta nacametarairuirahi te

máijare ema Viáquenu. ¹¹ Némehahe: Ichape eta nacunachacarevahi eta viyehe nácani ticamichanahi eta nátajivanahi. Écharichuhi eta macamichirahi ema víyarahaini Job. Échahivare eta táuriquenehi máijaracasihi me Viáquenu. Taicha tétavicavahi eta majapanuraivahi ema Viáquenu.

¹² Tacutiquene nutuparacachecha éti nuparapenaveana: Te ecayaseserehipuca, vahi ecuquicha eta juramento te máijare ema Viya, ema tépiyacahi eta anuma étapa eta juca apaquehe. Váhiquene ecuquicha eta juramento. Átupiruvachucha te itauchayarepuca, “Nítauchayare” ácahepa. Téhesera váhipuca, étupiruvayare “Vahi nítauchaimahi” ácahepa. Apaesa tacuija taviuchahe mayehe ema Viya.

Tatuparaca eyujaracacayare

¹³ Te etiarihinapuca éti ecatajivahi, tatuparacahi éneuchavayare me Viya. Te etiarihinapuca eti iúrisamureanahi, tatuparacahi ejira eta alabanza.

¹⁴ Téhevare etiarihinapuca eti ecajumanahi, ímichuhayare ena víyacarana vichamuriana apaesa nayajisicahé eta aceite, te máijare ema Viáquenu. Tásiha, tiyujaracacacayare. ¹⁵ Jéhesare, tisamacareyarehi eta nayaseasirana, táichavenehi eta nacasiñairava me Viya. Tásiha, ema Viáquenu macanaracayarehi eti ecajumaquenehi. Te étapuca tiviuchahehi eta epecaturana, macaepahayareva ema Viya eta epecaturana. ¹⁶ Eta tacahe, te tatiarihipuca eta éjecapiravanahi mayehe ema echamuri, eyaseacayare maperdonachahe. Tásiha, eyaseuchacacayare te eyujaraca eta enarasiraina. Taicha tétavicavahi eta tasamacarevahi eta nayujaracasa ena matapiravareana. ¹⁷ Émaripa ema vicutiquenéni achane víyarahaini profetaini Elías, te tiyujaracapa éma, tiyaseserecapa vahi tacuquiva. Tisamacarehi éma. Vaipa taquivahini. Mápana año, saisi caje eta tamajinairahi tiquiva. ¹⁸ Tásiha, tiápechavavarepa tiyujaracahi. Tiyaseserecapa táemiricahini eta tiquiva. Tiquivavarepa. Tacahe, tiúrinainehi eta evaraquiana te apaquehe.

¹⁹⁻²⁰ Nuparapenavechichana, te natiarihinapuca nácani vichamuriana téjecapavanahi tayehe eta yátupiqueneana, eti ecaturaraha iúrichavacayarehi éna, econsejachavacayare apaesa nachava éna, náinajicahini eta náejecapiravana. Tétavicavahi eta táurivahi eta íturusiraina eta nachavira, taicha táemesiava eta ecuchucuiravacayare tayehe eta náicuñayarehini, taicha eta táemesiavahi eta táepahairapa eta camuriquenehi eta napecaturana.

Tamu tupa.

Eta macartane ema Apóstole Pedro, ticajjare 1 PEDRO

¹ Núti Pedro, mayehenu apóstole ema Viáquenu Jesucristo. Nucajurehe eta juca nucartane eti nuchamuriana éjanerepairuanahi ecaquijiqueneanahi tayehe eta apana avasareana: eti iávihanahi te provincia Ponto, eti iávihanahi te Galacia, eti iávihanahi te Capadocia, eti iávihanahi te Asia, étipa eti iávihanahi te Bitinia. ² Emutu eti, yátupiquenehi eta manerejisirahehi ema Tata Vicaiyaquene taicha tacahehi eta mapanereruhi acane eta táepaniravahi. Émaripa ema Espíritu Santo, tiávahácaheripa máepachiasirahehi eta epecaturana eta te máitine ema Jesucristo, máitsivachinahehivare eta ítasesirana, máimicatasirahehivare eta esupajiraivahi me Viya. Puiti, nuvaraha tajurucaini eta eacutiaraira eta máemunasirahehi ema Viya; tájinavare tahapapirichahini eta táurivahi eta epanereruana.

Vijacapayare eta vícuchihi te anuma te tauri eta vítaresiraina

³⁻⁴ Tétavicavahi eta vicunachirahi ema Viya, Macaiyaquene ema Viáquenu Jesucristo. Tétavicavahi eta majapanuirahavihi, vijacapacarehi mayehe eta macachichairahaviripa. Tásiha, viratahahi vicamichahi tamutu eta viátajivana te juca vítaresirana taicha vicuchapahi eta sácheyare visiapaya eta mávasa ema Viya. Máitavacacayare eta vítaresirayare, táichavenehi eta máechepusirahi ema Machicha Jesucristo te máecari. Anaquí, tájinapa ticapacahemahi, váipavare íchaimahi eta tamauriqueneana. Máitavacacayare eta iúrisamurereasiravanayare. ⁵ Puítisera, tétavicavahi eta máitupajijiasiravahi ema Viya eta majaneasirahehi, táichavenehi eta ecasiñavairahi mayehe. Taicha mavaraha ticuchucuhaheyare te jena sache táepaniravayare eta viúritaresiraya.

⁶ Puiti, apanapaneyarechaha eta ecatajivairayarechaha. Nucasiñavahisera eyehe éti, vahi ecaínajiruvaimahi. Eta ecasiñavairahi me Viya, evapinavaichucha eta ecamichirahi tamutu, taicha ímatihí vaipa táunaimahi eta ecatajivairaya. ⁷ Ema Viya máisapahi eta juca ecatajivairana, mavarairahi ímereuchavayare eta yátupiquenehi eta ecasiñavairahi eta mayehe. Ecutiyare eta oro te nacaitamaraji te yucu te yátupihipuca étaquenehi. Étisera étaviviriacahi eta tatumeva eta oro, taicha eta oro títavayarehi, témitiacayarehi. Te vahi ecaínajiruva eta ecasiñavairahi mayehe ema Viáquenu, tétavicavayare eta ecunachacarevayarehi mayehe éma eta machimapiraheyare te machava.

⁸⁻⁹ Éti, vuíchaha ímatihini eta mamira ema Viáquenu. Émunacahisera éma. Ichapehivare eta ecasiñavairahi eta mayehe. Tásiha, ichapeyarehiva eta iúrisamurevaya, tájina eviyaimahi ácyemahini eta ecunachiraya éma, te jena sache iúchucuhainapa eta ítasesiraya máíhecuaraquirenapa. Étasera eta táitsivahi eta ecasiñavairahi mayehe ema Viáquenu.

¹⁰⁻¹¹ Eta juca viúchucuirayare, acaneripahi eta tacaecherairahi. Énaripa ena víyarahananini profetanaini nájuequeneharipa tayehe eta Sagrada Escritura eta máitesirayarehi ema ticuchucuhahaviyarehi. Émaripa ema Espíritu Santo máitametacavacahi éna eta macatajivairayarehi éma Cristo étapa eta machavirayare tayehe eta táurinaquenehi mávasa. Énasera ena profetana

vahi náimatimahi tamutu. Navarahahi náimatiyare ¿nájahapuca ema máiteruyarehi? ¿Tájahapuca eta máijareya? ¿Tájamuhuyarepuca eta máimeresiravaya? ¹² Émasera ema Espíritu Santo (ema másihaquenehi te anuma), mametacavacapa vahi náimahaimahi ema Cristo, taicha camuriyarehi eta áñoana eta máitecapiraya. Vítipasera puiti viti vítareruaichaha, vítipa vímatihí éma. Te vicametarairupa mayehe ema Jesucristo, ema Espíritu Santo títametacahehi te esamureana. ¡Tétavicavayare eta viúricacarevayare viti, te viúchuchapala! Énaripa ena ángeleana, ichape navarahahi náimatihini tájahapuca táchararacavayare eta viúricacarevayare.

Ena Viya, eta máichuirahavihi, mavarahahi tépachinachaviyare eta vítaresirayare

¹³ Eta tacahe, ecaratacava tayehe eta epanereruana, táurivainavare eta ítaresiraya. Ecasiñavayare eta ejacapirayare eta ícuchihi me Viya, máijaruheyare te machavapa ema Viáquenu Jesucristo. ¹⁴ Ímrecavayareva eta machichairahahi, esuapajirahiyare. Vaipa ecuquicha eta íchaqueneanaini eyeherepianaini cape juca te vuíchaha ímatihini ema Viya. ¹⁵ Puítisera, sánturuháhénapa eta ítaresirayare. Taicha ema tíchuhahahi, tétavicavahi eta masantuvahi. ¹⁶ Taicha ema Viya, ani macahehi eta máechajiriruvahi tayehe eta Sagrada Escritura: “Nuvaraha sántuhéna eta ítaresiraina, taicha núti, yátupiquenehi eta nusantuva”.

¹⁷ Te eyujarasirana éti, ani ecahehi: “Tata Vicaiyaquene” ecahehi mayehe ema Viya. Ímatiyare yátupi éma eta nájinairahi manerejruina, tacutiquene eta máemecharesirahi ena téjecapavana, máitsivachavacahivare nácani tíchanahi eta táuriqueneana. Tacahe, yátupina eta epicauchiraina éma tamutu sácheana puiti juca ítaresiraichaha te juca apaquehe. ¹⁸ Ena Viáquenu Jesucristo ticuchucuhaheripa tayehe eta tamaurivainihi eta ítaresirana, íamapiri-caichaha eta nayeherepianaini ena iáchucanaveánaini. Écharichuhi éti eta mavacharesirahahi ema Cristo eta iúchucuirahi, váhisera te plátainahini, óroinahipucaini. ¹⁹ Étasera eta máitine máepusairuhi éma eta mavacharesirahahi, étivenehi ímijararecahi éma, cútiripa te cáijararecasi eta uvesa matapiravarequenehi. ²⁰ Acane te tépanavainapa eta apaquehe ema Viáquenu Jesucristo ticatuparahaipa tacaheyarehi eta máepeniraya. Váhisera táitachavavanehini. Tapaenumavapa puiti, títauchavahi eta étavenepa eta iúchucuirayarehi éti. ²¹ Énerichu táichavenehi eta éhisirahi ema Cristo, ímatipa puiti ema Viya, ema ticaechepucahi ema Machicha te máecari. Puíticha téjacaripa éma tayehe eta máavace te anuma. Eta tacahe, tétavicavainehi eta ecasiñavairahi mayehe éma, ecuchapavaipa eta mayehe.

²² Puiti tipachinaripa eta iáchanevana táichavenehi eta esuapirahi eta yátupiquene máimiturapiana ema Jesucristo, máimitusiraheripa ema Espíritu Santo. Eta tacahe, ímrecavainapa puiti yátupina eta émunasiracacahi nayehe ena echamuriana. Evapinavare eta te esamureana eta émunasiracacairahi. ²³ Cape juca, eta ítaresirahi, tájina vahi íturuequenehahini eta iúchucuiraya. Puítipasera machihahehipahi ema Viya. Ísivachaipahi eta ítaresirainihi eta esuapirahi eta máechajiriruva ema Viya. Éta ticaítarecaheyarehi; jéhevere eta máitavacacahi. ²⁴ Eta Sagrada Escritura, ani tacahehi eta táechajiriruva, májurehi ema víyarahaini profeta Isaías: “Eta vítaresirahi viti achaneanasami te juca apaquehe, vicutihí eta táimarusira eta muiji.

Tijurucapa, tásiha tiájijipa. Eta vitumevainihi étapa eta vítupajijiasiravainihi, títavayare tacutihi eta flore: tépnehapa, tijiyupa, témiricapa. Étasera eta máechajiriruva ema Viya, jéhevare eta máitavacacahi” tacahepa. ²⁵ Eta juca máechajiriruva ema Viya, étaquenehi eta emetacasivanahi apaesa táuripa eta éhisirahi.

2

¹ Eta tacahe, támutupa ínajica eta evainararajivanainihi, tamutu eta ecaete-maraivainihi, eta apiapiemairahénihini, eta ecapinaruraivainihi, étapa eta échajivanainihi. ²⁻³ Puiti, eta ímatiraripahi yátupi eta máurivahi ema Viya, tijurucainapa puiti eta esuapirayare eta máechajiriruvana. Ecutinapa eta najurusira ena amuyana. Ánipichichapachu técuhana, tiájicanaripavare te nacheneana ena náenana. Ene ecahehi éti, yátupina eta evarairaya ecaravahu eta máechajiriruva ema Viya, apaesa tiápajucavaya eta ímatiequenehairaina eta mapanereruana.

Ena Cristo macutihi eta mari máepenacacahi

⁴ Yátupina eta ecasiñavaira me Viáquenu, taicha tétavicavahi eta macasiñacarevahi, macuti eta mari máepenacacahi. Éma, náepuruquenehi ena achaneana. Manerejiruhisera ema Viya taicha tétavicavahi eta macunachacarevahi mayehe. ⁵ Éneripa ecahehi éti, ecutiripa eta márijahiana máepenacacahi. Tacahe puiti, táuripa eta ecachaneracacainapa. Macarichu ema Viya ema ecaemataneacaya. Tivayuacaheya eta esuapajiraivaya eta máijarasiraheyarehi eta ématanepachuyare. Énerichuvare ecaturarahaipa sántuhénapa. Ecutiyare ena tiyujaracarahiana eta te Templo. Ecaturarahaipavare eyaseurahiya mayehe ena echamuriana. Étapa eta ecamavahaira me Viya, étaripa eta esuapajiraivahi, eta ehasulupayachirahi ema Viya, étapa eta ecunachirahi éma. Tamutu eta juca, ecurisamurechayare éma, taicha émarichuhi ema Jesucristo ticaitecapinaheyarehi me Viya. ⁶ Eta Sagrada Escritura, ani tacahe eta máechajiriruvahi ema Viya: “Núti névatacachi ema Nuchicha Cristo eta eyehe. Taicha nunerejiruhi éma eta macurujisirayarehi ena nuchanerana návaháruanaya. Tétavicavahi eta macunachacarevahi eta nuyehé. Nácani ticasíñavanahi eta mayehe ema nuvaneruyare, vahi máinajiacavacaimahi” macahepa ema Viya. ⁷ Éti, tétavicavahi eta macunachacarevahi ema Cristo eta eyehe, taicha yátupihini eta ecasiñairahi éma. Énasera nácani masuapajirairahanahi mayehe, náepuruhi éma, nacuti ena tépiyarecarahiana eta Templo, eta náepuruirahi eta mari ticunacharepanayare eta te peti. ⁸ Nácani masuapajirairahanahi eta máechajiriruvana ema Viya, tacutiqueneyarehi náepuruhi ema mavaneruhi ema Viya. Nacutihi mácani achane máquipairuhi táichavenehi eta macayutetuirahi. Tisemahi, mavaraha térajicavayare eta tímicyutetuchahi.

Ena machanerana ema Viya

⁹ Étisera manerejiruhiripa ema Viya, machichaheripa. Tachichaheripavare eta mávasa. Sántuhepa máicha. Tituparacaheripavare éma eyaseuchinavacayare ena achaneana eta mayehe. Majupahahehivare ema Rey. Puiti émapa macarichuhi téchahehi taicha mavecuhaqueneheripahi tayehe eta tímápicu, tímisiapaheripa tayehe eta táuricacarequene majaraiva éma, apaesa emetajiricaya eta táuricacarequeneana máematánerepi ema Viya.

¹⁰ Cape juca ítaresirahi éti, vuíchaha ímatihini ema Viya. Eyerehichaha éma, vuíchaha échahini eta majapanuirahéhi éma. Puítisera evapinavahi eta ímatirahi yátupi eta majapanuirahéhi, taicha machaneraheripa.

Yátupina eta ecaemataneasirayare ema Viya eta ítaresiraya

¹¹ Némunarqueneana nuparapenaveana, puiti éti, tímcutitjiricavaichaha estranjerohehi taicha iáviharichaha te juca apaquehe. Váipasera áyeremahi eta eyanirayare eta iávasayare te anuma. Eta tacahe, nuconsejachahe: Vaipa táuricahini íchahini eta tajamurachaqueneana eta iáqueheana. Taicha tétavicavahi eta tavarairahi tácamitiequeneha eta iáchanevana. ¹² Iúrihisera eta ecahanerarichaha ena achaneana te juca apaquehe máimatirahanahi ema Viya. Tayanapanerine ticitianacaheana, téchejicanahi eta eyehe ecutihí ena máuritairesirana náicha. Ímrecayaresera eta iúrivahi apaesa éna nacunachayare ema Viya, navarahainapa náehica ema Cristo taicha náimahahi eta táurivahi eta ítaresiranahi.

¹³⁻¹⁴ Táichavenenahi eta éhisirahi ema Viáquenu, ímrecayareva eta esuapajiraiva mayehe ema Emperador Presidente, énapa ena prefectoana, énapa namutu ena apamuriana tuparairucana tanacaqueneanahi eta ley. Éna, tícaturarahanahi náicuñacavayare ena achaneana váinarajiqueneana, téjecapanahi. Énasera ena achaneana tiúriana títaurahianahi, ticaemunacasianayarehi. ¹⁵ Taicha ema Viya, éta mavarahahi íchayare eta táuriqueneana apaesa ecamatinacaya ena máecharaireana nácani téchajicanahi eta eyehe.

¹⁶ Yátupihí vaipa tapamiruhénahi éti eta esuapirahi eta mavanairipianaini ema Moisés eta iúchucuirayare. Váhisera ecuyunaca eta vahi tapamisirahenahini, táetseraruina icha eta tamauriqueneana. Esapihasera ímrecavayare yátupihí eta mavanaraherahi ema Viya. ¹⁷ Epicaurahiyare nayehe namutu ena achaneana. Émunajiricacayare nayehe ena víchamuriana. Ímrecapa eta epicauchirahi ema Viya. Epicauchayarehivare ema Emperador Presidente.

Vácuti ema Jesucristo eta macamichirahi eta mátajivana

¹⁸ Éti, te ecaematanerecapuca, esuapajirahiyare, epicauchayareva nácani iáquenuanahi. Vahi nacucarichu esuapa nácani tiúriana achaneana. Tácuticaca eta epicauchiraina nácani váinarajianahi. ¹⁹ Te ecatajiva náicha, tájinapa eta eviurevanainahini, tétavicavahi eta ecunachacarevaya me Viya te ecamichahi tamutu, taicha evarahahi ítaucha eta mavarahaquenehi ema Viya. ²⁰ Téhesera náicuñacahepuca táichavenénahi eta íchirahi eta tamauriqueneana, tájina ecunachacarevaimahi eta ecamichirahi, taicha tatupiruvahi eta ecaicuñairayare. Téhesera táimicuñacahepuca eta íchirahi eta táuriqueneana, ecamichirahi eta náichirahéhi, tétavicava eta ecunachacarevaya te mampirahu ema Viya. ²¹ Taicha ema Viya, eta máichuirahéhi, mavarahahi ecutihyarehi ema Cristo eta macamichirahi tamutu eta mátajivana íchavenéhi éti, mavarairahi ecaravahu eta máurivahi, ecutihyarehi éma eta macayehera paciencia. ²² Éma, tájinahineni maviurevainahini, mapecaturainahipucaini. Nájinavare macaetemaquenénahini. ²³ Te nacaetemajiricapa, éma, vahi mácapaemachavacahini, macatitiemahipucaini eta náemecatativachirahi. Máechajicahisera ema Maiya, máimahainéhi éma. Taicha yátupihí eta máicuñasiravacaya ena témecatajivachanahi. ²⁴ Yátupihí ema Cristo ticaicuñahi víchavenéhi víti eta vícuñayaréni vícuchinihi táichavenéhi eta vipecaturana. Tétavicavahi eta mátajivana te máquehe eta náemetatasirahi eta te crusu.

Macamichahisera tamutu, mavarahahi vaipa tacuvayuacahavi eta pecatu, tatupiruvayarehi eta vítaresiraina. Eta majarana, éta ticanaracaheyare. ²⁵ Eta ítaresirainihi acane éti, ecuti eta uvesa táemitiaru. Puítisera iávahácaripa ema Cristo, émapa tijaneacahehi, ticatiuchahehivare eta iáchanevana.

3

Tiúriyare eta náitaresirayare ena nacaimaqueneana

¹ Tacutiquene eti esenana ecaimaqueneana, epicauchayareva ena ímanaveana, apaesa mácani vahi masuapahini eta máechajiriruvana ema Viáquenu, ecajimuyasamurechavaca táichavenénahi eta iúrivahi nayehe. ² Vaipa tácomesaimahi échajirica taicha náimahayare eta esuapajiraivahi nayehe, epicauchirahivare. ³⁻⁴ Ímerecayareva eta iúriya yátupiquenehi, tásihaquenehi te esamureana, tímicitijiricavahi eta iúrina eta emira. Tayanapanepuca ichanaruheripa, iúrinachavaya te esamureana. Evayuchahini eta étupisirava eta ésamirisirava. Eta juca, tétavicavahi eta ecunachacarehi mayehe ema Viya. Vahi étaparacaina eta evayuyujisirahipuca eta ecamuirihaira étapa eta ecataasirana, váhivare étaina eta ecayehera oro. ⁵ Taicha acane ena vénarahana esenana náinapureanahi téhicanahi ema Viya, tacahehi eta náurinachiravahi eta náitaresirana, taicha yátupihi eta nacasiñavairahi mayehe ema Viya. Tásiha, tétavicavahi eta nasuapajiraivahi nayehe ena náimanaveana. ⁶ Ecutiya esu vénaraha Sara. Suímerecahi eta susuapajiraiva mayehe ema suima Abraham, taicha ani sucahehi mayehe: “Náquenu eñi”. Tásiha éti, vahi ecupica eta esuapirahi ena ímanaveana. Ímereca yátupina eta iúrivahi nayehe.

⁷ Étipa ajairana ecayenaqueneana, eJapanuyare ena eyenana. Ejaneacavare, échahi éna eta vahi túmenahini. Yátupinahisera eta émunasirahi éna, taicha ecuticacayare eta ejacapirayare eta ícuchihi eta ítaresiraya mayehe ema Viya te jena sáchehare. Te iuri nayehe, esamacareya te eyujaraca.

Tiúriyare eta ecamichirahi eta íatjavana táichavenénahi eta íchirahi eta táuriqueneana

⁸ Ámutu éti, ácuticacahi eta epanereruana. EJapanucaca, émunacacavare nayehe namutu ena echamuriana. Ecajirahi. Mánsuhénahi. ⁹ Tijuricati natupiacahepuca, náumehahe, váhisera ecujicapa. Eyaseacachucha ema Viya eta náuricacarevaina. Taicha mavaraha ema Viya vijapanurahiyarehi víti, vicutiya éma eta majapanuraivahi. Tatiarihiyare táitsivayare viyehe máicha. ¹⁰ Taicha ani tacahehi eta Salmo: “Mácani mavarahahi tíurita-resira te apaquehe, támutuyare sácheana tíuríya, vahi téchajijicaimahi tivayua-recaimahi. Váhivare ticaetemarecaimahi tépiyahirahimahi. ¹¹ Váhivare máichaimahi eta tamauriqueneana. Máichahisera eta táuriqueneana. Macamitiacahi eta semanereana. ¹² Ema Viya majaneaca ena náuriqueneana; tisama-careanahi eta nayujarasirana. Énasera ena tíchanahi eta tamauriqueneana, macatianaruanahe éma” tacahepa eta Salmo.

¹³ Nájina tíjaracavaimahi titupiacaeana te náimahahi icha eta táuriqueneana. ¹⁴ Tijuricati natarihipuca ena ticatianacaheanahi táichavenehi eta táurivahi eta ítaresirahi, tásiha, tétavicavaya eta iúricacareva. Váhivare ecupica eta jácani náichirahepuca, váhivare iávamirahuimahi nayehe. ¹⁵ Íjaracavasera yátupi eta éhisira ema Viáquenu. Te nayaserecahepuca

eta tacayema eta éhisirahi éma Jesucristo, tiúrihi eta ejicapiravacaya tayehe eta ecuchapaquene. Mánsuhéna éti, epicaurahivare. ¹⁶ Tátupiruva tamutu eta íchaqueneana, táurivare eta náimairahena namutu ena achaneana, apaesa ecamatinaca nácani téchajisiaracaheanahi eta táurivahi eta éhisirahi éma Jesucristo, nátsirihapaini eta náechajjisira. ¹⁷ Te máisapahipuca éma Viya eta náemecatajivachirahe táichavenehi eta iúrivahi, tacunachacareyare mayehe eta ecamichira. Tájinasera ecunachacarevaimahi te ecaviurevahi.

¹⁸ Yátupi éma Cristo, étaherichuhi vímicapacahi táichavenehi eta vipecaturana. Éma, tétavicava eta máuriva, matapiravarehivare. Tíjaracavahisera ticatajivaya víchavenehi víti váinarajiqueneana, mavarairahi tiámahavi me Viya. Tépenahi eta máquehe, étasera eta máchaneva tímiyanavaichucha títareca. ¹⁹⁻²⁰ Tiyanavarepa máejirapanavacahi eta náchanevana ena náepenaqueneanaini nacaerataqueneanahi te infierno. Ticametarairupa nayehe éna nani náepenaqueneana antivuanaini, machamurianaini éma víyarahaini Noé. Ichapehinenihi eta macamichiravacahi éma Viya eta macuchapiravacahi eta nasuapirainahini, vahi náeñamavahini eta náimairahi éma Noé máepiyasirahi eta ichape pacure. Tacahe, te témiricapa eta ichapequene tiquiva, macarichuhi éma Noé ésupa esu mayena, énapa éna machichanaveana énapa éna nayenana, óchoanaichuhi éna tiúchucuhanahi tayehe eta ichapequene éne. ²¹ Tiuri puiti, éta une ticaeririjicavacahi éna masuapajirairahana, nímicutichahehi eta vícachasi. Éta vicaicachasirahi te víjaracavapa véhica éma Jesucristo, vahi étaparacaina táepachiacahavimahini eta víaquehe. Étasera éta vicaicachasirahi, étapa tímereuchahavi éta maperdonachirahaviripa éma Viya tamutu éta vipecaturana. Máepachinachinahaviripavare éta víáchanevana, tájinapa taviuchahavihini, éta visamiravahi te mamirahu. Yátupina éta víúchucuirayare táichavenehi éta máechepusirahi te máecari éma Viáquenu Jesucristo. ²² Puiti éma, tiyanaripahi te anuma; téjucaripa te mavaure éma Maiya. Tétavicavahi éta masuapacarevahi nayehe namutu éna mayeheana ángeleana. Énapa éna váinarajiana, nasuapahivare.

4

Éti éhicanahi éma Viáquenu, tituparacahe ecaratacavayarehi apaesa vaipa íchaimahi éta tamauriqueneana

¹ Éma Cristo, ichapemurihí éta macatajivairahi éta máepenirahi te crusu. Macamichahisera éma tamutu. Éti apanavare, ecutiya éma. Vahi iávamirahuimahi éta ecatajivairaya. Nímicutichaheyare éta mácani achane tépenapa, máinajicaripa éta pecatu. ² Éta tacahe éti, táichavenehi éta iúrujasirahi éma Jesucristo, tímicutijiricavaipa épenaipahini, ínajicarijavare éta pecatu. Puiti éta tápechiravaripa táitarecahíni éta íáchanevana, tatuparacahi ecaemataneacayare éma Viya. Vaipa tivayuacahémahi éta tajamuraraiva éta iáquehe. ³ Tamapurujipa éta táetavisiravaripa éta áñoana éta íchirahi éta tamauriqueneana, taicha emaimatirahi éma Viya. Tamutuhi icha éta tájiparacana, tivayuacahehi éta tajamuraraiva éta iáquehe. Evayuchavahi éta esenamaréranahi étapa éta ecavaharasiva. Ecasamurehi éta íchira éta piesta. Íchahi éta tájiparacana tamauriqueneana éta ejaneasirahi éta esíñarajiana achanemirana. ⁴ Puitisera éti, vaipa ecasiriquimurihini éna émunacasareana. Vaipa íchaimahi éta táíñemahiquene éta náitaresirahi. Ichapemurinehi éta náejiasirahehi. Tásiha, téchajicanapa éta eyehe. ⁵ Járappainapasera éta

sáchezare nacayaseserehirayare te mamirahu ema Viáquenu, taicha éma yátupiquenehi eta macatuparahairahi eta vicayaseserehiraya víti, vítare-ruanaíchaha énapa ena náepenaqueneana. ⁶ Eta tacahe, ema Jesucristo ticametarairuhi nayehe ena náepenaqueneana, mavarairahi macuchucuhayare eta náchanevana apaesa nápechavahini náitareca te mamirahu ema Viya, tayanapane eta náeche máteji táitavapapuca tayehe eta tacaecarasiyahi.

Yátupina eta émunajirisiracacaya, ítátijiricacayareva

⁷ Esamanuchaha, tiánehipa eta táitavirayare tamutu eta juca. Eta tac-
ahe, ecaratacava eta epanereruana apaesa táurivaina eta eyujarasiranaya.
⁸ Tiápajucavayarehisera ichape eta émunajirisiracacayare éti. Te yátupihí eta
émunajirisiracacahi, máejerareya eta eperdonachiracacaya eta jácani éjēcapi-
ravana. ⁹ Evapinavaya eta ejacapiracacaya, te epaipuchacaca te epenana.
¹⁰ Ema Viya tíjaracahevacaripa eta ítucaquenepachuhi. Tacahe, yátupina
ítauchaya eta ecaemataneasiracacahi te mamirahu. ¹¹ Eti máimitureana ema
Viya eta échajisira, ecuneuchava échajica yátupi eta máechajiriruvana éma.
Eti ímicatarahiana ítátivaca ena echamuriana, vahi éñamaimahi eta etumeva
májararuhehi ema Viya. Étavenehi éhisirahi ema Viáquenu Jesucristo, tamutu
tauri eta jácani íchaqueneana apaesa nacunacha ema Viáquenu namutu ena
tímahaheana. Éma, ¡tétavicavahi eta macunachacarevahi! ¡Tétavicavahivare
eta máitupajijiasiravahi eta máechirahavihi tiuri! ¡Máitavacacahivare eta
véhisiraya éma! Amén.

Vahi ecuavamirahu eta ecatajivairaya táichavene eta éhisirahi ema Jesucristo

¹² Némunarqueneana nuparapenaveana, vahi ecuarami eta muracairaya
eta íatajivanayare, tímicitijiricavayarehi táramicarehini eta eyehe. ¹³ Evapi-
navachucha taicha ecapayayaracahi eta macatajivairahi ema Cristo apaesa
evapinava te jena sáchezare eta enecapirayare éma eta máucupaisiraya
mámirayarepahi eta majaraiva. ¹⁴ Te náumehahepuca máichavenénahi ema
Cristo, tétavicavayare eta iúricacarevaya éti. Taicha tíavahácaheyare ema
Espíritu Santo, másihaquenehi te majaraiva ema Vicaiyaquene. Tayanapane
náepurupuca éma, étisera ecunachahi éma. ¹⁵ Te etiaríhipuca eti ecatajivahi
náicha, tacuijasera étaimahi tiviuchahémahi jácani ecapahivainahini, íámerai-
vainahipucáini, váhivare étaimahi tiviuchahémahi jácani ímisiapirasiravaina-
hipucáini tayehe eta náichaqueneana nácani apanana achaneana. ¹⁶ Étisera,
te ecatajivapuca táichavenénahi eta éhisirahi ema Cristo, vahi ecutsiriha.
Evapinavachucha, ehasulupayachavare ema Viya tayehe eta ecaijarerahi
eta máijare ema Cristo.

¹⁷ Puiti juca sácheana víavacurehi, táitecapaurehavrípa ichape eta vicata-
jivairayare, mavarairahi ema Viya vímereuchava eta víúriava víti machicha-
naveana. Énasera ena masupajirairahanahi eta náichuirahi ema Viya,
páureanasami taicha tiápajucava eta nacatajivairaya, ichape eta náicuñaya.
¹⁸ Ichape eta vicatajivairahi te juca apaquehe víti macuchucureanayarehi
ema Viya. ¡Páureanasamisera ena achaneana masupajirairahana, váinara-
jiqueneanahivare! ¡Ichapepanayare eta nacatajivairaya! ¹⁹ Puiti víti
véhicanahi ema Cristo, ichape eta vicatajivairahi. Váhisera vicainajiru-
vaimahi. Vímiyanavayarehi vicha eta táuriqueneana. Vácasíñava mayehe
ema Vicaiyaquene eta majaneasirahavíhivare, taicha éma, tétavicavahi eta
máitauravahi.

5

Ena Pedro maconsejachavaca ena machamuriana

¹ Tiuri puiti, nuparapenaveana, nuvaraha nuconsejachahe emutu eti pastoreana ejaneacanahi ena vichamuriana. Nútiripa pastornuhi. Énerichuvare testigonuhi eta nímararasirahi eta macatajivairahi máepenirahi eta te crusu ema Cristo. Esuapanuyare puiti eta nuconsejarapi taicha vicuticacayare tayehe eta vicutiparahairaya viáviyahare te majaraíva ema Cristo te táitecapa eta machaviraya. ² Tauri eta ejaneasiravacaina namutu ena vichamuriana, taicha éna tímicitijiricavahi uvesanainahini mayehe ema Viya. Ítauchayare eta etuparacasivahi. Ema Viya mavarahahi evapinavahini eta ejaneasiravacahi. Vahi ecuyacujiequenehavaca. Váhivare ecupanerecha ecavacha. Evapinavayaresera eta ecaemataneasiravacaya. ³ Váhivare ímipanánajicavacáimahi taicha vahi ecavanaravacahini. Ímerecayarehisera eta iúrivaya nayehe, apaesa éna náehica eta iúrivanahi. ⁴ Apaesa te machavapa ema yátupiquene Pastor eta viyehe, tétavicavaya eta macunachiraheya. Tíjarachenapa éma eta evachayare ícuchihi. Máitavacainapa eta ecachaneraya éma te mávihahi eta te majaraivahi.

⁵ Eti apanava eti amaperuana, nuconsejachahe: Esuapayare eta navanesiraheana ena víarahana. Emutuyare esuapacaca. Mánsuhénahi. Taicha ema Viya vahi majapanuimahi ena ticasíñavavairicana. Tétavicavasera eta majapanuiravacaya ena mánsupanereruanahi. ⁶ Te ímereca eta emansuvavachahi tayehe eta ecasíñavairahi eta me Viya, éma, te máimahapa tiuri, ticatiuchahenapa te tamutu eta íchararacaqueneana. Tásiha, tétavicavayare eta iúrisamurevaya. ⁷ Te tatiarhipuca eta éñamiravana, emetaca tamutu ema Viya. Éma, ticanaracaheya taicha tétavicavahi eta máeñamiravahi eta eyehe.

⁸ Ecuneuchava yátupina. Ejaneacavahivare, taicha ema viánarahi Váinaraji, macuti eta táíñehiquene sárare tatanujiriricahi eta tanicayarehi. Ene macahehi éma, matanucahi ena máquipairuanayare. ⁹ Eta tacahe, túmehéna ecanarairayare éma, machu máquipaicahe. Ácasíñava muraca eta mayehe ema Viáquenu. Écharichuhi vahi ácarichuhini eta ecatajivairahi. Túmehénahi eta ecamichiraini, ecutiyaere eta nacamichirahi ena vichamuriana ticavasanahi te tamutu avasareana. ¹⁰ Ema Viya, tíchuhahavihi, mavarahahi visiapayare tayehe eta mávasa táichavenéhi eta véhisirahi ema Jesucristo. Ánipirinesera eta ecatajivairaya puiti juca sácheana. Émasera ema Viya, tétavicavahi eta majapanuraivahi. Éma, tímararacahehi eta ecamichirahi; tásiha éma, tíjarachenapa eta evayuchiravainapaicha eta etumevaya. Tájina ticayacahemahi máicha. ¹¹ Éma, ¡máitavacacahi eta macunachacarevahi! ¡Macachuricahi eta máitupajjiásirava, máitavacacahivare éta! Amén.

Ena táichecuarauqui eta macartane ema Pedro

¹² Ímati emutu ema vichamuri Silvano. Éma, tétavicavahi eta máitauravahi te tamutu. Puiti, émahí ema tíáminanuríhi eta juca nucartane. Núti, ánipichichahi nájurehi eta eyehe. Esamanusera eta nuconsejachirahehi. Eta numetasirahehi tamutu eta juca, nuvaraha nétumechahe eta véhiruhi, taicha yátupíhi eta vicaijuheirahi me Viya táicha.

¹³ Énaripa ena vichamuriana ticavasanahi te juca avasare Babilonia, téchajicaheana. Énerichuhivare éna, manerejiruanahi ema Viya ecutihí eti

eta manerejisirahehi. Téchajicahehivare ema nuchicha Marcos. ¹⁴ Núti, eta néchajirisirahehi éti nuchamuriana, nuvaraha nétserarecahe emutu, táicutiarahi eta tavayuchirahi eta némunasirahehi emutu éti.

Puiti nuyaseuchahehi me Viya, máijaracahehini tanaraca tamutu eta epanereruana emutu éti machaneranahi ema Viáquenu Jesucristo.

Tamutupa eta juca néchajiriruvahi eyehe.

Eta macartane ema Apóstole Pedro, ticaijare 2 PEDRO

¹ Nuti Simón Pedro, mavanaranuhi ema Jesucristo. Manerejirunuhivare mayehenuhi apóstole. Nucajurehe eta juca nucartane eti nuchamuriana taicha tétavicavahi eta evapinairavahi eta juca véhiruhi. Puiti éti apanava ejacapacarehivare me Viya, ecaicuchiripavare eta iúchucuiraya maicha ema Viáquenu Jesucristo. ² Puiti, nuvaraha tajurucaini eta ecaicutiaraira eta máemunasirahehi ema Viya, tásihaquenehi eta ímatiequenehairapaipahi eta mapanereruana éma, émapa ema Viáquenu Jesucristo. Tájinavare tahapapiricahini eta táurivahi eta epanereruana.

Eta náurivana ena téhicanahi ema Jesucristo

³ Táichavenehi eta vímatirahi ema Viya, tétavicavahi eta máitupajijiasiravahi eta macaemataneasirahavihi eta vítaresirana, mavarairahi vétaviuchahini eta viúrivahi, vicutiyarehi éma eta masantuvahi. Étahi eta mapanereruhi eta máichuirahavihi. Tásiha, visuapavanepa taicha vímahapa eta majaraivahi, vímahavarepa tétavicavahi eta máurivahi taicha camuriquenehi eta táuriqueneana máichaqueneanahi. ⁴ Tíjaracavaripavare éma táetaviuchayare eta viúricacarevanayare maicha te jena sáchezare, tijamurachacareanahi tamutu. Muracahi eta vicasiñavairahi eta máitauchirayare tamutu eta júcana, taicha tétavicavahi eta máurivahi étape eta majaraivahi. Táichavenehi eta ecasiñavairahi mayehe, tinacasamurechahehi eta ecasamurerayarehi étachucha eta táuriqueneana, ecutiya éma eta macasamurerahi eta táuriqueneana. Vaipa tivayuacahemahi eta tajamurachaqueneanahi eta iáqueheana, taicha tétavicavahi eta tamaeperajichirahehi eta cape juca eta ítaresirana. ⁵ Eta tacahe, etuparahahi puiti, ímiyanavahini eta éhisirahi éma, epamicavavarehini iúriya nayehe namutu ena achaneana. ⁶ Epamicavavaréni ecaravahu apaesa ímatiequeneha eta mapanereruana ema Viya, ecaravahuparehini ecaratacava, étumechavavarehini eta ecamichira eta jácani iátajivana. Epamicavahivareni ácuti ema Viya eta masantuvahi. ⁷ Epamicavahivareni iápajucaya eta émunaraivahi nayehe ena echamuriana, ecajirayare. Epamicavahivareni eta émunaraivahi nayehe ena apamuriana achaneana, tayanapane vahi náehichahivihini. ⁸ Eta tacaheyare eta ítaresirana éti, ítamuturusirahi tamutu eta júcana iúriivanahi, ecutipaipahi ema Viáquenu Jesucristo eta máurivahi éma. Énerichuvare te muracahi íjaracava ecaravahupaipahi eta júcana, tiápajucavapaipahi eta ímatiequenehairahi eta máimiturapiana, tiápajucavapaipahivare eta etumeva tayehe eta ecaemataneasirahi éma. ⁹ Nácanisera vahi návarahahini nacaravahu, tímicutijiricavahi ena púchuquiana énaína ticatajivanayare. Taicha náemitisicaipahi eta máepachinachiravacahi ema Viya tayehe eta táinapurénihini napecaturana náichaquenénihi cape eta náitaresirahi.

¹⁰ Étiserá, eti nuparapenevaneana, nuvaraha échavahini eta máichuirahéhi ema Viya, manerejisirahéhi. Epamicavahini eta ímeresirahi yátupi eta machichaherahi. Eta ímiyaniravahi eta ecaravahuireta eta juca néchajisíhaqueneanahi, jéhesare, tájinapa tímiáquipaicaémahi. ¹¹ Tásiha, tétavicavaya eta iúricacarevaya eta machimapiraheya ema Viáquenu Jesucristo te macuchucuhahepa

eta te juca apaquehe, mámiraheya eta te mávacureya. Máitavacacaya eta macachanerahaviya vimutu.

¹² Tacahe núti, nupamicavahi puiti eta némechiraheya eta júcana, tayanapane nímatihehi eta ímatiriripahi, muracaripavare eta éhisirahi eta yátupiqueneana ímitucasivanahi. ¹³ Németeaca nétupicavahi eta juca nuconsejachirahehi puiti juca nítaresiraichaha te juca apaquehe. ¹⁴ Taicha vaipa náyeremahicha eta nítaviraya. Ema Viáquenu Jesucristo tímimetacanuhi eta nunarasiravanenapa te machacaya. ¹⁵ Nuvarahahisera vahi ecuemitísica eta juca numetaruheanahi, tayanapanéinepuca népenaipa. Eta tacahe, nupamicavahi eta nímiájurecahe emutu, taicha nuvarahahi échayarehi tamutu sácheana.

Víti vímahahi eta majaraivahi ema Jesucristo

¹⁶ Víti vitupiruva eta vímitusirahehi tayehe eta táichararacavayare eta machaviraya ema Viáquenu Jesucristo, máímeresiraya eta máitupajijiasirava ichape. Vahi vépiyahirahimahi, váhivare vivehaquenéna te vichuti. Vímatipa yátupi, taicha vímahahi te viúquihana eta majaraivahi eta aquenucairahi. ¹⁷⁻¹⁸ Taicha víti vitiarihihi te machacaya ema Viáquenu Jesús, vicachanehi éma tayehe eta cerro santo, te vinecapaequenehapa eta macaijareirahi éma eta Aquenucairaya. Visamahivare eta mahu ema Tata Vicaiyaquene eta macunachirahi ema Machicha. Ánipa macahehi: “Ema maca éma yátupiquenehi Nuchicha némunarquenehi. Tétavicavahi eta núrísamurevahi máicha” macahepa.

¹⁹ Víti vítametacahi eta nacayemaqueneanahi ena víyarahananini profetana tayehe eta Sagrada Escritura, eta náechajisihairahi eta aquenucairayarehi ema Viáquenu. Eta náimiturapiana tacutihi eta tajaraiya eta lámpara eta tamicauchirahavihi apaesa táuriyare eta vítaresirana te juca apaquehe taurivahi. Tacahe, étumechava tayehe eta ecuchapiravaya eta sáchezare te márajapainapa ema yátupiquene eta majaraiva, tétavicavayarepa eta mamicauchirahayare tamutu eta esamureana. Tacahe, tituparacahahi esuapayare eta juca esamaqueneanahi vímitucasivanahi. ²⁰⁻²¹ Nuvarahasera yátupina ímatiequeneha eta juca: Vahi táurica viveha te vichuti eta vímijachirahi eta tacayemaqueneanahi eta Sagrada Escritura. Vicatuparahahi vicaravahuyarehi eta yátupiquenehi. Ena víyarahananini profetana, váhivare navehaquenehanini te nachutiana eta nájuequenehairahi eta máechajiriruvana ema Viya. Ema Espíritu Santo, éma tímítucavacahi eta nájuequenehairaya éna tayehe eta Sagrada Escritura vímahaquenehi puiti.

2

Natiarihiyare ena tépiyahirahianaya tímijachavanayare pastoreana

¹ Tiuri, acane natiarihivaresera ena tépiyahirahiana tímijachavanahi profetana te namuri ena náchucanaveanaini ísraelítana. Ene tacaheyare puiti, natiarihiyareva ena tépiyahirahianaya, tépiyacavanaya pastoreana eyehe. Éna típichasacaheanayare. Témejecapavachaheanaya, apanaya eta náimiturapiana. Vahi émaimahi náechajisíha ema Viáquenu ema náimicaparuhivare. Énajivahi tíchavanahi natanucahi eta náicuñayare, táijahúchiravayarehi eta náemitiequenehairayare. ² Camurianayare ena náemejecapavaruanayare, náehicainapa eta nayeherepi, táetaviuchirahi eta natuhusivahi. Náichavenehi éna, téchajicanainapa ena apamuriana achaneana, nacaecahinapa eta juca

véhiruhi táurinaquenahi achene. ³ Ena nani, tímitucaheanaya eta náimiturapiana náepiyahiraivanahi, taicha navarahahi títuvavana tivereacaheanainapa éti, taicha tétavicavahi eta najamurarasirahi eta plata. Tájinasera náipuinayare, vahi táevejuacaimahi eta náicuñayare. Taicha acanevacaipa eta tacaecherairahi eta náicuñayare.

⁴ Nacutiyare ena ángeleana téjcapavanahi. Tájina vahi maperdonachavacaimahi ema Viya. Máquijicavacapa tayehe eta táifehiquene infierno távihahi eta timapicuquene. Ticaitihanahi puiti te cadena. Te táitecapapa eta juicio, tiápajucavanainapa eta náicuñayare éna. ⁵ Nuvaraha némechahe nayehe ena machamurianaini ema víyarahaini Noé eta acane, váhivare májapanuvacahini ema Viya táichavenehi eta namasuapajiraivahi. Macamiricapa eta ichape tiquiva náicuñahi. Téricanahi namutu ena nani achaneana, taicha náepuruhi eta máchuiravacahi ema Noé, táurivayarehini eta náitaresirana. Nacarichuhi tiúchucuhanaahi ema Noé, esu mayena, énapa ena sáisiquneeana machichanaveana. ⁶ Nuvaraha némechaheve nayehe ena ticavasanainihi te avasare Sodoma, étapa te Gomorra, váhivare majapanuvacahini ema Viya. Macamiricahi eta yucu, náicuñahi éna. Tájahúchavacapa tacamitiequenehavaca namutu. Títavanapa, amairihanecha tsimapa eta náitavirahi. Ema Viya máimerecahi eta juca, nayehe ena najurureanapa te juca apaquehe puiti, mavarairahi mámechavaca ena achaneana váinarajipanereruanahi te napicayarepuca. ⁷⁻⁸ Téhesera te nataracu, matiarihi ema víyarahaini ticaijare Lot. Éma, tamutuhi sácheana ticatisamurevahi taicha máimairavacahi ena achaneana náichirahi eta tamauriqueneana, masamirahivare eta náechajisihairahi eta titsirihacareanahi. Téñamavahivare éma eta máimairavacahi ena achaneana, natuhusivavacahi eta náitaresiranahi. Tacahe, macuchucuhahi ema Viya, taicha éma Lot, tétavicavahi eta máurivahi, tisupajirahihimayehe ema Viya. ⁹ Eta tacahe, ema Viya tétavicavahi eta macatiuchirahavi puiti, ticuchucuhahavi viti véhicanahi éma, tayehe eta viátacajivana. Énerichuvare yátupihimatu matsecaripa eta náicuñayare nácani achaneana masuapajirairahanahi.

¹⁰ Ema Viya, yátupihimatu máicuñacavacayarehi namutu ena tivayuchanahi eta náechipejisirahi eta náqueheana taicha tétavicavahi eta tavayuasiravacahi eta natuhusivana, énapa ena tépuruanahi ema Viáquenu eta émairahi téchavacahi. Ena nani, máeyajanahi. Mapicaurairahana, nájina návamirahuquenéna eta náumeharaiva. Nasapiha nacaecahivare ena ángeleana tiámána eta majaranavahi ema Viya. ¹¹ Apanasica ena ángeleana tiávianahi te mamirahu ema Viáquenu, vahi nájaracavahini nacajacharecahini ena váinarajiana, tétavicavahinéni eta natumeva. ¹² Énasera ena nani tépiyacavanahi pastoreana, nacaecahihisera eta téhicacareana namaiturrequeneruanahi. Éna, nacutihimatu eta táitaresira eta sárare, tájina nacaicutiaraquenéna. Najurupairuchucha te apaquehe. Éna, táurivasahi eta justicia, máejehahi náerataca táimicapacavaneyare. Tépenanayarehi nacuti eta táepenira eta sárare. ¹³ Éna, náimicatajivachahi nácani apamuriana achaneana. Páureanasamisera éna, tiápajucavanayare eta nacatajivairayare.

Ena nani, tétupicavanahi eta náimairavahi, tiúrisamurereácavanahi eta nacavahirahi tamutu sácheana. Táitaurevaquenehi tétavicavahi eta natsirihacarevayarehi eta namaetupicushivanahi, eta nacasiriquirahehi te jácani énisiracacana ena echamuriana. Ticamapuravanahi ticurisamurechavana,

navarairahi náituruca jácani najamurachaqueneana. ¹⁴ Namutuchucha najamuracha nácani esenana. Tájina náipuina eta náesenamarévana. Náechemaha eta náiturusiraya súcani esena máejerarehi. Náimitucavare ena ajairana tájina náituruéqueneha, nacutiyare éna eta náesenamarevanahi. Tájina tivechuihaimahi eta nacapecaturairahi. Ecuñarquisera eta náicuchihi éna. ¹⁵ Témunasiricavanahi éna, taicha namaimatirahi eta achene nacaijuhaya eta táuriquenehi. Nacutipahi eta mayeherepini ema maca achane Balaám, machichaini ema Beor. Éna, tétavicavahi eta majamurachirahi eta plata, mavachayare eta máichirayare eta tamauriqueneana. ¹⁶ Ema Viya máimahahi eta tamaurivahi eta mapanereruhi ema Balaam. Eta tacahe, eta burro macaperaquenehi ema Balaam téchajicapa, tacajachahi ema Balaam. Éna, macaicutiarahi eta táechajiriruvana eta mapera. Enevanepa témitiacahi eta mapanereruhi tamauriquenénihi.

¹⁷ Éna nánítátaji achaneana nacutíhi eta tiájicu eque. Nacutivare eta úcaji támarairuhi eta tétaticava. Éna, jararihipa eta náicuchi náicuñayare tayehe eta táetaviure eta tamapicuva. ¹⁸ Éna téchajisiavanapa ticunachavanapa eta náichaqueneana napecaturanahi náiturureanahi. Náiminajicapaipa nácani náiturevanapahi eta táurivainiripahi eta náehisirahi eta táuriqueneana, tichavanapaipa tayehe eta tamaeperajivanahi eta náitaresira. ¹⁹ Éna, ánipa tacahe eta náechajiriruvahi: “Víti, nájina víspaimahi tipamicahavi. Tacutirichuhi te vicha eta tamauriqueneana étapuca eta táuriqueneana. Vítijiva véchinavahi eta vítaresiraya” nacahehi. Éna, tímijachavanahi líbreana. Énasesa tiápajucavanahi ticaeratanahi taicha eta tavayuchiravahi eta napecaturana étapa eta namaeperajivana. Nácani tavayuaruanahi eta napecaturana, vaipa éninahini náechinavahini. ²⁰ Tacutiquene nácani tínajicavanahi eta náehisirahi ema Viáquenu Jesucristo, tichavanapa tayehe eta tamaeperajivahi eta náitaresirana te juca apaquehe, éna, tiápajupavanapa eta nacaicuñarayare, taicha eta naviorevahi. ²¹ Tiúripaichuhupucaini vahi nacuimatihini eta táurinaquene véhiruhi, váchupa náimatiripahi eta tiúrina achene, tásiha tínajicavanarichahavare tayehe eta táurinaquene vanairipi najacapanenénihi. ²² Jucarihi eta náechajiriruva náchucarapi, ani tacahehi: “Te tiáhica eta tamucu, táimichavayarehi tanica eta táhiruha. Étapa eta cuchi, tamapuruji vícachahini éta, taicha técarajicavayarehi te tiúrají”. Ene nacahehi ena tínajicavanahi tayehe eta véhiruhi, tichavanapa tayehe eta tamaeperajiqueneanahi.

3

Vaipa táyeremahi eta machavirayare ema Viáquenu Jesucristo

¹ Némuraruqueneana nuparapenaveana, apihepa puiti nímiamaréca eta juca nucartane. Eta táechajiriruvahi eta apinaquene nucartane, nuvarahahi nuconsejachahe, apaesa tacuija tahapapicahe eta éhisirahi ema Viáquenu. ² Nuvarahavare yátupina eta esuapiraina eta Sagrada Escritura nájureanahi eta acane ena víyaranahini santo profetana, étapa eta máimiturapiana ema Viáquenu Macatiurahiquene. Étarichuhivare vímiturapíhi puiti eta eyehe viti apóstoleana.

³ Tínapucayare nuvaraha némechaheyare eta juca. Te jena sache tánehipa eta táitavirayare, tímerecavainapa ena achaneana ticaecahirahiana tayehe eta juca yátupiqueneana vicuchapaqueneanahi víti. Eta náitaresirahi éna,

apanachucha eta tihapapiricavacahi eta náichirahi eta tamauriqueneana najamurachagueneanahi. ⁴ Áninapa nacaheyarecacha: “Táicharacava eta juca ecuchapaquenehi. Vuíchahacaru machavahini ema Cristo, ímijachaguenehi tichavavaneharehi. Vaipa tasuapacare eta machaviraya. Taicha puiti tacutirichuhi eta náitaresirainihi ena viáchucanaveánaini. Tanasirichuhi eta táepaniravahi acane eta apaquehe. Vahi táitsivachavahini” nacahepa.

⁵⁻⁶ Ena nani, vahi návarahahini napanerequeneha eta táitsivachiravahi maicha ema Viya. Jéhesare éma, eta acane, máechajiriruchucha eta máepiyasirahi tamutu eta anuma étapa eta apaquehe. Máechajiriruchuchavare eta táimeresiravahi máicha, eta tiájipahi tétupiecahi te une. Énerichuvare, te táequenepa, únehi eta náicuñahi máicha, macamirisirahi eta ichapequene tiquiva. Téricanahi namutu ena masuapajirairahanahi. ⁷ Numetacahe puiti: Ema Viya táepchavayare máicuñacayare eta juca apaquehe. Yúcuayehisera eta tacamitieuquenehayare tamutu eta anuma étapa eta juca apaquehe. Taicha éma, manacaripahi eta máechajiriruva, máicutichahi eta tayerevaya étapa eta távaphianahi. Jéhesare, te jena sácheyare, títapaicavacayare namutu ena achaneana masuapajirairahanahi váinarajianahi.

⁸ Váhivare ecuemitisica, nuparapenaveana, eta matuparaquihí ema Viya, vahi tácuti eta vituparesira viti achaneana. Éma, étana sache matuparacahi, vítisami mil áñoripa eta vitupachirahi tayerevaipa. ⁹ Éma, manacahi eta juca tayerevahi, mavarairahi macuchapayare ena achaneana eta náeneuchiravayare mayehe. Vahi tácahequénéahini eta juca táitaresirahi maicha eta apaquehe. Ichapemuri eta macayeherahi paciencia eta viyehe, mamavarairahi vámutuhichaini vémitieuquenehíni. Nararihisera ena achaneana téjecapavanahi te napanereruana. Eta náimairahi eta mayerevahi ema Viya eta máicuñasiravacayarehi, náimijachahi vaipa maratahaimahi máicuñaca eta juca apaquehe.

¹⁰ Esamanuchaha. Te táitecapapa eta sácheyare táitavirayare tamutu maicha ema Viya, vahi vinecapauchavaimahi, taicha tacutiyare eta mayumurusirava eta máitesira mácani tíamerahi. Eta anuma, étapa tamutu eta távaphianahi, tamutuyare témitiaca. Ticaemayare muraca, tacutiyare eta tacaemaira eta ichapequene yucu te ichape curiche. Étapa eta tiávihanahi te apaquehe, tamutuyarehi títava, énapa ena távaphianahi. Tamutuyare táijuchayare eta yucu.

¹¹⁻¹² Tásiha éti, écharipahi eta juca táitavirayarehi eta anuma étapa eta apaquehe, táijuirayare tamutu te yucu. Puitipa tacamunuipahi ámutuhini ésencahini ema Viya, étaviuchahini eta iúrivahi eta itaresirahi. Puiti, yátupi ávarahahini táitecapavanehini eta jena sácheyare. Eyaseaca ema Viya táitecapavane. ¹³ Taicha viti machaneranahi ema Viya, vicuchapainapa eta arairuyare anuma étapa eta arairuyare apaquehe, vícuchihi mayehe ema Viya. Tájinainapa eta pecatua, vaipa tihapapicahavimahi. Tétavicavayarehi eta táuriva.

¹⁴ Eta tacahe, némunarqueneana nuparapenaveana, puiti eta ecuchapirayare eta juca tacaitsivairaya tamutu, étumechavayarechucha eta ecasiñairahi ema Viáquenu Jesucristo, apaesa tauri eta machimapiraheyare, tacuija etapiravainahi. ¹⁵ Échava yátupina eta macayeherahi paciencia eta viyehe ema Viáquenu taicha mavarahahi ticuchucuhahaviya. Étarichuhívare tacahehi eta máimiturapili ema apana viparape vémunaruquenehi Pablo,

táichavenehi eta máitupajijiasiravahi máijjaruhi ema Viya. ¹⁶ Tamutu eta macartaneana máimiamareruanahi eta eyehe, étarichuhi táechajisihahi eta júcana. Jararihisera ticajerahi eta ecaicutiarairainahini. Nararihisera ena ticaravahuana apaesachicha, vuíchahavare túmevacaimahi eta náehisirahi. Náequepicasamichucha eta táimiturapi eta macartane. Nahapapicavare eta táimiturapihi eta apana Escritura. Táimicuñacavacayaresera eta nahapapisirahi.

¹⁷ Eta tacahe, némunaruqueneana nuparapenaveana, vahi tacumapuruji eta ímatiequenehairahi eta juca, machu nahapapicahe eta epanereruana ena tivayuarahianatataji. Máchuvare náiminajicahe eta éhisirahi ema Viáquenu. ¹⁸ Puiti, nuvaraha tajurucaparichuchaini eta ímatiraina ema Viáquenu Jesucristo. Tajurucaparichuchavaréni eta evapinairavahi eta máemunasirahehi ema Ticatiuchahavihi. ¡Tétavicavahini eta vijirauchira, vicunachahini éma, te vinarasirana, te véjamisirana! ¡Te visiapainapa eta mávasa, vímiyanavayare! ¡Amén!

Eta macartane ema Apóstole Juan, ticaijare 1 JUAN

Eta viúrujasira ema Jesucristo

¹ Nuti Juan nímiama reca eta juca nájure eta eyehe. Nuvaraha numetacahe éti, eta véchaquenehi mayehe ema Jesucristo, ema t́jaracahavi eta echájirirucava ticaitarecarahi. Éma, matiaríhihi acane te tépanavapa tamutu. Tacahe, tiúcupaicahi, tímerecavahi eta viyehe. Visamapa eta máechajiriruva. Camuri eta sácheana eta vímararasirahi éma te viúquiha. Vémamahaca te vivahu. ²⁻³ Éma, matiaríhihi acane, manasiqeneripahi mayehe ema Maiya. Tiúcupaicapasera eta viyehe. Víti vímatipa eta achánequenérahí éma. Tásiha, puiti vimetacahe eta juca vímahaquenehi étapa eta visamaquenehi. Vimetacahe taicha vivaraha iúrujicavahíni eta viyehe. Taicha víti viúrujicavahi mayehe ema Tata Vicaiyaquene émapa ema Machicha Jesucristo. Tásiha, éti apana iúrujicavahíni nayehe. ⁴ Tásiha, nucajurehe eta juca taicha nuvaraha yátupina eta iúrisamurevaina.

Eta majaraivahi ema Viya

⁵ Vimetacahe eta máimitusirahavi ema Jesucristo. Eta juca eta macaye-maquenehi: “Jararihi eta t́jarahi mayehe ema Tata Vicaiyaquene. Tájina timapicuina mayehe, taicha mavayure eta máuriva”.

⁶ Tiúri, te vinasirichupuca víti te timapicu, tásiha te vicahehipuca: “Viúrujicava mayehe ema Viya”, tásiha víti vépiyahirahiripa. Vahi viúrujicavahíni mayehe, váhivare visuapahíni eta mavanairipiana. ⁷ Téhesera yátupina eta visuapira eta mavanairipiana, vinasirichuhi eta te majaraivahi éma Viya, tacutihí eta manasirichuhi éma eta te majaraivahi. Tásiha, eta vinasirichuhi eta te majaraivahi, viúritarecayarehi eta viúrujusiracaca nayehe ena vichamuriana. Énerichuvare máepachinachayare tamutu eta vicapecaturairana, taicha te tépenapa ema Jesucristo Machicha ema Viya, máepusaicahi eta máitine eta máepachinachirahaviyarehi.

⁸ Te vicahehipuca: “Tájina eta nupecaturaina”, tacahe, vahi vátupiemahini eta vipanereruhi. Vítijiva vivayuaracavahi víti.

⁹ Téhesera vitupiruvahi eta vimetauresiravahi eta vicapecaturairana mayehe ema Viya, jararihiripa eta maperdonachirahavihi. Taicha t́jaracavahi éma eta maperdonachirahaviyare, vahi táeñamavacarehíni. Énerichuvare májahaya tépachinachahaviyare tamutu eta támaraiqueneana viyehe. ¹⁰ Téhesera vicahehipuca: “Tájina nupecaturaina”, vépiyaequenehahi ema Viya. Vímicutijiricapa ema máepiyahirahíni. Vahi tátupiruvahíni eta vijachapirainahíni eta máechajiriruva.

2

Ema Jesucristo, ema ticatajirahi

¹ Nuchichanaveana, nucajurehehi eta júcana taicha nuvaraha vahi ecuapaturaini. Téhesera íchapuca eta pecatu, mararihi ema ticatajirahi viyehe te mamirahu ema Tata Vicaiyaquene. Ticaijare Jesucristo ema ticatajicahavirahi. Éma, matapiravare; tétavicava eta máuriva. ² Éma, tímicapacavahi

táichavenehi eta macaepahairayarehi eta vipecaturana apaesa viúri mayehe ema Viya. Váhiserá tácarichu eta vipecaturana víti. Táimicapacahi éma eta macaepahairayarehi eta napecaturana namutu ena achaneana te juca apaquehe.

³ Tiúri puiti, vicasíñavahi eta vímatirahi ema Viya, taicha visuapahi eta mavanairipiana. ⁴ Te nararihipuca ena nácani achaneana nacahehi: “Núti nímati ema Viya”, téhesera vahi nasuapahini eta mavanairipiana, tacahe náepiyevahi éna. Vahi tásuapacarehini eta náechajiriruva. ⁵ Étasera eta visuapirahi víti eta mavanairipiana tímechahavihi eta víavahásirahi ema Viya. Yátupihí eta vémunasirahi ema Viya. ⁶ Víti vicahehi: “Vívaháca ema Viya”, tásiha, tacamunuhi eta táurihini eta vítaresirainahini tácutihini eta táurivahi eta máitaresirahi ema Jesucristo.

Eta mavanairipi ema Viya eta vémunasiracacaina

⁷ Nuparapenaveana, nuvaraha némechahe te juca carta eta macavanairipirahavi ema Jesucristo eta vémunasiracacaya. Te tépanavainapa eta ecaijuherahi ema Jesucristo, vímitucaheripa eta juca mavanairipi. Taicha tamutu eta juca vímiturapiana táuchurehi tayehe eta juca mavanairipi ema Jesucristo. ⁸ Puítirichu nuvaraha tápajucava eta ecaicutiarairaya eta máemunasirahavihi éma. Manasirichuhi éma te majaraiva ema Maiya. Tásiha éti, te esupa eta juca mavanairipi, te émunacaca, epauchainapaípa eta majaraiva ema Viya. Térajicavainapa eyehe eta timapicu.

⁹ Te nararihipuca ena nácani achaneana nacahehi: “Núti návihahi eta te majaraiva ema Viya”, téhesera nacaticahipuca ena nachamuriana, návirichuhi te timapicu. Vahi napauchaimahi eta majaraiva ema Viya. ¹⁰ Nácanisera náemunacahi ena nachamuriana, nanasirichuhi te majaraiva ema Viya. Tásiha, tiúrihi eta napaisirahi, apaesa vahi náejecapavahini. ¹¹ Énasera ena nácani nacaticahi ena nachamuriana, nanasirichuhi éna te timapicu. Vahi náechahíni eta napaisirayare eta náitaresira, taicha eta timapicu vahi táisapahíni náimairicahíni.

¹²⁻¹⁴ Eti nuchichanaveana, nucajurehe taicha néchahi eta maperdonachiraheripahi ema Viya eta epecaturana émavenehi ema Jesucristo, táichavenehivare eta ímatirapa ema Tata Vicaiyaquene.

Eti ávinaveana, nucajurehe taicha éti ímatihi ema Jesucristo, ema matiarihiquenehi acane te tépanavapa tamutu.

Eti átinaveana, énerichuware nímiajurecahehi taicha tanasirichu iúnacahi te esamureana eta máechajiriruva ema Viya. Tásiha éta, tétumechahehi eta ecapaquechiraipahi ema Váinaraji.

¹⁵ Emutu eti, vahi ecujamuracha eta tamauriqueneana te juca apaquehe. Váhivare ecujamuracha eta tatiarihiqueneana tayehe eta juca apaquehe. Te nararihipuca ena najamuracha eta tamauriqueneana te juca apaquehe, vaipa émainahini náemunaca ema Tata Vicaiyaquene. ¹⁶ Taicha tamutu eta napanereruana ena achaneana te juca apaquehe, tájina táurivaina. Napane-rechahi naicha eta tamauriqueneana. Najamurachaípa eta apayehe. Navarahaípa nacayehe náimijachaípapuca tiúrihi eta náimairahi. Te tícaimahaqueneanapa, tisiñavanapa táicha. Eta juca napanereruana, vahi máijararuinahini ema Tata Vicaiyaquene. ¹⁷ Numetacahe puiti: Títavainapaípa

tamutu eta apaquehe. Énerichuvare títavainapaipa tamutu eta najamurachaqueuena ena achaneana. Vítisera, te visuapa eta mavarahaquene ema Viya, máichecuarquiréna eta vítaresira.

Ena ticitianacana ema Cristo

¹⁸ Nuchichanaveana, puiti tiánehinapa eta táichecuiraya, títavainapa tamutu. Vimetacaheripa eta máitesirayare ema maca achane ticaicare Ánticristo, ema ticitianacayare ema Viáquenu. Púitiripa nararihipa ena ticitianacanahi ema Cristo, navarahaipa máitecavane ema Ánticristo. Tásiha, véchainapa eta tiánehinapa eta táichecuiraya tamutu. ¹⁹ Ena ticitianacana ema Cristo náchurehi eta viyehe. Váhiserá víumurivainahini éna. Taicha te víumurivainahini, nanasirichuhini eta viyehe. Náerajiruvai pahisera eta viyehe. Tásiha, vímatipa eta vahi víumurivainahini.

²⁰ Ema Viáquenu Jesucristo tjaraca heripa éti ema Espíritu Santo. Tásiha, emuturipahi ímati eta yátupiqueneana. ²¹ Nucajurehehi táichavenehi eta ímatirahi. Nuvaraha ácaicutiaraquenénahini eta yátupiqueneana. Te esupa eta yátupiqueneana, vahi ácutimahi ena tépiyahirahiana.

²² Numetacahe eta juca taicha nararihipa puiti ena tépiyahirahiana, ena nácani nacahehi: “Ema Jesús váhira émaina Cristo Machicha ema Viya” nacahehi. Ena nácani achaneana, ticitianacanahi ema Cristo. Tacuti eta nácahehini: “Váhira émaina yátupiquene Tata Vicaiyaquene, váhivare émaina Maiya ema Jesús” nacahepáini. ²³ Numetacahe eta apana: Nájina tiávahácanaimahi ema Tata Vicaiyaquene ena vahi nasuapahini ema Jesús eta machichairahi ema Tata Vicaiyaquene. Viávahácahisera víti ema Tata Vicaiyaquene vimutu víti visuapanahi ema Jesucristo eta machichairahi ema Viya.

Eta viávahásirahi ema Jesucristo

²⁴ Tásiha, ecapanereryaréchucha éti eta máechajiriruva, tamutu eta esamaqueneanaripahi eta te tépanavainapa eta ecasiñairahi ema Jesucristo. Eta ecapanereruira eta júcana, iávahácayare ema Tata Vicaiyaquene émapa ema Machicha. ²⁵ Taicha tjaracavahi ema Jesucristo tjaracahaviya eta vítaresira máichecuarquiréna.

²⁶ Puiti nararihi ena navarahayare tivayuaracaheana. Tásiha, nucajurehe apaesa ecuneuchava éti nayehe te témejecapavarahiána.

²⁷ Éti, mávaháruheripa ema Espíritu Santo mavaneruhi ema Jesucristo. Tásiha, nájina apanaina ácamunuhini máimitucahehini, taicha tímítucahehi tamutu ema Espíritu Santo. Éma, yátupiquenehi eta máechajiriruva. Éma, vahi tépiyahirahi. Timetacahehi éma: “Ánasirichu iávahácahi ema Jesucristo”.

²⁸ Púitiserá, nuchichanaveana, ímiyanava eta iávahásiraina éti ema Jesucristo apaesa túmesamurehéina éti, vahi ecutsiriha mayehe eta te machava.

²⁹ Éti échahi eta máetaviuchira eta máurivahi ema Jesucristo. Tásiha, ímatiyare ena apamuriana machichanaveana ema Viya, táichavene eta náichirahi eta táuriqueneana.

3

Viti machichanaveana ema Viya

¹ Nuchichanaveana, tétavícava táramicareva eta máemunasirahavi ema Tata Vicaiyaquene. Yátupíhi tímijarechahavíhi “machichanaveana”. Púitiripa

yátupiquenehi machichahaviripahi. Énasera ena apamuriana achaneana vuíchaha nácaicutiarahíni eta macachichairahavihi ema Viya, taicha vuíchaha náimatihíni eta máemunaraivahi éma. ² Némuncasareana, vécharipa eta macachichairahavipa ema Viya. Vuíchahasera tímechahavi éma eta viúrivayare. Vécharipavare eta vicitirayare ema Jesucristo eta te machava. Taicha vímahayare eta máimahiquene éma. ³ Tásiha, vimutu víti vicunevayare eta vicitiraya ema Jesucristo, puiti vácuticaca víúrihini tácutihini eta máurivahi éma.

⁴ Nuvaraha némechahe: Namutu ena tisipecaturana, nacaticha eta mavanairipiana ema Viya, étara eta juca napecaturahi. ⁵ Ema Jesucristo, tájina matapiravaina éma. Vímatiripasera eta tímitecahi éma te juca apaquehe eta macaepahairayare eta vipecaturana. ⁶ Víti, te viávahácahi ema Jesucristo, tituparacahavi vaipa vicuimisiapava tayehe eta pecatuana. Énasera ena ticapecaturarahiana vahi náimatihini ema Cristo.

⁷ Nuchichanaveana, vahi ecuisapava navayuacahe. Víti, te vímisiapavahi tayehe eta táuriqueneana, vímerecaya eta viúriava. Vicutinapa ema Jesucristo eta máetaviuchirahi eta máuriva. ⁸ Te náimisiapava ena apamuriana tayehe eta tauriqueneana, éta tímereuchavacahi eta machichairavacahi ema Váinaraji. Taicha ema Váinaraji, ema tinacuchahi táquenuhi eta pecatu. Numetacahe eta apana: Ema Machicha ema Viya tímitecahi eta macaepahairayare eta majarareruanahi ema Váinaraji.

⁹ Víti machichahaviripa ema Viya. Váipa vímisiapavaimahi tayehe eta vicepecaturairana taicha vicitinapa éma eta tamajinairahi matapiravaina. Éma, tájina mapecaturaina. Eta macachichairahavihi ema Viya, vahi vicepecaturaimahi. ¹⁰ Nácani vahi tíchanahi eta táuriqueneana, váhivare náemunacahíni ena nachamuriana, náimerecahi eta vahi machichavacainahini ema Viya. Tímerecavanahivare eta machichairavacahi ema Váinaraji. Vítisera, eta víchirahi eta táuriqueneana, étapa eta vémunasiracacahi, vímerecavahi eta macachichairahavihi ema Viya.

Eta vémunasiracaca

¹¹ Te tépanavainapa eta ecasiñairahi ema Viya, vimetacahehi eta mavarairahi eta vémunasiracacayare. ¹² Tásiha, vahi ecucuti éti ema Caín, mávaháruhi ema Váinaraji. Ema maca Caín macapacahi ema maparapéni Abel, táichavenehi eta máetaviuchirahi eta mavainarajivahi. Ema maca Abel, táimicapacahi eta masupajiraivahi, máichirahi eta táuriqueneana. ¹³ Nuparapenaveana, énerichuvare puiti nararihiya ena achaneana ticatichaeanayare éti apana. Váhisera ecuarami eta juca.

¹⁴ Nuparapenaveana, véchahi víti eta víapechiravaya vítareca te táequenéraya eta vépeniraya. Vicaijuhenapa eta vítaresiraya máichecuaraquireya. Véchahi eta juca, táichavenehi eta vémunasirahi ena vichamuriana. Énasera ena vahi náemunacahini ena nachamuriana, nanasirichu. Vahi tíuchuchuanaimahi tayehe eta náepenira. ¹⁵ Namutu ena ticatichanahi ena vichamuriana, nacutíhi ena ticapahiana. Eta náichararacavayare ena ticapahiana, véchahi eta namauchucuirayare. ¹⁶ Ema Jesucristo tímechahavihi eta máemunasirahavihi, taicha tíjaracavahi tépena vítivenehi. Tásiha víti, te jácani táichararacava, tituparacahavi víjaracavayare vépena énavene ena vichamuriana, vímechiraya eta vémunasiracacahi. ¹⁷ Te mararihi ema mácani achane ticaimahaquenehi,

te vahi achánesamurénaahi mayehe ema machamuri eta macaijuherahi, ema maca váhivare máemunacahini ema Viya. ¹⁸ Nuchichanaveana, vémunacacachucha vicajicaca eta vicayehequeneana. Vahi vicúyacuñiriríha. Váhivare vicuepiyahirahi eta vémunasiracacairahi. Vahi tacucarichu eta véchajiriruva.

Vicasiañavaya te mamirahu ema Viya

¹⁹⁻²⁰ Tásiha, eta te vémunacaca, véchahi eta yátupirahi machichahavi ema Viya. Téheserapuca tipicacaracavahi eta visamure, vicaesamiricayare eta visamure, taicha ema Viya tímahahavihi eta vicasiañairahi eta majapanuirahavihi. Taicha majapanurahiquenehi éma. Téchahi tamutu. ²¹ Tiúripána, némunacasareana, te tájina eta tapicacararasiravaina eta visamure. Tásiha, vahi vipicaimahi eta viyasearapiánaya mayehe ema Viya. ²² Vicasiañavainapá eta máijarasirahaviyare tamutu eta viyasearuanahi, taicha visuapahi eta mavanairipiana, vicurisamurechahi ema Viya. ²³ Eta juca mavanairipianahi: “Ecasiaña ema Nuchicha Jesucristo, énerichuvare émunacaca”. Tacáhehi eta mavanairipi viyehe. ²⁴ Te visuapa eta mavanairipiana, víavahácahi éma, énerichuvare éma tiávahácahaviya. Véchahi eta matiarahirahi ema Viya eta viyehe, máicha ema Espíritu Santo mavaneruhi éma.

4

Ena mávaháruana ema Espíritu Santo énapa ena mávaháruana ema Váinaraji

¹ Némunacasareana, ecuneuchava nayehe ena tépiyacavana ticametarairuana. Taicha puiti nararihi éna. Vahi mavaneruanaina ema Viya, váhivare mávaháruanaina ema Espíritu Santo. Tásiha, te náitecapauchahépuca ena návaraha tímítucaheana, éti eyaseresinavaya te yátupipuca vanairucana me Viya. Esamayare te étarichupuca eta vímiturapiánahi víti. ² Eta juca eta ímatiarayare ena mávaháruana ema Espíritu Santo te nacahehipuca: “Ema Jesucristo yátupiquenehi achane eta máuchusirahi”. ³ Énaserá ena apamuriana, te náñauchahípuca eta yátupirahi achane ema Jesucristo, vahi mavaneruanaina ema Viya. Éna, ticatianacanahi ema Cristo. Vimetacaheripa eta náitesirayare ena ticatianacana ema Cristo. Tiuri, puítirichu nararihipa ani viyehe.

⁴ Nuchichanaveana, éti machichahe ema Viya. Néchahi núti eta emaisa-piravahi tivayuacaheana taicha mávaháruhehi ema Espíritu Santo. Éma, tímepanahi mayehe ema Váinaraji, náehiruhi ena nani tivayuarahiana. ⁵ Ena nani, tahapapiricavacahi eta tájiparacana tayeheana eta apaquehe tamauriqueneana. Tásiha, ena achaneana máehicarahanahi ema Viáquenu náuricaipa náitecapauchavaca. ⁶ Vítiserá machichahavihi ema Viya. Tisamararahaviana ena tímátiana ema Viya. Énaserá ena apamuriana máimati-rahana ema Viya, vahi tiúrimahi eta nasamirahavi. Tásiha, tímaticareanaya ena mávaháruana ema Espíritu Santo. Énerichuvare tímaticareanaya ena mávaháruana ema Váinaraji.

Témunarahuquene ema Viya

⁷ Némunacasareana, tacamunu eta vémunacaca vámutu. Taicha ema Viya tímítucahavihi eta vémunasiracacaya. Vimutu viti vémunacacanahi, étapa tímereuchahavihi eta macachichairahavihi ema Viya, yátupihí eta vímatirahí éma. ⁸ Énaserá ena nani vahi témunacacana, vahi náimatihini ema Viya.

Taicha ema Viya, yátupiquenehi eta máemunaraiva. ⁹ Éma, tímechahaviripa eta máemunasirahavihi, eta mavanésirahi ema macarichuquene Machicha. Mavanecahi títeca te juca apaquehe, tíjarachaviyare eta vítaresirayare máichecuaraquirénapa. ¹⁰ ¡Tétavicava eta máemunasirahavihi! Vítisera vahi vítvainahíni vémunaca ema Viya. Mativahi ema témunacahavihi. Eta máemunasirahavihi ema Viya, máijararecahi ema Machicha. Mavanecahi tépenayare te crusu étavene eta macaepahairayare eta vipecaturana.

¹¹ Némunacasareana, máetaviucha eta máemunasirahavihi ema Viya; tásiha, vítipa tacamunu eta vémunasiracacáina. ¹² Nuvaraha ácaicutiara eta juca: Nájina tímahaina ema Tata Vicaiyaquene. Téhesera víti, te vémunacacapuca, tiávahácahaviya éma. Tásiha, vicutihi ema Viya eta máemunaraivahi éma.

¹³ Puiti, víti viávahácahi ema Viya, énerichuvare tiávahácahavihi éma. Véchahi eta mávahásirahavihi ema Viya, máichavenehi ema Espíritu Santo mavaneruhi eta viyehe. ¹⁴ Tásiha, víti vicachaneanripa ema Jesús, vimetacavacapahi namutu ena vímanaruanapahi eta máucupaisiraipa te anuma, taicha vivaraha náimatiyare namutu eta mavanésirahi ema Viya máiteca ema Machicha ticatiuchahaviyare vimutu víti achaneana te juca apaquehe. ¹⁵ Tacahe, te nararihipuca ena nacahehi: “Ema Jesús machichara ema Viya”; tásiha, tímaticareanahi éna, mávaháruanahi ema Viya, étapa eta návahásirahi éma.

¹⁶ Víti véchahi eta yátupirahi máemunasirahavihi ema Viya. Eta tac-ahe, vicasíñavahi eta mayehe. Témunarahiquene éma. Tásiha, víti apana, te vémunarahipuca, viávahácaya ema Viya; éma apana, tiávahácahaviya. ¹⁷ Vétaviuchaya eta vémunasiraya ena vichamuriana taicha eta viávahásirahi ema Viya. Tásiha, vahi vipicaimahi eta jena sácheare te viyanapa te mami-rahú ema Viya. Vahi vipicaimahi taicha machichahavihi ema Viya, vicutihi ema Jesús eta macachichairahi ema Maiya, tayanapanepuca vítarecarichaha te juca apaquehe.

¹⁸ Ena apamuriana achaneana tipicacaracavanahi taicha téchavanahi eta nacaicuñairaya. Vítisera vahi vipicaimahi taicha vicasíñavahi eta máemunasirahavihi ema Viya. Te yátupihipuca vicasíñahi, macaesamiricaya eta visamure eta vipisira. Tásiha, nácani típcanahi, napicahi taicha vahi nácasiñavahini eta máemunasiravacahi ema Viya.

¹⁹ Víti vémunacahi ema Viya taicha ema mativahi témunacahavi. ²⁰ Te nararihipuca ena nacahehi: “Víti vémunaca ema Viya”; téheserapuca nacati-chaichucha ena nachamuriana, éna tépiyahirahianahi. Taicha náimahanénipuca ena nachamuriana, váhisera náemunacahini, ene tacahehi eta namaemunasirahi ema Viya máimahasiquenehi. ²¹ Eta juca eta mavanairipihí viyehe ema Viya: “Émunacanu nuti yátupiquenehi Viya; émunacavare ena echamuriana”.

5

Virataha vínjica eta tamauriqueneana

¹⁻² Yátupihí eta macachichairahavipa ema Viya vimutu víti visuapanahi ema Jesús eta émairahi ema Cristo. Tásiha, vémunacarine ema ticachichahavihi. Tásiha, te vémunaca ema Viya, téhepa visuapa eta mavanairipiana, tituparacahavi tacutiyaichu eta vémunasiraya namutu ena vichamuriana, taicha machichanaveanahivare éna, viparapenaveanahi te mavahuana ema Viya. ³ Étavene eta vémunasirahi ema Viya, visuapaya eta mavanairipiana.

Taicha vahi táyacujicarehini eta visuapiraya eta mavanairipiana. ⁴ Tásiha, viti machichanaveana ema Viya viratahaya vínajica eta tamauriqueneana eta vítaresiraya. Taicha tímícatacahaviripa ema Jesús táichavenehi eta vicasiñairahi eta mayehe. ⁵ Víti visuapahi eta yátupirahi Machicha ema Viya ema Jesús. Tásiha, viti véhicanahi éma, vicarichuhi víti virataha vínajica eta tamauriqueneanahi eta vítaresira.

Éma Jesucristo, Manerejiruhi ema Maiya

⁶⁻⁸ Te títecapa ema Jesucristo, tímerecavapa te juca apaquehe, une eta macaicachasiyahi. Énerichuvare eta máitine máepusairuhi eta máepenirahi te crusu. Tásiha, te vímatiequeneha eta macaicachasirahi te une, étapa eta máepusaisirahi eta máitine, témechahaviripa eta manerejiruichuhi ema Maiya. Eta une étapa eta máitine témechahavipa ema Jesús eta émairaquenehi Cristo. Éma Espíritu Santo, émapa títámetacahavi. Taicha ema Espíritu Santo yátupihí eta mametarapiana. Eta une, eta máitine, émapa ema Espíritu Santo, eta juca mapanaquene témechahaviripa. Ticuticacahi eta tacayemaqueneana. ⁹ Tacutihí eta masuapacareva ema mácani achane tiuri. Tíápajucavasera tasuapacarevapana eta mametarapiana ema Viya mayehe ema Machicha. Ánipa macahe: “Émara nuchicha, némunaruquene ema maca”. ¹⁰ Tásiha, te vicasiña ema Machicha ema Viya, visuapava vicasiñava te visamure eta yátupirahi eta mametasirahi ema Viya. Ena apamuriana vahi nasuapahini ema Viya, náimicutichapa máepiyahirahihíni ema Viya, taicha vahi nasuapahini eta mametarapianahi mayehe ema Machicha. ¹¹ Étarichuvare eta juca eta mametasirahi ema Viya, eta máijarasirahaviripa eta vítaresirayare máichecuaraquirénapa. Éma Machicha ema Viya, éma téchahi eta vítaresira. ¹² Ena ticasíñanayare éma, títarecanayare. Énasera nácani vahi ticasíñanahi ema Machicha ema Viya, vahi títarecanaimahi.

Éta vítaresirayare máichecuaraquireyare

¹³ Tiuri, némunacasareana, nuvaraha échayare eta ítaresirayare máichecuaraquirénapa, taicha ecasiñahi ema Machicha ema Viya. Éta tacahehi eta nucajureirahehi.

¹⁴ Tásiha, tájina táéñamavacarehini eta viyasearuanahi ema Viya, taicha véchahi víti eta masamirahavihi, taicha eta viyasearapiana tásihaqueneanahi eta vímatiequenhairahi eta mavarahaquenehi ema Viya. ¹⁵ Tásiha, véchahi eta máijarasirahaviya tamutu eta viyasearuana, taicha véchahi eta tasamacarevahi eta viyasearapianahi eta mayehe.

¹⁶⁻¹⁷ Tamutu eta tamauriqueneana náichahi ena achaneana, ema Viya máimijarechahi “pecatuana”. Jararihi eta pecatuana tíñehipana mayuchaticavaneya ema Viya eta vítaresira táicha. Jararihivare eta apana pecatuana váhirichu tíñehicha. Te mararihipuca ema mácani vichamuri ticapecaturarahi, eta váhirichu tíñehicha eta máepeniraini; te ímahapuca eta macapecaturairahi, éti eyaseuchaya éma, mayehe ema Viya. Tásiha, ema Viya máijarayare eta máítaresirayarechaha ema ticapecaturarahi. Téhesera mararihipuca ema mácani ticapecaturarahi eta tíñehipana mayuchaticavaneya ema Viya eta máítaresira, vahi nuvanecahe eta eyaseuchahini ema maca achane ticapecaturarahi.

¹⁸ Vecha eta vahi vímisiapavaimahi tayehe eta vicapecaturairana viti machichanaveanahi ema Viya. Taicha ema Machicha ema Viya tijaneacahavihi vimutu víti. Vahi máratahaimahi ticaetemahavi ema Váinaraji.

¹⁹ Taicha véchahi eta macachichairahavihi ema Viya. Váhisera vámutu. Nararihihi ena apamuriana achaneana machaneranahi ema Váinaraji.

²⁰ Vítisera véchahi eta máitesirahi eta te juca apaquehe ema Machicha ema Viya. Éma tímitupanahavihi. Émavenihi témesenichavihi mayehe ema Maiya ema yátupiquenehi Viya. Máichavene ema Machicha Jesucristo, viávahácaripa víti ema yátupiquenehi Viya. Émara ema macarichuquenehi yátupiquenehi Viya. Éma, tíjaracahaviya eta vítaresiraya máichecuarquirénapa.

²¹ Nuchichanaveana, vahi ecucasiñaraji; vahi ecucuti ena achaneana ticasiñarajiana eta achanemirana.

Tamutupa eta juca néchajiriruvanahi eyehe.

Eta macartane ema Apóstole Juan, ticaijare 2 JUAN

Eta vémunaraivaya

¹ Nuti Juan, víyarahánupa, nucajurevi eta juca nucartane piti ati. Néchajicavi piti manerejiruhi ema Viya. Énerichuvare némechajirisihavaca ena pichichanaveana. Eti némunaruhequenehi núti, tacuti eta náemunaravaca namutu ena apamuriana títucana tisuapana eta yátupiquene máechajiriruva ema Viya. ² Viti vémunacahe taicha viciticacahi eta visuapira eta yátupiquene máechajiriruva ema Viya. Máichecuarquirénapa eta visuapiraya. ³ Nuvaraha macatajcahehini ichape ema Tata Vicaiyaquene, émapa ema Jesucristo, Machicha ema Viya. Nájapanuhehini, nájaracahehini eta táurivaina eta epanereruana, taicha yátupiquenehi eta náemunasirahehi.

⁴ Núrisamureinehi eta néchirahi eta nanerejisiravahi ena pichichanaveana, tíurihi eta náehisirahi eta yátupiqueneanahi, tímiyanavanavare eta nasuapirahi eta mavanairipiana eta víyehe ema Tata Vicaiyaquene, taicha ene vicaheyarehi.

⁵⁻⁶ Tiuri puiti, ati, nucajurevi, taicha nuvaraha némechavi eta juca mavanairipi ema Viya, étarichu eta vémunasiracacayare vimutu. Te vémunaca ema Viya, visuapaya tamutu eta mavanairipiana eta víyehe. Te tépanavainapa eta vicasiñairahi ema Viya, tivanecahaviripahi eta vémunasiracacayare. Tásiha puiti, eta ecaheyare eta émunasiracacairayare eta ítaresiayare.

Ena tivayuarahiana

⁷ Nuvaraha némechavi eta juca, taicha nararihi te juca apaquehe te viávihi ena navarahahi ticaetemaheanaya. Ena nani, vahi návarahahini náimicaecheráchahíni eta máuchusirahi yátupiquenerahi achane ema Jesucristo. Ena nani, tivayuarahianahi, ticatianacanahivare ema Cristo. Vahi návarahahini véhica éma. ⁸ Tásiha, ecaunevayare tayehe eta navayuarapiana. Échapavachucha éti, machu nacamitísicahe tayehe eta ícuchihi ématanevachahi. Nuvaraha ejacapayare tamutu.

⁹ Viti visuapahi eta máimiturapiana ema Cristo, viti viávahácahi ema Tata Vicaiyaquene émapa ema Machicha. Váhisera návahácaimahi ema Viya nácani vahi návarahahini nasuapa eta máimiturapiana ema Cristo. Tasapihapa, náimitucahi eta nayechiravarichu eta napanereruana. ¹⁰ Tacahe, te náitecapauchahepuca te iúrujisiavahi ena nácani, téhesera vahi nacuechajisiha eta máimiturapiana ema Cristo, tasiha, vahi ecujachapa te epenana. Váhivare ecuichuha: “Yare, ani, ítecapauchanu” vahi ecuquicha éna. ¹¹ Taicha te íchapuca eta juca, ticutinapapuca eta étirichuhi nachamuriana ena tivayuarahiana. Váhira ecuimisiapava nayehe, máchura étaina etapiravaina eta juca náichirahi éna eta tamauríqueneana.

Eta táichecuarqui eta macartane ema Juan

¹² Tiuri, júcaríhi apamuri eta numetaruheanaya. Vuíchahasera numetacahemahi puiti te juca carta. Taicha nucunevahi eta nítesiraya eyehe apaesa véchajiricavainapa eta vímanajirisiracacayare. Tásiha, viúrisamurénapa vimutu.

¹³ Téchajicaviana ena suchichanaveana esu péchavi, ésurichuvare manere-
jiruhi ema Viya.

Tamutupa eta juca néchajiruvahi eyehe.

Eta macartane ema Apóstole Juan mayehe ema Gayo, ticajare 3 JUAN

Ema Juan macunacha ema Gayo

¹ Nuti Juan, víyarahánupa, nucajurevi piti némunaruruquenehi Gayo. Núti yátupihí eta némunasirávihí.

² Némunaruruquene, nuyaseuchavíhi me Viya táurivaina eta pémataneana. Énerichuvare nuyaseuchavivare táurivaina eta pítaresira, tácutini eta táurivaipa eta piáchaneva. ³ Tétavicavahi eta núrísamurevahi, te títecapanapa ena vichamuriana, taicha timetacananapa eta pisuapirahí, péhisirahí eta yátupiqueneana echájirirucávana mayehe ema Cristo. ⁴ Tájinarínehi tácuti eta núrísamurevahi taicha eta nusamairirisiraparacahi eta éhisirahí eti nuchichanaveana eta yátupiquene echájirirucava mayehe ema Cristo.

⁵ Némunaruruquene, tájina táichavahi eta pijacapirahí péchapajirisirahí ena vichamuriana, váhinéni pímatiquenevacáinahíni éna. ⁶ Te títecapanapa ani te víúrújisiavahi, timetacahavianainapa. Tájina táichava eta piúriva, pímicatasiravacahi eta nayanira ena vichamuriana. Eta picahéyare pímiyanavaini eta piúriva nayehe, taicha eta juca víchirahí tacurísamurechayare ema Viya. ⁷ Taicha éna, táimipaicahi eta nacametarairuirahí eta tiuri echájirirucava mayehe ema Jesucristo. Eta napaisirahí, tájina nayasesererecapahíni éna nayehe ena achaneana masuápiráirahanaríchaha. ⁸ Tásiha, tavarahaichu eta véchajirícavaca ena nani, apaesa eta vímicatasihaya éna eta nacametarairuiraya eta yátupiquene tiuri echájirirucava.

Eta mamarivahi ema Diótrefes

⁹ Nucajureripa ena pichamuriana te piávihahi. Mararihísera ema Diótrefes. Éma máurica ticainapupuiricava te namirahu ena achaneana. Éma, vahi masuapa eta vituparahana. ¹⁰ Tásiha, te nutiaríhinapa eta ara eyehe, núti nítametacaheyare tamutu eta máichaqueneana. Éma, téchajicahi eta viyehé. Cátichacarehí eta máechajiriruvana, váhisera másuapacarehíni. Váhivare tácarichu eta juca máichahi. Éma, vahi majacapaimahi ena vichamuriana típaicanahí. Te natiaríhi ena navaraha najacapa, ema maca macavanairipi nacuija nacujacapa. Énerichuvare mavaraha macaerajica te emuri ena tivarahana najacapa.

¹¹ Némunaruruquene, vahi picucutipa ena tíchanahi eta tamauriqueneana. Picutiyaeresera ena tíchanahi eta táuriqueneana. Taicha viti víchana eta táuriqueneana, viti machichanaveana ema Viya. Énasera ena tíchanahi eta tamauriqueneana, éna, vahi náimatihíni ema Viya.

Ema Juan macunacha ema Demetrio

¹² Nutuparacavi pijacapayare ema Demetrio. Namutu nacunacha éma, taicha yátupiquenehi táuriva eta mayeherepi. Núti apanavare énerichuvare nuncunacha eta máuriva. Píti pímatínuhi, eta tatupiruvahi tamutu eta néchajiriruvana.

Eta táichecuaraquí eta macartane ema Juan

¹³ Tiuri, jucarihi apamuri eta numetaruvianayare. Vuíchahasera numeta-cavimahi puiti te juca carta. ¹⁴ Nútijapainapasera eta ara piyehe apaesa nímahavi. Tásiha, véchajiricavainapa eta vímanasirácacayare.

¹⁵ Puiti, nuvaraha májaracavini ema Viya eta piúrivaina tayehe tamutu eta pipanereruana. Téchajicaviana ena piájiriareana. Tásiha, péchajisinanu émanapachuina ena nájiriareana núti.

Tamutupa eta juca néchajiriruvahi piyehe.

Eta macartane ema San Judas, ticaijare JUDAS

¹ Nuti Judas néchajicahevaca emutu eti nuparapenaveana nuchamurianahi. Núti mavanerunuhi ema Viáquenu Jesucristo. Éti ímatihí ema nuparape Santiago. Núti nucajurehevaca eta juca nucartane taicha eti apanavare machanerahepa ema Tata Vicaiyaquene, taicha esuapahi eta máichuarapihi. Tétavicavahi eta majaneasirahehi táichavene eta iúrujasirahi ema Machicha Jesucristo. ² Puiti, nuvaraha tajurucaini eta evapinairavavacahi eta máemunasirahehi ema Viya, étapa eta majapanuirahéhi; tájinavare tahapapiricahini eta táuriva eta epanereruana.

Yátupiyare eta náicuñayare ena tivarahanahi námejecapavacha ena vichamuriana

³⁻⁴ Tétavicavahi eta nuvarairahi nucajurehe emutu éti, nétumechaheyare eta éhisiraina ema Viáquenu Jesús. Púitiserá nusamairiricapa eta náimisipiravahi eta eyehe ena nácani tépiyahirahiana tímijachavanahi vichamurianahi. Tásiha, nuvaraha ecuneuchavaya nayehe. Étumechacaca, vahi ecusuapavaca ena nánitátajiana, machu námejecapavachahe. Táimiyana tauri eta éhisiraina eta véhiruhi. Taicha ena víyarahana apóstoleana tímítucachavianahi eta máimiturapiana ema Viáquenu Jesucristo. Tásiha, vahi táuricahini vihapapiricahini. Énaserá ena nani tépiyahirahiana, tétavicavahi eta namapicauravahi eta me Viya. Éna tímijachavanapa eta vahi máicuñacavacáimahi eta náichira tamutu eta tájiparácana taicha tétavicavahi eta máemunasiravaca. Tavetijipa tíñmahipanapa jararihiva eta náimiturapi, ánipa nacahe: “Vahi típicauchacare ema Jesús, váhivare táuricahini vácahehi émara Viáquenu. Te échajisihapuca éma, tatupiruvachucha ‘Jesús’ ichayare, taicha vahi émaina téchahavi víti” tacahehi eta navarahaquene éna. Máimahainepasera ema Viya eta náicuñayare éna, taicha acanevacaipa eta mametarapi ema Viya: “Muracaqueneya eta náicuñayare namutu ena ticaecahinuanahi eta némunasiravacahi”.

⁵ Németeaca éti écharipa eta náichararacavahi ena viáchucanaveanaini israelítana eta náuchusirapa te avasare Egipto. Nuvarahasera némechahe émahí ema Viáquenu ticuchucuhavacahi namutu éna. Téhesera te táequenepa, tétavicavahi eta namasupajirairavahi ena namutuyaréni. Tásiha, máitapaimuríhapa ena masuapajirairahanahi. ⁶ Énerichuvare némechahe eta náichararacavahi ena ángeleana masuapajirairahanahi. Éna nani aquenucarahanaini te anuma, sántuanainihi. Tímisiapavanapasera tayehe eta tamauriqueneanahi. Tásiha, ema Viya macavanairipipa eta náiyaracua ena ángeleanaini téjecapanahi eta te tímápicu inferno, nacaerataiyahi. Puiticha váhiquene títurucavanaimahi tíuchucana. Te jena sáchezare mayaseseresihaya ema Viya, muracayare eta náicuñayare namutu éna. ⁷ Échahivare eta náichararacavahi ena achaneana ticavasanahi te apinaquene avasare Sodoma étapa eta Gomorra, étapa eta avasarechichana te tachacayanahi. Éna, tétavicavahi eta tavayuchiravacahi eta náesenamarevana. Navetijipa ena tivehacacana ajairacacana. Tacutiya eta tájáhúchiravahi eta máemecharesiravacahi ema Viya ena ángeleanaini, macamiricahi eta yucu, tájuchavacapa namutu ena nani

achaneana váinarajiqueneana. Eta juca tavaraha yátupina vicaicutiarahi tayehe eta nacaicuñairavacayare eta te yucu infierno namutu ena tíchanahi eta tauriqueneanahi. Máitavacainapa eta nacatajivairaya. ⁸ Táitusiava, vahi náechavahini ena nani tímisiapavanahi eyehe. Navayucharichucha eta náechipejisirahi eta náquehe taicha tétavicavahi eta tavayuasiravacahi eta natuhusivana. Ena nani tépuruanahi ema Viáquenu eta émairahi téchavacahi. Nacaecahivare ena ángeleana tiámána eta majaravahi ema Viya. ⁹ Vahi táurihini eta juca. Nuvaraha némechahe eta jena sache máepenirahi ema víyarahaini Moisés, ema Váinaraji mavaraha mámayarehini eta máquehe. Ema Váinaraji macanarapa ema Arcángele Miguel, mavaraha máimiyusemaca. Váhisera masemahini ema Miguel. Váhivare macajacharecahini. Ánipa máicha: “Páurevisami píti. Pímahaya eta pícharacavayare maicha ema Náquenu” máichapa. ¹⁰ Énase ena nánitátajiana achaneana, vahi napicaurahihini. Tíjaracavana nacaecahi jácani tájahánapuca váhinéni náimatiequeneha. Éna nacutihi eta sárareana. Tinicanahi, téranahi, esenamareanahi. Nájina tatsirihaquenéni. Éta pa tímicuñacavacaya.

¹¹ ¡Páureanasami ena nani! Muracayare eta náicuñayare te yucu, taicha nacutihi ema Caín eta mamasuapajiraivahi me Viya. Nacutivare ema Balaam ema témejecapavacachavacahi ena achaneana eta mavarairahi eta plata. Nacutivare ema Coré ema tépuruhi ema mavaneruhi ema Viya. Éta pa tivichahi eta macapasirahi ema Viya. ¹² Tétavicavahi eta natsirihacarevahi eta náimisapiravahi eyehe te iúrujisiravana eta énisirana ena echamuriana. Taicha éna, tájina napícauchaquenéni eta náurisamureravahi te nanisirana, náerirana. Éna, navarahahi epicauchavacayare éti, navarairahi ticaetemajiricaheana. Ena nánitátajiana nacutihi eta úcájiana te ichape sácherehi. Ticutimahi tiquivayarehi. Técaticavachuchasera eta támapahi. Tájina taquivahini. Nacutivare eta yucuquiana máhiriquireana te ticahipaipa eta apamuriana yucuquiana tachamuriana. Tamapuruji eta vicuchapirahi eta náichirahi eta táuriqueneana taicha nacutivare eta yucuquiana tájiqueruana vinereruana, tépurihapa. Váipaquene tímarucaimahi. ¹³ Éna, nacutivare eta táepacuruha eta une te técaticavapa muraca eta ichape une, camurihi eta tarisasama. Tétavicavahi eta tatsirihacarevahi eta náichaquenehi eta tauriqueneana. Nacutivare eta jarariquiana tiyejerecavana. Jararihiserá eta nacaicuñaiyayare eta ichapequene timapícu. Máitavacayare eta nanasiyare.

¹⁴⁻¹⁶ Ena nánitátajiana, tétavicavahi eta nacaecahirahi tamutu. Étachucha natanucachi eta najamuraraivana. Ticasiñavavaicana eta náechajirisiravana. Nacunachahi ena ticaimahaqueneanahi, navarairahi nacaetemajiricavaca éna. Ticaicuñayaresera, taicha ema víyarahaini profeta Enoc acane máimaha te mavapure eta náicuñayare éna. Ánipa macahe: “Nímahahi te nuvapure eta máitecapirayare ema Viáquenu te juca apaquehe. Mámayarepahi namutu ena mayeheana ángeleana. Tétavicavahi eta nasimutuvahi. Nacurujicavacayare namutu ena ticapecaturarahiana. Náimerecayareva tamutu eta naviurevana ena achaneana váinarajiqueneana, taicha tétavicavahi eta náichirahi eta tauriqueneana. Navetijnapa ena ticaecahirahiana me Viya, ichapepáinapa eta naviureva” macahepa. Tétavicavahi eta masuapacarevahi ema víyarahaini Enoc, taicha mámariequenehi ema Adán, sántoquehivare éma.

Ena Judas matuparacavaca ena machamuriana

¹⁷ Nuvarahavare némechahe, eti nuchamuriana némunaruqueneana, eta nametarapi ena víarahana apóstoleana mayeaneanahi ema Viáquenu Jesucristo. ¹⁸ Ánipa nacahe: “Vahi táyerémahi eta náuchujisirayare ena ticaecahirahiana tayehe eta táuriqueneana máimiturapiana ema Viáquenu. Váhivare návarahahíni náinajica eta tamauriqueneana” nacahepa. ¹⁹ Puiti numetacahé: Natiarihipa puiti ena ticaecahirahiana. Tímaticareana éna, taicha navaraha náiputsicavaca ena vichamuriana. Étachucha natanucahi eta najamuraraivana. Éna, vahi návarahahíni émainahíni máechavacahini ema Espíritu Santo.

²⁰ Étisera némunaruqueneana, étumechacacaya eta éhisirahi ema Viáquenu, taicha tétavicavahi eta tasantuvahi eta véhiruhi. Ísapavayareva tímitucahe ema Espíritu Santo eta eyujarauchirana. ²¹ Tauri eta ítaresira, vahi ecuemitisicavahini eta táetaviuchiravahi eta máemunasirahehi ema Viya. Váhivare ecuyacujihini eta ecuchapirahi eta jena sácheyare táepaniravaya eta vítaresira. Máitavacacayare eta vítaresiraya taicha eta majapanuirahavihi ema Viáquenu Jesucristo.

²² Étumechayare ena echamuriana nácani tipanerechanaripa náéhica ena tivayuarahiana. ²³ Ena epamuriana, ena téhicanaripa eta náepiyahiraivana, epamicayare éna apaesa tachava eta náehisiraina yátupina ema Viáquenu. Ecuchucuhavacayare eta náejecapiravana, tacuti te vicuchucuhahi eta viyereruvana te tijahúchavapuca tiju eta vipena. EJapanuyare nácani muracaripahi eta náejecapiravanahi. Ecuneuchavaserá, machu napareacahé eta náejecapiravana, taicha tétavicavahi eta tauriva. Epicayare éta.

Tétavicava eta vicunachirahi ema Viya

²⁴⁻²⁵ Ema Viya, tétavicava eta máitupajjiasiravahi. Macarichuhi éma marataha ticatiuchahavi tayehe eta vícuchinihi vícuñayarehini, taicha mavanecahi máepeninahaviya ema Machicha, ema Viáquenu Jesucristo. Puiticha tétavicavahivare eta majaneasirahehi éti apaesa vahi ecuaquipacavahini tayehe eta pecatu. Taicha mavarahahi máepachinachayare eta iáchanavana, tacuijahivaréni eviurevaina eta mámiraheyare te mamirahu te jena sácheyare. Tétavicavainapa eta iúrisamurevaya te ímahapa eta majaraivaquenehi. Acane nacunachanahi ena ángeleana. Énerichuvare víti, tétavicavayareva eta vicunachiraya éma vimutu víti, taicha tétavicavahi eta máramicarevahi taicha ichapequenehi eta máitupajjiasirava. Vépuyumiraucha eta víjarasirava visuapayare. Máitavacacayare eta vitsiusirayare éma. Amén.

Eta mametacasivanahi ema Apóstole Juan te mavapure, ticaijare APOCALIPSIS

¹ Ema Tata Vicaiyaquene mavarahahi tímimatichahaviyare eta táijahúchiravaya táichararacavayare eta apaquehe, apaesa vecha viti mavanaranahi. Ema máimechahi eta juca, ema machicha Jesucristo. Tásiha, ema Jesús mavanecapa ema ángele timetacanuyarehi nuti Juan mavanarahi. Eta tacahe, nájuchahi puiti eta juca apaesa écha éti apanavare eta táichararacavayare. ² Tacuti eta yátupihí eta nucametarairuirahi nútí eta máechajiriruvana ema Viya, étarichuhi eta máimiturapiana ema Jesucristo, puiti nutupiruva numetacahe eta juca numetacasivanahi eta máimerunuanahi ema ángele. ³ Tétavicava eta náuricacarevaya ena téchajicuhanaya eta juca máechajiriruvana ema Viya, eta máimimatirunuhi. Énerichuvare tétavicava eta náuricacarevaya ena tisamanaya tisuapanaya eta juca. Taicha táínehinapa eta táitavirayare tamutu.

Ema Juan macajure ena siétemuriqueneana machamuriana

⁴ Nuti Juan nucajarehe eti siétemuriana nachamuriana ejanereruanahi tayehe eta tinapaica te Asia. Nuvaraha macatajicahehíni ichape ema Tata Vicaiyaquene, émapa ema Jesucristo. Táurihivaréni eta epanereruana. Ema Tata Vicaiyaquene matiarhiquenehi te tépanavainapa, puiti manasirichuhi eta viyehe, émarichuva manasiqueneyare te táitavapa tamutu. Te tamirahu eta máejasihahi trono, natiarhi ena siétequeneana mayeheana arcángeleana. Navarahahivare eta iúricacarevainaini. ⁵ Ema Viáquenu Jesucristo, ema yátupiquenehi tiámaparauchahavihi eta juca vímitucasivanahi. Énerichuvare ema máinapuiruhi téchepuca te máecari, apanapa eta máquehe. Éma, yátupiquenehi Rey. Namutuhi macachuriacavacaya ena réyena te juca apaquehe. Éma, yátupihí eta máemunasirahavihi, masipasinahavihi eta viáchanevana tayehe eta vipecaturana te máítine máepusairuhi. ⁶ Énerichuvare, tinacahavihi te namuri ena manerejiruanahi tuparairucahaviyarehi eta mayehe, mavarairahi viyujaracaráhiyare mayehe ema Viya. ¡Támutuhi ní sácheana vicunacha eta máitupajijiasiravahi! ¡Viáramiparahini eta aquenucairahi! ¡Amén!

⁷ Ímaha, márajapainapa ema Cristo. Támayarepahi eta úcaji. Namutu-yare nanecapa ena achaneana te juca apaquehe. Náimahainapa, tásiha, típicanainapa. Tiyahahacavanainapa eta náimairayare, énaripa ena námariqueneana ena tijarachanahi, taicha téchavanahi éna eta nájecapiravahi ena náchucanaveanaini. ¡Ene tacaheyare! ¡Máitecapavanepaini!

⁸ “Nútira nunacuchahi eta táepaniravahi eta apaquehe. Nútirichuvare nécha eta táimianiravaya tiuri. Néchayareva eta táitavirayare tamutu” macahehi ema Viya, tétavicava eta máitupajijiasirava, máituruequenehahi tamutu. Éma, matiarhiquenehi te tépanavainapa, puiti manasirichuhi eta viyehe, émarichuva manasiyare te táitavapa tamutu.

Eta máimeresirava ema Jesucristo mayehe ema Juan

⁹ Nuti Juan, nútirichu echamurinuhi. Nútirichuvare ecutiquenenuhi tayehe eta vicatajivairahi, vicamichahisera tamutu taicha tétumechahavihi ema Jesús. Taicha vicunevaipahi eta visiapiyare te mávasa, aquenucahaviya.

Núti, tiáquijicanuanahi tayehe eta tíurupuhi ticaijare Patmos te etupiereca mar, táichavenehi eta nucametarairuirahi eta máechajiriruva ema Viya, néchajisihairahivare eta máijare ema Jesucristo. ¹⁰ Te jena sáchequenehi lumincuquenehi, ema Espíritu Santo tímimahanuhi eta mavarahaqueneana tímechanu ema Jesucristo. Tacahehi eta táepaniravahi eta máimimahaqueneuhi. Tativapa nusamahi eta mahu ema émana te nuquecu. Muraca eta máechajisiranuhi. Tirurehucha eta nusamirahi. ¹¹ Ánipa macahehi:

—Piájuchaya tamutu eta juca pímahaqueneanaya. Pímiamarecapa eta piájure nayehe ena siétemuriqueneana pichamuriana: ena tiávihanahi te Efeso, ena tiávihanahi te Esmirna, ena tiávihanahi te Pérgamo, ena tiávihanahi te Tiatira, ena tiávihanahi te Sardis, ena tiávihanahi te Filadelfia, énapa ena tiávihanahi te Laodicea* —macahepa.

¹² Tacahe, néviurucavapa. Nuvarahapa nímahayarehi ema téchajicanuhi. Tásiha, nímahapa eta siete candelero tiúquiána, amairiha oro. ¹³ Te ennumhuri eta siétequene candelero, matiarihi ema achane vivasimahi. Tiúmaji eta mamuiriha. Títecapa te máivapeana. Ichapeme eta máitijuhe, títecapa te matupa. Amairihavare oro. Eta máitijuhehi táicutiarahi eta aquenucairahi éma. ¹⁴ Eta machutimaca amairiha tijapu, tirapepejicaquenehi. Eta máuquihana, tétavicavahi eta tavayuhauquiravahi. ¹⁵ Eta máivapeana tjanunupevachava, tacuti eta bronce eta tajanunusira. Eta mahu, tétavicavahi eta tamuracavahi eta marurehuchirahi. ¹⁶ Te mavahu vaure, macaratacahi eta siete jarairiquiana. Te majaca tiúchucahi tavasimahiyaréni eta espada. Táetaviuchahi eta tacasiriva, tínunapehivare. Eta mamira, tétavicavahi eta táeramemesirahi tacuti eta sache.

¹⁷ Nupicarinehi eta nímairahi. Náquipaicavapa te máivapeana. Tiánehi népenaini eta nupisirahi. Émasera manacapa eta mavahu vaure te nápusi. Máichanupa:

—Vahi picupicanu. Nútichucha nuti nunacuchahi eta táepaniravahi. Nútirichuvare néchahi eta táitavirayare tamutu. ¹⁸ Núti yátupiquenénu nucaitarecarahi, taicha nuchavahi nífareca te táequenepa eta nacapasiranuhi. Puiti máichecuaraquirénapa eta nítaresira. Nútirichuvare necha ena tépenana. Nucaehepucayare eta náqueheana ena náepenaqueneana nácani níchuhaqueneanayare. ¹⁹ Piti Juan, piájuchayare eta juca pímahaqueneanahi puiti, étapa eta pisamaqueneanahi nutupararuvianahi nayehe ena pichamuriana, étapa eta táichararacavayare nímechaquenéviyare. ²⁰ Numetacaviya eta tacayemaquenehi eta siétequene jarairiqui nucarataruhi te vaure, étapa eta siétequiqueneana candeleroana óroquiána. Éta juca siete jarairiqui, énapa ena ticametarairurahiana nayehe ena siétemuriqueneana pichamuriana. Eta siete candeleroana, énapa ena siétemuriqueneana nuchanerana.

* **1:11** Tamutu eta jucana avasareana tiávihanahi te provincia Asia. Puiticha eta juca provincia ticaijare Turquía.

2

Eta mametarapi ema Jesús nayehe ena machaneranahi ticavasanahi te Efeso

¹“Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Efeso: Núti íaquenunuhi taicha núti nucaratachahi eta siétequene jarairiquiana te nuvahu vaure. Núti návihahi te tamuri eta siétequiqueneana candeleroana óroquiana, táicutiarahi eta néchirahahi emutu éti. ²Núti nímati tamutu eta íchaqueneanahi, étaripa eta tamuracavahi eta ecaemataneasiranuhi, ecamichirahi tamutu. Váhivare iúricahini ecasiriquihini ena achaneana váinarajiana. Váhivare ejacpahini ena tépiyacavanapahi apóstoleana, ímatiacavanehi éti ena tépiyahirahianapahi. ³Nímatihé eta ecamichirahi tamutu eta íatájivanahi táichavenehi eta ecaemataneasiranuhi núti. Vahi eyacujihini. ⁴Jucarihiserá eta juca eviurevahi nuyehe. Puiti ecamitiacaripa eta émunaraívana. Vaipa tácutihini eta émunaraívanahi te épanavainapa. ⁵Puiti nuvaraha étupiricayare eta juca, tachava eta émunaraívahi. Éneuchavaya tatívana apaesa íchavare eta táuriqueneana tacuti eta acane. Te vahi ecuetupiricava, nútijacaruvayare níteca, nítsivachayare eta candelero ícutiarahi eyehe. ⁶Éti, ecunachacarehi eta ecatichirahi eta tamaetupisiravahi eta nayeherepiana ena apamuriana téhicanahi ema Nicolás. Ene nucahehi núti, nucaticahivare eta nayeherépiana.

⁷“Ema Espíritu Santo tímitucaheyare eta juca numetarapiana eti nuchaneranahi. Etupiruvayarehi esuapa. Emutu eti ecamichanahi, ímiyanavahivare eta éhisiranuhi, nucasiapaheyare núti tayehe eta paraíso ícumunahi me Tata. Nénicahyareva eta tahi eta yucuqui tiama eta táuricacarevayare eta itaresira.

Eta mametarapi ema Jesús nayehe ena machaneranahi ticavasanahi te Esmirna

⁸“Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Esmirna: Núti nunacuchahi eta táepaniravahi. Nútirichuvare néchahi eta táitavirayare tamutu. Nuti nacaparuhi, nuchavahisera nítareca. ⁹Núti nímati tamutu eta íchaqueneanahi, eta ecatajivairahi, étapa eta epaureravanahi. Tétavicavahisera eta iúricacarevahi, tímicutijiricavaipahi rícohénahíni. Nímativare vahi esemahini taicha eta épiyaequeneanahi nayehe ena tímijachavanahi machanerana ema Viya. Mávaháruanahi ema Váinaraji, machaneranahivare. ¹⁰Vahi ecupica eta ecatajivairaya. Numetacahe: Ema Váinaraji tímisiapaheya te cárcel eta máitsamaresiraheya te tímínajicaheyarepuca. Ecamichachuchasera, taicha diésquenerichu sache eta ecatajivairayare. Nutuparacahecha: Ejicapaicayare tayanapanepuca nacapacahe. Núti nújaracaheyare eta táitsivayare. Tiúriyare eta itaresiraya.

¹¹“Ema Espíritu Santo tímitucaheyare eta juca numetarapiana eti nuchaneranahi. Etupiruvayarehi esuapa. Emutu eti ecamichanahi, ímiyanavahivare eta éhisiranuhi, nucuchucaheyare. Vahi ecatajivaimahi tayehe eta nacatajivairayare te yucu ena masuapajirairahanahi.

Eta mametarapi ema Jesús nayehe ena machaneranahi ticavasanahi te Pérgamo

¹² “Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Pérgamo: Núti nítuca némecharecavaca nácani téjcapavana taicha nucayehe eta espada, táetaviurequenehi eta tacasiriva. ¹³ Núti nímati tamutu eta íchaqueneanahi. Nímativare eta éñamiravahi taicha namutuyaréni ena echácapenána téhicanahi eta máimiturapi ema Váinaraji Satanás. Váhiserá ínjacavahini, étumehavaichucha eta éhisiranuhi níti. Étaripa te ímahapa eta nacapasirahi ema nuchaneraini Antipas, yátupiquenehi eta masuapiranuhi éma. Ena machaneranahi ema Váinaraji nacapacahi éma te jena íávihahi éti. ¹⁴ Jucarihisera eta juca eviurevahi nuyehe. Taicha ísapavaichucha natiarihíhi ena nanerejiruvana ena echamuriana vahi návarahahini náinajica nanica eta tinicacare nayujaraurehi te tamirahu eta nasiñarajiana. Tacutiquene esenamareanahi éna. Eta acane, ema máratátaji Balaam tímitucahi ema Balac eta máimiaquipaisiravacahi ena israelítana tayehe eta juca tamauriqueneanahi. ¹⁵ Énerichuvare nararihi ánaqui te emuri ena apamuriana váhivare navaraha náemitisica eta máimiturapiana ema Nicolás. Tétavicavahi eta nucatichirahi níti eta máimiturapiana ema Nicolás taicha tétavicavahi eta tamaetupisiravahi. ¹⁶ Eta tacahe, éneuchavayare eti éjcapavanahi. Te vahi ecueneuchava, nútijapayare némecharepanaheyare tayehe eta tacasiriquene espada táuchurequenehi te nujaca.

¹⁷ “Ema Espíritu Santo tímitucaheyare eta juca numetarapiana eti nuchaneranahi. Etupiruvayarehi esuapa. Emutu eti ecamichanahi, ímiyanavahivare eta éhisiranuhi, nénicaheyare eta ícuchihi me Viya eta ticaijare maná, tayumururevaquenerichaha. Énerichuvare níjaracahevacyare eta tijapu mari. Eta te mari tatiarihiyare eta ajureca arapiru. Nájinasera tímatiequenehaimahi. Macarichu ema ticayeheyare, éma tímatiyare eta máijare arapiru.

Eta mametarapi ema Jesús nayehe ena machaneranahi ticavasanahi te Tiatira

¹⁸ “Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Tiatira: Núti Machichanuhi ema Tata Vicaiyaquene. Núti nímatihí tamutu, taicha tijarahivaca eta núquihana, tétavicavahi eta tavayuhauquiravahi. Eta nívapeana tijanunucavacava tacuti eta bronze eta tajanunusirahi. ¹⁹ Núti nímati eta íchaqueneana. Nímativare eta émunasiranuhi, eta esuapiranuhi yátupi, eta échapajirisirahi ena achaneana, étapa eta ecamichirahi. Nímativare muracapanaipahi eta ecaemataneasiranuhi. Tiápajucavaipahi puiti tayehe te épanavainapa. ²⁰ Jucarihisera eta juca eviurevahi nuyehe. Ísapahi tisiapamurihahe esu esénatátaji. Ésu, vahi táetupicavahini eta suyeherepiana, sucutihi esu Jesabélnitataji eta acane. Tímijachavahi mavanara ema Tata, suémejecapavachahisera ena nuchanerana. Suímitucavacahi naicha eta piesta, tásiha nanicavare eta tinicacareana nayujaraureanahi te tamirahu eta nasiñarajiana. Suímitucavacavare eta natuhusivayare. ²¹ Núti íchapemurahi ena nuchapirahi ésu, eta suéneuchavahini, apaesa suínajicahini eta sutuhusiva. Váhiquenesera suvaraha suínajica eta suyeherepi. ²² Puiti níjaracayare eta suícuñayare. Ticajumayare apaesa suíveca te sucamane. Ichape eta sucatajivairaya. Énerichuvare ena suítirevanahi, nícuñacavacayareva muraca, te vahi nacuínajica eta suíchaqueneasanahi ésu. ²³ Énerichuvare

ena suchichanaveana nįjaracayare eta najumayare, nįmicapasiravacayare. Tásiha, échainapa eti nuchaneranahi eta nįmatirahi tamutu eta epanereruana, eta te esamureana éti. Nįmahainepasera nůti eta nįcharacavacayare ena téjcapavanahi, étapa tiámayare eta náichaqueneana. ²⁴⁻²⁵ Tájina apanainahini eta eviurevahi nuyehe. Nųrisamurehi eyehe eti matapiravareanahi, eti vahi éhicahini eta suńmiturapiana esu esenátáji. Váhivare ávarahahini įjaraca éhica eta suhiapemarevanahi, susińavavairisirahi eta máimitusirahi ema Satańás. Tásiha puiti, nutuparacahe eti nuchanerana iávihanahi eta te avasare Tiatira: Ecaratacava muraca tayehe eta juca éhiruhi. Ecuenuyare eta nuchaviraya.

²⁶ “Emutu eti ecamichanahi, ímiyanavahivare eta éhisiranuhi, váhivare ínjicahini eta ecaemataneasiranuhi, nůti nįjaracahénapa eta tuparairucairahénapa tayehe eta avasareana. ²⁷ Ecutinuyare nůti eta májjarasiranuhi ema Tata Ticachichanu eta tamuracavahi aquenucairanuhi. Ene ecaheyare éti. Muracayare eta aquenucairaheyare. Ecaratacayare eta etsucurupayare fińroqui. Esuapacareyare muraca. ²⁸ Tétavacavayare eta ejaraivayare nįcha nůti, taicha nujupahaheyarehi éti. ²⁹ Ema Espńritu Santo tímitucaheyare eta juca numetarapiana. Emutu eti nuchaneranahi, etupiruvayarehi esuapa.

3

Eta mametarapi ema Jesús nayehe ena machaneranahi ticavasanahi te Sardis

¹ “Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Sardis: Nůti néchavacahi ena siétequeneana arcángleana, étipa eti ecametarairurahiana taicha nůti távami-raurehi eta siétequeneana jarairiquiana. Nůti nįmati tamutu eta íchaqueneana. Ena achaneana tímijachanahi tíurihi eta ecaemataneasiranuhi. Nůtiserá nįmararacahi eta esamureana. Nįmatihe tiánehi eta ínjjisirainapa eta éhisiranuhi. ² Ecaunchavayare apaesa vahi ecuemitiaca eta éhisiranuhi. Taicha nįmararacahi nůti vahi tátupiruvahini te esamureana eta ecaemataneasirahi ema Tata. ³ Puńtiserá, éneuchavayare apaesa tacuijapa ecuichiravaina. Échavayare éti tamutu eta ímitucasivanahi. Yátupina eta éhisiraya. Te vahi ecuetupiricá eta epanereruana, nůtijapayare tíjahúchavayare eta nítecapirayare némecharepanahya. ⁴ Váhinéni ámutuhini éjcapavahini éti ecavasanahi te Sardis. Natiarihíhi ena matapiravareanahi, váhivare náechipejicavahini. Ena nani, nįjaracavacainapa eta namuirihayare tijapu. Ticachane-nuanayareva taicha tatuparacahi eta návihairayare eta nuyehe.

⁵ “Emutu eti ecamichanahi, ímiyanavahivare eta éhisiranuhi, nįjaracahayare ecamuirihayare eta tijapu. Váhivare nucaepahaimahi eta įjareana tayehe eta libro tiama eta nalista ena náitareruanayare. Nįmimatichaheyareva eta me Tata, énapa ena ángeleana. ⁶ Ema Espńritu Santo tímitucaheyare eta juca numetarapiana. Emutu eti nuchaneranahi, etupiruvayare esuapa.

Eta mametarapi ema Jesús nayehe ena machaneranahi ticavasanahi te Filadelfia

⁷ “Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Filadelfia: Nůti yátupiquenénuhi Viya, yátupiquenehivare eta nusantuva. Nucarichu nůti néchahi eta tapajacura eta arairuyare avasare Jerusalén, tacuti eta máechapajirisirahi

ema náchucaini rey David eta tánapuiruinihi Jerusalén. ⁸ Núti nímati eta íchaqueneanahi eta ecaemataneasiranuhi. Nímahahivare eta vahi camurihé-nahini. Nímatihivare eta ecatajivairahi, váhisera ecainajiruvahini eta éhisiranuhi. Ímiyanavahivare esuapahi eta nímiturapiana. Tásiha, puiti níjaracaheyare eta apana ématanerépiya. Nájina nísapaimahi tihapapiricaheánaimahi eta ítauchiraya éta. ⁹ Núti nítahacavacayare ena israelítana tépiyacavanahi machanerana ema Tata, machanerana hisera ema Váinaraji. Nucaepuyucavacayare te emirahu, apaesa náimati eta némunasirahehi.

¹⁰ “Éti, ítauchahi eta nuvanairipi eta ecamichiraya tamutu. Eta tacahe, nujaneacaheya núti apaesa vahi tacuimivehahe te táitecapapa eta nucaetemajirisiravacayare namutu ena achaneana távapahianahi te juca apaquehe.

¹¹ ¡Tiánehipa eta nuchaviraya! Étumechavaya eta éhisirahi, machu émpureureca ejacapirayare eta ícuchianayare.

¹² “Emutu eti ecamichanahi, ímiyanavahivare eta éhisiranuhi; nítisirijicavayare eyehe. Máichecuaraquireyare eta ecachaneraya ema Tata te mávasa. Íamayare eta májare, étapa eta níjare arairu. Íamayarevare eta tájare eta arairu Jerusalén, taicha tachichahevacya. ¹³ Ema Espíritu Santo títitucaheyare eta juca numetarapiana. Emutu eti nuchanerana, etupiruvayarehi esuapa.

Eta mametarapi ema Jesús nayehe ena machaneranahi ticavasanahi te Laodicea

¹⁴ “Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Laodicea: Núti náichasa ‘Ema títaurahi’. Námapahi eta yátupiqueneana táuriqueneana echajirirucava. Núti tájinaquenéhi néjequiha. Núti nítauchahi tamutu eta mapanereruanahi ema Tata, te népiyacapa eta anuma étapa eta apaquehe. ¹⁵⁻¹⁶ Eta juca numetarapi eyehe éti: Nímati eta íchaqueneanahi. Éti apáesasajíruichucha eta éhisiranuhi. Éti, vuíchaha ímereuchavahini eta ecatianasiranu; váhisera yátupinahini tatupiruvahini eta éhisiranuhi. Tacamunuinehi átupiruvahini, yátupinahini ímrecava eta éhisiranuhi. Machu étaina taviuchahe eta nucaerajisiráhéna nuyehe. ¹⁷ Taicha éti ímijachavahi rícohe, tájina íchiravainahini, tájinaavare ácamunuhini. Vahi esamauchavahini ichapemurihi eta éjapanuravahi. Váhineni rícohenahini. Etihinéni ecáijare páureana, púchuquiana, mamuriareana. ¹⁸ Nuvaraha nuconsejachahe: Te evarahapa yátupina eta erricovayare, iteca eta nuyehe. Jéhevare núti núrichaheyare, ecutiyare ena ticayeheana eta yátupiquene oro. Jéhevare núti níjaracaheyare eta emuirihayare tijapu apaesa vahi ecutsiríha te numirahu. Nétsarachaheyareva eta ipuruji apaesa ímairirica. ¹⁹ Núti nétupiricaya eta napanereruana namutu ena némunarua te náejecapava. Te vahi nacusuapanu, némecharecayarehi. Tásiha éti, tituparacahehi étupiricavane eta epanereruana, étumechavavare tayehe eta éhisira. Éneuchavavare apaesa tacuija ecuichiravaina. ²⁰ Núti nujapanurahi. Nuvaraha tachava eta vicachaneracacahi. Vaipa ecuévuisiha eta nuyehe. Íchuhanuvare. Víápechava vivapinava eta véchajirisiravaparacayare*.

* **3:20** Te juca, ema Víáquenu títicutijiricava eta máehahamesira te jácáni tapajacura, mavarairahi masiapa, manica macachane ena ticavasanahi te tajuhe. Étasesa eta máechajisíhaqueneana, vahi étainahini eta tapajacura eta vípena. Te juca, ema Víáquenu máechajisíhahi eta majapanuirahavi étapa eta mavaraira vichavaya vipaucha éma, tachavahini vivapinava mayehe, viúriyareva te machacaya.

21 “Emutu eti ecamichanahi, ímíyanavahivare eta éhisiranuhi, núti nucaejacahevacyare tayehe eta néjasihayare, tacutiyare eta néjasirahi te mavaure ema Tata, taicha eta nétumechiravahi nucamichirahi tamutu. 22 Ema Espíritu Santo timitucaheyare eta juca numetarapiana. Emutu eti nuchaneranahi, etupiruvayare esuapa” tacahehi tamutu eta máechajiriruvana ema Viáquenu eta eyehe.

4

Emá Juan máimaha eta natsiuresira te anuma

1 Te táequenepa eta juca, nímahavarepa eta téjiacahi eta anuma. Nusamavarepa eta mahu ema émarichuhi ema títapucahi téchajicanuhi. Tirurehucha eta mahu. Tíchuhanupa, ánipa macahe:

—Yare, piápana. Nuvaraha nímechaviyare eta táicharacavayare puiti juca vicaijuheyare —macahepa.

2 Tacahe, eta nusamirahi eta íchuarapi, ema Espíritu Santo títjaracanupa eta nucaicutiarairayare tamutu eta nímahaqueneanayarehi. Tíjahúchavapa nímaha ema Viya, téjacahi te trono te anuma. 3 Tiáramicarehi eta máimahi. Tétavicavahi eta máurinavahi. Eta máimahi tacuti eta tajanunusira eta márijahi jaspe étapa eta cornalína. Te tachachacuana távihahi eta trono, tétavicava eta tajaravahi tacutiyaréni eta táimahi eta ahe eta táurinava. Véresera eta táimahi.

4 Távihahi eta ichape trono, tatiarihivare te tachachacu eta vénticuatro trono. Natiarihivare ena vénticuatroanavare téjacanahi tayehe, viyarahana tuparairucana. Tijapu amairiha eta namuirihana. Namutu ticayeheana corona te nachutiana, amairiha oro. 5 Tásiha, nímahahi eta térameca tásihaquenehi tayehe eta trono. Nusamavare tirurehuchanahi. Ticaemapa. Tásiha, tatiarihihi te tamirahu eta trono eta siete tijarahivaca tacutiyaréni tanene eta yucu. Énahi ena siétequeneana arcángelleana mayeheana ema Viya. 6 Tijararacavare te tamirahu eta trono tacutipa eta tajarahivahi eta ichapequene une.

Natiarihivare ena cuátroqueneana tijanearecanahi te machacaya ema Viya. Éna, ecutiarareana eta máitupajijiasirava. Tacutimahi ticaquihavacahi te namirahu téhepa nachepa. Amairiha eta náuquihana. 7 Eta títapuca tavasimahiyaréni eta sárare táíñehiquene*. Eta apana tavasimahiyaréni eta torillo. Eta apana tacutimahiyaréni achanemira. Eta apana tacutimahiyaréni eta ichape mátihi tiárarairicahi. 8-9 Tacahe, ena nani cuátroqueneana ecutiarareana tiávihanahi tayehe eta trono, sáisivaca eta napavana. Ticaquihavacavare amairiha eta napavana. Ena nani, vahi táechuquihahini eta nacunachirahi ema Viya, ema acanevacaquene eta máitaresirahi. Tijiranahi tamutu sácheana, yátiana. Ánipa nacahe:

“Tétavicavahi eta pisantuva, pítit Tata.

Tétavicavahivare eta pítupajijiasiravahi,

píturuequeneha tamutu.

Pítit pítiarihiquenehi te tépanavainapa eta apaquhe.

Pítit pinasirichuvare eta viyehe.

Pítirichuvare pinasiyare te táitavapa tamutu.

Pítit vihasulupayachavihi eta pichanerahavihi”

nacahepa ena ángeleana.

* 4:7 Te jena avasare Asia (puíticha ticajare Turquía), tatiarihihi eta tíñehiquenehi sárare náimijarechahi “león”. Te táiyahapa, eta tahu tacuti eta ichapequene toro, étapapuca eta ichi ajaira.

¹⁰ Énavarepa ena véinticuatroqueneana víyahana tuparairucana tépuyucanahi te mamirahu ema Viya, mávihahi te mayehe trono. Nacamavahupa eta nayeheana corona. Titsiurecanavare. Ánipa nacahe:

¹¹ “¡Tata Víyaquene, piti Viáquenuvihí!

¡Tétavicavahi eta piúrivahi!

Picarichuhi piti vicasiñaquenévi.

Ichapequenehi eta vicunachiravihi.

Tamutuhi pirataha píti.

Taicha píti pépiyacahi acane tamutu eta juca

vímahaqueneanahi puiti.

Pítirichuvare péchahi puiti tamutu eta

pépiyuanahi”.

5

Éma Cordero macarataca eta ajureca tiama eta siete sello

¹ Tacahe, te mavahu vaure ema máejaruhi tayehe eta trono, nímahapa macaratacahi eta ichapeme ajureca ticayuruquihí, ticanaracacahi eta letra te tajuhe étapa te táqueme. Ticaipistahi tayehe eta siete sello, táipistaruvanahi. ² Nímahapa ema ángele tipiaracahi muraca. Tétavicava eta tamuracava eta mahu. Ánipa macahehi:

—¡Puiti táuricapa máimerecava mácani tatupararuhi tivepistacayare eta tayeheana sello eta juca ajureca, maverurusarayare! ¡Tatuparacapa máiteca puiti! —macahepa.

³ Nájinasera náijaracavahini navejijapanahini eta ajureca: énaripa ena tiávihanahi te anuma, énavanerecainahipucaini ena tiávihanahi te apaquehe, énaripa ena tiávihanahi te amahe apaquehe. Nájinavare tipatsicavaina náimarracahini eta ajureca. ⁴ Níyahacavapa núti eta nímarahi namajinairahi náijaracavahini naveruruacahini eta ajureca, náechajicuhahipucaini, étavanerecainahipucaini náimarracahini. ⁵ Tacahe, téchajicanupa ema émana víyara tuparairucahi. Máichanupa:

—Vahi picuiyaha. Taicha matiaríhi ema Cristo, ema yátupiquenehi manerejiruhi ema Viya ema téchaya tamutu eta juca apaquehe. Éma, tíjaracavahi eta máepenirahi víchavenehi víti. Tichavaripahisera títareca. Tásiha, macarichu ema tatuparacahi maveruruacayare eta ajureca, mavepistahayareva eta siétequene tayeheanahi sello táipistaruvanahi —máichanupa ema víyara.

⁶ Tacahe, nímahavarepa ema Jesús, ticajjarehivare Cordero. Titupihahi éma te tamirahu eta trono, nachayacahi ena cuátroqueneana ecutiarareana énapa ena víyahana tuparairucana. Nímahahi eta majara, taicha táimicacacahi éma eta macaepahirahi eta vipecaturana viti achaneana. Siete eta majíhuana. Eta juca táicutiarahi eta aquenucairahi. Siétevere eta máuquihana. Eta juca táicutiarahi eta tamutuirahi máimatiqueneha, taicha navanahíhi ena siéteana arcángeleana mayehe ema Viya, eta náimarrasiraya tamutu eta apaquehe. ⁷ Éma maca Cordero tiyanapa, majacapahi eta ajureca te mavahu vaure mayehe ema máejaruhi te trono. ⁸ Te macaratacapa eta ajureca, ena nani cuátroquene ecutiarareana, énerichuvare ena véinticuatroqueneana víyahana tuparairucana tépuyucanapa te mamirahu ema Cordero. Éna nani véinticuatroqueneana, namutuyehéhi te navahuana eta guitarra étapa eta

escudilla, amairhasera oro. Tiama eta incienso, táicutiarahi eta táurivahi eta nayujarasiranahi ena machaneranahi ema Viya. ⁹ Tijiranahi eta juca jirasare arapiru. Ánipa nacahe:

“Picarichu píti tituparacavihi eta picaratasirayare eta ajureca, pivepistasirayare eta tayeheana sello.

Tituparacavihi taicha píjaracavahi píti tímicapacavihi eta pivacharesirahaviyarehi tayehe eta pítine vimutu víti apaimamajiquenehavihi te juca apaquehe.

Taicha pivarahahi machanerahaviyarehi ema Tata Vicaiyaquene.

¹⁰ Píjaracahavivare viyujaracahiyare mayehe ema Viya.

Píti píjaracahavihi eta aquenucairahaviya tayehe eta avasareana” nacahepa.

¹¹ Tásiha, nusamavarepa eta nahu ena camuriqueneana ángeleana nachayacahi eta trono, eta návihahi ena cuátroqueneana ecutiarareana, énapa ena tuparairucana. Tétavicava eta nasimutuvahi éna. ¹² Énerichuvare tijirana muraca. Ánipa nacahe:

“Piti Cordero, piti nacaparuhi, picarichu tatuparacahi pijacapayare puiti eta piávacure mayehe ema Viya.

Tétavicava eta piúricacarevahi táicha.

Tétavicava eta pímatiequenehairahi tamutu.

Tétavicava eta pitumevahi.

Tétavicava eta pipicauchacarevahi.

Tétavicava eta picunachacarevahi.

Tijarahi visama te vijirauchavi” nacahepa.

¹³ Nusamavare eta tahu tamutu eta máepiyaruanahi ema Viya, eta tiávihanahi te anuma, étapa eta tiávihanahi te apaquehe, énerichuvare eta tiávihanahi te amahe eta apaquehe, étapa eta tiávihanahi te une. Ánipa tachehi:

“Tétavicava eta pítupajijiasiravahi, piti Vicaiyaquene, pítipa piti Cordero.

Éti, tétavicava eta epicauchacarevahi.

Éti, tétavicava eta ecunachacarevahi.

Tijarahi visama eta vijirauchirahe.

Máitavacayare eta vítsiusiraheyare” nacahepa.

¹⁴ Énapa ena cuátroqueneana ecutiarareana najicapapaipa:

—Amén, ene vicaheparacayare —nacahepa.

Tásiha, ena véinticuatroqueneana viyarahana tépuyumurihanapa, natsiucapa ena apinana.

6

Eta táepistasira eta sélloana

¹ Tacahe, nímahapa ema Cordero te mavepistacapa eta tinapuca sello. Tásiha, nusamapa ema émana ecutiararehi. Eta mahu tacutichucha tirurehucha.

Ánipa macahe:

—Yare, piúchuca —macahepa.

² Tacahe, nímahapa eta cavayu tijapu. Ema ticaperahi, tatiarihi eta mataquiriqui. Tásihapa, ticaijaracasipa eta corona éma. Eta juca táicutiarahi eta máquipairisiraparacaya ena mánarana, taicha guerrerohi éma.

³ Nímahavarepa ema Cordero mavepistacavarepa eta tápinane sello. Nusamavarepa ema apana ecutiararehi:

—Yare, piúchuca —macahevare.

⁴ Tacahe, tiúchujicapa eta apana cavayu. Titsi eta táimahi. Ema ticaperahi mámahi eta ichapequenehi espada. Ticavanahipa eta manacasamurechirayare ena achaneana eta náehacacairayare. Téhepucaínapa eta guerra. Ticapajiricanainapa ena achaneana camuriqueneana.

⁵ Nímahavarepa ema Cordero mavepistacavarepa eta tamapanane sello. Nusamavarepa ema apana ecutiararehi, máichapa:

—Yare, piúchuca —macahevare.

Nímahapa eta cavayu tiquisa. Ema ticaperahi macaratacahi eta balanza te mavahu. ⁶ Nusamavarepa eta mahu ema apana te namuri ena cuátroqueneana ecutiarareana. Ani macahehi eta máechajiruvahi:

—Ticatajivanayare ena ticaematanerahiana. Vaipa tisivachaimahi eta mavacha mácani achane. Diez páneana eta mavachayare te étana sache. Étaripa eta arusu* mapanarine kilo eta navachayare te étana sache. Étasera eta aceite comer, vahi téjiacavaimahi, étaripa eta tachi eta uva —macahepa.

⁷ Te mavepistacavarepa ema Cordero eta tacuatrone sello, nusamapa ema apana cuátroquene ecutiararehi, máichapa:

—Yare, piúchuca —macaheripavare.

⁸ Nímahapa eta apana cavayu tiyacaca. Ema ticaperahi, éma ticaijarehi “Ticaparerecaya ena achaneana”. Matiarihivare ema téhicapahi, ema táquenu eta náchanevana ena náepenaqueneana. Tacahe, eta cuarta parte eta nasimutuva ena achaneana tépenanaya naicha ena apinana. Taicha ticapajiricanainapa ena achaneana tayehe eta guerra. Ena apamuriana técuhanainapa. Apanapanenapa eta najumanayare. Énerichuvare tani-cainapa eta sárareana táíñehiqueneana.

⁹ Te mavepistacavarepa ema Cordero eta tacincone sello, nímahapa eta mesa tiámahi eta mayucuneasa ema Viya. Te tápecu, nímahavarepa eta náchanevana ena náepenaqueneana táimicaparuanahi eta náehisirahi ema Viya. Vahi náinajicahini eta náehisirahi te nímahapa eta nacatajivairayare. Váhivare tímatinanaimahi eta nametasirahi eta máechajiriruva ema Viya.

¹⁰ Puiti éna, tipiaracanahi. Ani nacahe eta napiarasirahi:

—Tátachicha, sántoquenevihi píti. Yátupiquenevihi eta picasiñacareva. Píti pirataha tamutu. ¡Puiti vivaraha pítauchayare eta pitsirijiequenehairayare ena ticapacahavianahi te apaquehe! ¡Vivarahapa nacáemecharahipaini! —nacahepa.

¹¹ Tásiha, ticaijaracasianapa eta namuirihanayarehi eta tijapu. Ticame-tacasianapa nanarahasiranumayare apaesainahi. Tiámainucavayarehi te tiyuriticavapa eta natupayare ena nachamuriana nacaparuanayarechahavare ena téhicanahi ema Cristo.

¹² Te mavepistacavarepa ema Cordero eta tasaisine sello, nímahapa eta tamuracavahi tayamurisirahi eta apaquehe. Eta sache témahavarepa, tétavicavahi eta taquisava. Énerichuva eta caje amairihapa ítime. ¹³ Eta jarairiquiana tiávihanahi te anuma, témiririjicapa te juca apaquehe, tacuti eta tahi eta mitu te muracaicha técatícava. ¹⁴ Eta anuma témitiacavarepa tacutipa te téchuquimeca eta ajumeruca. Tásiha, eta ichapequeneana cerro tiyamuricavacapa tiyjecavavacapa. Étaripa eta tiúrupuhiana te mar énerichuvare tiyjecavavacapa. ¹⁵ Tacahe, tijunanapa ena réyeana te avasareana, énapa ena presidenteana, énapa ena comandanteana, énapa ena aquenucarahana,

* 6:6 Ema ecutiarare máechajisihahi eta taqui ticaijare cebada. Eta juca tacuti eta arusu.

énapa ena rícoqueneana, énaripa ena músuana, énapa ena líbreana. Ticayumurú-quianapa te tajuhe eta ichapequeneana máriana cerro.

¹⁶ Ánipa nacahe:

—Vicavi eta ichapequeneana mari, apaesa vahi macuimahahavi ema Viya, apaesa viúchucuha tayehe eta táifehiquene máicuñaraqui ema Cordero.

¹⁷ Táitecapaurehavipa puiti eta ichapequene juicio. ¡Páurehavisami! ¡Nájina tacaemachaquenemahi! —nacahepa.

7

Ena dócemuriqueneana israelítana nacamarcaqueneanayare

¹ Tacahe, nímahapa ena cuátroqueneana ángeleana. Titupihanahi te táinahu eta juca apaquehe, náichejimirusirahi tamutu eta técativana. Éna, náichejicahi eta técativana apaesa tacuija eta técativana te apaquehe étaripa te une, étavanerecainahipucaini tacaecherahini te yucuquiana. Ticatuparahanasera éna nacamiriuchayarehi eta táicuñayare te apaquehe étaipa te une mar. ² Énerichuvare nímahavarepa ema apana ángele tiásihahi te táuchusinehi eta sache. Macaratacahi eta mamarca ema yátupiquene Viya Vicaiyaquene. Ema maca ángele máechajicavacapa muraca ena cuátroqueneana ángeleana.

³ Tacahe, ema ángele máichavacapa:

—Vuíchaha ecucamirica eta táicuñayare eta apaquehe eta une te mar étaipa eta yucuquiana. Tapainumavaya te vimarcachavacapa te nanahuana ena mavanarana ema Viya —máichavacapa.

⁴ Tásiha, te tamutupa eta nacamarcairavacahi, nusamapa eta natupa ena nacamarcaqueneanaripa. 144,000 eta nasimutuva. Násihaqueneanahi nayehe ena dócemuriqueneana israelítana. ⁵ Doce mil ena ticamarcanahi machichanavéqueneana ema Judá. Doce mílvare ena ticamarcanahi machichanavéqueneana ema Rubén. Doce mílvare ena ticamarcanahi machichanavéqueneana ema Gad. ⁶ Doce mílvare ena ticamarcanahi machichanavéqueneana ema Aser. Doce mílvare ena ticamarcanahi machichanavéqueneana ema Neftalí. Doce mílvare ena ticamarcanahi machichanavéqueneana ema Manasés. ⁷ Doce mílvare ena ticamarcanahi machichanavéqueneana ema Simeón. Doce mílvare ena ticamarcanahi machichanavéqueneana ema Leví. Doce mílvare ena ticamarcanahi machichanavéqueneana ema Isacar. ⁸ Doce mílvare ena ticamarcanahi machichanavéqueneana ema Zabulón. Doce mílvare ena ticamarcanahi machichanavéqueneana ema José. Doce mílvare ena ticamarcanahi machichanavéqueneana ema Benjamín.

Camurianavare ena apavasajuecuana tijapumuirihavacahi

⁹ Tacahe, nímahavarepa ena camuriqueneana achaneana tiásihana te tamutu avasareana, apaechajiririvaqueneana. Vaipa titupachacareana eta nasimutuvahi. Titupihanahi éna te tamirahu eta trono, mávihahi ema Cordero. Tijapumuirihavaca eta namuirihana. Tásiha eta náurisamurevahi nacaratacahi te navahuana eta cáchipaca. ¹⁰ Namutu tipiaracanahi, ánipa nacahe:

—Vihasalupayachavi, piti Tata Vicaiyaquene, pítipa piti Cordero, taicha éti ecuchucuhahavíhi —nacahepa.

¹¹ Tacahe, namutu ena ángeleana titupihanahi te tachacayahi eta trono, nachayacahivare ena cuátroqueneana ecutiarareanahi, énapa ena víyarahana

tuparairucana. Tásiha, tépuyucanapa te tamirahu eta trono. Tétipaimurihanapa. Natsiucapa ema Viya. ¹² Ánipa nacahe: “¡Eta vicaheyare!

Máitavacayare eta vitsiusiraviyare.

Taicha tétavicavapa eta picunachacarevahi.

Tétavicavavare eta pímatiequenehairahi tamutu, étapa eta pipicauchacarevahi, étapa eta pitumeva.

Picarichu piti péchahavihi.

Ichape eta vihasulupayachiravihi.

Tijarahi te visamure te vijirauchavi. Amén”.

¹³ Tacahe, ema émana víyaraha máichanupa:

—Te pivaraha pímati, nímimatichaviyare ena nani ticamuirihanahi eta tijapu, távihavarepuca násiha —máichanupa.

¹⁴ Tacahe, níchapa núti:

—Picatajicanu, pímetacanu, tata.

Tásiha, máichanupa:

—Ena nani énara ena nacatajivaqueneanahi ichape taicha eta náehisirahi ema Jesús, tiúchucuhanaripasera. Ticasipaipa puiti eta náchanevana tayehe eta máitine ema Cordero. Puiti ticamuirihanapa tijapu, taicutiarahi eta tájinairaripa naviorevainahini. ¹⁵ Eta tacahe, titupihanahi puiti te tamirahu eta trono mávihahi ema Viya. Najirauchahi, natsiucahi éma tamutu sácheana yátiana te mayehehi templo. Éma majaneacavacahi. ¹⁶ Ena nani tájinapira nácamunuiimahi, vaipa técuhana, váipavare timauneana. Váipavare ticatajivanaimahi taicha eta táijureva eta sache. ¹⁷ Taicha ema Cordero, ema tiávihahi te tamirahu eta trono, tétavicava eta majapanuraivahi, majaneacavacayarehi. Máesichayareva eta tiúriama une ticaitarerahi. Énerichuvare ema Viya macamitiasinayare eta náiyaira —máichanupa ema víyaraha.

8

Éma Cordero mavepistacapa eta téqueneha sello

¹ Tacahe, mavepistacapa ema Cordero eta téqueneha sello tayehe eta ajureca. Tamuturine timatina. Média-horapuca eta tamatinaira. ² Tásiha, nímahapa ena siéteana ángeleana, titupihanahi te mamirahu ema Viya. Ticaijaracasianapa eta siete chujareana nachujanayarehi. ³ Tásiha, títecapavarepa ema émana ángele. Mámapahi eta censario, amairiha oro. Tatiarihi te mamirahu ema Viya eta mesa tiámahi eta mayucuneasa. Amairihavare oro. Ema ángele titupihapa te tamirahu eta mesa. Náijaracapa eta incienso tisimuri. Tacahe, macaratacapa eta censario te tápusi. Macapusisiacapa ema Viya, tacachanepaipa eta nayujarasirana namutu ena máchanerana ema Viya. ⁴ Tásiha, eta taquijarera étapa eta mayujarasirana tiápanapa mayehe ema Viya, tásihaquenehi te mavahuana ema ángele. ⁵ Tásiha, ema ángele mavehavarepa eta apamuri emaniqui eta te mayucuneasa. Máinicachapa eta censario. Tásiha, máepuraicapa te apaquehe. Tijahúchavapa térameca, ticaema, tirecapa. Tiyayacarepa eta apaquehe.

Eta nacachujairayare ena siétequeneana ángeleana

⁶ Tacahe, nímahavarepa ena siétequeneana ángeleana titsecavanaripa eta nacachujairayare.

⁷ Te ticachujapa ema tnapuca ángele, témiricapa te apaquehe eta uverequi étapa eta tiquiva ítiama. Témiricavare eta yucu. Táijuchapa eta tercera parte te apaquehe. Támairiacapa eta yucuquiana, eta muiji, étapa eta sucurecana.

⁸ Te ticachujapa ema apana ángele, témiricavarepa eta ichape mari. Timurupahi eta táemirisira tayehe eta mar. Eta une, ítiama taicha. Tercera pártelivare eta ítiama. ⁹ Támairiacapa tacapapajicavaca eta sárareana tiávihana te une. Éta eta pacureana tachimararuanahi, técharicavanapa. Téririjicanapa tamutu.

¹⁰⁻¹¹ Te ticachujapa ema apana ángele, témiricapa eta ichape jarairiqui. Tétiraraicaparine eta táemirisirahi. Tajararecapa eta une tayehe eta tercera parte eta cajacureana étapa eta cáquiureana. Venenoamapa taicha eta jarairiqui. Ichapemurianavare ena achaneana tépenaracana taicha eta náerirahi eta une tisucareama. Eta tacahe, ena tacaitiruanahi tímijarechanahi eta ecuñaraqui: Eta Súcareama Venenoama.

¹² Te ticachujapa ema apana ángele, tiúchujicapa eta tépacuchahi eta sache, eta caje étapa eta jarairiquiana. Óchorine hora eta táetaviuchirahi eta tamapicuva. Tacahe, óchovare hora eta tacaecherairahi eta sache. Ocho hóravare eta tacaecherairahi eta caje étapa eta jarairiquiana.

¹³ Tacahe, nésenicapa te anuquehe. Nímahavarepa ema émana ángele tíararaicahi. Nusamapa tipiaracapai muraca, ánipa macahe:

—Páureanasami ena tiávihanahi te apaquehe. Tétavicavaya eta nacatajivairayare, puiti te táitauchavapa eta nacachujairaya ena mapanaqueneana ángeleana, téquenehanaya ticachujana —macahepa.

9

¹ Te ticachujapa ema apana ángele, nímahapa ema ángeléni mvasihi eta jarairiqui. Máquipairuvahi te apaquehe. Máisapa ema Vía eta mavejiasirayare eta pozo táupenaquene ticaijare Abismo. ² Tacahe, mavejiacapa eta táupenaquenehi pozo. Tiúchucapa eta ichape quijare tacutipa eta taquijarera te tiju eta evitarahi. Eta sache, timapicupa taicha eta quijare. ³ Témunahiricavapa tiúchuca eta tavasiqueneana eta tsacarana, tayehe eta quijare. Amairipáhipa tamutu eta apaquehe. Tajarachapahi eta tayucaraivahi tacutipa eta tayucaraiva eta sáserahi. ⁴ Tícatuparacasipa vahi tacunica eta tamujira eta apaquehe étapa eta tapacajiana eta sucurecana étapa eta yucuquiana. Eta tatuparahahi eta tayucavacayarehi namutu ena achaneana. Nacarichu tacaitica ena ticamarcanahi te nanahuana tayehe eta mamarca ema Vía. ⁵ Cíncoyarehi caje eta tayereva eta tayucarareresirayarehi. Váhisera tépena náimahi ena achaneana tayaqueneanayarehi. Tétavicavasa tacativayarehi nasama. Eta tayucaraqui tacutiyahehi eta sáserahi eta tacativayarehi nasama. ⁶ Te jena sácheanayare ena achaneana navarahayare ticapacavana. Váhisera tépena náimahi, tayanapane navarahayare tépenana.

⁷ Eta juca tavasiqueneana tsacarana, nímicutíchapa eta cavayuna te titsecavanahi tayehe eta guerra. Tásiha, te tachuti tacutimahiyaréni ticayehe corona oro. Eta tamira achanemirayaréni. ⁸ Tíuji eta tachutimaca, tacutiyaaréni eta suchutimaca esu esena. Tíñehivaca eta táheana. ⁹ Eta taparuma tacutiyaaréni eta fierro muracaquenehi. Vahi táechucaimahi eta isavipe. Eta tárairahi, ¡tétavicavahi eta tamuracavahi! ¹⁰ Ticaijiquivaca tacutiyaaréni eta sáserahi. Eta juca tiyucarahi, cinco cájeyarehi eta tacaitemajirisiravacayare ena achaneana. ¹¹ Mararihivare ema táquenu ema téchahi éta, ema ángeléni

tivejiacahi eta táupenaquene pozo. Ema maca ángeléni, eta máijare te náechajiriruva ena hebreoana “Apolión”. Te véchajiriruvana víti, ticaijare “Tijararerahi”.

¹² Títauchavapa eta títapuca ecuñaraqui nímahaquenehi. Jucarihichahavaresera apinachaha eta ecuñaraquiyare.

¹³ Te ticachujapa ema apana ángele, nusamapa eta mahu ema apana te tápusi eta cuátroquene esquina tayehe eta mesa oro eta tiámahi eta mayucuneasa ema Viya, tiávihihi te mamirahu éma. ¹⁴ Ticavanairipipa ema ángele ema ticachujahi, ánipa macahe:

—Picaiticapa ena cuátroqueneana ángeleanaini váinarajiana, tiávihanahi te tachacaya eta cjacure Eufrates —macahepa.

¹⁵ Taicha acane ema Viya manerejcaripa eta juca hora eta macaitisirainapa ena cuátroqueneana ángeleanaini, máispainapa eta nacapasirayarehi camuriqueneana achaneana, ena mapamuriqueneana eta náichapemuriva. Tacahe, téjapuacanapa éna. ¹⁶ Tacahe, tiúchujicanapa ena sustaruana ticaperana. Nusamapa eta natupa. Dosciento millone eta náichapemuríva.

¹⁷ Tacahe, eta nímairahi ena ticaperana, tatiarihi eta náicutiara te natupana. Eta táimahiana titsi, azul, tiyacaca. Táíñehiquenehi eta tachuti eta naperana. Tiúchucapaipa eta yucu, eta quijare te tajaca. Azufrepuha eta táepuha. ¹⁸ Camurianahi ena achaneana, ena tacaparuanapahi eta juca mapanaquene ecuñaraqui eta tacuchusirapahi te tajaca: eta yucu, eta quijare, étape eta azufrepuha. ¹⁹ Énerichuvare tatiarihi eta táíjiqui ticutipainehi eta quichare. Tétavicavahi eta táíñehivapahi eta tacaparaqui táuchurepahi te tajaca étape te táíjiqui.

²⁰⁻²¹ Énasea ena apamuriana achaneana tacaitiruanahi eta ecuñaraqui, váhiquene navarahaimahi náinajica eta náichira eta tauriqueneana. Váhiquene téneuchavanáimahi. Váhivare náinajicahini eta nacapahivana, eta nahiapemarevana, étape eta náesenamarevana, étape eta námeraivana. Váhivare náinajicaimahi eta najirauchira ena éreanana, eta natsiusirahi eta nasiñarajiana náepiyaruanahi oro, plata, bronce, márijahi, yucuqui. Tamutu eta juca mayamuricacahivare, váhivare tapaicahini, váhivare tasamarahihini, váhivare táimairiricahini.

10

Ema ángele macaratacahi eta ajurecachicha

¹ Tacahe, nímahapa ema apanavare ángele tiúcupaichahi te anuma. Tétavicava eta máíñehiva. Tamuichapahi eta úcaji. Te mápusi, tatiarihipa eta ahe. Eta mamira, tétavicava eta tajararasirahi tacuti eta táimahi eta sache. Eta mapaqueana tijarahivaca ticutipahi timuruquiape. ² Téjiacahi eta ajurecachicha eta macaratasirahi te mavahu. Tásiha, eta mapaque vaure mácatayaecahi eta une te mar. Eta étaquiape sapa tacatayacahi te tiájipahi. ³ Tásiha, típiaracapa muraca, tacuti eta tahu eta tíñehiquenehi sárare. Te títapiricapa, nusama eta nahu ena apamuriana tacutiayaréni eta tirurehuchahi. Siétequenehi eta najicapirahi. ⁴ Te timatinapa, nuvarahapa nájuequenehaya-rehini. Nusamapasera ema téchajicanuhi te anuma. Máichanupa:

—Vahi picuajucha eta juca pisamaquenehi. Piáñauchayare eta juca. Váhivare picumetajirica —máichanupa.

⁵ Tásiha, ema maca ángele nímahaquenehi eta mácatayasirahi eta une étapa eta tiájipahi, masuvechapa te anuma eta mavahu vaure. ⁶ Ánipa macahe:

—Tivanecanuhi ema Viya, ema acanevacaquenehi eta máítaresira, ema yátupiquenehi tépiyacahi eta anuma, eta apaquehe, eta mar, étapa tamutu eta tiávihaqueneanahi tayehe. Éma, tivanecanuhi numetaca eta juca máechajiriruvahi: “Tájinapa vaipa tayeremahi eta táitaviraya”. ⁷ Ánaquiaparipahi eta nacametacasivahi ena profetana eta mapanereruana ema Viya. Púitiserá te macachujapa ema téqueneha ángele, títavainapa tamutu eta mapanereruanahi —tacahepa eta mametarapihi ema ángele.

⁸ Tacahe, nusamavarepa eta mahu ema téchajicanuhi tásihaquenehi te anuma. Tivanecanuvarepa nupaucha ema ángele titupihahi tayehe eta une étapa te tiájipahi. Ánipa macahe:

—Piyana piyaseaca eta ajureca macarataruhi ema ángele —macahepa.

⁹ Tacahe, nuyanapa mayehe ema ángele. Nuyaseacapa eta ajureca. Tásiha, éma máichanupa:

—Júcahi eta ajureca. Piveha, pinica. Títiveyare eta pisamira te pijaca tacutiyare eta mápama. Étaserá te piami, tisucareyare pisama —macahepa.

¹⁰ Tacahe, nuvehapa eta ajurecachicha te mavahu ema ángele. Nunicapa. Jéhesaréinehi títivéinehi eta nusamira te nujaca tacutirinehi eta mápama. Téhesera nujiricapa, tisucarepa nusama te nami. ¹¹ Tásiha, nucametacasi-varepa:

—Píti piápechavaya picametarapiya eta náichararacavayare namutu ena aquenucana te juca apaquehe, énapa ena achaneana ticavasanahi te tamutu avasareana.

11

Éma Viya mavanecainapa ena apinana mavanaranayarehi profetanaya

¹ Tacahe, te nuvapure, tíjaracanuanapa eta ecutiriqui. Tásiha, máichanupa ema Viya:

—Píyanayare tayehe eta Templo te Jerusalén. Pícutichaya tamutu eta peti étapa eta canchón. Pícutichavare eta náijuchirarehi eta sárareana námavahuqueneana. Tásiha, pitupachayareva áyananahipuca ena achaneana téneuchavarahanahi eta te canchón. ² Váhisera picuicuticha te aneca tamirahuhi eta Templo. Taicha ena apajuecuruhana, nísapaqueneanapa eta návilhairaya éna. Nísapainavarepa eta náitahasiraya eta tayereruvanaini eta avasare tacapicahuquenehi Jerusalén. Ichape eta namapachichijisirayare. Cuarenta y dos caja eta náichirayare. ³ Nútiserá nuvanecavacainapa ena apinana nuvaneruana profetana. Éna, tiquisamuirihanayarepahi eta namuirihana. Éta juca táicutiarayarehi eta náichuarésirayare náeneuchava ena achaneana. Mil doscientos sesenta sache eta nayerevayare —macahepa.

⁴⁻⁵ Tásiha, nímahapa te anuma te mamirahu ema Viya eta apina yucuqui olivo étapa eta apina candeleroana te mamirahu ema Viya, ema téchahi tamutu eta juca apaquehe. Éta juca táicutiara eta majaneasiravaca ena apinana mavanarana, taicha manerejiruanahi éna, nacametairuyare eta náeneuchiravayare ena achaneana. Te natiarihinapuca nácani tivarahanayare titupiacana, éna ticatiuchavanayare. Tiúchucayare eta yucu te najaca. Táijuchayare muraca, tacapacayareva ena nánaranayarehi. ⁶ Énerichuvare ena nani, naratahayarevare náichejica eta tiquiva te jena sácheana

nacametarairuirayare. Étaripa eta une, náepiyacayare ítiamayare náicha. Nacuchucayareva eta táíñepahiyare nayehe ena achaneana, apanapaneneyarehi náicha, te jácani navarahaqueneyare éna. ⁷ Téhesera te táitachavapa eta nacametarairuirayare, macanaravacainapa ema Tíñehi Achane Váinarajiquene tciaijare Útsutsure. Émaripa ema majupaha ema Satanás. Tásiha, masapihainapa ticaparecayare macapacavacainapa ena apinana mavanarana ema Viya. ⁸⁻⁹ Tásiha, ema Tíñehi Achane Útsutsure vahi máisapaimahi náecara eta náqueheana. Tanasiyarehi te aneca. Tacahe, náimahayare namutu ena achaneana te juca apaquehe. Mapana sache y medio eta nacaheyare te calle eta te avasare. Eta juca avasare, étarichuhi eta macaetataínehi ema Viáquenu. Eta juca avasare, tétavicavahi eta tauriva tacuti eta avasare Sodoma, éta eta Egipto. ¹⁰ Ena achaneana, natiarihiyare te tamutu avasareana ena tíurisamureanaya eta náimairaya ena tépenanahi. Ticapiestaranainapa. Tijaracasichacacanainapa eta námavahuana. Taicha titavannaripa ena nani profetanaini, énaripa ena tihapapiricanahi eta náichira eta tauriqueneana. ¹¹ Tásihasera, te táequenéna eta mapanaquene sache y medio, macaechepucavacainapa ema Viya. Tichavanainapa titarecanayare. Namutu ena achaneana náimahaya. Ichape eta napisirayare. ¹² Tacahe, ena nani apinana profetana nasamainapa eta mahu ema tíchuhavacahi te anuma. Muraca eta mahu eta máichuiravacahi:

—Yare, íteca, íapana —máichapa.

Tacahe, járajapapa eta úcaji táepanavacapa éna, támapa te anuma. Ena ticanaranahi náimaracaripa eta nayanirahi. ¹³ Enevanepe tiyayacarepa eta apaquehe. Muraca eta tayamurisirahi. Camuri eta pétiana tíaquipacavavacahi. Siete mil eta náichapemuriva ena náepenaqueneanahi. Ena achaneana táemachanahi, tétavicavainehi eta napisirahi. Náimatinumainehi ema Viya. Napiaracapa, nacunachapa eta máitupajijiasiravahi ema Viya tíavihahi te anuma.

¹⁴ Títauchavapa eta juca apinaquene ecuñaraqui. ¡Váhisera tayerequenehaimahi eta mapanaquene ecuñaraqui!

Ticachujapa ema téqueneha ángele

¹⁵ Tacahe, ticachujapa ema téqueneha ángele. Tásiha, ticaemapa muraca te anuma. Ánipa tacahehi eta nahu eta nusamirahi:

—Títauchavapa puiti eta émarayarepa ema Viya técha, ticavanairipiyare namutu ena achaneana te juca apaquehe. Macaejacapa ema Machícha Cristo, máijaracainapa eta mávacureyare. Acanevacainapa eta émarayare techa tamutu —tacahepa eta nahu.

¹⁶ Tacahe, tépuyucanapa ena véinticuatroqueneana víyarahana, ena téjacanahi tayehe eta trono te mamirahu ema Viya. Tísiucapairicanapa, nacunachapa ema Viya. ¹⁷ Tijiranapa, ánipa nacahe:

“Vihasalupayachavi, Tata.

Tétavicavahi eta pítipajijiasiravahi, píturequeneha tamutu.

Píti pitirihiquenehi te tépanavainapa eta apaquehe.

Pinasirichuhivare puiti eta veyehe.

Puiti péjacapa tayehe eta piávacure ichapequene, pítirayarepa pecha tamutu.

¹⁸ Tétavicavahi eta nasemanevahi ena achaneana eta piyehe.

Muracapanainapasera eta pícuñasiravaca éna.

Puiti ticayaseserhianainapa te pimirahu ena náepenaqueneana.

Jéhesare, picamitieguenehainapa namutu ena ticamitieguenerahianaini te juca apaquehe.

Puiti pítsirijicavainapa eta nacaemataneasiravihi ena pivanarana ticameta-rairurahiana eta péchajiriruva.

Puiti píjaracainapa eta náicuchihi ena yátupiqueneanahi

pichichanaveanahi tiámanahi eta píjare:

nácani ichavicana, araitanana, énapa ena amaperuana” nacahepa.

¹⁹ Tacahe, téjiacapa eta tapajacura eta Templo tiávihihi te anuma, mapena ema Viya. Ticaeherapa eta sagrario tacaunaiyahi eta echajirirucavana matratuneanahi ema Viya nayehe ena israelítana. Tásiha, enevanepa téramecahi, ticaemapa, tirurecapa. Témiricapa eta uverequi timítutupahi. Tiyamuricavarepa eta apaquehe.

12

Máimhavare ema Juan esu esena tñacayarehi étpa eta táíñehiquene sárare ticajjare Serpiente

¹ Nímahavarepa eta apana ecutiarrare te anuma. Tiáramicarehi éta. Su-tiarihi esu esena. Eta sumuirihatacutiyaréni eta tajaraiwa eta sache. Te tápecu eta súivapeana tacutiyaaréni eta caje. Eta te suyehe corona te suchuti, jararihi tacutiyaaréni eta dócequeneana jarairiqui. ² Esu suca esena ticajarihi. Tipiararecahi eta suínasirayarehi. Ichape eta sucatajivairahi.

³ Tásiha, témunahiricavarepa tiúchujica eta táíñehiquene sárare. Ichapeque-nehivare. Ticajjare Serpiente. Máchaneva ema Satanás. Titsi eta táimahi. Siete eta tachuti. Diez eta tajihuana. Ticayehehi eta corona eta te tachutiana. ⁴ Eta te táijiqui, táestacapa eta mapamuriana eta táichapemuriva eta jarairiquiana, tacamiricapa te juca apaquehe. Tásiha, titupihapa eta sárare te sumirahu esu esena esu tñacayarehi. Titsecavaipa eta tanisirayarehi eta suchicha.

⁵ Tacahe, ajaira eta suchichahi esu esena. Námavanepasera mayehe ema Viya, te mávihahi te trono. Ema suchicha, aquenucayarehi tayehe tamutu eta avasareana. Macaratacayare eta matsucurupa fiérrroqui. Váhiqueneayarehi tijapanucareanaimahi nácani náichahi eta tamauriqueneana. Muracayarehi eta náicuñanayare ena téjecapavana. ⁶ Tásiha, esu esena tijunavanepe te mávapaihi apaquehe eta suávihayarehi maicha ema Viya. Natiarihiyarehisera ena ténicanayarehi ésu. Mil doscientos sesenta sácheana eta náitátirayarehi esu esena.

⁷ Tacahe, tiúchujicapa ema Arcángele Miguel énapa ena ángeleana machamuriana. Téhacacanapa nacanarapa eta Serpiente. Énerichuvare natiarihivare ena tayeheanahi ángeleanaini váinarajianahi. ⁸ Apaquehererupasera eta ichapequenehi Serpiente, énapa ena tachamuriana. Tásiha, vaipa máisapa ema Viya nanasihini te anuma. ⁹ Tacahe, ticaquijianapa te juca apaquehe namutu ena ángeleanaini, émapa ema náquenumurihhi Serpiente, ema ticaetemahi acane esu Eva. Émarichuhi ema Váinaraji ticajjarehivare Satanás. Puíticha ticaetemajricavacahi ena achaneana te juca apaquehe.

¹⁰ Nusamavarepa te anuma eta mahu muraca, ániapa macahe:

—Títauchavapa puiti eta náuchucuirapa ena téhicanahi ema Cristo. Máimerurapa ema Viya eta tamutuirahi marataha. Máijaracapa ema machicha Cristo eta émarapa techa tamutu. Taicha ticaquijipa ema Satanás, ema timetauchaparacainihhi me Viya eta náichavaquenevanahi ena vichamuriana, tamutu sácheana, yátiana. ¹¹ Ena vichamuriana naratahaipa

ticatiuchavana mayehe ema Satanás. Vaipa macapaquechavacaimahi éna, taicha yátupi ticasíñavanahi tayehe eta máepenirahi ema Cordero. Énerichuvare náimimaticahahi ena apamuriana achaneana eta máechajiriruvana ema Viya. Éna, vahi napicacavacahini tayehe eta náitaresira. Tíjaracavanahi te náepenirayarehi, vahi návarahahini náinajica eta náehisirahi ema Cordero. ¹²Tétavicavaya eta iúrisamurevaya puiti, emutu eti iávihanahi tayehe eta juca anuma. Páureanasamisera ena ticavasanahi te apaquehe étapa eta tiávihanahi te une te mar, taicha ema Váinaraji máucupauchavacaipa. Tétavicava eta masemanevapahi taicha máechahi eta ánipirinehi macaheyare —macahepa ema maca.

¹³Tacahe, eta Serpiente, eta táimairahi eta tacaquijirahi te anuma, táucupaisiraipa te juca apaquehe, tacamesapa táehicarairica esu esena suñaruihi. ¹⁴Ésusera ticaijaracasipa eta apina ichapequeneana supavanayarehi tacuti eta tapava eta ichape mátihi. Sumaitasiavayarehi tiara tayehe eta mávapahi apaquehe suáviyaharehi. Ánaqui natiarihiyareva ena téchapajiricanayarehi. Mapana año y medio eta náenisirayarehi. Eta Serpiente vahi táitecapauchaimahi ésu. ¹⁵Tásiha, eta Serpiente táhicapa eta une te tajaca, tavarairahi tójahúchava tatiarihi eta cajacure apaesa suéricahini esu esena. ¹⁶Étasera eta apaquehe tacatiuchapa esu esena. Téjiacapa eta apaquehe, táerapaicavanepa eta une táhiruamahi eta Serpiente. ¹⁷⁻¹⁸Tacahe, eta táimairavahi eta Serpiente vahi táratahahini, tavetijipaicha eta tasemirahi suyehe esu esena. Tiyana nayehe ena suchamuriana, énapa apavequeneanahi. Tavarahapa tacapacayarehi ena sucutiqueneanahi tisuapanahi ema Viya, téhicanahivare eta máimiturapianahi ema Jesucristo.

13

Máimahavare ema Juan eta útsutsure étapa eta sárare tíñehiquene

¹⁻² Te táequenepa eta juca, te nuvapure, nutupihahi tayehe eta playa eta mar. Nímahapa eta útsutsure tiúcupaicapahi tásihahi te une. Siete eta tachuti. Dies eta tajihuana. Te tápusi eta tajihuana tatiarihi eta tayehe corona. Eta juca sárare tavasimahiyaréni eta ichini. Táíñehiquenehi eta tajaca. Eta táivapeana tacutiyaréni eta táivape eta aticure. Tásiha, te tachutiana tatiarihi eta ajureca tímijachavahi Váyainahíni. Macunahisera ema achane majupaha ema Satanás. Eta tacahe, eta Serpiente táijaracapa eta máitupajijiasiravayarehi ema Útsutsure eta macaetemaraivayarehi maratahairayarehi tamutu. Aquenucayare te tamutu avasareana maicha eta Serpiente. ³Te étana machuti ema Útsutsure, tatiarihi eta majara eta ticapacahi. Tásihasera, tichavahi títareca, tinaracavarepa. Tacahe, eta náimairahi ena achaneana te tamutu avasareana, ichaperinehi eta nárami. Tásiha, náehicapa nasuapapa ema Útsutsure. ⁴Natsiucavarepa eta Serpiente, taicha eta náimairahi eta táijarasirahi eta máitupajijiasiravahivare ema Útsutsure. Tásiha, nacahepa mayehe:

—Tétavicavahi eta máitupajijiasiravahi ema maca. Nájinavare tiratahaimahi nacanara náquipaica éma —nacahepa.

⁵⁻⁷Tacahe, ema Viya máisapahi ema Útsutsure téjacahi te mávacure, ichape aquenuca, ticavanairipipa tayehe tamutu avasareana te juca apaquehe. Ema Viya vahi máicuñacavanehini eta masíñavavaisirahi, tímijachavahi

Víyainahini. Tíñemahipivaca eta máechajisira, macaecahirahi ema Viya étapa eta mapena. Macaecahivare ena tiávihanahi te anuma. Énerichuvare mapanjiricavaca ena machanerana ema Viya. Máimicaratacavacapa, mavarairahi máimicapacavacaya. Cuarenta y dos caje eta macamichirahi ema Viya eta máimiyusemasirahi ema Útsutsure.⁸ Eta acane te tépanavainapa eta apaquehe, tatiarihi eta libro tiama eta nalista ena títarecanaya te apana vítaresira. Macarataruhi ema nacaparuhi Cordero. Natiarihisera ena apamuriana tájinahi eta nalista tayehe eta libro. Ena nani ena titsiucanahi ema Útsutsure.

⁹ Te evarahapuca ecaicutiara eta juca, tavaraha epanerechaya ichape.
¹⁰ Mácani témeratacayare ema apana, énerichuvare éma te tacaicutiaravapa ticaeratayareva éma apanavare. Mácani ticaparecahi, nacapacayareva éma. Eta tacahe, nácani machanerana ema Viya, tatuparaca nacamichayare tamutu, náimereca yátupina eta náehisirahi ema Viya.

¹¹ Tásiha, nímahavarepa eta apana sárare, táíñehiquenevare. Tiúchujica te amahe apaquehe. Eta juca sárare, macunahi ema achane ticaijare Falso Profeta*. Eta juca, tatiarihihi eta apina eta tajihuana, tacuti eta tajihu eta uvesa. Étasera eta táechajisira tacutiahu eta tahu eta Serpiente Satanás.
¹²⁻¹⁴ Énerichuvare ema Falso Profeta majupahahi ema Útsutsure. Muraca eta tasuapacareva eta mavanairipiana ema Útsutsure maicha ema Falso Profeta. Éma, maratahahi tímereca eta tiáramicareana. Maratahahivare macamirica eta yucu tiásihaya te anuma. Náimahahi namutu ena achaneana te juca apaquehe. Ichape eta náramirahi. Étavenahi eta juca táimeresirahi eta tiáramicareana, étainapa tivayuacaya ena achaneana, tisuapacarenapa titsiucacarenavarepa ema Útsutsure. Taicha náimahahi eta manarasirahi eta majara te tumare; tiápechava títarecahi. Tacahe, ema maca Falso Profeta macavanairipipa náepiyacaya eta máimahi ema Útsutsure, nasiñarajiya.
¹⁵ Ema Viya macamichahi tamutu eta máichaqueneanahi ema Falso Profeta. Vahi máicuñacavánehini eta máchanechirahi eta náepiyarui máimahi ema Útsutsure. Téchajicayare máicha. Eta juca nasiñaraji títipajijiacavainapa tivanereca, ánipa tacahe:

—Namutu tatuparacahi natsiucanu núti. Nácani vahi návarahahini titsiucanuhini, ecapacavacayarehi —tacahepa.

¹⁶⁻¹⁷ Tacahe, ema Falso Profeta macavanairipinapa nacamarca te navahu te vaure, te nanahupuca ena achaneana: ena amaperuana, énapa ena ichanaruana, énapa ena ichavicana. Tayanapane rícoanahipuca, páureanahipuca, líbreanahipuca, mósoanahipuca. Námayarehi eta máijare ema Útsutsure étapa eta mayehe número. Énerichuvare macavanairipipa vahi nacuisapa nacujachapa eta navacharapiana ena mamarcareana. Ticatajivanainapa eta náiturúsirayare eta nacamunuqueneana taicha vahi nacamarcahini.
¹⁸ Tacamunuhi yátupina vipáneréquenehayare maicha ema Viya, apaesa vácaicutiara eta tacayemaquenehi tayumururevahi eta tuparaquí máijare ema Útsutsure eta 666. Éta, tacunahi eta máijare ema maca achane.

* **13:11** Te pivarahapuca pecha eta apana, pitanuca eta capítulo 16.13.

14

Eta najirasa ena 144,000 ena téhicanahi ema Cordero

¹⁻³ Tacahe, nímahavarepa eta plaza ticaijarehi “Sántoquenahi Sión”, te mamirahu ema Viya, máejasirahi eta te trono, te návihahi ena cuátroana ecutiarareana énapa ena véinticuatroqueneana víyarahana tuparairucana. Nímahavarepa ema Cordero. Te machacaya natiarihahi ena 144,000queneana téhicanahi éma. Éna, ticamarcavacahi te nanahuana eta máijare ema Cordero émapa ema Maiya. Nusamavarepa eta muraca ticaemahi te anuma tacutiyaréni eta muraca tirureca. Tásiha, títsivachavavarepa. Nusamapa ticapununeanahi eta camuriqueneana guitarrana. Tacahe, ena 144,000queneana tijiranahi te mamirahu ema Viya. Arapiruhi eta najirasahi. Nájina apanaina títucaína eta najirasahi. Nacarichu títucañahi ena 144,000queneana. Ena nani náuchucureanahi te namuri ena ticavasanahi eta juca apaquehe. ⁴ Matapiravareanahi éna te mamirahu ema Cordero. Tájinaavare váhiquene náechipejicavahíni, navirainahini esu esena túhusi. Náehicahi ema Cordero te jácani mapaisirana. Ena nani, ena náinapureanahi masantuchaqueneanahi ema Viya émapa ema Cordero. ⁵ Tájina náimatiyahini eta náepiyahirahihini. Tájinaquene natapiravainahini te mamirahu ema Viya.

Eta nametarapi ena mapanana ángeleana

⁶⁻⁷ Nímahavarepa ema émana ángele tíararairicahi. Ticametarapihi eta téqueneha mametarapi eta máichuaresirahi eta náeneuchiravaina ena achaneana tíáviañahi te tamutu avasareana, apaechajiriruvacueneana. Máitavacainapa eta náitaresiraya nácani ena tisuapanahi. Muraca eta máichuaresirahí, ániapa macahe:

—Éneuchava eta epecaturana. Epicauchayare ema Viya, taicha éma tépiyacahi eta anuma, eta apaquehe, eta mar, étapa eta cáquiureana. Émaina ejiraucha, ecunachaya. Émaina etsiua. Taicha járajapainapa puiti eta máicuñasiraya ena achaneana máeneuchavarahana —macahepa.

⁸ Tacahe, tíuchujicavarepa ema apana ángele. Émapavavare téchajica. Tíáramicare eta macayemaquene. Ániapa macahe:

—Tájinaapa táipuina tacamitiaruinapa eta ichapequenehi avasare Babilonia, taicha tétavicavahi eta tamutuirahi taicha eta támaraiqueneana. Tavayucacahi tamutu eta apana avasareana táchiraya eta támaraiqueneana, tacutihí súcani esena suétaviurequenehi eta sutuhusivahi, namutupahi suyuaca —máichapa.

⁹ Te títapiricapa, émapavavarepa téchajica ema émana ángele, ema namápananehi. Muracavare eta máechajisirahi. Ánivare macahe:

—Tájinaavarepa táipuina eta náicuñanayare ena tijirauchanahi ema Útsutsure étapa eta máimahi náepiyaruihí nasiñarajihí, énaripa ena tíámanahi eta mamarca te nanahuana étapa te navahuana. ¹⁰ Muraca eta nacatajivairaya taicha ichape eta náimiyusemasirahi ema Viya. Ticaepujuquichacasianainapa eta te muracaquene yucu, táetiraráisina eta tamuruira. Muracaquenehi eta nasamira. Táitusiava, natsirihainapa eta máimararasira ema Cordero, énapa ena ángeleana. ¹¹ Máichecuaraquireyare eta nacaicuñairayare. Tájina ticaemahaimahi eta yucu. Támutu sácheana, yátiana nacaheyare te yucu ena tijirauchanahi títsiucanahi ema Útsutsure, tíámanahivare eta mamarca, tacuna eta máijarehi ema nasiñarají. ¹² Eta

tacahe, ena machaneranahi ema Viya, ena tisuapanahi eta mavanairipiana, túmesamureanayare eta náehisiraya ema Jesús, puiti nacamichayarehi tamutu —máichapa ema ángele.

¹³ Tacahe, nusamavarepa ema téchajicanuhi te anuma. Ánipa macahe:

—Piájuchayare eta juca numetaruvianayare: ¡Tétavicava eta náuricacarevaya ena táimicaparuanayare puiti juca vicaijuheyare eta náehisirahi ema Viáquenu! —máichanupa.

Énerichuvare ema Espíritu Santo máichanupa:

—Jéhevare, najacapainapa eta náicuchihi taicha eta nacaemataneasirahi ema Viáquenu. Tájinapa nácamunuimahi, tinaracanainapa —macahepa.

Ena nacurujisiraya ena ángeleana ena achaneana

¹⁴⁻¹⁶ Te nésenicapa, nímahapa eta tijapu úcaji. Matiarihahi ema támaquenepahi. Téjacahi éma te úcaji. Achanehi eta máimahi. Te machuti tatiarihahi eta mayehe corona oro. Németeaca titsecavaipa eta macurujisirayare eta trigo. Tásiha, tiúchucapa ema émana ángele te tajuhe eta Templo. Mapiaracapa muraca ema téjacahi tayehe eta úcaji. Máichapa:

—Puiti piyana. Picurujica namutu ena achaneana manerejiruanahi ema Viya, taicha tiyuriticavapa eta natuparaha. Piputuvahu* —máichapa.

Tacahe, ema téjacahi te úcaji, títahúchavapa macurujicapa ena náequeneruanahi manerejiruanahi ema Viya. Macuchucavacapa eta te juca apaquehe.

¹⁷ Tásiha, tiúchucavarepa ema apana ángele te tajuhe eta Templo te anuma. Németeaca matsecaripavare eta macurujisirayare, étapa eta uva†. ¹⁸ Énerichuvare tiúchujicavarepa ema apana ángele eta te mesa tiámahi eta mayucuneasa ema Viya. Éma, téchahi eta yucu. Tacahe, mapiaracapa muraca ema matsecaripa eta macurujisirayare. Máichapa:

—Puiti piyana. Piputuvahu picurujica ena apamuriana achaneana te juca apaquehe. Tícuñacacareanapa ichape, taicha tétavicavahi eta náichirahi eta tamauriqueneana. Vaipa ticuchapacarehini eta náeneuchiravaina‡ —máichapa ema ángele.

¹⁹ Tacahe, tiyanapa ema ángele. Macurujimurihapa ena achaneana tíchanahi eta tamauriqueneana. Tíñehiquenehi eta náepenirahi taicha títecapapa eta táíñehiquene ecuñaraqui tíásihahi me Viya taicha eta náimiyusemasirahi éma. Tacajapapahecavacahi éna.

²⁰ Te tachachacu eta viávasa eta tacajapapahesihahi. Tiúchucapa eta náitine, tacuti eta cajacure. Étana metro eta táupenava. Tresciento kilómetro eta táunavayare.

15

Ena siétequeneana ángeleana najacapapa eta siétequene ecuñaraquiana

¹ Tacahe, te nésenicapa te anuma, nímahavarepa eta apana ecutiarare. Tétavicavapa eta táramicarevahi. Natiarihivare ena siétequeneana ángeleana.

* **14:14-16** Te pivarahapuca pecha eta apana, pitanuca Mateo 13.24-39, étapa te 24.30,31. † **14:17** Te juca, ema Juan máechajisihahi eta nacurujisirahi eta uva, tahí eta épire. Te jena avasare, eta nayeherepi ena achaneana, nácatayajica eta uva te raveta, navairahi nacuchuca eta tachi.

‡ **14:18** Ema ángele máimicutijiricahi eta tíñehiquene ecuñaraqui ticapacayare ena camuriqueneana achaneana étapa eta sárareana. Vuúchahasera étaina eta táequeneha ecuñaraqui.

Ticaturacasianapa éna eta nacamirisirayarehi eta siétequene ecuñaraqüiana te apaquehe. Te táitavapa eta juca ecuñaraqüiana, títavainavarepa eta masemanevahi ema Viya.

² Nímaha tativa eta ticutiyaréni táimahi eta une te ichapequene cáquiure. Tétavicavasera eta tajanunusira tacutihi eta espejo. Tásiha, tacutiyaréni eta yucu eta táimahi. Natiarihihivare ena máisapavarahanahi najirauchahini natsiucahipucaini ema Útsutsure étapa eta máimahi náepiyaruhi, váhivare náisapavahini nacamarcahini eta mamarca. Te tachacaya eta une titupihanahi. Nacaratacahi eta nayeheana guitarrana máijararuana ema Viya.

³ Tijiranahi eta jirasare majirasaini ema víyarahaini Moisés, mavanaraini ema Viya. Najirauchahi ema Cordero. Ani tacahehi eta jirasare:

“Píti ichapequenevahi aquenuca,

Tétavicava eta pítupajijiasirava.

Tamutuquenehi píturuequeneha.

Tétavicavapa eta táramicarevahi eta pépiyuanahi.

Tiúricarehivare eta pinaquipairuanahi.

Vahi apanapanenejinahini eta péchajiriruvana.

Yátupihí eta piúriiva.

Píti aquenucavihi, péchaya tamutu avasareana.

⁴ Namutuhi tipicaviana, piti Tata.

Namutuvare ticunachaviana taicha piti yátupiquenévihi eta pisantuva, nájina nácutivihini.

Títecanayare nácani achaneana te tamutu avasareana.

Titsiucavianayare taicha náimahahi tatupiruvahi tamutu eta píchaqueneanahi”.

⁵⁻⁶ Tásiha, nímahavarepa te anuma téjiacahi tamutu eta Templo. Nímahapa tiúchucanahi ena siétequeneana ángeleana te téqueneha cuarto te tajuhe, énaquenehi ena ticaturarahanahi eta siétequene ecuñaraqüiana táequenere-ruyare tiúchujica. Eta namuirihana, amairiha eta lino tijapu tirapepacavaca. Eta náitijuheana ichapemevaca, títicapavaca te natupana. ⁷ Tásiha, nímahapa ema émana ecutiarareana nacuatronehi. Máijaracavacapa étasivaca eta escudilla oro ena siétequeneana ángeleana. Te tajuhe eta escudilla támapahi eta táíñehiquene ecuñaraqüi táicutiarahi eta masemaneva ema Viya. Éma, acanevacaquenehi eta máitaresira. Máimahapa tamutu eta tamauriqueneanahi náichaqueneanahi ena achaneana. ⁸ Tacahe, nímahapa títahúchavapa eta tajurusirahi eta majaraivahi ema Viya, ema acanevaca eta máitaresirahi. Tétavicavahi eta mapicauchacarevahi taicha eta matumeva, maratahairahi tamutu. Tásiha, nájina tiratahaina tisiapana te Templo, váhivare tímahacarehini eta tapajacura táichavenehi eta tavayuchiravahi eta majaraivahi. Tiámainucava te táitachavapa eta siétequene ecuñaraqüi táequenereyarehi námaquenepahi ena siétequeneana ángeleana.

16

Títauchavapa eta ecuñaraqüiana nacamiriruhi ena siétequeneana ángeleana

¹ Nusamapa muraca eta mahu ema Viya tásihaquenehi eta téqueneha cuarto náuchusinehi ena siétequeneana ángeleana. Ticavanahianapa éna. Ánipa tacahe eta navanahi:

—Eyanapa ecamirica te apaquehe eta juca siétequene ecuñaraqui táíñehiqueneana tiávihanahi te escudilla taicha eta nusemanevahi —máichapa ema Viya.

² Tacahe, tiyanapa ema títapuca ángele. Máepusaicapa te apaquehe eta ecuñaraqui tiávihahi te escudilla macarataruhi. Tacahe, ena achaneana tiámahahi eta mamarca ema Útsutsure, táichavenehi eta natsiusirahi eta máimahahi nasiñarajihí, témunahiricavapa táuchuacavaca éna eta caracha ticajachacarepa tijechevare, tacutiyaereni eta espuntiu.

³ Ema apana ángele máepusaicavarepa eta macarataruhi tayehe eta mar. Tacahe, eta une títahúchavapa ítiama, tijecheamapa. Tépenaracanapa tamutu eta sárarechichana ticavasanahi te mar.

⁴ Ema apana ángele máepusaicavarepa eta macarataruhi tayehe eta cajacureana, te cáquiureana, étpa te tatavarapiana. Énerichuvare ítiamaavarepa. ⁵ Nusamavarepa ema máepusaicahi eta juca ecuñaraqui tayehe eta cajacureana. Macahepa éma:

—Tétavicavapa eta piúriva, piti Tata Vicaiyaquene, eta pícuñasiravacaipa puiti ena ticaviurevanahi. Yátupiquenevahi eta pisantuva. Píti pitirihiquenehi te tépanavainapa, puitiripa pinasirichuhi eta viyehe. ⁶ Títutichavnainapa puiti eta navarahaquenehi térana eta íti ena tépusaicanaahi eta náitine ena píchanerana táimicaparuaana eta náehisiravihi píti, étpa eta nacametairuirahi eta péchajiriruva. Puiti píjaracaipa eta náerirayare eta ítiama taicha naviurevanahi éna.

⁷ Nusamavarepa eta mahu ema apana tayehe eta mesa tiámahi eta mayucuneasa ema Viya. Ánipa macahe:

—¡Tata Vicaiyaquene, tétavicavapa eta vicunachiravi! Píti, tétavicava eta pítipajijiasirava, píturequeneha tamutu. Pitupiruvahi eta pícuñasiravacahi ena ticaviurevanahi. Vahi pémetavicaíhí —máichapa.

⁸ Ema apana ángele máepusaicavarepa eta macarataruhi tayehe eta sache. Tacahe, eta sache tépanavainapa eta tavayuchiravayare tíjure, táijuchirapa eta apaquehe énapa ena achaneana. ⁹ Jéhesaréinehi, táetaviuchapa eta táijurevahi. Táijuchavacapa ena achaneana. Váhiquenesera náeneuchavahíni, váhivare návarahahíni náesenicahíni ema Viya. Navayuchaichucha eta nasemanevahi. Nacajachapa ema Viya, ema ticavanairípipa eta ecuñaraquiana.

¹⁰ Ema apana ángele máepusaicavarepa eta macarataruhi te táinahu eta mávasa capital ema Útsutsure, eta máejasihahi. Tacahe, ticutipá timapícupa te návihahi ena majupahana. Vaipa náimatíequenehahíni tájahapuca eta náicharacavaya namutu ena machanerana. Ticapítiquiahechavanapa ena achaneana taicha eta tacativa nasama. ¹¹ Tacahe, tisemasamureanapa nacajachapa ema Viya taicha eta tacativahi nasama eta najarana nacarachana. Váhiquenesera téneuchavanáimahi mayehe ema Viya. Váhivare náinajicaímahi eta náichira eta tamauriqueneana.

¹² Ema apana ángele máepusaicavarepa eta macarataruhi tayehe eta ichapequene cajacure ticaijare Eufates. Tacahe, eta cajacure tiájícupa, apaesa máejerare eta nánucuiraya ena aguenucana tíasihanahi te tinapaica eta táuchusine sache, énapa ena suntaruana.

¹³ Tásiha, nímahavacapa ena mapanaqueneana ticaetemarahanahi: ema Serpiente, ema Útsutsure, émapa ema Falso Profeta. Tiájajacanahi éna. Te najaca, tiúchucahi eta tavásiyaréni eta varutete. Éreananahi eta júcana,

náchanevanahi ena mapanaqueneana. ¹⁴ Éna, títipajjiacavanahi tíchanahi eta tíaramicareana tavayuraquianahi nayehe ena aquenucana te tamutu avasareana. Navaraha nacurujicavacayare, énapa ena nayeheana ejército nasuntaruana apaesa namutu ticanaranaya ema Viya. Tíjáhúchavasera muraca eta máquipapaisiravacainapa éma, taicha tétavicava eta máitupajjiasirava, máituruequeneha tamutu.

¹⁵ (Nuti, tíjáhúchavaya eta nítecapauchiraheyare éti. Váhiserá tánecapacaremahi eta nítesira. Eta tacahe, tétavicava eta iúricacarevaya te ecunevahi, machu ímacariana eta nuchimapiraheyare, etsiriacaréipa.)

¹⁶ Tacahe, ena mapanaqueneana éreanana nacurujicapa ena aquenucana énapa ena nasuntarurana tayehe eta vámahí ticaijare Armagedón te náechajiririva ena israelítana.

¹⁷ Ema téqueneha ángele nasietenehi máepusaicapa eta mayehe escudilla te anuquehe. Tásiha, nusamapa muraca eta mahu ema Viya tísihahi te trono tayehe eta Templo. Ánipa macahe:

—¡Títauchavapa puiti tamutu! —macahepa.

¹⁸ Tacahe, tíuchucapa eta térameca. Ticaemapa. Tirurecapa. Tiyamuricapa eta apaquehe, muraca eta tayamurisira. Tájina tácuti eta tamuracava nasamasarehini eta acane eta táepaniravahi eta apaquehe. ¹⁹ Te tamutu eta avasareane te juca apaquehe, tíáquiapacavanapa eta pétiana. Tavetijipa eta ichapequene avasare Babilonia. Tíáquiapacavapa tamutu eta pétiana. Mapana eta táejepahi eta apaquehe te tajuhe eta avasare. Taicha ema Viya máechavapa eta naviurevanahi ena tachichanaveana. Máimerecapa éma eta masemanevahi. ¡Tétavicavahi eta tamuracava eta táicuña! ²⁰ Énerichuvare, tamutu eta tíurupuhiana téricapa. Eta cérrroana témitiequenevarepa. ²¹ Témiricavarepa eta ichapequene uverequiana. Tájinavere tácuti eta táichapeva. Cuatro arroba eta tajitacarevavaca. Tásiha, ena achaneana tisemanaichucha, nacajachaichucha ema Viya, taicha tétavicava eta tamuracava eta ecuñaraqui, eta táemirisirahi eta ichape uverequi.

17

Esu esena túhusi téjacahi te tamaiquehe eta apanavare sárare tíñehi

¹ Tásiha, típauchanupa ema émana ángele nasietenehi ena ticaratacanahi eta escudillana. Máichanupa:

—Yare, nímechaviyare eta suícuñayare esu esena túhusi, tavayurevahi eta supecaturana. Ésu, tacunahi eta ichapequene avasare te tachausi eta mar. ² Ena aquenucana te juca apaquehe namutuhi suíturucavaca sucachanevaca éna. Suíchuhavare ena suvarahaqueneanahi suíturucavaca tayehe tamutu eta tájiparacana tamauriqueneana —máichanupa.

³ Tacahe, ema Espíritu Santo tímimahanuhi eta mavarahaqueneana tímechanuya ema ángele. Ema ángele tíámanupa tayehe eta mávapahi apaquehe. Ánaqui nímahapa esu esena téjacahi te táinahu eta táíñehiquene sárare, máchanevahi ema Útsutsure. Titsi eta táimahi. Te táquehe, amairiha eta ajureca táimijarechavahi, tímijachavahi Váyainahini. Siete eta tachutiana. Diez eta tajihuana*. ⁴ Esu suca esena, eta táimahi eta sumuriha mularume étapa eta titsi. Tétavicavahi táurinavavacahi eta suyereruvana, amairiha oro étapa

* 17:3 Te pivarahapuca pecha eta apana, pitanuca eta capítulo 13.1-8.

eta táurinaqueneana márijahichichana, étapa eta tíurinana perla. Tásiha, te suvahu sucaratacahi eta ichape suéresi oro. Tiámahi eta tájiparacana pecatuaana táifemahiqueneana suíchaqueneanahi eta suítaresirahi sutuhusivahi. ⁵ Te suchuti, tatiarihihi eta ajureca eta suíjaruhi, tayumururevachuchasera eta tacayemaquenehi: “Eta ichapequene avasare Babilonia, tacachichapa ena túhusiana. Táquenuyare eta tájiparacana táifemahiqueneana”. ⁶ Nucaicutiarapasera eta suícharacavahi esu esena ticavahahi ésu. Táecavahachahi taicha eta suéirahi eta náitineamaini ena machanerana ema Viya, ena suímica-paruanahi taicha eta náechajisihairahi ema Jesús. Eta nímairahi eta juca, ichaperinehi eta náramesirahi. ⁷ Tacahe, máichanupa ema ángele:

—¿Tájaha tacayema pírameca? Numetacaviyare puiti eta tacayemaquene eta juca pímaquenehi suyehe esu suca esena, étapa eta sárare superahi, eta siétequenehi tachuti, eta diésquenehi tajihuana. ⁸ Eta juca sárare pímaquenehi, tanasiqeneripahineni acane, tájinaipahisera puiti. Tiúchujicayarevaresera tásihaya tayehe eta táupenaquene pusu. Ichape eta náramesirayare eta náimairayare ena achaneana, namutu ena tájinahi eta nalistainahini acane te tépanavainapa eta apaquehe, tayehe eta libro tiana eta nalistana ena náitareruanayare. Tatupiruvayaresera eta sárare tépenayare títaequenénapa.

⁹ “Pisamanuchaha. Puiti numetacaviyare eta tacayemaquenehi eta pímaquenehi, te pivarahapuca picaicutiaraya. Esu esena tacunahi eta ichapequene avasare. Eta juca siétequene tachuti eta sárare tacunahi eta siétequene cerro távihahi eta avasare. ¹⁰ Tacutiquene eta juca siétequene tachuti eta sárare náicutiaranahi ena siétequeneana aquenucana. Cíncoanapasera ena nájinaripa puiti. Matiarhisera ema émana aquenucaichaha puiti. Ema apana vuíchaha títecapahi. Téhesera te máitecapapa ema téquenehayare, vaipa tiyeremahi. ¹¹ Étarichuvare eta sárare táitareruihi acane, tájinaripahisera puiti. Éta, macunahi ema nahóchone ena siétequeneana aquenucana. Te máuchujicapa, majacapa eta návacureana ena siétequeneana aquenucana. Tíjahúchavasera eta máitaviraya.

¹² “Eta pímaquenehi diésquene tajihuana nacunahi ena apamuriana diésqueneana aquenucanayare. Vuíchahasera ticatuparacasiana. Najacapayaresera eta natuparahanaya ena aquenucanaya eta te návasana. Ánipirichusera nacaheyare eta nacachanerayare eta sárare. ¹³ Ena nani diésqueneana aquenucana tinunana eta napanereru. Námicatcaya eta sárare eta aquenucairanahi te návasana. ¹⁴ Tacahe, ena nani nacanarainapa ema Cordero. Váhisera náratahaimahi. Máitahacavacayarehi ema Cordero. Taicha éma, yátupiquenehi Rey, Aquenucahivare. Mavanecahi ena réyeana énapa ena aquenucana. Natiarhiyareva ena macachanequeneanayare éma. Nacanerejiquenehi eta máichuirahi ema Viya. Tásiha, yátupihí eta náehisirahi éma.”

¹⁵⁻¹⁸ Tásiha, máichanuvarepa ema ángele:

—Esu esena túhusi pímaquenehi, tacunahi eta ichapequene avasare. Sucaetemaqueneanahi suítahacavacahi ena aquenucana te tamutu avasareana. Eta jena mar pímaquenehi te tachaui eta suéjasihahi esu túhusiquenehi, tacunahi eta náichapemuriva ena achaneana te tamutu avasareana. Eta diésquenehi tajihuana eta sárare pímaquenehi tacunahi ena diésqueneana aquenucana. Éna, nacatichayare esu túhusi. Téhesera te

táequenepa eta juca, náitaracainapa ésu eta sucayehequeneanaini. Náepachiacainapa. Náquipaicayare tamutu eta supenana. Tásiha, eta náemachayare náijuchainapa te yucu. Eta nacuticacairaya, navaraha náimicatatacema Útsutsure, étapa eta nacamitiequenehaya esu túhusi, vahi tásihahini eta napanereruana éna. Émarichuhi emá Viya tíjaracavacahi eta napanereruana-yarehi, náichirayare eta navarahaquenehi éma —macahepa emá ángele.

18

Eta táquipaisiravahi eta avasare Babilonia

¹ Nímahavarepa emá apana ángele tícupaicapahi másihahi te anuma. Muraca eta matuparahahi. Mamicauchaparinehi eta apaquehe eta majarai-vapahi. ² Téchajicapa muraca, ánipa macahe:

—Tájinapa táipuina táquipairuvainapa eta ichapequene avasare Babilonia. Nájinapa nánasihini nacapenahini ánaqui. Énanecha ticapenanahi ena váinarajiana, étapa eta cáyureana tacajachacarequeneana. ³ Muracaqueneya eta táicuña taicha namutu ena achaneana te avasareana, tétavicavahi eta tavayuasiravacahi eta túhusicare, étanecha nacasamurehi. Énaripa ena aque-nucana, énerichuhivare nacahehi éna táemesiavahi. Énerichuvare, ena tíjararecarahiana eta tétacare, tétavicavaipahi eta náurisirahi tarriochavacaipahi eta tímitahacavacayare ena apamuriana —macahepa.

⁴ Nusamavarepa te anuma eta mahu emá apana ángele. Ánipa máichanu:

—Eti machaneranahi emá Viya, vahi ecuehica eta napecaturana ena achaneana te juca avasare. Íuchucavesera, machu tavehahe eta táíñehiquene táicuñayare taicha eta napecaturana. ⁵ Taicha tétavicavapa eta táuruquechiravahi eta napecaturana. ¡Ániquehepa! ¡Ema Viya máimarracahi tamutu eta tamaeperajivanahi! ⁶ ¡Puiti eti nuchamuriana ángeleana, ícuñacayare! ¡Íjaracayare muraca eta táitsivayare taicha tavayuaca náichahi eta tamauriqueneana ena tachichanaveana eta juca avasare! Cape juca náimicatajivachavacahi ena páureana. Puiti, ichapepanayareva eta íjarasiraya eta nátajivaya. ⁷ ¡Émecharecayare muraca! Ichapena eta nacatajivaira taicha tétavicava eta nájarasiravahi eta nacaetemaraivahi eta napanereruhi: “Tájina níchiravainahini eta návihahi. Núti néchahi. Tájina nácamunuimahi. Vahi nucatajivahini” tacahehi eta napanereruanahi. ⁸ Eta juca napanereruhi naviurevana eta táijahúchirainapa eta náicuñayare. Técuhanainapa ena tachichanaveanahi eta juca avasare. Ticatisamurevanainapa. Tíjuyare eta napenana, táimijuchavacainapa éna. Tépenaracanainapa namutu. Máijahúchahi máicuñacavaca emá Viya, máemereuchirahi eta tamutuirahi marataha —máichanupa emá ángele.

⁹ Natiarihivare ena aquenucana te avasareana, ena tavayuaruanahi eta túhusicare, táimiaquijiararuana eta tavayuasiravacahi. Éna, te náimahapa tipusisicapa eta yucu, tíyahanainapa ticatiequenehavanainapa. ¹⁰ Nayererequinainapa eta náimarrasirayare táichavenéni eta napisirayare eta yucu táicuñayare eta avasare. Tásiha, nacahenapa:

—Páurevisami, piti ichapequene avasare Babilonia. Tíchechupaiti eta táijahúchiravapa eta pícuña —nacahepa.

¹¹ Énaripa ena comerciánteana tíjararecarahiana eta tájiparacana te avasareana, tíyahanayareva ticatisamurevanaya eta náimairayarehi eta táitavirapa

eta avasare. Taicha nájinainapa tiviyechaimahi eta námaqueneasana: ¹² oro, plata, táurinaqueneana márijahichichana, perla, yerécava táurinaqueneana, seda, apaimamajiqueneana mularumeana, títsimeana; énerichuvare eta náepiyaruana tijapu íápe ticaijare marfil, yucuqui táurinaquene, bronce, fierro, étapa eta mari ticaijare mármol. ¹³ Étaripa eta canela, eta apana tájiyequeneana táhiana yucuqui nasucureana, eta tátuyucuqui inciensosare, tíjiyequeneana brillantina, perfumeana. Étaripa eta téracareana, eta acéiteana, eta harina te trigo. Étaripa eta sárareana ticavanaracarevaca, eta vuyie, cavayu, burro, énerichuvare eta tinicacareana uvesa, vaca. Étaripa eta carro. Énaripa ena achaneana ticamusuracareana náijarareruanayarehi.

¹⁴ Tiápechavavarepa téchajica ema ángele, ánipa maicha eta avasare:

—¡Jéhesare pítítataji! Títavapa puiti eta picayeheraini eta táurinisiqueneana tinicacareana, tétavicavainehi eta tavayuasiravihi. Énerichuvare títavavarepa eta picayehvaini eta tímahacareana táurinaqueneana pipincanillavaini —máichapa.

¹⁵ Énerichuvare ena nani tíjararecarahianaini eta juca tájiparacana ichape-muriqueneana tarricuchaqueneanahi eta avasare, nayererequinaripa eta náimararasirahi eta tacaicuñairayarehi eta avasare. Ticatisamurevanaripahi. Tíyahanaripahi. ¹⁶ Tásiha, nacahepa:

—Páurevisami piti ichapequene avasare. Tétavicavaini eta piúrinavaini. Picutiníhi esu esena eta táurinava eta sumuiríha lino, mularume, titsi eta tayehejaca eta sumuiríha. Eta piyereruva amairíha oro, táurinaqueneana márijahiana, perla. ¹⁷ ¡Puiti, tétavicavapa eta tájahúchiravaípa témitiaca tamutu eta pímahaqueneanainisamihi! —nacahepa.

Énerichuvare, namutu ena comandanteana táquenuanahi eta lancha, énapa ena pasajeroana, énapa ena marineroana, énapa ena ticaemataneanahi tayehe eta lánchana te mar, nanasipa namutu te tiyerehi. ¹⁸⁻¹⁹ Eta náimairahi eta taquijarera eta yucu tájjuirahi eta avasare, típiararecanapa eta nacatiequenehairahi. Tíyahanapa. Nanacahivare eta máteji te nachuti. Tásiha, nacahepa:

—¡Páurevichapucaini! ¡Tamapurují eta juca ichapequeneni avasare! ¡Tájina apainana avasarena tácutihini eta juca ichapequenéni avasare! ¡Títavapa tamutu eta tarricovainehi virrichochiravainihi vimutu viti tímisiapanahi eta táimahaqueneana viyereruasanahi te lánchana tayehe eta juca mar! ¡Puiti tétavicavapa eta tájahúchiravahi eta táemitiequenerahi tamutu! —nacahepa.

²⁰ Tiápechava téchajicapa ema ángele, ánipa macahe:

—¡Iúrisamurecarepa puiti eyehe eti íávihanahi te anuma, étipa eti apóstoleana, étipa eti profetana, emutu eti machaneranahi ema Viya! Taicha máitsiríjequeneharipa puiti ema Viya tamutu eta táemecatajivasirahehi —macahepa.

²¹ Tacahe, tiúchujicapa ema émana ángele, máetaviure eta mamuracava. Manaracuhapa eta ichapequene mari ticheyaramé. Máquijicapa te une. Tásiha, macahepa:

—Tacaheyare eta tamuracavaya eta náquipaisiraya eta ichapequene avasare Babilonia. Tájnapa tímiapecháimahi náimahahini. ²²⁻²³ Tamutu

timatina eta te távinenihi. Tájinapa tímiapecháimahi tacasamahuhini eta irimaraquiana te cáleana eta nacapununeraini eta guitarrana, sivivire, nacajane, étapa eta nachujana. Nájinavarepa ena ticachujarahianaini. Váipavare ticasamahuimahi eta piéstana ena araimarahiana. Nájinainavarepa ena ticaemataneanaini eta tunicacareana. Títavainapa tamutu eta ematane-canaini. Étaripa eta tamicahuana, tamutupa témitiequenehana. Tamapurujiva eta náiturequenehainihi ichape ena comerciánteana, náijarareca eta tasimutuqueneana. Tamapurujivarepa eta tavayuasiravaca eta apamuriana avasareana téhicanahi éta, taicha puiti nájina ticatajicaimahi eta ichapeni avasare. ²⁴ Eta júcatataji avasare, ticaviurevahi eta nacapasiravacahi namutu ena machaneraini ema Viya te juca apaquehe, énaripa ena profetanaini —macahepa.

19

¹ Te táequenepa eta juca, nusamavarepa eta nahu ena camuriqueneana achaneana tayehe eta anuma. Muraca eta najiraira. Ánipa nacahe:

“¡Aleluyapa puiti!

¡Tétavicavahi eta vicunachiravihi piti Tata!

Eta picatiuchirahavihi, pímerecahieta nacapasiravacahi nam eta pítupajijiasiravahi.

² Taicha títauchavapa eta náicuñahi ena ticaviurevana, vahi pémetaviacavacahini eta náemecharahiana ena túhusiqueneana tachichanaveanainihi eta avasare.

Ichape eta navayuareresirainihi ena achaneana te apanana avasareana eta túhusicare.

Puiti pítipa pítsirijiequenehahi eta nacapasirahavihi viti machaneraini”.

³ Tiápechavanavarepa tijirana:

“¡Aleluyapa puiti, taicha acanevacainapa eta tacaicuñairahi eta juca avasare-tataji!” nacahepa.

⁴ Tásiha, ena véinticuatroqueneana víyarahana tuparairucana énapa ena cuátroqueneana ecutiarareana tépuyumurihanapa te mamirahu ema Viya, ema téjacahi te trono. Natsiucapa eta nacunachirahi. Ánipa nacahe:

—¡Amén! ¡Aleluya!

⁵ Tásiha, nusamavarepa eta mahu ema téchajicahi tayehe eta trono. Macahepa:

—Puiti etsiucayarepa ema Viya, emutu eti machanerana, étipa eti amape-ruana epicaurahiana mayehe —máichapa.

Eta táurinaquene mapiestara ema Cordero

⁶ Nusamavarepa eta nahu ena camuriqueneana achaneana. Tijajacanahi. Tétavicavahi eta tamuracavahi eta najirairahi. Ánipa nacahehi:

“¡Aleluyapa puiti!

Taicha téjacaipa te mávacure ema Viáquenu, tinacuchavapa eta émairapa técha tamutu éma.

Taicha tétavicava eta máitupajijiasirava, tamutuquenehi máituruequeneha.

⁷ ¡Vámutu vicunacha éma!

¡Tétavicava eta viúrisamurevapa puiti!

Taicha títauchavapa puiti eta macurujisirahavipa ema Cordero, tímicutijiricavahi te araimamuhu.

⁸ Viti véhicanaahi ema Cordero, tétavicavahi eta vipachinavaipahi maicha, tacutihi súcani araimayare ticaetupirihpa, sucamuirihahivare eta táurinaquene múiriare lino, tijapu tirapepemeca” nacahepa.

(Eta juca lino, táicutiarahi eta táurivahi eta víchaqueneana viti véhicanaahi ema Viya.)

⁹ Tacahe, máichanupa ema ángele:

—Piájuchayare eta juca: Tétavicavapa eta náuricacareva nácani nacaichuha-siqueneanahi tayehe eta táurinaquene mapiestara ema Cordero.

Tásiha, máichanuvarepa:

—Eta juca nímechaquenéviana, yátupiqueneanahi máechajirivanahi ema Viya —máichapa.

¹⁰ Tacahe, népuyucapa te máivapechacaya ema ángele. Nuvarahapa nutsuicayarehini. Émasera máichanupa:

—Péchepecachucha. Vahi picutsiucanu. Taicha nútirichuhi picutiq-nenuhi mavanaranuhi ema Viya, énapa ena pichamurianahi títauchanahi eta mavanairipiana ema Jesús. Ema Viya, éma tatuparacavihi pitsuicayare. Taicha étirichuhi vicutiqeneana eta vicametarairuira eta máechajiriruva ema Jesús —máichanupa.

Éma Jesús, macaperahi eta tijapu cavayu

¹¹⁻¹³ Tacahe, nímahavarepa eta anuma téjiacahi. Tiúchucapa eta cavayu tijapu. Eta máijare “Tímimatirahi me Viya”^{*} ema ticaperapahi éta. Éma, yátupiquene títaurahi; taicha éma, tatupiruva eta mahaquenucavahi. Éma, macatiuchavacahi ena náuriqueneanahi. Énaserá ena tíchanahi eta tamauriqueneana, muraca eta máicuñasiravacahi. Éta pa eta macanarairavacahi ena mánarana, vahi macapacavacaimahi ena tájina naviurevaina. Énaserá ena nacaviurevanahi, máitaequenehavacayare. Eta tacahe, eta mamuiriha ticaepapamehi te iti. Eta máuquihana tímuruhevaca tacutiyaereni eta yucu. Te machuti ticayehehi eta camuriquene coronana. Tatiaríhivare eta ajureca tíamahi eta apana máijare. Macarichusera ema téchahi eta tacayemaquenehi eta ajureca. ¹⁴ Náehicapahi ena mayeheana ejército, tíásihanahi te anuma. Namutu ticaperavaca eta cavayu tijapu. ^{*} Eta namuirihana, amairiha eta táurinaquene líno tijapu. ¹⁵ Te majaca ema tínapucapahi, tiúchucapa tavasi-mahiyaréni eta tacasiriquene espada eta macapasihayare ena mánarana. Macaratacahi eta matsucurupa fiérroqui eta macarujisiravacaya. Mácatayayajicavacayare ena mánarana tacutiyaere eta nácatayayajisirahi eta uva eta nacuchusirahi eta tachi táitivequenehi. Éta tímereuchayarehi eta tamuracavayare eta náicuñaya, taicha tétavicavahi eta náimiyusemasirahi ema Viya ema máitupajijihacuenehi, máituruequenehavare tamutu. ¹⁶ Tatiaríhivare eta ajureca te tacheyarapi eta mayehe capote tépacuchahi eta mapaheana. Eta táechajiriruva eta ajureca, ani tacahehi: “Éma yátupiquenehi Rey, Aquenucahivare. Mavanecahi ena réyeana énapa ena aquenucana”.

¹⁷ Nímahavarepa ema ángele titupihahi te tamirahu eta sache. Mapiaracavaca eta cáyureana tíararairicaráhiana te anuquehe. Ánipa macahe:

—¡Yare, emutu eti cáyureana, iúrujicava! Enicayare eta táurinisiquene tinicacare máeniruheyaere ema Viya. ¹⁸ Enicayare eta náecheanaini ena aquenucanaini comandanteanaini, ena ajairanaini tímijachavana túmeana, énapa

* **19:11-13** Te pivarahapuca pecha eta apana, pitanuca eta Juan 1.1-8.

ena nayeheanaini ejército nasuntaruranainipahi, étapa eta táeche eta cavayu naperanaini. ¡Vénicaheyare namutu éna! —macahepa.

¹⁹⁻²⁰ Tacahe, nímahavarepa ema Útsutsure, énapa ena apamuriana majupahana aquenucana te avasareana, énapa ena nayeheana ejércitoana. Matiarihivarehi ema Falso Profeta, ema tímerecaparacainihi eta tiáramicareana, mavayuarauquianahi nayehe ena achaneana eta náisapiravayarehi ticamarcana, natsiusirayarehiva eta máimahi ema Útsutsure. Tacahe, namutu ena náurujiruvanahi ticanaranahi ema ticaperahi eta cavayu tijapu énapa ena téhicanahi mayeheanapahi ejército. Tacahe, ena ángeleana nacaratacapa ema Útsutsure, émapa ema Falso Profeta. Tásiha, ena apinana náitareruichaha náepujuquichapa tayehe eta táijurequene yucu táetiraraisina eta tamuruira. Éta nacaicuñaiyahi. ²¹ Tásiha, ema ticaperahi eta cavayu tijapu, máijahúchapa macapapajicavaca ena suntaruana mánaranahi. Eta macaparaqui eta tacasiriquene espada táuchurehi te majaca. Tásiha, járajapapa eta camuriquene cáyureana, tanicapa eta náecheanaini. Tisatuhevaca.

20

Eta táichavaquenevaya eta mil año

¹ Nímahavarepa ema émana ángele másihapahi eta te anuma. Mámaphi eta ichapepi cadena, étapa eta llave, tacaerataiyayare eta táupenaquene pusu.

² Tacahe, ema ángele macaratacapa eta táíñehiquene Serpiente, eta ticaetemarerechahi acane, émarichuhi ema Váinaraji Satanás. Tacahe, ticaitihapa ema Satanás tayehe eta ichapepi cadena. Mil año yare eta macaitihairayare.

³ Tacahe, ema ángele máiyaracuhapa éma eta te mávacu pusu táupenaquenehi. Manacapa eta llave, máerataequenehapa. Manacavarepa eta ajureca, ánipa tacahe: “Machu évejiaca eta juca tapaja”. Tayerevayare eta mil año, vahi ticaetemarecainahi nayehe ena achaneana. Te táequenepasera eta mil año, tiúchujicainavarepa eta ticaetemarecainavarepa, ánipinesera.

⁴⁻⁵ Tacahe, nímahapa ena achaneana náechepureanahi nacaparuanainihi. Éna, táimicaparuanahi eta náehisirahi ema Jesús, étaripa eta nacametarairuirahi eta máechajiriruva ema Viya. Ena nani, vahi náepuyumirauchahini ema Útsutsure, váhivare natsiucahini eta máimahi nasiñarajihini ena apamuriana achaneana, váhivare návarahahini nacamarcahini eta te nanahu étapa te navahu. Ena nani, ena náinapurehi téchepucana te tamirahuichaha eta mil año. Nímahapa eta náejasiraipa te trono, catuparahanapa éna, juéseanaripa. Mil año eta nacatuparahairayare. Énasera ena apamuriana náepenaqueneanapa masupajirairahanainihi, vuíchaha téchepucanaimahi. Tiámainucava te táequenénapa eta mil año, napaenumavainapa téchepucanayare. ⁶ ¡Tiúricacareanayare ena nani tiápechavanayare títarecana puiti juca! Masantuchainapa ema Viya. Vaipa tiápechavanaimahi tépenana. Vaipa ticaicuñanaimahi eta te táijurequene yucu. Tiyujaracarahianaya mayehe ema Viya, étapa me Cristo. Aquenucarahanayare, taicha ema Cristo máijaracainapa eta natuparahanayare. Mil año eta nacatuparahairayare.

⁷ Tásiha, te táequenénapa eta mil año, tiúchucainavarepa ema Satanás tayehe eta macaerataiyahi. ⁸ Tépanavainavarepa ticaetemarecayare nayehe ena achaneana te tamutu avasareana. Étaripa eta apinaquene avasare ticajare Gog étapa eta Magog, macaetemareshayare. Mayurucavacainapa eta nacatianasiraya ema Viya. Tásiha, ticurujicainainapa ena nayeheana

ejércitoana. Tétavicavainapa eta nasimutuvayare. Vaipa titupachacareana eta nasimutuvahi. ⁹ Tacahe, tiyananapa. Ichapecuequeanapaine eta nayanine, taicha eta nasimutuvahi. Nacapayacayarehi eta nachayasirayare eta avasare máemunaruinihi ema Viya, návihahi ena machanerana. Émasera ema Viya, enevanepa máitaequenehavacahi. Tiúcupaicapa eta yucu tiásiha te anuma, táijuchavaca namutu. Nájina tacaemachaquenéna. ¹⁰ Tásiha, ema Satanás ema tivayuaerecainihi, nacaratacapa náepujuquichapa tayehe eta táijurequene yucu, táetiraraisina eta tamuruira. Étaripa eta mávihahi ema Útsutsure, émapa ema Falso Profeta. Tájina nanarasiraimahi. Tamutu sácheana, yátiana eta nacatajivairaya, máichecuaraquireya.

Étapa tiámahaviyare eta víchaqueneanahi vicevatainapa tayehe eta viáviyahare

¹¹ Nímahavarepa eta ichapequene trono tijapu. Téjacahi ema Viya tayehe. Tétavicavahi eta máramicarevahi. Eta nímararasirahi éma, némitiacapa. Vaipa necha távihapuca návihahi téhepuca anuma, téhepuca apaquehe. ¹²⁻¹³ Nímahavarepa namutu ena náepenaqueneanaini: ena amaperuana, énapa ena ichanaruana, énapa ena ichavicana. Taicha tichavanahi eta náchanevana namutu, téhepupujicanahi éna tayehe jácani náepenineanainipahi. Namutu titupihanahi te mamirahu ema Viya téjacahi te trono. Tásiha, tatiaríhi eta libro tiama eta nalistana ena náitareruanaya. Tatiaríhivare eta apamuriana libro tacajuiyahi eta náichavaquenevanahi ena achaneana. Ena ángeleana náechajicuhapahi. Nácani náichahi eta tauriqueneana, etapa tiviuchahi eta nacayaseserehirayarehi, nacaicuñairayare. Te tivayuchapuca eta napecaturana, muraca eta náicuñayare. ¹⁴⁻¹⁵ Eta nacaicuñaiyahi eta táijurequene yucu, táetiraraisina eta tamuruira. Namutu ena tájinahi eta náijarénahíni tayehe eta libro tiama eta nalista ena náitareruanayare, náepujuquichapa tayehe eta táijurequene yucu, tamutu eta náqueheana etapa eta náchanevana. Máitavacacainapa eta nacatajivairayare. Máitujianainapa tayehe.

21

Ticasipainapa eta anuma etapa eta apaquehe

¹ Nímahavarepa eta tacasipairaripahi, tamuturipahi arairu eta anuma etapa eta apaquehe. Tájina eta ichapequene une mar. ² Tásiha, nímahavarepa núti tiúcupaica eta tiúrina avasare. Ticaijarehi Arairu Jerusalén. Tétavicavahi eta tasantuva, taicha tásihapahi te anuma te mávihahi ema Viya. Tiúrinapahi eta tacaetupiríhírahí, tacutihi te ticaetupiríhi esu araimayare. ³ Nusamavarepa muraca eta mahu ema ángele, tiásihahi te anuma. Ánipa macahe:

—Púiti, ema Viya macucupaicapa eta mapena te juca apaquehe. Ánina macavasaya. Tiávahácahénapa eti achaneana. Yátupiquenénapa Ecaiyaqueneya éma. ⁴ Tacahe, ema Viya macamitiasinaheyare eta íyairana. Váipavare épenaimahi. Váipavare ecatisamurevaimahi. Tájina ticaiyacahémahi. Váipavare ecatajivaimahi taicha tájinapa tiviuchahémahi —macahepa ema ángele.

⁵ Tacahe, nusamavarepa eta mahu ema Viya ánipa macahe:

—Púiti tépanavapa arairu, tamutupa ticaitsiva nicha núti —macahepa.

Tásiha, máichanuvarepa ema ángele:

—Piájuchayare púiti eta juca, taicha yátupiqueneya eta táicharacavaya. Tamutuyare titauchava. Jéhevale eta tisuapacareana —máichanupa.

⁶ Ánivarepa macahe ema Viya:

—Títauchavapa puiti tamutu eta nupanereruana. Nútira néchahi tamutu eta táepaniravahi eta apaquehe. Nútirichuvare néchahi eta táimyaniravahi tiuri. Puiti núti nítauchapa tamutu. Eti emaunehi, núti níjaracaheyare eta máitavacaca une ticaitarecarahi. Tájina vahi evacharecaimahi. ⁷ Tacutiquene, eti camichanahi, ímianavahi eta éhisiranuhi, níjaracaheyare tamutu eta júcana ícuchianayarehi. Núti ecaiyaqueneya, taicha nuchichaheyare éti. Núti néchaheya éti. ⁸ Ticaicuñanayaresera namutu ena tipiturijiana, ena masuapajirairahana, ena máeperajiana, ena ticapahiana, ena túhusiana, ena íápemareana, ena ticasíñarajiana eta achanemirana, énapa ena tépiyahirahiana. Ticaquijianayare namutu éna tayehe eta náicuchi táijurequene yucu máitavacaca eta tamuruira, táetiraraisina eta tamuruira. Váhiquene tiúchucanaimahi tayehe —macahepa.

Eta arairu avasare Jerusalén

⁹ Tacahe, tipauchanupa ema émana ángele nasietenehi ena ticaratacanahi eta siétequene escudilla tiámapahi eta siétequene ecuñaraquiana táíñehiqueneana. Tásiha, máichanupa:

—Yare. Nímechaviyare eta avasare, návihahi ena machanerana ema Cordero. Tímicutijiricavahi esu araima sucaetupirihiquenehi eta suítauchiravayare —máichanupa.

¹⁰ Tásiha, ema Espíritu Santo tímimahanuhi eta mavarahaquene tímechanuya ema ángele. Ema ángele tiámanupa eta te tápusi eta ichapequene cerro anuquehequene. Tímechanupa eta táucupaisirahi eta avasare Arairu Jerusalén. Tétavicavahi eta tasantuva taicha tásihahi te anuma te mamirahu ema Viya. ¹¹ Eta juca avasare, tétavicavahi eta tajaraivapahi taicha tiámahi eta majaraivahi ema Viya. Eta táimahi eta tajaraivahi tacutiyareni eta tajanunusira eta márijahi tijararacahi. ¹² Te tachachacuana eta avasare, tatiarihi eta tacuti yúchama tímítutuche. Anuquehe eta táichapeva. Tatiarihi eta dócequene tapajacurana, táviahahi eta ajureca náijare ena dócequeneanaini náchucanaini ena israelítana. Natiarihivare ena ángeleana tayehe eta tapajacurana. ¹³ Tatiarihi mapana tapajacura te tinapaica eta táuchusine eta sache. Mapanavare tapajacura te tinapaica eta cajaha. Mapanavare tapajacura te tinapaica eta vana. Tásiha, eta mapanaquenevare te tinapaica eta tasiapine eta sache.

¹⁴ Te apaquehe eta yúchama, tatiarihi eta doce márimeana táejahameruanahi eta yúchama. Támahi eta dócequene náijareana ena apóstoleana mayeaneanahi ema Cordero.

¹⁵ Ema ángele ema téchajicanuhi macaratacachi eta máicutiriqui úruqui, máicutichihayare eta tapajacurana étape eta yúchamana. ¹⁶ Eta avasare falaru eta táimahi. Eta táunava ticuticacachi eta tajuhe. Dos mil doscientos kilómetro eta táichapeva eta avasare. Ticuticacachi eta táunava, eta tánuqueva, étape eta tajuhe. ¹⁷ Máicutichavare eta yúchama. Sesenta y cuatro metro eta tánuqueva.

¹⁸ Eta yúchama amairiha mari jaspe tímájumeana. Eta avasare amairiha eta yátupiquene oro. Tijanunucachi tacuti eta cristale eta tarahivahi. ¹⁹ Eta márimeana tachunuspévanahi eta yúchama, tatiarihihi eta táurinaqueneana mari. Eta tinapuca tacayehehi eta mari ticaijare jaspe. Eta apana tacayehehi eta ticaijare zafiro. Eta apana tacayehehi eta ticaijare ágata. Eta apana tacayehehi eta ticaijare esmeralda. ²⁰ Eta apana tacayehehi eta ticaijare ónice. Eta apana tacayehehi eta ticaijare cornalina. Eta apana tacayehehi

eta ticaijare crisólito. Eta apana tacayehehi eta ticaijare berilo. Eta apana tacayehehi eta ticaijare topacio. Eta apana tacayehehi eta ticaijare criso-prasa. Eta apana tacayehehi eta ticaijare jacinto. Eta téqueneha tacayehehi eta ticaijare amatista. ²¹ Eta dócequene tapajana tacayehehi eta doce perla. Tayehepachuhi eta tapaja eta étana perla. Eta tina puca calle, tacayehe eta yátupiquene oro, tjanunucahi tacuti eta cristale eta tajarahivahi.

²² Te jena avasare, tájina nímahahini eta Templo nayujarasirarenahini. Tájina tácamunuhini eta nayujarasirareyare taicha matiarihihini ema Viya máitupajijihaguene máituruequenehavare tamutu, émapa ema Cordero. Návaháruhi namutu. ²³ Tacutiquene, vahi tácamunuhini eta sache étaripa eta caje eta tamicauchirainahini eta avasare. Taicha tamicauchahi eta majaraiva ema Viya, émapa ema Cordero. ²⁴⁻²⁶ Tájina támatiyaimahi ticaerata eta tapajana, taicha tájina timapicuina tayehe, tájinavare yátina. Tásiha, namutu ena achaneana te apanana avasareana macuchucureanahi ema Viya, ichape eta napicauchirayare eta Arairu Jerusalén, ichapevare eta nacunachirayare. Tisuapajirahianayarehi tayehe eta vanairipiana tásihagueneanahi eta juca mávasa ema Viya. Énerichuvare ena aquenucana te avasareana, ichape eta námavahuanayare me Viya te jena avasare mávihahi éma.

²⁷ Tájina námatiyaimahi tisiapana ena nachipejiqueneana énaripa ena ticharahiana eta tamaeperajivaqueneana énaripa ena ticaetemarrahiana. Nacarichu tatuparaca tisiapanayare ena tatiarishi eta náijareana tayehe eta libro macarataru ema Cordero, tiama eta nalista ena náitareruanayare.

22

¹ Tásiha, ema ángele tímechanuvarepa eta tapachinaquene cajacure. Tétavica vahi eta tacaitarecaravahi eta tahunera. Tacutiyareni eta cristale eta tajararaesira. Eta táuchusihahi eta mayehe trono ema Viya, émapa ema Cordero. ² Tacahe, tatiarihihini eta yucuquiana, ticaitarecarahi eta tahi. Eta távihahi te enumuhuiyapahi eta tina puca calle, te tachaupahivare eta cajacure. Tásiha, dócehe ticahi te étana año. Cájepachu eta tacahira. Ipurujivare eta tapacaji, tacanaraca ena achaneana te avasareana. ³ Tájinapa tímiapchaimahi tiviuichaimahi ena achaneana ticavasana tayehe eta juca avasare, máejasihahi ema Viya, émapa ema Cordero. Vimutu viti mavanaranahi, máitavacayarehi eta vjírauchirayarehi, vitsiusirayare. ⁴ Vímara-racayare eta mamira tamutu sácheana. Vicamaracayare eta máijare te vinahu. ⁵ Aquenucahaviyare. Máichecuarquireya eta vicatuparahirayare. Ánaqui tájinapa yátina, tájinainapa eta timapicu. Vaipa vicamunuimahi eta tajarai va eta sache. Váhivare vicamunuimahi eta vimícahu. Taicha tamicauchayare eta majaraivahi ema Viya.

Tiánehipa eta máitesirayare ema Jesucristo

⁶ Máichanuvarepa ema ángele:

—Eta juca nímeruvihini, yátupiqueneya eta táchararacavaya. Tamutuyare títauchava. Jéhevare eta tisuapacareana. Taicha émarichuhi ema Viya tivane-canuhi eta nímitusiravi píti. Acane ema Viáquenu máimitucavacahi ena profetana eta mapanereruana. Puiti mavaraha nímechaheyare eti mavaneranahi eta táequenereruhana mapanereruana, tayehe eta táijahúchirainapa eta táichavaquenevaya. ⁷ Énerichuvare ema Viáquenu máichahehi: “Níjahúchavanénapa nútijapa”.

¡Tétavicava eta náuricacarevaya ena tisuapanahi, napanerequenehairahi eta nímechaviqueneanahi, étaripa eta piájurequeneanahi te juca libro! — macahepa ema ángele.

⁸Tétavicava eta náramirahi núti eta nímairahi tamutu eta júcana, nusamirahi nuti Juan. Tásiha, te tamutupa, népuyucapa te máivapeana ema ángele ema tímechanuhi eta juca. Nuvarahapa nutsuicayarehini. ⁹Émasera máichanupa:

—Péhepucachucha. Vahi picutsiucanu. Taicha nútirichuhi picutiquene-nenuhi mavanaranuhi ema Viya, énapa ena pichamurianahi ena ticameta-rairuana eta máechajiriruvana ema Viya, énaripa ena tisuapanahi tamutu eta tacajuqueneanahi te juca libro. Éma tatuparacahi pitsuicayare ema Viya — máichanupa.

¹⁰Énerichuvare máichanuvarepa:

—Vahi picuñaucha. Pimetajirica eta juca pimetacasivanahi eta máechajiriruva ema Viya piájuchaqueneana eta te juca libro, taicha tíánehipa eta táitauchiravayare tamutu eta táichararacavayarehi. ¹¹Énasera, nácani váinarajianahi, vahi picucamesavaca. Náimiyanavachaha naicha eta navainarajiva. Nácani tíchanahi eta tamauriqueneana, náimiyanavachaha naicha eta tamauriqueneanahi. Nácanisera tíchanahi eta táuriqueneana, tatuparacahi náimiyanavachucha naicha eta táuriqueneana. Nácani matapiravareanahi te mamirahu ema Viya, náimiyanavavare náuri eta mayehe — máichanupa.

¹²Ánivare macahe ema Viáquenu:

—Nútijapavenénapa. Námayarepahi eta nájaracasianayrajiva. Nácani tíchanahi eta tamauriqueneana, náare ena ticaemataneacanuanahi eta náitaresirahi te juca apaquehe. Énerichuvare námayarepahivare eta nayeheanayare ena masuapajirairahana. ¹³Nútira néchahi tamutu te tépanavainapa eta apaquehe. Nútirichuvare néchahi eta táimiyaniravahi tiuri. Puiti núti nítauchayare tamutu — macahepa.

¹⁴Tétavicava eta náuricacarevayare nácani tépachinachana eta náchanevana, tacuti te ticasipajihana eta namuirihana. Éna tatuparacahi nanicayarehi eta tahi eta yucuquí ticaitarecarahi. Tatuparacahivare nasiapayare eta Arairu Jerusalén. ¹⁵Énasera ena masuapajirairahanahi vahi títujicavanaimahi tisiapana. Nanasiyare te aneca, énapa ena íápemareana, ena túhusiana, ena tica-pahiana, ena ticasíñarajiana eta achanemirana, énerichuvare ena tíuricanahi tépiyahirahiana ticaetemarrahiana.

¹⁶Macahevare ema Viáquenu:

—Nutí Jesús, nuvanecahi ema nuyehe ángele máimicaecherachayarehi tamutu eta juca numetarapiana puiti eyehe eti nuchanerana te avasareana. Núti, yátupinuhi Reyhi ecuchapaquenehi, mavanerunuhivare ema Tata. Tétavicavahi eta nujaraivahi taicha eta aquenucairanuhi ichape — macahepa.

¹⁷Ema Espíritu Santo énapa ena téhicanahi ema Cordero, tíchuarecana éna:

—Yare, epauchahavi —náichapa.

Énapa nácani tisamanaya eta juca ichuárapi, énerichuvare éna náichuarecavare:

—Yare, epauchahavi —náichapa.

Énapa nácani timauneanayare, náiteca apaesa náera eta une ticaitarerahi. Tájina vahi navacharecaimahi.

¹⁸ Emutu eti esamayare eta juca mametarapiana ema Viya tacajuqueneanahi te juca libro, nuvaraha numetacahe nūti: Nācani navayuyupicayare eta táechajisihaqueneanahi eta juca libro, énerichuvare ema Viya mavayuchinayare eta nacatajivairayare tayehe eta juca ecuñaraqüianayare táechajisihaqueneanahi. ¹⁹ Énerichuvare ecaunehava eta iáñauchira eta táechajisihaqueneanahi te juca libro, machu máñauchahe ema Viya eta esiapira eta juca mávasa sántoquenehi, machu vahi macuenicahe eta tahi eta yucuquiana ticaitarecarahiana, étaripa nímahaqueneanahi nájurequeneana te juca libro.

²⁰ Émarichu ema Viáquenu títametacahi tamutu eta júcana. Énerichuvare máichahehi:

—Yátupi nútijapavaneyare —macahehi.

¡Éheyavapuca, Tata Jesús! ¡Pítecavanepaini! Amén.

²¹ Aní táichecuiya eta juca nájurehi. Nuyaseuchaheparaca emutu éti me Viáquenu Jesucristo, táetaviuchahini eta iúricacarevaya máicha.